


Lologena Wo Kienane
Yesu Kristo Kome
Kewo



The New Testament in the Lewo Language of Epi Island,
Vanuatu

Lologena Wo Kienane Yesu Kristo Kome Kewo
The New Testament in the Lewo Language of Epi Island, Vanuatu
Le Nouveau Testament en Lewo langue de l'île d'Épi au Vanuatu – Niutestamen long Lewo lanwis, blong
Epi Aelan, Vanuatu

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-12-20

PDF generated using Haiola and XeLaTeX on 4 Mar 2019 from source files dated 20 Dec 2018
ee028e1c-7e53-571d-8041-681daaf580e8

Contents

INT	1
Matiu	2
Mak	69
Luk	109
Yoane	181
Yumaena Lala	231
Rom	299
1 Koren	332
2 Koren	361
Kalesia	381
Episas	393
Pilipae	403
Kolosi	411
1 Tesalonaika	419
2 Tesalonaika	426
1 Timote	430
2 Timote	439
Taetas	446
Pilimon	451
Le Yu Lala	454
James	478
1 Pita	486
2 Pita	495
1 Yoane	500
2 Yoane	507
3 Yoane	509
Sut	511
Nakilologianega	514

Preface

This publication is the New Testament in the Lewo language. The 3,500 speakers of Lewo live on the east coast of Epi, an island in the Shefa province of central Vanuatu. It was translated over the years 1982 to 2015 by the Lewo Translation and Literacy Project, which operated under the Epi Council of Chiefs and the churches on the island. The translators were Kapiapo Melio, Andrew Avio, and John Sethy. The translation advisor and editor was Robert Early. Numerous Lewo speakers assisted as committee members and reviewers, and the support provided by many overseas donors is acknowledged.

Visena Pesa

Visena lala e Naviranarena Viyu naga molue susumo kome visena na Krik. Siraunia, apilopu pim kome visena taḗena la moki talivi viora e yomerava. Mis lala naḗa apim Vanuatu asiar navilopuena kome kieta visena.

Mis Graham Horwell amio elta laḗas apilopu tusi laḗas sumo, ana pe punu re poli. Asiar si na siriena kome Lewo e 1982 pog naḗa Maltarwo Robert Early myuḗae amio Elta Kapiapo Melio sumo, ḗisna Andrew Avio mila towe yuḗaena, ḗisna John Sethy naga ḗmena mila yuḗaena nawuloveveena namaro.

Yuḗaena nene pa ḗnaga tol kasi nini 2016 naḗa yuḗaena keviu pimi ḗisi, ana tusi kiena ne Ntewa pimi pani yeririna lala naḗa apisin visena na Lewo. Potena keviyu pan ita punuga nae Epi, sane suḗe lala, suḗare lala, la naḗa akoan kilavaru a la naḗa amila yuḗaena sane asike loyuḗa e komiti na vilopuen visena pona amiyuḗae sane yaru na vilopuen visena, pona lala na wuloveveena visena.

Po pon telavia sane pe nalaena wo tanea naḗa Ntewa na mava mla pan ita, ve teligan lua re, ana teuloia, tesuḗalu ea, telelaga ea naḗa naga pisawali ke Suḗe Yesu pan ita, vena ilaen kieta maliena lala e yomarava nini, a e ḗmena e legiena maro.

Nono naḗa teke ea kulus nen tusi wa naga kinas sanini

Tusi Wa ḗmeke e wosnen klavaru ana kapi tego ke ea.

Klavaru – toutouena na suḗalu ḗmareraena ve kulul re pogos tai

Tusi Wa – Visena kiena ne Ntewa

Kapi – Ninuna ne Ntewa tego li yo punuga

Lologena Wo Kiena Ne
 Yesu Kristo Naþa
MATIU
 Siriyuia
 Visayuena Na Tusi Nene

Komþasnen suniena plas na tusi nini

Tusi nini, “Lologena Wo Kiena Ne Yesu Kristo Naþa Matiu Siriyuia”, naga pisawal lologena wo sape Yesu, naga yaru naþa Ntewa pisaar pa kiena yeririna la nanua sumo rui sape yoko naga imi vena tamalia la. A e Yesu, navisaarena la naþa Ntewa pisaar pa kiena yeririna lala e Tusi Þesa ana pimi malivi narui. Yesu paeme e yo kiena lus nae Israel lala, a kiena lologena wo nene, naga pe kiela re ga poli, naga pe kiena yeririna punuga na yomarava nini.

Matiu mligan ruru komþasnen tusi la nene sunaga sanene. Naga pisayu þesania, naþa Yesu paeme, a naga pisayu menaga naþa Yoane kea, a naþa Yermare kilalia. A siraunia, naga pisayu naþa Yesu siari kiena yunaena e yo naþa Kalele suna pisawal ke lologena wo pa yaru lala, pian la, a kila ruru kiela inanena lala. Siraun nene, naga pisayu mena naþa Yesu pa ma Yerusalem, amio suri la naþa Yesu kila maron e kiena legiena na olua maro. A naga pisayu maron naþa Yesu mare, a yoko mal sina.

Matiu pisayu naþa Yesu naga pe navianiena tai naþa po taulu navianiena taþena lala a nanareraena na visawalen kinasnen navisaluaena kiena Ntewa sike e naga, a pisayu þelaga naþa Ntewa pimi pe Þarin Suþe kiena ne kiena yeririna lala.

Suri la moki naþa Yesu pian la ea, Matiu miliþere kompas lima, sanene:

Yesu pian kiena yeririna lala metava e kunusa. E kiena vianiena nena, naga pisawal þelaga naþa yaru la monar akila, vena aimi naþa Ntewa ve kiela Þarin Suþe. A naga pisawal kiela yunaena lala, ana taman pan la vena ayunaenia, a pisayu sur la naþa yoko atolia e luwasnen kiela maliena e yomarava viu naþa Ntewa imi ve Þarin Suþenia. Kiena vianena la nene sike e marana na keviu lima vito tol marana na keviu olua.

Yesu pian kiena yeririna lualima taaga pa lua. A mila mareraena pan la vena ava avisawal kiena lologena wo va yaru taþena lala. Navianena la nene sike e marana na keviu lualima.

Þakaiwa la naþa Yesu pisa vena visayuen yaru la naþa Ntewa pe kiela Þarin Suþe, e yomarava viu naþa yoko ava asike ea. Þakaiwa la nene sike e marana na keviu lualima taaga pa telu.

Yesu pian kiena yeririna lala e þelaga naþa yaru monar kila vena tavevea. Navianena la nene sike e marana nakeviu lualima taaga pa orelu.

Yesu pian kiena yeririna lala, pisayu suri la naþa yoko imi malivi e legiena maro, a e yomarava viu naþa Ntewa ve Þarin Suþenia. Navianena la nene sike e marana na keviu lualima lua pa vari a lualima lua pa lima.

Komþasnen tus la nini

Repinane Yesu lala a Yesu paeme 1:1—2:23

Yunaena kiena Yoane Nakeena 3:1-12

Yoane kee Yesu, a Yermare taþalia 3:13—4:11

Yesu kila kiena yunaena e lepas naþa Kalele 4:12—18:35

Yesu moluwe Kalele pa ma Yerusalem 19:1—20:34

Legiena na maro kiena Yesu naþa kila kiena yunaena garu Yerusalem a yo la naþa lavisin ga Yerusalem 21:1—27:66

Yesu mal sina a kiena nalogena lala apisu naga 28:1-20

*Repina ne Yesu lala**Luk 3:23-38*

¹ Yesu Kristo naga molue kome lus na yermarua keviu lalua kiena ne repina ne le Yu lala, nane Epraam naga sumo, amio Tepet naña naga sirau. Repina ne Yesu la punu ga, la kiela kia sanini:

² Epraam naga narina naña Aisak.

Aisak naga narina naña Sekop.

Sekop naga narina naña Suta, amio wenla tañena lala.

³ Suta naga narina lua, Peres amio wenla Saera, naña lalua na ape kaora, naña lalua na anela naña Taña.

Peres naga narina naña Ebron.

Ebron naga narina naña Ram.

⁴ Ram naga narina naña Aminatap.

Aminatap naga narina naña Nason.

Nason naga narina naña Salom.

⁵ Salom naga narina naña Poas, a Poas nene naña naga anena Reap.

Poas naga narina naña Opet, a Opet nene naña naga anena Rut.

Opet naga narina naña Sese.

⁶ Sese naga narina naña Tepet, a Tepet nene naña naga pe ãarin suñe kiena ne le Israel lala.

Tepet naga narina naña Solomon, a Solomon nene naña anena, naga wona ne Uraea na sumo.

⁷ Solomon naga narina naña Reopoam.

Reopoam naga narina naña Apia.

Apia naga narina naña Asa.

⁸ Asa naga narina naña Seosepat.

Seosepat naga narina naña Soram.

Soram naga narina naña Usaea.

⁹ Usaea naga narina naña Sotam.

Sotam naga narina naña Eas.

Eas naga narina naña Isakaea.

¹⁰ Isakaea naga narina naña Manasa.

Manasa naga narina naña Amon.

Amon naga narina naña Sosaea.

¹¹ Sosaea naga narina naña Sekonaea, amio wenla lala. Ana e pogos kiena ne la nene narui, yaru lala na purvanua tañena naña Ñapilon apanon añure plan le Israel lala ava ayuñae korena garu Ñapilon.

¹² Sekonaea naga narina naña Seltiel, nane pogos naña le Israel lala amiyuñae korena ke garu Ñapilon wa.

Seltiel naga narina naña Seruñapel.

¹³ Seruñapel naga narina naña Apiut.

Apiut naga narina naña Eliakim.

Eliakim naga narina naña Aso.

¹⁴ Aso naga narina naña Satok.

Satok naga narina naña Akim.

Akim naga narina naña Eliut.

¹⁵ Eliut naga narina naña Eliesa.

Eliesa naga narina naña Matan.

Matan naga narina naña Sekop.

¹⁶ Sekop naga narina naña Yosop, naña wona ne Maria. Maria nene, naga anenane Yesu, naña apisape naga pe Navisaarena.

¹⁷ Siar e Epraam, teras lelei lala pimi tol Tepet, teras la nene tol lualima taaga pa vari. A siar e Tepet pimi tol pogos naña le Ñapilon lala añure plan le Israel lala avanon ayuñae

korena garu Ĥapilon, teras lelei lala tol mēna ga lualima taaga pa vari, a siar e pogos naġa la asike garu Ĥapilon, pimi tol Kristo, teras lelei lala tol ke sina ga lualima taaga pa vari.

Yesu paeme

Luk 2:1-7

¹⁸ Suniena nini kiena ne Yesu Kristo, naġa naga paeme sanape, naga sanini: naga anena, sira naġa Maria, naġa la apisaaria sumo asape yokorena talopa amio yaru tai, kiena kia Yosop. Ana pogos naġa lalua pe atalopa re poli wa, Maria naga mlogekilale naġa naga mēġena, na pimi kome Ninuna Wa. ¹⁹ A Yosop naġa la apisaaria apisape yokorena naga talopa amio Maria nene, naga pe yaru wo tai, a naga pe pisa re pisape Maria naga kila suri tai piowa poli. Ana naga pisu sane ġisi na lalua na monar akilaro kiela navisaarena nene, ana naga sitom ke pisape kila ga e ġelaga tai naġa malumu ga, vanon naġa naga yepen mavin kilaen Maria memawa manenea vanon suri nene. ²⁰ A pogos naġa naga sitom ke sape kila sanene, naga mēnia, pisu navisi tai kiena ne Ntewa m̄alivin naga, ana navisi nene pisa pania, pisape “Yosop, ko lus kiena ne Tepet, ko na ve ologe re viowagan naġa oure Maria ve woġa, vanon sisi naġa teke e naga, naga pimi ga kome Ninuna Wa. ²¹ Yokorena Maria war narina yerġene, a monar osikia kiena kia Yesu Natamaliaena, vanon yokorena naga warplan mlamulena viowa lala vetan kiena yeririna lala.”

²² Ana suri la nene pimi kakate sanene, vena kila visena kiena ne Ntewa tai vim ve lelaga, sa naġa Navisawalena Aisea naga pisawal sumo, ²³ naġa naga pisape “Yokorena sira mēe tai naġa yerġene pe pisu re poli wa, naga mēġena, ġisi na war narina tai ve yerġene, ana ġisi na asikia kiena kia ve ‘Emanuel.’ ”

Ais 7:14

Kia naġa “Emanuel” naga kana kinas sane “Ntewa sike amio ita.”

²⁴ Pogos naġa Yosop tavilo sina, kila sa naġa navisi kiena ne Ntewa pisa pania, ana naga talopa amio Maria, ġere pe wona. ²⁵ Ana pe pa pisu re Maria tol pogos naġa Maria ġarlua narina nene. A pogos naġa Maria ġarlua sisi nene, ana Yosop sikia kiena kia “Yesu.”

2

Yaru la naġa akilia ruru ġelaga kiena ne verue lala apimin asape avisu Yesu

¹ Yesu naga paeme e pulkumali tai, kiena kia Petleem, lepas nae Yutea. E pogos naġa Yesu paeme, Erot naga pe ġarin suġe kiena ne le Yu ke lala. A siraunia, pe piavi re nena poli, ana yaru la ġasia naġa la akilia ruru ġelaga kiena ne verue la po paġisi, apimi atol garu Yerusalem. Susumo la nene amolue e kiela purvanua, e lepas naġa mrae molue ke komea, ana apimi. ² Ana la apiun tan yaru lala, asape “?Sisi naġa paeme mare ga na wa, naġa asape ġisi na naga vim ve ġarin suġe kiena ne le Yu lala, naga mēke pe? Imimi moġal kiena verue rui, molue ke e yo naġa mrae molue ea, ana imimi mepimin ke mesape meieluar naga.”

³ Ana pogos naġa Ĥarin Suġe Erot tol visena la nene, amio yaru taġena laġasia nae Yerusalem, amloge, ana la pe akekan re nena ga. ⁴ Ana Erot pio yerġawa kiena ne yaru wa lala amio navianena navisaluaena lala apimi apisuia, ana naga piun tan la, pisape “? Navisaarena naġa apisape ġisi na naga imi, la apisa ke asape ġisi na naga vaeme pe?”

⁵ La naġani apisataġnea, asape “Yokorena Navisaarena naga vaeme garu lepas nae Yutea, e pulkumali naġa Petleem. ⁶ Nanene vanon naġa sumo na, navisawalena tai siriyuia, pisape

‘Ntewa naga pisa sanini, pisape

‘Amiu nae kumali naġa Petleem, amiu taġatete avisavenua,

yerġawa taġena nae Yutea lala, la atola metavan amiu, ana amiu na ato ga tano, peraga,

vanon yokorena nasumonena keviu tai molue nenaga kom pun amiu,

ana naga visuar ruru kiau yeririna lala nae Israel.’ ”

Maika 5:2

⁷ Ĥisi na Ĥarin Suġe Erot naga pio vinaun ga yaru na kilia ruruen ġelaga kiena ne verue la nene, vena aimi avis ga amio naga taaga, vena naga loge ruru tan la, pisape la apisu

verue naḡani kate na pogwai. ⁸ Ana naga pisa pan la, pisape “Amiu na monar ava akale sisi nene vano-o alualia, ana awasuḡe si aimi avisawal van inu, vena inu mēna ga nevano neieluar naga,” ana naga mligan la apa garu Petleem. Ana kiena visena nene naḡa naga pisa ana pisokan ga, naga sinenan pisape visae lual sisi tomtom nene, ana weḡmaria.

⁹⁻¹⁰ Ana yaru la nene la amloge visena kiena ne ḡarin suḡe nene ḡisi, ana apa sina ga e kiela mrapplepa, ana apisu sina verue nene naḡa tego ḡesia e lepas naḡa mrae molue ke komea. Pogos naḡa la apisu si verue nene, akekara paḡisi, ana verue naḡa naga sumon la m̄a ga pano-o atol e naḡa sisi nene m̄eke ea. ¹¹ Ana la apa loyuḡa e yuḡa nene, apisu sisi nene, amio anena naḡa Maria. Ana la akinai, amieluar naga. A la apikeḡa kiela karo lala, aḡar plan kiena nalaena la pania, suri tai naḡa kol, amio suri lalua naḡa ponos taninu po paḡisi sa naḡa m̄aḡes, naḡa kiela kia prakensis, amio mer, naḡa mer nene naga kana kilavaru keviu paḡisi.

¹² Ana kolemallo, Ntewa pisi pan la e m̄eniena tai, pisaluḡar la pisape “Ve ava akom re si lepas naḡa puna ne Erot.” Ana la amligan yo nene, aḡasuḡela ke sina ga, akome mrapa taḡena apa kiela.

Aḡurelua Yesu, aḡure apa Isip

¹³ Pogos naḡa yaru la nene amial rui, ana Yosop m̄enia m̄a navisi kiena ne Ntewa tai pimi puna, pisa pania pisape “Yosop, osuḡalu, owar ninis nene amio anena, amiu aure ava garu Isip, vanon lavisi ke ḡarin Suḡe Erot kale ninis tomtom nene vena weḡmar narui. Ava asuḡa garu Isip vano-o tol pogos naḡa nevisa van ko, ana awasuḡe amiu si aimi.”

¹⁴ Ana Yosop mlogear visena kiena navisi naḡani, ana suḡalu ḡarlua ninis tomtom nene amio anena, ana amligan plan ke e yemalo nene, ana amialin ke ava garu Isip. ¹⁵ Ana la apa asuḡa garu Isip yam piavi li m̄a ga, pano-o tol pogos naḡa ḡarin Suḡe Erot mare.

Suri la nene pimi kakate sanene, vena kila visena kiena ne Ntewa tai naḡa Navisawalena Osea naga pisawal nanua sumo vena vim ve lelaga, naḡa naga sapenua “Naruu na yerḡene sike garu Isip, ana nevio naga wasuḡe imi.”

Ose 11:1

Yaru nakilaen mara lala aḡe moḡar ninis lala

¹⁶ Pogos naḡa ḡarin Suḡe Erot naga kilia sape yaru nakilia ruruen ḡelaga kiena ne verue lala pe akila re sa naḡa naga pisa poli, pe apimi akom re si puna poli, ana naga sinena mimi paḡisi, ana naga pisa pan kiena yaru na mara lala, pisape “Ava akale ninis la punu ga naḡa ape yerḡene asike Petleem, a la m̄ena ga naḡa asike lavisinia, la naḡa pe kiela kas lua re poli wa, ana awe moḡar la make ga amarmare.” ḡarin Suḡe nene naga polo pogos nene sanini, vanon mloge visena tan yaru la nene, naḡa apisawal mesmesun pania nanua e pogos naḡa verue nene kateḡesia.

¹⁷ Suri la nene kila visena naḡa Navisawalena Sereḡaea naga pisa sumo pimi pe lelaga, naḡa naga pisape

¹⁸ “Le Raḡa lala amloge sira nae pula tai tagi na tagi,
naga mloge piowa paḡisi,

sira nene naga Resel, naḡa naga tagin ke mapina lala.

Ana naga yepena mavin yaru tai kila luḡeluḡeena vena loge wo sina,
vanon mapina la akokovio make ḡisi rui.”

Ser 31:15

Yosop ḡar Yesu nene molue Isip, ḡasuḡe si pa Nasaret

¹⁹ Ana pogos naḡa Yosop lala asike garu Isip wa, ana ḡarin Suḡe Erot naga mare. Ana Yosop m̄enia, pisu sina navisi kiena ne Ntewa tai pimi puna, ²⁰ ana navisi nene pisa pania, pisape “Yosop, osuḡalu, oure ninis nene amio anena, awasuḡe amiu si, ava garu kiamiu purvanua naḡa Israel, vanon ḡarin Suḡe Erot nene naḡa naga sape weḡmar ninis nene, naga mare rui.” ²¹ Ana Yosop naga mlogear visena nene, naga suḡalu, ḡar ninis nene amio anena, aḡasuḡela ke sina ga apa e kiela purvanua naḡa Israel.

²² Pogos naḡa la amialin ke asape ava tol garu Yutea, ana Yosop mloge asape Akaleas kus ke lelana ne arimana naḡa Erot, pe ḡarin suḡe ke garu Yutea. Ana Yosop maraun si

vaen garu Yutea, ana naga m̃eni si tai, m̃al Ntewa naga pisi pania, pisaluṗar pisape “Ve ova re si garu Yutea,” ana Yosop lala apalein e yo taṕena tai, kiena kia Kalele. ²³ Ana la apa asike e kumali tai e lepas nene, kiena kia Nasaret.

Suri nene pimi kate sanene vena kila visena kiena ne navisawalena lala vim ve lelaga, naṕa la apisayu Navisaarena nanua sumo rui, naṕa la apisa apisapenua “Yokorena, lala avisave naga ve yaru nae Nasaret tai.”

3

Yoane Nakeena sike ga e yokorena, mlologon ke navilopuena

Mak 1:1-8; Luk 3:1-8; Yoane 1:1-28

¹ Yesu naga kapuru pimi keviu, gar ga Nasaret, ana e pogos ke nene narui, Yoane Nakeena naga pimi ṕarpoyo e yokorena e lepas nae Yutea, ana naga suṃa mlologon ke, pisapenua ² “Amiu na monar avilopu amiu, vanon Nasuṕenena kiena ne Ntewa pimi ke narui.” ³ Yoane Nakeena nene naga pe yaru naṕa Navisawalena Aisea pisawal nanua sumo rui, naṕa naga pisa, pisapenua

“Pulgon yaru tai suṃa pio ke e yokorena, pisape

‘Amiu akila ruru make mrapa kiena ne Ntewa, vena naga kilia imi m̃alivi e kiamiu malena lala.’ ”

Ais 40:3

⁴ Yoane Nakeena nene naga sane Navisawalena Elaisa nene nanua sumo, sa naṕa naga pe miyen re kulsota naṕa po poli, m̃ana kulsota na ape ga e vilulus nen kamel, a kiena kilika na kararen m̃eṕena na amiyuṃaen ga e kulus nen puluk. A kana kinanena e yokorena, kan ga narin suri la naṕa asape kurpo ne, amio suri kiki naṕa sukapak tetan la amiyuṃaenia. ⁵ Naga suṃa e yokorena nene pano pano-o, ana yeririna nae Yerusalem lala amio m̃ena ga pulkumali taṕena lala nae lepas naṕa Yutea, a pulkumali m̃ena ga la naṕa lavisin wii nae Yortan, la apanon apisu naga. ⁶ La amiyagogon kiena lologena lala, a la apisa plan kiela mlamulena viowa lala pania, ana Yoane kela e wii nae Yortan.

⁷ Ana e pogos tai, Yoane pisu naṕa yeririna la moki na ṕegas nalotena lua nene kiena ne le Yu lala, naṕa Varasi lala amio Satusi lala, la apimin ke naṕa naga ke la, ana naga pisi m̃arera pan la, pisape “?Amiu na sane loṃara lala, naṕa la amaraun kapi tai ana la aṕure, ana amiu na asitom asape akilia aurmatan kapi naṕa Ntewa naga ṕisi na ligan imi, naṕa pe amiu apilon amiu re poli wa? ⁸ Ana visae ve lelaga kemua naṕa amiu amaraun nakoena nene, ana kiamiu malena naga monar war mras la naṕa powo, naṕa torokin kiamiu navilopuena nene. ⁹ Ana avisuar amiu, popon amiu na ve awarwar amiu re sina, sa naṕa asuṃa akila ke rui, naṕa apisa ke asape ‘A, ita na poga ga rui, okilakan ita na tepe lus ruru kemua kiena ne yermarua Epraam.’ Ana nanene na pe suri re tai nene poli, vanon visae Ntewa naga sinenania, naga kilia la ga kilavaru la nene, kila la aimi ave lus kiena ne Epraam la ve moki, vena akus lelemiu. ¹⁰ Nevisa van amiu, nesape m̃ekiavi mon ruru rui pisape teroro purlaki la naṕa pe ṕar re mras wo poli, ana yokorena ateroro la ana akoven la ava e kapi. ¹¹ In na nepimi sumo, ana nekee amiu ke ga e wii, vena kila merarava sa naṕa amiu apilopu amiu rui, ana yaru taṕena tai naga pimi ke siraun inu wa. Yaru nene, naga to laa metavan inu, a in na nepiowa ga, netorokin re nowar plan kiena kulus nen lana poli, pona nekilia nekila kiena yuṃaena taṕena lala. Ana naga ke narui, naga kilia kee amiu e Ninuna Wa, amio kana kapi nena, vena kekan plan kororaki lala e kiamiu malena lala. ¹² Naga na sane mlarar ke koruak nayuraren wit e limana, ana sisilin plan mrasa la akekapil vito lele taṕena, a vinus vito lele taṕena, ana war plan mrasa va uṃa m̃ana, a yokorena naga kilia kuan vinusa va e kapi naṕa taṕatete mare pogos tai.”

Yoane ke Yesu

Mak 1:9-11; Luk 3:21-22

¹³ Ana Yesu mligan lepas naña garo Kalele, pam e wii nae Yortan vena Yoane ke naga.
¹⁴ Ana Yoane pisape visaluþaria, pisapenua “?Sanape na ko opamin osape nekee ko? Suri nene na pe mesmesu re poli. Popon ga ko na okee inu.”

¹⁵ Ana Yesu pisatañea, pisape “Peraga, þisi na ve ve sa re nene, popon ita na tetañan ga tetaveve suri wo la naña Ntewa naga sinenania sape tekila.”

Ana Yoane tañan Yesu pimi puna, ana kea.

¹⁶ Ana pogos naña naga ke þisi, Yesu naga molue e wii pa metava, ana veraga ma e peni pietava pania, ana naga ñal Ninuna ne Ntewa pitomi ke tano sa naña loñe, pitomi tol Yesu. ¹⁷ Ana la amloge Ntewa nae ma e peni pisi pitomi tano, pisape “Nene na naruu ne, naña nesitom naga paþisi. Kiau sitomena teke ga e naga, a nekekan naga paþisi.”

4

Þarin suþe kiena ne yermare lala taþali Yesu

Mak 1:12-13; Luk 4:1-13

¹ Suraun naña Yoane Nakeena kee Yesu þisi, ana Ninuna Wa naga sumon Yesu pa e yokorena tai, vena Yermare taþali naga. ² Ana e pogos nene, Yesu monsilun leniena tol legiena lualima vari a lemalo ñena ga lualima vari, a siraunia naga viso kari paþisi. ³ Ana Yermare, yaru na taþalien yeririna lala, pimi pisa pania, pisape “Visae ko na ope narina ne Ntewa kemua lelaga, ko ovisali van kilavaru la nene aimi ave kilaparavi, vena okan tai.”

⁴ Ana Yesu pisa pania, pisape “Peraga, vanon Visena Wa pisa sanini pisape ‘Kinanena ga taþatete kila yaru mali, ana visena punu ga naña Ntewa pisa, naga ga nene kilia kila yaru mali.’” *Naw 8:3*

⁵ Ana Yermare pisape wereli sina ga sitomena kiena Yesu va garu e Yuña Wa naña garu Yerusalem, ana mligan naga sike e yo tai naña pa manene metava paþisi e wosoyuña Ñana Ntewa. ⁶ Ana naga pisa pania, pisape “Visae ko ope narina ne Ntewa kemua lelaga, ko oula, oto tano e nene. Ana yoko ko okila woga ga ne, vanon Visena Wa pisayu Ntewa, pisape

‘Naga yoko ligan kiena navisi lala aimi avisuar ko ñaga, ana la ayukop yaun ko ga oñeke metava e limala, vena ve owan re laña e kilavaru tai.’” Yauena 91:11,12

⁷ Ana Yesu pisatañe ke sina ga Yermare, pisa pisape “Peraga, vanon Visena Wa pisa ñena ga sanini, pisape ‘Ko na taþatete otaþali kioña Suþe Ntewa, naña otaþali oñareran osape naga kila kioña suri tai.’” *Naw 6:16*

⁸ Naga na, Yermare þere ke sina ga sitomena kiena Yesu pa metava e pupia kunus tai, pisape “Visae ova ose kunus nene, okira vito tano ovisu purvanua kerkeviu la ne sike e yomarava nini, amio kala suri wo la naña asike ea.” ⁹ Ana taþali ke sina ga Yesu yam telu narui, pisa pania, pisape “Suri punu la nene na yokorena netañan van ko, visae okinai olotun inu.”

¹⁰ Ana Yesu pisatañea, pisa pisape “Ko oure, Yermare. Visena Wa pisa sanini, pisape ‘Þisi na monar olotun ga Ntewa naga taaga, naña pe kioña Suþe, a okila ga kiena yuñaena naga taaga.’”

¹¹ Ana Yermare purmatan Yesu, ana navisi la apitomi, apisuar ke naga.

Yesu siar kiena yuñaena garu lepas nae Kalele

Mak 1:14-15; Luk 4:14-15

¹² Ana e pogos nene, li na mara lala kiena Þarin Suþe Erot la atarar Yoane Nakeena, amligan naga pa e yuña nakoena. Ana pogos naña Yesu mloge nalogeena nene, naga sitom sape wasuþe si vito garo Kalele. ¹³ A pogos naña naga þasuþe si pito garo Kalele, ana naga pe pa re si garo Nasaret poli, naga pito la garo Kapeneam rui, pulkumali naña ñeke lavisin lapa nae Kalele. Yo la naña siar Kalele pito tol yo losi, yo la nene porotano kiena

ne lus lalua kiena yermarua lalua na nanua sumo, Sepulan amio Naptali. ¹⁴ Suri nene pimi m̃alivi vena kila visena kiena ne Ntewa nene vim ve lelaga, sa naṗa Navisawalena Aisea naga pisawal sumo rui, naṗa pisape

¹⁵ “Amiu yaru lala nae yo kiena ne Sepulan amio yaru lala nae yo kiena ne Naptali, naṗa asike likan wii nae Yortan amio pupia sive, amiu yaru la nae garo Kalele, e lelen yaru la moki naṗa pe ape le Yu re poli asike ea, amiu aloge visena nini:

¹⁶ Yeririna la naṗa asike e yemalolo, ṗisi na alual pupia yomerarava tai.

La nene asuke ga e yemalolo silaga, naṗa la na ape namarena ga, ana pupia yomerarava tai tego paṗisi pimi tegoli la.” Ais 9:1,2

¹⁷ Ana siar e pogos nene, Yesu suṗna ga mlologon ke, pisapenua “Amiu na monar avilopu kiamiu sitomena vetan kiamiu mlamulena viowa lala, vanon naṗa nasuṗenena nae ma e peni pimi ke lavisi narui.”

Yesu pio yaru na wereen ika la vari

Mak 1:16-24; Luk 5:1-11

¹⁸ Ana Yesu suṗna ga miyaloro ke e isinen pupia lapa nae Kalele, ana m̃al yaru la lua, Saemon Pita amio wenla naṗa Antru. Lalua asuṗna ga akuan ke lilivi, vanon lalua na ape yaru na wereen ika. ¹⁹ Ana naga pisa pan lalua, pisape “Amiu lua ataveve inu, ave kiau yaru lala, vena nevian amiu ana ave yaru na wereen yaru lala.” ²⁰ Ana lalua nene amligan kiela lilivi naṗani veraga ga, lalua ataveve Yesu.

²¹ Ana Yesu mial li ga pa laa sane, m̃al si yaru la lua Semes amio wenla naṗa Yoane, la lua na la narina ne Sepeti. Lalua asike e kiela los nen wa tai amio arimala, lala asuṗna ga akila ruru ke kiela lilivi. Ana Yesu pio lalua pisape lalua atavevea, ²² ana la lua asuṗmalu veraga, amligan arimala ṗeke e wa, ana ataveve Yesu apano.

Yesu mlologo, pian ke yaru lala, a kila ruru ke namaiena lala

Luk 6:17-19

²³ Ana Yesu miyaloro ke pa e yo punu ga garu Kalele, pian ke le Yu lala e loyuṗna e kiela yuṗna na lotuena lala. Ana naga pisawal ke nalologena wo nene nasuṗenena kiena ne Ntewa, a kila ruru ke yaru la naṗa maiena sike e yepela, a kila yaru la naṗa yepela laṗas malmalumu, apimi amloge po sina. ²⁴ Ana la asunyu kia kiena Yesu pa kalo ṗena yo punu ga e lepas naṗa Kalele na vito tano, naṗa apio asape Seria. Ana la aṗure yaru la naṗa amai e yo punu ga nene apimi puna Yesu. La nene, laṗasia naṗa amai, laṗasia naṗa magka kar kare la amloge piowa paṗisi, laṗas naṗa yermare la asike e la, laṗas naṗa amarmarelu ke lala, a laṗasia naṗa yepela laṗasia marmare, ana Yesu kila ruru punu ga namaiena la nene amloge po sina. ²⁵ A yaru la moki paṗisi naṗa ataveve Yesu e pogos nene. La nene apimi garu Kalele, a e ṗena e lepas naṗa pulkumali lualima sike ea, a garu Yerusalem, a garu lepas taṗena lala nae Yutea, a ma ṗena e lepas nen ṗalu nae Yortan lepas ṗasia na vano. Ana la nae yo la nene apimi ataveve Yesu e pogos nene.

5

Yesu pian yeririna lala

Luk 6:20-23

¹ Ana e pogos tai, Yesu pisu yeririna la moki, ana naga pa metava e kunus tai. Sane kiela navianena tai, naga totano ana kiena yeririna lala apimi atovivia, ² ana naga pian la.

³ Navianena kerkeviu laṗasia kiena ne Yesu sanini: naga pisape “La naṗa apisu kilale naṗa pe aṗnal re Ntewa e kiela malena poli wa, ana ṗisi na navisa ruruena vim van la, vanon Ntewa naga pe ṗarin Suṗe kiena ne yeririna la ne sanene.

⁴ La naṗa suri viowa lala akila kare la ke paṗisi, a amloge piowa, atagi ke na, ana navisa ruruena vim van la, e nakila luṗeluṗeena lala.

- ⁵ La naþa ape yaru malumu ga, navisa ruruena vim van la, vanon naþa Ntewa pisaar pan la rui pisape la suri wo la naþa sike e yomarava nini van la.
- ⁶ La naþa sinelan manene þelaga mesmesu lala sa naþa Ntewa naga sinenania, ana navisa ruruena vim van la, naþa þisi na avisu kiela malena ulen namesmesuena la nene.
- ⁷ La naþa asuþna sinela miye ke yaru taþena lala, navisa ruruena vim van la, naþa yokorena Ntewa naga sinena ye manene la vaþisi.
- ⁸ La naþa sinela mekiki po, navisa ruruena vim van la, naþa yokorena la avisu Ntewa.
- ⁹ La naþa ape yaru na kilaen suþare, ana navisa ruruena vim van la, naþa Ntewa naga vio yaru la nene ave narina lala.
- ¹⁰ La naþa amlelaga e Ntewa, ana yaru taþena lala akila kare la vanon kiela nalelagaena nene, navisa ruruena vim van la, naþa yokorena Ntewa ure la ava loyuþna e kiena nasuþenena.
- ¹¹ “Amiu la naþa yaru la akila kare ke kiamiu kia, a la aþnene amiu ke na, a la apisa kare amiu, a apisa kotalia amiu, vanon naþa amiu na ape kiau yeririna lala, ana þisi na navisa ruruena vim mþena ga van amiu. ¹² Ana ve sinemiu viowa re, akilia akekara ga, vanon kiamiu pupia suri wo tanea lala sike ma e peni. Þisi na yaru la akila kare amiu vaþisi, ana visae ve sanene, la akila ve sa ke naþa yaru na sumo lala akila kare navisawalena lala.”

Kururu sive amio kapi viaga

Mak 9:50; Luk 14:34-35

¹³ Ana Yesu pisa mþena ga, pisapenua “Amiu na sane sive na e yaru na yomarava lala. Ana visae sive ve melkalka re sina, ana pe suri re si tai naþa kilia kila melkalka si poli. Ana sive nene na pe popon re si suri tai poli, popon ga akuan va narui.

¹⁴ “Amiu na sane kapi viaga na yomarava. Pogos naþa yaru la akila kiela pulkumali metava e kunus tai, kolemallo yaru la naþa asike perina akilia avisu kapi nena, ana taþatete akilawan kiela pulkumali nene. ¹⁵ Ana pe yaru re tai poli naþa silan kiena kapi, ana kalo si kapi nene e piaki tai. Pogos na yaru silan kapi, ana monar ligan to metava e lelana, ana yaru punu ga naþa asike loyuþna ana kapi vivaga nene tegoli la. ¹⁶ Ana e þelaga ne na nene, amiu na monar ataþnan kapi na kiamiu malena tegoli yaru la punu ga vena akilia avisu kiamiu yuþnaena wo la naþa amiu akila ke na. Ana pogos naþa la avisu kiamiu yuþnaena wo la nene, ana la akilia ayeluar kia kiena Arimamiu naþa sike ma e peni.”

Yesu pisayu navisaluaena kiena Mosis

¹⁷ Ana Yesu pisa mþena ga, pisapenua “Pe sineun re nenaga, naþa amiu asitom ke asape inu nepimin nesape nekuan plan navisaluaena kiena Mosis, amio visena kiena ne yaru navisawalena la poli. Peraga, pe sa re nene poli. In na nepimin nesape nevian ruru amiu e kinas nen visena punu ga la nene van amiu. ¹⁸ Suri na ne nepisa ke pan amiu ne, ana lelaga paþisi monar asitoþmalia, þisi na taþatete navisaluaena nene kovio, vanon sinapane amio yomarava nini lalua akovio. Ana taþatete narin mras nen visena tai, pona ya sina naþa teke e navisaluaena nene, kilia kovio, taþatete ga, vano-o tol pogos naþa suri na navisaluaena la nene vim kakate make ga. ¹⁹ Vanon suri ne na nene, visae yaru tai kila pal narin suri tai e navisaluaena nene, pona vian yaru taþena tai kila sanene, yaru nene na ve to re e yo wo tai e nasuþenena kiena ne Ntewa. Ana yaru naþa taveve ruru visena na navisaluaena la nene, a pian ke yaru taþena lala akila sanene, ana naga yoko kiena kia wo e nasuþenena kiena ne Ntewa. ²⁰ Inu nevisa van amiu, visae sinemiun asape ava e nasuþenena kiena ne Ntewa, ana monar kiamiu þelaga la wo a mesmesu, taulu navianena navisaluaena lala, amio Varasi lala, visae peraga, taþatete ava ea.”

Yesu pisayu nasinekarena

Luk 12:57-59

²¹ Ana Yesu pisa m̄ene ga, pisapenua “Amiu amloge m̄a naḡa navianena la apian ke kieta yermarua la nanua sumo rui, apisape ‘Ve aweḡar re yaru, a visae yaru na weḡar yaru mare, mesmesun ga naḡa aure naga va kumali ana avis vania.’ ²² Ana nevisa van amiu sanini: Yaru naḡa sinena kari wenla, yaru nene mesmesun aure va kumali avis vania. A yaru naḡa visi viowa van wenla, visavenua ‘Ko na yaru viowa tai nene wa,’ yaru nene mesmesun aure va e kieta viorena keviu ana aliḡere naga. A yaru naḡa ḡisi na la sinemimiena van wenla, pisape ‘Ko na ḡaruḡa pe wowe,’ naga mesmesun va e kapi naḡa e lele na loge viowaena. ²³ Vanon suri ne na nene, visae oimi e wonta kiena ne Ntewa vena ola nalaena vania, ana ositoḡal si naḡa okila suri tai pa womla piowa teke na, ²⁴ ana oligan nalaena nene toḡa e lepas nen wonta nene sumo wa, ana monar omolue sina, ova okila ke ne marawo wa, ana siraunia okilia oimi ola si kioḡa nalaena naḡani va Ntewa.

²⁵ “Visae okila suri piowa pa yaru tai, ana naga sinenan pisape were ko ova kumali avis van ko, ana popon okoskosin ovisi ruru omio yaru nene, e pogos naḡa pe aḡure ko re opa kumali poli wa. Visae peraga, pona ligan ko e limana yaru na liḡereena la yo, ana la nene aligan ko e limana yaru na taren yaru lala, ana la akilia aligan ko e yuḡa nakoena. ²⁶ Suri na nepisa ke pan ko ne naga lelaga, ana visae sanene, taḡatete si omolue e yuḡa na koena, vano-o tol pogos naḡa oul make kioḡa nakoena.”

Yesu pisayu kolau

²⁷ Ana Yesu pisa m̄ena ga, pisapenua “Amiu amloge m̄a naḡa navianena lala apisalua sumo rui, asape ‘Ve okila re kolau.’ ²⁸ Ana inu, nevisa van amiu sanini: Yaru naḡa yepen kawe ke sira taḡena tai, naḡa naga sinenania sape werea, ana naga sane kila kolau amio sira nene ḡisi rui e kiena sitomena.

²⁹⁻³⁰ “Visae kilamaraḡa na ḡamarua kila ko ke omloru e mlamulena viowa sanene, popon osilua kilamaraḡa nene vano. A visae lumoḡa na ḡamarua kila ko ke oloru e mlamulena viowa, popon otelua, okuan vano. Ana popon narin lepasneḡa ga tai kovio, a visae peraga, akoven punu ga tasneḡa va e lele na loge viowaena.”

Yesu pisayu nakuwanluaen sira

Matiu 19:9; Mak 10:11-12; Luk 16:18

³¹ Ana Yesu pisa m̄ena ga, pisapenua “Nanua sumo na apisa sanini, apisape ‘Yaru naḡa koanlua wona, ana naga monar kila m̄aki tai vania, naḡa pisa meraravan pania pisape koanlua rui, pe pe wona re si poli.’ ³² A in ne nanini, nevisa van amiu, sanini: Pe mesmesun re nena ga naḡa yaru tai m̄enelua wona poli, visae naḡa wona nene naga pe kila re kolau sumo poli. Visae yaru tai m̄enelua wona, naga kila kare wona nowo nene sa ga naḡa wona nene naga pe sira na taḡaen ga kolau rui. A yaru taḡena naḡa naga were sira tai naḡa wona nasumo naga m̄enelua naga rui, yaru taḡena nene, naga suḡa kila ke kolau narui.”

Yesu pisayu sanape naḡa akila navisaarena

³³ Ana Yesu pisa m̄ena ga, pisapenua “Amiu na amloge m̄a naḡa navianena lala apisa pan kieta yermarua la sumo rui, apisape ‘Visae ovisa kia kiena ne Ntewa vena kila kioḡa visena m̄arera, siraunia ko taḡatete okilaro sina visena nene. Visae ovisa kia kiena ne Ntewa, monar okila mesmesu sa naḡa ko opisa.’ ³⁴ Ana nanagane, inu nevisa van amiu, sanini ‘Taḡatete ovisa kia kiena ne suri taḡena vena kila kioḡa visena m̄arera.’ Taḡatete ovisavenua ‘Lelaga metava,’ vanon naḡa ma e peni na lelana ne Ntewa naḡa totano ke ea, na pe yo wa paḡisi. ³⁵ A taḡatete m̄ena ga ovisa kia kiena yomarava nini, vanon yomarava nini lelen lana ne Ntewa naḡa naga piawa ke ea. Taḡatete ovisa Yerusalem, vanon Yerusalem na lelana ne kieta ḡarin Suḡe Wa. ³⁶ A taḡatete m̄ena ga ovisa ḡaruḡa, vanon taḡatete ovilon viluḡa tai imi yuwowo pona imi malolo. ³⁷ Visae avisa suri na lelaga, monar avisa ga ‘Lelaga,’ a visae avisa suri naḡa peraga, monar avisa ga ‘Peraga.’ A visena taḡena la naḡa akilia avisa, naga molue ga kome Yermare.”

Yesu pisayu yaru naþa kila maran si piowa pan yaru naþa kila piowa pania

Luk 6:29-30

³⁸ Ana Yesu pisa mēna ga, pisapenua “Amiu amloge mēna naþa navianena lala apisa nanua sumo, apisape ‘Visae yaru tai kito kilamara mēna tai, ana ko okilia okito mēna ga kilamarana. A visae yaru tai sulua maluemēna tai, ko mēna ga okilia osulua maluena tai.’

³⁹ Ana nanagane, inu nevisa van amiu sanini: Amiu ve akilamaran re si suri van yaru naþa kila viowa van amiu. Visae yaru tai lipa pipi mēna e lepas na þamarua, ana monar ota mēna mēna ga lipa pipi mēna lepas na þa mēli. ⁴⁰ Ana visae yaru tai visave were ko ova avis van ko kumali, ana naga mēnaran visave owar mo mēna kulsota vania, ana ko owar mēna ga mo mēna kulsaket vania. ⁴¹ A visae yer kawa tai mēnaran visave owar kiena karo amio ayal va tol mrae ve taaga, ana monar okekararan owar va tol si maran mrae ve taaga. ⁴² Visae yaru tai viun suri tan ko, monar ola vania, a visae yaru sinenan visave la kio mēna suri tai yu mēna, monar ota mēna vania vena lavia, ve ovisalu þar re vania.”

Yesu pisayu nisape monar akekararan nasinekar lala

Luk 6:27-28,32-36

⁴³ Ana Yesu pisa mēna ga, pisapenua “Amiu amloge mēna naþa navianena pisa sumo rui pisape ‘Monar ositom nalavis pu mēna, a monar okila viowa va kio mēna nasinekar lala.’ ⁴⁴ A nanagane, inu nevisa van amiu sanini: Monar asitom kiamiu nasinekar lala, a monar alen wo mēna yaru la naþa akila ke piowa pan amiu, ⁴⁵ vena amiu ataveve ruru þelaga kiena ne Arimamiu naþa sike ma e peni, vanon naþa naga kekararan yaru punu ga maran taaga. Vanon suri ne nanene, naga kila kiena mrae tego, a kila kiena yua powo pitomi pun yaru punu ga, la naþa apo a la naþa apiowa. ⁴⁶ ?Visae akekararan ke ga yaru la naþa asitom amiu ke na, amiu na asitom ke asape yokorena atol kiamiu nalaena tai? A yaru na takis lala, naþa yaru taþena la asape la ape yaru viowa ga, la akilia akila sanene. ⁴⁷ Visae otalopan ga kio mēna yeririna lala, nanene na pe otaulu re þelaga kiena ne yaru viowa la poli. A yaru la naþa pe amlelaga re e Ntewa poli, la mēna ga akekararan kiela namratava lala. ⁴⁸ A kiamiu malena monar mesmesu ruru wo, sa naþa þelaga kiena ne Arimamiu naþa sike ma e peni naga mesmesu ruru paþisi, a naga po pan yaru la punu ga.”

6

Yesu pisayu nalaena lala

¹ Ana Yesu su mēna pisi pan la, pisa pisape “Suri la naþa kieta nalotena pisa pisape popon teyu mēna, amiu na ve akila re sa naþa amiu akila na vena yaru ve moki akilia avisu kilale naþa amiu akila ke suri wo. Visae amiu asu mēna akila mēna sanene, þisi na Arimamiu naþa sike ma e peni, naga taþatete la nalaena van amiu vanon kiamiu yu mēna la nene.

² “Visae ve sanene, pogos naþa ko ola nalaena va yeririna la naþa pe kiela suri re poli, vena oiila la, ana pe pon re owarwar ko vanon poli, sane li navilavenen viskorenena. Yaru la nene apisawal ke kiela yu mēna wo lala e loyu mēna na leniena, a e yepesinas la vanua, vena yaru la ayeluar la. Ana nevisa suri na lelaga van amiu, yaru la ne sanene amla kiela nalaena þisi rui e nayeluarena naþa yaru taþena la amla pan la, a taþatete si ala suri tai. ³ A pogos naþa ko ola nalaena va yaru la naþa pe kiela suri re poli, vena oiila la, monar okila ga e þelaga na tapolouena, yaru ve visu re, a ve kio mēna sitomena yeluar ko re e nalaena nene. ⁴ A visae okila tapoloun ga kio mēna yu mēna wo la ne sanene, ana Arimo mēna naþa pisu ke suri la naþa yaru la pe apisu re poli, naga kilia la nalaena van ko vanon kio mēna yu mēna wo la nene.”

Yesu pisayu leniena

Luk 11:2-4

⁵ A Yesu pisa mēna ga, pisapenua “Ana pogos naþa amiu alen, pe pon re ataveve þelaga kiena ne li navilavenen viskorenena la poli. La nene na sinelan manene asape asu mēna vena alen loyu mēna e yu mēna na leniena, a vanua e yometava lala, ana yaru la akilia avisu la.

Ana inu nevisa suri na lelaga van amiu, yaru la ne sanene amla kiela nalaena ħisi rui e nayeluarena naĥa yaru taĥena la amla pan la, a taĥatete si ala suri tai. ⁶ Ana pogos naĥa visae okila leniena, ana ova loyuĥa e moĥa yuĥa ko ga taaga, okotava ana okila leniena va Arimoĥa naĥa sike na, ana pe yaru pisu re naga poli. Ana Arimoĥa naĥa kilia visu suri la naĥa pe yaru pisu re poli, naga kilia la kioĥa nalaena van ko, vanon kioĥa suri wo naĥa okila.

⁷ “A pogos naĥa alenia, ana pe pon re avisa visena ve moki poli, ve sa yaru la naĥa pe amlelaga re e Arimata lelaga poli. Yaru la nene aĥape yokorena na alual suri naĥa la amlen ke vanonia, komin la apisa ke visena la moki manenea, ana peraga. ⁸ Ana amiu na ve ataveve re kiela ĥelaga lala, vanon Arimamiu, naga kilia ke suri la naĥa limamiu plasan rui, pogos naĥa amiu pe apiun re suri la nene tan naga poli wa.

⁹ “Vanon suri ne nanene, mesmesun naĥa amiu alen sane leniena nini, naĥa pisa pisape

‘Arimamimi naĥa ko osike ma e peni,

mesmesun ga naĥa yaru la asu vatanon kioĥa kia wa.

¹⁰ Memlen mesape kioĥa nasuĥenena imi suĥalu ĥarera se yomarava nini, vena yeririna la akila sa naĥa ko sinoĥania, sa naĥa la ne ma e peni akila ĥaga.

¹¹ Awis, ola kinanena van imimi ĥane, a e legiena punu ga.

¹² A ovewo imimi e kiamimi mlamulena viowa lala, sa naĥa imimi ĥena mepiewo ke yaru taĥena la naĥa akila ke piowa pan imimi.

¹³ Ko ve oligan manene re suri viowa lala aimi ataĥali imimi, okila wo Yermare ve imi kila kare imimi re.’

¹⁴ “Vanon naĥa visae amiu aviewo ke yaru la naĥa akila ke piowa pan amiu, ana Arimamiu naĥa sike ma e peni viewo amiu ĥena ga. ¹⁵ A visae ve aviewo re yaru taĥena la naĥa akila ke suri piowa pan amiu, ana Arimamiu taĥatete viewo kiamiu mlamulena viowa lala.”

Yesu pisayu monsilena

¹⁶ A Yesu pisa ĥena ga, pisapenua “A visae pogos naĥa amiu amonsilu ke sina ga, ve akinan re vena amiu asitoĥali Ntewa a alen vania, amiu ve akila re sa naĥa pe ake re maramiu poli, pona amiu akila maramiu la viowa, a kulugomiu la miyopiop sa naĥa viso kar amiu paĥisi, vena yaru lala avisu kilia ya naĥa akila ke na. Nanene na yuĥaena kiena ne li navilavenen viskorenena. Ana visae akila sanene, ana yeririna laĥasia sinela ye la, naga ga nene kiela naulena naĥa la akilia alavia vanon kiela monsilena, ĥisi na taĥatete si Ntewa naga la sina ga suri tai van la. ¹⁷ Ana ko, pogos naĥa amonsilu ga sanene, popon okee maraĥa, okila ruru viluĥa, oyowau ruru wo sa naĥa ko okila ke silaga, ¹⁸ vena yaru la aninue ya naĥa ko okila ke ne. Arimoĥa ga naĥa naga sike na, pe yaru la aĥa re naga poli, ana naga ga ĥisi na kilia pisu ke suri la naĥa pe yaru la apisu re poli, ĥisi na naga la nalaena van ko vanonia.”

Yesu pisayu kilavaru

Luk 12:33-34

¹⁹ Ana Yesu pisa ĥena ga, pisapenua “Pe pon re amiu akilapolo kiamiu suri wo na yomarava la nini poli, vena avim ave yaru keviu na suri moki manenea. E yomarava nini na kirara lala akilia akar suri la nene, a suri la nene akilia avililua a amenunu ĥena ga, a amio ĥena ga yaru na vinauena naĥa kilia kilapo yuĥa, vena vinaun suri la naĥa amiu aĥionia. ²⁰ Ana amiu na monar awarpolo kiamiu suri wo lala ma e peni, vanon naĥa e nene na yo tai naĥa pe kirara re e poli, a suri tai taĥatete vililua a menuu, a yaru na vinauena lala taĥatete akila kare kiamiu suri nowo la naĥa amiu amligan ruru sike ea. ²¹ Popon vena amiu na kiamiu suri wo la ve moki sike ma e peni, vanon e naĥa kioĥa suri wo la sike ea, ana kioĥa sitomena ĥena ga sike e nene silaga.”

Yesu suṃa pisayu naṓa yaru la ve ave puluvis re

Luk 11:34-36

²² A Yesu pisa ṃena ga, pisapenua “Kilamarana yaru naga pe yo taaga ga naṓa kapi vivaga pimi loyuṃa e tasnena. Visae kilamaraṃa merarava ruruia, okilia ovisu kilale yaru taṓena, vena oiila naga. Visae okila sanene, losineṃa pulen ruru kapi pivaga paṓisi.

²³ A visae kilamaraṃa ve merarava ruru re, yoko taṓatete ovisu kilale ruru yaru taṓena, yoko osuṃa ovisu ga kioṃa suri lala ove puluvisin ga. Visae okila sanene, losineṃa pulen manene la yemalolo, a visae yemalolo naga sike e naṓa mesmesun kapi vivaga naga se ea, nanene sane ko na osike e yemalolo naṓa pe pupumalo paṓisi.”

Yaru taṓatete yuṃae kiena suṓe ve lua veraga

Luk 16:13

²⁴ A Yesu pisa ṃena ga, pisapenua “Yaru tai taṓatete kilia yuṃae kiena suṓe ve lua veraga. Visae sanene ana naga kekaran tai, a yepena mavin tai, pona naga logear tai, aligan tai. Amiu na taṓatete akila sane ave yaru kiena ne Ntewa, ana ave yaru kiena kilavaru ṃena ga.”

Sanapen yaru naṓa sitom manene kiena malena

Luk 12:22-31

²⁵ Ana Yesu pisa ṃena ga, pisapenua “Vanon suri ne na nene, inu nevisa van amiu sanini: Pe pon re kiamiu sitomena ulen manene ga kiamiu yuṃaena na visuar amiuen la poli, naṓa amiu asuṃa apiuviun ke, asapenua ‘?Aṃa e nape naṓa yoko ita telual kata kinanena a ṃata namunena?’ pona ‘?ṓisi na ita tetol ṃata kulsota na yenwo e sanape ne?’ Sitomena la ne sanene na pe po re nenaga, komin kiamiu malena naga po taulu kinanena, a tasnemi naga po taulu kulsota. ²⁶ Asitomli manu la ne akaka ke ne. Manu la nene pe amapla re kala lokove poli, a pe apa aṓar re kinanena pitomin naṓa aligan ruru sike loyuṃa poli. Ana Arimamiu ga naṓa sike ma e peni, naga ga mla ke kinanena pan la, ana e kiena navisuena, naga pisu amiu na sane ato metavan manu lala, ṓisi na naga kilia visuar amiu taulu la. ²⁷ ?Amiu na asitom asape yaru kilia kila kiena malena naṓa plas ga ne vim ve piavi li laa sane wo ga, vanon sitom manene la kiena malena? Peraga, pe sa re nene poli, ana amiu na popon ve asitom manene re kiamiu malena.

²⁸ “?A komin ya ne asitom manene ke ṃamiu kulsota la vanonia? Amiu asitomli vinas nen purmeme la ne pitotovi ke e yo punu la ne. Vinas la nene na pe amiyuṃae re poli, a pe asulu re ṃala kulsota la poli. ²⁹ Ana inu nevisa van amiu, ṓarin Suṓe Solomon nene nanua sumo, naga pe yaru na suri moki, ana naga ṃana kulsota la naṓa naga miyenia na pe miyowau ruru re sane meme la nene poli. ³⁰ A meme la nene na la ape na legiena taaga ga, peni narui asikapi la e kapi, ana Ntewa ga naga paia ruru la ke apo sanene. ? Ana amiu na asitom asape ṓisi na Ntewa naga taṓatete la kulsota van amiu? !Aulai, amiu na pe apiawa re nena ṃarera e Ntewa poli!

³¹ “Komin suri ne la nene, pe pon re sinemi la ulen sitomena la nene poli naṓa sape ‘?Yoko takan ya ne, a tomun ya ne, a telual ṃata kulsota sanape ne?’ ³² Lelaga, yaru la naṓa pe amlelaga re e Ntewa poli la asitom manene suri la ne sanene silaga, ana amiu, Arimamiu naṓa sike ma e peni, naga kilia ṃa ga naṓa pisape yokorena monar kiamiu suri la nene na wa. ³³ Suri naṓa amiu monar asitom ṓesan ve keviu e kiamiu malena, nane nasuṓenena kiena ne Ntewa, amio kana namesmesuena nena lala. Visae ve sanene, ṓisi na naga la ṃena ga suri taṓena la nene van amiu.”

³⁴ “Ve sanene, pe pon re sane ṓane na, asitom manene suri la na legiena na peni poli. Peni ga, akilia asitom suri la na peni, komin legiena na ṓane, ana suri viowa la moki pimi e rui.”

Yesu pisayu naliṓere kareen yaru taṓena

Luk 6:37-38,41-42

¹ Ana Yesu pisi ke pan la na wa, pisape “Amiu na monar ve aliþere kare re yaru taþena lala. Ve sanene, Ntewa mēna ga ve liþere amiu manene re, ² komin sitomena naþa teke e amiu pogos naþa amiu aliþere yaru taþena, þisi na sitomena na sanene teke mēna ga e Ntewa e pogos naþa naga liþere amiu. Þisi na Ntewa naga liþere amiu, ve sa ke naþa amiu amliþere yaru taþena lala. ³ Pe pon re naþa ko osuṃa ovisasawal ke narin kororaki naþa teke e kilamarana ne womla poli, ana ko pe opisu kilale re pupia mora laki na mēke e kilamaraṃa poli. ⁴ ?Sanape narui ko ositom ke osape okilia ovisi va womla nene, ovisave ‘Þisi na nelalua ke ne kororaki na teke e kilamaraṃa ne sumo wa?’ ⁵ !Visae sanene, na ko na pe opisu kilale re kioṃa mlamulena viowa poli, ana ko osuṃa omliþere ke ga mlamulena kiena ne yaru taþena lala! !Ko na ope yaru navilavenen viskorenena paþisi wa! Okilalua ke ne pupia miasin laki naþa mēke kilamaraṃa sumo wa, siraunia ana okilia ovisuveve narin kororaki naþa teke e kilamaran yaru taþena.

⁶ “Pe pon re amiu akilali naþa avisawal Visena Wa kiena ne Ntewa va yeririna la naþa la pe akekaran re ala poli. Nanene sa naþa amiu asuṃa apagan ruru ke lokul tetan lala e kinanena naþa po, ana pogos naþa akinana þisi, þisi na avilon þarila ana akar amiu ke sina ga. Sa ke mēna ga naþa visae awar nalaena wo lala va nompui lala, þisi na la avieno ga vitove sike e pulkene.”

Yesu pisayu naviunena suri tan Ntewa

Luk 11:9-13

⁷⁻⁸ A Yesu pisape “Yaru naþa suṃa piun ke suria, silaga naga mlavia, a yaru naþa suṃa kale suria, silaga naga mḃalia, a yaru naþa suṃa sigariga ke mratava, silaga pulutava pietava pania. Visae sanene, þisi na amiu awar ya naþa amiu asuṃa apiun ke tan Ntewa, a þisi na amiu alual ya naþa amiu asuṃa akale ke tania, a mratava naþa amiu asuṃa asigariga ke ne, þisi na Ntewa naga vietava van amiu. ⁹ Visae naruṃa tai viso karia, viun narin kilaparavi naþa teke ne, þisi na taþatete ola kilavaru tai vania, ¹⁰ pona visae naga viun ruru ika naþa teke rui, ana taþatete ola loṃara van kania. ¹¹ A lelaga naþa amiu na ape yaru viowa ga lala, ana taþatete amiu yaru tai kilia kila sanene, amiu na akekaran ga silaga naþa amla suri wo lala pan narimiu lala. Sanene, pogos naþa amiu aviun suri tai va Arimamiu nae ma e peni, naga kekaran ga naþa la suri wo la van amiu narina lala, va ve keviu la sane wa.

¹² “Amiu na monar akila wo va yaru taþena la silaga e suri wo ga lala, sa naþa amiu sinemiun asape yaru taþena lala, la monar akila wo van amiu. Visena ke nene narui naga purþes nen visena kiena ne navisaluaena la nene naþa Mosis naga siriyuia, amio mēna ga ya naþa navisawalena na sumo lala la apisa.”

Mrapa lua la

Luk 13:24

¹³⁻¹⁴ Ana Yesu pisa mēna ga, pisapenua “Pupia pulutava tai naþa keviu mon mḃaga, ana mrapa naþa pa þarpoyo komea ana lepalepasa a pe yotop ruru po paþisi. Yeririna la mokliu naþa ataveve ke mrapa nene, ana mrapa nene naga va e yo natolen koaena. A amiu na monar ava loyuṃa e pulutava taþena tai, naþa naga ve tokak la ga. Naga kana mrapa nena mḃarera paþisi, a pe yeririna moki re naþa akom ke e poli, ana mrapa nene naga mrapa na malena.”

Purlaki amio kana mrasa

Luk 6:43-44

¹⁵ Ana Yesu pisa mēna ga, pisapenua “Amiu na monar avisuar ruru yaru la naþa la apisape la ape yaru navisawalena lala, ana apian ke suri navisokanena lala. Pogos naþa la sinelan asape avian amiu, la apimi sa naþa ape erau wo amio amiu, naþa la yepela moṃau ruru nenaga, sa naþa sipsip lala, ana e losinela lala la sa ga lokul tetan lala, naþa la visokarlan suri punu ga. ¹⁶ Ana þisi na amiu avisu kilale la e mras nen kiela malena lala. Viluṃini la naþa pe nenosa, amio kilika la naþa pe nenosa, la pe aþar re kinanena

wo poli pona mras naŋa kiki ruru poli. ¹⁷ Purlaki naŋa kapuru ruru po, naga monar war mras naŋa po, a purlaki naŋa kapuru piowa ga, naga monar war mras naŋa piowa ga. ¹⁸ Ana purlaki naŋa kapuru po, ana taŋatete war mras naŋa viowa, a purlaki naŋa kapuru piowa ga, ana taŋatete war mras naŋa po. ¹⁹ Naga sa ga nene narui, visae purlaki viowa la nene naŋa la taŋatete awar mras napo, ŋisi na monar ate plan la ga vena akuan la ava e kapi. ²⁰ Visae ve sanene narui, mras naŋa naga molue e malena kiena ne yaru kila meraravan pisape yaru nene naga pe yaru na sanape, ana ŋisi na amiu akilia avisu kilale navisawalena viowa la nene e mras viowa la naŋa molue e kiela malena lala.”

“Pe nekilia amiu re nenaga”

Luk 13:25-27

²¹ Ana Yesu pisa mēna ga, pisapenua “Yaru la mokliu asuŋa apio inu ke asape ‘!Kiau Suŋe, kiau Suŋe o!’ ana taŋatete la punu ga nene naŋa ŋisi na akilia ava loyuŋa e nasuŋenena kiena ne Ntewa ma e peni. Yeririna naŋa kilia va loyuŋa, naga yeririna ga naŋa naga suŋa kila ke suri la naŋa Ata naga sinenania. ²² E pogos naŋa ŋisi na Ntewa naga liŋere yeririna lala, yeririna la ve moki naŋa ŋisi na avio inu ve sanene, avisave in na nepe kiela Suŋe. ŋisi na la avisa avisave ‘?Suŋe, sanapen imimi? Imimi na memiyuŋaen suri wo la mokliu e kioŋa kia, a imimi mepisawal mēna ga kioŋa visena, a imimi meŋene plan mēna ga yermare lala, a mekila ke mēna ga kile la mokliu. ?Pona ko pe ositoŋal re kiamimi yuŋaena wo la nene poli, yo?’

²³ “Ana yokorena inu nevisawal mesmesun van la, nevisave: Inu na pe nekilia amiu re nenaga pogos tai, naŋa amiu na ape kiau. Amiu na ape yaru na mlamulena viowa ga la ne. !Amiu aurmata inu nagane!”

Yuŋa lua

Luk 6:47-49

²⁴ A Yesu pisa mēna ga, pisapenua “Visae ve sanene, la naŋa ataveve ruru sa naŋa nepian amiu rui, la sane yaru tai naŋa pe manmaruan naŋa kila mēna yuŋa, naŋa naga mapila kana kemraŋe pito tano tol yo mārera tano. ²⁵ Ana siraunia, yua pimi, a womie la mlau keviu, a lagi miyui, mē yuŋa nene, ana yuŋa nene pe mloru re poli, komin naŋa yaru nene pisirlua ruru mēna yuŋa nene e yo mārera naŋa.

²⁶ “Ana la naŋa pe ataveve ruru re sa naŋa nepian amiun rui, la sane yaru tai naŋa kiena sitomena piowa ga, ana pogos naŋa kila mēna yuŋa, kililinaria kana kemraŋe lala su ga metava e none. ²⁷ A siraunia, pupia yua kove, a womie la mlau keviu, a lagi miyui, mē yuŋa nene, ana yuŋa nene mloru. A pogos naŋa mloru, yuŋaena kiena ne yar nene pimi piowa make nenaga.”

Amilan manene Yesu kiena visena nene ŋan wa

²⁸ Siraun naŋa Yesu ŋisin kiena visena la nene, yeririna la amilan paŋisi, ²⁹ komin naŋa la apisuvevea sane kiena visena na pe sa re visena kiena ne kiela navianena navisaluaen la poli, ana kiena visena la urmi paŋisi, a naga suŋa miur ke kiela sitomena lala, a naga pisawal visena sane yaru tai naŋa naŋareraena teke e naga.

8

Yesu kila ruru yaru tai naŋa leperosi se yepena, miania

Mak 1:40-45; Luk 15:12-16

¹ Yesu mligan kunus keviu naŋa naga pian ke yaru la ea, naga pitomi tano, ana yaru la mokliu naŋa atavevea. ² Ana yaru tai naŋa leperosi sike e yepena pimi puna, ana kinai tano pania piunia, pisape “!Suŋe! In na nemlelaga e ko nesape ko na okilia okila ruru inu wo ga, ana visae ko okekara, sineun nesape neviun tan ko vena okila van inu ve sanene.”

³ Ana Yesu pe maraun re yaru naŋa poli vanon kiena maiena nene, ana ŋuarar naga e limana, pisape “Ee, inu sineunia. Poga ga, nesape yepeŋa ikiki.” Ana veraga ga yepena

miania, leperosi nene ĩisi ea. ⁴ Ana Yesu pisa pania, pisape “Omloge ke ne, ovano ve ovisawal re suri nene va yaru lala wa, ana nanagane ga ne ova okom puna yaru wa vena naga kilia visuveveli yepeña. ĩisi na, monar ova okila lotuena va Ntewa, a okila ĩena kuĩaĩaena nene naĩa Mosis pisa sape yaru monar kila vanon suri na sanene, ana siraun naga nene, yaru wa nene naga kilia visawal visave leperosi nene ĩisi rui.”

Yesu kila yaru naĩa yepena komĩasia mare pimi po

Luk 7:1-10

⁵ Ana pogos naĩa Yesu pa loyuña garu pulkumali naĩa Kapeneam, yaru keviu tai kiena ne li na mara lala nae Rom pimi puna, tagi pania, ⁶ pisape “Suĩe, yaru na kilaen kiau yuñaena tai mloru ĩeke e ĩana tog nanagane garu ĩau. Tasnena lepas komĩas mare, ana naga mloge ke piowa paĩisi.”

⁷ Ana Yesu pisa pania, pisape “Ita, tevano. ĩisi na inu nekila ruru si naga loge wo.”

⁸ Ana yerkawa na kilaen mara naĩa pisataĩea, pisape “Suĩe, in na pe nepe yaru wo re tai naĩa netorokin naĩa ko oimi ĩau loyuña poli, sane in na pe nepe yere Yu re poli, ana visae okilia ovisa ga visena tai, nekilia nesape ĩisi na kiau yaru nene kilia loge wo narui.

⁹ In na nekilia naĩa nesape ĩisi na monar ve sanene, vanon nekilia nesape kioña visena naĩareraena keviu sike ea. Naga sane yaru na mara la naĩa asike vatanon inu, naĩa monar alogear kiau visena. Visae nevisavenua ‘Ovano,’ monar tai vano, pona nevisave ‘Oimi,’ monar naga imi, pona nevisave ‘Okila ve sa nene,’ ana naga monar kila. A inu ĩena ga monar nekila ya naĩa kiau yaru keviu pisa pan inu. Ana nemlelaga naĩa visae ko ovisa ga suri tai, ana monar ve sa nene.”

¹⁰ Ana pogos naĩa Yesu mloge kiena visena nene, kila naga milan paĩisi a kekara ĩena ga paĩisi. Ana pisa pan ĩina la naĩa ataveve ke ne, pisape “Nevisa suri na lelaga van amiu, in na pe noĩal re nena ga yaru nae Israel tai naĩa naga piawa ĩarera e inu sane yaru nene poli. ¹¹ Inu nevisawal van amiu sanini, ve le Yu re ga la naĩa akilia aimi loyuña e ĩaĩagena keviu na legiena maro nene. Peraga, ana yokorena yaru la ve moki ve sa yaru nene e yo taĩena lala na yomarava nini, naĩa aimi atotano lele taaga vena akinana amio Epraam, Aisak, a Sekop. ĩisi na la nene na asu ruru silaga ve sanene e nasuĩenena kiena ne Ntewa ma e peni. ¹² Ana le Yu la nene naĩa Ntewa pio la sumo vena ava loyuña, nanagane la pe amlelaga re e inu poli, ana ĩisi na Ntewa koven plan la ava e yemalolo vanua, e yo naĩa yaru la asuña atagi ke ea, akar ke maluela ea.”

¹³ Ana Yesu pisa pa yerkawa na kilaen mara naĩani, pisape “Ko, okilia ova uña. ĩisi na vim van ko ve sa naĩa kioña nalelagaena piawa ke ĩarera ea.” A e ke e pog nene narui, ana yepen yaru na yuñaena nene pimi po sina.

Yesu kila riru anenane wona Pita

Mak 1:29-34; Luk 4:38-41

¹⁴ Ana pogos naĩa Yesu sike garu Kapeneam wa, ana naga pa loyuña ĩana Pita, naga pisu anenane wona Pita naga miava karia, ĩeke e ĩana tog. ¹⁵ Ana Yesu mligan limana te limana ne sira nene, ana miava naĩa ĩisi, ana naga suĩalu, mla kinanena pa Yesu.

¹⁶ A yepekilavi e legiena nene, yaru la aĩure yaru la moki naĩa apimi puna Yesu, yaru la naĩa yermare lala asike e la. Ana naga ĩene plan yermare la nene e ga e kiena visena, a naga kila ruru ĩena ga namaiena lala apimi apo sina. ¹⁷ Suri la nene pimi kakate vena kila visena kiena ne Navisawalena Aisea imi ve lelaga, naĩa naga pisape

“Naga lalua kieta maiena lala,

a naga kuslua kieta yepe lalaea lala.”

Ais 53:4

Yaru la lua sinelan asape ataveve Yesu

Luk 9:57-62

¹⁸ E legiena taĩena sina ga tai, Yesu suña amio yaru la mokliu naĩa la amiervivi naga telivi piora, ana naga sinenan pisape yali vetan la, ana naga pisa pan kiena nalogenena lala, pisape “!Aulai! Ita, teva e lepas nen lapa nene lepas ĩasa.”

¹⁹ Ana asun ke asape avano, ana navianena navisaluaena tai naga pimi, pisaar pa Yesu, pisape “Navianena, ãisi na netaveve ko, e nape naãa ko okom ea ana inu netaveve ko teva ea.”

²⁰ Ana Yesu pisataãnea, pisape “Lokul tetan lala, la ãmala pulus na monena la asuãna ga, a manu ãmena ga lala ãmala ponovi la asuãna ga. Ana inu, Narina ne Yeririna na, pe ãmau yo re tai naãa neva nomomalio e poli. Visae ko okekaran ãmena ga malena na sanene, ko okilia oimi.”

²¹ E ke e pogos nene, ana nalogena taãena kiena ne Yesu tai pisa pania, pisape “Awis ãmara, otaãnan inu neva nevisuar ke ne ata sumo wa, a visae pogos naãa mare pae, ãisi na neimi netaveve ko ga na wa.”

²² Ana Yesu pisa pania, pisape “Ko oimi otaveve inu ga. Ko oligan yeririna la naãa ninula mare rui, vena la asin kiela yaru la naãa la amare.”

Yesu pisi pa lagi amio sive

Mak 5:1-20; Luk 8:26-39

²³ Ana Yesu amio kiena nalogena lala apitomi atol lapa nene narui, ana aãiyu apa e waa tai e yo nene. ²⁴ Ana apa li ga metava pe piavi re poli, pupia lagi tai molue, miyui kila pupia lapa naãani kululu keviu paãisi, ana kila waa naãani siar sape talilu. Ana Yesu ãmeke e waa, naga momalio ruru ga ãmeke na, ²⁵ ana la apito akilaãpegea, apisape “!Suãe, opisu ke ne! Lavisi tetalilu narui, monar otamalia ita.”

²⁶ Ana Yesu pisa pan la, pisape “!Ei! ?Amaraun ke ya ne sanene? Aa, amiu na pe apiawa re nena ãmarera e kiau naãmareraena poli.” Ana naga suãmalu, pialuããar lagi, pisape ve yui re sina, a pialuããar sive, pisape malumu. Ana pog pimi po, amalumu.

²⁷ Ana pogos naãa nalogena la apisu yo pimi pa ruru make nenaga po sanene, ana amilan paãisi, apisape “!Suwala! Yaru nene na pisa ga sanene, ana lagi amio sive lalua amlogear naga. !Yaru nene na pe yaru re nene poli yo!”

Yesu pile plan yermare lala petan yaru lua

Mak 5:1-20; Luk 8:26-39

²⁸ Ana pogos naãa Yesu pimi tol lapa nene lepas ãasa, naga pa gare yo kiena ne le Katara lala. E yo nene, yaru la lua amolue e puluve ãmana ne yaru mare lala, ana la lua aãnal Yesu. Ana la lua nene na yermare lala asike e la, ana la lua ape wowe asirag paãisi, ana kila yaru la amaraun vaen e mrapa nene paãisi. ²⁹ Ana pogos naãa apisu Yesu, lalua apio manene paãisi, apisape “?Ko Narina ne Ntewa, kioãna ya naãa teke e imimi? ?Ko opimin osape ola nakoena van imimi naãa pe kana pog re poli wa, ne?”

³⁰ Ana e yo nene, na ãpegas nen nompui tai asuãna akolkol ãna porotano lavis ga, ³¹ ana yermare la nene atagi, apisa pa Yesu, asape “Visae oãmene plan imimi, awis oligan imimi mava e los nen nompui la ne asike ne.”

³² Ana naga pisa pan la, pisape “Avano.” Ana la amolue petan lalua nene, apa e los nen nompui la naãani. Ana pogos ke nene, nompui la naãani akiriri apano, apitove e yeparpasa tai, amloloru apito tano e pupia lapa nene, atalilu apito akokovio ea.

³³ Ana yaru na visuaren nompui lala apureure apa e kiela pulkumali, apisawal suri la naãa kakate, a ya naãa tol lalua naãa yermare la ase lalua sumo. ³⁴ Ana pogos ke nene, yeririna la punu ga naãa e kiela pulkumali nene apimi apisu Yesu. A pogos naãa apisu naga, apisi ãmarera pania apisape naga ure vetan kiela yo.

9

Yesu kilia viewo mlamulena viowa

Mak 2:1-12; Luk 5:17-26

¹ Ana Yesu ãpasuãe sina amio kiena nalogena lala, amiyai ke ga e waa naãani, ana akusro si lapa keviu naãani, ana aãpasuãe apimi e kiena pulkumali naãa Kapeneam. ² Ana yaru laãpasia akus namaiena tai pimi puna naãa naga tasnena kompãas mare, naga mloru ga ãmeke e ãmana tog. Ana pogos naãa Yesu pisu kiela nalelagaena ãmarera asape Ntewa naga

þisi na iila namaiena nene, naga pisa pania pisape “Naruu, ve sineña kona re. Kioña mlamulena piowa lala, nepiewo þisi rui.”

³ Ana e pogos nene navianena navisaluaen laþasia asuña ga, ana amloge ke visena kiena ne Yesu nene. Ana verakorena la apismumunia, apisape “Yaru nene naga þarnena kare kia wa kiena ne Ntewa rui. Naga pisa ke sanene sa ga naga Ntewa rui.”

⁴ Ana Yesu kilia ña kiela sitomena lala, ana pisape “?Vanon ya ne kiamiu sitomena la pulen sitomena viowa sanene? ⁵ Visae nevisa sanini va yaru nene, nevisavenua ‘Inu nepiewo kioña mlamulena viowa,’ pona nevisa nevisavenua ‘Osuñalu oyali,’ e visena lua nene, tai ñareran na visaena, a tai meme ga navisaena. Visena naþa pisapenua ‘Osuñalu oyali,’ naga ñarera, vanon naþa yaru la apisu kilale asape yaru nene suñalu pona ve suñalu re. ⁶ Ana þisi na nekila suri tai naþa amiu asitom sane Ntewa naga ga taaga kilia kila, komin naþa sineun nesape nekila merarava van amiu naþa sane Narina ne Yeririna naga torokin naþa viewo mlamulena viowa lala e yomarava nini.” Ana Yesu pisa pan namaiena nene, pisa pisape “Osuñalu osilowar moña tog, oyali, ova moña.” ⁷ Ana yaru naþani suñalu, mial pa ñana.

⁸ Ana þina na yeririna la naþa apisu suri nene amarau, a amieluar ñena ga Ntewa vanon naþa naga tañan nañareraena nene pisape yaru tai kilia kila ve sanene.

Yesu pio Matiu pimi taveve naga

Mak 2:13-17; Luk 5:27-32

⁹ Ana Yesu mligan yo nene, naga mial ga pa ña sane. Naga pa ñaga, ana ñal inu neteke tano e lelen kiau yuñaena. Kiau yuñaena e pogos nene, nawarpoloen kilavaru na takis. Ana Yesu pio inu, pisape “Matiu, oimi otaveve inu.” Ana nesuñalu veraga, netaveve Yesu.

¹⁰ Siraunia, Yesu pimi kinana e ñau yuña, ana e pogos nene nepure li nawarpoloen takis la moki, amio yaru viowa taþena lala, apimi atotano, vena akilia akinana veraga amio Yesu a kiena nalogena lala. ¹¹ Ana le Varasi laþasa asike e pogos nene, ana apisu naþa Yesu teke veraga amio yaru la ne sanene, ana apiun tan kiena nalogena lala, asape “?Komin ya ne kiamiu navianena kinana ke veraga amio yaru viowa la ne sanene?”

¹² Ana Yesu mloge kiela visena nene, ana naga pisatañe la, pisape “Yaru la naþa yepela poga ga, pe sinelan re yaru na kilaruruen maiena poli, ana la ga naþa aþar maiena, ana la sinelania. ¹³ Popon amiu asitomyuli kinas nen visena tai naþa teke e Visena Wa, naþa Ntewa pisa, pisape

‘In na pe sineun re kiamiu kuþaþaena la poli,
ana sineun ga nasineyeena se kiamiu malena lala.’

In na pe nepimin re naþa nevio yaru la naþa asitom asape la amesmesu þisi rui, peraga, inu na nepimin ga nesape nevio yaru viowa lala vena ataveve inu.”

Naviunena tai e lepas na monsilena

Mak 2:18-22; Luk 5:33-39

¹⁴ Siraun suri nene, ana nalogena laþasia kiena ne Yoane Nakeena apimi pu Yesu, apiun tania, asape “Sinemimin mesape ovisawal suri nene van imimi. ?Imimi na memonsilu ga silaga vena mekila leniena, a Varasi ñena ga lala akila ke sanene, ana vanon ya ne kioña nalogena lala pe akila re poli?”

¹⁵ Ana Yesu pisatañe la, pisayu naga amio kiena nalogena lala, sane la akekara paþisi pogos naþa naga sike amio la, ana þisi na sinela monar viowa siraun pogos naþa naga ure matan la, ana pisape “?Pogos naþa yaru naþa talopa naga sike e þaþagena amio kiena erau lala wa, amiu asitom asape akilia ataginia? Peraga. Ana e pogos tai, visae nasinekar kiena ne yaru nene laþasia aimi aurelua naga vetan kiena erau lala, e pogos nene narui þisi na kiena erau lala la akilia amonsilu ga vanon nasineyeena.”

Sur viu amio sur marua

¹⁶ Þelaga na monsilena nene, naga þelaga marua na lotuena kiena ne le Yu lala, ana Yesu sinenan pisape kila meraravan van la sape þelaga marua la ne sanene, la taþatete

akilia asikolia amio suri viu la naþa naga pian la ke ea, ana naga pisa þakaiwa tai e lepas nene pan la, pisape “Taþatete ola kinakina kulmrae tai naþa pe urviu ana osuluwo ruru pulus naþa teke e kulsota marua. Vanon naþa kinakina kulmrae viu nene kilia kilaroro kulsota marua nene komþasa, ana kana pulus kilia vim ve keviu la sane.

¹⁷ “Ana taþatete okonkonkia kuruta na munena naþa sirpup pava ke ea wa, vito e kulus nen nani naþa pe urmarua, naþa akonkonkia kuruta na munena pito ea yam moki rui. Ana visae akila sanene, kuruta na munena nene lapa e kulus nen nani nene, ana yukuswinia na mþapoa, ana kuruta namunena naþani lau, ana pias nene naga mþena viowa. Ana kuruta viu monar okonkonkia va e pias viu, naþa mþarera ruru po, ana okilia oligan ruru moþa kuruta na munena nene moþa ga.”

Yesu kila ruru sira kawa tai amio nin sira mþee tai

Mak 5:21-43; Luk 8:40-56

¹⁸ Ana pogos naþa Yesu pisayu ke pa nalogena kiena ne Yoane la sanene, ana yaru keviu nalotena kiena ne le Yu lala pimi lavisi, kinai pito tanon Yesu, tagi pania, pisape “! Awee! Kiau loþnearu mare ga na wa, ana sineun nesape oimi, oligan lumoþa towar naga, vena naga kiena malena imi sina.” ¹⁹ Ana Yesu suþmalu, taveve yaru nene, naga amio kiena nalogena lala apano.

²⁰⁻²¹ Ana pogos naþa Yesu pa ke sanene, ana sira tai suþna ga naþa maiena na kupario teke e naga legiena punu ga pano-o pimi tol kas lualima taaga pa lua rui. Ana naga pisu naþa Yesu mial pimi, naga sitom sape “Visae netol ga mþana kulsaket, vena kiau maiena þisi.” Ana naga kom rana Yesu, pimi tol ga mþana isinen kulsaket.

²² Ana Yesu pilon veraga, pisu sira naþani, pisa pania, pisape “Auia, ve sineþa kona re. Kioþa naviawaena e inu kila ko owo sina.” Ana e ke e pogos nene, maiena naþani þisi e sira nene.

²³ Ana pogos naþa Yesu pa tol yuþa mþana yerkaawa nene, naga pisu yaru la sinela mie manene la sira mþee naþa mare mþeke ne, ana asuþa atagi a amiyaun ke yauena na marena lala. ²⁴ Ana naga pisi pan la, pisape “Amiu amolue, ayal tetai sina. Sira mþee nene na pe mare re nene poli, naga momalio ga ne.” Ana la naþani apitalia kare ga naga.

²⁵ Ana amligan plan yaru la nene apa vanua, ana Yesu pa loyuþa. Naga pa tarar limana sira mþee nene, ana naga suþmalu, mali sina. ²⁶ Ana amlologon suri nene pa e yo make ga, kalo make yo punu ga e lepas nene.

Yesu kila ruru kilamaraþala lua

²⁷ Ana Yesu molue petan yuþa mþana yerkaawa nene, a pogos naþa naga mial ke pano, ana kilamara þala la lua atavevea, la asuþa apio ke, asapenua “Ko lus kiena ne Tepet, ko Navisaarena, awis ko sineþa ye imimi lua nini ka.”

²⁸ Ana Yesu mial pano, pa pa loyuþa e yuþa tai, ana kilamara þala la lua naþani apimi puna. Ana Yesu piun tan la luoka, pisape “?Amiu luoka ga amlelaga e inu, asape nekilia nekila ruru amiu sanene?”

Lalua apisataþnea, apisape “Ee Suþe, imimi memlelaga.”

²⁹ Ana Yesu mligan limana te kilamarala, pisape “þisi na ve sa naþa nalelagaena kiamiu amlua.” ³⁰ Ana lalua kilamarala pimi po ke e pogos nene. Ana Yesu pialuþar mþarera pan la luoka, pisape “þisi na amiu lua ve avisawal re suri nene va yaru lala.” ³¹ Ana lalua amolue petania, ana lalua amlologon suri naþa Yesu kila pan la ne, pano-o kalo make yo la punu ga e lepas nene.

Yesu pilelua yermare petan puru tai

³² Ana pogos naþa lalua nene amligan Yesu apano, yaru taþena lala aþure yaru tai pimi puna. Yaru nene pe puru, vanon yermare sike e naga. ³³ Ana Yesu pilelua yermare nene, ana puru naþa pisi ruru narui, ana yeririna lala sinela kurkur paþisi, apisape “Suwala, pe tepisuli re suri tai e Israel sanene poli wa, þane ga.”

³⁴ Ana Varasi lala apisayu Yesu, apismumunia, apisape “Yeririna nene pile plan ke ga yermare lala e nañareraena naña suñe kiena ne yermare lala naga mla pania.”

Yesu sinen mie yeririna lala

³⁵ Ana Yesu suña mialili ke pulkumali lala, a pian ke yeririna lala e kiela yuña na lotuena lala. Naga pisawal ke nalologena wo nasuñenena kiena ne Ntewa, a naga suña kila ruru ke namaiena lala a la naña tasnela la piowa. ³⁶ Ana pogos naña suña mialili ke yaru la sanene, naga suña pisu ñina lala, naga pisu la sa naña kiela sitomena la pule pañisi, a suri la piowa pan la e kiela malena lala, ana naga sinena mie la pañisi, komin naña asuña ga sa ga nene sane sipsip la naña pe yaru navisuar laen re poli, la amninue asape ñisi na la ave sanape narui. ³⁷ Ana naga pisa pan kiena nalogena lala, pisape “Lelaga, kinanena moki pañisi naña marua sike lokove, ana yaru la lua la ga naña asuña añar ke pitomi uña. ³⁸ Ana amiu na, monar aviun manene tan suñe na lokove nene, vena naga ligán plan re si yaru lañasia la avano vena awar kana kinanena la nene vim.”

10

Li nalogena kiena ne Yesu lala

Mak 3:13-19; Luk 6:12-16

¹ Ana Yesu pio kiena nalogena la lualima taaga pa lua pisape aimi puna. Ana la apimi, ana naga pisi ruru pan la ñisi, a naga mligan plan la apano vena akilia añene plan ninuna viowa e yeririna lala, a vena akilia akila ruru namaiena lala a nainanena viowa tañena lala.² Ana kia kiena ne li nalologena ne la nanini narui:

nasumo, Saemon, naña apio asape Pita, naña naga pe kiela yerikawa, amio wenla, naña Antru,

Semes, naña narina ne Sepeti, amio wenla naña Yoane,

³ Pilip,

Ñatalomiu,

Toñas,

inu Matiu, in na nepe yaru na warden takis,

Semes, naña naga narina ne Alpeas,

Tateas,

⁴ Saemon, naña naga kila manene politik sape kuan plan le Rom lala,

a Sutas nae Kariot, naña siraunia, naga pielua Yesu.

Yesu mligan plan kiena li nalologena lala

Mak 6:7-13; Luk 9:1-6

⁵ Ana Yesu pisi ruru pa la lualima taaga pa lua nene, a siraunia naga mligan plan la apano. Visena wo la nene naña naga pisa pan la nanini, naña naga pisape “Amiu na ve ava re puna ne la naña pe ape le Yu re la poli, a amiu ve ava re e pulkumali nae Samaria lala wa. ⁶ Amiu na avanon ga sipsip nae Israel la naña akilalu mrapa. ⁷ Ana pogos naña avanon la nene, ana monar alogon, avisave ‘Nasuñenena kiena ne Ntewa pimi ke pun ita narui!’ ⁸ Ana amiu monar akila ruru namaiena lala, a monar akila namarena lala aimi amal sina. A la naña leperosi sike e yepela, monar akila yepela la imi ikiki sina, a amiu monar añene plan yermare e yaru lala. Ana yuñaena la nene, ñisi na ayuñae e nañareraena tai naña amla korenan ga, ana amiu monar ala korenan lein ga va yaru lala. ⁹ A amiu na ve awar re kiamiu kilavaru lañasia e kiamiu pultaga lala, ¹⁰ a ve awar re ñena kiamiu karo tai, naña akon ñamiu kulsota tañena lala, a kiamiu kulus nen lamiu tañena lala se ea, a ve awar re ñena kiamiu plagsai vano. Yaru la naña akila yuñaena wo la ne sane amiu, ñisi yaru tañena la naña la amiyuñae pan la, monar avisuar ruru la vanonia.”

¹¹ Ana Yesu pisa ñena ga, pisape “Pogos naña amiu avano-o atol pulkumali tai, ana monar akale yaru tai naña kekarán naña were amiu ava ñana, ana asuña ga ñana, vano vano-o tol pogos naña amiu avatani si pulkumali nañani. ¹² Ana pogos naña avano asike

mratava m̃ana yaru nene, ana monar atalopan ruru la, avisavenua ‘Suṃare sike amio amiu.’¹³ A visae mratava nene kila wo van amiu, ana suṃare naṓa apisa ana ṓisi na sike amio la, a visae la akila viowa ga van amiu, ṓisi na suṃare nene wasuṓe ke sina ga, vim van amiu.¹⁴ Ana visae yaru laṓasia yepela mavin were amiuena ava m̃ala uṃa, pona yepela mavin loge amiuena, ana popon aligan ruru mratava nene pona pulkumali nene m̃eke na. Ana pogos naṓa amolue e yo nene, amiu atanvan puluyavi nae e yo nene naṓa sike e lamiu, sane kiamiu visena m̃arera tai ne pan la ne, pisape ṓisi na la akus nakoena naṓa mesmesun ga kiela ṓelaga viowa la nene.¹⁵ Lelaga naṓa nevisa meraravan van amiu, e legiena na liṓereena, ana la nene na m̃arera la van la, taulu naṓa Ntewa mliṓere le Sotom amio le Komora lala nanua sumo.”

ṓisi na yaru la aṃene nalogena kiena ne Yesu lala

Mak 13:9-13; Luk 21:12-17

¹⁶ Ana Yesu pisa pan la, pisape “Amiu asitom ruru wo. Inu neligan plan amiu avano, a amiu ala limamiu ga ava sanene, amiu na sa ga sipsip la naṓa asike likan ṓegas nen lokul tetan lala. Visae sanene, ana monar ave manmarua ruru wo, a amiu monar amoṃau ruruia.¹⁷ Ana monar avisuar ruru amiu, vanon naṓa saṓisi yaru lala aure amiu ava kiela kumali, a e kiela yuṃa na leniena lala, vena avis van amiu, ana ṓisi na ala nakoena van amiu, a avisuaria saṓisi awe amiu.¹⁸ Ana ṓisi na aligan amiu ava asuṃalu ase marana ne yerikawa na purvanua vanon ga naṓa amiu ape kiau nalogena lala, a e pogos nene amiu akilia avisawal kiamiu nalelagaena e inu e maran la nene a e marana ne la naṓa pe amlelaga re e Ntewa poli.¹⁹ Ana pogos naṓa la nene aimi aure amiu, ana amiu na ve asitom manene re avisave “ṓisi na nevisa sanape ne, a nevisa ya ne van la ne?” vanon naṓa ṓisi na Ninuna Wa naga la visena na visawalena van amiu naṓa avisa, mesmesun e pogos na visena.²⁰ A pogos naṓa amiu avis, ana pe kiamiu visena re nene poli, ana visena kiena ne Ninuna ne Arimamiu naṓa naga visi e amiu.

²¹ “E pogos m̃arera nene, ṓisi na yaru kilia taṃan yaru viowa taṓena la nene la aimi aurelua wenla ruru naapo pona narina ruru naapo, vena awe moṃar la amarmare, nanene komin naṓa la nene amlelaga e inu. A nisisi lala la m̃ena ga akilia asuṃalu avisawal anela lala a arimala lala naṓa la amlelaga e inu, vena la m̃ena ga amare sanene.²² Ana ṓisi na yaru lala ve sinelan amiu re sina, akawe kiamiu visena silaga, vanon kiau kia teke e amiu, a yaru naṓa suṃalar m̃arera suṃa ga vano-o pog m̃arera nene ṓisi, ṓisi na Ntewa tamalia naga.²³ Ana pogos naṓa la asuṃa aṃene manene amiu la e pulkumali tai, amiu monar aure ava e pulkumali taṓena, a visae aṃene amiu ke sina ga e yo nene, amiu monar aure sina. Ana nevisa ruru van amiu, nesape kiamiu yuṃaena nene e pulkumali nae Israel lala, ṓisi na ve ṓisi ruru re wa ana Narina ne Yeririna vim warpoyo ke sina ga.”

²⁴ Ana Yesu pisa, pisape “Naloge-na, naga pe to re metavan kiena navianena poli, a yaru na yuṃaena, naga pe to re m̃ena metavan kiena suṓe poli. Ve sanene, amiu na ve asitom re avisave ṓisi na taṓatete m̃arera van amiu pogos tai,²⁵ komin ṓelaga m̃arera naṓa la akila va navianena, ṓisi na la akila ke m̃ena ga va nalogena, a suri m̃arera la naṓa suṓe naga kusia, ṓisi na kiena yeririna naga m̃ena ga monar tolia. Sa naṓa yaru la apio kare inu, naṓa in na nepe yerikawa e m̃au mratava, apisape in na Pielsipel, naṓa naga pe suṓe kiena ne yermare lala, ṓisi na la akilia avio kare amiu la sane na wa, amiu la naṓa ape kiau e mratava taaga.”

Nalogena kiena ne Yesu taṓatete maraun yaru lala

Luk 12:2-7

²⁶ Ana Yesu pisape “Vanon naṓa ṓisi na avis viowa van amiu ve sa ke ga naṓa apisi piowa pan inu, ana amiu ve amaraun la re. Suri viowa la punu ga naṓa yaru lala akila vinaunia, pona apisawaniga, ṓisi na vim kakate e yometava na wa, vena yaru la punu

10:14 Yuṃaena 13:51 10:15 Mat 11:24 10:15 Luk 10:4-12 10:16 Luk 10:3 10:17 Mak 13:9-11; Luk 12:11,12, 21:12-15 10:21 Mak 13:12; Luk 21:16 10:22 Mat 24:9; Mak 13:13; Luk 21:17, Mat 24:13; Mak 13:13 10:24 Luk 6:40, Yoan 13:16, 15:20 10:25 Mat 9:34, 12:24; Mak 3:22; Luk 11:15 10:26 Mak 4:22; Luk 8:17

ga akilia. ²⁷ A amiu m̄ena ga, suri wo la naḗa nesuḗna nepisa ke pan amiu e yemalolo, amiu monar avisawal ke sina ga e yomerarava, a suri la naḗa nesuḗna nepragogon ke ga e kiligamiu, amiu na monar avion manene va metava e maran yeririna lala, vena yar punu ga akilia aloge.

²⁸ “Ana amiu na ve amaraun re yaru la naḗa akilia aweḗnar tasnemiū mare, komin naḗa la taḗatete aweḗnar ninumiū mare. Ana amiu na monar amaraun ga Ntewa, naḗa naga kilia kilalele kare tasnemiū amio ninumiū luwoka e lele naloge viowaena. ²⁹ Amiu asitoḗmalia. Ninlaea la ne akaka ke la ne, la moki paḗisi, sa ga kororaki ga, a la asuḗna aḗiliwilin ke lua e narin kilavaru ga tai, ana visae tai loru vitove tano e porotano, ana Arimamiū naga kilia m̄a ga. ³⁰ A vilḗarimiū m̄ena ga moki paḗisi, ana Ntewa naga poloar make ga peve taaga, naga kilia la m̄aga. ³¹ Sanene, ana amiu ve amarau re, vanon naḗa Ntewa pisu amiu na po manenea taulu ninlaea la nene, ana ḗisi na naga kilia visuar ruru amiu e suri punu ga e kiamiū malena.”

Yaru naḗa naga pisawal pisape naga pe kiena ne Yesu

Luk 12:8-9

³² Ana Yesu pisa pisape “Yaru naḗa naga visawal e marana ne yaru lala visave naga pe kiau yeririna tai, ḗisi na inu m̄ena ga, nevisawal naga e marana ne Ata naḗa ma e peni, nevisave yaru nene pe kiau. ³³ Ana yaru naḗa visawal e marana ne yaru lala visave naga pe pe kiau yeririna re poli, ana inu m̄ena ga nevisawal e marana ne Ata naḗa ma e peni, nevisave yaru nene naga pe pe kiau yeririna re poli.”

Yesu naga pe purḗes nen kaween visena

Luk 12:51-53

³⁴ Ana Yesu pisape “Amiu na ve asitom re avisave inu nepimin naḗa nekila sane pupia suḗnare pimi sike e yomarava nini. Peraga, inu pe nepimin re ga neligan suḗnare e poli, ana inu nepimi nemio playu na kilaen mara tai, naḗa ḗisi na yaru la aveveyu la, a akila mara van la vanon inu. ³⁵ In na nepimin nesape nekila sane ḗisi na yaru m̄ee lala akawe visena kiena ne arimala lala, a sira m̄ee lala akawe visena kiena ne anela lala, a sira la naḗa atalopa ga na wa, ḗisi na akawe visena kiena ne anela simem lala. ³⁶ ḗisi na la naḗa sinela kari manene kiau nalogena lala, naga pe yaru taḗena re la poli, yaru na mratava ga m̄ala lala.”

Yesu naga sumo e malena kiena ne kiena nalogena lala

Luk 14:26-27

³⁷ Ana Yesu pisa, pisape “Yaru naḗa sitom manene la arimana, pona anena, pona narina, taulu naḗa naga sitom inu, yaru nene naga mesmesun re imi sane ve kiau nalogena poli. ³⁸ Ana visae yaru tai naḗa ve kus re kiena laktorovia taveve inu, sane naga pe taḗan re naga loge viowa vanon inu poli, yaru nene taḗatete imi ve kiau nalogena. ³⁹ Visae yaru tai naḗa naga sitom manene la kiena malena, yaru nene naga ḗisi na kilalu kiena malena nene. A visae kiau nalogena tai naga kilalu kiena malena vanon inu, ḗisi na naga tol malena naḗa taḗatete ḗisi.”

La naḗa avisuar ruru nalogena lala, ḗisi na la atol kiela nalaena

Mak 9:41

⁴⁰ A Yesu pisa, pisape “Visae yaru tai naḗa were amiu ava m̄ana loyuḗna, nanene sa ga naḗa ḗere inu ke ga nepa m̄ana loyuḗna ne. A visae yaru tai were inu neva m̄ana loyuḗna, ana nanene sa ga naḗa pere ke ga naga naḗa naga mligan inu nepimi, pa ke m̄ana loyuḗna. ⁴¹ Visae yaru tai were navisawalena tai pona yaru mesmesu tai ne sanene va m̄ana loyuḗna, komin naga kilia ke sape yerkawa nene naga pe yaru wa nayuḗnaena kiena ne Ntewa, yoko naga kus ke ga nalaena torokin naḗa yoko Ntewa la va kiena yerkawa la nene. ⁴² A inu nevisa ruru van amiu sanini, visae yaru tai naga la piala na wii manini ve

taaga va kiau nalogena tai, naþa naga pe sitom re pisape nalogena nene naga pe yerkawa tai poli, pona yaru tai naþa naga to ga tano, þisi na yaru nene la kiena nalaena tai komin suri wo nene naþa naga kila pa kiau yeririna tai.”

11

¹ Ana pogos naþa Yesu pisa ruru pa kiena nalogena la lualima taaga pa lua nene þisi, naga mligan yo nene, ana naga pa e pulkumali nae Kalele lala, vena vian la a lologon van la.

Nalogena kiena ne Yoane Nakeena lala apimi

Luk 7:18-23

² E pogos nene, Yoane Nakeena sike e yuþna nakoena, a naga mloge ke yuþnaena la naþa Kristo kila ke ne, ana naga mligan kiena nalogena laþasia, ³ apanon apiun tan Yesu, apisape “?Sanape? ?Ko na yaru nanua apisa ke sumo asape þisi na yaru keviu tai imin vena ve kieta nasumonena, pona pe naga re nane ko poli, ana imimi na monar mesuþmate laa na wa, þisi na yaru nene imi?”

⁴ Ana Yesu pisataþne la, pisape “Awasuþe amiu sina, ava ke ga puna ne Yoane, a avisawal vania e suri la naþa amiu apisuia naþa nemiyuþnaen ke e yo nini, a suri la naþa apisayu inu ke pan amiu, sane suri la naþa Navisawalena Aisea naga pisayu sumo rui, naþa naga pisape:

⁵ *‘Kilamaraþala lala, nanagane akirava si rui,*

a yaru la naþa ape lapele a ape laulu, nanagane akilia amial po si narui,

a yaru la naþa leperosi sike e yepela, nanagane yepela pimi mian ruru si narui,

a yaru la naþa ape kiligapoþe, nanagane amloge si suri narui,

a yaru la naþa amare, nanagane amal si rui,

a yaru la naþa limala korena ga, nanagane nemlologon ke Nalologena Wo pan la rui.’ Ais 35:5,6

⁶ “A amiu avano avisa mþena va Yoane, avisave ‘Yaru naþa pe kiena sitomena pe peve lua li re e inu pogos tai poli, þisi na navisa ruruena sike e naga.’ ”

Yesu pisayu Yoane Nakeena

Luk 7:24-30

⁷ Ana pogos naþa nalogena kiena ne Yoane Nakeena lala amolue vena awasuþe sina, Yesu pisayu Yoane nene pa yaru la naþa asike ne, pisape “?Nanua sumo na, pogos naþa amiu apa e yokorena nene, amiu na apanon apisu ya? !In na pe nesitom re naþa nesape amiu apanon apisu kiai na yokorena la naþa lagi miyuia ana kulkulul luen ga poli! ⁸ A pe nesitom re mþena ga nesape amiu avanon vena avisu yerkawa tai naþa naga miyowau ruru po poli, komin yaru la ne sanene ana taþatete ase lele viowa tai sane yokorena nene, ana silaga asike ga e pupia yuþna wo mþana ne suþe kerkeviu lala. ⁹ ?Peraga, ana in na nesitom ke nesape amiu apanon ke vena avisu navisawalena tai, ne? Ee, ana naga nene na poga ga ne, ana inu nevisa van amiu, yaru nene naþa amiu amoluen apa apisu naga, naga to laa metava, taulu navisawalena nasumo lala, ¹⁰ komin Ntewa naga pisayu Yoane nene sumo rui e kiena Visena Wa, naþa naga pisape

‘In na nemligan kiau navisi pimi sumon ko, vena kila ruru kioþna mrapa.’

Mal 3:1

¹¹ “Lelaga nevisa van amiu sanini, e yomarava nini, Yoane Nakeena naga to la metavan yaru taþena la punu ga. Ana yeririna la punu ga naþa þisi na la ava loyuþna e nasuþenena kiena ne Ntewa, vano-o tol kiela yaru naþa su maro la garo tano, la punu ga nene la apa la metavan Yoane, naþa la awar kiela navisa ruruena kiena ne Ntewa pa laa taulu naga. ¹² A siar e pogos naþa Yoane Nakeena siar mlologo, pimi tol nanagane, yaru lala asuþna akawe ke nasuþenena kiena ne Ntewa, a nasinekar mþarera na kilaen mara lala la mþena ga akilali naþa atauluia. ¹³ Nanua sumo manene la, pimi tol pogos kiena ne Yoane, navisawalena lala, a navisaluaena naþa Mosis siria, ana la apisayu suri la moki naþa kilia kakate sirau. ¹⁴ A visae amiu akekarana alelaga e suri la nene naþa þisi na aþalivi sirau, ana þisi na amiu akilia avisu kilale naþa Yoane Nakeena naga pe Elaisa nene, naþa la apisaaria sumo

rui apisape ĩisi na naga monar wasuĥe sina ga imi. ¹⁵ A visae kiligamiu toĥa ga, popon ayagogon ruru kiau visena la nene.”

Yesu pisi ĥarera pan kiena teras lala

Luk 7:31-35

¹⁶⁻¹⁹ A Yesu pisi pa laa sane, pisa pisape “?Ana ĩisi na nevisawal visena ya naĥa kilia tol ĥelaga kiena ne yeririna na nanagane lala? E lepas punu ga naĥa Ntewa naga kila vena kilali wo van amiu, ana amiu yepemiu mavin ga, amiu apisa kare ga naga vanonia. Komin pogos naĥa Yoane naga pimi sike ga wa, ana monsilu ga pe kinana re poli vena len, a naga palia ĥena ga kuruta na munena, pe mun re poli, ana yaru la apisu naga sanene, la apismumun naga, apisape ‘Yaru nene yermare pa e naga.’ A pogos naĥa Narina ne Yeririna naga pimi sike na, naga kinana ruru ga a mun ruru ga, sa ke ga yaru taĥena lala, ana yaru la apismumun naga, apisa apisape ‘Opisu ke ne, yaru nene naga pe yaru na kinan merorolen paĥisi, a pe yaru na munena ĥena kuruta na munena paĥisi, a naĥa naga kiena erau lala na, la ape yaru nawarpoloen ga takis, a ape yaru viowa ga lala.’

“Komin suri ne nanene narui, inu nepisu amiu yeririna na nanagane lala naĥa amiu na sa ga sisi lala naĥa visae asuĥa akirakirai e yometava na kumali, ĩisi na la asuĥa aviovion va kiela erau lala, avisave ‘!E, amiu na apiowa nene! Visae imimi mesuĥa mowe plaĥe, ana amiu ve awol re amio imimi, a visae imimi meyaun yauena na marena, ana amiu ve atagi re amio imimi.’

“Ana suri punu ga naĥa la amolmolue e namanmaruaena kiena ne Ntewa, sumonia yaru la mokliu naĥa apisu sane piowa ga, ana siraunia ĩisi na Ntewa naga kila imi merarava sane kiena manmaruaena nene naga mesmesu a naga pe lelaga ruru nenaga.”

Yesu pisaar ruru pa la naĥa pe amlelaga re e naga poli

Luk 10:13-15

²⁰ Ana Yesu pisaar ruru pa yeririna lala na pulkumali la punu ga naĥa naga kila kile la moki pan la, komin naĥa apisu kiena suri la nene rui, ana pe apilon la re poli. ²¹ Naga pisa pisape “Yaru nae Korasin lala, amio yaru nae Petsaeta lala, amiu na akila kare amiu keviu paĥisi wa! Visae le Taea amio le Saeton la nanua sumo, ana la avisuli ga kile la naĥa amiu apisu ĩisi rui, pona avilopu la nanua sumo yo rui. La pe ape le Yu re poli, ana ĩisi na vera na ayen ĥililis nen karo, a pona la akuwani posnoyavi e ĥarila yo rui, vena yaru la avisu kilale sane amloge kemua piowa lelaga vanon kiela mlamulena piowa lala. ²² Inu nevisa mesmesun van amiu, e legiena na liĥereena, ĩisi na kiamiu nakoena naĥa van amiu taulu naĥa van la nene. ²³ !Ana amiu le Kapeneam lala, naĥa amiu asuĥa aĥarwar amiu, a naĥa sinemiun asape amiu ato manene metava, ana amiu avisuar amiu! ĩisi na Ntewa koven plan amiu ato tano, ato tano vaĥisi e pulukapi. Visae le Sotom lala la avisuli ga kile la nene naĥa amiu apisuia, vera na la apilopu la rui, a vera na pupia kapi nae ma e peni nene taĥatete kekan kiela yo nene kovio. Ana amiu apisu pa kile la nene rui, amiu pe apilopu amiu re nena poli, ²⁴ nane nevisa van amiu, e legiena na liĥereena, ĩisi na Ntewa naga sinena ye la manenea taulu amiu.”

Yesu pisa potena pa Arimana

Luk 10:21-22

²⁵ Ana e pogos nene, Yesu mlen, pisa pisape “!Ata-o, ko ope Suĥe nae ma e peni a Suĥe nae yomarava nini! Nevisa potena van ko, Ata, vanon naĥa ko opian suri la naĥa e inu pan la naĥa kiela sitomena sa ga nisisi lala, ana yaru la naĥa asitom asape ape manmarua a la naĥa asitom asape akilia ruru suria, ko okilawan suri la nene van la. ²⁶ Lelaga, Ata, nanene ve sa ga naĥa ko sinoĥania.”

²⁷ Ana Yesu pisa ĥena ga, pisape “Arimau naga mligan make suri la punu ga e luĥau ĩisi rui. A Arimau naga taaga naga kilia ruru inu, a inu naĥa nepe narina, in ga taaga ga nekilia ruru naga. Inu nemio la naĥa nemligan la vena nekilogia Arimau van la vena awasinea, ana imimi ga nene mekilia ruru naga naĥa naga pe Arimamimi.”

“Amiu aimi pun inu vena ava ruru amiu”

²⁸ Ana Yesu pisa mēna ga, pisape “Amiu punu ga naŕa amiu sinemiu mare paŕisi vanon naŕa amiu asuŕna aŕar ke suri urmi lala e kiamiu malena lala, amiu aimi, amiu aimi pun inu, vena nekilia nekila amiu ava ruru amiu. ²⁹ Amiu alarar kiau visena lala ve sa naŕa ŕeligas tai e kiamiu malena, a amiu alarar kiau ŕelaga lala, vanon naŕa inu na nepe yaru moŕnau tai, a kiau sitomena to ga tano. Sanene, ŕisi na amiu alual naŕa kiamiu sitomena lala varuruia, ³⁰ vanon naŕa kiau vianena lala ameme ga a amelala ga, a suri la naŕa ŕisi na inu nowar van amiu vena amiu awaria, ŕisi na naga taŕatete urmi manene van amiu.”

12

Yesu naga pe suŕen Legiena Wa

Mak 2:23-28; Luk 6:1-5

¹ Ana e legiena taŕena si tai, naŕa naga pe Legiena Wa, Yesu amio kiena nalogena lala amial apano, ana kiela mrapa pa ga likan lokove na wit lala. Amial ke sanene, ana kiena nalogena lala viso kar la, ana apeve plan mras nen wit laŕasia vena akania. ² Asiar akila ke sanene, ana Varasi la ŕasia asike e yo nene, ana apisula mŕaga, ana la apisi pa Yesu, asape “!Ei, opisu ke ne! Kioŕna nalogena lala la asuŕna aŕar ke kinanena e lokove sanene, la asuŕna amiyuŕnae ke e Legiena Wa ne, a visae ve sanene, la asu mŕa akilaro ke kieta navisaluaena ne.”

³ Ana Yesu pisataŕne la, pisape “?Ana, sanene yo, pona amiu pe apuloli re Tusi Wa pogos tai poli yo, e suri la naŕa ŕarin Suŕe Tepet naga kila sumo? Naga amio kiena yeririna lala viso kar la paŕisi, ⁴ ana naga pa loyuŕna e silparpara wa mŕana Ntewa, ana naga mla kilaparavi wa nene naŕa Navisaluaena pisape yaru wa ga lala, la akilia akania, ana Tepet mēna ga la akania. ⁵ ?Pona amiu na pe apulo re mēna Navisaluaena kiena ne Mosis poli yo, naŕa e Legiena Wa punu ga, yaru wa lala, la monar ava loyuŕna e Yuŕna Wa mŕana Ntewa vena akila kiela yuŕnaena la ea? Sanene na, la akilaro ke Navisaluaena naŕa pialuŕar ke sape yaru ve yuŕnae re e Legiena Wa ne, ana Ntewa naga pisu suri nene ana pe sitom re pisape suri viowa tai nene poli. ⁶ Inu nevisa van amiu, nesape nasuŕenena viu tai sike nanagane, naŕa naga to laa metava taulu navisaluaena na Yuŕna Wa mŕana ne Ntewa, ⁷ ana naga sa naŕa e Tusi Wa, Ntewa pisa pisape

‘Inu na pe sineun re kiamiu kuŕaŕaena la poli, ana in na sineun ga ŕelaga na sineyeena.’ Ose 6:6
?Pona amiu na aminue ke kinas nen visena nene wa? Visae amiu akilia, a ŕisi na amiu taŕatete asuŕna aliŕere kare kiau nalogena la nene naŕa pe akila re ŕelaga viowa tai poli.

⁸ Narina ne Yeririna, naga ke naŕa pe suŕen Legiena Wa narui.”

Yesu miyuŕnaen ruru limana yaru tai

Mak 3:1-6; Luk 6:6-11

⁹ Ana Yesu molue e yo nene, mial pano, ana pa loyuŕna e kiela yuŕna na lotuena tai. ¹⁰ E yo nene, yaru tai sike ea ana naga limana ve tokak, a pe lima mare, ana yaru mēna ga laŕasia naŕa asuŕna ga sinelan asape alual li suri laŕasia naŕa Yesu naga kila na pe mesmesu re poli yo. Ana yaru la nene apiun tan Yesu, asape “?Sanape, kieta navisaluaena pialuŕar yuŕnaena na kilaruruen tas nen yaru e Legiena Wa, pona pe pialuŕar re poli? !Ovisali suri nene!”

¹¹ Ana Yesu pisataŕnea, pisape “Visae yaru tai kiena sipsip ve taaga ga, ana e Legiena Wa tai, kiena sipsip nene va loru vitove e ŕiliŕili tai, amiu asitom asape ŕisi na yaru nene taŕatete va werelua sina? !Ee, ŕisi na ita punu ga monar tekila sanene va kieta suri mali lala! ¹² Ana visae mesmesu ga ve sanene e kieta navisaluaena vena teiila kieta sipsip tai sanene e Legiena Wa, ana sanene ita tekilia tekila mēna ga yuŕnaena naiilaen yaru taŕena e Legiena Wa, komin yaru naga po taulu sipsip.”

¹³ Ana Yesu pisa pa yaru naŕa limana mare, pisape “Okian mesmesun lumoŕna.” Ana yaru naŕa kila sane Yesu pisa, kian mesmesun limana, ana limana pimi po sina, sa ke ga

limana kompas. ¹⁴ Ana Varasi la naþa asike e pogos nene apielue, ana amolue apa vanua, vena avisayu sanape naþa akilia aweñar Yesu mare.

Yesu naga pe yaru nayuñæna kiena ne Ntewa

¹⁵ Ana Yesu kilia ña naþa Varasi lala asape awe naga, ana naga molue e yo nene, amio yeririna la moki naþa atavevea. Ana naga suña kila ruru ke namaiena lala, ¹⁶ ana naga pisi ñarera pan la, naga pisaluþar la pisape la ve avisayu re naga va yaru taþena lala.

¹⁷ Naga kila sanene vena visena kiena ne Ntewa tai vim ve lelaga, naþa Navisawalena Aisea pisawal sumo rui, a visena nene pisa sanini, pisape

¹⁸ “Nanene yaru naþa naga miyuñæ kiau, naþa in na nemligan lua naga.

In na nesitom naga paþisi, a kiau sitomena kekaran naga paþisi.

Þisi na inu neligan Ninuu van naga, vena naga visawal þelaga mesmesu lala va yolai lala na yomarava nini.

¹⁹ *Þisi na naga taþatete visin sinekar van yaru, pona visi molmolue va þisi, a naga taþatete koven visena ve moki e yo metava.*

²⁰ *Ana naga taþatete telua kiai naþa poroli þisi rui, a naga taþatete vilonñar kapi vivaga naþa lavis mare rui.*

Naga þisi na yuñæ ña sanene vano vano-o, tol naþa þelaga mesmesu suñalu ñarera taulu nena þelaga viowa.

²¹ *Ana þisi na yolai lala na yomarava nini, la alelaga ñarera e naga, avisave þisi na naga tamalia la.”*

Ais 42:1-4

Apisa apisape Yesu myuñæ e nañareraena kiena ne Yermare

Mak 3:20-30; Luk 11:14-23, 12:10

²² Ana yaru lala asumon yaru tai naþa yermare pa e naga pimi puna Yesu. Yermare nene kila naga pe kilamara þala, a pe puru ñena ga, ana Yesu kila ruru si kilamarana amio pulgona apimi apo sina. ²³ Ana yeririna la naþa apisu suri nene amilania, a sinela kurkuru paþisi, ana apiun ke sina ga tan la, apisape “!E! ?Yaru nene naga narina ne Tepet naþa tesuñate ke yo, pona peraga?”

²⁴ Ana pogos naþa Varasi lala amloge visena kiena ne yeririna la nene, ana apielue paþisi, naþa apisape “Yaru nene ñene plan yermare lala e ga e nañareraena kiena ne suþe kiena yermare lala, naþa Pielsipel, naga tañan pania.”

²⁵ Ana Yesu mlogekilale ña kiela sitomena nene, ana naga pisa pan la, pisape “Visae suþe tai, kiena yeririna lala aliþerela, naþa laþasia akawe si visena kiena ne lala komþasia, þisi na suþe nene kiena yuñæna lala monar loloru ga vito sike na; a visae pulkumali tai pona mratava tai, kiela yeririna lala aliþerela, naþa sane laþasia sinelan asape añene plan si laþasia, þisi na yeririna la nene taþatete asu ruru pogos tai. ²⁶ ?A sa ñena ga nini, visae yermare lala kiena ne Yermare Lego, laþasia añene plan ke sina ga lala þasia, nanene na kana kinasia sane amlipere la þisi narui, ana nasuþenena kiena ne Yermare Lego naga yoko suñalu ve sanape ne? ²⁷ !Ana amiu na apisa ke asape sanene narui, asape in na nesuñæ neñene plan ke yermare taþena lala e nañareraena kiena ne pupia yermare naþa Pelsepel, ana pe sa re nena nene poli! Ana visae ve sa naþa amiu apisa, sanape na amiu ñena laþasia naþa añene plan ke yermare lala? ?Ane mla nañareraena nene pan la, pona Yermare Lego ñena yo? A popon visae kiamiu nalogenala naþa añene plan ke yermare lala, la alogeveveruruli kiamiu visena la nene. ²⁸ Ana peraga, amiu apisa suri nene na pe mesmesu re poli. Inu na neñene plan ke ga yermare lala e nañareraena kiena ne Ninuna Ntewa, ana suri nene na sane nasuþenena kiena ne Ntewa sike likan amiu pisi rui.

²⁹ “!Amiu na apisu ke ne! Visae yaru tai sinenan ke pisape va loyuñæ ñana ne yaru ñarera tai, vena vinaun kiena suria, naga monar war kilika viar ke ne yaru nene sumo wa, þisi na naga kilia va loyuñæ ana war plan make kiena suria. Ana in na nekila ke sanene pa yaru ñarera nene naþa Yermare Lego.

³⁰ “Yaru naþa pe taveve inu re poli, naga suwo inu ke ne, a yaru naþa pe miyuñæ re

amio inu poli vena moure kiau yeririna lala aimi lele taaga, naga sane suña m̄netetain la ke ne. ³¹⁻³² Ana sanene narui, in na nevisa van amiu, mlamulena viowa lala, a visena viowa lala, a visena naña kila kare Narina ne Yeririna, Ntewa naga kilia viewo yaru vanonia, ana yaru naña pisayu kare Ninuna Wa, naña pisa pisape kiena yuññaena naga Yermare Lego ga miyuññaena, yaru na sanene, Ntewa tařatete viewo naga pogos tai, e pogos na tesike e ne, a e pogos naña pimi ke sirau.”

Purlaki amio kana mrasnena

Luk 6:43-45

³³ A Yesu pisa m̄ena ga, pisape “Ita tekilia tevisu kilale purlaki lala e mrasnena naña ařaria. Purlaki naña kapuru po, naga mrasa m̄ena ga po, ana purlaki naña piowa ga, řar m̄ena ga mrasa naña piowa ga. ³⁴ A malena kiena ne yeririna naga sa ke m̄ena ga nene, naña e losinena naga sane pe purřes tai, a visena la naña amolmolue e kiena malena, la sane mras la naña amolmolue ke e purřes nene. ?A inu nepisu kiamiu purřesia menunu řisi rui, ana sanape naña yoko mras wo lařasia kilia molue kome kiamiu visena lala? ! Amiu na ape lus kiena ne loñara kemua lelaga narui! ³⁵ Yaru naña po, řarpolo suri wo lala sike e losinena, ana silaga naga kiena sitomena wo toñga ga naña kilia lalua va yaru. Ana yaru viowa, naga suña řarpolo suri viowa lala sike e losinena, ana naga tařatete kilia lalua kiena sitomena wo tai pogos tai.

³⁶ “Inu sineun nesape amiu akilia naña e legiena na liřereena, ana yaru la punu ga monar akila navisawalena tai vanon kiela visena viowa la veve taaga naña apisa e kiela malena lala, ³⁷ vanon naña řisi na Ntewa naga liřere kioñga malena e ga e kioñga visena lala. Nanene, vanon naña kioñga visena lala akilia akila ko vena omal, pona akila ko vena owar nakoena.”

Yerkawa lařasia la sinelan asape avisu kile

Mak 8:11-12; Luk 11:29-32

³⁸ Ana navianena na navisaluaena lařasia, amio Varasi lařasia, apisa pa Yesu, apisape “!Ei, ko naña apio ko ke asape Navianena, imimi sinemimin mesape okila kile tai van imimi vena imimi mevisu kioñga nañareraena.”

³⁹ Ana Yesu pisatañe la, pisape “Yaru la naña sinelan ga asape avisu kile la sanene, la ape yaru viowa la pařisi, akila ke wowe pa Ntewa sane la naña akila ke kolau. Peraga, řisi na tařatete amiu avisu kile tai, ana kile naña kiena ne Navisawalena Sona sumo, naga ga nene na akilia avisuia. ⁴⁰ Sona nene m̄eke e loñeřen pupia ika lesumsum nene pano-o tol legiena telu a lemalo telu, ana řisi na ve sa ke m̄ena ga nene e Narina ne Yeririna, naña řisi na naga m̄eke e los nen porotano vano-o tol legiena ve telu a lemalo ve telu. ⁴¹ Ana la nae Ninive nanua sumo amloge visena kiena ne Sona narui, ana apilopu la, a e legiena na liřereena, řisi na la nene asuñmalu avisa lologia kiamiu naviowaena lala, komin naña yaru tai naña naga to laa metavan Sona naga sike amio amiu nanagane, ana amiu na pe apilopu amiu re nenaga.

⁴² “Nanua m̄ena ga sumo, ana sira kawa tai naga pe řarin suře tai, naña naga mligan kiena purvanua naña sike koperina pařisi, ana pitomi tano vena loge visena namanmaruaena kiena ne řarin Suře Solomon. Ana sira kawa m̄ena ga nene řisi na suñmalu e legiena naliřereena, naga visa lologia kiamiu naviowaena lala, komin naña yaru tai naga pe manmarua to laa metavan Solomon sane, naga sike amio amiu nanagane, ana amiu na pe sinemiun re nenaga.”

Ninuna viowa naga kilia wasuře sina

Luk 11:24-26

⁴³ Ana Yesu pisa m̄ena ga, pisapenua “Pogos tai, pogos naña visae añnenlua yermare e yaru tai, yermare nene kilia va yoñmarua vena kaleli yo tai naña va se ea vena ve m̄ana uñña. Ana visae ve lual re, ⁴⁴ řisi na naga visavenua, ‘A, řisi na nevito li si e m̄au uñña

marua na sumo wa.’ Ana pogos naña naga wasuþe vitomi, þisi na naga vitomi wal yuñna naña mon korena ga, ana merarava po paþisi, a akila ruru make suri la e yuñna naña þisi rui. ⁴⁵ Ana naga kilia wasuþe sina va were si yermare taþena lala ve olua, naña la apiowa manene la taulu naga sane, atomi amio naga, ana akilia ava si asike e los nen yaru nene. Ana yaru nene, nanua sumo kiena malena piowa, ana siraunia kiena malena viowa la sane. A þisi na ve sa ke mñena ga nene e malena kiena ne yaru viowa nanagane lala.”

Yesu, anena amio wenla lala
Mak 3:31-35; Luk 8:19-21

⁴⁶ Pogos naña Yesu pisi ke amio yaru la nene wa, ana anena amio wenla lala apimi aporu e yo nene, asuñmalu asuñna ga vanua, la sinelan asape avis amio Yesu. ⁴⁷ Ana yaru la tai nene pisa pa Yesu, pisape “Ei, anoñna amio womla lala asuñmalu asike vanua, la sinelan asape avis re amio ko wa.”

⁴⁸ Ana Yesu pisatañnea, pisape “?Ana ane pe aneu, a ane pe wolai lala?” ⁴⁹ Ana naga kiar kiena nalogena lala, pisapenua “?Aþisu ke yaru la ne asike ne? Aneu a wolai lala, yaru ne la nane asike ne. ⁵⁰ Komin visae yaru naña kila ke ya naña Ata nae ma e peni naga sinenania, yaru na sanene naga pe wolai, a pe vineu, a pe aneu.”

13

þakaiwa na kurus nen wit la naña akekapil apa e porotano la naña ape taþena la vari
Mak 4:1-9; Luk 8:4-8

¹ E ke e legiena nene, Yesu molue uñna, pito totano e yepas nen pupia lapa nene vena vian yeririna lala. ² Ana yeririna la moki paþisi apitomi puna e pogos nene narui, ana kila naga þiyu pa to meta e waa tai, ana yeririna la punu ga yo pule ga asike ura, ³ ana naga pian suri moki pan la e ga e þakaiwa lala.

Ana naga pisa pan la, pisape “Yaru tai pa peven kurusa e kana lokove. ⁴ Pogos naña naga suñna sisilin ke kurus la nene, ana kurus laþasia kekapil pa e mrapa, ana siraunia manu lala apimi ate plan make ga. ⁵ Ana kurus laþasia akekapili pa e naña kilavaru mñeke tano, ana pe porotano po re teke meta poli. Ana akakapur vilaga, vanon porotano meninivi ga. ⁶ Ana pogos naña mrae pa mñarera, kekan kurus nen suri la naña pitotovi memeu veraga, vanon þeligas lala pe pito ruru re tano poli wa. ⁷ Ana kurus laþasia akekapili apa e naña sumo pe ate plan ruru re kilika viowa la e poli, ana þisi na kilika viowa naña pitovi pimi keviu sina, ana piwo kare kurus nen suri la naña pitotovi ne ana amarmare. ⁸ A kurus taþena si laþasia akekapil apa e porotano tai naña po, ana akapuru po, ana aþar mrasnela, naña laþas aþar mras tol ponotia taaga, laþasia aþar mras tol lualima orai, a laþasia lualima telu.”

⁹ Ana Yesu pisa, pisape “Yaru naña kiligana teke ea naga monar yagogon ruru visena nene.”

?Vanon ya ne Yesu pis e þakaiwa lala?
Mak 4:10-12; Luk 8:9-10

¹⁰ Ana siraunia, nalogena lala apimi puna ne Yesu apiunia, asape “?Vanon ya ne ko osuñna opian ke yeririna lala e þakaiwa la sanene?”

¹¹ Ana Yesu pisatañnea, pisape “Ntewa naga kila ke sape þisi na amiu akilia alual nakilia wanena kiena ne kiena nasuþenena, ana naga taþatete la kiliaena ne va yeririna taþena la nene. ¹² Nevisa sanini van amiu, visae yaru naña kiena suri moki rui, þisi na war va la sane vena ve moki va þisi, a yaru naña pe kiena suri re poli, þisi na naga kilalu narin suri ya naña naga kiena. ¹³ Sanene, nepian la e þakaiwa lala, vanon naña la asuñna apisuia, ana apisu kilale þele ga, ana asuñna amloge, ana amloge kilale þele ga. ¹⁴ Yaru suri la ne sanene, akila narui ana Ntewa pisayu la nanua sumo rui e visena lelaga naña Navisawalena Aisea pisawal sumo, naña pisa pisape
‘Ana þisi na amiu aloge vano-o, ana taþatete alogakilale pogos tai.

A ĥisi na amiu avisu vano-o, ana taĥatete avisu kilale pogos tai,

¹⁵ vanon naĥa amiu na sane yaru la naĥa kiela sitomena la amarmare ĥisi rui, sa naĥa aĥiwo pulkiligala, a sane aĥelawa rui.

Visae ve akila re sanene, pona vera na akilia avisu kilale suria, a vera na akilia alogekilale suria, a vera na kiela sitomena akilia asitomkilale suria, ana sanene, akilia avilopu la aimi pun inu vena nekila ruru la.’ Ais 6:9,10

¹⁶ “Ana nevisa van amiu, kiau nalogena lala, navisa ruruena sike e amiu komin naĥa kilamaramiu la asuĥna apisu ke suri la naĥa amiu apisuia, a kiligamiu la amloge ĥna suri la naĥa nesuĥna nepian amiu ke ea. ¹⁷ Inu nevisa van amiu, navisawalena la moki amio yeririna kiena ne Ntewa lala la moki liu nanua sumo, naĥa sinelan manene paĥisi naĥa asape avisu suri la naĥa amiu apisu ke nanagane, ana pe apisu re poli, a la akilayon manene naĥa aloge suri la naĥa amiu amloge ke nanagane, ana pe amloge re nenaga.”

Yesu pisawal kinas nen ĥakaiwa na kurus nen wit

Mak 4:13-20; Luk 8:11-15

¹⁸ Ana Yesu pisa pan la, pisape “Amiu, ayagogo ruruia, ĥisi na nevisayu kinas nen ĥakaiwa nene, naĥa naga pisayu yaru nene naĥa pa peven kurusa e kana lokove.

¹⁹ “Suri nasumo, naga kurus la naĥa kekapili e mrapa, naga sa naĥa yaru la ne amloge nalologena wo nasuĥnena nene ana pe amloge kilale re poli. Kurus wo lala kekapil e kiela sitomena lala, ana yaru viowa nene naĥa Yermare, naga pimi ĥar plan ke sina ga nalologena wo nene e losinela.

²⁰ “Taĥena, naga nene na kurus la naĥa kekapili e yo naĥa kilavaru ĥeke tano, a naga sa naĥa yaru la ne amloge lologena wo nene, ana akekaran veraga, ²¹ ana sa naĥa ĥeligasa pe po re poli. Akilia asu ve plas ga, a visae pogos ĥarera tai, pona yaru la aĥene la vanon naĥa la amlelaga e visena kiena ne Ntewa, ĥisi na la aloru ke veraga.

²² “Taĥena ĥena ga, naga na kurus la naĥa kekapil e yo naĥa kilika viowa sike ea, ana naga na sa naĥa yaru la ne amloge lologena wo nene, ana la asitom manene la kiela malena lala, a sinelan manene la suri na yomarava nini. Ĥelaga la nene apimi sane kilika viowa, ana la apiwo kare nalologena wo nene vena ve war re si mrasa e kiela malena.

²³ “Ana na maro, naga na kurus la naĥa kekapili e porotano naĥa po, naga na sa naĥa yaru la amiyagogo ruru e lologena wo nene, ana amloge kilale ruru po, ana aĥar mras nen nalologena nene e kiela malena lala, naĥa sane laĥasia aĥar lualima telu, laĥasia aĥar sane lualima orai, a laĥasia aĥar moki sane mrasa tol ponotia taaga.”

Ĥakaiwa na viluĥini viowa amio kurus nen wit lalua akapuru lele taaga

²⁴ Ana Yesu pisa sina ga ĥakaiwa taĥena tai pan la, pisape “Ĥelaga naĥa Ntewa ĥere yaru lala apimi loyuĥna e nasuĥnena kiena naga sanini. Yerkawa tai naĥa naga pa peven kurus nen wit la naĥa po e kana lokove, ²⁵ ana pogos naĥa yaru lala amomalio ke kolemallo, kiena nasinekar tai naga pimi, mapila kurus nen viluĥini viowa tai e lokove nene ĥisi, ana pure pano. ²⁶ Ana suri la lua nene apitotovi, ana lalua maran taaga ga, ana pogos naĥa wit lala asiar naĥa awar mrasa, ana yerkawa nene, kiena yaru na yuĥnaena lala apisu kilalea sane viluĥini viowa ĥena ga kapuru ke amio wit nene. ²⁷ Ana la apimi puna, apiun tania, asape ‘?Yerkawa, sanape? Kurus la naĥa tepeven e koĥna lokove, ana kurus wo ga lala. ?Ana viluĥini viowa nene pimi sanape?’

²⁸ “Ana naga pisa pan la, pisape ‘Peraga, nene na kiau nasinekar tai ne kila suri sanene.’

“Ana kiena yaru na yuĥnaena lala apiun ke sina ga tania, asape ‘?Poga ga, ana sanape, sinoĥan osape imimi meva moure plan viluĥini viowa la nene?’ ²⁹ Ana naga pisaluĥaria, pisape ‘Toko, aligan suwa wa. Visae amiu ava aure plan viluĥini viowa la nene, pona visae akila palia sa aure plan lae ĥena ga amio wit la nene veraga. ³⁰ Lalua akilia akakapuru ĥna veraga vano-o tol pogos na waren kinas nen wit imi. E ke e pogos nene, ĥisi na nekilia nevisa va yaru la naĥa ava awar wit, vena ava ate ke ne viluĥini viowa

nene sumo wa, aviaria e p̄egasia akoven va e kapi. Siraunia, la akilia ava ate wit lala vena awar vitomi uña.’ ”

Ĥakaiwa na kurus nen mras nen purpa

Mak 4:30-32; Luk 13:18-19

³¹ Ana Yesu pisawal Ĥakaiwa taĤena tai pan la, pisape “NasuĤenena nae ma e peni naga sane kurus nen mras nen purpa tai naĤa pito pelan te laki tai. ³² Kurus nene na ve tokak na ve tokak paĤisi, ana pogos naĤa kapuru pano-o, ana pimi pe purlaki tai naĤa keviu taulu make purlaki taĤena lala, ana manu lala akila m̄ala ponovi lala e kana korowas lala.”

Ĥakaiwa na is

Luk 13:20-21

³³ A Yesu pisawal sina Ĥakaiwa taĤena tai pan la, pisape “NasuĤenena kiena ne Ntewa, naga sa naĤa sira tai p̄alelar narin is amio puluyavi na kilaparavi e pupia pialora tai, ana narin is nene kilia kila kilaparavi la nene punu ga mlapa.”

Yesu pisi pan la e ga e Ĥakaiwa lala

Mak 4:33-34

³⁴ E visena kiena ne Yesu la nene, naga pisawal suri la ne sanene pa yaru lala, a silaga naga pisi pan la e ga e Ĥakaiwa lala. ³⁵ Sanene, naga kila visena kiena ne navisawalena nanua sumo imi ve lelaga, naĤa Ntewa pisa, pisape “Ĥisi na inu nevisawal kiau visena lala e ga e Ĥakaiwa, p̄isi na nevisawal suri la naĤa tapolou su nakonua rui, asike ga perina wa, siar e pogos na siien yomerava nini, pimi tol nanagane.” *Yauena 78:2*

Yesu pisawal kinas nen Ĥakaiwa na viluṁini viowa

³⁶ Ana Yesu mligan p̄ina lala, pa loyuña, ana kiena nalogena lala apimi puna, apiunia apisape “?Yesu, imimi sinemimi mesape ovisawal van imimi ya ne kinas nen Ĥakaiwa na viluṁini viowa naĤa kapuru ke e lokove na wit nene?”

³⁷ Ana Yesu pisataṁe la, pisape “Yerkawa naĤa peven ke kurus wo lala, nane Narina ne Yeririna nene. ³⁸ A kana lokove nene, nane yomarava nini. A kurus wo la nene, nane yeririna la naĤa asike loyuña e nasuĤenena kiena ne Ntewa nene. A viluṁini viowa la nene, nane yeririna kiena ne Yermare la nene. ³⁹ A nasinekar nene naĤa pa peven kurus nen viluṁini viowa nene, nane Yermare na ga. A pogos nawarpoloen kinas nen wit la nene imi, nane luas nen pog nini. A yaru na yuñaena la nene naĤa avanon ate wit awarpuloia, nane navisi lala. ⁴⁰ A yuñaena nene na warpiloena viluṁini viowa la nene vena asikapila, nane p̄elaga ke sina ga nene naĤa p̄isi na imi e pogos maro, ⁴¹ naĤa Narina ne Yeririna, naga ligan kiena navisi lala vena avano awar plan suri la naĤa kila yaru lala amloru e mlamulena viowa, amio yaru la nataĤaen mlamulena viowa, vena ve asu re si veraga amio yaru la nasuĤenena kiena. ⁴² Ĥisi na navisi lala akoven la ava e pupia kapi, e yo naĤa yaru lala asuña ga atagi, a asuña ga akar ke maluela ea. ⁴³ Ana siraunia, yaru mesmesu lala p̄isi na atego ve sa mrae, loyuña e nasuĤenena kiena ne Arimala. A yaru naĤa kiligana teke e naga monar yagogo ruru e visena nene.”

Ĥakaiwa na pupia kilavaru wo tai natauluen kilavaru

⁴⁴ A Yesu pisape “Ĥelaga kiena ne yaru naĤa sinenan sape va loyuña e nasuĤenena kiena ne Ntewa, sane Ĥakaiwa nini: yaru tai pa pisu kinakinas nen porotano tai, ana naga milan pupia kilavaru wo tai naĤa monyoyou ga ṁeke ea. Ana naga sinwan rurulein kilavaru naĤani, ana naga pitove p̄iliwilin plan make kiena suri lala punu ga, vena kilia vam ul lua kinakinas nen porotano nene, vanon naĤa mloge po manene la paĤisi e suri wo naĤa m̄alia.”

Ĥakaiwa na kilavaru yuwowo naĤa teke e mratamelilivi

⁴⁵ A Yesu pisa ṁena ga, pisape “A sa ke sina ga nini, p̄elaga kiena ne yaru naĤa sinenan pisape va loyuña e nasuĤenena kiena ne Ntewa, sa ke ṁena ga nini: yaru tai naĤa naga

pul ke kilavaru yuwowo la naþa po tan yaru lala, naþa sike loyuþna e mratamelilivi. ⁴⁶ Ana pogos tai naga mal tai naþa po na po, pisa pisape ‘!Lelaga þa, in na sineun suri nene paþisi wa! Visae in na nokus ga ve kiau ga rui vera wo wa. Yoko in na neto nowilwilin plan make kiau suri taþena lala, vena nevam nowul lua suri wo nini.’ ”

þakaiwa na lilivi

⁴⁷ Ana Yesu pisa ke sina ga, pisape “A naga ke sina ga, þelaga kiena ne Ntewa nawereen yaru lala ava loyuþna e kiena nasuþenena, naga sa mena ga nini, naþa pogos na yaru la aþure lilivi e lapa, la akilia asuwoia ana aure ika la naþa veve taþena ve moki vaþisi ea. ⁴⁸ Ana pogos naþa lilivi pule ruru po, ana yaru lala aþurelua pa ura e yomema, ana atapurpurga atotano, amliþere ika lala. Ana ika la naþa po, akon apito e kiela karo lala, a ika la ne piowa, ana akuwani pano. ⁴⁹ Þisi na ve sa nene e luas nen pogos nini, naþa þisi na navisi lala ava aliþere yaru lala, awere plan yeririna viowa lala, ⁵⁰ vena akoven la ava e pupia kapi nene, naþa yaru lala asuþna ga atagi, a asuþna ga akar ke malueta ea.”

þakaiwa na suri marua amio suri vii

⁵¹ Ana Yesu piun tan kiena nalogena lala, pisape “?Amiu amloge kilale ke visena la nene?”

Ana lala apisataþnea, asape “Ee, pona mekilia ma yo.”

⁵² Ana naga pisa pan la, pisape “Suri la nene naga sane yaru tai naþa sumo, naga pe navianena tai e navisaluaena lala na Visena Wa kiena ne Ntewa, ana siraunia, naga pimi sane kiau nalogena tai e nasuþenena kiena ne Ntewa. Yaru na sanene naga sane yerkawa tai naþa kiena suri wo na yuþnaena lala moki e mana yuþna. Ana silaga naga kilia lalua kiena suri marua naþa po ke ga wa, akilia mena ga lalua kiena suri vii, vena kila kiena yuþnaena amio la.”

Le Nasaret lala pe sinelan re Yesu poli

Mak 6:1-6; Luk 4:16-30

⁵³ Ana pogos naþa Yesu pisawal þakaiwa la nene þisi, naga molue e yo nene, ⁵⁴ þasuþe sina ga pimi kiena. Ana naga suþna pian ke yaru lala nae yo nene, loyuþna e kiela yuþna na leniena, a la sinela kurkurun kiena visena la pano paþisi. Ana la asuþna apisavisa ke pan la, apisape “!Aulai! ?Yaru nene tol nakiliaena na sanene sanape, a naga kila ke kile la nene sanape? ⁵⁵ Ita tekilia ke yaru nene rui. Naga arimana, yaru na yuþnaenen ga yuþna, naþa Yosop, a anena naga naþa Maria. A wenla lala yaru la nene, Semes, a Yosop, a Saemon, a Sutas, naga pe wenla la nene. ⁵⁶ A vinena lala, la ga nene naþa asike ga amio ita ne. ?Ana yaru nene naga molue pun ita pa þar suri la nene pe?” ⁵⁷ Ana sinela karia, pe sinelan re nena naga.

Ana Yesu pisa pan la, pisape “Yaru naþa pe navisawalena, yaru taþena lala akilia avatanon naga, ana yaru na mana mratava lala, amio yaru na kiena yo lala, la ga nene na taþatete avatanon naga.” ⁵⁸ Ana e yo nene, naga pe kila re kile la moki e poli, vanon naþa pe amlelaga re e naga poli.

14

þarin Suþe Erot Antiþas pisayu Yesu

Mak 6:14-16; Luk 9:7-9

¹ E pogos nene, apisayu Yesu pa tol Suþe Erot, naþa naga pe þarin suþe e lepa nae garu Kalele. ² Ana Suþe Erot mloge visena la nene, ana naga pisa pan kiena yerkawa lala, pisape “?Yaru nene naþa apisayu ke ne, pona naga Yoane Nakeena nene, naþa nanagane naga mali sina e marena yo? Vanon suri ne nanene, naga kila naga tol naþareraena nakilaena kile la nene.”

?Yoane Nakeena mare sanape?

Mak 6:17-29

³⁻⁴ Ana Suḗ Erot pisa sanene, vanon naḗa naga mēmar Yoane Nakeena mare rui, ana naga marau paḗisi. Ana marena kiena ne Yoane Nakeena kana suniena nena sanini: wenla Suḗ Erot nene, naga kiena kia Pilip, naḗa lalua arimala taaga, ana anela lua. Ana sumo, Pilip nene talopa amio sira tai, kiena kia Lerotias. Ana siraunia, Suḗ Erot pa ḗerelua sira nene. Ana e pogos nene, Yoane pisi pa Suḗ Erot, pisape “Suri nene pe mesmesu re nene poli, naḗa ko oure sira nene, komin naga pe wona ne womla.” Ana Erotias naga pe kekaran re nena visena kiena ne Yoane poli, ana naga pisi pa Suḗ Erot, ana Suḗ Erot mligan kiena yeririna la ḗasia apa atarar Yoane, ana apiari naga, amligan naga pa e yuḗna nakoena. ⁵ Ana Suḗ Erot sape weḗmar Yoane, ana naga maraun li ḗa le Israel lala, vanon naḗa amlelaga e Yoane asape naga pe kiela navisawalena tai.

⁶ Ana Lerotias nene, naga narina na loḗmaru ḗa tai, ana pogos naḗa la akila ḗaḗagena nasitoḗmalena legiena naḗa Suḗ Erot paeme ea, loḗmaru nene naga polu e marana ne la naḗa asike lele taaga e ḗaḗagena nene. Ana Suḗ Erot kekaran kiena wolena paḗisi, ⁷ ana naga pisaar ḗarera pan loḗmaru nene, pisape suri ya naḗa naga visa, ḗisi na naga la vania.

⁸ Ana Lerotias pisi amio narina naḗa sira ḗee nene, ana sira ḗee pa pisalein pa Suḗ Erot, pisape “In na sineun nesape okus ḗarina ne Yoane Nakeena, ḗene pialo tai, imi van inu nagane ga ne e nini.”

⁹ Ana visena nene kila Suḗ Erot mloge piowa vanon kiena navisalaweena nene, ana naga pisape akila ga ve sa naḗa sira ḗee nene pisa, vanon naḗa naga pisaar ḗarera sanene e marana ne kiena erau la ḗisi rui. ¹⁰ Ana apa e loyuḗna nakoena nene, atelua kolmekina ne Yoane, ¹¹ ana la amligan ḗarina ḗene pialo tai, akus pimi pa sira ḗee naḗani, ana sira ḗee nene kus pa anena. ¹² Ana siraunia nalogena kiena ne Yoane lala apimi akus tasnena, apa asinia, ana apano apa apisawal pa Yesu.

Suniena kiena ne Yoane Nakeena nane maro e nene.

Yesu pagan yerḗene lala tol manu lima

Mak 6:30-44; Luk 9:10-17; Yoane 6:1-14

¹³ Ana pogos naḗa Yesu mloge sanene, naḗa Suḗ Erot naga pisayu ke ḗena naga, sape naga Yoane Nakeena naḗa mali sina petan marena, ana Yesu molue e yo nene, ana ḗiyu e waa tai, vena va e yo ḗano tai naḗa pe yaru re e poli. Ana pogos naḗa yeririna lala akilia asape naga pa ke e sanene, la ḗena ga amolmolue e kiela pulkumali lala, la amial akom ura. ¹⁴ Ana pogos naḗa Yesu pa ura, naga pisu naḗa ḗina na yeririna ḗeke pa ura rui, ana naga sinena mie la paḗisi, ana naga kila ruru si kiela yaru namaiena lala apimi apo sina.

¹⁵ Ana pogos naḗa mrae pito tano, nalogena lala apimi puna Yesu, apisa apisape “Ei, Suḗ, yo nini pe po re nenaga, a lavisi ḗena ga yemalo narui. Popon ko oligan ḗina na yeririna la nene awasuḗe ava e pulkumali lala vena auli kala kinanena la ḗasia.”

¹⁶ Ana Yesu pisataḗe la, pisape “Toko, akilia asuḗna ga ve sanene woga ga ne. Popon amiu awar kinanena laḗasia van la.”

¹⁷ Ana la apisa, apisape “!Ke peraga yo, imimi memlarar narin kilaparavi lima ga teke na, amio narin ika naḗa satin lua ga!”

¹⁸ Ana Yesu pisape “Ala imi van inu,” ¹⁹ ana naga pisi pan yeririna la nene, pisape “Amiu atotano e viluḗini sumo wa.” Ana naga mla narin kilaparavi lima amio narin satin lua naḗani, kirava pa metava ma e sinapane, pisa potena pa Ntewa vanon kinanena nene, ana kauroro narin kilaparavi lima naḗani, kian pa kiena nalogena lala vena avion plan va yeririna la nene. ²⁰ Ana la akan pano-o, ḗeḗela kawa paḗisi, ana kinakinas nen kinanena la naḗa pe akan re poli, torokin akon va e karo mavava la naḗa kerkeviu ve lualima taaga pa lua. ²¹ Ana yaru la naḗa akan kinanena nene, la pa sane manu lima, ana pe apulo re sira la poli amio ninis lala.

Yesu mial yau metava e wos nen sive

Mak 6:45-52; Yoane 6:15-21

²² Ana Yesu pisa pan kiena nalogena lala, pisape “Inu sineun nesape amiu akus kieta waa, ana asumo akusro pupia lapa nene ava lepas ḗasia navano, ana in na nesuwa nesuḗna

neligan plan kone yeririna la awasuþela avano wa.”²³ Ana pogos naþa naga mligan plan yeririna lala apavano þisi, ana naga pa metava e kunus tai, naga taaga, vena len. Pogos naþa yemalolo, Yesu naga ga taaga sike na,²⁴ ana e pogos nene, waa nene ðeke perina paþisi, ðeke likan lapa naþani, ðeke va yotena narui. Ana sive keviu, a la asuþna akawe lagi paþisi, a kila sane akus ðena ga sive naþa akus sive.²⁵ Pogos naþa lavisi yelagi merarava, Yesu pimi pula, naga mial yau ga metava e wos nen sive.

²⁶ Pogos naþa kiena nalogena lala apisu naga mial yau ke e wos nen sive pimi pula sanene, amarau paþisi, apisa apisape “!Aulai! ?Suri ya na pimi ke sanene? ?Yermare yo, pona ya ne sanene?”

A la asuþna ga amlolokai keviu, vanon naþa la amarau paþisi,²⁷ ana Yesu pis pan la vilaga, pisa pisape “!Ei, ve amarau re, in ga nini!”

²⁸ Ana Pita pisataþnea, pisape “Suþe, visae ko kemua nene, otaþnan naþa inu ðena ga neyal yau metava e wos nen sive, neiþasu puþna.”

²⁹ Ana Yesu pisa, pisape “Ko, poga, otomi.”

Ana Pita mligan waa, pito tano, siar mial yau e sive, pa lavisin Yesu,³⁰ ana pogos naþa naga sitoþnal si lagi ðarera nene, naga marau. Naga marau sanene, siar mian pito tano narui, ana naga pio Yesu, pisape “Suþe, ko otamalia inu.”

³¹ Ana Yesu kian limana pa veraga, tarar Pita, ana pisa pania, pisape “?Vanon ya ne sineþna miyuwawa sanene? !Ko pe opiawa re nena kawa e inu poli wa!”

³² Ana pogos naþa lalua aþiyu si apa meta e waa, lagi nene mare,³³ a la naþa e waa amieluar Yesu, apisa, apisape “Lelaga kemua, ko ope narina ne Ntewa lelaga.”

Namaiena lala atol ga isinen kulkota ðana Yesu

Mak 6:53-56

³⁴ Ana Yesu lala akusro pupia lapa nene e kiela waa, apa e laþas þasia, ana apa ura e yo tai, kiena kia Kenasaret.³⁵ Ana pogos naþa yaru lala nae e yo nene apisu kilale Yesu, amligan visena telivi piora pa e yo punu ga. Ana yaru lala aþure namaiena lala apimi puna,³⁶ apiun tan naga vena naga taþnan namaiena lala atol ga ðana isinen kulkota. Ana la naþa atol ga sanene, kiela maiena la kokovio nenaga, apimi apowo sina.

15

Nalogena lala kiena ne Yesu pe ataveve re þelaga marua kiena ne le Yu la poli

Mak 7:1-13

¹ Ana e pogos nene, Varasi la þasia amio navianena navisaluaena laþasia amolue garu Yerusalem, apimi apisu Yesu.² Apiun tan naga, apisa apisape “?Vanon ya ne kioþna nalogena lala pe ataveve ruru re kieta þelaga marua na lotuen nanua sumo poli, naþa kieta nasumonena lala apian ita, sa naþa la asuþna apisa, apisape visae yaru tai sinenan sape kinana, naga monar taveve ruru þelaga mesmesu lala na kevanen limana sumo wa, ana þisi na naga kilia kinana?”

³ Ana Yesu pisataþne la, pisape “?Ana amiu ðena ga, vanon ya ne amiu aþareran naþa ataveve kiamiu þelaga marua lala, ana e kiamiu þelaga marua la nene, amiu asuþna akilaro ke navisaluaena kiena ne Ntewa? ⁴ Ana Ntewa pisa rui, pisape ‘Ovatano e arimoþna amio anoþna,’ a naga pisa ðena ga, pisape ‘Yaru naþa pisi piowa pan arimana pona anena, aweþnar naga mare.’ ⁵ Ana nanagane, pogos naþa yaru tai visaar visave kiena suri lala ve suri wa, þisi na la va Ntewa pogos tai, ana naga pisa sanene ana siraunia naga pe pisuar ruru re kiena yermarua la luwoka poli, pona ve iila re si la luoka e suri la nene,⁶ ana amiu asuþna ga apisa ke asape sanene na poga ga ne, pe pe sur re tai nene poli. A e þelaga nene, amiu asuþna ga akila ke navisaluaena kiena ne Ntewa pimi pe suri korena ga tai ne, vanon naþa amiu sinemiun asape auarar ga kiamiu þelaga marua lala. ⁷ !Ana amiu na apisokani ke nene, amiu apisi korena ga ne! Navisawalena Aisea naga pisayu amiu sumo rui, naþa naga pisawal visena nene naþa Ntewa pisa, naþa pisa pisape

⁸ *‘Yaru la nene apatanon inu e ga e kiela visena lala, ana kiela sitomena lala asike perinan inu wa.*

⁹ Akila ke lotuena pan inu, ana pe suri korena ga,
vanon pogos naña akilapian yeririna lala, apisa ke asape visena nene naga pe visena kiena
ne Ntewa nene, ana visena la nene pe kiela ga la ga yeririna lala.' ” *Ais 29:13*

Suri la naña kila yaru namname e marana Ntewa

Mak 7:14-23

¹⁰ Ana Yesu pio viraviran yeririna lala vena aimi puna, ana naga pisa pan la, pisa pisape
“Amiu ayagogo ruruia, amiu monar alogakilale kiau visena nene. ¹¹ Pe kinanena re naña
pa e logon yaru poli naña kilia kila naga namname e marana ne Ntewa, ana visena lala
naña molue e logona yaru, suri ne nanene naga kilia kila naga namname.”

¹² Ana siraunia, kiena nalogena lala apimi, apisa pania, apisape “?Ei, ko okilia ña naña
Varasi lala sinela mimi pañisi vanon kioña visena la naña osuña opisa ke ne?”

¹³⁻¹⁴ Ana Yesu pisatañe la, pisape “Amiu na ve asitom re yaru la nene. Ya naña la
asuña akila ke ne, naga pe yuñmaena kiena ne re Ntewa nene poli, a yoko kau Ata nae ma
e peni, ñisi na naga wereplan make suri la naña naga pe mapila re poli. ?Yeririna la nene
na ape kilamara ñala ga, ana sinelan asape asumoni yeririna lala, ana sanape narui, yaru
tai naña pe kilamara ñala kilia sumon yaru tañena naña pe kilamara ñala lalua ayal? !Ñisi
na lalua akilia aloru veraga atotano e ñilipiñi tai ne!”

¹⁵ Ana Pita piun tan Yesu, pisape “Suñe, sineun nesape ovisawal ke ne kinas nen
ñakaiwa nene sumo wa, naña opisa ñesan ga na wa.”

¹⁶ Ana Yesu pisa pisape, “?Sanape ne, pona ñarimiu ñmena ga merorol ke yo wa?
¹⁷ Pona amiu akilia ña ve tokak ga yo, naña suri ya naña vito kome logona yaru, pito
tano vitove kome ñmeñena narui, ana kilia pa vanua si kome tasnena, ¹⁸ ana suri ya naña
molue e logona yaru, naga molue e losinena sumo, a suri ne nanene, naga kilia kila yaru
namname. ¹⁹ Naga nene na vanon naña nasitomiena viowa lala amomolue e los nen yaru,
sa naña nawemoñaren yaru, natañeen kolau, nakilaena lau, navinauena, navisokanena,
a nasisien visena. ²⁰ Nanene ñelaga la naña akilia akila yaru namname e marana ne
Ntewa. A ñelaga nene naña yaru kinana ana pe ke re limana sumo poli, suri nene naga
tañatete kila yaru namname sanene.”

Yesu pilelua yermare e sira ñnee tai

Mak 7:24-30

²¹ Ana Yesu molue e yo nene, naga pito e lepas naña pulkumali lua asike ea, naña Taea
amio Saeton. ²² Ana sira tai nae lepas naña Kenan, naga pe wolawa ga, sike e lepas nene,
ana naga pimi puna ne Yesu, pio naga, pisape “Suñe, ko ope Navisaarena naña ko omolue
e lus kiena ne Tepet, neviun tan ko vena sineña ye inu. Kiau loñearu, yermare tai sike
e naga, naña suña kila kare naga silaga.” ²³ Ana Yesu mloge visena nene, ana pe pisa re
nena suri tai pa sira nene poli.

Siraunia, nalogena lala apimi, apisa pa Yesu, apisape “Sira nene suña taveve ita ke
sanene na, naga suña pio manene liu wa. Popon oligan lua naga vano.”

²⁴ Ana pe Yesu pisatañe la re poli, ana naga pisi pa sira nene narui, pisa pania, pisape
“Ntewa mligan inu nepimi vena neva ga puna ne le Israel lala, la naña sane sipsip la naña
akila pal mrapa.”

²⁵ Ana sira nañani pimi, kinai tano e lana ne Yesu, pisape “Awis, Suñe, nepiun tan ko,
nesape oiila inu.”

²⁶ Ana Yesu pisatañea, pisa pisape “Ana pe mesmesu re naña nelalua kinanena kana
ne nisisi lala, vena nela va lokul poli.” Naga pisi sanene vanon naña naga kilia ña sape
e pogos nene, le Yu tañena lala, naña la asitom asape la ga ape narina ne Ntewa, asuña
apisayu kare yaru la naña pe ape le Yu re poli, apisape la ape lokul ga la ne.

²⁷ Ana sira nene pisi, pisa pisape “Ko opisa pe lelaga, Suñe, ana lokul lala akilia akan
ñmena kororos nen kinanena naña amloloru vatano e lelen kinanena kana ne taena ne
lokul lala.”

²⁸ Ana Yesu pisatañe ruru naga narui, pisa pisape “Sira, ko opiawa ruru ke ñarera e inu pañisi. Ñisi na ko ovisu ga nanagane imi van ko ve sa naña ko omlelaga ea.” Ana e ke e pogos nene narui, sira ñee kiena ne sira nene pimi po sina.

Yesu kila ruru namaien la moki

Mak 7:31-37

²⁹ Siraunia, Yesu molue ke sina ga e yo nene, ñasuñe si pa lepas naña Kalele. Naga suña mial pano, ana pa kom ga lavisin pupia lapa na lepas nene, ana pa totano metava e kunus tai. ³⁰ Toña sane, ana ñegas nen yeririna lala apimi puna, amio laulu lala, amio latakin lala, amio kilamara ñala lala, amio kiligapoñe lala, amio ñena namaiena tañena ñena ga lañasia. Ana añar la nene apimi, amligan la asike ga lavisin Yesu, ana Yesu kila ruru la apo ke sina ga. ³¹ Ana yeririna lala sinela kurkuru pañisi, pogos naña apisu puru lala apisi, latakin lala apimi apo, laulu lala amial po, a kilamara kata lala akirava, ana la amieluar Ntewa kiena ne le Israel lala pañisi vanonia.

Yesu pagan yerñene lala tol manu vari [4000], amio ñena ga sira lala a nin sisi lala

Mak 8:1-10

³² Ana Yesu pio kiena nalogena lala apimi puna, ana naga pisa pisape “Inu sineu mie ñina na yeririna la nene pañisi wa, komin naña asike amio ita legiena telu narui, ana pe kala kinanena re si poli. A inu tañatete neligan la ava si uña naña pe kala kinanena re sanene poli, vanon naña visae nekila sanene, pona e mrapa komsusa ana yaru lañasia viso kar la vano-o marala malko yo.”

³³ Ana nalogena kiena ne Yesu lala apisa pania, apisape “?Ana ñisi na ita towar kala kinanena pe ne? Ana komin yo nini na yo korena ga nini, a la moki manene la wa.”

³⁴ Ana Yesu piun tan la, pisape “?Ana amiu kamiu kilaparavi via na sike na?”

Ana la apisa, pisape “Olua ga, amio narin ika naña satin lañasia.”

³⁵ Ana Yesu pisa pa ñina na yeririna la nañani, pisape “Atotano e nene sumo wa.”

³⁶ Ana naga ñar kilaparavi la olua nañani, amio narin ika naña satin la nene, ana naga pisa potena pan Ntewa vanonia, ana siraunia ana kawewowala, ana kian pa kiena nalogena lala, ana la lein añar apiovion pa yeririna lala. ³⁷ Ana la punu ga akan pano-o ñeñela kawa ruru po pañisi. Ana siraunia, akon kinakinas nen kinanena la nene naña sike na, pa e karo popos olua, ana puleule pañisi. ³⁸ Ana yerñene la naña akania, tol manu vari, ana pe apulo re sira lala amio ninis la poli.

³⁹ Ana Yesu mligan ñina na yeririna la nene añasuñe apa si uña, ana naga pa si e kiela waa, ana mligan yo nene, pimi suli ga plas ga e lepas naña kumali keviu naña Makatan ñeke ea.

16

Yer kawa la ñasia asape avisu kile tai

Mak 8:11-13; Luk 12:54-56

¹ Ana pogos tai Varasi la ñasia amio Satusi la ñasia apimi puna Yesu, naña sinelan asape akilali naga, ana apisa, apisape “Imimi sinemiminia mesape ko okilali pupia kile tai van imimi, naña ko okila e puriukawa nae ma e peni.”

² Ana Yesu pisatañe la, pisape “Pogos naña mrae pito ke tano, ana visae amiu avisu naña yo vivaga e lepas naña mrae pito ke tano ea, amiu akilia avisa avisave ‘Ñisi na yepisun peni,’ ³ a pogos naña mrae pa ñarpo yo, a visae amiu avisu sinapane tano vivaga a lul la malolo ñena ga metavana, amiu akilia avisave ‘Ñisi na yua kove ñane.’ ?Nane amiu asuña apisu kilale ke kile la nene e sinapane ñisi narui, naña ñisi na pog ve sanape pona ve sanape, ana sanape naña amiu pe apisu kilale re kiau kile lala na pog keviu nini naña nesike nemio amiu poli?”

⁴ Ana Yesu pisa ñena pan la, pisape “Yaru la naña sinelan ga avisu kile lala, la ape li viowa la pañisi, la akila wowe pa Ntewa, la apilon ñasila pania, sane la naña akila lau,

aþure matan wola lala. Peraga, þisi na taþatete amiu avisu kile tai narui, ana yoko amiu avisu ga naþa málivi e inu ve sa ke ga kile naþa pa Navisawalena Sona nanua sumo, naþa Ntewa kila naga mali sina.” Ana Yesu purmatan la, naga mligan la asikena.

“Amiu avisuar e is kiena ne Varasi lala amio Satusi lala”

Mak 8:14-21

⁵ Ana pogos naþa Yesu amio kiena nalogena lala amligan e nene, ana aþaro e pupia lapa naþa apa e lepas þasa, ana nalogena lala sinela þesania naþa pe aþar re si kala kilaparavi laþas poli. Ana pogos naþa atol lepas þasa, ⁶ ana Yesu mla visena tai pan la, pisape “Amiu na monar avisuar ruru amiu, e is kiena ne Varasi lala amio Satusi lala.”

⁷ Ana la amloge visena nene, ana la apisayulein pan la, apisape “?Pona naga pisi sanene vanon naþa pe toþar re kilaparavi laþas pimi poli yo?”

⁸⁻⁹ Ana Yesu kilia m̃a kiela sitomena nene narui, pisape “?Pe na ya naþa amiu asitom manene ke m̃eþemiu la sanene, naþa apisape yoko takan ya ne? ?Sanape naþa amiu pe amloge kilale re suri la nene poli wa? !Kiamiu lelagaena ve tokaki paþisi wa! ?Pona amiu sinemiu þesan m̃ena ga kilaparavi la lima nene yo, naþa inu nemla pa yeririna lala tol manu lima nene, amio m̃ena karo la naþa amiu akon puleule? ¹⁰ ?Pona amiu sinemiu þesan m̃ena ga kilaparavi la olua nene, naþa inu nemla pa yeririna lala tol manu vari nene yo, a karo via naþa amiu akon sirau? ¹¹ ?Sanape naþa amiu pe amloge kilale re naþa pe nepisi re pan amiu vanon kilaparavi poli? Inu nevisa ke sina ga van amiu, nesape amiu na monar avisuar ruru amiu e is kiena ne Varasi lala amio Satusi lala.”

¹² Ana e pogos nene, la akilia m̃a naþa naga pe pisayu re is nakilaen kilaparavi pan la poli, ana naga pisa ke visena navisokanena la naþa Varasi lala amio Satusi lala akilia avian la ea, naþa kilia kila þarin yaru lapa imi ve keviu, ana kilia kila kare make kiena malena, sa naþa is na miyuþmaen ke e kilaparavi.

Pita pisawal sape Yesu naga pe Navisaarena kemua lelaga

Mak 8:27-30; Luk 9:18-21

¹³ Ana Yesu lala apito garo e lepas naþa pulkumali keviu nene Sisaria Piliþae m̃eke ea, ana e pogos nene naga piun tan kiena nalogena lala, pisape “?Amiu asuþna amloge m̃a naþa yeririna lala asuþna ga apisavisa ke Narina ne Yeririna, apisape naga ai?”

¹⁴ Ana lala apisa, apisape “La þasia apisa apisape ko Yoane Nakeena ke sina ga, a la þasia apisape ko Elaisa, a la þasia apisape ko Sereþmaea, pona navisawalena taþena tai na nanua sumo.”

¹⁵ Ana naga piun tan la, pisape “?Ana amiu, amiu na asape inu na ai?”

¹⁶ Ana Saemon Pita pisataþmaea, pisape “Ko, ko na Navisaarena, ko ope Narina ne Ntewa Mali.”

¹⁷ Ana Yesu pisataþmaea pania, pisape “Saemon, narina ne Yoane, navisa ruruena imi van ko. Suri naþa ko opisa ne, pe yaru re na pian ko e poli, ana Ata ga nae ma e peni naga pian ko ea. ¹⁸ A ko nene ko kioþna kia taþena naþa Pita, naga kana kinasia sanini, sane ‘kilavaru,’ ana lelaga paþisi, sa naþa nanagane, in na nepisu ko na sane ko ope varsu tai, ana þisi na in na nevisirlua þegas nen kiau li nalotena lala e kilatapili na sanene narui, a puriukawa na marena taþatete kilia taulu þegas nene. ¹⁹ Þisi na in na nela kii lala navietavanena amio nakotaween nasuþenena kiena ne Ntewa van ko, a suri ya naþa ko ovisaluþar e yomarava nini, ana Ntewa nae ma e peni naga m̃ena ga visaluþaria amio ko, a suri ya naþa ko otaþmania e yomarava nini, ana Ntewa nae ma e peni naga m̃ena ga taþmania amio ko.”

²⁰ Ana Yesu pisa m̃arera pa kiena nalogena lala, pisape “Amiu na ve ava avisawal re van yeririna la avisave in na nepe Navisaarena.”

Yesu pisawal kiena marena

Mak 8:31-33; Luk 9:22

²¹ Ana siar e pogos nene, Yesu kilali naþa kila merarava va nalogena lala, sape naga monar va ma Yerusalem, ana e yo nene, þisi na suþe kiena ne le Israel lala, akila kare manene naga vaþisi, amio þarin yaru wa lala, amio mþena ga navianena navisaluaena lala, la make narui þisi na akila kare naga vaþisi. Yesu pisa mþena ga pisape þisi na la nene aweþnar naga mare, ana kana legiena na telu þisi, Ata Ntewa kila naga suþmalu mali sina.

²² Ana pogos naþa Pita mloge visena nene, piolua Yesu pano, pisi mþarera pania, pisape visaluþaria, pisape “Yesu, Ntewa monar visaluþar suri nene. Suri la nene taþatete kilia imi ve lelaga e ko ve sa nene.”

²³ Ana Yesu pilopuia, pisi mþarera pa Pita, pisape “!Yermare Lego, oure vetan inu! Ko osuþna okilali inu ke sina ga e kioþna sitomena nene naþa pe sitomena kiena yaru ga, pe sitomena kiena ne Ntewa re nena ga.”

Nalogena kiena ne Yesu monar sitom korenan ga kiena nasinenanena lala

Mak 8:34–9:1; Luk 9:22-27

²⁴ Ana Yesu pisa pa kiena nalogena lala, pisape “Yaru naþa sinenan sape siraun inu, monar sitom korenan ga kiena nasinenanena lala, ana monar kus kiena laki torovia, ana taveve inu. ²⁵ Yaru naþa sinenan sape visuar ruru kiena malena, naga þisi na kilalua, ana yaru naþa naga kilalu kiena malena vanon inu, naga þisi na kilia tol malena lelaga. ²⁶ Ana visae yaru tai naga tol make suri na yomarava la punu ga, ana kilalu mrapa na malena, naga pe taulu re nena suri wo napo lelaga tai poli, ana siraunia, taþatete kiena suri wo la nene aulimaran si kiena malena. ²⁷ Ana lavisi ke Narina ne Yeririna wasuþe ke sina ga imi narui amio navisi lala, naga imi amio naurarena kiena ne Arimana, ana naga ul yaru lala mesmesun kiela nayuþnaen lala. ²⁸ Inu nevisa suri na lelaga nene van amiu, nesape yaru la þasia asuþmalu asike e nini, naþa þisi na taþatete amare asuþna ga vano-o avisu Narina ne Yeririna warpoyo amio kiena nasuþpenena, vena vim ve suþen yeririna la punu ga.”

17

Yepena ne Yesu pilonia pimi pe taþena

Mak 9:2-10; Luk 9:28-36

¹ Siraun e pogos nene, legiena orai þarovia, ana Yesu þere Pita, a Semes, a wenla naþa Yoane, ana la ga vari nene apa metava e ravie tai. ² Asuþna sanene, ana nalogena la telu nene apisu naþa yepena ne Yesu pimi ke pe taþena, a marana pilavila manene sa naþa mrae, a mþana kulkota lala apimi amiyuwowo pano-o amiyuwowo po paþisi. ³ Ana la telu nene apisu mþena ga Mosis amio Elaisa, lalua aþnaliv, ana lalua asuþna ga asun ke amio Yesu. ⁴ Ana Pita pisa pa Yesu, pisape “Suþe, popon tanea ita tesuþna ga e yo nini. Visae ko sinoþmania, ana neyuþnaen silparpara ve telu e nini, moþna tai, mþana ne Mosis tai, a mþana ne Elaisa tai.”

⁵ Ana pogos naþa Pita suþna pisi ke ga wa, ana lul tai naþa pilavila paþisi pitomi kalo la, ana amloge visena tai molue e lul nene, pisa pisape “Nene na naruu nene, naþa in na nesitom naga paþisi. Kiau sitomena sike ga e naga, a nekekarana naga paþisi. Amiu na monar alogear ruru naga.”

⁶ Nalogena lala amloge visena nene, ana amarau na amarau, ana amloru e porotano, aþariwani marala lala.

⁷ Ana Yesu pimi pulu, mlipalipa la telu nene, ana pisa pan la, pisape “Amiu asuþmalu, ve amarau re.” ⁸ Ana pogos naþa la aþar plan si þarila pa metava, apisu re si lalua nene poli, ana la apisu ga Yesu naga taaga sike na.

⁹ Ana lala amolue e ravie nene, aþasuþe la ke sina apitomi tano, ana Yesu pisaar mþarera pan la, pisaluþar la, pisape “Suri naþa Ntewa kila amiu apisu ne, þisi na amiu ve avisawal

re va yaru la nanagane, vano-o tol naþa Narina ne Yeririna mali sina ga e marena, e pogos nene narui amiu akilia avisawal va yeririna lala.”

La apisayu Elaisa

Mak 9:11-13

¹⁰ Ana nalogena la telu nene apiun tan Yesu, apisape “?Sanapen naþa navianena na navisaluaena lala asuþna ga apisa ke, apisape ‘Monar Elaisa naga wasuþe ke sina ga imi sumo wa, siraunia na Navisaarena nene kilia imi malivi?’”

¹¹ Ana Yesu pisataþne la, pisape “Naþa la apisa sanene, naga lelaga kemua, komin Navisawalena Malakaea naga pisa sanene rui e kiena tusi. Elaisa naga monar imi sumo vena kila ruru make suri punu ga, þisi na Navisaarena naga kilia imi sirau, ¹² ana in na nevisa van amiu sanini, Elaisa nene pimi þisi rui, ana pe yaru lala apisu kilale re asape naga poli, ana pe asitom re naga poli. Ana e ke e þelaga nene, þisi na akila ke mena ga viowa va Narina ne Yeririna.”

¹³ Ana e pogos ke nanene, nalogena la telu nene akilia ga na wa, naþa Elaisa naþa Yesu pisayu ke ne, nane Yoane Nakeena nene.

Yesu pilelua yermare e yaru mee tai

Mak 9:14-29; Luk 9:37-42

¹⁴ Ana Yesu amio la telu nene aþasuþela, ana apito asikolila amio þina la naþa asike e pogos nene, ana yaru tai pimi kinai tano e lana ne Yesu, ana pisa pisape ¹⁵ “Suþe, inu sineun nesape ko sineþna ye kiau yaru mee nini, oiila naga, komin naþa maiena tai teke e naga. Maiena nene kila naga marmarluiam yam moki paþisi, ana kila kare manene la naga wa, suþna kila ke naga mlorvavae ma pano, mloru pa e kapi pona e mena ga e wii lala. ¹⁶ Inu nepureli naga pimi puna ne kioþna nalogena lala, ana amiyuþnaen pano-o, peraga, ana akila ruru þele naga.”

¹⁷ Ana Yesu pisi pa kiena nalogena lala, pisape “?Amiu la nene, sanape na sanene? Amiu na pe apiawa re nenaga e Ntewa poli, silaga amiu asuþna ga apa ape wowe yo. ? Monar nesuþna si nemio amiu vano tol pogwai? Inu sineu maren amiu paþisi rui. Ana poga ga, aure yaru mee nene imi pun inu.” ¹⁸ Ana la aþure yaru mee nene pimi, ana Yesu pisaar pan yermare naþa sike e naga, pisape “!Omolue e naga nanagane ga ne!” ana verakorena yaru mee nene pimi po sina.

¹⁹ Ana siraun e pogos nene, pog naþa Yesu suþna naga taaga, nalogena lala apimi puna, apiun tania apisape “?Sanape na imimi mepilelua þele yermare naþa sike e yaru mee nene?”

²⁰ Ana Yesu pisa pan la, pisape “Nanene na vanon naþa amiu pe apiawa ruru re marera e inu poli wa. Lelaga nevisa van amiu, visae aviawa e inu ve tokak ga ve sa ga narin kurus nen mras nen purpa, ana visae kiamiu naviawaena ne ve lelaga kemua napo, ana þisi na amiu akilia avisa va tavie na meke ne, avisave ‘Ko oure,’ ana þisi na naga monar ure. Þisi na pe suri re tai naþa amiu akilia akila þele poli. ²¹ Ana naþa naþeneplanen yermare la ne sanene, ana kana mrapa ne sanini: yaru na monar len, ana monar monsilu ga ve kinan re. E ga e þelaga nene, þisi na naga kilia mene plan yermare kar la ne sanene.”

Yesu pisawal ke sina ga kiena marena

Mak 9:30-32; Luk 9:43-45

²² Ana pogos tai naþa Yesu amio kiena nalogena lala apimi lele taaga garu Kalele, Yesu pisa pan la, pisape “Lavisi ke naþa aligan Narina ne Yeririna va e limana yaru la narui, ²³ naþa þisi na aweþnar naga mare, ana siraunia, e kana legiena na telu, þisi na Ntewa kila naga mali ke sina ga.” Ana pogos naþa Yesu pisa visena nene, kiena nalogena lala amloge piowa vanon paþisi.

Kilavaru na takis na Yuþna Wa Mana Ntewa garu Yerusalem

²⁴ Pogos naŕa Yesu amio kiena nalogena lala apimi atol Kapeneam, yaru lala na warpoloen takis na Yuŕna Wa Ŕana Ntewa, apimi puna ne Pita, apiunia apisape “?Sanape, kioŕna navianena ŕena ga pul ŕa takis ne, pona peraga?”

²⁵ Ana Pita pisataŕnea, pisape “Naga pul ŕaga.”

Ana Pita ŕasuŕe si pa e yuŕna naŕa Yesu sike ea, a naga pe pis re poli wa, ana Yesu naga piŕŕesia, piunia pisape “Saemon, ko ositomveveli ŕarin suŕe na yomarava la nene. ?Li pe la ne apul ke takis nene pan la? ?Yaru na ŕala mratava ga lala, pona yaru taŕena lala?”

²⁶ Ana Pita pisa, pisape “Yaru taŕena ga lala, la monar aulia.”

Ana Yesu pisa, pisape “Ee, sanene narui, ana kana kinasia sanini, mratava kiena ne ŕarin suŕe lala, la taŕatete aulia. Ana in ke nena naŕa nepe mratava kiena ne Suŕe Keviu na Yuŕna Wa naŕa narui, ana vanon suri ne nanene, in na pe pon re neul takis naŕa la apiun ke tan ko poli. ²⁷ Ana popon italu na ve tekila kare re yaru lala na warpoloen takis, italu ŕena ga monar toul ga. Ko, oto garo e lapa, oto oŕate ika, a ika naŕa oŕate ŕesania, ŕisi na ko olual kilavaru tai e logona, naŕa torokin italu toul kieta takis ea, ana olavia ola ova oulia.”

18

“?Yaru ai naŕa naga to laa metavan yaru taŕena lala?”

Mak 9:33-37; Luk 9:46-48

¹ Ana e pogos ke nene, nalogena taŕena lala apimi aŕnalivi, apimi nena puna Yesu, apiun tania, asape “Imimi sinemimin meviun mesape: ?Yaru ai naŕa naga to laa metavan yaru taŕena lala e loyuŕna na nasuŕenena kiena ne Ntewa?”

² Ana Yesu pio sisi tai naŕa suŕna ga pimi puna, ana mligan sisi naŕani suŕnalulu su likan la, ³ ana naga pisa pan la, pisape “In na nevisa van amiu, visae amiu ve avilopu amiu re naŕa kiamiu ŕelaga la aimi ve sa ŕelaga kiena ne nisisi nene, ŕisi na amiu taŕatete kemua aimi loyuŕna e nasuŕenena kiena ne Ntewa pogos tai. ⁴ Ana yaru naŕa kila kiena sitomena su ga tano ve sa nisisi nini, yaru nene naga yoko kilia imi to laa metava, taulu yaru taŕena lala e nasuŕenena kiena ne Ntewa. ⁵ Yaru naŕa kiena sitomena pito tano e inu, ana naga kekaran naŕa naga kila wo va nisisi kokan tai ne sanene, yaru nene naga sa ga naŕa naga kekaran inu ke ga narui.”

Nataŕaliena lala

Mak 9:42-48; Luk 17:1-2

⁶ Ana Yesu pisa ŕena ga, pisape “Ana visae yaru tai kila nisisi tai ne sanene ligan inu, ve viawa re si ŕarera e inu, ana ŕisi na yaru nene kus nakoena tai naŕa ŕarera manene la. Visae aŕatear pupia kilavaru tai ŕene kolmekina, ana akuwani naga talilu vitove e lowe memaena, nanene naga nakoena tai ne meme ga ne, ana yaru nene naga yoko war va re la na wa taulu nanene. ⁷ !Aulai! Yomarava nini piowa manene la narui, naŕa pulen manene la suri la naŕa silaga asuŕna akilali ke yaru lala vena kila la akilalu kiela naviawaena e inu. Nataŕaliena la nene ŕisi na asuŕna likan amiu silaga, ana ŕisi na viowa manene la va yaru la naŕa aŕar nataŕaliena viowa la nene pimi e yaru taŕena lala.

⁸⁻⁹ “Visae lumoŕna tai, pona laŕna tai, pona kilamaraŕna tai, pona suri ya sina naŕa e kioŕna malena, visae suri la nene tai kila ko ve oviawa re si ŕarera e inu, popon otelua suri nene vetan ko, okuwan vano. Visae otelua ŕelaga na mlamulena viowa vetan kioŕna malena ve sanene, ŕisi na ko okilia ova loyuŕna e malena, a visae ko ova loyuŕna e malena naŕa lumoŕna, pona laŕna, pona kilamaraŕna, pona suri ya sina e kioŕna malena, visae suri la nene tai kovio ŕisi rui, ana nanene na poga ga nene. Ana piowa manene la naŕa visae tasneŕna la punu ga amio kioŕna ŕelaga viowa lala asuŕna woga ga e ko, ana siraunia akoven ko e kapi naŕa taŕatete ŕewo pogos tai e yo naloge viowaena.”

Ŕakaiwa na sipsip naŕa kilalu mrapa

Luk 15:3-7

¹⁰ Ana Yesu pisa mēna ga, pisape “Amiu na monar avisuar ruruia vena amiu ve asitom korenan re naru la tai nene pogos tai. Visae peraga, amarañe amiu, vanon naña naru la nene, la kiela navisi lala nae ma e peni naña la asuñma apisuar la mñaga, a navisi la nene silaga asike e marana ne Ata nae ma e peni. ¹¹ Ana yuñmaena kiena ne Narina ne Yeririna naga sanini: naña naga pimin pisape tamalia la naña akilalu mrapa.

¹² “Amiu ayagogon ruru li suniena nini: Yaru tai naña naga kiena sipsip lala tol ponotia taaga, ana lala tai kila ãarina, pa la perina, ana kila pal mrapa, pa kovio. ?Pisi na yaru nene kila sanape narui? Naga monar ligana kiena sipsip la lualima ovari pa ovari nene, asuñma ga akinana ke e yo na viluñini, ana naga monar vano vena kaleli sipsip nene naña kilalu mrapa. ¹³ Lelaga nevisa van amiu, pogos naña naga mñal si sipsip nene, ana naga kilia kekaran va ãisi, taulu naña naga kekaran kiena sipsip tañena la moki naña asu ruru asuñma ga, pe amial re naña apa akovio poli.

¹⁴ “Ana Arimamiu nae ma e peni, naga mēna ga sa ke ga, naña naga yepen mavin narina tai nene yepe vetan mrapa vena vano va kovio.”

Visae womla tai naña kila viowa van ko

Luk 17:3

¹⁵ Ana Yesu pisa mēna ga, pisape “Visae womla tai naga kila viowa van ko pogos tai, monar ko ova ovisu naga naña amiu ga lua nene asikena, ana ko monar ovisawal kiena naviowaena vania. Visae naga kekaran logeen kioñma visena, nanene naga sa naña kioñma visena kila amiu luwoka ape mara wo si ãisi narui. ¹⁶ Ana visae naga yepen mavin yagogonen kioñma visena, ana monar ko ovano oure si yaru tañena la ve lua pona ve telu aimi amio ko, vena aiila ko e kioñma visena, sa naña Tusi Wa pisa pisape ‘Visena la punu ga, monar yaru naiilaena visena, yaru ve lua pona ve telu, vena kila visena nene kilia suñmalu.’

¹⁷ Ana visae womla nene yepen mavin ke yagogon ruru koena wa, ana ko monar ovisawal kiena ãarkawa nene va ãegas nen li nalelagaena lala, vena la ãasia akilia aimi avisuli re mēna ga naga. A visae naga mñarera ke ga wa, ve yagogon re mēna ga nalelagaena lala, amiu monar avisu naga sa naña naga pe wolawa ga tai, pona naga sa ga yaru na warpoloen takis, naña yaru lala pe ape erau ruru re nenaga amio la poli.”

Leniena naña yaru la mras ve lua la ga aviranar la ea

¹⁸ Ana Yesu pisa mēna ga, pisape “Lelaga, inu nevisa van amiu, ana suri ya naña amiu avisaluñaria e yomarava nini, ana Ntewa nae ma e peni naga mēna ga visaluñaria amio amiu, a suri ya naña amiu atañania e yomarava nini, ana Ntewa nae ma e peni naga mēna ga tañania amio amiu.

¹⁹ “A naga sina, nevisa mēna ga van amiu, visae amiu yaru la ve lua naña la lua aviranarlan suri tai e yomarava nini, ana visae lalua alenwoia, ana kau Ata nae ma e peni ãisi na naga kila suri nene van lalua. ²⁰ Vanon naña visae yaru ve lua pona ve telu aimi lele taaga e kiau kia, ana inu mēna nesike likan la.”

Ñakaiwa na ãelaga na viewoena

Luk 17:3-4

²¹ Ana Pita pimi puna Yesu, piun tania, pisape “?Suñe, visae kiau wolai kila ke pe mesmesu re pan inu silaga poli, inu monar neviewo naga yam ve via? ?Monar va tol yam ve olua pona sanape?”

²² Ana Yesu pisatañea, pisape “Peraga, ãisi na ko ve oviewo re ga naga yam ve olua ga, ko monar oviewo naga yam ve lualima yam ve olua, ko oviewo mña naga sanene vano tol sina ga kana yam ve olua [70 x 7]. ²³ Ñelaga naviewoena loyuñma e nasuñenen kiena ne Ntewa, monar ve sanene narui. Amiu ayagogo e suniena tai naña pisayu ãelaga naviewoena, naña pisa sanini, pisape: Ñarin suñe tai, naña naga sinenan sape visuveveli lapui la naña kiena yaru na yuñmaena lala akila pania. ²⁴ Ana naga kila mña sanene pano-o, ana añure kiena yaru nayuñmaena tai pimi puna, naña yaru nene naga kila lapui na

kilavaru na tenario via puna ne kiena yerkawa nene. ²⁵ Pogos naþa apiun kilavaru tan yaru nene, naga pisape naga taþatete si ulmaran lapui nene. Ana yerkawa nene pisa pa kiena yeririna lala, pisape ‘Poga, akilalua naga a auliulinlua naga ve kiena ne yerkawa taþena, vena yuñae korena ga vania. Ana auliulin mēna ga wona, amio narina lala, a amio make kiela suri lala, a awar kana kilavaru imi vena auli kiena lapui nene komþasia ea.’

²⁶ “Ana yaru nene mloru e lana ne þarin suþe nene, tagi m̄arera pania, pisape ‘Ko ope yerkawa, awis, inu sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.’ ²⁷ Ana yerkawa nene sinena miye yaru nene, naga piwo make lapui nene pania, vena ve ul marana re sina, ana tañan yaru naþani molue ga sa ga ne.

²⁸ “Ana pogos naþa yaru nene pano, naga pisu kiena erau tai, naþa kiena erau nene kiena lapui tai teke e yaru nene. Ana kiena lapui ne ve tokaki ga, ana yaru nene pano þuarar kolmekina, pisa pania, pisape ‘Ko monar oul lua kioñna lapui nene vetan inu nanagane ga ne.’

²⁹ “Ana kiena erau nene pimi mloru e lana, tagi manene pania, pisape ‘M̄ara, ko ope kiau erau, awis, sineun nesape neviun tan ko vena ko ola re narin pogos tai van inu sumo wa, vena inu nekilali neul maranli lapui nene van ko.’ ³⁰ Ana yaru nene yepena mavin viewoen kiena erau nene, þisi na naga pa kila la amligan naga pa e yuñna nakoena, vena suñna vano-o ul plan kiena lapui nene, þisi na naga kilia molue sina.

³¹ “Ana pogos naþa yaru taþena la naþa kiena ne þarin suþe nene apisu þelaga nene, amloge piowa paþisi, ana apa puna ne kiela þarin suþe, apisawal suri la nene pania. ³² Ana þarin suþe nene pio kiena yaru nene vena vim si puna, ana sinena karia, pis m̄arera pania, pisape ‘!Aa, ko na ope yaru þilþil ya na sanene! Inu nepiewo ko e kioñna pupia lapui nene rui, vanon naþa otagin manene pan inu, ana okila sineu miye ko. ³³ ?Vanon ya ne ko taþatete mēna ga sineñna ye kioñna erau sa naþa inu sineu miye ko sumo rui?’ ³⁴ Ana þarin suþe nene sinena mimi pa la narui, ana naga pisape monar aligan yaru nene va e yuñna nakoena, ana la monar ala m̄na nakoena vania vano-o naga ul plan make kiena lapui nene.”

³⁵ Ana Yesu pisa, pisape “Visae amiu ve aviewo re womlamiu lala silaga, ve lelaga e sinemiu la wetelu, þisi na kau Ata nae ma e peni, naga sinena kar amiu ve sanene, þisi na naga la nakoena ve sa ke ga nene van amiu.”

19

Yesu pisayu sanape naþa yaru mligan lua wona Mak 10:1-12

¹ Ana Yesu pisa visena la nene þisi, ana naga mligan Kalele naga kome wii nae Yortan lepas na vano, ana pa metava e lepas nae Yutea. ² Ana þina lala ataveve ke naga e pogos nene, ana e yo nene naga kila ruru namaiena la moki.

³ Ana Varasi mēna ga laþasia asike e pogos nene, ana apimi puna ne Yesu, apisape akilali ke sina ga naga, la apiun naviunena tai pania, la apiunia, apisape “?Kieta navisaluaena pisa ya ne e lepas nen þelaga kiena ne yaru naþa ligan lua wona? ?Mesmesu ga naþa yaru kilia kila sanene vanon suri kar punu ga naþa pe miasia, pona kilia kila vanon ga suri kerkeviu ga laþasia?”

⁴ Ana Yesu pisatañe la, pisape “?Pona amiu na pe akilia re Visena Wa kiena ne Ntewa naþa naga pisa, pisape ‘E purþesia, Ntewa naga sii suri punu ga, ana sii mēna ga yeririna lua, yerñene tai, a sira tai?’

⁵ Suri nene amiu akilia þisi rui, amio mēna ga visena taþena nene naþa pisa, pisape ‘Sanene, þisi na yaru ligan arimana amio anena, ana naga vano vilolar wona na sira, ana lalua aimi ave taaga ga narui.’ *Nas 2:24*

⁶ Nanene kila sane lalua ve ave lua re sina, ana lalua apimi ape taaga ga narui. Ana ya naŕa Ntewa naga vilolaria aimi ave taaga, pe pon re si yaru kilapure la poli.”

⁷ Ana Varasi la nene amloge visena la nene, ana apiun ke sina ga tan Yesu, asape “? Poga ga, ana vanon ya ne Mosis naga pisawal navisaluaena nene naŕa taŕnan sape yaru naga kilia la ŕmaki naliganluaena tai vena la va wona, vena ligan lua naga vano?”

⁸ Ana Yesu pisataŕne la, pisape “Ee, ana sumon naŕa nasiien yomarava nini, naga pe sa re nene poli, ana vanon naŕa amiu ŕarimiu lala apimi ŕarera paŕisi, nane kila Mosis taŕnania sanene sape siar e repimiu la pimi, amiu akilia aligan plan womiu lala. ⁹ Ana nanagane, inu nevisa van amiu, visae yaru tai, wona kila kolau, yaru nene kilia ligan lua wona nene. Ana visae sira nene ve kila re kolau ve sanene sumo, ana yaru nene ligan lua naga, ana ŕisi na va were sira taŕena, visae ve sanene, ana Ntewa pisu sane yaru nene naga kila kolau narui amio sira taŕena nene, naga kila kare sira nene naŕa wona na sumo.”

¹⁰ Ana nalogena kiena Yesu lala apisa pania, apisape “Visae ve sanene, ŕelaga na talopaena pe suri ŕarera tai ne paŕisi ne. Pe pon re si tekila ita tetalopa poli.”

¹¹⁻¹² Ana Yesu pisa pan la, pisape “Ee, lelaga naŕa yaru laŕasia naŕa ŕisi na la ve atalopa re pogos tai, sa naŕa sane laŕasia apaeme ana tasnela la piowa pa rui, pona laŕasia akila kare tasnela, sa naŕa asila, ana la taŕatete atalopa. A laŕasia, pe atalopa re poli vanon naŕa la amligan talopaena vena la ayuŕnae e nasuŕenena kiena ne Ntewa. Ana Visena Wa, naga pisa pisape popon yerŕene amio sira, lalua atalopa, a popon lalua asu ruru ŕnaga sanene tol luas nen kiela malena la luoka. A ko naŕa ko okekaran visena nene, ana opisu naŕa Ntewa naga kila sanene pan ko rui, popon olarar ruru visena nene ŕarera e kioŕna malena.”

Yesu pisa ruru sisi lala

Mak 10:13-16; Luk 18:15-17

¹³ Ana laŕasia akus narila lala apimi puna Yesu, vena naga ligan limana te la, len wo la. Ana nalogena lala apisuia, ana apisi ŕarera pan yaru la nene, apisaluŕar la, ¹⁴ ana Yesu pisa, pisape “Amiu ve avisaluŕar re sisi la nene, amiu ataŕnan la aimi pun inu, vanon naŕa sisi la nene na asa ga la naŕa asike loyuŕna e nasuŕenena kiena ne Ntewa.”

¹⁵ Ana naga mligan limana te sisi la nene, ana suraunia, naga mial pano.

Yaru ŕnee tai naŕa kiena suri moki

Mak 10:17-22; Luk 18:18-23

¹⁶ Ana e pogos taŕena tai, yaru ŕnee tai pimi pisu Yesu, piun tania, pisape “?Navianena, ana in na monar nekila yuŕnaena wo ya, naŕa vena kila inu ŕisi na netol malena naŕa ve uro re?”

¹⁷ Ana Yesu pisa pania, pisape “?Vanon ya ne ko opiun tan inu sanene, osape nevisa yuŕnaena wo tai van ko? Ntewa ga naga po, a visae ko ologear kiena navisaluaena lala, ŕisi na ko okilia otol malena wo nene.”

¹⁸ Ana yaru naŕani piun ke sina ga tan Yesu, pisape “?Ana ko opisa ke navisaluaena ya la nene?”

Ana Yesu pisa pania, pisape “Navisaluaena ne la nanini narui, naŕa pisa pisape: ve oweŕnar re yaru mare, ve okila re kolau, ve ovinau re, ¹⁹ ve ovisokan re, ko ova tanon arimoŕna amio anoŕna, a ko ositom nalavis puŕna lala, ovisuar ruru la, ve sa ke naŕa ko opisuar ruru ko ke ga.”

²⁰ Ana yaru ŕnee nene pisa pania, pisape “Navisaluaena la naŕa ko opisa ke nene, inu nesuŕna nemlarar make punu ga rui. ?Suri ya si naŕa teke ga wa, naŕa inu pe nekila re poli wa?”

²¹ Ana Yesu pisa pania, pisape “Visae ko sinoŕnan osape oimi omesmesu ruru wo va ŕisi, torokin naŕa ko otol malena naŕa ve uro re, ŕisi na ko na monar okila ve sanini: ko ovano, oululin plan make kioŕna suri la punu ga, ana owar kana kilavaru nena, ova

ovioviaonia van yaru la naþa pe kiela suri re poli. Visae ko okila sanene, þisi na ko kioþna suri wo lala ve moki vaþisi ma e peni. Ko, ova okila, siraunia oimi otaveve inu.”

²² Ana pogos naþa yaru mēe nene mloge visena nene, kiena sitomena urmi a sinena piowa paþisi, vanon naþa naga kiena suri la moki manene la. Ana naga pure matan Yesu.

Yaru naþa kiena suri moki, naga mārera la naþa va loyuþna e nasuþenena kiena ne Ntewa Mak 10:23-31; Luk 18:24-30

²³ Ana Yesu pisa pa kiena nalogena lala, pisape “Lelaga nevisa van amiu, visae yaru tai naþa kiena suri moki, naga sinenan pisape va loyuþna e nasuþenena kiena ne Ntewa, suri nene na mārera towe mna naþa. ²⁴ Ee, inu nevisa van amiu, visae kamel tai naga va warpoyo e pulus nen nitil nene, nane naga mārera vaþisi ne, ana visae yaru tai naþa naga kiena suri la moki ana sinenan sape va loyuþna e nasuþenena kiena ne Ntewa, naga mārera la na wa.”

²⁵ Pogos naþa nalogena lala amloge visena nene, amilania paþisi, ana la apisape “? Suwala, ana visae ve sanene, þisi na ane kilia tol namalena nene?”

²⁶ Ana Yesu kirava pisu la, naga pisa pisape “Ee, lelaga naþa yaru taþatete kilia kila yaru tol malena nene, ana Ntewa ga kilia kila make suri punu ga.”

²⁷ Ana Pita pisataþnea, pisa pisape “?Ana sanapen imimi? Imimi meligan make kiamimi suri la rui, ana imimi metaveve ko. ?þisi na imimi metol mna suri wo laþas ne, pona peraga?”

²⁸ Ana Yesu pisa pan la, pisape “Lelaga nevisa van amiu sanini, pogos naþa Narina ne Yeririna totano e kiena lelana wa natotanoena e yomarava viu nene naþa þisi na imi, amiu naþa ataveve inu ke nanagane, ana amiu mēna ga atotano e pupia lelemiu wa natotanoena ve lualima taaga va lua, vena avisuar lus nae Israel lala lualima taaga pa lua nene, sa naþa amiu ape kiela þarin suþe lala. ²⁹ Ana yaru naþa visae ligan mna yuþna, pona wenla pona vinena, pona arimana pona anena, pona narina, pona kiena porotano, ana visae naga ligan suri la nene vanon ga inu, þisi na naga warmarana sina ga e yomarava nini kiena suri la naþa naga mligania, kilia tol sina ve ponotia tai, ana metavana, þisi na naga kilia tol mēna ga malena naþa ve uro re.

³⁰ “Ana yaru la moki liu naþa asu metava, þisi na ato tano, a yaru la naþa ato tano, þisi na la asu metava.”

20

þakaiwa kiena ne yaru na yuþnaena lala

¹ Ana Yesu suþna pisa mþaga pano-o, pisape “Suri naþa nepisa ga na wa, sa ke þelaga naþa Ntewa kila ke pa yaru lala loyuþna e nasuþenena kiena. A þisi na nevisayu suri nene van amiu e þakaiwa tai, naþa pisa sanene, pisape: Yerkawa tai, naþa kana pupia lokilþmasþas tai. E kolulagi tai, naþa pe yemlagi ruru re poli wa, naga pa e pulkumali tai vena were yaru laþasia ava ayuþnae e kiena lokilþmasþas nene e legiena nene. ² Naga mþal la þasia, ana pisaar pan la e kilavaru tai naþa torokin yuþnaena na legiena wetelu tai, ana mligan plan la apano vena ava ayuþnae e kiena lokilþmasþas nene. ³ Ana e mrae ovari, naga pa sina ga e pulkumali nene, pisu yaru taþena lala asu korena ga, asuþna sane pe kiela yuþnaena re poli, ⁴ ana naga pisa pan la, pisape ‘Popon amiu mēna ga aimi ayuþnae re e kiau lokilþmasþas, ana þisi na nowul amiu ke ga.’

⁵ “Ana la nene apa amiyuþnae, a siraunia, kolpae mēna ga, a mrae telu mēna ga naþa yepekilavi, ana yerkawa nene þasuþe si pano, þere ke sina ga yaru laþas apimi amiyuþnae kiena sanene. ⁶ A yam si tai, e yepekilavi mrae lima, naga þasuþe sina ga pa e pulkumali nene, pisu yaru laþasia naþa asuþmalu asike e yo nene na wa, ana naga pisa pan la, pisape “?Komin ya ne asu koren ke sanene na wa e yo nini, naþa pe akila re nena yuþnaena tai poli?”

⁷ “Ana la apisatañea, apisape ‘Peraga, pe yaru tai pimin re sape meva meyuñae kiena poli.’

“Ana yerkawa nene pisa pan la, pisape ‘Poga, visae sanene, in na neure amiu narui. Amiu, aimi ayuñae kiau.’

⁸ “Ana e ko yepekilavi la rui, amiyuñae ñisi, ana yerkawa nene pisa pa kiena navisuaren yuñae nene, pisape ‘Poga, ovio yaru na yuñae nene aimi, oul la. Ñisi na ko okila sanini: oul ñesan la naña apimi mare ga na wa, vano-o oñisi e la naña apimñesani kolulagi.’ ⁹ Ana pogos naña yaru la naña asiar ga yuñae nene e mrae lima apimi, yaru nene mla kilavaru pan la torokin ke legiena wetelu na yuñae taaga. ¹⁰ A pogos naña la naña apami amiyuñae sumo apimin vena awar kiela kilavaru, la amape pona la ala va la metava, taulu la naña amiyuñae plas ga, ana yaru nene mla kilavaru pan la, la punu ga torok ga.

¹¹ “Ana pogos naña la apisu kiela kilavaru sa ke ga nene, la amloge piowa, asuñae apisimumun yerkawa nene. ¹² Ana amligan lala tai pa piun tania, pisa pisape ‘La naña apimi mare ga na wa, la amiyuñae aora taaga ga, ana imimi memiyuñae legiena wetelu e pupia yepisusun nene. Imimi mepisu naña ko omla kilavaru maran taaga pan la, sa ke naña omla pan imimi. ?Suri nene na sanape na sanene?’

¹³ “Ana yerkawa nene pisatañe naga, pisape ‘Ñara, in na pe nekila kare ko re nene poli. Italu tepranar ñisi rui, tesape ko oyuañae e legiena wetelu ve taaga nene, ana tesape ñisi na nowul ko torokin ga kioña yuñae nene. ¹⁴ Ve sanene, popon ko ola kioña kilavaru ova ga uña. Naga kiau sitomena ga tai nene, naña kilavaru naña nemla pan ko, sineun nesape nela ñena ga marana ve taaga va la naña apimi mare ga. ¹⁵ ?Ko ositom osape in na tañatete nekila sa naña inu sineunia, e kiau kilavaru? ?Sanape na ko opielue e yaru la naña nekila ke po pan la? Ana ñakaiwa nini ñisi e nene.’ ”

¹⁶ Ana Yesu pisa make kiena visena e pogos nene, pisa pisape “Ana yaru la naña asirau, ñisi na la asumo, a la naña asumo, ñisi na la asirau.”

Yesu pisawal kiena marena yam telu narui

Mak 10:32-34; Luk 18:31-34

¹⁷ Ana Yesu pa ke metava ma Yerusalem narui, ana pogos naña amial ke e mrapplepa apavini, naga pio kiena nalogena la lualima taaga pa lua apimi puna, ana pisi pan la, pisape ¹⁸ “Amiu ayagogo ruruia. Nanagane ita tepa ke ma Yerusalem narui, naña ñisi na ve ve piavi re, ñisi na aligan Narina ne Yeririna e limana ne yerkawa lala kiena ne yaru wa lala, a amio navianena kiena ne navisaluaena ñena lala, ana ñisi na la nene la aliñere naga avisave ñisi na naga monar mare. ¹⁹ Ana siraunia aligan naga e limana ne le Rom lala, naña ñisi na la nene akirakirai viowa vania, a ñisi na la akua naga, ana ñisi na asuarua naga e laki torovia vena mare. Ana pogos naña naga mare pae, ana e kana legiena na telu, ñisi na Ntewa kilamalia sina naga.”

Anenane Semes amio Yoane, naga piun suri tai tan Yesu

Mak 10:35-40

²⁰ Ana wona ne Sepeti, naga ñere narila luwoka nene naña Semes amio Yoane, apimi puna ne Yesu. Sira nene kinai e lana Yesu, piunia pisape “Inu sineunia nesape otañan suri tai van inu.”

²¹ Ana Yesu pisatañe naga, pisape “?Ana ko sinoñan osape oviun ya?”

Sira nene pisatañea, pisape “Inu sineunia nesape otañan sanini: pogos naña ko ovisirlua kioña nasuñenena, ñisi na naruu la luwoka nene akilia atotano amio ko e kioña yo wa naña metava lavisin ko, tai e lepas nen lumoña na ñamarua, a tai e lepas nen lumoña na ñañeli.”

²² Ana Yesu pisatañe la, pisape “Amiu pe akilia re suri naña apiun ke ne poli. ? Sanape, amiu lua nene asitom asape amiu lua atorokin naña ita tomunpae e piala naloge viowaena nene naña inu monar nomun ea?”

Lalua apisa pania, apisape “Ee, imimi lua metoroki.”

²³ Ana Yesu pisa pan la luoka, pisape “Ee, lelaga naŕa ŕisi na amiu luwoka amun mēna ga e māu piala naloge viowaena nene, ana suri nene naŕa amiu lua apiunia, apisape amiu lua atotano amio inu e lepasneu luwoka, suri nene naga pe kiau re naŕa nela van amiu poli. Yo la ne sanene, kiena ne la ga naŕa kau Ata naga kila ruru pe kiela, a naŕa naga pisaar ŕisi rui pisape ŕisi na la atotano ea.”

Narina ne yeririna pimin vena yuŕae kiena yaru lala

Mak 10:41-45

²⁴ Pogos naŕa nalogena taŕena la lualima nene la amloge suri nene, naŕa wolai lalua nene Semes amio Yoane apiunia, ana la sinela kari lalua. ²⁵ Ana Yesu pio la, vena aimi puna, vena naga visi van la, ana naga pisa pisape “Ita tekilia rui ŕelaga kiena ne yaru la naŕa pe amlelaga re e Ntewa poli. Ita tepisu mā naŕa suŕe lala amio yerkawa lala na yomarava nini, la sinelan asape aŕareran yaru taŕena lala vena asu vatanon la silaga. ²⁶⁻²⁷ Ana amiu kiau nalogena lala, kiamiu ŕelaga monar ve ve sa re nene. Visae amiu yaru tai sinenan sape imi ve kiamiu yerkawa tai pona kiamiu nasumonena tai, kana mrapa nena sanini: yaru nene monar imi ve sa ga yaru na yuŕae kiamiuena tai. ²⁸ Narina ne Yeririna naga kila sanene ŕisi rui, naŕa naga pe pimin re naŕa vena yaru la akila yuŕaena naiilaen naga poli, ana naga pimin vena naga yuŕae vena iilaen lala, a vena taŕan kiena malena vena ul plan yaru la ve moki.”

Yesu kila ruru kilamarakata lua

Mak 10:46-52; Luk 18:35-43

²⁹ E pogos nene, Yesu amio kiena nalogena lala asike garu Seriko, ana pogos naŕa amligan e pulkumali nene apano, ana yeririna la moki paŕisi naŕa ataveve la. ³⁰ Ana kilamara kata la lua, naŕa lalua atoŕna tano e isinen mrapplepa. Ana pogos naŕa lalua amloge naŕa apisape Yesu mial ke e mrapplepa pimi, lalua apio ke asape “!Suŕe-o, ko lus kiena ne Tepet, imimi lua mesape ko sineŕa ye imimi!”

³¹ Ana yaru taŕena lala apisin sinemimien pan lalua nene, apisa apisape “Ee, amiu lua nene aŕaaga.”

Ana lalua apio manene la, asape “!Suŕe-o, ko lus kiena ne Tepet, imimi lua mesape ko sineŕa ye imimi.”

³² Ana Yesu suŕalu su mrapa e yo nene, pio lalua, pisa pisape “?Amiu lua sinemiun asape nekila ya ne van amiu?”

³³ Ana lalua apisataŕea, asape “Suŕe, awis, imimi lua sinemimin mesape kilamaramimi la imi wo, vena mekilua mekirava.”

³⁴ Ana Yesu sinen mie la, ana tol kilamarala, ana lalua apisu ruru ke ga suri e pogos nene, a lalua asuŕalu ataveve Yesu apano.

21

Yesu pimi tol yo Yerusalem

Mak 11:1-11; Luk 19:28-40; Yoane 12:12-19

¹ Nanagane, Yesu lala apami lavisin Yerusalem narui, ana la aŕalivi e narin pulkumali tai sumo, kiena kia Petpas, naŕa teke e kunus nene naŕa la apio asape Kunus Na Purolip. Ana Yesu miila kiena nalogena la lua, pisape ² “Amiu lua ava e pulkumali na gare, a mesmesu e pogos naŕa ava loyuŕa ea, ŕisi na amiu lua avisu togki tai, naŕa aŕatear sike na, naga amio narina. Ana amiu lua aluŕar plan la, a amiu aure ga la luoka aimi pun inu e nini. ³ Ana visae amiu lua aloge yaru tai visi van amiu, ŕisi na amiu lua avisa ga vania, avisave ‘Suŕe na sinenan suri mali lalua nini vena ava akila kiena yuŕaena tai wa,’ ana pogos naŕa amiu lua avisa sanene, naga kilua taŕan lalua aimi veraga.”

⁴ Suri nene pimi ŕarpoyo vena kila visena nene kiena ne navisawalena nanua sumo vim ve lelaga, naŕa naga pisa pisape

⁵ “Amiu avion va le Saeon lala, avisave
 ‘Amiu apisu ke ne, nanagane kiamiu þarin suþe pam ke pun amiu narui.
 Naga pe yaru tai naþa kiena sitomena to ga tano, kila naga kus ga togki,
 togki tai naþa ve tokaki ga, naþa pe ninus ke ga wa.’”

Sek 9:9

⁶ Ana nalogena lalua nene apano, ana lalua akila sa naþa Yesu pisa. ⁷ Ana pogos naþa lalua aþere togki nene amio narina apimi, ana lala aþatetae m̃ala kulkota lala e wos nen togki lalua nene, ana Yesu naga pa totano meta e navetokak. ⁸ Ana yaru la mokliu naþa aþatetae m̃ala kulkota lala suvileviles nen mrapplepa, ana yaru laþasia apa ate m̃amañela lala pitomi aþatetae m̃ena ga, vena togki kiena ne Yesu yali ea. Ve sanene, akila sa naþa la apatanon Yesu sa naþa naga pe pupia þarin suþe tai. ⁹ Ana la amial ke apano vena ava loyuña Yerusalem, ana þina na yeririna la naþa asumon Yesu, amio la naþa asiraunia, asuñña apiovionia sanini, apisa apisape

“!A ke suwala, po na po! !Teyeluar naga naþa pe lus kiena ne Tepet tai nene!

!Ntewa na mava, ko ovisa ruru naga nene naþa pimi e kioñña kia!

!Amiu nae ma e peni metava amiu m̃ena ga ayeluar naga!”

Yauena 118:26

¹⁰ Ana pogos naþa Yesu pa loyuña e Yerusalem, yaru lala sinela pulaula, ana la asuñña akila ke visena la moki, asuñña apiuviunia, asape “?Yaru nene naga ai?”

¹¹ Ana yeririna la naþa apimi amio Yesu, la apisatañña sanini, apisa apisape “Nanene na navisawalena nene naþa naga molue e pulkumali nae Nasaret garu Kalele, naþa kiena kia Yesu.”

Yesu m̃ene plan la naþa asuñña apuliwilin ke suri e Yuñña Wa M̃ana ne Ntewa

Mak 11:15-19; Luk 19:45-48; Yoane 2:13-22

¹² Ana Yesu pa e Yuñña Wa m̃ana ne Ntewa, a e pogos nene naga pisu sane yaru la moki liu naþa la asuñña e kopkop na yuñña nene. La nene la asuñña akila ke ga yuññaena lala natauluen kilavaru, naga nene e lepas nalaena lala a e kuþaþaena na Yuñña Wa nene, ana la asuñña akila kewia ke ga yaru lala. Ana pogos naþa Yesu pisu suri nene, naga pe kekearan re poli. Ana naga pa m̃ene plan la, naga kawepu narin varvara kiena ne yaru na keueen kururu varu lala, a naga koantetaññ lele na totanoena kiena la naþa apuliwilin ke kupa lala. ¹³ Ana naga pisa pan la, pisape “Ntewa pisa e kiena Visena Wa, pisape ‘Þisi na la avisa m̃au Yuñña Wa avisave naga yuñña na leniena,’ ana amiu apilon þisi pimi sa ga puluve m̃ana yaru na vinauena la narui.”

¹⁴ Ana pogos naþa Yesu sike e Yuñña Wa nene na wa, kilamara kata lala amio laulu lala apimi puna, ana naga kila ruru la sina. ¹⁵ Ana yerkawa lala kiena ne yaru wa lala, amio navianena na navisaluaena lala, apisu yuññaena wo kiena ne Yesu la nene, a amloge m̃ena ga naþa sisi lala asuñña ga apiovion ke ga wa, asape “!A ke suwala, pona po! Teieluar naga naþa naga pe lus kiena ne Tepet nene!” ana yerkawa la nene sinela mimi manene la. ¹⁶ La sinela mimi sanene, ana la apisa pa Yesu, apisape “?E sanape, ko omloge m̃a visena naþa la asuñña apisa ke ne?”

Ana Yesu pisatañña la, pisape “Ee, nemloge m̃a ne. ?Ana sanape, amiu asitom ke asape visena nene piowa ga? Pona pe apuloli re Visena Wa kiena ne Suþe naþa pisa, pisape ‘Ntewa o, ko okilia okila nin sisi kokan lala, amio m̃ena sisi tomtom lala, amieluar ruru ko paþisi.’”

Yauena 8:2

¹⁷ Ana Yesu mligan la nene, molue ke sina ga petan Yerusalem, pa e narin pulkumali naþa Petani, pa mono ea.

Purlaki tai naþa pe þar re mras poli

Mak 11:12-14,20-24

¹⁸ Ana Yesu mon m̃a e nene, ana yemlagi kolulagi naga pisape wasuþe sina va Yerusalem, a naga suñña mial m̃a pavini, ana naga mloge sane viso karia. ¹⁹ Naga kira pa e isinen mrapplepa, naga m̃al purpiliva tai, naþa naga m̃as ga moki, ana pe mras su re e poli. Ana Yesu pisa pa purlaki nene, pisape “Ko ove owar re si mrasnoñña pogos tai.” Naga pisi sanene, ana veraga ga purpiliva nene mano taþa nenaga.

²⁰ Nalogenena lala apisu naþa purlaki nene pimi mano sanene, ana sinela kurkur paþisi. La apiun tai Yesu, apisape “?Ya ne kila purpiliva nene mano ke veraga sanene?”

²¹ Ana Yesu pisatañe la, pisape “Lelaga nevisa van amiu, visae amiu aviawa ñarera e inu, naþa amiu kiamiu sitomena ve veve lua re, þisi na amiu ñena ga akilia akila sanene, a þisi na amiu akilia akila ñena ga va re laa na wa taulu nene. Sane visae amiu avisa va pupia kunus nene, avisave ‘Osuñalu otove oula ova e sive,’ þisi na ve sanene narui. ²² A visae amiu aviawa kawa e Ntewa, naþa amiu alelaga kemua lelaga, þisi na amiu akilia atol suri ya naþa amiu amlen vanonia, amiu aviun tan naga.”

Nasumonon le israel lala sinelan asape avisaluþar Yesu

Mak 11:27-33; Luk 20:1-8

²³ Ana Yesu þasuþe si pa loyuña e Yuña Wa Ñana ne Ntewa, ana naga pa suña pian ke sina ga yaru lala. Ana yerkawa kiena ne yaru wa lala, amio nasumonena lala kiena ne le Yu lala, apimi puna, apiun tania, apisape “?Ko osuña okila ke suri la ne sanene e yo nini e kia kiena ai, a a ñena ga naþa tañan ko sape okila ve sanene?”

²⁴ Ana Yesu pisatañe la, pisape “Poga ga, ana inu ñena ga nesape neviun naviunena tai van amiu wa. Visae amiu avisatañe ruru kiau naviunena nene, þisi na nekilia nevisawal van amiu sanape naþa nekilia nekila ve sanene. ²⁵ Poga ga, kiau naviunena sanini narui, sape: ?Nakeena naþa Yoane naga kila mare ga nanua e yaru lala, naga suri tai naþa Ntewa naga pisa pania pisape naga monar kila, pona yaru ga la apisa pania?”

Ana naviunena nene kiena ne Yesu kila na la apisi ga pan la narui, naþa la asuña apisa apisape “?Þisi na ita tevisa sanape na vania? !Tevisuaruruia! Visae ita tevisa tevisave nakeena nene Ntewa naga pisa pa Yoane, þisi na yaru nene viun si tan ita, visave vanon ya ne ita pe temlelaga re e Yoane poli. ²⁶ Ana siraunia ita taþatete si tevisa tevisave nakeena nene, yaru ga la apisa pa Yoane, vanon naþa yeririna la nene la amlelaga ke ñarera þisi rui, asape Yoane nene naga pe navisawalena na lelaga tai kiena ne Ntewa, ana pe pon re yeririna la nene sinela kar ita poli.” ²⁷ Ana kiela sitomena la ne sanene narui kila la apisatañe Yesu sanini, apisa ga apisape “Imimi memninue ga.”

Ana Yesu pisa pan la, pisape “Visae sanene, þisi na inu ñena ga, taþatete nevisa van amiu nevisave ane pisa pan inu pisape nekila yuñaena la ne sanene.”

Þakaiwa kiena ne yaru tai amio narina lalua

²⁸ Ana Yesu pisa pan la, pisape “Amiu asitomli suniena nini. Yaru tai, narina na yerñene lua, ana yaru nene pa pisa narina naþa ñearu, pisa pania, pisape ‘Naruu, sineun nesape þane na ko ova oyuñae e kata lokilñasñas.’

²⁹ “Ana narina nene pisatañea, pisape ‘Peraga, yepemavi.’ Ana pe piavi re poli, yaru viu nene sitom si arimana, ana naga pilon kiena sitomena, ana pa miyuñae sa naþa arimana pisa pania. ³⁰ Ana arimana ne lalua nene naga sitom ke sape þisi na narina nene taþatete va yo, ana pisa si visena nene pan narina nasirau, ana narina nene pisatañe ruruia, pisape ‘Poga ga ata, þisi na neva ke nanagane ga ne,’ ana siraunia, ana naga pe pa re si poli.”

³¹ Ana Yesu piun tan la, pisape “?Lalua nene, ane kila sa naþa arimala sinenania?”

Ana lala apisatañea, apisape “Ñearu.”

Ana Yesu pisa pan la, pisape “Ee, ana lelaga nevisa van amiu, nanagane na sanene narui. Inu nesuña nepisu naþa yaru viowa la moki sane yaru na warpoloen takis lala, amio sira na mrapplepa lala, la ke naþa ape yeririna viowa la nene, ana nanagane la asuña akekaran ke naþa vena aimi loyuña e nasuþenena kiena ne Ntewa, la asuña apilon la ke rui. Ana nepisu sane amiu asike la varaun la, asike la perina paþisi wa. ³² Ana pogos naþa Yoane Nakeena naga pimi, naga pian amiu e þelaga na mrapa naþa mesmesu, ana yeririna viowa la nene amlelaga e naga. A amiu ñena ga, amiu apisu suri la nene, ana amiu na pe apilon amiu re lelaga poli, a pe amlelaga re nenaga.”

Ĕakaiwa na yeririna viowa la naĕa apisuar lokilĕasĕas tai

Mak 12:1-12; Luk 20:9-19

³³ Ana Yesu pisi ke pan la na wa, pisa pisape “Amiu ayagogon ruru si ĕakaiwa taĕena nini, naĕa pisayu yerkawa tai, amio kiena lokilĕasĕas tai. Yaru nene kila ruru kiena yo nene naĕa kila kove ĕarera tai telivi piora ea, a kila kana lelana navieplanen was nen ĕasĕas, a kila ĕena kana lele tai naĕa pa metava naĕa yaru kilia wiyu va se ea, vena visuar lokilĕasĕas nene.

“Ana e pogos tai, yerkawa nene sinenan sape yalor re va e purvanua taĕena tai, ana naga mligan kana lokilĕasĕas nene e limana ne yaru la ĕasia ayuĕaenia, ana aul vania.

³⁴ Ana yerkawa nene pa suĕa perina pano-o, ana naga pisa kilale pisape nanagane pogos na mraĕasĕas marua narui. Ana naga mligan kiena yaru la ava si puna ne la naĕa asike e kana lokilĕasĕas nene vena awar kiena kilavaru na mras nen ĕasĕas komĕasia, naĕa la nene monar aul vania. ³⁵ Ana poglis naĕa kiena yaru la nene apimi, ana yaru taĕena la nene aĕe la, naĕa tai la aĕe ga naga, a tai asuĕar naga mare, a taĕena sina akoveĕar naga mare.

³⁶ “Ana yerkawa nene mligan si kiena yaru taĕena laĕasia, ana la moki la sane, ana la naĕani akila si ĕelaga maran taaga sa ke ga pan la. ³⁷ Ana yerkawa nene sitomyu ĕelaga kiena la nene, ana naga pisape ‘Inu monar neligan ga naruu vano, ĕisi na monar avatanon naga,’ ana naga mligan narina wawa napo nene pano. ³⁸ Ana pogos naĕa apisu naga, asuĕa apisavisa pan la, apisape ‘Naga nene na narina ne yerkawa ke narui. Yaru ke nanene narui, naĕa visae yerkawa nene kovio, ĕisi na naga ke narui naga kus porotano nene sane lalimana ne arimana. Popon ita toweĕar ĕena ga naga mare, ana ĕisi na ita ga tekilia tokus porotano nene ve kieta.’ ³⁹ Ana sanene narui atarar naga, aĕure lua naga petan lokilĕasĕas pa vanua, ana aĕeĕar naga mare.”

⁴⁰ Ana Yesu piunia, pisape “?Pogos naĕa yerkawa nene imi sina, ĕisi na naga kila sanapen la naĕa asuĕa apisuar ke kiena lokilĕasĕas nene?”

⁴¹ Lala apisataĕea, apisape “Yaru viowa la nene, ĕisi na yerkawa nene weĕar la, monar amare e ĕelaga tai naĕa ĕarera viowa vaĕisi. Siraunia, naga ligan kiena lokilĕasĕas e limana ne yaru wo taĕena lala, naĕa ĕisi na akilia auli mesmesun vania e kana pog nena.”

⁴² Ana Yesu pisa pan la, pisape “Visena tai teke e Visena Wa kiena ne Ntewa, pisape ‘Kilavaru nene, yaru na yuĕaenen yuĕa lala, apisa apisape piowa ga, akoven rui.

Ana nanagane, kilavaru nene pimi pe kilavaru wo na mrapun yuĕa, naĕa uarar yuĕa ĕarera.

Suri nene, naga Ntewa ga kila, a imimi mepisuia na po paĕisi.’ *Yauena 118:22*

“?Visena nene na amiu apuloli ĕa pogos tai rui, pona peraga yo? ⁴³ Inu nevisa van amiu, ĕisi na Ntewa lalua kiena nasuĕenena vetan amiu, ana ĕisi na la va yaru taĕena lala naĕa kiela malena lala kilia war mras wo lala, torokin naĕa asike loyuĕa ea.

⁴⁴ “Ana visae yaru tai loru e kilavaru nene, ĕisi na si kare naga vaĕisi, tasnena wororowa make ga, pona visae kilavaru nene loru e yaru tai, ĕisi na kilamumu yaru nene kila kare naga vaĕisi.”

⁴⁵ Ana pogos naĕa yerkawa kiena ne yaru wa lala amio Varasi lala amloge ĕakaiwa kiena ne Yesu la nene, akilia naĕa naga suĕa pisayu la ke sanene. ⁴⁶ Kila narui lala sinela kar naga, sinelan asape auarar naga, ana akila ĕele ga komin amaraun manene laa ĕina na yeririna la, naĕa amlelaga asape Yesu naga navisawalena kiena ne Ntewa tai.

22

Ĕakaiwa na ĕaĕagena na talopaena

Luk 14:15-24

¹ Ana Yesu pis sina ga pan la e ĕakaiwa, pisa pisape ² “Ĕelaga kiena ne Ntewa naĕa pio yaru lala apimi loyuĕa e kiena nasuĕenena sanini: Ĕarin suĕe tai kila ruru pupia kinanena tai e ĕaĕagena na talopaena kiena ne narina. ³ Naga piun tan yaru la moki rui naĕa yoko aimi e ĕaĕagena na talopaena nene, ana pogos naĕa mligan kiena yaru

na yuĉmaena lala vena ava aure la nene aimi, ana la nene yepel mavin si imiena. ⁴ Ana ĉarin suĉe nene pisa pan kiena yaru na yuĉmaena taĉena lala, pisape ‘Amiu towe awasuĉe amiu ke sina ga avano, vena avisa kiau visena nene van la, avisavenua ita toĉne puluk la rui, amio ĉmena ga suri mali taĉena lala naĉa amlapa ruru po, ana suri punu ga lala e kinanena nene tekila ruru la pa rui. Avisava van la avisave monar aimi lele taaga amio ita e paĉagena nini.’

⁵ “Ana la apa apisa pan la sanene, ana la nene asitom korenan ga visena kiena ne ĉarin suĉe nene, lala sinelan asape asuĉma akila ga suri naĉa la sinelania. Tai pa kana lokove, a tai suĉma ga pisuar ĉma kiena yuĉma na wilwilinen suria, ⁶ a laĉasia apuarar yaru na yuĉmaena kiena ne ĉarin suĉe la nene, akila piowa pan la, ana aĉmemoĉmar la. ⁷ Ana ĉarin suĉe nene sinena mimi, ana mligan kiena li na mara lala apano, ana aĉne yeririna viowa la nene amarmare, a asikapi kiela pulkumali.

⁸ “Ana ĉarin suĉe nene pisa pan kiena yeririna lala, pisape ‘Kinanena nene tekila ruru ĉisi rui, ana la naĉa nepio la ĉisi vena aimi ea, la pe pon re si aimi poli narui, teligan la. ⁹ Ana inu sineun nesape amiu ataveve narin mrapa taĉena lala, ana yaru ai la naĉa amiu alualia, avio la vena aimi e paĉagena nini.’ ¹⁰ Ana kiena yeririna lala apano akila sanene, aĉpure yaru la apimi, pe suri korena ga naĉa visae yaru wo lala pona yaru viowa lala, aimi ga sanene vena akokonia ruru yo na paĉagena nene.

¹¹ “Pogos naĉa la asike loyuĉma e yo nene, ana ĉarin suĉe nene pimi vena talopan la naĉa apimi, ana e pogos nene naga pisa lala yaru tai, naĉa pe miyen re moĉma kulsota wo naĉa torokin paĉagena poli, mien ga kulsota tai naĉa pe taĉena ga. ¹² Ana ĉarin suĉe nene piun tan yaru nene, pisape ‘?ĉmara, ko opimi loyuĉma e yo nini sanape, naĉa ko pe omiyen re moĉma kulsota wo na paĉagena poli?’ Ana yaru nene pe pisa re si suri tai pan poli. ¹³ Ana ĉarin suĉe nene pisa pan kiena yaru na yuĉmaena lala, pisape ‘Amiu aviar ruru limana luwoka amio lana luwoka, ana amiu akoven naga va vanua, e yo malolo, e yo naĉa ĉisi na naga suĉma taglue, a suĉma kar luen ga maluena ea.’” ¹⁴ Ana Yesu pisa, pisape “Ntewa naga pio yeririna la punu ga, ana ve ve moki re naĉa naga wereplan la ave kiena.”

Suri kiena ne Ntewa a suri kiena ne Sisa
Mak 12:13-17; Luk 20:20-26

¹⁵ Ana Varasi lala apanon ataĉali naĉa alual naviunena ĉmarera laĉasia vena ataĉali Yesu ea, naĉa naga visataĉne ĉele ga. ¹⁶ Lala apisayu ĉmaga pano-o ĉisi narui, ana lala mligan kiela nalogena laĉasia amio ĉmena ga laĉas e ĉegas kiena ne Erot, apimi puna ne Yesu. Ana la nene akila kotalia naga e visena wo lala, la apisa apisape “Navianiena, imimi mekilia naĉa ko ope yaru mesmesu tai. Kioĉma visena lala punu ga pe lelaga, a ko opian ke yeririna lala e ĉelaga naĉa Ntewa naga sinenania. Ana ko pe opisu re ga yaru laĉas po poli, ana ko opisu yeririna punu ga marana taaga ga. ¹⁷ ?Suri ne nanene narui, imimi mesitom mesape ko ovisali van imimi, naĉa kieta navisaluaena pisa sanape? ?Pisa pisape, mesmesun ga naĉa ita le Yu lala toul takis va Sisa, naĉa pe ĉarin suĉe kiena ne le Rom lala, pona pe mesmesu re na sanene poli?”

¹⁸ Ana Yesu kilia ĉmaga naĉa la sinelan asape akila kare naga, ana naga pisa pisape “Kiamiu visena lala po naĉa po, ana losinemiu lala piowa a kona rui. ?Amiu asuĉma ataĉali inu ke sanene vanon ya? ¹⁹ Poga ga, amiu ala kilavaru na ulen takis tai imi.”

Ana amla tai pimi, akian pania, ²⁰ ana Yesu piun tan la, pisape “?Ane marana na teke e narin kilavaru nene? ?A ane kiena kia nene?”

La apisa apisape “Marana ne Sisa nene, a kiena kia ĉmena ga.”

²¹ Ana naga pisa pan la, pisape “Poga ga, suri naĉa kiena ne Sisa, amiu ala va Sisa, a suri naĉa kiena ne Ntewa, amiu ala va Ntewa.”

²² Ana pogos naĉa la amloge visena nene, amilan paĉisi, ana amligan Yesu aĉpure apano.

*La naþa amare, þisi na amal sina**Mak 12:18-27; Luk 20:27-40*

²³ Ana e ke e legiena nene narui, le Satusi laþas apimi puna ne Yesu, la sinelan asape aviun suri tai tan naga e lepas naþa lala amlelaga m̃arera ea, naþa la amlelaga asape yaru la naþa amare, taþatete amal sina e legiena maro. Vanon suri ne nanene apiun tan Yesu sanini, apisa apisape ²⁴ “Yesu, ko naþa ope navianena, imimi sinemimi mesape meviun tan ko, mesape sanape e visena tai naþa yermarua Mosis pisa nanua sumo. Naga pisa pisape visae yaru tai mare tan wona, naþa pe narila re poli wa, naga wenla monar talopa sina amio letano nene vena ve wona. E þelaga nene, þisi na sira nene kilia war narila tai, vena uarar kia kiena ne wona na yerñene naþa mare ne, vena kia nene mali m̃aga. ²⁵ Poga ga, ana e uña tai pun imimi, welelai la olua. Kiela m̃earu talopa, ana naga pe narina re tai poli wa ana naga mare tan wona, ana wenla nasiraunia þere leinia pe wona. ²⁶ Ana wenla nene naga mare tan m̃ena ga, a welelai na telu kila m̃ena ga sanene, pano-o tol welelai na olua, la punu ga amare tan sira nene. ²⁷ A siraun e wona la punu ga, sira m̃ena ga nene mare. ²⁸ ?Ana ko ovisali suri nene: e legiena maro, pogos naþa apisa ke apisape þisi na yaru la amal sina, þisi na sira nene na ve wona ai, vanon naþa naga talopa amio punu welelai la olua nene þisi rui?”

²⁹ Ana Yesu pisa pisape “Peraga, kiamiu sitomena pa pe wowe la, vanon naþa amiu pe akilia re ya naþa Visena Wa kiena ne Ntewa pisa poli, a amiu pe akilia re m̃ena ga ya naþa naga kiena nam̃areraena keviu kilia kila poli. ³⁰ Pogos naþa yaru lala amal sina, þisi na lala ave saga navisi kiena ne Ntewa lala ma e peni narui, ana þisi na ve akila re si suri nene natalopaena. ³¹⁻³² ?A e lepas na malena si nene, ana Visena Wa tai kiena ne Ntewa suña ga naga kilia iila ita e nene, pona amiu na pe apuloli re poli yo wa? Visena nene pisa sanini, pisape ‘In na nepe Ntewa kiena ne Epraam, Aisak, a Sekop.’ ?Ana visena nene pisa ya? La telu nene la amare e yomarava nini nakonua rui, ana kas moki na moki þaro rui, ana Ntewa pisa ga visena nene na wa, naþa pisape naga pe kiela Ntewa. Sanene na kiena visena naga kana kinasia sape la telu nene la amare e yomarava, ana la amal kemua puna na wa. Ntewa pe sinenan re sape kiena yeririna lala la ave yaru naþa mare la poli, ana naga sinenan sape naga ve Ntewa kiena ne yeririna la naþa la amali.”

³³ Ana pogos naþa þina na yeririna lala amloge visena kiena ne Yesu nene, la amilan suri lala naþa naga suña pian la ke ea.

*Navisaluaena na keviu lua**Mak 12:28-34; Luk 10:25-28*

³⁴ Ana pogos naþa Varasi lala amloge naþa Yesu kila Satusi lala pe akilia re si suri tai naþa avisa poli, ana la akila narin viorena tai þisi, ana apimi puna Yesu, la m̃ena ga asape akilalia. ³⁵ Ana la yaru tai, naþa la apisu sane naga pe manmarua ruru e Navisaluaena, naga piun naviunena tai pan Yesu, pisape ³⁶ “?Navianena, inu sineun nesape ko ovisawal li, ovisave e visena la punu ga naþa sike e kieta Navisaluaena, nape naþa keviu, a to metavan la taþena la sane?”

³⁷ Ana Yesu pisa pania, pisape “Visena Wa pisa sanini, pisape ‘Ntewa na mava naþa naga pe kioña Ntewa, ko monar ositom naga e losineña wetelu, a e kioña malena wetelu, a e kioña sitomena wetelu.’ ³⁸ Nanene naga pe navisaluaena þesia, a naþa naga keviu paþisi. ³⁹ A navisaluaena na lua nene naþa naga keviu m̃ena ga sa ke ga nasumo nene, naga pisa sanini, pisape ‘Ko monar ositom nalavis puña lala, okila wo van la, ve sa ke naþa ko ositom ko m̃aga.’ ⁴⁰ Navisaluaena la lua nene, ape purþes nen navisaluaena taþena lala kiena ne Mosis, amio m̃ena ga visena kiena ne navisawalena lala, naþa asike e kieta Tusi Wa.”

*Navisaarena naga pe Ntewa kiena ne yermarua Tepet**Mak 12:35-37; Luk 20:41-44*

⁴¹ Ana e pogos naþa Varasi lala asike veraga amio Yesu sanene, naga mēna ga piun naviunena tai pan la, pisape ⁴² “?E kiamiu sitomena lala, asape þisi na Navisaarena mālivi e lus kiena ai?”

Ana la apisatañea, apisape “Þisi na naga ve lus kiena ne yermarua Tepet nene naþa naga pe þarin suþe sumo.”

⁴³⁻⁴⁴ Ana Yesu piun sina ga tan la, pisape “?Ee, naþa amiu apisa na pe lelaga, ana sanape naþa Ninuna Wa sike e Tepet, ana Tepet pisi, pisa pisape

‘Ntewa na mava pisa pa kiau Suþe, pisape

“Ko ototano pun inu e lepas na þamarua, otoñmate mña vano-o, þisi na inu neligan kioñna nasinekar lala aimi ve sa narin takue na vilanvanen lañna ea.”’ *Yauena 110:1*

“E yo nene tepisu naþa Tepet naga suñna pio Navisaarena nene pisape Navisaarena naga pe kiena Suþe. ⁴⁵ ?Ana vanon naþa Tepet pisa sanene, a sanapen naþa amiu apisa apisape Navisaarena nene naga molue ga e Tepet, ana naga pe kiena lus ga tai?”

⁴⁶ Ana pe yaru re si tai naþa kilia visa si navisatañeena tai va Yesu, a siar mēna ga e legiena nene, pe yaru re si tai naþa kilali si Yesu e naviunena la poli.

23

Yesu pisi mñarera paþisi pa nasumonena lala nalotena

Mak 12:38-39; Luk 11:43,46, 20:45-46

¹ Ana e pogos nene, Yesu pisi pa þina lala, amio mēna kiena nalogena lala, pisape ² “Lelaga kemua naþa nanagane, navianena na navisaluaena amio Varasi lala, naþa la ke narui la akus lelena ne Mosis vena avisawal kinas nen navisaluaena lala kiena ne Ntewa.

³ Ana visae ve sanene, ana amiu na monar alogear la, akila ve sa naþa la apisa. Ana amiu na ve ataveve re kiela þelaga lala, komin naþa pe akila re suri la naþa la asuñna apisa ke pa yaru taþena la poli. ⁴ Ana la asuñna asikol ke si narin navisaluaena la moki naþa la ga akila, naþa mñarera paþisi, naþa añareran ke pa yeririna lala vena alogear la. Asuñna akila ke yuñnaena la nene sa naþa akon ke suri la naþa urmi paþisi e yeririna lala, ana lala na pe akekaran re nenaga naþa vena aiila la na akuspae ga suri la nene.

⁵ “Lala na aþarwar la manene la e kiela yuñnaena lala wa, naþa lala akila ga vena awere kilamarana yaru taþena lala. Amiu apisu ke kiela narin pultaga la nene, naþa akon Visena Wa kiena ne Ntewa sike e la, naþa apiari e piamenala a e pilepile na limala. La asuñna sinelan ke asape kiela lala na monar ve kerkeviu vaþisi, taulu yaru taþena lala. Amiu apisu mēna ga naþa lala apil mñala in kulsota na leniena lala piayavi paþisi. Ana la apilave manene la e suri la nene, a la sinelan ga asape yaru la ayeluar la ea. ⁶ A e pogos na þaþagena lala a e loyuñna na lotena mēna ga lala, la sinelan naþa silaga asape atoga tano e lelen yerkawa lala, ⁷ a pogos naþa visae la ayaloro e lelen na wilwilena, sinelan asape monar yaru lala avatanon la, a avio ruru la avisa avisave ‘!Oo navianena wo, pokolulagi!’

⁸ “Ana amiu na, amiu kiamiu navianena taaga ga rui, a amiu na sa naþa na mratava taaga ga, ana visae ve sanene na amiu ve atañan re si yaru lala avio amiu laþas avisa avisave ‘Navianena.’ ⁹ Ana þisi na amiu ve avio re yaru e yomarava nini avisave arimamiu, vanon naþa amiu na Arimamiu na taaga ga, naþa naga sike ma e peni. ¹⁰ A þisi na amiu ve atañan re yaru la avio amiu laþasia avisave amiu ave kiela nasumonena, komin naþa amiu na, kiamiu nasumonena na taaga ga, naþa Navisaarena nene. ¹¹ Kiamiu yerkawa ai naþa naga to laa metava, naga monar imi ve sa ga yaru na yuñnae kiamiuena. ¹² Ana yaru ai naþa naga ga pisirlua naga vena vim ve yerkawa, þisi na Ntewa kila naga suñna tano. Ana yaru naþa naga ga kila naga suñna tano, þisi na Ntewa visirlua naga va metava.”

Yesu pisawal napiowaena kiena ne nasumonena nalotena lala

Mak 12:40; Luk 11:39-42,44,52, 20:47

¹³ Ana Yesu pisa pan la, pisape “!Amiu navianena na navisaluaena lala amio Varasi lala, ake! Amiu akila kare amiu paþisi wa, þisi na viowa van amiu vaþisi, komin naþa kiamiu visena lala pona po, ana losinemiu lala piowa a kona rui. Yaru la sinelan asape

aimi loyuṃa e nasuṓenena kiena ne Ntewa, ana amiu asuṃa akotawela ke ga e marala, vena ve aimi re si loyuṃa narui, a metavania, amiu ṃena ga pe apimi re loyuṃa poli.

¹⁴ “!Amiu navianena na navisaluaena lala amio Varasi lala, ake! Amiu na apiowa ga. Amiu na asuṃa aṓure piavin ke kiamiu leniena la paṓisi, ana apisokani ke ga ne, vanon naṓa e ke e pogos nene, amiu asuṃa akila kotalia ke letano la nene, vena avinaun kiela suri lala. Vanon suri ne nanene, ṓisi na kiamiu nakoena ṃarera re la sane.

¹⁵ “!Amiu navianena na navisaluaena lala amio Varasi lala, amiu na amiyuṃae piowa ga! Amiu akekarana naṓa ayaloro e waa lala, vena ava e purvanua taṓena lala, vena akilali naṓa aure yaru lala ataveve amiu. Ana pogos naṓa amiu ataulu tai imi narui, ana ve ve piavi re naga la make kiamiu ṓelaga naṓa piowa, va viowa la sane, taulu amiu sina.

¹⁶ “!Ake, amiu na sumonena lala, na ape kilamara ṓala ga lala! Akila kare amiu paṓisi wa, ṓisi na viowa vaṓisi van amiu. E pogos naṓa yaru lala apisa kia kien suri tai vena kila kiela navisaarena suṃalu ṃarera, visae avisa avisave ‘Nepisa lelaga nene, Yuṃa Wa ṃana ne Ntewa na ṃeke ne,’ ana siraun, visae akilaro sina navisaarena nene, amiu apisape ‘Nanene na naga poga ga nene, ve ve suri re tai.’ Ana visae avisa avisave ‘Nepisa lelaga, suri la naṓa pe kol, la ne asike e Yuṃa Wa ṃana ne Ntewa ne,’ amiu apisa apisape visena nene na ṃarera paṓisi, taṓatete si akilarovia. ¹⁷ Aa, amiu na kilamaramiu ṓala ga, a ṓarimiu pe wowe. ?Ya ne pe suri wa manene la sane: suri la naṓa pe kol nene, pona Yuṃa Wa ṃana Ntewa naṓa kila kol nene pe suri wa tai?

¹⁸ “A visae yaru tai visa visave ‘Nepisa lelaga nene, wonta na ṃeke ne,’ amiu apisa apisape visena nene pe suri korena ga. A visae naga visa visae ‘Nepisa lelaga nene, kuṓaṓaena nane ṃeke e wonta,’ nanagane amiu apisa apisape visena nene naga ṃarera paṓisi, yaru taṓatete kilarovia. ¹⁹ !Sa naṓa nepisa rui, amiu ape kilamara ṓala ga! ? Ya naṓa pe suri wo manenea: kuṓaṓaena naṓa ṃeke e wonta, pona wonta naṓa kila kuṓaṓaena nene pe suri wa tai? ²⁰ Amiu na monar avisu kilale suri la nene, vanon naṓa naga naṓa ki wonta vena kila kiena visena va ṃarera, naga suṃa ki ke ṃena ga amio kuṓaṓaena naṓa suṃa e wonta. ²¹ A yaru naṓa ki ke Yuṃa Wa ṃana Ntewa, naga ki ke ṃena ga yerkaṓa naṓa ṃana yuṃa, ²² a yaru naṓa ki ke pa ma e peni, naga suṃa kipran ke ṃena ga lele natotanoena wa kiena ne pupia ṓarin Suṓe keviu nene, ana visae ve sanene, naga suṃa ki mesmesun ke nena Ntewa narui.

²³ “!Amiu navianena na navisaluaena lala, amio Varasi lala, ake! Amiu akila kare amiu paṓisi wa, ṓisi na viowa manene van amiu vaṓisi. In na nekilia ṃaga naṓa amiu asuṃa apisu ruru ke silaga, naṓa visae amiu awar kamiu kinanena ve lualima, ṓisi na monar ala tai va e Yuṃa Wa ṃana ne Ntewa, sa naṓa navisaluaena naga suṃa pisa, a amiu asuṃa akila ke sanene e kiamiu suri punu ga, pano tol ṃena ga narin ṃak lala a suri ṃena ga la ne sane mrasil. Ana pupia suri la naṓa navisaluaena naga pisa, ana amiu na pe asitom re nena ga, sa naṓa naga pisa pisape amiu na monar amesmesu ruru wo, a amiu monar asitom yaru taṓena lala, a amiu monar auarar kiamiu navisaarena lala. Visae amiu sinemiun awarar narin suri la ne sanene ṃarera, nanene na poga ga, ana pupia suri la nene naga popon visae amiu akila rui, ana peraga.

²⁴ “!Amiu nasumonena lala, ake, amiu na ape kilamara ṓala ga! Amiu asuṃa akila ke sa naṓa pogos naṓa amiu amun suria, ana amiu asitom manene la naṓa ve akilalu re naṓa akilalu narin neneno tai naṓa naṓa talilu pito teke e ṃamiu piala, ana amiu pe apisu kilale re naṓa amiu asuṃa asinomlaunlae ke puluk la naṓa asike e poli.

²⁵ “!Amiu navianena na navisaluaena lala amio Varasi lala, ake! Amiu akila kare amiu paṓisi wa, ṓisi na viowa van amiu vaṓisi. Amiu asuṃa ataveve ruru ke narin navisaluaena lala e lepas na kevanen ṃamiu piala amio kamiu pialo lala, ana amiu asitom ke asape kiamiu suri punu ga mekiki ruru narui. Ana kiamiu pialo la nene punu ga pulen ga kinanena na vinauena naṓa amiu aṓar e ṓelaga na sinesunena ga lala. ²⁶ Amiu Varasi lala, amiu ape kilamara ṓala kemua lelaga. Visae amiu sinemiun asape kamiu pialo amio

ĩmamiu piala lala imi ikiki ruru wo silaga, ĩisi na amiu ve akokonia la re si e kinanena la naĵa kiamiu mlamulena viowa sike ea.

²⁷ “!Amiu navianena na navisaluaena lala amio Varasi lala, ake! Amiu na akila kare amiu paĵisi wa, ĩisi na viowa van amiu vaĵisi. Amiu na sa ga tampona na yaru naĵa mare, naĵa amioa wosia miyuwowo na miyuwowo ruru po paĵisi, ana e losa na pulen ga puriu na yaru mare nene, amio tasnena naĵa menun ke na wa. ²⁸ A sanene, na visae pogos naĵa yaru la apisu ke yepas nemiu vanua, ĩisi na lala asitom ke asape amiu na amesmesu ruru ke ne, ana peraga, e losinemiu lala na apuleni ga visokanena a mlamulena viowa lala.

²⁹ “!Amiu navianena na navisaluaena lala amio Varasi lala, ake! Sila ga na amiu asuĩna apisi ke ga e kulugomiu. Amiu na asuĩna ga apisuar ruru ke tampona kiena ne navisawalena na sumo lala, ana amiu asuĩna ga apaia ke ĩena ga kilavaru na nasitoĩmalena kiena ne yaru mesmesu lala, ana sanape: ?Amiu na asitom ke asape amiu amesmesu ruru ĩena ga amio la nene? ³⁰ A amiu asuĩna apisa ke apisape visae amiu amal ke rui e pogos kiena ne repimiu la na nanua sumo nene, vera na amiu ve amio re la nene e pogos naĵa la aĩne moĩnar navisawalena lala kiena ne Ntewa. ³¹ Ana e kiamiu visena na visokanena nene, amiu asuĩna apisa kare amiu ke sina ga, vanon naĵa visena nene, kana kinasia sane pisape amiu ape lus ruru nenaga kiena ne repimiu lala li nawemoĩnaren navisawalena lala. ³² Poga ga, amiu ayuĩnaen va ĩnaga, amiu akilali naĵa akila make yuĩnaena nene naĵa repimiu lala la asiar ĩesan nanua sumo rui.”

Nakoena kiena ne li nasumonena nalotena lala

Luk 11:47-51

³³ Ana Yesu pisi ĩarera ke pan la na wa, pisa pisape “Amiu na sa nena ga loĩnara lala. ?Amiu asitom asape amiu akilia aure matan kiamiu nakoena e lele naloge viowaena? !Peraga! ³⁴ ĩisi na visae neĩla navisawalena lala aiĩnasu, amio yaru lala naĵa ape manmarua ruru e visena kiena ne Ntewa, amio navianena na navisaluaena lala, visae aiĩnasu pun amiu, ana ĩisi na amiu awe moĩnar laĵasia amare e laki torovia, a laĵasia amiu awela e kiamiu yuĩna na leniena lala, a ĩisi na aĩne plan la ĩena ga e kiamiu pulkumali lala. ³⁵ Ana ĩisi na amiu akilalue ga ve sanene van la vano-o, ana ĩisi na amiu ke ga narui naĵa akus nakoena vanon marena kiena ne yaru mesmesu la punu ga nene naĵa repimiu nasumo lala aĩne moĩnar la amarmare rui. Nanene siar e Epela, naĵa naga pe kila re suri tai piowa poli, pimi pimi tol Sakaraea naĵa narina ne ĩarakaea, naĵa repimiu la nene aĩneĩnar naga mare lavisin wonta, loyuĩna e Yuĩna Wa ĩana ne Ntewa. ³⁶ Lelaga nevisa van amiu, nakoena nene vanon naweĩnarena kiena ne la nene, ĩisi na imi tol amiu la nene, naĵa amiu amal ke nanagane.”

Yesu Sinena Mie Yerusalem

Luk 13:34-35

³⁷ Ana Yesu tagin Yerusalem, naga pisa pisape “!Yerusalem oo, Yerusalem oo! ?Vanon ya ne ko osuĩna oĩne moĩnar ke navisawalena lala amare sanene, a okove moĩnar ke yaru lala naĵa Ntewa mligan la apiĩnasu puĩna? Yam moki liu naĵa inu sineun nesape neligan luĩnau yervivi kioĩna yeririna lala, sa naĵa lakaporo ĩere narina lala apimi atapolou vatano e kupena, ana kioĩna yeririna lala pe akekaran in re poli. ³⁸ Ana ko opisu ke ne, Ntewa mligan ko ke narui, ana ĩisi na ko oimi ove yo yau korena ga narui. ³⁹ Ana nevisa van ko, ĩisi na kioĩna yeririna lala taĵatete avisu inu sina, vano vano tol pogos naĵa kioĩna yeririna lala avisa sina ga sanene, avisave ‘Ntewa Namava, ovisa ruru naga nene naĵa pimi ke e kioĩna kia.’ ”

24

Yesu pisawal naĵa ĩisi na awe plan Yuĩna Wa ĩana Ntewa

Mak 13:1-2; Luk 21:5-6

¹ Ana Yesu molue e Yuña Wa ñana ne Ntewa, ana pogos naña naga suña mial pano, kiena nalogena lala apimi akilologia pupia yuña la naña asike loyuña e kove na Yuña Wa nene, naña la apowo pañisi, ana la apisape Yesu kirařatau si visu la. ² Ana Yesu pisa pan la, pisape “?Amiu apisu ke yuña la nene? Lelaga inu nevisa van amiu, yuña la nene, řisi na tařatete si kana kilavaru ne tai naña toña ga towawa ruru teke e lelana, komin řisi na yar lařasia aimi, awe plan make nena yuña la nene vano.”

Pog naloge viowaena monar imi

Mak 13:3-13; Luk 21:7-19

³ La amial sanene, apimi e Kunus Na Purolip, ana Yesu totano e yo nene. A pogos naña pe yaru tařena lala asu re poli, kiena nalogena lala apimi puna, ana apiun tania, apisape “?Řisi na awe plan Yuña Wa nene pogwai, a kile ya na kioña nawasuřeena, naña řisi na ko owasuře ko sina e luas nen pogos nini?”

⁴ Ana Yesu pisatañe la, pisape “Popon amiu avisuar ruru e amiu, vena ve yaru imi ve visa kotalia amiu re, ⁵ vanon naña řisi na yaru la ve moki naña ala kiau kia, ana řisi na aimi avisa avisave ‘In na nepe Navisaarena nene,’ ana visae ve sanene, řisi na aure yaru la ve moki naña ava avewowe. ⁶ Ana e ñena ga e pogos nene, řisi na amiu aloge ñaagena na mara naña suña lavisu, a lologena na mara la naña sike perina, ana amiu ve sinemiu yuyuwawa manene re. Suri la nene monar imi kakate sumo, ana nanene na pe legien maro re poli la wa. ⁷ A řarin suře lala, řisi na akila mara amio řarin suře tařena lala, a purvanua lala řisi na asuñalu akawela amio purvanua tařena lala. A yo kari ga e yomarava nini, řisi na pupia viso, a yokorena yemninu vařisi e yo punu ga. ⁸ Ana suri la nene, pe legiena maro re nene po la wa, ana sa ga sira naña ñeřena, naña sane mloge řesan ñasina mlaea vena war sisi, ana pupia naloge viowaena naga pere na wa.

⁹ “A e pogos nene narui, amiu nene naña kiau kia sike e amiu, yokorena auarar amiu ñarera, a akoa kare amiu ñena ga, vano vano-o awe moñar amiu amarmare. Ana yaru na purvanua tařena lala ve sinelan amiu re nenaga, la akawe kiamiu visena lala. ¹⁰ Suri la nene, řisi na kila yaru la ve moki naña ve aviawa re si ñarera e inu, a řisi na la nene naña amlelaga řesan e inu, řisi na ve sinelan re si la naña amlelaga ke ñarera e inu na wa e pogos nini, a řisi na la avie plan la ava e limana ne kiela nasinekar la nene. ¹¹ Ana yokorena navisawalena navisokanena la ve moki asuñalu, a řisi na la aure yaru la ve moki ava ayal wowe. ¹² Yokorena naviowaena imi ve keviu manene va laa sane, kila yaru la ve moki vařisi naña sinela la imi marmare, la pe asitom re si Ntewa poli. ¹³ Ana yaru naña naga suñalar ñarera suña ga e inu vano vano-o pogos ñarera nene řisi, řisi na Ntewa tamalia naga. ¹⁴ A lologena wo na nasuřenena nene, yokorena alologon va yolai la punu ga e yomarava nini, řisi na kile tai naña pisawal ke pisape legiena maro pimi ke narui.”

Pupia pog ñarera tai garu Yerusalem

Mak 13:14-23; Luk 21:20-24

¹⁵ Ana Yesu pisa ñena ga visena tařena tai, naña popon visae yaru naña wolovia, kilali naña kilia ruru kana kinasia. Visena nene pisa sanini, pisape “Yokorena amiu akilia avisu avisirlua nono tai naña viowa na viowa manene laa, naña yoko suñalu ana warnena kare manene laa yo wa na Yuña Wa ñana ne Ntewa. Suri nene Navisawalena Taniel naga pisawal nanua sumo rui, ¹⁶ a pogos naña amiu avisu suri nene, amiu naña asike Yutea, amiu popon aure, ava atapolou e kunus lala. ¹⁷ E pogos nene, visae yaru tai va ruru teke vanua lavisin ñana yuña, naga monar ve va re si loyuña vena war kiena suri lařasia, ¹⁸ pona visae yaru sike e kana lokove, naga monar ve vito re si uña vena tar ñana kulsota, naga monar kiriri vitařili ga sanene vano. ¹⁹ Ana e ñena ga e pogos nene, yokorena viowa la va sira la naña la asena, amio ñena ga la naña asuña amla ke yu pa kiela sisi tomtom lala. ²⁰ Visae ve sanene, popon amiu alen wo amiu vena kiamiu pog na ureena nene, řisi na ve imi tol amiu re e pogos naña miava keviu, pona e legiena wa tai, ²¹ vanon naña

pogos m̄arera nene, p̄isi na m̄arera la sane taulu m̄ena ga pogos m̄arera taḗena lala, naḗa siar e pogos naḗa Ntewa sii yomarava nini pimi tol nanagane, a yokorena ve pupia pog m̄arera re si tai ve sanene pogos tai. ²² Ana Ntewa naga sitoḡmal rui pisape yokorena tero pogos m̄arera nene imi ve plas ga, vanon kiena yeririna la naḗa naga mligan plan la vena ave kiena, naḗa asike e pogos nene. Ana visae naga ve tero re ve plas sanene, yokorena taḗatete yaru tai kilia mali sike na.

²³ “Ana e pogos m̄ena ga nene, visae yaru tai visa van amiu, visa visavenua ‘Amiu apisu ke yaru nene, nanene na Navisaarena nene,’ pona visae visa visavenua ‘Nane Navisaarena ne nane gare,’ ana amiu na ve alelaga re e kiena visena la nene, ²⁴ komin naḗa navisaarena la mokliu naḗa pe ape lelaga re poli, la akilia asuḡmalu, amio m̄ena ga navisawalena navisokanena la ve moki, a p̄isi na la nene akila pupia kile lala, amio suri nailanena m̄ena ga lala. Yokorena akila sanene, ana p̄isi na la aure yaru lala avano avewowe, vano-o tol naḗa p̄isi na akilali naḗa aure m̄ena yeririna kiena ne Ntewa naḗa naga mligan plan la vena ave kiena, ana la taḗatete akilia akila. ²⁵ Ana nanagane, akilia avisuar amiu, komin nepisawal suri la nene pan amiu sumo rui, e pogos naḗa pe aḗaripo re yo poli wa.

²⁶ “Ana vanon suri ne nanene, visae yaru la avisa van amiu, avisave ‘Navisaarena nene, nanagane naga sike gare yokorena nene rui,’ ana p̄isi na amiu na ve avanon re naḗa avisulia, pona visae la avisa, avisave ‘Naga ke narui, naga nane sike ga loyuḡna e yuḡna nene,’ p̄isi na amiu ve alelaga re e visena la ne sanene. ²⁷ Ana pogos naḗa Narina ne Yeririna wasuḗe sina ga vitomi, ana p̄isi na vitomi merarava ruru nenaga va yeririna la punu ga, sa naḗa yekarpla naḗa pilavila, a vivaga ruru make ga e yo punu ga ma e sinapane. ²⁸ E pogos nene, p̄isi na ve sa m̄ena ga naḗa visae suri mare tai m̄eke e yo tai, ana pupia pepauḡna la naḗa akan ke suri mare lala, p̄isi na aiminia, la monar ave p̄egas ga asike e yo nene.”

P̄isi na narina ne yeririna imi sina

Mak 13:24-27; Luk 21:25-28

²⁹ A Yesu pisa pisape

“Ana siraunia, mesmesun nena e pogos naḗa naloge viowaena nene visae p̄isi narui, p̄isi na mrae imi ve pupumalo, a kupario ve tego re sina.

A verue la ne ma e sinapane p̄isi na aloloru, a suri m̄arera lala nae ma e sinapane, yokorena Ntewa naga kululun la akululu.” *Ais 13:10, 34:4*

³⁰ “E pogos nene, kile nawasuḗeena kiena ne Narina ne Yeririna yokorena warpoyo ma e sinapane, a yokorena yolai lala nae yomarava nini atagtagi alolokai, a p̄isi na la avisu Narina ne Yeririna molue e lul lala amio pupia naḡmareraena a pupia naurarenakam kiena. ³¹ Ana siraunia, pupia kumasua yelu, a naga ligan kiena navisi lala ava e yo punu ga e yomarava nini a ma e peni, vena aure kiena yeririna la naḗa naga mligan plan la p̄isi rui, aimi lele ve taaga puna.”

Pe yaru re tai naḗa kilia pog na legiena maro nene poli

Mak 13:28-32; Luk 21:29-33

³² Ana Yesu pisa, pisape “Amiu asitomli purlaki nene, naḗa asape purpiliva ne. Naga kiena suri navian amiuena tai teke ea, naḗa amiu na monar avisururuia. Pogos naḗa amiu avisu naḗa naga korowas nena imi memaena, a imi malumu, sitos la siar miyulua sina, ana amiu akilia asape pogos na yepisinu m̄arera pimi ke lavisi narui. ³³ Ve sanene, pogos naḗa amiu avisu kile la nene e yomarava, sa naḗa nepisa pan amiu rui, ana amiu akilia naḗa Narina ne Yeririna naga suḡna ga e pulutava rui, lavisi ke molue narui. ³⁴ Nevisa suri na lelaga van amiu, yokorena suri la nene p̄isi na imi kakate sumo, ana siraunia, teras kiena ne yaru la naḗa la amal ke e pogos nene, p̄isi na naga kilia kovio vetan yomarava nini. ³⁵ A yokorena sinapane amio yomarava nini lalua m̄ena ga akovio veraga, ana kiau visena lala taḗatete akovio pogos tai. ³⁶ Ana pe yaru re tai naḗa kilia kana legiena pona

aora nena naŋa ƒisi na Narina ne Yeririna naga imi ea. Navisi lala nae ma e peni, amio Narina ne Ntewa, la mēna ga amninue ga, ana Ata ga, naga taaga naga kilia mēga.”

Amiu monar akila ruru amiu asuŋa ga

Mak 13:33-37; Luk 17:26-30,34-36

³⁷ Ana Yesu pisa pisape “Vano vano tol pogos naŋa Narina ne Yeririna imi sina, ana ƒisi na taŋatete yaru la akila ruru la wo, ve sa ke pogos kiena ne Yermarua Noa nanua sumo. ³⁸ Ana e pogos nene narui, sumon naŋa pupia womie mlau, ana yaru lala asuŋa akinana mēga, a asuŋa amun mēna namunena lala, a akila ke talopaena la sanene, pimi tol pogos naŋa Noa pa loyuŋa e kiena pupia waa naŋa naga miyuŋaenia. ³⁹ Ana yeririna la nene asuŋa ga sanene, la pe asitom re suri tai poli, ana apisu ga pupia womie nene mlau pimi ƒere plan la. Ana inu nevisa van amiu, yokorena e pogos naŋa Narina ne Yeririna naga wasuŋe sina imi, ana ƒisi na la nene maran ve taaga ke ga ve sa nanua sumo e pogos kiena ne Noa. ⁴⁰ Visae yaru la ve lua, lalua asuŋa ayuŋae ke e lokove, ƒisi na navisi lala aimi atarlua tai, ana aligan tai mēke na, ⁴¹ a visae sira ve lua, naŋa lalua asuŋa ayuŋaen ke kinanena, ana la atarlua tai, ana aligan tai mēke na.

⁴² “Sanene, ana amiu monar asuŋa avisuar ruru amiu, komin naŋa amiu amninue ga e legiena ya naŋa kiamiu Suŋe imi sina warpo yo. ⁴³ Amiu na monar avisu kilale suri nene, sa naŋa visae yerkawa tai suŋa ga, ana visae naga kilia mēga pogos naŋa yokorena yaru navinauena tai imi e mēna yuŋa vena vinaun kiena suri lala, ƒisi na yerkawa nene suŋa visuar ruru silaga, vena suŋate ruru yaru navinauena nene imi. ⁴⁴ Ana ve sanene, na amiu monar asuŋa avisuar ruru amiu, vanon naŋa Narina ne Yeririna ƒisi na naga imi kate, e pogos tai naŋa amiu pe asitom re asape ƒisi na naga imi e poli.”

ƒakaiwa na yaru na yuŋaena naŋa kiena yerkawa ƒasuŋe sina pimi

Luk 12:41-48

⁴⁵ Ana Yesu pisa pisape “?Visae yaru na yuŋaena tai, naŋa naga pe manmarua ea, naga ƒuarar ruru yuŋaena, naga yuŋae sanape? Naga yuŋae sanene, naŋa visae kiena yerkawa naga ligan yo vena va perina, ana yerkawa nene ligan naga vena naga visuar ruru e yaru na yuŋaena taŋena lala, ana yoko yaru nene naga uarar ruru yuŋaena la nene. ⁴⁶ Ana pogos naŋa yerkawa nene wasuŋe sina, ana kilia lual naŋa yaru na kiena yuŋaena nene suŋa ga uarar ruru ke yuŋaena lala na wa. Ana yokorena yaru na yuŋaena nene loge wo vaƒisi, ⁴⁷ komin naŋa yokorena yerkawa nene ligan kiena suri punu ga e limana ne kiena yaru nene. Ee, lelaga, yoko Ntewa naga kila mēna ga ve sa ke nene.

⁴⁸ “Ana visae yaru na yuŋaena nene viowa ga, a pogos naŋa yerkawa nene ligan yo va suŋa perina ve piavi, ana yaru na yuŋaena nene kilia visa, visave ‘?E suwala, yerkawa nene pa su piavi la wa, pona ve wasuŋe re si yo narui, pona mēna sanape?’ ⁴⁹ Ana ƒisi na naga suŋalu kila viowa va yaru na yuŋaena taŋena lala, a yokorena naga va suŋa mun mēna wii, ve wowe amio yaru na munen wii lala, ana asuŋa akan kare ke ga kilavaru kiena ne yerkawa nene na. ⁵⁰ Ana yokorena yerkawa nene naga wasuŋe imi e legiena tai naŋa yaru na yuŋaena nene ilan ga, a e pogos tai naŋa yaru nene naga pe sitoŋal re sape ƒisi na naga imi ea. ⁵¹ Ana yerkawa nene ƒisi na naga la nakoena ve keviu va yaru nene, naŋa yokorena kila naga va sike amio yaru na visokanena taŋena lala e yo naŋa yaru la asuŋa atagi, a akar ga maluela ea.”

25

ƒakaiwa na sira mēe lualima

¹ Ana Yesu pisa, pisape “E pogos naŋa Narina ne Yeririna wasuŋe sina ga, yokorena nasuŋenena kiena ne Ntewa naga ve sa naŋa ƒakaiwa nini pisa. ƒakaiwa nini, naga pisayu ƒaƒagena na talopaena tai, naŋa taveve kiela ƒelaga, la ne e lepas naŋa puna ne yerŋene la aƒure naga pa e yuŋa mēna ne sira mēe vena aure sira nene amio naga imi amio la.

Ana vinena ne yerġene nene la lualima la asike ga uġna, vena la akila ruru suri la punu ga. Ana lavisi yemalo, ana vinena lala la aġar kiela kapi vivaga lala, la amiyalilu mrapan la, vena la punu ga awasuġela si aimi. ²⁻⁴ Ana vinena la nene, lala lima la ape manmarua, asitom ruru suri po, naġa aġar ġna piawi na sirveve laġasia vena akokonia sina ga kiela nakapi vivaga lala, ana la lima na ape tampos ga, la pe asitom ruru re si sanene poli, ana la aġar ġnaga kiela nakapi vivaga lala, ana la pe aġar re si sirveve laġas poli naġa vena visae taġa, ana akilia akokonia sina ga. ⁵ Ana lala asuġmate ġna yaru natalopaena nene pano-o, ana naga susun paġisi, kila sanene sira ġnee la lualima nene, atekavito pano-o paġisi, ana amomalio.

⁶ “Ana kolemallo ko yepelilika, ana yaru tai pio, pisape ‘!Yaru na talopaena, pimi ke lavisi warpoyo narui. Amiu aimi avitawe naga!’ ⁷ Ana sira ġnee la lualima nene atavillo, akila ruru kiela nakapi vivaga lala vena vivaga ruru sina. La akila plan ġnau na kilika na kapi lala, a apisuveve kiela sirveve lala. ⁸ Ana la naġa la pe asitom ruru re suri poli, apisu kilale kiela nakapi vivaga lala lavisi marmare, sirveve ġisi, ana apiun tan lala ġsasia, apisape ‘Awis suwala, amiu akilia ala re narin sirveve van imimi wa, a visae peraga yokorena kiamimi nakapi la amarmare yo.’

⁹ “Ana la naġa asitom ruru suri po, apisa apisape ‘!Peraga yo! Sirveve nini pe torokin punu ita re poli. Popon amiu ava li si e yuġna nawilwilena vena aul si kiamiu laġasia.’

¹⁰ “Ana la apanon si asape aul kiela sirveve, a pogos naġa apa ke ga wa, yaru natalopaena naġani pimi poru. Naga pa loyuġna e ġmana yuġna, a sira ġnee la lima nene naġa la asuġmatea, lala amio naga apa veraga e kinanena na talopaena. Ana pogos naġa yeririna la apa asike loyuġna rui, ana la akotava ruru e mratava.

¹¹ “Ana siraunia, sira ġnee taġena la naġani aġasuġe la ke sina ga, ana asuġmalu asuġna mratava, apio apisape ‘!ġmeneu, ġmeneu, awis ovieta va meiġmasu loyuġna!’

¹² “Ana yaru naġa pisa ga pan la, pisape ‘!Lelaga nevisa van amiu, nemninue amiu ga!’ ”

¹³ Ana Yesu pisa pae ġakaiwa nene ġisi, ana pisa pisape “Poga ga, ana amiu na monar avisuar ruru wo, vanon naġa amiu pe akilia re legiena na suri nene poli amio mrae nena.”

ġakaiwa na yaru telu naġa la apisuar kilavaru tai

Luk 18:11-27

¹⁴ Ana Yesu pisa, pisape “Ana pogos naġa Narina ne Yeririna wasuġe sina ga, ġisi na ve sa ġnena ga naġa ġakaiwa nini pisa, pisape: Yerkawa tai, kila ruru ke pisape ġisi na va e yo tai naġa koperina na koperina, e purvanua taġena tai. Ana yerkawa nene pio kiena yaru na yuġnaena lala vena aimi puna, ana naga pisi pan la, mligan kiena suri lala e limala, vena avisuar ruruia ayuġnae amio. ¹⁵ Ana naga pisuveve kiela na kiliaena lala ġisi, ana mligan taga na kilavaru lima te liman tai, a mligan taga na kilavaru lua te limana yaru taġena, a mligan taga na kilavaru taaga e limana ne taġena, ana siraunia naga mligan la, ana pa sike koperina na piavi towe la ga. ¹⁶ Ana yaru naġa mla taga na kilavaru lima, mial ke veraga pano, kila yuġnaena la moki e kilavaru nene, pano-o tol ke sina ga taga na kilavaru taġena lima. ¹⁷ Ana e ke e ġelaga nene, yaru ġnena ga naġa mla taga na kilavaru lua, naga ġnena ga taulu ke sina ga taga na kilavaru taġena lua. ¹⁸ Ana yaru naġa mla taga na kilavaru taga ga, naga pa kili ġiliġili e porotano, vena sinwan kilavaru kiena ne kiena yerkawa nene.

¹⁹ “Ana pogos moki ġaro pa rui, ana yerkawa kiena ne yaru la nene naga ġasuġe ke sina ga pimi, ana naga sinenan pisape visuveveli kilavaru la naġa naga ġar pa kiena yaru la telu nene. ²⁰ Ana yaru naġa naga tol taga na kilavaru lima sumo, ana naga pimi suġmalu se marana ne kiena yerkawa nene, naga ġar ke sina ga taga na kilavaru nene lima. Ana naga pisa pisape ‘ġmara, nanua sumo ko oġar taga na kilavaru lima pan inu, ana na nini. Ana netaulu sina ga taga na kilavaru lima nini su metavanja nanua sumo, naġa netauluia na pe kioġna.’

²¹ “Ana yerkawa nene pisa pania, pisape ‘Po paḗisi, potena. Ko na okila yuḗaena po paḗisi wa. Ko opuarar ruru narin yuḗaena nene naḗa nemligan e lumoḗa, ana ḗisi na neligan ko vena ko ovisuar kiau yuḗaena kerkeviu la ḗasia. Poga ga, oimi omio inu e kiau ḗaḗagena na kekarena nini.’

²² “Ana yaru naḗa naga ḗar taga na kilavaru lua, ana naga ḗmena ga pimi suḗalu se marana ne yerkawa nene. Ana naga pisa pania, pisape ‘Ḗara, nanua sumo ko otar taga na kilavaru lua nini pan inu. Ana taga na kilavaru lua ne na nini, amio sina ga taga na kilavaru lua naḗa netaulua na pe kioḗa.’

²³ “Ana yerkawa nene pisa pania, pisape ‘!Po paḗisi! Potena, ko na okila yuḗaena po paḗisi wa. Ko opuarar ruru narin yuḗaena nene naḗa nemligan e lumoḗa, ana ḗisi na neligan ko vena ko ovisuar ruru kiau yuḗaena kerkeviu la ḗasia. Poga ga, oimi omio inu e kiau ḗaḗagena na kekarena nini.’

²⁴ “Ana yaru naḗa tol taga na kilavaru taaga ga, naga pimi suḗalu se marana ne yerkawa nene, pisawo ga, pisa pisape ‘Ḗara, nesitom nesape ko ope yaru ḗarera tai. Ko okilia ola kinanena e lokove naḗa ko pe omiyuḗaen re poli, a ko okilia ola ḗmena ga mralaki e purmraki naḗa pe ko re omapila poli. ²⁵ Vanon suri ne na nene, nemaraun ko ea, ana nepa nesinwan ga kioḗa kilavaru e porotano. Ana nanini, ovisu kioḗa kilavaru nane su ruru ga suḗa ne.’

²⁶ “Ana yerkawa nene pisataḗnea, pisape ‘!Aa, ko na yaru viowa tai nene naḗa ne, ko ope yowena paḗisi wa! Ko opisa kare inu ḗisi rui, osape in na nepe tewena tai, ana visae ko opisu naḗa in na nepe yaru ḗarera tai sanene, vanon ya ne ko omligan ga kilavaru su korena ga suḗa sanene? ²⁷ Visae ko ova oligan ga e yuḗa na kilavaru vera na woga ga, vena pogos naḗa neimi si sanini, nekilia nelalua sina amio ninusa naḗa kapuru ke e yepasia.’ ²⁸ Ana yerkawa nene pisi pa kiena yaru lala, pisape ‘Aulai, avano alalua kilavaru nene vetan limana, ana ala va van yaru naḗa ḗarar ke taga na kilavaru lualima rui. ²⁹ Nevisa sanini van amiū, visae yaru naḗa kiena suri moki rui, ḗisi na naga war va la sane vena kiena ve moki vaḗisi, ana yaru naḗa pe kiena suri re poli, ḗisi na naga kilia kilalu narin suri naḗa naga mla ke na. ³⁰ Ana amiū akoven melioi nene va vanua e yo malolo, e yo naḗa yaru lala asuḗa ga atagi ke ea, a akar ke maluela ea!’ ”

Legiena na liḗereena

³¹ Siraunia, ana Yesu pisa pisape “Pogos naḗa Narina ne Yeririna vitomi amio navisi lala e kiena naurarena, ḗisi na naga imi ve Ḗarin Suḗe narui, a ḗisi na naga vitomi va e kiena lele wa na totanoen ea. ³² Ana navisi lala, ḗisi na awere yolai punu ga na yomarava nini aimi asuḗalu ase marana. Ana e pogos nene narui, ḗisi na naga liḗere yaru lala ava e ḗegas ve lua, ve sa naḗa yaru tai navisuaren suri mali lala, naga liḗere kiena sipsip lala e nane lala. ³³ Ana ḗisi na ḗarin suḗe nene ligan kiena sipsip lala ava ase kiena lepas na ḗamarua, a nane lala ava ase laḗas na ḗaḗmeli. ³⁴ Ana ḗisi na naga visa van la ne asike e lepas na ḗamarua, visave ‘Amiū yeririna ne la na nene naḗa Ata naga visa ruru amiū. Amiū aimi narui, a akus lelemiu loyuḗa e kiena nasuḗenena, naḗa naga miyuḗaen ruru suḗate amiū ke rui nanua sumo, e pogos naḗa naga sii yomarava nini ea. ³⁵ Amiū aimi, vanon pogos naḗa visae viso kar inu, amiū amla kinanena pan inu, a pogos naḗa moto kar inu, amiū amla wii pan inu. A pogos naḗa nepe wolawa ga, amiū aḗure inu nepa e ḗamiū uḗa, ³⁶ a pogos naḗa yepeu korena ga, amiū amla kulsota pan inu. A pogos naḗa nemai, amiū apimi akaten inu, a pogos naḗa nesike e yuḗa na loge viowaena, amiū apimi asun amio inu.’

³⁷⁻³⁹ “Ana yaru mesmesu lala naḗa asike e lepas na ḗamarua ḗisi na aviun tania avisave ‘?Ana Suḗe, sanape? Ko osuḗa apisa ke osape imimi memiila ko e kioḗa pogos ḗarera la ne sanene, ana imimi pe mesitom re nena mesape mekila sanene pan ko poli-i ḗisa. ? Imimi mekila suri la nene pan ko na pogwai?’

⁴⁰ “Ana yoko Ĥarin SuĤe nene visataĤne la, visave ‘Lelaga nevisa van amiu, pogos naĤa amiu akila ke sanene pan yaru na Ĥmau mratava tai, ana sa ga naĤa akila ke ga pan inu narui, pe suri korena ga naĤa naga pe yaru na sanape.

⁴¹ “Ana siraunia, Ĥisi na naga Ĥisi Ĥena ga pa la naĤa e lepas na ĤaĤeli, yokorena visa van la, visave ‘Amiu aure vetan inu, Ntewa piain nakoena viowa tai pan amiu Ĥisi rui. Amiu ava e kapi nene naĤa Ĥivaga Ĥna silaga, taĤatete mare pog tai, naĤa suĤate ke Yermare Lego amio kiena navisi lala vena la ava ea. ⁴² Vanon pogos naĤa viso kar inu, ana pe amla re kinanena pan inu poli, a pogos naĤa moto kar inu, ana pe amla re wii pan inu poli. ⁴³ A pogos naĤa nepe wolawa, ana pe aĤure inu re nepa Ĥmamiu uĤna poli, a pogos naĤa yepeu korena, ana pe amla re kulsota pan inu poli, a pogos naĤa neminana, pona nesike e yuĤna naloge viowaena, ana pe apimi akaten inu re poli.’

⁴⁴ “Ana Ĥisi na la avisataĤne Ĥarin suĤe nene, avisave ‘?Ana SuĤe, sanape? ?Imimi moĤal ko na pogwai naĤa ko viso kar ko, pona moto kar ko, pona ko ope wolawa, pona ko yepeĤna korena ga, pona omai, pona osike e yuĤna naloge viowaena? ?Ana pogwai naĤa ko sanene, ana imimi pe mepimi memiila ko re poli?’

⁴⁵ “Ana naga Ĥisi na visataĤne la, visave ‘Lelaga, nevisa van amiu, nevisave pogos naĤa amiu na pe asitoĤali re naĤa akila ve sanene va kiau yaru tai naĤa naga pe yaru na sanape, nanene na sa ga naĤa amiu pe asitoĤali re naĤa akila pan inu poli.’ ”

⁴⁶ Ana Yesu kila make kiena visena nene, naga pisa pisape “La nene yokorena la avanon vena atol nakoena nene naĤa ve uro re. Ana yaru mesmesu la nene yokorena la avanon atol malena nene naĤa suĤna vano vano ve uro re.”

26

Apisape aweĤnar Yesu mare

Mak 14:1-2; Luk 22:1-2; Yoane 11:45-53

¹ Ana pogos naĤa Yesu pian kiena yeririna lala e visena la nene Ĥisi, ana naga pisa pan la, pisape ² “Amiu akilia Ĥna legiena na vewo rui, ana ĤaĤagena NasitoĤalena Natamaliaena siar narui. E pogos na ĤaĤagena nene narui, Ĥisi na aligan Narina ne Yeririna va e limana ne la naĤa yoko asuari naga e laki torovia vena mare.”

³ Ana e pogos nene, yerkawa lala kiena ne yaru wa lala, amio nasumonena kiena ne le Israel lala, asuĤna e viorena e yuĤna Ĥmana ne Ĥarin yaru wa, naĤa naga kiena kia KaeĤas.

⁴ La apisayu ke naĤa Ĥisi na auaravinaun ga Yesu, a ala nakoena namarena ga vania.

⁵ Ana la apisa apisape “Suri nene, ita taĤatete tekila e pogos na ĤaĤagena, vanon naĤa Ĥisi na yaru la sinela kar ita vaĤisi, ana yokorena la aĤaaga vaĤisi ne wa, komin naĤa la mokliu naĤa la akekaran yaru ne nanene Ĥisa.”

Maria taron ponotaninu e Ĥarina ne Yesu

Mak 14:3-9; Yoane 12:1-8

⁶ Ana siraunia, Yesu sike garu e pulkumali nene Petani, ana naga pa sike e yuĤna Ĥmana ne yaru naĤa apio kiena kia asape Saemon Leperosi, komin naĤa naga Ĥar leperosi sumo.

⁷ Ana pogos tai naĤa Yesu kinana ke e yuĤna nene, ana sira tai Ĥimi puna, ana sira nena kus Ĥiawi naĤa amiyuĤaenia e kilavaru tai naĤa po paĤisi, a ponotaninu pule ga Ĥeke ea, naĤa kana kilavaru keviu manene la paĤisi. Ana sira nene taron make ponotaninu nene e Ĥarina ne Yesu.

⁸ Ana pogos naĤa nalogenena kiena ne Yesu lala apisu suri nene, ana sinela mimi paĤisi, ana la apisape “?Vanon ya ne naga kila kare ponotaninu nene sanene? ⁹ Visae naga wilwilin lua ga, vera na naga tol kilavaru keviu tai, naga kilia lavia vena iilaen yaru la naĤa limala korena ga.”

¹⁰ Ana Yesu kilia Ĥna naĤa la apisi ke sanene, ana naga Ĥisi pan la, pisape “Ei, ve akila kare re sira nene sanene. Naga kila yuĤaena wo tanea e inu ne. ¹¹ Yaru la ne pe kiela suri re poli, Ĥisi na la na asuĤna ga likan amiu silaga, vena akilia aiila la, ana inu na, taĤatete nesike nemio amiu silaga. ¹² Suri naĤa sira nene kila, naĤa taron ponotaninu e tasneu,

naga kila sane kila ruru ke tasneu vena asin inu. ¹³ Lelaga nevisa van amiu, e yo punu ga e yomarava nini naña p̄isi na avisawal kiau nalologena wo ea, ana p̄isi na lala asunyu m̄ena ga suri naña sira nene kila, vena asitoñali luen ga kiena nasitomiena keviu nene, naña sinena mie inu kemua lelaga.”

Sutas pisaar pisape yoko vielua Yesu

Mak 14:10-11; Luk 22:3-6

¹⁴ Ana nalogena la lualima taaga pa lua nene, lala tai, naña kiena kia Sutas nae Kariot, naga pa puna ne yerka kiena ne yaru wa lala, ¹⁵ ana naga pisa, pisape “?Visae nevielua Yesu viñasu e limamiu, p̄isi na amiu ala ya ne van inu?” Ana la nene apul pania e kilavaru naña selpa tol lualima yam telu, ¹⁶ ana siar e pogos nene, Sutas suña kalewele mrapa naña vielua Yesu van la ea.

Nalogena lala akila ruru kinanena na p̄ap̄agena

Mak 14:12-16; Luk 22:7-13

¹⁷ Ana pimi tol legiena p̄esia na p̄ap̄agena nene, naña la apisa m̄ena ga apisape naga pe P̄ap̄agena Na Kanen Kiligaḗ, ana nalologena lala apimi puna Yesu, apiunia apisape “? Ko sinoñan osape imimi meva mekila ruru suri lala e yo nape, vena ita tekila Kinanena Na Sitoñalena Natamaliaena ea?”

¹⁸ Ana Yesu pisatañea, pisape “Ava garu Yerusalem, ava avisu yaru nañani, avisa van sanini, avisave ‘Kiamimi navianena pisape naga kiena pogos pimi ke lavis narui. Naga sinenan pisape naga, amio imimi kiena nalogena lala, p̄isi na meimi mekila kanena nañani e moña uña.’ ”

¹⁹ Ana nalogena lala apa akila sa naña naga pisa, ana la akila ruru suri lala na p̄ap̄agena nene.

Yesu pisawal naña yoko Sutas vielua naga

Mak 14:17-21; Luk 22:14,21-23; Yoane 13:21-30

²⁰ Ana siraunia, Yesu lala apimi e uña nene, ana kolemalu, la atotano, la asuña akan ke kinanena nene narui, ²¹ a Yesu pisa pisape “Lelaga nevisa van amiu, p̄isi na amiu yaru tai, naga vielua inu.”

²² Ana kiena nalogena lala amloge naña naga pisa sanene, ana la sinela piowa paḗisi, ana lala peve taaga apiun tania, apisape “!Suḗ! ?Pe inu re poli, ne?”

²³ Ana Yesu pisatañe la, pisape “Tai naña imimi lua melapae kamimi kinanena e pialo taaga, naga ke narui. ²⁴ Yokorena Narina ne Yeririna monar mare ve sa naña Nasiriena Wa la pisayuia, ana yaru naña pielua naga, p̄isi na viowa la van naga, visae naga ve vaeme re vera wo va p̄isi.”

²⁵ Ana Sutas, naña siraunia naga pielua Yesu, naga piunia pisape “?Navianena, ana ai? ?Inu?”

Ana Yesu pisatañea, pisape “Ana, sane opisa ne yo.”

Kinanena maro

Mak 14:22-26; Luk 22:15-20; 1 Koren 11:23-25

²⁶ Ana pogos naña la asuña akinana ke ga wa, Yesu mla kilaparavi tai, pisa potena pa Ntewa vanonia, ana naga kawewoia, kian pa kiena nalologena lala, pisa pisape “Amiu alavia, akania. Nanene na pe tasneu.” ²⁷ A siraunia, mla piala na kuruta namunena, ana pisa potena pa Ntewa vanonia, ana kian pa pan la, naga pisa pisape “Amiu punu ga amunpae ga e piala nini, ²⁸ vanon naña nanene na tau nene, naña vena kila naviranarena kiena ne Ntewa suñalu m̄arera, a vena lau vanon naviewoena na mlamulena viowa kiena ne yaru lala ve moki. ²⁹ Nevisaar van amiu, yokorena ve nomun re si kuruta namunena nene narui, vano vano-o yoko nemun kuruta na munena viu nene nemio amiu, e pogos naña tesike e nasuḗnena kiena ne Ata.”

³⁰ Ana siraunia la amiyau maro e yauena tai na Yauena lala p̄isi, a siraunia la amolue, apa maro e Kunus Na Purolip.

Yesu pisawal naŕa ŕisi na Pita viro naga

Mak 14:27-31; Luk 22:31-34; Yoane 13:36-38

³¹ Ana Yesu pisa pan la, pisape “E yemalo ke nini narui, kiamiu nalelagaena e inu ŕisi na loloru, vanon suri la naŕa imi m̄alm̄alivin inu. ŕisi na ve sa ke ga naŕa Ntewa pisa e Nasiriena Wa lala, naŕa pisa, pisape

ŕisi na noweńar yaru na visuarena sipsip mare,

ana ŕisi na kiena sipsip lala ayaltetai ava e yo punu ga.’

Sek 13:7

³² “Ana pogos naŕa nemali sina ga vetan marena, yokorena nesumo neva garu Kalele, ana yokorena amiu m̄ena ga monar asirau aimi.”

³³ Ana Pita pisawal pania, pisape “Yesu, pona nalelagaena kiena ne la nene punu ga loloru, ana la aure vetan ko yo, ana in na taŕatete kemua neligan ko pog tai.”

³⁴ Ana Yesu pisa pania, pisape “Lelaga nevisa van ko, ŕisi na yemalo ke ga nene, pogos naŕa termene ve kokoreko re yam tai wa, ana ko oviro inu yam ve telu narui, ko ovisave omninue nu ga.”

³⁵ Ana Pita pisawal meraravan pa Yesu e marala, pisape “Visae la sinelan avisave aweńar nu nemio ko, nanene na poga ga ne, ana inu, yokorena taŕatete kemua neviro ko, nevisave in na pe nepe kiońa re poli.” A e pogos nene, nalologena taŕena m̄ena ga lala apisa m̄ena ga sa ke ga.

Yesu pa mlen e Ketsemani

Mak 14:32-42; Luk 22:39-46

³⁶ Ana siraunia, Yesu amio kiena nalogena lala apa e yo tai, kiena kia Ketsemani. Ana naga pisa pan la, pisape “Amiu atońa e nene sumo wa, ana in na neva laa perina sane, vena nelen re yam ve plas ga.” ³⁷ Ana naga ŕere Pita amio narina ne Sepeti la luwoka, Semes amio Yoane, la teloka nene amio naga apa la perina ve tokak ga, a e pogos nene Yesu naga sinena pimi urmi manene la, mloge piowa paŕisi. ³⁸ Ana naga pisa pa la telu nene, pisa pisape “Nanagane nemloge sane ninuu pilaroro la narui, ana kila inu lavisi nemare vanonia. Awis, amiu akilali asuńa atavilo amio inu e yo nini sumo wa.”

³⁹ Ana Yesu mial ga pa la sane, ana mloru kinai mono, monar marana, vena len. Ana naga pio, pisape “!Ata o! Visae okilia okila suri nene, awis ko olalua piala naloge viowaena nene vetan inu, vena ŕisi na ve nomun re ea. Ana ko ve okila re nasinenanena kiau, ana okila ga kiońa.”

⁴⁰ Ana naga ŕasuŕe sina, pitomi puna ne kiena nalogena la telu nene, ana naga pisa naŕa la asuńa amomalio rui. Ana la atavilo sina, ana Yesu pisa pa Pita, pisape “?Sanape na amiu taŕatete atavilo amio inu e aora ve taaga ga nene? ⁴¹ Amiu monar avisuar ruru wo, a amiu monar alen silaga, vena nakilaliena lala ve akila amiu re aloru e mlamulena viowa. Ee, kiamiu sitomena m̄arera ruru po, ana tasnemi malumu manene la.”

⁴² Ana yam lua, naga pa sina e naŕani, mlen pisape “!Ata o! Visae otaŕatete olalua m̄au piala naloge viowaena nene, ana monar nomun ea, komin naŕa monar ve sa ga naŕa ko sinońania.” ⁴³ Ana naga ŕasuŕe sina pimi, pisa naŕa la telu nene asuńa amomalio ke sina ga, komin naŕa marala kawa, atekavito paŕisi, atavilo ŕele ga.

⁴⁴ Ana naga mligan la telu nene asuńa ga, ana ŕasuŕe ke sina ga pa e naŕani, mlen e visena taaga m̄a nena ga, naŕa naga kila yam telu ne. ⁴⁵ Ana naga ŕasuŕe si pimi pun la telu nene, pisape “?Ei, amiu asuńa apa ruru amiu, a amomalio ke ga wa? !Amiu avisuarial! Lavisi ke pogos naŕa Narina ne Yeririna va e limana ne li viowa la narui. ⁴⁶ Ita, asuńala, tevano. Amiu apisu ke ne, yaru na vielua inuena nane suńa pimi m̄a ga lavisi nańa.”

La apuarar Yesu m̄arera

Mak 14:43-50; Luk 22:47-53; Yoane 18:3-12

⁴⁷ Ana pogos naŕa Yesu pisa ke visena nene wa, Sutas nene, naŕa nalogena la lualima taaga pa lua nene lala tai, naga pimi, naga amio yaru na mara la moki naŕa aŕar kiela playu na mara lala amio kiela plaki lala. La ke nene narui, naŕa yerkawa lala kiena ne yaru wa lala, amio nasumonena kiena ne le Yu lala, la amligan la apimi.

⁴⁸ Ana sumon naþa la apa amalivi sanene, yaru na vieluaena naþa Sutas nene, naga pisaar kile tai pan la, naþa naga pisa pisape “Yaru naþa visae neva nevitawe þesania, nane yaru ne nanene naþa þisi na amiu auarar ruru naga,” ⁴⁹ ana pogos naþa la amalivi, Sutas mial mesmesun ga Yesu, ana naga pitawea, pisa pania, pisape “!Pokolemalo, Navianena! Sumare sike amio ko.”

⁵⁰ Ana Yesu pisa pania, pisape “Mara, yumaena naþa ko opiminia, ko okila ga.” Ana la apimi narui, apuarar Yesu marera. ⁵¹ La apuarar naga sanene narui, ana Pita þerelua kiena playu, terania, tetereria yaru kiena ne Þarin yaru wa tai, ana telua kiligana lepas tai. ⁵² Ana Yesu pisa pania, pisape “Ko oligan ruru si kioma playu e kana taga. Yaru naþa þar ke playu na kilaen mara, naga þisi na mare e playu na kilaen mara. ⁵³ ?Amiu asitom asape in na taþatete nevio Ata, vena naga iila inu? Visae nevio naga, yam ve taaga naga þisi na ligan þegas nen kiena navisi lala ve moki naþa vena aimi avisuar inu. ⁵⁴ Ana visae nekila sanene, þisi na visena nasumo lala naþa asike e Nasiriena Wa lala, yokorena la taþatete aimi ave lelaga, sa naþa apisaar þisi rui.”

⁵⁵ Ana Yesu pisi pan yaru la nene, pisape “?Vanon ya ne amiu aþara kiamiu playu amio kiamiu plaki lala? ?A vanon ya ne amiu asape aimi atararvinaun inu e pupumalo sanene? ?Pona amiu asitom ke asape in na nepe yaru marera na vinauena tai pona na wemaren yaru? ?Ana silaga e legiena punu ga, naþa in na nesuma nepian ke yaru lala loyuma e Yuma Wa Mana ne Ntewa, ana vanon ya ne pe apimi atarar inu re e pogos la nene poli? ⁵⁶ Ana suri la nene la poga ga ne, vanon suri la ne amiu akila ke ne, sa ke ga naþa navisawalena nasumo lala apisawal nanua rui e kiela Nasiriena Wa lala, ana kiela visena la nene pimi ke sane pe lelaga make narui.”

Ana e pogos nene, nalogena lala amligan Yesu, la aþure matania.

Aþere yesu pa e kumali keviu kiena ne yerkawa kiena ne le yu lala

Mak 14:53-65; Luk 22:54-55,63-71; Yoane 18:13-14,19-24

⁵⁷ Ana la naþa atarar Yesu, aþure pimi vena akila naga sumalu se marana ne Kaeþas, naþa naga pe Þarin yaru wa. Ana navianena navisaluaena lala amio nasumonena kiena ne le Yu lala, apimi mena ga lele taaga e kiena kumali nene rui. ⁵⁸ Ana Pita mena ga suma taveve ke Yesu e pogos nene, ana pe pa re lavisin naga poli, ana pogos naþa la apimi loyuma e kove na kumali nene, Pita pano totano amio li nayumaena kiena ne Kaeþas lala, vena naga logeli sanape naþa þisi na la akila va Yesu.

⁵⁹ Ana yerkawa lala kiena ne yaru wa lala, amio yerkawa taþena lala naþa la asike loyuma e viorena nene, akilali naþa akale yaru laþasia vena la avisokan ga e Yesu, naþa la avisa suri laþasia naþa la avisa sane akilia awemar Yesu mare vanonia. ⁶⁰ Ana la apisi narui, ana yaru la moki naþa asumalu, la apisokani pano pano-o paþisi, ana viorena nene pe ma re suri tai e kiela visena la poli vena torokin la akila ve sanene va Yesu. Kiela visena la peve taþena ga sanene pano-o þisi, ana yaru la lua asumalu, ⁶¹ ana la lua apiranari visena taaga, apisape “Yaru nene, pisa pisape naga kilia we plan Yuma Wa Mana ne Ntewa, ana visirlua sina e legiena ve telu ga.”

⁶² Ana Þarin yaru wa nene sumalu, pisi pa Yesu, pisa pisape “?Sanape, yokorena ko ovisatane la, pona peraga? ?Sanapen visena la nene naþa la asuma apisawal ke ne?”

⁶³ Ana Yesu topuru ga toma ga. Ana Þarin yaru wa nene pisa sina ga pania, pisape “Nevisa van ko, ko na monar ovisa kia kiena ne Ntewa Mali, ovisave lelaga naþa ko Navisaarena, naþa ko ope narina ne Ntewa, pona pe ko re naga poli. !Ko na monar ovisawal ruru van imimi nanagane narui!”

⁶⁴ Ana Yesu pisatanea, pisape “Suri ne nanene narui, nane ko osuma opisa ke narui. Ana nevisa van amiu, nesape siraunia ve ve piavi re, þisi na amiu avisa Narina ne Yeririna naþa totano e lepas marua kiena ne Ntewa namareraena, a þisi na amiu avisa naþa warpoyo e lul lala, vitomi tano e yomarava nini.”

⁶⁵ Ana Āarin yaru wa nene sinena mimi paḗisi, pitolwowa ḗmana kulsaket, pisa pisape “!Nane-e, toroki! Yaru naḗa suḗna ḗarnena kare ke kia wa kiena ne Ntewa, nanene rui. ? Amiu amloge ḗa ne? ?Vanon ya ne ita tesuḗna takale ke si yaru vena visawal si suri laḗas e naga? ⁶⁶ ?Ana viorena nini sitom sanape? ?ḗisi na teliḗere naga sanape?”

Ana la apisataḗnea, apisape “Popon aweḗnar nena naga mare.”

⁶⁷ Ana la nene la apilasiria marana, a asu naga, a laḗasia la amlipa kare naga paḗisi, ⁶⁸ ana apisa kare naga, apisape “?Ei, Navisaarena, ko ovisawalia, ane mlipa ko ga na wa?”

Pita piro Yesu

Mak 14:66-72; Luk 22:56-62; Yoane 18:15-18,25-27

⁶⁹ Ana e pogos nene, naḗa Pita toḗna tano loyuḗna e kove nene, sira ḗnee tai na visuaren yuḗna pimi puna, pisa pisape “!Ei, ko ḗmena ga otaveve Yesu nae Kalele nene!”

⁷⁰ Ana e marala la punu ga, Pita piro suri nene, pisa pisape “Peraga, nemninue suri na ko opisa ke ne.” ⁷¹ Ana naga mial petania, pito tano e pupia pulutava na kove na kumali nene.

Ana e yo nene, sira ḗnee taḗena ḗal naga, ana pisa pa yaru la naḗa asike ga lavisinia, pisape “Yaru nene, naga ḗmena ga amio yaru nae Nasaret naḗa Yesu.”

⁷² Ana Pita piro ke sina ga suri nene, pisa visena tai naḗa pe visena ḗarera, pisape “! Peraga ḗa, in na nemninue nena yaru nene!”

⁷³ Ana yam plas ga, yaru la naḗa asike ga lavisin pulutava nene apimi puna ne Pita narui, ana apisa pania, apisape “Lelaga, ko na ko lala yaru tai, vanon naḗa memloge kilale naḗa ko osuḗna oḗan ke visena lala sa ga le Kalele ga lala.”

⁷⁴ Ana Pita pisi ḗarera la sane, naga pisaar ga visena ḗarera lala, pisape “!Lelaga ḗa, sinapane! Nepisa pa rui, inu na pe nekilia re nena yaru nene poli.”

Ana e ke e pogos nene naḗa Pita pisa visena nene, terḗene tai kokoreko, ⁷⁵ ana kila Pita sitoḗal si visena kiena ne Yesu, naḗa naga pisa pania, pisape “Lelaga nevisa van ko, ḗisi na yemalo ke ga nene, pogos naḗa terḗene ve kokoreko re yam tai wa, ana ko oviro inu yam ve telu narui, ko ovisave omninue inu ga.” Ana Pita mloge piowa naḗa piowa, ana naga pa vanua, naga tagi naḗa tagi.

27

Lala aḗure Yesu pa puna ne Āarin Suḗe kiena ne le Rom lala naḗa pisuar ke Israel

Mak 15:1; Luk 23:1-2; Yoane 18:28-32

¹ Ana e kolulagi nene, pogos naḗa mrae siar pa metava, yerkawa kiena ne yaru wa lala amio nasumonena kiena ne le Israel lala, la atotano ke sina ga vena aviranar ruru li mrapa tai, vena kilaen Yesu mare. ² Pogos naḗa la apisayu ḗisi, ana la apiar limana ne Yesu, la aḗure naga pa puna ne ḗaelat, naḗa naga pe ḗarin suḗe nae Rom naḗa naga pisuar ke Israel e pogos nene, ana la amligan Yesu e limana ne ḗaelat nene, vena naga liḗere naga.

Sutas ḗeḗnar ke sina ga naga

Yuḗaena 1:18-19

³ Ana Sutas, naḗa naga pielua Yesu ḗisi, naga pisa kilale naḗa la amlipere Yesu ḗisi rui asape naga monar mare, ana e pogos nene naga mloge si piowagan suri naḗa naga kila. Ana naga pilon si kiena sitomena narui, ana naga ḗar si selpa lualima yam telu nene, pa yerkawa la naḗa apul naga sumo. ⁴ Ana naga pisa pan la, pisape “In na nekila mlamulena viowa nene, naḗa inu nepielua yaru tai naḗa pe kila re nena suri tai, ana kiau visena na kila na yoko aweḗnar naga mare.”

Ana yerkawa la nene apisa ga pania, apisape “Ei, ve oimi otag re si van imimi. Imimi meḗisin ko pa rui.”

⁵ Ana Sutas silin tetain kilavaru nene su tano e loyuḗna wa ḗmana Ntewa, ana naga pa vanua, pa telan kolmekina e kilika, naga mare.

⁶ Ana yerka kiena ne yaru wa lala, la apano aþar kilavaru nene, ana la apisape “Kilavaru nene, kuruta kana yaru mlau vanon rui, a e kieta navisaluaena, ita taþatete teligan kilavaru na sanene va teke karo na Yuþa Wa Mõana Ntewa.” ⁷ Ana lala apisayuia, ana amla kilavaru nene, apa apul kinakinas nen porotano tai naþa nanua sumo, la apisape kiena kia “Porotano na piaki,” ana la amligan narin porotano nene pe lotap kiena ne wolawa lala. ⁸ Vanon suri ne nanene, pimi tol nanagane, yaru lala apisa ke narin porotano nene, asape “Porotano na Kuruta.”

⁹ A suri ne nanene kila visena tai kiena ne Navisawalena Sereþmaea pimi pe lelaga, naþa sumo naga kiena visena pisape

“La ala kilavaru naþa selpa ve lualima yam telu nene,

na torokin maran kilavaru naþa le Israel lala apisa apisape mesmesun aul lua yaru,

¹⁰ *ana la amla apano apul porotano kiena ne yaru na kilaen piaki nene, sa ga naþa Ntewa pisa pan inu sape nekila.”*

Sek 11:12-13

Yesu suþalu e marana ne Paelat

Mak 15:2-5; Luk 23:3-5; Yoane 18:33-38

¹¹ Ana la aþure Yesu pimi suþalu se marana ne Parin Suþe Paelat, ana naga piun tan Yesu, pisape “?Ko ope Parin Suþe kiena ne le Israel lala, pona peraga?”

Ana Yesu pisataþnea, pisape “Naga ke narui, sane ko opisa ke ne.”

¹² Ana pogos naþa yerka kiena ne þarin yaru wa lala amio nasumonena lala apisavisawal suri moki e Yesu, ana Yesu pisataþne re si suri tai poli. ¹³ Naga topuru ga toþna sanene, ana kila Paelat piun sina ga tania, pisape “?Sanape, ko pe ositom re naþa la apisa suri viowa la moki e ko poli?”

¹⁴ Ana e lepas na suri la nene naþa la asuþna apisa ke ne, ana Yesu pe pisataþne re si suri tai pan la poli, ana Parin Suþe nene milan paþisi.

Paelat naga taþnan pisape Yesu Monar mare

Mak 15:6-15; Luk 23:13-25; Yoane 18:39-19:16

¹⁵ Ana e pogos nene, la asike e pog na Paþagena na Sitoþmalena Natamaliaena na wa, ana e kayui punu ga e þaþagena nene, Parin Suþe nae Rom nene naga silaga kila suri tai pa le Israel lala. Naga kila naþa visae la þasia asike e yuþa naloge viowaena, la akilia avisa kia kiena ne yaru ve taaga naþa la sinelania, ana yokorena Paelat naga ligan lua naga molue. ¹⁶ Ana e pogos nene, yaru na kilaen politik tai naga moþna e yuþa naloge viowaena, naþa yaru la akilia ruru naga, kiena kia Yesu Paraþas. ¹⁷ Pisi na, pogos naþa þina lala apimi ape moki lele taaga e marana ne Paelat, ana naga piun tan la, pisape “?Ami sinemiun asape neligan lua ane molue sina iþasu pun amiu? ?Sinemiun Yesu Paraþas, pona Yesu naþa apio ke asape Navisaarena?” ¹⁸ Paelat piun sanene, vanon naþa naga kilia pisi rui naþa yerka ga lala kiena ne le Yu lala, la aþure Yesu pimi puna, sane yuþaena na vielueen ga, vanon naþa apisu naþa kiela yeririna taþena lala akekaran Yesu paþisi.

¹⁹ Ana e mþena ga e pogos naþa naga totano ke e lelen naliþereena vena akila navisena nene, ana wona mligan visena pimi pania, pisape “Ko ve okila re suri tai va yaru nene. Naga pe kila re suri tai poli, ana na kolemallo nomomallo, nepisu naga, ana nanagane nemloge ke piowa vanon paþisi.”

²⁰ Sanene narui, Paelat sinenan pisape ligan lua Yesu naga vano, ana yerka lala kiena ne yaru wa lala amio nasumonena kiena ne le Yu lala, la akila kare sitomena kiena ne yeririna lala, la aþareran la paþisi vena la monar avisa va Paelat vena naga ligan lua Paraþas nene vano, a naga monar kila Yesu va mare.

²¹ Ana Parin suþe nene piun sina ga tan la, pisape “?Ami sinemiun asape netaþnan yaru la lua nene, ana ane molue ga sane?”

Ana la apisataþnea, apisape “Imimi sinemimin Paraþas.”

²² Ana Paelat piun tan la, pisape “Poga ga, ana visae ve sanene, pisi na nekila ve sanapen Yesu nene naþa apio ke naga asape Navisaarena?”

Ana la punu ga apionia, la apisape “!Asuar naga e laki torovia!”

²³ Ana Ñaelat piun tan la, pisa pisape “?Vanon ya? ?Naga kila suri ya naña piowa?”

Ana la apion manene la pa metava sane, la apisa apisape “!Asuar naga e laki torovia!”

²⁴ Ana Ñaelat pisu naña naga tařatete si taulu la, vanon naña pupia m̃aagena pařisi naña pa ke metava rui, ana naga kus pialo na wii tai, ana e maran yeririna la nene, naga kevan limana ea, ana naga pisape “Kuruta na yaru nene naga pe su re e inu poli. Kiena marena, naga kiamiu yuñnaena ga nene.”

²⁵ Ana pogos naña yaru la amloge visena nene, la akiikii ke sina ga, apisape “Poga ga ne, suri ke naña imimi sinemimin ke nanene narui e, naña kiena marena pe kiamimi yuñnaena, a naña kana kuruta suñna e imimi memio narimimi lala.”

²⁶ Ana Ñaelat mligan lua Ñarařas molue si řasuře pa pula, sa naña la sinelania, ana naga mligan Yesu e limana ne kiena li na mara lala vena akoa naga, a vena aure naga va asuar naga e laki torovia.

Li na mara lala akirakirai viowa pa Yesu

Mak 15:16-20; Yoane 19:2-3

²⁷ Ana yaru na kilaena mara lala kiena ne Ñaelat, la atar Yesu ařurelua pa vanua e yometava na kiena kumali nene, ana la apio pa kiela řegas nen li na mara tařena lala vena la aimi avisu Yesu. ²⁸ Ana la amiyenlua m̃ana kulsota, ana amiyen kulkota tai e naga naña marana pe melia vivaga sa naña řarin suře la amiyen, ²⁹ ana la ařar nenos nen kilsirili, ana ařan ruruia, amligan e řarina, sa naña karo na řarin suře tai, a amligan m̃ena lakiavio tai e limana na řamarua vena lararia. Ana la asuñna akinai tano pania, la asuñna akirakirai viowa pania, la apisa apisape “!Imimi meva tanon ko, ko naña ope řarin Suře kiena ne le Yu lala, imimi memieluar ko!” ³⁰ Ana la asuñna apilasiria naga, a amla lakiavio nařani, asuñna añe řarina Yesu ea. ³¹ Ana pogos naña la akirakirai piowa pania řisi, ařarlua kulkota nene e naga, ana amien si m̃ana kulsota la e naga, ana atar naga, apano vena asuar naga e laki torovia.

Asuar yesu e laki torovia

Mak 15:21-32; Luk 23:26-43; Yoane 19:17-27

³² Ana pogos naña li na mara lala la asumon Yesu apa ke narui, amal yaru tai nae Saerin, kiena kia Saemon, ana la añareran pania asape naga towe kus laki torovia kiena ne Yesu vano. ³³ Ana la apa atol kunus tai, kiena kia Kolkota, naña kana kinasia na asape yo naña sane puriu na piařarin yaru. ³⁴ Pogos naña apimi aporu e wos nen kunus nene, ana la sinelan asape ala kuruta namunena va Yesu vena munia, ana kuruta namunena nene was nen suri tai naña melkalka sike ea, vena kila tasnena ne Yesu kapulu ga, ve lae manene re, ana pogos naña Yesu munli suri nene, naga yepen mavin si munena.

³⁵ Ana la atar Yesu, asuari naga e laki torovia. řisi na, la akila sa naña amlil m̃apila, vena alual li naña ane war m̃ana kulsota tai, a ane war tai, ³⁶ ana la atotano atoñaga e yo nene vena akirakira m̃aga va avisu naga. ³⁷ Ana la asiri navisawalena tai, asuari teke metavan řarina, naña pisawal suri naña la añeñar naga mare vanonia, naña pisa pisape “Yesu nene, řarin suře kiena ne le Yu lala.” ³⁸ Ana e pogos nene, yaru navinauena lalua, asuari m̃ena ga la luoka e laki torovia sa ke Yesu, la amligan tai e lepasnena na řamarua, tařena e lepasnena na řañeli.

³⁹ Ana yaru la naña asuñna amialoro ke apa e yo nene, asuñna asisilin řarila, apisalele kare Yesu řisa, la apisa apisape ⁴⁰ “!Ke, suwala! Ko nene, nanua sumo ko opisa opisape ko okilia owe plan Yuñna Wa Mana ne Ntewa, ana ovisirlua ke sina ga e legiena ve telu ga, ana sanape narui? !Poga, ko ga otamalia ko lia! !Visae ko ope narin Ntewa kemua lelaga, ko otapulu e laki torovia nañna, otomi tano!”

⁴¹ E řelaga m̃a nena ga nene, yerka lala kiena ne řarin yaru wa lala, amio navianena na navisaluaena, a li na sumonena kiena ne le Yu lala, la asuñna apitalia kare naga pařisi,

⁴² la asuṃa apisa ke, apisape “!Pona naga tamalia ṃa yaru taṓena la moki yo rui, ana naga mninue kare si narui, taṓatete si tamalia naga! ?Ana naga pe kieta ṓarin suṓe ita le Yu lala, pona peraga? Popon naga vitomi tano e laki torovia nanagane, vena ita telelaga e naga. ⁴³ A yaru nene pisape naga piawa e Ntewa, ana pisape naga Narina ne Ntewa. ! Poga ga, tevisulia, visave Ntewa kekaran naga, yoko naga tamalia naga nanagane narui!”

⁴⁴ Ana yaru navinauena la lua nene, naṓa asuar la e laki torovia amio Yesu, la ṃena ga luoka asikol sina visena viowa kiena ne la nene pania.

Yesu mare

Mak 15:33-41; Luk 23:44-49; Yoane 19:28-30

⁴⁵ Ana kolipae ga, yemalolo pimi kalo make yo punu ga e yo nene, pano tol mrae telu yepekilavi, ⁴⁶ a lavis ga e pog nene, Yesu mlokai keviu e kiena visena ruru napo, pisa pisape “?Eli, Eli, laṃa saṓatani?” naṓa kana kinasia sape “?Kiau Ntewa, kiau Ntewa, sanape naṓa ko omligan inu neṃeke sanene?”

⁴⁷ Ana yeririna laṓasia naṓa asuṃalu asuṃa e yo nene, naṓa la asuṃa apisuvisu ke suri la nene, ana amlogepalia naṓa Yesu mlokai sane, ana la apisa apisape “Ke, yaru nene suṃa pio ke yermarua Elaisa, vena imi iila naga-o.” ⁴⁸ Ana veraga ga, lala yaru tai kiriri pimi, mla lumlum tai, taron kuruta namunena naṓa melkalka pa ea, miyurar te laki tai, ana kian va Yesu munia. ⁴⁹ Ana yaru taṓena lala apisa apisape “!Osuwa! Tevisulia wa, pona yokorena yermarua Elaisa vitomi tamalia naga, pona ve vitomi re.”

⁵⁰ Ana Yesu mlokai manene sina, ana ṓere maron kiena yalua, taṃan ninuna pano, mare ṓan.

⁵¹ Ana pogos ke ga nene, pupia kulmrae naṓa e Yuṃa Wa Ṃana ne Ntewa, naṓa mono ke yo wa naṓa pe yo wa paṓisi, naga purṓa pito ga lika, siar metava pito tol tano. A yemninu, a pupia kilavaru lala pororowa la, ⁵² a e lotap, tampona na yaru mesmesu la moki na nanua sumo apikevike, ana kana yaru ne lala amamal sina. ⁵³ Ana la amolmolue e kiela tampona lala, ana siraun pogos naṓa Yesu ṃena ga mali sina ga e marena, la nene amial apa garu pulkumali wa Yerusalem, ana yaru la moki naṓa apisula.

⁵⁴ Ana li na mara lala, amio kiela yerkawa, naṓa la asuṃa apisuuari ke Yesu, pogos naṓa la amloge yemninu, a apisu suri la naṓa kakate, la amilan paṓisi, la sinela kurkur pano-o amiyuyuwawa, ana la apisa apisape “!Aulai, yaru nene naga pe Narina ne Ntewa kemua lelaga naṓa nel!”

⁵⁵ Ana sira la moki paṓisi e yo nene, la asuṃa asuṃalu asike la perina sane, la asuṃa apisuvisu ke Yesu. La nene, naga la naṓa amolue garu Kalele nanua sumo, la asuṃa ataveve ṃa Yesu pano-o, a asuṃa amiila naga. ⁵⁶ Ana likan sira la nene, ana Maria tai naṓa sira nae Maktala, a Maria ṃena naṓa anenane Semes amio Yosop, a sira ṃena naṓa wona ne Sepeti.

Yosop sin Yesu

Mak 15:42-47; Luk 23:50-56; Yoane 19:38-42

⁵⁷ Ana yaru tai nae Aramatia suṃa ga, naṓa naga pe yaru na suri moki, kiena kia Yosop, a naga pe nalogena kiena ne Yesu tai. Ana pogos naṓa lavis mrae vito tano, ⁵⁸ naga pa suṃalu se marana ne Ṕaelat, piun tania pisape kus tasnena ne Yesu. Ana Ṕaelat pisa pa kiena li na mara lala, vena la akus tas nen Yesu imi vania. ⁵⁹ Ana Yosop kus tasnena ne Yesu, mliluwoia e kulmrae tai naṓa miyuwowo ruru po, ⁶⁰ ana naga pa mligan ṃeke e puluve viu naṓa naga ṃana, naṓa la ate mare ga ṓisi ga na wa. Ana la amelilivin pupia kilavaru na monoen puluve nene, pimi mono pulusa, ana Yosop la aṓasuṓe si apano. ⁶¹ Ana Maria lalua nene, naṓa lala tai nae Maktala, amio taṓena nene, lalua apimi asike e yo nene, la atoṃa tano ato mesmesun ga pulmaran puluve nene naṓa tasnena ne Yesu ṃeke ea.

Li namara lala akirakiravan ṃa puluve

⁶² Ana suri la nene la apimi kakate e legiena na kilaen suri la punu ga su ruruia suṃate Legiena Wa. Ana e legiena taṓena, naṓa sane Legiena Wa nene narui, yerkawa kiena

ne yaru wa lala amio Varasi lala la apa asuñmalu ase marana ne Ĥaelat, ⁶³ ana la apisa apisape “Mesape mevisa ga van ko, Ĥaelat, naña imimi mesitoñmal ke visena kiena ne yaru na visokanena nene na wa, naña pogos naña naga mali ke ga wa, naga suña pisaar pisape ‘Siraun legiena ve telu, ĥisi na nemali ke sina ga.’ ⁶⁴ Ana visae ve sanene, imimi sinemimin mesape meviun tan ko sanini, mesape ko oligan kioña li na mara lañasia ava avisuar e puluve nene, vano vano tol kana legiena telu nene warovia. Visae peraga sa ĥisi kiena nalogena la ava akusvinaun tasnena, ana ĥisi na la avisokan, avisawal va yaru lala, avisave ‘Naga mali sina e marena rui.’ A visae la akila ve sanene, ĥisi na kiena navisokanena maro nene yoko imi viowa la sane, taulu naña nasumo.”

⁶⁵ Ana Ĥaelat pisa pan la, pisape “Poga ga, aure kiau li na mara lañasia avano. Amiu akilia ava akila ruru make suri punu ga sa naña amiu ava akirakiravan ruru yo nene.”

⁶⁶ Ana la apano, amligan pilu tai e kilavaru naña mono ke puluve nene, naña visae yaru tai melilivin kilavaru nene, ĥisi na pilu nene worovia, ana ĥisi na akilia avisu kilalea. Ana la amligan ñena li na mara lala asuña akirakirava e puluve nene.

28

Puluve korena ga ñeke na

Mak 16:1-10; Luk 24:1-12; Yoane 20:1-10

¹ Ana pogos naña Legiena Wa ĥarovia, ana e legiena na siraunia, naña legiena ĥesia na wik, pogos naña mrae ĥarpoyo, ana Maria nae Maktala amio Maria tañena nene, lalua apanon asape avisuli puluve nene. ² Lalua apano atol yo nene, ana pupia yemninu veraga, vanon naña navisi kiena ne Ntewa tai mligan ma e peni, pitomi tano melilivin lua kilavaru nene, ana pa teke metava e wosia. ³ Ana marana pilavila pañisi, a ñana kulsota merarava ruru po, naña miyuwowo na miyuwowo ruru po, ⁴ ana pogos naña li na mara lala la apisuia, la amarau pano pano-o amarmarlula asike ea.

⁵ Ana navisi nene pisi pan sira la lua nene, pisa pisape “Marauen toko. Nekilia ña naña amiu lua apimin ke Yesu, naña asuar naga e laki torovia, ⁶ ana naga pe mon re si e nini poli, naga mali sina, suñmalu rui, sa naña naga pisaar sumo. Amiu lua aimi avisuia e naña tasnena momalio ñene. ⁷ Ana amiu lua ava vila ga, avisawal va kiena nalogena lala naña naga mali si e marena rui. Ana nanagane, yokorena naga sumo vito garo Kalele, ana amiu ñena ga yoko atove, avisu naga e yo nene. Nane kiau visena pan amlua nene.”

⁸ Ana lalua akoskosin naña lalua amolue e puluve, lalua apano. Lalua apano na, sa naña lalua amarau ke ga wa ana lalua amloge sane akekara ñena ga pañisi. Ana lalua akiriri apano vena avisawal lologena nene va kiena nalogena lala, ⁹ ana lalua apa ña sane, ana lalua apitawe Yesu. Lalua amilan kare naga pañisi, ana naga pisi pan lalua, pisa pisape “Pokolulagi.” Ana lalua apa akinai tano e naga, lalua atarar lana, lalua amlotun naga.

¹⁰ Ana Yesu pisa ga pan la luoka, pisape “Marauen toko. Amiu ga luoka ava avisa va wolai lala vena ato garo tano Kalele, ana e yo nene, la akilia avisu inu.”

Li na mara lala la apa apisawal suri la nene

¹¹ Pogos naña sira lalua nene añasuñela apa ke puna ne nalogena lala, e ke e pogos ga nene, ana li na mara lala ñasia añasuñela apa Yerusalem, la apa apisawal suri la nene naña kakate, van yerkawa kiena ne yaru wa lala. ¹² Ana la nene, la apio nasumonena tañena lala apimi, ana la apa lele taaga amio la, ana la apisayu suri la nene pano-o ĥisi, ana la apiranaria asape la monar awar kilavaru keviu tai va li na mara la nene, ¹³ ana la apisi ñarera pan la, apisape “Avano avisavisawal va yeririna lala, avisave ‘!Peraga, kiena nalogena ga la nene! Apimi kolemalu, e pogos naña imimi mesuña momalio ke ga wa, ana la apinaun tasnena akus apano.’ ” ¹⁴ Ana la apisa ñena ga pan la, apisape “A visae visena na suri nene va tol Ĥaelat, ĥisi na imimi ga mevano mekila ruru memio naga, ĥisi na amiu ve aloge re visena tai vanonia.”

¹⁵ Ana li na mara la nene akekaran kilavaru nene, amlavia, ana la apano apisovisokani e yo punu ga sa naþa yerkawa la nene apisa pan la, a suri nene kila le Israel lala la apisavisa ke visena nene pimi tol nanagane.

Yesu pimi puna ne kiena nalogena lala

Mak 16:14-18; Luk 24:36-49; Yoane 20:19-23

¹⁶ Ana nalogena la lualima taaga pa taaga nene apito garo tano Kalele, e tavie naþa Yesu pisaar pan la, ¹⁷ ana pogos naþa la apisu naga, amlotun naga, ana la þasia la asitom þele ga asape Yesu re nene poli. ¹⁸ Ana Yesu pimi lavisin la, pisa pan la, pisape “Ntewa mligan suri punu ga nae ma e peni a nae mēna ga e yomarava nini, e luñau, vena nevesuþen la. ¹⁹ Sanene, nemligan plan amiu ke narui, vena amiu monar ava e yolai punu ga na yomarava nini, amiu monar aurela aimi ave kiau nalogena lala, naþa amiu akela e kia kiena ne Ata, Narina, a Ninuna Wa, ²⁰ a naþa avian la mēna ga vena alogear visena la naþa nepisa pan amiu þisi rui. Ana amiu monar asitoñali luen ga, naþa nesuñna nemio amiu silaga, vano vano-o tol luas nen pog nini.”

Lologena Wo Kiena Ne
Yesu Kristo Naña
MAK
Siriyuia
Visayuena Na Tusi Nene

Komþasnen suniena plas na tusi nini

Tusi nini, “Lologena Wo Kiena Ne Yesu Kristo Naña Mak Siriyuia”, naga siari e visena tai naña sape lologena wo nene, naga lologena wo kiena Yesu Kristo, narina Ntewa. Mak kilologia naña Yesu pe yaru na yuñnaena kiena ne Ntewa, a kiena visena m̄areraena sike ea. Tekilia tevisu kiena m̄areraena pogos naña piyan ke yeririna lala, a m̄neneplan m̄na yermare lala, a naña warplan milamulena viowa kiena yaru lala. Yesu pisawal kiena kia tai, sape naga Narina Yeririna, naña naga pimin tañan kiena maliena vena warplanen milamulena viowa kiena yaru lala, vena akilia aure matan nalogeviowaena, yepela melala.

Mak pisayu manene yuñnaena kiena Yesu pa laa sane, amio kile lala naña naga myuñnaenia, taulu naña pisayu kiena visena lala.

E tusi nini, Mak pisayu þesan Yoane Nakeena amio kiena yuñnaena, a naña Yoane kee Yesu. Siraunia, pisayu naña Yermare taþali Yesu. A siraun m̄na suniena plas na visena nene, naga pisayu yuñnaena kiena Yesu la narui naña kila ruru yaru la naña amai apimi apowo sina a naña naga piyan ke yeririna lala. Pogos naña Yesu kila kiena yuñnaena lala, silaga kiena nalogena la asuñna akilia ruru naga amio kiena þelaga lala pa laa sanene.

Ana e pogos nene, yaru laþas pe akekan re Yesu poli, sinela kar Yesu paþisi. Marana na maro la na tusi nini apisayu malena kiena ne Yesu e kiena legiana olua na maro e yomarava nini, a pupia suri naña pisayuia, nane kiena marena, a naña mali sina.

E marana na keviu 16, yaru moki asitom asape Mak naga siri tusi nene tol ga marana na ve tokaki orelu, ana marana na ve tokaki la ne siraun nene, pona yaru taþena naga siria yo.

Komþasnen suniena la naña sike e tusi nini

Yuñnaena kiena Yoane Nakeena 1:1-13

Yuñnaena kiena Yesu garu Kalele 1:14–9:50

Yesu molue Kalele pa Yerusalem 10:1-52

Legiana olua na maro kiena Yesu naña kila kiena yuñnaena Yerusalem, a yo make la naña lavisin Yerusalem 11:1–15:47

Yesu mal sina 16:1-8

Yesu pimi m̄alivin kiena nalogena lala a naga pa mae peni 16:9-20

Yoane Nakeena sike e yokorena pisawal ke visena kiena ne Ntewa

¹ Na nene Lologena Wo kiena Yesu Kristo naña narina Ntewa. ² Suniena na Lologena Wo nini siar e Yoane Nakeena, sa naña Visena Wa kiena ne Ntewa pisayu naga konua rui e visena tai naña Navisawalena Aisea pisawalia, naña Ntewa pisa pisape

“Naga pe yaru tai nalologonen kiau visena,

naña nemligan naga sumon ko, pe na kilaruruen mrapa lala kioñna mekiki ruru wo. Mal 3:1

³ Ana naga suñna piovion ke e yokorena, piovion ke pisa ke pisape

‘Amiu na monar akila ruru mrapa lala kiena Suþe Ntewa, amesmes ruru wo, vena naga kilia yali ea imi kate e kiamiu malena lala.’”

Ais 40:3

⁴ Sanene narui, Yoane Nakeena pimi kate e yokorena lepas naña Yutea, ana mlologon ke visena kiena ne Ntewa pan yeririna lala. Naga pisawal ke pan la pisape “Amiu monar avilopu amiu e kiamiu mlamulena viowa lala, aimi, vena nekee amiu e wii nakeena,

ḡisi na Ntewa viewo amiunia.”⁵ Ana ḡisi na yeririna la moki nae Yerusalem amio nae pulkumali taḡena e lepas naḡa Yutea, la apa amiyagogan Yoane, ana la apisa plan ke kiela naviowaena lala pania, ana naga kee la e wii naḡa Yortan.

⁶ Ana pogos naḡa Yoane Nakeena sike e yokorena sanene, naga kila sa ga yermarua navisawalena tai na konua rui naḡa Elaisa, sa naḡa pe miyen re kulsota la naḡa po poli, ana ḡana kulkota ape ga e vilulus nen sur mali tai naḡa kiena kia kamel, ana kulka na ḡeḡena amiyuḡaen e narin kulus nen puluk tai. A kana kinanena e yokorena nene, naga kurpo ga ne amio kopululus nen lago na yoḡarua, naḡa kiki sane purutevi.⁷ Ana pisaar pan yeririna lala, pisa pisape “ḡisi na yar tai, naḡa puryuna ḡarera taulunu, naga yoko siraun inu imi. Yar nene, naga to laa metavan inu, in na pe netorokin re poli naḡa neulounia neyen plan kiena kulus nen lana, pona nekila si yuḡaen tai ne sanene vania.⁸ In na nesuḡa nekee amiu e ga e wii, ana yoko naga kee amiu e Ninuna Wa.”

Yoane kee Yesu

Matiu 3:13-17; Luk 3:21-22

⁹ Ana Yesu mligan pulkumali naḡa Nasaret, e lepas naḡa Kalele, pimi e lepas naḡa wii nae Yortan, ana Yoane kee e wii nene.¹⁰ Ana pogos naḡa kee pae Yesu, Yesu suḡalu, molue e wii pa metava, ana veraga ga ma e peni pietava pania, naga ḡal Ninuna ne Ntewa pitomi ke tano sa ga manu naḡa loḡe, pitomi mesmes ga koan te naga.¹¹ Ana lala amloge Ntewa nae ma e peni pis pitomi, pisape “Ko, ko ga taaga ope naruu wawa, ana nepinaia ko paḡisi. Sineu si ko, nekekarani ko paḡisi.”

Yermare taḡali Yesu

¹² Ana e pogos ḡa ke nene, Ninuna Wa ḡere Yesu naga taaga pa laa perina sane e yokorena,¹³ ana Yesu suḡa e nene tol legiena lualima yam vari, naḡa Yermare taḡali naga paḡisi. Yesu sike amio sur mal tetan lala e lele nene, ana navisi kiena ne Ntewa lala apimi apisuar ke naga.

Yesu siar kiena yuḡaena garo Kalele

Matiu 4:12-17; Luk 4:14-15

¹⁴ Ana siraunia, apim atarar Yoane Nakeena, aḡere pa akotawea e yuḡa naloge viowaena. Ana pogos naḡa Yesu mloge lologena nene, petan yo ḡasuḡe pato si lepas naḡa Kalele, ana siar e pogos nene, naga mlologon Lologena Wo kiena ne Ntewa.

¹⁵ Ana pogos naḡa naga mlologon ke, pisa ke sape “Nanagane na, Ntewa kilia sane pe pog mesmes naḡa monar avilopu amiu narui. Navesuḡenena kiena ne Ntewa naga pimi ke pun amiu narui, monar avilopu amiu, alelaga e Lologena Wo nini.”

Yesu pio yar na wereen ika la vari

¹⁶ Ana siraunia, Yesu naga suḡa mialoro ke e is nen pupia lapa nae Kalele, ḡal yaru la lua nawereen ika, nane Saemon amio wenla Antru, lalua asuḡa aḡere ke kiela lilivi.¹⁷ Ana Yesu pisa pan la, pisape “Amiu lua aim atavevenu. Yoko nekila amiu ave li nawereen yeririna lala aim ave kiau.”¹⁸ Ana veraga ga lalua nene amligan kiela lilivi lala, ataveve Yesu.

¹⁹ Ana Yesu mial pali laa sane, kirawal narina ne Sepeti la luoka, nane Semes amio wenla naḡa Yoane. Lalua atotano ke e pulus nen kiela waa, akila ruru ke kiela lilivi lala.²⁰ Ana pogos naḡa Yesu kirawal lalua nene, pio la, vena la ḡena ataveve naga, ana asuḡalu, amligan arimala Sepeti naga ḡeke e waa amio kiena yaru nayuḡaena lala, lalua ataveve Yesu.

Yesu pilelua ninuna viowa tai

Luk 4:31-37

²¹ Ana Yesu amio kiena yaru lala amial apa atol pulkumali naḡa Kapeneam, ana e Legiena Wa, apa e yuḡa nalotena, ana Yesu naga pian yeririna lala e Visena Wa kiena ne Ntewa.²² Ana la naḡa amiyagogania amilan paḡisi, komin naḡa amloge navianena kiena

ne Yesu naga pe taþena, pe sa re navianena kiena ne kiela navianena la poli, komin Yesu naga kiena urmi po, puriukawaena kiena ne Ntewa teke ea.

²³ Ana e pogos nene, yaru tai naþa ninuna viowa teke e naga sike amio la, ²⁴ kila yar nene, naga m̃aþaaga kare ga paþisi, naga pis pa Yesu, pisape “?Yesu nae Nasaret, kioþna ya ne teke e imimi? !Po ko na opimin osape okila kare imimi! In na nekilia ko pa rui, ko na ope Yar Nowo Wa kiena ne Ntewa.”

²⁵ Ana Yesu pis m̃arera pan ninuna viowa naþane, pisaluþar pania, pisape “!E, ko na ve ovis re! !Oure vetan yar nene nanagane ga ne!” ²⁶ Ana ninuna viowa naþane kila yepen yar nene miokamarmare, m̃aaga keviu yam si tai, þisi na molue petania pure pano.

²⁷ Ana yar la nae yo nene amilan sur nene paþisi, asuþna apisasayu ke Yesu, asape “? E, sanape na sanene? ?Navianena viu si tai nene, pona yar ne? Yar nene, naga puriuna kawa paþisi ne, pis ga pan ninuna viowa lala, ana amlogearia.” ²⁸ Ana komin sur ne la nanene narui, akekarania, apisa ruru kia wo kiena Yesu pa e yo lala pa þar punu yo punu ga e lepas nae Kalele.

Yesu kila ruru anenane wona Saemon Pita, amio yeririna taþena si laþasia

Matiu 8:14-15; Luk 4:38-39

²⁹ Ana Yesu amio yaru ne la nini, Semes amio Yoane, a Saemon amio Antru, lala amolue petan yuþna na lotena, apa e yuþna m̃ana ne lalua nene Saemon amio Antru, nanene e pulkumali m̃a ke ga naþa Kapeneam. ³⁰ Ana e uþna m̃ana lalua nene, anenane wona Saemon naga mai m̃eke ea, yepena pisusun, momalio ke e m̃ana tog, ana lalua apisawal pa Yesu. ³¹ Ana Yesu pa tarar limana sira marua nene, tarlua toþmalu e m̃ana tog, ana yepena pimi manin sina, naga suþmalu, pa piran kala kap.

³² Ana e m̃a nena e legiena nene ko yepekilavi, pogos naþa Legiena Wa þarovia, sane mrae pito kovio pa rui, yeririna lala aþure yar la naþa amai, a la naþa yermare la asike e la, apim pu Yesu, ³³ ana la moki manene la, sa naþa lavisi la punu ga nae kumali nene apim asuþmalu e mratava na yuþna nene. ³⁴ Ana Yesu kila ruru yeririna la moki naþa amain inanena taþena lala, a m̃ene plan yermare la moki petan yar lala, pisawo yermare lala sape ve avisa re si sur tai, komin akilia pa rui sane naga pe Navisaarena kemua lelaga kiena ne Ntewa.

Yesu mlologon ke e yo lala lepas nae Kalele

Luk 4:42-44

³⁵ Ana kolulagi, pogos naþa lakaporo pe kokoreko re poli waa, Yesu suþmalu, naga taaga mial petan uþna, ana pa e yo m̃ano tai, mlen pa Arimana. ³⁶ Ana siraunia, yeririna la apimi akale si naga uþna, ana Saemon la aþna re si naga poli, la apa akalea. ³⁷ Lala akale m̃a pano-o, aþnal naga e yo naþane, apisa pania, asape “Yeririna taþena la moki apimin akale ko ke.”

³⁸ Ana Yesu pisape “Ee, nekilia m̃a ga. Ana peraga, monar teva m̃ena ga e pulkumali taþena laþas naþa sike ga waa, vena nekilia nelologon m̃ena Lologena Wo nene van la. Sur ne na nene, in na nepetan ma ne nepitom nesike e yo nene.”

³⁹ Ana þisi na Yesu pato mialoro ke e yo punu ga garo Kalele, mlologon ke e yuþna na lotena kiena le Yu lala, pile plan ke m̃ena yermare lala moki petan yeririna lala.

Yesu kila ruru yaru tai naþa leperosi se yepena miania

Matiu 8:1-4; Luk 5:12-16

⁴⁰ Ana yaru tai naþa leperosi sike e yepena pimi puna Yesu, kinai tano puna, piun m̃areran tania, pisape “Awis, visae ko na otaþan ga, nelelaga sane ko ga okilia okilarurunu, neikiki sina.”

⁴¹ Ana Yesu sinena miye manene yaru naþane, naga pe maraun re sape visae tol lae naga vanon kiena inanena, ana naga mligan limana te naga, pisape “Inu netaþania, nanagane monar yepeþna ikiki sina.” ⁴² Ana veraga ga yepena miania, leperosi nene þisi petan yepena, naga mekiki sina. ⁴³⁻⁴⁴ Ana Yesu m̃areran pania, pisa pisape “Omloge ke ne,

ovano ve ovisawal re suri nene wa, ana nanagane ga ne ova okom puna yaru wa vena naga kilia visuveve yepeña. P̄isi na monar ova okila lotena va Ntewa a okila m̄ena kuḗpaḗaena na ikikiena nene naḗa Mosis pisa, sape yaru monar kila vanon sur na sa nene, ana p̄isin sur nene, yar wa kilia visawalia sape nanagane na leperosi naga p̄isi.” Ana Yesu pitetalia naga pano.

⁴⁵ Ana pogos naḗa yaru nene pano, pa pisayu sur la nene pan yeririna lala punu ga, kila sane visena nene pa p̄ar punu yo, pano-o kila sane Yesu pe mial re si pa loyuḗa e pulkumali taḗena la poli, komin visae vano, yoko yeririna la ve moki aiminia. Naga suḗa ga perinan pulkumali lala, ana yeririna lala asuḗa apetan ke kiela pulkumali lala, apimi puna.

2

Yesu kilia viewo m̄ena mlamulena viowa kiena yeririna lala

¹ Ana legiena laḗas p̄arovia, Yesu p̄asuḗe si pa ma pulkumali naḗa Kapeneam, ana pe piavi re poli, yeririna la amloge asape naga pam si rui. ² Ana p̄isi na la moki naḗa apim puna, yo loyuḗa naga pulen la paḗisi, a vanua m̄ena e mratava naga yepa vitokaki ga. Ana pogos naḗa la asike lele taaga sanene, Yesu mlologon Visena Wa kiena ne Ntewa pan la. ³ Ana e ke e pogos nene na, yar laḗasia atar yaru tai naḗa minana pimi, naḗa yepena wetelu ga mare. Ana la vari atar ga naga e m̄ana tog naḗa mono ke ea pimi.

⁴ Ana pogos naḗa apim atol yo naḗane, apisu sane yo pule pa rui, taḗatete si atar kiela erau nene va lavisin Yesu. P̄isi na lala ataryaun naga apa metava e wos nen yuḗa naḗane, lala aḗepo wos nen yuḗa metava mesmesun ga e naḗa Yesu sike ea, amligan malumun yaru naḗa mono ke e m̄ana tog, pitomi tano e pulmas naḗane, pito loyuḗa.

⁵ Ana pogos naḗa Yesu kira pisu sur nene, kilia sape la nene, amlelaga m̄arera e naga paḗisi sane yoko naga iila kiela inanena nene, naga pisa pania, pisape “Naruu, in na nepiewo kon kioḗa mlamulena piowa lala.”

⁶ Ana e pogos nene yaru navianena na visaluaena la p̄asia asuḗa ga, amloge ke visena kiena ne Yesu. Ana p̄isi na la kiela sitomena la miyuḗae piowa ke e sur nene, ⁷ apisa kare ke naga, apisape “?Yaru nene pisalele kare ke kia wa kiena ne Ntewa sanape na sanene? Ntewa naga taaga kilia viewo mlamulena viowa lala, pe yar re si tai poli, ana yaru nene pis ke sanene, naga sitom ke sape naga pe Ntewa narui.”

⁸ Ana veraga ga, Yesu mnunulu-p̄aria sape asitom ke piowa sanene e naga, ana pis pan la, pisape “?Komin ya ne sinemi la pulen ke sitomena viowa la ne sanene? ⁹ Visae nevisa ve sanini van inanena nene, nevisave ‘Nepiewo pa kioḗa mlamulena viowa rui,’ pona nevisa vania nesapenua ‘Osuḗalu, osulowar moḗa tog, oyali,’ ana e visena lua nene, tai naga m̄areran navisaena, a tai naga meme ga naḗa avisa. Naḗa sape ‘Osuḗalu, oyali,’ naga m̄arera manene laa, komin yoko akilia avisuluḗar sane kiau visena nene pe lelaga pona pe pe lelaga re poli, naḗa yaru nene suḗalu, pona pe suḗalu re poli. ¹⁰ Ana nagane, neyuḗaen sur tai naḗa ami asitom ke asape Ntewa ga naga taaga kilia yuḗaenia, vena akilia avisuluḗar sane Narina Yeririna naga kiena puriukawaena torokin naḗa viewo mlamulena viowa lala na yomarava nini. Amiu ayagogan ruruia.”

¹¹ Ana Yesu pisa pa yaru na inanena naḗane, pisape “Nepisa pan ko, osuḗalu, osulowar moḗa tog, oyali ova uḗa.”

¹² Ana veraga ga, e maran la naḗa apisu ke, suḗal sanene, kus m̄ana tog, mial pa vanua pa uḗa.

Ana pogos naḗa p̄ina la nene apisu sur nene, amilan paḗisi, amieluar Ntewa, asape “Awee, pe tepisuli re sur tai sanene poli wa e kieta malena, p̄ane ga ne.”

Yesu pio Matiu naḗa kiena kia tai Livae pimi tavevea

Matiu 9:9-13; Luk 5:27-32

¹³ Ana Yesu p̄asuḗe si pito garo e is nen pupia lapa, ana p̄ina la moki apim lele taaga e yo nene akovivia, naga pian la ke. ¹⁴ P̄isi na naga mial laa pa sane, kirawal yaru tai teke e kiena yuḗaena e yuḗa na warpoloen kururu varu na takis. Yaru nene naga

Livae, narina ne Alpeas. Ana Yesu pion pania, pisape “Oimi otavevenu.” Ana veraga ga Livae suñalu, taveve Yesu. ¹⁵ Siraunia, Yesu pa kinana e yuñna ñana Livae, ana e pogos nene, li nawarpoloen ñena takis la moki, amio ñarmarera tañena la, naña apimi atotano veraga amio Yesu amio kiena nalogena lala, komin e legiena nene, yeririna kar la ne naña atavevelili ña Yesu. ¹⁶ Ana navianena navisaluaena la ñasia, naña la ape le Varasi lala, apisu naña Yesu teke veraga amio yaru la ne sanene, apiun tan nalogena lala, apisape “? Komin ya ne kiamiu navianena kinan ke veraga amio ñarmarera la sa nene?”

¹⁷ Ana Yesu mloge visena nene, pisatañe la, pisape “Yaru la naña yepela poga ga la pe sinelan re asape ava puna ne yaru nakilaruruen maiena la poli, ana la ga naña amai, la na sinelan pañisi. In na pe nepimin re naña nevio yaru la naña apisa ke asape amesmes ñisi rui e marana ne Ntewa vena ataveve inu, peraga, in na nepimin li viowa la sane la nini.”

Naviunena tai e lepas na monsilena

Matiu 9:14-17

¹⁸ Ana e pogos nene, nalogena kiena ne Yoane Nakeena amio le Varasi lala añar ke ñelaga namonsilena nakilaen lotuena van Ntewa, ana yeririna la apim pu Yesu, apiun tania, apisape “?E, sanape ne naña nalogena kiena ne Yoane la amonsilu pe nakilaen leniena, a nalogena sa le Varasi ñena lala, akila ke maran taaga, ana komin ya ne kioña nalogena lala pe akila re poli?”

¹⁹ Ana Yesu pisatañe la, pisayu naga amio kiena nalogena lala, sane la akekara pañisi pogos naña naga sike amio la, ana ñisi na sinela viowa pogos naña sa naga ure matan la, ana pisape “?Pogos naña yaru natalopa-ena sike e ñağagena amio kiena erau lala wa, asitom ke asape lala monar aligan kinanena na ñağagena? Peraga. ²⁰ Ana siraunia, visae pogos tai nasinekar kiena ne yaru nene lağasia aimi aurelua naga vetan kiena erau lala, e pogos nene narui kiena erau la nene akilia aligan kinanena, komin naña la sinela piowagan manene naga.”

Sur vii amio sur marua

²¹ Ñelaga na monsilena nene, naga ñelaga marua tai na lotena kiena ne le Yu lala, ana Yesu sinenan pisape kila meraravan van la sape ñelaga marua la ne sanene, la tağatete yakol si amio suri vii la naña naga pian lan ke ne. Ana pisa ñakaiwa tai e lepas nene pan la, pisape “Tağatete tela kinakina kulmrae tai naña pe urviu ana tesuluwo ruru pulus naña teke e kulsota marua nene, komin kulmrae vii nene kilia urewowa kulsota nene komğas, ñisi na pulus naga kilia vim ve keviu laa sane. ²² Ana kuruta na munena naña sirpup pava ke ga wa, tağatete tetaron vito e kulus nen nane naña pe urmarua, naña ataron kuruta na munena pito ea yam moki rui. Ana visae tekila ve sanene, yoko kuruta nañani lapa, kila kulus mapoa, kuruta namunena naga taroi, a kana pias nena piowa nena ga. Ana kuruta vii, monar tetaron va e kulus nen nane naña pe urviu, ñarera ruru po, ana tekilia teligan ruru moña yam ve piavi.”

Yesu pe suğen Legiena Wa

Matiu 12:1-8; Luk 6:1-5

²³ Ana e legiena tañena si tai, naña pe Legiena Wa, Yesu amio kiena nalogena lala amial apano, ana kiela mrapa naga pa kom lokove na kona lala. La amial ña sanene, pano-o kiena nalogena la viso kari la, ana apae plan kona lağasia akania. ²⁴ Lala akila ke sanene, le Varasi la ñasia asuñna e nañane, naña akirawal ke Yesu lala, apisa pa Yesu, apisape “!Ei, okira! Kioña nalogena la akila ke sanene, la pe pon re akila sanene e Legiena Wa poli, sa ve sanene la akilaro ke kieta navisaluaena ne.”

²⁵ Ana Yesu pisatañe la, pisape “?Pona pe amiu apuloli re e Visena Wa pogos tai poli yo, naña pisayu sur la naña Ñarin Suğe Keviu Tepet kila nanua sumo? !Amiu akilia ruru pa rui! Naga amio kiena yaru lala viso kar la pañisi, ²⁶ naga pa loyuña e lele wa kiena ne Ntewa, mla kilaparavi wa naña navisaluaena pisape yar wa ga lala akilia akania, ñisi na Tepet la akania. Ana Apieta, naña pe ñarin yaru wa e pog nene, naga tañan ga pan la.

²⁷ “Nevisa van amiu, sane kieta navisaluaena lala pe pe na m̄areran kare itaen re si poli. Ve sanene na, Legiena Wa naga pe pe na kila kareen re si malena kiena yeririna la poli, ana pe naiila itaena. ²⁸ Ana Narina ne Yeririna naṗa pe suṗen sur punu ga, naga ke narui pe suṗen m̄ena Legiena Wa, naga ga kilia visa ya naṗa tekilia teyuṗmaen e Legiena Wa, a naṗa ve teyuṗmaen re.”

3

Yesu kila ruru lima ulu tai e Legiena Wa

Matiu 12:9-14; Luk 6:6-11

¹ Ana e Legiena Wa si tai na, Yesu naga pa si e yuṗma na lotuena, ana e pogos nene, yar tai naga m̄eke loyuṗma naṗa limana tai pulu. ² Ana le Varasi laṗasa naṗa sinela kar ke pa Yesu rui, asike lavisin naga e pogos nene, la asape apisuar ruruli ke naga, vena alual li ṗelaga viowa ṗasia e naga, ana sinelan asape avisuli m̄ena yoko Yesu kila ruru lima ulu nene e Legiena Wa nene pona ve kila re.

³ Ana Yesu pisa pan yar naṗane, pisape “Osuṗmalu, ovam metava e nini wa,” ⁴ ana naga piun tan la naṗa asike ne, pisape “?E, kieta navisaluaena pisa ke sape tekilia teyuṗmaen yara la ne e Legiena Wa lala? ?Pisa ke sape tekilia teyuṗmaen sur la naṗa po, pona sur la naṗa piowa? ?Po pisa ke sape tekilia tetamalia yaru, po towemoṗmaria?”

Ana la nene pe apisa re si sur tai poli.

⁵ Ana Yesu kira pisuveve la, pisu marala la m̄arera ga sike na, ana naga mloge piowa manene paṗisi vanonia, ana sinena kari la. Ana naga pis si pan yar naṗa limana pulu, pisape “Kian mesmesun li lumoṗma wa.” Ana pogos ga naṗa yar nene kila sanene, limana pimi po sina ga. ⁶ Ana le Varasi la amolue, apa mesmes ga apisu yeririna kiena Suṗe Erot, naṗa lala akilia alual li mrapa tai na weṗmaren Yesu ve sanape.

Yeririna la moki apimin Yesu

⁷ Ana Yesu amio kiena nalogena la apetan la, apato si garo pupia lapa, ana yeririna la moki atavevela apatove. Yeririna la nene, laṗasia amolue e yo taṗena lala nae Kalele, ⁸ a la ṗasia apitom tano e lepas naṗa Yutea, amio pupia kiela kumali naṗa Yerusalem, a ṗas apitom e lepas naṗa Itumea, a ṗas apitom e wii naṗa Yortan lepas na vano, a ṗas akom ma pupia sive keviu e yo lala nae kumali keviu lua nene, Taea amio Saeton. La punu nene amloge pa visena na sur la naṗa Yesu miyuṗmaen ke rui, ana asape aviminia.

⁹ Ana pogos naṗa la punu ga nene asike e is nen lapa, Yesu pisa pan kiena nalogena la pisape ava avisawo narin waa tai toṗma ga, komin yaru la nene moki liu, ana naga yepen mavin sape sa ṗisi yar la aim yo kuskus manene la puna. ¹⁰ Na nene komin naga kila inanena la moki amloge po si rui, ana yar taṗena la naṗa aminana ke wa, la m̄ena moki naṗa asusunlan ke asape aimi lavisin Yesu, vena atol ga naga.

¹¹ Ana e pogos nene, visae ninuna viowa la asike e yeririna la ṗasia, visae avisu Yesu, lala monar avatanonia, akinai e mia lana, avion m̄areran, avisave “Ko na ope narina Ntewa.” ¹² Ana Yesu pis m̄arera pan ninuna viowa la nene, pisaluṗar la pisape yoko ve avisawal re sanene van yaru lala avisave naga ai.

Yesu mliganar kiena nalogena la lualima taaga pa lua

Matiu 10:1-4; Luk 6:12-16

¹³ Ana siraunia, Yesu naga pa metava e yo naṗa pe kunusia, naga pio yeririna laṗasia pisape aimi puna. ¹⁴ Ana pogos naṗa apimi, naga mliganar la lualima taaga pa lua, pisa pisape lala ave nalologena, naṗa kiela yuṗmaena na ve sanini: yoko monar la ayal luen ga amio naga, a yoko naga ligan la vena akus Lologena Wo va e yo lala, ¹⁵ a yoko puriukawaena na m̄eneplanen yermare sike e la.

¹⁶ Ana kia kiena ne nalologena ne lala sanini:

Saemon, naṗa Yesu sikiapu si ki viu tai Pita,

¹⁷ a Semes, naṗa narina ne Sepeti,

a Yoane naña wenla ne Semes nene, naña Yesu sikiapu lalua nene rui, asape Ponases, naña kana kinasia pisape la lua nene ape polilu nena ga, komin la lua nene, pulgola apismolue lue ga,

¹⁸ a Antru,

a Pilip,

a Patalomiu,

a Matiu,

a Toñas,

a Semes naña narina Alpeas,

a Tateas,

a Saemon, naña kila politik pan le Rom lala,

¹⁹ amio Sutas nae Kariot, naña siraunia pielua Yesu.

Namratava puna ne Yesu asitom ke asape naga pe wowe

Matiu 12:24-32; Luk 11:14-23, 12:10

²⁰ Ana siraunia, Yesu pasupe si uña, pupia pına la apim si puna, ana Yesu amio kiena nalogena la amiyuñae la ña pano-o pe aparurula re nena ga, akinana re poli.

²¹ Ana la naña e mratava puna ne Yesu amloge naña naga miyuñae manene la pa sanene, amloge ñena yar tañena la apisayu ke naga, apisape “!Yar nene kilalu pa ñarina rui!” ana anena amio wenla lala, apano asape aurelua naga vetan la.

Yerkawa ñena lala apisa ke asape Yesu miyuñae ke ga e puriukawaena kiena ne Yermare

²² Ana e pogos nene, navianena na visaluaena lañasia amligan ma Yerusalem apitomi e yo nene, la ñena apisayu ke Yesu pan yeririna lala, asape “Yaru nene, supe kiena yermare la naña Pelsepel, naga pa ñeke e rui,” ana apisa ñena, asape “Yar nene, naga ñena pile plan ke ga yermare lala e puriukawaena naña Pelsepel tañan pania.”

²³ Ana Yesu pio la apimi lavis puna, pisi pan la e ñakaiwa, pisa sape “?Sanape, amiu asitom ke asape Yermare naga kilia ñenelua sina Yermare? !Naga tañatete nena ve sa nene! ²⁴ Visae supe tai, kiena yeririna la aureure, sane kompas la na akawela ke amio lañas, yuñae kiena supe nene tañatete ga suñalu. ²⁵ A visae uña tai, la aureure naña la ñasia asape añene plan lala ñasia, yoko yeririna la nene tañatete asu ruru pogos tai. ²⁶ Ana sa ñena nene, sa yermare kiena Yermare Lego, la ñasia asuñalu asape akilali naña añene plan lala ñasia, nanene kana kinasia sane nasuñenena kiena Yermare tañatete suñal ñarera, kiena puriukawaena naga pisi. !Ana peraga, yermare ñarera ke ga wa!

²⁷ “Kam na apisu ke ne, visae yaru tai sinenan ke pisape va loyuña ñana ne yaru ñarera tai vena vinaun kiena sur lala, naga monar war kilika viar ke ne yaru ñarera nene sumo wa, pisi na kilia war plan kiena suria. Ana nekila ke sanene pan yaru ñarera nene Yermare.

²⁸ “Lelaga nepisa ke pan amiu, mlamulena viowa kiena yeririna lala, amio visena viowa la naña apisa ke nene, Ntewa kilia viewo la vanonia, ²⁹ ana yar naña visae visanena kare Ninuna Wa, visa kiena yuñae ñasia Yermare Lego ga naga miyuñae, yar na sa nene tañatete tol naviewoena pogos tai, kiena mlamulena viowa nene tolue ga vano-o tañatete pisi pogos tai.”

³⁰ Yesu pisa ruru si visena ñarera nene pan la komin la nene la ke narui naña apisa ke asape ninuna naña teke e naga pe ninuna viowa ga tai.

Anenane Yesu amio wenla lala apim asape aurelua naga

Matiu 12:46-50; Luk 8:19-21

³¹ Ana anenane Yesu amio wenla la apimi akate e pog nene, asuñal ga asuña vanua, amligan visena pavinia vena naga vitom katen la. ³² Ana e pogos nene, pupia pına atotano ke lavisin Yesu, ana visena nene pa tol naga, la apisa apisape “!E, anoña amio womla lala asike vanua, asape avis kone amio ko wa!”

³³ A Yesu pisatañe la, pisape “?A aneu naga ai? ?A wolai lala ai?” ³⁴ Ana kira pisuveve la naña ateke lavisinia pisa pan la pisape “!E, apisu ke ne! Aneu, amio wolai lala, la ke

nene narui. ³⁵ Komin yaru naþa miyuñmaen sur naþa Ntewa naga sinenania, yar ne sanene naga pe wolai, a pe vineu, a pe aneu þa rui.”

4

þakaiwa na yaru naþa peven kona

Matiu 13:1-9; Luk 8:4-8

¹ Ana e pogos taþena si tai, Yesu pian ke yaru lala e yepas nen lapa nae Kalele. Ana yeririna la moki naþa apimi puna e pog nene, kila naga pa metava e narin waa tai naþa toñña e lapa nene, pa totano metava ea, ana yar la naþa asuñña ga ura. ² Ana naga pian la ke e sur la moki e þakaiwa, ³ naga pisa pan la, pisape “Ayagoga ruru lia. Yar tai, naga pa peven kona e kana lokove. ⁴ Ana pogos naþa naga peven kona la pa sanene, kurus la þasia kekapil lavisin laa is nen mrapplepa. Ana siraunia, manu la apimi atete plan sina.

⁵ “Ana kurus laþasia kekapil e yo naþa kilavaru sike vatano. Ana e yo nene pe porotano wo keviu re poli teke metava, ana kila narui akapuru iroro ga, ⁶ ana pogos naþa mrae þarlar pa metava, yepisusunun sus lala, veraga ga amiyayai komin þeligas la pe pito manene re tano poli.

⁷ “Ana kurus þasia amlolor e yo tai naþa sumo pe ate plan ruru re kilika la naþa pe nonos e poli, ana þisi na kilika nene kapur sina keviu, ana piwo make ga sus nen kona la naþane pano-o amarmare, pe aþar re si mras la poli.

⁸ “Ana kurus taþena la amloloru e porotano naþa po, akapuru po, pano-o aþar mrasnela lala. La þasia aþar mrasnela tol lualima yam telu [30], a laþas aþar tol lualima yam orai [60], ana laþasia pa laa tol ponotia taaga [100].”

⁹ Ana Yesu pisa pan la, pisape “!Amiu punu ga kiligamiu sike na. !Popon sa aloge kilia kiau visena nini!”

?Komin ya ne Yesu pis ke ga e þakaiwa lala?

¹⁰ Ana siraunia, þina lala apiapa tetai, ana Yesu naga taaga ga sike, ana yar la naþa asike amio naga amio kiena nalogena lala, apim apiun tania apisape “?Kinas nen þakaiwa nini naga sanape? ?Ana komin ya ne ko na okuan ke visena la ne sa nene, ana opian ke mñena yaru lala e þakaiwa?”

¹¹⁻¹² Ana Yesu pisatañña la, pisape “In na nepian la ke e þakaiwa la nene, komin la ape þarmarera la paþisi, sa naþa akila ke visena kiena Navisawalena Aisea na konua rui pimi pe lelaga, naþa pisa ke sape

‘La akirava, akirava mña vano-o, amloge, amloge mña vano-o,

ana taþatete avisu kilia suri tai, taþatete mñena aloge kilia suria.

!Visae peraga, pona avilon kiela sitomena la yo rui, pona Ntewa viewo pa kiela mlamulena viowa la yo rui!

Ais 6:9,10

“Vanon sur sanene, inu nepisape lala ape þarmarera lala, asuñña perina paþisi. Ana amiu ke narui, yoko wo laa van amiu vaþisi. Navisawanena navesuþenena kiena ne Ntewa, yoko in na nevisawal ruru merarava wo van amiu.

¹³ “?Ana sanape, amiu pe amloge kilia re kinas nen kona nene poli? ?Ana visae amiu pe asitom kilale re kinas poli, ana sanape yoko aloge kilia þakaiwa taþena la naþa sa nevisayu van yeririna lala?”

Yesu pisawal kinas nen þakaiwa na yar naþa peven kona

¹⁴ Ana Yesu pisa, pisape “Pogaga, yoko in na nevisayu meraravan kinas nen þakaiwa nene van amiu. Kana kinasia naga sa nini: Porotano taþena la nene, la sa naþa malena kar la ne kiena yeririna lala. A naþa yar nene peven ke kurusia e porotano la nene, naga sa naþa apisawal ke visena kiena ne Ntewa pan yeririna lala.

¹⁵ “Porotano mñarera naþa e is nen mrapplepa, naga sa naþa yar naþa pogos naþa mloge visena kiena ne Ntewa, ana visena nene pe pa ruru re nena loyuñña e losinena poli. Ana

manu la nene, la sa naþa Yermare, naþa veraga ga pimi mlalua sina visena kiena ne Ntewa petan los nen yeririna nene.

¹⁶ “Ana porotano naþa kilavaru naga sike tano, naga sa naþa yar naþa mloge visena kiena ne Ntewa, ana verakorena ga kekarania, ana mlavia, ¹⁷ ana visena nene naga pe towawa ruru re e losinena poli. Ana naga kapuru sa ga narin sus tai naþa pe pe þeligas ruru re poli naþa kila yoko kapuru ve plas ga. Ana pogos naþa sa pog m̃arera la imi pona yar la asape avevela komin amlelaga ke e visena kiena ne Ntewa, ana verakorena ga aligan sina ga.

¹⁸ “Ana porotano naþa kilika viowa sike ea, naga sa naþa yar la amloge visena kiena ne Ntewa, ¹⁹ ana þisi na, lala asitom manene la kiela malena, a sitomena na waren sur ve moki vim kila kotalia la, ana lala sinelan manene la sur wo lala na yomarava nini. Þelaga la nene pimi sane kilika viowa, piwo Lologena Wo nene kila sane ve war re si mrasa e malena kiena yeririna la nene.

²⁰ “Ana porotano wo nene, naga sa naþa yeririna la naþa amloge visena kiena ne Ntewa, amloge kilia, akekarania, amlararia e losinela, ana siraunia aþar mras nen Lologena Wo nene e kiela malena, la þasia aþaria tol lualima yam telu [30], þas tol lualima yam orai [60], þas tol ponotia taaga [100].

“Kinas na þakaiwa na kona maro ga e nene.”

Þakaiwa na kapi na tegaena

Luk 8:16-18

²¹ Ana Yesu pisa sina pan la, pisape “Ita yeririna lala, visae tesilan kap vivaga, yoko ve telawan re to vatanon paket. Peraga, monar tetelan to metava e kana lele nena vena tegoli punu yo. ²² Sanene, nanagane nasuþenena kiena ne Ntewa sane kapi te ga nene, naþa nanagane na molmolue ke e ita narui, vena tegoli sur punu ga, ana sur lala punu ga naþa apisawo sike na, a visena wan lala, monar akakate e yomerarava. ²³ !Ana amiu punu ga kiligamiu sike na, popon sa aloge kilia kiau visena nini!”

La monar ayagogan ruru visena kiena Yesu

²⁴ Ana Yesu naga pis si pan la, pisape “Amiu monar ayagogan ruru kiau visena, asitom ruru la lia. Yaru naþa mloge, ana pe taveve re poli, naga yoko taþatete loge kilia ruru si narui. Ana yar naþa mlogear kiau visena la, naga kilia loge kilia ruru m̃ena kiau navianena la moki naþa sa imi si sirau. ²⁵ Ana yar naþa kiena suri moki pa rui, yoko war ve moki laa va laa sane, ana yar naþa pe kiena sur re poli, þisi na naga kilalu narin sur naþa mla ke.”

Þakaiwa na kurusia naþa kapuru ke

²⁶ Ana Yesu pisa ke sina ga pisape “Nasuþenena kiena ne Ntewa naga sa naþa kona naþa yar tai naga peven ke e kiena porotano. ²⁷ Pogos naþa peven pae na, pe kila re si sur tai e kurus nene poli. Naga moñna momalio ga, tavolo, momalio, tavolo, suñalu, salue ga nene yemalo a legiena, ana kurus nen sur nene, naga ga sus plamolue, kapuru ke sanene. Kapuru m̃a pano-o, ana yar nene naga kiliar re kurus nen sur nene kapur ke sanape poli. ²⁸ Yar nene kilia re sur tai poli, pano-o korowas la kian pa perina piavi re na þar vinasia, þisi na tau. ²⁹ Ana pogos naþa kinas la menmene ruru po, yar nene siar si miyuñmae narui, þar kiena playu pa te plan mrasnena lala.

“Ana navesuþenena kiena ne Ntewa naga kapur tekak ga sanene, telivi ke e yomarava wetelu nagane, ana e legiena tai yoko tekirawal pupia mrasnena vam metava.”

Þakaiwa na kurus nen purpa

Matiu 13:31-32; Luk 13:18-19

³⁰ Ana Yesu pisa sina, pisape “Þelaga navesuþenena kiena ne Ntewa naga pe taþena ga sike na, naga m̃arera paþisi naþa nekilia nekirawal si þakaiwa tai naþa vena visaen

sape naga sanape. ³¹ Sa naña kurus nen purpa tai yo, naña naga tekaki ga miyuve kurus nen sur taņena la naña temapila la ke e kata lokove lala, naga tekaki na tekaki. ³² Ana pogos naña kapuru keviu, purpesia naga pimi keviu miyuve make ga kinanena taņena la naña sike e kata lokove lala. Ana pupia korowas la paņisi, naña manu la akilia ava ase ea, vanon kana wamal po, yomanin ea.”

Yesu naga pian yeririna la e ðakaiwa

³³ Ana Yesu pian ke yeririna la e Lologena Wo e ðakaiwa la moki sanene, naña sane torokin yoko akilia aloge kilia. ³⁴ Visena la punu ga naña pian lania, ðakaiwa teke loyuņa, ana pogos naña naga ga sike amio kiena nalogena la, e pogos nene narui na naga sun pisa meraravan kinas nen ðakaiwa la nene pan la.

Pupia lagi naña Yesu naga pisawoia

Matiu 8:23-27; Luk 8:22-25

³⁵ Ana Yesu suņa ke e waa naña naga totano e pian yeririna lala, ana ko yepekilavi, naga pisa pan kiena nalogena la, pisape “Ei, ita tokusro teva komþas nen lapa vano.”

³⁶ Ana kiena nalogena la amligan yeririna la asike na, apa e waa naña Yesu naga teke pa e rui apano. Ana narin waa si laņasia asiraun la. ³⁷ Narin waa la nene apato mņa pano-o, pupia lagi tai naga molue, miyu lapa naņane kila pupia sive naga kekela ke e waa, kila na pulen ke e sive narui, lavis talilu. ³⁸ Ana Yesu naga miyulugan ke e yulugana tai e þeren waa, monon momalio mņa. Þisi na lala apa apioþegeia, ana apisa pania, asape “!Navianena! ?E, sanape pe ositoņal ita re na lavis tetalilu ne po?”

³⁹ Ana Yesu suņalu, pis mņarera pan lagi, a pis mņa pan pupia sive la nene, pisape “!Amiu ava ruru amiu!” Þisi na lagi molue re si poli, yo mare ga mņeke na. ⁴⁰ Ana Yesu pisa pan la, pisape “?Komin ya ne amiu amarau sanene? ?Amiu pe amlelaga re e in poli yo?”

⁴¹ Þisi na la amarau paņisi, apiuyun ke sina ga petan la, sape “?Yar a nene? Aulai, naga pis ga sanene na, lagi amio sive amlogear veraga ga.”

5

Yesu mņene plan ninuna viowa moki petan yaru nae Kerasa

Matiu 8:28-34; Luk 8:26-39

¹ Ana Yesu amio kiena nalogena lala apimi aņarpo yo e komþas nen pupia lapa nene, aņarpo lologia yo naña Kerasa, naña laņas apio ke asape Katara pona Kerkasa. ² Ana la apa ura e yo nene, ana e yo nene puluve na yar mare la asike ea, ana yar tai naña ninuna viowa teke e naga, naga sike e lotap nene, sa naña pe mņa uņa.

Ana pogos naña Yesu pula tano petan waa, veraga ga yar nene molue e lotap, kiriri pitomi puna. ³ Yaru nene marana ka paņisi, yar la akilayon asape aviaria pano-o akilapule ga yonia. ⁴ Yam moki rui apiar lana amio limana e sen pona kilika, apiviaria panon laki ana naga pureroro ga sen la nene amio laki lala, pano-o pe yar re si tai poli naña puryuna kawa torokin kila yar nene imi moņau. ⁵ Ana kolemallo punu ga amio legiena, naga suņa mialialor ke e lotap a metava mņa e kunus lala, naga monon mņaaul ke, a pilavilan wowa ke yepena lala e kilavaru.

⁶ Ana yar naņane, pogos naña naga suņa ke perinan yo naña Yesu la apim ura ea wa, naga mņal pa Yesu rui, kiriri pitomi tano puna, patanonia, kinai puna. ⁷⁻⁸ Ana Yesu pisa, pisape “!Ninuna viowa, ovetan yar naņa, oure matan naga nanagane!”

Ana ninuna viowa mlokai mņarera pania, pisape “A ko, Yesu, narina ne Ntewa Mali, kioņa ya ne teke e inu? !In na nepiun tan ko, e kia kiena ne Ntewa, sane yoko ko na ve ola re nakoena van inu.”

⁹ Ana Yesu piun tania, pisape “?Ko na kioņa kia ai?”

Ana ninuna viowa pisataņea, pisape “In sa kia Yaru Moki na Mara, komin imimi moki liu.” ¹⁰ Ana ninuna viowa naņane piuyun mņareran ke petan Yesu sape ve mņene plan la re vetan mņala nene.

¹¹ Ana e yepas nen kunus nae yo nene, pupia p̄egas nen nompui, la asun akolkol m̄na e porotano, naḡa tol sane manu lua [2000], ¹² p̄isi na yermare la naḡane atagi, apiuyun m̄arera petan Yesu, asape “Awis, oligan imimi meva e nompui la nene, otaḡan imimi meva mese e losinela.”

¹³ Ana Yesu taḡan pan la, pisape “Pogaga, amiu avano.” Ana lala amolue petan yar naḡane, apa e los nen nompui la naḡane. Ana veraga ga, nompui la nene akiriri, apito tano e yeparpas nen kunus nene, amloloru apito tano e pupia lapa naḡani, ana la amunḡar lan wii na amarmare.

¹⁴ Ana yaru navisuaren nompui la apureure, apito uḡna, apisawal sur nene, a lala apisawal m̄na e yo taḡena la naḡa sike ne, kila narui na yeririna la moki naḡa apavin asape avisulia. ¹⁵ Ana pogos naḡa la apavini, apisu Yesu naga sike amio yaru naḡa sumo ninuna viowa la ase naga, mian pa kulmrae rui, pa ruru pa rui pe maran ka re si poli. La apisu naga pimi po si sanene rui, amaraunia. ¹⁶ Ana la naḡa asuḡesania apisu ke sur la punu ga nene, la asunyu pan yeririna taḡena la naḡa apam marea, la apisayu sur la naḡa Yesu miyuḡnaen pan yar nene, a sanapen nompui la naḡa amloloru apito e wii. ¹⁷ Ana la apisu sane piowa ga, aḡareran ke pan Yesu asape naga monar ure vetan kiela yo.

¹⁸ Ana p̄isi na Yesu la apito si tano e kiela waa, pogos naḡa Yesu pa ke metava e waa, yar naḡa sumo ne, naga pitomi piun m̄areran ke pan Yesu, pisape “Awis Suḡe, in na sineun nesape ko otaḡania ita la nini!”

¹⁹ Ana Yesu pe taḡan re poli, pisa pania, pisape “Peraga, popon sa ova si uḡna, ovisayu van la naḡa na mratava pun ko amio kioḡna erau lala, ovisayu van la sanape naḡa Ntewa sinena miye ko paḡisi, ana kila po na po sanene pan ko.”

²⁰ Ana yaru naḡane p̄asuḡe sina, pa e yo punu ga e laḡas naḡa puna, naḡa apio ke asape Pulkumali Lualima, naḡa yaru la naḡa Le Yu lala pe asu re e poli, ana pisawal ke yuḡnaena wo naḡa Yesu miyuḡnaen pania. Ana lala naḡa amiyagogon kiena sunena nene, lala amilan paḡisi.

Narina ne Saeras naḡa sira, amio sira naḡa tol kulkota m̄na ne Yesu

Matiu 9:18-26; Luk 8:40-56

²¹ Ana Yesu la akome waa, akusro sina komḡas nen lapa naḡa narui, ana pogos naḡa Yesu pula pa ura sane na, pupia p̄ina na yeririna la apim akovivi sina asike. ²² Ana yaru keviu tai na yuḡna na lotena nae yo nene, kiena kia Saeras, naga pimin sape visu Yesu, pimi lavisinia, kinai tano puna. ²³ Naga tagi pania, piun tania, pisape “Naruu naḡa sira, naga mai na mai, ana nanagane na pona naga mare pa yo rui. Ana nepiun ke tan ko vena ko oim, oligan lumoḡna te naga, vena loge wo sina, mal ve piavi re laa sane wa.” ²⁴ Ana Yesu p̄arlar suḡalu, amio yar naḡane apavin, ana yaru la moki e p̄ina la nene, la m̄na ataveve la, naḡa amigagar la ga e yepas nena ne Yesu apano.

²⁵ Ana lala yaru tai naḡa apa ataveve ke Yesu sanene, naga sira, naḡa inanena na kupario teke e naga legiena punu ga, tol kas lualima taaga pa lua rui. ²⁶ Ana sira nene, naga pul yaru na kilaruruen inanena la pano-o kiena kilavaru la p̄isi, akilayon naga pano-o paḡisi, ana naga mloge maran taaga sike, inanena nene naga pimi keviu lue ga legiena punu ga. ²⁷⁻²⁸ Naga mloge yam moki rui naḡa yaru la apisayu ke Yesu, ana kiena sitomena tai na, sitom ke sape “Visae netol ga m̄na kulkota, yoko kiau inanena naga p̄isi.” Sanene narui na pa tapolou likan yeririna la naḡane, naga pimlilue lavis varaun m̄asina ne Yesu, kian limana sane na, tol ga mrapogos nen kulkota m̄na ne Yesu.

²⁹ Pogos naḡa naga tol kulkota m̄na Yesu sane na, veraga ga e aora nene kiena kuruta naḡane p̄isi, ana naga mnunun luḡaria e naga sane kiena inanena naga kovio petan rui. ³⁰ A Yesu m̄na mnunun luḡar sur tai, sane puriuna tai kovio petania, ana naga pilon veraga ga likan yeririna la naḡane, piunia pisape “?E, ane tol ga m̄na kulkota nanagane?”

³¹ Ana kiena nalogena la apisa-taḡnea, asape “?Ko na opiun osape ane tol ko ga nagane, sanape ne, ko pe opisu re yeririna la moki manene na amigar la akovivi ko ke ne po?”

³² Ana naga suḡa kiraweke m̄aga sape kirawal li ane tol naga. ³³ Ana sira naḡane kilia pa rui, sape naga, naga marau paḡisi, sinena kurkur na kurkur, p̄isi na pimi puna Yesu, kinai

tano e mialana, pisawal sur punu ga. ³⁴ Ana Yesu pisa pania, pisape “Auia, nalelagaena ga kioṃa e inu kila ko omloge si po narui. Kioṃa inanena naga kovio nenaga. Suṃarena kiena ne Ntewa sike amio ko, owasuṓe ko sina ga oto uṃa.”

³⁵ Ana pogos naṓa Yesu pis ke pan sira naṓane wa, visena tai kom ma uṃa ṃana ne Saeras pitomi, pisawal pania sape “Naruṃa sira naṓane naga mare rui. Yoko ve oure re si pupia navianena nene vavini, ve okila kare re naga.”

³⁶ Ana Yesu mloge ṃa visena nene, pisa pan Saeras, pisape “Ve sineṃa viowa re, olelaga ga ṃarera e Ntewa.” ³⁷ Ana Yesu pialuṓar yeririna la punu ga sape la asuṃara ga ve ataveve la re avavini, naga pure ga la telu Pita, a Semes amio wenla naṓa Yoane apavini. ³⁸ Pogos naṓa apa lavisin uṃa ṃana ne yar keviu naṓane, apisu yar la sinela piowagan ke nin sira nene rui, la asike atagin ke, amlolokain ke. ³⁹ Ana Yesu pa loyuṃa, pisa pan yaru la nene, pisape “?Sanape ne amiu amlolokai keviu ke, atagi ke sanene? Sira nene naga mare re poli, naga momalio ga ne.” ⁴⁰ Ana la apitale viowa ga pania.

Ana Yesu pisa pan la apa vanua, purear ga anenane sira nene amio arimana, a kiena nalogena la telu naṓane apa e lele naṓa tas nen narin sira nene ṃeke ea. ⁴¹ Ana Yesu pa mlilu tarar limana, pis pania kome kiela visena, pisape “Talita kum,” kinas nen visena nene pisa ke sape “Kiau narin sira, ko osuṃalu lia.”

⁴² Ana veraga ga e aora nene, narin sira nene naṓa kiena kas tol lualima taaga pa lua [12], naga suṃalu, mial. Ana pogos naṓa la apisu sur nene, amilan na pano-o kiela sitomena plas ga. ⁴³ Ana Yesu pisa pan la pisape ala re kinanena tai vania, a pisa ṃena pan la pisape yeririna taṓena la ve aloge re sur nene.

6

Le Nasaret lala pe sinelan re Yesu poli

Matiu 13:53-58; Luk 4:16-30

¹ Ana Yesu molue e yo nene, ṓasuṓe sina ga pimi kiena, amio kiena nalogena la. ² Ana e Legiena Wa, naga pa amio yaru lala nae kiena yo nene e loyuṃa e kiela yuṃa na lotena, ana suṃa pian la ke. Ana pogos naṓa la amloge amilan kiena visena la pano-o paṓisi. Ana la apisa apisape “!Aulai! ?Yaru nene naga ṓar sur la nene pe? ?Naga tol namanmaruaena nene sanape? A naga kila ke kile la nene sanape ne? ³ Ita tekilia ke yaru nene rui. Naga yaru na yuṃaenen ga yuṃa, naga pe narina ne sira naṓa Maria, a la nene, Semes, a Yoses, a Suta, a Saemon, naga pe wenla ne la nene. A vinena lala, la ga naṓa asike amio ita ne.” Ana sinela karia, pe sinelan re nena naga.

⁴ Ana Yesu pisa pan la, pisape “Yaru naṓa pe navisawalena, yaru taṓena lala akilia avatanon naga, ana yaru nae kiena yo, amio ṃena namratava puna, la ga nene taṓatete avatanon naga.” ⁵ Ana e kiena yo wawa nene, Yesu taṓatete kila kile la ea, ana naga mligan ga limana e yaru la lua la ga naṓa aminana, amloge si po. ⁶ Ana Yesu sinen pula mila paṓisi komin yaru la nae kiena yo wawa naṓa pe amlelaga re e naga poli. ṓisi na naga petan kiena yo, mial pa e pulkumali taṓena lala ana pian ke yeririna lala.

Yesu mligan plan kiena nalogena lala pepe lua

Matiu 10:5-15; Luk 9:1-6

⁷ Ana Yesu pio kiena lualima taaga pa lua nene, pis ruru pan la, mla naṃareraena pan la vena akilia ataulu ninuna viowa lala, a siraunia mligan plan la pepe lua apano. ⁸ Visena wo la nene naṓa naga pisa pan la sumon naṓa lala apano, naga sanini, pisape “E lepas na kiamiu mrapa, yoko amiu ve awar re sur laṓas amio amiu, ana kiamiu plasgai ga alararia avano. Yoko amiu ve awar re kamiu kinanena ṓasia, pona karo lala, pona varu. ⁹ Amiu akilia ayen kiamiu kulus nen lamiu lala, a ve awar re ṃamiu kulmrae taṓena laṓasia, ṃamiu kulmrae taaga nane amiyenar ke ne sa ayal avano.”

¹⁰ Ana Yesu pisa ṃena ga, pisape “Pog naṓa sa la awere amiu ava loyuṃa ṃala, ana amiu monar akekarana ga nasuen amio na mratava nene, vano tol pogos naṓa sa amiu

avatan si pulkumali naþane. ¹¹ Ana visae pulkumali tai, yeririna laþas yepela mavin were amiuena ava m̃ala uña lala pona yepela mavin loge amiuena, amiu aligan ruru kiela yo nene m̃eke na, ana pogos naþa sa amolue e yo nene, monar atanvan puluyavi nae yo nene naþa sike e lamiu, sane kile tai, pona kiamiu visena m̃arera tai pan la, sane yoko lala akus nakoena tai naþa mesmesun ga kiela þelaga viowa nene.”

¹² Þisi na kiena nalogena lala apa amlologon pan yeririna lala asape monar avilopu la, ¹³ ana la a m̃ene plan ninuna viowa la moki e yeririna lala, ataron m̃ena narin wel na mras nen olip e þarin nainanena la moki, sane kile na navisa ruruena kiena ne Ntewa, ana la amloge po sina.

Þarin Suþe Erot Antiþas pisayu Yesu

Matiu 14:1-2; Luk 3:19-20, 9:7-9

¹⁴ Ana e pogos nene, Þarin Suþe Erot naga m̃ena mlogeli m̃a sur la naþa Yesu miyu m̃aenia, komin kia kiena Yesu, apisawal ke pa rui e yo punu ga, a yeririna la punu ga akilia pa rui. Yar la þasia apisa ke Yesu, asape “Naga na, pe Yoane Nakeena si ne, naþa naga mal sina e marena; sur ne na nene kila naga puriuna kawan nakilaen kile la sanene.” ¹⁵ La þasia apisa ke asape “Naga na yer marua Elaisa na konua rui,” a la þasia apisa ke asape “Naga navisawalena tai ne sa naþa yermarua navisawalena lala nakonua manene la rui.” ¹⁶ Ana pogos naþa Suþe Erot mloge sur la naþa Yesu naga kila ke ne, ana naga pisa sape “?Yaru nene, pona Yoane Nakeena ke sina ga ne. Inu netero pa þarina pa rui, ana nanagane naga mali sina e marena yo?”

?Yoane Nakeena mare sanape?

¹⁷⁻¹⁸ Ana Suþe Erot pisa sanene vanon naþa naga m̃emar Yoane Nakeena mare nanua rui, ana naga marau paþisi. Ana marena kiena ne Yoane Nakeena kana suniena nena sanini: Wenla Suþe Erot nene, naga kiena kia Pilip, naþa lalua arimala taaga a anela lua. Ana sumo, Pilip nene talopa amio sira tai, kiena kia Erotias. Ana siraunia, Suþe Erot pa þerelua lein sira nene pe wona. Ana e pogos nene Yoane pis pa Suþe Erot, pisape “Sur mesmesu re nene poli, naþa ko opurelua sira nene, komin naga pe wona ne womla.”

Ana Erotias pe kekaran re nena visena kiena ne Yoane nene, naga sinena karia, ana Suþe Erot mligan kiena yeririna la þasia apa atararia, apiari naga amligan pa e yu m̃a nakoena. ¹⁹ Ana Erotias sinenan ke sape monar we m̃ar Yoane, ana naga kila þele ga, ²⁰ komin Erot maraun wemo m̃arena. Naga maraunia komin naga kilia ruruia sane Yoane naga pe yar mesmes tai a pe yar wa, naga puar ruru ga su m̃a ga. Yam la moki naga mligan visenan Yoane pa puna lalua asun, naga kekaran visena kiena ne Yoane la paþisi, ana yam punu ga, visena la nene miyur ke naga, kila narui na naga kiena sitomena peve lua ke narui. ²¹ Pe piavi re poli na, Erotias m̃al kiena mrapa tai. Nane e pogos naþa la akila þaþagena nasito m̃alen legiena naþa Suþe Erot paeme ea, ana Erot naga kila kinanena kana kiena yarkeviu lala, amio nasumonena na yu m̃aenia kiena, a yerkawa taþena lala nae yo naþa Kalele. ²²⁻²³ E pogos na þaþagena nene, lo m̃earu kiena ne Erotias naga polu e marala, ana Suþe Erot la akekaran kiena wolena paþisi, naga pisaaria m̃arera pania, pisape “Suri ya naþa visae oviun tan inu, nekilia neta m̃an ga van ko, va tol komþas nen kiau sur make ga lala.”

²⁴ Þisi na sira naþa pa vanua, piun petan anena naþa Erotias, pisape “?Auia, yoko neviun yar ne tania?”

Ana anena pisa pania pisape “Ovisa ga vania ovisave, naga monar kus ga þarina ne Yoane Nakeena van ita.”

²⁵ Ana sira naþani miroro si pa loyu m̃a, pisa iroron ga pa Erot, pisape “In na sineun nesape okus ga þarina ne Yoane Nakeena m̃ene pialo tai imi ga nanagane e nini.” ²⁶ Ana visena nene kila Suþe Erot mloge piowa, pe sinenan re sape kilaro kiena navisaarena naþa pisaar m̃arera rui e maran kiena erau lala, ²⁷ þisi na veraga ga e m̃a nena ga e pogos

nene, naga miila kiena yar na mara tai pa pisa, pisape akus þarina Yoane vano. Þisi na lala apa e loyuña e yuña nakoena nene, atelua kolmekina, ²⁸ ana la amligan þarina ñene pialo tai, akus pimi pan sira ñee naþane, ana kus pa pan anena.

²⁹ Ana siraunia, pogos naþa nalogena kiena ne Yoane la amloge suri nene, la apimi akus tasnena, apa amligan e lotap. Ana suniena kiena ne Yoane Nakeena maro ga e nene, ana pogos naþa Erot mloge suniena kiena ne Yesu, kila naga marau paþisi, ñape Yoane Nakeena nene naþa naga ñemaria, mal sina.

Li nalologena la apa amlologon visena kiena ne Ntewa þisi na aþasuþela sina

Matiu 14:13-21; Luk 9:10-17; Yoane 6:1-13

³⁰ Ana e pogos nene, nalologena la naþa Yesu mligan plan la apa amlologo, aþasuþe la si apimi. Ana lala apisayu pa Yesu sur la punu ga naþa amiyuñan pan yeririna lala, a sanape naþa apian la. ³¹ Ana yar la moki naþa asuñan apimi ke pu Yesu, þisi na apano, ana þisi na taþena si la apimi, þisi na apano, salue ga nene, Yesu la pe apa ruru la re nenaga, pe aora re tai naþa la akilia ala narin kinanena tai. Ana Yesu pisa pan la, pisape “Aulai, ita, tevetanli la e yo nini wa. Teva takale yo tai naþa naga yo ñmano, akilia avaruru amiu ea.”

³² Þisi na la apa akus waa tai, asape ava akale yo tai lepas nen lapa naþa pe yar la asu re e poli.

Yesu pagan yeririna la moki taulu manu lima [5000]

³³ Ana yeririna la moki apisu sane Yesu la apa ke sanene, la ñena ga amolue e kiela pulkumali lala, akiriri ataveve la akom ura, apato atolþesa yo nene naþa la apisu sane waa naga pato ke ea, la asumon Yesu lala. ³⁴ Ana Yesu pa ura, pogos naþa pisu þina na yeririna naþa asike pa ura rui, naga sinena mie la paþisi, komin naga pisu la sa naþa sipsip la naþa akuspal mrapa, pe yar re tai naþa kilia visuar la, þisi na naga pa sun pian la e visena wo la moki.

³⁵ Ana pogos naþa mrae pito tano, nalogena lala apimi puna, apisa asape “E, Suþe, yo nini naga pe po re poli, a lavisi ñena yemalolo narui. ³⁶ Ana popon ko oligan þina la nene awasuþe ava ñala uña pona pulkumali lala vena awul kala kinanena la þasia.”

³⁷ Ana Yesu pisatañe la, pisape “Toko, popon amiu ga awar kinanena þasia van la.”

A lala amape Yesu naga pe pisa ruru re poli, ana la apisa asape “!Ke, peraga yo! Pona ko na sinoñan ke osape imimi mowar pupia kieta varu ana mevato meul kilaparavi torokin lala manu moki nene akania!”

³⁸ Ana Yesu pitetalia la, pisape “Amiu avato avisulia aþara ke kilaparavi via na sike amio amiu nanagane.”

La apato apisu pae na, apam sina ga apisape “Memlarar narin kilaparavi lima ga teke na, amio narin ika naþa satin lua ga.”

³⁹ Ana Yesu pis pan yeririna lala, pisape “Amiu atotano e viluñini wa,” ⁴⁰ ana la atotano e þegas lala, þegas laþasia sane lualima lima [50], ana þegas taþena laþasia sane ponotia taaga [100]. ⁴¹ Ana naga mla narin kilaparavi lima naþane amio narin satin lua nene, kira pa ma e peni, pisa potena pa Ntewa vanonia, þisi na kaweroro narin kilaparavi lima naþane kian pa kiena nalogena lala vena avion plan van yeririna lala, pion ñena narin ika lua naþane sa ke ga.

⁴² Ana la akan ña pano-o, meþela la kawa paþisi, ⁴³ ana kinakinas nen kinanena la naþa akanligania, torokin akon si va e karo la tol lualima taaga pa lua [12]. ⁴⁴ Ana yaru la naþa akan kinanena nene, yerñene ga lala, la atol sur sane manu lima.

Yesu mial yau metava e wos nen lapa

Matiu 14:22-23; Yoane 6:16-21

⁴⁵ Ana Yesu pisa pan kiena nalogena lala, pisape “Inu sineun nesape amiu akus kieta waa, asumon akusro pupia lapa nene ava lepas þasia e kumali naþa Petsaeta, ana in na nesuwa nesuñan neligan plan ke ne yeririna la nene wa.” ⁴⁶ Ana pogos naþa naga mligan

plan yeririna la nene apa pae na naga pa metava e kunusia vena len. ⁴⁷ Pogos naþa yemalolo ke narui, waa naþane m̃eke perina paþisi, lika e lapa, ana Yesu naga taaga sike ura. ⁴⁸ Ana naga kira pisu la na m̃arera pan la na valuanen waa paþisi, komin la apane ke pupia lagi, kila kiela waa naga pure malum ga. Pogos naþa lavisi yelagi merarava, Yesu pimi pula, mial yau ga metava e wos nen lapa. Suri ne na nene vena naga va þesan ura sumon la, ⁴⁹ a pogos naþa lala apisu naga mial yau ke e lapa pimi pula sanene, la apionia asape “!Aulai, suri ya ne pimi ke sanene! ?Yermare yo, pona yar ne sanene?” ⁵⁰ Lala punu apisu naga sa nene, amarau paþisi.

Ana veraga Yesu pisi pan la, pisape “!E, ve amarau re, in ga ne.” ⁵¹ Ana Yesu þiyu pa metava e waa amio la, ana veraga ga e aora nene, lagi nene mare, ana la naþa asike e waa amilan paþisi. ⁵² Amilan sanene komin kiela sitomena la m̃arera ke wa, la pe apisu kilia re sur la naþa Yesu naga kilia yuþaenia e kiena puriu kawaena poli, sane ya naþa miyuþaen amio narin kilaparavi la lima naþane.

Namaiena lala atol ga luas nen kulkota m̃ana Yesu

Matiu 14:34-36

⁵³ Ana Yesu lala akusro pupia lapa nene e kiela wa, apa atol yo tai, kiena kia Kenasaret. Ana pogos naþa akoan kana kilavaru pa ura, ⁵⁴ apula petan kiela wa, ana verakorena ga yaru nae e yo nene lala apisu kilale Yesu. ⁵⁵ Ana lala akiriri atelivi piora e m̃ala yuþa lala, akus kiela inanena la e m̃ala tog, apa ke e yo la naþa amloge asape naga pa ke ea.

⁵⁶ Ana e yo punu ga naþa Yesu pa ke ea, e yuþa lala, pona pulkumali lala, pona mrapa lala, akus ke kiela inanena lala, amligan ruru la ke pa rui e yo metava lala, la apiun ke tania asape visae naga taþmania ana inanena lala akilia atoliga m̃ana luas nen kulkota. Ana lala naþa atolga sanene, kiela inanena la þisi, amloge po sina.

7

Nalogenena kiena Yesu la pe ataveve re þelaga marua kiena le Yu la poli

Matiu 15:1-9

¹ Ana e pogos nene, le Varasi la þasia apimi lele taaga puna Yesu, amio m̃ena navianena navisaluaena, naþa lala akom garo Yerusalem apami. ² Ana lala apisu ke sane pogos naþa nalogenena kiena Yesu la akinana ke, lala akila sane e nakiravaena kiena le Varasi la, la nene limala la na piowa ga. Na nene vanon pe ataveve ruru re narin mrapa la moki naþa na kevanen limala sa naþa le Varasi la apisa ke asape yar naga monar yuþaen, sumon naþa kinana.

³ Nanene komin e pogos nene, le Varasi lala amio le Yu taþena la aþareran ke paþisi nayuþaen ve sanene, vena taveve ruruen kiela þelaga marua na kiela nalotena na sumo lala. ⁴ La akila ke sanene pogos naþa amiyal apa kumali, pona akom pe, ana pogos naþa la awasuþe la si uþa, la monar ataveve kiela navisaluaena na kevanlaen amerarava wo pona ave wa ruru sina. Þisin nakilaen sanene, la akilia akinana narui, komin visae la ve akila re, taþatete atol kala kinanena. Ana kiela narin navisaluaena m̃ena laþas moki naþa monar atavevea, naþa þasia, na kevanen m̃ala piala la monar akevan ve sanene ve sanene, a þasia, sane monar avilvan kala piaki ve sanene ve sanene, a þasia, naþa nakevanen kala pialo la naþa amiyuþaen e pras ve sanene ve sanene, naga pa sa la nene.

⁵ Sur ne nanene kila le Varasi la apiun petan Yesu, asape “Komin ya ne kioþa nalogenena la pe ataveve re þelaga marua la na kieta nalotena na sumo la poli, naþa kieta nasumonena la apian itania. Ana kioþa yar la nene, la akinana ga e limala namname lala, komin pe akevan ruru re limala la poli.”

⁶ Ana Yesu pisataþne la, pisape “Pe lelaga ga, navisawalena Aisea na sumo naga pisayu ruru amiu ga yeririna na visokanen lala, naþa naga mlologon visena naþa Ntewa naga pisa, naþa naga pisa sape

*‘Yeririna la nene la apatanonu ga e kiela visena lala,
ana kiela sitomena naga sike perinan inu paþisi wa.*

⁷ *La amiyeluarnu ke, ana pe sur korena ga, komin pog naþa la apian ke yeririna lala, apisa ke asape visena nene kiena ne Ntewa, ana peraga, visena nene naga pe kiela ga yeririna lala!* ” *Ais 29:13*

⁸ A Yesu pisa pan la, pisape “Amiu na amligan lua ke navisaluaena kiena ne Ntewa, apuarar ke ga þelaga marua kiena ne yeririna lala m̄arera. ⁹ Nanene naga pe mesmes re naþa ayuñnaen sanene poli, komin amiu añareran ga nataveveen þelaga marua kiena ne yeririna lala, a nanagane amiu akila pano-o þelaga marua ga la nene naga sike narui, miaslua make navisaluaena kiena ne Ntewa. ¹⁰ Amiu na ve asitom re asape amiu akila ke sanene, ana yoko nevisa kiamiu tai, naþa amiu asuñna akila ke. Amiu asitoñnal li navisaluaen kiena Mosis, naþa pisape ‘Ologear arimoñna amio anoñna,’ pisa m̄ena sape yar naþa sa vis viowa van arimana amio anena, awemoñmaria. ¹¹ Navisaluaena nene pisa ke sape ita monar tevisuar ruru ita kieta yermarua lua nene, ana amiu na akila pe taþena. Visae yar tai kilawoia sape kiena sur laþasia pe kiena ne Ntewa, ana pogos naþa kiena yermarua lua kiela sur re poli, aim aviunia, yoko amiu avisa ya ne vania? ¹² Yoko amiu añareran vania, avisave ‘Toko, ve otañnan re van lalua nene, vanon kieta þelaga naga pisa sape sur naþa tepisaarwoia pan Ntewa, ko na monar owar ga van kiena yar wa lala, ve otañnan re van yar taþena lala.’ ¹³ ?Amiu na apisa ke sanene, ana sanape na sanene? Amiu na asuñnal ke m̄arera e kiamiu þelaga marua, amiu amligan lelein ke pitove, ana kila ke naþa þelaga marua la nene naga kila ke navisaluaena kiena ne Ntewa pimi pe sur korena ga. Ana pe naga re ga nene poli, amiu akila ke m̄ena sur la moki sanene.”

Suri la naþa kilia kila yaru naga pe namname e marana Ntewa
Matiu 15:10-20

¹⁴ Pisi na Yesu naga pio si yeririna lala pisape aimi veraga puna, ana pisa pan la, pisape “Amiu punu ga ayagogan ruru inu, monar aloge kilia kiau visena la nini. ¹⁵⁻¹⁶ Pe sur re tai naþa teke vanuan yeririna, naþa sa naga va loyuñna e losinena kilia kila naga namname e marana Ntewa. Ana suri ga la naþa sike loyuñna e losinena yeririna, pogos naþa molmolue e naga, kila naga ve namname e marana Ntewa.”

¹⁷ Ana Yesu petan yeririna la nene, pato si uñna, siraunia kiena nalogena la apim, apiun tania e kinas nen þakaiwa naþa naga pisayu pan la. ¹⁸ Ana Yesu pisape “?Ei, sanape, pona amiu m̄ena pe þarimiu pike re sane la nene poli yo? Komin ya ne amiu m̄ena pe apisuluþar re sur nene poli, sane suri la naþa teke vanua, sane kinanena lala, visae va loyuñnan yeririna, sur la nene naga taþatete kila yeririna viowa e marana ne Ntewa. ¹⁹ Nanene komin sur la nene pe tol re kiena sitomena poli, la apato ga e m̄eþena, ana la amolue akom sina ga e yepena.” Yesu pisa pa sanene narui, siraunia, yeririna la apisuluþar kiena visena, naga pisa kilale pisape pe kinanen re tai poli naþa yeririna monar lonia vena mekiki e marana ne Ntewa, ana kinanena la punu ga naga pon na kanena.

²⁰ Ana Yesu pisa m̄ena sape “A suri la naþa sike pa e yeririna rui, þisi na amolmolue e kiena malena, sur ne la nanene naga kilia kila yeririna ve namname. ²¹ Nanene komin e los nen yeririna, þelaga viowa la na amolmolue ke ea, suri ne la sane sitomen viowa, kolau, vinauena, nawemoñnaren yaru, navinaunen wona yar taþena, ²² sinenanen sur kiena yar taþena, þelaga viowa lala, visokanena, kilaroen navisaluaena, veveyuena, navisa kareen yaru, nawarwarena, navilaveena, a ve woveena. ²³ Þelaga viowa ne la nene amolmolue e los nen yeririna, sur la nene kilia kila yeririna ve namname e marana ne Ntewa.”

Yesu m̄enelua ninuna viowa e sira m̄ee tai
Matiu 15:21-28

²⁴ Pisi na Yesu petan yo nene, pato tano garo pulkumali nae Taea. Ana pa e uñna tai, sape kila sane yaru la ve akilia re asape naga sike e yo nene, ana naga tapolou þele ga sanene. ²⁵⁻²⁶ Ana sira tai sike e nene naþa kiena lus la kom ma Kris apitom, naþa la pe ape Yu re poli, apitom asike yo naþa Ponosia lavisin Seria. Sira nene, narina tai na sira, ninuna viowa teke ea, pogos naþa naga mloge asape Yesu naga sike e yo nene, naga pa

kinai e mialana, tagi pania sinenan pisape naga m̄nelua ninuna viowa ure vetan narin sira nene. ²⁷ Ana Yesu pisatāne pania, pisape “Ana sisi mesmes la na monar akinana ko ne wa. Pe mesmes re nāpa nowar plan kinanena kan sisi la vetan la, nevagan lokul la ea.” Naga pisa sanene komin e pogos nene, le Yu la na asitom ke asape la ga ape narina Ntewa, la apio kare ke la nāpa pe ape le Yu re la poli, asape “Amiu na ape lokul lala.”

²⁸ Ana sira nāpa pisatāne pania, pisape “Ko na opisa pe lelaga, Sūpe, ana lokul m̄na la apa ke lavisin lele na kinanen kan sisi kokan lala, akilia akan korkoro kinanena la nāpa kekapili sike e porotano.”

²⁹ Ana Yesu pisa pania, pisape “Ko na opisatāne kinas nen kiau visena nene po pāpisi. Ana komin kiōna visena nowo nene, nepisulūpar sane opiawa m̄arera e inu. Poga, okilia ovato si ūna, ninuna viowa molue petan narūna nāpa rui.” ³⁰ P̄isi na sira nāpa pato si ūna, pisu narina pa ruru ga tōna ga, tōna momalio m̄a pogaga e m̄ana tog.

Yesu kila ruru yar tai nāpa kiligana la pōpe

³¹ Ana Yesu naga mligan yo nae Taea, pato kome pulkumali tāpena tai, Saeton, ana naga pam sina ga e lapa nae Kalele, e lepas nae yo nāpa apio sape Pulkumali Lualima.

³² Ana la nae yo nene āpure yar tai pimi puna, vena naga ligana limana te ea, komin yar nene kiligana la pōpe, mon m̄a mnenene ga. ³³ Ana Yesu p̄urelua yar nene petan yeririna moki la nāpa asike lele nene, lalua apa li laa perina sane. Ana naga kian mrasilmana pa e pulkiligana lala, p̄isi na mla wasirina, plan e purmenen yar nāpane. ³⁴ Ana Yesu kira pa ma e peni, pure kiena yalua keviu, pisa pan yar nāpa e kiela visena, pisape “Epata.” Visena nene kana kinasia sape “Ovike.” ³⁵ Ana veraga ga, yar nāpane kiligana la pike, a purmenena naga kululu sina, kila sane naga mloge ruru si sur lala, a pis ruru sina.

³⁶ P̄isi narui na Yesu pisa m̄areran pan la, pisape ve ava asunun re sur nene van yar tāpena lala, ana silaga pogos nāpa pisa sanene pan la la apa apisalelein ke pa e yo punu ga. ³⁷ Ana la apisawal-lelein sa nene, komin sinela la pula na pulan sur la punu ga nāpa apisu Yesu kilia tāpa. La apisasa ke asape “Yesu nene kila la nāpa kiligala la pōpe amloge si suria, a kila la nāpa apis pule ga, akilia apis ruru sina. Aulai, yar nene kila sur la punu ga po na po pa p̄isi.”

8

Yesu pagan yeririna la miyuve manu vari [4000]

Matiu 15:32-39

¹ Ana e pogos tai, pupia p̄ina na yeririna la moki apimi sina pu Yesu, la asūna amio pano-o, viso kar la, ana la pe kala kinanen re poli. Ana Yesu pio kiena nalogena la apimi lavisi puna, pisa pan la pisape ² “E, in na sineu miye p̄ina la nini pāpisi, komin nāpa la asike amio ita legiena telu p̄aro rui, kala kinanena la p̄isi. ³ Ana visae netāman la ava ūna m̄ala nāpa pe akinana re sanene poli, pona lāpas viso kar la e mrapa komsusa, kilamarala malko, komin lāpasia m̄ala ūna la sike koperina pāpisi.”

⁴ Ana kiena nalogena la apisa pania, asape “?Ana tevagan yeririna la nene e yo korena nini sanape ne?”

⁵ P̄isi na naga piun tan la, pisape “?Amiu amlarar ke kilaparavi via?”

Ana la apisatānea “Olua ga p̄a.”

⁶ P̄isi na Yesu pisa pan p̄ina moki la nene, pisape “Amiu atotano e yo nene wa.” Naga mla kilaparavi la olua nene, pisa potena pan Ntewa panonia, p̄isi na kawewowaia, kian pan kiena nalogena lala vena akianlelein van yeririna lala, p̄isi na la apion tetain pan la.

⁷ Ana la amla m̄na narin satin lua la ga e pogos nene, a Yesu mlotuwo m̄na ga, pisa pan la sape ava avionlelein m̄na ga van yeririna lala. ⁸ Ana la nāpa akinana pano-o, mēpela la kawa, ana korkoro kinanena nāpa akanligania, āpar akon pa e karo olua. ⁹ Ana la nāpa akinana e pogos nene tol sane manu vari.

P̄isi na Yesu miila si p̄ina la nene āpasūpe si m̄ala ūna lala, ¹⁰ ana naga pa e kiela wa, amio kiena nalogena lala, apetan yo nene, akusro apa atol yo tai nāpa kiena ki Talmanuta.

Yar keviu la Ɔasia asape avisu kile tai

¹¹ Ana e pogos tai, le Varasi laƆasia apim asape agorua Yesu, asape ataƆali mēna ga naga, ana la apisa asape “Imimi sinemimin mesape okilali pupia kile tai van imimi, naƆa sane okila e puriu kawaena nae ma e peni.”

¹² Ana Yesu naga miyuveve pa kona, sa naƆa sinena maren la pa rui, naga pisatame la, pisape “?Sanape na amiu na nanagane, sinemiun asape avisu kile tai ne sanene? Nepisa ke pe lelaga pan amiu, sane peraga, yoko kiamiu lus la na nanagane taƆatete avisu kile tai.”

¹³ Ana Yesu pure petan la mligan la asike na, pa si e wa, pa kusro lapa komƆasia pa lepas na vano.

Nasumonena nalotena la asuama akila ke Ɔelaga viowa la kapurulue ke

¹⁴ Ana pogos naƆa la apetan yo nene apa atol komƆas nen lapa nene, amilan sane sinela pon nawararen kala kilaparavi Ɔasia amio la, ana la amlarar ga kilaparavi taaga teke amio la e wa. ¹⁵ Ana Yesu pisa visena tai pan la, pisape “Amiu monar avisuar ruru amiu, vanon is kiena ne le Varasi la amio Erot.”

Yesu pisa is nene, kana kinasia Ɔelaga viowa kiena ne nasumonena lala, ana nalogena la pe asitom kilia re poli. ¹⁶ La amloge visena nene, apisayu ke pan la, apisape “Pona naga pis sanene vanon ita pe toƆar re kilaparavi laƆas pimi poli yo.”

¹⁷ Ana Yesu kilia ma kiela sitomena lala, Ɔisi na pisape “?Amiu apisayu ke asape ita pe toƆarar re kilaparavi komin ya? ?Sanape, amiu pe amloge kilia re poli, pona pe apisu kilia re sur la poli wa? !Sinemi la marera paƆisi wa! ¹⁸ Amiu kilamaramiu la sike na, ana apisu kilale re sur poli, ana kiligamiu la sike na, ana amloge kilia re sur poli. ?Pona amiu pe asitoamal re si sur la naƆa nemiyumaen pan yeririna la poli? ¹⁹ ?Pogos naƆa nekiantetain kilaparavi lima nanua ne pan yeririna la manu lima naƆane, akan pano-o meƆela kawa, ana akon korkoro kinanena la nene pa e karo via?”

La apisatamea, asape “Imimi mokonkonia lualima taaga pa lua [12].”

²⁰ Ɔisi na naga piun sina ga, pisape “?A pogos naƆa lala manu vari nanua ne akan kilaparavi olua ga naƆane, Ɔisi na amiu akon si karo via?”

Ana la apisatamea, asape “Imimi mokonkonia olua.”

²¹ Ana naga pis pan la, pisape “?Pogaga, ana sanapen nanagane? ?Amiu akiliali ma sur la nene, pona pere ke ga wa?”

Yesu kila ruru kilamara kata tai nae Petsaeta

²² Ana Yesu la apam atol pulkumali nene, Petsaeta. Ana la nae yo nene, a sumon kilamara kata tai pimi puna, atagi pania vena tol ruru yaru nene. ²³ Ana Yesu tarar limana ne kilamara kata, sumon naga pano, la lua amiyuve kumali apa lepas na vano. Ɔisi na Yesu mla wasirina, mligan e kilamaran yar luwoka naƆane, mligan liman tea, ana piun petania, pisape “?Sanape, ko na opisu ke suria, pona pere ke ga wa?”

²⁴ Ana yar naƆane kirava, kira pisu suri lala, naga pisape “Ee, nepisu ke yar lala, ana nepisu la sa ga purƆes nen laki la amiyal ke na.”

²⁵ Ana Yesu mligan si limana e naga, yam luania, Ɔisi na yar nene kilamarana pimi po ruruia, naga kilia kira pisu si suri lala, kira pisu la merarava po na po paƆisi. ²⁶ Ana Yesu pisa pania, pisape “Yoko ko ove ova re si ovisu la nene gar uma, oto mesmes ga moama.”

Pita pisawal sape Yesu pe Navisaarena lelaga

Matiu 16:13-20; Luk 9:18-21

²⁷ Ɔisi na Yesu amio kiena nalogena la asape avato e narin pulkumali lala naƆa lavisin kumali keviu naƆa Sisaria PiliƆae, a e pogos naƆa la amiyal ke apato e yo nene, naga piun tan la pisape “?Amiu amloge ke yar la apisa ke asape in na ai?”

²⁸ La apisatamea apisape “LaƆasia apisa ke asape ko na Yoane Nakeena sina ga, laƆasia asape ko na Elaisa, Ɔasia asape ko na navisawalena tai naƆa na konua rui.”

²⁹ Ana naga piun si tan la, pisape “?A sanapen amiu, amiu na apisa ke asape in na ai?” Ana Pita pisatañea, pisawalia pisape “Ko na ope kiamimi Navisaarena kemua lelaga.”

³⁰ Ana Yesu pisa mesmesun ga pan la, pisape “Pogaga, ana amiu ve ava avisawal lelein re sur nene van yeririna lala.”

Yesu pisawal kiena marena

Matiu 16:21-28; Luk 9:22-27

³¹ Ana e pogos nene, Yesu siar naña mlologon ke pan kiena nalogena lala, pisape Narin Yeririna, monar akila sur la ve moki naña naga loge viowagania, ana nasumonena kiena le Israel lala, amio yar keviu kiena yar wa lala, amio navianena navisaluaena, p̄isi na la akovenlua naga. Ana Yesu pisa m̄ena ga sape la aweñmar naga mare, ana e kiena legiena na telu, suñalu sina, taulu marena. ³² Visena la nene, Yesu pisa meraravan po pan la, ana pogos naña Pita mloge, naga piolua Yesu, pis m̄arera pania, sape visawoia, yoko monar ve ve sa re nene.

³³ Ana veraga ga Yesu pilon m̄asina pimi pu Pita, kira pa pun kiena nalogena tañena la naña asike ne, p̄isalup̄ar m̄arera pa Pita, pisape “!Yermare, oure vetan inu! Kioñna sitomena nene naga pe sitomena kien yeririna ga, pe pe sitomen kiena re Ntewa poli.”

Nalogena kiena ne Yesu naga monar sitom korenan nasinenanena kiena

³⁴ Ana Yesu pio p̄ina lala amio kiena nalogena lala, sape aim puna, pisa pan la, pisape “Yar naña sinenan sape taveve inu, monar sitom korenan nasinenanena kiena, monar kus kiena laki torovia, siraun inu. ³⁵ Yar naña sape taulu kiena malena, yoko kilaluia. A yar naña kilalu kiena malena vanon inu pona vanon kiau lologena wo, naga yoko tauluia. ³⁶ Visae yar tai war make sur na yomarava la punu ga ne, p̄isi na kupal mrapa na malena, naga pe taulu re sur wo tai poli. ³⁷ Ana kiena sur nowo la naña naga p̄aria, tañatete ulmaran si kiena malena. ³⁸ Yeririna moki naña lus na nanagane, la ataña mlamulena viowa, la pe ape lelaga re pan Ntewa poli, la apiowa manene la, a la amawan ke yar tañena la vanon inu a vanon m̄ena kiau visena. Ana siraunia, Narin Yeririna naga yoko wasuñe sina ga, amio kiena navisi wa lala, amio naurarena kiena arimana, ana pogos naña avim, visae yar naña yepena mavin ke naga nanagane, naga m̄ena yoko yepena mavin yar nene.”

9

¹ Ana Yesu pisa m̄ena pan la, pisape “Lelaga nepisa ke pan amiu, yeririna lañas na asuñal ke e nini, naña p̄isi na tañatete amare, vano-o tol pogos naña avisu nasuñenena kiena ne Ntewa imi kate amio kiena pupia m̄areraena.”

Yepena ne Yesu pimi pe tañena

Matiu 17:1-13; Luk 9:28-36

² Siraun Legiena Orai p̄arovia, Yesu p̄ere Pita amio Semes, a Yoane, la ga vari apa metava e pupia ravie tai. Asuñna sane na, nalogena la telu nañane apisu ga yepena ne Yesu pimi pe tañena ke narui, ³ apisu ga m̄ana kulkota la pilavila ke, miyuwowo na miyuwowo, miyuve make ga sur na yomarava la naña miyuwowo. ⁴ Ana akirawal m̄ena navisawalena Elaisa amio yermarua Mosis akate, lalua asike asun ke amio Yesu. ⁵ Ana Pita pisa pa Yesu, pisape “Suñe, po pañisi naña ita tesuñna ga e nini. Popon sa meyuñnaen silparpara ve telu se e nini, moñna tai, m̄ana yermarua Mosis tai, a m̄ana ne navisawalena Elaisa tai.” ⁶ Pita pis wowe ga sanene komin lala sinela kurkur pañisi, amarau m̄ena ga, ana la amninue ga avisa yara.

⁷ Veraga ga lul tai pimi kalo la, amloge visena tai molue ea, pisape “Nanene naga pe Naruu, naña nekekan naga pañisi. Amiu monar alogear ruru naga.” ⁸ Nalogena la amloge visena nene, ana akiraweke ke e yo nene, p̄isi na pe apisu re si lalua naña poli, akirawal ga Yesu naga taaga suñal sike amio la.

⁹ Ĥisi na lala apetan ravie naĤane, apitom ke sina ga tano, a Yesu pis m̄arera pan la, pisawo la pisape “Sur la naĤa Ntewa kila pan amiu apisuia, amiu na ve ava avisasawal re van yeririna la nanagane, vano-o tol pogos naĤa Narin Yeririna mal sina ga e marena, e pogos nene narui amiu akilia avisawal van yeririna lala.” ¹⁰ Ĥisi na la amlogear visena kiena ne Yesu nene, amlarar ga pe kiela ga, ana la apiyun ke sina ga petan la asape ya ne kinas nen kiena visena nene, naĤa pisape mal sina ga e marena.

Asitom ke asape Elaisa na lua sirau vim sina, ana Yesu sape naga Yoane Nakeena pa rui

¹¹ Ana nalogena la telu nene apiun tan Yesu, asape “Sanape ne navianena navisaluaena la apisa ke asape ‘Elaisa naga monar wasuĤe Ĥesia wa, Ĥisi na Navisaarena nene naga m̄alivi?’ ”

¹² Ĥisi na Yesu pisataĤe la, pisape “NaĤa apisa ke ne pe lelaga, Elaisa naga monar imi Ĥesia vena kilaruruen sur la punu ga susumo, Ĥisi na Navisaarena kilia vim. Ana nasiriena wa pisa ke m̄ena sur taĤena tai naĤa pe asitoĤal re poli, naĤa pisayu ke Narin Yeririna, sane naga monar vane nataĤaliena la ve moki, ana yoko yeririna la asitom korenan naga viowa vaĤisi ne. ¹³ Ana nevisa van amiu, Elaisa nene naga pimi ga na wa, ana yeririna la yepela mavinia. Sa naĤa Visena Wa pisa, ana la akila pa piowa ga pan rui.”

Yesu m̄enelua yermare petan teras tai

Matiu 17:14-22; Luk 9:37-43

¹⁴ Ĥisi na Yesu amio la telu naĤane apa ke sina ga puna ne nalogena taĤena lala, ana apisu na pupia Ĥina na yeririna la akovivi la asike na, apisu navianena navisaluaena la agorua la ke amio la. ¹⁵ Ana pogos naĤa Ĥina la akirawal Yesu pam ke sina, amilania, akekaran m̄ena naĤa asape avisu naga, akiriri apim puna, atalopan naga. ¹⁶ Ana Yesu piun tan nalogena la, pisape “?E, amiu apisayu ke ya ne amio la nene?”

¹⁷ Ĥisi na lala yar tai pisa pania, pisape “Navianena, in na nepure kiau sisi yerm̄ene nini pimin ko vena ovisulia, komin purkol m̄arera tai kila naga. ¹⁸ Ana pogos naĤa kila naga, kovenlua naga pato tano e porotano, wasirina mlau piowa ga sa naĤa siripu, karar ke mraluena, a yepena punu ga miokamarmare. Ana nepure naga pamin ko, ko na osu re poli, Ĥisi na nepiun ga tan kioĤa nalogena lala vena la alen naĤeneluaen suri nene vetania, ana la amiyuĤaen m̄a pano-o, akilapule ga yonia.”

¹⁹ Ana Yesu pisataĤe la, pis pan la, pisape “?Amiu la nene, sanape na sanene? Amiu na pe asuĤal m̄arera re nena e Ntewa. ?In na monar nesuĤa nemio amiu vano tol pog ya? Nemiowon amiu pa rui. Ana pogaga, akus teras nene vim punu.” ²⁰ Ana la aĤure pimi, ana pogos naĤa purkol nene m̄al Yesu, kila yepen teras naĤane miokamarmare, mloru pato tano e porotano m̄eke pilolon ke, kila wasirina naga mlau piowa ga sa naĤa siripu. ²¹ Ana Yesu piun tan ariman teras naĤane, pisape “?Ana purkol nene siar kila sanene pogwai?”

Ana arimana pisataĤea, pisape “E, sur nene siar na konua konua rui, pogos naĤa pe sisi ke ga wa. ²² Ana pimi tol nanagane, yam moki rui naĤa sur nene kila ke naga mlolor pa e kapi po pito e puluwii. Sur nene kila kare ke ga naga paĤisi, sape kilaĤaria, ana sa ko na okilia okila sur yan tai, imimi mepiun tan ko, awis, ko na sineĤa ye imimi, oiila imimi komin narimimi nini!”

²³ Ana Yesu pisa pania, pisape “Nemloge ko na opisa sanene, osape sa in na nekilia nekila. Ana nepisa pan ko, visae ko na olelaga ga, okilia okila sur punu ga.”

²⁴ Ana ariman teras naĤane pio verakorena ga pa Yesu, tagi pania, pisape “Nemlelaga tekak ga, ana pe nemlelaga toroki re poli wa. Awis, ko na oiila inu vena kiau nalelagaena vim ve keviu laa sane wa.”

²⁵ Ana pogos naĤa Yesu pisu Ĥina na yeririna la apim moki manene la akovivi la, ana naga pis pa purkol naĤa teke e sisi yerm̄ene nene, pisape, “Ko yermare na kiliga poĤe, a na plapur, nepisa mesmes ga pan ko, omolue vetan naga nanagane, ana ve oimi re si loyuĤa e naga pogos tai.”

²⁶ Ana yermare nene ki viowa keviu, kila yepen sisi yerġene naġane miokamarmare pano-o piowa ga rui, ġisi na molue petania, pure pano. Ana yepen yar naġane malumu ga ġeke, sa ga naġa naga mare pa rui, yar la naġa asike apisu ke la apisa ke sa nini, asape “Ke, teras nene mare pa ġisi rui.” ²⁷ Ana Yesu tarar limana, tarlua suġalu, ana teras nene suġal ruru ga sike.

²⁸ Ana siraunia, Yesu pato si uġna, a e pogos nene, naġa naga taaga sike, kiena nalogena la apim, apiun tania, asape “?Sanape ne imimi na meġnelua ġele yermare petan teras nene?”

²⁹ Ana Yesu pisa pan la, pisape “Yermare la ne sanene, la aġarera paġisi, ana leniena ga kilia ġene plan la.”

Yesu pisawal sina ga kiena marena

Matiu 17:22-23; Luk 9:43-45

³⁰ Ana Yesu la apetan yo nene, apa akom ga likan yo na e Kalele, ana e pogos nene, Yesu pe sinenan re sape yeririna la akilia suri la naġa naga kila ke poli, a e ġena yo la naġa apa ke ea. ³¹ Na nene komin naġa pian ke kiena nalogena lala e pogos la nene, a naga pisa ġena ga ke pan la, sape “Lavisu ġena narui naġa aligan Narin Yeririna va e liman yar la naġa aweġar naga mare, siraunia e legiena na telu, ġisi na Ntewa tamalia sina.” ³² Ana kiena nalogena la pe amloge kilia re sur la naġa Yesu pisayu ke ne, ana la amaraun ġena naviun ruruen si tania.

“?Yar ane to metavan make yar taġena lala?”

Matiu 18:1-5; Luk 9:46-48

³³ Ana siraunia, pogos tai la apam atol si Kapeneam, apa loyuġna e yuġna tai, ana Yesu piun tan kiena nalogena lala, pisape “?Amiu na akawe amiun ke visena ya naġa e mrapa?”

³⁴ Ana la pe apisataġe re poli, komin naġa lala amiyal ke mrapa apami, apis ke pan la, asape lala ane naga to metavan make la, po miyuve make la ga. ³⁵ ġisi na Yesu totano, ana pio kiena lualima taaga pa lua apim lavis puna, pisa pan la, pisape “Visae amiu yar tai naga sinenan sape vim sumo, pona sinenan sape kiena kia to ġesia, pogaga, naga monar kila naga imi maro, to vatanon la make ga, naga monar vim ve yar nayuġaenen yuġaena kiena ne yar taġena la wa.”

³⁶ Ana Yesu pio narin sisi tai naġa suġna ga pimi puna, mligan su likan la, ana tararia, pisa pan la, pisape ³⁷ “Yar naġa kiena sitomena pato ga tanon inu, ana kekaran na kilaen wo van nisisi tai ne sanini, nanene sane naga kekaran inu ke pa narui. A yar naġa kekaran inu sanene, pe kekaran inu re ga ne po, kekaran ġena ke pa naga naġa mliganu nepimi.”

“Yar naġa pe pialuġar ita re poli, naga miila ita ke”

Matiu 18:6-9; Luk 9:49-50, 17:1-2

³⁸ Ana nalogena naġa Yoane pisa pa Yesu, pisape “Navianena, imimi mepisu yar tai, naġa naga ġene plan ke yermare lala, ġene plan la ke e kioġna kia. Ana yar nene na, pe mekilia re naga poli, naga pe ita yar re tai poli, ana imimi mepialuġaria.”

³⁹ Ana Yesu pisa pan la, pisape “Peraga, amiu ve avialuġar re naga. Visae yar tai sane pe lelaga, kila ke yuġaena keviu la e kiau kia, ana yoko naga taġatete si visanena kare kiau kia pogos tai. ⁴⁰ Yar naġa pe pialuġar ita re poli, miila ita ke ne. ⁴¹ Inu nepisa ke pe lelaga pan amiu, visae yar tai kilia sape amiu akus ke kia kiena ne Kristo e amiu, naga la piala na wii tai van amiu amunia, yar nene naga yoko taġatete kilalu kiena nalaena nowo naġa yoko tol sirau.”

Nataġaliena lala

⁴² Ana Yesu pisa ġena ga, pisape “A visae yar tai naga kila narin sisi tai ne sanini ve suġal ġarera re e inu, yar nene yoko tol nakoena tai ne ġarera laa sane taulu naġa sa aviar pupia kilavaru tai e kolmekina, akuan naga talilu e lowe memaena. ⁴³⁻⁴⁶ Visae lumoġna tai pona laġna tai naġa kila ko na pe osuġalu ġarera re si e in poli, popon

manene ga otelua vano. Visae ko na ote plan þelaga naviowaena vetan kioġna malena sanene, þisi na okilia ova loyuġna e malena, a sa ova loyuġna e malena naþa komþas nen lumoġna tai po laġna tai kovio pa rui, nanene naga pogaga ne. Ana piowa vaþisi visae yepeġna la asuġna ga woga ga, þisi na akuan ko ova e kapi naþa taþatete mare pogos tai. ⁴⁷ Ana visae kilamaraġna pona suri ya si tai e malena kioġna naþa kila ko pe osuġmalu ġarera re si e inu poli, popon manene ga osiplania. Þisi na okilia ova loyuġna e nasuþenena kiena ne Ntewa naþa sane narin sur tai nene kovio petan ko, na nene naga pogaga ne. Ana piowa ga vaþisi visae kilamaraġna luoka pona kioġna þelaga viowa tai suġna ga, þisi na narin sur ga la nene aure kioġna malena wetelu va e kapi e lele naloge viowaena, ⁴⁸ naþa kapi nene taþatete þisi pogos tai, sisu la na akakarlue ga yepeġna.

⁴⁹ “Sa naþa kururu sive naga kila kinanena ponos taþatete kona, yoko Ntewa naga ligan kapi e yar lala vena kekan plan kororaki la naþa e kiela malena lala. ⁵⁰ Ana tepisu ġmena sane kururu sive kila kata kinanena naga kiki, ana visae kana ġmareraena kovio, taþatete si kila kiena yuġnaena narui. Ana amiu monar ataġnan kururu sive kiena ne Ntewa yuġnae lue ga e amiu, vena kiamiu malena naga ve kona re, a vena kiamiu þelaga la kiki, naþa sane suġnarena sike amio amiu silaga.”

10

Yesu pisayu sanape naþa yaru mligan lua wona

Matiu 19:1-12; Luk 16:18

¹ Ana siraunia, Yesu mligan Kalele ana pa metava e lepas nae Yutea, kome wii nae Yortan lepas na vano. Ana þina lala apim ke sina ga puna e pogos nene, ana sa naþa naga kila ke silaga, pian la ke e sur la moki.

² Ana Varasi ġmena ga þasia asike e pogos nene, apimi puna ne Yesu, apisape akilali sina ga naga, la apiun naviunena tai pania. La apisape “?Kieta Navisaluaena pisa ya ne e lepas nen þelaga naþa visae yaru mligan lua wona? ?Ositom sanape, memes ga naþa yaru kilia kila sanene, pona pe memes re poli?”

³ Ana Yesu piuntaġne la, pisape “? Ana Yermarua Mosis pialua ya ne e kiena navisaluaena rui?”

⁴ Ana Varasi la apisape “Mosis pisawal navisaluaena tai naþa naga taġmania sape yaru kilia la luġmaki naliganluaena tai van wona, vena ligan lua.”

⁵ Ana Yesu pisataġne la, pisape “Lelaga, ana Mosis siri visena nene vanon ga naþa amiu þarimiu la ġmarera paþisi, suri nene kila naga taġmania sape akilia aligan plan womiu lala.

⁶ A siaria e nasiiena naga pe sa re nene poli, komin Visena Wa kiena ne Ntewa pisa sape ‘E purþesia, Ntewa sii yeririna, yerġmene a sira.’

⁷ Ana visena taþena si tai, naþa pisape

‘Vanon suri nene, þisi na yaru ligan arimana amio anena, naga va iakol amio wona, ⁸ ana lalua aimi ave taaga ga narui.’

“Nanene kila sane lalua ve ave lua re sina ga, aimi ave taaga ga narui. ⁹ Ana sur ya naþa Ntewa vilolaria pimi taaga, pe memes re naþa yaru kilapure si poli.”

¹⁰ Ana pogos naþa lala apa si loyuġna, kiena nalogena lala apiun sina ga tania e lepas nen visena la naþane. ¹¹ Ana Yesu pisa memes ga pan la, pisape “Visae yaru tai ligan lua wona, þisi na va ure si sira taþena, Ntewa pisu sane yaru nene naga taþa ke pa kolau rui, naga kila kare sira naþa pe wona nasumo. ¹² Ana visae sira tai ure matan wona na yerġmene, va pu yerġmene taþena, naga ġmena nene Ntewa pisu sane kolau.”

Yesu pisa ruru sisi lala

Matiu 19:13-15; Luk 18:15-17

¹³ Ana laþasia akus narila la apimi pu Yesu, vena naga ligan limana te la, ana nalogena la apisuia, apisi ġmarera pan yeririna la nene, apisalupar la. ¹⁴ Ana pogos naþa Yesu pisuia, pe kekaran re nena naþa kiena nalogena la amiyuġnaen sanene poli, naga pis pan la

pisape “Amiu ve avisaluþar re sisi la nene, ataþman la ga aim pun inu, vanon naþa sisi lala, la na sa ga yeririna la naþa asike loyuþna e nasuþenena kiena ne Ntewa. ¹⁵ In na nevisa ve lelaga van amiu, yar naþa sinenan ke sape va loyuþna e nasuþenena kiena ne Ntewa, naga monar kilia sane naga sa ga sisi kokan tai, naga taþatete kila sur tai vena kus nasuþenena kiena ne Ntewa e malena kiena.” ¹⁶ Ana Yesu kutarar sisi la nene e limana, mligan limana te þarila pisa ruru la.

Yaru mþee tai naþa kiena sur moki

Matiu 19:16; Luk 18:18-23

¹⁷ Ana e pogos naþa Yesu siar mial pa ke narui, yaru mþee tai kiriri pimi kinai tano puna, piun tania, pisape “?Navianena Nowo, in na monar nekila yuþnaena wo ya, naþa kila þisi na netol malena naþa ve uro re?”

¹⁸ Ana Yesu pisa pania, pisape “?Vanon ya ne opiun tan inu sanene, osape in na nepe Navianena Nowo? Pe yar re tai po poli, Ntewa ga naga taaga po. ¹⁹ Ana ko na okilia mþena kiena navisaluaena la naþa monar ologear la, naþa apisa ke asape, ve oweþmar re yaru mare, ve otaþa re kolau, ve ovinau re, ve ovisokan re, ve okilakewean re yaru, ko ova tanon arimoþna amio anoþna.”

²⁰ Ana yaru mþee nene pisa pania, pisape “Navianena, navisaluaena la naþa opisa ke ne, siar pogos naþa nepe sisi ke ga wa, nesuþna nemlarar make punu ga rui pimi tol nagane.”

²¹ Ana Yesu kira pisu mþa sane pano-o, kekaran naga vanon kiena visena nene paþisi, pisa pania, pisape “Sur taaga teke ga wa naþa ko na okila re poli wa. Ko ovano, owilwilin plan make kioþna sur la punu ga, owar kana kilavaru nena, ova oviovionia van yaru la naþa pe kiela sur re poli. Visae ko okila sanene, þisi na kioþna suri wo lala ve moki vaþisi ma e peni. Ko, ova okila, siraunia oimi otavevenu.”

²² Ana pogos naþa yaru mþee nene mloge visena nene, kila naga milan karea, sinena piowa paþisi, vanon naþa naga kiena sur la moki manene laa. Ana naga pure matan Yesu.

Yaru naþa kiena sur moki, naga mþarera laa naþa va loyuþna e nasuþenena kiena ne Ntewa

Matiu 19:23-30; Luk 18:24-30

²³ Ana Yesu kira pisuveve kiena nalogena lala, pisa pan la, pisape “!Nevisa ruru van amiu, visae yaru tai naþa kiena suri moki, sinenan pisape va loyuþna e nasuþenena kiena ne Ntewa, suri nene na mþarera towe mþa naþa!” ²⁴ Ana kiena nalogena lala amilan visena kiena ne Yesu nene paþisi, naga pisa si pan la, pisape “Pe lelaga naruu la, navaen loyuþna e nasuþenena kiena ne Ntewa naga mþarera na mþarera. ²⁵ Ee, nevisa van amiu, naþa kamel tai naga va warpoyo e pulus nen nitil, nanene naga mþarera vaþisi ne, ana visae yaru tai naþa kiena suri la moki sinenan sape va loyuþna e nasuþenena kiena ne Ntewa, naga mþarera laa na wa.”

²⁶ Ana pogos naþa nalogena la amloge visena nene, amilan paþisi, apisape “?Suwala, ana visae ve sanene, þisi na ane kilia tol namalena nene?”

²⁷ Ana Yesu kirava pisu la, pisape “Ee, lelaga naþa yaru taþatete tamalia yaru, ana Ntewa ga kilia kila make suri punu ga.”

²⁸ Ana Pita sinenan sape vis, pisape “?Ana sanapen imimi? Imimi memligan make kiamimi sur la rui, ana metaveve ko.”

²⁹ Ana Yesu pisa pan la, pisape “In na nepisa ke pe lelaga pan amiu, yaru a naþa visae ligan mþana uþna, pona wenla pona vinena, anena pona arimana, narina pona kiena porotano, ana visae naga ligan sur la nene vanon ga inu, a vanon kiau lologena wo, ³⁰ þisi na naga warmarana sina ga kiena suri la naþa mligania, kilia tol sina ga ve ponotia tai. E yomerava nini, yoko tol sina mþana uþna la, wenla la, amio vinena la, anena la amio narina la, a porotano la, a amio sur la nene, yoko tol pog mþarera ve moki, naþa yaru la sinela kar mþena ga. Ana metavan sur taþena la nene, e pogos naþa imi, yoko tol mþena malena naþa taþatete þisi. ³¹ Ana yaru la moki liu naþa asike metava, þisi na avito tano, ana yaru la naþa asike tano, þisi na la ava metava.”

Yesu pisawal kiena marena yam telu narui

Matiu 20:17-19; Luk 18:31-34

³² Ana Yesu lala amlulu ke mrapa, apa ke metava ma Yerusalem narui. Ana Yesu naga sumon ke kiena nalogena la, la sinela kurkur paḡisi naḡa apisu naga sumon la apa Yerusalem, komin la akilia ke asape yeririna nae yo nene la sinela kari ke paḡisi. Ana li taḡena la naḡa asurau ke ga wa, la ḡena asuḡna amarau lili ḡaga. A naga piolua ga kiena lualima taaga pa lua apimi puna, pisawal si pan la sanape naḡa ḡisi na akila viowa vania gar Yerusalem. ³³ Naga pisayu pan la, pisape “Amiu ayagoga ruruia. Nanagane ita tepa ke Yerusalem narui, naḡa ve ve piavi re, ḡisi na aligan Narina Yeririna e limana ne yerkawa lala kiena ne yaru wa lala, amio navianena navisaluaena ḡena lala, ana ḡisi na la nene aliḡere naga avisave ḡisi na monar mare. Ana siraunia, aligan naga e limana ne la naḡa pe ape le Yu re poli, ³⁴ naḡa ḡisi na la nene akirakirai viowa vania, avilasirkon marana, ḡisi na akoa naga vano-o aweḡaria. Ana e kana legiena natelu, ḡisi na mali sina.”

Semes amio Yoane, apiun sur tai tan Yesu

Matiu 20:20-23

³⁵ Ana amiyal laa apa sane, ḡisi na narina ne Sepeti lalua nene Semes amio Yoane, apimi puna ne Yesu, apiun petania, apisape “Navianena, imimi lua mesape sur ya naḡa meviun tan ko nagane, mesape otaḡan van imimi.”

³⁶ Ana Yesu pisataḡe la, pisape “?Ana amiu lua sinemiun asape in na nekila ya ne van amiu?”

³⁷ Apisataḡea, asape “Imimi lua sinemimin mesape otaḡan sanini: pogos naḡa ko na ovim ove ḡarin suḡe na yomerava nini, ḡisi na mekilia metotano memio ko e kioḡa yo wa metava lavisin ko, tai te lepas na ḡamarua, a tai e lepas na ḡaḡeli.”

³⁸ Ana Yesu pisataḡe la, pisape “Amiu pe akilia re sur ne apiun ke ne poli. ?Sanape, amiu lua nene asitom asape atorokin naḡa tomunpae e piala naloge viowaena nene naḡa in na monar nemun ea? ?Ana amiu asitom ke asape amiu akilia atol nakeena e wii naḡa akee in ea?”

³⁹ Lalua apisa pania, apisape “Ee, imimi lua metoroki.”

Ana Yesu pisa pan la, pisape “Ee, lelaga naḡa ḡisi na amiu amun ḡena ga e ḡau piala naloge viowaena nene, ana pe lelaga naḡa atol nakeena e wii nakeena naḡa akeenu ea, ⁴⁰ ana sur nene naḡa amiu lua apiunia, asape atotano amio inu e lepasneu luwoka, sur nene naga pe kiau re naḡa nela van amiu poli. Yo la ne sanene, kiena ga la naḡa Ata kila ruru pe kiela, pisaar ḡisi rui pisape ḡisi na atotano ea.”

Narin Yeririna pimin vena yuḡae kiena ne yeririna lala

Matiu 20:24-28

⁴¹ Ana pogos naḡa nalogena taḡena la lualima nene amloge sur nene, naḡa wenla lalua nene Semes amio Yoane apiunia, la sinela kar lalua. ⁴² Ana Yesu pio la apimi puna vena naga visi van la, ana pisape “Amiu akilia ruru ḡelaga kiena ne yaru la naḡa pe amlelaga re e Ntewa poli. Tepisu sa naḡa suḡe lala amio yerkawa lala na yomerava, la sinelan asape aḡareran yaru taḡena lala asu vatanon la silaga.

⁴³⁻⁴⁴ “Ana amiu kiau nalogena lala, kiamiu ḡelaga monar ve ve sa re nene. Visae amiu yar tai sinenan sape imi ve yerkawa tai pona ve kiamiu nasumonena tai, kana mrapa nena sanini: yaru nene monar imi ve sa ga yaru na yuḡae kiamiuena tai. ⁴⁵ Narina Yeririna naga kila sanene ḡisi rui, naḡa pe pimin re vena yar la aiila naga poli, naga pimin naiilalaena, a vena taḡan kiena malena nawulplanen yeririna la ve moki.”

Yesu taḡa ruru kilamara kata tai

Luk 18:35-43

⁴⁶ E pogos nene, Yesu amio kiena nalogena lala apim asike garu Seriko, ana pogos naḡa amligan yo e pulkumali nene apano, ana yeririna la moki paḡisi ataveve la. Pog naḡa amiyal ke apano, ana kilamara kata tai toḡa tano e isinen mrapplepa. Yar nene, arimana

kiena kia Timeas, ana apio kia kiena ne narina asape P̄atimeas. P̄atimeas nene, totano e mrapplepa legiena punu ga, pion ke pan yar lala sape akuan narin kururu varu vania vena iilaena kiena malena.

⁴⁷ Ana pogos naḗa mloge apisape Yesu nae Nasaret mial ke e mrapplepa pimi, ḗisi na naga pion ke, sape “!Yesu-o, ko lus kiena ne Tepet, nesape ko sineḗa ye inu wa!”

⁴⁸ Ana yaru taḗena la apisin sinemimien pania, asape “Ee, ve oḗaaga re.”

Ana naga pion manene la pavini, sape “!Suḗe-o, ko lus kiena ne Tepet, awis, nesape sineḗa ye inu.”

⁴⁹ Ana Yesu panar suḗalu su mrapa e yo nene, pis pan yeririna lala, pisape avio yar nene vim lavis puna, ana lala apa apisa pan kilamara kata naḗane, asape “Welu.” Ana naga sape “P̄asa.” Ana lala apisape “Ve ologe re viowa. Yesu naḗane sape oim puna wa. Ko osuḗalu, ita.” ⁵⁰ Ana yaru nene kuanlua ḗana kulkota, suḗal veraga ga, pimi puna.

⁵¹ Ana Yesu piun tania, pisape “?Ko na sinoḗan osape nekila ya ne van ko?”

Ana naga pisataḗea, sape “Suḗe, awis, in na sineun nesape kilamarau la imi wo, vena nekilia nekirava.”

⁵² Ana Yesu pisa pania, pisape “Pogaga, ko na okilia ova si uḗa moḗa. Kioḗa nalelagaena ga kila ko opim omloge po narui.” Ana naga pisu ruru ke ga suria e pogos nene, ana mial taveve Yesu e mrapa apano.

11

Yesu pimi tol yo naḗa Yerusalem

Matiu 21:1-11; Luk 19:28-40; Yoane 12:12-19

¹ Nanagane, Yesu lala apam lavisin Yerusalem narui, ana la aḗalivi e narin pulkumali lalua sumo, kiela kia Petpas amio Petani, naḗa sike e yepas nen kunus nene naḗa la apio asape Kunus Na Purolip Lala. Ana Yesu miila kiena nalogena la lua, pisape ² “Amiu lua ava e pulkumali na gare, a memes ga e pogos naḗa ava loyuḗa ea, ḗisi na avisu narin togki tai, naḗa aḗatear teke na, pe yar tai totanoli re e wosia poli wa. Ana aluḗarlua aure imi pun inu e nini. ³ Ana visae yar tai vis van amiu vanonia, viunia visave “?Amiu akila sanene vanon ya?,” ḗisi na avisa ga vania, avisave ‘Suḗe na sinenan sur mal nini vena wa kila kiena yuḗaena tai wa, ḗisi na naga ligan wasuḗe sina ve ve piavi re.’ ”

⁴ Ana ḗisi na nalogena lua nene apano, aḗal narin togki naḗane, apiaria teke na sike ga vanua e mratava na yuḗa tai lavisin ga mrapplepa. Pogos naḗa asape aluḗarlua kana kilika, ⁵ ana lala naḗa asike e yo nene apiunia, asape “?Amiu akila ke ya ne, amluḗarlua ke kana kilika na ya ne?”

⁶ Ana la apisa pan la visena la naḗa Yesu pisa ruru pan la, naḗa sane avisa van yar la nene, ana la ataḗan asape akilia aure togki vano pogaga. ⁷ ḗisi na lalua aḗere togki nene pimi, aḗatetae ḗala kulkota lala e wos nena, ana Yesu pa totano metava ea. ⁸ Ana yar la moki liu naḗa aḗatetae ḗala kulkota lala suvileviles nen mrapplepa, ana yaru laḗasia apa ate ḗaḗela lala pitomi aḗatetae ḗena ga, vena togki yal ea. Sanene narui, akila sa naḗa la apatanon Yesu sa naḗa pe pupia ḗarin suḗe tai. ⁹ Ana la amial ke apano vena ava loyuḗa Yerusalem, ana ḗina na yeririna la naḗa asumon Yesu, amio la naḗa asiraunia, asuḗa apiovion manene sanini, apisape “!A ke suwala, pona po! !Teyeluar naga!

!Ntewa na mava, ko ovisa ruru naga nene naḗa pimi e kioḗa kia!

¹⁰ !Ita tekekanan paḗisi nasuḗenena kiena ne kieta yermarua Tepet naḗa pimi ke! !Amiu nae mava peni, amiu ḗena ga ayeluaria!”

¹¹ Ana Yesu pa loyuḗa Yerusalem, a pa tol Yuḗa Wa ḗana ne Ntewa. Ana pa loyuḗa, pisuveve yo lala, a sur la punu ga naḗa amiyuḗaen ke ea, pano-o mrae naga pato ke tano narui, naga pure kiena lualima taaga pa lua, apetan si pupia kumali naḗani, apa amono gar Petani.

Purlaki tai naḗa pe tau re poli wa

Matiu 21:18-19

¹² Ana yemlagi kolulagi la amligan si ma Petani aņasuþe sina vena ava Yerusalem, ana Yesu mloge sane viso karia. ¹³ Naga kira pa e is nen mrapplepa, mal purpik tai sike, ana naga mial pa lavisinia vena war mras laþasia. Ana pogos naþa pimi pisuia, purpik nene mas ga moki, ana pe mras su re e poli, komin pe kana pog re poli wa. ¹⁴ Ana Yesu pisa pan purpik nene, pisape “Ko ove owar re si mrasnoma pogos tai vena yar la akilia akania.” Ana kiena nalogena mena la amloge ke naþa naga pisalele kare laki na sanene.

Yesu mene plan la naþa asuma aþiliwilin ke suri e Yuna Wa Mana ne Ntewa

Matiu 21:12-17; Luk 19:45-48; Yoane 2:13-22

¹⁵ Ana Yesu la apa atol si Yerusalem narui, lala apa sina ga loyuna e Yuna Wa mana ne Ntewa. Ana e pogos nene naga pisu sane yar la moki liu naþa asuma e yepas nen yuna nene, la asuma akila ke ga yunaena natauluen kilavaru lala ea, ana yar la mok liu naþa apul ke sur la naþa aþiliwilin ke ne. Ana naga pe kekaran re nenaga, pa mene plan la, kawepu narin varvara kiena ne yar nakeueen varu sa le Rom la pimi ve sa le Yu la, nakilaena nalaena. A naga koantetan lele na totanoena kiena ne la naþa apuliwilin ke kupa nakuþaþaena lala. ¹⁶ A naga pisawo mena ga yar la naþa sinelan ke asape awar kiela sur na yunaena la ayal akom likan yepa na Yuna Wa nene.

¹⁷ Ana naga pisa pian la, pisape “?Sanape, amiu pe akilia re asape Ntewa pisa e kiena Visena Wa, sape

‘Þisi na la avisa mau Yuna Wa avisave naga yuna nalotena kiena ne yolai punu ga e yomarava wetelu?’ *Ais 56:7*

‘Ana nanagane na amiu akepu pimi sa ga ponovi mana yaru na vinauena la narui.’ ” *Ser 7:11*

¹⁸ Ana pe piavi re nena, yerkawa lala kiena ne yaru wa lala, amio navianena na navisaluaena lala, amloge sur la naþa Yesu kila e Yuna Wa mana ne Ntewa, ana la sinela kar paþisi, asape akila suriania. Ana amaraun Yesu, pe akila re si poli, vanon apisu kilale naþa yeririna la akekaran naga paþisi, asuma amilan ke kiena navianena wo lala.

¹⁹ Ana pogos naþa mrae pato pa tano narui, Yesu la apetan ke sina ga yo naþa Yerusalem.

Purpik naþa pe tau re poli, mare make ga

Matiu 21:20-22

²⁰ Ana kolulagi, la aņasuþe apa ke si Yerusalem, ana apisu purpik naþane, mas la miaiai make nena rui. ²¹ Ana Pita sitomal si visena kiena ne Yesu, pisa pania, sape “Suþe, opisu ke ne! Purpik naþa opisanena kare nakoneva, nagane mare rui.”

²² Ana Yesu pisatanea, pisa pan la, pisape “Amiu punu ga monar aviawa marera e Ntewa. ²³ In na nepisa ke pe lelaga pan amiu, visae yar tai naþa pe kiena sitomena peve lua re poli, a mlelaga marera, ana visae suri ya naþa naga visa, monar ve sanene narui. Visae naga vis va pupia kunus nene, visave ‘Osumalu otove, oula ova e sive,’ þisi na monar ve sa ga nene. ²⁴ Nane nepisa pan amiu, ana sur ya ne ko na oviunia e kiona leniena, visae olelaga marera sane sur nene pe kiona pa rui, þisi na monar ve sa ga nene narui. ²⁵⁻²⁶ Ana e pogos punu ga naþa visae alen, amiu monar asitom ruru mena ga, visae kilapurpu tai teke e ko amio yar taþena tai, monar oviewo sumo wa, þisi na okilia osumalu okila kiona leniena van Ntewa. Visae okila ve sa nene, yoko arimata nae ma e peni, naga mena sitomal ko, viewo kon kiona mlamulena viowa lala.”

Nasumonon le Israel lala sinelan asape avisaluþar Yesu

Matiu 11:23-27; Luk 20:1-8

²⁷ Ana Yesu la aņasuþe si apam atol Yerusalem, ana apa si loyuna e kove na Yuna Wa mana ne Ntewa. Ana pogos naþa amialoro ke loyuna, yerkawa kiena ne yaru wa lala, amio navianena navisaluaena, a nasumonena lala kiena ne le Yu la, apimi puna, ²⁸ apiun tania, asape “Ko osuna okila ke sur la ne sanene e yo nini e kia kiena ne ai? Ana a si na pisa pan ko sape okila ve sanene?”

²⁹ Ana Yesu pisatañe la, pisape “Pogaga, ana inu ñena nesape neviun naviunena tai van amiu wa. Visae amiu avisatañe ruru kiau naviunena nene wo, ñisi na nekilia nevisawal van amiu sanape naña nekilia nekila ve sanene. ³⁰ Ana kiau naviunena naga sanini narui, sape: ?Nakeena naña Yoane naga kilamare ga nanua ne e yaru lala, naga pe sur tai naña Ntewa pisa pania sape naga monar kila, pona yaru ga la apisa pania? Amiu avisatañeli kiau naviunena nene.”

³¹ Ana naviunena nene kiena ne Yesu kila la agorua la narui, naña asuñña apisa asape “?Ñisi na ita tevisa sanape na vania? !Tevisuaruruia! Visae ita tevisa tevisave nakeena nene Ntewa naga pisa pa Yoane, ñisi na yaru nene viun si vetan ita, visave vanon ya ne ita pe temlelaga re e Yoane poli. ³² Ana ita tañatete si tevisa tevisave nakeena kiena Yoane nene pe sitomena kiena yeririna ga lala, visae peraga, la sinela kar ita.” Yar keviu la amaraun visaena visen nene, komin akilia asape yeririna la nene amlelaga ke po ñarera e Yoane ñisi rui, asape naga pe navisawalena na lelaga tai kiena ne Ntewa.

³³ Ana kiela sitomena la ne sanene narui, kila apisatañe Yesu sa ga nini, apisape “Imimi memninue ga.”

Ñisi na Yesu pisa pan la, pisape “Visae sanene, inu ñena ga, tañatete nevisa van amiu nevisave ane pisa pan inu sape nekila yuññaena la ne sanene.”

12

Ñakaiwa na li viowa la naña apisuar lokilkerep tai

Matiu 21:33-46; Luk 20:9-19

¹ Ana pogos naña Yesu suñña pian la ke, naga pisayu ke ñakaiwa pan la. Ñakaiwa tai na pisa sa nini, pisayu yerkawa tai, amio kiena lokilkerep. Yaru nene kila ruru kiena yo nene, kila kove ñarera tai telivi piora ea, a kila kana lele navieplanen was nen kerep, kila ñena kana lele tai naña pa metava naña yaru kilia wiyu va se ea, vena kiravawoen lokilkerep nene.

“Ana e pogos tai, yerkawa nene sinenan sape yaloro re va e purvanua tañena tai, ñisi na mligan kana lokilkerep nene e limana ne yaru lañasia, vena ayuññaena, aul vania.

² “Ana yerkawa nene pa suñña gare pano-o, ñisi na pisu kilale sane nanagane na pogos na mrakerep la marua narui. Ana mligan kiena yaru tai pa si puna ne la naña asike e kana lokilkerep nene vena war kiena kilavaru na mrakerep kompañia, naña la nene monar aul vania. ³ Ana pogos naña kiena yaru nene pano, ana yaru tañena la nene aña kare naga, añaenelua sina naga pano, pe mla re sur tai poli.

⁴ “Ana yerkawa nene miila si kiena yaru tañena pano, ana la naña aña, ñar kuruta e ñarina, akila piowa pan naga pañisi, añaenelua pa sina. ⁵ Ñisi na naga miila ke sina ga tañena tai, ana añaemoñar naga mare, siraunia, naga miila kiena yeririna moki apano, asula añaemoñar la ñena ga.

⁶ “Ana yerkawa nene pisu sane yar taaga sike narui, pe narina wawa naña naga kekaran pañisi, ana naga sitomveve pano-o, pisape ‘In na monar neligan ga naruu vano, vena monar avatanon naga.’

⁷ “Ana pogos naña yar viowa la nene apisu narina ne yerkawa nene pimi, la asuñña apismumun pan la, asape ‘Narina ne ke yerkawa naña narui. Yaru ke na nene narui, naña visae yerkawa kovio, ñisi na kus porotano nene sane ve kiena lalimana. Popon ita toweñar ñena naga mare, ana ita ga tekilia tokus porotano nene ve kieta.’ ⁸ Ana sanene narui atarar naga, añaemaria, akovenlua naga petan lokilkerep pa vanua.”

⁹ Ana Yesu piun tan la, pisape “?Pogos naña yerkawa nene yoko imi sina, ñisi na kila sanapen la naña amiyuñae ke e kiena yo nene? Yaru viowa la nene, ñisi na yerkawa nene imi weñar la, monar amare e ñelaga ñarera tai, siraunia naga ligand kiena lokilkerep e limana ne yaru wo tañena la ñasia.”

¹⁰ Ana Yesu pisa pan la, pisape “Visena tai teke e Visena Wa kiena ne Ntewa, pisa sanini pisape

'Kilavaru nene, yaru na yuṁaenen yuṁa lala apisa asape piowa ga, akoven rui, ana nanagane na, kilavaru nene pimi pe kilavaru wo na mrapun yuṁa, ve nauararen yuṁa ṁarera.

¹¹ *Ana sur nene, Ntewa ga kila, a mepisuia na po na po.' "* *Yauena 118:22,23*
 “?Ana sanape, visena nene akilia pa rui, apuloli ṁa pogos tai, pona peraga yo?”

¹² Ana pogos naṁa Yesu pisa pae ṁakaiwa nene, yerkawa lala akilia naṁa naga suṁa pisa ke ga visena la nene vanon kiela ṁelaga lala, ana sinela kar naga, kila narui sinelan asape auarar naga, ṁisi narui na apisu sane yar la mokliu, amaraun la, amligan naga ṁeke na aṁpure apano.

Sur kiena ne Ntewa, a sur kiena ne Sisa

Matiu 22:15-22; Luk 20:20-26

¹³ Ana yar keviu lala apa apisuveve sur nene, lala amligan Varasi laṁas apimi, amio ṁena ga ṁasia e ṁegas kiena ne Erot, naṁa apiunli naviunena ṁarera laṁasia ve nataṁalien Yesu ea, naṁa sane naga visataṁe ṁele ga. ¹⁴ Ana apimi puna ne Yesu, akila kotalia e visena wo lala, apisa asape “Navianena, imimi mekilia ko na ope lelaga kemua. Ko ope omaraun re yar tai poli, sane yar keviu, pona yar naṁa to metava, po yar na sanape, ana ko osuṁa apisalua ke mrapa mesmes kiena ne Ntewa pan la punu ga. Ana mesape meviunli tan ko, mesape kieta navisaluaena pisa sanape? ?Pisape mesmes ga naṁa ita le Yu toul takis va Sisa, naṁa pe ṁarin suṁe kiena ne le Rom lala, pona pe mesmes re sanene poli? ¹⁵ ?Pogaga naṁa toul takis la nene po peraga?”

Ana Yesu kilia ṁaga naṁa la apiun kotalia ga, sinelan ke asape akila kare naga, ana naga pis pan la, pisape “?Amiu asuṁa ataṁalinu ke sanene vanon ya? Pogaga, amiu ala kilavaru tai imi vena nevisuvevelia.”

¹⁶ Ana amla tai pimi, akian pania, Yesu piun tan la, pisape “Ninun marana a ne teke e narin kilavaru nene? ?Ana kia na asiri teke ea, ane kiena kia nene?”

La apisape “Marana ne ṁarin Suṁe Sisa nene, a kiena kia ṁena ga.”

¹⁷ Ana pisa pan la, pisape “Pogaga, sur naṁa kiena ne Sisa, monar ala va Sisa, a suri naṁa kiena ne Ntewa, monar ala va Ntewa.” Ana pogos naṁa amloge navisataṁeena nene, amilan kare paṁisi.

La naṁa amare, ṁisi na amal sina

Matiu 22:23-33; Luk 20:27-40

¹⁸ Ana siraunia, le Satusi laṁasia apimi puna ne Yesu, sinelan asape aviunli suri tai tania e lepas na sur tai naṁa la amlelaga ṁarera ea, asape sa yaru la naṁa amare, taṁatete amal sina e legiena maro. Vanon suri ne nanene apiun tan Yesu sanini, asape ¹⁹ “Navianena, sinemimin mesape meviunli tan ko sanape e visena tai naṁa yermarua Mosis siri pan ita nanua sumo. Naga pisa pisape visae yaru tai, mare tan wona naṁa sane pe narila re tai poli wa, ṁisi na wenla yaru nene monar talopa sina amio letano nene. Ana visae sira nene war sisi, akilia asikia e kia kiena ne arimana naṁa mare pa rui, vena kia nene mali ṁaga. ²⁰ Ana e pogos tai, wenla la olua. Kiela ṁearu talopa, ana naga mare petan wona, pe narila re tai poli wa. ²¹ Ana wenla nasiraunia ṁereleinia pe wona, ṁisi na naga ṁena ga mare petania, pe narila re tai poli, a wenla na telu kila ṁena ga sanene, ²² pano-o tol wenla na olua, la punu ga amarmare tan sira naṁa sanene. A siraun wona la punu ga naṁa amarmare, sira ṁena ga nene mare. ²³ Ana ko ovisali sur nene: ?E legiena maro, pogos naṁa apisa ke asape ṁisi na yaru la amal sina, ṁisi na sira nene na ve wona ai, vanon naṁa naga talopa amio wenla la olua nene ṁisi rui?”

²⁴ Ana Yesu pisape “Peraga, kiamiu sitomena pa pe wowe laa. ?Pona kam na pe akilia re ya ne kila amiu ape wowe ke sanene poli yo? Vanon pe akilia re ya naṁa Visena Wa kiena ne Ntewa pisa ke poli, a pe akilia re ṁena ya naṁa kiena naṁareraena keviu kilia kila poli. ²⁵ Pogos naṁa yaru la amal sina, ṁisi na lala ave sa ga navisi kiena ne Ntewa lala ma e peni narui, ana ṁisi na ve akila re si suri nene naṁa natalopaena. ²⁶ A e lepas na malena si nene, kana visena tai teke e tusi naṁa Mosis naga siria, naṁa pisayu ke narin laki tai naṁa kapi kekania, naṁa Ntewa pisa pa Mosis sanini, pisape

'Epraam, Aisak, a Sekop, in na nepe kiela Ntewa.'

"?Pona amiu na pe apuloli re visena nene pogos tai poli yo, ²⁷ ana in na nevisakilale van amiu vena kila ruru kiamiu sitomena lala. La telu nene la amare e yomarava nini nakonua rui, ana kas moki na moki þaro pa rui, ana Ntewa pisa ga visena nini na wa, naþa sape naga pe kiela Ntewa. Sanene na kiena visena naga kana kinasia sape la telu nene la amare e yomarava, ana la amal ke ma puna na wa. Ntewa pe sinenan re sape kiena yeririna lala la ave yaru la naþa amare poli, ana naga sinenan sape naga ve Ntewa kiena ne yeririna la naþa amali."

Navisaluaena na keviu lua
Matiu 22:34-40; Luk 10:25-28

²⁸ Ana navianena na visaluaena tai pimi suñalu sike e pogos nene, ana miyagogan ke le Satusi lala ataþali ke Yesu, ana Yesu taulu la ga e kiena navisatañeena wo lala. Ana navianena nene, naga sitom sape naga towe lai viun va Yesu, pisape "?E kieta navisaluaena lala, nape naþa keviu, miyuve taþena lala?"

²⁹ Ana Yesu pisa pania, sape "Visena Wa pisa sanini, pisape 'Yeririna nae Israel, amiu ayagoga.

Ntewa na mava, kieta Ntewa, naga taaga pe Ntewa na mava.

³⁰ Ntewa na Mava naþa pe kioñna Ntewa, ko na monar sineñna sia e losineñna wetelu, e kioñna malena wetelu, e kioñna sitomena wetelu, a e kioñna puriukawaena wetelu.'

³¹ "Nanene naga pe navisaluaena þesia, a nalua nena naga pisa sanini, pisape 'Ko monar sineñna si nalavis puñna lala, okila wo van la, sa ga naþa ko sineñna si ko ke ga.' "Ana pe navisaluaena re si tai poli naþa naga keviu taulu lalua nene."

³² Þisi na navianena navisaluaena pisatañe pania, pisape "Lelaga ga navianena, ko opisa mesmesu ga. Ko opisa pe lelaga ga, osape yar keviu naga taaga ga, pe tai re si poli. ³³ Ana ko opis pe lelaga ñena ga osape monar sineu si naga e sineu wetelu, e kiau nakiliaena wetelu, amio kiau puriukawaena wetelu, ana monar sineu si la naþa asike lavis pun inu, sa ga naþa sineu si in ke ga. Pe lelaga ga ne, e nakiravaena kiena ne Ntewa, visae nekila ve sa nene, nanene naga to laa metava, po manene laa taulu make nakuþaþaena lala naþa netaþa ke e ñana Yuñna Wa."

³⁴ Ana Yesu mloge kiena navisatañeena naga po, pe manmarua po, ana pisa pania, pisape "In na nevisa van ko, sane ko ko na osike pa lavisu rui, ko na yoko þisi na ova loyuñna e nasuþenena kiena ne Ntewa na wa."

Ana siraun e pogos nene, þisi na pe yar tai taþali re si Yesu e naviunena la poli.

Navisaarena naga pe Ntewa kiena ne yermarua Tepet
Matiu 22:41-46; Luk 20:41-44

³⁵ Ana siraunia, Yesu naga pian ke yeririna lala e Yuñna Wa ñana ne Ntewa, ana naga towelai piun naviunena tai pan la. Naga pisape "?Nekilia ñaga naþa kiamiu navianena navisaluaena lala apian amiu ñaga, ana nesape neviunlia, komin ya naþa apisa ke asape Navisaarena naga monar ñalivi e lus kiena ne yermarua Tepet nene naþa naga pe þarin suþe sumo? ³⁶ Nepiun ke sa nene, komin nanua sumo, Ninuna Wa pimi e Tepet, kila naga piþi, pisape

'Ntewa na Mava pisa pa kiau Suþe, pisape

"Ko ototano e kiau lepas na þamarua, otoñate ña vano-o, þisi na neligan kioñna nasinekar lala aimi ve sa narin takue na vilanvanen laña ea." ' Yauena 110:1

³⁷ "E lele nene tepisu naþa Tepet suñna pio ke Navisaarena nene sape pe kiena Suþe rui. ?Ana vanon naþa Tepet pisa sanene, a sanapen naþa amiu apisa ke asape Navisaarena nene naga molue ga e Tepet, ana naga pe kiena lus ga tai?"

Ana pupia þina naþa asike e pogos nene, lala sinelan manene navianena kiena Yesu la ne sanene, la akekaran manene paþisi.

Yesu pisi m̃arera paḥisi pan nasumonena lala nalotena

Matiu 23:1-36; Luk 20:45-47

³⁸ Ana e pogos nene naḥa Yesu naga pian la ke, pian lan la ke m̃ena ga e ḥelaga na yeluarlaena kiena ne kiela nasumonena lala. Naga pisape “Amiu avisuar amiu e navianena navisaluaena lala. Lala aplave ke paḥisi e m̃ala kulkota piayavi lala, a pogos naḥa visae la ayaloro e lele na wilwilinena, sinelan asape yaru lala monar avatanon la, a avio ruru la avisave ‘!Navianena, pokolulagi!’ ³⁹ A e pogos na ḥaḥagena lala, a loyuḥa e nalotena m̃ena ga lala, la sinelan naḥa silaga asape atotano ga e lelen yerkawa lala. Amiu apisu kilale la ke narui, ne? ⁴⁰ Ana lala asuḥa aḥure piavin ke kiela leniena la paḥisi, ana apisokani ke ga ne, vanon naḥa e ke e pogos nene, lala asuḥa akila kotalia ke letano la, vena avinaun kiela suri lala. Ana vanon suri ne nanene, ḥisi na kiela nakoena m̃arera re laa sane.”

Letano tai mla kiena kururu varu pan Ntewa

Luk 21:1-4

⁴¹ Ana siraunia, Yesu naga pa laa lavisin yo naḥa akuan ke varu ea e Yuḥa Wa nene, ana kira pisulili ke yar lala naḥa akuwakuan ke kiela nalaena lala. Naga pisu yar la moki naḥa kiela sur la mokliu, aḥar kiela nalaena kerkeviu la pimi, akuwania. ⁴² Ana ḥisi na pisu m̃ena sira marua tai pimi, naga letano tai, pe kiena sur re poli. Ana naga mla narin kururu varu lua pimi, mla pan Ntewa. ⁴³ ḥisi na Yesu pio kiena nalogena lala vena aim puna, naga pis pan la, pisape “?Amiu apisu ke sira marua nene, naḥa kuan narin varu lua ga nene? In na nevisa ve lelaga van amiu, naga mla keviu taulu make nalaena punu ga naḥa yar la naḥa kiela sur la moki amlavia. ⁴⁴ Lala nene, kiela varu keviu paḥisi, ana amla ga komḥas tekak ga pano, ana letano nene, narin varu naḥa naga mlararia vena iilaena kiena malena, mla punu ga pan Ntewa.”

13

Yesu pisawal naḥa ḥisi na awe plan Yuḥa Wa M̃ana ne Ntewa

Matiu 24:1-2; Luk 21:5-6

¹ Ana Yesu molue e Yuḥa Wa m̃ana ne Ntewa, ana pogos naḥa naga suḥa mial pa ke, kiena nalogena lala tai kilologia pupia yuḥa lala na Yuḥa Wa nene, pisa sape “!Navianena, ovisuia! !Yuḥa la nene amio kana kilavaru lala apo paḥisi wa!”

² Ana Yesu pisa pania, pisape “?Opisu ke pupia yuḥa la nene? Yuḥa la nene, ḥisi na taḥatete si kana kilavaru ne tai naḥa toḥa ga towawa ruru teke e lelana, komin ḥisi na yar laḥas aimi, awe plan make nena yuḥa la nene vano.”

Naloge viowaena monar imi

Matiu 24:3-14; Luk 21:7-19

³ La amial sanene, apim e Kunus Na Purolip lala, naḥa kira pisu ke Yuḥa Wa, ana Yesu totano e yo nene. A pogos naḥa pe yaru taḥena la asu re poli, kiena nalogena la vari apimi puna, Pita, Semes, Yoane amio Antru. Ana apiun tania, asape ⁴ “?ḥisi na awe plan Yuḥa Wa nene pogwai, a kile ya ne yoko kila sur la nene vim kakate?”

⁵ Ana Yesu pisataḥe la narui, pisape “Popon amiu avisuar ruru amiu, vena ve yaru imi visa kotalia amiu re, ⁶ vanon naḥa ḥisi na yaru la ve moki naḥa ala kiau kia, ana aimi avisave ‘In na nepe Navisaarena ḥa,’ ana ḥisi na aure yaru la ve moki ava ave wowe. ⁷ Ana visae e pogos nene, aloge m̃aagena na mara pimi ke lavisi, pona alogon pupia mara la naḥa sike perina, ana ve sinemiu kurkur manene re. Suri la nene monar imi kakate sumo, ana nanene na pe pe legien maro re poli na wa. ⁸ A ḥarin suḥe lala, yoko akila mara amio ḥarin suḥe taḥena lala, a purvanua lala yoko asuḥalu akawela amio purvanua taḥena lala. A yo kar ga e yomarava nini, yoko yemninu vaḥisi, a pupia viso m̃ena, ana suri la nene, pe pe legiena maro re nene poli na wa. Ana suri la nene sa ga sira naḥa m̃eḥena, naḥa sane mloge ḥesan m̃asina mlaea vena wari sisi, ana pupia naloge viowaena naga pere na wa.

⁹ “Ana monar avisuar ruru amiu, sa ħisi yaru la aure amiu ava e kiela kumali, pona e kiela yuĥa na lotuena lala, vena avis van amiu, ala nakoena van amiu, pona awe amiu. Yoko monar aligan amiu ava asuĥalu ase marana ne yerkawa na purvanua vanon ga naĥa amiu ape kiau nalogena lala, ana e pogos nene amiu akilia avisawal kiamiu nalelagaena e inu e marala. ¹⁰ A lologena wo, yoko alologon va yolai la punu ga e yomarava nini sumo wa, ħisi na sur la nene kilia imi ĥalivi. ¹¹ Ana visae la nene aim atarar amiu, aure amiu avano vena ala nakoena van amiu, amiu na ve asitom manene re avisave ‘?Ĥisi na nevisa ya ne van la ne?’ Ana avisa ga visena naĥa ħisi na Ninuna Wa la van amiu, memes ga e pogos na visena, vanon pe amiu re apis poli, komin Ninuna Wa ga naga vis e amiu.

¹² “E pog ĥarera nene, yoko yar kilia taĥan yaru viowa taĥena la aimi aurelua wenla ruru naapo pona narila ruru naapo, vena awe moĥar la, nanene komin naĥa la nene amlelaga e inu. A nin sisi ĥena ga lala akilia asuĥalu avisawal anela lala amio arimala lala naĥa la amlelaga e inu, vena lala ĥena ga amare sanene. ¹³ Ana yoko yaru la sinela kar manene amiu, naĥa kiau kia teke e amiu, a amiu yaru a naĥa suĥalar ĥarera suĥa ga vano-o pog ĥarera nene ħisi, Ntewa tamalia naga.”

Pupia pog ĥarera tai garu Yerusalem

Matiu 24:15-28; Luk 21:20-24

¹⁴ Ana Yesu pisa ĥena ga visena taĥena tai, naĥa popon yaru kilia wuloyuia, vena kilia ruru kana kinasia. Visena nene sanini, pisape “Yoko amiu akilia avisu naĥa avisirlua nono tai naĥa piowa manene laa, yoko suĥalu se e yo wa tai pe pon re nena naĥa aligan se ea. A pogos naĥa avisu suri nene, amiu naĥa asike Yutea, popon amiu aure, ava atapolou e kunus lala. ¹⁵ E pogos nene, visae yaru tai va ruru teke vanua lavisin ĥana yuĥa, naga monar ve va re si loyuĥa war kiena suri laĥasia, ¹⁶ pona visae yaru sike e kana lokove, naga monar ve vito re si uĥa tar ĥana kulsota, naga monar kiriri vitaĥili ga sanene vano. ¹⁷ Ana e pogos nene, yoko viowa laa ĥena van sira la naĥa meĥela, amio la naĥa amla ke yu pan kiela sisi tomtom lala. ¹⁸ Visae ve sanene, popon amiu alenwo amiu vena kiamiu pog naureena nene ve imi tol amiu re e pog na miava keviu. ¹⁹ Nanene vanon pogos nene, ħisi na ĥarera na ĥarera, ĥarera laa sane taulu pogos ĥarera taĥena lala, naĥa siar e pogos naĥa Ntewa sii yomarava nini pimi tol nanagane, a yoko ve pog ĥarera re si tai ve sanene pogos tai. ²⁰ Ana Ntewa sitoĥal rui pisape yoko tero pog ĥarera nene imi ve plas ga, vanon kiena yeririna la naĥa pisir plan la vena ave kiena, asike e pogos nene. Ana visae ve tero re ve plas sanene, yoko taĥatete yaru tai kilia mal sike na.

²¹ “Ana visae yaru lala avivisa van amiu, avisave ‘Amiu avisu yaru nene, naga na Navisaarena nene,’ pona avisa taĥena, asape ‘Nane Navisaarena ne nane gare,’ ana amiu na ve alelaga re e kiela visena lala toko, ²² komin naĥa navisaarena la mokliu naĥa pe ape lelaga re la poli, la akilia asuĥalu, amio ĥena ga navisawalena navisokanena la ve moki, a ħisi na la nene akilia akila kile lala, amio sur nailanena lala. Ana yoko akila sanene, aure yaru la ava ave wowe, vano-o tol naĥa akilali naĥa aure ĥena yeririna kiena ne Ntewa la naĥa pisir plan la vena ave kiena, ana la taĥatete akilia akila. ²³ Ana akilia avisuar amiu ruruia, komin nepisawal make suri la rui pan amiu nanagane, naĥa pe aĥarpo yo re poli wa.”

Ĥisi na Narin Yeririna wasuĥe sina

Mak 13:24-27; Luk 21:25-28

²⁴ A Yesu pisape “Ana e pogos nene, siraun naĥa naloge viowaena nene ħisi, mrae imi ve pupumalko, a kupario ve tego re sina. ²⁵ A verue la ma e sinapane asuĥa aloloru, a suri ĥarera lala nae ma e sinapane, yoko Ntewa kululun la. ²⁶ E pogos nene, ħisi na la avisu Narin Yeririna molue e lul amio pupia kiena naĥareraena amio naurarena. ²⁷ Ana siraunia, naga ligan kiena navisi lala ava e yo punu ga e yomarava a ma e peni, ana yoko aure kiena yeririna la naĥa naga pisir plan la ħisi rui, aimi lele taaga puna.”

Pe yaru re tai naþa kilia pog na legiena maro nene poli

Matiu 24:32-36; Luk 21:29-33

²⁸ Ana Yesu pisape “Amiu asitomli purlaki nene, naþa asape purpiliva. Naga kiena sur navian amiuena tai teke ea, naþa monar avisururuia. Pogos naþa avisu sitos la siar miyunlua sina, imi memaena, ana amiu akilia asape pog na yepisusunu m̄arera pimi ke lavisi narui. ²⁹ Ve sanene, pogos naþa avisu kile la nene e yomarava, la apimi akakate ke sa naþa nepisa pan amiu rui, ana amiu akilia naþa Narin Yeririna suña ga e pulutava rui, lavisi ke kate narui. ³⁰ Nevisa suri na lelaga van amiu, yoko sur la nene imi kakate sumo, ana siraunia, lus kiena ne yaru la naþa amal ke e pogos nene, þisi na akilia akovio e yomarava nini. ³¹ A yoko sinapane amio yomarava nini lalua m̄ena akovio veraga, ana kiau visena lala taþatete nena akokovio pogos tai. ³² Ana pe yar re tai naþa kilia kana legiena pona aora nena naþa þisi na Narin Yeririna m̄alivi ea. Navisi lala nae ma e peni, amio Narina ne Ntewa, la m̄ena amninue ga, ana Ata ga, naga taaga kilia.”

Monar akila ruru amiu asuña ga

Matiu 24:42-44

³³ Ana Yesu pisape “Sanene, ana monar asuña avisuar ruru amiu, komin amninue ga asape kiamiu suþe naga imi sina e legiena ya. ³⁴ Sur nene sa naþa yar keviu tai mligan m̄ana uña vena vanon kiena pupia yalena tai. Sumon naþa naga ligam kiena yo, naga monar ligam kiena sur la punu ga va sike limana ne kiena yar na yuñaena lala, a monar vis ruru van la naþa apisuar ke mralaea, sape avisuar ruruia. ³⁵ Ana nanagane sa m̄ena nene van amiu, amiu m̄ena asuña avisuar ruruia, komin pe tekilia re poli, yar keviu na uña vim pogwai. Pona imi kotaþa, po kolemalo, pona sa lakaporo la akokoreko, po kolulagi, ³⁶ ana piowa ga naþa sa naga vim m̄alivin amiu, lual naþa kam na amomalio m̄aga. ³⁷ Ana visena naþa nepisa ke pan amiu, mesmesun naþa yeririna la punu ga monar aloge, sane amiu akirarava ruruia, avisuarua.”

14

Li nasumonena la nae Israel sinelan asape yoko aweñar Yesu na wa

Matiu 26:1-5; Luk 22:1-2; Yoane 11:45-53

¹ Ana þisi na, pog pimi lavisi naþa e kas punu ga asuña akila kiela pupia þaþagena lua. Legiena lua ga suwo ke wa, þisi na akila þaþagena na sitoñalen natamaliaena naga sumo, þisi na akila þaþagena na kanen kiligaþe naga sirau.

A e legiena nene, þarin yar wa lala, amio navianena na visaluaena la sinelan ke asape yoko aweñar Yesu na wa, ana akale ke mrapa tai na tarwanen naga. ² Ana lala apisayu ke pan la, asape “Sur nene taþatete tekila e maran yeririna la naþa apimi e þaþagena nene, komin visae pere na la sinela kar ita vaþisi ne, yoko akila pupia m̄aagena, vanon la mokliu naþa akekaran ke pa yar nene rui.”

Maria taron ponotaninu e Yesu

Matiu 26:6-13; Yoane 12:1-8

³ Ana e pogos nene, Yesu sike e kumali naþa Petani, naga sike e yuña m̄ana yaru tai naþa apio ke Saemon Leperosi, komin nanua susumo naga þar leperosi se e yepena. Ana Yesu kinana ke e yuña nene, sira tai pimi puna, mla piawi tai naþa amiyuñen e kilavaru tai naþa po, a piawi nene na pulen ponotaninu naþa amiyuñen e was nen þeligalaki tai, naþa kana kilavaru keviu paþisi. Ana sira nene pilonpo gon piawi nene, taron make ga ponotaninu nene taroi e þarina ne Yesu.

⁴ Ana laþas naþa asike e lele nene e pogos nene, apisu ke sur nene, ana la sinela kar sira nene paþisi, asuña apisamumun ke pan la, asape “?Komin yar ne sira nene taron kare korenan ke ponotaninu sa nene? ⁵ Visae wilwilinlua ga na, vera war varu keviu ea, vena iilaena yeririna la naþa pe kiela sur re la poli. Naga kila kare na!” Ana la asun apisa kare ke sira naþa sanene.

⁶ Ana Yesu pisa pan la, sape “?E, kam na akila ke sanene pan sira nene komin ya? Amiu na ve avisa kare re si naga, naga kila yuḿaena naḗa po tanea pan inu, pisa ruru inu paḗisi. ⁷ Li na lima korena la naḗa apisa la ke ne, yoko lala asulue ga likan amiu, ana amiu akilia aiila la silaga e pog punu ga naḗa sinemiunia. Ana inu, in na yoko ve nesu re silaga nemio amiu. ⁸ Suri naḗa sira nene miyuḿaenia, naḗa taron ponotaninu e inu, naga kila sur wo punu ga naḗa naga kilia kila, naḗa pe nakilaruruen yepu yoko neva e marena. ⁹ Nepisa ke sur na lelaga pan amiu, e yo punu ga e yomerava wetelu naḗa avisawal kiau lologena wo ea, ana asunyu ḿena sur nowo nene naḗa sira nene miyuḿaenia, vena asitoḿal sina ga silaga pupia sitomena kiena e inu, naḗa sinena miye inu lelaga.”

Sutas ḗiliwilin wan Yesu

Matiu 26:14-30; Luk 22:3-20; Yoane 13:21-30

¹⁰ Ana Sutas nae Kariot, naḗa naga ḿena pe nalogena na lualima taaga pa lua tai, naga sitom ke pa rui naḗa yoko wilwilinwan Yesu, ḗisi na pa pisa ḗarin yar wa lala. ¹¹ Ana pogos naḗa amloge yoko naga kila kiela mrapa na tarwan vinaunen Yesu, akekaran paḗisi, apisaar pania, asape “!E po paḗisi ne! Visae oiila imimi ve sanene, yoko mela narin nalaena tai van ko vanonia.”

Ana e pogos nene, Sutas siar kale ke pulmas tai yoko kilia ligan Yesu va e liman yaru wa la nene.

Yesu pitetalia Pita amio Yoane ava akila ruru kana kinanena maro

¹² Ana legiena ḗesia na ḗaḗagena na kanen kiligaḗe pe Toste, naga legiena naḗa la asuḿa akila ke nakuḗaḗaena e narin sipsip lala vena sitoḿalena natamaliaena. Ana nalogena la apiun tan Yesu, asape “?Ko na sinoḿan osape mekila ruru kata kinanena na ḗaḗagena naḗa e lepas nape?”

¹³ Ana naga pisa pan lalua, sape “Ava gar Yerusalem, yoko alual yar tai kus ke pupia piawi na wii tai, imi ḿalivin amiu. Ana ataveve naga avano, ¹⁴ ana yoko naga were amiu ava e yuḿa tai. Ana pogos naḗa ava loyuḿa e yuḿa nene, amiu avis van ḗar na yuḿa nene, avisa sanini asave ‘Kieta navianena piun ke sape awa yo kiena ne wolawa lala, vena naga memio imimi kiena nalogena lala mekilia makan kinanena na sitoḿalen natamaliaena ea?’ ¹⁵ Amiu avisa sanene vania, ana naga vian amiu e pupia lele tai metava van amiu, naḗa suri la punu ga sike pa e rui, ana yoko akila ruru sur la punu ga nakanena e lele nene.”

¹⁶ Ana Yesu pisa sanene pan nalogena lua nene, ana apano, amial ḿa apa atol Yerusalem. Ana e pogos nene, sur la punu ga pimi ḿalivi sa ga naḗa Yesu pisayu susumo pan lalua.

ḗisi narui na, lalua akila ruru maron kinanena na ḗaḗagena nene kana Yesu, ḗisi na aḗasuḗela sina ga.

Yesu pisawal naḗa yoko Sutas vielua naga van kiena nasinekar lala

¹⁷ Ana kolemalo, Yesu amio kiena nalogena lala apitom garo Yerusalem, apito e yuḿa naḗani. ¹⁸ Ana pogos naḗa asuḿa akinana ke narui, Yesu pisa pan la, sape “In na nepisa ke pe lelaga pan amiu ne, yoko amiu yaru ga tai yoko vielua inu, amiu yaru ga tai naḗa ita tesike tekinana ke veraga nagane.”

¹⁹ Ana nalogena la amloge naḗa naga pisa sanene, ana amloge piowa paḗisi, apiun veve ke tan la peve taaga, asape “?E, in re poli?”

²⁰ Ana Yesu pisataḿe la, sape “Naga naḗa yoko kila sanene van inu, naga pe kiau nalualima ga taaga pa lua tai, naḗa naga yaru tai naḗa imimi lua meputon kamimi kilaparavi e ga e pulpiala taaga. ²¹ Ana yoko Narin Yeririna naga monar mare sa naḗa Nasiriena Wa pisayu pa sumo rui. A yaru naḗa vielua naga, yoko viowa manene laa van naga, naga popon manene sa ve vaeme re ga rui.”

Kinanena maro

²² Ana pogos naḗa la akinana ke sanene na, Yesu mla kilaparavi tai, pisa potena pan Ntewa, ana kawewowaia, kian pan la, ana naga pisa pan la, sape “Alavia, akania; nanene

naga pe tasneu.”²³ Ana ĩisin nene, mla piala na kuruta, pisa potena pan Ntewa, ana kian pan kiena nalogena lala, ana la punu ga peve taaga amunpae ea.²⁴ Ana naga pisa pan la, sape “Nanene, naga pe tau naĥa pe nakilaen naviranarena kiena ne Ntewa suĥalu ĥarera silaga, naĥa yoko tau nene naga lauwo malena kiena ne yeririna la ve moki.²⁵ Nepisaar ke pe lelaga na pan amiu ne, nesape yoko sane in na ve nemun re si kuruta pogos tai, vano vano-o nemun ga kuruta viu e navesuĥenena kiena ne Ntewa.”

²⁶ Ana pogos naĥa Yesu kila pa sanene, ana la amiyau e yauena tai naĥa teke e tusi kiena ne Yauena lala, ĥisi na amolue petan yo nene, amiyal apa e Kunus Na Purolip la.

Yesu pisawal sape yoko Pita naga visawan naga

Matiu 26:31-35; Luk 22:31-34; Yoane 13:36-38

²⁷ Ana pogos naĥa asike e kunus nene wa, Yesu pisawal pan la pisape “Ĥane ga kolemallo, kiamiu lelagaena e inu naga loru, komin Visena Wa pisawal pa sur nene rui, naĥa sape

‘Yoko in na nowe moĥar yar navisuaren sipsip, ana kiena sipsip lala yoko aureure tetai.’ *Sek 13:7*

²⁸ “A pog naĥa netaulu si marena, yoko in na nesumo neto garo Kalele, ana amiu ĥena monar asirau atom garo lele nene.”

²⁹ Ana pogos naĥa Pita mloge visena naĥa Yesu pisa pania, pisawolia pisape “Pona nalelagaena kiela punu ga nene e ko loru, aure vetan ko, a yoko inu, in na taĥatete neligan ko pogos tai.”

³⁰ Ana Yesu pisa pan la, sape “Lelaga nepisa ke pan ko, yoko ĥane ga kolemallo, pogos naĥa towa la ve akokoreko re yam ve lua wa, a ko, ko na yoko ovisawan inu yam ve telu rui.”

³¹ Ana Pita pisaluĥar visena nene, pisaar ĥarera, sape “Visae la sinelan asape aweĥarnu ĥena nemio ko, naga pogaga ne, ana inu, yoko taĥatete nevisawan ko, nesape in na pe nepe kioĥa re poli.” Ana e pogos nene, nalogena punu ga la apisa ĥena sa nene.

Yesu pa mlen ma Ketsemani

Matiu 26:36-46; Luk 22:39-46

³² Ana sirau, Yesu lala apa e lepas nen kunusia, amiyal apito tano e narin pulĥalu tai, naĥa kiena ki Ketsemani. Ana naga pis pan la pisape “Amiu asuĥa e nini wa. Ana in na neva nelen ve plas ga wa.”

³³ Ana naga ĥere Pita amio Semes a Yoane, ataveve naga, apa li la vitokak ga sane, ana e pog nene, sinena Yesu naga pimi urmi keviu, mloge piowa paĥisi.³⁴ Ana naga pisa pa la telu nene, pisa pisape “Nanagane, nemloge sa naĥa ninuu naga pororowa make ga, naĥa lavisi nemare narui. Awis, amiu asuĥali atavilo amio inu e yo nini wa.”

³⁵ Ana Yesu miyal pa laa sane, mlorun kinai, mlen pa arimana, sape “Ata-o, Ata-o, sa otaĥania, yoko aora na pog ĥarera la nene naga ve imin in re sina.³⁶ Ko na okilia okila sur punu ga, ana nepiun tan ko vena okuslua piala naloge viowaena nene vetan inu, vena in na ve nemun re ea. Ana ko na ve okila re sa naĥa na sinenanena kiau, ana okila ga sa naĥa kioĥa nasinenanena.”

³⁷ Ĥisi na, naga pimi sina ga puna kiena nalogena la telu naĥane, naga pisu lala amomalio pa rui. Ĥisi na lala atavilo sina ga, ana Yesu pis pa Pita sape “?Sanape Saemon? Ko na omomalio? ?Komin ya ne kam na taĥatete atavilo amio inu e aora nini? ³⁸ Kam na monar avisuar ruru amiu, monar alen lue ga, vena nataĥaliena la ve akila amiu aloru re e mlamulena viowa. Pe lelaga, kiamiu sitomena ĥarera po, ana tasnemi naga miyowo ga.”

³⁹ Ana siraunia, naga pa si e yo na leniena naĥane, mlen, mlenin sina ga visena naĥane.⁴⁰ Ana pogos naĥa naga ĥasuĥe sina, pisu la telu nene amomalio ke sina ga, komin atekavito paĥisi, ana pogos naĥa pis pan la, lala pe apisataĥe re si suri tai pan poli.

⁴¹ Ana naga pavin sina, kiena leniena na telu, ana pogos naĥa ĥasuĥea, naga pis pan la, sape “!E! ?Amiu apa ruru amiu ke ga wa, amomalio ke ga wa? !Poga, ĥisi ga ne! Naga ne

lavis ga pog naþa narin yeririna va e liman li viowa la narui. ⁴² Ko pogaga, amiu asuñalu ita tetove, yar nawilwilin wan inuena, nagane pam ke lavis gar ne narui.”

Apuarar Yesu ñarera

Matiu 26:47-56; Luk 22:47-53; Yoane 18:3-12

⁴³ Ana e pogos nene naþa Yesu pisa ke visen nene wa, Sutas, naþa naga tai lala lualima yam taaga pa lua ne, naga pimi, amio yeririna la moki naþa aþar ke playu na mara amio kiela plaki lala. La nene, yar keviu la kiena yar wa la, amio navianena na visaluaena, amio na sumonena kiena le Yu la, lala amligan la apimi. ⁴⁴ Susumon naþa apimi, yar na wilwilinena naþa Sutas, naga pisaþes kile tai pan la sumo rui, pisape “Yar naþa sa neva netalopan þesia, yar ne nanene naþa ita sinetan ke, ana kiamiu yar na mara la monar atararia ñarera aure naga vano.”

⁴⁵ Ana pog naþa apimi narui, Sutas miyal mesmesun ga Yesu, pis pania, sape “Navianena, pokolemalo.” Talopania, ⁴⁶ ana kiela yar na mara la apimi atararia asape aure naga vano. ⁴⁷ Ana pogos naþa atarar sanene, ana nalogena tai þurelua kiena playu, sape te yar tai naþa nae pun yar wa la, ana naga tetereria ga þarina, telua kiligana komþas pano.

⁴⁸ A Yesu pis pan yar la nene, sape “?Sanape na amiu aþar kiamiu playu amio plaki lala? ?Sanape na asape aim ataranu sanene? ?Pona asitom ke asape in na nepe yar ñarera na vinauena amio na weñaren yaru la yo? ⁴⁹ Sila ga e legiena punu ga, in na nepian amiu e yuñna ñana Ntewa, ana sanape na amiu pe apim ataranu re e pogos nene poli? Ana pogaga, kome sur la naþa nasiriena wa pisayu sumo rui, monar imi ve sa ga nene.” ⁵⁰ Ana e pogos nene, nalogena la amligan Yesu, aþure petania.

⁵¹ Ana e pogos nene, yar ñee tai taveve ke yar la naþa aþure ke Yesu pano, ana naga pitavi ga. Ana yar la nene þasia apisuluþar naga, asape atarar ñena naga, ⁵² ana atarpal ga naga, atarar ga kiena kulmrae aþurelua petania, pe plamoñe ga kiriri pano.

Aþere Yesu pa e pupia kumali kiena yar kerkeviu kiena le Yu la

Matiu 26:57-68; Luk 22:54-71; Yoane 18:13-24

⁵³ Ana lala aþere Yesu pimi suñal e marana ne þarin yar wa, naþa kiena ki Kaeþas, amio yar keviu kiena yar wa lala amio navianena na visaluaena, amio na sumonena kiena ne le Yu lala, apim pa lele taaga e yo nene rui. ⁵⁴ Ana Pita ñena taveve ña Yesu e pogos nene, ana pe pa re lavisin poli, ana pogos naþa apim loyuñna e kove na kumali nene, Pita pa totano amio yeririna na yuñnaena kiena Kaeþas, lala atega ke kapi, komin miava. ⁵⁵ Ana yar keviu la naþa asike loyuñna e viorena nene, lala akale ke yar laþas naþa akilia avisa plan sur laþasia naþa Yesu miyuñnaenia pona pisa, vena kila la akilia aweñar naga vanonia, ana pe aña re sur tai poli. ⁵⁶ La añal laþasia aþerela apimi apisawal visena moki, ana visena punu ga nene apisokan ga, asuñna apisa ke ga sur la naþa pe taþena lala, ana kiela visokanena la nene mlolor ga.

⁵⁷ Ana þisi na, laþas na visokanena añal visena tai, asuñalu, asape ⁵⁸ “Memloge yar nene naga þarwar e visena sanini rui, sape pupia yuñna wa naþa kieta yermarua ga la amiyuñnaenia e limala, pisa sape yoko naga taaga ga kilia weplania, yoko yuñnaen ruru si yuñna wa viu taþena tai e legiena ve telu ga, naþa liman yeririna taþatete yuñnaenia.”

⁵⁹ La apisa ña visena la nene pano-o, kaka ga, kiela visena la nene pe suñal ñarera re poli.

⁶⁰ Ana þarin yar wa suñalar se marala, pisi pa Yesu, piun tania, sape “?Ko na yoko ovisatañe van la pona ve ovisatañe la re? ?Sanape e visena la nene naþa apisa plan ke ne?”

⁶¹ A Yesu pe pis re si po, pisatañe re si poli. Ana þarin yar wa pis si pania, sape “? Sanape? Ko na ope Navisaarena naþa pe narina ne Ntewa, pona pe ko re poli?”

⁶² Ana Yesu pisatañe pania, sape “Ee, Navisaarena nene, naga inu. Ana nesape nevisa ñena van ko, þisi na yam ve plas ga, avisu si Narin Yeririna naga totano ke e lepas na

þamarua puna Ntewa na m̄areraena, yoko avisu naga vaeme e lul metava vitom tano e yomarava nini.”

⁶³ Ana þarin yaru wa sinen karia na pitolwowa m̄ana kulkota, pisape “Þisi ga ne! ? Komin ya ne ita takale ke si yar taþena naþa kilia visa plan si sur laþasia e naga? ⁶⁴ Amiu amloge ke ne! !Yar nene naga þarnena kare pa kia wa kiena ne Ntewa rui! Viorena sitom sanape, yoko tela naliþereena van ve sanape?”

Ana la amla naliþereena pa Yesu, asape mesmes ga naþa monar aweþaria.

⁶⁵ Ana laþas apasirkon naga, apiwo kilamarana, ana asuia, apisa karea, apiuyun tania, asape “?E, ovisalia, ane mlipa ko ke nanagane?”

Ana yar na mara laþas kiena þarin yaru wa la apim aþurelua naga petan yo nene, ana la m̄ena nene asuia, amlilipa ke pogos naþa aþure ke naga apano.

Pita naga pisawan Yesu

Matiu 26:69-75; Luk 22:56-62; Yoane 18:15-18,25-27

⁶⁶ Ana e pogos nene, Pita sike loyuþna e kove wa, ana sira na visuaren yuþna m̄ana þarin yar wa pimi e lele nene, ⁶⁷ ana m̄al Pita tegan ke kapi, pisuluþaria, pisa pania, sape “!E, ko nene ko m̄ena otataveve yar nae Nasaret naþane!”

⁶⁸ Ana Pita pisawan sur nene, sape “!E! In na pe nemloge ruru re sur na ko opisa ke ne poli!” Ana naga petan lele nene, pato laa lavisin pupia pulutava na yuþna nene.

⁶⁹ Ana e yo nene, sira nene naga m̄al sina, ana pisawal pan yar la naþa asike ne, sape “Yar nene pe yar kiena ke yar naþa tai narui.”

⁷⁰ Ana Pita pisawan sina ga visena nene. Ana pe piavi re nenaga, la nene apisa pa Pita, asape “Peraga, ko ke tai narui, komin ko na yar nae ke Kalele tai narui.”

⁷¹ Ana Pita pis m̄arera, pisaluþar m̄areraena e visena sa nini, sape “!E lelaga kemua rui, Ntewa na Mava, in na nepisa pa rui, pe nekiliaar re nena yar na kam na apisayu ke ne poli.”

⁷² Ana veraga ga pogos naþa Pita pisa ke sanene, towa kokoreko yam lua narui, kila Pita sitoþmal si visena kiena Yesu, naþa pisa pania, sape “!Lelaga nepisa pan ko, þane ga ne kolemalo, pogos naþa towa ve kokoreko re na yam lua poli wa, ko na ovisawan inu yam ve telu rui.”

Ana Pita mloge sinena piowa na piowa, molue pa vanua, tag na tag.

15

Lala aþure Yesu pa puna ne þarin suþe kiena ne le Rom la naþa sike Israel

¹ Ana kolulagi e Praere nene, li kerkeviu la kiena le Yu la apiora sina ga e kiela pupia kumali. La nene nane yerkaawa kiena ne yaru wa lala, amio kiela nasumonena lala, amio kiela navianena navisaluaena la. Apis m̄a pano-o, atol sitomena tai, þisi na apiar limana ne Yesu, aþure naga pa puna ne þarin suþe keviu Þaelat, ana la amligan Yesu e limana, vena naga liþerea.

Yesu suþalu e marana ne Þaelat

Matiu 27:11-14; Luk 23:3-5; Yoane 18:33-38

² Ana Þaelat piun tan Yesu, sape “?Ko ope Þarin Suþe kiena ne le Israel lala, pona peraga?”

Ana Yesu pisataþnea, pisape “Naga ke narui, sane opisa ke ne.”

³ Ana yerkaawa lala kiena ne þarin yaru wa lala apisasawal suri la e Yesu, asape naga kila sur la moki naþa piowa. ⁴ Ana Þaelat piun sina ga tania, sape “?Sanape, la apisa suri viowa moki e ko rui, ana ko na omla m̄a kana navisataþneena pona peraga?”

⁵ Ana e lepas nen sur la ne apisa ke ne, Yesu pe pisataþne re si sur tai pan la poli, ana Þaelat sinen pulan sur nene paþisi.

Þaelat taþnan pisape Yesu monar mare

Matiu 27:15-26; Luk 23:13-25; Yoane 18:39-19:16

⁶ Ana e pogos nene, la asike e pog na Pāpāgena na Sitoñmalena Natamaliaena wa, ana e kas punu ga e pāpāgena nene, p̄arin supe nae Rom silaga kila suri tai pan le Israel lala. Naga kila naḗa visae laḗas naḗa asike e yuḗa naloge viowaena, la akilia aviun yaru ve taaga naḗa sinelania, yoko P̄aelat naga ligan lua naga molue. ⁷ Ana e pogos nene, yaru na kilaen politik tai naga ḗmeke e yuḗa naloge viowaena, naḗa yaru la akilia ruru naga, kiena ki P̄araḗas. Naga pe yar tai pogos naḗa asuḗmalun kawelaen amio le Rom lala, ḗmemoñar laḗas amare, ana amligan pa e yuḗa na loge viowaena. ⁸ P̄isi na, p̄ina lala apimi moki lele taaga e marana ne P̄aelat, apiun tania vena naga kila van la sa naḗa naga suḗa kila ke ne, monar ligan lua lala yar tai naḗa sike e yuḗa naloge viowaena molue sina.

⁹ Ana P̄aelat pisataḗe la, sape “Pogaga. ?Amiu sinemiun asape neligan lua yaru nene molue sina, naga pe kiamiu p̄arin supe amiu le Yu la?” ¹⁰ P̄aelat piun sanene, vanon naga kilia pa rui naḗa yerkawa ga kiena ne le Yu lala, aḗure Yesu pimi puna, sane yuḗaena na vielueen ga, vanon naḗa apisu kiela yeririna taḗena lala akekaran Yesu paḗisi.

¹¹ Sanene narui, P̄aelat sinenan sape ligan lua Yesu vano, ana yerkawa kiena ne yaru wa lala akila kare sitomena kiena ne yeririna lala pimi pisusun paḗisi, asape aḗareran van P̄aelat vena ve ligan lua re Yesu, ligan lua ga P̄araḗas vano. ¹² Ana P̄aelat mloge ke sur la naḗa apisa ke pania, piun tan la, sape “Pogaga, ana visae sanene, p̄isi na nekila ve sanapen yar nene naḗa amiu apio ke naga asape p̄arin supe kiena ne le Yu lala?”

¹³ Ana la punu ga apioyonia, asape “!Asuar naga e lak torovia!”

¹⁴ Ana P̄aelat piun tan la, sape “?Vanon ya? ?Naga kila suri ya ne piowa?”

Ana la apioyoni manene laa pa metava sane, asape “!Asuar p̄a, asuar ma e laki torovia!”

¹⁵ Ana P̄aelat pisu p̄ele narui, sinenan sape visa sur tai naḗa kila yeririna la nene aloge wonia, ana naga sape Yesu naga suḗa ga, a mligan lua ga P̄araḗas pa si pula. Ana mligan Yesu e limana ne kiena li na mara lala vena akoa, aure va asuar e lak torovia.

Li na mara lala akila lele kare Yesu

Matiu 27:27-31; Yoane 19:2-3

¹⁶ Ana li na mara lala atarar Yesu aḗerelua pa vanua e yometava na kumali kiena ne P̄aelat nene, ana la apio pa kiela p̄egas nen li na mara taḗena lala vena aimi avisuia.

¹⁷ Ana la amiyenlua ḗmana kulsota, ana amiyen kulkota tai e naga naḗa marana mene sa naḗa p̄arin supe la amiyen, ana aḗar nonos nen kilsirili, ana aḗaniroron ga, amligan e p̄arina, sa naḗa karo na p̄arin supe tai. ¹⁸ Ana pogos naḗa amligan sur la nene e p̄isi, la asuḗa akila lele kare ke, asape “!P̄arin supe kiena ne le Yu lala-oo! Imimi mepatanon ko, memieluar ko!” ¹⁹ La amla lakiavio tai, aḗe p̄arina ea, la asuḗa apasiria kare naga, akinai tano puna sa naḗa apatanon ke naga. ²⁰ Ana pogosia naḗa la akila lele kare naga, p̄isi na aḗarlua kulkota mene nene petan naga, ana amiyen si ḗmana kulsota tai ea, aḗure apano vena asuar naga e lak torovia.

Asuar Yesu ma e lak torovia

Matiu 27:32-44; Luk 23:26-43; Yoane 19:17-27

²¹ Ana pogos naḗa li na mara la asumon Yesu apa ke narui, aḗal yaru tai naḗa naga pa yoñmarua ana naga mial pimi. Yar nene, naga Saemon naḗa sumo naga nae Saerin, naḗa naga arimanane lalua nene Aliksanta amio Ruḗas. Ana aḗareran pania asape naga towe kus lak torovia kiena ne Yesu vano. ²² Ana lala asumon Yesu apa atol kunus tai, kiena kia Kolkota, naḗa kana kinasa asape yo naḗa sane puryu na piaḗarin yaru. ²³ Pogos naḗa apimi aporu e wos nen kunus nene, ana la sinelan asape ala kuruta namunena va Yesu vena munia. Ana kuruta namunena nene ataron was nen suri tai naḗa melkalka sike ea, vena kila tasnena ne Yesu kapulu ga, ve lae manene re, ana pogos naḗa amla pania, yepen mavin munena.

²⁴ Ana la atarar Yesu, asuar naga ma e laki torovia. P̄isi na, la akuan taes, vena alual li ane war ḗmana kulmrae tai, a ane war tai. ²⁵ Ana pogos naḗa amligan pa Yesu ma e laki torovia, naga kolulagi, maran mrae ovaria. ²⁶ Ana li na mara nae Rom la asiri navisawalena

tai, naþa pisawal suri naþa nasumonena kiena ne le Yu la sinelan asape aweñmar naga vanonia, naþa sape “Yaru nene naga pe þarin suþe kiena ne le Yu lala.”²⁷ Ana e pogos ñena nene, yar navinauena lalua, asuari la ñena ga e laki torovia sa ke Yesu, apisirilua tai e lepas na þamarua, taþena e lepas na þañeli.²⁸ E mrapa ne nanene, lala akila visena marua tai na Tusi Wa pimi kate sina ga, naþa sape “Amligan naga ñeke amio yar na kilaroen navisaluaena.”

²⁹ Ana yaru la naþa asuñña amiyaloro ke apa e yo nene, asisilin þarila, apisalele kare ke Yesu þisa, la asape “!Koe, suwala! Ko nene nanua sumo ko opisa osape ko okilia owe plan Yuñña Wa ñana ne Ntewa, ana ovisirlua sina ga e legiena ve telu ga, ana sanape narui?³⁰ !Pon ko ga otamalia ko lia, ovetan laki torovia nañña, otom tano!”

³¹ E þelaga ña nenaga nene, yerka kiena ne þarin yaru wa lala, amio navianena na visaluaena, asuñña apitalia kare ke naga paþisi, asuñña apisa ke, asape “!Pona naga tamalia ña yaru taþena la moki rui, ana naga mninue kare si narui, taþatete si tamalia naga yo!³² ?Ana naga pe kieta Navisaarena, a pe þarin suþen ita le Yu lala, pona peraga? Popon naga vitom tano e lak torovia nanagane, vena ita tevisu sane naga pe lelaga, vena telelaga e naga.” Ana la lua ñena naþa asuar la e laki torovia amio Yesu, la ñena ga amiyakol sina visena viowa kiena ne la nene pania.

Yesu mare

³³ Ana kolipae ga, yemalolo pimi kalo yo punu ga e yo nene, pano tol mrae telu koyepakilavi.³⁴ A e pogos nene, Yesu mlokai keviu e kiena visena ruru naapo, sape “?Eli, Eli, lañña saþatani?” naþa kana kinasia sape “?Kiau Ntewa, kiau Ntewa, sanape na omliganu neñeke sanene?”

³⁵ Ana yeririna laþas naþa asuññalu asike e yo nene, apisusu suri la nene, ana amlogepal ñaagena kiena ne Yesu nene, ana la asape “Amloge ke ne, yaru nene pio ke yermarua Elaisa, vena imi iila naga yo?”³⁶ Ana veraga ga, lala yaru tai kiriri pimi, þar lumlum þasia, taron kuruta namunena naþa melkalka pa ea, miyurar te laki tai, kian pa Yesu vena munia, þisi na naga sape “!Tesu wa! Tevisulia, pona yoko yermarua Elaisa vitom tamalia naga pona pere.”

³⁷ Ana Yesu mlokai manene sina, þere maron kiena yalua, marþanu.

³⁸ Ana pogos ke ga nene, pupia kulmrae naþa merorol tamalele ke e Yuñña Wa ñana ne Ntewa, naþa mono ke yo wa naþa pe yo wa paþisi, purþa pito ga lika, siar metava pito tol tano.

³⁹ Ana yerka kiena ne li na mara lala, naþa pisusuar ña Yesu, pogos naþa pisu þere maron kiena yaluaena, milan paþisi, pisa sape “!Aulai, yaru nene naga pe Narina kemua Ntewa lelaga naþane!”

⁴⁰ Ana sira laþasia naþa atataveve ke Yesu asike e yo nene, asuññalu asike laa perina sane, asuñña atamaren ke kiela navianena. E lala nene, la telu naþa kiela kia la sanini, Maria tai naþa sira nae Maktala, Maria ñena naþa anenane Semes kokan amio Yoses, a sira ñena tai, Salome.⁴¹ Naga lala naþa pogos naþa Yesu sike garu Kalele nanua sumo, la asuñña ataveve naga, amiila ñena naga. Ana sira ñena la moki asuññalu asike e pogos nene, naþa lala ñena akom garo Kalele ataveve Yesu apa ma Yerusalem.

Yosop sin Yesu

Matiu 27:57-61; Luk 23:50-56; Yoane 19:38-42

⁴² Ana legiena na Praere, naga pe legiena na kilaruruen sur la punu ga suññate Legiena Wa peni, ana pogos naþa lavis mrae vito tano,⁴³ yaru tai nae Aramatia, kiena ki Yosop, naga pe marau re poli, kila kiena sitomena ñarera po, pa suññalu se marana ne Þaelat, piun tania sape kus tasnena ne Yesu. Naga ñarera pan paþisi nakilaen ve sanene, komin naga pe pupia yar tai na kansel kiena ne le Yu lala, naþa yar la akilia ruru naga po, pe yar ñena tai naþa sinenan ke navesuþenena kiena ne Ntewa naga vim.

⁴⁴ Ana Paelat mninue ga sape e pogos nene na Yesu mare rui po pere wa, pio kiena yar kawa na mara pimi piun tania. ⁴⁵ Pogos naþa mloge sape Yesu mare rui, ana tañan tasnena Yesu imi va Yosop.

⁴⁶ Ana Yosop temare ga ñana puluve viu tai þisi ga na wa, pa pul kulmrae nowo tai, pa akuslua tasnena ne Yesu petan laki torovia, amluluwoia ana la apa amligan ñeke e ñana puluve naþane. Ana amelilivin pupia kilavaru pimi mono pulusia, ana la aþasuþe la si apano.

⁴⁷ Ana Maria lalua nene, tai naþa nae Maktala, amio taþena nene anenane Yoses, lalua ñena apimi apisu yo naþa tasnena ne Yesu ñeke ea.

16

Puluve korena ga ñeke

Matiu 28:1-8; Luk 24:1-12; Yoane 20:1-10

¹ Ana pogos naþa Legiena Wa þarovia, ko yepekilavi e Pog Orai, Maria nae Maktala, amio Maria naþa anenane Semes, amio ñena Salome, la telu nene apito apul suri la naþa ponos taninu vena awar va avilan e yepena ne Yesu. ² Ana e Sante kolulagi wa ke ga wa, sa naþa mrae siar molue, la teloka amiyal apa e puluve naþane. ³ Ana pogos naþa amiyal ke apano, apiuyun ke sina ga pan la, asape “?Ana visae tetol ma ne, ane kilia melilivin lua pupia kilavaru naþa mono ke pulus nena van ita, vena tekilia teva loyuña?”

⁴ Ana pogos naþa la apimi lavisin yo nene, apisu ga pupia kilavaru naþane, yaru tai melilivin lua pa rui. ⁵ Ana la apa loyuña e puluve naþane, amilan yaru ñee tai totano teke e lepas na þamarua, miyen ke kulmrae naþa miyuwowo paþisi, ana pogos naþa apisuia, sinela kurkur, miyuyuwawa pano-o paþisi. ⁶ Ana naga pis pan la, pisape “!E, ve amarau re! In na nekilia pa rui naþa amiu apimi e yo nini vanon Yesu nae Nasaret, naþa añear naga e laki torovia. Ana naga suñalu mali si rui, pe mon re si e yo nini poli. Aimi avisulia! Na nene yo naþa amligan tasnena ñenea. ⁷ Ana ato vilaga, avisawal va Pita amio nalogena taþena lala, avisave yoko Yesu naga sumo vito þes garo Kalele, ana þisi na la ñena monar asiraun atove, avisu naga e yo naþani, sa naþa naga pisaar pan la sumo rui.”

⁸ Þisi na la apitaþili, apetan puluve aþure apitove, komin la amilan suri la nene pano-o paþisi, amiyuwawan ga rui. Ana la amarau ñena paþisi, kila sanene la apitove na pe apisawal re si pan yaru taþena la poli, apa memes puna ne nalogena lala.

Yesu ñalivin Maria nae Maktala

Matiu 28:9-10; Yoane 20:11-18

⁹ Ana Yesu mal sina e Pog Olua kolulag wa ke ga wa, naþa pe legien þesia na wik. Þisi na naga ñalivin ke la naþa atavevea, ana naga naþa ñalivin þesia, Maria nae Maktala, naþa nanua sumo pile plan ninuna viowa la olua petania. ¹⁰ Þisin naþa Maria pisu Yesu, pa ñalivin la naþa asuña ataveve ke naga sumo, la asuña amloge ke piowa atag ke ga wa, naga pisawal pan la pisape Yesu naga mal si rui. ¹¹ Naga pisa ruru pan la pisape naga pisu Yesu e kilamarana rui, ana la pe amlelaga re e naga poli.

Yesu ñalivin kiena nalogena la lua

¹² Ana siraun sina, e pogos tai nalogena la lua apetan Yerusalem amial apa ke apa sane, ana Yesu ñalivin la. Lalua apisu sane yepena pe taþena, pe sa re si nanua sumo poli, ¹³ ana pogos naþa apisu pae þisi, lalua apilon la sina aþasuþela, apitove apisawal sur nene pan lala taþena lala, ana yam si tai lala taþena la nene pe amlelaga re e sur nene poli.

Yesu ñalivin kiena nalogena lala

¹⁴ A siraun sina, Yesu ñalivin kiena nalogena la lualima taaga pa taaga, e pogos tai naþa atotanon ke kinanena. Ana naga pislí ña pan la, komin naþa pe aþasine ruru re naga poli, komin sinela la ñarera paþisi, kila na la pe amlelaga re e visena kiena ne la naþa akirawal naga mali si rui. ¹⁵ Ana Yesu pisa pan la, pisape “Nanagane na monar

avano, aliureure amiu e yo punu ga e yomarava nini, monar alogon kiau lologena wo van yeririna la punu ga. ¹⁶ Visae yar tai naga loge, ana lelaga ea, siraunia tol wii nakeena, yaru nene yoko tol malena, a visae naga naŋa ve lelaga re, ŋisi na Ntewa visaar marena vania. ¹⁷ Ana la naŋa yoko alelaga, ŋisi na kile la asike e la, sa naŋa la avile plan yermare la e puriukawaena na kiau kia, ana avisin mēna visena taŋena lala, ¹⁸ a sa pogos tai auarar loŋara tai, ana yoko woga ga, a visae amun sur tai naŋa monar amarenia, ana sur nene taŋatete kila sur tai van la, ana yoko aligan limala la e inanena lala, ŋisi na aloge wo sina ga.”

Yesu ŋasuŋe si pa ma e peni

Luk 24:50-53; Yuŋaena 1:9-11

¹⁹ Ana pogos naŋa kieta Suŋe Yesu pisa pa visena la nene pan la, Ntewa ŋurelua si naga pa ma e peni, mligan naga totano e lepas na ŋamarua puna. ²⁰ Ana kiena nalogena la amial tetai, apa amlologo e yo punu ga, ana apisu sane Suŋe naga miyuŋae ke amio la, kila ke kile la moki pan la, vena kilaen yeririna la avisu kilia sane kiela visena la pe lelaga ga.

A sunena nene maro ga e nene.

Lologena Wo Kiena Ne
Yesu Kristo Naña
LUK
Siriyuia
Visayuena Na Tusi Nene

Kompasinen suniena plas na tusi nini

Tusi nini, “*Lologena Wo Kiena Ne Yesu Kristo Naña Luk Naga Siriyuia*”, naga pisayu Yesu sape naga yaru naña Ntewa pisayu pa lus nae Israel lala nanua rui, sape yoko naga imin tamalia la, a vena tamaljena yeririna makega na yomarava. Luk sirilua pa e kiena tusi nini, sape Yesu nene, Ninuna Ntewa namava ke narui pio naga vena “visawal kiena lologena wo va la naña limala korena ga.” Ana komin sur ne nanene, lologena wo naña Luk siriyuia, pulen suniena la naña kilologia sape Ntewa sinena miyee yaru la naña asike e nalogeviowaena.

Suri taņena la moki naña tomal e tusi nini, nane suniena kiena yaru la naña amloge po pona akekara. Suniena la moki na sanene sike e marana na keviu taaga [1] naña pisawal sape yoko Yesu imi, a e marana na keviu lua [2] naña pisawal sanape naña Yesu paeme.

A e mēna e marana na maro, yaru la akekara paņisi kome naña Yesu mal sina, a p̄asuņe si pa mae peni.

Yaru naña siri tusi nini naga siri si tusi taņena tai naña kiena kia “*Yuņaena Kiena Li Nalologena Lala*”. E tusi na lua nene, naga pisawal suniena lala naña moluwe marea e pogos naña Yesu pa mae peni. Suniena la nene pisa lologia sape yaru la naña amlelaga e Yesu Kristo apimi moki liluwe, ana asuņa apa apisawal kiela lelagaena nene e yo taņena lala.

Tusi nini “*Lologena Wo Kiena Ne Yesu Kristo Naña Luk Siriyuia*”, komsus orelu sike ea. E kompasnena na lua, amio na orai nena, pisawal suniena laņas la naña sike e ga e tusi nini, ana pe su re e tusi taņena lala naña Matiu, Mak a Yoane la telu asiriyuia.

Naga suniena la naña pisayu navisi lala naña amiyau, a suniena naña pisayu yaru na visuaren sipsip lala naña apimin apisu Yesu e pogos naña naga paeme, amio mēna suniena naña pisayu pogos naña Yesu pa e yuņa mēna Ntewa pogos naña naga pe yaru viu ke ga wa, p̄akaiwa na yaru wo nae Samaria, a p̄akaiwa na ninis naña kovio.

Pupia suri mēna laņasia naña Luk pisayu kaņarania e tusi nini, naga sanini. Naga pisayu lotena, a Ninuna Wa, a yo kiena sira lala loyuņa e yuņaena kiena Yesu, a pisayu naña Ntewa kilia viyewo ita, kilia warplan kieta milamulena viowa lala.

Kompasnen tusi la nini

Visena na sumo 1:1–4

Yoane Nakeena amio Yesu lalua apaeme, a lalua akapuru 1:5–2:52

Yuņaena kiena Yoane Nakeena 3:1-20

Yoane kee Yesu, a Yermare taņalia 3:21–4:13

Yesu kila kiena yuņaena e lepas nae Kalele 4:14–9:50

Yesu moluwe Kalele pa ma Yerusalem 9:51–9:27

Legiena maro naña Yesu kila kiena yuņaena garu Yerusalem a e yo la naña lavisin

Yerusalem 19:28–23:56

Yesu mali sina a kiena nalogena la apisu naga 24:1-53

Visen p̄esia

¹ Inu Luk nesiriyu suniena nini pan ko, Yerkawa Tiopilas. Sa naña ko okilia p̄isi rui, yaru la moki liu naña asiri suniena na suri la nene kompas rui naña aņalmalivin ita e kas laņas p̄aro rui. ² Suri la nene, ita pe tepisu mesmes re e kilamarata poli, ana la naña apisuia, siar e purņesa, a la na sa naña la ape li Nalologena Wo p̄esia, la ke narui

la apisawal ruru lelein pimi pan ita. ³ Ana siar nakonua rui, nesuŕna nepisusu ruru ke ŕmaki taŕena la naŕa la asiria, a nesuŕna nemla ke visena na suri la nene, ana nepisu sane popon visae nekilali nela sunien taŕena la nene komŕasa, nesirikolia vena aim sane tus wo tai naŕa taveve ruru narin mrapa lala na suniena nene. ⁴ A nane nesiri sike na rui, a nekekarana naŕa neligan imi ve kioŕna, vena ouloyuia, okilia ovisu kilalea sane suri la naŕa osuŕna omloge ke rui, la amesmes ga a ape lelaga, la sa naŕa kiau tus nini pisawalia.

Navisi pimi pisawal pa Sakaraea pisape yoko naga war Yoane Nakeena

⁵ Suniena nena naga siar sanini, sape: E pogos naŕa Ŕarin Suŕe Erot naga pe suŕen ke lepas nae Yutea, yaru wa tai, naga pe namratava kiena ne Apisa, a naga ŕere sira tai naŕa naga ŕmena molue kome lus kiena ne yaru wa lala, nane e namratava kiena yermarua Eron, wenla Mosis nanua sumo ne. Yaru nene kiena kia Sakaraea, a wona kiena kia Lesipet. ⁶ Ana lalua nene kiela malena mesmesu po paŕisi e navisuena kiena ne Ntewa, naŕa la asuŕna amlogear kiena navisaluaena lala, a asuŕna akila ke ŕelaga la naŕa mesmes silaga, pe akilalu re tai poli. ⁷ Ana suri ga tai, lalua pe narila re tai poli, komin sira naŕa Lesipet naga pe luŕmaluŕna ga, a nanagane lalua apimi ape yermarua laa rui.

⁸ Ana e pogos tai, pe pog na ŕegas kiena ne Sakaraea naŕa monar ava akila kuŕaŕaena e Yuŕna Wa ŕmana ne Ntewa, sa naŕa ŕegas tai kila e wik tai, ŕegas tai kila e wik tai. ⁹ A silaga, pogos naŕa akila sanene, la monar akila sa naŕa amlil ŕmapila, vena alual yaru ai naŕa yoko naga kila pupia yuŕnaena navaen loyuŕna e Yo Wa na Yuŕna Wa nene, vena sikapen ponotaninu na wonta naŕa sike ne. Ana e poglis nene akila sanene, a kia kiena ne Sakaraea naga pa metava, asape naga narui naŕa va kila yuŕnaena nene. ¹⁰ Ana e nena e pogos na sikapen ponotaninu nene, naga pa loyuŕna vena va kila, a pupia ŕina na yeririna lala asike vanua, asuŕna amlen ŕaga.

¹¹ Ana pog naŕa Sakaraea pa loyuŕna, ana milan kare navisi tai kiena ne Ntewa naŕa ŕmalivinia, suŕnal ga sike e lepas nen wonta naŕani lepas na ŕamarua. ¹² Ana pogos naŕa Sakaraea pisu navisi naŕani, naga mninue kare narui sape aŕna kila ve sanape na wa, naga marau paŕisi. ¹³ Ana navisi nene pisa pania, pisape “Sakaraea, ve omarau manene re. In na nepimin ga nesape nevisawal van ko, Ntewa mloge kiamiu leniena amlua rui, a yoko woŕna Lesipet, ŕisi na war naruŕna na moŕne tai, a pogos naŕa vaeme, yoko oligan kiena kia Yoane.

¹⁴ “Pogos naŕa vaeme, yoko akekara vaŕisi, aloge wo, ana ve amiu re ga, ana yaru taŕena ŕmena lala akekara vaŕisi.

¹⁵ “Sisi nene, yoko imi ve yerkawa tai kiena ne Ntewa, a naga sane ve yaru wa tai, ŕisi na naga valia kuruta a wii ŕmarera ŕmena lala. Siar e pog naŕa naga teke e loŕeŕena anena wa, ana yoko Ninuna Wa ulen naga vaŕisi. ¹⁶ Yoko naga ve yaru tai naŕa ŕisi na vilon le Israel la ve moki awasuŕe la si puna Ntewa na Mava, kiela Suŕe. ¹⁷ Yoko avisu naŕa ninuna a naŕareraena naŕa se e Navisawalena Elaisa sumo sike sina ga e naga maran ve taaga, komin naŕa naga imi sumo, vena visawal visave ve ve piavi re Navisaarena naga imi raunia. Yoko naga vilon sinen ata lala vena asitomyu ruru sina ga narila lala, a yoko vilon sitomena kiena ne li nakilaroen navisaluaena lala vena ataveve si ŕelaga naŕa pe manmarua a mesmes ruruia. E mrapa ne la nanene narui, ŕisi na naga kila ruru ŕegas nen yeririna la tai va Ntewa, vena asuŕmate naga imi ŕmalivin la.”

¹⁸ Ana Sakaraea mloge visena la nene, ana pisa pa navisi nene, pisape “Ei, ve ovisa re sanene. Taŕatete ve sanene, komin imimi lua na mrae pito tano rui.”

¹⁹ Ana navisi naŕani pisa ke sina pania, pisape “Peraga, yoko ve sa ga nene. In na Navisi Kaŕriel nini, naŕa silaga nesuŕnal luen ga nesike e marana Ntewa vena nowar kiena visena, ana naga mligan inu nepim puŕna vena nevisawal lologena wo nini van ko. ²⁰ Ana pogos naŕa nepisawal pan ko, ko na pe omlelaga re e poli, ana nevisa van ko sanini, yoko ove puru, ana ŕisi na osuŕna ga sanene imi tol pogos naŕa ovisu suri la nene imi ŕmalivin ko nena ga e kana pogosia.”

²¹ Ana pogos naŕa navisi pis ke sanene pa Sakaraea, yeririna la asuŕnal asike vanua na wa, asuŕmate ŕna pano-o, ana kiela sitomena lua narui, asape “Vanon ya ne naga pa

loyuŋa, kila malion manene suri sanene.”²² Ana siraunia na, molue sina, ana la apisu naŋa naga pe pis re si pan la poli, ana la apisu kilale asape naga sike loyuŋa, naga pisu suri tai, nane kila naga sanene. Ana naga pis ga e limana pan la, naga pe puru ga moŋa ga.²³ Ana suŋa kila kiena yuŋaena e Yuŋa Wa ŋana ne Ntewa, pano-o kilamake kiena pogosia, ana ŋasuŋe si pa ŋana.

²⁴ Ana asuŋa sanene pano-o, pe piavi re poli, wona sena, ana pogos naŋa naga mloge sane ŋeŋena sanene, naga pa moŋa ga ŋala uŋa sanene pano-o tol kupario lima.

²⁵ A e pogos nene, naga suŋa pisa sanini, pisape “!Ntewa kila po pan inu paŋisi nene wa! Sumonia, yaru la asuŋa apisu memawan inu komin naŋa pe noŋar re sisi poli, ana nanagane Ntewa pisuveve inu, sinena miye inu, ana mlalua memawaena na kiau luŋaluŋaena nene rui.”

Navisi pimi pisawal pa Maria pisape yoko naga war Yesu

²⁶⁻²⁷ Ana Lesipet sena tol kupario orai rui, ana Ntewa pitetalia kiena navisi naŋani, Kaŋriel, vena vito visawal kiena visena tai va sira ŋee tai, kiena kia Maria, naŋa naga sira ŋee tai na pulkumali nae Nasaret e lepas naŋa Kalele. E pogos nene, la apisaar Maria rui vena va talopa amio yaru tai, kiena kia Yosop, naŋa naga molue kome lus kiena ne ŋarin Suŋe Tepet nanua sumo, ana Maria pe pa su re amio naga poli wa.

²⁸ Ana navisi naŋa Kaŋriel pimi ŋalivin Maria, pisape “O, Maria, Ntewa sitom ruru ko nena paŋisi, naga suŋa pisa ruru ko, sike kemua amio ko lelaga.”

²⁹ Pogos naŋa Maria mloge visena nene, naga sitom paŋisi, sape visuvelia, pisape navisi nene pisa po paŋisi, ana kana kinas sanape.³⁰ Ana navisi pis sina pania, pisape “Maria, ve omarau re. Ntewa kekaran ko ga, ana yoko kila pupia navisa ruruena tai imi e kioŋa malena.³¹ Nanagane, yoko osena, vano-o owarwal naruŋa na yerŋene tai, a visae naga vaeme pae, monar osikia kiena kia Yesu.³² Visena Wa nanua sumo naga pisayu pa naruŋa nene rui, naŋa pisape

‘Naga yoko ve yerkawa, a kiena kia,

“Narina ne Ntewa na mava,”

a Suŋe Ntewa yoko kila naga imi ve ŋarin suŋe tai naŋa kus lelen repina marua nene

ŋarin Suŋe Tepet nanua,

³³ ana ŋisi na naga ve suŋen la naŋa amolue e mratava ŋana yermarua Sekop, nane le

Yu ne la ne asike nanagane, a la naŋa yoko aim sirau,

a kiena nasuŋenena nene yoko taŋatete ŋisi pogos tai.’ ”

³⁴ Ana Maria milan visena nene paŋisi naŋa sape yoko naga war sisi, ana naga piun tan navisi nene, pisape “?Ana suri nene yoko ŋalivi ve sanape ne, komin naŋa in na pe nesu re nemio wou nene poli wa?”

³⁵ Ana navisi pisataŋea, pisape “Ninuna Wa yoko naga vitom e ko, a naŋareraena kiena ne Ntewa na mava ŋisi na kalo ko, ana yoko osena. A komin naŋa yoko ove sanene, ŋisi na avisave sisi wa nene naŋa yoko owaria, naga ve narina ne Ntewa.

³⁶ “E kioŋa navisuena, opisuri nene sane ŋarera paŋisi naŋa yoko ve sanene, ana popon ositomli anoŋa sira marua Lesipet nene. Asuŋa apisu ke naga asape naga taŋatete nena ga war sisi narui, ana nevisa van ko, naga pe sira marua rui, ana nanagane, kiena kupario orai narui.³⁷ Ositomlia, sa naŋa Ntewa pisa pa sira marua Sera nanua sumo laa rui, e lepas na puna, pe suri re nena tai naŋa naga kila ŋele poli.”

³⁸ Ana Maria pisataŋea, pisape “Lelaga kemua naŋa. In na nepe sira ŋee na yuŋaena kiena ne Ntewa ga, ana netaŋan inu ga vena naga kila suri la nene imi ve lelaga e inu ve sa ga naŋa naga sinenania, sa naŋa opisawal pan inu.” Ana navisi nene purmatania.

Maria pa ŋalivin Lesipet

³⁹ Ana Maria suŋa sitoŋal ke visena lala kiena ne navisi nene, ana sinenan manene paŋisi sape va visu anena nene, naŋa Lesipet, ana pe piavi re poli na, mligan kiena yo,

mial kawa pa e pulkumali naþa Lesipet amio wona Sakaraea lalua asike ea, nane e lepas na kunus lala nae Yutea.

⁴⁰ Ana Maria pa tol mala yuna, pa pio Lesipet. ⁴¹ A poglis naþa Lesipet mloge kilale pulgo Maria naþa pis pania, mloge narina naþa teke e naga kulul keviu. Ana Ninuna Wa pitomi e Lesipet, pitomi pule ea, ⁴² ana Lesipet pio manenea, pisape “!O, Maria, Ntewa pisa ruru ko keviu paþisi, taulu make sira la punu ga, a yoko pupia kiena navisa ruruena sike mena e mrasnona naþa yoko owaria. ⁴³ In na pe nepe sira wo re nena tai poli vena anenane kiau Suþe imi yal li inu sanene, ana nepisu sane po pan inu paþisi. ⁴⁴ A kiau sisi tomtom pisu kilale ko, kekara paþisi, komin pogos nena naþa memloge þesan pulgona, naga kulul paþisi e lomeþeu. ⁴⁵ Ita lua tekekara na tekekara, komin temlelaga e visena kiena ne Ntewa, a yoko imi ve lelaga van ita ve sa nena naþa naga pisaar pan ita.”

Maria mieluar Ntewa e yauena tai

⁴⁶ Ana e poglis nene, yauena kiena Maria tai sanini, sape “Sineu mieluar Ntewa keviu,

⁴⁷ ninuu kekara paþisi

pa kiau Suþe Natamaliaena,

⁴⁸⁻⁴⁹ naga pisu inu nesike tano

nepe sira na kiena yunaena tai,

naga pe Ntewa namareraena,

naga sitomal inu, kila po pan inu.

Teras lelei la naþa aim sirau avisayu inu, asape ‘Sira nene, Ntewa pisa ruru naga keviu,’ nepisirlua kiena kia wa.

⁵⁰ Sinena miye la naþa apatanonia,

teras na sumo, na sirau.

⁵¹ Namareraena na limana kila suri moki, naga mlipureure la naþa ape þarmarera, kila la apa tetai.

⁵² Kila plan þarin suþe e lelela la, pisirilua la naþa sitomena su ga tano.

⁵³ La naþa viso kar la, pagan ruru la,

li na suri moki, mene plan la, limala korena ga.

⁵⁴⁻⁵⁵ Kila sa naþa pisaar pa repita lala,

pimi miila ita kiena le Israel lala.

Pe sinen þesan re Epraam poli, sinen ye luen ga kiena piaparavi, vano-o ve uro re.”

⁵⁶ Yauena kiena ne Maria nane þisi e nene, a naga sike amio Lesipet pano-o tol kupario telu, siraunia þasuþe si pa mana una.

Yoane Nakeena paeme

⁵⁷ Ana pimi tol ruru pogos na narina ne Lesipet vaeme, ana paeme pe mone. ⁵⁸ Ana pogos naþa namratava puna ne Lesipet amio la naþa asike lavisinia amloge suri nene, akekara paþisi amio naga e pupia sinewo kiena ne Ntewa naþa pimi pania, naþa nanua sumo naga pe lumaluna ga, ana nanagane narina nasumo nane paeme ne. ⁵⁹ Ana pogos naþa sisi nene kiena legiena olua, apimin akila naga pe þaviu. E pogos nene, la sinelan asape asikia mena kien kia, Sakaraea, sane kia kiena ne arimana, ⁶⁰ ana anena pisa luþaria, pisape “Peraga, kiena kia, Yoane.” ⁶¹ Ana la apis pania, apisape “Ya ne sanene? Namratava puna na pe amligan re kia tai sanene e poli!”

⁶² Ana apisi ga e limala pa ariman sisi naþani, vena aviun tania avisave naga sinenan sape aligan kia nape e narina nene. ⁶³ Ana Sakaraea pis ga e limana pan la, pisape ala maki tai vania, ana siri ea, pisape “Kiena kia, Yoane.”

Suri nene kila la nae yo nene amilan paþisi, ⁶⁴ a e mena e pogos nene, purmenena ne Sakaraea kulul sina, kilia pis narui, ana mieluar Ntewa.

⁶⁵ Ana yaru punu lala na lepas nene amloge suri nene, amilan kare paþisi, a suniena nene pa laa narui tol pulkumali taþena lala na lepas na kunus lala nae Yutea. ⁶⁶ A la naþa amloge, asitom paþisi, komin naþa la apisu kilale asape limana ne Ntewa sike amio naga, ana la asuna apiuviun pan la asape “?Nin sisi wa nene yoko naga ve sanape ne?”

Sakaraea pisawal visena naþa Ntewa pisa pania

⁶⁷ Ana Ninuna Wa pitomi pule e Sakaraea arimanane sisi nene, ana naga pisawal sanini, pisape

⁶⁸ “Teieluar kia kiena ne kieta Ntewa, Suþe nae Israel,

pitomi pun ita, pul plan ita,

⁶⁹ maplarar kana keyowo,

molue e piaparavi na kiena yaru na yuþaena Tepet,

naþa yoko tamalia ita.

⁷⁰ Nanene kiena navisaarena nanua, navisawalena apisawalia, asape

⁷¹ Naga urelua ita vetan limana ne nasinekar lala,

⁷² Taþatete mēna sinen þesan naviranarena amio repita lala,

sinena mie la ke na wa,

⁷³ nane navisaarena mārera amio repita Epraam,

⁷⁴⁻⁷⁵ Ntewa pisaar pisape tamalia ita vetan limana ne kieta nasinekar lala,

vena ve temarau re sina,

teve yaru wa,

temesmesu e marana,

teyuþae vania e legiena punu ga e kieta malena.

⁷⁶ Nin naruu, avio kon Navisawalena kiena ne Ntewa na meta manenea, osumon Suþe okila ruru kiena mrapa.

⁷⁷⁻⁷⁸ Yoko ovisawal sane Ntewa sinena ye kiena yeririna lala,

ve sinewo van la,

viewo kiela mlamulena viowa lala, tamalia la.

Yoko Ntewa kila kiena narin yomerarava þesa na kolulagi va metava van ita,

⁷⁹ vitom tegoli ita naþa tesike e yemalolo,

naþa ninuna na marena kalo ita rui,

a vitom vivagali mrapa na suþare vena teyaloro ea.”

Yoane Nakeena kapur pa metava

⁸⁰ Ana pogos naþa kas la pimi þaro pano, Yoane nene kapuru pimi keviu, a kiena sitomena marua ruru po, a suþalu mārera suwa wa se yuþaena kiena ne Ntewa. A naga pa sike e yokorena, vena va tol pogos naþa naga monar vaeme e marana ne le Israel lala.

2

Yesu paeme

Matiu 1:18-25

¹ Ana e pogos nene, þarin suþe kiena ne le Rom lala, naga kiena kia Sisa Okastas. Ana naga pisawal pisape monar aulo yeririna punu ga e purvanua make ga naþa asike vatanon kiena navisuarena. ² Yuþaena nawuloen yaru la nene, la akila þesania, a e pogos naþa la akila, yeririna kiena ne Sisa tai naga pisuar ke pupia lepas nene Seria, a kia kiena ne yerikawa nena, naga Kuarinias. ³ Ana nakilaen yuþaena nene, apisape yeririna punu ga monar ava si e kiela yo lala, vena akilia asiri ruru kiela kia, a aulo ruru la.

⁴ Suri ne nanene kila Yosop molue e pulkumali nene Nasaret, naþa naga sike ea, naga nene e lepas nae Kalele, ana naga pa ma metava e pulkumali nene Petleem, naþa yermarua Þarin Suþe Tepet naga paeme e nanua sumo, naga nene e lepas naþa Yutea, komin naþa Yosop naga molue e lus kiena ne yermarua Tepet nene.

⁵ A Yosop þere wona naþa Maria lalua apano, naþa e pogos nene, naga lavisin ke naþa kana sisi vaeme narui. ⁶ Ana lalua apano, a pogos naþa asike Petleem wa, Maria mninu sane kiena pogos na waren sisi pimi narui. ⁷ Ana Maria þarlua þesan kiena moþe nene, a naga mliluwo ruru e kinakinas nen kulmrae lala, ana pe mēna yo namonena po re poli, komin lalua akilali asape ava e yuþa mēna wolawa lala, ana pule rui, ana Maria mligan ga sisi tomtom nene mēne lelen navaganen surmali lala.

Navisi lala añmalivin yaru navisuaren sipsip lala

⁸ Ana lemalo nene, yaru navisuaren sipsip laņas asike amio kiela surmali lala, e yo na vilumini vanuan ga Petleem nene. ⁹ Ana navisi tai kiena ne Ntewa pitomi tano pula, a naurarena kiena ne Ntewa tegoli make yo nene sane pupia kapi tai, kila yaru la nene amilan paņisi. ¹⁰ Ana navisi naņani pis pan la, pisapenua “Ve amarau re. In na noņar ke visena tanea tai ne navisaen van amiu, naņa kilia kila yeririna make ga aloge won vaņisi. ¹¹ Yemalo ga nini, e pulkumali kiena ne Āarin Suņe Tepet nanua, nane Petleem, nin sisi tai paememare ga na wa, naņa yoko naga ve kiamiu Natamaliaena. Naga ke narui pe kiamiu Suņe, naga pe Navisaarena naņa Ntewa pisaaria nanua rui pisape yoko ligana imi.

¹² “A nanene narui nane kile na sur ne tai nini. Yoko alual nin sisi tomtom nene, naņa la akila ve taņena vania. Yoko avisu naņa aliluwo ga e kinakinas nen kulmrae lala, a amligan mņeke e lelen kinanen kan surmali lala.”

¹³ Ana veraga ga amilan ga pupia pņegas nen navisi tai nae ma e peni apitom asikol navisi naņani. Ana navisi la nene amieluar Ntewa, amiyau apisape

¹⁴ “Ma metava ma e peni, asike amieluar ke Ntewa keviu paņisi, a e yomarava nini, suņmare sike e yeririna la naņa Ntewa naga kekarana la.”

Yaru navisuaren sipsip la apa garu Petleem

¹⁵ Navisi lala apisawal visena nene pņisi, apur matan si yaru navisuaren sipsip la naņani, aņasuņe la si apa ma e peni. Ana yaru la nene asuņa apisasayu ke sina suri la nene pan la, apisapenua “Suwala, ita, tevano. Popon teva garu Petleem vena tevisuli suri naņa mņalivi ga na wa, naņa Ntewa pisawal pan ita.”

¹⁶ Ana amiyal kawa apano, apa añal Maria amio Yosop, apa akaten sisi tomtom naņani, mņeke ga mņana yo e lele navaganen suri mali lala. ¹⁷ Ana pogos naņa apisu suri la nene ana apisawal visena make ga naņa navisi pisa pan la e lepas na sisi tomtom nene. ¹⁸ Ana pogos naņa yaru taņena la amloge suniena nene, apule mamaga e pupia nailanena tai. ¹⁹ A Maria, naga mligan ruru suri la nene e losinena, pe sinen pņesan re poli, sisitoņal luen ga silaga.

²⁰ Ana yaru la nene aņasuņela si apa pun kiela sipsip lala, asuņa apisirlua ke kia kiena ne Ntewa, a asuņa amieluar naga paņisi vanon suri wo la naņa amloge a naņa apisuia, naņa atorokin nena ga visena kiena ne navisi naņa pisawal pan la.

Asikia Yesu

²¹ Ana pogos naņa moņe nene kiena legiena olua, ana kana pogos na kilaen pņaviu ea. Akila sanene pņisi, asikia asape Yesu, kia nena naņa navisi pisawal pņesania, sumon naņa Maria mņeņenania.

Akus toroun Yesu pa e Yuņa Wa mņana ne Ntewa

²²⁻²⁴ A pogos naņa Yesu paeme wik orai pņaro pae pano, pogos nakilaen kuņaņena naikikena e Yuņa Wa mņana ne Ntewa narui, naga nene komin kuruta kana sira naņa pņar sisi. Ana akila kuņaņena nene, taveve Navisaluaena kiena ne Mosis naņa pisape “La naņa limala korena ga, akilia awe ga loņe ve lua, pona narin kupa ve lua.”

Ana e ke e pogos nene, la akus toroun Yesu pa e Yuņa Wa mņana Ntewa, amiyawawo pania. Suri nene taveve mņena Navisaluaena kiena ne Mosis, naņa pisape “Yermņene punu ga la naņa apaeme pņesia ape wa, la ape kiena ne Ntewa.”

Yermarua Simion pisu Yesu e Yuņa Wa mņana ne Ntewa

²⁵ Ana yaru tai sike e Yuņa Wa mņana ne Ntewa e pogos nene, kiena kia Simion. Naga pe yaru nae ga Yerusalem, pe yaru mesmesu tai, a pe yaru mņarera tai e pņelaga na leniena. Naga suņa suņate ke sape sinenan visu Nasineyeena kiena ne Ntewa nene, nane Navisaarena, imi iila le Israel lala e pog mņarera nene naņa asike ea.

Ana Simion nene naga yaru tai naņa Ninuna Wa sike e naga silaga, ²⁶ a Ninuna Wa pisawal pa naga rui naņa yoko naga taņatete kovio, vano vano-o kilamarana visu

Navisaarena kiena ne Ntewa sumo wa. ²⁷ A Ninuna Wa ðere pimi e Yuña Wa ðana ne Ntewa, e nena e pogos naða akus sisi tomtom Yesu pimi, vena akila ðelaga navisaluaena nene.

²⁸ Ana Simion miaðear sisi nene, mieluar Ntewa, pisa potena pania, pisape ²⁹ “Suðe Keviu o, nanagane nepisu suri naða opisaar pan inu, pimi pe lelaga rui. Ana suri nene kila suðmare pimi e sineu, ana nanagane okilia otañan inu, yaru na kioña yuñaena, nevetan yomarava nini neiñasu. ³⁰ E ga e kilamarau, nepisu kioña Natamaliaena, ³¹ naða omligan pimi e maran yolai lala na yomerava, ³² sane kapi tai na kipian koena van yeririna taþena lala, a yoko aieluar imimi kioña le Yu lala, komin kiamimi naurarena nene Yesu.”

³³ Ana Yosop amio Maria lalua amilan visena kiena ne Simion nene paðisi naða pisayu Yesu, ³⁴ ana Simion pis ke sina ga, pisa ruru la, ana pisa pa anena Yesu, pisape “Ntewa mligan sisi nene pimi pan ita nae Israel vena kila ita ve moki teloru, a vena kila ðena ga ita ve moki tesuñalu sina. Ntewa mligan naga pimi sane kile tai, ana yokorena yaru ve moki naða avisa kare ga naga. ³⁵ Ana ve sanene, yoko naga kila kiela nasitomwanena la nene añalivi e yometava.

“Ana e lepas na puña, ðisi na naloge viowaena yur losineña sane playu na mara tai, yokorena sineña worovia komin suri la naða yoko imi ðalivin naruña nini.”

Sira marua Ana pisu Yesu e Yuña Wa ðana ne Ntewa

³⁶⁻³⁷ A sira marua tai naga ðena teke e poglis nene, kiena kia Ana, naða naga pe navisawalena tai. Ana nene, arimana Panuel, naða molue kome lus kiena ne Aisere nanua sumo. Naga talopa pogos naða pe sira ðee ke ga wa, ana naga sike amio wona na yerñene tol kas olua ga, ana wona nene mare tania. Naga pe letano ga sanene, pano-o tol kiena kas lualima orelu pa vari.

Naga pe sira tai naða silaga sulueen ga e Yuña Wa ðana ne Ntewa, naða suña pa ke e pogos na lotuena na kolulagi lala pa tol na yepekilavi, a silaga naga monsilu ga vena len.

³⁸ E poglis nene narui, pimi lavisin la, mlen, pisa potena keviu pa Ntewa vanon sisi nene, a siraunia, molue pano suña pisayu Yesu pa yeririna la naða asun akiravan ðate ke asape Ntewa imi tamalia Yerusalem, ana Ana pisawal ruru pan la, naða kiela Navisaarena pimi rui.

Yosop la aþasuðela si apa Nasaret

³⁹ Pogos naða Yosop amio Maria akila suri la nene sa naða Navisaluaena kiena ne Ntewa pisa ðisi narui, ana aþar Yesu aþasuðela si apito garo kiela pulkumali nene Nasaret, lepas naða Kalele. ⁴⁰ A nin sisi nene kapur pimi keviu, kiena sitomena pimi pe manmarua ruru po paðisi, a apisu naða Ntewa miila naga vena naga kila sur punu ga wo e kiena malena.

Yesu pe yaru viu ga, pian yaru la e Yuña Wa

⁴¹ Ana e kas punu ga, le Yu la asuña akila ke kiela þaþagena tai, naða Þaþagena na Sitoñalen Natamaliaena. A silaga, la naða asike e yo taþena lala, la sinelan manene paðisi vena ava ma Yerusalem akila þaþagena nene, a arimana Yesu amio anena, la ðena akila ke sanene. ⁴² Ana e kas tai, pog naða Yesu kiena kas tol lualima taaga pa lua [12] ke na wa, apa sina, ana aþure Yesu amio la. ⁴³ Ana la akila suri na þaþagena la nene pano-o ðisi, ana yeririna la aþasuðela si apa e kiela yo lala. Ana Yesu na pe pa re poli, naga suña ga Yerusalem, ana arimana amio anena pe akilia re poli. ⁴⁴ Lalua asitom ke asape pona naga sike amio la þasia veraga e pupia þegas na kiela namratava lala a kiela erau lala, ana amial ða pano-o tol legiena wetelu tai. Ana e yemalo nene akale Yesu pano-o, ⁴⁵ pe añal re naga sike amio la poli, ana apisu sane la monar atayu lala awasuðe si ava garu Yerusalem vena alualia. ⁴⁶ La amial legiena wetelu taaga, apim atol si Yerusalem, akale pano-o, ana e legiena taþena, naða kana legiena na telu na kiela yalena, añal ga na wa, apisu teke tano e Yuña Wa ðana ne Ntewa. Naga totano teke amio navianena lala nae e yo nene, toña miyagogon ke kiela visena lala, a toña piuviun ke navianena la tan la. ⁴⁷ A

la naþa asike lavisinia e pogos nene, la amilan manene pupia manmaruaena a nakiliaena kiena ne Yesu paþisi, amio navisataþneen la naþa naga suþna mla ke pan la naþa apiun ke suri tania. ⁴⁸ Ana pogos naþa arimana amio anena apisu naþa naga kila ke sanene, amilan paþisi, ana anena pis pania, pisape “Ei, naruu! Komin ya ne sinoþman osape okila kare manene imimi sanene? Opisu ke ne, imimi lua makale ko pano-o, pe moþnal ko re nena ga, ana okila imimi memloge piowa paþisi wa.”

⁴⁹ Ana e pogos nene Yesu mla navisataþneen tai pan lalua, pisa sanini, pisape “?Komin ya ne amiu lua apa akale inu e yo taþena la ne sanene? Sanape, amlua pe asitoþnal re si sane in na monar nesuþna nekila ga yuþnaena kiena ne kau Ata loyuþna e mþana yuþna poli?” ⁵⁰ Ana navisataþneena naþa pisa pan la, amninue logekilaleen kana kinasia. ⁵¹ Ana Yesu mligan yo nene, naga pito amio la, ana la aþasuþe si apito e kiela yo naþa Nasaret.

A Yesu su pogaga amio la e yo nene, suþna mlogear ruru la mþa silaga. A anena naþa Maria suþna sitoþnal luen ga suri la nene loyuþna e losinena silaga.

⁵² Ana kas la pimi þaro pano, a Yesu kapur pimi keviu, a kiena manmaruaena amio kiena maruaena suþna pimi keviu laa narui, a Ntewa suþna pisa ruru naga keviu paþisi, kila yaru la apisu naga po na po, akekaran manene naga paþisi.

3

Yoane Nakeena sike e yokorena, naga mlologon ke navilopuena

¹⁻² Ana kas laþas þaro pa rui, ana Yoane Nakeena, narina ne Sakaraea, naga pimi mþaliv e yokorena. Naga nene e pogos naþa pupia Þarin Suþe Taepirias Sisa nae Rom naga pe suþe keviu ke tol kana kas lualima taaga pa lima rui, a e poglis nene na mliganar kiena yerkawa laþas rui, sane Ponses Þaelat, naga pisuar Yutea, a Erot, naga pisuar Kalele, a wenla naþa Pilip, naga pisuar lepas nae Ituraea amio Trakonatis, a Lasanias, naga pisuar lepas nae Apilin. A e mþena ga e pogos nene, lalua naþa ape þar na yaru wa lala asike garu Yerusalem, naga Anas amio Kaeþas.

Ana Yoane sike garu yokorena, ana Ntewa mla visena la pania, ³ ana naga pa make e lepas punu ga na wii nae Yortan, naga suþna mlologon ke pisape yaru la punu ga monar avilopu la, a monar ava e nakeena, ana yoko Ntewa naga viewo kiela mlamulena viowa lala. ⁴ Naga kila sa ga naþa Navisawalena Aisea pisa nanua rui e kiena tusi, naþa sape

“Pulgo tai suþna pio ke e yokorena, sape

Akila ruru make mrapa kiena ne Ntewa,
vena naga kilia imi mþalivi e kiamiu malena lala.

⁵ *Yoko kam na monar asinwo make pulþalu lala,*

a monar akilro kunus la su ga tano,

a yo la naþa kapinia la monar aim amesmesu ruruia

a yo la naþa þilþil la monar aim ameri ruruia;

⁶ *ana sanene, yoko yolai la punu ga avisu kiela Natamaliaena naþa Ntewa ligania yalin la e mrapa nene imi mþalivin la.”* *Ais 40:3-5*

Yaru la apim puna Yoane

⁷ Yuþnaena kiena ne Yoane, naga mlologon sanene narui, ana pogos naþa þina la moki amolue apa e yokorena vena naga kee la, naga pis mþarera pan la, pisa sanini, pisape “Kam na sa ga loþnara la naþa amaraun kapi tai ana aþure, ana kam na asitom asape akilia aurmatan pupia anen kapi naþa Ntewa yoko ligan imi? Peraga, komin pe apilopu amiu ruru re poli wa. ⁸ Ana visae lelaga kemua naþa amaraun nakoena nene, kiamiu malena lala monar war mras wo la naþa torokin kiamiu navilopuena nene. Ana avisuaria, ve awarwar amiu re sina, sa naþa akila ke rui, naþa asuþna apisa ke asape ‘E, ita na tesuþna poga ga rui, okilakan ita ke narui tepe lus kiena ne Epraam nena naþa.’ Ana nanene na pe sur re tai nene poli, komin naþa visae Ntewa sinenania, naga kilia war kilavaru la nene, yuþnaen lus kiena ne Epraam la ve moki ea, vena la akus lelemiu. ⁹ In na nevisa van amiu,

nevisave m̄ekiavi mon ruru m̄eke rui, vena te plan laki la naḡa pe aḡar re mras wo la poli, akoven la ava e kapi.”

¹⁰ Ana pogos naḡa ḡina la amloge nene, amarau na amarau, ana apiunia, asape “Ana visae ve sa nene, yoko imimi mekila ve sanape narui?”

¹¹ Ana Yoane pisataḡe la, pisape “Yar naḡa ḡana kulsaket lua, yoko naga monar taḡan tai va yar naḡa pe ḡana re tai poli. Yaru naḡa kana kinanena keviu, yoko naga monar vion re komḡas va yar naḡa pe kana re poli.”

¹² A yar na takis la moki, naḡa ape li nakila keuiaen nena yar lala, apimin vena Yoane kila nakeena van la, ana la ḡena ga apisu kilale kiela napiowaena lala, ana la apiun ḡena ga asape “?Navianena, sanapen imimi, yoko imimi monar mekila ve sanape?”

¹³ Ana naga pisa pan la, sape “Yoko awarpolo vetan yaru lala torokin ga ya naḡa la monar aulia, ana ve yuve re, sa naḡa akila ke ḡisi rui.” ¹⁴ Ana yaru na mara ḡena laḡasia apiun sanini pa Yoane, asape “?A imimi, yoko mekila ya?”

Ana naga pis pan la, pisape “Amiu apuarar ke kiamiu suri na mara lala, ana yaru la asuḡa amaraun amiu paḡisi, lala sane visae pog tai sinemiun kiela suri tai, amiu avisa ga ana monar ataḡania. Ana ḡelaga nene, yoko monar ve akila re sina. A asuḡa sinemiun mimi lue silaga asape yerkawa la nene apul amiu ve tokak ga, pona torok ga yo, ana monar akekaran ga narui.”

Yoane sape yoko Navisaarena imi

¹⁵ E pogos nene, le Yu lala asuḡa asitom ke asape kiela Navisaarena lavisi ḡalivi, ana amloge visena wo la nene kiena ne Yoane, akekarania, ana naviunena sike e kiela sitomena lala, asuḡa apiuviun ke, asape “O, pona yaru ne nanene yo, naga pe kieta Navisaarena, pona peraga?”

¹⁶ Ana Yoane suḡa pisawal ruru merarava pan la, pisape “Peraga. In na nepitom sumo, vena nesuḡa nekee amiu ke ga e wii, ana yaru taḡena tai vim siraun inu. Yaru nene, naga to laa metavan inu, a in na pe netorokin re naḡa neluḡarlua kulus nen lana poli pona nekila kiena yuḡaena taḡena. Ana naga ke narui, yoko kee amiu e Ninuna Wa, amio kana kapi nena, vena kekan plan kororaki lala vetan kiamiu malena. ¹⁷ Naga sa naḡa naga tarar ke koruak nayuraren wit, vena silsilin plan kana kinas lala. Ve sanene, yoko naga war ruru kinas nen wit la nene va uḡa, ana yoko naga koven vinus va e kapi tai naḡa taḡatete mare pogos tai.”

¹⁸ Nanene narui, Yoane Nakeena mlologon Lologena Wo pa yeririna la sa ke nene narui, a naga suḡa pisa ke ḡena visena wo naiilaaren taḡena la pan la, a visena nakila ḡegelaena. ¹⁹ Ana yar tai pe kekaran re nena Yoane, nane ḡarin Suḡe Erot, komin Yoane suḡa pis ke pania vanon naḡa naga ḡerelua sira nene Lerotias, naḡa wona wenla, a pis pania vanon sur taḡena ḡena laḡasia naḡa naga kila. ²⁰ Ana metavan kiena napiowaena taḡena lala, Erot sinen kar Yoane pano-o, suḡal narui koven pa e yuḡa naloge viowaena.

Yoane kee Yesu

Matiu 3:13-17; Mak 1:9-11

²¹ Ana pogos naḡa Yoane pe pa re e yuḡa naloge viowaena poli wa, naga kee ḡa yeririna la pano-o, ana pog tai Yesu ḡena pimi e yo nene, ana Yoane kee ḡena naga. Ana pogos naḡa Yesu molue e wii, suḡa mlen ḡaga, ana veraga ga sinapane pike, ²² a Ninuna ne Ntewa pimi pe tasa, moḡa pitomi tano sane loḡe tai, pitomi pran ea. Ana Ntewa pis ma e peni pitomi pania, pisape “Ko Naruu nene, naḡa nepinaia ko paḡisi. Kiau sitomena sike ga e ko, nekekaran ko paḡisi.”

Repina ne Yesu lala

Matiu 1:1-17

²³ Ana siraun naḡa Yoane kee Yesu, ana naga siar kiena yuḡaena narui, a e poglis nene, naga kiena kas la tol lualima telu. A lus naḡa Yesu molue komea, e lepas na yerḡene, siar e Yosop, naḡa apisu sane arimanane Yesu, pa sanini:

Yosop, naga narina ne Eli;
²⁴ Eli, naga narina ne M̃Matat;
 M̃Matat, naga narina ne Livae;
 Livae, naga narina ne Melki;
 Melki, naga narina ne Sanae;
 Sanae, naga narina ne Yosop;
²⁵ Yosop, naga narina ne M̃Matateas;
 M̃Matateas, naga narina ne Amos;
 Amos, naga narina ne Neam;
 Neam, naga narina ne Esli;
 Esli, naga narina ne Nagae;
²⁶ Nagae, naga narina ne M̃Mat;
 M̃Mat, naga narina ne M̃Matateas;
 M̃Matateas, naga narina ne Semein;
 Semein, naga narina ne Sosek;
 Sosek naga narina ne Sot;;
²⁷ Sota, naga narina ne Soanan;
 Soanan, naga narina ne Resa;
 Resa, naga narina ne Seruṗapel;
 Seruṗapel, naga narina ne Saltiel;
 Saltiel, naga narina ne Neri;
²⁸ Neri, naga narina ne Melki;
 Melki, naga narina ne Ati;
 Ati, naga narina ne Kosam;
 Kosam, naga narina ne Elm̃matam;
 Elm̃matam, naga narina ne Ere;
²⁹ Ere, naga narina ne Yosua;
 Yosua, naga narina ne Eliesa;
 Eliesa, naga narina ne Sorim;
 Sorim, naga narina ne M̃Matat;
 M̃Matat, naga narina ne Livae;
³⁰ Livae, naga narina ne Simion;
 Simion, naga narina ne Suta;
 Suta, naga narina ne Yosop;
 Yosop, naga narina ne Sonam;
 Sonam, naga narina ne Eliakim;
³¹ Eliakim, naga narina ne Melea;
 Melea, naga narina ne Mena;
 Mena naga narina ne M̃Matata;
 M̃Matata, naga narina ne Natan;
 Natan, naga narina ne Tepet;
³² Tepet, naga narina ne Sese;
 Sese, naga narina ne Opet;
 Opet, naga narina ne Poas;
 Poas, naga narina ne Sala;
 Sala, naga narina ne Nason;
³³ Nason, naga narina ne Aminatap;
 Aminatap, naga narina ne Atmin;
 Atmin, naga narina ne Ani;
 Ani, naga narina ne Ebron;
 Ebron, naga narina ne Peres;
 Peres, naga narina ne Suta;
³⁴ Suta, naga narina ne Sekop;
 Sekop, naga narina ne Aisak;

Aisak, naga narina ne Epraam;
 Epraam, naga narina ne Tera;
 Tera, naga narina ne Nao;
³⁵ Nao, naga narina ne Seruk;
 Seruk, naga narina ne Reu;
 Reu, naga narina ne Pelek;
 Pelek, naga narina ne Eþa;
 Eþa, naga narina ne Sela;
³⁶ Sela, naga narina ne Kaenan;
 Kaenan, naga narina ne Aþaksati;
 Aþaksati, naga narina ne Sem;
 Sem, naga narina ne Noa;
 Noa, naga narina ne Lamek;
³⁷ Lamek, naga narina ne
 Metusela;
 Metusela, naga narina ne Inok;
 Inok, naga narina ne Saret;
 Saret, naga narina ne Malalil;
 Malalil, naga narina ne Kaenan;
³⁸ Kaenan, naga narina ne Enos;
 Enos, naga narina ne Set;
 Set, naga narina ne Atam; ana
 Atam, naga narina ne Ntewa.

4

Þarin suþe kiena ne yermare la naþa Yermare Lego, kilali Yesu

Matiu 4:1-11; Mak 1:12-13

¹ Ana pogos naþa Yesu pimi si e lepas na wii nae Yortan naþa Yoane kee naga ea, naga pulen Ninuna Wa paþisi. Ana Ninuna þere Yesu pa ke sina ga e yokorena, ² a naga sike e yo nene pa tol legiena lualima yam vari, naþa þarin suþe kiena ne yermare lala suþa kilali naga. Ana e legiena la nene, pe kinan re poli, suþa pano pano-o tol naþa visokar na visokaria.

³ Ana Yermare Lego nene pimi pisa pania, pisape “Visae ko ope Narina ne Ntewa kemua lelaga, ovisali va kilavaru nene imi ve kilaparavi, vena okania.”

⁴ Ana Yesu pisataþnea, pisape “Peraga, komin Visena Wa pisape ‘Pe yar malin re ga kinanen poli.’ ”

⁵ Ana Yermare Lego sinenan sape kilali sina Yesu, ana þere kiena sitomena pa metava e pupia kunus tai. Kipian naga e purvanua make ga na yomarava nini, ⁶ ana pisa pania, pisape “Navisuaren yo la nene, amio kala naurarena make ga, asike pa e luþau rui. Inu noþar kian la, ana nekilia netaþnan va yar ai naþa in na sineun nesape netaþnan vania. ⁷ Pogaga, visae ovatanon inu, olotun inu, vera na neligan make sur la nene se lumoþna.”

⁸ Ana Yesu pisataþnea, pisape “Visena Wa pisape ‘Olotun ga Ntewa okila ga kiena yuþnaena naga taaga, komin naga ga pe kioþna Suþe.’ ”

⁹ Ana Yermare Lego sinenan sape kilali sina Yesu, þere kiena sitomena pito garo Yerusalem, mligan naga e yo tai naþa pa manene metava, e wos nen yuþna mþana Ntewa, ana pisa pania, pisape “Visae ko ope Narina ne Ntewa, oula oto tano. Okilia okila woga ga ne, ¹⁰ komin naþa Visena Wa pisayu Ntewa, pisape ‘Naga yoko ligan kiena navisi lala, vena aim asuþna amio ko, avisuar ko mþaga.

¹¹ Yoko ayukop yaun ko ga vena ve otan re laþna e kilavaru.’ ” *Yauena 91:11,12*

¹² Ana Yesu pisataþne ke sina ga, pisape “Peraga rui, komin Visena Wa pisa mþena ga pisape ‘Ve oþareran re okilali kioþna Suþe Ntewa vena kila kioþna sur tai.’ ”

¹³ Ana pogos naþa Yermare Lego kilali kiena nataþaliena la nene pa Yesu þisi, ana purmatania pano, naga pa suþmate ke vena lual pogos taþena naþa sitom ke sape kilia taulu Yesu ea.

Yesu siar kiena yuþmaena gar Kalele

Matiu 4:1-11; Mak 1:12-13

¹⁴ Ana siraunia, Yesu mialoro e naþareraena kiena Ninuna Wa, pimi tol yo Kalele, ana yar la apisayu naga pano-o kalo make yo lepas nene. ¹⁵ Ana naga suþma pa ke e kiela yuþma na leniena lala, suþma pian la, ana asuþma akekarana naga paþisi, asuþma apisirlua ke kiena kia.

Le Nasaret la aþmenelua Yesu

¹⁶⁻¹⁷ Ana Yesu pimi tol kiena yo naþa Nasaret, naþa kapuru pimi keviu ea, ana e Legiena Wa, sa naþa kila mna silaga, naga pa amio la e kiela yuþma nalenena. Ana asape naga ulolua Visena Wa Kiena ne Ntewa van la, ana akian tus naþa Aisea siriyu pania. Ana naga suþmalu na pikeþa tus naþani, mla e naþa sinenan sape ulolua van la, ana puloia, naþa pisa sanini, pisape

¹⁸ “Ninuna ne Ntewa sike e in rui, komin naþa Ntewa mligan inu vena in ke narui naþa nelologon Nalologena Wo va la naþa limala korena ga.

Naga mligan inu nepimin vena nevisawal va la naþa asike e yuþma naloge viowaena, nevisave nanagane, akilia amolue ga sa ga ne,

a vena nevisawal va kilamara þala lala, nevisave nanagane, kilamarala la kilia imi wo sina.

A naga mligan inun sape yeririna la naþa asike tano, naþa yar taþena la asuþma akila kare la ke silaga, yoko in na neure plan la, aim asu si e yo wo tai.

¹⁹ Ana sanene, in na nekilia nekila merarava nevisave nanagane, Ntewa kila kiena pog viu nowo tai pimi mlaivin yar la nene rui.” *Ais 61:1,2*

²⁰ Ana pogos naþa Yesu pulo nawuloena nene þisi, naga pulonar si tus, kian si pa yaru na visuaren yuþmaena, ana pa to meta e lelen nalologena, vena vis va yar lala. Ana la make ga naþa asike loyuþma asuþma atamaria Yesu asape aþma yoko aloge ya ne visa van la ne wa. ²¹ Ana pogos naþa naga siar kiena visena, ana pisa sanini, sape “Nevisa van amiu, nevisave Visena Wa kiena ne Ntewa naþa amloge ga na wa, kana visena la nene pimi pe lelaga nagane ga na wa, e maramiu.”

²² Ana pogos naþa yar la amloge visena la naþa kiena ne Yesu, amloge sane naga pis ruru po na po, pis malumu ga a pis tanea þisa, ana la amilan paþisi, asuþma apisavisa pan la sanini, asape “!Ana yar nene, naga narina ne Yosop ga nene! ?Naga þar visena tanea la ne sanene pe ne?”

²³ Ana Yesu pisataþme la, pisape “Pona sinemiun asape avisa kieta visena marua nene van inu yo, naþa pisape ‘Tokta, okila ruru ko sumo wa, ana siraunia okilia oiila yar taþena.’ Nanene komin naþa amloge þisi rui naþa nesike gar Kapeneam, nekila ruru ke namaiena la moki, ana asitom asape komin ya ne pe nepim nekila re mna sanene pan amiu e kieta yo nini poli. ²⁴ Ana lelaga nevisa van amiu, sane visae navisawalena tai, ana kiena yeririna lala nae kemua kiena yo naþa, la taþatete akekarania, taþatete alogearia. ²⁵⁻²⁶ Nanene na lelaga. Sineun nesape asitomyuli pogos kiena ne yermarua Elaisa nanua sumo. E pogos nene, yua pe powo re poli pa tol kas telu komsusa, a pupia viso tai kalo make yo Israel. ?Ana Ntewa mligan Elaisa pa miila ane e poglis nene? Apisu ke ne, pe mligan re naga panon iila letano nae Israel lala tai naþa amloge ke piowa poli, ana mligan naga pa miila letano nae pulkumali keviu nene Sareþat, nane lepas taþena naþa Saeton. ²⁷ Ana asitomyuli mna ga pogos kiena ne yermarua Elisa. ?E pogos nene, yar la moki naþa aþar leperosi, ana Ntewa kila ruru ai? Naga pe kila ruru re le Israel lala tai naþa aþar maiena nene poli, ana kila ruru ga yere Seria nene naþa Neman. Lelaga-o, ita yeririna la naþa tepisa ke tesape ita nena naþa tepe yeririna lala kiena ne Ntewa, ana yar la naþa Ntewa mligan la apimin asape akila kieta yuþmaena, ana yepeta mavin la ke sina ga.”

²⁸ Ana pogos naña la nene asike loyuña nalenena amloge visena nene, kiela sitomena la pilon pa pe tañena narui, nagane la sinela kar Yesu narui. ²⁹ Ana la aplamoluen Yesu, aþurelua naga petan kiela pulkumali pa vanua, aþure pa e pupia yeparpas tai naña kiela pulkumali ñeke ea, la sinelan asape akuan Yesu vito tano e yo ne nanene narui. ³⁰ Ana Yesu kila naña la taþatete si auarar naga, ana mial ga pa þaro likan la sanene pano, mligan la asike na.

Yesu pa garu Kapeneam, pilelua yermare tai

Mak 1:21-28

³¹ Ana Yesu mial pito tol pulkumali tañena nae Kalele, nane Kapeneam, ana e Legiena Wa naga pian la e kiela loyuña na leniena. ³² Ana la naña amiyagogonia amilan paþisi, komin amloge kiena visena urmi paþisi, a nañareraena kiena ne Ntewa sike ea. ³³ Ana pogos nene yar tai sike loyuña amio la, naña ninuna ne yermare viowa tai suña kila kare naga, ana yar naþani pio manene kare Yesu paþisi, pisa pania, pisape ³⁴ “?Ei, Yesu nae Nasaret, kioña ya na teke e imimi? !Pona ko opimin osape okila kare imimi yo, a! Komin naña in na nekilia ko rui, sane ko ope Yar Wa nena napo tai kiena ne Ntewa.”

³⁵ Ana Yesu pis ñarera pa yermare viowa naþani, pisaluþaria, pisape “!Ei, ve ovis re sina! Omolue ke vetan yar nene nagane.” Ana ninuna viowa naþani koven yar nene mloru pito tano likan la, ana molue petania pure pano, ana yar ne po sina ga sike na.

³⁶ Ana yar na yo la nene amilan paþisi, ana apisasayu Yesu, asape “?Ei, visen ya na sanene? Nanene yar ñarera tai nene yo, kiena nañareraena keviu paþisi wa. Naga pis ga pa ninuna viowa lala, ana apureure ga sa nene.” ³⁷ Ana komin sur ne la nanene narui la akekara, a asuña apisa ruru kia kiena ne Yesu mlewo pa e yo punu ga e lepas nene.

Yesu kila ruru auia simem kana Saemon Pita, amio ñena yar tañena la moki

Matiu 8:14-17; Mak 1:29-34

³⁸ Ana Yesu suñalu pa vanua e yuña nalenena nene, ana pa uña ñana Saemon, nanene gar ke Kapeneam na wa. Ana e uña nene auia simem kana Saemon mloru ñeke e togin namaiena, yepena pibusun, ana apisawal pa Yesu, apiun pania asape sanape e sira marua nene. ³⁹ Ana Yesu pimi suñalu se yepas nen sira naþani, ana pisaluþar maiena nena, ana yepen pimi manin sina, mloge nena po, ana suñalu pa miyuñaen kala kinanena.

⁴⁰ Ana pogos naña mrae pito tano, sane Legiena Wa nene þisi narui, la naña kiela namaiena la asikena, aþerela apim puna Yesu, ana Yesu þuarar la, kila ruru la. ⁴¹ A la moki naña, yermare la amolue petan la, naña asuña akiikii, asape “!Ei, ko kemua naña ope Narina ne Ntewa narui!” Ana Yesu pisaluþar yermare la naþani, pisape ve avisa re si suri tai, komin naña akilia rui asape naga Navisaarena kemua lelaga.

Yesu mlologo make ga e lepas lala nae Yutea

Mak 1:35-39

⁴² Ana kolulag kona, Yesu suñalu naga taaga molue pa vanua, pa e yo ñano tai naña pa ruru po na po paþisi. Ana siraunia, yar la apiminia, akale ña pano-o añal e yo ne nanene, a la sinelan asape naga suña amio la, akilali asape avisaluþaria vena ve ligan la re, ⁴³ ana pisa pan la, pisape “Toko, in na monar neva nelologon Nalologena Wo na suþenena kiena ne Ntewa va e pulkumali tañena la naña asike ga wa, komin naga mligan inu nepimin suri ne nanene.” ⁴⁴ Ana naga petan la, pano mlologo teliv make e yuña nalenena lala e pulkumali punu ga nae lepas naña Yutea.

5

La naña Yesu pio la þesania, apa ataveve naga

Matiu 4:18-22; Mak 1:16-20

¹ Pogos tai, Yesu sike e yepas nen pupia lapa naña laþas asape Lapa nae Kenasaret, a laþas asape Lapa nae Kalele. A e pogos nene, yaru la naña asuñalu amiyervivi Yesu la

moki paḗisi, sane yepa ve tokaki ga, komin naḗa sinelan asape aloge naga lologon visena kiena ne Ntewa van la. ² Ana Yesu pisu waa lua naḗa sike ga lavisinia, naḗa aḗure pimi sike ga e kukunone, a pisu kana yar ne la asuḗalu asike e sive, asuḗa akevan ke kiela lilivi lala. ³ Ana Yesu mial pano pa miai e waa tai nene, naḗa kiena ne Saemon, ana pisa pania pisape suponlua va li laa sane. Ana Yesu teke e waa naḗani, toḗna pian ke la naḗa asike ura.

⁴ Ana pogos naḗa naga pis pan la ḗisi, naga pisa pa Saemon, pisape “Ita, in na sineun nesape teva re laa e lowe memaena, vena toure re lilivi wa.”

⁵ Ana Saemon pisataḗnea, pisape “E yerkawa, imimi mekila sur nene rui pano-o yemlagi, ana pe metol re nena ika tai poli. Ana komin naḗa opisa sanene pan inu, poga, nekekarana naḗa tevali ga.” ⁶ Ana la apa akila sa naḗa Yesu pisa, ana la amilan pupia ḗegas nen ika tai pulen ga kiela lilivi naḗani, kila kiela lilivi nene siar pororovia, ⁷ ana la apio laḗas naḗa asike e waa taḗena, la akuḗin limalan la vena aim aiila la. Ana la naḗa apim, ana asuḗa aḗere lilivi naḗani amio kana ika ne lala apa metava e waa luwoka nene, pano-o waa luwoka ga naḗani pulemamaga ruru nena ga, lavis luoka ga talilu.

⁸ Ana Saemon pisu sur la nene, pisu kilale sane Yesu ga miyuḗaen e kiena pupia naḗareraena wa, ana kinai tano e mialana ne Yesu, pisape “Suḗe, in na nepe yar viowa ga tai. Popon oure matan inu, ve osu re si lavisin inu.” ⁹ A pe naga re ga taaga po, ana la ḗena naḗa asike amio e pogos nene, la punu ga amilan ḗan wa e pupia ḗegas nen ika naḗa la aḗar ne, ¹⁰ amio narina ne Sepeti lua nene, Semes lalua Yoane, naḗa asikol la amio Saemon amiyuḗae lele taaga, la ḗena luoka amilan paḗisi.

Ana Yesu pis pa Saemon, pisape “Ei, ve omaraun re si sur nene. Siar nagane, yoko ve oure re si ika, ana yoko osuḗa oure yar la aimi ataveve inu.” ¹¹ Ana aḗasuḗe la, aḗere si kiela waa la naḗani apa ura, ana pe akila re si sur taḗena poli, amligan kiela sur punu ga suḗa sanene, ana ataveve Yesu apavini.

Yesu kila ruru yaru tai naḗa ḗar leperosi

Matiu 8:1-4; Mak 1:44-45

¹² Ana siraunia, e pogos tai, Yesu sike pulkumali tai e yo nene, ana yar tai ḗalia pimi puna, naḗa yaru nena, maiena naḗa leperosi kilapel naga kila kare nena tasnena. Ana yaru naḗani pimi mloru e lana ne Yesu, tag pania, piun tania, pisape “Suḗe! In na nemlelaga nesape ko okilia okila ruru in si wo ga, ana visae okekarania, in na sineun nesape neviun tan ko vena okila inu neikiki sina ga.”

¹³ Ana Yesu pe maraun re tolen maiena kiena ne yar nene poli, ana puararia, pisa pania pisape “Ee, in na sineun nesape yepena yania.” Ana veraga ga yepena miania, leperosi naḗani ḗisi e naga. ¹⁴ Ana Yesu pisa pania, pisape “Omloge ke ne, ovano ve ovisayu re sur nene va yar lala wa, ana nanagane ova nena okom puna ne yar wa vena naga visu ko lia, a kilia visawal visave tasneḗa mian rui. Siraunia, ana monar ova okila lotena va Ntewa a okila kupapaena na kioḗa yepe ikikena nene, sa naḗa Mosis pisape monar akila.” ¹⁵ Yesu pisape yar nene vano ve visayu re sur nene, ana peraga, pe piavi re poli asuḗa apisayu ḗa Yesu pano-o pa tol yo punu ga, kila sane pupia ḗina la apimin asape aloge kiena visena, ana la sinelan asape naga kila ruru kiela namaiena lala. ¹⁶ Ana e pogos la punu nene Yesu suḗa petan ḗena yeririna lala, pa ke e yokorena, mlen ke pa Ntewa.

Yesu kilia viewo mlamulena viowa

Matiu 9:1-8; Mak 2:1-12

¹⁷ Ana pogos sina tai, Yesu pian la ḗaga, a Varasi laḗasa amio navianena navisaluaena lala atoḗaga tano e nene, naḗa la na pulkumali taḗena lala e lepas lala nae Kalele amio Yutea, a laḗasia amolue Yerusalem apimi. Ana e pogos nene, naḗareraena kiena ne Ntewa pimi keviu manene laa e Yesu narui, kila naga kila ruru namaiena lala. ¹⁸ Ana yar laḗasia akus namaiena tai pimi, naḗa yepena la punu ga marmare, naḗa akus pimi ana mlor ga ḗeke e ḗana tog. La sinelan asape akus imi loyuḗa aligan mon lavisin Yesu, ¹⁹ ana apisu sane pupia ḗina ḗeke pa loyuḗa rui, ana yo ve tokak paḗisi, taḗatete akus

kiela erau nene vano. Ana akus pa metava e wos nen yuṁa narui, akawepo lologia Yesu, ana amligan malumun yaru naṁa amio ṁana tog pito tano e pulus naṁani, pito ṁeke likan yeririna lala, ṁeke nena ga vamon Yesu. ²⁰ A pogos naṁa Yesu pisu suri nene, naga kilia naṁa la amlalaga ṁarera e naga paṁisi, asape yoko naga iila namaiena nene, ana naga pisa pania, pisape “Ṃara, in na nepiewo kioṁa mlamulena viowa rui.”

²¹ Ana pogos naṁa Varasi amio navianen navisaluaena lala amloge visena nene, asitom piowa e naga paṁisi, ana asuṁa apiuviunia, asape “?Ane ṁarnena kare ke kia wa kiena ne Ntewa sanene? Ntewa naga taaga kilia viewo mlamulena viowa, pe yar taṁena re si poli, ana yaru nene pis ke sa naṁa naga sitom ke sape naga Ntewa nene narui.”

²² Ana Yesu mninu kilale rui sape asitom ke piowa sanene e naga, ana pisa pan la, pisape “?Komin ya ne sinemiu la pulen ke sitomena viowa la sanene? ²³ Visae nevisa ve sanini va namaiena nene, nevisave ‘In na nepiewo kioṁa mlamulena piowa,’ pona nevisa vania nevisave ‘Osuṁalu, oyali,’ ana visena lua nene, tai ṁareran navisaena, a tai meme ga. Na naṁa sape ‘Osuṁalu, oyali,’ naga ṁarera laa sane, komin naṁa yoko okilia ovisu kilale sane kiau visena pe lelaga pona peraga, naṁa yar nene suṁalu pona taṁatete suṁalu. ²⁴ Ana nanagane ṁisi na nekila suri tai naṁa asitom asape Ntewa ga naga taaga kilia kila, ana avisu kilale sane in na Narina ne Yeririna, naṁareraena sike e inu. A nevisa van amiu, nesape naṁareraena nene torokin nekilia neviewo ṁena mlamulena viowa e yomarava nini. Ayagogo ruruia.”

Ana Yesu pis pa namaiena naṁani, pisape “Nevisa van ko, nesape osuṁalu, ovilonar moṁa tog, oyali ova uṁa.”

²⁵ Ana sa nena nene, e marana ne la naṁa apisu ke ne, yar nene suṁalu, ṁar ṁana tog, mial pa vanua, naga pa uṁa naṁa suṁa miyeluarlilien Ntewa sanene pano.

²⁶ A pogos na la naṁani apisu suri nene, amilan kare nena lelaga, yepela ṁil paṁisi, asuṁa amiyeluar Ntewa, asape “E suwala, lelaga kemua-o, ṁane na ita tepisu sur tai naṁa pe taṁena paṁisi!”

Yesu pio Matiu, naṁa apio ṁena Livae, pimi tavevea

Matiu 9:9-13; Mak 2:13-17

²⁷ Ana siraunia, Yesu mialili ga pa laa sane, ana ṁal yar tai totano teke e kiena yuṁaena e yuṁa na warpoloen takis. Yaru nena, kiena kia Livae. Ana Yesu pio, sape “Oim otaveve inu.” ²⁸ Ana Livae suṁalu nena ga, mligan kiena yuṁaena, mligan kiena suri punu ga sike na, ana taveve Yesu. ²⁹ Siraunia, Livae nena kila pupia kinanena tai kana ne Yesu e ṁana uṁa, a e pogos nene, yar na takis taṁena la moki, amio ṁena yar taṁena la moki na sanene, la ṁena apim ato lele taaga amio Yesu amio kiena nalogenala lala e kinanena naṁani. ³⁰ Ana Varasi laṁasia, amio kiela navianen navisaluaena laṁasia, apragogo pa nalogenala lala, asape “?Komin ya ne akinan ke lele taaga sanene amio yaru viowa lala a ṁararera la nene?”

³¹ Ana Yesu ke pisataṁe la narui, pisape “La naṁa tasnela ṁarera ruru poga ga, la pe asitom re asape ava akom pun yar na kilaruruen maiena poli, ana la ga naṁa aṁar maiena, la sinelan paṁisi. ³² In na pe nepimin re nevio yar la naṁa apisa ke asape la apo rui e marana ne Ntewa vena ataveve inu, ana in na nepimin ke yeririna viowa la ne sanene narui, vena avilopu la vetan kiela mlamulena viowa lala.”

Naviunena tai e lepas na monsilena

Matiu 9:14-17; Mak 2:18-22

³³ Ana la apiun naviunena tai pa Yesu, asape “Nalogenala kiena ne Yoane Nakeena la asuṁa apuarar ruru ke ṁelaga nene naṁa yam mokliu, asuṁa amonsilu ga vena alen va Ntewa, a Varasi ṁena la akila sa ke ga. ?Ana komin ya ne kioṁa nalogenala pe akila re poli, ana la asuṁa akinana a asuṁa amun ga sanene?”

³⁴ Ana Yesu pisataṁe la, pisayu naga amio kiena nalogenala lala, sane la akekara paṁisi pogos naṁa naga sike amio la, ana yoko sinela viowa sirau e pogos naṁa naga ure matan la. Ana pisape “?Pogos naṁa yar natalopaena sike amio kiena erau lala wa, asitom asape

yoko akilia aligan kinanena na p̄aṗagena nene sike na, ve akan re? Peraga. ³⁵ Ana yoko pogos tai imi, naṗa yoko aurelua yar natalopaena nene vetan kiena erau lala, a e pogos nene narui akilia amonsilu, komin naṗa sinela miye naga paṗisi.”

Sur marua amio sur vii

³⁶ P̄elaga na monsilena nene, naga p̄elaga marua tai nalotena kiena ne le Yu lala, ana Yesu sinenan sape kila meraravan sane p̄elaga marua na sanene, taṗatete asikol amio suri vii la naṗa naga pian la ke ea, ana pisa p̄akaiwa tai e lepas nene pan la. Pisape “Taṗatete ola kinakinas nen kulmrae vii tai, naṗa ovitolṗa kinakinas tai, ana osuluar e kulmrae marua vena kilawo pulus naṗa teke ea. Visae sanene, yoko opitol p̄a kare kulmrae vii nene narui, ana kana kinakinasa, yoko taṗatete nena marana ve sa ke kulmrae marua nene, ana apisu piowa ga. ³⁷ A taṗatete okokonia kuruta vii naṗa m̄eke p̄eṗela ke ga wa va e kulus nen nane tai naṗa pe urmarua, naṗa akon kuruta pa e yam moki li rui. Visae okila sanene, yoko kuruta vii nene lapa, kila kulus nen nane naṗani m̄apo, ana kuruta nene lau kare ga ne, ana kana pias m̄ena imi viowa nena ga. ³⁸ Ana kuruta vii, monar okokonia va e kulus nen nane naṗa naga m̄ena pe urvii, naga m̄arera ruru po, a okilia oligan ruru moṃa kuruta mon m̄a ea. ³⁹ A pogos m̄ena naṗa yar la amun kuruta naṗa amiyuṃaen towe laa nanua rui, yoko ve sinelan re si munen kuruta vii, naṗa amiyuṃaen mare ga na wa, ana yoko monar avisave kuruta marua naga kiki laa sane.”

6

Yesu pe suṗen Legiena Wa

Matiu 12:1-8; Mak 2:23-28

¹ Ana e sina ga e legiena tai, naṗa pe Legiena Wa, Yesu amio kiena nalogena lala amiyaloro apano, a kiela mrapa pa p̄aro e lokove na kona lala. La amiyal m̄a sanene, ana nalogena lala viso kar la ana akawe plan kona laṗas naṗani, apae vania, akania. ² La akila ke sanene, ana Varasi laṗas asuṃa e naṗani, apisu ke Yesu lala, ana apisa pania, apisape “Ei, komin ya ne asuṃa akila ke yuṃaena nene e Legiena Wa sanene? Visae sanene, asuṃa akilaro ke kieta navisaluaena ne.”

³ Ana Yesu pisataṃe la, pisape “?Pona pe apuloli re Visena Wa pog tai poli yo wa, e sur la naṗa P̄arin Suṗe Tepet nanua naga kila? !Kam na akilia pa rui! Naga amio kiena yeririna lala la viso kar la manenea, ⁴ ana naga pa loyuṃa e yuṃa wa m̄ana Ntewa, a naga mla kilaparavi wa naṗa Navisaluaena sape yar wa ga la akilia akania, ana Tepet amio kiena yeririna la akania.”

⁵ Ana Yesu pisa pan la, pisape “Inu Narina ne Yeririna, inu ke narui nepe suṗen Legiena Wa, ana inu ga nekilia nevisa ya naṗa popon akila e Legiena Wa, pona ya naṗa pe pon re akila poli.”

Yesu kila ruru limaulu tai e Legiena Wa

Matiu 12:9-14; Mak 3:1-6

⁶ A e si e Legiena Wa tai, Yesu pa si loyuṃa e yuṃa na leniena, pian la. Ana poglis nene yar m̄ena tai sike loyuṃa naṗani, limana marua pulu. ⁷ Ana navianen navisaluaena lala, amio Varasi lala, naṗa la sinela kar Yesu rui, asike ga lavisinia e poglis nene, asuṃa apisuar ruruia p̄isa, vena asape alual li p̄elaga viowa laṗasa e naga, ana la sinelan asape avisu sane yoko Yesu kila ruru limaulu naṗani e kiela Legiena Wa nene pona yoko ve kila re.

⁸ Ana Yesu kilia ruru make ya naṗa sike e kiela sitomena, ana pis pa yar naṗani, sape “Osuṃalu, ovam osu metava e nini sumo wa,” ana naga suṃalu pavini. ⁹ Ana Yesu piun tan la naṗa asike e ne, pisape “?Kieta Navisaluaena sape tekilia tekila ya ne e Legiena Wa? ?Pisape popon tekila sur wo pona popon tekila sur viowa? ?Pona pisape popon tetamalia yaru, pona popon toweṃar yaru?” ¹⁰ Ana Yesu pisuveve la make ga, ana pis sina pa yaru naṗani, pisape “Lumoṃa visilia!” A e ga e pogos naṗa yar nene kila sanene, limana naṗani pimi po nenaga.

¹¹ Ana le Varasi lala sinela mimi, naña sane amloge mlae pañisi, ana apa vanua apisayu weleli sane yoko akila ve sanape na va Yesu.

Yesu mliganar kiena nalogena la lualima taaga pa lua

Matiu 10:1-4; Mak 3:13-19

¹² Ana siraunia, e sina e pogos tai, Yesu pa metava e pupia tavie tai vena naga se ea, len va Ntewa, ana suña kila ke sanene e yo nañani pa tol yemlagi. ¹³ Ana kolulag na pitomi pio kiena nalogena lala apimi lele taaga puna, ana e la nene, naga pisawal la lualima taaga pa lua naña naga mliganar la pisape la narui, la ape nalologena.

¹⁴ Ana kia kiena ne la lualima taaga pa lua nanini:

Saemon, naña Yesu mliganar kiena kia tañena, sape Pita,

a wenla naña Antru,

a Semes, a wenla naña Yoane,

a Pilip,

a Patalomiu,

¹⁵ a Matiu,

a Toñas,

a Semes, naña narina ne Alpeas,

a Saemon, naña sape ñene plan le Rom lala,

a Sutas, naña narina ne Semes,

¹⁶ a Sutas nae Kariot, naña siraunia naga kom varaun Yesu.

Yesu suña mlologo a kila ruru namaiena lala

Matiu 5:1-12

¹⁷ Ana Yesu ñere nalologena la nene apitom si tano, ana añal yotop tai, apa asike ea. A poglis nene, nalogena kiena ne Yesu tañena lala apule ga asike ea, amio ñena pupia ñina lala na pulkumali tañena lala nae Yutea, a le Yerusalem ñena lala, amio le Taea a le Saeton lala, naña amolue e kiela yo lala garo losi lavisin sive apami. ¹⁸ La nene apamin asape aloge visena lala kiena ne Yesu, a la sinelan asape kila ruru kiela maiena lala. Ana Yesu kila ña sanene pan la pano-o, naga kila ruru ñena la naña yermare lala asuña akila kare la ke silaga.

¹⁹ Yaru la moki manene pañisi, ana la punu ga sinelan asape atol ga Yesu, vena la aninuli ga pupia nañareraena naña apisu sane suña ñalivi ke ea, naña suña kila ruru ke yar la moki rui.

Navianena lala kiena ne Yesu

²⁰ Ana Yesu kira pisu kiena na-logena la nene, ana pian la, pisape:

“Kam naña apisu kilale sane limamiu koren ga, navisa ruruena sike e amiu, komin amiu ke narui naña Ntewa naga pe ñarin suñen amiu, ana visuar amiu.

²¹ Kam naña viso kar amiu ke nagane, navisa ruruena sike e amiu, yoko aloge sane aim aulemaamaga nena ga e suri wo ne lala.

Kam naña atagi ke nagane, navisa ruruena sike e amiu, yoko akilia akekara.

²² Kam naña yar la pe akekaran amiu re poli, a naña asuña yepel mavin amiu, a naña asuña apisa kare amiu, a asuña akoven plan ke kiamiu kia lala sane kam na ape yar viowa ga lala, nanene komin naña kam na ape yar kiena ne inu Narina ne Yeririna, navisa ruruena sike e amiu.

²³ E pogos la ne sanene, ve asitom manene re, aulaula ga warar pupia kekarena, komin naña asuña akila kare amiu ke ga e ñelaga ña nena naña repila lala akila pa navisawalena la nanua sumo. Ana pogaga, yoko awar kiamiu pupia nalaena ma e peni.

²⁴ Ana kam la naña ape nasur moki manenea, yoko viowa manene laa van amiu, komin naña añar kiamiu nalogewoena a kiamiu nakekarena lala e kiamiu malena wo la na yomarava nini rui.

²⁵ A kam la naþa mēþemiu pulemamaga ruru pa sike rui, yoko viowa van amiu vaþisi, komin naþa yoko viso kar amiu manene va laa sane.

A kam naþa apitale ke nanagane rui, yoko viowa van amiu vaþisi, komin þisi na aloge viowa, atagi.

²⁶ “A monar avisuar ruru amiu pogos naþa yar la asuþna amieluar ke kiamiu kia. Visae ve sanene, pe pon re amiu mēna asitom ke asape amiu na apo, komin naþa navisawalena navisokanena la nanua sumo, kieta yermarua la amiyeluar kiela kia la sanene, ana Ntewa pisu la sane la apiowa ga ana mla nakoena pan la.”

Yesu pisayu sinesien manene nasinekar lala

Matiu 5:38-48, 7:1-5

²⁷ Ana Yesu pisape “Kam la naþa amloge kilale ke kiau visena nene, in na nevisa van amiu, nevisave: Monar sineta si kieta nasinekar lala, a monar tekila wo van la naþa pe asitom ita re poli, ²⁸ a monar tevisa ruru la naþa apiuelin ita, a monar telenwo la naþa akila kare ita. ²⁹ Visae yar tai lipa pipiþna lepas tai, ko monar ovilopu mēna pipiþna lepas þasia vania vena lipa, a visae yar tai māraran van ko vena war moþna kulsaket, yoko monar okekaran ga war mēna moþna kulsota. ³⁰ Visae yar tai viun kioþna sur tai, monar ola vania, a visae yar tai lalua kioþna suri tai, yoko ve ova oviun re si tania vena lamaran si van ko. ³¹ Þelaga ya naþa sinoþman vena yar la akila van ko, þelaga ne nanene yoko monar okila van la.

³² “Visae tesuþna sineta si ga yaru la naþa asitom ita, nanene na pe sur re tai nene po laa wa, komin yar nakilaen mlamulena viowa lala asitom ke la naþa asitom la rui. ³³ Pona visae tekila ga wo van la naþa akila ke po pan ita rui, naga mēna pe sur re tai nene poli, komin yar nakilaen mlamulena lala, la mēna akila ke sanene rui. ³⁴ Pona visae tetaþnan ga kilavaru va la naþa akilia alamaran sina, naga mēna ga pe pe sur re tai nene po laa wa, komin yaru nakilaen mlamulena la akila ke yuþnaena nene silaga.

³⁵ “Ana in na nevisa van amiu, nevisave: Sineþna si kioþna nasinekar, a okila wo vania, a otaþnan ga kioþna kilavaru sa ga ne, naþa ve ositom manene re van naþa omla pania, ovisave pona kilia lamaran si pogos tai, pona taþatete si lamarana. Visae osuþna okila ke sanene, osuþna okus ke þelaga kiena ne Arimata Yaru na Meta ne, a naga yoko la nalaena tai van ko ve keviu laa sane, komin naþa naga yar sur naþa sinen po pan la naþa pe apisa re potena pan poli, pona la naþa asitom la ke sina. ³⁶ Sanene, ko na monar sineþna ye yar lala sa naþa Arimata naga sinena miye la.”

Yesu pisayu naliþereen yar taþena

Matiu 7:1-5

³⁷ Ana Yesu pis ke pan la na wa, pisape “Yoko ve aliþere manene re yar taþena pona ala nakoena vania. Visae sanene, yoko Ntewa taþatete liþere manene amiu, taþatete la nakoena van amiu. Visae aviewo yar taþena, yoko Ntewa viewo amiu, ³⁸ a visae ala sur va yaru taþena, yoko Ntewa la sur imi van amiu. A yoko Ntewa laa van amiu ve keviu la sane taulu naþa amlavia, yoko naga war ve moki vaþisi, sa naþa akokonia karo, atanaria, yoko amiyalar mēna ga, pano-o pulemamaga ruru nenaga, suri laþas kekapil pito ke tano. Lelaga paþisi, yokorena awar imi pun amiu maran ve taaga sa ke ga naþa aþarwar ke pan yar taþena.”

Monar avisuar ruru kiamiu malena

³⁹ Ana Yesu pis ke pan la na wa, pisa þakaiwa tai pan la, pisape “?Sanape, visae kilamara þala tai suþna ga, ana naga kilia sumon kilamara þala taþena tai lalua ayalþel woga ga? !Peraga, yoko la ga luwoka aloru ato e þiliþili tai ne! ⁴⁰ Nalogenaga naga pe pa manene re metavan yar naþa pian ke naga poli, ana visae naga kilia ruru make sur la naþa navianena piania, yoko naga imi maran ve taaga sa ke ga kiena navianena. ⁴¹ Pe pon re osuþna ovisavisa ke narin kororaki tai naþa teke e kilamarana ne womla poli, ana pe opisus kilale re osape pupia purþes nen laki tai mēke e kilamaraþna poli.

⁴² “?Sanape na osape ovisa va womla nene, ovisave ‘Wolai, yoko nowarlua kone kororaki na kilamaraña wa’? Sanene ko na pe opisu kilale re kioña mlamulena viowa poli, a osuña omliṗere ke ga mlamulena viowa kien yar taṗena lala. Okilia ña naṗa ko opiowa ga, ana osape okila sane yar la asape ko opo rui. Okus lua pupia miasin laki na ñeke e kilamaraña sumo wa, ṗisi na okilia ovisuveve narin kinakinas nen kororaki naṗa teke e kilamaran yar taṗena nene.”

Purlaki amio mrasa

Matiu 7:16-20, 12:33-35

⁴³ Ana Yesu pisa ñena ga, pisape “Purlaki naṗa po taṗatete war mras naṗa piowa, a purlaki naṗa piowa taṗatete war mras naṗa po. ⁴⁴ Ee, sanene narui, naṗa tevisu kilale purlaki, tesape sanape e ga e mrasnela. Mralaki la naṗa mam ruru po, pe toṗar re e viluñini la naṗa pe nenos poli, peraga. ⁴⁵ Yaru naṗa po naga miyuwon ruru suri wo la sike e losinena, ana silaga kiena sitomena wo suña ga naṗa kilia visaplania, ana yaru viowa naga suña ṗarpolo ke suri viowa e losinena, ana naga visa plan ga sitomena viowa lala. Suri ya naṗa pule sike e los nen yaru pona e kiena sitomena, sur ne na nene narui yoko suña molmolue luen ga e gona.”

Yuña lua

Matiu 7:24-27

⁴⁶ Ana Yesu pisape “?Komin ya ne apio in ke asape ‘Suṗe o, Suṗe o,’ ana siraunia pe asuña amlogear re ya naṗa nepisa pan amiu nesape akila poli? ⁴⁷ Yar naṗa pimi pun inu, mloge kiau visena, naga monar logearia a monar kila. Yar naṗa kila sanene naga sa naṗa suniena tai pisayuia, naṗa pisa sanini: ⁴⁸ Yar tai suña kila ke ñana yuña, a yaru nene pe manmarua ruru po, kil ṗiliṗili la pito manene tano vena tol yo ñarera tano, ana maplar kemraṗe lala e pulus la naṗani. Ana pogos na pog ñarera, pupia womie lau, ana taṗatete nena kila yuña nene kulul, komin naṗa yar na kila, kila ruru ñarera po. ⁴⁹ Ana yar naṗa mloge kiau visen lala, ana pe mlogear re poli, naga sane yar taṗena tai. Yar nena, naga ñena miyuñaen ñana yuña tai, ana naga pe wowe ga, miyuñaen ñana yuña suñal yau ga e porotano, kana kemraṗe ne la pe pito manene re nena tano poli. Ana pogos naṗa pog ñarera, pupia womie mlau pitomi, kil lua yuña naṗa, kilalua mloru, ana yuña naṗa pororovia, piowa make nenaga.”

7

Yer kawa na mara nae Rom tai mlelaga ñarera e Yesu

Matiu 8:5-13

¹ Ana pogos naṗa Yesu pisa plan kiena navianena la naṗani ṗisi, naga pa loyuña e pulkumali nae Kapeneam. ² Ana e yo nene, nasumonon li na mara nae Rom tai sike ea, ana naga kiena yar wo na yuñaena tai naga mai paṗisi, lavis ga kovio. ³ Ana pogos naṗa mloge yar la apisayu ke Yesu, asape pimi ke lavisin kiela yo rui, ana pio nasumonena kiena ne le Yu lala, pitetalia la apanon Yesu, vena aviun tania imi kila ruru namaiena nene.

⁴ Ana la naṗani apim puna Yesu, apisayu namaiena naṗa pania, ana apiun manene tan sanini, asape “Nasumonon li na mara la nene, popon sa oimi oiila naga. ⁵ Lelaga naṗa sane naga pe ita re tai nene poli, naga pe yere Rom ga, ana naga pe yar tai naṗa sitom manene kieta ṗegas nen yeririna la paṗisi, ana naga ñena miila imimi e yo nini keviu paṗisi rui, naṗa miyuñaen kiamimi yuña na leniena. Ana visae ko okekarania, oim ovisu kiena yaru nene naṗa mai paṗisi.”

⁶ Ana Yesu tañania, ana pa amio la. La amial apano, ana pogos naṗa asike towe laa perinan yuña ñana nasumonon li na mara nena wa, apisu yaru laṗasa amiyal ke apimi. La nene, erau kiena ne nasumonena si laṗasa, naṗa naga pitetalia la si apim puna Yesu, vena avisa kiena visena tai vania. Ana la apim apisawal pa Yesu, apisape “Yere Rom naṗani mligan imimi mepim si puña, pisa sanini, pisape naga suña kila kare ko paṗisi.

Naga pisape naga pisu sa naþa naga pe yaru tai naþa pe torokin re oim m̃ana loyuṃna poli. ⁷ A sitomena nene kila naga pisu sane pe pon re m̃ena naga imi kate puṃna poli, komin naga pe pe yere Yu re sane ko poli, ana naga pisa ga pisape, visae ovisa ga visena tai, yoko kiena yaru nene loge wo woga ne. ⁸ Naga kilia sape monar ve sanene komin naga kilia sape kioṃna visena naga naṃareraena sike ea. Naga sape suri nene naga sane li na mara la naþa asike vatanonia, naþa la monar alogear kiena visena. Visae visa van tai, visave 'Ovano,' naga monar vano, pona visae visave 'Oimi,' naga monar imi, pona visae visave 'Okila sanene,' yoko naga monar kila. A naga m̃ena sape monar kila ya naþa pupia yerkaṃna nasumonen li na mara la pisa pania. Naga sape naga sitom sanene narui, visae ovisa ga sur tai, ana monar ve sanene."

⁹ Pogos naþa Yesu mloge visena nene, naga milan sitomen kiena ne nasumonen li na mara la nene paþisi, a kekaran paþisi, ana pis pa þina la naþa asike amio e poglis nene, sape "Nevisa van amiu, nevisave pe noṃal re nena yere Yu tai naþa suṃal m̃arera se e in sane yar nene poli."

¹⁰ Ana siraunia, la nene aþasuþela si apa m̃ana nasumonen li na mara la naþani, ana la amilan naþa apisu namaiena nene pimi po si rui.

Yesu kila si m̃ee kiena letano tai mal si petan marena

¹¹ Ana siraunia, pe yam piavi re poli, Yesu mial pa tol pulkumali taþena tai, kiena kila Naeni, a sa naþa silaga, kiena nalogena lala amio yaru taþena la moki asuṃna ataveve ke naga. ¹² Ana pogos naþa Yesu lala apim ke lavisin pupia mralaea na pulkumali nene, apisu sane yar la amiyalvai apim, asuṃna akus ke yar mare tai pano vena ava asinia. Naga naþa mare ne, naga m̃ee tai naþa anena pe letano. Letano nene, naga pe þar re si narina tai poli, naga þar nena taaga ne nane mare narui. ¹³ Ana Yesu la asuṃna apisu ke la naþa amial apim, ana pogos naþa kieta Suþe pisu letano nene, naga sinen mie pano-o þisa. Ana pa lavisinia, pisa pania, sape "E, tagen toko." ¹⁴ Ana Yesu pimi lavisin marena nene, mligan limana tea, a la naþa akus pa ke ne asuṃalar la asu, pe amiyal re si poli. Ana naga pis pa yar mare naþani, pisape "E, nevisa van ko, osuṃalu si na wa."

¹⁵ Ana m̃ee nene suṃalu, suṃna pivis pan la, apikevike van sina, ana Yesu sumon naga pano, mligan si pa anena. ¹⁶ Ana pogos naþa yar la apisu sur nene, sinela kurkur paþisi, a asuṃna amieluar Ntewa, asape "!Ake, suwala! Pupia navisawalena kiena ne Ntewa suṃalu nena sike likan ita rui." A laþas apisa m̃ena, asape "!Lelaga þa! Ntewa pimi katen kiena yeririna la rui." ¹⁷ A suniena na suri nene, asuṃna apisalelein pano, pano-o tol lepas naþa Yutea, amio yo taþena la naþa asike lavisinia.

*Yoane Nakeena pitetalia kiena nalogena lala apim pu Yesu
Matiu 11:2-19*

¹⁸ Ana e pogos nene, Yoane Nakeena sike e yuṃna nakoena rui, ana kiena nalogena la apim apisayu pania e sur la punu ga naþa Yesu suṃna kila. ¹⁹ Ana Yoane pis ga pan lala lua, pitetalia la apa puna kieta Suþe, vena ava aviun ruru tania, avisave naga Navisaarena naþa asuṃmate ke ne, pona pe naga re poli. ²⁰ Ana la amial apim apisu Yesu, apiun sanini pania, asape "?Kiamimi yerkaṃna naþa Yoane sinenan sape kilia sanape? ?Ko na yar sur naþa apisa nanua sumo asape yoko yerkaṃna tai imi ve kieta nasumon itaena, pona pe ko re na nene poli wa, a monar mesuṃmate ke yar nene yoko imi na wa?"

²¹ Ana e nena e pogos naþa apim apiun naviunena nene, Yesu suṃna kila ruru ke maiena lala a suṃna pile plan ke yermare petan yeririna lala, a suṃna kila ke kilamara þala lala, kilamarala la pimi po sina, ana nalogena kiena ne Yoane la apisu sur la nene. ²² Ana Yesu pisataṃne la, pisape "Awasuþe amiu si ava puna Yoane, ana avisawal sur ya naþa apisuia pona amloge e nini. Suri la nene asa ga naþa navisawalena Aisea pisa pan amiu rui, naþa sape:

'Kilamaraþala lala, nanagane apisu si suri rui,
a laulu lala nanagane amial ruru si rui,
a yaru la naþa aþar leperosi, nanagane tasnela la mekik ruru si rui,

a kiligapoŕe lala, nanagane amloge si suri narui,
 a yar mare lala, nanagane amal si rui,
 a la naŕa limala korena, nepisawal Lologena Wo pan la rui.'

²³ Ana ava avisawal mēna va Yoane, avisave 'Yaru naŕa pe sinen peve lua re e inu pog tai poli, navisa ruruena sike e naga.'

Yesu pisayu Yoane Nakeena

²⁴ Ana pogos naŕa nalogena kiena Yoane la amolue sina vena awasuŕe avano, Yesu pisayu Yoane nene pa yeririna la naŕa asike ne, sape "Pogos naŕa apa ŕesan e yokorena nene, apanon asape avisu ya ne? !In na pe nesitom re nesape apanon ga avisu kana kiai ne la poli, naŕa sisilin kare ke ga sanene. ²⁵ A in na pe nesitom re mēna nesape apa apisu yerkawa tai naŕa miyen mēna kulsota nowo la poli, po sike e malena naapo, komin yaru sur la ne sanene, la pe asusu re e yo viowa la ne sane yomema nene poli, ana la asike ga e yuŕna naapo mēna ŕarin suŕe keviu lala. ²⁶ Peraga, ana in na nesitom nesape apanon apisu navisawalena tai, ne? Nanene naapo ne, ana nevisa van amiu, Yoane naŕa apanon apisuia, naga pa laa sane, naga taulu navisawalena nasumo lala, ²⁷ komin naŕa Ntewa pisayu naga e kiena visena wa rui, sape

'In na nemligan ŕesan kiau yaru na waren visena nene pitomi pun ko, vena kila ruru kioŕna mrapa.'

Mal 3:1

²⁸ "Lelaga nevisa van amiu, sane e yomarava nini Yoane Nakeena nene naga mon metavan make yar la punu ga. Ana la punu naŕa yoko aim e nasuŕenena kiena ne Ntewa, vito tol kiela yar maro naŕa sike laa tano, la punu nene la asike metavan Yoane, naŕa yoko la awar navisa ruruena kiena ne Ntewa va laa sane taulu naga."

²⁹ Ana pogos naŕa apa amiyagogon Yoane Nakeena mlologo, naga pisawal mrapa kiena ne Ntewa vena la akilia avilopu la. Ana yar viowa la moki, pa tol mēna yaru na takis lala, apisu sane mrapa nene pe lelaga, ana apilon la, ana Yoane kee la e wii. ³⁰ Ana yar taŕena lala, sa naŕa Varasi lala amio navianen navisaluaena lala, la apilopu māsila e mrapa naŕa Ntewa kila vena akilia avilon la ea, ana Yoane pe kee la re poli.

Yesu pis mārera pa yeririna la e kiena pogosia

³¹ Ana Yesu pis mārera pa yar na vilaveena lala e poglis nene, pisape "Yoko nevisa visena ya naŕa kilia tol ŕelaga ken la na nagane, sane la ape yar ya? ³²⁻³⁴ E lepas punu ga naŕa Ntewa kila vena kilali wo van amiu, ana yepemiu mavin ga, apisa kare ga naga vanonia. Komin poglis naŕa Yoane pimi, naga suŕna monsilun kinanena vena len, a naga mlon kuruta namunena, ana yaru la apisu sanene, asuŕna apisayuia, asape 'Yaru nene, yermare sike e naga.'

"Ana pogos naŕa inu Narina ne Yeririna nepim nesike na, nekinan ruru ga a nomun ruru ga, ana apisayu si inu ŕisa, apisape 'Apisu ke ne, yaru nene naga kinan merorol paŕisi wa, naga pe yar na mun maneneen mēna kuruta, a naga kiena erau lala, yar na warpoloen ga takis, a yar viowa ga lala.'

"Komin sur ne nanene nepisu yeririna na nagane lala asa ga ninis la naŕa visae asuŕna akila kokan ke e yepesinas na kumali, yoko la aviovio kiela narin erau lala, avisave '!Ei, kam na apilon manene visena na! Visae mowe ke plaŕe, ana pe sinemiun re wolen amio imimi poli, pona visae meyaun ke yauena na marena, ana pe sinemiun re atagipae amio imimi poli.'

³⁵ "Sur ne na nene, yeririna la yepela mavin mrapa lala kiena ne Ntewa, ana mras wo naŕa molue e malena kiena yaru naŕa taveve ke mrapa kiena ne Ntewa, kilologia sane mrapa ne nanene narui, naga pe mrapa na manmaruaena naŕa lelaga."

Sira tai mloge kemua piowa lelaga e kiena mlamulena viowa lala

³⁶ Ana Varasi tai, kiena kia Saemon, naga sape sinenan kila kinanena tai ve kana Yesu, ana Yesu pa mēna, pa totano vena akinana. ³⁷ Ana e pulkumali nena, sira tai sike ea, naŕa

naga kila þelaga viowa la moki paþisi, ana naga mloge naþa Yesu pa kinan ke m̃ana Varasi naþa Saemon ne. Ana sira naþa pisu kiena mlamulena viowa, mloge piowa manene laa, ana mloge sane monar imi visu Yesu, ana kus kiena piawi tanea tai na ponotaninu, kus pimi e yuṃa naþani. ³⁸ Ana Yesu pelein ke sape kinana, ana sira nene pimi suṃal su varaun lana, naþa wamarana mlau, kekapil pito ke e lana ne Yesu. Wamarana kee ke lana sanene, ana tar viluna la naþa piayavi ne, suṃa miyumuvan ke lana Yesu, a naga pelan pipina komþasa te lana ne Yesu, a yokorena taron ponotaninu naþani ea.

³⁹ Ana Varasi naþa þere Yesu pimi m̃ana, naga pisu ke sur nene, ana sitom piowa towe ga ea. Naga sitom ke sanini, sape “Visae Yesu nene naga pe navisawalena tai naþa lelaga, pona vera na kilia ruru yo rui sane sira nene naga pe sira na mlamulena viowa na sanene, ana yoko ve taṃan re tol lana wa nene. Ana naga taṃan kila sanene, in na nemninue kare narui.”

⁴⁰ Ana Yesu na kilia m̃a kiena sitomena nene, ana pisataṃea, sape “Saemon, in na nesape nevisa visena tai van ko sumo wa.”

Ana taṃania sape “Pogaga, Navianena. Okilia ovisa.”

⁴¹ Ana Yesu pisataṃe sanini pania, sape “Yerkawa tai, ana yar lua akila lapui pania. Lalua nene, tai na kiena lapui keviu, komþasa naga kiena lapui keviu manene laa paþisi.

⁴² Ana pogos na ulmaranen lapui la nene, la ga luwoka apulmaran þele ga, ana yerkawa naþani sinen mie la, ana piwo make kiela lapui la nene pan la. ?Ana komin sur ne nanene, lalua nene ane sitom manene yerkawa nene?”

⁴³ Ana Saemon pisataṃe Yesu, pisape “Nemninue ga, pona naþa kiena lapui keviu manenea naga monar sitom va laa sane yo.”

⁴⁴ Ana Yesu pisape “Ee, sa ke nene narui.” Ana Yesu þarpuia kilologia sira naþani pa Saemon, sape “Saemon, pogos naþa nepim moṃa, pe noṃal re yar tai þar wii pimi pan inu poli vena nekevan kororak na mrapplepa e lau, sane e kieta þelaga na, monar okila. Ana opisus ke sira nini, naga ke naþa kevan lau e wamarana narui, a miyumuvan si mema e viluna. ⁴⁵ In na nepim moṃa loyuṃa, ko na pe otalopan ruru in re poli, sane nepe kioṃa erau wo tai, ana siar e pogos naþa nepim loyuṃa, naga mligan pipina lepas þasia te lau silaga. ⁴⁶ Ko na pe oþar re ponotaninu pimi otaron pito e þaruu po, ana naga kila e lau rui. ⁴⁷ Ana nevisa ruru van ko, nevisave sira nene, kiena mlamulena viowa moki paþisi, ana nepiewo make ga rui, kila narui naga sinena sii inu keviu paþisi. Ana nepisu yaru naþa kiena mlamulena viowa pe keviu re poli, nepiewoia, ana naga pe sinen sii manene inu re poli.”

⁴⁸ Ana Yesu pisa ruru m̃ena pa sira naþani, pisa pania, sape “Kioṃa mlamulena viowa la naþa ositom þele ke ne, nepiewo make rui.”

⁴⁹ Ana pogos naþa Yesu suṃa pisa ke visena nene, yaru taþena la naþa akinan ke amio la e pogos nene pe akekara re nena poli, asuṃa apragogo pan la, apisa ke asape “?Ana yaru nene sinenan sape naga ve ai, naþa naga pisa ke sape naga þar plan ke mlamulena viowa kien yar la sanene?”

⁵⁰ Ana Yesu pisa si pa sira nene yam tai, pisape “Kioṃa naviawaena kila otol natamaliaena rui. Ve ologe re si viowa, okilia ova narui, a suṃare kiena ne Ntewa sike amio ko.”

8

Sira la moki naþa ataveve Yesu

¹ Ana pe yam piavi re poli, Yesu mial sina pano, pa kome pulkumali lala, la naþa ve torokak amio la naþa kerkeviu, a e yo punu ga naga suṃa mlologo, a suṃa mla lologena wo nasuþenena kiena ne Ntewa pimi pa yeririna lala. Ana sane silaga, kiena nalualima taaga pa lua la m̃ena asike amio e pogos nene, ² a sira la moki li m̃a naþa la asuṃa atavevela. E sira la nene, laþasia naþa Yesu taþa ruru la petan ninuna viowa lala a e inanena viowa la naþa se e la, sa naþa Maria nae Maktala, naþa sumo yermare la olua ase

e naga,³ amio Soana, naþa naga wona ne yar naþa Kusa, naþa naga pe yerkaena na kilaena yuþaena kiena ne Ðarin Suþe Erot, a amio mþena Susana nene. A la moki manene ke sina ga, naþa la asuþa amiila Yesu lala keviu paþisi, a la asuþa apisuar la e nalaena la naþa asuþa aþar ke pan la.

Ðakaiwa na kurus nen viluþini naþa kekapil e porotano na pe taþena vari

Matiu 13:1-9; Mak 4:1-9

⁴ Ana e pogos tai, pupia þina na yeririna lala la moki amolue e kiela pulkumali la peve taaga, ana la apimi amiervivi Yesu piora, ana naga pis pan la, kuan þakaiwa tai pan la.

⁵ Naga pisa sanini, sape “Yar tai sape va veven kurusia e kana lokove. Pogos naþa peven kurusia, suþa sisilinia, ana kurus laþasia amloloru e mrapplepa, a siraunia, yar la apim amiyaloro ea, apie kare ga, a manu mþena lala apimi ate plan make ga. ⁶ A kurus laþasia amloloru e yo naþa kilavaru sike ea, pitotovi pavini, ana yoko miaiai ga, komin naþa pe wii re e yo nene poli. ⁷ A kurus laþasia mloloru e yo naþa sumo na pe ate plan ruru re kilika viowa e poli, ana yoko siraunia kilika viowa nene kapur ke sina ga pimi keviu, kewo make kurus la naþa pitotovi ne-e amarmare. ⁸ A kurus taþena ne laþasia amloloru e porotano naapo tai, ana la apitotovi akapur mþa pano-o, la aþar mrasnela la moki, tol ponotia taaga.”

Ana pogos naþa Yesu pisa visena la nene þisi, naga pion manene pan la, sape “Yar naþa kiligana teke ea, monar yagogon ruru visena nene.”

?Komin ya ne Yesu pis e þakaiwa lala?

Matiu 13:10-23; Mak 4:10-20

⁹ Ana siraunia, nalogena lala apim puna Yesu apiun kinas nen þakaiwa nene tania. ¹⁰ Ana naga pisataþne la, pisape “Ntewa kila sanene sape vena akilia alual nakilia wanena na kiena nasuþenena.

‘Ana e yar taþena lala, nakilia wanena la nene la atapolou asike e þakaiwa na wa, ana la asuþa apisu pano-o, pe apisu kilale re poli, a la asuþa amiyagogo pano-o, pe amloge kilale re nena poli.’ ”

Ais 6:9

Yesu pisavan kinas nen þakaiwa na kurus nen viluþini

¹¹ Ana Yesu pisavan ruru ga þakaiwa nene pan la na wa. Naga pisapenua “Pogaga, kinas nen þakaiwa nene naga sanini. Sur nasumo, naga kurusa, a naga na sane visena kiena ne Ntewa. ¹² A kurus la naþa akekapil mrapplepa, naga na sa naþa yar la ne amloge visena nene, ana kurus nowo lala mloloru pitomi e kiela sitomena lala. Ana Ðarin Yermare nene pimi þar plan ke sina ga visena la nene petan sinela lala, vena kila sane ve alelaga re sina, ve atol re si natamaliaena.

¹³ “Taþena, naga kurus la naþa asike e yo naþa pe kilavaru, a na nene sane yar la naþa amloge lologena wo nene, amlavia, akekarania, ana sa naþa þeligas nela pe po re poli. La asuþa amlelaga yam plas ga, a visae atol pog mþarera, pona nakilaliena imi, yokorena la aloloru ke sina ga.

¹⁴ “Taþena mþena ga, naga na kurus la naþa asike e lenen kilika viowa lala, a na nene sa naþa yar la amloge, ana pogos naþa la amial ke apa sane, ana asitom manene laa kiela malena lala, a sinelan manene mþena kilavaru, a akekarana manene mþena kekarena na yomarava la nini paþisi. Þelaga la nene apimi sane kilika viowa tai naþa piwo la, ana taþatete nena kiela malena war mras naþa marua ruruia.

¹⁵ “Ana na maro, naga kurus la naþa sike e porotano naapo, nanene naga sa naþa yar la amiyagogo ruru e Lologena Wo nene, ana amligan ruru sike e losinela lala, atarar ruru mþarera, naþa ape lelaga kemua. Yeririna wo la ne sanene, la akila kiela sitomena la viayavi, ayuþae ruru mþa vano-o awar mras nen Lologena Wo nene e kiela malena lala.”

Ðakaiwa na kapi vivaga

Mak 4:21-25

¹⁶ A Yesu pisa mþena ga, pisapenua “Ita yeririna lala, visae towar kap vivaga imi,

yokorena ve yar tai warwan re ñeke vatanon karo tai pona sur tai sanene. Peraga, tetelan ga ñeke metava vena kila yar la naña aim loyuña la avisu naña yo merarava ruru nena ga. ¹⁷ Pogaga, ana nasuñenena kiena ne Ntewa naga sane kap vivaga nene, naña nanagane suña ñalñalivin ita vena tegoli make suri punu ga. Suri punu ga naña tapolou sike ga wa, a nakilia wanena punu ga, yokorena la monar amolue e yepesinasa vena yar la akilia avisu kilalea. ¹⁸ Kam na monar ayagogon ruru kiau visena lala, a akilali naña asitom ruru la. Yar naña kiena suri moki rui, yokorena naga war va ve mok manene vañisi. Ana yar naña limana plasan suri lala, yokorena naga kilalu kiena narin sur nene naña naga sitom ke sape pe kiena pa rui.”

Anenane Yesu amio wenla lala, apim asape aurelua naga

Matiu 12:46-50; Mak 3:31-35

¹⁹ Ana anenane Yesu amio wenla lala apim aporun naga e pogos nene, ana la akila ñele yon naña ava atol naga loyuña, komin naña ñina la moki, kila yo ve tokak ga. ²⁰ Ana yar la amla lelein ga visena pimi tol Yesu, asape “!Ei, anoña amio womla lala asuñalu asike vanua, sinelan asape avisu ko sumo wa!”

²¹ Ana Yesu pisatañea, sape “Naga naña pe aneu, pona pe wolai, nanene na la ga naña amloge visena wa kiena ne Ntewa, a la asuña akila ke sa naña visena nene pisa.”

Pupia lagi naña Yesu pisaluñaria

Matiu 8:23-27; Mak 4:35-41

²² Ana e legiena tai, Yesu ñere nalogena lala, la apa amiyai e waa tai, ana Yesu pisa pan la, sape “Ita, yoko teva e lepas nen lapa nene lepas ñasia.” Ana la amligan yo, asuña apano, ²³ ana pogos naña waa kiriri ke pa narui, Yesu maran kawa pano-o momalio. Ana siraunia, pupia lagi tai miyui, miyu lapa nañani, ana pupia sive lala akilapela pano-o sive pule e pulu waa, apisu sane piowa ga narui. ²⁴ Ana apito apioñege Yesu, apisa pania, asape “!Suñe, Suñe, lavis ke tetalilu narui!”

Ana Yesu suñalu, pisaluñar lagi amio sive ñarera la nene, ana sur la nene apito tano, yo ñano ruru nenaga. ²⁵ Ana Yesu pisa pan la, sape “?Awa kiamiu naviawaena?”

Ana amarau pano-o, amilan manene pañisi, ana asuña apiuviun ke sina tan la, asape “?Aulai, yaru ya nene? Naga pis ga sanene ana lagi amio sive, lalua amlogearia. !Suwala!”

Yesu pile plan yermare moki petan yere Karasa tai

Matiu 8:28-34; Mak 5:1-20

²⁶ Ana Yesu la apa atol lepas ñasa, e naña Kalele kira ke pa ea, nanene mesmesun e yo naña Karasa. ²⁷ Ana pogos naña Yesu pa ura e yo nene, yar nae e yo nene tai pitomi pitawea, naña yar nene yermare la asike ea. Nakonua rui, yar nene pesinas ga, pe miyen re sur tai poli, a naga pe mon re e yuña poli, naga kekaran ga naña monmon ga e lotap lala, e puluve la naña amligan ke kiela tas nen yar mare la añeñeke ea. ²⁸⁻²⁹ Ana yermare la nene akila kare yar nene yam moki rui, kila sane yar la akirakiravanli naga silaga, a apiar e kilipan, a apiar lana amio limana e kilika panon laki, ana naga suña kilaroro ga, a yermare la nene añenelua naga pa ñeke e yokorena nene.

Ana Yesu pisuia, pis pa ninuna viowa, pilelua sape ligan yaru nene. Ana yar nene pisu Yesu, pio naga, a mloru e lana, ana ninuna naña sike ea pis ñarera, sape “?Ana Yesu, ko narina ne Ntewa na Mava, kioña ya na teke e inu? !Nepiun ñareran pan ko, nesape ve ola re nakoena van inu!”

³⁰ Ana Yesu piun tania, sape “?Ana kioña kia ai?”

Ana ninuna viowa nene pisatañea, sape “Kiau kia ‘Yermare lala na kilaen mara.’ ” Naga pisa sanene komin naña yermare la naña apa e losinena la mok liu. ³¹ A ninuna viowa la nene asuña apiuviun ñareran ke sina ga pa Yesu vena naga ve vile plan la re, naga ve kila la re ava aloru ato tano e pupia pulukapi.

³² Ana yepas nen kunus na yo nene, pupia ñegas nen nompui lala asuña akolkol ke porotano, ana yermare la nene atagi pa Yesu, apiun ñareran tania asape naga ligan la

ga ava e nompui la nene. Ana Yesu tañan pan la,³³ ana la amolue petan yar nene, apa e los nen nompui lala. Ana nompui la nene aplamolue yam veraga akiriri apito e yeparpar tai, ana apiovion la apito e pupia lapa nene, atalil make e sive.

³⁴ Ana yar na visuaren nompui lala apisu sur nene, la aþure apa uña, apisawal sur nene, ana apisa make ñena ga e yo la punu ga,³⁵ kila sane yar la moki sinelan asape aimi avisuia. A pogos naþa la apimi, apisu Yesu suña ga, a yar naþa ninuna viowa la aþure petan rui naga totano teke e lana ne Yesu. Nanagane, naga miyen ruru ñana kulmrae wo la rui, a pimi moñau ruru nenaga, pe sirag re si poli. Pogos naþa la apisu yaru nene pimi po si sanene narui, ana amarau.³⁶ A la naþa asuñesania apisu suri punu ga, asunyu pa la naþa apim mare ga na wa, apisa meraravan pan la sanape naþa yaru nene naþa yermare la asuñesan ea, ana Yesu kila naga pimi po si rui.³⁷ Ana yeririna lala na lepas nae Karasa, la apisu sane piowa ga, ana la asuña añareran pa Yesu asape la sinelan naga molue si vetan la, komin naþa sur nene kila amarau pañisi. Ana Yesu la apitovin si vena aiai e kiela waa, vena awasuñela sina.

³⁸ Ana pogos naþa la asuña apito ke narui, yar naþani pitomi piun ñareran tan Yesu sape naga sinenan sape va su lue amio naga, ana Yesu pialuþaria, pisa pania, sape ³⁹ “Peraga, komin naþa popon manene ko owasuþe ko ga ova si uña, a ova osunyu van yar lala, ovisa van la sanape naþa Ntewa kila po naþa po manene pan ko sanene.”

Ana yar nene þasuþe sina, a naga suña pa miyervivi yo punu ga nae lepas na kiena pupia pulkumali, a pisawal yuñena wo naþa Yesu kila pania.

Nin sira kiena Saeras, amio sira naþa tol kulsota ñana Yesu

Matiu 9:18-26; Mak 5:21-43

⁴⁰ Ana Yesu lala akusro lapa nene apa ke sina lepas þasia, a pupia þina na yeririna lala asuñate ke naga, ana la akekaran naþa apisu pa ñalivin la sina.⁴¹ Ana yerkawa na kiela yuña na lotena nae e yo nene, kiena kia Saeras, naga pimi lavisin Yesu. Ana kinai tanonia, tag pania, piun tania sape imi ñana,⁴² vena visu nin narina naþa sira, naga minana pañisi. Nin sira nene, naþa yerkawa nene naga narina taaga nena nene, a kiena kas pe sur sane lualima taaga pa lua ga [12], ana kiena inanena pimi keviu manene laa narui, kila narui apisu sane lavis ke mare ne. Ana Yesu suñalu, amio yar nene apano.

Ana pogos naþa naga pa ke sanene narui, pulen yeririna na pupia þina la nene asuña atavevea, asuña amiigin la piora e Yesu.⁴³ Ana lala tai, naga sira tai, naþa maiena kien sira lala teke e naga e legiena punu ga, tol kas lualima taaga pa lua [12] rui, ana pe yar re nena tai naþa kilia kila ruru kiena maiena nene poli.⁴⁴ Ana sira nene, naga mialvan ga yaru la lika, pimi pimi lavisin ñasina ne Yesu, kian limana sane, tol ga ñana isinen kulkota. Tol ga kulkota ñana Yesu sane, ana e ke e pogos ga nene, kiena maiena naþani þisi nena ga.

⁴⁵ Ana Yesu piun ke ga, pisape “?Ane tolmare in ga na wa?”

Ana la apisapenua “Pe yar tai tol ko re poli,” ana Pita ñena ga pisa pania, sape “?Ana Suþe, sanape? Yaru la apule manene laa asuña amiigin la kar ga miyervivi ko pivi, asuña apavan e ko.”

⁴⁶ Ana Yesu pisa pania, sape “Peraga, yaru tai tol inu nena naþa, komin naþa in na nemninukilale sane kiau nañareraena komþas pa vanua e inu pa e yaru nene þisi rui.”

⁴⁷ Ana sira nene pisu sane naga taþatete si tapolou narui, ana pimi puna ne Yesu, marau pañisi, sinen kurkur ñena ga. Naga pimi mloru e lana Yesu, ana e marana ne yeririna la naþa asike ne, naga pisawal make sur la e naga pania, sa naþa komin ya ne naga pimi tolia, a sanape naþa pimi po si rui e pogos nene.

⁴⁸ Ana Yesu pisa pania, sape “Auya, kioña naviawaena e inu kila ko opo si rui. Suñare kiena ne Ntewa sike amio ko, owasuþe ko sina ova uña.”

⁴⁹ Ana pogos naþa Yesu suña pivis ke amio sira nene wa, visena pimi pa yerkawa nene, sape “Nin naruña nene kovio rui. Popon ve oure re si pupia navianena nene imi, vena ve okila kare korenan re naga.”

⁵⁰ Ana Yesu m̄ena mloge m̄a visena nene, ana pisa pa Saeras, pisape “Ve ositom re suria, owasine ga Ntewa m̄arera, a yokorena nin naruṃa sira nene imi wo si ne.” ⁵¹ Ana Yesu pa amio yar nene apa m̄ana, a pogos naṃa apim atol yo nene, naga pisaluṃar laṃasa sape yoko ve ava re loyuṃa amio naga, ana naga ṃere ga Pita, amio Yoane, a Semes, a arimanane nin sira nene amio anena, ana apa loyuṃa. ⁵² Pogos naṃa apa loyuṃa apisu naṃa yar la asuṃa sinela miye ke nin sira naṃa rui, asuṃa ataginia, ana Yesu pisa pan la, sape “Ve atagin re nin sira nene sanene. Naga pe mare re nene poli, naga momalio ke ga ne.” ⁵³ Ana la apitalia kare ga naga, komin naṃa la akilia asape nin sira nene marṃantop nena rui.

⁵⁴ Ana Yesu pa tarar limana ne nin sira naṃani, pisa pania, sape “Nin naruu, osuṃal li sumo wa.” ⁵⁵ Ana e ke ga e pogos nene, apisu naṃa nin sira nene, kiena malena ṃasuṃe sina pimi e naga, ana suṃalu, suṃa miyaloro, ana Yesu pisape popon ala narin kinanen tai vania. ⁵⁶ Ana arimana amio anena, amilan paṃisi naṃa kiela sitomena la kovio nena ga, ana Yesu pisa pan la sape yoko ve avisawal re sur nene va yar taṃena lala.

9

*Yesu pitetalia kiena nalogena la peve lua**Matiu 10:5-15; Mak 6:7-13*

¹ Ana Yesu pio viraviran kiena lualima taaga pa lua [12], ana pis ruru pan la, naga mla m̄areraena pan la, taṃan la vena akilia ataulu yermare lala, a vena akilia akila ruru maiena lala. ² Naga kila sanene vena vitetalia la avanon alologon navesuṃenena kiena ne Ntewa, a vena akila ruru namaiena lala. ³ A visen wo laṃas naṃa pisa pan la sumon naṃa apano, sanini, naṃa sape “E lepas na kiamiu mrapa, yokorena ve awarar re sur tai. Ve awar re kiamiu plasgai, pona kiamiu karo, pona kinanena, pona kilavaru, a ve awar re m̄amiu kulsota ve lua, yokorena ayen ga m̄amiu kulsota ve taaga ga naṃa amiyenar ke ne.

⁴ “A uṃa ya naṃa visae aure amiu ava ase ea, ṃisi na monar akekaran naṃa asu amio mratava na uṃa nene, yokorena aligan ga uṃa nene pogos naṃa amolue si vetan pulkumali nene. ⁵ A e pulkumali ya naṃa visae la yepel mavin were amiuena ava e m̄ala yuṃa lala, ṃisi na aligan ga kiela yo nene, a pogos naṃa amolue vetania, monar atan plan puluyavi na mrapa na yo nene vetan lamiu, sane kile tai pona kiamiu visena m̄arera tai van la, sape yoko awar nakoena tai naṃa torokin ga kiela ṃelaga viowa nene.”

⁶ Ana nalogena lala amolue apa narui, a asuṃa aṃaro ke e pulkumali lala, asuṃa amlologon ke lologena wo, a asuṃa akila ruru ke maiena lala.

*ṃarin Suṃe Erot Antipas pisayu Yesu**Matiu 14:1-2; Mak 6:14-16*

⁷ Ana e pogos nene, ṃarin Suṃe Erot m̄ena ga mloge towe m̄a ya naṃa Yesu la asuṃa akila ke ne, ana naga sitom manene paṃisi, komin naṃa yar laṃas asuṃa apisayu Yesu, asape naga Yoane Nakeena, naga mali si petan marena, ⁸ ana taṃena laṃas asape naga yermarua Elaisa nanua, nane m̄alivi si ne, a taṃena laṃas asape naga pe navisawalena la tai nanua sumo sumo manene laa, naṃa suṃalu si petan marena. ⁹ Ana ṃarin Suṃe Erot pisape “Pe Yoane Nakeena re nene poli, komin nesilua ṃarina rui, ana yar na apisayu ke ne, naga a si nene?” Ana sitomena nene kila naga sinenan visuen Yesu paṃisi.

*Nalologena la apa amlologo, ana aṃasuṃe la sina**Matiu 14:13-21; Mak 6:30-44; Yoane 6:1-15*

¹⁰ Ana nalologena la naṃa Yesu pitetalia la sape ava alologo, aṃasuṃe sina, ana apisawal sur punu ga naṃa amiyuṃaenia pa Yesu. Ana Yesu ṃere la amolue petan yar lala, amiyepel la ve tokak ga apa e pulkumali tai, kiena kia Petsaeta. ¹¹ Ana siraunia, yar la amloge asape apa ke e yo nene, ana la m̄ena ga asirau apano, apa m̄ena e yo nene. Ana Yesu kekara ga,

naga sun towe amio la, a siraunia pian la e lepas navesuþenena kiena ne Ntewa, a kila ruru yar la naþa sinelan ke asape popon yar tai iila la.

Yesu pagan yeririna la manu lima [5000]

¹² Ana Yesu suþna amio la pano pano-o, apisu naþa mrae pito ke tano narui, ana kiena lualima taaga pa lua nene apim puna, apisape “Ei, Suþe, popon oligan þina la nene awasuþela ava mþala uþna lala pona avakar ga e pulkumali la ne sike ne, vena akilia aul kala kinanena laþasia, a vena akilia alual mþala lele na monoena, komin e yo na tesike e ne pe pon re yemalo wo ita e poli.”

¹³ Ana Yesu pisa pan la, pisape “E, peraga. Popon kam ga awar kinanen laþas van la.” Ana la apisataþnea, apisape “!Kei! Imimi memla ke ga narin kilaparavi lima, amio narin ika lua. ?Ana visae peraga, pona ko sinoþnan ke osape yoko imimi ke narui meva moul kinanena torokin pupia þina la nene?” ¹⁴ La apisa sanene komin yeririna la naþa asike ne la moki manene laa, ana yerþnene ga lala pa tol sur sane manu lima [5000].

Ana Yesu pisa pan la, sape “Ava avisa va yeririna lala avisave atotano ke ne wa, atotano e þegas lala, naþa yar la lualima ve lima [50] e þegas tai.” ¹⁵ Ana apa akila sa naþa naga pisa, a yeririna lala atotano e þegas lala.

¹⁶ Ana Yesu mla kilaparavi lima nene amio narin ika lua naþani, kirava pa ma e peni, pisa potenania ana kawewowa, kian pa nalologena lala vena alalein akian va þegas la nene. ¹⁷ Ana akan panpano-o mþeþela kawa ruru nena ga, a kororos nen kinanena naþa akanligania, akon pa e karo popos lala tol lualima taaga pa lua [12].

Pita pisawal pisape Yesu naga Navisaarena kemua lelaga

Matiu 16:13-28; Mak 8:27-31

¹⁸ Ana pogos tai, Yesu suþna mlen ke naga taaga, a kiena nalogena lala asuþna ga lavisinia, ana naga piun tan la, sape “?Asuþna amloge yar la apisavisa inu asape in na ai?”

¹⁹ Ana apisa pania, asape “Laþas asape ko Yoane Nakeena, a laþas asape ko Navi-sawalena Elaisa, a laþas asape ko navisawalena taþena lala tai nanua sumo sumo nane naga mali si petan marena ne.”

²⁰ Ana naga piun tan la, pisape “?A sanapen amiu, kam asape in na ai?”

Ana Pita pisataþnea, pisape “Ko Navisaarena kiena ne Ntewa nene.”

Yesu pisawal kiena marena

²¹ Ana Yesu pis mþarera, pisaar nena pan la, pisape yokorena ve avisawal re sur nene va yar lala, ²² ana pisa ruru pan la pisape yoko ve sanapen naga. Naga pisape “Inu na nepe Narina ne Yeririna, a yoko nasumonena kiena ne le Israel lala, amio yerkawa kiena ne yar wa lala, amio navianen navisaluaen lala, yoko akoven lua inu, þisi na monar akila sur ve moki na kila kare inuena. Yoko monar aweþnar inu nemare, ana e kana legiena na telu, yoko Ntewa visirlua inu nemal sina.”

Nalogena kiena Yesu naga monar sitom korenan ga kiena nasinenanena lala

²³ Ana e pogos nene, Yesu pis pan la, pisape “Yar naþa sinenan sape taveve inu, naga monar sitom korenan ga kiena nasinenanena lala, naga monar kus kiena laki torovia e legien punu ga, sa naþa yoko inu nekus kiau, ana taveve inu luen ga. ²⁴ Nepisa sanene komin yar naþa sinenan sape ve puluvisin kiena malena, yoko kilalu kiena malena. Ana yar naþa taþnan kiena malena vanon inu, yoko naga taulu si kiena malena. ²⁵ Visae yar tai tol make sur wo na yomarava nini lala, ana kila pal mrapa a kilalu kiena malena, naga pe taulu re nena sur wo tai poli. ²⁶ Yar naþa mawa e marana yar taþena lala vanon inu pona vanon kiau visena, yoko inu Narin Yeririna mþena nemawan yar nene e marana Ntewa e pogos naþa nowasuþe sina, naþa yoko nevitom nemio pupia naurarena naþa pe kiau, a pe kiena ne Ata, a naþa pe kiena ne mþena navisi wa lala. ²⁷ Lelaga nevisa van amiu,

yar laþas asuñmal asike e nini, naþa taþatete amare na wa, vano-o tol pogos naþa avisu Navesuþenena kiena ne Ntewa imi ñalivi.”

Tasnena ne Yesu pimi pe taþena

Matiu 17:1-8; Mak 9:2-8

²⁸ Siraun pogos naþa Yesu pisa visena la nene, pe sur sane legiena olua þaro ga na wa, ana naga þere Pita, amio Yoane, a Semes, la vari apa metava e ravie tai, komin sape len. ²⁹ Ana apam atol yo nene, a pogos naþa suña mlen, nalogena la telu nene apisu naþa marana pimi pe taþena, a apisu naþa ñana kulsota pilavila paþisi, a miyuwowo naþa miyuwowo manene laa. ³⁰⁻³¹ Ana siraunia, yermarua lalua nene Elaisa amio Mosis, lalua añalivi amio pupia naurarena nae ma e peni, ana lalua asun ke amio naga, naþa asuña apisayu ke sanape naþa yoko naga monar va garu Yerusalem, a monar mare vetan yomarava nini, sa naþa Ntewa pisaaria þa rui.

³² Ana sumo, la telu Pita, Yoane a Semes nene asuña amloge marala kawa paþisi pano-o amomalio, ana pogos naþa atavilo sina, la amilan sur la naþani, naþa apisu pupia naurarena kiena ne Yesu, a apisu lalua naþa asuñmal asike amio naga. ³³ Ana apisu naþa lalua nene asape aligan si yo vena awasuþela, ana Pita sinenan sape visi, ana naga mñinue ña visa ya ne, ana naga pisolawe ga visen kar tai pa Yesu, pisape “Suþe, popon naþa ita tesuña e nini. Popon teyuñaen silparpara ve telu e yo nini, moña tai, ñana Mosis tai, a ñana Elaisa tai.”

³⁴ Ana pogos naþa naga suña pisa ke visena nene, lul tai pitomi kalo la, ana pogos naþa la apisu sane apa ke loyuña e lul nene narui, amarau paþisi. ³⁵ Ana amloge visena tai molue e lul naþani, pisape “Nanene na naruu ne, naþa nepisirlua naga rui. Naga ke narui monar alogear ruru naga.”

³⁶ Ana pogos naþa visena nene þisi, lul nene kovio sina, apisu naþa Yesu naga taaga sike si amio la. Ana siraun nene, nalogena la nene apa ruru la, asuña ga sa ga ne, pe apa apisayu re sur nene pa yar taþena la poli.

Yesu pilelua yermare petan ñee tai

Matiu 17:14-21; Mak 9:14-29

³⁷ Ana e kana legiena na siraunia, Yesu amio la telu naþani aþasuþela si apitom tano, ana pupia þina na yeririna la asuñmate ke naga, sinelan asape avisuia. ³⁸ Ana pogos naþa apim añalivin la, lala yaru tai pion manene pa Yesu, pisape “Navianena, nepisa awis pan ko, ovisuli naruu na yermene nini, komin naþa naruu wawa taaga nena nini. ³⁹ Ninuna viowa tai ne suña pimi ke e naga sanene, kila naga mlakai manene paþisi, ana miokamarmare tasnena ñarera pano-o wasirina la mlalau. Sur nene suña kila ke naga pa piowa laa, kila kare naga paþisi, a suña kila luen ga, pe mliganli re naga pa ruru pogos tai poli. ⁴⁰ In na nopure naga pa puna ne kioña nalogena lala, nepisa awis pan la vena añenelua ninuna viowa nene, ana la akilalia, amiyuñaen pano-o, akila þele yonia.”

⁴¹ Ana Yesu pisatañea, pisa pan la, pisape “?Kam la nene, sanape na sanene? Pe asuñmal re nena ase Ntewa poli. ?Monar nesuña nemio kam wowe lala tol pogwai? In na sineu maren amiu rui. Ko, pogaga, oure naruña nene imi.” ⁴² Ana apa aþure pimi, a pogos naþa apim ga sane, ninuna viowa naþani kilapel ke sina ninis naþani, kila tasnena miyuyuwawa a ñarera. Ana Yesu pis kapuru pialuþar ninuna viowa naþani, a kila ruru ñee nene, ana mligan si pa arimana. ⁴³ A la naþa apisu sur nene, amilan manene nañareraena nowo kiena ne Ntewa nene paþisi, naþa kila po sanene paþisi pan ñee naþani.

Yesu pisawal sina ga kiena marena

Ana siar e pogos naþa yar taþena la asuña apisasayu ke sur wo naþa Yesu kila, ana Yesu pisa kiena visena tai pa kiena nalogena lala. ⁴⁴ Naga pisa pan la, pisape “Ayagogon ruru kiau visena nini, aligan ruru te kiamiu sitomena lala, vena ve sinemiu þesan re sina. Ee, nepisa ruru van amiu, nesape Ntewa mligan inu sane Narin Yeririna, ana lavis

ke naþa aligan inu neva e limana ne yaru la naþa yoko aweñmar inu nemare narui.”⁴⁵ Ana nalogena lala pe amloge kilale re ya naþa Yesu suña pisayu ke pan la poli wa, sa naþa kana kinas tapolou ke ga wa, kila pe apisu kilale re poli, a amaraun ñena naþa aviun ruru va Yesu e lepas na visena nene.

“?Ane to laa metavan yaru taþena lala?”

Matiu 18:1-5; Mak 9:33-40

⁴⁶ Ana siraunia, veveyuena tai ñalivi likan nalogena lala, naþa apisape ane to laa metavan lala taþena laþasa. ⁴⁷ Ana Yesu kilia ña kiela sitomena la nene, ana pio ninis tai naþa pimi ke puna, ana mligan ninis naþani suñalu se yepasa, ⁴⁸ ana pisa pan la, sape “Yar naþa kiena sitomena patanon inu, ana naga kekaran wereruruen ninis nini, nanene sa ga naþa kekaran were ruru inuen ga narui. A yar naþa kekaran inu, naga sane kekaran ke ga naga naþa mligan inu nepim. Nanene komin naþa amiu ai naþa kiena sitomena su tano vaþisi, naga ke narui naþa naga to metavan amiu make ga.”

“Yaru naþa pe pisaluþar ita re poli, naga suña miila ita ke ne”

⁴⁹ Ana Yoane pisa pa Yesu, sape “Suþe, mepisu yar tai, naþa suña pile plan ke yermare lala, naga ñene plan la e kioñna kia. Ana yaru nene, memninue ga, naga pe ita re tai poli, ana mepisaluþaria.”

⁵⁰ Ana Yesu pisa pania, pisape “Toko, visaluþaren toko, komin yar naþa pe pisaluþar ita re poli, naga miila ita ke ne.”

Yesu sitoñal sape lavis ke monar va ma meta Yerusalem narui

⁵¹ Ana Yesu pisa kilale sape nanagane, lavis ke Ntewa were si naga va meta ma e peni narui, ana kila ruru kiena sitomena, sape kiena mrapa monar va ma meta Yerusalem narui.

⁵² Ana la amial apano, ana Yesu mligan kiena yar na waren visena lala la asumo apa e pulkumali tai kiena ne le Samaria lala, vena akila ruru make suria, naga sirau imi. ⁵³ Ana la ne e yo nene, la pe sinelan re Yesu la aim e kiela yo poli, komin la pe sinelan re iilaen le Yu la naþa akom ke kiela yo poli vena ava meta Yerusalem. ⁵⁴ Ana pogos naþa nalogena lalua nene Semes lalua Yoane apisu naþa apisaluþar la sa nene, lalua apiun tan Yesu, asape “Suþe, ko sinoñan osape melen mevio kapi tai ligan ma e peni vitom tano kekan la nenaga?”

⁵⁵ Ana Yesu þarpuia pis ñarera pan lalua, pisaluþar la. ⁵⁶ Ana pe apa re si e nene poli, la apa e pulkumali taþena.

Yaru naþa taveve Yesu ve kiraþatau re sina

Matiu 8:19-22

⁵⁷ Ana pogos naþa amial ke e mrapa narui, yaru tai pimi pu Yesu, pisaar pania, pisape “Yoko netaveve ko e nape naþa visae ova ea.”

⁵⁸ Ana Yesu pisatañea, pisape “Lokul tetan lala la ñala pulus la suña ga, a manu lala ñala ponovi la suña ga. Ana inu Narina ne Yeririna, naþa nokom ma e peni nepitom, in na pe ñau yo re poli, naþa neva nomonea. Visae ko okekaran ñena malena na sanene, ko okilia oimi.”

⁵⁹ E ke e pogos nene, yaru taþena tai, Yesu pisa ñena pania pisape imi tavevea, ana naga pisatañea, pisape “Suþe, otañan neva nevisuar ke ne kiau yermarua sumo wa, a visae marþan pae, ana yoko neim netaveve ko ga na wa.”

⁶⁰ Ana Yesu pisa pania, pisape “Oligan yaru la naþa pe atol re malena poli wa ava asin kiela yar mare lala. Ana ko, oim ga teva telologon navesuþenena kiena ne Ntewa.”

⁶¹ A yar taþena si tai kila sa ke ga, kila sa naþa pisasa ga, pisa pa Yesu, sape “Suþe, yoko in na netaveve ko lue narui, ana sur taaga ga, nesape otañan neva nevisa ke ne pokolemalo va la ne uña ñau wa.”

⁶² Ana Yesu pisa visen tai sanini pania, pisape “Yar naþa suña sitom manene la ñana uña þarar kiena suri make ga, naga sane yaru naþa tarar ke þeligas nen waa, a silaga,

suŋa kira ƣatau lue ga. Yar na sanene pe torokin re imi ve yar na navesuƣenena kiena ne Ntewa poli.”

10

Yesu pitetalia yar la moki naƣa la peve lua ava alologo

Matiu 9:37-38, 10:7-16, 11:20-24

¹ Ana e pogos nene, kieta Suƣe pisir plan si kiena nalologena laƣasa. La punu ga tol lualima yam olua pa lua [72], a naga sitom ke sape ligan la nene ava sumo, la veve lua ava e pulkumali lala a e yo la naƣa yoko naga sirau va m̄alivi ea. ² Ana naga pian la sanini, pisape “Lelaga, kinanena moki liu naƣa marua sike lokove, ana yar la lua la ga naƣa asuŋa aƣar ke pitomi uŋa. Monar aviun manene tan yerkawa na lokove nene, vena naga ligan plan re si yar laƣasia la avanon awar kana kinanena la nene imi. ³ Sanene, monar ala kiamiu mrapa avano. Ana popon avisu kilale sane in na nemligan plan amiu apano, sa ga naƣa narin sipsip, naƣa apanon ke vena avitawe pupia lokul tetan lala. ⁴ A pogos naƣa avano, ana ve awar re kiamiu taga na varu, a ve awar re kiamiu karo, a ve awar re si kiamiu kulus nen lamiu taƣena. Ava ga sa ga ne, ve asunlilue re mrapplepa va yar lala. ⁵ A pogos naƣa ava aŋaliv e yuŋa ya, sur naƣa yoko avisa ƣesania, yoko avisa sanini, avisave ‘Suŋare sike e uŋa nini.’ ⁶ Ana visae yaru naƣa sike e uŋa nene naga sinenan suŋare, yoko suŋare naƣa avisa kilia sike amio naga, ana visae pe yar re tai ne sanene poli, yokorena suŋare wasuƣe si imi van amiu. ⁷ A ve ava aulaula kare e yuŋa taƣena lala, ana asuŋa ga e yuŋa nene, a akekaran ala kinanena ya pona namunena ya naƣa ala imi van amiu. Ve amawan re ala sur wo ya naƣa akila van amiu, komin naƣa yar na yuŋaena naga mesmesun la kiena narin nalaena tai.

⁸ “Sanene na, visae kumali ya naƣa ava aworu ea, visae akekaran naƣa avisuar amiu, yoko monar akekaran ga kinanena ya naƣa sinelan asape ala van amiu, ⁹ a monar akila ruru namaiena la e yo nene, a monar avisa van la, avisave ‘Nanagane, nasuƣenena kiena ne Ntewa pimi ke lavisin amiu, nanagane Ntewa pimi pe kiamiu Suƣe narui.’

¹⁰ “A pogos laƣasia, yoko aworworu e pulkumali tai, ana yoko ve akekaran re naƣa aure amiu ava asike amio la. Visae sanene, amiu ataveve pupia mrapa nene ava e yepesinas na pulkumali nena, a avisawal va kana yar lala, avisave ¹¹ ‘Puluyavi na mrapplepa na kiamiu yo nini, imimi metan plan petan lamimi lala, sane kiamiu kile nasitoŋalen tai. Monar ve sinemiu ƣesan re, sane lavis ga navesuƣenena kiena ne Ntewa imi pun amiu narui, ana pe sinemiun re poli, ana akilalu narui.’

¹² “Nevisa lelaga van amiu, e legiena na liƣereena, yokorena la ne sanene la ava e nakoena tai naƣa m̄arera manene laa taulu nena naƣa la nae pulkumali naƣa Sotom nanua yoko awaria.”

Yesu pisayu la naƣa pe amlelaga re e naga poli

Matiu 11:20-24

¹³ Ana Yesu pis m̄arera pa yeririna na kumali taƣena laƣasa, pisape “!Le Korasin, amio le Petsaeta, akila kare manene amiu paƣisi wa! Visae le Taea amio le Saeton lala avisuli ga kile la naƣa kam na apisu ƣisi rui, vera na avilopu la nanua rui. La pe ape le Yu re poli, ana vera na la ayen ƣilili karo a akuan yavi e ƣarila rui, pona atotano m̄a sanene ana yaru la avisu sane sinela piowagan kemua kiela mlamulena viowa la lelaga. ¹⁴ Nevisa van amiu, e pogos naliƣereena, yokorena kiamiu nakoena naga taulu nena naƣa kiena ne la nene.

¹⁵ “!A amiu le Kapeneam la naƣa aƣarwar amiu paƣisi, naƣa sinemiun asape avisir plan amiu asu manene metava, avisuar amiu! Yoko Ntewa koven amiu ato laa tano rui e pulus nen kapi.”

¹⁶ A Yesu pisa m̄ena pan la, pisape “Yar naƣa visae yoko logear amiu, naga suŋa mlogear in ke ne, a visae yar naƣa yepen mavin amiu, naga suŋa yepen mavin in ke

ne, a yaru naþa visae yepen mavin in ke sanene, naga suþna yepen mavin ke yerkaawa naþa naga mligan inu nepim.”

Ana e visena la nene, Yesu mligan yar nalologena lala apanon akila yuþnaena.

Yar nalologena la aþasuþe la si narui

¹⁷ Ana yar nalologena la nene apa akila yuþnaena wo la moki, ana siraunia aþasuþe la si apim puna Yesu, naþa apulen manene kekarena e sur punu ga naþa akila rui. Aþasuþe la, apisa pa Yesu, asape “!Suþe, memiyuþnaen sur la e kioþna kia pa tol naþa yermare mþena la asu vatanon imimi!”

¹⁸ Ana Yesu pisataþne la, pisape “Ee, kieta yuþnaena sanene narui. A in mþena ga, noþnal Yermare molue ma e peni, akoven lua naga pitomi tano sane yekarpla tai. ¹⁹ Nanagane, in na netaþnan pan ami rui, nesape akilia avieyar loþmara amio logovi, a mþareraena kiena ne kieta nasinekar sike mþena vatanon lamiu, ana taþatete sur tai kila kare amiu. ²⁰ Ana ve awarwar amiun re ya naþa in na netaþnan pan amiu, naþa ninuna viowa la asike vatanon amiu, ana sur taaga ga naþa akilia aulen manene kekarena vanonia, na naþa kiamiu kia lala asiri plan sike loyuþna e tus namalena rui.”

Yesu pisa potena pa Arimana

Matiu 11:25-27, 13:16-17

²¹ Ana e pogos nene Ninuna Wa kila sinena ne Yesu kekara paþisi, ana Yesu mlen, pisape “!Ata o, ko ope Suþe nae ma e peni a Suþe nae yomarava nini! Nevisa potena van ko, Ata, vanon sur la naþa e lepas na pun inu, okila meraravan pan la naþa kiela sitomena sa ga nin sisi lala, ana yaru la naþa asitom asape ape manmarua a la naþa asape akilia ruru suria, ko okilawan sur la nene van la. Lelaga þa Ata, nanene na sa ga naþa ko sinoþmania.”

²² A Yesu pisa mþena pan la, pisape “Ata mligan suri punu sike e luþmau rui. A Ata naga taaga naþa kilia inu sape in na ai, a inu naþa nepe narina, in ga taaga naþa nekilia ruru naga, nesape naga ai. Inu nemio la naþa ne nemliganar la vena nekipian la e Ata vena awasine naga, imimi la nene narui naþa mekiliala ruru naga naþa pe Arimamimi.”

²³ Ana Yesu pilon pa puna ne kiena nalogena lala, pragogo ga pan la, la ga amloge, pisape “Ntewa kila po pan amiu paþisi, naþa akilia avisu suri la nene. ²⁴ Navisawalena la mok liu amio þarin suþe la mok liu nanua sumo naþa la sinelan manene paþisi asape avisu sur la nene, ana pe apisuli re pogos tai poli, a aþaryon asape aloge mþena sur la nene, ana la pe amloge re nena poli.”

þakaiwa naþa yere Samaria sinen miye yere Yu tai

Matiu 22:34-40; Mak 12:28-31

²⁵ Ana pogos taþena si tai, yar tai naga pe manmarua ruru e navisaluaena, naga pisape kilali Yesu e naviunen mþarera tai ana naga suþmalu, piun tan Yesu, pisape “?Navianena, visae sineun nesape nekilali netol malena naþa pe luas re poli, yoko monar nekila ve sanape?”

²⁶ Ana Yesu pisataþnea, pisape “Ana kieta Tus Wa pisa ya ne e lepas nene? ?Ko opuloia opisu pisa sanape?”

²⁷ Ana yar naþani pisataþnea, pisape “Tus Wa pisa sanini, pisape: Ntewa na mava naþa naga pe kioþna Ntewa, ko monar sineþna si naga, oligan naga to sumo e losineþna wetelu, a e kioþna malena wetelu, a e kioþna mþareraena wetelu, a e kioþna sitomena wetelu, a ko na monar ositom nalavis puþna lala, okila wo van la, sa naþa ko ositom ko ke ga.”

²⁸ Ana Yesu pisa pania, pisape “Ee, opisa mesmesun nena narui. A visae okila ve sa nene, yoko otol malena nane opiun ke ne.”

²⁹ Ana yar nene kilia sape naga pe kila re mesmes sanene poli, ana naga kilali naþa kila pisape mninue ga, piun tan Yesu, pisape “?Ana a la ne asike lavis pun inu naþa monar nekila wo van la?”

³⁰ Ana Yesu pisataþne kiena naviunena nene e þakaiwa tai, naþa pisape “E legiena tai, yar tai molue ma Yerusalem, suþna mialoro pito garo Seriko. Ana naga mialoro mþa sanene

pano tol yoñarera tai, ana milan ðegas nen yar na vinauen tai, naña apulania, añe kare naga pañisi, añar plan make kiena suria aþure, amligan naga marluia ñeke kiena mrapa komsusa. ³¹ Ana kieta yar wa tai, naga ñena mialoro e mrapa nene naga siraun pimi, ana pogos naña pimi lavisin yar nene, naga miyepe ga pa e isinen mrapplepa, mial þaro pano. ³² Ana siraunia, yar taþena mial pimi. Naga pe Livae la tai, naña asuñña akila ke yuññaena make ga e Yuñña Wa ñana ne Ntewa, ana pogos naña pimi tol yar naþani, naga ñena ga yepen mavin iilaena, miyepe ga pa e isinen mrapplepa mial ga þaro pano. ³³ Ana siraun sina, yar taþena, naña naga suñña mlilu kiena mrapa viavi tai pimi. Naga pe yere Samaria tai, ana sa naña tekilia, yar la nene pe ape erau wo re amio ita le Yu la poli. Ana pogos naña pimi tol e yo naþani, pisu yar nene marlu ñeke e yo naña añe ea, ana sinen miye pañisi. ³⁴ Ana naga pimi lavisinia, kevan lele la naña la nene añea, plan sirveve e magka la naþani, piar ruruia. Ana tarlua yar nena, mligan mon meta e kiena togki, ana mial ñña amio pano-o tol yo tai naña yuñña na varuruen tai ñeke ea. Ana þere naga pa loyuñña ea, miila naga po pañisi. ³⁵ Ana kolulagi, þar kiena varu tai, kian pa þar na yuñña na varuruena naþani, pisape ‘In na monar neva si e kiau mrapa narui, ana yar nene yoko sike e lumoñña sumo wa. Ovisuar ruruia e sur punu ga, a visae varu nene ve torok re, yoko in na nevisuveve si e pogos naña nowasuþe si e kiau yalena nini.’ ”

³⁶ Ana Yesu piun tan yar naña piun naviunena nene pania, pisape “?Opisu suniena nene sanape? ?E yar la telu naña amiyal e mrapa naña yar nene ñeke ea, yar ai naña kila pania sa ga yar tai naña ñeke ga lavisinia?”

³⁷ Ana yar naña pisape “Nesitom nesape yar naña sinen miyea, a miila.”

A Yesu pisa si pania, pisape “Ore, naga ke narui, a ko ñena ga, ova otaveve kiena þelaga wo nene.”

Mareta amio Maria

³⁸ Ana e pogos naþani, Yesu amio kiena nalogena lala amiyaloro ke apa ma Yerusalem, ana apa añalñaliv e narin pulkumali naña Petani, ana sira naña Mareta þere Yesu pa ñala uñña. ³⁹ Ana pogos naña Yesu pa sike amio la nene, luena ne Mareta nene tai, kiena kia Maria, naga totano ga teke lavisin lana ne Yesu, toñña miyagogon ruru ke kiena navianena lala. ⁴⁰ Ana e pogos nene, Mareta naga pe toñña miyagogo re poli, ana naga suñña ñareran ke sape kila ruru make sur punu ga suñate Yesu, a naga sitom manene laa e yuññaena la nene. A siraunia, pimi pisu Maria to ga tano toñña ga, miyagogon ñña Yesu, ana pisa pa Yesu, pisape “Suþe, luou nañña to koren ga toñña sanene, ana in ga taaga nekila make suria. Pona ko opisu kilale re poli yo, ana popon ovisa vania vena imi iila inu.”

⁴¹ Ana kieta Suþe pisatañña, pisape “Mareta, ko sireyar tai naña ositom manene sur pañisi, a omloge piowagan manene sur moki laa na sanene wa. ⁴² Ana sur taaga ga toñña ga naña yoko ko ositom manene urmi ea, nane suri ne nane Maria ñal rui e kiena malena, ana yoko in na taþatete si nelalua vetania.”

11

Leniena naña Suþe pian ita ea

Matiu 6:9-13

¹ Pogos tai, Yesu pa mlen e yo tai, þisi þasuþe pitomi, ana kiena nalogena tai piun tania, pisape “Suþe, visae okilia ovian imimi lia vena imimi ñena mekilia melen, sa ga naña sumo na Yoane pian kiena nalogena lala vena alen, vera na wo vaþisi.”

² Ana Yesu tañan, pisape “Pogaga, visae sinemiun leniena, akilia avisa sanini, avisave: ‘Arimamimi, torokin kemua naña imimi mevatanon kioñña kia wa.

Memlen mesape kioñña navesuþenena imi.

³ Mepiun tan ko, mesape ola kinanena van imimi þane a e legiena punu ga.

⁴ A oviewo kiamimi mlamulena viowa lala, komin imimi mepiewo ke la naña akila ke piowa pan imimi.

A ve oligan re suri la imi akilali manene imimi.’ ”

Ĵakaiwa na viunen suria

⁵⁻⁶ Ana Yesu pisape monar ve amaraun re viunen sur tan Ntewa, ana pisa Ĵakaiwa tai pan la, pisape “Visae kolemallo koe yepe lilika tai, oilan ga kioĴna erau tai yal imi tol yo puĴna. Ana pe koĴna kinanen re si poli, ana monar okirir ova pun yuĴna tai naĴa Ĵneke lavisin ko, monar oviun manene tania, ovisave ‘Wolai, kiau erau tai pimi porun in ga nagane na wa, ana in na luĴnau plas nena ga. In na pe kau kinanena re si naĴa nekilia nela van kan poli. ?Ko na koĴna kinanen tai toĴna ga okilia otaĴnan van inu sumo wa?’ ”

⁷ “Ana sanape, tesitom tesape yoko yaru nene kilia visataĴne visave ‘Aa, ve okila re yuĴnaena Ĵmarera sanene van inu. OĴisu ke ne, mokotava rui, ana memio nin sisi la, moĴneke e Ĵmamimi tog rui, ana taĴatete si nesuĴnal narui.’ Ana peraga, yaru nene taĴatete visa sanene.”

⁸ Ana Yesu yakol si visena van la, sape “Pona pogos tai yaru tai kilia sitom korenan ko, yepen mavin iila koena vanon ga ko na osike lavisinia. Ana visae ve omawan re naĴa oviun kaĴaran Ĵna sanene vano vano-o, yoko yar nene monar la ya naĴa opiun ke ne van ko.”

Yesu pisayu naviunen suri tan Ntewa

Matiu 7:7-11

⁹⁻¹⁰ Ana maran taaga e Ĵakaiwa kiena ne Yesu nene, naga pisa ke sina pan la, pisape “Yaru naĴa piun ke suria, naga tol silaga, a yaru naĴa kale ke suria, naga ĴĴalia, a yaru naĴa sigariga ke mratava, pulutava pietava pan silaga. Visae sanene, yoko akilia awar ya naĴa apiun tan Ntewa, a alual ya naĴa akale ke puna, a mratava naĴa asuĴna asigariga ke ne, vietava van amiu. ¹¹ Visae naruĴna tai viso karia, viun narin ika naĴa teke ne, taĴatete ola loĴnara vania, ¹² pona visae naga viun kopululus nen lakaporo naĴa teke ne, taĴatete ola logovi tai van kania. ¹³ Lelaga naĴa kam na ape yar viowa ga lala, ana amiu yar tai taĴatete kila sanene, asuĴna akekarana ga naĴa ala suri wo la va narimiu la silaga. Sanene, pogos naĴa aviun tan Arimamiu nae ma e peni, naga kekara manene la a naĴa la Ninuna Wa van amiu naĴa ape narina lala.”

Ĵapisape Yesu miyuĴnae ke ga e naĴareraena kiena ne Yermare

Matiu 12:22-30; Mak 3:20-27

¹⁴ Ana siraunia, aĴure yaru tai naĴa yermare pa e naga pimi puna Yesu. Yermare nene kila yar nena pe pis re poli, ana Yesu pilelua yermare naĴani petania, ana naga pis ruru sina, kila yar la naĴa apisu sur nene amilan paĴisi. ¹⁵ Ana la Ĵas apielue, ana apisalele kare Yesu Ĵisa, apisape “Yar nene pile plan ke yermare lala e ga e naĴareraena naĴa suĴe kiena ne yermare lala, naĴa kiena kia Pielsipel, taĴnan pania.” ¹⁶ Ana la si Ĵasa, la ĴĴena asitom piowa e Yesu, ana asuĴna akilalia, sinelan asape aĴareraena vena kila kile tai nae ma e peni avisuia.

¹⁷ Ana Yesu mloge kilale kiela sitomena lala, ana pisape “Visae suĴe tai, kiena yeririna la aliĴere la, naĴa laĴasia akawe laĴasia, yoko yuĴnaena kiena ne suĴe naĴani monar loru. A visae uĴna tai, asuĴna aliĴere la, naĴa laĴasa asape aĴene plan laĴasa, yoko la nene taĴatete asu ruru pog tai. ¹⁸ ?Sa ĴĴena nini, visae yermare kiena ne Yermare Lego la asuĴna amliĴere la ke rui, ana yoko nasuĴenena kiena ne Yermare Lego suĴmalu ve sanape ne? !Kam na apisa ke sur pa sanene narui, asape in na nesuĴna noĴene plan ke yermare lala e naĴareraena kiena ne pupia yermare naĴa Pielsipel, ana taĴatete nena ve sa nene Ĵisa! ¹⁹ ?A visae ve sa kemua naĴa apisa, ana komin ya naĴa kam la Ĵasa asuĴna aĴene plan ke yermare? ?Ane taĴnan Ĵareraena nene pan la, pona yermare Ĵna nene yo? Popon sa kiamiu nalogena la naĴa aĴene plan ke yermare lala aloge kiamiu visena la nene. ²⁰ Ana peraga, apis pe po re nene poli. In na nesuĴna nepile plan ke yermare lala e ga e naĴareraena na limana Ntewa, a sur nene na kana kinasa sane navesuĴenena kiena ne Ntewa sike likan amiu rui.

²¹ “!Apisu ke ne! Sa naþa visae pupia yar m̄arera tai, naga war kiena pupia suri na mara lala, naga suþna kirawo ruru ke m̄ana yuþna. Ana sur kiena ne yar nene su ruru ga suþna e kiena kove. ²² Ana Yermare Lego kiena yuþnaena naga sa ga nene. Visae yar m̄arera taþena imi naþa m̄arera laa taulu naga sane, yoko lalua akila m̄a mara vano naga taulu Yermare Lego, ana yoko kilia war plan kiena sur na mara lala, naþa naga þasine þesania, a yoko naga kilia war make sur la naþa sike loyuþna e kove nene ve kiena, ana liþere va kiena yeririna lala.

²³ “Yaru naþa pe taveve in re poli, naga sane suwo in ke ne, a yar naþa pe miyuþnae re amio in poli, vena moure kiau yeririna la aim lele taaga, naga suþna m̄ene tetain la ke ne.”

Ninuna viowa kilia wasuþe sina imi

Matiu 12:43-45

²⁴ Ana Yesu pisa m̄ena ga, pisapenua “Pogos tai, pog naþa aþnenelua yermare e yar tai, yermare nena kilia va yoþmarua vena kaleli yo tai naþa va se ea ve m̄ana uþna. Ana visae ve lual re, yoko naga visavenua ‘Aa, yoko neto li si e m̄au uþna marua na sumo.’ ²⁵ Ana pogos naþa pitomi, yoko naga lual sane akilavan ruru ga m̄eke na, akila ruru make sur la e yuþna naþa þisi rui. ²⁶ Ana yoko naga va were si yermare taþena la ve olua naþa apiowa manene laa taulu naga sane atom amio, ana yoko ava si asike los nen yar nene. Ana yar nene nanua sumo kiena malena piowa, ana siraunia kiena malena piowa manene laa sane.”

Mrapa na tolen kekarena naþa lelaga

²⁷ Ana e pogos nene, sira tai sike amio la naþa apisu ke sur la nene, a naþa amloge ke visena kiena ne Yesu lala, ana sira naþani kekaran paþisi. Ana pion manenea, pisape “! A kee, anoþna naþa þar ko, a mla yu pan ko, navisa ruruena kiena ne Ntewa keviu paþisi pania, naþa naga þar sisi tai sane ko.” ²⁸ Ana Yesu pisataþnea, pisape “Ee, nanene na lelaga, ana nevisa van ko, nesape navisa ruruena kiena ne Ntewa va ve keviu manene laa sanene sike e yar ai naþa logear visena lala kiena ne Ntewa, a naþa kila ya naþa naga sinenania.”

Yar la naþa sinelan visuen kile

Matiu 12:38-42; Mak 8:11-12

²⁹ Ana e pogos nene, þina la naþa amiagogon ke Yesu asuþna apim la mok manene laa narui, ana Yesu kilia m̄a naþa sane la moki naþa apimin ga avisu kiena kile lala, ana pis pan la, pisape “In na nepisu sane lus na yeririna nanagane lala la apiowa laa. La sinelan asape avisu ga kile lala, ana peraga, Ntewa taþatete nena la kile tai van la vena avisuia. Ana kile kiena ne navisawalena Sona nanua sumo, naga ga nene akilia avisuia. ³⁰ Ntewa mligan Sona, naga sane kile tai kiena ne la nae Ninive nanua sumo, ana naga mligan m̄ena inu Narina ne Yeririna nepimi sane kiamiu kile na nagane tai.

³¹⁻³² “Ana le Ninive la nanua sumo amloge visena kiena ne Sona, la apilopu la e pogos nene, a yoko la nene asuþnalu ase e legiena na liþereena, la avisa lologia kiamiu naviowaena, komin yar tai naþa naga to laa metavan Sona naga sike amio amiu, ana pe apilopu amiu re nena ga.

“A nanua m̄ena sumo naþa sira kawa tai pe þarin suþe tai naþa molue e kiena purvanua naþa sike koperin paþisi, pitomi tano vena loge visena na manmaruaena lala kiena ne yermarua Þarin Suþe Solomon. Ana sira kawa m̄ena naþani yoko naga suþnalu se e legiena na liþereena nene ana visawal ruru nena kiamiu naviowaena lala, komin naþa yar tai naga to laa metavan Solomon naga sike amio amiu, ana pe sinemiun re nena naga poli.”

þakaiwa lua e lepas na kapi vivaga

Matiu 5:15, 6:22-23; Mak 4:21; Luk 8:16

³³ Ana Yesu pisa m̄ena, pisape “Pogos naþa tesilan kapi vivaga, ve tesilan re ga þisi na

teva towarwan m̄eke e p̄iliṗili tai e porotano, pona takalo si e piaki tai, ana tesilania vena tetelan to metava, vena visae yar imi loyuṁa ana lual naṗa kapi vivaga nene tegoli make nena yo.”

³⁴ Ana Yesu pisa m̄ena, pisape “Kilamaran yar naga sane yo taaga ga naṗa yomerava pimi ke loyuṁa e tasnena. Sanene, visae kilamaraṁa merarava ruru wo, visu ruru nena sur lala, yoko ve sa naṗa tasneṁa pulemamaga nena e yomerarava. Ana visae kilamaraṁa viowa, pinaia sur la punu ga naṗa suṁa pisuia, yoko ve sa naṗa losineṁa pulen nena yemalolo. ³⁵ Visae sanene monar avisuar ruru amiu, vena kapi vivaga naṗa teke e losinemiū ve imi re si ve sa yemalolo. ³⁶ A visae losinemiū la ulen ruru luen ga kapi vivaga silaga, naṗa ve narin malo re nena tai teke ea, yoko kiamiū malena tego ruru nenaga, tegoli make yo punu ga.”

Yesu pis m̄arera pa li nasumonēn nalotēna lala

Matiu 23:1-36; Mak 12:38-40; Luk 20:45-47

³⁷ Yesu pis m̄a pa p̄ina la pa sanene, ana Varasi tai naṗa toṁa miyagogonia pisa pania pisape yoko were va m̄ana, kila kinanen tai vania. Ana amio Yesu apano, ana pog naṗa kinanena su ruru pa sike na, ana Yesu pa totano e lelen kinanena. ³⁸ Ana e pogos nene, Varasi lala la sane monar atarar m̄arera navisaluaena tai naṗa sane yar monar taveve mrapa laṗasa nakevanen limana, p̄isi na kilia kinana. A Varasi naṗani sitom pisape Yesu naga pe yaru wa tai, naga monar kila ve sa naṗa kiela p̄elaga m̄arera nene pisa, ana pogos naṗa pisu sane Yesu pe sitom manene re kilaen poli, naga milan manene paṗisi. ³⁹ Ana Suṗe pis pa yar naṗani, pisape “In na nekilia make kiamiū p̄elaga le Varasi la rui. Amiu na sinemiūn manene asape akevan ruru m̄amiū piala amio kamiū pialora la silaga, ana apilaven paṗisi, asitom ke asape kam na amekik paṗisi ne, a ape yar wa. Ana pupia kororaki sike e amiu na wa, komin losinemiū lala pulen kilakotaliaen yaru, a nakila kareen yaru, a p̄elaga viowa la ne sanene. ⁴⁰ !E, ve ave wowe re sanene! ?Pe apisu kilale re naṗa asape Ntewa nene naṗa si make sur na vanua e sur punu ga, naga si m̄ena loyuṁa na sur make ga, ana po paṗisi naṗa visae akila yepas nemiū la punu ga ikik ruru nena wo lelaga, vanua amio loyuṁa. ⁴¹ Sur nowo la naṗa asuṁa akokonia manene ke e kamiū pialora amio m̄amiū piala lala, visae aliṗere re ga laṗas va yar la naṗa limala plasia, vera na wo na wo. Visae ve sanene, pona yoko avisu kiamiū sur la imi ikik ruru yo rui, ana ve aṁareran re si kilaen kiamiū p̄elaga taṗena laṗasia.”

⁴² Ana Yesu pisayu p̄elaga navisokanena kiena ne li na sumonen na lotēna lala pa laa sane, pisape “!Amiū le Varasi lala, o! Akila kare amiū paṗisi wa, yoko viowa manene laa van amiū. In na nekilia m̄a naṗa apisuar ruru ke silaga, asape visae awar kamiū kinanena ve lualima, yoko monar tai va e yuṁa m̄ana Ntewa, sa naṗa navisaluaena suṁa pisa, a asuṁa akila ke sanene e kamiū sur punu ga, pano-o tol m̄ena narin m̄as nen kapis lala a sur m̄ena la naṗa sane m̄rasil. Ana sur kerkeviū la naṗa navisaluaena pisa, kam na pe asitom re nena poli, sa naṗa pisape monar amesmes ruru wo, a monar sinemiū si Ntewa a yar taṗena lala. Visae sinemiūn uararen narin sur la nene m̄arera, naga pogaga, ana pupia sur kerkeviū la nene popon visae asuṁa akila ga rui, ana pe akilali re nenaga.

⁴³ “!Amiū le Varasi lala, o! Akila kare amiū paṗisi wa, yoko viowa van amiū vaṗisi. Loyuṁa e yuṁa na leniena lala, sinemiūn asape ato luen ga tano e lelen yerkaṁa lala, a visae ayaloro e marana yeririna lala, sinemiūn asape monar avatanon amiū, avio ruru amiū, avisave ‘A ke, navianena wo, pokolulagi!’ ⁴⁴ Yoko viowa manene van amiū vaṗisi, komin naṗa kam na sane suri korena ga, kam na sane lotap marua la naṗa yaru la sinela p̄esan rui, ana amialor ke ga meta ea, pe apisu kilia re asape suri kona tai menunu m̄eke tano e poli.”

⁴⁵ Ana e poglis nene, yar tai naṗa pe manmarua ruru e navisaluaena, naga m̄ena suṁa miyagogonia, ana mloge sane visena kiena ne Yesu tol ruru naga amio m̄ena la naṗa amiyuṁae ke sane naga, ana pisape “!Navianena, nemloge sane sinoṁan osape ovisa kare imimi towe m̄ena ga!”

⁴⁶ Ana Yesu pisatañnea, pisape “!Ee, yoko viowa ñena van amiu li navisaluaen lala! Asuñña apisir plan ke sina narin navisaluaena lala e lepas nen nalotena silaga, sane sur urmi la naña asuñña akuanpolo sike e ñasin yar lala asape monar awaria, ana amiu, asuñña ga sanene, pe akululun re nena mrasilmamiu tai vena akilali naña aiila la. ⁴⁷ Yoko viowa nena van amiu, komin naña kam na asuñña amiyowauia ruru ke tampona kiena navisawalena la kiena ne Ntewa, ana amiu na maran taaga ga sa ke repimiu marua la nanua sumo, naña la ke narui naña aña moñar navisawalena la nene. ⁴⁸ Kam na amio la nene maran taaga, komin nanua sumo, yermarua la nene la aña moñar navisawalena lala, ana nanagane kam na akekarana ke yuññaena ken la nene, kam na asikol ke si ne naña asuñña amioa ke kiela tampona lala.

⁴⁹ “Kam na sane na visena na manmaruaena kiena ne Ntewa naña pisa nanua sumo, naña pisape ‘Yoko neligan kiau navisawalena lala a kiau li nalologena lala imi van la, ana yoko akila kare la, pona yoko awe moñar la.’ ⁵⁰ Visena nini, kana kinasa sane yoko kam ke narui naña akus nakoena kiena ne naweñaren navisawalen la punu ga naña repimiu na sumo lala aña moñar la, siar e nasiaren purpēs nen yomarava nini. ⁵¹ Naga nene siar e Epela nene, pimi tol Sakaraea naña repimiu la nene añañaria likan wonta amio yo wa loyuñña e yuñña wa ñana ne Ntewa. Lelaga nane nevisa van amiu ne, sane nakoena na kuruta kana navisawalena lala kiena ne Ntewa sike e kam nanagane.

⁵² “Ee, piowa pan amiu yaru na kilia ruruen navisaluaena lala, komin kam ke naña amlawan ki na pulutava na kiliaena, ana kam na pe apa re si loyuñña e poli, a asuñña asuwo ke mrapa pan yar tañena la naña sinelan asape ava loyuñña.”

⁵³ Ana Yesu pisa pa visena la nene, molue petan yuñña nene pano, ana navianen navisaluaena lala amio Varasi lala sinela mlæan naga pañisi, naña sinela mimi kar pañisi. Ana la apanon Yesu silaga, asuñña akuan ke visen ñarera a naviunen ñarera la pania vena ayurli naga, ana akilali ñena naña asape naga visa visena lañasa naña ve mesmes re. ⁵⁴ La apanon Yesu sa naña naga pe sur tetan tai, komin naña sinelan asape alual kiena visena lañasa naña torokin aliñere naga vanonia.

12

Navisawanena lala naña tapolou yoko aim akate e yometava

Matiu 10:26-27

¹ Ana ñina la apim ke puna Yesu na wa, la ataulu manu mok liu, a poglis naña apim ke lele taaga sanene, yo ve tokaki ga, a asuñña apieyepal kare ke ga lala lala. Ana pogos naña Yesu pe pis re pan la poli wa, pis ñesan pa kiena nalogena lala, pisape “Kam na avisuar ruru amiu e ñelaga viowa kiena ne Varasi lala, komin naña la asuñña apivis ke ga e gola, la asuñña apis vilave ke sanene, ana apisokan ga ne. Ñelaga viowa kien la nene kilia va tolkare yar tañena lala, sa naña is na kilaparavi naga ve tokak ga ana ñarmake puluyavi na kilaparavi nene veraga. ² Sur viowa make ga naña yar la ne sanene asuñña amiyuññaen vinaun ke na, pona naña apisawan ke ga, yoko amolmolue e yo metava na wa, vena yar punu ga akilia. ³ Visena ya naña yar pisa ke ga e yemalolo, yoko monar aloge sina ko legiena, a sur la naña yar pisa mumun ke ga ñana loyuñña, yoko monar avion manene si va metava e maran yar make ga, vena yar make ga akilia aloge.”

Nalogena kiena Yesu naga monar ve maraun re yaru

Matiu 10:28-31

⁴ Ana Yesu pisa ñena pa kiena nalogena lala, pisape “Era lala, nevisa van amiu sanini, nesape ve amaraun re la naña akilia aweñar ga tasnemi mare, ana siraunia tañatete si akila sur tai va ninumi. ⁵ Ana in na sineun nesape nevis ruru van amiu nesape yoko amaraun yar ai? Yoko monar amaraun nena Ntewa, naña naga kilia kilañar ñesan tasnemi sumo, a siraunia kilia kuan ninumi vito e lele na logeen viowa. Lelaga ña, yar ne nanene na monar amaraunia. ⁶ Ana visae amaraunia, yoko tañatete si amaraun sur tai, komin Ntewa na suñña pisuar ruru amiu ñaga, sitoñal amiu ñaga. Asitomli narin

ninlaea la naþa la moki kar ga asike ne, sa ga kororaki, a yar la asuþna aþiliwilin ke la lima e ga e narin varu tai, ana Ntewa naga sitoþnal make la ga peve taaga silaga, pe sinen þesan la re nena poli. ⁷ A vilþarimiu þena lala, moki paþisi, ana naga polo make vilþarimiu la peve taaga na sike ne. A Ntewa na pisu amiu na po paþisi, taulu ninlaea la nene, ana yoko visuar amiu e sur punu ga na kiamiu malena lala.”

*Yar naþa pisawal pisape naga pe kiena ne Yesu
Matiu 10:32-33, 12:32, 10:19-20*

⁸ Ana Yesu pisape “Yar a naþa pisawal e maran yar lala pisape naga pe kiau tai, yoko inu Narina ne Yeririna inu þena nevisawal e marana ne navisi lala nae ma e peni nevisave yar nene naga pe kiau. ⁹ Ana yar a naþa pisawal e maran yar lala pisape pe pe kiau re poli, yoko inu Narina ne Yeririna inu þena nevisawal e marana yar lala nevisave yaru nene na pe pe kiau re poli.

¹⁰ “Mlamulen viowa amio visen viowa lala, a visena naþa kila kare inu Narina ne Yeririna, Ntewa kilia viewo ke yar vanon na wa. A yar naþa kila kare sur wa kiena ne Ninuna Wa, pisayu yuþaena kiena ne Ninuna Wa pisape Yermare Lego ga miyuþaenia, yar na sanene Ntewa taþatete viewo pogos tai.”

¹¹ “A visae pogos laþasia, yar la sinela kar amiu, yoko avis van amiu. Yoko akilia aure amiu ava asuþnal ase maran yerka wa lala na yuþa na leniena, pona kumali, ana ve asitom manene re avisave yoko akilia avisataþe la ve sanape ne, pona yoko avisa visena ya na van la ne. ¹² E nena e aora ga nene, yoko Ninuna Wa ga iila amiu, vian amiu e visena ya naþa akilia avisa.”

þakaiwa na yaru na sur moki naþa pe sitom ruru re kiena malena poli

¹³ Ana yaru na þina nene tai pion ke pa Yesu, pisape “Navianena, wolai suþna kila kare in ke ne, pe mliþere ruru re lalimana arimamimi pan in poli. Popon ovisa vania monar kila mesmes ga van inu.”

¹⁴ Ana Yesu pisataþea, pisape “Peraga yaru, sur nene ve in re na nekila. In na pe nepe yar na liþereen re yar poli.” ¹⁵ Sanene, Yesu pe kila re sa naþa yar nene pisa poli, ana mla visena tai pan la e lepas na sinesunen manenea. Naga pisape “Monar avisu ruruia, pe pon re avieluen manene yar taþena la poli, sinemiun manene laa asape awar kiela sur lala. Kieta malena pe su re e sur moki la naþa towar poli, ana kieta malena na suþnal ga sike e sur taþena.”

¹⁶ Ana e nene Yesu sikol kiena visena pa laa sane, naga pisa þakaiwa tai pan la, pisape “Yar na sur moki tai, kiena porotano keviu paþisi, a po þena paþisi, ana kana lokove la þar kinanen moki paþisi. ¹⁷ Ana yar naþa pisu kinanena la nene, sitom þele narui, pisape yoko naga kila ve sanape ne, yoko ligan ruru kana kinanena la nene su pe ne, komin kiena yuþa na kinanena lala a kiena yo taþena la puleule make rui. ¹⁸ Ana yar naþani pisape ‘Yoko nowe plan ga kiau yuþa na kinanena na urmarua la nene, ana nekila si urviu laþasa, naþa akerkeviu laa sane, atorokin kinanen make la nene amio kiau sur moki taþena la naþa sike ne. ¹⁹ Pogos naþa nekila pae, yoko nevisave in na sane in ke narui, in na nopo laa narui. !Lelaga þa, yoko neloge wo vaþisi! Kiau sur moki la nene, yoko nakan la þa sanene vano-o, la avisuar ruru inu e kas ve moki. E pogos nene, in na taþatete si neyuþae narui, yoko in na nakan ga ya naþa in na sineunia, yoko nomun korena ga suria, sane nesu luen ga e malena wo narui.’

²⁰ “Yar nene sitomiyu ke sanene pano, ana mninue ga, naga ke naþa Ntewa kila ruru ke sape vis van narui, visave ‘Peraga yaru, ko na ope wowe ga. Yemalo ga nini, nesape nelalua si kioþna malena vetan ko. A kioþna sur moki la naþa oþareran omiyuwon polo pe kioþna sike ne, yoko a ne ve kiena si narui?’ ”

²¹ Ana Yesu pisa pan la, pisape “Yoko ve sa ke nene narui va la naþa amiyuwon polo ke kiela sur lala, la ape yar na sur moki e yomarava nini, ana la pe ape yar na sur moki re nenaga e lepas kiena ne Ntewa.”

*Yesu pian la sanapen yar naþa sitom manene kiena malena
Matiu 6:25-34*

²² Ana Yesu pisa mēna pan kiena yeririna lala, pisape “Visae sanene, in na nevisa van amiu, nevisave, pe pon re kiamiu sitomena la ulen manene kiamiu yuṁaena na visuar amiuen ga la poli, naþa apiuviun ke asape ‘?Yoko telual kata kinanena pe ne?’ pona ‘?Yoko tetol m̄ata kulmrae na yenen sanape ne?’ ²³ Sitomen la nene pe mesmes re poli, komin kiamiu malena naga to laa metavan kinanena, a yepemiu na to laa metavan kulmrae. ²⁴ Asitomli sako la ne akaka kar ke la ne. La nene pe amapla re lokove po, la pe apanon re aþar kinanena pimi po, a pe lelen kala kinanena re tai naþa awarpolo se poli. Ana Ntewa pagan la ke ne, a e kiena navisuenā, naga pisu amiu ato manene laa metavan manu la naþani, ana naga monar visuar amiu manene laa na wa taulu la. ²⁵ ?Asitom asape yar naþa naga sitom manene laa kiena malena naga kilia kila kiena malena naþa plas imi ve piavi li laa sane? ²⁶ Peraga, pe sa re nene po, komin naþa kam na taþatete akila narin sur tai ne sanene, po pon kam na ve asitom manene re sur taþena lala e kiamiu malena.

²⁷ “Asitomli meme tanea la ne pitotovi kar ke ga la ne. La na pe amiyuṁae re poli, a pe asuluwo re m̄ala kulmrae la poli. Ana nevisa van amiu, þarin suþe Solomon nanua sumo, naga pe yar na sur moki a naga kiena sur make ga, ana m̄ana kulsota pe miyowau ruru re poli sane meme la nene. ²⁸ Meme la nene na legiena taaga ga, yoko peni ga na asikapi la, ana Ntewa suṁa miyowauia ruru la paþisi. ?Ana asitom asape yoko taþatete Ntewa war kulsota van amiu? Peraga, kam na pe apiawa re nena m̄arera e naga poli. ²⁹ Komin sur ne la na nene, pe pon re sinemiu ulen manene sitomena, naþa asape ‘?Sanape na yoko tekinana, pona tomun suria, pona telual m̄ata kulsota?’ Pe pon re asitom manene sur la sanene poli. ³⁰ Ee lelaga þa, yar make ga lala na purvanua kerkeviu na yomarava nini la asuṁa asitom manene sur la ne sanene silaga, ana amiu na, Arimamiu kilia pa rui sape yoko monar awar sur la nene. ³¹ Sur naþa asitom þesan ve keviu e kiamiu malena, naga navesuþenena kiena ne Ntewa. A visae akila sanene, yoko naga la m̄ena sur taþena la nene van amiu. ³² Lelaga þa, kiau narin sipsip lala, Arimamiu sinenan manene paþisi sape taṁan amiu aimi avesuþen kiena yeririna lala, ana kam na taþatete sinemiu konan sur tai, yoko suri punu ga woga ga van amiu.”

*Yar naþa naga pe yar na suri moki
Matiu 6:19-21*

³³ Ana Yesu pisapenua “Po pon auliwilin plan kiamiu sur la nene, awar kana varu la va van la naþa limala korena vena aiila la. Visae akila sanene, sa naþa aþar ke kiamiu pupia karo tai naþa m̄eke ma e peni, naþa taþatete viowa pogos tai, a akokonia ke kiamiu sur moki paþisi pito ke ea, naþa akilia awasinea, naþa yar navinauena taþatete si warlua vetan amiu, naþa kirara la taþatete si akila karea. ³⁴ Popon sane kam na kiamiu sur nowo la ve moki sanene su ma e peni, komin naþa yoko kiamiu sitomena lala sulue ga e yo nene naþa kiamiu sur nowo la sike ea.”

*Nalogenā la monar asu ruruian naþa Suþe wasuþe sina
Matiu 24:42-51; Mak 13:33-36*

³⁵⁻³⁶ Ana Yesu pisa mēna pan la, pisape “Monar asu ruru silaga vena kiamiu Suþe imi m̄alivin amiu. Kam na monar ave sa yar na yuṁaena kiena ne yerkawa tai, naþa mligan la vena va e talopaena tai. A amiyowau ruruia, a asilan kiela kapi lala, asuṁalu ga asuṁa ga, ana pog ya naþa kiela yerkawa imi m̄alivin la, sigariga mratava, ana la asu ruru asike rui, akilia avietavan veraga. ³⁷ Pupia navisa ruruena sike e yar la naþa amiyuṁae sanene, pogos naþa kiela yerkawa pimi m̄alivin la, ana asuṁate m̄a naga, atavilo ga asuṁa ga. Yokorena kiela yerkawa kekarān la vaþisi, ana yoko naga va yowau, siraunia imi ana la aiilan ga naþa vio la vena atotano e kana lelen kinanena, naga piovision kala kinanena tanea nene. ³⁸ Pe sur koren ga visae yemalo rui, pona pa ko yepelilika la ne, pona lavis lakaporo kokoreko, ana visae yerkawa naþani imi lual kiena yeririna la atavilon ke sanene wa, þisi na naga kila wo manene laa van la sane wa.

³⁹ “Ana maran taaga sina ga, visae yar tai kilia ruru pogos naþa yoko yar na vinauena tai imi m̄ana, yoko yar nene taþatete ligan m̄ana yuṁa ana va koyo tai, ana naga monar su ruru ga suṁate m̄aga. ⁴⁰ Ana visae sanene, kam m̄ena monar asururuia, asuṁate naþa inu Narina ne Yeririna neim noṁalivi, komin naþa yoko neim noṁalivin amiu sina e pogos tai naþa pe yar tai kilia re poli, pona sitom ke sape yoko nowasuþe inu ea.”

Ṕakaiwa na yar na yuṁaena naþa kiena yerka wa ṕasuþe si pimi
Matiu 24:45-51

⁴¹ Ana Pita piun tan Yesu, pisape “?Suþe, ṕakaiwa naþa opisa ga na wa, opisa ga pan imimi imimi kioṁa li nalologena lala, pona pe kien yaru make ga?” ⁴² Ana Yesu pe pisataṁe ruru re poli, ana pisataṁea e ṕakaiwa tai.

Ṕakaiwa nena sanini “?Visae yar na yuṁaena tai, naþa naga pe manmarua ruru ea, a naga ṕuarar ruru yuṁaena nene, naga yuṁae sanape? Visae kiena yerka wa ligan yo vena va perina, ana yerka wa naþani ligan kiena yuṁaena lala se e limana. Ana yar nene naga visuar ruru yar na yuṁaena taþena lala, yoko uarar ruru yuṁaena la nene. ⁴³ A pogos naþa yerka wa wasuþe sina, yoko lual sane yar na kiena yuṁaena naþani, suṁa ṕuarar ruru ke yuṁaena la naþa na wa. Ana e pogos nene, yar na yuṁaena naþani kilia loge wo vaṕisi, ⁴⁴ komin yoko yerka wa naþani ligan make kiena sur la e limana ne. Ee, a yoko Ntewa m̄ena ga kila ve sa ke ga.

⁴⁵ “Ana visae yar na yuṁaena naþani yuṁae viowa ga, ana pogos naþa kiena yerka wa mligan yo pa sike perina, yoko naga sitom visave ‘E, yerka wa nene pa sike gare piavi laa narui, pona ve imi re si yo.’ Ana yoko naga suṁalu kila viowa va kiena yar na yuṁaena lala, pona sira na yuṁaena lala, a yoko naga suṁa kinanan kilavaru kiena ne yerka wa naþani, a va mun luen ga wii e legiena punu ga. ⁴⁶ Ana yoko yerka wa naþani wasuþe sina e legiena tai naþa yar na yuṁaena nene ilan ga, e pogos tai naþa yar nene pe sitom re pisape yoko imi e poli. Ana yoko yerka wa naþani la pupia nakoena tai van yar nene, naþa yoko kila naga va sike e yo kiena ne ṕarmarera lala.

⁴⁷ “Yar na yuṁaena naþa kilia ruru ya naþa kiena yerka wa sinenan pisape monar kila, ana siraunia naga pe kila re poli, yoko awe kare naga vaṕisi. ⁴⁸ A yar na yuṁaena naþa kila piowa sane popon awe kare naga, ana komin naga mninue ga, yoko taþatete awe manene naga.

“Yar naþa Ntewa mla keviu pania, Ntewa sinenan pisape visu yaru nene yuṁae ve keviu m̄ena amio. A yar naþa visae yar la amligan sur la moki se limana, yoko aviun ke sina sur ve moki vania va laa sane na wa.”

Yesu pe purþes nen yar na kaween yaru
Matiu 10:34-36

⁴⁹ Ana Yesu pisape “In na nepimin nena nesape neligan kapi e yomarava nini, a popon manene visae kapi nene vivaga rui, ana pere wa. ⁵⁰ Ana pupia yuṁaena tai sike vamon inu wa, vena in na monar neva nowarpoyo ea, a nanagane in na nakawean in manene ke vanon rui. Popon sur nene imi vilaga, vena nekilia nekila makea. ⁵¹ ?Kam na asitom ke asape in na nepimin nekila sa naþa pupia suṁare imi sike e yomarava? Peraga, in na pe nepimin re neligan suṁare e poli, ana in na nepimin nekila ṕelaga na viaþaena imi ve keviu. ⁵² Siar nanagane, pona e uṁa tai, yar la lima asike ea, ana yoko la ve telu aviaþa vetan la ve lua, pona la lua aviaþa vetan la ve telu. ⁵³ Yoko yar la asuṁa aviaviaþa, naþa yoko m̄ee lala akawe arimala lala, arimala lala akawe narila m̄ee lala, a anela lala akawe narila sira m̄ee lala, a sira m̄ee lala akawe anela lala, a yoko anen simem lala yoko akawe sira la naþa atalopa amio narila na yerṁene lala, a yoko sira la naþani akawe anela simem la nene.”

Monar avisu kilale kile na pogos kiena ne Yesu
Matiu 16:2-3

⁵⁴ Ana Yesu pis sina ga pa ṕina lala, pisape “Pogos naþa ita tevisu pupia malo m̄eke e yo naþa lagi molue ke kom ea, tekilia tesape ṕisi na yua wowo, a ve ve piavi re yoko yua nene

imi. ⁵⁵ A pogos naþa visae teloge kieta lagi ura yui, nanene na tekilia tesape yepisusun vaþisi ne, a yokorena monar ve sa ga nene narui. ⁵⁶ ?Nanene narui, nane asuþna apisu kilale ke kile lala na sinapane a na yomarava nini narui, avisave yoko pogos ve sanape pona ve sanape, ana sanapen naþa pe apisu kilale re kiau kile la poli, na pupia pogos nanagane naþa nesike nemio amiu ea? ?Pona kam na yepemiu mavin ga visu kilaleen yo? Aulai, kam na apilaven manene laa kiamiu visen koren la nene paþisi wa.

⁵⁷ “Popon kam akilali naþa akilia towe laa narui sane mrapa ya naþa mesmesun aliluia. ⁵⁸ Visae pogos tai oveveyun sur tai omio yar tai, ana naga sinenan pisape were ko ova osuþmalu ose marana ne yar naliþereena, popon okilayonli naþa vena ovis ruru omio naga sumo wa, pogos naþa pe atol re kumali poli wa. Visae peraga, pona naga ligan ko e limana ne yerkawa na liþereen yar yo, ana yerkawa naþani pona naga ligan ko mþena ova e limana ne yar na taren yaru lala, a yaru na taren yar lala pona aligan ko e yuþna nakoarena yo. ⁵⁹ Lelaga, nevisa van ko sanini, nesape visae sanene, yoko taþatete si omolue e yuþna nakoarena, vano-o oul plan make kioþna nakoarena sumo wa, þisi na okilia omolue sina.”

“Ana visena nini pe lelaga e kiamiu malena na yomarava nini, a pe lelaga mþena e lepas na pun amiu amio Ntewa.”

13

Visae ve avilopu ko re yoko omare

¹ Ana yeririna laþas naþa asike e pogos nene, la asunyu pa Yesu e lepas kiena ne le Kalele laþasia, naþa yerkawa nae Rom naþa Paelat kila þelaga piowa tai pan la. Apisape “La nene, asike e Yuþna Wa mþana ne Ntewa, ana pogos nena naþa amlotun ke Ntewa akila kuþaþaena pania, Paelat la apim amial moþnar la. A la aþalelar kuruta kan la nene amio kuruta na kuþaþaena nene naþa la asuþna akila ke ne.”

Ana pogos naþa apisa sur nene pa Yesu, la asitom pa rui asape sur viowa nene naþa pimi mþalivin la nene, pona nakoarena kiena ne Ntewa tai nene yo komin kiela sur viowa laþas naþa akila. ² Ana Yesu pisataþne la, pisape “?Kam na apisu le Kalele la naþa kiela marena piowa sanene, asitom sanape? ?Pona kam na asitom ke asape la nene na ape yar viowa la lala, taulu le Kalele taþena lala, pona kiela nakoarena ga? ³ In na sineun nesape nevisa van amiu nevisave peraga, pe sa re nene poli. Ana kam na monar avisuar ruruia, komin visae ve avilopu amiu re, yoko kam mþena amare e þelaga tai ve sa ke nene. ⁴ A kam na asitomiyluli mþena yuþna na kirakiravaena naþa mþeke e pulkumali naþa Siloam. Naga mon manene metava paþisi, ana poglis nanua mloru ne, ana kowar yar lala, la lualima taaga pa orely [18] amare. ?Sanapen la nene? ?Pona kam na asitom ke asape la mþena apiowa laa taulu le Yerusalem taþena lala, pona nanene na sane kiela nakoarena ga ne? ⁵ Ana peraga, naga mþena pe sa re nene poli. Ana in na nevisa si van amiu, kam na monar avisuar ruru amiu, komin visae ve avilopu amiu re, yoko kam mþena amare ke ga e þelaga tai ve sa nene.”

þakaiwa na purpiliva naþa pe þar re mras poli

⁶ Ana Yesu pisa sina þakaiwa tai, naþa pisa sanini, pisape “Yar tai, kana purpiliva tai kapuru sike e kana lokove. Ana pogos tai yar naþani pimin purlaki nena, sinenan pisape visulia þar mþa mrasa pona peraga. Ana pimi pisulia, mþal purlaki naþa pe þar re nena mras poli. ⁷ Ana pis pa yar naþa pisuar ke kana lokove, pisape ‘Nanagane tol kas telu narui naþa nepimin nakale mras nen purpiliva nini, ana peraga. Sineu maren rui, naga mono korenan ke ga yo wo nene, yoko otelua ga vano.’

⁸ “Ana yar nene sinen miye purpiliva naþani, pisa pa kiena yerkawa, pisape ‘Visae sanene, yoko teliganli mon mþa tol si kas ve taaga. Yoko nekilayonli naþa nekila ruru sumo, yoko nekilvivi purþesa, a yoko nokoven sin puluk laþas va ea vena kila kapur wo. ⁹ Ana visae kapur wo, war towe mþa mras laþas e kas na sirau, yoko kilia suþna ga sanene, ana visae peraga, naga narui yoko otelua ga na wa.’ ”

Ana ðakaiwa nene pisayu ke sape narin pulmas teke ga wa naþa yaru la akilia avilon la, visae peraga, yoko Ntewa la nakoena van la.

Yesu kila ruru sira marua tai e Legiena Wa

¹⁰ Ana e Legiena Wa tai, Yesu suþna pian ke yeririna lala loyuþna e kiela yuþna na leniena. ¹¹ Ana e yo nene, sira marua tai suþna ea, naþa ninuna na maiena viowa sike ea. Ana ninuna nene kila naga pa tol kas lualima taaga pa orelu [18] rui, kila mþasina ne sira nene pulu nena paþisi, naga suþnalumu mesmes þele sina. ¹² Ana pogos naþa Yesu pisuia, pio pimi, pisa pania, pisape “Sira marua, nevisa sanini, nevisave ko, inanena naþa piar ko ke ne, ligan ko ga nanagane.” ¹³ A Yesu mligan limana tea amio visena nene, ana mþasina pimi po ruru veraga e nena e pog naþani, ana sira naþani mloge po paþisi, mieluar Ntewa.

¹⁴ Ana nasumonen na yuþna na leniena naþani sinen kar Yesu vanon naþa kila ruru sira naþa e Legiena Wa. Ana pis pa yeririna lala, pisape “Sa naþa tekilia rui, tekilia teyuþnae e legiena ve orai, a legiena ve taaga ve teyuþnae re. Visae sinemiun naþa akila plan maiena vetan amiu, popon aimi e legiena orai la nene, ana Legiena Wa na sa nini pe pe kana pogos re nene poli.” ¹⁵ Ana Suþe pisataþnea, pisape “?Sanape? ?Pona akepu ke kiamiu puluk la e Legiena Wa yo, pona pe akila re poli? ?Pona apagan ke kiamiu sur mal lala, pona amla wii pan la e Legiena Wa yo, pona pe akila re poli? ?Ana vanon ya ne kam na pe akekarana re naþa nekila suri wo e sira marua nene? !Kam na ape yar navilavenen ga vis korenen nene! ¹⁶ Sira marua nini, naga vineta tai naþa ita punu ga tomolue e lus kiena ne Epraam, ana Yermare Lego piar manene panon inanena nene mþene kas lualima taaga pa orelu rui. Ana in na nepisu sane Legiena Wa naga torokin ga naþa tourelua naga e yo viowa naþa naga sike ea.”

¹⁷ A pogos naþa Yesu pisa visena nene, kila kiena nasinekar la naþani amloge amawa paþisi e marana ne yeririna lala. Ana yar taþena lala, la amloge akekara paþisi e yuþnaena naþareraena wo la naþa Yesu kila pan la.

Þakaiwa na kurus nen mrapa

Matiu 13:31-32; Mak 4:30-32

¹⁸ Ana Yesu pisa ke sina ga, pisape “?Yoko nevisa visena ya ne van amiu vena kila na akilia sane nasuþnenena kiena ne Ntewa naga sanape? Yoko nevisave nasuþnenena nene naga sane sur ya? ¹⁹ Yoko nekilali naþa nekila merarava van amiu e ðakaiwa nini, naþa pisape: Nasuþnenena nene, naga sane kurus nen mrapa naþa mloru pito pelan te laki tai. Kurus nene na ve tokak paþisi, ana pogos naþa kapuru, pimi pe purlaki tai naþa keviu manene laa, ana manu la akila mþala ponovi lala e kana korowas lala.”

Þakaiwa na is

Matiu 13:33

²⁰ Ana Yesu pisa sina ðakaiwa taþena pan la, pisape “?Pona nevisave nasuþnenena kiena ne Ntewa sa si ya narui? ²¹ Nasuþnenena nene, naga sane sira tai þalelar is amio yavi na kilaparavi pa e pupia pialora tai, ana narin is naþani kila kilaparavi la punu nene mlapa.”

Mrapa lua ga

Matiu 7:13-14,21-23

²² Ana Yesu mla si kiena mrapa, sinenan pisape va ma Yerusalem. Ana pogos naþa pa sane, pa kome pulkumali lala, suþna pian ke yeririna lala. ²³ Ana yar tai piun tania, pisape “?Suþe, la naþa yoko atol malena la moki, pona pe la moki manene re poli?”

²⁴ Ana Yesu pisataþne la, pisape “Monar akilayonli naþa ava loyuþna e pulutava taþena nene, naþa ve tokak la ga. Nepisa ke lelaga na pan amiu ne, nesape yoko yar la ve moki naþa sinelan asape ava loyuþna, ana yoko taþatete akila. ²⁵ Nanene komin naþa siraunia, yoko yerikawa na yuþna, naga visu sane toroki rui, ana yoko naga suþnalumu, kotava ruru sina. E pogos nene, yoko kam ve moki naþa aim awon amiu ase mratava nene, asigar ga avio, avisave ‘Suþe-o, awis ovieta van imimi!’ Ana yoko yerikawa naþani visataþne ga sanini visave ‘Peraga o, nemninue amiu nena ga! Kam na yer pe la nene?’ ²⁶ Ana yoko

akilali naŭa avisa van e pogos nene, avisave ‘?Ana sanape, ko na pe ositoŕmal re si naŭa osape ita ke narui nanua tesuŕna tekinan ke lele taaga ne? Imimi ke narui naŭa opam opian imimi ke e yometava la nene e kiamimi pulkumali lala?’ ²⁷ Ana yoko naga visa van la, visave ‘In na nepisa pan amiu yam tai rui, nesape nemninue amiu nena ga, nesape kam na yer pe la nene. Nekilia nesape kam la nene kam na yar na kilaen ga ŕelaga viowa lala. !Pogaga, kam na aure matan inu nagane!’ ²⁸ E pogos nene, yoko kam na aloge viowa vaŕisi, yoko atag vano-o ŕisa, asuŕna akar maluemi. Nanene komin naŭa yoko kam na avisu yeririna wo lala kiena ne Ntewa, naŭa sane Epraam, Aisak, Sekop, a navisawalen taŕena ŕmena ga lala, la asu ruru ga asike loyuŕna e kiena nasuŕpenena ana kam na akoven amiu asuŕmalu asuŕna ga vanua sanene.

²⁹ “E pogos nene, yoko yeririna taŕena la ve moki naŭa amolue e mrapun yomarava varoka, aimi atotano vena akinana e pupia ŕaŕagena loyuŕna e navesuŕpenena kiena ne Ntewa, ana kam na taŕatete ava loyuŕna.”

³⁰ Ana Yesu pisa make kiena visena e pogos nene, pisape “Ana yar la naŭa asirau, ŕisi na la asumo, a la naŭa asumo, ŕisi na la asirau.”

*Ŕarin Suŕe Erot sape weŕar Yesu
Matiu 23:37-39*

³¹ Ana e pogos nene naŭa Yesu pa ke ma Yerusalem wa, Varasi laŕas apim puna, apisawal pania, apisape “Pona ko pe okilia re poli yo, naŭa Ŕarin Suŕe Erot, naga pisaar rui pisape yoko weŕar ko. Popon oure ova gar Yutea sumo wa, komin naga pisuar ke lepas nini.”

³² Ana Yesu pisataŕne la, pisape “In na pe nesitom re kawe nene nesape naga pe yar tai naŭa kilia kila sur tai van inu poli. Yoko ava avisawal e marana, avisave in na nekila ke ne kiau yuŕnaena sumo wa. Avisava vana avisave in na noŕne plan ke yermare lala, a nekila ruru ke namaiena lala, a yoko neyuŕnae ve sanene ŕane, amio peni, amio ŕmena vewo, vano-o nevisu sane nekila make nenaga. ³³ Ana nekilia nevisa van amiu, sane ve asitom manene in re, komin naŭa e ke e legiena la nene narui, in na nomolue nepa ke sanene narui. Monar neva netol ke ne yo ma Yerusalem wa, komin naŭa nepisu sane siar nanua sumo yar la aŕne moŕar kiena navisawalena lala e ke e yo nena nene narui.”

Yesu sinen miye Yerusalem

³⁴ Ana e pogos nene, Yesu sitom manene Yerusalem pano-o taginia, pisape “Yerusalem o! Komin ya ne oŕne moŕar ke navisawalena lala, a okove moŕar ke yar la naŭa Ntewa mligan la pimi pan ko? Yam mok liu naŭa sineun nesape neligan luŕmau yervivi kioŕna yeririna lala, sa naŭa lakaporo mligan narina lala apim atapolou vatanon kupena, ana kioŕna yeririna lala pe akekaran re poli. ³⁵ Ana opisus ke ne, Ntewa pilon ke ŕasina pan ko narui, ana naga pitetalia inu nepim ŕes e nini, ana nevisa van ko, nesape yoko kioŕna yeririna lala taŕatete si alual inu, vano-o tol pogos naŭa avisu kilale inu, avisayu inu, avisave
‘!Ntewa na mava, ovisa ruru naga naŭa pimi e kioŕna kia!’ ”

14

Yesu kila ruru namaiena tai

¹ Ana e Legiena Wa tai, nasumonena tai kiena ne Varasi lala ŕere Yesu pa kinan ŕmana. Ana yar taŕena ŕmena la ŕasia asike e pogos nene, naŭa pe sinelan re Yesu poli, la asuŕna apisusu naga visae kila sur tai naŭa ve memes re, la akilia akila sur tai vana. ² Ana yar namaiena tai sike loyuŕna amio la e pogos nene, naŭa yar nena yepena la sirorop paŕisi. Ana Yesu pisu yar nene, ³ ana pis pa navianena navisaluaena lala, piun tan la pisape “? Sanape e lepas na kieta navisaluaena? ?Pisape tekilia tekila ruru maiena e Legiena Wa, pona pisaluŕar pisape ve tekila ruru re?”

⁴ Ana pogos naþa Yesu piun naviunena nene, apisu sane taþatete avisataþnea, atopur nenaga. Ana Yesu þere yar naþani pimi lavis puna, kila ruru sina, ana pisape kilia wasuþe si va ga uþna. ⁵ Ana naga pis pa la naþa asike ne, pisape “Kam na asitomyulia. Visae kam yar tai nene, e Legiena Wa tai, narina tai pona kiena sur mali tai va loru vito e þiliþili na wii tai, ana yoko okila ve sanape? ?Yoko ovitaþilin ne, naþa ova ga ourelua si ne, pona ovisave: Ke, piowa narui e, nagane na Legiena Wa nini narui, navisaluaena pisape ve neyuþnae re e Legiena Wa, ana pona naruu pona kiau sur mali nene mon mþa e þiliþili wa, neva ga nourelua peni? Peraga, pona yoko ovitaþilin ga ourelua yo.”

⁶ Ana la aminue kare narui aþna yoko avisataþne si naga e lepas nene ve sanape, la asupur ga asike na.

Pe pon re yar ga visirlua sina naga poli

⁷ Ana pogos naþa apim asun ke naþa atotano e kinanena nene, Yesu pisu kilale naþa la taþena laþas naþa þar na þaþagena pio la apimi, sinelan manene alual yo tai naþa po, la apa atowo lenen yerkaawa la metava. Ana Yesu pisu kiela þelaga navilaveena la nene, ana pisa pan la pisape ⁸ “Visae pogos tai avio kon ova e kinanena natalopaena tai, pona sur tai sane þaþagena, ana pe pon re ovitaþilin naþa ova oto nena tano e lenen yerkaawa la poli. Pona yo nene akila ruru monþmate ke pupia yerkaawa tai yo, ana pe okilia re poli, ⁹ ana yoko þar na þaþagena imi visa van ko, visave ‘Ake wolai, pe sineyeena paþisi, ana yoko otom ke ne tano wa, komin naþa oteke e lenen kiau yerkaawa naþna.’ Ana yoko omawa ologe viowa vaþisi, ana yoko monar oto si tano, okilali naþa olual narin pulmas tai tano vena okilia olawan maraþna ea.

¹⁰ “Ana þelaga wo na sanini, visae avio ko ova e kinanena tai, pogos naþa oþalivi ea, yoko ova oto ga tano omio yar kar ga lala. Ana visae þar na þaþagena vim visu ko, visave ‘E, yerkaawa, nepisuar ruru leleþna teke meta ma e ne rui. Yoko ita lua tevavini, neligan ruru ko otea.’ Ana e pogos nene, okilia ologe wo vaþisi, naþa þar na þaþagena pisirlua ko sanene e maran yeririna taþena la naþa akinan ke lele taaga. ¹¹ Naga sanene narui, sane yar naþa naga ga pisirlua naga, yoko aligan naga mon tano, ana yaru naþa mligan naga mon tano, yoko avisirlua naga.”

Popon ovio mþena yar naþa limana korena ga imi e kioþna þaþagena

¹² Ana e pogos nene, Yesu pisa mþena visena tai pa yar naþa pio naga pimi kinan mþana, pisa pania, pisape “Nagane, tepisu pogos naþa visae yar la akila kinanena tai, la sinelan ga avio kiela erau wo lala, pona kiela wolai lala, pona kiela namratava taþena lala, amio mþena pupia yerkaawa la naþa asike lavisin la. Akila ke sanene, komin akilia ke asape visae siraunia, visae la mþena akila kinanena pogos tai, yoko monar akila maran sina van la. ¹³ Ana þelaga wo na kilaen e þaþagena naga pe sa re nene poli. Popon manene ovio yar taþena lala, sane la naþa limala korena ga, a la naþa tasnela la pioyowa ga, pona laulu lala, pona kilamara þala lala, yar la ne sanene, la aim akinana amio ko. ¹⁴ Yar sur la ne sanene la taþatete akilamaran si van ko pogos tai, ana pogos naþa Ntewa pisu naþa okekaran opure la nene apim akinana moþna, yoko naga kekara vaþisi. Yoko naga visa ruru ko, a yoko owar kioþna nalaena wo vanonia, nanene e pogos naþa naga kila kiena yeririna mesmes lala amal si vetan marena.”

þakaiwa na visawoena

Matiu 22:10

¹⁵ Ana yar tai toþna e kinanena nene, naga mloge mþa naþa Yesu pisayu ke pisape yoko Ntewa visir plan kiena yar mesmes lala e legiena maro, ana naga pisape “!Lelaga naþane, yoko wo manene laa van ita e pogos nene, naþa ita tesikol ita e pupia þaþagena nene loyuþna e nasuþenena kiena ne Ntewa!”

¹⁶ Yar nene pona naga sitom ke sape naga po narui, ana yar la na sanene la sinelan re vaen loyuþna poli, ana Yesu pisa þakaiwa tai e lepas nene, naþa sanini “Yerkaawa tai, naga sinenan pisape kila pupia kinanena tai, ana pio yar la moki naþa aimi. ¹⁷ Ana pogos

naþa kila ruru make sur punu ga þisi, naga pitetalia kiena yar tai vena vanon were la naþa apio la þisi rui aimi. ¹⁸ Ana pogos naþa kana yar nena pimi malivin la, la make ga nene maran taaga asuna akila ke sina ga visena na visawoen suria. Tai pisa sanini, pisape 'Pogaga, ana in na nopul ga kiau narin porotano tai na wa, ana nepavin ke nesape nevisulia ana porotano nena sanape wa. Yoko ovisa va yerka wa ovisave pe nasineyeena paþisi ana taþatete neinas nanagane.' ¹⁹ A taþena, pisa sanini pisape 'Pogaga, ana in na nopul ga kiau puluk laþas na wa, vena ureen kiau kat lala, ana nesape neva nevisu la lia ana amarera ruru maga. Yoko ovisa va yerka wa ovisave pe nasineyeena paþisi, ana in na taþatete neinas nanagane.' ²⁰ A taþena mena ga, naga pisape 'Pogaga, ana in na nekila ga þaþagena na kiau talopaena nanua ga nagane, ana in na nepisu sane taþatete neinas yo, komin sur moki paþisi.'

²¹ "Ana yar naþani pimi pisawal visena la naþani pan kiena yerka wa, mloge, sinen kar la. Ana naga pitetalia sina kiena yar naþani, pisape 'Pogaga, oyal kawa, ova e narin mrapa la ne lavis ga nana, ova olual la naþa pe kiela sur re poli, amio la naþa tasnela la pioyowa ga, amio laulu lala, amio kilamara kata lala, ana owere la nene aimi e kieta þaþagena.'

²² Ana naga pa kila, ana siraunia þasuþe si pimi pun kiena yerka wa, pisape 'Suþe, sur naþa opisa þa, nekila rui, a yaru moki apimi, ana yepa keviu meke ga wa.' ²³ Ana pitetalia ke sina ga, pisape 'Visae sanene, ova sina, ova kare ga yo una la e pulkumali, a omareran kare ga va yar naþa visae olualia, ovisave monar aimi, vena akokonia kiau kove, vena akila þaþagena nini imi wo. ²⁴ Taþena la naþa akila ke navisawoen viowa lala, in na nepio ruru la nesape aim e þaþagena nini þa rui, ana nanagane, yoko taþatete nena lala yaru tai kan re narin kinakinas nen kinanena tai e þaþagena nini þisa, peraga. !Nepisa ruru ga ne!'"

Yesu naga monar to sumo e malena kiena ne kiena nalogena lala
Matiu 10:37-38

²⁵ Ana Yesu mla sina kiena mrapa, pa ke meta ma Yerusalem na wa, a pupia þina moki la ataveveia. Amiyal ma pano-o, pilopu naga kira pimi pula, pisa pan la pisape ²⁶ "Yar naþa sitom sape taveve inu, naga monar ligan inu neto nena sumo e kiena malena, in na neto manene laa metavan arimana, pona anena, pona wona, pona narina, pona wenla, pona vinena. Yar naþa pe pisu kilale re kiena malena sane naga pe pe sur re tai poli, naga pe torokin re nena naþa imi sane kiau nalogena poli. ²⁷ Ana yar naþa sinenan sape imi ve kiau nalogena, naga monar kila sanini. Monar kus kiena lak torovia, taveve inu lue ga, sa naþa kilia tanan naga loge viowa vanon inu. ²⁸ Po pon asitom ruru ke ne sur nene sumo wa, þisi na avitaþilin visena, avisave sinemiun ataveve inu.

"Nanene naga sa ga naþa yaru tai, visae sitom ke sape kilia kila pupia yuna tai, naga monar totano, visu ruru ke ne sumo wa, wolo ruru kiena kilavaru nakilaen yunaena nene, naga monar visu kilale sane yoko naga torokin kilia kila make pupia yunaena nene, pona pe torokin re poli. ²⁹ Visae peraga, yoko naga siaria, yunaen ruru þeren yuna nena, va laa sane, yoko ilan ga naþa limana ve plas ruru nena ga ana yoko yunaena nene loru meke na. Ana pogos naþa yar taþena la aimi avisu yuna naþa komþas meke na amio kana lepas ne lala, a pe maero pa re e poli wa, yoko avitalia kare yar nene narui, yoko avisave ³⁰ 'Ke, yar nene, kiena sitomena po paþisi. Sinenan sape yunaen mana yuna, ana pe maplar ruru re kiena yunaena po, ana taþatete nena kila makea.'

³¹ "A yar naþa sinenan sape visaar naþa yoko imi kila yunaena amio inu, naga monar kila sane þarin suþe tai, naþa yerka wa taþena sumalunia, þere kiena pupia þegas nen nakilaen mara tai aim akila mara vania. Li namara kiena ne þarin suþe nene pe la moki re poli sane yerka wa nene, ana þarin suþe nene monar visu ruru sumo, monar sitom ruruia, sane naga kilia taulu pupia þegas naþa pimi ke ne, pona taþatete tauluia. ³² Visae visu sane taþatete kilia kila, naga monar ligan visena vano va yerka wa, pogos naþa sike perina wa. Naga monar viun tania, visave yoko ul ya naþa yerka wa nene pisa, vena lalua asu sina e sunare. Visae ve sanene, naga monar vatanon yerka wa, tanan make nena

naga vania. ³³ Ana kam naþa sinemiun asape aim ataveve inu, monar avisu kilale sane kam m̃ena monar akila ve sanene van inu. Yar naþa pe tañan re kiena malena poli, amio make kiena sur van inu, naga taþatete kilia imi sane kiau nalogena.”

Þakaiwa na sive naþa apeven e kinanena

Matiu 5:13; Mak 9:50

³⁴ Ana Yesu pisa sina þakaiwa taþena pan la, pisape “Sive naga pe sur tai naþa po paþisi, ana visae pogos tai sive nene ve melkalka ruru re sina, taþatete kila kiena yuñnaena naapo, a taþatete si sur tai kilia kila imi melkalka ruru sina. ³⁵ A sive na sanene, taþatete si kilia kila yuñnaena wo taþena tai van ko moñna uñna, pona van m̃ena koñna lokove. Sur nene naga pe na kovenen ga va e kororak narui.

“Naga ke nene narui naga pe kiau totou na kiau nalogena naþa kilalu kiena nañar-eraena nakilaen kiau yuñnaena. Ana yar naþa kiligana teke ea, popon naga loge kilale kiau visena nene.”

15

Yesu kila erau amio yar viowa lala

¹ Ana e pogos la ne sanene, apisu sane yar laþas naþa yar la pe asitom la re poli, sane yar na takis lala, amio yar taþena la naþa Varasi la asape la apiowa ga, la m̃ena apim ke lavisin Yesu vena ayagogonia. ² Ana pogos naþa Varasi lala amio navianen navisaluaena lala apisu naþa Yesu sinenan pisape sun amio la nene, apisu sane piowa ga, ana asuñna apisa ke apisape “Lelaga kemua naþane, yar nene naga sitom ga li namlamulen viowa la ne sanene, a silaga sinenan m̃ena sape va kinan lele taaga amio la. ?Pona naga pisu sane la ga kiela þelaga po yo, a ita na kieta piowa ga?”

³ Ana la kiela sitomena sane kila Yesu sun pan la e þakaiwa la naþa pisayu sanape naþa naga pimi e yomarava nini vanon yar naþa kilalu mrapa.

Þakaiwa na sipsip naþa kovio

Matiu 18:12-14

⁴ Þakaiwa þesa kiena ne Yesu e lepas nene naga sanini, naþa pisa pan la, pisape “Yar tai, naga pe yar na vaganen sipsip, ana kiena sipsip lala tol ponotia taaga [100]. Kiena sipsip la moki sanene narui, ana visae pogos tai tai va kovio, yoko naga sitom korenan ga, pona naga sitom vaþisi? Yoko naga monar ligan kiena sipsip taþena lala asuñna ga sanene wa, ana naga vanon naþa kovio, kale m̃a vano-o lualia. ⁵ A pogos naþa lualia, kekearan vaþisi, yoko kuslua sipsip naþani va e purkaunena, kus wasuþe imi. ⁶ Ana siraunia, pogos naþa þasuþe si pitomi tano uñna, yoko vio namratava la puna pona kiena erau taþena lala vena aimi. Ana naga sunyu van la, visave ‘Aulai, sur tai nini naþa ita tekilia teloge won vaþisi. Kiau sipsip tai naþa pa kovio na kovio lue, ana yoko nepanonia, nepa nakale m̃a pano-o, noñalia. !Pogos naþa noñalia, nekekeara na nekekeara!”

⁷ Ana Yesu pisa meraravan pa Varasi lala, pisape “Ana yoko ve sa ke m̃ena nene ma e peni. Yar mok liu naþa asike e yomarava nini naþa sane amiu, la asitom ke asape la na apogaga narui, ana asape ma e peni amloge ke pon amiu la ne sanene yo? Ana pogos naþa visae yar namlamulen viowa ve taaga ga, naga vilopu kiena malena, yoko pupia kekaren vaþisi vania ma e peni, naþa va ve keviu re laa sane na wa. Suri ne nanene kila narui inu na nekekearan sunen nemio yar la naþa kam na pe akekearan la re poli.”

Þakaiwa na kururu varu naþa kovio

⁸ Ana Yesu pisa si þakaiwa tai e lepas nene, pisape “Sira tai, naga kiena kururu varu lualima, naþa mlawan ruru teke e m̃ana loyuñna. Ana visae pogos tai, naga wasuþe imi m̃al tai naþa mloru rui, teke ko yo, yoko naga kila ve sanape narui? Yoko war kapi vivaga, war plan make kiena suri lala, yevan ruru m̃ana loyuñna vano vano lualia. ⁹ Ana pogos na lualia, yoko vio namratava la puna, pona kiena erau taþena lala, vena aimi. Ana yoko naga sunyu van la, visave ‘Aulai, sur tai nini naþa tekilia teloge won vaþisi. Kiau pupia

kilavaru tai nekilalua pa kovio nenaga, ana siraunia, nakale m̃a pano-o, noñalia. Pogos naña noñalia, nekekarano pano-o p̃isa!’ ”

¹⁰ Ana Yesu pisa meraravan pa Varasi lala, pisape “Ana yoko ve sa m̃ena nene ma e peni. Visae yar na mlamulen viowa ga tai, naga vilon kiena malena, yoko navisi kiena ne Ntewa lala avisu naña pupia kekarena pañisi ma e peni.”

Ākaiwa na yaru m̃ee naña pa kovio

¹¹ Ana p̃akaiwa maro kiena ne Yesu e lepas nene sanini, naña pisape “Yaru tai, narina na yer̃mene lua, naña lalua amiyuñae ke amio naga e kiela porotano. ¹² Ana pogos tai, prasmaro na lalua nene suñalu, pisawal pa arimala, pisape ‘Ata, in na sineun nesape nowar kiau kilavaru kom̃asa naña na lalumoña nagane ga ne.’

“Ana sur nene pe mesmesun re nena naña naga viun sanene poli, komin arimana mali sike ga wa, ana arimana pe pis re poli, mliṗere make kiena suria, tañan kom̃as pa prasmaro nene, a kom̃as pa m̃earu. ¹³ A yokorena yar m̃ee nañani suña p̃iliwilin plan make sur la naña arimana p̃ar pania, ana siraunia pe piavi re poli, aña ga naga kon make kiena sur lala, p̃ar kiena kilavaru pion pano. Ana naga pa sike e purvanua taṗena tai koperin pañisi, ana e yo nañani, naga pa make nenaga e p̃elaga viowa lala, kan kilavaru nañane pano-o, kila kare make punu nenaga.

¹⁴ “Ana naga kilia ruru sane limana plas ruru ga na wa, a e legiena nene, pupia viso pimi tol purvanua naña naga sike ea, mligan yar m̃ee nañani sike e yo tai naña m̃arera pañisi.

¹⁵ Ana pa kale yuñae na tai naña pona naga kilia yuñae vena tamalia kiena malena, ana pa miyuñae kiena ne yer̃kawa tai e yo nene, pagan kiena nompui lala. Yar m̃ee nañani, naga pe mesmesun re kila yuñae nene poli, komin naga palia nompui sane ita le Yu la, ana yuñae taaga ga nene naña naga kilia m̃alia.

¹⁶ “Ana miyuñae m̃a sanene pano-o, ana pe amla re kinanena pan poli, a pe m̃al re mrapa na lualen kinanen poli, kila naga visokar luen ga. Naga visokar m̃a sanene pano-o sinenan sape suan limana vito e karo na kinakinas nen kinanena ka nompui la naña kom̃as pililua rui sike ea, amio purkavila na kona la naña kiena yer̃kawa ponpolo suña ga vena kiena nompui la akania. ¹⁷ Ana pogos naña naga sinenan ke sape kila sanene, naga ga pisu kilale si naga narui, pisu kilale naña kiena p̃arm̃arera ga kila kare manene si naga. Ana sitoñal si arimana amio m̃ana uña, pisape ‘Lelaga kemua nañane, in na nepe wowe pañisi. Kiau p̃arm̃arera ga nane kila nesike viso karm̃arin ke e yo nini. Ositomyu la naña sane ape yar na yuñae kiena ne ata. Naga p̃ar ke kinanena moki pan la e legiena punu ga, naña yoko akan make p̃ele ga. ¹⁸ Sanene, popon nowasuṗeli in ga narui, neyuñae re ve sa la nene. Yoko neva nevisu ata, nevisa sanini vania nevisave: O Ata, in na nekila pupia mlamulen piowa pa Ntewa, a pan ko m̃ena ga. ¹⁹ Nanagane, pe popon re si naña ovisu inu sane nepe naruña tai poli, ana nesape neviun tan ko vena sineña ye inu, otañan inu neyuñae re ga sane lala yar tai naña miyuñae kioña ke ne.’

²⁰ “Ana naga kila ruru kiena sitomena sanene, ana suñalu, pimi lelei m̃a pimi pasuṗe si pu arimana.

“Naga pe kilia re poli, ana arimana sitoñal luen ga naga silaga, suña kirakira ke mrapa sape pona naga imi. Ana pogos naña sike perinan uña wa, ana arimana pisu kilalea, sinen miye pañisi, ana kiriri pa pitawea. Ana pogos naña pimi puna narina nañani, kutararia e limana luwoka yepen mavin liganen sina. ²¹ Ana yar m̃ee nene pisa pa arimana narui, pisape ‘O Ata, in na nekila pupia mlamulena piowa pañisi pa Ntewa, a pan ko m̃ena ga. Nanagane, pe mesmesun re si ovisu inu sane naruña tai poli.’

²² “Ana arimana pialuṗaria, pio kiena yaru na yuñae lala, pisape ‘E, ava vilaga, ava awar kulsota tai naña po, amio kana kulus nen lana, a kana rig nena, sur la ne sanene, awar imi ayen ea. ²³ A narin puluk naña apagan mlapa po ne, ava aweñaria, tekila kinanena tai takania vena tekekara temio prasmaro nini. ²⁴ Komin naruu nini naga mare rui, ana nagane mali sina, naga kovio, nanagane toñal sina.’ Ana pe yam piavi re poli, la asuñae akila ke p̃apagena na yar m̃ee nene narui.

²⁵ “Ana e pogos nene, narina na m̄earu naga mialoro pa miyuñae ke kana lokove rui, ana siraunia pitomi si uña. Ana pogos naña pitomi ke lavisin uña, mloge yauena a mloge m̄ena m̄aagena na wolena kapur pa m̄eke na. ²⁶ Ana naga pisa yar na yuñae na la tai, piun tania, pisape ‘?Ei, ya ne akila ke garo uña sanene?’ ²⁷ Ana yaru naña pisa pania pisape ‘!E, womla nañani, naga p̄asupe si rui, mal ga! Ana arimoña sinenan sape kila kana kinanena tai. Añeñar narin puluk na p̄a rui!’ ²⁸ Ana pogos naña m̄earu mloge, sinena mimi pañisi, pe pa re loyuña amio la poli.

“Ana arimana pimi pis amio, vena were va loyuña, ana naga yepen mavin ga vaena. ²⁹ Pisa ga pa arimana pisape ‘?Ata, kas via rui naña nesuña nemiyuñae ke nemio ko e nini? In na nemlogear ruru ko e suri punu ga, ana pe okila re sur tai sanene pan inu poli. In na pe noñal re naña oñeñar narin nane tai pan inu pogos tai poli, vena nekila kinanena tai nemio kiau erau lala. ³⁰ Ana pogos naña oñal naruña tañena nene p̄asupe sina, ana osuñalu oñeñar kieta narin puluk naña tesuña tepagan ruruia. ?Ana yar nene kila ya ne po pan ko? Naga p̄ar plan pupia kioña kilavaru komp̄asia, pa kan kilavaru nene na nañeneen ga sira, pano-o kila makea. ?Pona p̄elaga ne nanene na ko sinoñania ana okila kana kinanena nena?’

³¹ “Ana arimana sinena miye m̄ena kiena m̄earu nañani, ana pisa pania pisape ‘Ei, naruu, in na pe nesitom re sanene poli. Ko okila inu nekekara manene laa rui, naña osuña omio inu silaga, a kiau sur la punu naña sike ne, in na netañan punu pan ko rui. ³² Lelaga naña kiau prasmario nene kilalu kiena mrapa na malena, ana pogos naña pilopuia p̄asupe si pimi pun inu, sineu miyea, a in na nepisu sane popon kemua tekekarania, a tekila kinanena tai temio. Womla nene naga mare rui, ana naga mali sina, naga kovio, ana toñal sina!’ ”

Ana Yesu pisa pan le Varasi lala, pisape “Pogaga, p̄akaiwa nini p̄isi e nene narui. A sa naña pisa ne, popon yar naña kilalu mrapa, naga monar vilopu sina, sa naña prasmario nene. Ana monar avisuar ruru amiu m̄ena ga ve akila re ve sa m̄earu nene, naña kiena sitomena m̄arera pañisi, naga pieluen wenla naña pilopu kiena malena.”

16

P̄akaiwa na p̄elaga na yuñae amio kilavaru

¹ Siraunia, Yesu pis pa kiena nalogena lala, pisa p̄akaiwa tai pan la, ana pisayu yar na yuñae na tai. Yaru nene, naga pisa sane yoko kiena yerkawa kovenlua, ana suñalu miyuñae sur tai naña yoko siraunia kiena malena suña woga ga. P̄akaiwa nena sanini, sane: “Yerkawa tai, naga mligan lua kiena yar tai ve na visuaren kiena kilavaru. Ana pogos tai, visena pimi tolia sape kiena yar nene suña kan ke ga kiena kilavaru, a kila kare ke kiena sur lala. ² Ana naga pio yar nene pimi puna, pis pania, pisape ‘Ei, yar la apisawal ko pan inu rui. In na nepisu sane popon nekoenlua ko si vetan yuñae na nene, yoko oñis nenaga. Ana sumon naña yoko ovano, sineun nesape oligan ruru sur lala wa vena nekilia nevisu lapui la naña yar la akila pan inu.’

³ “Ana yar na yuñae nañani mloge piowa, pisape ‘Lelaga o, piowa narui, yerkawa nene lalua yuñae na wo nene vetan inu, neminue sane yoko aña nekinana ve sanape narui. In na netotano e yuñae na nini nakonua rui, ana in na pe puriuu pe m̄areran re si yuñae na lokove poli, a pe sineun re m̄ena neva nesuña neviuviun kinanena vetan yar la poli. ⁴ Pogaga, kiau mrapa ve sa nini. Yoko nete plan si lapui kiena ne yar lala vito laa tano, ana yoko la akekaran inu vano vano-o yoko la monar avisuar inu e pogos naña yerkawa kovenlua inu vetan yuñae na nene.’

⁵ “Ana naga pa pio la naña kiela lapui sike e yerkawa, la pepe taaga apim puna. Ana tai pimi puna narui, piun tania, pisape ‘?Ana ko okila lapui e sur ya, a tol kilavaru via?’ ⁶ Pisatañea, pisape ‘Pias nen wel na kanena tol ponotia taaga [100].’ Ana yar naña pisa pania pisape ‘Pogaga, yoko italu tetelua si vito laa tano. Nane kioña lapui ne nanini, ototano, oyumu plan ke ne vilaga wa, osiri lualima yam lima ga [50].’

⁷ “Ana naga pano, yar taņena pimi, piun tania, pisape ‘?A ko, kioņa lapui na ya?’ Ana naga pisataņea, pisape ‘Karo na wit manu taaga [1000].’ Ana naga pisa pania, pisape ‘Pogaga, yoko italua tetelua si vito laa tano. Nane kioņa lapui ne nanini, ototano, oyumu plan ke ne vilaga wa, osiri ga ponotia ve orelu [800].’ Ana naga kila mņa sanene pano-o kila makea.

⁸ “Ana siraunia, yerkawa naņani pisu kilale sur nene, ana naga pisa ke pa kiena yar naņane naņa naga kan kiena kilavaru sumo, pisape ‘Lelaga ne, opinaun ruru inu nenaga, ana nepisu sane kioņa manmaruaena po, ko þaruņa po paņisi naņane.’ ”

Ana Yesu pisape “Kam na apisu ke ne, yaru na yomarava nini lala, pogos naņa amiyuņae amio kilavaru, ana akila masisuania þisa, akilia þelaga na kilaen erau wo amio yaru lala, vena yaru la nene akila wo van la sirau. Ana nepisu naņa naruu na yomerarava lala, yam mokliu naņa pe amanmarua ruru re poli naņa ayuņae amio kilavaru naņa Ntewa mla pan la.”

⁹ Nepisa ruru pan amiu, nesape “Kilavaru naga pe na yomarava ga nini, ana visae kilia iila ko vena ove erau ruru omio Ntewa, popon oyuņae ea. Visae oyuņae ruru wo amio kilavaru kome mrapa naapo, siraunia yoko Ntewa kekaran vena were ko ova e naņa pe kilavaru re e poli, nane ma e moņa uņa ma metava.

¹⁰ “Yar naņa þar yepeņae narin yuņaena tai, tekilia towasinea sane yoko naga war mņa yepeņae pupia yuņaena woga. Ana yar naņa miyuņae narin suri tai pe mesmes re poli, yoko naga yuņae viowa laa na wa e pupia suria. ¹¹ Visae kam na ve awar re yepeņae yuņaena na kilavaru e yomarava nini, yoko ane ligan sina sur nowo lala kiena ne Ntewa e limamiu vena ave kiamiu? ¹² A visae kam na taņatete ayuņae ruru amio sur la naņa Ntewa taņan pan amiu naņa ve plas ga e yomarava nini, a ne yoko taņan si nalaena nowo naņa asike ma metava e peni ave kiamiu lue?”

Yar taņatete yuņae yuņaena kiena ne suņe ve lua veraga

¹³ A Yesu pisa mņa ga, pisape “Naga sina nini, visae yar na yuņaena tai, naga taņatete yuņae pran yuņaena kiena ne suņe ve lua veraga. Visae sanene, yoko naga kekaran tai, ana yepen mavin tai, pona logear tai, ana ligan tai. Taņatete akila naņa ave yar na yuņaena kiena ne Ntewa, a ave yar na kilavaru mņa veraga.”

Varasi lala la pe akekaran re visen kiena ne Yesu nene poli

¹⁴ Ana e poglis nene, Varasi mņa lala asike ga wa, asuņa amiyagogon ke visena la nene. Ana lala, la ape yar la naņa asitom manene kilavaru silaga, ana apitalia kare ga mrapa wo na yuņae amio kilavaru naņa Yesu pisayu ke pa kiena nalogena lala. ¹⁵ Ana Yesu pis pan la, pisape “Kam na sinemiun asape akila sa naņa yar la avisu amiu sane yar mesmes lala, ana Ntewa naga pisu ke ya naņa sike e losinemi. Sur mok liu naņa yar la amieluaria, asape po, ana e visuena kiena ne Ntewa, pisu sane sur viowa ga lala.”

Nasuņenena kiena ne Ntewa pimi narui

Matiu 11:12-13, 5:18; Mak 10:11-12

¹⁶ Visena taņena naņa Yesu pisa sanini, pisape “Nanua sumo, Tus Marua moņa ga, naņa tus lala kiena ne Mosis amio tus la naņa kiena ne navisaluaena lala asike ea, pimi mņa pano-o tol pogos kiena ne Yoane Nakeena. Yoane miyuņae pano-o þisi, a nanagane Lologena Wo na suņenena kiena ne Ntewa pimi, ana asuņa amlologon kare ga, a yar la naņa sinelan asape ava loyuņa ea asuņa aņar ke yon paņisi vena atolia. ¹⁷ Ana nanene pe kila re sane Navisaluaena kiena ne Ntewa naņa sike e Tus Marua naga piowa poli. Pona ma e peni amio yomarava nini ava akovio yo, ana taņatete narin mras nen visena na Navisaluaena naņani kilia kovio pogos tai.”

Pe pon re teligan lua wota la poli

Matiu 5:31-32, 19:9; Mak 10:11-12

¹⁸ Visena taþena si tai naþa Yesu pisa, sanini, pisape “Visae yar tai ligan lua wona, ana va were si sira taþena, Ntewa pisu yar nene kila ke kolau amio sira taþena ne. Maran taaga mena ga visae yar tai talopa amio sira tai naþa wona na sumo ligan lua rui, yar mena nene kila ke kolau.”

þakaiwa na yar na sur moki amio Lasaros

¹⁹ Yesu pisa mena þakaiwa nene, naþa pisa sanini, pisape “Yar tai, naga limana pulen sur wo la moki paþisi, naga suna miyowau ruru lue ga silaga, a legiena punu ga amiyunaen kana pupia kinanena wo lala. ²⁰ Yar taþena mena tai tona ga, naþa silaga aþere naga pimi amligan teke vanua e kove na pupia yuna mana yar na suri moki naþani. Yar nene, naga pe yar tai naþa pe kiena suri re poli, naga pe yaru na loginen ga kinanena, tas nen wetelu pulen ga magka, kiena kia Lasaros. ²¹ Amligan naga teke e yo nene pona visae yoko kilia tol re kororos nen kinanen laþas naþa yerka nene kanligan yo, ana peraga. Naga mlogin korenan ke ga sanene, ana lokul la apim asuna amunvan ke kiena magka lala.

²² “Pano-o yar naþani mare, ana navisi lala apim akuslua pa amligan meke e yepas nen Epraam, ma e peni. A pe piavi re poli, yerka nene mare, asinia. ²³ Ana akoven naga pa e kapi, naþa mloge piowa na mloge piowa paþisi, ana siraunia, kira pa metava, kira pa perina paþisi, pisu Epraam sike na, a pisu naþa Lasaros sike amio, lalua asuna akinana ke na. ²⁴ Ana pio laa, pisape ‘Oe, Ata Epraam, awis sinena ye inu, oligan Lasaros vitom suan luas nen mrasilmana vito e narin wii tai, vena ligan te purmeneu. Nanagane kapi kekan inu nemloge piowa pano-o þisa.’

²⁵ “Ana Epraam pisatanea, pisape ‘Naruu, nagane ositonal si malena wo naþa ose sumo. E pogos nene, ko otol make kiona suri la naþa ko sinomania po pan ko paþisi, ana Lasaros na ositom korenan ga vanon piowa ga. E kiena malena nanua, suri punu ga piowa ga, ana nanagane, naga mloge si po e nini narui, a ko omloge ke piowa manene laa paþisi e nana. ²⁶ Ana suri ga tai, taþatete inasu iila ko, komin Ntewa mligan pupia pulus tai meke likan ita lua, vena kila sane yar taþatete molue e yo nini vena inasu puna, a taþatete molue e na osike e ne vena imi e yo nini.’

²⁷ “Ana yar nene piun ke si na ga, pisape ‘Ata, visae sanene, neviun mareran tan ko vena ovitetalia Lasaros wasuþe si vito tano garo una mana kau ata, ²⁸ komin naþa wolai lima asike ga wa. Popon Lasaros vito visawal van la, visae peraga, sa þisi la mena aimlae e yo naloge viowaena nini.’ ²⁹ Ana Epraam pisatanea, pisape ‘?Ana komin ya ne monar Lasaros vitove? La aþar ke Tus Wa rui, naþa nasiriena wa kiena Mosis amio navisawalena la sike e rui. Popon la auloia, yoko alual suri punu sike ea.’ ³⁰ Ana naga mareran maga, pisape ‘?Ata Epraam, pona taþatete akila yo? Ana visae yar tai wasuþe si imi e marena, visawal make sur la nene van la, yoko monar avilon la ga narui.’ ³¹ Ana Epraam pisatanea, pisape ‘Visae la nene yepel mavin logeen ya naþa Tus Wa pisa, pe sur re si tai naþa kilia kila na alelaga poli. Pona yar tai wasuþe si imi e marena, visa sur punu van la, pona ya sina, ana yoko la yepel mavin ga lelagaena.’ ”

17

þelaga na kilaen nakilalina van yar taþena

Matiu 18:6-7,21-22; Mak 9:42

¹ Ana Yesu pisa pan kiena nalogenena lala, pisape “Yoko nakilalina lala akilia aim lue silaga ne, ana yar naþa kila sur laþasa naþa were nakilalina imi lavisi, yoko viowa van vaþisi. ² Visae amatear kilavaru tai mene kolmekina a akoan talilu vito e lowe memaena, nanene na nakoena tai naþa melala ga ne. Ana yar naþa kila naruu tai ligan inu, ve viawa re si marera e inu, loru e mlamulena viowa, yoko yar nene naga war nakoena tai naþa marera manene laa sane taulu naga nene. ³ Sanene, kam na monar avisu ruru kiamiu malena la silaga, vena ve okila re nakilalina viowa lala aim amalivin kiona erau.”

Ĕelaga naĔa oviewo womla

A Yesu pisape “Visae ovisu naĔa womla mloru ke pito tano e mlamulen piowa tai, monar ovis omio vena okila ruruia, a visae naga vilonia, monar oviewoia. ⁴ Visae naga kila viowa van ko yam ve olua e legiena ve taaga, a pogos punu ga, naga kila viowa, a siraunia naga pisa ga pan ko na wa pisape ‘Ake wolai, nekila kare ko paĔisi. Awis, oviewo inu,’ yoko okilakania? Ĕisi na monar oviewo naga e pogos make la olua nene.”

NaĔareraena na viawaena

⁵ Ana nalologena la apiun tan Yesu, apisape “SuĔe, sinemimin mesape okila kiamimi naviawaena imi Ĕarera la sane wa.”

⁶ Ana naga pisataĔnea pisape “Visae aviawa ve tokak ga e inu, sane kurus nen purpa, ana visae kiamiu naviawaena nene ve lelaga ruru naapo, ana Ĕisi na akilia avisa va purlu na Ĕeke gare avisave ‘Omolue e yo nene, omio Ĕeligas neĔa lala, ova okapur ke gare likan lowe memaena ne, ana yoko naga logear amiu woga.’ ”

Yar na kilaen yuĔaen kien yerkawa naga monar kekaran ga kila

⁷ A Yesu pisape “Visae kam yar tai ve yerkawa, a kiena yar tai suĔa kila yuĔaena la pania. Pona pa miyuĔae lokove yo, pona pisuar kiena sur mali lala, pona ya sina, ana visae yepekilavi, pogos naĔa ĔasuĔe e yuĔaena pitomi, yoko yerkawa visa ya ne vania? TaĔatete visa vania visave ‘Ko, oimi oto omio inu, italua tekinana,’ komin naga pe kiena yar na yuĔaena ga. ⁸ Yoko yerkawa monar visa ga vania, visave ‘Pogaga, yoko ova oviran kapi sumo wa. Visae kinanena manoa, ova oyowau ruru ke ne wa, Ĕisi na owar kau imi nakania, nomunia, Ĕisi, okilia ola koĔa.’ ⁹ A pogos naĔa yar nayuĔaena kila sur punu ga naĔa yerkawa pisa pania, yoko yerkawa taĔatete visa pupia potena vania, vanon naga kiena yuĔaena ga. ¹⁰ Ana kam Ĕena ga monar ave sanene. Visae akila ruru make yuĔaena naĔa Ntewa pisa pan amiu, vano-o Ĕisi, yoko avisa ga sanene, avisave ‘Ee, nanene na pe sur re tai nene poli. Tekila ga ya naĔa torokin tekila sa ke ga yar na yuĔaena kiena ne Ntewa lala.’ ”

Yesu kila ruru yar na leperosi la lualima, ana taaga ga pisa potena

¹¹ Ana e pogos nene, Yesu la asuĔa amial ke apa ma Yerusalem na wa, ana kiela mrapa pa likan lepas lua nene, Samaria amio Kalele. ¹² Ana amial Ĕa pano-o, lavis ga aĔalivi e pulkumali tai, apitawe Ĕegas nen yar tai na leperosi lala, la lualima, naĔa la asuĔa e yepas nen mrapa. ¹³ Ana pogos naĔa apisu Yesu, apion manene pania, asape “Yesu, SuĔe, awis sineĔa ye imimi.”

¹⁴ Ana pogos naĔa Yesu mloge, pisa pan la, sape “Ava akom Ĕesan pun yaru wa lala vena la avisu ruru nena tasnemi u lala vena avisave kam na yepemi u mian rui.”

Ana la apano, a pogos naĔa la asuĔa amial apano, amilan ga naĔa yepela la pimi mian ke narui. ¹⁵ A lala tai, pogos naĔa pisa naga po sanene narui, naga pilonia ĔasuĔe si pimi, miyeluar Ntewa paĔisi, ¹⁶ pimi mloru e lana Yesu, pisa potena pania. Yar nene, naga pe pe yere Yu re naapo poli, ana naga pe Yu la komĔas tai nae Samaria. Ana taĔena lala, la ape yere Yu nena naapo, ana la pe aĔasuĔe re si apim poli.

¹⁷ Ana Yesu pisa sanini, sape “La naĔa yepela mian rui, la lualima, ana awa la ovaru? ¹⁸ NaĔa ĔasuĔe pimi, naga yar nae ga lele taĔena, ana komin ya ne naga taaga ĔasuĔe pimi mieluar Ntewa, laĔas pe apim re poli?”

¹⁹ Ana Yesu pisa pania, pisape “Erau, osuĔalu oyali ova uĔa. KioĔa naviawaena tamalia ko rui.”

NasuĔenena kiena ne Ntewa imi ve sanape?

Matiu 24:23-28,37-41

²⁰ Ana siraunia, Varasi la apim apiun tan Yesu, asape “?NasuĔenena kiena ne Ntewa naĔa opisayu ke silaga, yoko mevisu pogwai?”

Ana Yesu pisataĔnea pisape “NasuĔenena kiena ne Ntewa pe pimi re sane sur tai naĔa yar kilia visu e kilamarana poli. ²¹ Naga pe sur re tai naĔa yoko avisave ‘Ke, na naĔa

narui, nane pimi ke naña,' pona avisave 'Nane, sike gare rui.' Kam na pe apisu kilale re poli, ana nasuþenena kiena ne Ntewa sike pa likan amiu rui."

²² Ana Yesu pisa pan kiena nalogena lala, sunyu pan la sape yoko ve sanape e legiena maro la ne pimi ke ne. Naga pisape "Siraunia, yoko kam na sinemiun manene vaþisi navisuen pog naþa yoko inu Narina ne Yeririna neim nořmalivin yomarava, ana nanene na pe pon re kam na avisu poli. ²³ Yoko yar la avisasa sanini avisave '!Naga nane gare!,' pona '!Naga nane garo ne!,' ana kam na ve ava re amio la, komin pe inu re nene po laa wa. ²⁴ Ana pogos naþa inu Narina ne Yeririna nowasuþea ve lelaga e kana legiena nena, yoko yar make ga avisu kilalea, yoko neimi sane yekarpla tai naþa kila sinapane vivaga e lepas tai va tol lepas komþasa. ²⁵ Ana sur nene na pe kana pogos re poli wa, komin sumon nene, yoko inu Narina ne Yeririna, yar nanagane lala akila viowa van inu e sur viowa la ve moki, yoko monar akovenlua inu.

²⁶ "Vano-o tol pogos naþa inu Narina ne Yeririna nowasuþea, yoko yar la ve akila ruru la re na wa, maran ve taaga ga sa ke pogos kiena ne yermarua Noa nanua sumo. ²⁷ E pogos nene, yar la asuřna akinana, amun suri lala, asuřna akila ke talopaena sanene, pimi tol pogos naþa Noa pa loyuřna e kiena pupia waa naþa naga miyuřnaenia. Ana pupia womie pitomi kus plan make kiela malena la punu ga. ²⁸ A e pogos kiena ne Lot sa řna nenaga nene. Yar la asuřna akinana, amun suri lala, asuřna apa ke e lele na wilwilena po amiyuřnaen ke kilavaru, asuřna amiyuřnaen ke lokove, amiyuřnaen ke yuřna, la akila ke ga sanene pa ke na, pe asitořmal re sur tai poli. ²⁹ Ana e nena e legiena naþa Lot molue petan kiela yo, kapi amio pan na kapiapo mloloru pitomi ma e sinapane, kekan la akokovio make nenaga. ³⁰ Ana nevisa van amiu, e pogos naþa yoko inu Narina Yeririna neimi, yar la taþatete asitořmal sur tai, asitořmal la ga, ana yoko ailan pupia sur kerkeviu la ne sanene imi řmalivin la.

³¹ "E pogos nene, visae yar tai suřna yuřnae ke meta e řmana wos nen yuřna, ana visu sur nene imi, ana vito tano pe pon re kilali sape va war suri laþas e řmana loyuřna poli, naga monar va ga narui. Yaru naþa miyuřnae ke lokove, naga řmena taþatete si vito uřna, yoko monar va ga narui. ³² Kam na ve sinemiu řesan re wona Lot, naþa kiraþatau, ana pimi pe kilavaru. ³³ Yar naþa kilali sape visuar ruru ga kiena malena, yoko kovio, ana yar naþa tařnan kiena malena kovio, yoko naga ga tamalia sina naga. ³⁴ Nevisa van amiu nevisave e pogos nene, pona kolemalo naþa yar řmeke amio wona yo e řmala tog, ana yoko aim awerelua ve taaga ga, aligan tai řmeke na. ³⁵ Ana pona yoko sira la ve lua asike avili ke kala kinanena lele taaga yo, ana ve taaga vano tai sike na. ³⁶ Ana pona yar lalua ayuřnaevain ke lokove tai yo, yoko tai ure matania, ve taaga suřnal wowe ga sike na."

³⁷ Ana nalogena la apiun tania, asape "?Ana Suře, suri la nene yoko řmalivi e nape?"

Ana naga pisatařne la, sape "E pogos nene, yoko ve sa naþa visae sur mare tai řmeke koyo tai. E yo nene narui yoko manu la naþa akakan ke sur mare, yoko aiminia, monar la ve moki ase yo nene. E nape naþa mlamulena viowa sike ea, yo ke ga nanene narui yoko naliþereena se ea."

18

Řakaiwa na sira naþa tagi řna pa kiena suře na pulkumali pano-o, suře miyagogonia

¹ Ana Yesu pisa sina řakaiwa tařena tai pan la, vena iilaar la ve asitom řele re si kiela leniena lala, vena asuřnal řmarera asulue ga ea, alen řna vano-o atol kana navisatařneena. ² Kiena řakaiwa nena pa sanini, sape: "Pulkumali tai, naþa kana suře nena naga pe yar řmarera tai, naga pe yar tai naþa pe patanon re Ntewa poli, pe maraun re nenaga, a naga sitom řele řmena yar la. ³ Ana letano řmena tai sike e yo nene, naþa yar tai suřna kila kare ke kiena sur la silaga. Ana letano nařani pa suřna tagi ke pan kiena suře, naga suřna pisawal ke yar nařani, sape 'Awis, monar okila sur tai va yar nene, naga kila kare in pařisi

wa.’⁴ Ana suḗe naḗani pe sinen miye re sira nene poli, a pe yowenan visen va yar naḗani, ana kila luen ga sanene pa ke na, sira mēna naḗani pa tagi luen ga pan silaga.

“Ana siraunia naga pisape ‘In na nepe yar tai naḗa pe nesitom re nesape nekila ya naḗa Ntewa pona yar taḗena pisa pan inu sape popon nekila.’⁵ Ana sira pimi tagin ke pan inu, ana in na pe sineun re nesape nekila ya naḗa pisa ke poli. Ana naga pimi piun luen ga sanene, naga kila kare inu paḗisi wa, ana pona nekila ga ya naḗa naga piun ke yo. Visae peraga, yoko neloge kiena tagena vano-o sineu marena.’”

⁶ Ana Suḗe Yesu pis pa la naḗa amiyagogon ke ḗakaiwa nene, pisape “?Kam na ayagogon ruru visena naḗa suḗe yowena nene pisa ne? Komin sira nene tagi yam moki pania, ana yoko monar sitomli sur na sira nene piun ke ne. ⁷?Ana sanapen Ntewa nae ma e peni? ?Pogos naḗa mloge kiena yeririna la naḗa mligan plan la, atagi ke pania lemalo a legiena, naga kilia su kaḗar sanene ve kila re sur tai van la? ⁸Peraga, ana nevisa van amiu sanini, visae loge naḗa alen m̄arera vania silaga, yoko naga suḗmalu vilaga e pogos make ga kilia iila amiu. ?Ana nesape neviun mēna van amiu, sane visae pogos naḗa inu Narina ne Yeririna nowasuḗe si neim e yomarava nini, yoko nelual naḗa yar la asuḗmalu m̄arera asike e inu sanene, pona peraga?”

ḗakaiwa kiena yar naḗa ḗarwar e kiena ḗelaga naḗa mesmesu

⁹ Ana pogos naḗa Yesu sike amio yeririna lala, naga pisu kilale naḗa laḗasa aḗarwar la paḗisi, asitom ke asape la kiela malena mesmes ruru po narui, a la apisu yar taḗena la apiowa ga, apisu sane la apiowa manene laa pe sa re la poli. Ana pisayu yar la sanini, pisa ḗakaiwa tai, sape ¹⁰“Yar lalua apa ma e Yuḗna Wa m̄ana Ntewa e pogos na leniena. Lala yar tai, naga pe yere Varasi, a taḗena, naga kila yuḗmaena tai naḗa yaru la pe sinelan re naga vanon poli, naga pe yar na takis. ¹¹Ana pogos naḗa yere Varasi naga suḗmalu mlen, pisa sanini, sape ‘Ake Ntewa nepisa pupia potena pan ko paḗisi, naḗa kiau malena naga po laa sane taulu kiena ne yar taḗena lala. Nemieluar ko, naḗa in na pe sa re yar navinauen la poli, pona yar na kilakeuiaen yar lala, a yar na kilaen kolau lala, pona yar na takis lala sane yar na suḗmalu sike ne. ¹²Peraga, in na nesuḗna nekila ke po silaga, komin naḗa in na nomonsilun kilaen leniena van ko e legiena lua e wik taaga, a e sur make ga naḗa nemla e luḗau, visae netol ve lualima, monar nela ve taaga van ko silaga. Sur ne la na nene narui naḗa in na nesuḗna nekila, ana kila inu nopo paḗisi e maraḗna.’

¹³“Ana yar na takis, naga suḗna mloge ke piowa vanon kiena mlamulena viowa naḗa kila, ana m̄ninu sane Ntewa pisu kiena malena pe po re nena poli. Ana naga yepen mavin va maneneen lavisi, suḗmalu ga suḗna perina, a naga yepen mavin kiraen va metava ma e peni, a naga ḗarin tau ga toḗna ga, mlipalipa ke yerena, tagi, pisape ‘!Ake Ntewa, ove lemam van inu, sineḗna ye inu, yar na kilaen mlamulena piowa!’ ¹⁴Ana kam na asitomyulia leniena kiena lalua nene, ana yoko Ntewa kekaran kiena ai? Lelaga, yar naḗa pisu kilale kiena mlamulena viowa, a mloge piowagania, Ntewa ḗar plan kiena mlamulena viowa. Ana yar taḗena naḗani, naga ḗasuḗe si pa uḗna naḗa kiena malena maran taaga ga sa ke naḗa pimi. Yar naḗa suḗna pisirlua naga, yoko Ntewa ligan naga ḗe ke tano, ana yar naḗa mligan naga sike tano, yoko Ntewa visirlua naga.”

Yesu pisa ruru sisi kokan lala

Matiu 19:13-15; Mak 10:13-16

¹⁵ Ana e poglis nene, auia laḗas aḗar narila sisi tomtom lala apim puna Yesu, sinelan asape kus la, visa ruru la. Ana pogos naḗa nalogena la apisuia, apisaluḗar la, asape avava sina. ¹⁶Ana Yesu pio sira la naḗani, sape aim m̄aga, ana pisa pan nalogena lala sanini, sape “Kam na ve avisaluḗar re sisi la naḗa, ataḗan la aim pun inu, komin naḗa sisi la naḗa, yeririna la naḗa asa ke ga la nene, la ke ga nene narui naḗa asuḗna apa loyuḗna e nasuḗpenena kiena ne Ntewa. ¹⁷In na nepisa ke lelaga na pan amiu ne, visae yar naḗa sinenan nasuḗpenena kiena ne Ntewa, naga monar kila naga imi ve sa sisi la nini, visae peraga, naga taḗatete va loyuḗna.”

Yerkawa kiena ne le Yu lala tai sinenan sape tol malena

Matiu 19:16-30; Mak 10:17-31

¹⁸ Ana siraunia, suŕe tai pimi piun tan Yesu, sape “Navianena wo, awis, popon ovisawal van inu sane in na monar nekila ya naŕa visae nekila yoko nekilia netol malena naŕa ve uro re.” ¹⁹ Ana Yesu pisataŕnea, sape “!Ei! Ko na okilia ya ne, osape in na nopo? Pe yaru tai po ruru re naapo poli, ana Ntewa ga naga taaga. ²⁰ Ana ko opiun osape sanape naŕa yar tai sane ko naga kilia imi wo e marana Ntewa woga. Pona okilia ruru kiena Navisaluaena yo rui, naŕa pisape ko ve okila re lau, ve oweŕnar re yaru, a ve ovinau re, ve ovisokan re, ovatanon arimoŕna amio anoŕna.”

²¹ Ana yar naŕani pisataŕnea, pisape “Lelaga, in na nekilia kemua Navisaluaena la ne opisa ke ne, a nekilia nevisa van ko sanini, in na nopuar ruru la siar e pogos naŕa nepe yar viu ke ga wa. Pimi tol nanagane, pe nekilalu re tai poli.”

²² Ana pogos naŕa Yesu mloge pisa sanene, pisape “Pogaga, ana e lepas naŕa puŕna, sur tai sike ga wa. Monar ova owilwilin plan make kioŕna sur moki la nene, ana owar kana kilavaru, ova okiakian kare ga va yar la naŕa limala plasa. Visae okila sanene, yoko kioŕna sur wo la ve moki ma e peni. Ko, ova okila, ŕisi na oim otaveve inu.” ²³ Ana pogos naŕa yar nene mloge visena nene, sinen piowa paŕisi, kiena sitomena pimi urmi na urmi, komin naga pe yar na sur moki, limana pule paŕisi.

Yaru naŕa kiena sur moki, naga ŕarera li ŕnaga vena vaen loyuŕna e nasuŕenena kiena ne Ntewa

²⁴ Ana Yesu pisa manene yerkawa nene pano-o ŕisa, siraunia pisape “Visae yar tai naŕa kiena sur moki, naga sinenan sape va loyuŕna e Nasuŕenena kiena ne Ntewa, sur nene naga ŕarera towe ŕna naŕa. ²⁵ Ee, nevisa van amiu, visae kamel tai va warpo yo kome pulus nen nitil, nanene na ŕarera paŕisi, ana visae yar tai naŕa kiena sur moki sinenan sape va loyuŕna e Nasuŕenena kiena ne Ntewa naga ŕarera laa na wa.”

²⁶ Ana la naŕa amloge visena nene amilan pano-o paŕisi, asape “!Aulai! Visae sanene, ane yoko tol malena?”

²⁷ Ana Yesu pisataŕnea, pisape “Lelaga, yar taŕatete kila naga tol malena, ana ya naŕa yar taŕatete kila, Ntewa naga kilia kila woga.”

²⁸ Ana Pita piunia, pisape “?A yoko ve sanapen imimi? Memligan ŕmamimi uŕna la rui, ana metaveve ko ke narui.”

²⁹ Ana Yesu pisa pa kiena nalogena lala, sape “Kam na ve asitom manene re e lepas nene. Yar a naŕa visae ligan ŕmana uŕna, pona wona, pona wenla, pona arimana amio anena, pona narina lala, a visae ligan sur la nene vanon yuŕnaena na Nasuŕenena kiena ne Ntewa, ³⁰ yoko naga tol maran si kiena sur la nene va ve moki manene laa va laa sane na wa. Naga nene e pogos nanagane, a sirau ŕmena ga e pogos na pimi ke ne, yoko naga tol malena naŕa ve uro re.”

Yesu pisawal kiena marena yam telun nene

Matiu 20:17-19; Mak 10:32-34

³¹ Ana poglis naŕa amiyaloro ke apano, Yesu pio kiena lualima taaga pa lua apim puna, pisa pan la pisape “Ayagogo ruruia. Nanagane tepa ke ma Yerusalem narui, a pogos naŕa tetolia, sur make la naŕa navisawalena lala asiriyu nanua sumo rui e lepas nen Narina ne Yeririna, yoko avisuia aimi aŕnalŕmalivi ve sa nena naŕa apisa. ³² Yoko avisu naŕa aligan naga va e limana ne le Rom lala, naŕa yoko akirakirai viowa vania, akila karea e ŕelaga viowa lala, avilasiria, ³³ alilia, akila ŕna sanene vano-o aweŕmaria. Ana yoko kana legiena ve telu, naga suŕmalu mal sina.”

³⁴ Ana pe sur korena ga naŕa Yesu pisawal meraravan make sur punu pan la sanene, ana la pe amloge kilia ruru re nenaga. Naga sa naŕa visena la nene na atapolou ga e la, ana kila sane taŕatete atol kana kinasa.

Yesu kila ruru kilamara ŕala tai

Matiu 20:29-34; Mak 10:46-52

³⁵ Ana Yesu la amiyaloro apa m̄aga, apim lavisin pulkumali naḗa Seriko, ana kilamara ḗala tai teke tano e is nen mrapa, toḗa mlogin ke kana kinanena tan yeririna la naḗa apa akomkom ke e nene.

³⁶ Ana kilamara ḗala naḗani mloge naḗa Yesu la apim ke na amio ḗina la naḗa asuḗna amialoro ke amio, ana naga piunia pisape “La nene na li pe la nene, akope ke ne?”

³⁷ Ana apisataḗne sanini, asape “!Ke, nanene na Yesu nae Nasaret naḗane, nane pimi ke ne imi kom pun ita ne!”

³⁸ Ana yar naḗa pio manenea, a tagi pa Yesu pisape “!Yesu, ko lus kiena ne Tepet, sineun naḗa sineḗa ye inu!”

³⁹ Ana la naḗa asumon ke Yesu, amloge pio sanene, ana apisalup̄aria, apisape “Ova ruru ko ga.”

Ana yar naḗa yepen ma ga, pio ke sina ga, pa laa meta sane wa, pisape “!Yesu, ko na lus kiena Tepet, nemie awis pan ko, sineḗa ye inu!” ⁴⁰ Ana Yesu mial pano, pimi suḗal su puna e yo nene, pisape atar yar nene imi lavisinia. Ana atar pimi, Yesu piun tania, pisape ⁴¹ “?Ana ko sinoḗan osape nekila ya ne van ko?”

Ana naga piunia pisape “Suḗe, awis, sineun nesape kilamarau imi wo, nekilia nevisu suria.”

⁴² Ana Yesu pisape “Pogaga, nanagane nela kioḗa nakiravaena van ko sa naḗa opiunia. Kioḗa naviawaena kila ko opim opo sina.” ⁴³ Ana e nena e poglis nene, yar naḗani, kilamarana pimi po, ana mial ke amio Yesu, suḗna miyeluar ke Ntewa. A yeririna ḗena la naḗa apisu sur nene, apisu po paḗisi, asuḗna amieluar ke kia kiena ne Ntewa vanonia.

19

Yesu pitawe Sakias

¹ Ana Yesu la apim loyuḗa Seriko, amialin ke naḗa ava awar ro ga ea. ² Ana e naḗani yar tai sike ea kiena kia Sakias. Naga pe yerkawa kiena ne yar na warpoloen takis e pupia lepas nene, ana vanon naḗa naga miyuḗae piowa, kila kare ke yaru lala e kiela kilavaru na takis nena, kila naga liman pule paḗisi, naga pe yar na sur moki. ³ Ana Sakias ḗena pimi e poglis nene, sinenan sape visu Yesu naga pe yar na sanape, ana yeririna la mokliu naḗa asike lavisin Yesu, asuwo ga yo, sa naḗa yo kuskus ga rui, ana naga pe pisu ruru re poli, komin naga pe yar plas ga tai. ⁴ Ana Sakias pisu sane piowa narui, kiriri sumon Yesu lala, pa tol puryove tai ḗiyu pa e korowas tai, suḗmate ke naḗa visae Yesu la ayal aimi, ana naga kilia visu ruruia.

⁵ Ana pogos naḗa Yesu pimi tol puryove naḗani, Sakias milan ga naḗa Yesu kira pa pisuia, pis pania, pisape “Sakias, otapulu vilaga. In na nemninuluḗar e inu sane ḗane neva nesu re nemio ko sumo wa gar moḗa.” ⁶ Sakias mloge narui, suḗalu pula nena pitomi tano, ana ḗere Yesu pa ḗmana, amio pupia kekarena paḗisi.

⁷ Ana pogos naḗa yeririna la apisu sur nene, la moki naḗa pe akekaran re poli, apismumu, apisape “Yar naḗa Sakias naga pe yar sur naḗa miyuḗae piowa ga, naga kila kareli yar lala wa, ana vanon ya ne Yesu sinenan sape amio ava asu ḗmana?”

⁸ Ana pogos naḗa asike loyuḗa rui, Sakias mloge sane naga monar vilopuia, a monar keḗu kiena malena, ana suḗalu pisawal e marana ne Suḗe, pisape “Suḗe, nanagane in na netaḗan kiau sur la komḗas va yar la naḗa limala korena, pe kiela sur re poli. A suri ya naḗa nepisa kotalia yar la ea, nepinaun la, yoko nowar maran si van la tol yam ve vari.”

⁹ Ana Yesu mloge pon manene visena naḗa Sakias pisa, ana pisa pania pisape “Nepisu sane ḗane na, natamaliaena kiena ne Ntewa pimi nena tol mratava nini. Yar nene naga kilalu mrapa na kiena malena, ana naga ḗena pe lus kiena ne Epraam kemua lelaga, naga pe yere Yu kemua tai, ¹⁰ ana inu Narina ne Yeririna nepim e yomarava nini vena nakale la naḗa amiyepe petan mrapa sane yaru nene, vena netamalia la.”

*ḗakaiwa na yar telu naḗa apisuar kilavaru kiena ne kiela yerkawa
Matiu 25:14-30*

¹¹ Ana yeririna la asuñña amiyagogon ke visena kiena Yesu la nene, ana pis ña pan la pano-o, pisa ñakaiwa tai pan la. Naga pisa sane popon vian la e ñakaiwa nena, komin naga kilia ke sape sane yeririna lala asitom ke asape pogos naña ava atol yo Yerusalem, yoko naga kila nasuñenena kiena ne Ntewa imi warpo ke yo van la veraga. A nanagane apim ke lavisin Yerusalem rui, a Yesu sape vianin la sane naga monar ligán la sumo wa, yoko imi si pula. ¹² Naga pisa pan la sanini, sape “Yerkawa tai, naga pa perina e naña pupia ñarin suñe sike ea, vena avisirlua naga imi ve ñarin suñe na kiena lepasa, yoko naga kilia wasuñe sina visuar kiena yo. ¹³ Ana sumon naña pe pa re poli wa, naga pio kiena yar lala, la lualima, a la punu ga mla kilavaru peve taaga pan la, sape monar ayuñae amio kilavaru nañani vano-o tol pogos naña naga wasuñe sina. ¹⁴ Ana yeririna la nae lepas nene ape nasinekar kiena ne yerkawa nene, ana pogos naña naga pur matan la pa narui, la apisayuia asape la pe sinelan re si naga imi ve kiela ñarin suñe poli. Ana amligan visena pa pa ñarin suñe keviu na purvanua nañani, asape ‘Pe sinemimin re yar nene imi ve kiamimi ñarin suñe poli. A pe sinemimin re nena naña oligan kia keviu nene e naga poli.’ ¹⁵ Ana ñarin suñe keviu nañani kila ga, ana yerkawa nene pimi ve suñen ke sina ga kiena lepasa. Ana pimi pio viraviran kiena yar la naña naga ñar ñesan kilavaru nene pan la, sinenan sape visu sane amiyuñae ea, ana ataulu si kiena kilavaru via.

¹⁶ “Ana yar naña pimi suñal ñesan se marana, pisape ‘Suñe kioñña kilavaru taaga naña omla pan inu, nemiyuñae ña amio pano-o netaulu si lualima to metavana.’

¹⁷ “Ana yerkawa nene pisa kiena yar na yuññaena nene miyuñae po, ana pisa pania sape ‘Po na po pañisi, ko omiyuñae po manene laa wa. Ana komin naña osuñalu ñarera ose narin yuññaena naña nemligan e lumoñña, ana nagane nela yuññaena keviu tai van ko, neligan ko ovisuar kiau pupia pulkumali ve lualima.’

¹⁸ “Ana siraunia, yar nalua pimi, pisape ‘Suñe, kilavaru taaga naña omla pan inu, nemiyuñae ña ea pano-o taulu si lima to metavana.’

¹⁹ “Ana yerkawa nañani pisa pania, sape ‘Po wa, ko ññaena omiyuñae po pañisi, yoko neligan ko ovisuar kiau pupia pulkumali ve lima.’

²⁰ “Yoko kiena yar tañena pimi, pisape ‘Suñe, kioñña kilavaru naña omla pan inu, nepiwo ruru e kinakina kulmrae tai, nemligan ruru toñña ga, nane nesape nela si wasuñe imi van ko narui. ²¹ In na nesuñña nepisu ko ke sane ko yar tai naña okilia owar plan kioñña sur naña yar tañena ñarar sike na, a okilia okinana e lokove naña pe ko re omapila poli. Kioñña ñelaga ñarera towe laa sanene, kila nemaraun ko, ana pe nekila re surian kioñña kilavaru nene po, nepuarar ruru ga toñña ga.’

²² “Ana yerkawa nañani sinen karia, pisape ‘Yaru, opisa kare in laa ne wa, naña osape in na yar ñarera tai ne sanene. Ana pogaga, kioñña visena nene naga ga kar ko ke sina ga. ²³ ?Visae in na yar sur na sanene, komin ya ne opuar kiau kilavaru sanene? Po pañisi naña visae oligan ga e pag, vena pogos naña nowasuñea, nekilia nowar plan sina amio narina naña naga tauluia.’

²⁴ “Ana yerkawa nañani pisa pa yar tañena la naña asuñal asike lavisinia, sape ‘Awar plan kilavaru nene e limana, awar va yar naña taulu lualima.’

²⁵ “Ana apis pa yerkawa nañani, asape ‘!Ana suñe, naga ñar mokliu wa, kiena lualima rui!’

²⁶ “Ana yerkawa pisa pan la pisape ‘Lelaga, ana sanene narui. Naga naña kiena sur mok rui, yoko naga war si va laa sane na wa, ana naga naña pe kiena sur re poli, yoko naga kilalu kiena narin sur ve tokak ga naña naga mla ke rui. ²⁷ Ana e lepas na kiau nasinekar la nene, naña la yepela mavin naña in na neve suñen la, sineun nesape ava aurela aim e nini, awe moñar la amarmare e marau.’ ”

Ana ñakaiwa kiena ne Yesu nane ñisi e nene.

Yesu pimi tol yo naña Yerusalem

Matiu 21:1-11; Mak 11:1-11; Yoane 12:12-19

²⁸ Ana Yesu pisa pa visena la nene, suñalu, sumon la, ðere la apa ma Yerusalem. ²⁹ Ana la apim lavisin narin pulkumali lua nene sumo, naþa Petpas amio Petani, e lepas nen Kunus Na Purolip lala. Ana Yesu pisa pa kiena nalogena lua, pisape ³⁰ “Kam lua ayalor ava ke ne e narin pulkumali na gare sumo wa. Pogos naþa ava loyuña, yoko alual togki tai, amatear teke ea. Togki naþani pe teras ga, pe yar tai to li re e masina poli wa, ana kamlua aluþarlua, aure imi e nini. ³¹ Visae aviun tan amiu amlua, avisave ‘E, amluþarlua ke pe na ya?,’ yoko avisatañea avisave ‘Suþe sinenan sur mal nini kila kiena yuñena tai.’”

³² Yesu pisa sanene pan lalua, ana mligan la apano, ana apano apisu sanena naþa pisa pan la. ³³ Ana apano asuña amluþarlua ke kilka petan sur mal naþani, ana pogos naþa akila ke sanene, kana þar ne la apiunia asape “?E, asuña amluþarlua ke kilka petan pe na ya?”

³⁴ Ana apisatañea asape “Peraga, Suþe sinenan sape sur mal nini kila ke ne kiena yuñena tai sumo wa.” ³⁵ Ana atañan narui, aþure togki naþani pimi pa Yesu, ana aþatetae mñala kulkota lala meta e masina, amligan Yesu totano ea. ³⁶ Ana Yesu kus togki nene, mial pano, ana pogos naþa mial ke pa sanene, yeririna lala amien plan mñala kulkota lala aþatetae sululu mrapa, vena togki kiena ne Yesu yalor ga metava ea.

³⁷ Ana amial mña e Kunus Na Purolip la pano-o, apim atol yo e naþa mrapa na vitoen garo Yerusalem. Ana pogos naþa pupia þina moki lala na nalogena lala apisu naþa Yesu pimi ke lavisin Yerusalem, asitoñal pupia yuñena lala a kile lala naþa apisu naga kila, a apisu sane kiela pupia þarin suþe viu tai ne pimi ke ne, ana akekara paþisi, asuña amieluar Ntewa keviu vanonia. ³⁸ Asuña apiovionia, asape “!Ntewa na mava, ovisa ruru þarin suþe nene naþa pimi ke e kioña kia! !Pupia kekarena ma e peni, kam nae ma metava avisirlua kia kiena ne Ntewa, kiena naurarena po na po!”

³⁹ Ana e poglis nene, Varasi laþas asike mña likan þina la nene, ana pe akekaran re naþa apisirlua ke kia kiena Yesu sanene poli, ana apisa pania asape “!Navianena, ovisaluþar kioña nalogena lala ve akiikiin ko re si sanene!”

⁴⁰ Ana Yesu pisatañe la, sape “E, peraga narui! Visae ve akiikii re sa nene, pona yoko kilavaru ga la ne sike ne monar akiikii yo.”

Yesu tagin pulkumali wa naþa Yerusalem

⁴¹ Ana Yesu pimi lavisin pupia pulkumali nene Yerusalem, kira pito pisuia, sinen miyea, siar naþa wamarana mlaunia. ⁴² Kila sanene narui, pisaar nena pania, pisape “Visae ovisu kilale ga ya naþa molue puña nagane! Ntewa suña kila ke kioña mrapa wo tai vena olual suñare ea ana opisu kilale þele ga. ⁴³ Ana monar nevisa van ko sanini, yoko pogos tai imi van ko naþa kioña nasinekar lala, la ve moki vaþisi naþa aimin ko. Yoko asuvivi ko, asuwo ruru ko nenaga, a yoko awar porotano imi ayuwonpolo e yepas nen kioña pupia kove ana akila mrapa na vitoñasen loyuña, vena awe ko. ⁴⁴ Yoko awe moñar naruña lala, a akilawowa make moña yuña lala, awar plan make nena kala kilatapili lala. Nakoena na sanene yoko imi van ko komin naþa ko yepmavin visu kilaleen naþa nagane naga pe kioña pogos naþa Ntewa pimi mñalivi vena tamalia ko.”

⁴⁵ Ana Yesu mial pa loyuña e pulkumali, pa e Yuña Wa mña Ntewa, ana pisa la naþa akila ke yuñena na tauluen kururu kilavaru ea. Ana naga mñene plan la, sape ⁴⁶ “Ntewa pisa e kiena Visena Wa, pisape ‘Mau yuña wa naga pe yuña na leniena, ana kam na apilon yuña nene narui pimi sane puluve tai mña yar na vinauena lala.’”

⁴⁷ Ana e poglis nene e legiena punu ga Yesu pa ke loyuña e Yuña Wa, ana pian ke yeririna lala, a yerkawa kiena ne yar wa lala amio navianena navisaluaena lala amio mña yerkawa kiena ne yeririna lala, pe akekaran re nenaga. Asuña akalewele ke mrapa vena akilia akila sur tai vena kila narui monar aweñar Yesu. ⁴⁸ Ana peraga, apisu sane taþatete alual mrapa, komin yeririna la naþa amiyagolon ke kiena navianena lala, akekaran manene laa kiena visena lala, la sinelan ga naga silaga.

20

*Nasumonena nae Israel lala sinelan asape avisaluþar Yesu**Matiu 21:23-27; Mak 11:27-33*

¹ Ana e si e legiena taþena, Yesu þasuþe si pa e Yuþna Wa mþana Ntewa gar Yerusalem, suþna pian ke yeririna lala a mlologon ke mþena nalologena wo pan la. Ana nasumonena kiena yar wa lala amio navianena navisaluaena lala amio mþena nasumonena taþena lala apim puna, apiun tania, asape ² “?Ovisali van imimi, sane okila ke sanene e nini e kia kiena ai? ?Ane pisa pan ko pisape okila sa nene?”

³ Ana Yesu pisataþne la, sape “Pogaga, ana yoko in mþena neviun naviunena tai van amiu sumo wa. Kiau naviunena sanini, sane ⁴ “?Nakeena naþa Yoane kila nanua ga ne pa yar lala, naga pe sur tai naþa Ntewa pisa pan pisape kila, pona Yoane ga sitom sape kila? Amiu avisalia.”

⁵ Ana naviunena kiena ne Yesu nene kila narui apis manene ke sina ga pan la, apisa ke asape “?Yoko tevisa ve sanape na vania? !Tevisuar ruruia! Visae tevisave nakeena nene, Ntewa naga pisa pa Yoane, yoko yar nene viun sina tan ita ne visave ana komin ya ne yepeta mavin lelagaena e Yoane? ⁶ Ana visae tevisave Yoane ga sitom sape kila, sa þisi yaru la sinela kar ita ana akove ita, komin naþa amlelaga mþarera rui sane Yoane naga pe navisawalena kiena ne Ntewa kemua lelaga.” ⁷ Ana sitomena nene kila narui apisataþne Yesu asape aminue kare ga narui.

⁸ Ana Yesu pisa pan la, sape “Sanene, in mþena ga taþatete nevisa van amiu ane pisa pan inu sape nekila yuþnaena nene.”

*þakaiwa na yeririna viowa lala navisuaren lokilkerep**Matiu 21:33-46; Mak 12:1-12*

⁹ Ana Yesu pisa þakaiwa tai pan yeririna la naþa asike e poglis nene, pisape “Yerkawa tai, amio kiena lokilkerep tai. Naga sinenan sape yaloro re va e purvanua taþena tai, naþa mþeke laa perina, ana naga mligan kiena lokilkerep nene pa yeririna taþena laþasa naþa yoko aim ayuþnae ea, ana aul vania. ¹⁰ Ana yerkawa naþani pa suþna gare pano-o, pisu kilale sane nanagane pogos naþa mrakerep marua narui. Ana mligan kiena yar tai þasuþe si pa pun la naþa asike e kiena lokilkerep naþani, vena war kilavaru na mrakerep komþasa naþa monar aul vania. Yar nene pano, ana pogos naþa mþalivin la, la pe sinelan re aul poli, ana aþne kare naga, amligan si naga þasuþea liman korena ga. ¹¹ Ana yerkawa naþani mligan si kiena yar taþena pano, ana aþne mþena naga, akila piowa pania paþisi, ana aþnelua þasuþe koren ga pa sina. ¹² Ana yam telu narui, yerkawa naþani mligan kiena yar taþena, ana naga mþena ga, aþnea kulu ga kuruta rui, akoven lua e lokilkerep nene pano.

¹³ “Ana yerkawa na lokilkerep pisu þelaga viowa la ne sanene, mninue kare narui, pisape ‘!Awe! ?Popon nekila ya narui? Pona nanagane monar neligan ga naruu wawa nini narui. Naruu taaga ga nini, nesitom naga paþisi, ana visae naga vano monar avisu kilalea, avatanonia.’ ¹⁴ Ana mligan naga pano, a pogos naþa yar la nene apisuia, asitom piowa pania. Apisayu sina pan la, asape ‘Nanene na narin yerkawa nene yo. Yar ne na nene narui, naþa visae yerkawa nene kovio, naga ke narui naþa yoko kus porotano nene sane kiena lalimana. Popon toweþmaria, vena ita ga touarar tano nene ve kieta.’ ¹⁵ Ana asuþnal narui atararia, akovenlua naga pa vanua e lokilkerep naþane, ana aþneþmaria.”

Ana Yesu sape “Suniena nene pimi maro e nini na þa rui, ana popon asitomlia. Pogos naþa yerkawa mloge sur nene, yoko naga imi kila ve sanapen la nene? ¹⁶ Nevisa van amiu sanini, yeririna viowa la nene, yoko naga imi we moþnar la, yoko amarmare e nakoæn mþarera tai, ana yoko ligan lokilkerep naþani e limana yar laþas naþa apowo.”

Ana poglis naþa amloge Yesu pisa sanene, amloge kilale naþa visena nene sane pisawan ga sur tai, pisayu sape le Yu lala pe sinelan re naga naþa pe narina ne Ntewa poli, ana yoko Ntewa were yar la naþa pe ape le Yu re poli akus lelela. Ana sur nene pe sinelan re aloge po, apis mþarera, asape “Sur naþa opisa ke ne, Ntewa monar ve ligan re sur nene imi mþalivi sanene.”

¹⁷ Ana Yesu kira pisu manene la, piun pisape “Pe sinemiun re poli, ana vanon ya ne asiri visen wa naþa pisa sanini, pisape
‘Kilavaru nini, yar na yuþaenen yuþa lala asape piowa ga, ana akoven lua pa rui, ana nanagane kilavaru nene pimi pe kilavaru wo tai naþa pe na mrapun yuþa, vena uarar yuþa m̃arera.’ *Yauena 118:22*

¹⁸ “Yeririna make ga naþa visae avane kilavaru nene, yoko aloru akove kilavaru nena, siwowa kare yepela lala. A visae vano vano-o tol pogos naþa kilavaru nene loru, ana yar a naþa kilavaru monoaria, yoko kilamumu kare naga vano-o kovio nenaga.”

¹⁹ Ana navianen navisaluaena lala amio yerkawa kiena ne yar wa lala, apisu kilale þakaiwa kiena Yesu nene panon la nena ga, ana sinela kar manene laa narui, asuþmalu asape auarar nena naga e pogos nene. Sinelan manene laa asape akila sur tai vania, ana akila þele ga, komin apisu yeririna la akekaran laa naga. ²⁰ Kila sanene narui ana silaga asuþma apisuaria, a laþasa apa vinau ga apa lavisinia, akila kokanin ga sa naþa alelaga e naga, ana sur naþa la akila ke ne, asuþma aþar make nena kiena visena lala. Kiela sitomena sane sinelan asape alual visena laþas naþa naga pisa, ana akilia avisawal va yerkawa nae Rom nene Paelat, vena naga kilia la nakoarena tai vania sa naþa la sinelania.

Sur kiena ne Ntewa, sur kiena ne Sisa
Matiu 22:15-22; Mak 12:13-17

²¹ Þis na pog tai la naþa apinaun vena aim lavisin Yesu, apiun naviunena tai tania, sa naþa akila kotalia ga naga. Asape “Navianena, mepisu kilale sane kioþma visena lala a kioþma vianena lala ape lelaga a po paþisi. A mepisu kilale sa naþa kioþma naliþereen yar lala pe peve taþena re poli, naþa opisu la maran taaga ga, ko opisawal mesmesun ke mrapa kiena ne Ntewa pan yeririna make ga. ²² Ana sinemimin mesape meviun tan ko sanini, sane ‘?Kieta navisaluaena pisa sanape? ?Sape mesmesun ita le Yu lala toul takis va þarin suþe nae Rom, naþa Sisa, pona pisape pe mesmes re poli?’ ”

²³ Ana Yesu pisu kilale sane asape akila kotalia ga naga, ana pisa pan la pisape ²⁴ “Ala narin kilavaru tai imi van inu. ?Avisuli sane marana ne ane teke ea? ?A kia naþa asiri teke ea, kia kiena ai?”

Apisape “Marana Sisa, a kiena kia m̃ena ga.”

²⁵ Ana naga pisa pan la sape “Pogaga, sur naþa pe kiena ne Sisa, ala va Sisa. A sur naþa pe kiena ne Ntewa, ala va Ntewa.”

²⁶ La nene sinelan manene asape atol ruru Yesu e maran yeririna lala e kiena visena tai, ana pogos naþa amloge kana navisataþneena nena, amilan paþisi, apisu sane naga kilaþar ruru kiela kap narui, ana apa ruru la ga asikena, pe apisa re si sur tai po.

Yar la naþa amarmare rui, yoko amamal sina
Matiu 22:23-33; Mak 12:18-27

²⁷ Ana siraun naga nene, le Satusi laþasa, apim puna Yesu, naþa sinelan asape aviun tania e lepas na sur tai naþa la amlelaga m̃arera ea, naþa asape yar la naþa amarmare rui, taþatete amamal sina e legiena maro. ²⁸ Ana apiun tania, asape “Navianena, sinemimin mesape meviun tan ko sanini. Sanapen visena tai naþa yermarua Mosis siriya pan ita na nanua sumo. Naga pisape visae yar tai, wenla mare tan wona, naþa lalua pe narila re tai poli wa, yokorena wenla nene monar were letano nene ve wona, vena kila sane sira nene kilia war sisi, vena uarar kia kiena ne wenla naþa mare mal toþma ga. ²⁹ Pogaga, ana e pogos tai, welelai la olua. Kiela m̃earu þere wona tai, ana naga mare tan wona naþani lalua pe narila re tai poli wa. ³⁰ Ana wenla na surana naga towe þere sira naþani, ana yoko naga m̃ena mare tania, ³¹ ana wenla m̃ena na telu, kila sa ke ga, akila m̃a sanene pano-o tol wenla maro na olua, la make ga maran taaga ga, naþa pe aþar re nena narila tai poli. ³² A siraun wona la punu ga nene, sira m̃ena naþani marþanu. ³³ Ana ovisali sur nene: ?E legiena maro, pogos naþa apisa ke asape yoko yeririna la amamal sina, yoko sira nene ve wona ai, komin naþa talopa make amio welelai la olua nene?”

³⁴ Ana Yesu pisatañe la sape “E ga e yomarava nini, yeririna lala asuñña atatalopa, ³⁵ ana la naña Ntewa pisape visae akilia amal si vetan marena vena ava loyuñña e kiena yo, ve akila re sina. E pogos nene, tařatete si atalopa narui, ³⁶ a yoko ve amarmare re sina komin naña aim sa ga navisi la narui. Yoko Ntewa kila amal sina e marena ana avim ave narina ruru nena lala. ³⁷ A e lepas namalen si nene, Mosis ñena pisayu nanua sumo rui e suniena na purlaki naña kap pivaga ke ea. E nene tepisu naña Mosis pion pa Ntewa na mava sape naga pe Ntewa kiena ne Epraam a Ntewa kiena ne Aisak a Ntewa kiena ne Sekop. ³⁸ Ana pogos naña Mosis siri visena nene, la telu nene amarmare e yomarava nini nakonua rui, sane amare e yomarava nini, ana amal asike ma puna Ntewa na wa. Ntewa naga pe pe Ntewa kiena ne yeririna re ga la ne amarmare po, ana naga sinenan sape yeririna la naña asike amio, yeririna la naña amali. E navisuena kiena ne Ntewa, yeririna la naña amarmare e yomarava nini rui, la amal ga asike ga wa.”

³⁹ Ana navianen navisaluaena lala asuñña amiyagogon navisatañeena kiena ne Yesu naña pa le Satusi lala, ana apisu sane manmarua ruru po pařisi, asape “Navianena, kioñña navisatañeena po na po pařisi.” ⁴⁰ Apis sa nene vanon visena kiena Yesu nene kila sane le Satusi lala amaraun naña aviunli si sur la tania.

Yesu Navisaarena naga pe Ntewa kiena ne yermarua Ĥarin Suře Tepet

Matiu 22:41-46; Mak 12:35-37

⁴¹ Ana Yesu pis pan la pa laa sane, piun sur tai tan la, sape “Komin ya ne la apian amiun ke asape Navisaarena naga monar ñaliv e lus kiena ne yermarua Ĥarin Suře Tepet, naña naga pe řarin suře řesania? ⁴² Nepiun nene, komin nanua sumo, Tepet siri e kiena tus na Yauena lala, sape

‘Ntewa na mava pisa pa kiau Suře, sape

‘Ototano e luñau lepas na řamarua,

⁴³ *otoñate ña vano-o, yoko neligan kioñña nasinekar lala aim ve takue tai na kilavanen laña.’* ’

Yauena 110:1

⁴⁴ “Nanene na tepisu sane Tepet pio ke pa Navisaarena sape naga pe kiena Suře rui. ? Ana komin naña Tepet pisa sanene, sanape naña asuñña apisa ke Navisaarena nene asape yoko molue kome Tepet, naga pe lus nena ga tai?”

Ana yam si tai amilan visena kiena ne Yesu.

Yesu pis ñarera pa nasumonen na lotena lala

Matiu 23:1-36; Mak 12:38-40; Luk 11:37-54

⁴⁵ Ana řina la asike amiyagogon ke ga wa, naga pisawal visena tai, naña pe kiena ne kiena nalogena ga lala. ⁴⁶ Naga sape “Kam na avisuar ruru yar navianen navisaluaena la nene. Asuñña aplave manene la e ñala kulsota viavi la nene, a visave ayaloro e yepesinasa e maran yar lala sinelan asape yar la avatanonla, a avio ruru la asave, ‘!Kee, pokolulagi, ko na ope Navianen tai naña po pařisi!’ A e pogos na řařagena a loyuñña e yuñña na leniena ñena lala, sinelan asape atoga e lelen yerkawa lala. ?Kam na apisu kilale narui ne? ⁴⁷ A la akila kiela leniena la piayavi pařisi wa, ana apisokan ke ga ne, komin e ke e pog nene, asuñña akila kotalia ke ga letano lala, akila kare la. Ana vanon kiela řelaga la ne sanene, yoko kiela nakoena naga ñarera manene laa sane.”

21

Letano tai mla narin kilavaru lua pan Ntewa

Mak 12:41-44

¹ Ana pogos naña Yesu la asike e yuñña ñana Ntewa, apisu naña yar lařasa apimin naña akuan kiela nalaena lala e karo na Yuñña Wa. Ana Yesu teke pisu ke ne, pisu naña yar na sur moki la apim akuan kiela nalaena wo lala, ² a siraunia, naga pisu ñena letano tai, naña pe kiena sur re poli, pimi kuan kiena narin kururu varu lua ga.

³ Ana naga pisayu sira nařani pan la, sape “Apisu ke letano nene, naña kuan narin kururu varu lua ga ne? Nevisa sur na lelaga van amiu, sane naga kuan taulu make yar

la naþa kiela sur moki. ⁴ Yar la nene, kiela kilavaru keviu paþisi, ana akuan ga narin kinakinas komþasa, ana letano nene, narin kilavaru naþa mlararia vena ve kiena malena, taþan make nena pan Ntewa.”

Yesu pisawal naþa yoko awe plan yuþna wa mþana Ntewa

⁵ Ana siraun naga nene, yar laþas apisayu ke Yuþna Wa, asape apisu po paþisi, amio kana kilatapili nowo lala, a kana sur tanea la naþa aþaria pe na vayaia punuen kana kove nena. Ana Yesu mloge mþa naþa asunyu ke sanene narui, naga sape ⁶ “?Kam na apisu sur la nene asape powo liu? Nevisa van amiu sanini, siraunia, e pogos la tai ne pimi ke ne, yoko taþatete si kana kilatapili ne tai to ruru si teke e lelen, komin naþa yoko yar laþasia aim awe plan tetain kare make yuþna nene.”

Yoko pog mþarera monar imi

⁷ Ana pogos naþa amloge Yesu pisa sanene, apiun tania, asape “?Ana Navianena, yoko awe plan Yuþna Wa nene pogwai, a yoko mevisu kile ya naþa visawal visave lavisi sur la nene imi mþalmþaliv narui?”

⁸ Ana pisa pan la, pisape “Kam na popon avisuar ruru amiu, vena ve yar tai imi visa kotalia amiu re, komin yoko yar ve moki naþa ala kiau kia, ana aim avisave ‘!In ne nanini nepe Navisaarena nene!’ pona avisave ‘!Nane, kana pogos ne nanini narui!’ Ana ve ataveve la re. ⁹ A visae e pogos nene, aloge mþaagena na mara lala, a sur viowa la asike ga lavisi, ana ve sinemiu kurkur manene re. Sur la nene monar aþalmþaliv sumo, ana naga nene na pe legiena maro re nene po la wa.”

¹⁰ Ana pisa mþena pan la, sape “A þarin suþe lala, yoko akila sina mara amio þarin suþe taþena lala, a purvanua lala asuþmalun sina purvanua taþena lala. ¹¹ Yoko yemninu vaþisi, a yoko yo kar ga la e yomarava nini pogos na pupia viso vaþisi a maiena mþarera lala, a nanene yoko amio mþena sur na sine kurkurena a pupia kile lala meta e sinapane. ¹² Ana pogos naþa sur la nene pere wa, yoko yeririna la akila ke ne viowa van amiu. Yoko auarar amiu mþarera, ala magka van amiu, ana siraunia aligan amiu e limana ne li na sumonen yuþna nalenena, pona akoven amiu ava asike e yuþna naloge viowaena, pona akila amiu asuþmalu ase marana ne kiela þarin suþe lala pona kiela nasumonena lala. Sur viowa la nene yoko akusia vanon naþa kam na apuarar ke kiau kia mþarera. ¹³ Pogos nene yoko akila mþarera van amiu vaþisi, ana yoko imi sa naþa kiamiu pulmas na lologonen Lologena Wo van la.

¹⁴ “Ana nagane, pogos naþa sur la nene pere ke na wa, ve asitom manene re sane yoko aþna avisa ya ne e pogos nene, ¹⁵ komin naþa yoko e nena e kana pogos nena, nela visena na manmaruaena van amiu. Ana pog naþa avisa visena la nene van kiamiu nasinekar lala, yoko ataulu la, yoko taþatete si avilon kiamiu visena nena.

¹⁶ “Yoko e kana pogos nena, la ga naþa kam na apio la ke asape arimamiu pona womla pona þapo pona erau, la ne sanene la ke naþa yoko aure plan amiu aligan amiu e limana ne yerkawa lala, ana yoko akilapel amiu sanene vaþisi vano-o kam laþasa awe moþar la. ¹⁷ Yoko yar la sinela kar amiu vaþisi, yoko laþasa alamaran si visena van amiu, kam la naþa kiau kia sike e amiu.

¹⁸ “Ana nevisa van amiu sanini yoko taþatete vilþarimiu tai yoko kovio lue. ¹⁹ Yoko asuþmal mþarera asuþna vano-o ataulu pog mþarera nene, a e mrapa nena nanene narui, yoko atol kiamiu malena na lelaga ea.”

Pupia mara gar Yerusalem

²⁰ A e lepas na pupia pog mþarera naþa yoko imi, Yesu pisa sina pan la sape “Pogos naþa visae avisu þegas nen yeririna na kilaen mara lala asuþmal asuwo ke yo yervivi pupia pulkumali naþa Yerusalem, nane yoko akilia narui sane pupia kana pog na kilaroroen pimi ke lavis narui. ²¹ A pogos naþa avisu sur nene, kam naþa asike Sutea, popon aureure ana atapolou e kunus lala, a amiu naþa asike loyuþna Yerusalem, popon amomolue ana aureure, pona amiu naþa asike yoþmarua, ve akilali re si naþa ato garo uþna. ²² Nanene

vanon poglis nene, naga pe pupia legiena na kila maranen sinemimiena kiena ne Ntewa, sa naþa nasiriena lala nanua sumo apisaaria. ²³ E mēna e pogos nene, yoko viowa manene laa va sira la naþa mēþela, amio mēna la naþa amla ke yu pa narila lala. E pog nene, yoko naloge viowaena ve keviu vaþisi e kieta purvanua, a pupia sinemimiena imi va kieta yeririna la nene. ²⁴ A yoko playu na mara kila la ave moki aloloru, a la ve moki naþa sen viar limala, aurela ava ayuñae korena kiena ne þegas nen yeririna taþena lala. Ita le Yu lala yoko yar taþena lala avienena kare kieta pulkumali wa naþa Yerusalem, la ave suþenia vano-o tol pogos naþa Ntewa ga kila sane lala kiela þisi narui.”

Yoko Narina ne Yeririna wasuþe si imi

²⁵ A Yesu pisayu legiena maro, sape “E pogos nene yoko avisu kile lala ma e mrae a e kupario a e verue lala. E yomarava nini, yoko þegas nen yeririna lala aloge viowa, asitom kare sur la vaþisi, a pogos naþa avisu sive kululu ve keviu a lapa ke vam metava va ke ura, yoko la aninue kare narui asape mēna yoko ve sanapen la na wa. ²⁶ A pogos naþa la avisu kilale ya naþa pivim ke e yomarava nini, a pupia sur la naþa ma e sinapane kulkulul kar ga narui, yoko sinela kurkur vaþisi, asuñā marala malon marauena, a amarmarlua. ²⁷ Yoko akila mēna sanene vano-o, avisu inu Narina ne Yeririna noñalivi e lul amio kiau pupia nañareraena amio kiau pupia naurarena.

²⁸ “Ana e kiamiu lepasa, pogos naþa visae avisu sur la ne sanene asiar añalñaliv, ve amarau re. Ve asitom re suria, ana asuñālu awar plan þarimiu vena akira va metava, komin naþa sur la nene kana kinasa sane kiamiu yaru nawere plan amiueña pimi ke, lavis warpoyo narui.”

Lepas na purpiliva

²⁹ Ana Yesu pisayu þakaiwa tai pan la e lepas na pogos mārera naþa pimi ke ga wa, sape “Kam na asitomyuli purpiliva nene pona purlaki taþena naþa sanene. ³⁰ Pogos naþa avisu sane korowas la imi memaena, a imi malmalumu, a kana stos la siar miyulua, ana kam na akilia sane pogos na yepisusun pimi ke lavis narui. ³¹ Sanene pogos naþa avisu kile la nene aim añalñaliv ke sa naþa nepisa pan amiu þa rui, yoko akilia sane nasuþenena kiena ne Ntewa pimi ke lavisin amiu narui. ³² Lelaga nevisa van amiu, yoko sur punu ga monar imi mālñaliv mēna sanene vano-o þisi, ana siraunia, teras na yaru la naþa amal ke e pog nene akovio e yomarava nini. ³³ A yoko sinapane amio yomarava nini la mēna luwoka akovio, ana kiau visena lala taþatete akovio pogos tai.”

Kam na monar akila ruru kiamiu malena lala

³⁴ Ana Yesu mla visena nene pan la e pogos nene, pe visena na weþege laena, sape “Ana e kiamiu lepasa, kam na avisuar ruru amiu. Pe pon re kiamiu malena ve taþena si poli, pona amun manene la kuruta na munena, pona sur kar la ne sanene, a ve kiamiu sitomena su manene re mēna ga e sur na yomarava nini la silaga. Visae peraga, yoko asuñā akila mēna sanene vano-o ailan ga pupia legiena nene imi mālavin amiu veraga sa ga ekarpila. ³⁵ Lelaga, yeririna make ga e yo punu ga e yomarava nini, pe asitoñal re poli, asu wowe ga pe akilia re poli, ana yoko legiena nene imi tol la sa naþa manu milan ga þeregawa suñal maneno sike e naga, marþan nenaga. ³⁶ Ana kam na monar avisuar ruru amiu silaga, monar alen lue ga vena akilia asñal mārera vena atamalia amiu e sur la naþa yoko imi mālñaliv, vena kila naþa akilia asuñal ase marau Narina Yeririna.”

³⁷ Ana Yesu suñā pian la ke sanene e Yuñā Wa ko legiena lala, a kolemalo naga petan pulkumali pava ke e Kunus Na Purolip lala. ³⁸ A kolulagi kona lala yeririna lala atavilo koskos, aþasuþe la apa si e Yuñā Wa vena aloge kiena visena lala.

22

*Nasumonena nae Israel lala asitom ke asape aweñar Yesu na wa
Matiu 26:1-5,14-16; Mak 14:1-2,10-11; Yoane 11:45-53*

¹ Ana siraunia, pimi ke lavisin pog naþa kas punu ga, la akila kiela pupia þaþagena lua, sane þaþagena na kanen kiligaþe naþa pe is re e poli, amio þaþagena na sitoñalen natamaliaena. ² A e pogos nene, yerkawa kiena ne yar wa lala amio navianen navisaluaena lala, asitom ke asape aweñar Yesu na wa, ana pe añal re mrapa na kilaen poli, komin amaraun naþa asape visae akila, pona yeririna la akila sur tai van la yo.

Sutas sun amio yerkawa lala, pisaar sape þisi na kom varaun Yesu

³ Ana e nena e pogos nene, Yermare pimi pa e sinena Sutas nae Kariot, naga nene la lualima taaga pa lua lala ga tai. ⁴ Ana pe yam piavi re nenaga, Sutas suñalu, pa ñalivin yerkawa kiena ne yar wa lala amio yerkawa kiena ne kiela lokul lala, pisawal kiena sitomena nena, ana apisayu mrapa ya naþa po, vena yoko kilia vielua Yesu van la.

⁵ Ana sitomena kiena ne Sutas nene kila amloge po paþisi, ana la apisu sane popon ala kilavaru tai vania vanonia. ⁶ Ana Sutas kekarania, a siar e pogos nene, silaga naga suña kale ke kiena pulmas tai naþa visae ve yeririna re lala, ana naga kilia vielua Yesu van la.

Yesu pitetalia Pita lalua Yoane vena ava akila ruru kana kinanena maro

Matiu 26:17-25; Mak 14:12-21; Yoane 13:21-30

⁷ Ana apim tol legiena na siaren þaþagena na kanen kiligaþe naþa pe is re e poli, naþa e ña nena e legiena nene monar akila kuþaþaena na narin sipsip lala vena sitoñalen natamaliaena. ⁸ Ana Yesu pisa pa Pita amio Yoane, sape “Nevitetalia amlua ava gare, vena akila ruru make sur lala na kinanena na þaþagena nene.”

⁹ Ana lalua apiun tania asape “?Ana ko na sinoñan ke osape meva mekila ruru e nape ne?”

¹⁰ Ana Yesu sape “Kamlua ava atol pupia pulutava nae Yerusalem, ana pogos naþa avaliga loyuña ea, alual yar tai naþa kus ke pupia piawi tai imi vitawe amiu. Ana ataveve avano, yoko naga were amiu ava e yuña tai. ¹¹ Ana pogos naþa ava loyuña, avis va þar na yuña naþani, avisave ‘Kieta Navianena piun sape, ?Awa ñamimi yuña imimi wolawa lala, vena mekilia mese ea makan kinanena nasitoñalen natamaliaena nene ea?’ ¹² Kamlua avisa ve sanene vania, ana yoko naga kipian amiun pupia lele tai metava, naþa sur make sike pa e rui, ana yoko akila ruru make sur na kanen la e yo nene.”

¹³ Ana Yesu pisa pa sanene pa nalogena lua nene narui, lalua apano, ana apisu sur la punu ga pimi ñalivi sa ga naþa naga pisa ruru þesan kemua pan la rui.

Sanene narui, lalua akila ruru kinanena maro kana Yesu.

Kinanena maro

Matiu 26:47-56; Mak 14:2-26; Yoane 18:3-11

¹⁴ Ana siraunia Yesu la apa meta e yo naþani, ana pog na kinanena, Yesu totano e lelen kinanena, ana li na lologena lala apim atotano amio. ¹⁵ Ana Yesu pisa pan la sape “Na nanua rui, in na nesitom ña kata kinanena nasitoñalen natamaliaena nene. Na nene kau kinanena maro nini, naþa ita ga tekinana lele taaga, ana siraunia, nekilia neva ga e kiau pog ñarera na wa. ¹⁶ Nevisa van amiu sanini, kilaparavi nini kana kinas pisayu natamaliaena. Ana yoko in na ve nakan re si narui, vano vano-o tol pogos naþa kiau natamaliaena imi ñaliv e yomarava nini, e pogos naþa nasuþenena kiena ne Ntewa imi.”

¹⁷ Ana naga mlarar piala tai, pisa potenan pa Ntewa, ana pisa pan la, sape “Ala nanini, ataron werewere van amiu, amunia. ¹⁸ Nanene komin naþa siar nanagane, in na yoko ve nomun re si kuruta na munena, vano-o tol pogos naþa nasuþenena kiena ne Ntewa imi.”

¹⁹ Ana naga mla kala kilaparavi tai, mlenin pisa potena pa Ntewa, kawewowaia pisape “Naga nini tasneu ne, naþa netañan pan amiu. Ana yoko kam ñena ga monar akila ve sanene, sa naþa kiamiu nasitoñalinena.”

²⁰ Ana siraunia, pogos naþa akinana pae, naga kila ke sina sa naþa kila e kilaparavi sumo, mla piala na munen tai, pisape “Piala nini naga sane kile na kau kuruta naþa yoko lau vanon amiu, vena visirluaen naviranarena viu kiena ne Ntewa amio amiu. ²¹ Ana sur viowa tai, yar naþa yoko vielua inu, naga ita ga tai naþa tekinana ke lele taaga nagane. ²² Yoko inu Narina ne Yeririna monar nemare ve sa naþa apisaar kemua nanua sumo rui, ana yar naþa yoko vielua inu, sineu miye ke nagane, yoko viowa manene vania!”

²³ Ana pogos naþa amloge, asuþna apiuviun tan la asape akilali naþa alual lala ai naþa sitom ke sape kila sanene, ana pe aþnal re poli.

?Ane yoko ve kiela nasumonena?

Matiu 20:25-28; Mak 10:42-45

²⁴ Ana e pogos nene, veveyuen tai molue likan nalologena lala, sape lala ai naþa yoko la monar avisu naga sane naga to laa metavan la sane, ve kiela nasumonena.

²⁵ Ana Yesu mloge, pisa pan la, sape “Ita tekilia þelaga kiena ne yerkawa na yomarava la nini rui. Þarin suþe lala la ape navisuaren kiela yeririna lala, a nasumonena lala, yar la monar avatanon la, ala kia naþa tometava van la, avio la avisave ‘yar navisuar itaena.’ ²⁶ Ana kam na kiau nalogena lala, monar ve akilali re sa naþa aim ave yerkawa na yomarava nini. Kam yar tai naþa pona apisa ke asape naga pe yerkawa, yoko monar imi ve tokakin amiu, sa naþa pe pras maro. Kam yar tai naþa sape naga ve kiamiu nasumonena, monar imi ve sa yar na iila amiuena.

²⁷ “E pogos na kinanena, yar tai naga toþna ga sane kikiran ga, a yar taþena naþa þar ke kana kinanena pimi pania. Ana lalua nene apisu sane ane pe yerkawa, naga mon manene laa metava? Lelaga kam akilia mþaga, ana in na pe sa re naga po, in na nepitom e yomarava nini sane naga naþa kila yuþnaena, miila yar taþena lala a kila po pan la.”

Yesu pisaar nalaena pan la

²⁸ Ana Yesu pisa pan la, sape “Kam nene, nepisu amiu sane kam na sane amiilar inu po e pog mþarera la naþa netolia, pimi tol nanagane. ²⁹ Ana sa naþa arimau mligan inu nepe suþen kiena yo, in mþena nevisa van amiu sanini nevisir plan amiu aim ave narin suþe lala e kiau yo la nene. ³⁰ Sanene, yoko kam ke narui kam naþa yoko ato si tano amio inu, tekinana lele taaga loyuþna e kiau nasuþenena, a yoko kam mþena atotano e lele na totanoena naþa mon metava vena visuaren lus lualima taaga pa lua nene nae Israel.”

Yesu pisawal naþa yoko Pita viro naga

Matiu 26:31-35; Mak 14:27-31; Yoane 13:36-38

³¹ Ana Yesu pis amio Saemon Pita, sape “Ake Saemon, ovisuar ruru ko. Yermare sinen kar amiu, sinenan sape kila kare amiu vaþisi, ana Ntewa taþnan rui sape yoko naga kilali amiu ve tokak ga, kilia liþere naþa po vetan naþa piowa. ³² Ana in na nemlenwo amiu ke rui, in na noþareran ko ke e kiau leniena nesape visae ko na ve sanape, ana yoko kioþna naviawaena taþatete loru makea. A siraunia visae ko na oim owo ruru sina, owasuþe ko oimi, yoko ko na oim ove yar tai naþa silaga okila womla lala aviawa mþarera manene laa sane.”

³³ Ana Pita pisataþne Yesu, sape “Suþe, visae akoven ko ova e yuþna nakoena, yoko in na nemio ko woga ga. Pona akila mþa van ko vano-o ova otol marena, ana in mþena nekekarana ga naþa italua.”

³⁴ Ana Yesu pisa pania, sape “Pita, nevisa sur na lelaga van ko, sane yemalo ga nini, ve lakaporo kokoreko re wa, yoko ovisa kotalia inu yam ve telu, ovisave ko na omninue in nena ga.”

Pog mþarera pimi þarpo yo rui

³⁵ Ana Yesu piun tan la, sape “Kam na asitoþnal ke nanua ne, pogos naþa nemligan amiu apa amlologo kar ga e yo la nene. In na nepisa pan amiu nesape ve awar re sur laþas amio amiu, sane taga na varu, pona karo, pona kulus nen lamiu taþena, pona sur la ne sanene. ?Ana sanape, kam na apisu limamiu plasan sur laþas, pona peraga?”

Ana apisataþnea, asape “Suþe, pe limamimi plasan re sur tai poli.” ³⁶ Ana Yesu pisa pan la, sape “Lelaga, naga ke narui. Ana nanagane, tesike e pog taþena nini narui. Nanagane, yar naþa kiena taga na varu, pona kiena karo toþna ga, yoko warar vano. Yar naþa pe kiena playu na mara re poli, popon wilwilin lua mþana kulkota ana la kana kilavaru, va ul

kiena playu na mara tai. ³⁷ In na nepisa nene pan amiu, komin nasiriena wa nasumo lala naña la apisayu inu, apim aňmalňaliv ape lelaga narui, pano-o tol visena naña Aisea pisa, naña sape

'Akila pania sa ga naga mēna pe yar viowa ga tai naña kilakilaro ke navisaluaena.' ” *Ais 53:12*

³⁸ Ana nalogena lala asuňna asitom veve ke ga visena kiena Yesu e lepas na playu na mara nene, ana asape “Suņe, opisu ke ne, nanini kieta playu na mara lua nini.”

Ana Yesu pisu sane la pe akilia ruru re kiena visena poli, ana sape “E, tepisayu sur nene torok narui.”

Yesu pa mlen ma Ketsemani ma meta e Kunus na Purolip lala

Matiu 26:36-46; Mak 14:32-42

³⁹ Ana Yesu la amligan yo na ma metava nene, ana sa naña kilakila ke ne, naga mialoro pa tol Kunus Na Purolip lala, naga amio kiena nalogena lala. ⁴⁰ Ana pogos naña atol yo naña Yesu pava ke ea, amap ea, ana pisa pan la, sape “Kam na monar alen silaga, vena nakilaliena lala ve akila amiu re aloru.”

⁴¹ Naga pisa pa sanene pan la, ana mligan la, pa laa perinan laa sane, ana kinai mlen pa Ntewa. ⁴² Naga mlen sanini, sape “Awis Ata, visae okilia okila woga ga, olalua piala na loge viowaena nene vetan inu ve nomun re. Ana ve okila re kiau nasinenanena, okila ga sa naña kioňa.”

⁴³ Ana e poglis nene Yesu mloge urmi pan paņisi, ana apisu navisi tai mligan ma e peni pitomi tano, pitomi miila naga vena naga m̄arera sina. ⁴⁴ Ana Yesu suňna mloge piowa paņisi, sitom ŕele narui ana mlen m̄arera laa sane, mlen m̄a pano-o kana ninena sigariga sane kuruta kekapili e porotano.

⁴⁵ Ana pogos naña mlen pae, suňal sina, ŕasuņe si pa puna nalogena lala, ana pisu naña nasineyeena m̄e la rui, amiyuňnaen ke ga momalena narui. ⁴⁶ Ana naga pis malum kilaņege la, sape “?E, amomalion ke ya ne? Popon asuňalu, akila ve sa naña nepisa pan amiu rui. Kam na monar alen vena nakilaliena lala ve aim re akila amiu aloru.”

Sutas la apim atarar Yesu

Matiu 26:47-56; Mak 14:43-50; Yoane 18:3-11

⁴⁷ Ana pogos naña Yesu pis ke pan la wa, apisu ga pupia ŕegas nen yeririna tai apim akaten la, apisu naña yar tai sumon la apim ke lavis narui, nanene na lala yar ga na sumo tai, naña Sutas. Ana Sutas mial pimi lavisin Yesu, kutararia ana mun pipina. ⁴⁸ Ana Yesu pis ŕesan pania sape “Sutas, omun pipiu sanene na pogaga, ana komin ya ne osape owilwilin inu Narina ne Yeririna e mrapa na sanene?”

⁴⁹ Ana la naña ape kiena ne Yesu naña asuňalu asike lavisinia apisu kilale ya naña Sutas la asape akila, la apiun tan Yesu, asape “?Suņe, sanape, tete la e kieta playu na mara lala?”

⁵⁰ Ana Yesu pe pisataňe re poli wa, ana nalogena tai suňalu, ŕerelua kiena playu na mara, mligan pan tai tea, naña naga yar kiena ne ŕarin yar wa, ana teteteria ga, telua kiligana na ŕamarua pano.

⁵¹ Ana Yesu pis pania, sape “!E toko! Ita ve tekila re si sanene van la.” Ana naga tol si lelen kiligana yar nene, kila ruru sina.

⁵² Ana kira pisu yerkawa kiena ne yar wa lala amio yerkawa kiena ne lokul lala na yuňna m̄ana Ntewa, amio nasumonena taņena kiena ne le Yu lala, naña la m̄ena apiminia, pis pan la, sape “?Sanape na aņar kiamiu playu lala a kiamiu plaki la sanene? ?Pona kam na asitom ke asape in na yar tai naña nepinau m̄arera pona noňeňe yaru? ⁵³ Nanua sumo, e legiena punu ga, in na nesisike nemio amiu e Yuňna Wa silaga pano-o, ana komin ya ne kam na pe apim re lavisin in poli vena atarar inu e pogos la nene? Ana nepisu sane kam na ape yar na yemalolo, naña apim amio naňareraena na yemalolo taņena lala, a nanagane kiamiu aora nena napo.”

Ana apim atarar Yesu aņere pano.

*Pita piro Yesu**Matiu 26:57-58,69-75; Mak 14:53-54,66-72; Yoane 18:12-18,25-27*

⁵⁴ Ana atarar Yesu, aþere þasuþe amio la apano, apa loyuþna e kove kiena ne þarin yar wa. Ana Pita mēna mial tapolou ga taveve la e pogos nene, pe pa re lavisin la poli. ⁵⁵ Ana pogos naþa apim loyuþna e kove nene, laþasa apa akila kapi pivaga vena ategania, ana Pita mēna pa totano amio la.

⁵⁶ Ana la asuþna narui kapi pivaga tegoli marana Pita, ana sira mēe na yuþnaena tai naþa naga sike amio la, naga pisu kilalea, sape “!E, avisulia! Yaru nene, naga mēna lala yar tai naþa silaga taveve yar naþani!”

⁵⁷ Ana Pita pirovia, sape “!Peraga, vineu! Nepisa ruru ke na pan ko ne, in na pe nekilia re yar nene poli.”

⁵⁸ Ana pe piavi re poli, yar taþena kira pisu Pita, pisu kilalea, sape “E, ko mēna tai nene naþa.”

Ana Pita pisataþnea, sape “Peraga, mara.”

⁵⁹ Ana asuþna ga aora si taaga þarovia, taþena pimi pilagan manene ke sina ga pan la, sape “Nevisa ruru van amiu, yar nene naga miaialor kemua amio yere Kalele nene nanua rui. !Apisu ke ne, naga mēna pe yere Kalele ruru nena napo!”

⁶⁰ Ana Pita pisataþnea, pisa kotalia la ke sina ga sape “Peraga, neminue nena sur na opisa ke ne.”

Ana pogos naþa Pita pisa ke visena nene wa, lakaporo kokoreko.

⁶¹ Ana pogos naþa lakaporo kokoreko, Suþe pilon þarina kira pimi pisu manene Pita. Ana Pita sitoþnal si visena kiena ne Suþe naþa pisawal þesan pania, naþa sape “Nevisaar nena van ko, e yemalo na legiena ga nene, pogos naþa lakaporo pe kokoreko re poli wa, ana yoko oviro inu yam ve telu narui, ovisave ko na omninue in ga.” ⁶² Ana Pita mloge piowa paþisi, pa vanua, tagi na tagi.

*Yeririna lala kiena ne þarin yar wa akila kare Yesu paþisi**Matiu 26:67-68; Mak 14:53-65; Yoane 18:19-24*

⁶³ Ana la naþa atarar ke Yesu e pogos nene akila piowa pania, apisa karea, asuia, ⁶⁴ akila mēna pano-o apiwo marana vena ve kirava re sina, ana pogos naþa asuþna amlipa ke naga, apiai pania apiun tania asape “Ei, apisa ke asape ko navisawalena tai, a ko ovisawal lia, ane mlipa ko ga na wa.” ⁶⁵ Ana akila mēna sanene panpano-o, apisa kare naga paþisi.

Atar Yesu pa e pupia kumali kiena ne yerikawa kiena ne le Yu lala

⁶⁶ Asuþna ga sanene pano-o mrae pa metava, ana nasumonena kiena ne le Yu lala, sa naþa pupia yerikawa wa lala amio navianen navisaluaena lala, apim lele taaga e kiela pupia kumali. Pogos naþa apim pa e lele taaga narui, aþere Yesu pa suþnal se marala. ⁶⁷ Ana apis pania, apiun asape “Visae ko ope Navisaarena kemua lelaga, naþa le Yu lala akiravan ke asape yoko naga monar imi, sinemimin mesape ovisawal ruru van imimi nanagane.”

Ana Yesu pisataþne la, sape “Nekilia nevisawal van amiu, ana visae nevisa, pona taþatete akekarana naþa alelaga e yo. ⁶⁸ A sineun nesape in mēna neviun sur laþas tan amiu, ana visae neviunia, yoko kam na taþatete mēna avisataþne yo. ⁶⁹ Ana sur tai naþa in na nekekarana nesape nevisawal van amiu, nevisa sanini, nesape ‘Siar nanagane, yoko ve sa naþa Tusi Wa pisa rui, naþa sape yoko Narina ne Yeririna va totano ma metava e lepas na þamarua puna ne Ntewa na pupia naþareraena.’ ”

⁷⁰ Ana pogos naþa amloge visena nene, apiun tania, asape “!Ke, ya ne sa nene! ?Opisa ke osape ko ke naþa ope Narina Ntewa narui?”

Ana Yesu pisataþne sape “Naga ke narui, sane apisa ke ne.”

⁷¹ Ana pogos naþa la asuþna apisu naþa Yesu pisa ke sape naga pe Narina ne Ntewa, sinela mimi, apisa sanini, asape “Yar nene pisa sanene, tepisu kilale ruru sane pupia veveyuena mēke ga e naga rui. Yoko ve takale re si yar taþena la kiena visena imi visawalia, naga kiena visena ga mliþere sina naga rui.”

23

Aþere Yesu pa puna ne Paelat, þarin suþe nae Rom naþa pisuar ke Israel

Matiu 27:1-2,11-14; Mak 15:1-5; Yoane 18:28-38

¹ Ana li na kumali kiena ne le Yu lala, amloge pa visena kiena Yesu rui, ana asuñalu akuspran la e pupia þegas tai, aþure Yesu pa suñal se marana ne Paelat e kiena lele naliþereena. ² Ana apis pa Paelat, apisawal sur la mok paþisi pania naþa apisayu Yesu. Asape “Yar nene, naga suña kila kare ke sitomena kiena ne yeririna lala e kiamimi purvanua, suña pialuþar la ke sape ve aul re si takis va kioña yerikawa nene, Párin Suþe Sisa nae Rom, a naga ga suña pisirlua ke naga sape kus kia naþa Navisaarena, kila sane naga ve kiamimi þarin suþe keviu. Sur la nene, imimi na mepisu nena e kilamaramimi.”

³ Paelat miyagogon pae kiela visena, ana piun tan Yesu, sape “Ko towe ovisali kioña. ?Lelaga kemua naþa ko ope þarin suþe kiena ne le Yu lala, pona peraga?”

Ana Yesu pisatañea, sape “Naga ke narui, nane opisa ne.”

⁴ Ana Paelat miyagogon visena kiena Yesu, ana pe ñal re naþa naga kila sur tai piowa po, ana pisa pa pupia yar wa lala amio kiela yeririna lala, sape “Yar nene, e kiau navisuena, naga mesmesu ga, naga pe kilaro re navisaluaena tai poli.”

⁵ Ana la pe sinelan re logen visena kiena ne Paelat nene poli, ana la akila ga sane sur na vitaþilena, añareran manene pania, asape “Peraga, yar nene na piowa ga. Naga suña miyuyur kare sitomena kiena kiamimi yeririna lala, a suña mlologo ke pan la e yo kar ga la ne e yo punu ga, siar gar Kalele, pimi þar make yo Yutea, pimi tol pupia pulkumali nene rui.”

⁶ Ana pogos naþa Paelat mloge asape Yesu siar kiena yuñena gar Kalele, piun sape naga pe yere Kalele naapo pona peraga. ⁷ Paelat piun sanene komin naga pe pisuar re lepas nae Kalele po, ana þarin suþe taþena naþa Erot naga pisuar ke yo nene, a pogos naþa apisawal pa Paelat asape Yesu naga nae Kalele, naga pisa pan la sape yoko monar aure naga va ñalivin nena Párin Suþe Erot e kiena lepasa. Ana e pogos ke nene, ana Erot ñena pimi mialiali ke Yerusalem rui, ana aþere ga Yesu apa apisuia.

⁸ Ana pogos naþa Párin Suþe Erot pisu kilale sape Yesu nene, kekarania komin naþa mloge pa kiena suniena rui, kila sane nakonua rui naga sinenan sape visuia ana peraga, ana naga sitom ke sape nanagane narui, pona visu Yesu kila kile tai van yo. ⁹ Ana naga sunli amio Yesu, piun veve sur la mok pania, ana Yesu pe pisatañe re poli, toña ga sane, pe pis re poli.

¹⁰ Ana e pogos nene, pupia yerikawa wa lala amio navianen navisaluaena lala, la ñena asuñal asike ga lavis, apis keviu apisasawal ke sur lala e lepas kiena ne Yesu. ¹¹ Ana sur la nene akila Erot amio kiena yar na mara lala pe sinelan re si Yesu po, akila piowa pania, apisalele karea þisa. Siraunia amiyen kulmrae nowo ñana ne þarin suþe ea, vena avitalia, ana akila ña sanene pano-o, yoko Erot mligan si þasuþe pa pa Paelat vena visuvevea.

¹² Ana sumon sur la nene, lalua nene Paelat amio Erot lalua ape erau viowa ga, ana siar e poglis naþa lalua amiyuñae si lele taagan liþereen Yesu, ana þere si lalua apim ape erau wo sina.

Yesu suñal si se marana ne Paelat

Matiu 27:15-26; Mak 15:6-15; Yoane 18:39-19:16

¹³ Ana aþasuþe la si apim e yo kiena Paelat, ana naga pio viraviran pupia yerikawa wa lala amio suþe lala a yeririna lala sape aim avisuia. ¹⁴ Ana pogos naþa apim loyuña, pis pan la, sape “Naþa aþere þesan yar nene pimi suñal se marau, kam na apisawal asape naga pilon kare lue ga sitomen kiena ne kiamiu yeririna lala. Ana nepiun sur laþas tania, sa naþa kam na amloge, ana in na pe noñal re sane naga kila sur la naþa apisa poli, noñal sane naga mesmesu ga. ¹⁵ Ana nemligan pa pa Erot pisuvevea, ana Erot pe ña re sur tai e poli, ana mligan sina pimi pan inu. Pogaga, kiau naliþereena naga sanini, sane naga pe kila re nena sur tai naþa monar maren poli. ¹⁶ Visae sanene, yoko in na nekila ga sanini vania, nekila ga naþa awea, yoko aligan si vano, kilia wasuþe si va e kiena yo.”

¹⁷ Ana komin naþa e pogos nene naga pe pogos na kilaen pupia þaþagena kiena ne le Yu lala, asitom ke asape sa naþa Þaelat naga kila ke silaga, yoko naga monar ligan lua si yere Yu tai naþa apuarar mēke e kiena yuþa na loge viowaena. ¹⁸⁻¹⁹ Ana poglis nene lala yar tai naþa Þaelat þuarar ke ga wa, naga yar naþa Þaraþas, naþa nanua sumo, naga þere yar taþena laþas akila sur piowa tai gar Yerusalem pa yar na kilaen mara lala nae Rom, aþne moþar la, ana Þaelat koven pa e kiena yuþa na loge viowaena.

Ana pogos naþa apisu sane Þaelat sinenan sape ligan lua si Yesu molue, apion manene pania, asape “Toko, toko! Imimi na sinemimin ga Þaraþas wasuþe si imi van imimi. Yar nene, mesape olalua ga kiena malena.”

²⁰ Ana Þaelat yepen mavi, naga sinenan sape Yesu na molue koren ga sa ga ne va si vanua, ana kilali naþa pis sina ga pan la. ²¹ Ana la ato ga metavana, apionia asape “! Osuaria, osuar e laki torovia!”

²² Ana Þaelat pis pan la yam telu narui, sape “?Ana komin ya ne, naga kila ya ne piowa? In na nepisuveve make sur la rui, ana pe noþal re sur tai piowa teke e naga po, naþa naga kilia marena. Yoko nekila awe ga naga, yoko aligan si wasuþe va uþa.”

²³ Ana la apisatame si Þaelat, apion manene laa pan sane, aþareran asape Yesu na monar va e lak torovia, ana akila mna sanene pano-o ataulua.

²⁴ Ana yokorena Þaelat mla kiena naliþereena, pisawal pisape naga taþan ya naþa la apiunia. ²⁵ Yar naþa sike e yuþa naloge viowaena komin þelaga na kilaen mara amio þelaga na weþaren yaru, Þaelat taþan naga molue si pa pan la, sa naþa la apiunia. Ana e lepas kiena ne Yesu, naga pisawal sape yoko kiena yar na mara lala akila vania ve sa naþa le Yu la sinelania.

Aþere Yesu pa e yo naþa Kalþari

Matiu 27:32-44; Mak 15:21-32; Yoane 19:17-27

²⁶ Ana la aþere Yesu pavini, amiyal apa e lele na suaren naga e laktorovia. Poglis naþa apa ke narui, aþal yar tai pa yoþarua þasuþea, yar nena naga Saemon naþa nanua sumo naga nae Saerin, ana aþareran asape naga kus laktorovia kiena ne Yesu, ana amligan e purkaunena, ana taveve Yesu vavini.

²⁷ Amiyal apa ke sanene, ana poglis nene yeririna taþena mēna la mokliu naþa ataveve ke Yesu, naþa sira la moki, naþa asuþa atagililue amio pupia sineyeena. ²⁸ Ana Yesu mloge mna kiela visena na loge viowaena lala, ana kira þatau pisu la, pis pan la, sape “Sira re Yerusalem lala o, ve atagin in re si sanene. Visae sinemiun tagena popon atagin amiu ga, pona narimiu lala. ²⁹ Nepisa sanene pan amiu, komin naþa pog mārera tai pimi ke ne naþa yoko yar la ne asuwal pog nena yoko avisa sanini, avisave ‘!Visae sira la ve kala sisi re ga rui! A wo manene laa sane visae ve awar re sisi la ne amun ke yu ne, komin e pogos nene yoko mārera manene laa van ita temio narita lala.’

³⁰ “A yoko pog nene imi viowa manene laa van la vano-o asuþalu atag va tavie lala a kunus la avisave ‘Awis, aloru akoar imimi, akove moþar imimi, asinwo imimi.’ ³¹ Monar avisuar ruruia, komin nanagane na lak memaena ke ga wa ana akila ke mārera manene pan inu rui, ana siraunia va mna sanene vano-o visae lak imi mano pae, yoko akilia akila viowa manene laa sane van amiu.”

Asuar Yesu e laktorovia

³² Ana e poglis nene, apuarar ke mēna yar lua nakilaroen navisaluaena, ana aþere lalua nene amio Yesu, vena aweþar la amio naga. ³³ Ana amial mna apano-o, apa atol kana yo nene, yo tai naþa apio asape “Yo na puriu na þarin yaru.” Ana la atarar Yesu, asuar naga e laktorovia, apisirlua su lika, ana asuar yar na mlamulena viowa lua nene, apisirlua la tai se þamarua a tai se þameþi.

³⁴ Sa nene narui, Yesu telan mēke e lak torovia, ana pis pa Ntewa, pisape “Ata, awis oviewo la nene. La pe apisu kilale re sur na akila ke ne poli.”

Ana siraunia li na mara la asuñña ga, akila sur sa naña amlil ñapila, vena lualen lala ane yoko war kulmrae ñana Yesu tai, a ane war tai.

Apitalia kare Yesu ñisa

³⁵ A yeririna tañena la asuññalu asike laa perina, asuñña apisuar ke ga, ana kiela nasumonena lala apis piowa pa Yesu, apisa karea, asape “Akira avisu yar naña! Asape naga tamalia yar tañena la mok rui, ana nanagane na sanape? Asape naga pe Navisaarena kiena ne Ntewa, pona naga pe yar tanea tai naña Ntewa mligan pimi. Visae sanene, popon tamalia towe laa naga narui!”

³⁶ Ana yar na mara ñena lala apisa karea, apim akian kuruta namunena naña melkalka pania vena munia, ³⁷ asape “!Visae ko ope ñarin suñe kiena ne le Yu kemua la lelaga, sa naña apisa ke ne, popon otamalia ko nanagane!”

³⁸ A e pogos nene asiri navisakilaleena tai, asuar to meta e laktorovia to metavan ñarina ne Yesu, naña sape “Ñarin Suñe kiena ne le Yu lala.”

Lalua na kilaroen navisaluaena apis pa Yesu

³⁹ Ana e pogos nene, lalua naña atelan la asike meta e lak torovia amio Yesu apis pania. Tai pis piowa pania, sa ke tañena lala, sape “?Ko ope Navisaarena naña, po peraga? ! Popon ovitañilin otamalia ita!”

⁴⁰ Ana tañena pis pania pisaluñaria, pisape “Ñara, nanagane kieta pogos na marena narui, ana ko na pe opatanon re Ntewa poli wa. Ita telu nini, naliñereena naña akila pan ita naga taaga ga, ⁴¹ a e lepas na ita lua, mesmesun ga napiowaena naña ita lua tekila, ana e lepas na puna, naga pe kila re nena sur tai poli.”

⁴² Ana pis pa Yesu, piun tania, sape “Yesu, pogos naña oim ove ñarin suñe owasuñe ko sina, awis, ve sineña ñesan in re.”

⁴³ Ana Yesu pisatañea, sape “Nevisaar van ko, legiena ga na ñane, yoko italua tesike e kieta yo wo.”

Yesu mare

Matiu 27:45-56; Mak 15:33-41; Yoane 19:28-30

⁴⁴ Nanagane pimi tol kolpae narui, a siar e pogos nene mrae tego re si po, kila narui yemalolo kalo make ga yo nene, mon ña sanene pano-o tol mrae telu yepekilavi. ⁴⁵ Ana siraunia, kulmrae naña telan ñeke loyuña e Yuña Wa ñana Ntewa, naña kilawo yo wa naña pe yo wa pañisi, naga purña lepas lua. ⁴⁶ Ana e pogos nene, Yesu pio maro sape “Ata, neligan ninuu e lumoña.” Pio sanene narui, ana ñere maron kiena yalua marñan top.

⁴⁷ Ana pogos naña yerikawa kiena ne yar na mara lala pisu sur la nene, naga pisirlua kia kiena ne Ntewa, sape “!Lelaga nañane, yar nene naga pe yar mesmes ga naña!” ⁴⁸ A ñina la naña apim lele taaga e yo nene, la ñena apisu make sur la nene naña akila pa Yesu, pe nasineyeena pan la pañisi. Ana siraunia añasuñela sina, amial apano amio pupia naloge viowaena, apa si ñala uña lala.

⁴⁹ A ñegas nen yeririna tañena ñena lala asike e pogos nene, la asuññalu asike laa perina sane, asuñña apisu make sur lala. Naga nene erau kiena ne Yesu lala amio sira la naña amolue gar Kalele nakonua rui, ataveve ña Yesu pano-o pimi tol yo nene, ana la ñena apisu marena kiena ne Yesu.

Yosop sin Yesu

Matiu 27:57-61; Mak 15:42-47; Yoane 19:38-42

⁵⁰ Ana yar tai, naga nae pulkumali kiena ne le Yu la naña Arimatea, kiena kia Yosop. Naga pe yerikawa tai na pupia kumali kiena ne le Yu lala gar Yerusalem, pe yar mesmes tai naña kiena ñelaga po pañisi. ⁵¹ Naga tai naña sinenan manene sape popon sa nasuñenena kiena ne Ntewa imi, ana nanua pogos naña apisayu ke asape akila ya ne va Yesu, naga taaga kiena sitomena pe sa re nene poli, naga kilali naña pisaluñar la sape ve akila re viowa vania. ⁵² Ana pogos naña mloge asape Yesu mare rui, naga pa suñal se marana

ne Paelat, piun tania sape kilia kus tasnena ne Yesu. ⁵³ Ana Paelat tañan pania, ana pa kuslua tasnena ne Yesu e laktorovia, mliluar e kulmrae, kus pa mligan ruru ñe ke loyuña e puluve viu tai naña ate mare ga na wa, pe amliganli re yar tai ñene poli wa.

⁵⁴ Ana legiena na marena kiena ne Yesu nene naga e Praere, sa naña pe legiena na kila ruruen sur lala na Legiena Wa. Ana mrae pito ke narui, lavis ke Legiena Wa siar ne, naga nene e ruru nena e pogos naña mrae pito kovio. ⁵⁵ Ana sira la naña nanua ataveve Yesu siar gar Kalele pimi tol kiena laktorovia, nanagane pogos naña akus tasnena pimi, ataveve sina. Ataveve pimi tol kana yo na nasiniena, ana apisu naña amligan ñe ke e puluve.

⁵⁶ Ana apisu pae, añasuñela apa si uña vena akila ruru ponotaninu lala sa naña ñaños amio pomat. Atol yo uña, ana Legiena Wa siaria, kila narui pe pogos re si tai pan la naña ava avaia tasnena ne Yesu poli. Ana asuña ga uña sanene, sa naña navisaluaena pisape monar akila e legiena wa.

24

Puluve koren ga ñe ke na

Matiu 28:1-10; Mak 16:1-8; Yoane 20:1-10

¹ Legiena Wa ñaro pano, ana kana legiena tañena na peni, naga legiena ñesa na legiena olua. Ana kolulag kona, sira lañas nene añar ponotaninu sa naña pomat amio ñaños naña akila ruru pa rui, amiyal apa e puluve nañani vena avaia ruru tasnena ne Yesu.

² Ana pogos naña apitom atol yo, añal naña pupia kilavaru na kilawoen puluve nene, amelilivin lua rui, ³ ana apa loyuña, amilan naña tasnena ne Yesu kovio rui.

⁴ Ana asuñal ga asike narui asitom wele ña pano-o amilan naña yar lua asuñalu asike amio la. Lalua nene ñala kulmrae la miyuwowo naña miyuwowo ruru nena naapo. ⁵ Ana sira la nañani amaraun naña akira avisu lalua nene, ana akinai tanon lalua, ñarila tau pito e porotano. Ana lalua nene apis pan la, asape “E, sira lala, tañatete alual yar na malena e yo na marena. ⁶ Naga pe mon re si e nini poli, Ntewa pisirlua rui. Amiu asitomyuli sina ya naña naga pisawal pan amiu, pogos naña naga sike amio amiu nanua gar Kalele, pe apim re e nini poli wa. ⁷ Naga pisa sanini sape sa naña naga pe Narin Yeririna, yoko monar atañan naga va e limana ne li viowa lala, ana yoko asuar naga va e laktorovia, ana siraunia, e kana legiena natelu, yoko suñalu mal sina. Nane visena ke nanene narui naña naga pisawal ñesan pan amiu.”

⁸ Sira la amloge narui, kila la asitoñal si visaarena naña pisa ruru pan la pisape yoko naga kilia mal sina. ⁹ Ana asitoñal sina, amligan yo nene añasuñela, apa apisu nalologena la lualima taaga pa taaga amio lala tañena lala. Sur la naña apisu e puluve apisayu meraravan pan la, ¹⁰⁻¹¹ ana la pe amlelaga re e poli, apisu sane sira la nene asun wowe ga.

Ana sira la naña apisu suri la nene, kiela kia la sanini: Maria nae Maktala, Soana, Maria naña anenane Semes, amio si sira tañena lañasa.

Pita kiriri pa pisuveve puluve

¹² Ana Pita ga naga taaga sinenan sape visuli sur nene pe lelaga pona peraga, ana naga suñalu, kiriri pano, sinenan sape visuveve yo loyuña e puluve. Pimi tol yo nene, pulu pa loyuña, ana pisu ga kulmrae la sike na, tasnena Yesu kovio. Ana pa si vanua, mial si ñasuñe pa uña, suña sitom liluenia sape sur nene na sanape ne, pona kana kinas na ya.

Nalogenia lalua amial apa gar Emeas, apitawe Yesu

¹³ Ana siraunia, e ke ga e legiena nene, la ke ga lalua amligan Yerusalem, sinelan asape ava e narin pulkumali tai, kiena kia Emeas. Mraplepa na vaen e yo nene pe piavi manene re poli, sur sane tasme lualima. ¹⁴ Ana pogos naña lalua amial apa ke narui, lalua asuña asunyu manene laa sur la naña ñaro pa rui.

¹⁵ Asunlilue m̃a sanene apano, ana Yesu mial pimi piear la, amialpil amio apano.
¹⁶ Apisu naḡa mial ke amio la, apisu sane wolawa ga tai, komin naḡa apisu kilale ḡele naga.

¹⁷ Ana Yesu piun tan la, pisape “?Kam lua amial ke sanene asunyu liluen ke ya ne?” Ana pogos naḡa naga piun sanene, aparurula, asuḡalu asu, marala piowa ga sike narui.

¹⁸ Ana lala tai nene, kiena kia Kleoḡas, naga pisataḡe Yesu, pisape “Yar la mok liu na yo kar ga la ne, asuḡa amialiali ke Yerusalem e pogos nene, ana pona ko ga taaga manene ga pe omlogeyu li re pupia sur la ne kakate mare ga yo na wa?”

¹⁹ Ana Yesu piun pisape “?Ana ya la ne sane opisa ke ne?”

Apisataḡea, asape “Naga nene e lepas kiena ne yar nae Nasaret naḡa, Yesu. Naga pimi, pe navisawalen tai, kila kile la mok liu na kiena pupia naḡareraena, mlologo, a pian ruru yeririna la po paḡisi, kila sanene sinelan naga keviu, pano tol ḡena Ntewa na Mava pisawal sape kekarana naga paḡisi. ²⁰ Ana siraunia, nanua ga yemlagi nakoneva, pupia yar wa lala amio kieta nasumonena lala sinela karia, aḡere m̃a naga pa e pupia kumali la pano-o amlip̃erea, asape naga monar mare, ana apa asuar naga pa e laktorovia, mare rui. ²¹ Nanua sumo, kiamimi sitomena sike ga e naga, mesape naga ke narui naḡa yoko tamalia ita le Israel lala, yoko were plan ita vetan naḡareraena kiena ne le Rom lala, ana nanagane, sur la punu ga pa piowa si narui. Naga kovio petan imimi, nagane kana legiena telu narui.

²² “Ana sur si tai naḡa kila imimi memilan manene paḡisi, ana mesitomyu kaḡaran ke na wa. Nagane kolulag pogos naḡa lakaporo kokoreko yam taaga, kiamimi sira laḡas asuḡal apa si e puluve naḡa amligan tasnena ne Yesu ḡenea, apavinin asape avaiia ruru wo. ²³ Ana pogos naḡa apa aporu e yo nene, apisu naḡa tasnena pe mon re si e lelen poli, ana akirir si aḡasuḡe la apitom pun imimi, apisawalia, a pe naga re ga nene poli, ana pisawal ḡena asape apisu navisi lalua, naḡa apisawal asape Yesu mal si petan marena rui. ²⁴ Ana imimi laḡasa sinelan asape ava avisulia, ana la apito e puluve, apisu sanena naḡa sira la apisa, pe aḡa re nena ga.”

²⁵ Nanene narui visena la naḡa lalua apisa pa Yesu, e pogos naḡa asuḡal ga asike mrapa. Ana naga ḡena pis, pisa pan la, pisape “Aulai, kam punu ga kiligamiu la poḡe ga. Navisawalena la apisawal sur la nene nakonua rui, ana sanape naḡa kam na pe amlelaga re poli wa? ²⁶ Pona akilia rui naḡa yoko Ntewa visirlua kiena Navisaarena ve pupia yerkawa e yomarava nini. Ana kam na pe apisu kilale re nena ga naḡa Nasiriena Wa lala apisawal rui, asape yoko monar akila Navisaarena loge viowa e sur la ve moki, yoko akila kare naga sumo, ḡisi na Ntewa kilia visirlua naga, vena tol kiena pupia naurarena.”

²⁷ Ana Yesu sunyu ke pan la sanene, pian la pa re laa sane wa. Naga siar e tus lala kiena ne Mosis, pimi tol tus lala kiena ne navisawalena lala, suḡa pisa meraravan ruru ke pan lalua nene sanape naḡa visena marua la nene suḡa kiar ke ga naga, apisayu ke ga naga silaga.

²⁸ Ana asuḡa amialor si apano, pe piavi re poli apim lavisin pulkumali naḡa lalua apanon ke ne. Ana lalua apisu sane Yesu suḡa mlilu mrapa pa yalen silaga. ²⁹ Ana aḡareran pania vena sike ne amio la wa. Apis pania, asape “Nagane na mrae pito ke narui, lavis pintaḡa ne. Oimi osu re omio imimi sumo wa, oḡeke ga e nini.” Ana Yesu pa ḡeke amio la.

³⁰ Asuḡa ga tol pogos na kinanena, ana apim lele taaga e yo na kinanena. Ana pogos na lenwoen kinanena, Yesu ga suḡalu mlarar kala kilaparavi, mlen pa Ntewa pisa potena pania, kawe wowaiia pion pan la. ³¹ Ana pogos naḡa kila sanene, e nena ga e pogos nene sa naḡa kilamarala pike, apisu kilalea sane naga naḡa sike amio la ne Yesu ke narui. Ana apisu manene m̃a sanene, a yam plas ga kovio nena ga.

³² Ana lalua asuḡa apisayuia, asape “Suwala, tepisu kilale re poli e, ana kieta Suḡe ga naḡa. Ana lelaga, naga nena ga, komin naḡa tesun lilue ke temio mrapa naḡa naga pisayu meraravan ke visena wa pan ita, kiena visena lala sa ga kapi kekan ke sineta.”

³³ Ana pogos naþa akilia sane apisu marana ne Yesu rui, pe amomal re si poli, ana asuñal ke ga, amial e pupia lepamiema aþasuþe apa Yerusalem vena avisawal va laþasa.

Ana añalivin la lualima taaga pa taaga naþa asike e viorena wa, amio laþasa, ³⁴ ana lalua pe apis re pan la poli wa, ana la apis þesan pan lalua, asape “E, pogos naþa kamlua apa ga sane, sur tai pimi ñalivin imimi e nini. Visena nanua sira la apisa, lelaga kemua naþa, kieta Suþe suñalu molue petan marena rui, Pita ne nanene naga pisu e kilamarana.” ³⁵ Ana la ñena lua naþani asikol kiela visena, apisayu sanape naþa Yesu ñalivin la mrapa, a naþa la pe apisu kilale re poli, pano-o tol pogos naþa kawewowa ga kilaparavi pan la.

Yesu ñalivin kiena nalogena lala

Matiu 28:16-20; Mak 16:14-18; Yoane 20:19-23; Yuññaena 1:6-8

³⁶ Ana pogos naþa lalua asuñña asunyu ke sur la nene pan la wa, amilan ga naþa Yesu suñal ga sike likan la rui, pisa pan la sape “Suñmare sike amio amiu.” ³⁷ Yesu pimi pula sanene, kila la añape yermare, ana amarau paþisi.

³⁸ Ana Yesu pisu kilale naþa amaraunia, piun tan la sape “!E, vanon ya ne asitom manene laa sanene? Ve sinemiu veve lua re! ³⁹ Avisuli luñau amio lau, lelen ya na sike e la? !Apisuia, in ga nini! Aim atolili tasneu la komþasa, komin sur sane yermare naga pe puryun re poli a pe kilañiu re poli sane tasneu nini.” ⁴⁰ Ana suñña pisa ke sanene pan la, kipian limana amio lana pan la vena akilia avisuia.

⁴¹ Ana e pogos nene, nalogena lala kiela sitomena miyuñña manene sanene, naþa akekara paþisi naþa apisu si Yesu, ana asitom þele towe ke ga wa. Ana Yesu pis ke sina ga, piun tan la sape “?E, apran kapi rui?”

⁴² Ana la amlega ika tai, manoa ga na wa, ana amla kinakinas tai pa Yesu, ⁴³ ana mlavia, kan ga e marala.

Yesu pis maro pa kiena nalogena lala

⁴⁴ Ana siraunia, Yesu pis pan la, pisape “Pogos naþa nesike nemio amiu nanua sumo ne, in na nepisayu visen la moki na lepas make ga na Siriena Wa pan amiu. In na neþar visena la e tus lala kiena ne Mosis, e tus lala kiena ne Navisawalena lala, a e tus na Yauena Wa lala, ana nesuñña nepisa ke nesape visena ne la nanene narui, asuñña apisayu in ke ga, a nesape yoko aim ave lelaga e inu ve ve piavi re. In na nepisa sanene pan amiu, ana nagane kam na apisu sur la punu ga nene apim ape lelaga e maramiu þisi narui.”

⁴⁵ Ana Yesu pian la pa laa sane, kila kiela sitomen la pa keviu li laa sane loyuñña e kinas nen Siriena Wa la nene, ana sur la punu ga pimi merarava ruru pan la. ⁴⁶ Naga pisa pan la, sape “Nane visen la nene kala kinas ne nanini narui, sane Navisaarena, yoko akila naga loge sinelae vano-o marena, ana e kana legiena natelu, yoko suñalu mal si vetan marena. ⁴⁷ A siraunia e ga e kiena kia, yoko kiena yeririna lala asiar gar Yerusalem, a yoko amolue ava e yomarava wetelu, ava alologon va þegas nen yeririna make ga, avisawal van la avisave monar avilopu la narui, ana akilia atol naviewoena e kiela mlamulen viowa lala.

⁴⁸ “Ana kam la naþa apisu sur la punu ga nene e kilamaramiu, kam ke narui ava avisawal va yar taþena lala avisave suri la nene na lelaga. ⁴⁹ Yuññaena nene naga pe yuññaena ñarera tai naþa ñarera paþisi, ana yoko neligan nañareraena tai e amiu vena iila amiu atauluia. Nañareraena nene, navisaarena kiena ne Ata sike naþa yoko naga ligan molue ma e peni vitom kokonia amiu, ana sineun nesape nevisa van amiu, ve aur matan re pulkumali nini wa, ana monar asuñmate ñña e nini, vano-o atolia.”

Ntewa þerelua si Yesu pa ma e peni

Mak 16:19-20; Yuññaena 1:9-11

⁵⁰ Ana pogos naþa Yesu sinenan sape ligan la, sumon la apito garo e narin pulkumali naþa Petani. Apitom atol yo nene, asuñña sanene, pano-o Yesu þar plan limana metavan la, pisa ruru la. ⁵¹ Suñña pisa ruru la ñña sanene pano-o, suñña siar mligan la palilue narui, pa si metava pa nena ma e peni.

⁵² Ana nalogena lala apisu kiela Suĥe kovio sina petan la, ana akinai tano amlotunia, ana aĥasuĥe la si apa gar Yerusalem, naĥa akekara naĥa akekara. ⁵³ Ana asuĥna e nene pano-o, ana silaga e pogos na leniena make ga asuĥna apa amieluar ke Ntewa e ĥana Yuĥna Wa.

Nane Lologena Wo kiena ne Yesu Kristo naĥa in Luk nesiria, ĥisi e nene narui.

Lologena Wo Kiena Ne
Yesu Kristo Naña
YOANE
Siriyuia
Visayuena Na Tusi Nene

Komþasnen suniena plas na tusi nini

Tusi nini, “Lologena Wo Kiena Ne Yesu Kristo Naña Yoane Siriyuia”, pisayu Yesu, sape naga Visena kiena Ntewa naña pimi sike amio ita, pe yaru. Yoane sape naga siri tusi nini vena yaru la naña auloia, akilia alelaga naña Yesu, naga yaru naña Ntewa pisaaria sape yoko ligan imi vena tamalia ita, a naga narina Ntewa lelaga. Naga siri sanene vena tekilia tetol malena e kia kiena Yesu, komin naña temlelaga ea (20:31).

Suri naña Yoane pisayu þesania, sape Yesu pe Visena naña sike kemua nanua sumo, naga sike amio Ntewa. Tusi nini pisayu kile la naña Yesu kila, naña akilia aiila ita tevisu kilalea sane Yesu naga narina Ntewa naña Ntewa pisaaria sape vitetalia naga imin tamalia ita. A siraun kile la peve taaga nene naña Yesu kila, Yoane pisayu kala kinasa. Naga pisayu sanape naña yaru laþasa amlelaga e Yesu ana atavevea, a yaru laþasa yepela mavin naña alelaga ea.

E marana na keviu 13 pa tol marana na keviu 17, Yoane pisayu suri la naña pimi e Yesu kolemalo naña nasinekar la apimin vena atararia. E yemalo nene, Yesu pis ke pan kiena nalogena lala, vena akila ruru la asuñate suri la naña yoko imi tol la pogos naña akila ke kiena yuñnaena. Naga pisin ñena visena na visirplanen kiela sitomena la sumo, sumon naña kiena nasinekar la apimi atararia.

E luasinen tusi nini, Yoane pisayu naña nasinekar la apimi atarar Yesu, aþure pa kumali apis pania, a siraunia apa asuar naga e laki torovia. Naga mare, a siraunia naga mali sina, a kiena nalogena lala apisu naga.

E tusi nini Yoane pisayu malena naña ve uro re, naña yaru kilia tolia e ga e Yesu Kristo. Malena nene siari nagane, a pimi ga e yaru la naña amlelaga, asape Yesu ga naga pe mrapa, a pe purþesnen visena lelaga, a pe purþesnen maliena. A pupia suri naña tusi nini pisayuia, naga þelaga kiena Yesu pogos naña piyan ke yaru lala, pisayu suri la naña yaru la akila pona amiyuñnaenia e kiela maliena e legiena makega. Naga pis e þelaga na visena sanene, amio pakaiwa lala, vena kilaen totou naiilaen sitomiena kiena la naña amloge, a kila ñena amloge sane naga ñena pa yaru saga lala. Naga pisayu suri la ne sane wii, kilaparavi, kapi vivaga, a yaru na visuaren sipsip amio kiena sipsip lala, a kilika naña krep amio mrasa, vena vian kiena yeririna lala e leþas na kieta maliena amio naga.

Komþasnen tusi nini la na nini

Visena na sumo 1:1—18

Yoane Nakeena a nalogena þesa lala kiena Yesu 1:19-51

Yesu kila kiena yuñnaena 2:1—12:50

Legiena maro lala kiena Yesu garu Yerusalem 13:1—19:42

Yesu mali sina a kiena nalogena lala apisu naga 20:1-31

Yesu ñalivi sina pan kiena nalogena lala garu Kalele 21:1-25

Navisaarena naga to sumon nasiiena na yomarava nini

¹ Na konua konua rui, e purþesia, naga naña apio Purþes nen Þelaga kiena ne Ntewa naga sike amio Ntewa, a naga pe Ntewa. ² E pogos na siien sur punu ga, naga amio pa Ntewa rui, ³ naga miyuñnaen yuñnaena na kilaen sur punu ga. Pe sur re tai naña naga pe miyuñnaen re poli.

⁴ Malena na lelaga molue e naga, ana malena nene pimi pe sane yomerarava kiena ðegas punu ga na yeririna lala. ⁵ Naga pimi sa naða yomerarava na tegolien la naða asike e pupumalko, na yemalolo nene taðatete tauluia.

Yoane Nakeena pimi mlologon ke pisape yomerarava pimi ke rui

⁶ Siraunia, Ntewa mligan kiena yar tai pimi e yomarava nini, nane Yoane Nakeena. ⁷ Naga pimi sane yar na iilaena, vena visawalen yaru na yomerarava nene naga pimi ke ne, vena iilaen yeririna la punu ga akilia alelaga asape yaru nene naga pe yomerarava kiena ne Ntewa. ⁸ Sa naða, Yoane naga pe pe yomerarava re poli na wa, ana pe yar na visawalen ga.

⁹ Ana siraunia, yaru na yomerarava nene pimi kate e yomarava nini. Naga pe yomerarava nalelaga napo, ana pimi pe na ligan kiena yomerarava nene e malena kiena yeririna punu ga.

Yomerarava na yomarava

¹⁰ Yaru na yomerarava, naga naða sii yomarava nini, ana pogos naða pimi ea, ana yeririna na yomarava lala pe apisuluðar re si naga poli. ¹¹ Naga pimi ðes puna ne uña ñana ne kiena yeririna la, ana la na mratava puna pe sinelan re naga poli. ¹² Ana la ga þasia akekaran naga, amlelaga ea, ana e la ga nene punuia, naga tañan la vena akilia aim ave narina ne Ntewa lala. ¹³ Naga kila la apaeme sina yam luania, pe sa re naða sisi la na apaeme taveve lus na kuruta, pona nasinenanen sa yermene amio sira, pona sitomena kiena yeririna, ana apaeme sina taveve nasinenanena kiena ne Ntewa.

Purðes nen Þelaga kiena ne Ntewa pimi pe yeririna

¹⁴ Sanene na, Purðes nen Þelaga kiena ne Ntewa pimi pe yeririna lelaga, pimi sike likan ita, ana tepisu kiena malena napo, pulen manene laa þelaga na lemamena amio þelaga nalelagaena. Naga pe nowo tanea wa ñearu kiena ne Arimata, ana mepisu kiena pupia naurarena, kiena naga taaga.

¹⁵ Pogos naða Yoane Nakeena pisayu naga nanua ne, pisape “Naga naða nepisawal pae pan amiu, nesape naga yoko siraun inu, naga su metava, in na neto ga tano, komin naga mal nakonua laa sane, in na na nanagane ga ne.”

¹⁶ Naga pulen þelaga wo lala, ana silaga kila ke po pan ita paðisi, kiena pupia lemamena kila temlogelue ga po paðisi. ¹⁷ Nanua Ntewa pisirlua yermarua Mosis, þar ga kiena navisaluaena lala pimi pan kiena yeririna lala, ana Yesu Kristo, Ntewa pisirlua naga þar þelaga na lemamena amio visena na lelagaena pitomi e yomarava nini. ¹⁸ Ita yeririna lala pe yar re nena tai naða kilia Ntewa poli, pona pisu e kilamarana, ana yaru naða tolue ga e sitomena kiena ne Ntewa, lalua aparpran la ga veraga, naga ga pimi kila ita tekilia Ntewa amio kiena þelaga lala.

Yoane Nakeena mlologonyu Navisaarena

Matiu 3:1-12; Mak 1:7-8; Luk 3:15-17

¹⁹ Ana pogos naða Yoane Nakeena mlologo ña pano-o, nasumonena kiena le Yu lala nae Yerusalem la asitom veve ke paðisi sane naga miyuñae ke sanape, pona naga pe Navisaarena, po naga ai. Ana la apitetalia yaru wa þasia amio yar keviu si þasia na lus wa kiena ne Livae, apim apiun petania asape “Ko na ai?”

²⁰ Ana pogos naða lala apiunia, naga pisawal ruru ga sur punu ga pan la, pisatañe la, pisape “Peraga, in na pe nepe Navisaarena re poli.”

²¹ Ana la apisape “?Sanene na, ko na Yermarua Elaisa nanua sumo ne, ana ko omal sina, po pere? Nanene komin naða Visena Wa pisape naga monar wasuþe sina sumon Navisaarena.”

Ana naga pisatañe la sina, pisape “Peraga, pe in re nene poli.”

Ana apisape “?Pogaga, ana po ko na navisaluaena naða Mosis pisaar nanua yo rui?”

Ana pisatañe sina, pisape “Peraga rui.”

²² Ana la apiun ke sina ga tania, sape “?Ana ko na a si narui? Monar ovisa sur tai van imimi vena mekilia mevano mevisawal van la naŕa amligan imimi mepimi. Ovisawal ruru ga van imimi, sane ko na ai?”

²³ Ana kiena navisataŕeena e pogos nene sanini, pisape “Inu in na pulgo korena ga ne e yokorena nini, naŕa Navisawalena Aisea pisawal na konua rui. Ana pulgo nene pimi pe na visawalen sape: ‘Amiu akila ruru mrapa lala kiena Suŕe e kiamiu malena!’ ”

²⁴ Ana lala ŕas naŕa asike e pogos nene, le Varasi lala, ²⁵ ana la apiun ke sina ga pan Yoane, apisape “Imimi memloge pa rui, ko na opisa osape pe ope Navisaarena re poli, pe ope Elaisa re poli, a pe ope navisaluaena re naŕa Mosis pisa poli. ?A visae sanene na, vanon ya ne ko na ositom osape ko na otorokin osun okekee lue yeririna lala sanene?”

²⁶ Ana Yoane pisataŕe la, pisape “Inu, nakeena naŕa nekila ke ne e la nene, naga e ga e wii. A yaru taŕena tai yoko imi kus leleu, naŕa naga sike pa likan ita rui, ana pe akilia re naga poli wa. ²⁷ Naga to laa metavan manene inu, sane in na pe netorokin re neva lavisin po, pona neyal nemio.”

²⁸ Ana lele naŕa apa ke ea na visuen Yoane, nane e norava lavisin kumali naŕa Petania, e wii naŕa Yortan lepas na vano, nane e yo naŕa Yoane suŕa kee ke yeririna lala ea.

Yesu, narin sipsip nakuŕaŕaena kiena ne Ntewa

²⁹ Ana e legien taŕena si tai, Yesu mial pa katen Yoane Nakeena amio imimi kiena nalogena la e yo naŕa mesike ea. Ana pogos naŕa Yoane pisa Yesu, pisa pan imimi, pisape “!E, amiu avisu yar na mial ke pimi naŕa! Naga, sa ga narin sipsip kiena ne Ntewa nawarplanen nakoena na mlamulena viowa kiena ne yeririna lala na yomarava nini.

³⁰ Nanene naga naŕa nepisayu ke pan amiu nanua rui, nepisa nesape: Siraun inu, pupia yar tai naga imi naŕa sumon inu, to manene laa metavan inu sane, komin naga teke sumon inu. ³¹ Nepisa visena nene nanua, nemninue ga nesape naga ai, nemninue ga nesape erau ne nanene, ana nekilia ga nesape monar nekee ita le Israel lala e wii, vena kilaen naŕa tekilia tevisu kilale kieta yerkawa nene.”

³²⁻³³ Ana Yoane pisa meraravan pan imimi sanape naŕa naga kilia sape Yesu pe Navisaarena. Naga sape “Sa naŕa nepisa pa rui, in na pe nekilia re poli nesape naga ai, ana pe piavi re nena ga, Ntewa pis pan inu, pisa sanini, pisape: Visae ovisu kiau Ninuna Wa vitom ke tano, totano e yar tai, naga ke ga nene naŕa yoko kee yeririna lala e Ninuna naŕa kiau.

“Naga pisa sanene pan inu, ana pogos naŕa nepisu Yesu nene, nepisu Ninuna mligan ma e peni pitomi tano e naga, sa naŕa loŕe, pitomi koan e naga. ³⁴ Vanon sur ne na nene naŕa nepisua, nekilia nevisawal ruru van amiu, sane pe lelaga ga, yar nene pe narina ne Ntewa kemua lelaga.”

Nalogena lua na sumo kiena Yesu apim puna

³⁵ Ana e legiena taŕena si tai na, Yoane Nakeena suŕa ke ga wa e yo nene, sun ke amio imimi lua Antru, naŕa e pogos nene mepe kiena nalogena. ³⁶ Ana mepisu Yesu mial pimi ŕaro lavis pu imimi. Ana Yoane pisa pan imimi lua, pisape “!Amiu lua avisu ke yar nene, naga sane narin sipsip na kuŕaŕaena kiena ne Ntewa!”

³⁷ Memloge Yoane pisa sanene, ana veraga ga mesuŕalu, memial mepa mesiraun Yesu.

³⁸ Ana Yesu kira ŕatau pisa imimi lua, pisape “Nepisu sane amiu lua sinemiun ke sur tai.”

Ana mepisataŕe, mepio naga sane kiamimi navianena tai, mesape “?Rapae, opimi e nini na, ko na omomon ke pe?”

³⁹ Ana naga sape “Pogaga, aimi teva avisua.” Ana memial mepa metol e naŕa Yesu sike ea e pogos nene, ana siar sane ko yepekilavi ko e maran mrae vari, mesun ŕna memio naga pano-o yemalolo.

⁴⁰ Ana Antru nene naŕa imimi lua memloge Yoane sunyu Yesu, mesuŕalu metaveve sanene, naga Antru naŕa wenla Saemon Pita navetokak. ⁴¹ Ana pog naŕa pisa sape taveve ga Yesu narui, ana miroro panon ŕesa wenla nene, a pogos naŕa ŕalia pis pania pisayu Navisaarena, naŕa e visena na Epru kiena ne le Yu la apio asape Mesaea, a e visena na

Kris kiena ne le Krik la asape Kristo. Ana pisawal sanene, sape “M̃ara, Navisaarena nene, imimi meñal rui.” ⁴² Naga pisa pan wenla nañane, ana pure pimi pu Yesu.

Ana pogos naña Yesu pisu naga, pisape “?A, ko m̃ena nene naña narina ne yermarua Yoane tai? Nenagane na nesikia ko sina ga, kioñma ki Keñas.” Ki m̃ena nene kome visena nae Epru, naña kana kinasia kilavaru, naña kome visena nae Kris asape Pita.

Yesu pure nalogena lua sina apim atavevea

⁴³ Ana e legiena tañena si tai, Yesu sinenan pisape taveve si kiena mrapa, pisape kusro yo vato si kiena yo naña Kalele. Mepa sanene, ñisi na m̃al si yar tai, pisa pania pisape “Ko oim otaveve inu.” Yar nene, kiena ki Pilip, ⁴⁴ naña naga m̃ena nae yo kiena Antru amio Pita, nanene pulkumali na Petsaeta.

⁴⁵ Ana pe piavi re poli na Pilip pa kale kiena erau tai, kiena ki Nataniel, pa pisa pania, pisape “Yar keviu naña yermarua Mosis amio navisaluaena lala asiriyuia, apisawal na konua rui, naga pimi m̃alivi likan ita rui. Imimi meñal rui, naga nae Nasaret, narina ne yermarua tai kiena kia Yosop. Ana yar nene, kiena ki Yesu.”

⁴⁶ Ana pogos naña Nataniel mloge asape Yesu naga nae ga narin pulkumali nañani, naga piunia pisape “Ana sanape? Pupia yar keviu napo tanea sanene tañatete m̃alivi e narin yo nene Nasaret!”

Ana Pilip pisatañea, pisape “Ei, ve ovis re sanene, ko na oim ovisuli kone wa.”

⁴⁷ Ana ñisi na lalua apa sina puna ne Yesu, a pogos naña lalua amial apim lavis puna, Yesu pisu Nataniel, pisayu naga, pisape “Lelaga ga, nepisu yar nene sa ne yar wo lelaga tai nae Israel, yar tai naña navisokanena pe to re nena e naga poli.”

⁴⁸ Ana Nataniel mloge Yesu pisayu naga sanene, piun tania sape “?Ana sanape na ko na okilia osape in na yar na sanene?”

Yesu pisatañea pisape “Pogos naña Pilip naga pe piñasun ko re poli wa, pogos naña ko ga taaga opa ruru ko ke vatanon purpiliva, in na nekirawal ko pa rui.”

⁴⁹ Ana Nataniel milan nakiliaena kiena Yesu nene, pisape “!Navianena, ko na narina ne Ntewa kemua na lelaga! Ko na ope ñarin suñe lelaga kemua nae Israel.”

⁵⁰ Ana Yesu pisa pania, pisape “!In na nepisa ga narin visena tai van ko, naña nepisu ko e purpiliva nene, ana veraga ga kila ko na omlelaga m̃arera e inu! Nanene na po pañisi, ana nevisaar van ko sane yoko ovisu sur na ilanena la ve moki vañisi ne, naña ve keviu laa sane taulu naña opisu pa rui. ⁵¹ Lelaga nepisa ruru ga, sane yoko amiu punu ga avisu ma e peni naga vike ga m̃eke na, amio navisi nae ma metava lala avitom ke tano e inu, ava sina metava, avitom tano, ava si metava ve sanene. Sur ne la nanene akilia avisuia komin naña inu nepe Narina ne Yeririna, sane in na nae ma e peni nepimi nepe yeririna ruru nena naapo.”

2

Kile na sumo kiena ne Yesu, e talopaena gar Kana

¹ Ana Yesu lala apimi atol pa norava nae Kalele, ana e legiena na telu, ñañagena na talopaena tai e kumali nene Kana. Ana anenane Yesu naga pa kate pa e ñañagena nene rui, ² a siraunia amligan visena pimin Yesu amio kiena nalogena lala, apio la m̃ena ga vena ava ea. ³ Ana Yesu lala apa akate e ñañagena, asuñma amio yeririna la pano-o, sur tai naga piowa, kuruta na munena na ñañagena nene naga ñisi iroro ga. Ana anenane Yesu pimi pisa pa Yesu, pisape “Namunena la naña yar keviu na ñañagena kila ruruia, amun make rui, ana nanagane na aplasan narui.”

⁴ Ana Yesu pisatañea, pis pania, pisape “?Sira marua, yuñmaena ya ne e ñañagena nene teke e inu? Ve oligan re te luñau, vanon kiau pog na yuñmaenen sur la ne sanene, naga pere ke ga wa.”

⁵ Anena mlogear sur la naña Yesu pisa, ana pis pa yar la naña na yuñmaenen ñañagena, pisape “Sur ya la naña sa naga visa, amiu akila ga, ve avis re, ayuñmaen ga.”

⁶ Ana p̄isi na Yesu p̄isu pupia p̄ias nen wii la p̄asia su m̄a ga lavis, na p̄a le Yu la asu m̄a apio ke wii pa ea, akevan ke kiela sur la ea sa na p̄a kiela lotuena p̄isa ke. Pupia p̄ias nen wii la nene ate e kilavaru torokin waren lita ponotia ve taaga [100], punu ga tol orai. ⁷ Ana naga p̄isa pan la, pisape “Amiu ava avio wii, awar imi ataron vito e p̄ias nen wii la nene vano-o uleule.” La apio m̄a wii pano-o apuleule ruru nenaga.

⁸ Ana Yesu pisape “Pogaga, nagane na avioli ve tekaki ga, ala van yar keviu na p̄a p̄agena munlia.” P̄isi na apio, amla pano-o akian pania.

⁹ Ana yerkawa munlia, mloge sane pimi pe kuruta na munena narui, ana milan pa p̄isi, mninue ga sape a m̄al namunena nene pe. Lala na p̄a apio, la ga akilia ke, ana pe apisawal re poli, p̄isi na naga pio yar na p̄a talopa ga na wa pimi puna. ¹⁰ Yar nene naga pimi ana yerkawa pis pania, pisape “E p̄a p̄agena ta p̄ena lala, apio ke kuruta namunena na p̄a po pimi p̄esa, ana pogos na p̄a yar la amun lili m̄a pano-o, atol mare ga kuruta na munena na p̄a pe po manene re poli naga pimi maro. Ana e p̄a p̄agena nini, la amun m̄a pano-o, p̄isi na ko otol ga m̄au kuruta napo tai na p̄a pimi maro. Komin ya ne okila sanene?”

¹¹ Ana sur na p̄a Yesu kila e pulkumali nae Kana e yo na p̄a Kalele, naga sane pe pupia kile tai, naga pe kiena kile p̄esia na p̄a miyu m̄a ena. Naga kila, sa na p̄a naga sape siar na kila meraravanen kiena puriukawa ena nae yo metava, ana pogos na p̄a kiena nalogena la apisuia, kiela nalelaga ena e naga pa laa metava, sane naga pe Navisaarena kemua lelaga. ¹² P̄isi narui na la punu ga nene apato si garo Kapeneam, nane Yesu amio anena, wenla lala amio kiena nalogena lala, apam atol si yo nene asu li m̄a sane pano-o tol legiena la p̄asia.

Yesu m̄ene plan lala na p̄a a p̄ilwilin ke sur lala loyu m̄a e Yu m̄a Wa m̄ana ne Ntewa

Matiu 21:12-13; Mak 11:15-18; Luk 19:45-46

¹³ Ana pogos tai, lavis ke pog na p̄a le Yu la akila kiela pupia p̄a p̄agena tai, na p̄a P̄a p̄agena na Sito m̄alen Natamalia ena. Ana kiela p̄elaga marua tai, sane e kas punu ga lala punu ga monar akilali na p̄a ava ma metava Yerusalem e kana pog ne naapo vena kila en p̄a p̄agena nene, vena sito m̄alen kala apua la na p̄a amolue gar Isip, ana e pogos nene Yesu m̄ena ga pavin. ¹⁴ Naga pa tol yo, ana pa kate e Yu m̄a Wa M̄ana ne Ntewa, p̄isu lala moki na p̄a asike a p̄ilwilin ke puluk la, sipsip lala amio manu la, p̄isu m̄ena la na p̄a nakepuen kilavaru ta p̄ena lala va e kilavaru nena naapo na Yu m̄a Wa m̄ana Ntewa. Yu m̄a ena la nene ape yu m̄a ena wo tai, komin ape yu m̄a ena na wilwilinen sur lala na p̄a yeririna la monar aulia vena kila en ku p̄a p̄a ena ea, a pe sur viowa tai, la akila kare laa yar lala, ana metavana, akila ke loyu m̄a e kove na yo wa.

¹⁵ Ana Yesu p̄isu na p̄a akila kare yo wa na yu m̄a sanene, p̄isi na sinena mimi, p̄ar kilika lala, p̄uarar luas lua sane, panon la. Naga pa sanene, pa m̄ene plan la amio kiela sipsip lala amio puluk lala apa vanua petan Yu m̄a Wa m̄ana ne Ntewa, ana e lepas kiena ne la na p̄a akepu ke kilavaru, pa taron plan kiela karo na kilavaru, kawē plan m̄ena kiela varvara lala. ¹⁶ Ana yar la na p̄a a p̄ilwilin ke manu lala, naga pis pan la pisape “!E, awar plan kiamiu sur la vetan yo nene! !Amiu ve akila re yu m̄a m̄ana ne kiau ata nene imi ve yu m̄a na tauluen kiamiu kilavaru sanene!”

¹⁷ Ana pogos na p̄a nalogena la apisu na p̄a Yesu m̄ene plan la sanene, kila lala asito m̄al si nasiriena wa tai, sa na p̄a pisayu pa Navisaarena sumo rui, na p̄a p̄isa sape “Kiau sitomena urmi pa p̄isi e yu m̄a wa kio m̄a, naga sa na p̄a kapi naga kekan ke loyu m̄a e sineu.”

Yauena 69:9

¹⁸ Ana vanon suri nene, yerkawa kiena le Yu lala, la m̄ena apisu ke sur la na p̄a Yesu miyu m̄a ena, ana apiun tania, asape “Suria ne ko na omiyu m̄a en ga ne, sur keviu tanea. ?Ana ko nene okilia okila kile ya ne e maramimi, vena kila imimi mevisu kilia sane mesmesu ga na p̄a okila sanene?”

¹⁹ Ana Yesu pisata m̄e pan la, pisape “Pogaga, kiau kile naga sanini: Amiu awe plan Yu m̄a Wa nene, ana siraunia, e legiena ve telu ga, yoko nevisirlua sina ga.”

²⁰ Ana asape “Lala naþa amiyuñmaen yuñna nene, amiyuñmaen pano-o tol kas lualima yam vari pa orai, ana sanape ne ko na opisa sanene, osape okilia ovisirlua si naga e legiena ve telu ga? !Taþatete ga ve sanene þa!” ²¹ Lala apis sanene, vanon la pe akilia ruru re sur naþa Yesu pisa ke e pogos nene poli. La pe apisu kilia re asape pog naþa Yesu pisa ke Yuñna ñmana ne Ntewa nene, pisa ke ga tasnena ne. ²² Ana siraun laa sane, pogos naþa naga mal sina ga taulu marena, kiena nalogena lala asitoñmal naþa naga pisa visena la nene pan la, þisi na kila amlelaga manene laa e nasiriena wa lala amio visena kiena ne Yesu lala pan la.

²³ Ana Yesu la asuñna e þaþagena nene garo Yerusalem pano-o, naga kila ke kile la moki, ana pogos naþa yeririna la apisuia, lala moki amlelaga e naga asape naga pe Navisaarena. ²⁴ Ana Yesu pe tañan manene re naga pan la poli, pe þasine manene la re poli, vanon naga kilia ruru la pa rui. ²⁵ Yar taþena taþatete visa sur tai va Yesu e lepas na þelaga kiena ne yeririna lala, vanon naga kilia ruru make ga, kilia ruru sur punu ga naþa sike e sitomena kiena yeririna lala.

3

Nikotimas pimi pisu Yesu

¹⁻² Ana pogos taþena tai na, kolemallo, nasumonena tai kiena ne le Yu lala pimi sape visu Yesu. Yar nene naga Varasi tai, kiena kia Nikotimas. Þisi na naga pimi, pisa pa Yesu pisape “Navianena, imimi mepisusu ko ke, naþa mepisuluþar sane ko, ko navianena tai naþa okom puna Ntewa opim, vanon pe yar re tai naþa kilia kila kile la ne sa naþa ko na okila ke ne poli, sa Ntewa ve to re amio naga.”

³ Ana Yesu pisatañne pania, pisape “Ee, kile la nene apogaga, ana in na monar nevisatañne ve lelaga van ko, sane yar naþa ve vaeme re sina ga imi ve urviu, yoko taþatete Ntewa ve suþe e kiena malena.”

⁴ Ana Nikotimas sinena pulan visena nene, pisa pisape “!Aulai! ?Ana yar naþa pe yermarua pa rui na kilia vaeme si ve sanape? In na pe nesitom re nesape naga kilia va sina ga loyuñna e ñmeþena ne anena poli, vena vaeme sina.”

⁵ Ana Yesu pisatañnea sape “Nepisa pe lelaga pan ko, sane yar monar vaeme e wii, a monar vaeme e ninuna. Visae peraga, naga taþatete va loyuñna e navesuþenena kiena ne Ntewa. ⁶ Yar kilia war sina ga yaru, ana Ninuna kiena ne Ntewa kilia war sina ga ninuna vii e malena kiena yeririna. ⁷ Nanene na vaemeena nalua naþa nepisa ke pan ko. Ve sanene, ko na ve sineña ulan re si naþa nepisa pan ko nesape ko na monar ovaeme sina.

⁸ “Ositom veve li lagi. Lagi na miyui ke ne, naga pa ke ga e yo naþa sape va ea, pona temloge ga miyui ana temninue ga tesape miyui pimi ke sanape, pona pa ke pe. Ana mrapa naþa Ninuna miyuñnae e malena kiena ne yeririna lala naga sa nene, naga sa naþa lagi.”

⁹ Ana Nikotimas sitom manene e visen la nene, piunia sape “Aulai, ana sur nene naga sanape þa!”

¹⁰ Ana Yesu pisatañne pania, pisape “Ko na ope pupia navianena tai kiena ne le Israel la rui, ana nepisu sane sur la ne nepisa meraravan ke pan ko ne, ko na pe okilia re nenaga na! ¹¹ Oyagogo ruruia! Sa naþa navisawalena la amiyuñmaen pa nanua rui, in na nepisa ke ga sur ya naþa nekilia amio suri ya naþa nepisuia, ana sa naþa silaga, amiu yeririna nae Israel lala yepemiu mavin kiamimi visena lala. ¹² In na nepisayu pa sur na yomarava nini pan amiu rui, ana yepemiu mavin lelagaen ea, ana visae nevisayu si sur nae ma metava lala, yoko akilia alelaga e ve sanape? In na nepisu sane peraga yo. ¹³ Ana inu Narina ne Yeririna nekilia nevian amiun sur la nae metava, vanon pe yar re si tai poli naþa pisu yo nene, ana in ga Narin Yeririna nepetan ma e nene nepitom tano rui, siraunia yoko nowasuþe neva si metava ea.

¹⁴ “Nanua sumo sumo, yermarua Mosis la asike e yo korena, loñara la akar moñar ke yeririna lala, ana pisirlua laki tai, miyuñmaen totouena na loñara a mligan mono metava ea, ana yar la naþa loñara kar la, visae akira ga va avisu loñara naþa ñmeke metava, Ntewa

tamalia la. Ana e ga e mrapa ña nena nene, yoko monar aligan inu ñena Narin Yeririna nomon metava e laki tai. ¹⁵ Ana yar naña visae lelaga e inu, yoko tol malena viu naña ve uro re pogos tai.”

¹⁶ Yesu pisa sanene komin Ntewa sinen si yeririna na yomarava la nini keviu pañisi, ana tañan narina nowo nene, naña naga taaga ga pe kiena, pitomi mare wo ita, ana yar ai naña lelaga e naga tañatete kovio, yoko tol malena wo naña ve uro re pogos tai. ¹⁷ ? Ana vanon ya ne Ntewa mligan narina nene pitomi tanon yomarava nini? Pe mligan re pitomi vena naliñereen yeririna na yomarava nini poli, ana mligan pitomi vena tañan kiena malena vena tamalia itaena.

¹⁸ “Yar naña mlelaga kemua e narina nene, yoko Ntewa tañatete liñere naga, ana yar naña pe mlelaga re poli, nakoena teke pa e naga rui, vanon pe mlelaga re e narina ne Ntewa poli. ¹⁹ ?Ana naliñereena nene naña Ntewa monar kila, purñesia naga ya? Nanene vanon mligan kiena yomerarava pitom e yomarava nini, ana yeririna la akila piowa ga pano-o, pe akekarana re naga poli, sinelan ga ñelaga viowa la na yemalolo. ²⁰ A lala punu ga naña akila ke piowa sanene, sa naña pe sinelan re nena yomerarava nene poli, pe sinelan re aim lavisin poli, amaraun asape sa kilalae kiela naviowaena la nene vim kakate e yometava, ñisi na yar la akilia avisu kilalea. ²¹ Ana yar la naña amiyuñae e ñelaga naña na po a memes, pe amaraun re yaru na yomerarava nene poli, apim lavisinia. Lala akekarania, komin yomerarava nini naga kila meraravana sane sur la naña akila, pe yuñaeena nalogearena ga na sinenanena kiena ne Ntewa.”

Yoane Nakeena kekara vanon Yesu siar kiena yuñaeena

²² Ana siraun sur la nene, Yesu pure kiena nalogena lala amligan Yerusalem apa e norava nae Yutea. Apa sanene, asun akee ke yaru lala. ²³ Ana e ña nena e pogos nene, Yoane Nakeena ñena suña e lele tañena tai kiena ki Aenon, lavisin yo naña Salim. Naga pimi e nene vanon wii tai ñeke ea, ñisi na yeririna la naña apim puna, naga kee la e wii nene. ²⁴ Nanene e pogos naña pe atarar re naga amligan pa e yuñae na koena poli wa.

²⁵ Ana e pogos nene nalogena kiena ne Yoane lala akila visena tai amio le Yu tañena tai e lepas nakevanen sur lala sa naña kiela lotuena pisa ke, ana e lepas ñena nakeena lala naña Yoane amio Yesu lalua akila. ²⁶ Apisayu ña pano-o ñisi na apim apisu Yoane, apiun petania, asape “Navianena, mesape meviun tan ko sanape e lepas naña nanua sumo, pogos naña tesike e wii naña Yortan lepas navano, ana yaru naña Yesu pimi pisu ko, ana ko na opisa plan sur moki kom puna. A nanagane na naga ñena kee ke yeririna lala, ana la punu ga asuñae amliligan ita apa ke ga puna, la moki na moki.”

²⁷ Ana pogos naña apisa sanene pan Yoane, naga pe pielue re poli, pe mloge piowagan re poli, kekaran ga, pisape “Ita yeririna la punu ga monar teyuñae ga suri ya naña sa Ntewa ligan te limata. ²⁸ Sa naña amiu akilia ruru pa rui, in na nepisawal lue ga, sane kiau yuñaeena, in na pe Navisaarena re poli, in na nesumon ga naga nepimi, ve na visawalen sape naga pimi pa rui. ²⁹ A nenagane na, sane amiu na apisawal ga pan inu na wa, naga pimi kila ke pa kiena yuñaeena rui, ana suri nene nekekarania, nepisu po pañisi.

“Naga sane pog na talopaena, naña sanini. Visae yar naña talopa, kiena erau tai, naga iila keviu nakilaruruen sur punu ga na ñañagena, ana siraunia, e kana legiena nena, pogos naña aure sira imi, sira nene tañatete va totano amio yaru nene, va su ga amio wona. Ana yaru nene pe mloge re piowa poli, kiena kekarena maran taaga ga sane naga naña talopa. Ana nanagane, in ñena nekekara sanene, naña kiau nalogena la asuñae ataveve Yesu. ³⁰ Nanene komin Suñe Navisaarena naga monar imi ve keviu lue ga sanene, in na monar neim neve tokak lue ga.”

?Navisaarena imi yuñae ve sanape e yomarava?

³¹ Ana Yoane Nakeena pisayu Navisaarena, sape “Naga nae yo na mava, naga su metavan sur punu ga. Ita tomolue ga tano e yo nini, ana tekilia tevisu ga sur na tano lala. Ana sa naña nepisa, naga petan ma e peni pitomi tano, to metavan yeririna punu

ga,³² a naga pitomi pisawal ke sur la naña nanua susumo pisu ma metava, a sur la naña mloge. Naga pisawal sur wo la nene, ana yeririna la pe sinelan re kiena visena la nene poli, pe amlelaga re e poli.³³ La moki pe amlelaga re poli, ana ita naña temlelaga, kieta nalelagaena kila sane Ntewa, naga kiena visena lala pe lelaga a mesmes ruru po.³⁴ Kiena visena la nene, mligan Navisaarena pitomi pisawal pan ita rui, ana tekilia tesape visena la nene pe visena lelaga. Nanene komin pogos naña Navisaarena pitomi, tepisu sane naga pis e puriu kawaena na Ninuna Wa kiena ne Ntewa, vanon Ntewa mla kiena Ninuna pan naga pe komsus re poli, punu nenaga.³⁵ Ntewa Arimana kekaran narina nene keviu pañisi, ana mligan sur punu ga e limana.

³⁶ “Ve sanene na, ita naña temlelaga e naga, tetol malena rui naña pe nalue ga. Ana yar naña pe mlogear re poli, yoko tařatete visu malena na sanene pogos tai, ana sinekar kiena ne Ntewa ve keviu vania.”

4

Yesu pisape wasuře si Kalele kom lepas na Samaria

¹⁻² Ana e pogos nene, visena tai telivi mña ga, apisa ke asape Yesu suña pure ke si nalogena tařena la moki apim puna, suña kee la. Ana sa naña pe Yesu re kila ke nakeena e la poli, ana imimi nalogena ga la mekila, ana la apisu sane yeririna kiena ne Yesu la apim ape moki taulu kiena Yoane Nakeena.

Ñisi na la apisasa lelein ke visena nene pa e yo la sanene, pano tol Varasi la, ana pogos naña Yesu mloge sape la mña akilia, ana kila amloge piowa kominia,³ naga pisu sane popon vetan Yutea, vato si tano garo Kalele. Ñisi na naga mligan yo, pato sanene,⁴ ana e kiena mrapa Ntewa pisaar sape monar vato war ro e norava nae Samaria.

⁵⁻⁶ Ana memial mña mepano, mepimi mořarpoyo e kumali tai, kiena ki Saeka. Ana lavisin kumali nene, pupia pulus nen wii tai moña ga, naña siar nakonua konua rui, pimi tol nagane, apio asape wii kiena ne Sekop. Porotano nene, nanua susumo pe kiena ne yermarua Sekop, ana siraunia naga tařan pa narina naña Yosop.

Ana memio Yesu memial mepim metol wii nene, mrae su va ruru nena, Yesu mloge yepena mimi vanon kiamimi pupia yalena e mrae mñarera, ñisi na pa totano e yepas nen wii nene.

Yesu pitawe sira nae Samaria tai

⁷⁻⁸ Mesuña e wii nene pano-o, ñisi na imimi nalogena la mesuñalu mepa e kumali pe na ulen kamimi kinanena, ana Yesu naga taaga pa ruru toña ga. Ñisi na sira tai nae Samaria mial pimi sape vio wii. Naga pimi ana Yesu piun tania pisape “?Awis, okilia ovio re mña wii tai?”

⁹ Ana sira nene, pe kilia re Yesu poli, ana pisu kilia ga sane le Yu tai, ana milan pañisi naña naga pis ruru po pan sanene, vanon e pogos nene, le Yu la amio le Samaria la pe apivis vitawa re poli. Ana piun tan Yesu, pisape “?Vanon ya ne ko na ope le Yu, opis panu, sira nae Samaria, opiun wii tan inu?”

¹⁰ Ana Yesu pisatañea, pisape “!Sira, visae ko na okilia ga nalaena nowo naña Ntewa sinena pisape la van ko! !Visae ko na okilia ga sape in na ai, naña nepiun wii tan ko! Visae ve sa ga nene, pona ve in re naña neviun wii tan ko, ana ko na naña oviun wii tan inu. Ana pogos naña visae oviun wii tan inu, nekilia nela wii naña pe wii na laena malena van ko.”

¹¹ Ana pogos naña sira mloge sur nene, piun petan Yesu, pisape “Yar keviu, pe kioña sur re tai naña na vioen wii e poli, ana pulus nen wii nene naga pato tano pañisi. Ve sanene, wii na malena naña opisa, yoko otol ve sanape, po yoko ovio lepas nape? ¹² Ana opisa ke wii tařena nene na, nane mñeke nini naga pe wii tanea tai. Kieta yermarua na susumo naña Sekop, naga mña wii nanini. Naga mun ke ea, amio narina lala, kiena sur mal lala, amligan lelein pimi tol ñane. Ko na omape ko opo taulu yermarua Sekop nene ana okilia ola wii tai naña wo taulu nanini?”

¹³ Ana Yesu pisatañnea pisape “Lelaga, wii nene naga po, ana pogos naña tomun pae na, ve piavi re na moto kar ita sina. ¹⁴ Ana yar naña visae mun wii naña nela vania, ñisi na naga tañatete si moto karia. Yoko wii naña naga munia, imi ve sa purñes nen wii si tai loyuña e kiena malena, ve wii na malena naña ve uro re pogos tai, suña lalau lue ga vetania, tañatete mema pogos tai.”

¹⁵ Ana sira nene pe kilia ruru re visena kiena ne Yesu nene poli wa, pisape “Yar keviu, visae sanene, popon ola re narin wii tai nene van inu, vena nemunia, ana ve moto kar inu re sina, ve netom re si e nini nevio wii.”

¹⁶ Ana Yesu sinenan sape sira nene kilia sape naga ai, ana pisa pania, pisape “Nevisa sur tai van ko sumo wa: ovato sina, oto ovio oña oure naga amiu lua avam si e nini.”

¹⁷ Ñisi na sira naña pisape “Ee, pe wou re tai poli.”

Ana Yesu pisa pania, pisape “Lelaga, ko na opisa ke mesmes ne, ko na pe oña re tai poli. ¹⁸ Nanene vanon yar la naña ko na oñere la nanua sumo rui, la punu ga tol lima, ana nagane na osike sina amio tai, ana pe otalopa re amio poli. Sane kioña visena pe lelaga ga, ko na pe oña re tai poli.”

¹⁹ Ana sira nene sinena pula pañisi naña sane Yesu kilia ruru kiena malena sanene, pisape “Lelaga ga, yar keviu. Nenagane na nekilia narui, ko ko na navisawalena tai.

²⁰ Naga po pañisi ne, ana pona ko na navisawalena ga kiena ne le Yu la yo. Imimi le Samaria lala, kiamimi yo wa nane pupia tavie nane ma ne Kerasim, naña repimimi la nasusumo amlotun Ntewa e konua rui, pimi tol nagane. Ana amiu le Yu lala, añareran ke asape pupia kumali wa kiamiu naña Yerusalem, naga taaga ga pe lele mesmes na kilaen lotena van Ntewa. Sanene, a si na mesmesu narui, amiu pona imimi? Ovisali nene!”

²¹⁻²² Ana Yesu kekaran nakilaruruen sitomena kiena ne sira nene e ñelaga mesmes na lotunen Ntewa, naga pisa pania, pisape “Lelaga vineu, opisa pe lelaga ne, lotena kieta italua pe maran taaga re poli. A nanene pe vanon re lele na kilaen lotena la lua, naga vanon sur na sanini. Amiu na yo nini, akila ke lotena, a pe akilia ruru re naga naña amlotun ke poli, a imimi le Yu la, Ntewa kilaar pisape yaru na tamaliaen yeririna lala naga molue e kiamimi lusia, ñisi na mekilia ruru Ntewa kamimi naña memlotun ke naga.

“Ana nekilia nevisa van ko sane yoko tañatete ve sanene. Monar olelaga e inu, naña nepisa ke pan ko nagane, sane pogos tai ne pimi ke ne yoko nalotena viu tai siaria, naña ve kieta ita punu ga. Le Yu amio le Samaria, ve tesitoñal re si sape yo mesmes na lotunena Ntewa ea nane ma tavie ne, po kumali naña Yerusalem, po yo tañena si tai. ²³ A pupia sur ga naña tesitoñalia, visae telotun Ntewa, na monar tetañan Ninuna Wa yuñae e ninuta, a monar telotun lelaga, torokin naña kiena visena lelaga pisa.

“Ana nanagane na Ntewa arimata kale ke yeririna la naña akilia alotun naga e ñelaga mesmesu na sanene. Ñisi na e pogos ne pimi ke na wa, po naña pimi pa rui, yoko kiena ñegas na lelaga na kiena lotena, alotun naga ve sanene. ²⁴ Ntewa naga pe ninuna, ana yar naña sape lotunia, monar lotun e ninuna, a suri nene monar ve lelaga e kiena malena.”

²⁵ Ñisi na sira nene, naga mlelaga ke sape yoko Navisaarena imi, naga naña visena nae Kris pisape Kristo, naga pisa pa Yesu pisape “Sur la naña ko na opisa ke ne, pona pe lelaga yo, ana nemlelaga nesape Navisaarena naña yoko imi, naga ke narui yoko visawal sur punu ga ve lelaga van imimi.”

²⁶ Ana Yesu pisa ga narin visena nene pania, pisape “Nane ko na opisa ke ne, in ga nini, nane nesun ke nemio ko nagane.”

²⁷ Naga pisawal pa naga pan sira nene sanene, ana nalogena la añasuñe la sina apa atol yo nañane. Apam na, apisu Yesu sun ke amio sira naña ne, sane lalua ga, ana la sinela pulania. Sinela pula na aparurula ga, pe lala yar tai piun re petan sira nañane pisape sinenan ya, po piun tan Yesu pisape lalua asunyu ke ya. ²⁸ Ana sira naña suñalu, mligan ñana piawi na wii ñeke na, mial si pa uña e kiela kumali. Pogos naña pa tol uña pisawal pan yeririna lala, pisape ²⁹ “Wolawa le Yu tai sike tano garo puluwii, sun amio inu, kilia make sur punu ga e kiau malena. Nepisu sane Navisaarena kemua, po peraga? Amiu aimi, teto tevisulia.” ³⁰ Ana lala asuñalu apito tano asape avisu Yesu.

Ĥakaiwa na kinanena naĝa marua sike lokove

³¹ Ana pogos naĝa lala amiyal ke apimi, akate re poli wa, nalogena la aĝar plan kala kinanena naĝa apato apulia, apisa pan Yesu, asape “Navianena, oim okinana.”

³² Ana Yesu pimi re poli, ana apio sina ga pano-o ĥisi na Yesu pisape “Amiu akinana, in na kau kinanena taĝena tai teke na naĝa amiu pe akilia re poli.”

³³ Nalogena la amloge sanene na, la apisasa ke pan la, asape “?Ane kus kana kinanena nene pimi pania? !Pe tepisu re nena yar tai poli!”

³⁴ Ana Yesu pisa pan la, pisape “Peraga, kinanena naĝa nepisa ke ne naga pe taĝena. Kau kinanena, naga yuĝaena na logearen nasinenanena kiena ne naga naĝa mligan inu nepitom tano, monar neyuĝaen punu ga vano-o ĥisi. ³⁵ Pogos naĝa temapila lokove, ita tepisayu lue ga tesape ‘Kupario vari sike ga wa, kinanena marua,’ ana nagane e lokove kana Ntewa yaru la asu ruru ke asape aloge kiena visena rui, la na asa ga kinanen la mamarua rui. Ana sineun nesape amiu avike li kilamaramiu lala, akirava ruru lia e yo lala, ana yoko akilia akirawal kinanena la mamarua ruru po rui, nagane pe pog na va waren imi. ³⁶⁻³⁷ Ana la naĝa ava awaria, yoko akekara vaĥisi vanon kiela narin nalaen tai naga teke pa rui, ana pogos naĝa awar kinanena la nene imi uĝa na malena naĝa ve uro re, yar keviu naĝa mapila, yoko naga ĝena kekara vaĥisi. Naga sa ga visena naĝa asape ‘Yar taĝena mapila, taĝena pa ĥaria, ana pupia kekarena pan yeririna punu ga!’ ³⁸ Sanene, in na nemligan amiu vena ava aure yeririna lala naĝa li taĝena ga la akila pupia yuĝaena pan la rui, ana nanagane na amiu punu ga ayakol amiu veraga e na logewoena e yuĝaena nene.”

Le Samaria la moki amlelaga

³⁹ Ana pogos naĝa le Samaria la e kumali nene amloge naĝa sira nene pisape Yesu kilia make sur la punu ga e kiena malena, sinela pula paĥisi, kila lala moki amlelaga e Yesu.

⁴⁰ Ana pogos naĝa apim asape avisuia, la asun ĝa amio naga pano-o, ĥisi na apiun tania asape visae mekilia meva uĝa amio la. Ĥisi na mepa mesuĝa amio la pano-o tol legiena lua, ⁴¹ ana la moki sina amlelaga e naga vanon kiena visena wo lala. ⁴² Apisa ĝena pa sira nene, asape “Nanua sumo, memloge sur la naĝa opisa, memninue ga, a nanagane, memloge ruru nena kiena visena lala, mekilia sane pe lelaga ga narui, kieta yar keviu nene, naga pe Natamaliaena na yomarava.”

Kile nalua kiena ne Yesu ma Kalele, tamalia narina ne suĝe keviu tai

⁴³ Ana legiena lua nene ĥaro pano, memio Yesu memligan yo nene, metaveve si kiamimi mrapa mepato si tano e lepas naĝa garo Kalele. ⁴⁴ Yesu sinenan sape wasuĝe si va gar kiena yo Kalele, komin naĝa naga pisu li taĝena lala amaagan li visayuen naga, asuĝa akalewele silaga. Nanene taveve kiena visena tai, naĝa pisape “Yeririna taĝena lala akekaran navatanon ruruen navisawalena, ana yeririna ga la na pulkumali puna na peraga, la asitom korenan ga naga.” ⁴⁵ Ana pogos naĝa mepa makate e yo naĝa Kalele, yaru na kiena yo lala akekaran paĥisi, aporworunia. Nanene vanon naĝa sumo, lala moki la ĝena asike e paĝaena ma Yerusalem, ana apisu pa nataĝaen ĝarera tai naĝa Yesu miyuĝaen e Yuĝa Wa ĝana ne Ntewa e pogos nene, ana apisu po paĥisi.

⁴⁶ Ana sun mialili ke yo lala nae Kalele pimi tol sina ga kumali naĝa Kana, naĝa nanua sumo kilapu wii pimi pe kuruta na munena. Ana e pogos nene pupia suĝe tai nae pulkumali taĝena nae Kapeneam sike e yo nene, mloge ke piowa vanon narina yerĝene mai keviu paĥisi, lavis ga mare. ⁴⁷ Ana pogos naĝa mloge asape Yesu ĥasuĝe ma Yutea pitomi si Kalele rui, naga pa kirawalia. Ana pisu Yesu, tag pania sinenan pisape va uĝa vena tamalia narina nene. ⁴⁸ Ana Yesu pisa pania, pisape “Pona ko ĝena sane yeririna taĝena la nene. Sinelan lue ga kile taĝena lala, ana visae neyuĝaenia, alelaga e in narui, a visae pe apisu re poli, pe akekaran re nalelagaena e inu poli.”

⁴⁹ Ana pupia suĝe ĝareran pania, pisape “Yar keviu, awis oimi vilaga, visae pere na naruu naga kovio.”

⁵⁰ Ana Yesu tařali nalelagaena kiena ne suře nene, pisape “Peraga, ko ga taaga ovano. Nevisa van ko, naruřna tařatete mare, mal řna woga ga.” řisi na naga mlelaga e visena nařa Yesu pisa pania, mligan yo pa si uřna.

⁵¹ Ana e legien tařena sina, pogos nařa řasuře ke si pavin, pitawe kiena yeririna lala, amial lulu ke mrapania. Ana apisa pania asape “Naruřna mloge si pogaga teke na.”

⁵² Ana piun tan la pisape “Amiu asitom veve ruru lia: Pog ya ne naga siar mloge pimi po sina ga?”

Ana apisatařnea, asape “Mepisu sane yepena pimi manin ruru nakoneva kolpae, sur tai sane koe aora taaga.” ⁵³ Ana ariman yerřene nene mloge na nene, kilia ga sape naga ke narui mesmesu ga aora nařa Yesu pisa pania pisape narina tařatete mare, mal ga woga ga. Ana sur nene kila naga, amio la punu ga na mratava puna, amlelaga e Yesu.

⁵⁴ Ana natamaliaena kiena ne yerřene nene, Yesu kila suraun nařa mligan ma Yutea pitomi, ana pe kiena kile nalua gar lepas nařa Kalele.

5

Yesu kila ruru si yar tai nařa yepena mare yam piavi

¹ Ana Yesu suřna Kalele yam piavi řna pano-o, tol pog na řařagena tařena si tai kiena ne le Yu lala ma Yerusalem. Ana Yesu lala apa si metava e řařagena nene. ² Asuřna Yerusalem sanena e legien tai Yesu mial pito tano lavisin pulutava keviu na kumali nene nařa apio asape Pulutava Na Sipsip, ana apa lele tai nařa wii na kulena tai řneke ea, nařa e kiela visena apio kiena ki Petsaeta. Ana e yepas nen wii nene, silparpara la lima sike ea, amiyuřnaen e kilavaru. ³ Ana nalue ga inanena lala, kilamara kata lala, a laulu lala, amio la nařa yepela la marmare, la ne sanene amoki manene apim ařneke e lepa yuřna taaga la nene. Apim asike sanene, vanon wii nene yam peve taaga kulkulul, ⁴ sa nařa navisi kiena ne Ntewa tai pitomi kila wii nene kulkulul, ana pogos nařa apisu sanena, inanena la nene yar ai nařa va řes tol wii nene, yoko maiena ya nařa teke e yepena řisi veraga ga e pog nene. ⁵ Sanene inanena la asuřna apim e yo nene, ana lala yar tai nařa sike e pog nene, naga yepena marmare tol kas lualima yam telu pa orelu [38] rui. ⁶ Ana pogos nařa Yesu pimi, pisu yar nene, kilia sape yar nene monon inanena nene yam piavi sanene, piun tania pisape “?Kiau erau, ko na sinořnan osape yepeřna imi wo sina, ne?”

⁷ Ana inanena nene pisatařnea, sape “Yar keviu, sineun pařisi ne, ana pogos nařa wii kulul, pe yar nakusnuen re vito ligan nu e wii poli. Ana pogos nařa in ga taaga nekila wowed ke yo nayalvitoen tano, yar tařena tai pitomi pito řes tano e wii sumon inu.”

⁸ Ana Yesu pis mesmes ga pan yar nene, sape “Pogaga, osuřmalu, okus mořna tog, oyali ovatove.” ⁹ Ana taveve visena kiena ne Yesu nene, yepe marmare la nene punu ga pimi po, naga suřnal kus řmana tog mial pitove.

Ana e legiena na sur nene pimi kate, naga pe legiena wa tai kiena ne le Yu la, ¹⁰ kila sane pogos nařa yar keviu řasia sa le Yu la apisu yar nene mial kus ke řmana tog, apis pan vanonia, akilawoia, asape “E, řa nini na pe Legiena Wa řa! Okus ke mořna tog sanene na okilaro ke kieta navisaluaena ita le Yu la ne.”

¹¹ Ana pisatařne la, sape “In na yepeu pororowaia, ana yar nene pimi kila ruru inu, pisa panu sape nekus řmau tog nevano.”

¹² řisi na lala sinelan asape akilia laa sane wa, apiun tania, asape “?Ana a nene? ?Naga pe ane pisa pan ko sape okila sanene?”

¹³ Ana yar nene mninue ga visaena, vanon naga pe kilia re sape Yesu nařa kila ruru naga poli, a tařatete visu kilalea vanon řina na yeririna la asike ea, ana Yesu mial řaroro likan yeririna lala, petan yo nene rui. ¹⁴ Ana siraunia pe piavi re poli, Yesu kirawal si yar nene e Yuřna Wa, ana pisa pania sape “Nanagane omloge po si narui, popon ovisuar ruru ko. Oligan punu ga kiořna naviowaena lala, visae peraga yoko sur tai viowa sina ga imi van ko va re laa sane taulu na sumo.” ¹⁵ Ana e pogos nene yar nene kilia narui sape Yesu ga nařa kila ruru naga, ana pa pisawal pan yar keviu kiena le Yu lala.

¹⁶ Ana pogos naþa la amloge sape Yesu ke narui naþa tamalia, sinela karia, pe akekaran re naþa miyuþmaen sur nene e Legiena Wa, þisi na la asiar naþa apeveyunia. ¹⁷ Ana Yesu pisataþme la, sape “Kiau ata, naga miyuþmaen ke kiena yuþmaena wo lala e legiena make ga, pa tol mþena Legiena Wa, a in mþena monar neyuþmae sa mþa nena naþa naga miyuþmaenia.”

¹⁸ Sanene na e pogos nene, nasumonena kiena le Yu lala apisu ke pa Yesu narui sane pe yar na warnena kareen nawaena na Legiena Wa. A nanagane metavana, amloge naþa naga pio ke Ntewa sape Arimana wawa, apisu sane naga kila ke naga maran taaga ga sane Ntewa. Ana sur ne la nene kila sane la apim pisusun manene laa sane, sinelan manene laa na wemoþaren naga mare.

Narina ne Ntewa amio Arimana amiyuþmae maran taaga ga

¹⁹ Ana Yesu pisa pan la, sape “Nepisa pe lelaga pan amiu, in na narina ne Ntewa, taþatete nekila sur tai inu ga taaga, ana sur ga la naþa nepisu Arimau kila, naga ga nene nekilia nekila. ²⁰ In na narina ne Ata Ntewa, naga sinen sii inu paþisi, kila pian inu e sur punu ga naþa naga sitom ke sape nekila. Ana yuþmaena taþena si þasia sike ga wa, naþa kerkeviu laa sane, naþa war van inu vena neyuþmaen sirau, ana pogos naþa neyuþmaenia, yoko amiu sinemiu ulan vaþisi ne. ²¹ Naga mþena nanini, sa naþa Ata mla si malena pan la naþa amarmare, taþan si kiela malena pan la, ve sa mþa nena nene inu narina nekilia nela malena van yar ai naþa sineun nesape nela vania. ²² Ana pe Ata re ga kila naliþereena poli, ana yuþmaena mþena nene mligan e luþau, ²³ vena kilaen yeririna punu ga monar avatanon inu sa ga naþa apatanon ke Ata. Ve sanene, visae yar naþa pe patanon ruru re inu narina poli, ana sa naþa naga pe patanon ruru re yerkawa naþa naga mligan inu nepitom tano poli.”

Marena amio malena

²⁴ Ana Yesu pisa laa sanene, sape “Ayagogon ruru visena nene. Yar a naþa logear kiau visena, a lelaga e naga naþa mliganu nepitom tano, e ke e pogos nene tol malena. Naga pe su re nena vatanon naliþereena mþarera tai, sane petan þelaga na marena rui, pa tol kiena malena viu rui.

²⁵ “A nepisa visena nalelaga nini pan amiu, sane pogos pimi ke sirau nanagane naþa sane yar la naþa amarmare e þelaga naviowaena rui, aloge pulgou inu narina ne Ntewa, ana la naþa aloge kilia, yoko atol malena. ²⁶ Kau Ata, malena nalelaga teke ga e naga, ana naga taþan malena nene sike e inu, ²⁷ a taþan mþena sane inu Narina ne Yeririna, yoko nekila yuþmaena lala na liþereena.

²⁸ “Sur la nene pe pon re si sinemiu ulan poli, monar yoko ve sa ga nene e pog naþa nepisa ke nesape pimi ke ne. Yoko la naþa amomalio e porotano, aloge pulgou vio, ²⁹ ana amolmolue sina ga, ana la naþa amiyuþmae po, kiela nasuþmalena si nene pe namalena, ana lala naþa amiyuþmae piowa, kiela nasuþmalena pe naliþereena.”

Sur la na iilaen visena kiena ne Yesu

³⁰ Ana Yesu pisa pa laa sane, pisa þarlologia ga pan yerkawa kiena ne le Yu la naþa amon nalelagaena e naga, pisayu sur la naþa kila meraravan sape naga pe lelaga. Pisa sape “E lepas naliþereena naþa neyuþmaenia, yoko taþatete neyuþmaen e nasitomiena kiau in ga taaga, ana nekila ga e sur naþa nemloge Ata pisa. Ve sanene, kiau naliþereena naga mesmes ga, vanon pe nekila re e kiau nasinenanena poli, nekila ga e nasinenanena kiena ne naga naþa mliganu nepimi. ³¹ Ana nepis sanene pan amiu, nekilia sane nepisayunu ke sina ga, pona amiu þas apisu sane pe pon re nevis ve sanene poli yo, taþatete alelaga e visena na sanene. ³² Ana pogaga, pe sur re tai nene po, vanon sur taþena la þasia naþa kilia iila kiau visena suþal ruru wo.

“Nasumo, naga yar tai naþa pisayu sur la naþa punu pe lelaga paþisi. ³³ Nane Yoane Nakeena ne, naþa nanua sumo, amiu amligan visena pato pania, apiunu sanape petania, ana pisawal sur punu ga pe lelaga pan amiu. ³⁴ Ana piowa ga naþa asitom asape kiau visena suþal sanene vanon ga visena kiena yaru tai sa ga Yoane. Ana sineun nesape amiu

asitom ruru li e visena la naþa Yoane pisa pan amiu e lepas na punu, vanon neþaryon amiu ke vena akilia atol natamaliaena. ³⁵ In na nepisa Yoane nene pan amiu, vanon naga sane pe kap tego tai na tegolien kiamiu sitomena lala, amiu naþa akekaran li mña naga.

³⁶ “Ana sur si tai naiilaen kiau visena, keviu laa taulu sur la naþa Yoane naga pisa. Naga kile la naþa Ata tañan panu nemiyuñmaenia e maramiu. Yuñmaena keviu la naþa nemiyuñmaen, lala amiila ke visena nene keviu sane pe lelaga Ata ne nanene mliganu nepimi.

³⁷ “Ana metavan sur lua nene, taþena toñna ga, nane kiau Ata naþa mliganu nepitom. Amiu pe amlogeli re pulgona poli, pe apisuli re marana po, ana naga mña, kiena visena la miila kiau visena la keviu, naþa pisawal inu. ³⁸ Ana amiu na akila sane visena nene pe lлена re e kiamiu malena poli, vanon amon lelagaen e naga naþa mliganu nepimi. ³⁹ Yam moki asuñna apisuveve ke Visena Wa lala, vanon amiu asitom ke asape yoko alual kiamiu malena naþa ve uro re ea, ana visena wa la nene naþa pisawal inu ga. ⁴⁰ Asape in na nepe purþes nen malena nene, ana amiu amon aimi atol malena nene e inu.”

⁴¹ Þisi na Yesu pisa sane þarila mñarera paþisi, pis sanini, sape “Sur la naþa nekila ke ne, pe nekila re nesape amiu ayeluar kiau ki, peraga. Pe nesitoñmal re nene poli, ⁴² ana sur viowa tai, nekilia ruru amiu pa rui, ana nekilia sane pe asitom manene re nena Ntewa poli. ⁴³ Pogos naþa nepim nakaten amiu, nepim e ki kiena ne kiau Ata, ana amiu pe akekaranu re poli. Ana visae pogos tai yar taþena imi, naþa imi ga e kiena ki naga taaga, pona amiu akekaran ga naga yo. ⁴⁴ Sineu mie amiu paþisi, ana nepisu sane mñarera pan amiu paþisi naþa atol nalelagaena nalelaga pogos tai. Nanene vanon amiu sinemiun lue ga nayeluaren kiamiu ki va metava. Amiu pe asitom re asape akilia avilopu si kiamiu þelaga poli, vena akila sur la naþa siraunia Ntewa kilia yeluar amiu vanonia.

⁴⁵ “Nepisa visena la nene pan amiu, pona amiu asitom ke asape ‘E, yar nene sinen kar ita, pona e legiena naliþereena naga visawal kieta naviowaena la van arimata Ntewa ma e peni!’ A peraga, ve in re naþa nekila sanene, ana yar taþena naga kila. Taþena nene nane yermarua Mosis, naþa amiu aþasine ke naga asape yoko visa visena na iila amiuena, ana nevisa ruru van amiu, naga ke narui naþa yoko visa plan ga kiamiu naviowaena lala. ⁴⁶ Amiu na apisa ke asape amlelaga ke mñarera e visena kiena ne yermarua Mosis nene, ana visae ve sanene, vanon ya ne amiu pe amlelaga mña re e in poli, vanon yermarua nene, naga siriyunu lue ke ga. ⁴⁷ Ana nanagane, nepisu sane amiu pe amlelaga re e kiena nasiriena la poli, ana komin suri ne nanene yoko taþatete mña alelaga e kiau visena lala.”

6

Yesu pagan þina na yeririna miyuve manu lima [5000]

Matiu 14:13-21; Mak 6:32-44; Luk 9:10-17

¹ Siraun naga nene, memio Yesu memiai e wa tai memligan si kiena yo nene, mepa mokusro pupia lapa naþa nae Kalele, naþa la þasia apio asape Lapa Taepirias. ² Ana pogos naþa yeririna la apisu imimi mepa ke sanene e lepas navano, la mña ga asuñmalu asiraun imimi. Asape ataveve Yesu vanon apisu kile natamaliaena la naþa miyuñmaen pan inanena lala. ³ Ana pogos naþa mepa metol lepas nene, mepa metava e kunus tai naþa mñeke e yo nene, memial mña mepano-o, memapi. ⁴⁻⁵ Ana pogos naþa Yesu totano teke na kira pa gar tena, pisa pupia þina la apim ke puna. Pisuluþar sane la moki, ape yeririna na yo taþena ga la ne amlapran la ke apato Yerusalem. Apatovin ke pupia þaþagena kiena le Yu lala, Paþagena na Sitoñmalen Natamaliaena, naþa yoko ve yam ve piavi re na akila.

Ana pogos naþa Yesu pisa la apimi, piun sur tai pa Pilip, pisape “Pilip, la nañna na viso kar la ke paþisi ne. ?Yoko toul kala kilaparavi ve sanape ne?” ⁶ Naviunena kiena ne Yesu, pe nataþaliena ga Pilip, vanon Yesu kilia pa rui sur naþa yoko kila van yeririna lala nene.

⁷ Þisi na Pilip pisatañnea, pisa ga pisapenua “Visae neyuñmae kas ve taaga, taþatete netaulu kilavaru torokin naulen kala kinanena lala la punu ga akan ve torokaki!”

⁸ Ana nalogena tařena tai, Antru, nařa wenla Saemon Pita na ve tokak, pisa pa Yesu, pisape ⁹ “Suře, nekirawal teras tai teke e nini, řar ke narin kilaparavi lima amio narin ika lua. Nanene tekaki ga, vanon yeririna la mok pařisi.”

¹⁰ Ana Yesu pisape “Peraga, poga ga ne, ovisa van řina la nene ovisave atotano wa.” Mepisa pan la, řisi na atotano e viluřini lala, ana mepisu sane yerřene ga lala tol sur sane manu lima [5000]. ¹¹ řisi na Yesu řarar kilaparavi la lima nene, mlen, pisa potena vanonia. Siraunia siar kaweroroia, piovion pan la nařa atotano ke ne, kila řena sa ke ga e ika, mla make ga pan la torokin nařa sinelan asape akania.

¹² Ana akan řa pano meřela la kawa, řisi na Yesu pisa pa imimi, pisape “Korkoro kinanena la ne sike ne, ve tekila kare re, ana popon awarpolo va lele taaga.” ¹³ Ana mepa mořar kinakina kilaparavi la lima nařa ne, nařa akanligania, mokon pa e karo pano-o tol karo lualima taaga pa lua [12].

¹⁴ Ana pog nařa yeririna la apisuluřar pupia kile nařa Yesu miyuřaenia, apisa ke pan la sanini, apisape “Kieta pupia navisawalena nařa kieta li marua la apisaar asape imi kate e yomarava nini, yar ne na nene navisawalena ke narui.” ¹⁵ Ana la asitom ke asape ava atarar Yesu, asape ařareran vania vena avisirlua suřal imi ve kiela řarin suře, ana pogos nařa mnunuluřar sur nařa la asitom ke asape ayuřaenia, naga petan la, naga taaga mial pa laa sane metava e kunus la nene.

Yesu mial yau metava e sive

Matiu 14:22-27; Mak 6:45-52

¹⁶ Ana imimi nalogena la mepisu mrae pato ke tano narui, mepisu sane popon sa mowasuře imimi sina, ana mepato si tano e yepas nen lapa. ¹⁷ Mepato tano ana pe mořa re Yesu katen imimi si poli, ana vanon yemalo pa rui, a mokus kiamimi waa, memligan si yo nene mepalua mepanon vena mokusro lapa meva ma Kapeneam. ¹⁸ Ana mepa ke sane, na narin lagi tai miyui li řaga, kila sive siar piowa řa pařisi. ¹⁹ Ana pogos nařa mepaluan pa laa tol sane kilometa lima, memilan Yesu mial ke metava e sive pimi ke lavisi. Ana memaraun naga pařisi, ²⁰ ana naga pis pan imimi, pisape “!Ee, amiu ve amarau re! In ga ne.”

²¹ Ana memloge po sina, metar pa meta e waa, ana veraga ga mepisu kiamimi wa monlologia ke lele nařa mesape meva ea.

Yeririna la apim akale Yesu

²² Ana kolulag, la nařa e lepas nen lapa, nařa Yesu pagan la ga na wa, asitomwele ke asape sanapen Yesu narui. Asitom ke sanene vanon pogos nařa memio Yesu mepim pula, mokus waa taaga ga, ana apisu imimi nalogena la mokus waa nene mepa pa rui, a Yesu pe amio imimi re poli, naga taaga sike na. A nanagane tařatete si alual naga amio la, ²³⁻²⁴ ana la apa akus waa tařena lala, akusro apa Kapeneam akale imimi. Waa tařena la nene, la pe kiela re poli, kiena ne la nae Taepirias nařa apim akaten la, apim ga ura e nařa Yesu mlenwo kilaparavi, kila pimi torokin nařa akania.

Yesu pisape naga pe kilaparavi na malena

²⁵ Ana yeririna la nařa ne apam atol Kapeneam, apa ura, apa akale Yesu. Ana pogos nařa ařalia, apiun tania, apisape “?Navianena, ko opam otol e nini pogwai?”

²⁶ Ana Yesu kilia pa sur nařa la asape avisu vanonia, naga pisataře la, pisape “Visae apamin akale inu sina vanon apisu kiau kile lala a apisuluřar inu sane in na ai, visae ve sanene na po na. Ana in na nepisu sane asitořal asape nakoneva nepagan ruru amiu, akinana pano-o meřemiu la kakawa po, ana amiu sinemiun si asape ve sa nene řane, yo?”

²⁷ “Poga ga, kiau visena na lelaga van amiu naga sanini: ve asitořal manene re si kinanena nařa yoko ve ve piavi re na naga kona make sina. Popon ayuřae řarera vanon kinanena nařa sulue ga, kilia suřa ga sanene vano-o tol pog na malena nařa pe luas re poli. Lelaga, in na Narin Yeririna nekilia nela malena nene van amiu, vanon Ntewa arimau kilaar pan inu rui in ga taaga vena nekila ve sanene.”

²⁸ Ana apiun tania, apisape “Ana sa imimi sinemimin mesape mekila sur la naþa Ntewa sinenania, yoko monar meyuñae ve sanape?”

²⁹ Ana Yesu pisatañe pan la pisape “Pupia sur naþa Ntewa sinenan sape ayuñae, sanini, sape alelaga lelaga e in naþa Ntewa miila inu nepim e yomarava nini.”

³⁰ Ana apiun ke sina ga, apisape “?A ko, kioñna kile ya naþa sa mevisuia, yoko mekilia melelaga e ko? Ko na yoko okila yuñae wo ya ne van imimi? ³¹ Mepiun ke sanene vanon mesitoñal kieta li marua la na susumo ne, naþa asu e yokorena. Asuñna sanena Mosis kila kile wo tai pan la, naþa silaga la aþar kilaparavi naþa apio mana, ana akania, pe visokar la re nena ga. Sur nene teke e Tus Wa, a pisa sape

‘Silau ga naga pagan la e kilaparavi nae ma e peni!’ *Esik 16:4*

³² Ana Yesu pisatañe la ke sina ga, pisapenua “Lelaga, sur nene teke e Tus Wa, ana kilaparavi naþa Mosis mlavia, pe pe kilaparavi nae re ma e peni poli. Kilaparavi naþa nae ma e peni nalelaga, arimau ga kilia lavia. ³³ Kilaparavi kiena ne Ntewa naga inu ga ne naþa nemligan ma e peni nepitom tano, vena nela malena viu van yeririna na yomerava lala.”

³⁴ Ana apisatañea, asape “Suþe, kilaparavi ke nene narui naþa imimi sinemiminia silaga.”

³⁵ Ana Yesu pisa pan la, pisape “Inu, in na kilaparavi na malena. Yar a naþa vim pun inu, taþatete si viso karia, yar ai naþa lelaga e inu, taþatete si moto karia. ³⁶ Ana sur taaga ga na piowa, sa naþa nepisa pa pan amiu rui, naþa apisu inu amio kiau kile lala e kilamaramiu rui, ana amon lelagaen e inu. ³⁷ Ana monar yar þasia alelaga e inu, vanon la punu ga naþa Ata mligan sike e luñau, yoko monar aim pun inu, a la punu ga naþa aim pun inu, ve lala yar re si tai naþa nekilia nekuan lua sina, yoko nowarar ruru punu ga ave kiau.

³⁸ “In na nemligan ma e peni nepitom tano e yomerava nini, pe nakilaen re nasinenanena kiau poli, ana pe nakilaen nasinenanena kiena ne naga naþa mligan inu nepitom tano. ³⁹ A pupia kiena nasinenanena sanini, sape la naþa naga mligan la asike e luñau, yoko ve nekilalu re lala yar tai, naga sinenan pisape e legiena maro nevisir plan la punu sina ga. ⁴⁰ Ata sinenan manene laa pisape ve sanene narui, naþa la punu ga naþa avisu inu, ana alelaga e inu, yoko atol malena naþa pe luas re poli, a sinenan manene ñena pisape e legiena maro, yoko in na nevisir plan la sina ga.”

Nasumonena kie le Yu lala pe akekaran re visena kiena ne Yesu la poli

⁴¹ Ana pogos naþa yerka kiena ne le Yu lala amiyagogan ke visena kiena ne Yesu, pe akekaran re nenaga, ana la apis lili ña vanonia. Kiena visen tai naþa amon logeena, nane visena naþa pisawalia sape naga pe kilaparavi naþa petan ma e peni pitomi tano e yomarava nini. ⁴² Apisayu pan la, apisape “?Sanape ne yar nene pisa ke pan ita pisape petan ma e peni metava pitomi tano pun ita? Naga pe yar re tai nene po, tekilia ruru pa naga rui, anena amio arimana. Naga Yesu ga þa, narina yermarua Yosop.”

⁴³ Ana Yesu pisatañe la, pisape “!Ei, visen mumu la e inu þisi, amiu ayagoga ruru kone wa! ⁴⁴ Yar ai naþa imi lelaga e inu nagane, e legiena maro nevisirlua naga mal sina ga. A ata naþa tañan inu nepimi, visae naga ve ure re yaru nene vim, ana taþatete nena kilia imi punu. ⁴⁵ Tus kiena ne navisawalena Aisea pisawal visena tai, pisape

‘Lala punu ga, yoko Ntewa ga vian la,’ *Ais 54:13*
ana komin nanene, nepisape la naþa aloge ruru visena kiena Ata Ntewa naþa naga vian ruru la ea, lala nene aim pun inu. ⁴⁶ Ana la ne sanene, pe lala yar re tai naþa pisu ke Ata Ntewa poli, vanon yar taaga pisu ke naga, nane inu naþa nepetan ma puna nepitom.

⁴⁷ “Nepisa ke lelaga pan amiu, sane yeririna punu ga naþa alelaga e inu, asike pa loyuñae e malena naþa ve uro re rui, ⁴⁸ vanon inu, in na kilaparavi na malena. ⁴⁹ Kilaparavi nene pe maran taaga re poli sa naþa kilaparavi naþa mana naþa yermarua la akan e yokorena. Akan ña pano-o, ana siraunia pe lala yar tai mal lue re si teke poli, lala punu ga amarmare ga sa nene. ⁵⁰ Ana visae kilaparavi tai toñna ga, visae yar naþa kania taþatete mare pogos tai, na nene tepio tesape kilaparavi nae peni lelaga. ⁵¹ Pogaga, in ke narui

nepe kilaparavi na malena nene, naþa petan ma e peni pitomi tano e yomarava nini, vena yar naþa kania, yoko mal lue. Kilaparavi ne nanene naga pe tasneu, netañan ke panon yomarava wetelu, nemla ke panon malena kiena ne kiena yeririna lala.”

⁵² Ana visena kiena ne Yesu la nene, ñarera pan yerikawa kiena ne le Yu la nene akilia ruruia, ana apiun ke asape “?Ya nene? Yar nene pisape yoko war kana kilañiu van ita vena tekania, po pisa ke ya ne?”

⁵³ Ana Yesu pisa meraravan pan la e lepas na kinas nen kiena marena, pisape “Nepisa lelaga pan amiu, sane amiu monar akan kiau kilañiu inu Narina Yeririna, amiu monar amun kau kuruta. Visae peraga, kiau malena taþatete te amiu. ⁵⁴ A naga naþa kan kau kilañiu, a mun kau kuruta, naga tol pa malena naþa pe luas re poli, ana nevisirlua si naga suñalu e legiena maro, nekila naga mal sina ga. ⁵⁵ Nanene komin kau kilañiu, naga pe kinanena taþena tai, a kau kuruta, naga pe na munena taþena tai. ⁵⁶ Naga naþa kan kau kilañiu, mun kau kuruta, kiena malena wetelu sike e inu, a kiau malena wetelu sike e naga. ⁵⁷ Ata naga pe purþes nen malena, ana mligan inu nepimi, a nemalin ke kiena malena naþa teke e inu, ana naga naþa kan kau kilañiu yoko naga mali e kiau malena naþa teke e naga. ⁵⁸ Sur ne nanene naþa nepisa ke e kiau visena e lepas na kilaparavi naþa petan ma e peni pitomi tano. Kilaparavi nene naga pe sa re kilaparavi naþa repita nasumo la akan poli, ana amare ga sanene. Naga pe kilaparavi naþa yar a naþa visae kania, naga kilia mal lue narui.”

⁵⁹ Visena ne la nene Yesu pian lan ke e yuñna na lotena nae Kapeneam.

Nalogenla la moki amligan Yesu aþasuþe la sina

⁶⁰ Ana komin naþa Yesu pisa visena la nene, ana imimi kiena nalogenla la moki asitom pano-o, apisa asape “Kiena navianena la nene ñarera paþisi. ?A si na kilia loge kilale ruruia?”

⁶¹ Ana Yesu mloge kilale e naga sane kiena nalogenla laþas apis lili ñna vanon naga sa nene, naga piun tan la, pisape “?Sanape, pe akekarana re kiau narin visena nene poli? ⁶² Narin visena ga nene, kila amiu asape aliganu sina? Visae ve sanene, nemninue amiu narui. Sane visae pogos tai, inu Narin Yeririna neligan amiu neva si metava ma e leleu, ana yoko sanape ne? Pona sinemiun þesan ruru inu yo? ⁶³ Kiau visena la nene ape mrapa na Ninuna a mrapa na malena. Yaru kilia war si yaru, ana yaru taþatete la malena lelaga nene va yaru taþena. Sur nene Ninuna ne Ntewa ga kilia lavia. ⁶⁴ Ana nevisu kilale amiu laþasia amlelaga pa rui, a amiu þas peraga.”

Yesu pisa naga nene, vanon siar nanua rui, naga kilia pa la naþa pe amlelaga re e naga po, pano-o tol naþa naga kilia lala ai naþa awilwilin wan naga. ⁶⁵ Ana Yesu pisa ñna ga pan la, pisape “Lala þasia alelaga, þas ve alelaga re, naga nene nepisa ruru visena nene rui, nesape taþatete yar tai vim punu, naþa sa arimau naga ve tañan re naga imi.”

⁶⁶ Ana e pogos nene imimi kiena nalogenla laþas apisu sane navianena kiena Yesu la nene añarera laa narui, apisu sane peraga, ana aþasuþe la sina, pe ataveve re si naga poli.

Pita pialua ñareran kiela na lelagaena pa Yesu

⁶⁷ Ana pogos naþa Yesu pisa lala þas amligan si naga, pis pan imimi kiena nalogenla lualima taaga pa lua [12], piun pisape “?A sanapen amiu? ?Pona sinemiun asape amiu ñna ava sina ga amio la nene?”

⁶⁸ Ana Saemon Pita pisatañea, pisaar ñarera pa Yesu, pisape “Suþe, visae meligan ko, yoko mesiraun si a ne? Ko ga taaga naþa lologena wo na malena teke e ko, ⁶⁹ nanagane na memlelaga ke ga e ko ga taaga, a mekilua pa rui mesape ko, ko na Navisaarena Wa naþa Ntewa mligan ko opimi vena otamalia imimi.”

⁷⁰ Ana Yesu pisatañe pisape “Lelaga, in na nekiar amiu kiau lualima taaga pa lua, vena alelelaga e inu sanene, a tai teke ñna likan amiu naga pe Yermare Lego ruru nenaga.”

⁷¹ Ana Yesu pe pisawal re kiamimi kia lala tai e pogos nene poli, ana siraunia mepisu kilale sane kiena visena nene, naga pisa ke Sutas, narina ne yermarua Saemon nae Kariot, naþa naga imimi na lua lima taaga pa lua tai, naþa pe sitom re poli, þililinwan si kiena Suþe naapo.

7

Yesu, wenla lala pe amlapran la ruru re amio naga poli

¹ Siraun naga nene, Yesu mial telilivi ke ga e yo lala na tavie na kiena yo nene Kalele. Naga pe pa re si metava e yo na tavie nae Yutea poli, vanon nasumonena sa le Yu la nae yo nene akale ke naga rui, asape awe moñar naga mare. ² Ana pogos tai, lavisin pog na kiela pupia þaþagena kiena le Yu la tai, naþa Paþagena na Silparpara. Ana sa naþa silaga, la moki sinelan asape avavini ma Yerusalem vanonia. ³ Ana e pogos nene, wenla Yesu lala apis pania, apisape “E, ko na ose nini yam piavi rui, popon ova li ma Yutea, vena kioþna nalogena la ma ne la towe avisu kile la naþa okila ke ne. ⁴ Ko na sinoþan osape yeririna la akilia ruru ko, ana omiyuþnae tapolou ke ga. Visae lelaga naþa omiyuþnaen ke pupia kile lala, popon ovanon okate yo punu ga e yomerava.” ⁵ Ana visena la ne sanene, sa naþa apisa kare ke ga Yesu, vanon lala na ape wenla ruru naapo, ana pe amlelaga re e naga poli.

⁶ Ana Yesu pisataþne la, pisape “Amiu akilia akila ga kiamiu sur ya e ga e pog naþa amiu sinemiun asape ayuþnaenia, ana kiau pupia pogos naga pe pimi re poli wa. ⁷ Amiu akilia akila ga kiamiu yuþnaena la woga ga, yeririna la taþatete avisa kare amiu vanonia, ana pogos naþa in na nekila kiau yuþnaena, nepisawal sane þelaga viowa kiena la na yomarava pe mesmes re poli, ana la sinela kar inu paþisi. ⁸ Ve sanene na amiu ga ava ma Yerusalem, in na nesuþna e nini wa. In na taþatete neva nakaten maran yar lala e þaþagena nene, vanon kiau pog pimi ke rui, ana pe pimi punu re poli wa.” ⁹ Naga pisa visena nene pan la, siraunia apavin, naga suþna ga.

Siraunia Yesu pa ma e þaþagena

¹⁰ Yesu suþna sane na, pe piavi re poli, naga mþena pa ma Yerusalem, ana pe pa re sa naþa yeririna la akilia poli, naga tapoloun la ga. ¹¹ Ana yerkawa kiena le Yu lala, asitom ke pa rui sape pona naga mþena ga vam e þaþagena, ana la akalewele, apiun asape naga mþeke pe. ¹² Ana yeririna mþena lala, asun apisayu lue ga naga, laþasia asape naga pe yar wo tai, laþasia asape naga pe yaru viowa ga, naþa kila kare ke ga sitomen kien yeririna lala. ¹³ Asun apisayu ke Yesu sanene na, pe apisawal manene re pa e yo metava poli, vanon asitom ke asape visae kiela yar keviu la aloge, yoko akila viowa van la.

Yesu pa kate e Yuþna Wa Mþana ne Ntewa

¹⁴ Ana akila mþa þaþagena pano-o, legiena þas þaro rui, ana Yesu pisu sane monar va ma Yuþna Wa Mþana ne Ntewa vena vian si yeririna lala. ¹⁵ Ana pogos naþa yerkawa kiena le Yu la amloge kiena navianena nowo lala, amilan paþisi, apisape “!Sanape na yar nene kilia ruru visena kiena ne Ntewa sanene? !Naga pe apian re nena ga, ana kiena navianena po na po!”

¹⁶ Ana sanene na Yesu pisawal pan la, pisape “Sur naþa nepian lan ke ne, pe kiau re poli, pe kiena ne Ata ga naþa mligan inu nepitom tano e yomarava nini. ¹⁷ Visae yar tai kekarana ga kila nasinenanena kiena ne Ata, yoko naga kila yar nene loge kilia sitom ruru kiau navianena. Yoko yaru nene kilia visu kilale sane in na pe nepian re yeririna la e ga e kiau kia poli, ana kilia visu kilale sane navianena la nene, pe lelaga naþa amolue kemua e Ntewa. ¹⁸ Visae tevisu yar tai vis ke ga e kiena kia, tekilia ga sane naga miyeluar ga kiena kia. Ana visae yar naþa pis, miyeluar ke ga kia kiena ne kiena yerkawa naþa mligan naga pimi, tekilia ga sane pe lelaga ga, naga pe pisokan re poli.

¹⁹ “Yar tai ne kila sanene nane Mosis. Ntewa mla kiena navisaluaena pania, a naga pisaliluen pimi pan amiu, ana asuþna akilaro ke pa narui. Ana sanape na asape aweñar inu vanon asape nekilaro navisaluaena. ?Pogaga na sanene?”

²⁰ Ana yeririna la apisatañea, apisape “!Kue-e, nagane na opis wowe ke ga, sa ga yermare tai teke e ko! ?Ane sape weñar ko? Ovisawal lia.”

²¹ Ana Yesu pisatañea, pisape “Nanua e pogos naña nepim e yo nini, in na nekila pupia kile tai e maramiu, netamalia laulu nene. Ana pogos naña apisuia, pe akekaran re poli, apisape in na nemiyuñae piowa ga naña nekila sanene e Legiena Wa. ²² Ana popon asitoñali kieta ðelaga na kilaen ðaviu, sa naña yermarua Mosis amio yermarua na sumo tañena lala, sane Epraam lala, la amla pan ita. Naga ñena pe yuñena tanea, ana visae kana legiena nena sulologia Legiena Wa, pe asitoñal re poli, amiyuñen ga. ²³ Amiu asuñña apisa ke asape amon kilaroen navisaluaena kiena ne Mosis, ana atañan luen ga asape nakilaen yuñena na ðaviu e Legiena Wa pogaga. Ana visae atañan nene, vanon ya ne sinemiu karnu keviu vanon ga kiau narin yuñena wo taaga ga nene naña nekila ruru si yepen yaru nene e Legiena Wa? ²⁴ Nepisu sane asitom veve ke sur la ne e ga e kulusia, ana popon ave manmarua li laa sane, asitom veve ruru li sur la va tol kana kilañiu.”

Asitom ke asape Yesu pe Navisaarena po pe naga re poli

²⁵ Ana e pogos nene yeririna moki nae Yerusalem apisu Yesu pian la ke e Yuñña Wa, amilania, apisape “!Lelaga naña ne! Yar ga nene nañane, naña yerkawa la apisa ke asape aweñaria. ²⁶ Ana nagane pisawal ke ga kiena visena la sanene, ana pe akila re si surian poli. Pe tekilia re poli, pona amon visaen vania vanon apisuluþaria sane lelaga, yaru nene, kieta Navisaarena lelaga. ²⁷ Ana peraga, taþatete naga, vanon kieta nalelagaena tai ða rui, sape Navisaarena, pogos naña naga kate, yoko taþatete yar kilia sape naga su pe na pimi ne. Ana yaru naña Yesu, ita punu ga tekilia ruru pa ñana uña rui.” Apisa sanene komin añape Yesu na paeme Nasaret, ana peraga, naga paeme Petleem.

²⁸ Ana vanon naña apisa ke sanene, Yesu þaryon ga navian laena loyuñña e Yuñña Wa, pisawal visena nene pan la, pisape “Asitom asape akilia inu, akilia ke lele naña nepim ea, ana in na nepisu sane pe akilia ruru re poli. Nepimi e nini, pe e re ga e kiau sitomena poli, ana yar tañena ga mligan inu nepimi, naña naga pe purþes nen lelagaena. A sa naña amninue inu ga, ana amninue ñena naga. ²⁹ A naga, in ke narui naña nekilia ruru nena naga, vanon naga ke narui naña mligan lua inu nepitom tano e yomarava nini.”

³⁰ Ana visena kiena ne Yesu la ne sanene kila añareran asape monar atarar naga, ana pe yaru re nena tai naña kilia tol naga, vanon kana pog ne pe pimi re poli wa. ³¹ Asape awe moñar naga, ana yaru la moki amlelaga e naga rui, vanon kile la naña miyuñena. Apisa sanini, asape “!Yoko Navisaarena nape naña kilia imi kila si kile ya la naña yuve naga? Peraga, yar nene kieta Navisaarena ke lelaga narui.”

Amligan yar na mara la apavinin Yesu

³² Ana Varasi la ðasia asuñña amiyagogon ke yeririna la amiilaar ke Yesu e kiela visena lala, ana apa iroro ga, apis pa pupia yar wa lala, na apiranar asape monar akila ga sur tai va Yesu nagane ga ne. Ana amligan kiela lokul navisuaren Yuñña Wa lala, asape ava akale pulmas tai na tararen Yesu, vena aure si naga vim pula.

³³ Ana Yesu pisawalia, pisape “Yoko in na nekilia nesu si nemio amiu yam ve plas ga, þisi na nowasuþe sina puna ne naga naña mligan inu nepimi. ³⁴ Pogos naña sa nowasuþe pae na, amiu akilali naña akale inu vano-o yoko taþatete alual inu. Lele naña neva nese ea, taþatete aim ea.”

³⁵ Ana pogos naña yerkawa kiena ne le Yu la amloge visena nene, asitom þele narui, apisa ke pan la, apisape “?Yar nene pisa ke yo nape ne, naña yoko va ea a þisi na taþatete ita telual si naga ea? Pona sitom ke pisape va e yo tañena lala e yomarava naña wenla ita le Yu lala aþure apa ea e pog na pupia yaltetaena, ana pisape va vian la ñena ga? ³⁶ Ana naga pisa ke ya nene, sape takale naga vano-o taþatete telual naga. Ana sanapen kiena visena naña pisape naga pa ke lepas tai naña taþatete tesiraun naga, taþatete teva ea.”

Ana e pogos nene, lokul na visuaren Yuñña Wa la pe atarar re Yesu poli wa.

Yesu mlologon Ninuna Wa, sape pe wii namalena

³⁷ Ana akila ña ããagena nene pano-o, apa atol kana legiena maro, naña sane pe kana pupia legiena nena. Ana pogos naña asike veraga, Yesu suñal pion manene sanini, pisawal pisape “Amiu a naña moto karia, popon imi pun inu, mun wii na malena. ³⁸ Yar naña mlelaga e inu, yoko wo van vañisi, sa naña Nasiriena Wa pisa, pisape !Yar na sanene, yoko losinena ule mamagan wii na malena, vano vano-o tataroi vetania sa naña wii mlau!”

³⁹ Ana visena kiena Yesu nene, kana kinasia na Ninuna Wa, vanon naga kilia sape siraunia, lala naña alelaga e naga, yoko atol Ninuna Wa. A e pogos nene, Ninuna Wa pe pimi re poli wa, vanon Yesu sike yomarava wa, pe pa totano re e kiena lele wa poli wa.

Ñarin sitomena la e Yesu

⁴⁰ Ana pogos naña yeririna la amloge Yesu pion sane na, kiela sitomena la pa pe tañena lala. La ãasia, apisa asape “Yar nene, naga navisawaliena sane Mosis, naña temlelaga tesape yoko imi.” ⁴¹ La ãasia apisa asape “Ana, pona visae peraga, naga pe kieta Navisaarena kemua.” Ana la ãas apisatañea, apisape “Peraga, pe visena re tai naña pisa sanene sape Navisaarena yoko ve yeririna nae Kalele sane yar nene poli. ⁴² Nanene komin naña kieta Nasiriena Wa la apisa ke ga asape Navisaarena naga molue ga e lus kiena ne Ñarin Suñe Tepet, yoko ve yeririna nae Petleem.” ⁴³ Ana ãarin sitomena moki la ne sanene kila narui yeririna la asu tetai vanon Yesu. ⁴⁴ La ãas pe akekarana re poli, apisu sane popon akuan va e yuñna nakoana, ana siraunia peraga, pe yar tai pa re lavis puna poli, vena tararia.

Nasumonena la sinela kar manene Yesu

⁴⁵ Ana siraun sur la nene, lala na visuaren Yuñna Wa apa sina ga puna ne ãarin yar wa amio Varasi lala, vena kilaen navisawalena lala van la. Ana pogos naña añalivi e marala, yar keviu la nene pe apisu re Yesu poli, ana apis pan la, apisape “?Awa yar naña memligan amiu apanonia? ?Vanon ya ne amiu pe añure re naga pimi poli?”

⁴⁶ Ana navisuarena la apisatañea, apisape “Imimi memiagogon kiena visena lala po na po, pe yar re si tai poli naña kilia vian ruru ita wo sane naga.”

⁴⁷ Ana navisatañeena nene kila Varasi la amilania, apisape “!Aulai, nagane na amiu ñena, yar nene ãere kiamiu sitomena la pa pe wowe! ⁴⁸ Amiu atañan naga pisa kotalia amiu, ana sanape, apisu sane e imimi yar kerkeviu lala pona imimi Varasi lala, la ãas amlelaga ea? Peraga yo. ⁴⁹ Lala ga naña amlelaga ea, nane ãina viowa ga la naña asike ko laa ne, a la pe akilia re sur poli. Pe akilia re kieta navisaluaena poli, Ntewa piain pa nakoana pan la rui.”

⁵⁰ Asuñna apis ñarera ke sane na, lala yar tai kilayon ke sape kila kiela visena vito si tano. Nane Nikotimas, naña nanua sumo e yemalo tai pa sun amio Yesu. ⁵¹ Naga pisa pan la, pisape, “Ita tepisayu ke yar na sanene na, sa ga naña ita temla ke pa naliñeena pania. Ana kieta navisaluaena pisa lepas nene, pisa sape visae tesape tevis van yar tai, monar tetotano ruru temio e kumali, tela pog vania vena naga kilia visawal kiena sitomena van ita, ana monar teviun naviunena vania vena tekilia tekirawal tesape lelaga kemua naga kila sanene sanene po sanape. Naga nene pe mrapa mesmes nakilaen yuñnaena nene.”

⁵² Ana la pe sinelan re yagogonen kiena visena nene po, vanon apisu sane naga miilaar ke Yesu. Apis pania, apisape “!Aulai, ko na opis ke sa naña ko ñena ope yar nae si Kalele tai! Asitomrurulia sur naña Visena Wa pisa. Pe visena re nena tai naña pisa sape yoko navisawalena viu tai suñalu garo Kalele vam e nini.”

⁵³ Ana kiela visena pa ñarera e lele nene, ãis na la amial tetai sina ga añasuñe si ñala uñna lala.

8

Sira naña apisape akirawal taña kolau

¹ Ana Yesu mligan Yuña Wa, mial pa si ma Kunus Na Purolip Lala. ² Monomi e nene, ana yemlagi kolulag mial pato si Yuña Wa Mana ne Ntewa. Pogos naña yeririna la apisuia, la moki apim puna, naga totano pian la.

³ Ana pe piavi re nena ga, navianena navisaluaena lala amio Varasi lala aþure sira tai pimi puna, akila suñal e marana ne yeririna lala. Sira nene, atarar ke sanene vanon asape kila kolau, ana laþas apisuia, apisawalia. ⁴ Ana akila naga suñal sanene, apis pa Yesu, asape “Navianena, sira nene, akirawal kila ke kolau. ⁵ Ana sa naña navisaluaena kiena ne Mosis pisa e lepas na mlamulena viowa nene, nanagane na monar mokove moñar ga naga mare. Ana navisaluaena kiena ne le Rom lala naga sape yoko taþatete mokoveñar yaru. A ko na sanape, kioña sitomena sanape?”

⁶ Ana naviunena nene, pe apiun ruru re pa Yesu poli, ana akila ke ga nataþaliena pania, vena visapal sur tai naña siraunia akilia ala naliþereena vanonia.

Ana Yesu pe pisatañe re poli, þarina tau pito tano, kian mrasilmana siri visena tai e porotano.

⁷ Ana apiuyun ke pania asape sanapen sira nene, ana Yesu toñal ruru sina, pis pan la narui. Pisa pan la, pisape “Pogaga, ana amiu yar naña kove þes sira nene, naga monar ve yaru tai naña pe naviowaena tai to re nena e naga.” ⁸ Ana yam si tai, pulu si pato tano, siri si visena taþena e porotano.

⁹ Ana pogos naña amloge sur naña Yesu pisa pan la, asiar naña amiyal tetai si lala. Naga naña sumon la, kiela yermarua tai, a siraun naga, lala taþena mēna lala apiayapa apavano, pano-o sira naþani naga taaga suñal sike e marana Yesu. ¹⁰ Ana Yesu kira pa pisuia piun tania, sape “?Sira, la naña asike pe nagane? ?Pe lala yar re si tai sape liþere ko poli?”

¹¹ Ana sira pisatañea, pisape “Suþe, pe tai re si poli.”

Yesu pisa pania, sape “Pogaga, in mēna taþatete neliþere ko. Ko, okilia owasuþe ko sina ova moña, ana ovavini ve okila re si naviowaena.”

Yesu pisape naga pe yomerarava na yomarava

¹² Ana siraunia Yesu pisi pan la, pisape “In na nepe yomerarava na yomarava, yar a naña taveve inu taþatete si yal e yemalolo, yoko yomerarava namalena teke e naga.”

¹³ Ana þisi na le Varasi la þasia naña asike wa apilon si kiena visena, apisape “Ko na opisa sanene, ko ga omiila ke si kioña visena, ko na oþarwar ko wa! Sanene na, imimi taþatete melelaga ne, kioña visena pe pe lelaga re poli.”

¹⁴ Ana Yesu pisatañea, pisape “Pona nekila sanene yo, ana kiau visena la punu ga amio kiau vianena la ape lelaga. In na nekilia sur punu ga e inu, sane nesu pe na nepim e nini, po nesike e nini þisi na nowasuþe si neva pe, ana amiu pe akilia in re nena poli. ¹⁵ Amiu amlþere in ke ga e sitomena kiena ga yeririna lala, ana in na pe nemliþere re ga amiu yar ta poli. ¹⁶ Ana visae pogos tai neliþere yeririna lala, yoko kiau naliþereena mesmas ga, vanon ve in ga taaga re nekila, nemio naga naña mligan inu nepimi.

¹⁷ “Ana e kiamiu navisaluaena, asiri sanini asape visae yar la ve lua aviranarla e visena tai, þisi na monar alelaga ea, ¹⁸ ana yoko monar ve sa mēna nene e imimi lua kau ata. In na nepisa ke nesape in na nepe lelaga, a naga miilaar inu, ana kila sane monar alelaga e inu narui.”

¹⁹ Lala amloge visena nene, apiun tania, asape, “?Ko na opisa ke arimoña nene, ana sike pe nagane?”

Yesu pisatañe la, pisape, “Amiu amninue ga naga, sa naña amiu amninue inu ga. Visae amiu akilia ruru inu, yoko kila amiu akilia ruru mēna naga, ana taþatete si aviun naviunena na sanene, ana peraga.”

²⁰ Visena la nene, Yesu pian la ke e Yuña Wa, e lepas naña akuan ruru nalaena lala kiena ne Ntewa sike ea.

²¹ Ana Yesu pisa mēna pan la, pisape “In na nepur matan amiu ke narui. Pogos naḡa neva pae na, akalenu vano-o taḡatete awal inu, yoko amare amio kiamiu naviowaena lala. In na nepa ke e lele tai naḡa amiu taḡatete avam ea.”

²² Ana pogos naḡa yerkaewa kiena ne le Yu la amloge visena nene, apiunia asape “?Yar nene sinenan pisape kila ya? Pisape va e lele tai naḡa ita taḡatete teva ea, pisa ke sape yoko we moḡar naga mare yo?”

²³ Ana Yesu pisape “Kiamiu sitomen lala amio kiau naga peve taḡena manene laa. Amiu na ape nae ga yo tano nini, inu na nepe nae yo na ma metava. Amiu na yomarava nini, in na pe nae re e poli. ²⁴ Ana sa ga naḡa nepisa ga na wa, yoko amare ga amio kiamiu naviowaena lala. Visae pe amlelaga re e in poli, naḡa nepe naga naḡa sike na sike lue narui, yoko monar ve sa ga nene.”

²⁵ Ana apiun, asape “Ko ovisa li sina osape ko na ai.”

Ana Yesu pisataḡe la, pisape “In na nepe naga ga naḡa siar na konua rui pimi tol nagane, nepisa ke nesape in na nepe naga. ²⁶ Naga ga nene nepisa ke e lepas na punu. Ana e lepas na pun amiu, sur la moki naḡa nekilia nevisa, ana visae nevisa, pe visen naliḡereena ga punu ga. Ana sur la ne nepisa ke ne e yomarava nini, naga pe visena ga la naḡa nemloge tan naga naḡa mligan inu, vanon silaga, kiena visena la mesmes paḡisi.”

²⁷ Yesu pis merarava ga sanene, pisayu ke arimana naḡa ma e peni pan la, ana pe akilia ruru re nena poli.

²⁸ Ana pis si pan la, pisape “Pogos naḡa yoko amiu atelan pae inu Narina Yeririna metava e laki, yoko akilia ga na wa sa naḡa in na nepe kiamiu Navisaarena. Yoko amiu avisu kilale naḡa sur punu ga naḡa nemiyuḡaenia, pe nekila re ga in ga taaga poli, silaga nepisa ga sur la naḡa Ata pisa pian inunia. ²⁹ Naga ke narui naḡa mligan inu nepimi, a naga sike amio inu nagane. Naga pe mliganu li re poli, vanon silaga nekila ke sur punu ga sa ga naḡa naga kekarania.” ³⁰ Yesu pis ke sanene, kiena visena la ḡere le Yu la moki amlelaga e naga.

Visena lelaga kila sen lala na mlamulena alolor sina ga

³¹ Ana Yesu pis pan le Yu la naḡa amlelaga mare ga e naga na wa, pisape “Visae awarar kiau visena ḡarera, amiu alogearia, amiu ave kiau nalogena la lelaga. ³² Yoko akilia ruru visena lelaga, ana visena lelaga kilia kila sen loru si vetan amiu.”

³³ Apisataḡe, apisape “Ee, imimi na lus kiena yermarua Epraam, imimi pe memiyuḡae koren kiena ne re yar keviu taḡena tai poli. ?Ana sanape ne osape sen lala alolor vetan imimi?”

³⁴ Yesu pisataḡe la, sape “Nepisa lelaga pan amiu, yeririna punu ga naḡa asuḡa akila ke naviowaena, la ape nayuḡae korenaena na naviowaena, sen la na viowaena apiar ḡareran la. ³⁵ Ana asuḡa amiyuḡae korena ga kiena ne yar keviu na naviowaena, ana pe ape namratava re puna poli. A inu, in na nesulue ga nemio Ata, komin in na namratava nena puna. ³⁶ Ana in na sisi nae ma e peni, visae noul plan amiu, yoko amiu mēna akilia asulue amio inu ma uḡa.”

Yesu pisape la pe ape narina ne re yermarua Epraam poli, ape narina ne Yermare

³⁷ Ana Yesu pisa ke sina ga pan yeririna lala, pisape “Nekilia ruru amiu na, ape lus nena kiena ne yermarua Epraam, ana lus kiena ne Epraam la narui naḡa popon sa akekaranu. Ana peraga, amiu laḡasia na lus ga nene naḡa kiau visena pe towawa ruru re e kiamiu malena la poli, sinemiun manene asape awe moḡar inu. ³⁸ Ana popon amiu alelaga e kiau visena lala, vanon in na nepisawal ke ga sur la naḡa nepisuia pogos naḡa nesike puna ne Ata, ana amiu na akila ke ga naḡa amloge arimamiu pisa.”

³⁹ Ana apisataḡeia, asape “Lelaga, vanon arimamimi, yermarua apua Epraam na sumo sumo laa.”

Ana Yesu pisa pan la, sape “Peraga yo! Visae amiu ape narina ne yermarua Epraam lelaga, popon amiu towe lai akilali sur wo la ve sa naḡa naga miyuḡaenia. ⁴⁰ Ana pere,

amiu akila piowa manene laa paḗisi. Sane inu, in na nepe yar tai naḗa nepisa plan ke ga visena na lelaga la naḗa Ntewa pisa pan inu, ana amiu asape aweḡar inu. ?Pona amiu asitom ke asape ḗelaga wo ke narui naḗa kiamiu yermarua Epraam sape akila? ⁴¹ Peraga, nepisu sane pe naga re nene po, ana arimamiu taḗena ga tai sike ga wa, naḗa amiyuḡae kiena ke.”

Ana la apisape “!Ke ya ne! !Osape okila imimi meve sisi na mrapa lala, memninue ga arimamimi! Armamimi taaga ga nalelaga naḗa sike, nane Ntewa.”

⁴² Ana Yesu pisape “Visae visena nene lelaga, sape Ntewa pe arimamiu, yoko amiu monar akekaran manene inu, vanon in na nepetan ma puna nepitom tano e nini. In na nepim re ga sanene poli, naga ke narui mliganu nepimi. ⁴³ In na nepisasa ke sur la nene pan amiu pano-o, ana silaga amiu pe amloge kilale re nena ga. Nemninue amiu ga, vanon ya ne yepemiu mavin logekilaleen kiau visen sanene? ⁴⁴ Amiu na arimamiu na Yermare, ana amiu sinemiun ga asape akila sa naḗa naga sinenania. Siar nanua sumo e nasiarena pimi, naga pe yaru na wemoḡaren yaru, pe sinenan re visena nalelaga poli, pe suḡal re nena e lepas nene poli. Kiena ḗelaga mesmes, pis lue ga e pupia visokanena lala, vanon naga pe purḗes nen navisokanena punu ga, pe ariman navisokanena. ⁴⁵ Naga sanene, ana pogos naḗa in na nepimi, nepisawal visena na lelaga wo pan amiu, ana siraunia amiu amon lelagaen si e inu. ⁴⁶ ?Ana amiu ane kilia visalua kiau naviowaena tai? ?Ana visae amiu apisu nepis pe lelaga, vanon ya ne amon lelagaen e inu?

⁴⁷ “Yar naḗa kiena ne Ntewa, naga suḡa miyagogon ruru visena kiena ne Ntewa. Ana amiu la naḗa pe sinemiun re aloge kiena visena la poli, nekilia sane nanene vanon pe ape kiena re nena ga.”

Yesu amio Epraam

⁴⁸ Ana visena ḡarera la nene kiena ne Yesu kila yerkawa kiena ne le Yu la nene amloge piowa, ana apiun pania, apisape “Imimi na memloge asape ko na pe ope yere Yu re lelaga poli, ko na ope apkas nae ga Samaria tai. Ana mepisu naḗa yermare tai teke e ko, kila ko ope wowe li ḡaga. ?Visena la nene ape lelaga, po peraga?”

⁴⁹ Ana Yesu pisataḡe pan la, pisape “Peraga, pe yermare tai to re e inu poli. Sur la naḗa in na nekila ke ne, nekila ke ga vena kia kiena ne ata va metava. Sur la naḗa amiu akila panu, akila naḗa kiau kia pato tano. ⁵⁰ Ana pe pe sur re tai pan inu poli, vanon in na pe nemiyuḡaen re naḗa na kilaen kiau kia va metava poli. Ana yar keviu tai ḡeke naḗa sinenan pisape yeririna la popon avatanon inu, ana naga taaga ga kilia la naliḗereena e lepas la nene. ⁵¹ Ana visena tai naḗa lelaga nekilia nevisa van amiu sa nini, visae amiu yar tai larar kiau visena ḡarera, logearia, yoko taḗatete va tol marena pogos tai.”

⁵² Ana le Yu la amloge visena nene, apisa pania, asape “Nanagane na mekilia ruru naḗa yermare sike pa e ko rui. Ko opisape yar naḗa lelaga e ko taḗatete mare, ana pe yar tai naḗa yoko taḗatete ve mare re pogos tai. Yermarua Epraam mal ḡa pano-o mare, a navisawalena lala, lala ḡena amiyuḡae ḡa pano-o amare. ⁵³ ?Pona ko na opisu sane oto laa metavan kieta yermarua wa la nene yo? ?Ko na ositom ke osape ko na a si ne?”

⁵⁴ Ana Yesu pisataḡe la, pisape “Visae nevisawal van amiu, pona avisu sane nemiyeluar ke sina ga kiau kia, ana avisu viowa ga. Yar taḗena ga tai kila ke kiau kia pa metava, naga naḗa asape pe kiamiu Ntewa, naga kau ata ne. ⁵⁵ Naga, amiu pe akilia re poli, ana in na nekilia ruru naga. Pe nepisokan re sane amiu poli, nepisa ruru ga ne, nesape in na nekilia ruru naga, a kiena visena punu ga, nemligan ruru sike e kiau malena. ⁵⁶ Nekilia nevisa ḡena ga sane repimiu yermarua Epraam, naga tai naḗa nanua sumo sinenan pisape visu kiau pog nane ḗane. Naga sinenan pisape visu naḗa nomolue e kiena lusia, nevim nekila kiau yuḡaena nini, ana pogos naḗa naga siar pisu ke pa rui, naga kekara na kekara.”

⁵⁷ Ana le Yu la apiunia, asape “Ana ko na pe ope yermarua re tai ne sane naga po, kioḡa kas pe tol re lualima yam lima poli wa. ?Ana sanape na opisa ke osape okilia yermarua Epraam na sumo ne? Ko opisu naga koyo tai?”

⁵⁸ Ana Yesu pisatañea, pisape “Nepisa pe lelaga pan amiu, sane yermarua Epraam na nanua sumo ne, in na nesumon laa naga. Pogos naña naga pere wa, ana inu in na naga naña su sumo rui.”

⁵⁹ Ana pogos naña le Yu la amloge Yesu pisa narin visena ga nene, naña sane kia wa kiena ne Ntewa, ana akilia asape naga pisa ke sape naga Ntewa, ana sinela mimi pañisi. Akale kilavaru na kovemareen Yesu, ana naga tapoloun la, mligan Yuña Wa, pure sina ga pano.

9

Yar naña paeme pe kilamara ãala

¹ Ana imimi nalogena lala memio Yesu memial mepano, ana pogos naña mepa ke sane na, mekirawal yaru tai naña pogos naña paeme, naga pe kilamara ãala. ² Ana mepiun tan Yesu, mesape “?Navianena, sur ya ne kila yar nene? ?Pona nakoena na kiena mlamulena viowa ga yo, po nakoena na mlamulena viowa kiena ne anena po arimana, kila naga pe kilamara ãala sanene?”

³ Ana Yesu pisatañea, pisape “Peraga, pe kiena naviowaena re poli, a pe naviowaena kiena re kiena yermarua lua poli, a naga paeme sanene vena kilaen ga sane yoko yaru la akilia avisu puriukawaena kiena ne Ntewa yuñae e kiena malena. ⁴ Sanene, yoko netamalia naga nanagane, komin pogos naña yemlagi ke ga wa, monar teyuñae ñarera, monar teyuñaen kiena yuñaena lala naña naga mligan inu nepimi. Yemalolo naga pimi ke narui, naña tañatete teyuñae ea. ⁵ A nanagane na, in na nesike tano e nini, in na nepe yomerarava na yomarava nini.”

⁶ Yesu pisa sanene, ãisi na plasiria yavi na porotano ãasia, pulou ãalelar pimi sane kene, plan e kilamaran yar nañane luwoka. ⁷ Ana pis pania, pisape “Pogaga, ovano oto tano e pulus nen wii naña Siloam, okevan ruru si maraña.”

Wii naña Yesu pisa pania, kiena kia Wii Na Liganen Vano. Ana yar nene pito tano kila sanene, ana kilamarana pimi po. ãisi na ãasuñe si pun imimi memio Yesu, sane naga kilia kira pisu sur narui.

Visena moki e lepas kiena kilamara ãala nene

⁸ Ana siraunia, la naña nalavis puna ne yar nene, amio la naña na sumo asuña apisu naga mlogi ke, apisu si naga, apisa asape “?Kilamara ãala ke nene narui, naña nanua suña monon mlogog kare ke ne, po pe naga re poli?”

⁹ Ana lala ãasia apisape “Ee, naga ga nene ne,” a ãasia asape “Peraga, yar tañena ga tai ne kus marana ne,” ana yar nene pisa meraravan pan la, pisape “In ga nini.”

¹⁰ Ana pogos naña pisawal pan la sane na, apiun tania asape “?Ana sanape na kilamaraña po sanene?”

¹¹ Ana pisatañe la, pisape “Yar naña Yesu, naga miyuñaenia. ãalelar narin kene amio kiena vilasirena, plan e kilamarau, ana pisape netotano e wii naña Siloam ne, neke plan si vetan kilamarau. Ana nekila ga sanene, nepitove, nekevan marau, nepisu sane kilamarau po narui.”

¹² Ana apiun Yesu tania, asape “?Yar nene ñe ke pe nagane?”
Pisatañe la, pisape “Nemninue ga, pe nepisu re si po.”

Le Varasi la amlipere la e sitomena lua e lepas na taña ruruena nene

¹³ Ana siraunia, añure yar naña sumo pe kilamara ãala, añure naga pa puna Varasi lala vena avisulia. ¹⁴ Añure naga pa sanene vanon legiena naña Yesu kila ruru kilamaran yaru nene, naga pe Legiena Wa, ana la asitom asape Yesu kila yuñaena tai naña navisaluaena na legiena wa pisa luñaria.

¹⁵ Ana pogos naña apa apisawal pan Varasi lala, apiun tania, asape “Pogaga, ko towe ovisayu meraravan sanape naña kilamaraña pimi po.”

Ana naga pisa ga sanini, pisape “Peraga, yar nene mligan ga narin kene e kilamarau, ana nepa neke plan sina ga, nekilia nepisu ruru si sur punu ga.”

¹⁶ Ana pogos naña Varasi la amloge, lañas apisape “Yar naña kila nanene, naga kila sa ga sitom korena ga navisaluaena na Legiena Wa. Sanene na, naga pe molue re nena e Ntewa pitomi poli.”

Ana la ñasia asape, “Peraga, visae pe lelaga naña pe yar viowa ga tai na kilaroen navisaluaena, sanape na naga kilia kila kile wo la ne sanene.” Ana apisayu ña sanene pano-o asuñalu ase sitomena lua narui.

¹⁷ Ana apiun ke sina ga tan yar naña nanua pe kilamara ñala, apisape “?Ana ko, ko naña naga miyuñaen kilamaraña, ko na ovisa ya ne e lepas na yaru nene?”

Naga pisatañe ga la nena, pisape “Naga pe navisawalena lelaga tai.”

¹⁸ Naga pisa sanene, ana yerkawa kiena le Yu la pe amlelaga re e kiena navisawalena la nene poli, pe amlelaga re asape nanua sumo yar nene pe kilamara ñala, a nagane kilia kirava. Ana apio arimana amio anena vena avim avisu la. ¹⁹ Ana pogos naña lalua apim, apiun tan la, asape “Avisu ruru li yar nene. ?Naga pe narimiu kemua lelaga, naña asape paeme ana pe kilamara ñala, pona pe naga re poli? ?Ana visae naga, sanape na kilamarana pimi po si sanene?”

²⁰ Ana lalua apisatañela, asape “Imimi lua mekilia mesape naga pe narimimi, mekilia mesape pogos naña moñaria, pimi tol nanagane, naga pe kilamara ñala nenaga. ²¹ A pe mekilia re mesape naga kilia pisu ruru si sur la nanagane, pe mekilia re a ne kila ruru si kilamarana sanene. Ana popon aviun ruru ga tania, naga pe pe sisi re poli, kilia vis.”

²² Lalua apis sanene, akilawan li ña kiela sitomena, vanon yerkawa kiena ne le Yu la apisayu pa rui, apisawal asape yar naña mlelaga sape Yesu pe Navisaarena, yoko akuan lua ve su re si amio la e Yuña Wa Ñana ne Ntewa. ²³ Apisawal sanena lalua amaraun pañisi, kila apisa ga asape aminue ga, asape “Popon amiu aviun ga tania, naga pe pe sisi re poli.”

Varasi la apis si pan yar naña nanua sumo pe kilamara ñala

²⁴ Ana pogos tañena si tai na, apio kilamara ñala na nanua ne pimi loyuña pula. Apis ñarera pania, asape “Ovisa kia kiena ne Ntewa na mava, ovisa ke sur la punu ga nene van imimi ve lelaga, vanon nagane na mekirawal pa rui sane yar nene pe yar viowa kemua na kilaroen navisaluaena.”

²⁵ Ana naga pisatañe la, sape “Naga pe yar viowa pona pe yar wo, in na pe nekilia re poli. Sur taaga nekilia, sanini. Nanua sumo, kilamarau ñala nena ga, ana nanagane na nekilia nepisu sur punu ga.”

²⁶ Ana apiunia, asape “?Ana visae sanene, miyuñaen ko sanape? ?Kila ruru kilamaraña sanape?”

²⁷ Ana naga pisatañe la, sape “Nepisa meraravan ruru sur punu ga nene pan amiu yam tai ña rui, ana amiu amon logeena, ana nanagane na sinemiun asape aloge sina ga. ?Vanon ya? ?Pona amiu ñena sinemiun asape aim ave kiena nalogena la yo?”

²⁸ Naga pisa sanene, sa naña pisa kare li la ña ga, ana la sinela kar manenea, apeveyunia asape “!Oo! Ko ga ope kiena nalogena tai, imimi na mepe nalogena la kiena ne yermarua wa Mosis. ²⁹ Mosis nene, mekilia ruru mesape pe lelaga naña Ntewa pisawal kiena visena pania, ana e lepas na yar tañena nene, imimi pe mekilia re poli, sane naga yar nae pe pimi sanape.”

³⁰ Ana yar naña pisatañe, sape “!Kue-e, nemilan amiu pañisi naña pe akilia re naga poli! Naga kila ke pupia yuñaena la sanene, pano-o kila ruru kilamarau, ana amiu akilia re asape naga ai po naga yar nae pe. ³¹ Tekilia tesape visae yar viowa vio van Ntewa, yoko Ntewa tañatete yagogonia, a visae yar naña pe yar na lotena a mlogear ke naga, visae vio vania, yoko yagogonia. ³² Ana yaru nene, Ntewa miyagogon ke naga, vanon siar e nasiarena na yomarava nini pimi tol nagane, pe apisuli re yar tai naña kila ruru si

kilamaran yaru tai pogos naña paeme pe kilamara ðala. ³³ Yar na monar petan ga Ntewa pitom e nini, visae pere, naga taðatete nena kila sur tai ne sanene.”

³⁴ Ana lala pe akekara re nena naña yar nene pis sanene pan la, asape “E, ko ope yar viowa kemua tai. Ko na ðelaga na mlamulena viowa pulemamaga e ko siar e pogos naña opaeme pimi tol nanagane. ?Ana ko ko na ai ositom ke osape okilia ovian imimi sina ga?”

Apis kare naga sanene pano-o, ðisi na añenelua si naga pa vanua.

Kilamaraðala nene mlelaga e Yesu narui

³⁵ Ana pe piavi re nena ga Yesu mloge asape añenelua yaru nene sanene, ana pa ñalia, piun tania, pisape “?Sanape? ?Nanagane na ko na omlelaga pa e Narin Yeririna rui, po pere?”

³⁶ Ana yar nañane piun tan Yesu, pisape “?Ana naga naña ko opisa ke ne, naga ai? Visae ko na okilia ovisali van inu, pona nekilia nelelaga e naga.”

³⁷ Ana Yesu pisatañea, sape “Ko na opisus pa naga rui, ko opisus ke naga nagane. In ga ða, nane nepis ke nemio ko ne.”

³⁸ Ana pisatañea, sape “O Suðe, visae sanene, in na nemlelaga nena ga e ko.” Ana yar nene ðaryon lue ga na yeluaren Yesu.

Yesu pis pan Varasi lala

³⁹ Ana Yesu pis pisape “In na nepim e yomarava nini vena nevisusuveve yeririna lala, vena kilaen sane yeririna la naña kilamarala ðala akilia avisusu suria, a vena kilaen sane yeririna la naña asitom ke asape akilia apisu sur punu ga, avisu kilale sane la ape kilamara ðala ga.”

⁴⁰ Ana Varasi la ðas asuñna lavis ga, amloge visena nene, apiun tania asape “?Ana opisape sane imimi ñena kilamaramimi ðala ga, a?”

⁴¹ Ana Yesu pisatañe la pisape “Visae pe lelaga naña amiu apisu kilale asape kilamaramiu ðala, po li ña ga, yoko amiu taðatete akilia awar nakoena vanonia. Ana pogos naña visae apisa ke asape akilia avisu ruru sur punu ga, sanene na pupia naviowaena sike pa e amiu rui.”

10

ðakaiwa na kove kan sipsip

¹ Ana Yesu pis pa re laa sane, pisa ðakaiwa tai pan la, e lepas na kove kan sipsip, naña amiyuñnaen pae ana sipsip kiena ne yeririna punu ga akilia ava amomelio loyuñna veraga. Naga pisa sanene, pisape “Nepisa pe lelaga pan amiu, yar naña visae ve kom re e mralaea na vaen loyuñna vanon sipsip lala, ana ðiyukalawan ga kove, yar ne sanene pe yar viowa na vinauen ga. ² A naga naña silaga pa kom lologia mralaea, naga pe yar memes nena navisuaren sipsip. ³ Visae aligan yar tai na kirakirawoen mralaea, ana pogos naña yeririna navisuarena sipsip vim, yoko naga kilia vike ga vania. Ana pogos naña va loyuñna, sipsip la punu ga aloge pulgona, ana naga vio ga kia kiena ne lala naña ape kiena ga, ðisi na lala ga nene asuñalu a naga sumon la ava vanua. ⁴ Ana pogos naña visae sumon la apa ava vanua, naga yal sumon la, la asiraunia avano, vanon akilia ruru pulgona. ⁵ Taðatete akila ve sanene van wolawa tai, yoko amaraun ga, vanon pe amloge kilia re pulgon yar tañena la poli.”

⁶ Ninun visena nene Yesu pisawal pan la, ana pe amloge kilia re kinas poli.

Yesu sape naga pe mralaea na kove na sipsip

⁷ Sanene na, Yesu sunyu ña pan la sane e lepas na kove na sipsip nene, pisape “Nepisa pe lelaga pan amiu, sane mralaea na kove na sipsip nene, naga inu. ⁸ Lala tañena la naña apim sumon inu, naña apisokan asape yoko avisuar ruru sipsip lala, ape yar viowa na vinauena ga lala, ana pogos naña apa akaten sipsip lala, sipsip la pe amloge la re poli. ⁹ In ga nepe mralaea na kove, yar naña imi kom ga pun inu, yoko nevisuar ruru kiena malena. Yoko naga kilia va vanua lual kana kinanena, ðisi na kilia vim sina momelio

kolemalo, kilia vim vano ve sanene naga pogaga. ¹⁰ Yar na vinauena pimi vena war plan vinaunen sipsip lala, pona nawe moñar laena, pona kila kare manene laena, ana in na nepimin vena akilia atol malena, vena akilia akekaran malena naña wo vañisi van la.”

Yesu pisape naga pe yar wo na visuar ruruen sipsip lala

¹¹ Ana Yesu pisa ñena ga, sape “In na nepe yar na po na visuar ruruen sipsip lala. Yar na visuar ruruen sipsip naga monar kekara naña tañan kiena malena vena tamaliaen kiena sipsip lala. ¹² Visae ve yar na yuñena ga tai, ñisi na tañatete visuar ruru sipsip la ve sanene, naga pe kekaran re la ne sanene vanon pe pe kiena sipsip re poli. Visae pogos tai visu pupia lokul tetan lala atomin sipsip la nene, yoko naga marau ga, suñalu kiriri ure, ligan sipsip la asike na, ñisi na lokul tetan la nene avim akarkare la añenetetain la. ¹³ Yar nene ure vetan sipsip la ne sanene, vanon naga pe yar tai nayuñenen ga kiena kilavaru, naga pe sitom manene re sipsip la nene poli.

¹⁴ “A in na nepe yar na visuar ruruen kiau sipsip lala. Nekilia ruru la naña ape kiau, a la nene akilia ruru ñena inu. ¹⁵ Imimi na mekilia ruru imimi sa ga naña imimi lua Ata mekilia ruru imimi lua. A in na sineu si kiau sipsip la nene torokin naña netañan kiau malena vanon la.

¹⁶ “Ana kiau sipsip ñena la moki asuñe ke ga wa, naña pe apim asu re loyuña e kiau kove poli wa, ana monar neva nevio la ñena ga, ana pogos naña aloge pulgou, yoko aimi. Nekila ña sanene vano-o kiau sipsip la punu ga aim ave ñegas taaga ga narui amio inu, yar keviu na visuar laena.

¹⁷ “Vano-o yoko netañan kiau malena vanon la, ana kau Ata naga kekaran pañisi, kekaran inu vanonia. Ana nekilia nevisa ñena sane kiau malena naña visae netañan vano-o, yoko nela maran sina. ¹⁸ Pe yar tañena re si naña yoko lalua kiau malena vetan inu, ana in ga taaga netañania. Naga pe kiau ga natañanen vano, a pe kiau ga nalamaranen sina. Na naña neyuñae sanene, Ata ga mligan e inu.”

¹⁹ Ana yam si tai, visena kiena ne Yesu na sanene kila le Yu lala añure tetai e sitomena lua sina. ²⁰ Lala moki asape “Yermare ga na sike e naga, yar naña ñarina pe wowe viowa ne. !Ve ayagoga re!”

²¹ Ana lepas ñasia asape “Peraga, kiena visena wo la nene pe pe visena kiena ne re yar naña yermare sike e poli. ?Ana sanape, yoko yermare viowa kilia kila ruru si kilamaran yaru naña pe ñala, sa naña yaru nene kila rui?”

Yesu pisawal meraravan naga pan le Yu lala

²² Ana e pogos nene la apim atol si pog na kala pupia ñağena tai, ma Yerusalem. Ñağena nene apio asape Ñağena Navisa Ruruen Yuña Wa Ñana ne Ntewa, ana amiyuñen ke e pog na miava. ²³ Ana Yesu ñena pa sike e ñağena nene, ana pogos tai naga pa ma e Yuña Wa Ñana ne Ntewa, mial ke pa e pupia mraliu naña apio sape Mraliu Kiena Solomon. ²⁴ Ana yerka kiena le Yu lala naña asike ne apim puna, ape ñegas amiyervivia, apiun ñareran pania, asape “!Konua rui mesape mekilia ruru ko ko na ai, ana ko okilawan ko ña sanene pano-o! Visae ko na ope Navisaarena kiamimi na lelaga, imimi sinemimin mesape ovisa meraravan ruru van imimi nanagane!”

²⁵ Ana Yesu pisatañe la, sape “?Ana in na nepisa ruru pan amiu ña rui, po pere? Nepisa ruru pan amiu ana amon naña alelaga ea. A pupia yuñena kerkeviu la naña nemiyuñen e kia kiena ne kiau Ata, sa naña amiu apisu pa rui, lala ñena akila meraravan inu pan amiu rui, ²⁶ ana naga ñena nene amiu pe amlelaga re e poli. Amiu pe amlelaga re nena e inu, pona nanene vanon amiu pe ape ñegas na kiau sipsip re poli yo. ²⁷ Kiau sipsip lala amloge kilia pulgou, a in ñena nekilia la punu ga, a lala asuñe ataveve inu. ²⁸ In na nemla ke malena naña ve uro re pan la, ana tañatete akovio, pe yar re tai naña kilia war plan la vetan luñau. ²⁹ Nanene vanon kiau Ata ke narui naña ñar la pan inu, a naga ñarera manene laa taulu punu ga, ana tañatete yar tai war plan sipsip la nene vetan navisuarena na limana. ³⁰ Lelaga, inu nemio ata, imimi lua mepe taaga ga.”

Le Yu la sinela kar Yesu

³¹ Ana pogos naþa Yesu pisa pa visena nene, yerkawa kiena ne le Yu la sinela kar ke sina ga, aþar kilavaru lala asape akoveþmaria. ³² Yesu pisuia, ana pis pan la, piunia pisape “?In na nekila þarin yuþmaena wo lala e maramiu rui, naþa Ata sinenan sape neyuþmaenia, ana amiu asape akove inu vanon nape?”

³³ Ana la apisataþnea, asape “Peraga, mesape mokove ko, pe vanon re yuþmaena wo poli, ana vanon ga naþa ko na oþarnena kare ke kia kiena ne Ntewa, naþa ko, ko na ope yeririna ga, ana silaga okila ke sa naþa ope Ntewa pa rui!”

³⁴ Þisi na Yesu pisataþne la, sape “E kieta Tus Wa, visena kiena ne Ntewa tai teke e Tus Na Yauena, naþa pis pa yeririna nae Israel lala, pisayu sanape naþa lala ape narina lala, naga pis sanene pan la, pisape ‘Amiu na sa ga ntewa lala.’

³⁵ “Sanene na, tevisu e yo nene sane la naþa visena kiena ne Ntewa nene pan la, la ape yeririna ga lala, ana visena nene pisape lala ape ntewa lala, ana visena nene naga pe kieta Nasiriena Wa tai, monar ve lelaga ga.

³⁶ “Ntewa pisayu kiena yeririna la sanene rui, ana yoko ve sanape van inu, naþa in ga taaga naga miawawo inu, mligan inu nepitom e yomarava nini? Mesmesun ga naþa nepisawal nesape naga pe kau Ata Ntewa, ana inu nepe narina, ana amiu asape piowa ga naþa nevisa sanene. Apisa ke asape in na neþarnena kare kia wa kiena ne Ntewa, ana pe sa re nene poli. ³⁷ Visae pe lelaga naþa nemiyuþnae ke pe pe kiena re arimau poli, pona amiu ve alelaga re e inu, naga pogaga. ³⁸ Ana visae nekila ke kiena yuþmaena lala, pona amiu amlelaga ke e inu po pe amlelaga re poli, a amiu monar alelaga e kiau kile lala, sane ape yuþmaena kiena ne Ntewa lelaga. Visae ve sanene yoko amiu akilia avisu kilia sane Ata teke e inu lelaga, a inu þmena neteke e naga.”

³⁹ Yesu pisa sanene pan la, ana kiela sitomena þmarera maran taaga suþna ga. Lala akilali naþa atararli si naga sanene na, amilan ga naga pure tan likan la pure pano.

⁴⁰ Ana Yesu petan si Yerusalem kusro pito sina e wii naþa Yortan lepas na vano, e yo naþa Yoane Nakeena kee yeririna lala ea nanua sumo. Ana suþna e yo nene yam piavi li þnaga, ⁴¹ ana yeririna la apim ke puna silaga. Apim apisayu naga asape “Yoane nanua, naga pe kila re kile la sane yar nene kila ke ne poli, ana naga pisa plan sur moki e lepas na puna, ana tepisu e kilamarata sane sur la punu ga naþa pisa ne apim ape lelaga ga narui.” ⁴² Ana kiela sitomena na sanene kila sane la moki nae yo nene amlelaga e Yesu.

11

Suniena kiena Lasaros

¹ Ana pogos naþa Yesu sike perina wa, maiena þmarera tai pimi tol kiena erau tai, Lasaros. Lasaros nene vinena la lua naþa Maria amio Mareta, la telu nene nae narin pulkumali naþa Petani lavisin Yerusalem. ² Ana Maria ne naga þna nene naþa siraunia taron ponotaninu e Yesu, miyumu vania lana e vilþarina. ³ Ana pogos naþa vinena la lua nene apisu þmenela nene mai keviu sanene, amligan visenan pa pan Yesu, asape “Suþe, kioþna erau naþa ko na sineþna si naga, mai tai na piowa ga.”

⁴ Ana pogos naþa visena nene pa tol Yesu, naga pe pito re poli, pisa ga sape “Inanena nene pe na marena re poli. Inanena nene sa ga mrapa kiena ne Ntewa tai, vena kila meraravanen kiena urarena, a vena kila meraravanen kiena pupia puriukawaena naþa mla pan inu Narina Ntewa.” Yesu pisa visena nene, sa naþa kilia pa rui suri naþa yoko yuþmaenia.

⁵ Yesu sinena si Mareta nene paþisi amio luena na ve tokak a þmenela nene, a sinena mie la paþisi, ana pe kan pog mesmes re na kilaen suri nene poli wa. ⁶ Sa nene, naga pe pa re ga poli, suþna si legiena lua e yo nene naþa wii nae Yortan lepas na vano. ⁷ Suþna si sanene, þisi na pisa pan imimi nalogena lala, sape “Pogaga, tokusro sina ga teva si yo nae Yutea.”

⁸ Ana imimi mesitoñal ke yerka kiena le Yu lala e yo nene naña sinela kar Yesu pañisi, ana memaraun vitoen sina. Mepiun tania, mesape “?Navianena, sanape? Nanua ga naña tesike ma ne na le Yu la akilayon asape akoveñar ko, ana nanagane na osape teva si pula.”

⁹ Ana Yesu pisa pan imimi pisape “Kiau navisatañeena van amiu naga sanini. E legiena, kana aora nena lualima yam taaga pa lua, pupia mrae tegoli yo, kila sane yar kilia yal ruruia, tañatete lolor. ¹⁰ Ana yar naña yal li e yemalolo na kolemallo, naga yoko lolor ga, vanon yomerarava nene pe tegoli re si kiena mrapa poli.”

¹¹ Yesu pisa visena nene pan imimi, kana kinasia sape naga kilia yaloro ga woga ga ne, tañatete suri viowa tai vania vano tol pogos naña Ntewa ligan ruruia sape akilia aweñar naga. Ana miakolkol sina ga, sape “Kieta erau nene momalio rui. Ana nanagane na tevano na neviopege sina naga.”

¹² Ana imimi nalogena la pe memlogekilale re kinas nen visena nene po, ana mepisalupar si Yesu, mesape “Suñe, visae naga momalio, pogaga ne, yoko kilia loge wo sina ga ne.” ¹³ Mepisa sanene vanon mesitom ke mesape Yesu pisa ke sape Lasaros pa ruru ke ga, ana pere, Yesu pisa ke kana marena ne.

¹⁴ Ana nagane na Yesu pisa meraravan pan imimi narui, sape “Lasaros mare pa rui, ¹⁵ komin pogos naña naga mai, pe nesu re nemio la poli. Ana sanene na nepisu pogaga, a po ñena ga pan amiu, vanon sane kiena marena nene yoko imi ve sa pulmas tai van amiu, vena amiu akilia alelaga lelaga e inu. Pogaga, tevanon, tevisuia.”

¹⁶ Ana imimi nalogena la memaraun ke navaena wa, ana Toñas naña apio sape Toñas Kaora, pisa pan imimi sape “Amiu asuñalu, ita punu ga tevano. Kieta Suñe sinenan sape va mare sanene, popon ita punu ga tevano, temare temio naga veraga.”

¹⁷ Ana imimi punu ga memial veraga mepano, mepa makate lavisin narin pulkumali naña Petani. Ana apisawal pa Yesu asape Lasaros, amligan tasnena mono e pulu kilavaru legiena vari ñaro rui. ¹⁸ Ana kumali naña Petani sike lavisin ga pupia kumali naña Yerusalem, torokin sane kilometa ve telu ga, ¹⁹ kila sane le Yu moki nae Yerusalem, pogos naña amloge marena nene, sinela miye Mareta amio Maria, ana apim vena atag amio la atagin naga naña kovio. ²⁰ Ana Mareta sike amio la nene, ana amligan visenania, asape Yesu pam sike pa garo ne e mrapa rui, ana naga suñal pato talopania. Ana luena naña ve tokak, Maria, naga suña ga loyuña, ana pe pa re vanua poli. ²¹ Ana Mareta pitomi pisu Yesu, pisa pania, sape “!Suñe, visae ko na ovim ga e nini, ñenemimi nene tañatete kovio! ²² Ana in na nemlelaga pe sur korena ga naña mare, ana sur naña ko oviun vetan Ntewa, yoko naga tañan ga van ko.”

²³ Ana Yesu pisa pania, sape “Mareta, yoko ñneneña nene suñal mal sina.”

²⁴ Ana Mareta pisatañea, sape “Lelaga, nekilia ke ne, nekilia nesape naga yoko mal sina ga e pupia nasuñalena e legiena maro.”

²⁵ A Yesu pisa visena nene pania, sape “In na nepe mrapa na suñalen sina, in na nepe purpes nen malena. Yar naña lelaga e inu, pe suri korena ga naña monar mare e yomarava nini, ana yoko mal sina ga. ²⁶ Yar naña tol malena nene, ana nalelagaena e inu teke e naga, naga tañatete visu si marena pogos tai. ?Mareta, ko na omlelaga sanene?”

²⁷ Naga pisatañea, sape “O, Suñe nemlelaga. Nemlelaga e ko, sane ko na Navisaarena, narina ne Ntewa, ko ko na naña siar nanua sumo sumo apisa ke sape yoko imi tamalia yeririna lala na yomerava nini.”

Yesu wamarana la mlalau

²⁸ Ana pogos naña Mareta pisa pa sanene pan Yesu, pa sina ga loyuña, pavinin vinena naña Maria, pis malum ga pania, sape “Navianena naña! Pam pa rui, sike garo e mrapa wa, pisape visu ko kone wa.” ²⁹ Maria mloge, suñalu veraga, sape vito visu Yesu, ³⁰ nane e ga e mrapa naña Mareta pisu ga naga e nanagane, vanon naga pe pimi re loyuña e kumali poli wa. ³¹ Ana le Yu la naña asike loyuña amio la, apisu naña suñal pa vanua pito yuroro sanene na, asitom asape naga sinenan sape va tag sina e pulkilavaru, ana la ñena asuñalu, ataveve naga apano.

³² Ana Maria mial m̃a pito sanena, pimi tol e naḗa Yesu sike ea. Naga kira pisuia, pimi lavis puna, kuan mlor pito tano e mialana, tag pania, pisape “!Suḗe, visae ko na oimi ga e nini, m̃enemimi nene taḗatete kovio ne!” ³³ Ana naga tag m̃a sanene, le Yu taḗena la naḗa atavevea, lala m̃ena atagi. Ana pogos naḗa Yesu pisu pupia naloge viowaena kiena Maria la sanene, naga m̃ena mloge piowa, mnunu sur nene sane urmi manene e losinena, ³⁴ naga piun petan la, sape “?Amiu amligan mono ke pe?”

La asape “Suḗe, oimi teva tevisuia.”

³⁵ Yesu mloge sanene, ana tagena pimi e naga, wamarana la mlalau.

³⁶ Pogos naḗa apisu naga tag sanene, la ḗas asape “!Lelaga naḗa ne, naga sinen si kiena erau nene paḗisi naḗa ne, kila sinena piowa na sinena piowa!” ³⁷ Ana lala ḗasia, naviunena teke e kiela sitomena, asape “Yar naḗa nanua kila kilamara ḗala tai, kilamarana pimi po sina ga. ?Visae sinenania na, naga kilia kila naḗa kiena erau nene ve kovio re ga, a?”

Yesu pioḗege si Lasaros petan marena

³⁸ Ana Yesu mial amio pupia sineyeena, amio Maria lala apa akate e pulkilavaru naḗa amligan tasnena ne Lasaros mono ke ea. Pulkilavaru nene naga pe puluve, naḗa amligan pupia kilavaru tai mono ke pulusia. ³⁹ Ana Yesu pisape akuslua pupia kilavaru nene.

Ana vinena taḗena nene Mareta mloge naḗa Yesu sape akuslua kilavaru, ḗisi na sape visaluḗaria, pisa pania, sape “Suḗe, piowa naḗa tekila sanene, vanon naga mare legiena vari ḗaro pa rui, yoko ponos kona va ḗisi ne.”

⁴⁰ Ana Yesu pisataḗne pania, sape “?E, ko na pe ositoḗmal re si kiau visena naḗa nepisa pan ko rui? In na nesape sa ko na olelaga ga, ovisu naḗareraena na urarena kiena ne Ntewa naga yuḗae.” ⁴¹ ḗisi na la akila ga, akuslua pupia kilavaru, ana Yesu kira pa metava, mlen, sape “Ata, nepisa siḗa pan ko keviu naḗa ko na okekan nalogeen kiau naviunena nini. ⁴² Nekilia sane sur ya naḗa visae in ga taaga nesape neviun tan ko, yoko ko ologe ga. Ana suri naḗa neviun tan ko nagane na, nepiunia e maran la ne asuḗmal asike nini, vena la m̃ena akilia aloge. Ana visae avisu sane ko ovisataḗne van inu sa naḗa nepiunia, kilia iilala alelaga sane pe lelaga ko na omligan inu nepitom e yomarava nini.”

⁴³ Ana pogos naḗa Yesu mlen pae sane na, naga kii m̃arera sanene pano, pisape “Lasaros, omolue ovim.”

⁴⁴ Ana amilan naḗa yar mare suḗmalu pimi vanua, ḗarar kulmrae la naḗa amluluar naga ea, tamalele ke e limana la amio lana a ḗarina asike wa. Ana Yesu pisa pan la sape “Pogaga, awar plan kulmrae la nene vetania, vena naga kilia yal ruru sina ga.” ḗisi na akila, ana Lasaros mal ruru ga sike si amio la.

Pupia kumali taḗan sape monar aweḗar Yesu mare

Matiu 26:1-5; Mak 14:1-2; Luk 22:1-2

⁴⁵ Ana le Yu la moki naḗa ataveve Maria apim e pulkilavaru nene, pogos naḗa apisu Yesu kila Lasaros mal si e marena sanene na, amlalaga nena e naga. ⁴⁶ Ana lala ḗasia amon lelagaena, aḗasuḗe la sina ga, apa si pu Varasi lala, apisawal pan la sur naḗa Yesu miyuḗaenia. ⁴⁷ A pogos naḗa amloge pe akekan re nena ga, ana lala amio yerkawa na yar wa lala, apio m̃ena lala taḗena na pupia kumali kiena le Yu lala apim lele taaga asunyua. Ana pogos naḗa apim pae lele taaga, apisawal pan la asape “?Yoko tekila kan yar nene narui? Naga kila ke pupia kile la paḗisi e maran kieta yeririna lala. ⁴⁸ Visae ve tevisawo re naga, yoko kila m̃a sanene vano-o ve tai re naḗa ve lelaga re e naga, yoko ure la punu ga ataveve ne. Ana visae la na mara nae Rom avisu yar nene kila ke sape imi ve pupia nasumonena tai sanene, yoko sinela kar ita le Yu la punu ga. Yoko akilia aimi akila mara amio ita vano-o akila kare kieta ḗegas punu ga amio awe plan kieta Yuḗa Wa M̃ana Ntewa.”

⁴⁹ Apisa ke sanene na, kiela pupia nasumonena Kaeḗas, naḗa e kas nene na naga ḗuarar kia naḗa ḗarin Yaru Wa, pisa pan la, sape “?E, vanon ya ne kiamiu sitomena la plas ga sanene, naḗa amiu aminue ga sane yoko tekila ya ne van yar nene? ⁵⁰ Sur ya na po pan

amiu? Pogaga naŕa yar taaga ga nene kila ita make ga tokovio, pona popon naga taaga mare vena tamalia kieta ŕegasia ita punu ga?”

⁵¹ Pogos naŕa pisa visena nene, naga mape pisawal ke sitomena tai naŕa kiena ga. Ntewa kila naga ŕuarar yuŕaena na ŕarin yaru wa e pogos nene, ana Ntewa ke narui mligan ŕmena visena nene e kiena sitomena, vena visawalen visena lelaga tai, sape Yesu monar mare vena tamaliaen yeririna punu ga. ⁵² Naga pe kilia re poli, a pisa ke sape siraunia, pogos naŕa Yesu mare, naga pe maren re ga ŕegas kiena ne le Yu ga la nene poli, ana kiena marena panon ŕmena narina ne Ntewa taŕena lala naŕa asike ŕmena e purvanua taŕena lala, ve naurepran laena punu ga aim ave na mratava taaga ga.

⁵³ Ana e pogos nene, Kaeŕas pisawal visena nene, pure sitomen kiena ne yerkawa la punu ga kiena ne le Yu la asape Yesu monar mare ga. Ana siar e pogos nene, apisayu ke silaga, asape akilia akila ve sanape. ⁵⁴ Ana kiela sitomena nene kila Yesu mialorotete sina likan yeririna lala e yo nae Yutea, naga ŕere plan imimi, mepa mesike e narin kumali tai, kiena kia Ipraim, naŕa sike perina, lavisin yokorena.

Lavisin pog na ŕaŕagena maro na Sitoŕalen Natamaliaen kiena ne Yesu

⁵⁵ Ana lavisin pog na ŕaŕagena kiena le Yu la nene, ŕaŕagena Nasitoŕalen Natamaliaena. Ana le Yu la naŕa asike e yo la ne, amligan ke kiela yo lala, apa ke ma Yerusalem, asape ava e Yuŕa Wa ŕana ne Ntewa, akila kuŕaŕaena naikikena e marana ne Ntewa, sumon naŕa ŕaŕagena siaria. ⁵⁶ Ana pogos naŕa yeririna la apa ke metava e Yuŕa Wa, asike akale ke Yesu. Akale pano aŕna re naga poli, ana la apiuyun ke petan la, asape “?E, amiu asitom sanape? ?Yoko naga vim kate e ŕaŕagena nini, po ve vim re?”

⁵⁷ Ana ŕarin yar wa la amio Varasi lala, lala ŕmena asitom ke asape pona Yesu kate li e aora nene yo. Ana la apisaar ŕarera asape visae avisu Yesu sike lele tai, monar aligan visena va van la vena aim na atararia.

12

¹ Ana pogos naŕa ŕaŕagena Nasitoŕalen Natamaliaena nene pere ke ga wa, legiena orai sike ga wa, ana imimi memio Yesu mepa tol si narin pulkumali naŕani Petani. Ana mepa makate si e uŕna ŕmana ne naga naŕa Yesu kilamalia sina ga pe piavi re poli, naŕa Lasaros. ² Mesuŕna memio la pano-o, la nene asape akila kinanen tai akan amio Yesu. Ana pogos naŕa akila ruru punu pa sur lala, imimi memio Yesu mepim metotano, a Lasaros ŕmena totano amio imimi, ana vinena naŕa Mareta naga ŕar ke kamimi kinanena pimi. ³ Ana vinena ne Lasaros taŕena naŕa Maria, naga ŕmena suŕna ga, naga kus pupia pias na ponotaninu pimi, ponotaninu nene apio asape nat, naga ponotaninu tai naŕa kana maran kilavaru pa metava paŕisi. Ana kus pimi lavis pu Yesu, taronia miyumuvan la Yesu ea. ŕisi na Maria tar pupia viluna piavi nene, miyumuvan sina ga la Yesu, ana pe piavi re poli, ponotaninu naŕa ne ponos miyere make loyuŕna e naŕa asike e ne.

⁴ Ana e pogos nene, nalogena kiena ne Yesu naŕa yoko siraunia wilwilin wania, Sutas nae Kariot, naga ŕmena pisu ke sur nene. ⁵ Naga pisape “?Vanon ya ne ve awilwilin re ga pupia ponotaninu nene? Visae sanene, akilia ataulu pupia varu tai, sane kilavaru naŕa yaru tai tauluia e kiena yuŕaena na kas wetelu tai, ana akilia ataŕnan vena iilaen la naŕa pe kiela sur la poli. !Akila kare ga nel!”

⁶ Naga pisa sanene, ana naga pe sitoŕal re yar la naŕa pe kiela sur re la poli. Naga pisa vanon naga pisuar ke kiamimi karo na varu, a pinaun la ke, kan ke kiamimi varu lala, a naga sitom manene laa varu na ponotaninu nene.

⁷ Ana Yesu pisataŕne e sur naŕa Sutas pisa, sape “Ei, piowa naŕa ko ovisa kare vineta sanene. Naga kila sanene pan inu vanon naga sitom ke sape legiena naŕa yoko asinwo inu pimi make lavis narui. ⁸ Yoko yar la naŕa ve kiela sur re la asulue ga amio amiu, vena amiu aiila la sanene, ana in na pe pe nasulueen re nemio amiu poli. Sanene, sur nene naŕa naga kila pan inu naga po paŕisi.”

⁹ Ana pe piavi re nena ga, visena pato tol lala naþa aþarpiran la ke e þaþagena garo Yerusalem, sape nagane na Yesu pam sike Petani rui. Þisi na lala apava ke asape avisuia, a pe naga re ga poli, asape avisu mēna Lasaros, naþa Yesu kila naga mal si rui. ¹⁰⁻¹¹ Yeririna la apa apisu ke Lasaros sanene, a sur naþa Yesu miyuþnaen pania kila naþa lala moki, pano tol li na sumonena laþas kiena le Yu lala, aþure petan kiela nasumonena taþena lala, apim amlelaga e Yesu narui. Ana yer keviu kiena yar wa lala naþa asike ne apisayu sur nene, apiranaria asape akale mrpa naþa awe moþmar Lasaros mare.

Yesu pimi tol yo naþa Yerusalem

Matiu 21:1-11; Mak 11:1-11; Luk 19:28-40

¹² Lasaros lala akila pae kinanena kana ne Yesu þisi, ana e legiena taþena sina, visena pato tol pupia þina la naþa apam asike Yerusalem e þaþagena, asape Yesu naga pimi ke rui, vena vim loyuþna e pupia kumali nene. ¹³ Ana yeririna la amloge, asuþmal amial apa ate luþmaþmela lala, amiyal apano vena avitawe naga mrpa.

Asape akila sanene vania vena naga vim ve sane kiela þarin suþe, ana la amial apa sanene, apioyon ke sanini apisape,

“!Pona we-e po! Teieluar naga, kieta þarin suþe viu nae Israel!

!Ntewa na mava ovisa ruru naga naþa pimi e kioþna kia!”

Yauena 118:26

¹⁴ Ana Yesu mial pimi ke, naga kila naþa aþure narin togki tai pimi puna, pa totano ea mial pimi. Sur nene naþa naga kila taveve ruru ga visena tai na Visena Wa naþa pisape.

¹⁵ *“Amiu le Yerusalem lala, amiu ve amarau re sina, Amiu avisuia, nanagane na kiamiu þarin suþe naga pimi ke pun amiu narui.*

Naga kus ke ga narin ninus nen togki tai, pa totano ea pimi ke.”

Sek 9:9

¹⁶ Ana e pogos nene, imimi nalogena kiena ne Yesu lala pe mesitoþmal re visena nene poli, a siraunia, pogos naþa pa pae ma e peni, imimi mepisu kilale ga na wa sane visena marua na nanua ne naga pisayu naga mesmes, ana mepisu sane naga kila sur punu ga mesmesu ga sa naþa Visena Wa lala apisa nanua sumo asape yoko Navisaarena yuþnaenia.

¹⁷ Ana þisi na pupia þina nene kila ke naworworena pa Yesu sanene na. Lala moki la naþa nakoneva asike amio naga pogos naþa pio Lasaros mþal si petan marena, ana la apa apisawal pupia kile nene pan yeririna taþena lala, ¹⁸ ana pogos naþa lala amloge sur la naþa Yesu miyuþnaenia, sinelan asape avisuia, ana la apim vena ava avisuia. ¹⁹ Ana lala punu ga nene, pupia þina pa tai narui, ana pogos naþa le Varasi la apisuia, amloge piowa, asilin þarila, apisape *“Toþaryon yar nene pano-o piowa ga. Naga taulu ita punu ga, pure yomarava wetelu nene apa ataveve naga rui.”*

Le Krik laþasia asape avisu Yesu

²⁰ Ana e yeririna moki la naþa ke metava ma Yerusalem vena alotun Ntewa e þaþagena nene, lala þasia pe ape le Yu re poli, lala le Krik la naþa apim amlelaga e Ntewa sane le Yu lala. ²¹ Ana pogos naþa amloge manene laa kia kiena ne Yesu, asape avisu naga. Apa akale, akirawal kiena nalogena naþa Pilip nae Petsaeta ma Kalele, ana apiun Yesu tania.

²² Ana Pilip pa pisawal pa Antru, þisi na lalua apa apisawal pa Yesu.

²³ Ana pogos naþa Yesu mloge sape la naþa pe ape le Yu re la poli asape avisuia, naga pisawal sape *“Nanagane na pe pogos mesmesu vena Ntewa kila kiau kia, inu Narina ne Yeririna, va metava. ²⁴ Nepisa pe lelaga pan amiu, sane visae kurus tai, visae ve amapla re, yoko naga taaga to korena ga toþna sanene. Ana visae amapla, yoko menun nena ga, ana siraunia kilia war si mras ve moki.*

²⁵ *“Sanene, naga naþa kekaran manene laa malena kiena e yomarava nini, taulu naþa kekaran inu, yoko kilalua, a naga naþa pe sitom manene re naga poli, yoko naga suþna ga woga ga vano-o tol malena viu naþa pe luas re poli.*

²⁶ *“Yere Yu pona yere Krik naþa sape sinenan kiau yuþnaenia, sinenan sape ilanua, naga monar taveve in lue ga. Ana pogos naþa naga taveve inu ke sanene, yoko e lele ya naþa*

sa neva nesike ea, a naga m̄ena kilia amio inu. Yar naḗa pe yar na kiau yuḗaena, yoko Ntewa la kia wo vania.”

Yesu sunyu kana marena

²⁷ Ana Yesu siar sitomveve ke naḗa yoko ve ve piavi re na, monar mare, ana mloge urmi paḗisi e naga. ḗisi na sape “Nanagane na, nemloge sane sitomena la moki e losineu. ? Yoko nevisa ya ne va kau Ata? ?Popon nelen, neviun vetania, nesape: Ata, awis otarlua inu e aora m̄arera na loge viowaena nene? Pona piowa ga naḗa nevisa sanene, vanon in na nepim e yomarava nini vanon nenaga yuḗaena ne nanene. ²⁸ Peraga, popon nevisa ve sa ga nene, nevisave: Ata, awis okila kioḗa kia vim ve keviu kome sur la naḗa sa akila van inu.”

Ana pogos naḗa Yesu pisa pa visena nene, pulgo tai metava ma e peni pis pitomi tano, pisape “Inu na nekila ke kiau kia pa metava kom ga e ko rui, a yoko nekila ke sina ga na wa.”

²⁹ Ana ḗina la naḗa asu ke lavis ga amloge m̄aagena na pulgo nene, ana ḗasia asape polilu ga tai, la ḗas asape “Peraga, navisi ga ta ne pisi ke pania.”

³⁰ Ana Yesu pisa pan la sape “Pulgona naḗa temloge ne, naga pe pitomi re sape in na neloge poli, a pitomin amiu, vena amiu akilia sane inu nepimi pe. ³¹ Monar ve sanene vanon nagane na, pe pog na liḗereen yeririna na yomarava narui, pe pog na kovenluaen ḗarin suḗe na yomarava narui naḗa Yermare. ³² Vena nekila yuḗaena nene, monar netamalele metava e laki torovia, ana pogos naḗa neḗeke metava sanene, nekilia noure yeririna punu ga aim pun inu.”

³³ Ana visena kiena ne Yesu, naga pisa pe nakilaen imi merarava van la sane kiena marena pe marena tai naḗa ve sanape. ³⁴ Ana pogos naḗa ḗina la amloge, asape “Memloge ke naḗa apuloyu ke Visena Wa, pisa ke sape Navisaarena naga mal lue ga, taḗatete mare pogos tai. ?Ana sanape naḗa ko na opisa ke osape yoko atelan Narin Yeririna metava vena mare? ?Pona ko na opisa ke ga taḗena tai yo? Narin Yeririna ya naḗa opisa ke ne, naḗa yoko ve sanene vania?”

³⁵ Ana Yesu pisataḗe pan la, pisape “Inu na nepe yomerarava kiena ne Ntewa, a nekilia nesuḗa si nemio amiu yam ve plas ga. Ana pogos naḗa nesike nemio amiu, popon ayal e kiau yomerarava nena, visae peraga, yoko pupumalko kalo make amiu, a yar naḗa sape yali, taḗatete visuluḗar si kiena mrapa. ³⁶ Pogos naḗa inu naḗa nepe yomerarava nene nesike ke nemio amiu wa, popon alelaga e inu, vena amiu m̄ena akilia aim ave yeririna na yomerarava lala.”

Ana pogos naḗa Yesu pisa pa visena la nene, naga mligan la asike, petan la pa tapolou e lele tai naḗa taḗatete aimin sina naga.

Le Israel la pe sinelan re alelaga e Yesu poli

³⁷ Yesu miyuḗaen pupia kile la moki e marala rui, ana pe suri korena, lala pe sinelan re asape alelaga e naga poli. ³⁸ Ana kiela ḗelaga na sanene, akila ke sina ga sa ga naḗa le Yu marua la nasumo akila e pogos kiena ne yermarua Aisea, naḗa pisayu e visena la lua naḗa pisawalia. Nasumo pisa sanene, pisape

“Ntewa na mava, imimi mepisasawal ke pan la, ana lala pe akekarana re asape alelaga poli, a ko ko na okila meraravan kioḗa puriukawaena na lumoḗa van la, ana lala a ne pisuluḗaria? Pe ta re poli.” Ais 51:1

³⁹ Ana na luania, naga m̄ena pisa sanapen lala amon lelagaena e Yesu, pisa sanini, pisape ⁴⁰ “Ntewa ḗaryon la pano-o peraga, ḗisi na kila ga kilamarala la pimi pe kilamara ḗala, kila losinela la pimi m̄arera laa paḗisi.

ḗisi na kilamarala la taḗatete si avisu ruru suria, po losinela la aninuluḗar suria.

Visae pere, yoko la avilon la aḗasuḗe la aim pa panu rui, vena nekila ruru kiela malena la.” Ais 6:10

⁴¹ Ana visena kiena Aisea nene pimi e naga, siraun naḗa naga pisa naurarena kiena Navisaarena loyuḗa e Yuḗa Wa M̄ana ne Ntewa, a nanagane na tepisu sane pisayu ga Yesu lelaga, amio lala naḗa e kiena pogosia. ⁴² Ana sa naḗa visena la nene pisa, lala moki

pe amlelaga re e Yesu poli, ana þasia amlelaga, pa tol mēna kiela nasumonena laþasia. Na nene naga po, ana sur taaga naga piowa, akilawan ke ga kiela nalelagaena, vanon amaraun Varasi lala, amaraun asape sa akoven plan la laea vetan kiela yuṁa na lotena. ⁴³ Kiela marauena nene, naga sane lala pe asitom re si nakilaena vena yoko Ntewa kekaran la vanonia, ana lala asitom ke ga keviu sane yar taþena ga la avisu la ve sanape.

⁴⁴ Ana Yesu pisawal pupia visena maro tai e maran kiena yeririna lala, pisape “Naga naþa mlelaga e inu, pe mlelaga re ga e inu poli, ana mlelaga e imimi lua naga naþa mligan inu nepimi, ⁴⁵ a naga naþa pisu nu ke, sa ga naþa pisu ke mēna naga. ⁴⁶ In na nepim e yomarava nini, sane kana yomerarava, na kilaen yar ai naþa lelaga e inu, yoko ve su re si e yemalolo. ⁴⁷⁻⁴⁸ Ana visae la þasia aloge kiau visena, ana pe amlogear re poli, pona visae laþasia akovenwanu amon logeen kiau navianena lala, la nene yoko akus kiela naliþereena e legiena maro. E pogos nene, ve in re naþa nesuṁalu neliþere la, vanon in na pe nepimin re naliþereen re yeririna na yomarava nini poli, nepimin natamaliaena. Ana sur naþa liþerela, nane kiau visena la naþa nepisa ke pan la pogos naþa nesike nemio la nagane narui. ⁴⁹ Kiau visena kilia kila sanini, vanon pogos naþa nepisa plan ke visena la nene, in na pe nepis re ga e kiau kia in ga taaga poli, ana nepis ke e kia kiena ne Ata naþa mligan inu nepitom tano. Naga ga pisa plan ruru pan inu sur la punu ga naþa pe kiau na visaplanena, ⁵⁰ ana sanene, silaga in na nepisa ke sur punu ga naþa Ata sinenan pisape nevisa. A kiena navisaluaena punu ga nene, nekilia sane malena wo naþa pe luas re e poli, sike ga e lala.”

13

Peni na luas nen malena kiena Yesu, ana naga kevan lana ne kiena nalogena lala

¹ Nanagane na, sur la punu ga akila ruru pa rui, naþa peni ga na pupia legiena naþa Þaþagenana na Sitoṁalen na Tamaliaena siaria. Ana Yesu pisu kilale ke pa rui sane kiena pog pimi ke narui, legiena ga na peni pe pog naþa monar ligan si yomarava nini wasuþe sina va puna ne arimana. Pimi tol pogos nene, e mrapa la moki, naga kila po paþisi pan la naþa puna naþa asike pa e yomarava nini, sitom la paþisi, a nanagane pe pog na sitom laen va ve keviu laa sane, vano-o tol naþa kiena malena kovio vanon la.

² Ana naga sike amio imimi kiena nalogena lala e yo ma metava, kila ke kana kinanena maro amio imimi. A Sutas naþa nae Kariot ne, narina ne yermarua Saemon, naga mēna sike ke amio imimi e pogos nene, naga sike amio kiena sitomena viowa na wilwilinwanen Yesu, komin naþa Yermare mligan teke e kiena sitomena rui. ³ Ana mekinana mēna pano-o þisi na Yesu naga sitomveve ke sanape naþa nanua sumo, petan ma puna Ntewa pitomi tano, a sanape na Ntewa mligan sur punu ga sike e limana, a sanape naþa monar tauluia, siraunia naga kilia vetan si yomarava nini va sina puna.

⁴ Naga mloge pupia sineyeena e losinena vanon imimi kiena nalogena lala, sinenan sape kila kile tai e sineyeena nene van imimi, vena imimi mēna ga mekilia mekila van imimi. Ana suṁalu, pa miyenlua mēna kulkota, pitavin tawol tai, ⁵ pio wii mēne pialo tai, kus pimi, siar kevan lamimi lala, kila naga sane pe yar na yuṁae kiamimiena tai. Kevan mēna lamimi la sanene pano-o, miyumuvan la e tawol naþa pitavin ke ne, ⁶ pano-o pimi tol lana ne Saemon Pita. Ana Pita pisu mēna naþa naga pimi tolia, pisa pania, sape “?Suþe, yar nene? Ko na ope yerka wa paþisi wa, pe mesmes re naþa ko na okevan lau sanene poli.”

⁷ Ana Yesu pisataṁea, sape “Pita, sur na nekila ke ne, nanagane na pe opisu kilale re poli wa. Ana siraunia, ko na okilia ovisu kilale ruru ga na wa.”

⁸ Ana Pita sinenan sape kilawo Yesu wa, sape “Peraga Suþe, taþatete ga netaṁan okevan lau.”

Ana Yesu pisape “Visae ve nekevan ruru ko re, pe kiau sur re tai teke e ko poli.”

⁹ Ana pogos naþa Pita mloge nene, kiena sitomena pe taþena narui, pisa pa Yesu sape “!Suþe, visae ve sanene, netaṁan ga, sineun nesape okee inu, ane ve lau re ga, okee inu punu ga va tol mēna luṁau lala amio þaruul!”

¹⁰ Ana Yesu pisatañe pa Pita e narin ðakaiwa tai naþa pisayu þelaga naþa yaru mekiki e kiena mlamulena viowa lala. Naga sape “Yar naþa kulu mare ga na wa, yepena punu ga merarava rui. Ana visae lana ve namname sina, ana taþatete naga va kulu punu sina ga, yoko naga kevan ga lana. Ana nepisu sane amiu sanene narui. Amiu punu ga amerarava ruru pa rui, a amiu yar ga tai naga pe sa re nene poli, naga pe namname ga moña ga.”

¹¹ Ana Yesu pisa sanene, sape pe imimi punu re memerarava poli, vanon naga kilia pa rui imimi yar tai naþa yoko ve yam ve piavi re na naga wilwilinwan naga.

¹² Ana Yesu kevan lana Pita amio imimi taþena lala pano-o þisi, pa miyen sina ga ðmana kulkota, totano piun tan imimi, pisape “?Amiu apisuluþar ke yuñnaena naþa nekila pan amiu ne, po peraga? ¹³ Sur nene naga sanini. Pogos naþa amiu apio inu ke asape nepe Navianena pona nepe Suþe, amiu na apisa pe lelaga ga. ¹⁴ Ana visae apisu naþa inu kiamiu Navianena po kiamiu Suþe nekevan lamiu, popon amiu ðmena akekevan ke lamiu lala, amiu akilakila þelaga wo la sanene van amiu silaga. ¹⁵ In na nekila sanene pan amiu, vena amiu na yoko ataveve maran taaga e legiena la naþa pimi ke ne, naþa amiu ga akila si van amiu sane in na nekila pa pan amiu rui. ¹⁶ Nepisa pe lelaga pan amiu, sane yar na yuñnaena naga taþatete to metavan kiena yerkaawa, po yar na waren visena naga ve to re metavan naga naþa mligan naga pano. ¹⁷ Ana visae amiu avisu sane kiau visena la nene pe lelaga, a visae amiu akila ke sur la naþa nepisa, yoko pupia navisa ruruena vim van amiu sirau.”

Yesu pisawal sape yoko Yutas wilwilin wan naga

Matiu 26:22-25; Mak 14:17-21; Luk 22:21-23

¹⁸ Ana Yesu pisape “Nepisa sanene, a pe nepisa amiu punu re poli, komin ita yar ga tai naga sike ne, naþa naga kiena sitomena pa pe taþena pa rui. Lelaga, in na nekilia ruru amiu punu ga naþa nekilogia amiu, ana nekilia nesape amiu yar tai yoko kila mesmes ga sa naþa Visena Wa pisawal nanua rui, naþa pisa sanini, sape

‘Naga naþa imimi lua makan pae kau kilaparavi,

nanagane na naga tarlua pa lana rui vena vielua inu!’

Yauena 41:9

¹⁹ “Sur nene naga piowa ga, ana nesape nevisawal van amiu sumo wa, ana pogos naþa avisu sina ga ve yam piavi re na, akilia alelaga asape inu na lelaga, in na naga naþa mon lue. ²⁰ Nepisa pe lelaga pan amiu, yar naþa porworun yar na waren kiau visena naþa nemligan naga piñasu, naga sa naþa porworun inu ke ne, a naga naþa porworun in sanene, naga sa naþa porworun ke naga naþa mligan inu nepimi.”

²¹ Yesu naga pisa pae visena nene pan imimi, ana siar mloge naþa sinena pulen naurmiena lala, pano-o pisawal meraravan ga e maramimi, pisape “Lelaga nepisa pan amiu, yoko amiu yar tai wilwilinwan inu.”

²² Ana pogos naþa naga pisa sanene, imimi memilania, mesuñna metamaren imimi ke sina ga, memninue ga mesape naga pisa ke imimi a ne. ²³ Ana e pog nene, inu Yoane, sane nalogena naþa Yesu sinena sii inu paþisi, inu netotano ke ga lavisin naga, ²⁴ þisi na Saemon Pita kila limana pan inu, sape “Wolai, ko na oviunli ga tania, ovisave naga pisa ke ai.”

²⁵ Siraunia nepa la lavisu tekaki ga, nekian þaruu pa laa lavis puna ne Yesu, nepiunlili tania, nesape “?Suþe, ko opisa ke imimi ai?”

²⁶ Ana Yesu pisatañea, sape “Nepisa ke ga naga naþa narin kinakina kilaparavi nene, nowuton vito e ðmata pursi, ana nekian vania.” Ana naga kila sa ga naþa naga pisa, mla kilaparavi tai, kian pito e ðmamimi pursi, ana mlalua mla pan Sutas, narina ne yermarua Saemon nae Kariot. ²⁷ Þisi na Sutas mla kania, ana veraga ga, Yermare pimi pa loyuñna e naga. Þisi na Yesu pisa pania, sape “Pogaga, sur naþa pe kioña nakilaena, oto vilaga okilalia wa.”

²⁸ Ana e imimi taþena la naþa metotano ke e kinanena nene memio Yesu e pog nene, pe imimi yar ta kilia re poli, sane vanon ya ne Yesu pisa visena nene pan Sutas. ²⁹ Imimi

ĥasia asitom amape vanon Sutas naga pisuar ke kiamimi karo, ana Yesu miila vena va ul kamimi kinanena yo, pona va la kilavaru tai van la naĥa pe kiela sur re poli, pona sur tai ne sanene. ³⁰ Ana Sutas naga kilia ruru ga sur ya naĥa Yesu pisa ke pania, ana veraga ga suĥalu pa si vanua, naĥa sane yemalolo pa rui.

Navisaluaena vii na sinesiena

Matiu 26:31-35; Mak 14:27-31; Luk 22:31-34

³¹ Ana pogos naĥa Sutas pa pae vanua, Yesu siar pian imimi ke sina ga e sur la moki. Naga pisa pan imimi, sape “Nanagane na pe pog na naurarena kiena ne Narin Yeririna vim kate, nanagane na pe pog naĥa yoko naga kila naurarena kiena ne Ntewa vim ve keviu laa sane. ³² Ana sur ya naĥa yoko naga yuĥaenia, kila kia kiena ne Ntewa va metava, siraun naga nene, ve ve viavi manene re, yoko Ntewa visirlua sina inu narina, kila ĥena kiau kia va metava.

³³ “Naruu lala, narin aora ga teke na, naĥa nekilia nesike nemio amiu wa, lavis ga naĥa monar neligan amiu. Pogos naĥa amiu avisu in na nevetan amiu pae na, yoko asape akalenulia ko laa ne, ana sur naĥa nepisa pan yerikawa kiena ita le Yu taĥena lala, nevisa ĥena si van amiu, sane lele naĥa in na yoko neva ea, amiu taĥatete asiraunu aim e nanagane. ³⁴ Ana nanagane nesape nela si navisaluaena vii tai van amiu, sane amiu monar sinemiu sisii manene amiu, va laa sanene ve sa ga naĥa sineu sii amiu. ³⁵ Ana visae sinemiu sisii amiu ke sanene, naga nene pe mrapa nakilaen yeririna nae yomarava la avisu kilia sane amiu ape kiau nalogena kemua la pe lelaga.”

³⁶ Yesu pisa pae pupia visena nene pan imimi narui, ana Saemon Pita sitoĥal ke sina ga naĥa Yesu sape ligan imimi, naga piunia sape “Ana Suĥe, ko na yoko okom pe?”

Ana Yesu pisataĥea, sape “In na nepa ke e lele tai naĥa amiu taĥatete asiraun inu aim e na wa, ana akilia ga aim e sirau.”

³⁷ Ana Pita mloge, piun sina ga, pisape “Suĥe, sanape in na taĥatete neim nemio ko ke nanagane? In na nekekarana ga netaĥan kiau malena vanon ko nanagane.”

³⁸ Ana Yesu pisa pania, sape “Ko opisa osape otaĥan ga kioĥa malena vanon inu? Pogaga, ana nevisa ve lelaga van ko, ĥane ga ne kolemallo, pogos naĥa lakaporo ve kokoreko re wa, ana ko na oviro inu yam ve telu pa narui osape pe ope kiau re poli.”

14

Yesu mla visena na kila luĥeluĥeena pan kiena nalogena lala vena ve aloge manene re viowa

¹ Ana Yesu pisa naĥa imimi nalogena la memloge piowa naĥa naga monar vetan imimi, ĥisi na pisa pan imimi, sape “Amiu ve akila re naĥa sinemiu viowa manene sanene. Aĥasine Ntewa rui, ana monar awasine in ĥena ga. ² Sa naĥa nepisa pa ĥa rui, neva nekila ruru lelemiu metava ma puna ne kau Ata, ana metava ma ĥana yuĥa, lele moki sike ea torokin amiu punu ga. Visae ve ve lelaga re, ve nevisa re van amiu. ³ Neva nekila ruru lelemiu nene, ana siraunia, nowasuĥe sina, netom tanon amiu, noure amiu avam punu, asulue ga amio inu e lele naĥa yoko nesike ea. ⁴ Ana mrapa naĥa na vaen tol lele naĥa nepa ke ea, amiu akilia pa rui.”

⁵ Ana Toĥas piun petania, pisape “Suĥe, imimi memninue ga lele naĥa ko opisa ke osape ova ea, ana sanape ne yoko mekilia mrapa na vaen ea?”

⁶ Ana Yesu pisape “In na nepe purĥes nen mrapa, in na nepe purĥes nen lelagaena, in na nepe purĥes nen malena. Pe yar re tai kilia va ma puna ne Ata sa ve kom re pun inu. ⁷ Visae amiu apisu kilale inu, asape in na nepe ai, naga sa ga naĥa apisu kilale ĥena Ata. Ana nanagane, amiu apisu ke pa naga narui, sane siar na ne ĥane, amiu akilia naga ve lelaga.”

⁸ Ana Pilip piun petania, sape “Suĥe, sur ne naga ke nene narui naĥa sinemiminia, mesape mevisu Arimata. Awis, sa ko na ovisa lologia li naga van imimi, yoko mekekarana vaĥisi.”

⁹ Ana Yesu pisatañea, pisape “?Pilip, nesike nemio amiu tol kas via rui, ana ko pe opisul kilale ruru re in poli wa? Sa naña nepisa ke pa rui, yar naña pisu inu, naga sa naña pisu ke pa Ata narui. ?Ana sanape na ko opiun ke sina ga osape nevisa lologia li Ata nae ma e peni van amiu? ¹⁰ ?Ko na omlelaga sane inu, in na e Ata, a Ata e inu, po ko na pe omlelaga re e poli? Visena la naña nepisa ke pan amiu la, pe sa re naña inu ga taaga ne nepis ke e kiau kia poli, ana Ata naña teke e inu naga kila ke kiena yuñena la nene pimi þarpoyo e inu. ¹¹ Popon amiu alelaga e sur la naña nepisa, sane in na e Ata, a Ata na e inu. Visae ve alelaga re e inu vanon ga kiau visena la nene, monar alelaga ga vanon yuñena la naña amiu apisu in na nekila ke pa rui.

¹² “Nepisa pe lelaga pan amiu, sane yar naña sa lelaga e inu, yoko naga ñena kilia kila yuñena la sane in na nemiyuñen ke ne. Yoko neligan si yo neva si puna ne Ata, ana siraunia neligan Ninuna vitomi, ana naga kilia kila kile kerkeviu la sanene, taulu naña amiu apisu pa rui. ¹³ Nepisaar pan amiu, sane sur ya ne aviunia e kiau kia, yoko in na nekila ga van amiu. Yoko nekila ga ve sanene vam amiu, vena kilaen kia kiena ne Ata naga kilia va laa metava ve keviu likan amiu, e yuñena la naña inu, sane narina, nemiyuñena. ¹⁴ Sanene na, sur ya naña aviun tan inu, yoko nekila van amiu.”

Yesu pisaar Ninuna Wa pan la

¹⁵ Ana Yesu pisa ñena pan imimi, pisape “Visae amiu sinemiu sii inu pe lelaga, monar auarar ruru kiau navisaluaena lala. ¹⁶ Yoko in na ve nesu re si nemio amiu, ana yoko neviun tan Ata vena ligan yar tañena tai vim kus leleu vena iila amiu. Naga naña yoko imi, yoko sulue ga amio amiu, ¹⁷ naga pe Ninuna na visawalen visena lelaga. Yeririna na yemalolo na yomarava nini taþatete atol naga, vanon taþatete akilia avisu kilale naga, pe akilia re nena, ana yoko amiu akilia ruru naga vanon naga ke narui naña amio amiu nanagane, a yoko sike lue ga e amiu.

¹⁸ “Kiau nalogena lala, taþatete neligan kare amiu naña asuñe sane ninuyu ga la poli. Peraga, yoko nowasuþe si neimin amiu. ¹⁹ Narin aora teke ga wa, pe piavi re nena, yoko yeririna na yomarava nini taþatete avisu in sina. Ana amiu ga yoko avisu naña in na nemal sina ga, ana vanon naña nemal, amiu ñena yoko amal. ²⁰ E legiena nene naña avisunu nemal sina, amiu akilia sane in na e Ata, a amiu e inu, a in na e amiu. ²¹ Naga naña sinena sii inu pe lelaga, naga pe naga naña þuarar ruru kiau navisaluaena lala a mlogear la. Naga naña sinena sii inu sanene, yoko Ata sinena siia, amio in ñena sineu siia, nakekaten ke naga vena nekila naga kilia inu laa sane.”

²² Ana imimi nalogena tai, naña Yutas tañena, pe naga re naña nae Kariot poli, piun tan Yesu, sape “Ana Suþe, osape oim okekaten imimi, ana yoko okila e mrapa na sanape naña yoko yeririna tañena la nae yomarava taþatete avisu kilia?”

²³ Ana Yesu pisatañea, pisape “Visae yar sinena sii inu, yoko uarar ruru kiau visena lala, ana yoko Ata sinena sii naga. A yoko imimi lua meim puna, mekila ñamimi uña memio naga e kiena malena, ana yoko taþatete ve sanene va la naña pe amlelaga re poli. ²⁴ Ana yar naña pe sinena sii in re poli, naga taþatete logear ruru kiau visena lala. Naga nene navisatañena na kiamiu naviunena nene, ana e visena naña amiu amloge ga nagane, pe pe kiau visena re nene poli, naga pe visena kiena ne Ata naña mliganu nepitom e nini.”

²⁵ Ana Yesu pisape “Pogos naña nesike nemio amiu wa, in na nepisa ke sur la moki sanini pan amiu rui. ²⁶ Ana pogos naña sa nevano, yoko Ata ligan Ninuna na iilaena vitomi, ana naga yoko kus leleu, vian amiu e sur punu ga, ana ligan nasitoñmalena e kiau visena la punu ga e kiamiu sitomena lala. ²⁷ In na nevano, ana neligan suñarena sike amio amiu. Suñarena kiau nene pe suñare nowo tai naña yomarava nini taþatete la van amiu. Ve sanene na, ve akila re naña sinemiu viowa manenea, a ve amaraun re sur lala. Amiu ve asitom manene re, ²⁸ kome monar ve sa ga naña nepisa pa pan amiu rui, nesape in na neure kone wa, ana yoko neim si pun amiu. Pona amiu aloge viowa naña nevano,

ana visae sinemiu sii inu, popon amiu akekara manenea naþa nekilia neva sina puna ne Ata, naþa naga to laa metavan inu keviu paþisi.

²⁹ “Sur la punu ga nene pere wa, ana nanagane na nepisawal ruru pan amiu rui. Ana pogos naþa avisu imi m̄alivi torokin nena ga sa naþa nepisa, ana þisi na akilia alelaga ga sane nepe lelaga.

³⁰ “A nanagane, taþatete nevisa si sur ve moki van amiu, vanon þarin suþe naþa pe þarin suþen ke yomarava nini nagane na, pimin inu ke pa rui. Ana yaru nene, puriukawaena kiena pe torokin re taulu kiau puriukawaena poli,³¹ ana netaþan inu ga e limana, monar nekila ga sur ya naþa Ata sinenan sape nekila. Nekila sanene, vena yeririna na yomarava nini avisuluþaria sane sineu sii la.

“Poga, kana pog narui, tesuþmalu teva vanua.”

15

Yesu pe purþes nen kilka naþa lelaga

¹ Ana e pog naþa memial mepano, Yesu pisa ke sina ga visena þas pan imimi. Naga pisape “In na nepe purþes nen kilkerrep naþa lelaga, a Ata naga pe yar na visuaren lokove na kilika lala. ² Naga pisuar ruru ke korowasneu lala, visae visu korowas tai naþa þar re mras poli, naga telua, a visae visu tai naþa þar mrasa, yoko kilavan ruruia vena war si mras ve moki. ³ Sur nene nekila pan amiu rui, naþa sane sur naþa kilavan ruru amiu, naga kiau visena la naþa nepisa ke pan amiu. ⁴ Amiu na korowasneu lala, monar ayakolkol ruru amiu e inu, a in na neyakolkol ruru nemio amiu. Visae korowas nen kilka ve yakol ruru re amio purþesia, taþatete war mrasa, a maran taaga ga amio amiu, visae ve ayakolkol ruru re amio inu, yoko kiamiu malena taþatete nena war mras napo lala.

⁵ “In na nepe purþes nen kilika, amiu na ape narin korowasneu lala. Naga naþa sikol e inu a nesikol e naga, naga ke naþa yoko kiena malena kilia war mras ve moki, vanon sa ve in re e amiu, taþatete nena akilia akila sur tai naþa po e marana ne Ntewa. ⁶ Visae yar tai ve sikol re e inu, naga sane korowas tai naþa pimi mano pa rui, atelua awar akoven va e kapi, kapi kekania. ⁷ Visae asu ruru m̄a e inu, a kiau visena to ruru m̄a e amiu, sur ya naþa sinemiu asape aviunia, akilia atolia. ⁸ Popon amiu awar mras la ve moki e kiamiu malena lala, naga nene mesmesun kiau nalogena la asuþna akila, a pe mrapa m̄ena nakilaen kia kiena ne Ata va manene laa metava. ⁹ Ata sinena sii inu paþisi, ana vanon naþa sinena sii inu, inu m̄ena sineu sii amiu, ana popon amiu asikol ruru amiu e kiau nasinesiena nene.

¹⁰ “Visae auarar ruru kiau navisaluaena lala, akilia asuþna loyuþna e kiau nasinesiena nene, sa naþa in na nepuarar ruru ke pa rui navisaluaena kiena ne Ata, nesike pa loyuþna e kiena nasinesiena rui.

¹¹ “Ana sur la naþa nepisa ke pan amiu, nemla pan amiu vena kiau nakekarena sike amio amiu, kila pupia kekarena tai naþa po na po kilia sulue ga amio amiu silaga. ¹² A kiau navisaluaena maro tai nalaen van amiu sanini, sane amiu monar sinemiu sisii amiu lue ga, sa naþa in na sineu si amiu ke ne. ¹³ Pe sinesiena re si tai poli naþa po taulu na sinesiena naþa yar tai taþan kiena malena, mare vena tamalia kiena erau tai. ¹⁴ Ana yoko in na nekilia nekila ve sa ga nene van amiu, vanon visae alelaga e kiau visena lala, yoko ave kiau erau la rui.

¹⁵ “Pe nepio amiu re sina nesape kam yar na yuþnae kiauena ga lala poli, vanon yar na yuþnaena naga miyuþnae ga, pe kilia ruru re navisaarena na yuþnaena kiena ne kiena suþe poli. Ana in na nepisu amiu ape kiau erau lala, vanon sur punu ga naþa nemloge Ata pisa pan inu, nepisawalia pimi merarava pan amiu. ¹⁶ Amiu pe apisa lologia in re poli asape nepe kiamiu, ana in na nepisa lologia amiu ape kiau, nepisirlar amiu vena ava awar mrasa e kiamiu malena lala, mras naþa sulue ga sike na rui. Ana pogos naþa ava ke sanene, sur ya naþa aviun e kiau kia van Ata nae ma peni, yoko naga la ga van amiu. ¹⁷ Na nene kiau navisaluaena van amiu naga sanini, sane amiu monar sinemiu sisii amiu.”

Lala naþa na yomarava nini yoko sinela kar nalogena kiena Yesu lala

¹⁸ A Yesu pisape “Visae yoko avisu sane yaru na yomarava la naþa pe amlelaga re poli, sinela kar amiu, ve ailan manene re. Monar asitoñal ña naþa lala na yomarava nini sinela kar inu sumo rui, þisi na sinela kar mare amiu ñena ga ne. ¹⁹ Visae amiu ave sa ga yeririna na yomarava nini, yoko akekaran amiu ga, ana in na nekilologia amiu pa rui nesape aure vetan malena na yomarava nini. Kam na pe maran taaga re si sane kiena yar la poli, kila sane sinela kar amiu narui. ²⁰ Ana popon amiu asitoñal lue ga visena naþa nepisa pan amiu rui, naþa nesape yar na yuñena taþatete sukalawan kiena suþe. Visena nene kana kinasia sape sa ga naþa akila piowa ga akila karenu, yoko akila viowa akila kare amiu ñena. Sa ga naþa la pe amlogear re kiau visena la poli, yoko ve alogear re ñena kiamiu visena lala. ²¹ Þelaga viowa na sanene yoko akila van amiu vanon ga naþa amiu ape kiau, akila vanon pe akilia re naga naþa mligan inu nepitom tano.

²² “Visae ve neim nevisa meraravan re sur la nene e marala, yoko Ntewa visu sane lala pe akilaro re kiau visena poli. Ana nanagane na, amloge kiau visena la punu ga rui, ana taþatete avisawan si visena tai e kiela naviowaena naþa akila þarñarera van Ntewa. ²³ Lelaga, akila þarñarera pa Ntewa rui, vanon naþa apieluen inu, ana naga sa naþa apieluen ñena Ata. ²⁴ Visae ve kiau kile re la naþa apisu nekila, naþa pe yar re si tai naþa kilia kila, pona Ntewa yoko ve visa re sape naviowaena sike e la. Ana pere, apisu pa rui, ana pe amlelaga re ga poli, aþaryon nakilaen navielueena pan imimi lua Ata. ²⁵ Sur nene mesmesun ga visena tai naþa Ntewa mligan teke e Nasiriena Wa, naþa sape ‘Sinela kar nu paþisi, ana peraga, pe panon re kiau naviowaena tai poli.’ *Yauena 35:19, 69:4*

²⁶ “Ana nevisa van amiu, sane yoko neligan Ninuna na iilaena vetan Ata mava vitom ñalivin amiu, naþa pe Ninuna naþa molue e malena kiena ne Ntewa, naþa pe Ninuna na visawalen nalelagaena. Naga vitom visawal inu re laa van amiu sane, ²⁷ ana siraunia, amiu ñena monar avisawal manene inu va laa sane van yar taþena lala. Na nene komin naþa amiu la nene asu lue ga amio inu silaga siar e nasiarena kiau yuñena pimi tol nanagane.”

16

¹ Ana Yesu pis ña ke pan imimi kiena nalogena lala wa, sape “Visena la nene, nepisa ke pan amiu ve nauarar ruru amiuena, vena kiamiu viawaena ve lor re pogos tai.

² “Pe lelaga, monar akilia asape kieta yerka wa yoko akoven plan amiu vetan kieta yuñna nalotena lala, ana yoko viowa laa sane van amiu vano-o tol pogos naþa sane sa awe moñar amiu, ana yoko la avisa asape nanene yuñna wo tai nene, ana akila vena Ntewa kekarania. ³ Yoko la akilia akila ve sanene van amiu, komin pimi tol nagane pe akilia ruru re Ata nae ma e peni poli wa, a pe akilia ruru in re ñena poli. ⁴ Ana siraunia, pogos naþa avisu sur la ne imi kakate ke ve sanene van amiu, akilia asitoñal sina ga, ana yoko avisa asape ‘Lelaga ga o, nanagane na tepisu sur la nene sa ga naþa Suþe pisa pan ita nanua sumo ne.’”

Yesu pisa sape Ninuna Wa yoko iila la

Ana Yesu pisape “Sur la nene pe nepisa re pan amiu sumo poli, komin e pogos nene nesike nemio amiu wa. ⁵ Ana nepisa ga na wa van amiu komin yoko ve viavi re na, monar neligan amiu, neva sina puna ne naga naþa sumo na mliganu nepitom. Nepisa lili ña sanene pan amiu rui, ana nepisu sane pe apiun manene re si lepas nene tan inu poli, asape nekom pe po neva e yo na sanape, ⁶ vanon pogos naþa nepisawal nesape monar neligan amiu sa nene, amloge piowagan paþisi ne. ⁷ Ana peraga, monar ve sa ga nene. Nepisa pe lelaga pan amiu, po manene laa pan amiu naþa nevetan amiu, komin naþa visae ve neva re, yoko Ninuna na iilaena taþatete imi, ana sa nevano, yoko neila naga vitomin amiu. ⁸ Ana Ninuna nene, pogos naþa vitomi, kila pupia yuñna tai e yeririna na yomarava nini, kila la asitom kilia pupia sitomena þasia, tai e lepas na kiela mlamulena viowa, tai e lepas na kiau mesmesuena, a tai e lepas nalipereena kiena ne Ntewa pan la.

⁹ “Na sumo, Ninuna nene yoko kila la avisu kilia sane purþes nen kiela mlamulena viowa, naga kiela þelaga na yepela mavin vatanon inuena.

¹⁰ “Nalua, Ninuna nene yoko kila la avisu kilia sane in na pe nekila re suri viowa tai poli, nemesmes nenaga. Inu netorokin naþa nekilia neva si metava puna ne Ata, ana yoko ve alual inu re sina.

¹¹ “Natelu, Ninuna nene yoko kila avisu kilia sane Ntewa kilia liþere la, sa ga naþa mligan ruru pa naliþereena kiena suþe viowa naþa pe þarun ke yomarava nini nanagane.

¹² “Sur la moki sike na wa naþa nekilia nevisa van amiu, ana nepisu amiu amloge piowa sanene, taþatete nevisawal van amiu nanagane. ¹³ Ana pogaga, vanon sirau, pogos naþa Ninuna na visawalen lelagaena vim pun amiu, yoko naga kilia sumon amiu, atol visena nalelagaena taþena la nene. Visena na lelagaena la naþa naga vian amiunia, taþatete visa ga e kiena sitomena naga taaga, ana sur la naþa loge ma e peni, naga ga nene visawal van amiu. Ana yoko kila sanene vano-o tol naþa naga kilia vian amiu ruruia e lepas na sur la naþa amolmolue e inu ve yam piavi re. ¹⁴⁻¹⁵ Naurarena la punu ga naþa kiena ne Ata, pe kiau mēna, ana Ninuna war kiau visena lelaga imi ligan ruru e kiamiu malena lala. E mrapa ne nanene yoko Ninuna naga kila mesmesun kiena yuþaena, naþa pe nayeluaren kiau kia.”

Pupia kekarena nawasuþeena kiena Yesu

¹⁶ Ana Yesu pisa mēna pan imimi, pisape “Ve yam viavi re na, yam ve plas ga, ana yoko ve avisunu re sina, ana yoko ve yam viavi re sina, akilia avisunu sina ga.”

¹⁷ Ana imimi nalogeno la memloge visena nene, mepisa lelein pan imimi mesape “Ita pe tekilia re nenaga sur la naþa naga pisa ke ne. Nanua sumo ne, pisa ke sape wasuþe sina va su si amio arimana ma e peni, ana nanagane na sape yam ve viavi re na, tevisu re si naga, þisi na yam ve viavi re na, tevisu sina ga. ¹⁸ ?A narin aora naþa pisa ke ne, kana kinasia yara? !Pe tetol re nena kiena sitomena poli!”

¹⁹ Ana Yesu kilia sane sinemimin mesape meviun meraravan sur la nene tania, naga pisawal þesania, pisape “?Pona amiu apiuyun ke sina ga pan amiu e lepas nen kiau visena lala yo? ²⁰ Pogaga, nevisa ve lelaga van amiu sanini, sane yoko amiu atagi, aloge viowagan ya naþa yoko lala akila van inu, ana yoko yeririna taþena lala na yomarava akekarania, aloge won vaþisi. Yoko sinemiu la ulen naloge viowaena vano-o, ana þisi na, nemali sina ga vetan marena, ana avisu inu sina, a yoko kila kiamiu naloge viowaena nene vilonia imi ve nalogewoena. ²¹ Naga sa ga pogos naþa sira mēþena, naþa sa tol kana aora nena, mēþena laea naga monar loge viowagania vano warlua. Ana pogos naþa þar pa na, pe sitoþal re si kiena naloge viowaena poli, ana naga pulen kekarena vanon kiena sisi tomtom naþa paeme mare ga pimi yomarava.

²² “Ana þisi na amiu ve sa ga nene narui. Nanagane na sinemiu la ulen nasineyeena keviu, ana siraunia in na neþalivin amiu si na, akilia akekara sina ga e pupia kekarena tai naþa taþatete yar tai lalua sina ga vetan amiu pogos tai. ²³ Ana e pogos naþa neimi neþalivin amiu, pona amiu asitom asape popon sa aviun sur ve moki vetan inu, ana taþatete ga, sur la nene pe naviunen re tan inu poli, akilia aviun mesmesun ga tan Ata ma e peni. Akilia aviun tania e ga e kiau kia, ana þisi na naga kilia taþan van amiu. ²⁴ Pimi tol nanagane na, amiu pe apiun re sur e kiau kia poli, ana siar ga nanagane na, sa aviunia e kiau kia, þisi na atolia, ana kila sinemiu ulen kekarena.

²⁵ “Pimi tol nanagane na, nepisa ke sur la pan amiu e ga e þakaiwa, ana aora pimi ke narui naþa ve nevisawan re si van amiu, nevisayu Ata ma e peni van amiu, nevisa plan meraravan sur punu ga van amiu. ²⁶ Ana e pogos nene, ve in re ga naþa neviun ke sur lala van Ata vanon amiu, ana amiu ga akilia aviun mesmesun vania e kiau kia. ²⁷ Amiu akilia aviun mesmesun ga vania, vanon naga pisu amiu ke naþa sinemiu sii inu, naga kilia ke naþa amlelaga e inu sane nepetan ma puna nepitom tano e yomarava nini. Suri nene kila sinena sii amiu paþisi, kekaran ga na yagogenen kiamiu naviunena lala.

²⁸ “Ana e lepas na lele naþa nepa ke ea, nekilia nevisa ga sa naþa nepisa ga þisi ne, sa naþa nepetan ma puna ne Ata nepitom e yomarava nini, ana þisi na nevetan si yomarava nini, nowasuþe si ma uña puna.”

²⁹ Ana mepisatañea, mesape “!Suþe, nanagane na ve ovisawan re si kioña visena e þakaiwa lala! Pogos naþa opisa meraravan sur la sanene mepisu po paþisi. ³⁰ Memloge kioña visena lala, mepisu kilia sane ko na okilia sur punu ga, pe kiamimi naviunena re si naviunena tan ko poli. Lelaga, nanagane na memlelaga ñarera sane pe lelaga, ko na opetan Ntewa opitom e yo nini.”

³¹ Ana Yesu pisatañe la, sape “Ana yo. Pona amlelaga e inu pe lelaga? ³² Popon alelaga ñarera, vanon aora naþa nepisa ke ne, pimi ke narui, ana visae pere, pimi pa yo rui. E pogos nene, añeñene amiu aliureure amiu, po amiu awasuþe amiu veve taaga sina e ñamiau uña lala, taþatete tai sike si amio inu, yoko inu ga taaga nesike. Ana nanene naga pogaga pan inu, vanon nekilia sane inu, pe in ga taaga re nesike poli, ana Ata na amio inu lue ga. ³³ Nepisa sanene pan amiu vena ve sinemiu kurkur re, a vena ve aloge re viowa. Pe lelaga naþa kiamiu malena e yomarava nini, ulen ga naloge viowaena amio pog ñarera, ana in na netaulu pa naviowaena na yomarava nini rui. E kiamiu malena la e inu, yoko alual luen ga suñarena wo.”

17

Pupia leniena kiena ne Yesu

¹ Ana pogos naþa Yesu pisa pa visena la nene, sape len va arimana. Kira pa metava ma e peni, pisape “Ata, nekilia sane nanagane na kiau pog na loge viowaena pimi narui. Awis, ovisuar inu naruña, vena kiau kia ve vito re tano, ana va metava, yoko inu ñena ga nekilia nevisirlua kioña kia va metava. ² Nemlelaga sane ko na okila sanene, vanon omla pupia puriukawaena pan inu rui, vena neve suþen yeririna punu ga. Ana otañan pan inu osape la naþa omligan la e limau, yoko nekilia netañan malena naþa ve uro re pogos tai van la. ³ Ana mrapa na malena naþa ve uro re pogos tai naga sanini, naþa akilia ko, naþa ope Ntewa taaga ga naþa pe lelaga, amio ñena inu Yesu Kristo naþa omligan inu nepitom. ⁴ In na nemligan ko nepitomin nakilaen kioña kia ve keviu e yomarava nini, ana nemiyuñan ña sur nene pano-o þisi, naþa lavis netaulu yuñana la naþa sinoñan osape nekila. ⁵ Ana Ata, sineun nesape neviun sane sa nevañasu nesuñalu si e maraña, oliganu sina nemio ko ita lua teve suþen si naurarena nae ma e peni sa naþa tekila nanua pogos naþa tesii yomarava nini.”

Yesu mlenwo kiena nalogena lala

⁶ Ana Yesu mlen ña, sape “Ata, e lepas na lala na yomarava nini naþa ko okilologia la ape kioña, ko na otañan la panu, omligan la e luñau, ana nekilia nevisa van ko nesape in na nepisayu ko pan la rui. Ana nanagane apuarar ke kioña Visena Wa ñarera.

⁷ “Lala apisuluþar pa rui sane sur wo punu ga naþa sike e inu, ape sane kioña nalaena lala pan inu, ⁸ vanon kioña visena la naþa oþar pan inu, nepisalelein pan la, ana la atol punu pa rui, kila sane amlelaga ñarera asape in na nomolue pun ko nepitom, ko na omiilanu.

⁹ “Nemlen pan ko nanagane, nomon nalenwoen yeririna punu ga na yomarava wetelu veraga ga, ana nesape nelenwo manene laa lala naþa otañan pan inu, komin apimi ape kioña rui. ¹⁰ La punu ga naþa ape kiau, ape kioña, a la punu ga naþa ape kioña, ape kiau, a lala naþa otañan la pan inu, ape purþes nen kiau naurarena.

¹¹ “Ana nanagane na pimi tol pog naþa nevañas si pun ko, naþa sane ve nesu re si e yomarava nini, ana kieta yeririna la nene asuñara ga. Ve sanene, Ata Wa, awis ovisuar la naþa otañan la pan inu, ouarar ruru la loyuña e mratava pun ita, vena akilia aim ave taaga, sa naþa ita lua tepe taaga. ¹² Pogos naþa nesuñan nemio la, nepisuar ruru la, nepuar ruru la vatanon kioña kia. Nepisuar la pano-o la punu ga asu ruru ña amio inu,

taaga ga naþa monar vetan inu, sa ga naþa Nasiriena Wa pisawalia, nane yar naþa pe sisi nakovioena.

¹³ “Lavisi ga nowasuþe puþna narui, ana nesape nevisa plan visena la nene pogos naþa nesike e yomarava nini wa, vena kilaen sane pupia kekarena naþa teke e inu nanagane yoko kilia imi ve keviu mþena van li taþena la nene. ¹⁴ In na nemla kioþna visena pan la rui, ana pogos naþa yeririna taþena la na yomarava nini apisu la, sinela karla paþisi. Nanene komin apim sane pe ape na yomarava re si po laa rui, sa naþa in na pe nepe nae re yomarava poli. ¹⁵ Ana nemlenin la pan ko, pe nepiun re nesape oure plan la vetan yomarava, nepiun nesape pogos naþa asike yomarava wa, ko na yoko ovisuar ruru la, vena yar viowa nene ve kila kare la re. ¹⁶ Awis ovisuar ruru la, komin la na sa ga inu, imimi mepe wolawa ga lala na yomarava nini. ¹⁷ Nemlen mþena sane ovian kioþna visena na lelagaena van la, vena yawawo kiela malena lala aim ave wa, ave kioþna ga ko ga taaga. ¹⁸ Nemlen wo la sanene, komin sa ga naþa ko na omliganu nepim e yomarava nini, þisi na in mþena nemligan la ke avava sanene ea. ¹⁹ Nemiawawo kiau malena wetelu pan ko vanon la, vena þisi na lala mþena ayawawo kiela malena lala van ko ve lelaga.”

Yesu mlenwo li nalelagaena lala

²⁰ Ana Yesu mlen mþa, pisape “Ata, nemlen ke pan ko, pe nemlen wo re ga la nene poli, nemlen wo mþena lala taþena naþa alelaga e inu vanon kiela visena la naþa pisayu inu. ²¹ Nemie awis pan ko Ata, sane la punu ga nene aim ave taaga, maran taaga sane ita lua. Ko, ko na e inu, a inu na e ko, ana lala mþena monar e ita, vena yomarava wetelu kilia lelaga sape in na nemolue puþna, ko na omiilanu nepitom tano. ²² Pupia naurarena naþa omla pan inu, nemla pan la, þisi na lala akilia aim ave taaga, sa naþa ita lua tepe taaga. ²³ Ko na e inu, a in na e la, þisi na akilia aim ave taaga e sur la punu ga, ana pogos naþa yeririna na yomarava la avisuia, akilia sane pe lelaga ga, ko ga naþa omliganu nepitom, akilia sane sineþna sii la keviu sa naþa sineþna sii inu.

²⁴ “Nanagane Ata, nepis maro sanene, sineun paþisi nesape la naþa otaþnan panu, yoko sirau akilia amio inu ma e leleta. Sineun nesape amionu vena akilia avisuveve pupia kiau naurarena nene, naþa ko na omla panu nanua sumo e nasiiena na yomarava nini, vanon ko na sineþna sii inu paþisi. ²⁵ Ata, ko na ope wa a omesmes, ana yeririna taþena la na yomarava nini pe akilia ko re poli, ana in na nekilia ruru ko lue ga. Nekila sane nanagane na kiau nalogena lala akilia sane in na nepetan ko, ko na omligan inu nepimi. ²⁶ In na nekila sane nanagane na, lala moki akilia ruru kioþna þelaga wo rui, ana yoko nekila va laa sane na wa, vena pupia sinesiena naþa sineþna sii inu ea kilia sike e la, a vena inu mþena nemio la lue ga.”

Ana leniena kiena Yesu pan arimana maro ga e nene.

18

Atarar Yesu mþarera

Matiu 26:47-56; Mak 14:43-50; Luk 22:47-53

¹ Yesu pisa plan visena la nene, mlen pae na, þisi na suþnalu sumon imimi nalogena la mepetan si Yerusalem, memial ga kolemalu mepito tano e þalu naþa Kitaron lepas na vano. Memial mepa metol narin los nen purolip lala naþa Yesu pa lue ga ea yam moki mþa rui, ana mesu li mþa yam plas ga ea.

² Lele nene na, Yutas taveve imimi memio Yesu mesuþna mepa ke ea nene yam moki rui, a naga kilia sape e pogos nene, imimi memio Yesu mesike e nene yo. Sanene na e pogos nene, naga pa pa sumo narui pisawal Yesu pan yar keviu la, ana la amiila kiela yar þasia asiraunia, ana naga sumon la apim e lele nene vanon Yesu. ³ La naþa yerkawa kiena ne yar wa lala amio Varasi la amiila la, la nanene na þegas na mara nae Rom tai, amio þegas na yar na kiravawoen Yuþna Wa lala. Ana amial ke apimi amio kapi vivaga lala, amio kiela sur na mara lala. ⁴ Apimi asape atarar Yesu, ana naga kilia ruru pa þisi rui sur la naþa yoko vim katenia, a pogos naþa pisu la pe milan re poli, pa ga naþa pitawe la, pis pan la, piunia sape “?E, amiu akale ke ai?”

⁵ Ana la naþa asuñal ga asuñma amio Yutas, yar na wilwilinwanen Yesu, ana apisatañnea, asape “Imimi makale ke yar naþa Yesu, nae Nasaret.”

Yesu pisatañne la, pisape “Naga naþa apisa ke ne, in ke narui.” ⁶ Ana pogos naþa Yesu pisa visena nene pan la, amilania naþa kila la apuresula veraga, amloloru kar ga lala e porotano.

⁷ Ana yam si tai Yesu piun ke sina ga tan la, sape “?Amiu avisali sina ga, akale ke ai?”
 Ñisi na apisa ke sina ga, asape “Makale ke Yesu naþa nae Nasaret.”

⁸ Ana Yesu pisape “Sa naþa nepisa pa rui, in ke nanini narui. Ana visae amiu apimin inu ga taaga, popon atañman kiau la taþena nini akilia ava ga sanene, ve atol la re.”

⁹ Naga pisa sanene pan la, kila kiena visena tai pimi pe lelaga, naþa pisalua mare ga e kiena leniena pan arimana, naþa pisa sanini, sape “E la naþa otañman pan inu, pe nekila pal re tai poli.”

¹⁰ Asuñma ga sanene, ana memilan ga naþa Saemon Pita þarlua kiena playu na mara, mligan ñene þarin yar tai kiena þarin yar wa lala, ana tetereria ga, telua kiligan yar nene lepas na þamarua. Yaru nene kiena kia Malkus.

¹¹ Ana Yesu pisa pa Pita, pisape “Pita, osuan ruru si kioñma playu vito si e kana pias nen paos nena. ?Sanape, pe sinoñman re nowar ro e pog ñarera na loge viowaena naþa Ata nae ma e peni mla pan inu? Peraga, monar nowar ro e naþa!” ¹² Yesu pisa sa nene, þisi na yar na mara la, amio kiela na sumonena, amio nakiravawoena la na Yuñma Wa, apim atarar Yesu, apiar ruru limana luwoka, aþure apano.

Aþure Yesu pa e yo kiena Ñarin Yaru Wa

¹³ Ana aþure Yesu pano, apa atol kove kiena ne Ñarin Yaru Wa, ana suri na sumo naþa akila, aþure Yesu pa tol yo puna ne yermarua nene Anas. Anas nene naþa sumo na naga pe Ñarin Yaru Wa, ana naga sike e yo nene wa amio Ñarin Yaru Wa viu, komin Ñarin Yaru Wa viu nene naga talopa amio narina naþa sira. ¹⁴ Yaru nene kiena kia Kaeþas, a naga naþa nanua sumo, pisawal mrapa tai pan li nasumonena kiena le Yu lala. Naga sape visae avisu sane monar aweñmar yar ve taaga vena tamaliaen malena kiena yeririna la ve moki, naga kilia tañman van la vena akila ve sanene na woga ga.

Navisawan þesanena kiena ne Pita e Yesu

Matiu 26:69-70; Mak 14:66-68; Luk 22:55-57

¹⁵ Sanene na aþure Yesu apa e lepas naþa Anas sike ea, ana e pogos nene, imimi lua Saemon Pita mesiraun la. Inu nemio yermarua Ñarin Yar Wa na sumo nene, imimi lua mepe erau, þisi na atañman inu nepa loyuñma siraun Yesu, ana apisaluþar Pita asape taþatete imi loyuñma. ¹⁶ Asape naga monar suñmalu ga suñma e mratava vanua, ana pogos naþa nepisu sanene, neþasuþe si nepa nepis pan sira ñee na yuñmaena kiena yar keviu nene tai, naþa suñmal sike e mratava. Ñisi na sira nene tañman sape nekilia noure ñena Pita imi loyuñma. ¹⁷ Ana pogos naþa Pita pimi ke loyuñma, sira naþa pisuia ana piun tania, sape “?Ana ko ñena nalogena tai kiena ne yar nene, ne?”

Pita mloge, þisi na miila, pisatañne kotalia ga, sape “E, peraga.”

¹⁸ Ñisi na Pita pisu yar na yuñmaena la amio nakiravawoen lala akila kap tai na kilamemego, asuñal asuvivia ategania, ana naga pa lavisin la, naga ñena tegania.

Ñarin Yar Wa na sumo nene Anas piun naviunena la pa Yesu

Matiu 26:59-66; Mak 14:56-64; Luk 22:66-71

¹⁹ Amligan Yesu suñmal e marana ne yermarua Ñarin Yar Wa na sumo nene Anas, ana naga piun sur la moki petania. Naga piun tan Yesu sanape e nalogena la naþa amlelaga ke e naga, a piun ñena e lepas navianena la naþa pianlania. ²⁰ Ana Yesu pe pisa re sur mok pan poli, ana pisa ruru ga pania sape “Sur la naþa nepian la ke ea, in na pe nekila vinaun re poli, ana nepisa plan ke ga e yometava merarava pan yeririna punu ga. Nepian lue ga kieta le Yu lala e yuñma na lotuena, pona e Yuñma Wa, ana lala moki amiyagogan

inu silaga. ²¹ ?Ve sanene na, komin ya ne opiun tan inu, osape nepian la sanape? Visae sinoñan osape okilia, popon oviun tan la naña amiyagogan inu lue ga. Lala akilia ruru ga ne.”

²² Ana pogos naña Yesu pisa visena nene, yar na kiravawoen tai naña suñal ña lavis puna, mloge sane Yesu pisa kare ke yerkawa nene, ñisi na mlipa Yesu, pis pania, sape “Ei, ositom osape po ne opisatañe kieta yar wa e visena na sanene? !Ovisuar ko!”

²³ Ñisi na Yesu pisatañe pania, pisape “Ositomveve ruru li kiau visena. Visae nepisokan, popon ovisawal e maran yeririna la nene, okilia ovisave nepisokan sanape. Ana visae pe nepisa re sur tai naña piowa poli, vanon ya ne omlipa inu?”

²⁴ Ana ñisin nanene aþure Yesu, naña limana la apiar ruru ga sike ga wa, amligan lepas nene puna ne yermarua Anas, aþure apa e kumali kiena Ñarin Yaru Wa Kaeþas, vena naga kila kotena vania.

Navisawanen na lua kiena Pita pa kiena Suþe

Matiu 26:71-75; Mak 14:69-72; Luk 22:58-62

²⁵ Ana Saemon Pita suñal suña amio la naña asike atega ke kapi wa, ana la apisu kilia li ña naga, apiun asape “?Sanape, pona ko ñena ope nalogena kiena ne yaru nene tai?”

Ana naga pisawoia, sape “Peraga, in na pe nepe kiena re poli.”

²⁶ Pita pisatañe sanene, ana lala yar tai naña asuñal asike ne, naga pe yar tai na yuñnaena kiena ne Ñarin Yar Wa, naña naga pe namratava tai puna ne naga naña Pita telua kiligana komþasa. Ana naga ñareran manene laa sane naviunen si tan Pita, sape “?Ko na pe ope kiena re poli yo, ana in na nesitom sane nepisu ko amio naga gare pun purolip la rui?”

²⁷ Ana Pita pialuþar ñarera sina, piro yam telun narui sape pe kilia re Yesu poli, ana e nena e aora nene, amloge lakaporo kokoreko.

Aþure Yesu pa suñalu e marana ne yerkawa nae Rom nene, Ñaelat

Matiu 27:1-2,11-14; Mak 15:1-5; Luk 23:1-5

²⁸ Ana kolulag wa ke ga wa, pe yo-merarava ruru re poli wa, ana Kaeþas pisi pa Yesu pano ñisi, ana aþure si naga apetan yo nene, apa e pulkumali kiena ne Ñaelat, pupia yar keviu nene naña le Rom la apisirlua naga suñalu ve suþen purvanua kiena ne le Yu lala.

Ana pogos naña apim lavisin kiena pulkumali, nasumonena kiena ne le Yu lala asitoñal asape amlon yuña nene, sane visae ava loyuña ea ñisi na kila la aim sane ve ayekiki re sina e marana ne Ntewa, taþatete ayakol e kinanena na Ñaþagena na Sitoñalen na Tamaliaena. Sanene, vanon sur nene, aþure Yesu apim asuñalu ga asu vanua, pe apa re loyuña poli.

²⁹ Ñisi na apisawal pan Ñaelat, ana naga pimi pisu la vanua, piun tan la, sape “Pogaga, ana amiu avisawal li sane yaru nene kila ya ne piowa, nane aþure pimi suñal sike e marau kolulag wa ke sanene.”

³⁰ Ana apisatañea, asape “Yerkawa, mekilia mevisa van ko sane yar nene, pe yar na kilaen ve woweena ñisa! Visae peraga na, taþatete moure imi pun ko.”

³¹ Ana Ñaelat pisape “Visae sanene, amiu ga akilia ava ala nakoena ya naña mesmesun kiamiu navisaluaena vania.”

Ana nasumonena kiena le Yu la apisa pania, asape “E kiamimi navisaluaena, mekilia meliþere naga sape akove moñar naga, ana nanagane na navisaluaena nae Rom pisawo imimi sina, sape ve mekila re ve sanene. Ko ga taaga, yar keviu kiena ne ñarin suþe na e Rom, okilia okila, okilia otañan osape ala nakoena na marena vania ma e laki torovia.”

³² Ana pogos naña apisa visena nene pa Ñaelat, la amninue ga, ana la akila ke visena kiena Yesu tai nanua sumo pimi pe lelaga. Nanene komin naga pisawal pa kiena marena rui, pisayu ruru mesmesun nena ya naña le Rom la akila ke, naña awarear yaru pa e laki torovia.

³³ Ana Ñaelat sinenan sape vis towe re amio Yesu lalua ga, pa si loyuña e kiena kumali, pio Yesu sape va puna. A lala akila Yesu pa loyuña, Ñaelat piun petania, sape “Sineun nesape ovisa ruru van inu. ?Ko na Ñarin Suñe kiena le Yu la lelaga, po pere?”

³⁴ Ana Yesu pe pisatañe mesmes re pan poli, ana naga pisatañe e naviunena tai, sape “?Kioña naviunena nene, opiun ruru ga ne, pona opiun ke pan inu vanon ya naña omloge lala tañena nene apisalele kare in ke ea?”

³⁵ Ñisi na Ñaelat pisatañe, pisape “Aulai, nemninue ga amiu le Yu lala, in na pe amiu re tai poli. Nekilia ga sane kiamiu yeririna lala amio yar keviu kiena kiamiu yar wa lala, añaure ko opimi vena neliñere ko. Sanene na, nesape nekilia ga nesape omiyuñaen ya ne naña la apisu pe mesmesu re poli?”

³⁶ Ana Yesu pisatañe, sape “Sinelan asape oliñere inu, vanon la pe sinelan re neve suñen la poli. Ana kiau nasuñenena pe sa re nasuñenena na yomarava nini poli. Kiau yeririna lala pe akila re mara amio la naña apimi atararnu rui, vena ve neva re e limana ne kiamimi li kawa le Yu la. Imimi pe mepe yaru na kilaen re mara sanene poli, vanon kiau nasuñenena pe pe na yomarava re nini poli.”

³⁷ Ana Ñaelat pis pania, pisape “?A, ana nemloge opisayu ke kioña nasuñenena, sane ko na ope ñarin suñe pa tai rui, po peraga?”

Ana Yesu pisape “Nagane e! Otol ruru pa ñisi ne, sane opisa ne. In na nepim e yomarava nini, nepaeme ea, vanon sur ga nene, a nepimi vena nevisawal sur na lelaga lala van kiena yeririna lala. Yar naña suñalu se e lepas na lelagaena, yoko yagogon ruru kiau visena lala.”

³⁸ Ñisi na Ñaelat piun ke sina ga petania, sape “Ana ane kilia, nalelagaena naga ya ne?”

Ñaelat sinenan sape tañan ga Yesu va si sanene

Matiu 27:15-31; Mak 15:6-20; Luk 23:13-25

Ana pogos naña Ñaelat pisa pa visena nene, suñalu pa sina ga vanua, pisawal pan le Yu la naña asuñalu asike vanua, sape “Yar nañane, nepisuveve pa naga rui, pe neñal re nenaga narin sur tai piowa teke e naga. Popon sane naga va sina ga ve sa ga nene. ³⁹ Ana visae amiu asitoñal ke e kas punu ga, e ñañagena la nene, nepure ke amiu yar tai naña sike e yuña nakoaena, netañan naga imi si pun amiu ve sa ga nene. Ana nepisu sane e kas nini na, popon sa netañan yar nene, kiamiu Ñarin Suñe amiu le Yu lala, iñasu pun amiu sa ga nene.”

⁴⁰ Naga pisa sanene, ana la pe akekan re poli, apion ñarera, asape “Pere, peraga, pe sinemimin re yaru nene poli. Otañan tañena nene Ñanañas imi van imimi sina.” Ñanañas nene naña asape, naga pe le Yu tai naña sumo naga pepeyu pa le Rom lala.

19

Ñaelat tañan sape awe Yesu

¹ Ana Ñaelat sitom ke sape kila Yesu molue sina ga, ana yerkawa kiena ne le Yu lala añareran naña apisaluñaria. Ana Ñaelat sinenan sape kila suri tai naña akekan naga vanonia, ana pisape kiena yar na mara lala awe li naga sumo wa. ² Ñisi na yaru na mara la añaure naga pano, aña nonos nen kilsirili, aña ruruia, amiyen te ñarina, sane karo na ñarin yar keviu tai. Ana aña pupia kulkota wo tai naña memaena sane kulkota ñana ne ñarin suñe, amiyen ea. ³ Ana la peve taaga apivim ke lavisinia, apisa kare ke naga, asape “!Ñarin suñe kiena le Yu lala, o! !Mepatanon ko!” Apisa visena nene pania, amlilipa ke marana.

⁴ Ana siraunia, Ñaelat pa sina molue puna li kerkeviu kiena le Yu la naña asuñal asike vanua wa, pisawal pan la, sape “Pogaga, nanagane na sineun nesape amiu avisuluñar naña neñal re sane yar nene, pe naviowaena tai to re e naga poli, ana nanagane neligan si iñasu van amiu.” ⁵ Naga pisa pa sanene, ñisi na Yesu pimi vanua, suñalu se marala, ñarar karo na nonos nen kilsirili e ñarina, amio kulkota naña amiyen ea. Ana Ñaelat pisa pan le Yu la, sape “!Nagane, kiamiu yerkawa ne nanene!”

⁶ Ana li kawa kiena ne yar wa lala, amio li nakirawoena lala na Yuña Wa, pogos naña apisuluñar sur naña Ñaelat sape kila, pe akekaran re nena poli, apion ke, asape “!Awear mare e lak torovia! Awear mare e lak torovia!”

Ana Ñaelat tařatete taulu la narui, řisi na tañan ga, sape “Pogaga, e nakiravaena kiau, yar nene pe kila re nena napiowaena tai poli, ana visae amiu sinemiunia, amiu ga aure naga, ava awear naga e lak torovia.”

⁷ Ana pogos naña amloge, pe akekara re poli, asape “Peraga yo! Okilia rui osape tařatete mekila ve sanene. Ana lelaga, popon yar nene mare, vanon naga kilaro kiamimi navisaluaena. Naga miyeluar ke naga pa lue ga metava, sape naga pe narina ne Ntewa. Ana ko ga narui okilia okila mare.”

⁸ Ana pogos naña Ñaelat mloge visena nene, pupia marauena tai pan si naga, sitomveve ke sina ga sape Yesu naga pe yar na sanape, ⁹ řisi na pa si loyuña e kiena kumali, pisape Yesu imi, piun tania, sape “?Ko, kioña yo wawa nape?”

Naga piunia, ana Yesu pis re poli, pe pisa re sur tai pan poli.

¹⁰ Řisi na Ñaelat sape “Ei, ve ovis re sanene, ko ga okila kare ko ke si ne. Popon ovisa sur tai van inu, vanon in ke narui, teke e inu nakilaen sur ya naña sineun nesape nekila van ko. Visae sineun nesape omolue sina ga ve sanene, nekilia nekila, pona visae sineun nesape omare e laki torovia, nekilia nekila. ?Ko okilia ña sur nene yo?”

¹¹ Ana Yesu naga pis narui, pisa-tañea, sape “?Pona sanene yo, ana a ne tañan sur nene pan ko sape okila ve sanene? Visae Yar Keviu na mava ve tañan re van ko, ko na tařatete okila sur tai van inu. Visae ovisa osape nemare, na nene kioña napiowaena tai narui, ana naga naña mligan inu e lumoña, naga kila piowa manene laa, nanene kiena pupia mlamulena viowa tai nene.”

¹² Ana pogos naña Ñaelat mloge Yesu pis sanene, naga řaryo řareran ke sinenan sape ligan Yesu va sina ga, ana li kawa lala kiena le Yu la apion sina ga, asape “Yar nene miyeluar ke naga pa metava, sape pe řarin suře tai, sinenan sape kila naga to metavan kioña yerkawa nene řarin Suře Sisa. Sanene na, visae ko oligan va ga sanene, okila ke yuñaena tai naña řisi na Sisa ve kekaran re, yoko kovenlua ko e kioña yuñaena nene.”

¹³ Apisa sanene, kila Ñaelat kiena sitomena peve lua sina ga, řisi na kila ařure Yesu molue pulkumali pimi vanua. A řisi na pa totano metava e kiena lele na naliřereena, naña apio asape Kilavaru Yotop, naña le Yu la apio asape Kapata. ¹⁴ Ana e pogos nene, pimi tol kolpae rui, nanene e legiena na kilaruruen sur punu ga na legiena na peni naña pe pupia legiena na řařagena na Sitoñalen na Tamaliaena.

Ana Ñaelat totano ke pa metava rui, kiiar Yesu e marana ne yerkawa kiena ne le Yu lala naña asuñal asike tano ne, sape “!Naga ke narui, pe pupia kiamiu řarin suře!”

¹⁵ Ana la amon ga, añañagawoia keviu, asape “!Aurelua vano! !Asuar metava e lak torovia, aweñaria!”

Řisi na Ñaelat pisatañe pan la, sape “!Ke! ?Sanape, amiu sinemiun asape nekila aweñar kiamiu řarin suře nene?”

Řisi na li kawa kiena yar wa lala apisatañea, asape “?Ane pisa sape naga pe kiamimi řarin suře? Yar keviu Sisa naga taaga pe kiamimi řarin suře.”

¹⁶ Pogos naña Ñaelat pisa añarera laa sanene, řisi na naga tañan ga Yesu pan la narui, mligan naga e limala vena asuar e laki torovia, sa ga naña la sinelania.

Asuar Yesu e lak torovia

Matiu 27:32-50; Mak 15:21-37; Luk 23:26-46

¹⁷ Ñaelat mligan Yesu e limala, řisi na ařurelua naga pano. Pogos naña apa ke narui, akila naña Yesu kus ke sina ga kiena lak torovia, ana la asumonia apa atol narin kunus naña kana kilavaru ne sane puriu na řarin yaru, naña apio e visena nae Epru, Kolkota. ¹⁸ E yo ne nanene narui asuar Yesu e laki torovia, amio ñena yar la lua, tai e lepas komřasia, a tai e lepas komřasia, a naga mon ga likan lalua.

¹⁹ Ana visena kiena Ñaelat tai, naga sape yoko asiria visena tai, asuar e lak torovia metavan þar Yesu, naþa sape “Yesu nae Nasaret, Ñarin Suþe kiena ne le Yu lala.” ²⁰ Visena nene asiri e visena la telu, Epru naþa kiena le Yu lala, Latin kiena le Rom lala, a Krik kiena le Kris lala, aÑear mon metava e lak torovia kiena Yesu. Yo naþa lak torovia nene sike ea, lavisin ga pulkumali, ana yeririna la naþa amial ke aþaro e yo nene apisu visena nene apuloia. ²¹ Ana yar keviu kiena yar wa kiena ne le Yu lala pe akekaran re visena nene poli. Apisawal pa Ñaelat, asape “Yerkawa, ko na opisa osape asiri sanene sape ‘Ñarin Suþe kiena le Yu lala,’ ko opisa pe mesmes manene re poli. Sinemimin mesape avilopu sina, asiri ve sanini, avisave ‘Nanene, pisa sape naga pe Ñarin Suþe kiena le Yu lala.’”

²² Ana Ñaelat pe sinenan re poli, sinenan sape toÑna ga ve sa naþa pisa, þisi na pisa mesmes ga pan la, sape “Sur naþa nesiria, nesiri pa narui.”

Yar na mara la amlieureure kulmrae ñana ne Yesu e la

²³ Li na mara la aÑear Yesu amio la lua nene e kiela laki torovia lala, þisi na apa ruru la. Yar na mara la nene la vari, ana aþarar kulmrae ñana ne Yesu, apisayuia, asape aliureure e la þegas ve vari, tai kiena yar tai, tai kiena yar tai, sanene. Amlieureure ña sanene pano-o, tol pupia kulkota ñana ne Yesu, ana amon vitol wowaena e lepas ve vari, vanon kulkota nene pe kana lele na yakolen re poli, amiyuÑaen ga e pupia kinas nen kulmrae taaga. ²⁴ Vanon sanene, apisasa si pan la, asape “Piowa naþa tevitól kare kulkota nene, yoko telili ga ñapilania.”

Ana la amninue ga, akila ke ga mesmesun visena na yauena tai e Tus na Yauena Wa Lala na susumo rui. Visena nene pisa sanini, sape

“Amlieureure ñau kulmrae lala e la, amlil ñapila vanon ñau kulkota.”

Yauena 22:18

Visena nene pisa sanene, mesmesun ga ya naþa li na mara la akila.

Yesu pis pa anena

²⁵ Yesu tamalele ñeke pa metava e kiena laki torovia sanene, ana e la naþa asuÑal asike lavisin apisu ke e pogos nene, sira la vari. La nene, anena Yesu, amio anena na ve tokak tai, amio Maria naþa wona na yerÑene kiena kia Klopas, amio Maria nae Maktala.

²⁶ Ana Yesu kira pito tano, pisu anena, pisu inu ñena, naþa sane imimi lua mepe puruvi, nesuÑal nesike lavisinia, ana pisayu inu pan anena, sape “Sira marua, naga nene na pe naruÑa narui.” ²⁷ A pis ñena pan inu, sape “Naga nene pe anoÑa narui.”

Ana siar e pogos nene nepure sira marua nene pam momalio ke uÑa ñau, nepisuar ruru naga sane pe aneu.

Yesu mare

²⁸ Yesu mloge ke piowa metava e lak torovia pano-o pisuluþar sane kiena yuÑaena punu ga þisi narui, þisi na pisawalia sape “In na moto karnu.” Nanene pe kiena visena si tai naþa pisa ana kila visena tai na Tus na Yauena Wa Lala pimi pe lelaga.

²⁹ Ana pogos naþa amloge sape moto karia, amla lumlum, aputon e ñala kuruta na munen tai naþa ñeke e pialo tai, amiyurar e laki tai, akian pa metava tol gona ne Yesu. ³⁰ Akian pae, ana kuruta na munena nene kee pa gona þisi, ana pisawal visena tai, sape “Þisi narui.” Ana pogos naþa pisa pae visena nene, telan þarina pito tano, taÑan ninuna pano, pure maron kiena yalua, mare.

Amiyurþe mraÑanena ne Yesu

³¹ Pogos naþa Yesu mare, naga kolpae e legiena na kilaruruen sur punu ga na Þaþagena na SitoÑalen na Tamaliaena. Sanene, legiena na peni, naga pe pupia legiena na þaþagena nene, ana e legiena nene, taþatete atol tas nen yar mare. Nanene kila sane yar keviu kiena le Yu lala sinelan asape monar akus plan tas nen la telu nene sumon naþa mrae vato tano. Ana amaraun ñena asape sa þisi la telu nene pe amare ruru re poli wa, þisi na amligan visena pa puna ne Ñaelat, apiunia asape aweroro lala lala vena amare vilaga.

³² Þisi na Ñaelat taÑania, ana kiena yar na mara la apa aÑero lan naga naþa asuar e lak torovia lepas tai, þisi na akila pan taþena. ³³ Þisi na apanon vena akila ñena va Yesu, ana apisu naþa naga marþantop pa rui, ana pe akila re si pan poli.

³⁴ Ana lala yar na mara tai kus kiena kalie, miyurþe mrañanena ne Yesu, susun pano-
o apisu pupia kuruta amio wii pinin molue pito tano. ³⁵ Ana sur nene pe lelaga kemua
paþisi, vanon nepisu e kilamarau, nekilia nesape pe lelaga, þisi na nesape nevisawal van
amiu, vena amiu mñena alelaga ea asape sur nene pe lelaga ga. ³⁶ Sur la nene molmolue
sanene vena kilaen visena la na Nasiriena Wa na susumo la aim ve lelaga ga. Visena tai
naþa pisa sanini, pisape

“Pe puriu na yepena re nena tai poli naþa yoko worovia,”

Yauena 34:20

³⁷ a taþena pisape

“Amiyur kare naga, þisi narui na asun avisusu mña naga.”

Sek 12:10

Ana þelaga na marena kiena ne Yesu naga sa ga naþa visena la nene apisawal na konua
konua rui.

Amligan tasnena ne Yesu e kana puluve

³⁸ Þisi na pupia yerka kiena ne le Yu la tai, kiena ki Yosop, nae pulkumali naþa
Arimateia, naga pe nalogena tai kiena ne Yesu nanua mña rui, ana kilawan ke kiena
nalelagaena komin mamaraun ke li kawa taþena lala. Ana pogos naþa kiena Suþe mare
pae, marauena nene kovio, pa puna Paelat, piun tasnena ne Yesu. Ana Paelat tañania,
pa kuslua tasnena ne Yesu petan lak torovia. ³⁹ Ana yar taþena tai naþa amio Yosop
e pogos nene, naga Nikotimas naþa nanua tapolou ga pimi puna ne Yesu kolemalu tai
vena sun amio. Ana Nikotimas nene naga pimi e pogos nene, þar mñena sur la na liluaren
tasnena ne Yesu, amio pupia pias nen sirveve na ponotaninu tai, naþa kana kilo miyuve
lualima yam telu [30]. ⁴⁰ Þisi na akus tasnena ne Yesu, apiar e kulmrae yuwowo lala, amio
ponotaninu la nene, sa naþa le Yu la amiyuñen ke e kiela marena lala. ⁴¹ Amlular pae
naga, ana lavisin ga e naþa añear naga e laki torovia, lokove tai moña ga, ana loyuña
e lokove nene puluve viu tai mñeke ea, naþa atemare ga na wa vena liganen tas nen yar
mare va ea, ana pe tai pa li re e poli wa. ⁴² Þisi na amligan tasnena ne Yesu mon loyuña e
nene, vanon apisu pog þarovia, lavis legiena na kilaruruena sur punu ga þisi, ana pogos
naþa sa mrae vato kovio, Legiena Wa siaria.

20

Puluve korena ga mñeke narui

Matu 28:1-8; Mak 16:1-8; Luk 24:1-12

¹ Amligan tasnena Yesu mñene puluve nene, þisi na moña pano tol legiena þesia na
wik taþena. Ana sira la þasia, sane Maria nae Maktala lala, asuñal kolulag wa ke ga wa,
amial malo ga apam e puluve.

Ana pogos naþa apam ke lavisin, amilan naþa apisu pupia kilavaru pe mono re si e pulus
nen puluve poli, amelilivin lua pae rui pa mñeke ga yepasia. ² Ana pogos naþa Maria pisuia,
pilon sina ga kiriri pimi, pisu Saemon Pita amio inu, inu naþa imimi lua Yesu mepe sa ga
puruvi ga lala, pisawal pan imimi lua, sape “!Aulai, tasnena ne Yesu kovio! Akuslua kom
ko yo tai, memninue ga sane mñeke pe narui.”

³ Imimi lua memloge, mesuñalu, mepa iroro ga ma puluve. ⁴ Imimi luwoka mekirir
ke mepavin, þisi na nemiyuve Pita, nepa netol þesan yo nene, a Maria taveve imimi lua,
naga mñena pimi sina. ⁵ Nepa netol puluve, nepa lavisinia nekira pa loyuña e lele naþa
amligan tasnena ne Yesu mñene ea. Þisi na pe noñal re si Yesu poli, nepisu ga kulmrae la
naþa amlular tasnena ea, akekapili ga sike sanene, ana pe nepa re loyuña poli. ⁶ Ana pe
piavi re nena ga Saemon Pita siraun inu pam, naga pa loyuña e puluve. Pisu kulmrae la
naþane, sa ruru ga naþa amlular Yesu e nanua yemlagi nakoneva. ⁷ Ana tawol tai naþa
apiar e þarina Yesu, naga pe to re amio kulmrae la poli, akawe ruru si naga taaga teke.

⁸ Pita pisuveve ke sur la ne sanene, ana inu mñena nepa loyuña nepisua. Imimi lua
mepisu veve ke sanene, mekilia ga narui, memlelaga mesape Yesu suñal si taulu marena
rui, lelaga na lelaga.

⁹ Sumo, imimi nalogena la pe mesitom re mesape ãisi na ve sanene poli, vanon pe mekilia re naãa Nasiriena Wa la apisawal ke rui asape kieta Navisaarena monar mare, siraunia mal sina. ¹⁰ Nanua na memninue ga, ana nanagane imimi lua nene mepisu e kilamaramimi. Mepisu ãa sanene pano-o, ãisi na moãasuãe si uãa.

Maria nae Maktala pisu Yesu

Matiu 28:9-10; Mak 16:9-11

¹¹ Imimi lua moãasuãe si uãa, ana Maria suãal ga suãa e pulgon puluve suãa ga, wamarana mlalau ke. Naga tag ãa sanene pano-o, ãisi na kira si pa e puluve, ¹² milan si navisi lua, amiyen kulmrae naãa miyuwowo paãisi, atotano ateke metava. Tai totano e naãa sumo amligan ãarina Yesu pa ea, tai totano e naãa lana la pito ea.

¹³ ãisi na lalua apis pa Maria, asape “?Erau, ko otagin ke ya?”

Pisataãe sape “Akuslua kiau Suãe kovio, nemninue amligan ãe ke pe narui.” ¹⁴ Naga pisa pa visena nene, ãisi na kirawe le sina, pisu yar tai suãalu sike na. Pe pisuluãar re poli, ana Yesu ke narui.

¹⁵ ãisi na Yesu ãena piun tania, sape “?Erau, ko otagin ke ya? Okale ke a ne e nini?”

Ana Maria sitom ãape yar na yuãaena ga nae e nene, pisataãea, sape “Yarkeviu, visae ko na okuslua naga petan e nini, awis, ovisawal van inu e nape naãa omligan tasnena ãe ke ea. Sineun nesape neva nekusia, neligan ruru sina ãe ke e lelana.”

¹⁶ Siraunia Yesu pio Maria, pio kiena kia, sape “!Maria!”

Naga mloge, pilonia, pisuluãar sane Yesu, pa lavisinia, pio e kiela visena, sape “!Raponi!” naãa kinas nen visena nene “Navianena.”

¹⁷ ãisi na Yesu pisa pania, sape “Maria, toko, ve otolnu re sanene. Inu taãatete nesu e nini, komin pe neãasuãe re metava puna ne Ata poli wa. Ana popon ko na owasuãe si puna ne kieta puruvi lala, ovisa van la osape nepisa sanini, nesape nanagane, nepa ke si metava puna naga naãa pe arimau, a pe arimamiu, naãa pe kiau Ntewa, a pe kiamiu Ntewa.”

¹⁸ Siraunia Maria nae Maktala nene kila sanene, ãasuãe si pu imimi nalogena lala, pisawal, pisape “Nepisu Suãe e kilamarau,” a pisayu pan imimi e sur la naãa Yesu pisa pania.

Yesu ãalivin kiena nalogena lala

Matiu 28:16-20; Mak 16:14-18; Luk 24:36-49

¹⁹ Ana e legiena ãesia na wik ke nene wa, ko yepekilavi, imimi nalogena la mesike lele taaga loyuãa e yo naãa metapolou ke ea. Mekiar ruru mratava lala, vanon memaraun ke mesape sa ãisi yerka wa kiena le Yu la sinela kar imimi ãena, sa naãa sinela kar Yesu rui. Mesuãa sane na, veraga ga, Yesu ãalivi pimi suãal likan imimi, sape “!Suãarena sike amio amiu!” ²⁰ Naga pisa sanene, ãisi na pian lologia imimi e lepas na mrapototo la naãa e limana amio pupia piakapila naãa e mraãanena. Mepisuia, ana pogos naãa mekilia mesape naga Suãe nene, mekekara na mekekara. ²¹ Pisa ke sina ga pan imimi, sape “!Suãarena sike amio amiu!” A miakol ke sina ga, sape “Sa ga naãa kiau Ata miãlanu vena nekila kiena yuãaena, ana inu towe neiãa amiu re vena akila sanene.”

²² Siraunia, miyu yalua pimi e imimi, sape “Amiu atol Ninuna Wa. ²³ Yar a naãa visae amiu aviewoia vanon kiena mlamulena viowa, yoko naviowaena nene kovio vetania, ana yar a naãa visae amiu ve aviewo re vanon kiena mlamulena viowa, yoko naviowaena nene to lue ga e naga.”

Toãas pisuia, mlelaga

²⁴ Ana pogos naãa Yesu ãalivin imimi, imimi yaru tai pe su re poli, naãa Toãas Kaora. ²⁵ A siraunia, mepisu naga, mepisawal pania, mesape “!Suãe ãalivin imimi, mepisu naga rui!”

Ana naga pe mlelaga re e poli, pisape “Peraga, in na monar nevisu e kilamarau. Visae ve nevisu re piakapila na mrapototo e limana, netol e mrasilmau nini, a visae ve neligan

re luñau nini e piakapila e mrañanena, yoko tařatete nelelaga nesape naga mal sina ga.”

²⁶ Toñas pisawal kiena sitomena nene, řisi na wik tai řaro pano, mesike si lele taaga e yo nařane. Ana e pogos nene Toñas ñena mesike memio, ana akiar mratava la ñarera, řisi na Yesu pimi ñalivin imimi yam si tai, sape “!Suñarena sike amio amiu!” ²⁷ Ana pis pa Toñas, pisa pania sape “Luñau na nini, okian mraslumoña, otol luřaria. Mrañaneu nanini, oligan lumoña te ea. Ve ositom řele re sina, oviawa ñarera e inu.”

²⁸ Toñas mloge na kira pisu Yesu, pisatañea sape “!Kiau Suře, ko ope kiau Ntewa!”

²⁹ řisi na Yesu pisa pania sape “?Sanape, opisunu ana omlelaga e inu? Nanene naga po, ana pupia navisa ruruena sike e la nařa pe apisunu re nena poli wa, ana amlelaga ke pa e in rui.”

Visena maro tai

³⁰ Sur la moki nařa Yesu kila, nesiri plan pa e tusi nini rui, ana naga miyuñmaen ñena kile tařena la moki e maramimi nařa pe nesiri plan re poli. ³¹ Ana visena la punu ga nařa asike e tusi nini, ve naiila amiuena vena alelaga asape Yesu naga pe Navisaarena, pe narina ne Ntewa na lelaga. Ana kiamiu nalelagaena e kiena kia nene, yoko ve kiamiu mrapa na tolen malena e naga.

21

Yesu ñalivin sina kiena nalogena la olua

¹ Ana siraunia, imimi nalogena la řasia mesuñma garo pupia lapa na garo Taepirias, pona Kalele, řisi na Yesu pimi ñalivi. ² Imimi nařa mesike e pogos nene, Saemon Pita, Toñas Kaora, Nataniel nae pulkumali nařa Kana ma Kalele, inu nemio olai na sumo Semes, amio sina imimi lua. Ana navaemeena kiena ne Yesu pan imimi e pogos nene sanini.

³ Susumo na Saemon Pita pisawal, pisape “Aulai, in na neva neure lilivi metava narui.”

řisi na mesuñmalu mepisape “Poga, ita punu ga.” řisi na mepatove mokus waa mepa mokuan lilivi. Mesuñma e sive pano-o yemlagi, ana pe metol re nena ika tai.

⁴ Ana pogos nařa yemlagi merarava ruru ke narui, Yesu patom su ura e nene, ana mepisu sane sa ga yar tai ne sike ne, ana pe mepisuluřar re poli mesape naga ke narui.

⁵ Ana Yesu pion pan imimi, piunia sape “?Naruu lala, ařar ña ika lařasia, po pere?”

řisi na mesape “Peraga rui.”

⁶ řisi na pisa, pisape “Pogaga, akila sanini. Ava akuan si lilivi, ana ve akuan re si sa nařa akuan ke ne, aluřarli va e lepas na řamarua sumo wa, ana nekilia nesape yoko atol ika řasia.”

Ana pe mepisu kilale re poli wa sane Yesu na pis ke ne, ana mepa meluřar lilivi sa ga nařa naga pisa. Ana veraga ga pulen ga ika na ika, ana pogos nařa mesape mourelua va metava meřure řele ga, pulen manene la ika lala.

⁷ řisi na mepisu kilale narui mesape Yesu, ana inu nařa imimi lua Yesu sane mepe puruvi, nepisa pa Saemon Pita, nesape “Pita, ovisuia, Suře nañma!”

Pogos nařa Pita mloge sane na, suñmalu veraga, miyen sina ga ñana kulkota, pula tano e sive, miye pa ura. ⁸ Pe mesu re perinan ura poli, sur sane tasme ponotia taaga ga [100], ana Pita sumon imimi mokus waa mesirau mopure yalolog ke lilivi nařa pulen ika.

⁹ Ana pogos nařa mepim ura, mepisu kap tai moña ga, nařa amlega ika řasia e mopulusia, mepisu narin kilaparavi lařas manoa ruru pa sike rui. ¹⁰ Ana Yesu pisa, sape “Ika la nařa amiu ařar ga na wa, awar řas vam ve kata.”

¹¹ Ana Saemon Pita pitove, pa metava e waa, řerelua lilivi, řere pimi ura. Ika mok pařisi, memaraun mesape sa řisi lilivi wororowa lawea, ana peraga, meřere pimi pogaga. Pogos nařa mořar plan ika la nene, mopuloia tol ponotia taaga lualima yam lima pa telu [153].

¹² Ana pogos nařa ika la manoa ruruia, Yesu pio, sape “Aimi akinana.”

E pogos nene mepisu kilale ruru mesape Suře ga nene, pe mesitom re si meviun mesape naga ai. ¹³ Mepim mesike pa lele taaga narui, Yesu mla kilaparavi, pion pan imimi, amio mēna ika lala, ana makania.

¹⁴ Naga nene sane pe Yesu kiena navaemeena natelu pan imimi kiena nalogena lala, siraun nađa Ntewa tamalia sina naga petan marena.

Yesu amio Pita

¹⁵ Ana pogos nađa memla pae kamimi kinanena na kolulag, Yesu pisape sun re amio Saemon Pita. Piun tania, sape “Saemon, narina ne Yoane, sanape? ?Ko na sineňa sii inu keviu, taulu nađa la nene sinela sii inu, po peraga?”

Pita pisatañe pania, sape “Suře, sur nene okilia pa rui, nekekaran ko pařisi.”

Ana Yesu pisa pania, sape “Pogaga, ovagan narin kiau sipsip lala.”

¹⁶ Pogos tařena sina ga, Yesu pisa pania, sape “Saemon narina ne Yoane, ko na sineňa sii inu po pere?”

Pita pisatañe ke sina, sape “Suře, sur nene okilia rui. Sa nađa nepisaaria, nekekaran ko pařisi.”

Ana Yesu pisa pania, sape “Pogaga, ovisuar kiau sipsip lala.”

¹⁷ Ana yam si tai, kila yam telun narui, Yesu piunia, sape “?Saemon narina ne Yoane, ko na okekaran inu kemua lelaga, po peraga?”

Ana pogos nađa Pita pisu Yesu piun m̃a sanene pano tol yam telu, mloge piowa, pisa pa Yesu sape “Suře, ko okilia make sur punu ga, okilia nađa nekekaran ko pařisi.”

Ana Yesu pisa pania, sape “Pogaga, ovagan kiau sipsip lala. ¹⁸ Ana nevisa ve lelaga van ko sanini, sane nanua sumo, pogos nađa ope m̃ee ke ga wa, ko na okila ke ga sa nađa sinoňan osape okila. Ko ga taaga omiyen moňa kulsota omialoro opa e lele la nađa sinoňania. Ana nekilia nevisa van ko, pogos nađa ovim ove yermarua, yoko yar tařena la ayenwo ko e moňa kulmrae, atarar lumoňa aure ko ova e lele la nađa ve sinoňan re ova ea.”

¹⁹ Visena kiena ne Yesu nene, sane pisawal ke sape sanape nađa yoko aweňar Pita. Ea kiena marena, naga kila řelaga tai nađa mligan naga pito tano, a pisirlua kia kiena ne Ntewa pa metava.

Ana siraun nađa Yesu pisa pa sanene pa Pita, řere ke sina ga naga, pisape naga kilia siraun si naga, pisape “Ovim, otaveve inu lue ga narui.”

Yesu amio Yoane

²⁰ Ana siraun nađa Yesu sun pae amio Pita, Pita pilonia, pisu inu, erau wo kiena ne Yesu, nesike lavisin la luoka. Inu ke narui nađa nanua, e kinanena maro, netotano lavisin Yesu, nepiun tania nesape e imimi nalogena lala, ane yoko vielua. ²¹ Ana pogos nađa Pita pisu inu, piun tai Yesu, sape “?Suře, sanapen erau nene?”

²² Ana Yesu pisa pania, sape “Visae nasinenanena kiau sane yoko naga ve kovio re, ana suňa sanene vano neim sina ga, sur nene naga pe kiau, pe pe kioňa re nađa ovisa sur tai e poli. Sur nađa pe kioňa na kilaena, nepisa pan ko řa rui, nesape otavevenu silaga.”

²³ Ana suraun pogos nene, pog nađa nalelagaena tařena la amloge nađa Yesu pisa sanene, amlogepalia, amape Yesu pisayu inunia, sape tařatete nemare pogos tai. Ana Yesu pe pisa re sanene poli, pisa ga sape visae naga sinenania, yoko kilia ve sanene. Sanene, kana kinasia sane sur nene nađa Pita piunia, pe kiena re poli, ana pe kiena Yesu ga.

Visen maro

²⁴ Ana inu nađa nepisawal ke sur la nene, nesiri plan ruru ke vena akilia auloia. Ana ita punu ga tekilia telelaga tesape visena la nene pe lelaga pařisi.

²⁵ Poga, tusi nene pimi řisi ga e nini narui. Sur la moki nađa Yesu kila sike ea, ana sur la moki na moki nađa Yesu kila pe su re e poli. Visae tesiri punuia, nepisu sane pona yoko kana tus la ve mok vařisi, vano-o yo ve tokak e yomarava nini.

YUÑAENA Kiena ne Li Nalologena Lala Visayuena Na Tusi Nene

Kompasnen suniena plas na tusi nini

Tusi nini “Yuñaena Kiena Ne Li Nalologena Lala”, Luk siri pan yaru tai, kiena kia Teopilas. Nane tusi na lua naña Luk siri, pimi siraun kiena tusi na sumo, naña kiena kia “Lologena Wo Kiena Yesu Kristo Naña Luk Siriyuia”. Tusi nini “Yuñaena Kiena Ne Li Nalologena Lala”, kiena kia na plasa sanene, sape “Yuñaena Lala”. Naga pisayu yuñaena p̄esa kiena li nalologena lala kiena Yesu, naña Ninuna Wa naga sumon la e yuñaena na visawalen lologena wo, siar garu Yerusalem a e yo punuga garu Yutea a Samaria, pano pano-o p̄ar make yo e yomarava (Yuñaena Lala 1:8).

Tusi nini naga suniena tai kiena li nalelagaena p̄esa, naña siari e p̄egas kiena lus nae Israel lala naña amlelaga, a kapuru pimi keviu kalo make yo la e yomarava.

E tusi nini, Luk sinenan sape kilologia naña lala naña amlelaga e Yesu, ve akawe re P̄arin Supe nae Rom naña naga pe supen make yo la e pogos nene. A naga sinenan sape kilologia naña suri makega naña lus nae Israel lala amlelaga ea asape yoko imi m̄alivi, nane apimi m̄alivi rui kome lologena wo naña ita li nalelagaena lala temlelaga ke ea.

Tusi nini komsus telu, naña kilologia sanape naña lologena wo suña p̄ar make ke e yo punuga narui, a suñare suña kapuru ke silaga. Komsus na sumo, pisayu suñare naña siari garu Yerusalem, siraun naña Ntewa p̄erelua Yesu pa ma e peni. A na lua, pisayu naña yuñaena kapuru pimi keviu, kalo make yo lua nene Yutea amio Samaria. A komsus na maro, pisayu naña yuñaena pano pa kalo yo punuga e puruvanua lala na yo na pawa sive naña apio asape Sive Naña Metiterenian, pa tol yo Rom.

Pupia suri keviu tai naña tusi nini pisayuia, nane yuñaena kiena ne Ninuna Wa. Pogos naña li nalologena lala asike garu Yerusalem wa e pogos na legiena na Pentikos, Ninuna Wa pitom ana mla m̄areraena pala. A siraun e pogos nene, Ninuna Wa suña miila ke yuñaena na suñare, a miila m̄ena li na sumonien yuñaena lala e kiela yuñaena. Tusi nini pisawal visena la p̄asa naña li nalologena lala apisawalia, a kila meraravan naña kiela visena la m̄arera po, pilon malena kiena la naña amlelaga, a miila li nalelagaena lala vena aimi aviran la lele taaga.

Kompasnen tusi la na nini

Yesu pis maro pan kiena nalologena lala 1:1–14

Amligan lua yaru naña kus lelana Sutas 1:15-26

Amlologon lologena wo garu Yerusalem 2:1–8:3

Amlologon lologena wo pa Yutea a garu Samaria 8:4–12:25

Yuñaena lala kiena Pol 13:1–28:31

Yalena na sumo kiena ne Pol 13:1–14:28

Apiora lele taaga garu Yerusalem 15:1-35

Pol miyaloro yam lua 15:36–18:22

Pol miyaloro yam telu 18:23–21:16

Visena na sumo

¹ O, kiau erau Tiopilas, inu nekekara pa p̄isi naña nevitawe ko e tusi ta p̄ena nini. E kiau tusi na sumo naña nesiri pan ko, nesiriyu suniena na suri la naña Yesu naga suña kila, a naña naga suña pian ke e sumo, naga nene naga siar e pogos naña naga siar p̄esan kiena yuñaena, ² pimi tol e pogos naña e na m̄areraena kiena ne Ninuna Wa, naga mla maron kiena visena maro pa kiena li nalologena lala naña naga mligan plan la rui, ana siraunia Ntewa p̄ere naga pa si metava.

³ Ana pogos naña naga mali sina ga e marena, naña naga pe pa re si metava poli wa, ana pogos moki, naga suña ñalñalivin la pa tol legiena lualima yam vari, naña kila meraravan ruru pan la naña naga mali sina ga e marena lelaga. E pogos la nene, la asuña apisu kilale ruru naga, a naga suña pisayu mrapa lala na nasuñenena kiena ne Ntewa pan la.

⁴ Pogos tai, naña naga suña veraga amio la, naga mla visena nene pan la, naga pisa, pisape “Amiu na monar ve aur matan re yo nene Yerusalem, amiu na monar asuñate ña ga wa vena atol Ninuna Wa nene naña Ata pisaar ñisi rui sape naga la van amiu, sa naña nepisa ñena ga pan amiu rui. ⁵ Sa nanua sumo, Yoane Nakeena naga kee yeririna lala e ga e wii, ana ve ve piavi re, legiena ga lañasia warovia, ñisi na Ntewa naga kee amiu ve lelaga, na nene e Ninuna Wa.”

Yesu pa metava ma e peni

⁶ Ana e si e pogos tai, naña li nalologena lala la apimi sina ga lele taaga amio Yesu, la apiun tania, apisape “?Suñe, sanape, nanagane naga pogos ruru naña ko okila naña ita le Israel lala ita ve kieta ñarin suñe sina ga tai, pona pe kana pogos nen re poli wa?”

⁷ Ana Yesu pisatañe la, pisape “Naga nene pe pe kiamiu re naña amiu akilia pogos la nene poli, pona legiena la nene poli, naña Ata ga naga taaga mligan ruru pisape ve sanene, a ve sanene. ⁸ Ana siraunia, Ninuna Wa naga vim e amiu, ana e pogos nene narui akus nañareraena, ana ñisi na amiu na monar ava avisawal inu garu Yerusalem nene, a e yo tañena punu ga lala garu Yutea amio Samaria, ana vano vano-o tol ñena ga yo tañena la punu ga e yomarava nini.”

⁹ A pogos naña naga pisa pa visena la nene ñisi, naña la asike apisu ruru ke naga wa, Ntewa ñerelua pa metava, a lul tai pitomi kalovia, ana la pe aña re si poli. ¹⁰ Pogos naña la asuña akirakira ke pa metava e sinapane wa, veraga ga amilan ga, naña añal yaru la lua naña ñala kulsota lala miyuwowo pañisi, lalua apimi asuñalar la asike amio la, lalua apisape ¹¹ “!E, le Kalele lala! Amiu ve sinemiu viowa re, ve akirakañar re va metava e sinapane sanene. Yesu nene naña Ntewa naga ñerelua naga petan amiu pa metava e peni, ñisi na naga monar wasuñe sina vitomi, a naga yoko wasuñe sina e ñelaga ga nene naña apisu ga nanagane ñisi ne.”

Ñegas kiena ne nalologena lala

¹² Ana li nalologena lala amligan kunus nene, naña Kunus Na Purolip lala, añasuñela apito garo Yerusalem, pe perina manene re poli, sane tasme na manu taaga ga. ¹³ La nene la apimi atol yo Yerusalem, ana la apa ke sina ga loyuña e yo naña metava naña la asusukemua e rui. A la nene kiela kia sanini: Pita, Yoane, Semes a Antru; amio Pilip, Toñas, Ñatalomiu, a Matiu; amio Semes naña narina ne Alpeas, amio Saemon naña naga lala yaru tai naña sumo akila politik pa le Rom lala, amio Sutas naña narina ne Semes. ¹⁴ Ana e pogos nene, la nene amio sira lala, la apalue ga lele taaga vena alen. A Maria, anenane Yesu, amio ñena ga wenla Yesu lala, asuña apa lele taaga amio la.

Yaru na kusen lelena ne Sutas

¹⁵ Legiena lañas ñarovia ñisi, ana li nalelagaena lala apimi lele taaga, naña la punu ga atol suri sane yaru ponotia taaga lualima yam lua. Ana e pogos nene, Pita naga sitom sape visayu van la vena akila sanape naña alual yaru na kus lelen yaru nene Sutas. ¹⁶⁻¹⁹ Naga nene vanon naña siraun naña Sutas naga sane kila kiena yuñaena viowa nanua sumo, naga pul ke sina ga porotano tai amio kilavaru naña naga tauluia, ana naga ga mloru e yo nene, ana ñeñena ñapo, a sinena la molmolue, ana naga mare. A yeririna lala nae Yerusalem amloge lologena nene, ana nane kila la apio kinakinas nen porotano nene e kiela visena asape “Akeltaña,” naga nene visena tai naña naga pisape “Yo Na Kuruta.”

Sanene, Pita naga sitom pisape visayu suri nene van li nalelagaena lala, ana naga suñalu e marala, pisi pan la, pisa pisape “Erau lala, nanua sumo, Ninuna Wa naga pisi

kome pulgona ne Tepet, naga pisayu yuñaena kiena ne Sutas nene naña naga sumon yeririna lala apimi apuarar Yesu, a visena la nene apimi ape lelaga ñisi rui, sa naña Visena Wa naga monar ve lelaga silaga. Sutas nene naga imimi yaru tai naña, naña Suñe mliganar naga vena tarar yuñaena amio imimi, ²⁰ ana nanagane, naga sa naña visena lalua nene naña teke e Tusi Kiena ne Yauena Lala, naña tai pisa, pisape

‘Naga popon naña ñana yuña mon korena ga, ñisi na tañatete yaru tai mono ea,’ *Yauena 69:25*
a tañena sina ga, naña pisape

‘Popon yaru tañena tai kus lelana.’

Yauena 109:8

²¹⁻²² “Komin suri ne na nene, ana monar yaru si tai naga imi sukol imimi sina vena navisawalen Yesu, kieta Suñe, visave naga mali sina ga e marena. Yaru nene naga monar lala yaru tai naña la amio imimi nanua sumo, e pogos la naña Suñe suña mialoro ke amio imimi. Naga monar ve yaru tai naña naga sike e poglis naña Yoane naga mlologonyu ke kiena nakeena, pimi tol legiena naña Ntewa naga ñurelua Yesu petan ita, vena va si metava.”

²³ Ana la apisawa kia kiena ne yaru la lua. Tai, kiena kia Yosop, naña la apio asape Ñasapas, a kiena kia tañena sina, kien kia asape Sastas. A yaru tañena, kiena kia Ñateas.

²⁴ Ana la amlen, apisa, apisape “Ntewa, Ntewa namanmaruaena, ko ga okilia ña ya naña sike e los nen yeririna lala. Narui imimi na sinemimin mesape ko okipian imimi e lalua nene, nape naña ko oñere rui, ²⁵ vena naga tarar yuñaena kiena ne nalologena nene, naña Sutas naga mligan rui vena naga va ruru nena ga e kiena lele na kovioena.”

²⁶ La amlen pae, ana akila sur sa naña la amlil ñapila, ana kia kiena ne Ñateas naga kate. Ana la amligan lua naga, ana asikol naga amio la lualima taaga pa taaga nene, kila la lualima taaga pa lua ke sina ga.

2

Ninuna Wa pimi

¹ E legiena na Ñapagena Na Yui Marua, li nalelagaena lala la apimi asu ña ga lele taaga, ² a veraga ga, ñaagena tai molue ma e sinapane, sa ga naña pupia lagi tai ñai, ana ñaagena nene naga kalo punu yo na loyuña nene naña la ateke tano ea. ³ Ana la apisu suri tai sane kapi mluamene, ana kapi nene naga mliñerea, ana peve taaga pa sike e la punu ga nene. ⁴ Ana la punu ga, Ninuna Wa naga pimi pulemamaga e la, kila la apivisi e visena tañena lala, sa naña Ninuna nene naga kila akilia apisi komea.

⁵ Ana garu Yerusalem, le Israel la asu ña ga, naña la ape li nalenena lala. La nene na la amolue e yo la moki na yomarava nini apimi. ⁶ Ana la nene amloge ñaagena nene, lala amio yeririna tañena lala, la moki pañisi naña la apimi e yo nene. Ana la nene sinela kurkur pañisi, komin naña yaru la naña Ninuna pimi e la, la pogos naña asuña apisi sanene, ana yaru make ga amloge nena kiela visena la naapo. ⁷ Ana la amilan pañisi, a amiyuwawa, apisa apisape “!Aulai! Yaru la nene naña asu ña apivisi ke sanene, ana lala na ape le Kalele ga lala. ⁸ ?Sanape naña ita punu tesu ña temloge ke naña apivisi ke e kieta visena la sanene? ⁹⁻¹¹ Ita tepe yaru na purvanua la moki na tesike ne, nae Patia, nae Mitia, nae Elam, nae Mesopotemia, nae Yutea, nae Kapatosa, nae Pontas, nae Esia, nae Pirisia, nae Pampilia, nae Isip, nae Krit, nae Arepia, nae Lipia e lepas na vaen Saerin, a nae ñena pupia pulkumali naña Rom. Ita lañasia tepe le Israel ruru ga, a lañasia pe ape le Israel re sumo poli, ana sirau la apimi ataveve kieta nalelagaena. Ana ita punu ga, ita punu peve taaga temloge ke naña la apivisi ke kome kieta visena lala ita punu ga, la asuña apisa ke pupia yuñaena la nene naña Ntewa naga kila.” ¹² Ana la amilan pañisi, kiela sitomena la kokovio, ana la aminue kare narui asape sanape narui, ana la asuña apiuviun ke tan la apisape “!Aulai! ?Ya ne sanene?”

¹³ Ana lañasia asu ña apitalia la nene naña Ninuna pimi e la ñisi rui, la apisa apisape “E, la nene amun ga kuruta nene, nane kila ape wowe ke ne.”

Visena kiena ne Pita pan la

¹⁴ Ana Pita amio li nalologena tařena la lualima taaga pa taaga nene, la ařariplan la asuñmalu, apimi ase e nene, ana naga pisi manene pan la, nařa naga pisawal sanini, pisape “Erau lala, nařa amiu le Yu lala, a amio amiu yeririna tařena lala nařa amiu asike Yerusalem, amiu na ayagogon ruru inu vena nevisawal sur nene van amiu. ¹⁵ Yeririna la nene na pe amun re wii poli, sa nařa amiu asu ña apisa ke ne, peraga, komin nanagane, aora ovari ga na kolulagi nini na wa. ¹⁶ Ana suri nene nařa amiu apisuia, naga suri nene nařa Navisawalena Soel naga pisayu sumo rui, nařa pisape

¹⁷ *‘Ntewa naga pisa, pisape “E legiena la nene na pog maro nene, řisi na nela ninuu van yeririna la punu ga.*

*Ana řisi na narimiu lala la avisawal kiau visena,
a řisi na kiamiu yar viu lala yokorena avisu sur lala,
a kiamiu yermarua lala, la añeni nañeni lala.*

¹⁸ *Lelaga řa, e pog nene, řisi na neligan Ninuu,
naga vitomi ve keviu e yaru ñee lala amio sira ñee lala na kiau yuñaena,
ana řisi na la avisawal kiau visena.*

¹⁹ *Řisi na nekila suri lala nailanena e yo yau,
amio kile lala na yomarava nini,
ana yoko kuruta a kapi a pupia ñau nařa piu asuña ga.*

²⁰ *Sumo na, mrae naga imi malolo, a kupario naga řisi na imi vivaga sane kuruta.
Ana siraunia, legiena keviu nene kiena ne Ntewa, nařa wo vařisi, naga kilia imi.*

²¹ *A e pogos nene narui, yaru ai nařa naga vio kia kiena ne Ntewa,
řisi na Ntewa tamalia naga.” ’*

Soel 2:28-29

²² “Amiu le Israel lala, amiu ayagogon ruru kiau visena la nini. Yesu nene nae Nasaret, naga pe yaru nařa Ntewa naga kipian ruru naga merarava pan amiu sape naga pe Navisaarena. Ntewa naga kila sanene nane e yuñaena na nařareraena lala, a e suri nailanena lala, a e kile lala nařa naga kila Yesu naga miyuñaenia e maramiu nanua sumo rui. Suri la nene amiu asuña akilia ke řisi rui, ²³ ana pogos nařa Ntewa naga mligan naga e limamiu, amiu asuñmalu añeñar naga mare, nařa amiu atañan li viowa lala la asuar naga e laki torovia. Pogos nařa amiu na pe akila re suri nene poli wa, ana Ntewa naga kilia řisi rui pisape řisi na ve sanene, ana naga tañania, komin nařa naga taveve sa nařa naga sitom ruru nanua sumo rui vena kila. ²⁴ A siraunia, nařareraena na marena pe torokin re nařa uarar manene Yesu poli, ana Ntewa řerelua naga petan nasinelaea lala na marena, kila naga mali ke sina ga. ²⁵ Naga nene naga sa nařa visena tai kiena ne Tepet nanua sumo, nařa naga pisayu Kristo, nařa naga pisa, pisape *‘In na nepisu nařa Ntewa naga suña amio inu silaga,
naga sike e lepasneu na marua, ana kila sineu pe kurkur re nena ga.*

²⁶ *Kila sanene narui, sineu kekara, a purmeneu naga miau,
in na nepe yeririna ga, ana neřasine ga Ntewa ñarera.*

²⁷ *A Ntewa, řisi na ko na ve oligan re ninuu e yo na marena,
a řisi na ko ve otañan re tas nen kioña Yaru Wa na yuñae kioñaena menunuu.*

²⁸ *Ko okipian inu e mrapa lala na malena řisi rui,
a řisi na sineu naga pulen nakekarena ve keviu, nařa ko osuña omio inu.’* *Yauena 16:8-11*

²⁹ *Wolai lala, in na nesape nevisawal meraravan suri nene van amiu. Repita ne na nene nařa Tepet, naga na mare nakonua rui, la asin naga řisi rui. Naga nane kiena tampona ne nane ñeke e kieta yo ne, mon ña pimi tol nanagane. ³⁰ Ana pogos nařa naga mali ke ga wa, naga kilia rui nařa Ntewa pisaar ñarera pania pisape řisi na pogos tai na, kiena lus tai naga monar to sina ga tano e kiena pupia lele natotanoena, sa nařa naga kiena lus nene naga imi ve řarin suře va yeririna lala, sa nařa Tepet nene naga pe řarin suře sumo. Ana Tepet naga pe navisawalena tai, ³¹ a pogos nařa suri nene naga pe ñalivi re poli wa, naga pisu nařa řisi na Ntewa kila Navisaarena nene naga mali ke sina ga e*

marena. Suri nene na Tepet pisa e kiena visena nene, naña pisa, pisape Ntewa pe mligan re ninuna e lelen marena poli, naga pe tañan re tasnena pa menun poli.

³² Suri ke na nene narui naña imimi mesuñña mepisawal ke ne, naña Ntewa naga pisirlua ke sina ga yaru naña Yesu nene petan marena. ³³ Ntewa pisirlua naga, ana ðerelua naga pa metava rui, mligan naga sike e kiena lepas na marua. Ana sa naña Ntewa Arimata nene naga pisaaria, naga mla Ninuna Wa pania, a nanagane Yesu taron Ninuna Wa nene pan imimi, ana Ninuna Wa nene naga suñña miyuññaen ke suri la nene naña amiu na asuñña apisuia a naña amiu na asuñña amloge. ³⁴ E visena kiena ne Tepet la nene, naga pe pisayu re naga poli, komin naña ve naga re naña naga va metava e peni, ana naga pisayu ga Navisaarena nene. A kiena visena tañena sa ñena ga nini, naña naga pisa, pisape

'Ntewa na Mava pis pa kiau Suñe, pisape

“Ko ototano e kiau lepas marua, otoñmatea,

³⁵ *ñisi na inu nekila kioñña nasinekar lala ve sa takue naña ko oviawa ea.”* *Yauena 110:1*

³⁶ Komin suri ne la nanene narui, inu sineun nesape nevisawal ruru merarava van amiu, amiu mratava nae Israel la wetelu, sane Yesu nene naña Ntewa mliganar naga sumo rui pe kieta Suñe a pe Navisaarena, ana amiu asuar naga e laki torovia rui.”

Yeririna la moki naña amlelaga e Yesu

³⁷ Pogos naña yeririna lala la amloge visena nene, amloge sa naña miyur sinela, pano pa tol ruru nena puriu, ana la apiun tan Pita amio li nalologena tañena lala, la apisape “?Wolai lala, ðisi na mekila kan imimi narui?”

³⁸ Ana Pita pisa pan la, pisa pisape “Amiu punu ga, amiu avilopu amiu, ana amiu ava e nakeena e kia kiena ne Yesu Kristo, vena ðisi na Ntewa naga viewo kiamiu mlamulena viowa lala. A ðisi na Ntewa naga ligan Ninuna Wa van amiu, sane kiena nalaena tai van amiu, ³⁹ komin naña navisaarena naña Ntewa naga kila, naga kila pan amiu, a naga kila pa narimiu lala, a naga kila ñena ga pa yeririna tañena lala naña la asike perina wa. Navisaarena nene naga sike e la naña kieta Ntewa na Mava naga suñña pio la ña ga.”

⁴⁰ Ana Pita suñña pisa ke visena wo nawere laena la moki pan la vena aimi, a naga pisa pisape “Amiu na monar aligan mlamulena kiena ne yeririna viowa lala na nanagane, amiu na atamalia amiu vetan nakoena naña naga suñña pimi ke pan la.”

⁴¹ Ana la moki liu naña la amloge visena nene kiena ne Pita, la amlelaga ea, ana la apa e nakeena. A e yeririna la punu ga naña asike e legiena nene, la moki pe suri sane manu telu la apimi apiran la amio kiela ðegas nene.

Li nalelagaena lala apiran la e nasinewo

⁴² Ana li nalelagaena la nene, la asuñña apurari ke ðelaga la nene ñarera pañisi, naña la amiyagogo ruru po silaga naña li nalologena lala la apian la, a lala apiran la silaga e nasinewo e kiela ðegasia, a la asuñña akinana lele taaga silaga, a la yepela ñaen aora na leniena lala silaga. ⁴³ Ana li nalologena lala la amiyuññaen suri nailanena la moki pañisi, amio kile la moki, ana yeririna la apisu suri la nene, sinela kurkur pañisi. ⁴⁴ Ana li nalelagaena lala, la sinela suñña maran taaga ga pano-o, a la asuñña atañan kiela suri lala ve kiela pae ga. ⁴⁵ Sanene, la asuñña aþiliwilin kiela porotano lala a kiela suri make ga lala, vena la avion kana kilaveru la naña la atolia, va lala ai naña limala plasan suri laþasia. ⁴⁶ Legiena punu ga, la nene la asuñña apiran la sane ðegas taaga loyuñña e Yuñña Wa ñana ne Ntewa, a la asuñña akinana ke lele taaga e ñala loyuñña lala. A silaga naña la asuñña apimpae ke sanene, ana la akekara pañisi, a silaga lala apito ga tano e Ntewa, a la apotena pañisi pania komin malena wo nene naña naga mla pan la, ⁴⁷ ana amieluar naga vanonia. A e pogos nene, yeririna tañena ñena ga lala akekaran kiela ðelaga viu wo nene ðisa, a e legiena punu ga, Ntewa na Mava naga suñña tamalia si yeririna la þasia, naga suñña sikol la ke e ðegas nen li nalologena lala.

3

Laulu tai suñalu mial

¹ Ana legiena tai, e nena e pog na leniena e mrae telu, ko yepekilavi, Pita amio Yoane, lalua asuñña apa ke metava e Yuña Wa ñmana ne Ntewa. ² Ana yaru tai naña naga paeme naga pe laulu, a e legiena punu ga la asuñña akus naga pimi amligan naga e mralaea nene naña apisape “Mralaea Wo,” naga nene e Yuña Wa ñmana ne Ntewa. Ana laulu nene naga toña mlogi ke pan la naña apa ke loyuña. ³ Ana naga pisu Pita amio Yoane, naña lalua asuñña apa ke loyuña, ana naga mlogin nalaena tai vetan lalua vena lalua ala suri tai vania. ⁴ Ana Pita amio Yoane, lalua atamaria yeririna nene, ana Pita pisa pania, pisape “Mara, okira ovisu imimi sumo wa.” ⁵ Ana naga pisu manene lalua, naga ñmape ñisi na lalua nene ala suri tai vania. ⁶ Ana Pita pisa pania, pisape “Erau, in na pe kiau kilavaru re nena ga, ana in na kiau suri wo ga tai naña inu na kiau, nela van ko. Nane suri ne nanene: e kia kiena ne Yesu Kristo nae Nasaret, nevisa van ko, osuñalu narui, oyali.” ⁷ Ana naga pulun tarar limana na ñamarua, miila laulu nene tarlua suñalu, ana lana luwoka pimi po veraga. ⁸ Ana naga suñalu ke veraga e pogos nene, suñalu su, ana mialial lia. Ana pogos naña lalua apavini, naga taveve la, ana la ga teloka apa loyuña e Yuña Wa ñmana ne Ntewa, naña yaru nene kekara pañisi naña naga mial ke narui, naga suña pulaula, suña mieluar ke Ntewa.

⁹ Ana la naña asike loyuña apisu naña naga mial, a naga suña mieluar ke Ntewa, ¹⁰ a pogos naña la apisu kilale yaru nene la apisa apisape “!Apisu ke ne! !Nanene na laulu nañane-e! Sila ga naga suña mlogin ke kilavaru vanua e mralaea nene na Yuña Wa, ana naga pimi po sina, naga suña mialoro ke narui.” Ana la amiyuwawa ruru e suri nene naña pimi ñmalivin yaru nene.

Pita pisi pan la loyuña e Yuña Wa ñmana ne Ntewa

¹¹ Ana komin naña yeririna lala la sinela kurkur pañisi, la akiriri apimi puna ne la telu nene e kopkop nene na Yuña Wa ñmana ne Ntewa, naña kiena kia “Kopkop ñmana ne Solomon.” E yo nene, yaru nene naga suña tawa ke e Pita amio Yoane na wa. ¹² Pog naña Pita pisu yeririna la nene apimi lavisi, ana naga pisi pan la, pisape “?E, ita le Israel lala, sanape ne? ?Sanape na amiu amilan ke suri nene, ana amiu apisu ke imimi lua sanene? ?Pona amiu na amape imimi ga lua mekila yaru nene naga kilia mial e ga e nañareraena ga kiamimi imimi lua yo, pona amiu na amape imimi lua mepe yaru wa yo, pona sanape? !Peraga! ¹³ Ana Ntewa ga naga kila suri nene, nane pupia kieta Ntewa na naña pe Ntewa kiena ne Epraam, Aisak, a Sekop, a naga pe Ntewa kiena ne kieta yermarua tañena ñmana ga lala. Naga kila suri wo nene vena visirlua kia kiena ne kiena yaru na yuñaena nene Yesu, e maramiu. Ana Yesu ke ga nanene narui, naña amiu aþure naga pa e kieta kumali keviu, ana Ñaelat naga pisu sane Yesu naga poga ga, naga pisa pisape naga kilia molue, ana e pog ke nene narui amiu na apisawal ñmarerania e marana ne Ñaelat asape Yesu na pisokan ga, amiu yepemiu mavin naga. ¹⁴ Pe suri korena ga naña naga ñar kia naña asape Yaru Wa a Yaru Mesmesu, ana amiu na apisa sanene e pog nene narui, asape yepemiu mavini naga. Ana amiu na apisa ga pa Ñaelat asape sinemiun yaru nene naña naga ñmeñar yaru mare ñisi rui naga kilia molue, ana Yesu naga suña ga, ana Ñaelat tañania. ¹⁵ Visae sanene, amiu ke narui, naña añeñar Purþes nen Malena mare rui, ana siraunia, Ntewa naga kilamalia sina ga naga e marena, a suri ne na nene imimi mepisu e kilamaramimi, ana imimi na mesuña mepisawalia. ¹⁶ Kia kiena ne Yesu ne nanene naga kila ruru laulu nene naña amiu akilia ruru naga, naga pimi po, sa naña amiu asuñña apisu ke ne. Komin naña imimi na mepiawa ñmarera e nañareraena na kia nene kiena ne Yesu narui, ana lana ne yaru nene luwoka naga ñmarera ruru nena ga e maramiu nanagane.

¹⁷ “Poga ga, wolai lala. Inu nekilia ña naña suri la nene naña sumo amiu amio kiamiu yerikawa lala akila pa Yesu, amiu punu ga akila komin naña amninue ga. ¹⁸ Ana naga nene naga pe mrapa kiena ne Ntewa naña naga kila visena la naña naga pisawalia nanua sumo

rui pimi pe lelaga. E visena lala kiena ne kiena navisawalena lala, naga na pisawal ĩisi rui, naĵa ĩisi na kiena Navisaarena naga monar loge viowa e tasnena. ¹⁹ Poga ga, ana amiu na monar avilopu amiu, a monar awasuĵe amiu aimi puna ne Ntewa, vena naga ĩisi na yumu plan kiamiu mlamulena viowa lala. ²⁰ Visae amiu na akila ve sanene, ĩisi na Ntewa naga kilia la naĵareraena viu e kiamiu malena lala, a naga kilia ligan kiamiu Navisaarena nene naĵa naga mliganar ruru ĩisi rui, naga nane Yesu, naga wasuĵe ke sina ga imi. ²¹ Ana Yesu naga monar suĵna metava e peni sumo wa, vano vano tol pog naĵa yoko Ntewa sinenan sape kila suri la punu ga aimi ave urviu ke sina ga, sa naĵa naga pisawal ĩisi rui e visena lala kiena ne kiena navisawalena wa lala nanua sumo. ²² Ana lala yaru tai naĵa naga pisa sanene naga nane Mosis, a naga pisa pisape
 ‘Ntewa na Mava naga ĩisi na naga kila kiamiu navisawalena tai naga suĵnalulu su likan amiu sa naĵa kila inu na nesuĵnalulu ĩisi rui. Navisawalena nene ĩisi na naga ve yaru tai nae ga kiamiu yo, a amiu na monar ayagogon ruru kiena visena lala.
²³ Yeririna la naĵa la ve alogear re kiena visena lala, ĩisi na Ntewa naga ligan plan la vetan kiena yeririna ruru la napo, vena la ava akovio.’
²⁴ Suri nene Mosis naga pisa, a navisawalena taĵena ĵena ga lala, sane Samiuel, amio ĵena ga la naĵa apimi mare ga, e kiela visena lala, asuĵna apisayu ke suri lala na kieta legiena nanagane la nene. ²⁵ Navisaarena lala naĵa Ntewa naga mla nanua sumo e visena lala kiena ne kiena navisawalena lala, la ape kiamiu, a amiu na asike ĵena ga loyuĵna e naviranarena nene naĵa Ntewa naga kila ĩisi rui amio kamiu yermarua lala na sumo, sa naĵa Ntewa naga pisa pan Epraam, pisa pisape
 ‘ĩisi na in na nekila naĵa navisa ruruena naga imi e yeririna lala na yomarava nini, naga imi kom ga e kioĵna lus lala.’
²⁶ Mesmesun navisaarena nene, Ntewa naga kila Yesu naga suĵnalulu rui sane yaru tai na kilaen kiena yuĵnaena, ana naga pe mligan re pan le taĵena la poli, naga mligan ga pimini amiu ĩesia. Naga mligan Yesu naga pimi vena kila wo van amiu vaĵisi, naĵa ĩisi na naga vilopu amiu, vena amiu aligan kiamiu ĩelaga viowa lala.”

4

¹ Ana Pita amio Yoane, lalua asuĵna amlologo ke pan yeririna lala wa, ana yaru wa lala, amio nasumonena kiena ne li nakirawoen yo lala e Yuĵna Wa ĵana ne Ntewa, amio Satusi lala, la apimi lavisin la. ² La nene sinela mimi paĵisi, komin naĵa lalua asuĵna apian ke yeririna lala asape sa naĵa Yesu naga mali sina ga e marena, yeririna ĵena ga lala akilia amal sina ga ve sa ke ga. ³ Ana atarar la luoka, apano amligan la apa e yuĵna naloge viowaena vena asuĵnate tol legiena na peni, komin naĵa yepekilavi rui. ⁴ Ana yaru taĵena la mokliu naĵa amloge visena kiena ne lalua, amlelaga ea, ana pimi tol pogos nene maran kiena ne la make ga naĵa amlelaga rui apim ape moki manene la narui, lavis tol manu ve lima, nanene sane yermene ga la ne [5000].

La aĵure Pita amio Yoane apa e kumali keviu kiena ne le Yu lala

⁵ A e kana legiena taĵena, yerikawa kiena ne le Israel lala, amio kiela nasumonena lala, amio navianena navisaluaena lala, la apimi lele taaga garu Yerusalem. ⁶ Ana la apa atotano e pupia kumali amio Anas, naĵa naga pe ĩarin li wa lala, a amio ĵena ga li kawa taĵena laĵas, naĵa sane Kaeĵas, a Yoane, a Aliksanta, a yeririna taĵena lala na mratava ĵana ne ĩarin li wa la nene. ⁷ Ana la akilali nalogenena lalua nene asuĵnalulu likan la, ana la apiun naviunena tan la luoka. Apiunia, apisape “?Ane pisape amiu lua nene akila sanene e laulu nene? ?Amiu lua akila e naĵareraena nae pe?”

⁸ Ana Ninuna Wa pitomi pule e Pita, ana Pita pisi pan la, pisape “Inu nesuĵnalulu e maramiu, amiu yerikawa kiena ne le Israel lala, a nasumonena lala, ⁹ a in na nepisu sane amiu asuĵna apiun ke tan imimi imimi lua, apisape sanape e kiamimi yuĵnaena wo nene naĵa imimi lua na mekila e laulu nene, a sanape naĵa imimi lua mekila naga pimi po sina. ¹⁰ Poga ga, in na nekekarar ga naĵa nela navisataĵeena na kiamiu naviunena nene van amiu, vena amiu akilia, a vena yeririna nae ĵena ga Israel lala la akilia. Nesape laulu ne

nanene, naga nane suñalu sike e maramiu naña, suñalun ke lana luwoka ga naña po, naga pimi po rui e nañareraena na kia kiena ne Yesu Kristo nae Nasaret. Yesu nene naga naña sumo amiu añaemaria mare e laki torovia, ana naña Ntewa naga pisirlua ke sina ga naga mali si petan marena. ¹¹ Naga na sa naña Visena Wa naga pisayu naga, pisa pisape ‘Amiu li nakilaena yuña lala,

amiu na akovenlua lawe laki tai,

naña nanagane naga pimi pe pupia kemraße na mava rui na mon lika e yuña.’ Yauena 118:22

¹² Ana pe mrapa tañaena re si tai naña ita tekilia tetol malena e poli, komin naña Ntewa naga pe mla re nena kia tañaena pan ita e yomarava nini poli naña naga kilia tamalia ita ea.”

¹³ Ana yerkawa la nene la amilan pañisi, komin naña la apisu naña Pita amio Yoane, ape yaru kari ga, lalua pe ape yerkawa re nenaga, a lalua pe akilia re mña ga suri moki poli, ana lalua nene pe sinela kurkur re nena ga. Ana la apisu kilale mña ga sa naña sumo, lalua nene na amiyal loro amio Yesu silaga. ¹⁴ Ana la tañatete si aweñar visena kiena ne Pita narui, komin naña yaru naña lana luwoka po si rui, suñalu sike amio lalua nene.

¹⁵ Ana la apisa pa la telu nene apisape la ava vanua sumo wa, vena la akilia avisayu suri nene. ¹⁶ La telu nene apa vanua, ana yerkawa la nene apisayula, apisa apisape “?Pisi na ita tekila ve sanapen lalua nene? Le Yerusalem la punu ga la amloge make pisi rui naña lalua nene akila ke pupia yuñaena tai nene e laulu nene ne, ana ita na tañatete si tevirovia. ¹⁷ Ana popon ita tekilali sane tekila visena nene na ve va manene re si e yeririna lala, ana ve sanene pisi na ita tevisaluñar lalua nene vena ve avis re si va yeririna lala, ve avisa re kia naña Yesu van la.”

Kumali keviu naga pisaluñar Pita amio Yoane

¹⁸ Ana la apio ke sina ga la telu nene apimi loyuña, ana apisi marera pa li nalologena la lua nene, la apisa apisape “Amiu lua nene ve avisayu re si kia kiena ne Yesu va yeririna lala, pona avian la ea.”

¹⁹ Ana Pita amio Yoane, lalua apisatañela, apisa apisape “?Sanape? ?Pona mesmesu ga naña e marana ne Ntewa naña imimi ve melogear re naga, imimi na melogear amiu ga? Naga nene na popon amiu na avisali suri nene, ²⁰ ana imimi nini, na imimi tañatete meva ruru imimi mesuña ne. Imimi monar mevisawal mña suri la nene naña imimi mepisu e kilamaramimi, a naña imimi na memloge e kiligamimi.”

²¹ Ana yerkawa la nene la apisi manene sina ga pa lalua, apisalunar la sa si nanua sumo, siraunia la apisa apisape lalua na akilia ava vanua, komin naña la pe aña re si mrapa nalaen nakoena van lalua poli, vanon naña yeririna lala la asuña amieluar ke Ntewa komin ya naña pimi mñalivi e laulu nene, ²² naña e pogos nene, yaru nene naga kiena kas na taulu pa lualima yam vari pisi rui.

Leniena kiena ne li nalelagaena lala

²³ Pogos naña Pita amio Yoane, lalua apa vanua, na añasupela ke sina ga apa e pegas nen li nalelagaena lala. Ana lalua apisawal visena lala naña yerkawa lala kiena ne yaru wa lala a nasumonena lala apisa, ²⁴ a pogos naña li nalelagaena la nene la amloge visena la nene pisi, la amlen pa Ntewa. La apisa, apisape “Ntewa na Mava, ko osii sinapane a porotano a sive, a suri punu ga naña sike e yomarava nini. ²⁵ Imimi mesitoñal si kioña Visena Wa tai, naña yermarua repimimi Tepet, naña naga na pe kioña yeririna tai, naga pisawal e nañareraena kiena ne Ninuna Wa, naña naga pisa sanini, pisapenua ‘?Komin ya ne yaru la naña pe amlelaga re poli sinela mimi manene sanene?

?Komin ya ne yeririna lala la asuña asitom ke asape akila yuñaena viowa, ana komin ya ne la akila ðele ga?

²⁶ ðarin suße lala na yomarava nini, la asuñalu asururuia vena akila mara, a yerkawa lala apimi lele taaga vanonia,

ana la amminue naña akila ke mara amio Ntewa na Mava, a amio kiena Navisaarena.’ Yauena 2:1,2

²⁷ Ntewa na Mava, imimi mepisu visena nene pe lelaga, naṁa mesmesun nena ga e kiamimi pogos nanagane, vanon naṁa mesmesu ruru e pulkumali nini, Erot amio Ponses Paelat, amio le Israel lala, amio yaru taṁena la nene, la sinela kari manene la yeririna na yuṁae kioṁaena nene naṁa Yesu, naṁa naga pe Navisaarena naṁa ko omiawawo naga, ana la asitom ke asape akila viowa manene vania. ²⁸ La nene la apimi lele taaga vena akila sanene, ana la akila mesmesu ga e ya naṁa ko ositom ruru sumo rui ana ko omliganaria osape naga monar ve sanene.

²⁹ “Ana Ntewa na Mava, imimi na mepiun mesape ko ositoṁal ruru ke visena ṁarera la naṁa la asuṁa apisa pan imimi, ana imimi mesitom mesape ko oiila imimi, kioṁa yeririna na yuṁaena lala, vena kila imimi na mevisawal kioṁa visena, naṁa kiamimi sitomena lala ve yuyuwawa re, a naṁa ve memarau re. ³⁰ A imimi na meviun ṁena ga tan ko okianlua lumoṁa, vena okila namaiena lala awo sina, a vena mekila kile lala pona suri nailanen lala, e kia kiena ne kioṁa Yaru Wa na yuṁaena, naṁa Yesu.”

³¹ A pogos naṁa la amlen sanene ṁisi, yo nene naṁa la apiora ke ea naga kululu, ana Ninuna Wa naga pitomi pulen la, ana kila la apano apisawal visena kiena ne Ntewa, naṁa kiela sitomena lala ṁarera la e naga sane.

Li nalelagaena lala la amiila la ga e kiela suri lala

³² Ana e poglis nene, ṁegas nen li nalelagaena la nene, kiela malena pimi po paṁisi, sane la sinela taaga ga, a kiela sitomena ṁena ga taaga ga, kila na sane pe yar re tai naṁa naga ṁareran sitom visave kiena suri lala la ape kiena ga, ana la asuṁa ataṁan kiela suri lala vena ve kiela pae ga. ³³ A li nalologena lala la asuṁa apisawal ke e maran yeririna lala, naṁa kieta Suṁe Yesu, naga mali sina ga e marena rui, a visena nene kiena la nene, naga naṁareraena keviu sike ea, a li nalelagaena lala la apisu naṁa e pogos nene, Ntewa naga suṁa pisa ruru la paṁisi e kiena lemamiēna pan la. ³⁴ Pe lala yar re tai naṁa e kiela ṁegasia naṁa naga limana plasan suri tai poli, komin naṁa yaru la naṁa la kiela porotano lala pona ṁala yuṁa lala, la asuṁa apuliwilin plan ke suri la nene, ana la asuṁa aṁar kana kilavaru ne lala apimi, ³⁵ amligan e limana ne li nalologena lala. Ana siraunia, li nalologena lala la asuṁa amlipere kilavaru la nene pan li nalelagaena la naṁa limala plasan suri la ṁasia.

³⁶ Lala yaru tai nene naṁa naga taveve ṁelaga nene naga yaru naṁa Yosop, naṁa naga molue e lus kiena ne Livae, naga paeme e purvanua nene Saepras, a naṁa li nalologena lala la amligan ke sina ga kiena kia taṁena tai, asape Pānaṁas, naṁa kia nene kana kinasa asape “Yaru na visirluaen sitomena kiena ne yaru taṁena lala.” ³⁷ Naga kila yuṁaena wo tanea sanene narui, naṁa naga ṁiliwilin lua kiena kinakinas nen porotano tai, ana naga mla kana kilavaru pimi, ana naga mligan e limana ne li nalologena lala.

5

Ananaias amio wona Sapira

¹ Ana yaru taṁena tai, kiena kia Ananaias, naṁa naga wona kiena kia Sapira, naga ṁena ga ṁiliwilin lua kinakinas nen porotano tai naṁa lalua kiela, ² ana mla kana kilavaru komṁasa, mla pimi mligan e limana ne li nalologena lala. Ana naga ṁarwan kilavaru na porotano nene komṁasa, pe kiela ga lalua, ana wona ṁena ga kilia ṁa suri nene, naṁa lalua apranaria. ³ Ana Pita pisa pania, pisape “?Ananaias, sanape naṁa ko otaṁan Yermare pimi kila kare sineṁa sanene, ana ko opisa kotalia Ninuna Wa, naṁa ko osuṁa omlarar ke kilavaru na porotano nene komṁasa wa? ⁴ !Opisu ke ne! Poglis naṁa ko pe opilwilin lua re kinakinas nen porotano nene poli wa, ana pe kiena ai? Naga pe kioṁa ga. A pogos naṁa oṁilwilinia, kana kilavaru ṁena ga punu ga sike e limana ai? Suṁa ke e lumoṁa wa. Ana pogos naṁa ko opisaar osape owar punu va Ntewa, ko monar okila ga sanene narui. ?Ana ya ne kila kioṁa sitomena naṁa okila si visokanena sanene? !Ko na pe opisa kotalia re ga yaru la poli, ko na osuṁa opisa kotalia ke Ntewa narui!”

⁵ Pogos naña Ananias mloge visena nene, veraga ga naga mloru pito tano e porotano, naga marřantop nenaga. A la naña la amloge kiena lologena nene, la amiyuyuwawa pařisi. ⁶ Ana kiela yaru viu lala la asuñalu, la amluluwo tasnena, akus pa vanua, ana apa asinia.

⁷ Lavisi aora ve telu warovia, ana wona nene Sapira, naña naga mninue ke suri ya naña pimi e wona na yermene wa, naga towe pimi loyuña. ⁸ Ana Pita piun tania, pisape “Sapira, ko ovisawal van inu. ?Nanene na kilavaru punu nene na kinakinas nen kiamiu porotano nene, pona peraga?”

Ana sira mēna ga nene pisokan, pisatañea, pisape “Peraga, naga ga nene.”

⁹ Ana Pita pisi pania, pisape “?Sanape na amiu lua apisokan sanene? !Amiu lua na apiranaria naña asape akilali Ninuna kiena ne Ntewa na Mava! ?Omloge ke yaru la ne amial ke apimi e pulutava ne? !La nene asin woña na yermene rui apimi, a řisi na nanagane ga ne la aviar ko mēna ga ova vanua!”

¹⁰ Ana pogos naña sira nene mloge visena nene kiena ne Pita, naga mēna ga mloru mesmesu ke e lana ne Pita veraga, marřantop nena ga. Ana yaru viu la nene apimi si loyuña, la apisu naña sira mēna marřan řisi rui, ana la apiar ke mēna ga tasnena pa vanua, la apa asinia mēke ga e yepas nen wona na yermene. ¹¹ Ana li nalelagaena na suñare lala, amio yeririna tañena mēna ga lala naña la amloge suri nene, la sinela kurkur, amiyuyuwawan pařisi.

Kile lala amio suri nailanena lala

¹² Ana e pogos nene li nalologena lala la asuña akila ke kile la moki na nañareraena kiena ne Ntewa, amio mēna ga suri nailanena la moki, e marana ne yeririna lala. A silaga, la nene amio li nalelagaena tañena lala la asuña apimi veraga e Kopkop mēna ne Solomon, e Yuña Wa Mēna ne Ntewa. ¹³ Yeririna tañena lala la asuña apatanon la, ana yeririna la naña la pe amlelaga re poli, la moki amaraun naña ava akuspran la amio la. ¹⁴ Ana silaga, yermene lařasia amio sira lala la amlelaga e Yesu, la apimi ape moki naña moki manene laa, ana la nene, Ntewa na Mava suña sikol la ke e řegas nen li nalelagaena lala. ¹⁵ Komin suri mēna ga la nene, yeririna lala asuña ařure kiela li namaiena lala apimi, ana la amligan la añeke e mēla tog a mēla takue lala e isinen mrapa. Ana lala akila sanene vena visae Pita war ro e yo nene, visae ninuna ga, ana visae tol lařasia, řisi na la aloge wo sina. ¹⁶ A puna lala naña e narin pulkumali lala naña la lavisin Yerusalem, la mēna ga apimi, a ařereari kiela li namaiena lala apimi, amio lařas naña yermare lala apa e la, ana li nalologena lala la akila ruru la sina ga amloge po.

Yerkawa lala nae Israel la apuarar li nalologena lala

¹⁷ Ana řarin yaru wa, amio kiena erau lala, naga nene na řegas nen Satusi lala nae e yo nene, la apieluen manene la li nalologena lala, ¹⁸ ana la apa apuarar la, akuan la e yuña nakoena amio li viowa lala naña la asike e řisi rui. ¹⁹ Asuña pano-o kolemallo, ana navisi kiena ne Ntewa naga pimi, pietava e mratava na yuña na koena nene, ana naga sumon li nalologena lala amolue sina ga. ²⁰ Naga pisa pan la, pisape “Amiu ava si asuñalu asu loyuña e Yuña Wa Mēna ne Ntewa, amiu avisawal si visena lala na malena viu nene wa yeririna lala.”

²¹ Ana li nalologena lala la amlogear visena nene, a pogos naña yemlagi merarava, la apa si loyuña e Yuña Wa Mēna ne Ntewa, la asuña amlologo.

Kumali keviu nae Israel naga pisi pa li nalologena lala

Ana kolulagi ke ga nene na wa, řarina ne yaru wa amio kiena erau la nene, la apio nasumonena tañena lala nae Israel vena la aimi atotano e kiela kumali keviu. La nene añape li nalologena la asike e yuña nakoena na wa, a pogos naña la apimi veraga sanene řisi, la amligan visena pa e yuña na koena vena li nakirawoen yo lala aure la aimi.

²² Ana pogos naña apa atol yuña nakoena, la pe añal la re poli. Ana la ařasuře ke sina ga apimi kumali, apisawal pan la, apisape ²³ “Pogos naña mēpa metol yuña nakoena, moñal pulutava mērera ga, akiar ruru ga mon mēga, a li nakirawoen yo na

yuña nakoena lala asuñalu asuña e mratava nene. Ana pogos naña mepietava, mepa loyuña, pe moña re yaru tai poli.”²⁴ A pogos naña yerkawa lala kiena ne yaru wa lala a nasumonena kiena ne nakirawoen yo e Yuña Wa Mana ne Ntewa, la amloge visena nene, la aminue kare ga e li nalologena la nene narui, ña sanape na sanene.

²⁵ A e pogos nene, yaru tai pimi pisa suri tañena tai pan la, pisape “!Aulai! Yeririna la nene naña amiu amligan la e yuña nakoena, la asuñalu asike loyuña e Yuña Wa, la apian ke si yeririna la rui.”²⁶ Ana pogos naña nasumonena nene mloge, ana naga amio kiena li nakirawoen yo lala, la apa añere nalologena la nene apimi ke sina ga, ana la akila ga e ñelaga naña malumu ga, komin naña la amaraun asape sañisi yeririna lala nae e yo nene ñisi na la akovela vanonia.

La añure li nalologena lala apa ke sina ga e kumali keviu

²⁷ La nene añere li nalologena lala apimi loyuña, ana la akila la asuñalu ase marana ne yerkawa la nene. Ana ñarina ne yaru wa naga piun tan la, naga pisi pan la, pisa pisape²⁸ “?Sanape na sanene? Imimi na mepisalupar amiu ñarera rui, mesape ñisi na amiu na ve avisayu re si kia kiena ne yaru nene va yeririna lala, pona avian la ea. ?Ana nanagane sanape? Amiu na akila ñaga pano-o yo nene naña Yerusalem naga pulen kiamiu visena la rui, a amiu na asuña apisa ke asape imimi ke naña mepe purñes nen marena kiena ne yaru nene narui.”

²⁹ Ana Pita amio li nalologena tañena lala apisatañela, apisa apisape “Imimi na monar melogear Ntewa taulu naña melogear yeririna.”³⁰ Amiu na añeñar Yesu rui, amiu asuar naga e laki torovia, ana Ntewa na Mava kiena ne kieta yermarua lala naga kila si naga mali ke sina ga petan marena.³¹ Ntewa nene naga pisirlua naga rui, vena naga suña e lespasna na ñamarua, vena naga ve kieta Nasumonena a vena ve kieta Natamaliaena. Ntewa naga kila sanene vena le Israel lala akilia avilopu la, a vena naga kilia viewo kiela mlamulena viowa lala.³² A imimi, imimi navisuen suri la nene e kilamaramimi rui, a navisawalena va yeririna lala, naga nene imimi memio Ninuna Wa nene naña Ntewa naga mla rui pan yeririna la naña amlogearia.”

Kameliel naga pisi e kumali keviu

³³ Ana pogos naña la nae pupia kumali nene la amloge visena nene, miyur la pa ñisi, ana kila sane la sinela kari li nalologena la pañisi, ana la sinelan asape aliñere la sa naña la monar amare.³⁴ Ana lala yaru tai, naña la asuña apatanon ke naga, naña naga pe Varasi, naga pe navianena navisaluaena tai, kiena kia Kameliel, naga suñalu pisapenua aure li nalologena lala la ava vanua sumo wa.³⁵ Ana naga pisi e kumali keviu nene, naga pisa pisape “Yerkawa nae Israel lala, amiu amarañe amiu, amiu na monar asitom ruru suri nene naña amiu na sinemiun asape akila van la nene.”³⁶ Amiu asitomyuli yaru naña Tutasi. Nanua ga ne, pe nakonua manene re poli, naga suñalu, naña naga pisa pisape naga pe yaru ña tai ne, a suri sane yaru la ponotia vari naña la apa apiran la amio. Ana la añeñar naga rui, la añenetetain kiena yeririna lala, a kiena ñegas nene naga pimi pe suri korena rui.³⁷ Siraun naga nene, nane e poglis nene naña la apolo viraviran yeririna lala, Sutas nene naña nae Kalele, naga ñena ga suñalu, naga ñere yeririna lala ataveve naga. Ana siraunia, la añeñar ñena ga naga mare, a la añenetetain ñena ga kiena yeririna lala apa apeve taaga.

³⁸ “Poga ga narui, a e suri nene naña ita tesuña tepisayu ke ne, inu nepisa ke sanini, nesape ñisi na ita na teligan yeririna la nene la asuña ga sanene, ñisi na ita ve tekila re suri tai van la. Naga nene komin naña visae kiela sitomena pona kiela yuñaena nene naga molue ga kome yeririna, ñisi na suri ñena ga nene monar loru ne,³⁹ ana visae naga molue e Ntewa, ita na tañatete tevisaluparia. A visae ita tekilali naña tevisaluparia, pona ita na tevisu naña sane tesuña tesuwo ke yuñaena wo kiena ne Ntewa tai.”

La amlil li nalologena lala

⁴⁰ Ana kumali keviu naga mloge visena namasisuena kiena ne Kameliel nene, naña pisapenua ve akila re suri tai va li nalologena la nene, a la apisa apisape p̄isi na la ataveve ga ve sa naña naga pisa. Ana la apio li nalologena lala apisape aimi si loyuña, ana la amla narin nakoena pan la, amlil la, apisi m̄arera ke sina ga pan la, apisape la ve avian re si yeririna lala e kia kiena ne Yesu, ana siraunia, la amligan plan la apano.

⁴¹ Ana li nalologena lala apa vanua e pupia kumali nene, ana la pe amloge re piowa poli, amloge ga po pañisi komin naña Ntewa naga pisu la sane la atorokin kemua naña atol memawaena e marana ne yeririna lala, vanon kia kiena ne Yesu. ⁴² Ana lala pe amlogear re nena kiela yerkawa la nene, ana legiena punu ga, loyuña e Yuña Wa M̄ana ne Ntewa, a loyuña lala e yuña m̄ana ne yaru lala, la pe amligan re nenaga naña la apian ke yeririna lala, a la amlologon ke Nalologena Wo nene kiena ne Yesu, asape naga pe Navisaarena.

6

La apu p̄arin yeririna naiilaena la olua

¹ Ana e pogos nene, nalogena kiena ne Yesu lala apimi ape moki manene la narui, ana nasinemimiena tai pimi likan la. E lepas tai, le Yu la naña apisi ke kom Kris, a e lepas tañena, le Yu la naña apisi ke ga kome kiela visena, naña Epru. Ana la nene naña la apisi kom Kris, la asuña apisimumun ke apisape e legiena punu ga, pogos naña la apion kiela narin naiilaena la pan letano lala, ana la akila pe po re nena ga poli pa kiela letano lala.

² Ana li nalologena la lualima taaga pa lua amloge visena nene, la apio viraviran make nalogena lala punu ga vena aimi lele taaga, ana la apisi pan la, apisa apisape “Wolai lala, pe pon re naña imimi meligan yuñaena na visawalen visena kiena ne Ntewa poli, vena imimi mesuña mevisuar ga yuñaena tañena la nene. ³ Visae ve sanene, amiu na monar akilali naña akale kiamiu yeririna la p̄asia ve olua, naña la kiela kia po e maran yeririna lala, a naña la apulen Ninuna Wa, a naña la yepela m̄aen yuñaena, vena p̄isi na mevisiri plan la la ave narin p̄egas na visuar ruruen yuñaena tañena la nene. ⁴ Ana sanene, p̄isi na imimi li nalologena lala, sinemimi la wetelu kilia suñalu m̄arera su silaga e yuñaena na leniena a navisawalen Visena Wa kiena ne Ntewa.”

⁵ Ana la ne e p̄egas keviu nene, la amloge sitomena nene, ana la akekaran manene pañisi, ana la añal yeririna la olua sa naña la apisa. La olua nene naña la añalia, ana Stipen tai, naña naga pe yaru m̄arera tai naviawaen e Ntewa, a naga pulen Ninuna Wa, amio m̄ena ga Pilip, a Pokaras, a Nikeno, a Timon, a P̄amenas, a yaru nae Antiok naña Nikolas naña naga pe pe Yu re poli, ana naña naga m̄elaga e Ntewa kiena ne le Yu la rui.

⁶ Ana la aṗure yeririna la olua nene la apimi asuñalu e marana ne li nalologena lala, vena la aligan limala te p̄arila, a la ayawawo la.

⁷ Ana suri nene naña la akila, kila sane silaga, visena kiena ne Ntewa naga suña telivi laa e yaru la narui, a p̄egas kiena ne nalogena lala garu Yerusalem pimi moki laa narui, naga pa tawa m̄ena ga e yaru wa kiena ne le Yu la moki narui, ana la m̄ena ga akus nalelagaena.

Le Yu laṗasia aṗere Stipen pa e kiela pupia kumali

⁸ Ana la olua nene, lala yaru tai naña Stipen, naga pe yaru tai naña naga pulen lemamiena kiena ne Ntewa, a naga pulen ke m̄ena ga pupia naṗareraena kiena ne Ntewa, kila sa naña naga miyuñaen kile la moki a suri nailanena m̄ena ga pa yeririna lala. ⁹ A le Yu laṗasia naña asike e yo nene, la pe akekaran re nena Stipen poli, ana la sinelan asape akila veveyuena vania. La nene, le Saerin lala, a le Alikantrea lala, naña la asike Yerusalem e pogos nene, amio m̄ena ga le Silisia laṗasia a le Esia laṗasia, naña la apimi asikolila. La moki nene la sane p̄egas taaga ga, naña la asuña apiora ke lele taaga silaga e yuña tai na leniena kiena ne le Yu lala. ¹⁰ Ana la nene la akilali naña avisaluṗar Stipen, pano pano-o peraga, komin naña Ninuna Wa naga suña kila ke Stipen naga pe manmarua ruru po e kiena visena lala, ana kiela visena na sinekar lala taṗatete nena ataulu naga narui. ¹¹ Ana la apa añal sina yeririna laṗasia vena la ava avisa kotalia yerkawa lala, ana

la nene la apa apisawal pan la, apisape “Imimi memloge yaru nene naga pisi na, pisa kare Navisaluaena kiena ne Mosis paḗisi wa, a naga ḗarnena kare mēna ga suri wa kiena ne Ntewa paḗisi.”

¹² Ana e ḗelaga nene, la akila nasumonena lala, a kiela navianena na navisaluaena lala, amio mēna ga yeririna taḗena la moki, la sinela pilulun Stipen paḗisi. Ana la apimi apuarar naga m̄arera, aḗure pa e pupia kumali kiena ne le Yu lala. ¹³ Ana e pogos nene narui, visena na visokanena la molmolue pimi pe moki laa sane, naḗa apisayu kare Stipen, apisapenua “Sila ga yaru nene ḗarnena kare luen ga kieta Yuña Wa m̄ana ne Ntewa, a e m̄ena ga e Navisaluaena kiena ne Mosis. ¹⁴ Imimi memloge naḗa naga pisayu Yuña m̄ana ne kieta Ntewa nene, naḗa naga pisa pisape ḗisi na yaru suri nene nae Nasaret naḗa Yesu, ḗisi na naga we plan Yuña Wa nene, a ḗisi na naga vilon mēna ga kieta ḗelaga marua lala naḗa Mosis naga mla kemua pan ita nanua sumo laa rui, naḗa ita tepuarar ruru la asuña ga pimi tol nanagane. !Yaru suri nene naḗa Stipen naga suña pisawal ke suri la nene, naga kila kare ruru ita paḗisi ne!”

¹⁵ La amloge visena nene, ana apilon ḗarila lala akirava apisu Stipen vena naga visataḗe visena la nene, ana pogos naḗa la apisuia, la apisu marana na sa ga marana ne navisi narui.

7

Visena kiena ne Stipen: Naga sunyu ḗesan Epraam sumo

¹ Ana ḗarin yaru wa naga piun tan Stipen, pisa pisape “?Ana ko, ko na opisa ya? ?Lelaga naḗa ko osuña opisawal ke visena la nene sa naḗa la asuña apisa ke ne, pona peraga?”

² Ana Stipen pisataḗea, pisape “Ata lala a wolai lala, amiu ayagogon kiau navisa-taḗeena sumo wa. ḗisi na in na nevisayu repita marua la sumo wa. Nakonua konua rui, yermarua Epraam naga suña e kiena purvanua naḗa Koltea, e pupia lepas nen yo nene naḗa Mesopotemia, ana kieta Ntewa na Naurarena naga pimi m̄alivinia, ana pisawal pania, pisape ³ ‘Ko na monar omolue e moña mratava, a e kioña yo, vena ova e purvanua tai naḗa ḗisi na in na nevisa van ko.’ ⁴ Ana Epraam naga molue e Koltea, naga pa sike e pulkumali naḗa Aran sumo, vano vano-o tol pogos naḗa arimana naga mare, ana Ntewa ḗere naga pimi sike e purvanua nini naḗa ita tesike e nanagane.

⁵ “Ana poglis naḗa Epraam naga pimi tol yo nene, ana Ntewa naga pe mla re nena narin kinakinas nen porotano tai pania, a e pogos nene Epraam naga pe ḗar re mēna narina la poli wa, ana naga ḗuarar m̄areran ga navisaarena naḗa Ntewa naga pisaar m̄arera pan sumo rui, naḗa naga pisaar pisape ḗisi na purvanua wetelu nene naga ve kiena ne Epraam amio kiena lus lala naḗa aimi siraunia. ⁶ Ana visena naḗa Ntewa naga pisa pa Epraam e poglis nene, sanini, naḗa Ntewa naga pisa pania, pisapenua

‘Kioña lus la nene ḗisi na la ava ase purvanua taḗena, ana yoko la ayuñae korena van kana suḗe lala, naḗa ḗisi na la akila viowa manene van la vaḗisi, vano-o tol kas ponotia ve vari.

⁷ Ana siraunia, ḗisi na in na nela naliḗereena van purvanua nene, a ḗisi na nela mēna ga nakoena van kiena yeririna lala, a ḗisi na inu neure plan ke sina ga kioña lus la nene, vena la awasuḗela aimi alotun inu e yo nena naḗa in na nemla pan amiu.’

⁸ “Ana e poglis nene Ntewa naga pisa ḗelaga na ḗaviu pa Epraam, sane totou na naviranarena nene naḗa Ntewa naga kila amio naga, ana pogos naḗa narina naḗa Aisak naga paeme, legiena olua ḗarovia, ana Epraam kila ḗaviu e naga. Ana siraunia, Aisak naga mēna ga kila sa ke ga nene pa narina naḗa Sekop, a ḗisi na Sekop mēna ga naga kila pa narina la lualima taaga pa lua nene, naḗa nanagane ita tesuña tepio la ke sane la ape ḗarin arimata nasumo lala.”

Stipen pisayu Yosop

⁹ A Stipen naga suña pisi ke ga wa, naga pisa pisape “Ana Yosop naga pe ḗarin arimata la nene tai, ana wenla taḗena la nene la apieluen naga paḗisi, ana la aḗiliwilin lua naga vena vanon yuñae korena e purvanua naḗa Isip. Ana Ntewa naga sike amio naga e yo

nene, ¹⁰ a miila naga e kiena pogos ñarera lala, panopano kila naña ñarin suñe nae Isip nene, naña kiena kia Pero, naga pisa manmaruaena kiena ne Yosop po pañisi, ana Pero nene mligan pupia yuñaena lala navisuaren kiena purvanua e limana ne Yosop naga taaga.

¹¹ “Ana e pogos nene narui, ana pupia pogos na viso tai garu Isip a e yo kiena ne ñena ga repita lala naña Kenan, ana la amloge piowa vanon pañisi, a la apisu sane peraga narui, pe kala kinanena re si po laa rui. ¹² Ana yermarua Sekop, naga mloge naña kinanena lañasia na wilwilinena suña ke ma Isip wa, ana naga mligan narina la nene, naña la ape ñarin arimata lala, vena la ava metava ma Isip vena awar kala kona lañasia. Naga nene naña sane la apa ñesan ga ma Isip na wa. ¹³ Ana yam luan naña la apa ma Isip sanene, Yosop naga pisa lologia naga pa wenla lala, a suniena na mratava la nene kiena ne Yosop naga pa tol ñena ga Pero. ¹⁴⁻¹⁵ Ana Yosop naga mligan visena pa pa arimana naña Sekop, pisape naga amio la punu ga na mratava ñana la monar avami asike amio naga, ana Sekop amio na mratava ñana lala apavini, la punu ga la lualima olua pa lima, la apa asike ma Isip. La apa asuña pano pano-o, ana siraunia Yosop nene amio kieta yermarua tañena la nene la amarmare ga e yo nene. ¹⁶ Ana ko pa tañena ga rui, la añar si puriula lala añasuñe sina e yo kiena ne la nene, e yo tai kien kia Sekem, ana la asinila e lotap tai naña yermarua Epraam naga pul lua nanua sumo rui tan le Amaro lala.”

Stipen pisayu Mosis

¹⁷ Ana Stipen naga suña pisi ke na wa, pisape “Ana kieta yeririna lala asike garu Isip tol si kas moki pañisi, ana la akapuru apimi ape moki manene la narui, ana Ntewa naga pisa sane naga torokin ruru kana pogos naña naga kila sa naña naga pisaar pa Epraam sumo ñisi rui, pisape ñisi na naga were plan kiena lus lala e kiela nayuñae korenaena. ¹⁸ Ana e pogos nene ñarin suñe viu tañena tai naga suñalu garu Isip rui, naña naga mninue suniena kiena ne Yosop nanua sumo amio kiena na mratava ñana lala, ¹⁹ ana naga kila kare manene laa kieta lus la nene na nanua sumo, naña naga ñareran la ga vena la aligan kare ga narila lala asuña ga vena amarmare, vena ve akapuru re si avim ave moki.

²⁰ “Ana e ke e pogos nene, Mosis naga paeme, naña naga pe sisi tomtom tai naña pe sisi tanea po pañisi. Ana arimana amio anena, lalua apisuwan ga sisi nene e ñala loyuña pano pano-o tol kupario telu, ²¹ ana siraunia, lalua akila ñele si yonia, ana lalua monar aligan lua naga. Ana siraunia, loñearu kiena ne ñarin suñe ga nene naga ñalia, ana naga sane kuslua Mosis, pisuarua vena ve narina. ²² Naga suña kapuru ña sanene pano-o, ana la asuña apian naga e manmaruaena kiena ne le Isip lala, ana naga kapuru pa pe yaru ñarera tai a pe yaru na visena na manmaruaena a yepen ñaen ñena ga yuñaena.”

Mosis naga sinenan sape tamalia le Israel lala

²³ Ana Stipen naga suña pisa ke, pisape “Ana pogos naña Mosis, kiena kas pa tol sane lualima yam vari, naga sitoñal si le Israel tañena la naña la asike na, naña la sa ga wenla ga lala, ana naga suña siar pa ñalivin la towe ñaga. ²⁴ Ana pogos tai naga pano, ñal naña yaru nae Isip tai suña ñe ke yaru nae Israel tai, ana naga pa miila yere Israel nene, ana naga kilamaran pa yaru nae Isip nene, ñeñar naga mare. ²⁵ Naga nene komin naña Mosis naga sitom ke pa ñisi rui pisape ñisi na Ntewa naga ligan lua naga vena natamaliaena kiena ne kiena yeririna la nene, ana e pogos nene le Israel lala la pe apisu kilale re poli wa naña asape ñisi na Mosis kila sanene van la.

²⁶ “Ana yemlagi ke sina ga e legiena tañena, naga ñal le Israel lalua asuña asu la a aña la ñaga, ana naga panon pisape visaluñar naña lalua ve awela re sina, a naga pisape kilali naña lalua atalopan la sina. A naga pisa pan la, pisape ‘E, amiu lua ayagogo. ?Sa ga naña amiu lua nene ape welelai ga rui, sanape na amiu lua akila kare amiu ke sanene?’

²⁷ “Ana naga naña pe kila mesmesu re pan naga kompas nene poli, naga suponlua Mosis pa perina, ana pisa pania, pisape ‘?Sanape? ?Ane mligan lua ko pisape ko ove kiamimi yerka, a vena ko oliñere imimi sanene?’ ²⁸ ?Pona ko sinoñan osape oweñar inu ve sa naña oñeñar yaru nae Isip nene nakoneva, ne?’

²⁹ “Ana poglis naña Mosis naga mloge visena nene, mloge piowa pañisi, naga suñmalu, pionlua petan Isip, pure pa sike e purvanua tañena tai, kiena kia Mitian, ana naga sike e yo nene piavi laa sane, a narina na yerñene luwoka ga, apaeme e yo nene.”

Mosis mloge Ntewa pisi pania

³⁰ Ana Stipen pisa pisape “Ana Mosis sike e yo nene pano tol si kas lualima yam vari, ana legiena tai naga suña e yokorena tai, lavisin pupia tavie naña Sinae. Ana e yo nene naga mali navisi tai pimi ñalivinia e kapi naña kekan purlaki wetelu tai. ³¹ Ana Mosis naga milan suri nene ana sinena kurkur pañisi, ana naga pa laa lavisin purlaki nene vena visu ruruia. Ana naga mloge pulgona ne Ntewa, ³² naña pisa pisape ‘In na nepe Ntewa kiena ne repiña lala, sane Epraam, Aisak, a Sekop.’ Ana Mosis telñanin pañisi, naga maraun visuena. ³³ Ana Ntewa na Mava naga pisa si pania, pisape ‘Ko oyenlua kioña kulus nen laña, komin yo na ko osuñmalu osike e ne, naga pe yo wa tai naña. ³⁴ Ana in na nevisa van ko sanini, nesape inu nepisuveve ruru naloge viowaena kiena ne kiau yeririna la garu Isip ñisi rui, a nemloge kiela tagiena ñisi. In na nepimin ke nesape neure plan la narui, a opisu ke ne, inu nesuña nemligan ko ñena ga nesape ko owasuñe si ova garu Isip sumo wa, vena ove kiau yeririna nakilaen yuñaena nene.’ ”

Le Israel lala yepela mavin Mosis

³⁵ Ana Stipen naga suña pisi ke pan la na wa, naga pisa pisape “A Mosis nene, naga ke nanua sumo yepela mavin naga narui, naña la apisa visena ne nanene narui, apisape ‘? Sanape, ane mligan lua ko vena ko ove kiamimi yerkawa, a vena ko oliñere imimi sanene?’ Ana Ntewa ke ga naña naga mligan kiena navisi naga pimi teke e purlaki naña kapi kekan ke ne, vena ligandar si Mosis naga ve suñe a ve natamaliaena kiena ne le Israel lala. ³⁶ Ana Mosis ke ga nanene na wa, naña naga sumon le Israel lala amolue garu Isip, la apimi. A silaga, garu Isip, a e Sive Naña Pivaga, a kas lualima yam vari ke sina ga e ga e yokorena, naga suña kila kile lala na nañareraena kiena ne Ntewa, a suri nailanena lala pan la. ³⁷ A Mosis ke ga nene na wa, naña naga pisawal pa le Israel lala, naga pisa pisape ‘Ntewa naga ñisi na naga ligandar ga amiu yaru ga tai, sane kiamiu navisawalen tañena tai, sa naña naga mligandar inu sumo rui.’ ³⁸ A Mosis ke ga nene na wa naña naga suña amio repita marua lala a amio le Israel tañena lala, poglis naña la amialoro ke e ñegas taaga e yokorena, a naga ke ga naña suña amio navisi nene naña pisi pania meta e tavie naña Sinae. E pogos nene narui, Ntewa mla visena namalena pa Mosis ne na nene, ana Mosis kus pitomi kian pan la.

³⁹ “Ana repita la nene yepela mavin nena logearen Mosis, a la akoven lua kiena visena nene, ana e kiela sitomena lala, la sinelan ga asape awasuñe la sina ga ava Isip. ⁴⁰ Pogos naña Mosis petan la, pa sike yam piavi ma tavie naña Sinae, ana la asitoñal ke sina ga kiela malena marua nanua asike garu Isip sumo, ana la apisa pa Aron nañani, apisape ‘Imimi na sinemimin mesape ko oyuñaen kieta nono lañasia, vena la akilia asumon ita tevano, komin Mosis nene naga ñerelua ita garu Isip ana naga sumon ita tepimi e yo nini, ana ita teminue kare ga naga sike pe narui, pona aña sanape e naga.’ ⁴¹ Ana la apa akila sanene, la amiyuñaen nono na narin puluk tai naña pe purwolu, ana la akila nakuñañaena pania, a la akila pupia ñañagena tai pa kiela nono nene naña la ga amiyuñaenia e ga e limala.

⁴² “Ana pogos naña Ntewa pisu suri nene, naga pilopu ñasina pan la, a naga mligan la vena la ava alotun verue lala. A suri nene naga sa naña visena wa kiena ne Ntewa nene naña Navisawalena Amos naga pisa e Visena Wa, naga pisa pisape

‘Le Israel lala!

?Sila ga e kas lualima yam vari e yokorena,

amiu aña moñar suri mali lala vena kilaen nakuñañaena,

ana nakuñañaena nene pan inu, pona pan ai?

⁴³ *Peraga kemua rui, pe akila re pan inu poli, ana amiu na amlotun ke ga nono la naña amiu ga akila ne,*

sa naṣa Molek nene,
 naṣa amiu na amialoro amio kana silparpara nena,
 a Repan ṁena ga sa ke ga,
 naṣa amiu akus nono na kiena verue nena naga pa sumon amiu.
 Komin suri ne nanene, ṣisi na in na neṁene plan amiu ava koperinan kiamiu purvanua, ava
 asuṁa garu Ṕapilon lepas na vano.’ ” Amo 5:25-27

Stipen pisayu naṣa Ntewa naga miila manene laa le Israel lala wa

⁴⁴ Ana Stipen pisa pisape “Ana e pogos naṣa kieta yermarua la nene la asike e yokorena nene, Ntewa naga pisa pa Mosis pisape naga monar yuṁaen ṁana silparpara tai, sane kile tai naṣa pisawal pisape Ntewa naga suṁa amio la. Ana la amiyuṁaenia torokin ruru sa naṣa Ntewa naga pisawal pania, ana la asuṁa amlenlelein ṁa silparpara nene pimi. ⁴⁵ La akila ṁa sanene pimi tol pogos naṣa Yosua sumon kieta yermarua lala apimi aṁene plan yolai taṣena la naṣa apimi asike e kieta porotano nene, rui. Ana Ntewa naga ṣere kieta yermarua lala apimi si loyuṁa e kieta purvanua nene a e poglis nene, la akus silparpara nene pimi loyuṁa amio la, mon ṁa amio la pimi pimi tol pogos naṣa yermarua Tepet naga pe ṣarin suṣe.

⁴⁶ “Ana Tepet pisu naṣa Ntewa naga kekarania e suri la moki liu, ana naga piunia pisape visae Ntewa naga taṁania, vena naga yuṁaen ṁana yuṁa wa tai, vena lus kiena ne Sekop lala akilia ava ea alen vania. ⁴⁷ Ana Ntewa naga pe taṁan re Tepet naga yuṁaen yuṁa tai sanene poli, ana siraunia narina nene naṣa Solomon naga miyuṁaen ṁana pupia Yuṁa Wa nene. ⁴⁸ Ana ita monar tesitoṁal ṁena ga, sane Yer Kawa Na Metava Manenea, naga taṣatete se yuṁa tai naṣa yaru ga la amiyuṁaenia, sa naṣa Navisawalena Aisea naga pisa pisape

⁴⁹ ‘Ntewa Na Mava naga pisa pisape

“Ma ga e peni naga sane leleu natotanoena,

a yomarava nini naga sane le lena liganen lau su metava ea.

?Amiu na asitom asape akilia ayuṁaen yuṁa ya, vena neva nese ea?

?Pona amiu asitom asape akilia ayuṁaen e yo nape, naṣa neva neva ruru inu ea?

⁵⁰ Suri la punu ga na sike ne, ana in ga na nesii make punu ga.” ’ ”

Ais 66:1,2

Stipen pisi ṁarera pan la pisape le Israel la pe amlogear re Ntewa poli

⁵¹ Ana Stipen sinenan pisape kila make kiena visena nene narui, ana naga pisi pa yerkawa kiena ne le Yu lala naṣa la asike e kumali, ana naga pisa pan la, pisape “Ana amiu na, amiu atorokin ruru nenaga kieta yermarua la na nanua sumo ne. Amiu na ape kuruṣil paṣisi wa, ṣarimiu ṁarera, a kiligamiu poṣe ṁena ga, yepemiu mavin logeen visena kiena ne Ntewa, a sinemiu lala naga sa ga sinen yaru la naṣa la pe ape ṣaviu re poli wa. Amiu na ape yaru na suwoen luen ga Ninuna Wa silaga. ⁵² Navisawalena lala kiena ne Ntewa nanua sumo, kieta yermarua lala akila make kemua piowa pan la punu ga rui, a la aṁe moṁar la moki, pe sur koren ga naṣa ape yaru la naṣa Ntewa naga mligan la apimi vena avisawal avisave Yaru Wa Nayuṁaena kiena ne Ntewa nene naga ṣisi na imi. Ana amiu na apiowa laa sane, komin naṣa pogos na yaru nene naga ṁalivin ita rui, ana amiu apielua naga a aṁeṁar naga mare. ⁵³ Amiu ke narui naṣa amiu atol Navisaluaena kiena ne Ntewa ṣisi rui, naṣa navisi lala amla pimi sumo, ana amiu na pe amlogear re nena poli, akilaroro kare make ga silaga.”

La akoveṁar Stipen

⁵⁴ Visena kiena ne Stipen ṣisi e nene narui, a pogos naṣa li navioraena lala na kumali la amiyagogon naga, visena la nene miyur manene sinela paṣisi, ana la sinela mimi paṣisi, la asuṁa akar ke maluela vanonia. ⁵⁵ Ana Stipen, naga Ninuna Wa pimi pulenia, ana naga kira pa metava ma e peni, kirava ruru ṁa sanene, pisu pupia naurarena naṣa kilawo ke Ntewa, a naga pisu ṁena ga naṣa Yesu naga suṁalu sike e yo na metava lavisinia, nanene na e lepasnena na ṣamarua. ⁵⁶ Ana naga pisu suri nene, naga pisa pa la naṣa asike ne,

pisape “!Ake-e aulai! Inu nepisu naña sinapane naga suwowo ga mon ñaga, ana Narina ne Yeririna naga suñalu sike e lepasnena ne Ntewa naña ñamarua.”

⁵⁷ Ana yerikawa la nene la amloge ya naña Stipen pisa, ana la amloge sa naña naga pisa kare Ntewa, ana amlokai keviu pa metava, a apuwo pulkiligala lala, vena la ve aloge re si visena kiena ne Stipen, ana la punu ga akiriri apa puna veraga, ⁵⁸ ana atararia, aþereyalolon naga petan pulkumali keviu nene pa vanua. Aþure matan pulkumali keviu nene, vena la akoveñmaria, ana la apisa asape yeririna la naña amligan la sumo vena la avisawal visena la naña kila Stipen kus naloge viowaena, apisape la ke nene narui la monar akoven þesan kilavaru. Ana la amien plan ñala kulsota lala, ana la amligan sike e limana ne yaru viu tai naña naga sike amio la e pogos nene, naga kien kia Sol, ana la nene asun ke naña akove Stipen narui.

⁵⁹ Ana pogos naña la asuñña akove ke naga sanene, ana naga mlen, pio Ntewa, pisa pisape “Suþe Yesu, awis, otañan ninuu vañasu, nesike nemio ko.” ⁶⁰ Ana naga kinai mloru mon tano, mlokai keviu, pisape “Suþe, awis, ve ola re si nakoena van la e kiela mlamulena viowa nene naña la akila ke pan inu ne.” A siraun naña naga pisa sanene þisi, mloru pito tano, naga mare nena ga.

8

¹⁻³ Ana Sol nene naña naga sike e pogos nene, naga pisa suri nene, naña akoveñmar Stipen mare, a naga pisa sa ga naña la akila ke ga yuñena wo tai. Ana pe yam piavi re poli, yaru ñarera na leniena laþasia, la pe amarau re poli, la sinela miye paþisi, ana la apimi akus tasnena ne Stipen, ana la ataginia þisa ataginia, ana la apa asinia.

Sol naga ñene kare la naña amlelaga e Yesu paþisi

Ana siar e pogos nene, ana Sol lala, la apilamoluen kare þegas nen li nalelagaena lala garu Yerusalem. La añene kare la pano-o kila narui la moki naña aþure e yo nene, apa asike e yo taþena lala garu Yutea amio Samaria, ana li nalologena ga lala, la pe apa re poli, la asuñña ga Yerusalem. Ana Sol la sinela kar manene laa li nalelagaena lala va laa na wa, ana la asuñña apa ke ga e ñala yuñña lala, a aþere plan la, amligan la e yuñña naloge viowaena, naga nene yerñene amio sira.

Pilip pa mlologo garu Samaria

⁴ Ana la naña la amlelaga e Yesu, la moki naña apuretetai petan Sol lala e pogos nene, ana pogos naña la asuñña apa tetai sanene, ana la asuñña amlologon ke visena kiena ne Yesu pano. ⁵ Ana lala yaru tai naga yaru naña Pilip, naña la amliganaria pe tikon sumo, naga pitomi tano e pulkumali keviu tai garo lepas naña Samaria, ana naga mlologon þesan ke Navisaarena Yesu pa yeririna lala nae e yo nene. ⁶ Ana yeririna la moki paþisi naña la amiyagolon ruru ke kiena visena lala, a la apisu kile la naña naga kila, ⁷ sa naña yermare lala amolue petan yeririna la moki, naña pogos naña la amolue, ana la amlokai manene paþisi ana apureure. Ana la apisu ñena sane yaru la naña yepela la komþas marmare, a amio ñena laulu lala, la apimi apo sina. ⁸ Ana e yo nene, a þina lala la akekara naña akekara paþisi komin suri la naña amloge a naña apisuia.

Yaru na purñaki tai, kiena kia Saemon

⁹ Ana nanua sumo, naña Pilip naga pe pimi re Samaria poli wa, ana yaru na purñaki tai naga sike e yo nene, naña naga kiena kia Saemon. Siar e pogos la nanua sumo rui, naga pe yaru naña naga kiena kimi moki paþisi a naga suñña miyuññaen ke suri la moki sanene, ana naga kila sa naña naga suñña pisawal ke naga pisape naga pe yaru taþena tai, ana yeririna lala nae e lepas nene la silaga sinela kurkurun naga paþisi. ¹⁰ Kiela yerikawa lala, amio yeririna taþena lala, la asuñña amlelaga ke e kiena visena lala, a la apisa ke sanini, apisape “!Aulai! Yaru nene, naga nañareraena kiena ne Ntewa kemua tai sike e naga. Naga nene naga monar nañareraena nanene narui naña ita tesuñña temloge ke naña asuñña apisayui, apio apisape ‘Nañareraena Keviu.’ ” ¹¹ La amilan manene naga

sanene narui, komin naña naga kila suri nene yam piavi rui, ana kila narui la amlelaga ea.

¹² Ana siraunia, pogos naña Pilip naga pa mlologon nasuñenena kiena ne Ntewa pan la, a mlologon mña ga kia kiena ne Yesu Kristo, ana la amlelaga e kiena visena narui, ana yermene lala amio sira lala, la punu ga apa e nakeena. ¹³ Pimi tol mña yaru nene Saemon, naga mña ga mlelaga, ana la amligan naga pa e nakeena. Siraun naga nene, silaga naga su ga lavisi, pe sinamaran pa Pilip, naga suña milan manene luen ga kile lala a pupia yuñaena lala nañareraena kiena ne Ntewa naña Pilip naga suña kila ke ne.

¹⁴ Ana pe yam piavi re poli, visena na suri la nene naña molue e nini, pano-o tol li nalologena lala garu Yerusalem, apisape le Samaria mña ga lala, nanagane la amlelaga e Ntewa rui. Ana li nalologena la nene la apisayuia, apisu sane popon avitetalia Pita amio Yoane vena lalua ava akaten la, ana lalua akilali naña avisuveve suri la nene. ¹⁵ Ana pogos naña la apito añalivin la garo Samaria sanene, ana lalua apu ãarila, a lalua amlenwo la vena Ntewa ligan Ninuna Wa vitom van la. ¹⁶ Ana lalua amlenwo la sanene, komin naña sumo ana Pilip naga kila nakee laena e kia kiena ne Suñe Yesu, ana Ninuna Wa naga pe pitomi re e la poli wa. ¹⁷ Ana sanene, Pita amio Yoane, lalua akila sanene pan la narui, ana Ninuna Wa pitomi e la e poglis nene narui. ¹⁸ Ana purmaki naña Saemon nene, poglis naña naga pisu nalologena la lua nene apu ãarina ne yeririna la, naña amlelaga mare ga na wa, ana kila naña Ninuna Wa pitomi pan la sanene, ana naga pieluen kiela nañareraena nene. Ana naga pa mla kilavaru tai pimi, kian pan lalua nene vena ul lua nañareraena nene naña sike e lalua nene, ¹⁹ pisa pan la, pisape “Nanene na, in na sineun nesape amiu lua ala re nañareraena nene kompas van inu, vena inu mña ga nekilia nowu ãarin yaru lala, vena la akilia atol Ninuna Wa.”

²⁰ Ana Pita naga miyelu kapuruia Saemon, naga pisi mñarera pania, pisape “Aa, in na tañatete nela kioña kilavaru naña ko ositom ke osape okilia oul lua nañareraena kiena ne Ntewa ea. ?Ko na okilia oul nalakorenanena naña Ntewa naga mla ga sa ga nene pa yaru lala? In na nevisa van ko, kioña kilavaru nene pisi na amiu lua ava akovio e lele na loge viowaena e kapi. ²¹ Nanagane mepisu kilale ko narui, ana tañatete metañan ko okila yuñaena nene amio imimi, komin naña kioña malena pe mesmesu re nena e marana ne Ntewa poli. ²²⁻²³ Peraga, ko na sineña pule ga e vielueena lala, a kioña mlamulena viowa lala apiar kioña malena mñarera pañisi. Ko na monar ovilopu ko e kioña sitomena viowa la nene, ana ko na monar olen va Ntewa vena naga viewo ko ea.”

²⁴ Ana Saemon naga pisatañe Pita lalua Yoane, pisape “!Ake suwala! Visae sanene, inu sineun nesape amiu lua alenwo inu, vena Suñe naga iila inu vena suri mñarera la naña apisa ke ne, pisi na ve imi tol re kiau malena.”

²⁵ Ana nalologena lalua nene Pita amio Yoane, asu towe laa amio yaru la nene, ana asuña apisawal suri la naña Kristo naga kila, amio visena lala naña Ntewa naga pisa, ana siraunia añasuñela, amlilu sina ga kiela mrapa apa Yerusalem. Ana e kiela mrapa komsusa, ana lalua asuña amlologon ke nalologena wo kiena ne Yesu e pulkumali lala kiena ne le Samaria lala, ana siraunia lalua apimi aporu ke sina ga garu Yerusalem.

Pilip pisi amio yaru malo tai nae Itiopia

²⁶ Ana poglis naña Pilip naga miyuña ke gar Samaria wa, ana navisi kiena ne Ntewa tai pimi mñalivinia, pisi pania, pisape “Pilip, inu nevisa van ko, nevisave osuñalu oyali ova otaveve mrapa naña kom Yerusalem, pa metava ma pulkumali nae Kasa.” Ana mrapa nene naga mrapa naña pa metava ãaro e lepas naña e yokorena.

²⁷⁻²⁸ Sanene, Pilip mloge visena nini suñalu, naga siar pisape va narui. Naga suña mial ke pa sanene, ana milan yaru malo tai naña sike e kiena kat naña wosi ãere ke pimi e mrapa nene. Yaru nene suña pulo ke Tusi Wa naña Aisea naga siriyuia. Yaru nene, naga pe yerikawa tai kiena ne pupia sira tai nae Itiopia, naña la apio sira nini asape Kantes, naña kana kinasa apisape naga ãarin suñe na kiela purvanua. Yuñaena kiena ne yaru nene, naga pe navisuaren pupia yuñaena lala e lepas na kilavaru kiena ne pupia sira kawa nene, a yaru nene, naga pe yaru mña ga tai naña sumo rui la akila naga pe kalmaite. Ana e

pogos nene, na pito garo Yerusalem rui vena len va Ntewa, ana naga taveve kiena mrapa vena wasuþe sina va kiena. ²⁹ Ana Pilip naga mlilu ña mrapa pano, a yerka wa ñena ga nene mialoro e kiena lele na totanoena naþa wosi þere ke ne, ana Pilip pisu naga. Ana Ninuna Wa pisi pania, pisape “Ko otaveve yaru nene, ova ga lavisin kiena kat nene.”

³⁰ Ana Pilip kiriri taveve naga pano, ana pa lavisinia, naga mloge naþa yaru nene suña pulo ke tusi kiena ne Navisawalena Aisea. Ana Pilip piun tan yerka wa nene, pisape “? Sanape, ko na okilia ke kinas nen visena la ne ko opuloyu ke ne, pona pe opulokilale re poli?”

³¹ Ana yerka wa nene pisataña, pisape “?Þisi na in na nekilia ve sanape ne, naþa pe yaru re tai naþa visawal kana kinas van inu poli?” Ana naga pisa ke sina ga pa Pilip, pisape “Visae sanene, oula ovami metava e lele na totanoena e nini wa, oto omio inu e nini.” Ana Pilip pa totano amio e kat.

³² Ana visena na Tusi Wa nene naþa Aisea siriyuia, a naþa yerka wa nene kilali ke sape wulovia e pogos nene, nane visena ne nane pisa sanini, pisape

“Yaru nene naga sane sipsip tai, komin naþa visae atararia vena aweñaria, naga pa ruru ga moña ga,

pona naga sa ga ninus nen sipsip ga tai,

naþa pogos naþa aña plan þesan ke vilulusia ana pe mlakai re poli.

Ana yaru nene naga sa ke nene narui, naþa naga e pogos ñarera na kiena malena,

naga pe pisa re nena kiena visena tai poli, naga pa ruru ga ñeke na.

³³ *Ana la akila ñena ga memawaena pan naga paþisi,*

ana pogos naþa la amlipere naga, la akila pe mesmesu re pan poli.

Þisi na la apisu sane ve narina re si tai naþa naga la kiena kia narui,

komin naþa lala la akilaro kiena malena e yomarava nini, pimi plas ga rui.” Ais 53:7,8

³⁴ Ana yerka wa nene piun kinas nen visena la nene tan Pilip, pisape “Ñara, sineun nesape ovisayuli van inu, ane navisawalena nene pisayu ke ne? ?Naga pisayu ke sina ga naga, pona naga pisayu ke ga yaru taþena tai?”

³⁵ Ana Pilip naga pisayu ruru pa yaru nene, siar ruru e marana Tusi Wa naþa naga puloyu ke ne, a naga taveve pano-o, pisawal wetelun ñena ga lologena wo kiena ne Yesu pania. ³⁶ Ana e pogos nene akiriri ña ke e kat wa, lalua ataveve mrapa apano, apimi atol e yo tai naþa wii tai ñeke ea. Ana poglis naþa yerka wa naþani ñal wii nene, pisa pa Pilip, pisa pisape “Inu sineun nesape okila nakeena van inu na, okira, wii tai ne ñeke ne. ? Sanape, suri laþasia suwo ke italua na wa, naþa taþatete neva e nakeena e nene, ne?”

³⁷ [Ana Pilip pisataña, pisa sanini, pisape “Visae ko olelaga kemua e sineña wetelu, inu nekilia nekila nakeena e ko.”

Ana yerka wa nene pisape “Ee, inu nemlelaga e Yesu Kristo naþa naga pe narina ne Ntewa kemua lelaga.”] ³⁸ Ana naga kila kiena kat pa ruru e nene, ana lalua amligan metava e lele na totanoena nene atapul apito tano, apito asuñalu ase e wii, ana Pilip kila nakeena e yere Itiopia nene.

³⁹ Ana pogos naþa lalua amolue sina ga e wii nene, ana Ninuna Wa pimi þerelua Pilip veraga pano, ana yerka wa nene pe ña re si poli. Ana naga pa si teke e kiena kat, mla ke sina ga kiena mrapa pano, ana kekara a kiena sitomena mloge po paþisi. ⁴⁰ Ana Pilip, sa naþa pa narui, milan ga naþa naga sike garu pupia pulkumali naþa Astoto rui. Ana naga suña mialoro ke pito garove, mlologon nalologena wo kiena ne Yesu e pulkumali la moki e lepas nene, a naga pa ñena ga tol pulkumali keviu naþa Sisaria.

9

*Ntewa pilon Sol pimi pe yeririna kiena ne Yesu
Yuñaena 22:4-16, 26:9-18*

¹ Ana e pogos nene, Sol ne nanene naþa sumo ana naga suña kila kare ke li nalelagaena la garu Yerusalem paþisi, naga sinena kar ke nalogena kiena ne Suþe la nene na wa, ana naga suña pisaar ke ga wa pisape þisi na naga we moñar la. Sanene e pogos tai,

naga pa pisu yerkawa kiena ne yaru wa lala, ² ana piun naiilaena laḡas tania. Sol naga sinenan pisape yerkawa nene naga siri m̄aki laḡasia vano va li nasumonena lala na yuña na leniena kiena ne le Yu lala, nae garu Taḡaskas, vena visawal van la visave la monar ataḡan Sol vito garo pula, vena kale yeririna lala naḡa la asike loyuña e ya naḡa la apio e pogos nene asape “Mrapa Viu,” nane li nalelagaena lala. Sol na kila sanene komin naḡa naga kiena sitomena pisape vito uarar la, yerḡene lala amio sira lala, ana were la si awasuḡe ava ma Yerusalem, e naḡa la ase sumo ḡisi na apureure, vena koven la ava e yuña nakoena. Ana yerkawa naḡani siri sa naḡa Sol piunia, kian pania.

³ Ana Sol naga ḡar m̄aki la nene, ana mligan yo Yerusalem, ana pito ke garo Taḡaskas. Ana Sol lala la amial m̄a apano-o e legiena laḡasa, a pogos naḡa apimi lavisin pulkumali nene Taḡaskas, ana naga milan ga naḡa pupia yomerarava kiena ne Ntewa tai molue metava e sinapane tegoli yo naḡa naga mial ke ea. ⁴ Pogos naḡa yomerarava nene tegoli Sol sanene, ana kila naga mloru pito tano e porotano, ana naga mloge pulgon yaru tai pis pania, pisa pisape “!Sol, Sol! ?Vanon ya ne ko osuña okila manene piowa pan inu sa naḡa ko osuña okila ke ne?”

⁵ Ana pogos naḡa Sol naga mloge naviunena nene, ana naga piuntaḡe sina ga, pisape “?Ana Suḡe, ko anene ḡa?”

Ana naga pisataḡea, pisa pisape “Inu Yesu nini naḡa ko osuña okila kare ke naga, in ne na nini.” ⁶ Ana Yesu pisa sina ga pania, pisape “Ko, osuḡalu, oyali ova garu uña Taḡaskas, ana ḡisi na yaru tai imi visawal van ko visave ḡisi na ko okila ve sanape.”

⁷ Ana yeririna la naḡa la asuña ataveve ke Sol e pogos nene, la m̄ena ga amloge visena la nene, ana la pe aña re yaru naḡa pisa poli, ana la sinela kurkur paḡisi, la asuḡalu wowe ga asikena, la pe kiela visena na visaen re si poli. ⁸ Ana siraun suri nene, Sol naga kila sa naḡa Yesu pisa. Naga suḡalu sina ga, ana pogos naḡa pikeḡa kilamarana, naga pe pisu re si suri tai poli, naga sa naḡa pe kilamara ḡala ga narui. Suri nanene kila narui ana la atarar limana, aḡure naga, ava garu Taḡaskas. ⁹ Ana la apa aporu garu uña e yo nene, ana Sol naga pe kilamara ḡala m̄aga sanene pano tol legiena telu, a e m̄ena ga e pog nene, naga pe kinana re poli, a pe mun re m̄ena ga sur tai poli, naga monsilu ga.

Ananaias pa mlotuwo Sol

¹⁰ Ana e yo naḡa Taḡaskas, nalogena tai suña ea, kiena kia Ananaias, ana naga pisu suri tai sa naḡa m̄eniena tai naḡa Suḡe Yesu naga kila logia naga pania, naḡa pio naga, pisape “Ananaias.”

Naga pisataḡea, pisape “Ya ne Suḡe, in nanini.”

¹¹ Ana Suḡe pisa pania, pisape “Osuḡalu, oto garo likan pulkumali nene, ana otaveve narin mrapa naḡa la apisa apisape ‘Mrapa Mesmesu,’ ana ova e yuña m̄ana ne yaru nene Sutas. E m̄ana uña, ana oviun yaru nae Tasas tai, naḡa kiena kia Sol. A yaru nene, nanagane ga ne naga mlen ke e nene, ana naga pisu m̄ena ga suri sa naḡa m̄eniena, ¹² naḡa e kiena navisuena nene, naga pisu ko ke narui, ana naga m̄al ko opa loyuña puna, ko omligan lumoña e naga, vena kilamarana imi wo sina.”

¹³ Ana pogos naḡa Ananaias mloge visena la nene, naga sitom paḡisi, naga pisa pisape “Suḡe, yaru la moki naḡa apisayu ḡelaga viowa kiena ne yaru nene pan inu ḡisi rui, naḡa naga kila ke piowa pa kioña nalelagaena wa lala garu Yerusalem, ¹⁴ ana nanagane, nemloge naḡa naga pimi Taḡaskas rui, naḡa yerkawa kiena ne yaru wa lala la ataḡan rui vena naga imi uarar imimi la naḡa memlotun ko.”

¹⁵ Ana Suḡe pisa pa Ananaias, pisape “Ve omarau re, ova ga, komin naḡa nemligan lua naga suḡalu rui, nepisaar nesape naga ve kiau yaru na yuñaena tai, a ḡisi na naga kilia war kiau kia va e yo punu ga va yolai la naḡa pe ape le Israel re la poli, a visawal va tol kiela ḡarin suḡe lala, a visawal towe m̄ena ga van le Israel lala. ¹⁶ A yoko in na nekila naga visu kilale m̄ena suri m̄arera si tai nene, sane pogos naḡa yoko naga suña visawal ke kiau kia, yoko naga monar loge viowa e suri viowa la ve moki naḡa la monar aimi vania, vanon ga kiau kia nene.”

¹⁷ Ana Ananias mlogear visena la nene, naga pano pa tol yuña nene naña Suþe pisa pania, naga pa loyuña, pisu Sol, pu þarina. Ana naga pisa pania, pisape “Wolai Sol, kieta Suþe, naña Yesu, naña naga porun ko garo mrapplepa, naga ke nane mligan inu nepam narui, vena nelenwo ko ana kilamaraña kilia imi wo sina, ana vena Ninuna Wa vitomi kokonia ko.” ¹⁸ Ana naga mlenwoia, a veraga ga, narin suri naña sane kilekilera na ika mloru petan kilamarana veraga, ana kilamarana pimi po sina ga. Ana Sol suñalu, ana e ruru e poglis nene, aþere naga apano akila nakeena pania. ¹⁹ A naga kinana sina ga, ana pimi mloge si po, puriuna m̄arera sina.

Sol siar mlologo garu Tañaskas

Ana Sol sike si legiena la þasia garu Tañaskas amio nalogena lala kiena ne Yesu la naña la nae e yo nene. ²⁰ Ana pe piavi re poli, naga suña pa loyuña e yuña na lotena lala kiena ne le Israel lala e yo nene, naga pa loyuña ana mlologon ke Yesu pisape naga narina ne Ntewa kemua lelaga. ²¹ Ana yeririna la mokliu naña amloge visena kiena ne Sol, ana la amilan paþisi, ana la apiuviun ke tan la, apisape “!Kee suwala! Nanua sumo na yaru ne nanene naga m̄e kare yaru la garu Yerusalem paþisi, vanon naña la apisa ke kia ne nane naga suña mlologon ke si ne. A naga pimin m̄ena ga suri nene e yo nini, vena naga uarar yaru la nene, vena were la na awasuþe si ava puna ne þarin yaru wa lala garu Yerusalem, naga pimi pe taþena narui. ?Nanagane na ya ne kila naga sanene narui?” ²² Ana Suþe naga miila visena kiena ne Sol pimi m̄arera ruru po laa narui, a naga suña taulu yaru la moki laa narui, naña naga suña pisa ruru merarava po paþisi pan la naña pisape Yesu, naga Navisaarena kemua lelaga napo. Ana le Israel taþena la naña asike garu Tañaskas, la pe kiela suri na visataþeen re si poli, vena la avisaluþar visena kiena ne Sol la nene, ana kiena visena lala la ataulu make ruru nena kiela sitomena viowa lala. ²³ A pogos laþasia þarovia, ana Sol naga suña mlologo ke sanene, ana le Israel la nene asuñalu apimi lele taaga, ana apiran ruru asape aweñmar naga mare. ²⁴ Ana legiena punu ga a lemalo punu ga la apa asuñate ke naga e yepas nen pupia pulutava lala e pupia purkove na pulkumali keviu nene, visae naga kilali visave ure, ana la akilia aweñmar naga. Ana visena nene pimi tol Sol, ²⁵ ana yemalo tai, la naña asike amio naga la atar naga, amligan m̄ene pupia karo tai, ana la amligan malumun naga pito pito tol yo tano lepas na va vanua e pupia purkove na kumali keviu nene. ²⁶ Ana Sol mligan yo nene Tañaskas, ana þasuþe si pa Yerusalem.

Sol þasuþe pa Yerusalem

Ana pogos naña Sol pam tol sina Yerusalem, ana kilali naña va viranar naga amio li nalogena lala, ana la nene pe amlelaga re e naga asape naga pe nalogena lelaga kiena ne Yesu poli, ana la yepela þilinia, amaraun naga paþisi. ²⁷ Ana lala tai nene, kiena kia Þanaþas, naga pisu sane Sol naga pe lelaga, ana kilali naña miila naga, ana naga kila kiena mrapa naña naga kilia suñalu se marana ne nalogena lala. Ana lalua apano, ana Þanaþas pisawal pan la sanape naña Sol naga pisu kieta Suþe e mrapa a naña kieta Suþe pisi pan naga, a naga pisawal m̄ena ga naña Sol naga m̄areran manene naña mlologon kia kiena ne Yesu garu Tañaskas. ²⁸ Ana lala amloge kiena visena, ana la akekarania, ana Sol sike amio la, a naga suña pa e yo punu ga garu Yerusalem, suña mlologon ke kia kiena ne kieta Suþe Yesu, naña naga pe sinena kurkur re nena ga. ²⁹ Ana naga pisi ke amio le Israel la nene naña la asuña apisin ke ga visena nae Kris, ana naga amio la asuña apilup pan la e visena paþisi, pano pano asitom asape popon aweñmar naga mare. ³⁰ Ana pogos naña kieta wolai la þasia amloge suri nene, ana la aþure Sol pito poga ga garo e pulkumali naña Sisaria, ana siraunia la apisi maro amio, ana la amligan lua naga þasuþe si pa kiena yo, pulkumali naña Tasas.

³¹ Siraun e pogos nene, ana nalelagaena lala naña asike yo punu ga gar e lepas nae Yutea, a garu Kalele, a garu m̄ena ga Samaria, la apisu sane pog malumu towe pan la narui. Ana Ninuna Wa naga suña kila po pan la, miila la, kila kiela suñare kapur pimi

ñarera, a kila ke ñena ga nalelagaena lala la apimi ape moki la sane, ana nalelagaena la nene punu ga asuña apatanon ke kieta Suþe silaga.

Garu Lita, nalologena Pita naga kila ruru lana ne Aeneas

³² Ana Pita naga suña mial e pulkumali la moki e lepas nene, naga suña mlologo, ana e si e pogos tai, naga pitomi pisu li nalelagaena wa la naþa asike garu pulkumali naþa Lita. ³³ Ana pogos naþa naga pa tol yo e nene, naga ñal yaru tai naþa yepena komþas mare, ñeke ga e ñana tog tol kas orely rui, pe mial re si poli. Yaru nene kiena kia Aeneas. ³⁴ Ana pogos naþa Pita pisuia, pisi pania, pisape “Aeneas, nevisa van ko, nevisave nanagane Yesu Kristo kila tasneña wo si narui. Osuñalu, osiloar moña tog.” Naga pisa sanene, ana Aeneas naga suñalu veraga, yepena po nenaga. ³⁵ Ana yeririna la punu ga naþa asike e pulkumali naþa Lita, amio la naþa asike e yotop naþa Seron, apisu yaru nene naga pimi po sina, la apilon kiela malena lala ava e Ntewa.

Garu Soþa, Pita kila Toreka mali sina

³⁶ Ana e yotop nene ana pulkumali tai ñeke ea, kiena kia Soþa, ana nalelagaena la tai naþa sike ea, naga sira naþa kiena kia, Tapita. Naga nene kia tai naþa e visena kiena ne le Kris lala la apisape Toreka, naþa kana kinasia, kia kiena ne suri mali nowo tai naþa tia. Sira nene, naga pe sira tai naþa naga suña kila ke yuñaena nowo la silaga, naga suña miila luen ga yaru la naþa pe kiela suri re poli. ³⁷ Ana e pogos nene, maiena tai tol sira nene, ana mai ñaga pano pano-o mare, ana akevan tasnena, ana amligan naga ñeke e ñana loyuña na metava, vena ataginia. ³⁸ Ana pogos naþa nalogena lala nae e yo nene Soþa la amloge visena naþa apisape Pita naga sike ga lavisi, e ga e pulkumali taþena nene Lita, la apitetalia yaru la lua amiyal kawa apanonia. Ana lalua apano-o aporun Pita, la apiun ñarera pania, apisape “Imimi sinemimin manene mesape oimi pun imimi vilaga.”

³⁹ Ana sanene Pita suñalu, amio la lua nene, apano. Pogos naþa pimi ñalivin la, la aþure naga pa e loyuña na metava e naþa la amligan sira naþa ñeke ea. Ana letano lala apimi, amiyervivia, la asuña atagin ke rui, a pogos naþa Pita pimi, la apian naga e kulsota nowo la naþa Toreka naga suluia e pogos naþa naga mali ke ga wa amio la. ⁴⁰ Ana þisi na Pita pisa pan la pisape la amolue ava vanua sumo wa, a pogos naþa la apa vanua, ana naga kinai, ana mlen. Ana þarlua þarina kira pisu tasnena ne sira naþani, naga pisi pania, pisa pisape “!Tapita, osuñalu!” Ana sira nene pike þa kilamarana veraga, ana pogos naþa pisu Pita, naga þarlua toñalu totano. ⁴¹ Ana Pita tarar limana, miila naga suñalu, ana naga pio nalelagaena lala, amio letano la nene. Ana la apimi loyuña, ana naga pisa pan la, pisape “Nanene narui, kiamiu sira nanini, naþa Ntewa naga kilamalia si naga.”

⁴² Ana lologena na suri keviu nene telivi piora e yo naþa Soþa, ana yeririna la moki naþa amlalaga e kieta Suþe vanonia. ⁴³ Ana siraunia, Pita naga su piavi towe laa garu Soþa sane, puna yaru tai, kiena kia Saemon, naþa naga pe yaru na yuñaenen suri lala e kulus nen suri mali lala.

10

Ntewa pis pa Konilias

¹ Ana pulkumali keviu taþena tai ñeke garo losi e lepas nene, kiena kia Sisaria, a yerkawa tai kiena ne yaru na mara lala nae Rom naga sike e yo nene, kiena kia Konilias. Naga suña pisuar ke þegas nen li na mara la nene tai, naþa yaru la tol ponotia taaga, a la apio kiena þegas nene apisape “Þegas Nae Italia.” ² Yerkaawa nene, naga pe yeririna wo tanea tai nene, a naga amio namratava la ñana, la silaga amlen pa Ntewa, a la amlotun naga, a silaga la asuña amiila ke le Israel la naþa pe kiela suri re poli, ana la asuña aþarþel ga pupia nalaena la pan la. ³ E legiena tai, e ruru e pog na leniena na yepekilavi, e mrae telu, ana naga pisu suri tai sa ga naþa ñenienna, naþa Ntewa naga kipian naga ea. E kiena navisuena nene, naga pisu meraravan paþisi, naþa naga pisu navisi kiena ne Ntewa tai pitomi e ñana loyuña, ana pio naga, pisa pisape “!Konilias!”

⁴ Ana pogos naña Konilias naga pisu navisi nene, naga sinena kona pañisi, ana naga pisu manene navisi nene, naga pisa pisape “?Ya ne?”

Ana navisi nene pisataña, pisape “Ntewa naga suña mloge ke kioña leniena la rui, ana naga pe sinena p̄esan re kioña p̄elaga wo la poli naña ko okila ke pa la naña limala korena, ana naga kekarania a sitoñal ko ke na wa. ⁵ Ana naga pisa pan ko, pisape ko na monar oligan kioña yeririna lañasia ava garu kumali naña Soña, vena avio yaru tai, naña kiena kia wetelu, kien kia Saemon Pita, vena naga imi e yo nini. ⁶ Ana yaru nene naga sike puna yaru tañena tai, naga kiena kia m̄ena Saemon, naga m̄ana yuña m̄eke garo lavisin sive, naga yaru na yuñaenen suri lala e kulus nen puluk.”

⁷ Ana navisi kiena ne Ntewa nene pisawal pa pania, ana kovio sina ga. Ana Konilias pio kiena yaru na yuñaena la lua, amio m̄ena ga kiena yaru na kilaen mara tai naña naga m̄ena ga pe yaru na lotunen Ntewa, naña naga suña amio naga silaga, pisuar naga, ana yeririna la telu nene apimi puna. ⁸ Ana naga pisawal sur punu ga nene pan la telu nene, siraunia ana naga mligan la apa garu pulkumali naña Soña, vena aure Pita imi.

Pita m̄ena ga pisu suri tai sa naña m̄eniena

⁹ Ana legiena na peni, pogos naña la nene amial ke apimi Soña na wa, Pita naga sike na, ana naga sinenan pisape kila leniena na kolpae, ana sa naña silaga, naga pa metava e yotop na wosoyuña naña naga sike ea. ¹⁰ Naga sike e nene wa, ana naga mloge visokaria, ana naga pisape la aviran kapi. Ana pogos naña la asuña akila ke kana kinanena wa, ana Ntewa pian naga e suri tai sa naña naga m̄enia. ¹¹ Naga pisu naña ma e peni pike, ana m̄al suri tai sa naña pupia kulmrae, suña pitomi ke tano e yomarava nini. Naga pisu naña la asuña atarar ke mrapura la varoka, ana la amligan malumun ke pitomi tano. ¹² Ana loyuña e kulmrae nene, Pita pisu sur mali tañena la punu ga asike ea, a amio m̄ena ga suri tañena la naña Ntewa naga kila ape suri wa naña ve le Israel la ve akan re, sane loñara lala, a nopi lala, a manu lala. ¹³ Ana naga mloge m̄ena ga pulgon yar tai pisa pania, pisape “Pita, osuñalu, oweñar suri mali tai nene, ana okania.”

¹⁴ Ana Pita pisa, pisape “E Ntewa, peraga yo, tañatete nena ga ve sanene, komin suri mali la naña asike e nene ana pe nakanli re lañas poli wa, naña imimi le Yu lala mepalia ga pe makakan re poli.”

¹⁵ Ana naga mloge ke sina ga pulgon yar nañani, pisa pisape “Suri naña inu Ntewa nepisa rui nesape mekiki ga, ana ko na tañatete si ovisa ovisave namname.” ¹⁶ Ana suri nene molue pimi yam lua sanene, p̄isi, siraunia, yaru telu nena, ana Pita pisaluñar m̄aga, ana siraunia, pupia kulmrae nene p̄asuñe ke sina ga pa metava ma e peni.

Pita tol kinas nen suri naña naga pisuia

¹⁷ Ana Pita suña mloge piowa pañisi, naga suña sitom manene laa pisape popon sa tol kinas nen sur naña m̄alivinia, ana pogos naña naga sitomveve ke ga wa, yaru kiena ne Konilias la telu naña naga pitetalia la apimi, apimi aporu Soña. Ana la apiun yuña kiena ne Saemon tan yaru la p̄asia, ana la akipian la ea, ana la apimi, asuñalu asuña e mratava na yuña m̄ana ne Saemon. ¹⁸ Ana la apio apisa apisape “?Ei, yaru tai kiena kia Saemon, naña kiena kia tañena apisape Pita, naga sike amio amiu e naña, pona peraga?”

¹⁹ Ana pogos nene Pita naga toña sitomyu ke kinas nen suri naña pisu sane m̄eniena wa, ana Ninuna Wa pisa pania, pisape “?E, ko omloge m̄aga? Yaru la telu asuña akale ko ke nagane, la ne nane asuñalu asike vanua, apio ko ke ne. ²⁰ A ko osuñalu, oyal kawa ga ototano vena ovisu la telu nene, ana visae avisave otaveve la, ana ve okilali re naña ovisaluñaria, ko na monar otaveve la, vanon in na nemligan la apimin ko.”

²¹ Ana Pita suñalu pito tano vanua, ana pisu la telu nene, ana naga pisi pan la, naga pisape “Inu naña akale inu ke ne. ?Amiu sinemiun inu vanon suri tai yo?”

²² Ana la apisataña, apisape “Ee, yerkawa na kilaen mara nene, Konilias, naga pitetalia imimi mepimin ko, vena oimi garu m̄ana, vena naga loge re visena lañas tan ko. Navisi kiena ne Ntewa tai naga pisa pania pisape naga vio ko oimi puna sanene. Kiamimi yerkawa nene, naga pe pe yere Yu re tai poli, ana naga pe yaru mesmesu tai naña naga

tarar luen ga kiamiu pogos na leniena la punu ga silaga, ana le Israel ñena ga lala nae e kiamimi yo nene akekaran naga pañisi. Naga ke naña pitetalia imimi mepimin ko narui, nane mesike e nini vanon ne.”²³ Ana vanon naña mrae pito ke tano rui, ana Pita ñerear la nene añeke amio naga e yuña naña naga sike ea, vena kolulagi ke ga wa ana la punu ga atove.

Pita pa mialiali Konilias

E yemlagi ke sina ga, Pita pa amio la nene, amio ke ñena ga nalelagaena tañena lañasia nae Soña, la apa ñena ga amio la.²⁴ La apano, yemalo wola ga mrapa komsusa, la amono, ana yemlagi ke sina ga la apa aporu ga Sisaria nene na wa. E yo nene, Konilias sike amio namratava ñana lala, a naga pio ke ñena ga kiena erau lañasia vena la aimi asuñate Pita lala.²⁵ Pogos naña Pita pimi tol uña ñana ne Konilias, Konilias pa pitawea, mloru pito tano e lana, sa naña mlotu naga.²⁶ Ana Pita tarlua ke sina ga pa metava, pisa pania, pisape “E, awis, ko osuñalu. Opisu ke ne, in na nepe yeririna ga.”²⁷ Ana Konilias suñalu, ana lalua asiar asunu lilue, ana apa loyuña, naña e pogos ke nanene narui Pita pisa yeririna la mokliu naña asuñate ke naga loyuña.

²⁸ Ana Pita pisi pan la narui, pisa pisape “Amiu asuña akilia ke naña e lepas nen kiamimi lotuena imimi le Yu lala, naña imimi na tañatete meva loyuña e yuña ñana ne yaru tañena la naña la pe ape le Yu re poli, pona meve erau wo memio la. Ana nagane, Ntewa naga pian inu merarava po, pisape pe pon re nevisu viowa e yaru lañasia naña nevisave la apiowa ga, pona la ape kororaki ga.²⁹ Komin suri ne nanene naña Ntewa naga pian inunia, inu pe nepisaluñar re la nene e pogos naña apimin inu poli, nesape tañatete neiñasu, ana nepimi ga. ?Ana in na sineun nesape amiu avisawal li van inu, avisave amiu apio inu asape neimi vanon ya?”

³⁰ Ana Konilias pisatañe Pita, pisape “Ee, potena pañisi. Nanagane legiena telu ñaro pa rui, mesmesun e pog suri nene narui, e mrae telu naña yepekilavi, in na netoña ga ñau loyuña, nesuña nekila ke leniena na yepekilavi. Nesuña nemlen ke sane, ana nemilan ga navisi tai naga pitomi suñalu ga sike e marau, naña naga ñana kulsota pilavila po na po.³¹ Ana naga pisi pan inu, pisa pisape ‘Konilias, Ntewa naga suña mloge ke kioña leniena la ne, a naga suña sitoñal ke ñena ga kioña ñelaga wo la naña ko osuña okila ke pa la naña pe kiela suri re poli.³² Ana ko na monar okila sanini: ko na monar oligan yaru lañas ava Soña, komin yaru tai, vena naga wasuñe ke sina ga amio la aimi puña. Yaru nene, kiena kia wetelu Saemon Pita, a naga pa sike e yuña ñana ne yaru tañena naña naga ñena ga kiena kia Saemon, naña naga, kiena yuñaena naga miyuñaen ke suri lala e kulus nen puluk. Ñisi na kioña yeririna lala akilia alual yuña ñana ne Saemon nene garo lavisin sive.’³³ Navisi nene pisi pan inu sanene, ana nane kila na nepitetalia ke yaru la nene apitoñasun ko vilaga, a nepisa potena pan ko pañisi komin kioña nasinewoena naña ko opam pun imimi e yo nini. Ana ita punu ga tesike e yo nini e marana ne Ntewa, vena imimi meloge visena naña Ntewa pisa pan ko vena ko ovisa van imimi.”

Pita pis pa Konilias lala

³⁴ Pita mloge visena la nene, ana naga pisa pan la, pisapenua “Po pañisi, a nepisa potena pañisi naña amiu amla pogos nene pan inu, vena nekilia nevis van amiu. Nekekara pañisi, komin naña nanagane nepisu kilale sa naña lelaga pañisi naña Ntewa naga pe ñaveve re yaru tañena la poli.³⁵ Yere Israel, pona yaru naña pe molue re kome lus nene poli, pona yer pe ke sina ga, ana visae naga vatanon Ntewa, kila ga sur la naña Ntewa naga sinenania, ñisi na Ntewa kekaran naga.

³⁶ “Visena naña Ntewa naga mligan pimi pan imimi le Israel lala, amiu akilia ñisi rui, naña naga lologena wo tai naña pisawal pisape yeririna kilia tol suñare naña pe lelaga e Yesu Kristo, naña naga pe Suñe kiena ne yeririna punu ga na yomarava nini.³⁷ A amiu akilia kana suniena nena, naña nanua sumo, ana Yoane Nakeena naga pimi mlologon kiena nakeena nene, a siraun naga nene, ana pupia suri ne ñalivin ita, siar garo Kalele, pano pano tol make ga yo punu ga e lepas naña Yutea.³⁸ Pupia suri nene, nane Yesu

nae Nasaret nene amio yuñae kerkeviu la naña naga, naña Ntewa naga mligan kiena Ninuna Wa pan naga, pulemamaga ruru keviu e naga, a naga mligan nañareraena keviu pania, ana Yesu naga suña pa kare ga e yo punu ga, kila ke yuñaena wo lala a kila ruru ke ñena ga la naña Yermare naga suña kila kare la ke pañisi. Yesu kila ke suri la nene, komin naña Ntewa naga sike amio naga.

³⁹ “Ana suri la nene naña naga kila garu Yerusalem, a e lepas tañena ñena ga lala e kiamimi purvanua imimi le Yu lala, imimi li nalologena la, mesuña mepisawal ke suri la nene pan yeririna lala. Imimi mesuña mepisawal ke naña kiamimi yerikawa lala la asuar naga e laki torovia, ana naga mare, ⁴⁰⁻⁴¹ ana e kana legiena na telu, Ntewa kilamalia sina ga naga. Ana Ntewa naga kila imimi lañasia mepisu naga, a imimi metotano memio naga, imimi mekinana a memun wii memio naga. Ana Ntewa naga pe tañan re naga imi vaeme sanene va yaru la punu ga poli, ana naga vaemen imimi ga la naña Ntewa naga mliganar imimi sanene, vena mevisawal va yeririna tañena lala mevisave Yesu naga mal si rui. ⁴² A pogos naña Yesu sike amio imimi sanene, naga pisi pan imimi, pisape imimi monar melologon kiena lologena wo va yeririna punu ga, a imimi monar mekila merarava van la mevisave Ntewa mliganar naga taaga vena naga liñere yeririna lala, sane la naña amare ñisi rui a amio ñena ga la naña yokorena la amal ke e pogos naliñereena wa. ⁴³ Nanene naga Yesu ke ga naña navisawalena lala apisawal naga nanua sumo rui, naña la apisape ñisi na Ntewa naga viewo mlamulena viowa lala kiena ne yeririna la naña la amlelaga e kiena kia, la aviawa e naga.”

Ninuna Wa mloru pitomi e la

⁴⁴ Pogos naña Pita suña pisi ke sanene wa, ana amilan ga naña Ninuna Wa pitomi tano pa tol la nini naña asuña amiyagogon ke naga. ⁴⁵ Ana li nalelagaena tañena la naña amligan yo Soña la amio Pita apimi, ape le Yu lala, ana lala amilan manene la suri nene, komin naña pimi tol pogos nene, ana lala añaape Ninuna Wa naga pe nalaena tai naña Ntewa mligan ga pan le Yu lala. ⁴⁶ Ana nanagane, ana apisu la nini naña pe ape le Yu re poli, apisi e visena tañena lala, asuña amiyeluar manene ke Ntewa keviu pañisi, ana akilia asape Ntewa mla ñena ga Ninuna Wa pan la naña pe ape le Yu re la poli.

⁴⁷ Ana Pita pisi pan la naña amio naga, pisape “!Amiu apisu ke ne! Nanagane, lala nene akus Ninuna Wa sa ke ga naña ita tokus sumo. Sanene, ana tetañatete ñena ga tevisaluñar la tevisa ve tekee la re e wii.” ⁴⁸ Ana Pita pis pan Konilias lala, pisape akeela e kia kiena ne Yesu, ana ñisi na, la akeela.

Ana la añareran ñena ga pa Pita vena naga sike re laa amio la wa e legiena si lañasia.

11

Pita mla navisayuenta pan nalelagaena lala garu Yerusalem

¹ Ana pe yam piavi re poli, ana lologena nene pano-o tol nalologena tañena lala garu Yerusalem amio ñena ga nalelagaena tañena lala e lepas wetelu na yo Yutea, pisape yeririna lañas naña pe ape le Yu re poli naña lala amlelaga e lologena wo kiena ne Ntewa rui. ² Ana nalelagaena lañas nae garu Yerusalem lala asitom manenea apisape nalelagaena tañena lala naña pe ape le Yu re poli, la ñena monar ave ñaviu vena ave sa le Yu lala, ana pogos naña Pita naga pavini ma Yerusalem la apisa nene kare naga piowa pañisi. ³ Lala apisa pania, apisape “?Sanape naña ko opa osike omio yeririna kar lala naña pe ape ñaviu re poli, naña ko okinana ke ñena ga omio la?”

⁴ Ana Pita naga pisi pan la, siar e kana purpes nena, naga pisawal ruru suri punu ga pan la, naga sun pan la sanini, pisape ⁵ “Nanua sumo, nesike Soña, ana pogos tai nesuña nemlen. Nesuña nemlen sanene pano-o netopopog ga neteke narui, ana nepisu suri tai sane pupia kanus tai, naña naga molue metava ma e peni pitomi tano, naña asu ña atarar ke mrapura varoka, asu ña amligan malumun ga pitomi tano, naga pitomi tano lavisin inu. ⁶ In na nepisu ruru loyuña e kanus nene, ana nepisu sur mali lala na uña amio suri mali lala na yoñarua, amio loñara lala a nopi lala, amio manu lala, la asike loyuña ea.

⁷ Nesuña nepisuvisu ke sanene, ana nemloge pulgona yaru tai pisi pan inu, naga pisape 'Pita, ko osuñalu, oweñar suri tai nene, okania.' ⁸ Ana nepisape '!Peraga Suñe, tañatete ve sanene! Suri la ne sanene naña pe mesmesun re nena akan poli, a naña imimi le Yu lala memlonia, nesuña nemilon ruru silaga.'

⁹ "Ana nemloge pulgona naña pitomi metava e peni naga pisi sina pan inu, naga pisape 'Suri naña inu Ntewa nepisa rui nesape naga mekiki ga, ko ve ovisa re si ovisave naga namname.' ¹⁰ Nemloge visena na ñmalivin inu sanene yam telu ñisi, ana kanus nene amio suri la naña asike ea añure si pa metava.

¹¹ "Ana e ruru nena ga e pogos nene, yeririna la telu apimi aporu e yuña naña imimi mesike ea, naña yaru nae garu Sisaria tai naga pitetalia la telu nene apimi vena aure inu neva sina nemio la. ¹² Ana Ninuna Wa naga pisi pan inu, pisa pisape 'Ko na ve ositom re ovisave ve okekaran re naña ova omio la telu nene,' ana inu nepa ga, a orueta tañena la orai nena nini nae Soña la ñmena ga apimi amio inu. Imimi mepano-o, meporu Sisaria, ana lala añure imimi mepa e yuña ñmana ne yaru nene, Konilias.

¹³ "Ana mepa loyuña, naga sun pan imimi, pisayu sanape naña naga pisu navisi tai ñmalivinia suñalu nenaga se marana loyuña e ñmana yuña, ana navisi nene pisi pania, pisa pisape 'Ko oligan visena va garu Soña, vena yaru nañani Saemon Pita naga monar imi visu ko. ¹⁴ Yaru nene naga imi visawal lologena tai van amiu ana visena nene naga kilia tamalia ko amio na mratava moña lala.'

¹⁵ "Ana pogos naña Konilias naga pisi ñisi, inu towe re nepisi pan la, ana e ruru nena e pogos naña nesuña nesiar nepisi ga na wa, ana Ninuna Wa pitomi e la sa ga naña pitomi ñesan e ita nanua sumo rui. ¹⁶ Nepisu suri nene, ana nesitoñal visena kiena ne kieta Suñe, naga pisa nanua sumo, pisape 'Yoane naga kee amiu e wii, ana ve ve piavi re, ana amiu akus nakeena naña e Ninuna Wa.' ¹⁷ Ana ita le Yu lala, naña ita temlelaga rui e kieta Suñe Yesu Kristo, Ntewa naga mla kiena Ninuna pan ita, sane nalaena tai, ana pogos naña nepisu naña Ntewa mla ñmena ga nalaena na sanene pan la naña pe ape le Yu re poli, ana suri nene kila merarava ruru pan inu naña sane nanagane, pe pe pon re naña nevisave yeririna la nene la tañatete aimi loyuña amio ita. !In na nepe ai nini naña vena nevisaluñar Ntewa sanene, visae naga sinenan visave kila sanene van la?"

¹⁸ Ana pogos naña le Yerusalem la nañani amloge visena kiena Pita, ana la pe apisa re si suri tai pan poli, ana la akekarania, amiyeluar Ntewa pañisi, la apisa apisape "!Lelaga pañisi naña ne! Nanagane ga ne ita tepisuluñar rui naña Ntewa naga kekara ñmena ga pañisi pan la naña pe ape le Yu re poli, ana naga mla ñmena ga pulmas pan la vena lala akilia avilopu la, a vena akilia atol malena lelaga e naga."

Ñegas nen li nalelagaena lala nae garu Antiok

¹⁹ Ana nanua sumo, pogos naña Sol lala añeñar Stipen naga mare rui, Sol la nene la akila kare ruru ñmena ga nalelagaena tañena lala garu Yerusalem pañisi, ñisi na nalelagaena la nene la moki apuretetai apeve taaga. Lañas añure manene laa apa perina apano-o atol lepas naña Ponisia, lañas añure asuña akus waa lala apano atol purvanua naña Saepras, a lañas apa laa ga waa, apa e kumali keviu tai, naña kiena kia Antiok. A pogos naña lala asike e yo la nene, la asuña amlologon ke Nalologena Wo nene, ana la asuña amlologo ke ga pan la naña ape le Yu ga sa naña lala. ²⁰ Ana siraunia, gar yo naña Antiok, nalelagaena tañena lala naña amolue e lepas na Saerin a purvanua naña Saepras, lala apimi ñmena ga, amlologo, ana la asuña apisasawal ke Nalologena Wo kiena ne kieta Suñe Yesu pan ñmena ga la nae Antiok naña la pe ape le Yu re poli. ²¹ Ana nañareraena kiena ne Ntewa suña pimi keviu e la nene, a yeririna la moki naña amloge kiela visena lala, ana lala amlelaga e Yesu, la apilopu la apimi e naga.

²² Ana nalologena na suri nene pimi tol kiligana ne ñegas nen li nalelagaena lala garu Yerusalem, sape visena kiena ne Ntewa pa tol pa li tañena la rui la naña pe ape le Yu re poli, ana la apitetalia Ñanañas pa garu Antiok vena naga visuli sur la nene wa. ²³ Pogos

naña Pãnaņas naga poru e yo nene, naga pisu suri nene pe lelaga pañisi, naña Ntewa naga pisa ruru malena kiena ne yeririna la nene keviu pañisi, ana kila naga kekara keviu pañisi ea, ãisi na naga sukol visena lala pan la vena la atarar Suþe ãarera e losinela lala wetelu, e pogos naña po a pogos naña piowa. ²⁴ Pãnaņas naga kila sanene komin naga pe yaru tanea tai, naña Ninuna Wa naga pule e naga, a naga piawa ãarera e Ntewa, ana sanene, yeririna la moki apimi e Ntewa e pogos nene.

²⁵ Ana Pãnaņas naga pisu sane yuñaena keviu garu Antiok, ana naga pisu sape popon va tol garo pupia pulkumali naña Tasas, vena kaleli Sol, vena were naga imi iila yuñaena. ²⁶ Pogos naña naga ãalia, ana pure naga la lua aþasuþe si apimi apa Antiok. La lua asike amio nalelagaena lala e yo nene, ana lala apian yaru la moki, amiyuñae ãa sanene pano-o tol kas wetelu taaga. E kumali keviu nene Antiok, ana li taþena lala la apisa kare towe la nalogena lala, lala apio la asape “La yeririna Kristo lala” pona “Kristin lala,” a nane la apisa þesan ke kia ne nanene narui.

²⁷⁻³⁰ Ana e pogos nene, nalelagaena laþasia naña ape navisawalena, amolue Yerusalem apimi atol garu Antiok, ana la nene tai, kiena kia Akaņas, naga suñalu, pisi e nañareraena kiena ne Ninuna Wa, naga pisape “Ana ãisi na ve ve viavi re, ana visokarena tai ve keviu imi tol yeririna make ga e purvanua punu ga e kieta leþasia.”

Ana pogos naña nalogena lala nae garu Antiok la amloge visena nene, la apisayuia, ana lala apranaria apisape ãisi na monar la punu ga akoan kilavaru ya naña la akilia alavia, vena aligan vano van kiela wolai lala naña asike e lepas nae Yutea, vena iila la vena lala asuñate ruru pogos ãarera nene. Ana lala akoan kilavaru la nene, ana lala amligan nalaena nene sike e limana ne Pãnaņas amio Sol, vena lalua nene awar vano van nasumonena kiena ne nalelagaena lala garu Yerusalem.

A visena kiena ne navisawalena nene pe lelaga, komin naña sirau ana pupia pogos ãarera tai tol yo la nene, sa ga naña naga pisawalia, ana nanene e pogos naña Klotias naga suña pe þarin suþe ke garu Rom.

12

Yerkawa la añe li nalelagaena lala, akila kare la manene laa

¹ E pogos nene, naña lalua aþar nalaena nene pimi garu Yerusalem, Þarin Suþe Erot suña ãe kare ke þegas nen li nalelagaena laþasia. ² Kiena yaru na mara laþasia la apa atarar wenla Yoane nene, Semes, ana la añeñar naga e kiela playu na kilaen mara.

³ Ana yerkawa lala kiena ne le Yu lala la akekaran manene suri nene pañisi, ana kila Þarin Suþe Erot naga kila þelaga nene pa laa sanene, ana naga pisa pa kiena yeririna la nene vena ava atarar ãena ga Pita. Naga kila nena ga nene e pogos na þaþagena kiena le Yu lala, naña la akila Þaþagena Na Sitoñalena Natamaliaena, amio ãena ga Þaþagena Na Kanen Tamþa. ⁴ Erot suña sitom ke pisape visae pogos na þaþagena nene war ro pae, yokorena naga were Pita va suñalu se marana ne yeririna lala, vena la avis vania, a vena la avisa avisave naga monar mare.

Naga narui, yaru la nene apa atarar Pita, ana akoven naga pa e yuña na koaena, a la amligan þegas nen yeririna na mara la vari vena akirakiravan ruru naga, naña þegas la nene kiela yaru na kilaen mara la peve vari ea. ⁵ Ana pogos naña Pita sike loyuña e yuña na koaena sanene, nalelagaena lala la amlen ke ãarera silaga pa Ntewa vanon naga.

Navisi pimi þerelua Pita petan yuña na koaena

⁶ Pita pa suña e yuña na koaena pano-o, pa tol nena yemalo naña Erot naga suña sitom ke pisape e kolulagi, ãisi na naga were Pita va suñalu se marana ne yeririna lala vena la aliþere naga. E yemalo nene, Pita naga momalio, ãeke ga likan yaru na mara la lua nene, naña la apiar Pita panon lalua nene amio sen lua. A li na mara taþena lalua, naña la ãena asuña apisuar ke mratava lala na yuña nakoena nene. ⁷ Ana verakorena ga, navisi kiena ne Ntewa tai naga suñalu sike loyuña e yo nene, a pupia yomerarava

nenaga e nañani pañisi. Ana navisi nene pa kululun purkaunena ne Pita, pio ñegea, ana pisape “!Ovitañili, osuñalu vilaga!” Ana sen lua nene la ga amluña petan limana ne Pita veraga, luoka ga mloloru pito sike e porotano. ⁸ Ana navisi nene pisape “Oviteran ruru kioña kilika na kararen mopoña, oyen kioña kulus nen laña a moña kulsota, italuva tevano.” Ana Pita kila sanene, ⁹ ana naga taveve navisi nene, lalua apano. E pogos nene, Pita pe kilia re pisape suri nene na lelaga poli, pona sanape, komin naga sitom ke pisape naga ñeni ke ga naña. ¹⁰ Ana lalua apa ña sane, lalua amiyuve mratava na sumo naña yaru na mara sike ea, lalua apa ñaga amiyuve ñena ga mratava nalua naña yaru na mara sike ea, ana lalua apimi atol pulutava maro na keviu naña mrapa na vaen vanua vetan yuña nakoena. Pupia pulutava nene la amiyuñen e pototo, ana pogos naña lalua apimi lavisinia, pupia pulutava nene naga ga pietava, ana lalua aña apa vanua. Lalua amialoro la ga e mrapa apa sane, ana Pita milan ga, navisi nene mligan ke naga veraga, ana Pita naga ga taaga sike na.

¹¹ Ana e ke e pogos ga nene, Pita pisa kilale ya naña navisi nene kila ke pania, ana naga pisape “!Aulai! !Lelaga kemua nañane! Nekilia narui, naña nesape Ntewa naga mligan kiena navisi nene pimi vena vinaunlua inu vetan limana ne Erot, a vena tarlua inu vetan suri viowa la naña le Israel lala la asuña asitom ke asape akila van inu.” ¹² Pita pisa kilale suri nene narui, ana naga pa memes ga e yuña ñana ne anenane Son Mak, kiena kia Maria. E yuña ke ga nene narui, la moki naña la asike pa e rui vena alen wo naga.

¹³ Ana Pita tol yuña nene, naga sigariga mratava, ana sira ñee nae yo nene tai, kiena kia Rota, naga pimin vena vietava. ¹⁴ Naga pe pietava ruru re poli wa, ana naga mloge kilale pulgona ne Pita naña pisi pania, ana naga kekara na kekara, naga mligan mratava nene ñeke na, kiriri pa pisawal pan la, pisape “!Pita nañani! !Pita nane suñalu sike vanua e ñata pulutava rui!”

¹⁵ Ana la apisa pania apisape “!Ko na ve ovisi wowe re sanene!” Ana naga pisa ke sina ga pan la, pisape “!Peraga kemua rui! Nepisokanlae re poli, nepisa ke lelaga ne!”

Ana la apisa ke sina ga pania, apisape “!Peraga! Visae sanene, pona kana yermare ga nene yo?”

¹⁶ La asuña apivis ke sanene, ana Pita sike vanua na wa, naga sigariga mratava suluen ga sike na pano-o, ana la apa apietavana. Pogos naña la apietava, la apisa kilale Pita, ana la amilan manene pano-o pañisi. ¹⁷ Ana Pita sisi ga pan la, kuan limana pisape vena avarurula, ana naga sunyu pan la sanape naña Ntewa naga ñerelua naga petan yuña nakoena. Ana naga pisa pan la pisape “Popon naña amiu ava avisawal suri nene va Semes nanagane, amio ñena ga arueta tañena la nene.” A siraunia, Pita molue ke sina ga, pa tapolou e yo tañena tai.

¹⁸ Ana kolulagi, yaru na mara lala amiyuyuwawa pañisin naña Pita pe mon re si e sen la nene poli, ana la amarau a aminue kare ga asape pisi na aña akila ya narui, la asuña apiuviun tan la, asape “?Ana yaru pure sanape, aña naga pa sike pe narui?” ¹⁹ Ana visena pa tol Ñarin Suñe Erot pisape Pita kovio, ana Erot mligan kiena yeririna lala apa akale pano-o, akale ñele ga. Ana Erot pisi pa kiena yeririna la naña la apisuar Pita, ana la nene tañatete si avisa suri tai vania, ana Erot pisape akoven plan la nene, la awe moñar la amarmare.

Ana siraunia, Erot mligan si yo naña Yutea, pito garove sike e pupia pulkumali keviu naña Sisaria.

Suniena na marena kiena ne Ñarin Suñe Erot

²⁰ Ana e pogos naña Erot naga ñene ke nalelagaena lala wa, ana naga suña peveyu keviu ñena ga amio yeririna na pupia pulkumali lua nene Taea amio Saeton, pano pano-o kila yeririna na kumali keviu lua nene amarau pañisi, naña asape visae veveyuena nene imi viowa pisi na yoko ñarera van la vañisi. La nene asitom sanene komin naña la asuña amalin ke ga kinanena la naña la aña ga e porotano tai kiena ne Erot nene. Ana la amligan kiela yerkawa lañasia vena la aimi akila mara wo amio Erot. Ana la nene apa ape erau wo amio yerkawa kiena ne Erot tai, naña naga kiena kia Plastas, vena naga

kilia iila la a naga kilia kila mrapa naña la akilia avis amio Erot vena asu ruru sina e suñarena amio naga. ²¹ Ana Erot pisawal legiena tai pisape la akilia aimi avisu naga ea, ana e legiena nene la apimi. E pogos nene, Erot mien mana pupia kulsota wo lala, sa naña naga pe pupia ãarin suñe, a naga totano e kiena pupia yo na totanoena, ana naga toña mligan ke visena tai pan la. ²² Ana la nene amloge kiena visena nena, ana la sinelan asape akila kotalia yo pona aña sanape, ana la apioni manene pa metava, la apisa apisape “!Ee, nanene pe yeririna re na pisi nene poli, pona na nene na Ntewa ga nene yo, aulai!”

²³ Ana Erot mloge visena nene, ana kekarania, a naga ãarwar ñena ga naña la apisape naga Ntewa, ana mesmesu e pogos nene, navisi kiena ne Ntewa tai pimi ñe naga, komin naña naga pe pisaluñar la re poli, pisape la monar ayeluar ga Ntewa, a la monar ve ayeluar re yaru. A pe piavi re poli, ana pulen ga kular viowa lala akaria akaroro sinena ana naga mare.

²⁴ A e pogos nene, pe suri koren ga naña yeririna la ne sane Erot nene la asuña akilali naña akila yuñaena kiena ne Ntewa vito tano, ana visena kiena ne Ntewa naga suña kapuru kekei ke pa e yo punu ga, a suña ãar ke mras moki liu.

²⁵ Ana Ñanañas amio Sol, lalua amla nalaena naña li nalelagaena lala nae garu Antiok la akuan rui, amla pa nasumonena lala kiena ne nalelagaena lala garu Yerusalem, ãisi ana lalua apitove, lalua añasuñela sina ga apa Antiok, a e pogos nene, lalua aÑure Son Mak taveve la.

13

Amiyawa Ñanañas lalua Sol

¹ E ãegas nen li nalelagaena lala garu Antiok nañani, ana yeririna laÑasia la asuña naña ape li navisawalena lala, a laÑasia naña la ape li navianena lala. La nene ana laÑasia la kiela kia sanini: Ñanañas, a Simion Kuluyepe Malolo, a Lusias nae Saerin, a Manaen naga nanua sumo, naña namratava ñana Ñarin Suñe Erot la akuslua naga pogos naña lalua Erot ape sisi ke ga wa, a amio la nene Sol naga ñena ga pe lala yaru tai. ² Ana pogos tai, la nene amio li nalelagaena taÑena lala, la amonsilu ga, ana asuña amlotun ke Ntewa, ana Ninuna Wa pisi pan la, pisape “Amiu akilalua Ñanañas amio Sol vetan amiu nanagane, ana amiu avisir plan lala lua naña akila yuñaena tai naña in na sineun nesape lalua monar akila.”

³ Ana siraunia, lala amonsilu ke sina ga pogos tai vena alen, ana la apuarar ãarina ne Ñanañas lalua Sol, ana amlenwo lalua, ãisi na amiila lalua apano vena akila yuñaena kiena ne Ntewa.

Ñanañas lalua Sol aporu garo Saepras

⁴ Ana sa naña Ninuna Wa miila Ñanañas lalua Sol sanene, lalua amligan yo Antiok, ana lalua apitomi e pulkumali naña Selusia naña ñeke garo losi, ana lalua amiyai e waa tai, apa aporu e purvanua naña Saepras. ⁵ E purvanua nene, ana lalua apa ura e kana pupia pulkumali nena naña Salamis, ana lalua apa e yuña lala nalotena kiena ne le Yu lala, ana lalua asuña apisawal ke visena kiena ne Ntewa. Ana e pogos nene, Son Mak naga sikol ke lalua nene na wa, ana naga suña miila la ke e yuñaena.

⁶ Ana la telu nene amiyal ke e purvanua nene, apitom atol kana luas taÑena, e kana pulkumali keviu taÑena tai naña Ñapos. Ana e yo nene, apisu yaru tai naña kilia kilaen ñaki ñeke e yo nene, naña naga pe Yu tai, kiena kia Ñayesu, ana apio ñena ga naga e visena kiena ne le Kris lala asape Eliñas. Yaru nene naga suña pisokan kar ga sape naga pe yaru navisawalena tai kiena ne Ntewa. ⁷ Ana yaru na kiliaen ñaki nene, naga pe yerkawa ñena ga tai e yuñaena kiena ne ãarin suñe na purvanua nene, naña Sese Polos. Ana ãarin suñe nene, naga pe yaru tai naña naga kilia ruru suri po, ana naga pio Ñanañas lalua Sol sape aimi avisu naga, komin naña naga sinenan sape loge visena kiena ne Ntewa tan la. ⁸ Ana pogos naña lalua apimi, ana yaru na kiliaen ñaki nini naga kawe kiela visena, taÑali naña visaluñar la, a taÑali naña kila kare sitomena kiena ne ãarin suñe nene naña naga taÑatete kus lelagaena e Yesu. ⁹ Ana Sol, naña naga asuña apisa ñena

ga kiena kia asape Pol, naga pimi pulemamaga e Ninuna Wa, ana kiena natamariaena ñarera nene miyur yaru na kiliaen ñmaki nene,¹⁰ ana pisi pania, sape “!Ko na ope narina Yermare ruru nena ga napo! Suri punu ga naña po, ana ko pe sinoñan li re nena ga, ana ko na opulen ga visokanena a ñelaga piowa ga lala. Visena lelaga lala kiena ne Ntewa, ana ko na osuña opilon la silaga apimi ape visokanena ke sina ga.¹¹ Nanagane ga ne, yoko ovisu limana ne Ntewa imi tol ko ruru nena ga. Nanagane yoko kilamaraña imi ve kilamara ñala, ñisi na ko otañatete ga ovisu legiena ve piavi li ña ga.”

Ana veraga ga, ana yaru nakiliaena ñmaki nañani naga pisu sa naña ñmau tai na yoñmarua naña malolo manenea pimi kalwo kilamarana, ana naga moña mial wowe ga sanene narui naña tañali sape lual re yaru tai naña tarar limana ana were vano.¹² Ana pogos naña ñarin suñe naga pisu suri la nene, ana naga mlelaga e visena kiena ne Ntewa narui, ana pogos naña Ñanañas amio Pol apian naga e visena wa la nene, ana naga milan manene pañisi, pisu po na po.

Pol lalua Ñanañas apa si Antiok tañena, e yo lepas naña Pisitia

¹³ Ana Pol la amligan yo Ñapos, ana akome waa apitove, ana apa ura e yo lepas nañani Pampilia, ana la amiyal apano atol pulkumali keviu nene Peka. Ana e yo nene, ana Son Mak naga mligan la, naga pe taveve la re si poli, ana naga ñasuñe sina pa Yerusalem.

¹⁴ Ana Pol lalua Ñanañas, lalua amligan yo Peka, ana amiyal apa re laa sane apano aporu e yo lepas naña Pisitia, apa atol ñena ga pulkumali keviu tai naña kien kia ñena ga Antiok. La asuña e yo nene, ana e Legiena Wa, ana apa loyuña e yuña na leniena kiena ne le Yu lala, ana atotano amio yeririna lala.¹⁵ Ana li nasumonena lala la akila lotuena, pano tol pogos naña apuloyu Visena Wa, ana apuloyu nawuloena tai e navisaluaena kiena Mosis, a tai e tusi kiena navisawalena lala. Ana pogos naña nawuloena la nene ñisi narui, ana li nasumonena lala apiun tai Pol lalua Ñanañas, la asape “Wenlamimi lala, visae amiu lua amlarar ke visena tai naña kilia iila malena kiena ne yeririna lala, ana imimi sinemimin mesape amlua avisa van imimi.”

¹⁶ Ana Pol suñalu, ana koan limana, naña sape ava ruru la ana ayagogon naga, ana naga pisi pan la, pisape “Poga ga, ana in na sineun nesape nevisa ve sanini, amiu le Yu lala, amio li tañena la naña amiu ñena ga asuña amlelaga ke e kiamimi Ntewa, ana amiu punu ga ayagogon ruru kiau visena nini.¹⁷ Kieta Ntewa nene, naga ke narui naña naga pisir plan kieta li marua la nanua sumo, a naga ga naña kila la apimi ape moki pañisi e pogos naña amiyuñae korena ke ga garu Isip, a naga ga ke sina ga naña ñere plan la e pogos ñarera nene, e kiena nañareraena keviu.¹⁸ Ana naga sumon la amolue apa e yokorena, ana amiyal ña e yo nene pa tol kas lualima yam vari, ana yam moki naña e pogos nene ana apilopu ñasila pan Ntewa, ana naga pe mligan la re nena poli.¹⁹ Ana pogos naña la apimi atol purvanua nene Kenan, naña Ntewa pisaar pisape tañan van la, ana naga ñene plan lus la olua kiena ne li tañena la naña apimi asike e yo nene rui, ana siraunia ana mla porotano nene pan repita lala, la ape ñarunia, ana lala apa asu wawa asike ea.²⁰ Siar e pogos naña apa garu Isip sumo, ana pimi ña pano-o tol pogos naña añasuñe la sina apa loyuña e kiela purvanua, tol kas pe suri tai sane ponotia vari lualima yam lima.

“Ana e pogos naña asu wawa asike e kiela porotano sanene, ana Ntewa pisir plan kiela suñe lala, naña asumon la a aliñere la, ana suñe la nene la amiyuñae ña sanene pano-o tol lala yaru maro nini, Navisawalena Samiuel.²¹ Ana la apisawal asape la pe sinelan re si suñe la ne sanene poli, ana la apisa pa Samiuel asape naga lual re yaru tai naña naga kilia ve kiela ñarin suñe keviu. Ana Ntewa kilologia Sol, narina ne Kis, pan la, naña naga pe lus kiena Pensiman, ana Sol naga pimi pe kiela ñarin suñe keviu nasumo, ana naga pisuar la pano-o tol kas lualima yam vari.²² Siraunia, ana Ntewa kilalua sina Sol, ana mligan Tepet kus lelana, ana Ntewa naga kekaran manene Tepet pañisi, naga pisayu sape ‘E Tepet nini, narina Sese, ana nepisu nesape netol yaru tai naña kiena ñelaga torokin ruru nena ga kiau sitomena, ana nekilia nesape naga ñisi na naga yuñae ga va sa naña

in na sineunia.’²³ Ana Ntewa pisaar pan repita la nanua sumo sumo laa rui, sape ñisi na naga werelua lus tai kiena ne yermarua Tepet nene, ana ligana naga van ita le Yu lala, ve kieta Natamaliaena, ana suri nene Ntewa kila pa e yaru naña Yesu rui.

²⁴ “Sumonia, pogos naña Yesu nene pe pimi re poli wa, ana Yoane Nakeena suña mlolog ke pan ita, sape ‘Amiu monar avilopu amiu, ana amiu monar ava e nakeena.’

²⁵ Ana pogos naña Yoane nene lavis ga kila punu yuñaena la naña Ntewa mla pan narui, ana naga suña piun ke tan yeririna lala, pisape “?Amiu añaape in na nepe Navisaarena? Inu nevisa van amiu, in na pe nepe yaru re nena naña amiu asuña asuñate ke poli, peraga. Ana siraun inu, ana naga suña pimi ke ne, a naga po naña po, a naga pe yaru wa manene laa, ana in na nepisu sane inu pe nemesmesu re naña neve yaru na kiena yuñaena ga poli, inu pe netorokin re neva lavisu puna poli naña nowar plan kiena kulus nen lana.’”

Pol pisape yerikawa kiena ne le Yu lala, la ke naña añañar Yesu narui

²⁶ Ana Pol pisa pan la, pisape “Wolai lala, amiu lañas naña ape le Yu ruru lala, naña añañivi e lus kiena Epraam, a amiu lañas naña ape li tañaena lala, ana amlelaga ke e kiamimi Ntewa imimi le Yu lala, ana sineun nesape monar avisu kilalea avisave ita ke narui naña Ntewa mla visena na natamaliaena pan ita rui, kila nesuña neñar ke pimi pan amiu ne. ²⁷ Lala nae Yerusalem amio kiela yerikawa lala, la pe apisu kilale re nena Yesu poli e pogos naña naga pimi, a pe apisu kilale re asape naga pe Natamaliaena poli naña li navisawalena la apisayu e Visena Wa la naña apuloyu silaga e Legiena Wa lala. Sanene, ana pe apisu kilale re poli, naña la akila visena kiena ne navisawalena la moki apimi ape lelaga, komin naña la ke nene narui la amliñere kiela Navisaarena nene asape naga monar mare. ²⁸ La pe añañal re nena suri tai poli naña torokin naga mare vanonia, ana la añañaran pa Ñaelat vena naga monar tañañan visave la akilia aweñañaria. ²⁹ Ana la akila piowa ga pania taveve ga ya naña li navisawalena lala apisawal nanua sumo la rui naña asape ñisi na yeririna la akila vania, vano vano aweñañar naga e laki torovia, ana siraunia la akus tasnena pano, amligan meke e puluve. ³⁰ Ana Ntewa tamalia ke sina ga naga petan marena, ³¹ ana e legiena lañasia, moki li ña ga, ana naga suña ñalñalivin kiena yeririna lala naña sumo lala asu amio naga garu Kalele, a naña ataveve naga apami metava ma Yerusalem. Ana la naña apisu Yesu sa nene rui, nanagane la ke nene narui la asuña apisasawal ke pan yeririna lala asape naga mali sina petan marena.

³² “Ana nanagane, e yo nini, imimi lua mepimi pun amiu naña memla Lollogena Wo nene pimi pan amiu. Imimi lua mepisawal pan amiu, mesape suri wo la naña Ntewa pisaar pan repita la na sumo, pisape ñisi na kila van kiena yeririna lala, ³³ ana nanagane suri la nene apimi ape lelaga rui e ita narin mapila lala, a e ita li tañaena ñena ga la naña temlelaga e naga. Ana ita tetol suri wo nene e ga e kieta pogos nini, naña Ntewa mligan Yesu pimi tano e yomarava nini, ana tamalia ke sina ga naga petan marena.

“E Visena Wa, Yauena marana lua naga pisayu suri nene, naña sape
‘Kiau sisi, nepisu sane ñane ko opimi ope naruu,
a nepimi nepe arimoña kemua lelaga.’

Yauena 2:7

³⁴ Ana e lepas naña Ntewa kila Yesu mali sina e marena, naña naga tañatete va sina ga e puluñili pogos tañaena, e lepas nene ana visena lua na Visena Wa la apisa rui. E visena tai, ana Ntewa pisa sanini, pisape

‘Navisa ruruena wa la nini naña in na nepisaar pan Tepet sumo rui,
la asuñalu ñarera asike ga wa,
ana nanagane nela van amiu narui,’

Ais 55:3

³⁵ ana visena na lua na lepas nene, sike sina ga e Yauena tai, naña yaru naña siria pisi pa Ntewa, pisape

‘Ñisi na ko na tañatete okilia otañañan kioña yaru wa visu marena,

pona tasnena menun pogos tai.’

Yauena 16:10

³⁶ “Ana visena la nini pe apisa re yermarua Tepet nanua sumo poli, komin naña siraun naña naga kila yuñaena kiena ne Ntewa pan kiena yeririna la pano pano-o, naga mare ga, ana asin naga ñeke amio repina lala, ana tasnena mon ña pano menun. ³⁷ Ana visena la nini apisayu ga Yesu nini, apisayu naña naga tasnena pe pa piowa re sanene poli, naga Ntewa pisirlua sina ga naga mali sina.”

Pol sape naviewoena naga ñeke ga e Yesu

³⁸ Ana Pol sape “Wolai lala, visae sanene, inu sineun nesape monar akilia ruru suri nene, sape e ga e Yesu nene, ana Ntewa suña kila pan ita lua sape naga piewo punu kieta mlamulena piowa lala. ³⁹ Navisaluaena kiena ne Mosis tañatete were plan ita lua vetan kieta ñelaga na mlamulena viowa lala, ana ko ai, naña visae olelaga ñarera e Yesu, ana ñisi na naga war plan kioña ñelaga na mlamulena viowa nene vetan ko. ⁴⁰ Sanene, ana monar avisuar ruru amiu, komin naña visae peraga, ana ñisi na amiu ve sa naña visena tai kiena ne navisawalena lala, ⁴¹ naña naga pisa pisape

*‘Amiu apisu ke ne! Amiu asuña apitalia kare suri wa lala,
ana nanagane ga ne ana yoko avisu kilale ga na wa, siraunia amare.*

*Komin naña in na nesuña nekila ke yuñaena tai likan amiu e pogos naña amal ke ga wa,
ana asuña apisavan ruru merarava pan amiu,*

ana amiu na pe sinemiun re alelaga e poli.’ ” Aña

1:5

Yeririna nae Antiok lala akekaran visena nene kiena ne Pol

⁴² Ana Pol pisi pan la ñisi, ana la apa vanua, ana yeririna la apimi apiun ñareran tan Pol, asape “Imimi sinemimin mesape e Legiena Wa naña pimi ke ne, ana ñisi na amlua awasuñe amiu si aimi, ana avian imimi re laa ga wa e suri la nene.” ⁴³ Ana pogos naña Pol lalua Ñanañas apano, ana le Yu la moki amio ñena ga yeririna tañena la naña apimi sa ga ape le Yu la rui, apimi amiyaloro ataveve lalua apano naña asape asun re laa sane wa. Ana nalologena lua nene apisi amio la, ana apisa pan la asape la monar awasine manene laa Ntewa sane wa, a lala monar atañali naña ava re laa loyuña e kiena lemamiena.

⁴⁴ Ana sa naña la apisa pa Pol amio Ñanañas rui, e Legiena Wa tañena naña sirau pimi, ana pulen ga le Yu lala, a pulen ñena ga yeririna tañena lala e pulkumali nene apimi sina lele taaga, naña asape ayagogon Pol lologon Visena Wa kiena ne Ntewa. ⁴⁵ Ana pogos naña yerikawa kiena ne le Yu lala apisu yeririna moki tañena la nene, ana apielue narui, ana la asuña apisa kare Pol, asuña apisa pan yeririna lala asape naga suña pisokan ke ga nene. ⁴⁶ Ana Pol amio Ñanañas lalua pe sinela kurkur re poli, ana lalua asuña apisi molmolue ga narui, a lalua kiela visena pa ñarera laa narui, a la apisa pan le Yu la nene, asape “Imimi mepisu mesape popon naña Visena Wa kiena ne Ntewa naña imimi mesuña mepisawal ke pan amiu, naga imi tol ñesan amiu le Yu la sumo, sumon naña tol yeririna tañena lala. Ana amiu na pe sinemiun re alelaga e poli, asuña akuwan plan kare ga pano, sa ga naña amiu atañatete si akilia atol malena naña ve uro re narui. Ana poga ga, teke ga e amiu, ana sanene ñisi na imimi meva ga melologon va la naña pe ape le Yu re la po la rui. ⁴⁷ Komin naña Visena Wa tai pisa rui naña imimi monar mekila sanene, naña Ntewa naga pisa, pisape

‘In na nepisirlua ko vena ovivaga sane kapi tai,

vena tegoli la naña pe amlelaga re e inu poli wa.

Ñisi na ko okus kiau natamaliaena va tol yo punu ga e yomarava.’ ”

Ais 49:6

⁴⁸ Ana pogos naña lala naña pe ape Yu re poli amloge visena nene, ana amloge po manene laa ea, la apisape “!Suwala, visena kiena ne Ntewa nene naga po naña po, imimi sinemimin pañisi wa!” ana lala naña lala lañas naña Ntewa pisaar la sape ñisi na la atol malena naña ve uro re, la ke nene narui naña amlelaga e Yesu e pogos nene. ⁴⁹ Ana siar e pogos nene, ana visena kiena ne Suñe suña mlenlelein pa ñar make yo e lepas nene.

Le Yu la sinela kar Pol amio Ñanañas

⁵⁰ Ana le Yu la naña apielue apa apisu sira kawa lala na kiela yuña na leniena amio li nasumonena lala na pulkumali, ana apis pan la akila kare kiela sitomena lala, pano pano-o yerkawa la nene amiila yeririna la apa añenelua Pol lalua Ñanañas petan kiela yo. ⁵¹ Ana pogos naña lalua asuña apa ke narui, ana lalua akila kile tai pan la ne na pulkumali nene, lalua añevan puluyavi na mrapa naña sike e lolala lalua.

Ana lalua apetan yo Antiok, lalua apa atol pulkumali naña Ikoniam, ⁵² ana nalogena viu la naña asike garu Antiok, la sinela kekara keviu, a Ninuna Wa pimi pulemamaga ruru nenaga e la.

14

Pol lalua Ñanañas, lalua amlologo e yo naña Ikoniam

¹ Ana e kumali naña Ikoniam, suri punu ga añalñalivi sa ga naña Antiok narui. Lala aporu e yo nene, ana siraunia Pol lalua Ñanañas, lalua apa loyuña e yuña na leniena kiena ne le Yu lala, ana lalua amlologo. Lalua amlologo amio nañareraena kiena ne Ntewa, ana yeririna la moki naña asike e yo nene, lala amlelaga e Nalologena Wo nene, naña lala ñasia ape le Yu, a lala lañas ape le Kris. ² Ana le Yu tañena lala naña asuña ga, lala pe sinelan re naña alelaga poli, ana siraunia la nene apano akilayon naña avilonkare sitomena kiena ne yeririna tañena lala naña pe ape le Yu re poli, la akila sinela la pimi kari la naña amlelaga mare ga na wa. ³ Suri ne nanene narui kila Pol amio Ñanañas, lalua asike e yo nene yam piavi la sane, vena akilali naña aiila nalelagaena lala. Ana pogos naña lalua asike amio la sanene, ana pe amaraun re la naña sinela kar la ke poli, ana la asuña amlologon Suñe Yesu pan la, a apisayu kiena pupia lemamienda pan yeririna lala. Ana Suñe naga kila yeririna lala apisu kilale naña kiela visena lala ape lelaga, komin naga tañan pan lalua vena akila kile ve moki e yo nene a suri nailanena lala.

⁴ Ana yeririna lala na kumali nene la amlipere la e ñegas lua narui, naña lañas akekaran le Yu lala, ana lañas akekaran nalologena lua nañani. ⁵ Lepas lua nene lalua asu ña apepeyun la sanene, pano-o ana le Yu lala amio li tañena lala naña pe sinelan re si li nalelagaena la poli, amio ñena kiela yerkawa lañasia, la ke naña apisa ruru narui vena la asu nalologena la nene a akove moñar la amare.

⁶⁻⁷ Ana nalologena lua nañani lalua amloge suri nene, ana apisu sane popon naña aure vetan yo nene, vena ava atapolou e yo tai. Sanene, lalua asuñalu petan yo nene, apa e lepas tañena naña Likonia, ana lalua apa amlologon Nalologena Wo e lepas nene, amio kana pulkumali ne luwoka, naña lalua kiela kia sanini, Listra amio Tepe.

Pol lalua Ñanañas lalua amlologo garu Listra

⁸⁻⁹ Ana e narin pulkumali nene naña Listra, pogos tai ana Pol naga suña mlologo ke pan yeririna lala, ana yaru tai pe laulu naga toña tano, ana naga toña miyagogon Pol. Yaru nene, siar e pogos naña naga paeme, naga pe mial re pogos tai poli, komin naña naga lana luwoka ga pulu.

Ana Pol pisu naña yaru nene suña miyagogon ruru ke naga, a naga mlogeluñar naña sane yaru naña pe laulu ne naga suña mlelaga e Yesu sape yoko naga kilia kila ruru lana luwoka. Ana Pol pisu manenea, ¹⁰ pio naga, pisape “!Laulu, ko oula ova metava, osuñalun laña luoka!” Ana yaru nene mloge Pol pisi pan sanene narui, ana naga pula pa metava veraga, ana naga suña mial ke amio lana luwoka naña apimi añarera ruru narui.

¹¹ Ana pogos naña yeririna lala apisu suri nene naña Pol kila e laulu nene, la asuña apiovion e kiela visena, apisape “!Ake! !Kieta ntewa lala akus maran yeririna, apitom tano pun ita sa ga yaru narui!” ¹² Ana la asikia Ñanañas, apio naga asape Susu, naña naga pe kia kiena ne ñarina suñe kiena ne kiela ntewa lala, a amligan kia kiena ne Pol, la apio naga asape Emis, naña naga pe kia kiena ne yaru nawaren visena kiena ne kiela ntewa lala, komin apisu naña Pol naga suña pisi manene laa sane taulu Ñanañas.

¹³ Ana vanua e mralaea na kumali nene, yuña wa tai ñana ne kiela ntewa nene, Susu, naga mon ña ga, amio kana yaru wa nena, ana yaru wa nene naga sitom sape kila ruru naña vena yeririna lala monar akila kuñañaena van Pol amio Ñanañas, naña la asitom asape yaru lua nene lala ape kiela ntewa. Ana yaru wa nene kila la apitañilin naña apanon añaure puluk lala apimi, ana apaia la e meme, vena awe moñar la e kove na yuña wa nene narui.

¹⁴ Ana Ñanañas amio Pol, lalua pe akilia re kiela visena poli, naña la asuña apisayu ke suri la nene, ana pogos naña lalua amloge ya naña asuña asitom ke naña asape akila, lalua amloge piowa pañisi wa. Nalologena lua nañani, lalua pe akekarana re nena naña yeririna la nene sinelan asape alotun lalua poli, kila sanene lalua apitolwowa ñala kulsota lala, ana lalua akiriri apano asuñalu asike likan yeririna la nene, apionia, apisape ¹⁵ “!Avisaluñar la, avisaluñar la! !Ve akila re ve sanene van imimi! !Imimi lua mepe yaru ga sa naña amiu, pe mepe ntewa re poli! Mepimi ga memio Nalologena Wo, mepimin naña mevisawal van amiu monar aligan kiamiu ñelaga marua la ne sanene sike na, amiu ve alen re si va kamiu ntewa moki la naña amarmare ga ne. Mepimin mesape mevisawal van amiu naña Ntewa mali taaga ga naña sike na, a mesitom mesape mevilon amiu vania, naña naga ga naga sii sinapane, amio porotano, amio sive, a naga sii suri la punu ga naña asike e yo punu ga e yomarava nini. ¹⁶ E kas kiena ne teras la moki naña añauro apa rui, Ntewa naga tañan naña yeririna lala na yomarava, sane amiu, la asuña amiyaloro ataveve ñelaga la naña peve tañena lala, a la pe akilia re naga poli, ana akila lotena sa ga naña la asitom apisape mesmesun naña akila. ¹⁷ Nepisu naña amiu akila sanene komin naña amiu pe akilia punu re naga po, ana e lepas naña puna, naga pe tapoloun punu re naga pan amiu poli, komin naña pogos punu ga naga suña kilologia naga ve torokaki ga pan amiu pisape naga pe lelaga, a naña kiena ñelaga e amiu na po pañisi. Naga ke narui naña naga suña kila ke kiena yua mloloru pitomi e yo yau, a naga ke narui naña naga suña kila ke suri punu ga akapuru e kamiu lokove la ne, lala añar kala kinas lala e kana pogos ruru nena napo. Naga ke narui naña naga suña kila amiu akekara a amiu amloge po keviu e kinanena wo la naña amiu asuña añar ke e kamiu lokove la nene.”

¹⁸ Pol amio Ñanañas lalua apisa visena la ne sanene ñisi, ana lavis ga naña tañatete akilia avisaluñar yeririna la nene naña lala sinelan manene naña akila lotena van lalua nene pona akila kuñañaena van la. Ana siraun naña la amloge visena kiena ne lalua nene, ana la pe akila re si poli.

¹⁹ Ana siraunia, le Yu lañasia naña añene Pol amio Ñanañas rui garu Antiok a e yo naña Ikoniam, ana nanagane la nene apimi añalivi ke sina ga narui e yo Listra nene. Ana la asuña asun pan le Listra lala, pano-o añaure plan ke sina ga kiela sitomena lala pa pe tañena ke sina ga, ana siraunia, ana lala apanon Pol, ana la akove naga pano-o apisu amape naga mare rui. Ana lala añaurelua tasnena petan pulkumali pa vanua, akoan kare ga naga mon ña ga sa ga ne, ana la añasuñe sina apano. ²⁰ Ana nalogena lañasia apimi amligan ruru Pol, ana la asuña amio naga, ana siraunia, naga tavolo sina, ana naga pa sina uña amio la. Ana kolulagi, naga amio Ñanañas, lalua amiyal, lalua apa e narin pulkumali tañena nene naña Tepe.

Pol amio Ñanañas, lalua apa sina, añasuñe sina ga apa akome yo la nene

²¹ Ana garu Tepe, Pol amio Ñanañas, lalua amlogo, ana e yo nene la añaure yeririna moki apimi amlelaga, apimi ape nalogena lala kiena ne Yesu. Ana siraunia, ana lalua amolue ke sina ga e yo naña Tepe, la asiar apa sina, ana lala ataveve ña ke sina ga mrapa naña la akom ea apimi. Sanene, la añasuñe ke sina ga apa garu Listra, sirau, Ikoniam, yokorena apano aporu garu Antiok nae Pisitia. ²² Ana e yo make la nene, la apian ke sina ga nalelagaena lala, ana amla visena wo la pan la vena iila la, a la apisape “Pe suri korena naña pona ita tekilia tetol pogos ñarera lala, pona yeririna la ve moki akawe ita, ana naña ita teva loyuña e navesuñenena kiena ne Ntewa naga monar ve sa ga nene narui. Visae sanene, amiu ve amalumu re, ve aursu amiu re sina, ana asuñalu asuwawa ñarera e Kristo pogos punu ga.” La apisa visena la ne sanene, kila nalelagaena lala la apuarar

naviawaena m̄arera. ²³ Ana e kumali la nene punu ga, la apu p̄arina ne yeririna la p̄asia vena ave nasumonena la e p̄egas na nalelagaena la veve taaga, ana lalua amonsilu ga vena alenwo la. Ana amligan la asike e limana ne Supe, naṗa lalua amlelaga asape yoko naga iila la silaga.

²⁴ Ana la aṗasuṗela sanene, ana la aṗaro e lepas na yo Pisitia, p̄isi na apimi e lepas na yo Pampilia. ²⁵ E lepas nene, la amlologo e kumali naṗa Peka, siraunia la apito garo Atalia, garo losi, ²⁶ ana la akus waa, aṗasuṗela si apa aporu garu Antiok, nanene e yo naṗa Seria. Nanene kumali keviu naṗa sumo rui, la amlenwo Pol lalua P̄anaṗas, apisape vena lemamiena amio navisuarena wo kiena ne Ntewa naga sike amio lalua, ana la amligan plan lalua vena ala Lologena Wo avano. Ana nanagane narui, lalua akila make nena ga pupia yuñaena nene p̄isi, ana apimi si rui. ²⁷ Ana lalua apio nalelagaena lala vena la punu ga aimi lele taaga, ana lalua apisawal yuñaena la pan la naṗa Ntewa miyuñaen pan lalua, a lalua apisayu ruru pan la sanape naṗa Ntewa naga pietava pan la naṗa pe ape le Yu re poli, pisape la m̄ena ga akilia alelaga, a la akilia aviran la lele taaga e kiena nasuṗenena.

²⁸ Ana lalua asu m̄ena tol kupario lua pona telu suri tai sanene amio nalelagaena lala garu Antiok.

15

?Li nalelagaena viu lala la monar ataveve navisaluaena kiena ne Mosis pona peraga?

¹ Ana pogos naṗa Pol amio P̄anaṗas lalua asike garu Antiok wa, li nalelagaena laṗasia na lepas nae Yutea, naṗa la ape le Yu, la apitomi garo e yo nene. A pogos naṗa la amlologo pa li nalelagaena taṗena lala nae Antiok, la apisawal kiela navianena tai, asape “Visae amiu li nalelagaena laṗasia, la pe ape p̄aviu re poli taveve ya naṗa navisaluaena kiena ne Mosis pisa, p̄isi na Ntewa naga taṗatete tamalia la.”

² Ana Pol amio P̄anaṗas, lalua pe akekaran re nenaga visena nene poli, komin naṗa la akilia asape Lologena Wo kiena ne Supe naga pe pisa re sanene poli, ana la apisi m̄arera pan la nene, la apepeyu amio la nene yam piavi laa sane, vena akilali naṗa avisaluṗar la vena ve avian woren re si yaru la sanene.

Ana li nalelagaena lala nae Antiok, la asitom manene laa visena la nene narui, ana peraga, la apisu sane popon manene naṗa la avitetalia Pol amio P̄anaṗas amio m̄ena ga laṗasia, la apa ma meta Yerusalem vena ava avisu li nalologena lala amio nasumonena lala, vena alogeli naṗa sane yerkawa la nene la asitom ke sanape e lepas na suri naṗa la apepeyu vanonia.

³ Naga narui, li nalelagaena lala apitetalia la apitove, apitove akome lepas la ne sane Ponisia, p̄isi na apa Samaria, a e pulkumali punu ga naṗa la apa akom ea, la asuṗa apiora amio li nalelagaena lala, a asuṗa asun amio la apisayu sanape naṗa apa atelivi e la naṗa la pe ape le Yu re poli, a apisawal Lologena Wo pan la, a sanape naṗa la moki apilon la apimi e Ntewa rui. A kiela navisawalena la nene la akila li nalelagaena lala la amloge po paṗisi, amieluar Ntewa vanonia.

⁴ La akila liluen sanene pano pano-o, apito atol garo Yerusalem, ana la apa apisu p̄egas nen li nalelagaena lala, amio nalologena lala a nasumonena na suṗare lala, ana la nene la akekaran naṗa apisu Pol amio P̄anaṗas lala, ana la apisa visena na worworen pan la. Sanene, Pol amio P̄anaṗas lalua apisawal m̄ena ga e la naṗa garu Yerusalem, apisape sanape naṗa Ntewa naga kila yuñaena moki rui pa lalua naṗa lalua apa atol la naṗa la pe ape le Yu re poli, ana amlologon pan la, apisape visae la alelaga ga e Kristo, p̄isi na Ntewa naga tamalia la.

⁵ Ana pogos naṗa lalua apisawal suri la nene sanene, li nalelagaena laṗasia naṗa ape le Yu, naṗa ape Varasi, la asuṗalu la apisawal ke sina ga kiela navianena nene, apisape “Popon visae la naṗa la pe ape le Yu re poli, visae la sinelan asape alelaga e Kristo, ana la monar ave p̄aviu m̄ena ga, a la monar ataveve m̄ena ga visena taṗena lala na navisaluaena

kiena ne Mosis, ana visae ataveve kieta ðelaga ita le Yu la sanene, naga nene ana ðisi na ita tekilia tevisa tevisave ðisi na Ntewa naga kekaran la.”

Pupia viorena garu Yerusalem

⁶ Ana la asuñña apisayu manene laa suri nene, kila sanene li nalologena lala amio nasumonena lala la apisa apisape monar akila viorena tai vena avisayuia. ⁷ Ana e viorena nene, la apisi manene pano pano-o kila Pita suññalu, pisi pan la, pisape “Wolai lala, amiu akilia ðisi rui, nanua na Ntewa naga mligan inu vena in na nevaþesan nelologon Lologena Wo va la naþa pe ape le Yu re poli, ana nanagane ita tesuñña temloge ke naþa la moki asuñña amlelaga ke e Kristo rui. ⁸⁻⁹ Ntewa naga kila sanene, komin naþa naga pe mliþere re la nene petan ita poli, ana naga pisu ke losinela lala maran taaga ga sa naþa naga kilia ruru ya naþa sike e losineta. Naga kila merarava pan ita sa naþa naga kekaran vena la akilia alelaga ke e mrapa ñña nenaga naþa ita tesuñña temlelaga ke ea, naþa naga mla Ninuna Wa pan la, a naga kevan ke ñña ga losinela lala mekiki, komin naþa la aþasine naga, sa ke ga ita. ¹⁰ Ntewa naga kila po manene laa pan la rui, ana nanagane, ita laþasia la sinelan asape akila ke sina ga ñnarera van la. Visae ita sinetan tesape toñmareran la nene vena la awar suri urmi lala na kieta navisaluaena e ññasila, sa naþa la asuñña apisa ke ne, sanene na piowa ne, ita tekilawo ke sina ga Ntewa ne. Repita lala la apisu sane navisaluaena nene naga ñnarera paþisi wa, a ita ñña ga tepisu sane taþatete yaru tai kilia logear kana visena ne la punu ga. ¹¹ Ana la amlelaga, a ita ñña ga temlelaga temio la, tesape ita punu ga towasine ga Suþe Yesu, a tetol malena e naga, pimi kom ga e kiena lemamiña.”

¹² Ana la naþa e viorena la pe apisi re si po laa rui, ana la asu puru, ana amla pogos na visena tai pa Pol amio Þanaþas, la sinelan asape aloge re si kile lala amio suri na ilanen lala naþa lalua akila e nañnareraena kiena ne Ntewa pa la naþa pe ape le Yu re poli, pogos naþa lalua apa atelivi pula.

Semes sikol kiela visena lala

¹³ Ana pogos naþa lalua asunyu suri la nene ðisi, Semes nene, naþa naga pe kiela yerkawa tai garu Yerusalem, naga suññalu sikol visena pa yeririna lala, pisape “Wolai lala, sineun nesape ayagogon inu sumo wa. ¹⁴ Ita temloge ga ðisi na wa naþa Saemon nene, naþa Pita, naga pisawal ruru pan ita rui sanape naþa Ntewa naga ññalññalivi þesan pa la naþa pe ape le Yu re poli, a naþa naga pure laþasia apimi ave yolai viu tai naþa kiena kia sike ea. ¹⁵ A e Visena Wa, visena kiena ne kieta navisawalena lala nanua sumo, pisa pisape yoko ve sanene narui. Lala tai naþa pisa sanene, naga Emos, naþa naga pisawal visena kiena ne Ntewa tai, naþa pisa sanini, pisape

¹⁶ ‘Þisi na, inu nowasuþe inu sina neimi, neyuññaen ruru si lus kiena ne Tepet nene naþa mloru, vena mali sina.

Naga sa ga yuñña tai naþa kekapili kar ga sike ne, ana ðisi na nevisirlua sina.

¹⁷ Ana ve sanene, yeririna taþena lala naþa pe ape kiau re poli wa,

þisi na la akale inu Ntewa Namava,

a yeririna lala na purvanua punu ga na yomarava nini,

naþa nemligan kiau kia sike e la rui,

la aimi ave kiau yeririna.

¹⁸ Inu Ntewa Namava, naþa nekila yeririna lala la apisu kilale suri la nene siar nanua sumo laa rui,

kiau navisaarena sanene narui.’ ”

Amo 9:11,12

¹⁹ Ana Semes pisi manene laa sane, pisawal kiena sitomena, pisape “E kiau navisuena, naga sanene narui. Pe pon re ita tekila yuññaena ñnarera pona tekila kare manene la naþa la pe ape le Yu re poli, naþa la apilon la ga apimi puna ne Ntewa na wa. Pe pon re tevisave la monar ave þaviu poli, pona la monar ataveve kieta Navisaluaena sanene pona sanene. ²⁰ A ya ga naþa popon ita tekila van la, naga sanini, sane ðisi na ita tesiri ññaki tai, tevisawal suri ve telu van la. Suri na tevisaþesania, tevisave la ve akan re si tata la

naṁa yaru taṁena la akila ke kuṁpaṁaena ea pan kiela nono lala, la monar avaliania. A sur nalua, la ve akila re si ṁelaga viowa, sa naṁa kolau pona lau. A natelu, ṁisi na ve akan re ṁena ga kuruta na suri mali, sane tata na suri mali naṁa kuruta pe mlau make re poli wa. ²¹ Yaru lala la asuṁa akilia make ke suri la nene naṁa pe mesmesun re naṁa akila po laa rui, komin naṁa Navisaluaena kiena ne Mosis naga suṁa pisa, a la asuṁa apulolua ke Navisaluaena nene a amlologon silaga e Legiena Wa lala e kiela yuṁa na lotuena e kiela pulkumali lala, siar nakonua rui pimi tol ṁane.”

Yerkawa lala nae Yerusalem la asiritaṁe pa la nae Antiok

²² Ana siraunia, la apisu sane la apisi toroki, ana li nalologena lala a nasumonena lala, amio ṁena ga li nalelagaena la punu ga, la apisu sane popon aligan laṁas ava ke sina ga amio Pol lalua ṁanaṁas, ato garo Antiok. Ana la apisaar kiela yerkawa nayuṁaena lalua nene, Suta ṁasapas amio Saelas, apisape ṁisi na lalua nene atove. ²³ Ana la asiri ṁena ṁaki tai vena lalua akilia alarar vitove, a ṁaki nene pisa sanini, pisape “Imimi li nalologena lala memio nasumonena lala nae Yerusalem, naṁa imimi mepe wolai memio amiu e Yesu, imimi mekekara paṁisi naṁa mevitawe amiu e ṁaki nini. Imimi mesiri ṁaki nini piṁasu, amiu na pulkumali nae Antiok, a e kana lepas naṁa Seria, a van amiu ṁena ga e lepas nae Silisia, nanene na amiu la naṁa pe ape le Yu re poli, naṁa nanua sumo ana amiu na asike ga e yemalolo. ²⁴ Visena pam tol imimi ṁisi rui, pisape sumo, imimi laṁasia mepitoṁasu garo pun amiu, a la apian amiu asape amiu na monar ataveve kiamimi Navisaluaena imimi le Yu lala, visae peraga, ṁisi na Ntewa naga taṁatete tamalia amiu. Imimi mekilia mesape visena nene naga kila kare manene kiamiu sitomena la paṁisi, a kila amiu amloge piowa paṁisi, ana visena nene naṁa la apisa, imimi memninue ga, imimi pe mepisa re pan la mepisape la monar atoṁasu avian amiu ve sanene poli. ²⁵⁻²⁶ Ana kieta wolai wo lalua nene, Pol amio ṁanaṁas, naṁa lalua na pe asitom re kiela malena poli ana lalua asuṁa sinela urmin ga visawalen kia kiena ne Suṁe Yesu Kristo, amiu apitetalia lalua nene apami apisu imimi vanon suri nene. Ana imimi mepiora vanonia, imimi mepisuveve-e pano-o, ana imimi mepranar mesape ṁisi na imimi meligan wolai ve lua e yo nini awar ṁaki nene, la amio Pol a ṁanaṁas la atoṁasu pun amiu. ²⁷ Lalua nene, Suta amio Saelas, ṁisi na lalua asunyu ruru manene laa van amiu, maran ve taaga ve sa ṁa nena naṁa imimi mesiriyu pan amiu e ṁaki nini. ²⁸ Ana e kiamimi navisuena, a e navisuena kiena ne Ninuna Wa ṁena ga, imimi mepisu sane piowa naṁa imimi moṁareran amiu vena amiu monar alogear kiamimi Navisaluaena imimi le Yu lala. Ana imimi mepisu sane suri laṁasia, naṁa imimi le Yu lala imimi yepemimi mavin paṁisi, a popon manene naṁa amiu ṁena ga ve asuṁa akila re, vena kila sane amiu akilia asu ruru amio arueta taṁena la naṁa ape Yu. ²⁹ Suri la nene, tai pisa sanini, pisape ṁisi na amiu monar alon tata naṁa yaru taṁena lala la akila kuṁpaṁaena ea pan kiela nono la rui. A nalua nena, ṁisi na amiu ve akan re kuruta, pona tata na suri mali naṁa kana kuruta pe mlau re petan poli wa. A natelu nena, ṁisi na amiu ve akila re ṁelaga viowa lala, sane kolau a lau.

“Visae amiu aligan ruru make suri la nene, imimi mepisu sane ṁisi na wo vaṁisi van amiu punu ga. Pogaga, kiamimi visena e lepas nene ṁisi ga e nene.”

³⁰ Ana la amligan Pol a ṁanaṁas amio lalua taṁena nene, la apito garo Antiok. Pogos naṁa la nene aporu e yo nene, la apio ṁegas nen li nalelagaena lala la apimi lele taaga, ana amla ṁaki nene pan la. ³¹ Ana la nae Antiok apulo ṁaki naṁani, ana la akekara paṁisi e visena wo la naṁa la nae Yerusalem asiri pimi pan la. ³² A lalua nae Yerusalem nene, Suta amio Saelas, lalua nene ape navisawalena, ana lalua asuṁa amlologon ke pa la nae Antiok, apisape la monar awasine manene ga Yesu silaga, ana lalua akila sinela la suṁalu ṁarera, e kiela visena wo moki naṁa lalua apisa.

³³⁻³⁴ La asuṁa apisi ke pan la sanene e legiena moki, ana siraunia, la nae Antiok la amligan lalua e kiela mrapa, la amlenwo lalua, asape “Suṁarena kiena ne Ntewa sike amio amluoka.” Ana lalua aṁasuṁe sina apa ma Yerusalem. ³⁵ Ana Pol amio ṁanaṁas,

lalua asike garo Antiok tol si kuþar laþasia, lalua asuñña amiila yaru taþena la naþa la asuñña amlologo a asuñña apian ke yaru lala e Visena Wa kiena ne Ntewa.

Pol amio Þanaþas, lalua apeveyu

³⁶ Ana siraunia, Pol pisa pa Þanaþas, pisape “Ei, sanape, þisi na italua teva teyaliali ke sina ga arueta amio vineta lala e yo la nene naþa italua teva temlologon Visena Wa kiena ne Ntewa e nanua sumo rui? Þisi na italua teva tevisu la li sane aña la asike sanape.”

³⁷ Ana Þanaþas pisape “!Po paþisi ne, nekekarana paþisi wa! Ana sineun manene nesape þisi na italua toure Son Mak nene imi temio.”

³⁸ Ana Pol naga suñña sitoñnal ke ga wa naþa la amialiali la þesan sanene sumo, Son Mak nene naga purmatan la yam tai rui, nene garu Pampilia, naþa pogos naþa yuññaena pe þisi ruru re poli wa ana naga þasuþe ke sina ga pano. Sanene, Pol pisu sane, peraga, pe pon re Son Mak imi amio la ke sina ga e kiela yalena taþena nene poli. ³⁹ Suri nene kila Pol amio Þanaþas lalua apeveyun la ruru nenaga, ana lalua amliþere la narui. Þanaþas pa þere ga Son Mak, ana la ga lua apa akome waa, lalua apa amiyuññaena garu Saepras, ⁴⁰ ana Pol naga pa kilalua Saelas. Ana li nalelagaena lala amlenwo lalua nene apisape þisi na lemamienna a navisuarena wo kiena ne Ntewa sike amio la. ⁴¹ Ana lalua amialoro apa atelivi e lepas lua nene Seria amio Silisia, amiyuññaena ke sanene vena akila þegas nen li nalelagaena lala la aimi añarera manene la sane.

Nanene sane pupia yalorena kiena ne Pol yam lua ne.

16

Timote mñena ga pa amio Pol lalua Saelas

¹ Ana e kiena pupia yalena na lua nene, Pol pimi tol sina kumali lua nene Tepe, amio Listra. Ana e yo Listra nene, ana nalogenana tai sike ea, nanene yaru mñee naþa Timote. Timote nene, anena pe sira re Yu tai, naþa naga mlalaga e Yesu rui, ana arimana naga pe pe yere Yu re poli, naga pe yere Kris tai. ² Ana arueta lala nae yo kiena ne Timote, amio lala nae pulkumali taþena naþa mñeke lavis ga ne Ikoniam, la apisu naþa Timote naga kila yuññaena kiena ne Suþe po paþisi pan la. ³ Ana Pol naga sitom pisape were Timote va amio naga e kiena yalena nene, ana suri taaga ga naga piowa, naga ga naþa Timote naga pe pe þaviu re poli, nanene komin arimana naga pe pe yere Yu re poli. Ana Pol naga kilia naþa visae Timote taveve naga sanene, ana visae e yo ya naþa la ava ea, ana yoko le Yu lala, avisaluþar naga vena ve va re loyuñña e kiela yuñña na lenienna lala, a yokorena la ve akekarana re aloge kiena visena lala. Ana komin suri ne na nene, ana Pol kila Timote pano ana la akila þaviu e naga, ana siraunia, la telu nene Pol, Saelas, a Timote, apano. ⁴ Ana pogos naþa la asuñña atelivi ke e kumali lala, la asuñña apisalelein ke visena la pan nalelagaena lala, apisawal pan la e navisaluaena la naþa nalologena a nasumonena nae Yerusalem la apisa e kiela viorena sumo rui, ana Pol lala apisa pan la naþa monar ataveve visena la nene narui. ⁵ Ana pogos naþa Pol lala asuñña amiyalyal li laa a la apian ke þegas nen nalelagaena la sanene, kila sa naþa þegas la nene asuññalu asu mñarera ruru laa, a la apisu sane silaga naþa nalelagaena lala apimi ape moki manene laa narui.

La asike garu Troas, ana Ntewa pis pa Pol e nañenienna tai

⁶ Ana Pol la asitom naþa asape ava awar ro e kumali la ve moki e lepas nae Esia, ana Ninuna Wa pisaluþar la vena la ve ava re avisawal Nalologena Wo e yo nene, kila sanene apa atol ga e lepas na yo Prisia amio Kalesia. ⁷ Asuñña apa ke sanene, ana pogos naþa la apimi lavisi e lepas naþa Misia, la akilali naþa ato garo e lepas keviu naþa Pitinia, ana pogos si tai, ana Ninuna ne Yesu pe tañan re pan la naþa la ava sanene poli. ⁸ Ana lala apa aþaro ga e yo Misia nene, apa mña pano-o la atol kana kumali ne tai garo losi, kiena kia Troas. ⁹ Ana e yo nene, ana kolemalu, Pol naga momalio pisu sane yaru tai nae lepas keviu nae Masitonia e sive lepas þas, naþa yaru nene naga pimi puna, naga tagi pania,

piun tania, pisape “Awis M̄ara, imimi sinemimin mesape ko oimi owar ro pun imimi, vena oiila imimi.”¹⁰ Ana e poglis nene, inu Luk nesike m̄ena ga nemio la, ana pogos naña Pol naga pisawal naña naga p̄isu yaru nene p̄isi pania, veraga ga imimi mepanon makale mrapa vena mekilia meva mokusro yo meva M̄asitonia, komin imimi mekilia naña Ntewa naga pio imimi rui vena meva melologon Nalologena Wo nene van la.

Asike garu Piliḗae, ana sira naña Litia naga mlelaga

¹¹ Sanene, imimi mokus waa, memligan yo Troas, meḗpure mepano-o metol purvanua nae Sametres. Ana imimi momomalio e yo nene, ana kolulagi, ana mepano-o metol lepas nae yo M̄asitonia, ana mepa ura e kana kumali nene Niapoles.¹² Ana e lepas na M̄asitonia nene, pupia pulkumali taḗena tai mon m̄a ga, naña naga m̄eke vatanon navisuarena kiena ne ḗarin suḗe nae Rom. Kumali nene kiena kia Piliḗae, ana imimi memial mepano-o meporu ea. Imimi mesike e yo nene legiena lua pona telu, pano-o tol Legiena Wa.¹³ Ana imimi memloge rui naña apisa apisape e Legiena Wa, le Yu lala nae yo nene la asuḗa akila ke lotena e yo na leniena tai garo e wii tai, e pulkumali lepas na vano. Ana imimi m̄ena memolue vena metoven mevisu la e yo nene, ana imimi mepa metotano mesun memio sira laḗasia naña la asumo apitom asike e yo nene rui.

¹⁴ Sira la nene tai, naga pe pe Yu re poli, ana naga suḗa mlelaga e Ntewa. Naga pe nae kumali nae Tuatira, ana ḗuarar ke kiena pupia yuñaena keviu tai, naga suḗa ḗiliwilin kar ke kulmrae tai naña maran lavis malolo, naña po na po naña la amiyuḗaen e kiena yo. Sira nene, kiena kia Litia. Ana e pogos nene, Suḗe pietava e kiena sitomena narui, ana naga mlarar ruru visena la naña Pol naga suḗa p̄isa pan la, a naga tarar m̄arera po e losinena.¹⁵ Ana e pogos nene, Litia nene amio la naña e m̄ana uḗa, la punu ga apa e nakeena. ḗisi, naga m̄areran imimi, p̄isa pisape “Visae amiu apisu sane nesuḗalu kemua m̄arera lelaga e Suḗe, sineun nesape amiu aimi asu re garu m̄au wa.” Sanene narui, ana naga pure imimi mepa mesike e m̄ana uḗa.

Akuan Pol amio Saelas apa e yuḗa nakoena

¹⁶ Ana e legiena si tai, ana memio Pol mepitom sina e kiela yo na leniena, ana imimi mepitawe narin sira m̄ee tai e mrapa. Narin sira m̄ee nene, yeririna laḗasia apulua naga vena yuḗae kiela, ana ninuna viowa tai sike e naga, naña apio asape ninuna ne loḗara, naña pe ninuna navisuen suri la naña aimi aḗalivi sirau. Ana yeririna la moki apimi apiun ke sira m̄ee nene tan yerkawa lala, vena naga visawal van la sanape e kiela malena lala. Ana pogos naña sira m̄ee nene pisawalia, ana la asu m̄a aḗar ke naiilaena pan kiena yerkawa lala, kila sanene ana pogos punu ga la asuḗa ataulu kilavaru moki na moki vanonia.¹⁷ Ana imimi memial mepa laa sanene, ana narin sira m̄ee nene taveve imimi naga sirau, naga suḗa piovion manene pan yeririna kar ga la punu ga, naga suḗa pisawal ke, pisape “!Ei, apisu ke ne! Yaru la nene la ape nayuḗaenen yuḗaena kiena ne Ntewa mali na metava manenea. La ke narui naña akilia avisawal mrapa na tamaliaena van amiu.”

¹⁸ Ana sirau, naga suḗa kila ke sanene pan imimi e legiena moki, kila Pol mloge piowa pano pano-o, tol pogos tai, ana naga sinena kar ninuna viowa nena, ana naga kira pa varau, pis pania, pisape “!E, toroki! Nepisa mesmesun pan ko, nesape e kia kiena ne Yesu Kristo, ko omolue tan narin sira m̄ee nene nanagane.” Ana veraga ga, naga mligan narin sira m̄ee nene naga pano.

¹⁹ Ana pogos naña yerkawa lala kiena ne narin sira m̄ee nene apisu naña mrapa nene natauluen kiela kilavaru ea pimi piowa rui, la sinela kar Pol amio Saelas paḗisi. Ana la aḗure lalua nene apano asuḗalu ase marana ne naliḗereena lala nae Rom garu kumali.²⁰ Ana la apisawal pan la, apisape “Le Yu la nene, la apimi e kieta yo, la akila kare ita manene laa na wa.²¹ La asuḗa sinelan asape aḗareran ita vena tetaveve kiela ḗelaga laḗasia, ana e navisaluaena nae Rom naña ita tesike vatanonia e yo nini, pe mesmesu re nena ga naña ita tekila sa naña la asuḗa apisa ke ne poli.”²² Ana yeririna la akila pupia m̄aagena, ana la akila kare Pol amio Saelas paḗisi, asitom asape asu lalua, ana naliḗereena

la nene apisa apisape la avitolwowa kulsota ñana lalua nene, ana awe la e laki. ²³ Ana la aña kare lalua nene pano pano-o ñisa, ana aþure lalua apano akuan la apa loyuña e yuña nakoena, ana apisaar ñarera pan yaru na visuaren yuña nakoena, apisape naga monar visuar ruru la, lalua ve aure re sina, visae peraga, ana yoko viowa vania. ²⁴ Ana pogos naña yaru nene naga mloge visena nene, naga pure lalua nene apa manene loyuña, e yo ñarera tai naña la apuarar ke yaru la naña ape þarñarera pañisi apa ea, a naga piar lala lala panon pupia laki naña ñeke e yo nene.

Yemninu kululun yuña nakoena nene

²⁵ Ana asuña pano-o tol kolemalu yepelilika, Pol amio Saelas lalua asuña amlen ke pa Ntewa e yauena wa lala, a yeririna taþena la naña asike amio la e yuña nakoena la asuña amiyagogon lalua. ²⁶ Ana la amilan manene pañisi, naña veraga ga, pupia yemninu tai pimi, kila yuña nakoena nene miyuyuwawa make ga, naga kululun make kana nin kinakinas la punu ga. Ana la apisu mratava punu ga apietava, a sen punu ga naña apiarar limala lala a lala lala akekapil ga sa ga ne. ²⁷ Ana yaru na visuaren yuña nakoena nene naga tavilo, ana kiriri pimi pisu mratava la punu ga pietava ga sike na, ana naga ñape la naña asike loyuña, la make ga apuretetai apava make rui. Ana suri nene kila naga marau pañisi, ana naga mlalua kiena playu na mara, ana sinenan pisape yalñar ke sina ga naga mare. ²⁸ Ana Pol naga pisu ke ne, ana pio manenea, pisape “!Ei, ko osuwa, ko ve okila kare ko re! Imimi punu ga mesike ga wa!” ²⁹ Ana yaru nene naga pio sape awar kapi vivaga imi, ñisi na naga kiriri pa loyuña e yo naña Pol amio Saelas asike ea, ana naga mloru pito tano e lan lalua nene, naña naga sinen kurkur na kurkur. ³⁰ Ana sirau, naga þere lalua na apa ke sina ga vanua, ana naga piun tan lalua nene, naga pisape “Ei, yerkawa luwoka, ana monar nekila ya naña ñisi na nekus natamaliaena?”

³¹ Ana lalua nene apisa pania, apisape “Ko monar olelaga e Suþe Yesu, ana otol natamaliaena, ko omio la naña e moña mratava.” ³² Ana la apisawal visena kiena ne Suþe pania, a apisawal ñena ga pan la naña asike ñana uña, ³³ ana e ke e kolemalu ga nene, yaru nene naga kila ruru yepe sirorop la naña sike e yepena ne Pol amio Saelas, ana e ke ñena e pogos nene, lala akee naga amio la naña asike e ñana mratava. ³⁴ Ana naga þere lalua nene apa loyuña e ñana yuña, ana naga mla kinanena pan la, ana naga amio lala na ñana uña la asuña akekara na akekara, komin nanagane la añal Ntewa e kiela malena la narui.

³⁵ Ana pa tol kolulagi, ana naliþereena lala aminue ke suri nene wa, ana la ato si tano, ñisi la apitetalia kiela yeririna lala apimi apisawal, apisape “Yeririna lua nene akilia amolue ga sane.”

³⁶ Ana yaru na visuaren yuña nakoena nene naga pimi pisawal pa Pol, pisape “Naliþereena lala amligan visena pimi apisape amlua akilia amolue ga sa ga ne, sanene ana amiu aimi, ava ga sane. Ana ita ve tekila re si visena van ita vanon suri nene.”

³⁷ Ana Pol pisa pa la nañani pisape “Ei, taþatete ga, pe sa re nene poli. Imimi ñena mesike vatanon þarin suþe nae Rom nene, a e kiena navisaluaena, naliþereena la nene akila pe mesmesu re pan imimi nene poli. Pe aña re naña imimi meki la suri tai piowa poli, ana siraunia la aña imimi e marana ne yeririna lala, a akoan imimi mepa loyuña e yuña nakoena, ana nanagane la sinelan asape añaene plan vinaun imimi ga sanene. !Taþatete ga, awasuþe amiu ava avisa van la avisavenua la ke narui la monar aimi aure plan imimi e yo nini, a monar aimi avisa visena tai van imimi sumo wa!”

³⁸ Ana yeririna kiena ne naliþereena lala amla visena nene kiena ne Pol aþasuþela si apano, ana pogos naña amlogeyu naña Pol amio Saelas, lalua ñena asike vatanon navisaluaena nae Rom, la amarau narui. ³⁹ Ana la apimi apisa visena laþas pan lalua, ana aþure la apa mrapa, apisape la sinelan asape lalua monar amolue e yo nene. ⁴⁰ Ana Pol amio Saelas, lalua aþasuþe la sina, lalua apa añaliviþesan e yuña ñana Litia sumo, a siraunia, ana la apisu sina arueta lala, a la amla visena wo lala vena iilaar laena, a siraunia, ana lala amolue petan pulkumali nene.

17

Pol amio Saelas, lalua asike garu Tesalonaika

¹ Ana p̄isi na Pol amio Saelas, amiyaloro apano, ana akome pulkumali lua nene Ampipolis amio Apolonia, ana lalua apimi atol pulkumali nene, Tesalonaika. Pulkumali nene yuña na leniena kiena ne le Yu la tai m̄eke ea, ² ana sa naña Pol mon m̄a kila e yo punu ga naña naga pa ea, naga pa sikol la nae e yo nene, ana suña pa ke loyuña amio la e kiela yuña na leniena, e pogos na leniena punu ga. Ana e Legiena Wa telu, naga kila sanene, a naga pisi yam moki amio la e ya naña Visena Wa naga suña piania. ³ Ana Pol suña pian la ea, a naga suña pisawal meraravan po pan la pisape taveve ya naña Visena Wa pisa, ana mesmesu ga naña kiela Navisaarena, yeririna la akila viowa ga vania, va m̄a va m̄aga naga mare, ana siraunia naga monar mal sina e marena. Ana Pol pisawal pan la, pisape “Yesu nene, naña nesuña nepisayu ke ne, naga ke naña pe kieta Navisaarena narui.”

⁴ Ana lañas naña la asuña amiyagogonia, apisu asape visena nene pe lelaga, la amlelaga e Yesu, ana apimi e lepas kiena ne Pol lalua Saelas. Ana e yo nene, yeririna lañasia naña pe ape Yu re poli, la amlelaga e Ntewa rui, ana lala moki m̄ena ga naña amlelaga e Yesu narui, amio m̄ena ga li nasumonena kiena sira la moki.

⁵ Ana yerkawa kiena ne le Yu la pe akekara re poli, la apielue, ana la apisayu asape akilali suri tai. Ana la apa apisu p̄egas kiena ne p̄arkawa lala nae yo nene, ana aņere lañasia naña apiowa laa ga wa, ana apa aņere sina yeririna la moki ana akila pupia p̄ina ga nene, ana la apa akila kare ke pupia veveyuena e pulkumali nene na. Ana la aņape Pol amio Saelas lalua asuña ke e yuña m̄ana yaru tai, kiena kia Seson, ana la apanon lalua e yuña nene, vena awere la ava kumali. Ana la apimi atol yuña nene, ana la akila kare ruru nena ga, akilaroro kana mratava nena, ⁶ ana pe aņal re lalua asu loyuña e poli. Ana apuarar ga Seson nene, amio arueta taņena lañasia, ana aņere la apano asuñalu ase marana ne li nasumonena lala na pulkumali nene. La apisi keviu, asape “Yeririna la nene naña asuña apilontapon ke kieta yomarava, la apa e yo taņena la moki rui, ana nanagane la apimlein asike pun ita narui. ⁷ Ana yaru nene, Seson, naga p̄ere la apa m̄ana, ana la nene apiowa ga, asuña akilaroro ke navisaluaena kiena ne p̄arin suņe nae Rom nene, Sisa. Sisa nene pisa rui pisape monar telotun ga naga, ana la naņani asuña apisa ke asape p̄arin suņe taaga ga na yomarava nini, naga yaru tai, kiena kia Yesu.” ⁸ Ana yeririna punu ga amio li nasumonena lala na pulkumali nene, pogos naña amloge visena nene, ana la sinela mimi, ana la asuña akiikii a asuña apisi piowa keviu manene la. ⁹ Ana li nasumonena la nene asape Seson lala la monar aligan pupia kilavaru tai sike pula, naña kila sane p̄isi na Seson la ve aure re si Pol imi sike amio la pog tai, visae peraga, ana la taņatete si akilia awarmaran kilavaru nene. Ana siraun naña amligan kilavaru nene sike na, ana la ataņan la apetan yo nene apano.

Pol amio Saelas, lalua asike garu Perea

¹⁰ Ana kolemalu ga, ana arueta la nae e yo nene apa amligan vinaun ga Pol lalua Saelas e kiela mrapa, ana lalua apa sina metava e pulkumali tai, naña Perea. Ana yam si tai, lalua asuña apa ke loyuña e yuña na leniena lala kiena le Yu lala e yo nene. ¹¹ Ana le Yu make ga la nae e yo nene la apo, a nalogearena sike e la, lala pe sa re le Tesalonaika la poli, lala kiela sitomena la po naña la akilia amiyagogo ruru po e navianena kiena Pol amio Saelas. Ana legiena punu ga, sinelan manene asape avisuveve loyuña e Visena Wa kiena ne Ntewa, vena akirawal asape lalua apisa pe lelaga pona pa sanape. ¹² La akila m̄a sanene pano pano-o, pe yam piavi re poli, ana la asiar naña amlelaga narui, a nasumonena lala kiena ne sira yere Kris m̄ena ga lala amio yere Kris la moki, la m̄ena ga amlelaga.

¹³ Ana siraunia, visena p̄asuņe sina pa tol le Yu la garu Tesalonaika nanua ne, ana sape nanagane ana Pol m̄eke mlologon ke m̄ena ga visena kiena ne Ntewa garu Perea, ana la sinela mimi sina. Ana apam ma metava Perea, ana akila kare ke sina ga sinena ne le Perea taņena lala vena kila la aveveyu van lalua, aņenelua lalua avano. ¹⁴ Ana arueta la

apisu suri nene, ana apisu asape popon aiila Pol naga vito sina ga garo losi vilaga wa, ana apisu asape Saelas amio Timote, lalua akilia asuña ga wa, lalua na poga ga. ¹⁵ Ana aþere Pol e kiena mrapa, apito garo losi, ana la akus waa tai ana apa atol pupia pulkumali naþa Atens. Ana pogos naþa amligan Pol e yo nene ana la asape awasuþe la sina, ana Pol pisa pan la pisape þisi na Saelas lalua Timote, la mēna ga luwoka monar ato garo puna vilaga ve viavi re, vena ayuñae sina ga lele taaga amio naga.

Pol sike garu Atens

¹⁶ Ana Pol sike garu Atens, suñate ke Saelas lalua Timote vena lalua aimi, ana pogos naþa naga pisuveve yo la uña e pulkumali nene, ana pisu ga naþa yo pulen ga nono lala, ana suri nene miyur sinena paþisi. ¹⁷ Ana naga suña pa ke loyuña na leniena kiena ne le Yu lala, ana suña kila visena la moki komin suri nene amio la a amio mēna ga li taþena la naþa amlelaga e Ntewa. Ana legiena punu ga, ana naga suña pa mēna ga e yo metava na pulkumali, vena sun amio yaru ai naþa visae naga lual e yo nene. ¹⁸ Ana garu Atens, ana pupia yuña lua naþa na navianen namanmaruaena, naþa yaru navianena la na yuña lua nene, a pio la asape le Epikuru, amio le Stoiki lala, ana la asuña apiora ke mēna ga amio Pol.

Ana laþas nene, asuña apismumun Pol, asape “!Yaru naþa pivis kaþar ne, ana naga pe kilia ruru re suri wo tai naþa kilia visa van ita poli.” Ana lala mēna ga laþas, amloge naþa Pol suña pisayu ke Yesu amio nasuñalena, ana la asitom ke asape nanene na yeririna lua nene, ana la apisa, apisape “Peraga, imimi mepisu mesape yaru nene naga suña pisayu ke ntewa taþena lala a ninuna taþena lala na purvanua nae ga gare tai.”

¹⁹ Ana siraunia, le Atens la apio Pol asape naga va totano amio la e kiela pupia kumali, metava e pupia kunus nae yo nene, naþa kiena kia, Areoþakas. Ana apiun tan Pol, asape “Imimi sinemimin mesape ko otaþali ovisayu navianena viu nene naþa osuña opisawal ke pan yeririna lala, ovisa van imimi wa. ²⁰ Imimi mesuña memloge ke navianena nene pe taþena ruru nena ga, ana sinemimin mesape mekiliala suri la naþa osuña opisa ke ne, ana kala kinas sanape.” ²¹ Ana pogos naþa akila sanene, ana asuña ataveve ke kiela þelaga mārera tai, komin naþa le Atens lala amio yeririna taþena la naþa asike e yo nene, ana la sinelan manene ga naþa silaga, ana asuña aloge pona asun e navianena viu pona visena viu, pona sitomena taþena lala pona lelagaena kiena ne yeririna lala.

²² Ana Pol suñalu se marala e kumali naþa ma metava garu Areoþakas nene, ana naga pisi pan la. Naga pisa pan la, pisape “Yerkawa lala nae Atens, nepisu sane amiu sinemiun manene laa nalotena lala, taulu naþa yaru taþena la sinelania. ²³ Pogos naþa nesuña nemialoro ke e kumali nene, ana nepisu punu ga yo wa lala a wonta lala, a kiamiu nono la moki manene laa, ana pogos tai ana nepisu wonta tai naþa ate siriena tai sike ea, naþa pisape ‘Wonta kiena ne ntewa naþa temninue naga.’ Ee, amiu amlenin ke ntewa nene, ana amiu apisa lelaga ga, pe akilia re nena naga poli, naga a ne. Ana Ntewa naþa pe lelaga ga taaga sike na, ana naga ke narui naþa sineun nesape nevisawal van amiu vena akilia naga. ²⁴ Naga nene naga pe Ntewa keviu naþa sii yomarava nini, a suri punu ga la naþa tepisu sike ea. Naga na, naga pe Þarin Suþe nae ma e peni, a pe Þarin Suþe na yomarava nini. Naga na, naga pe su re nena e yo wa la poli, a pe su re e suri wa la naþa yeririna ga la akila poli, ²⁵ a naga pe þasine re yeririna poli, vena tevaganian pona tevisuaria. Peraga, komin naþa naga ke narui, naþa naga mla malena, a mla yalua, a mla suri make ga pan yeririna punu ga. ²⁶ Ntewa ke na nene narui, naga kila yolai la punu ga añalivi e yeririna na sumo naþa naga siia, ana nanua nanua sumo laa rui, ana naga pisaar pogos punu ga a yo punu ga e maran yomarava nini, naþa þisi na yolai la nene akilia amal ea. ²⁷ Naga kila sanene naþa kila sape ita punu ga, monar tesitoñal tesape ita monar telual Ntewa nene, ana kila ita tesuña tekian kare ga limata pa e yemalolo, vena topoporog welen kiena kapi vivaga. Ana popon naþa tesitoñal mēna ga, tevisave Ntewa nene, naga pe su manene re koperin poli, naga moña ga lavisi pun ita ita make ga peve taaga. ²⁸ Yeririna na siriena

kiamiu yauena lala la apisayu suri nene rui, naña lala tai naga pisa sanini, pisape 'Ita temal e naga, ita temial e naga, ita na e ga e naga silaga,' ana ta mēna ga tai pisa sanini, pisape 'Ita punu ga ita tepe kiena li viu lala.'

²⁹ "Ana komin naña ita punu nena ga tepe narina ne Ntewa nena sanene, ana pe mesmesu re naña tesuña tesitom tesape naga sa ga nono tai naña liman yeririna miyuñaen e kol, pona e selpa, pona e kilavaru, naña amiyuñaenia taveve ya naña sike ga e kiela nasinenanena. ³⁰ Nanua sumo laa rui, e yemalolo, ana yeririna la pe akilia re suri poli, ana Ntewa sinen po pan la, naga pe pulo re kiela naviowaena la e pogos nene poli. Ana nagane narui, ana Ntewa pisawal mesmesun ga pan yeririna punu ga e yo punu ga, pisape monar avilopu la, ³¹ komin naña naga pisaar legiena rui, naña p̄isi na naga liḗpere yomarava nini, ve sa naña torokin naga kila, a naga pisaar mēna kiena yaru tai rui naña p̄isi na naga kila kiena yuñaena nene. Naga kila suri nene merarava ruru pan yeririna make ga p̄isi rui, naña kiena yaru wa nena, aḗmēnar pa naga rui, ana siraunia Ntewa pisirlua ke sina ga naga mal sina."

³² Ana pimi tol pogos nene, la asuña amiyagogon ruru Pol, ana pogos naña amloge naga pisayu pisape yaru tai mare, ana Ntewa kila naga mali sina, ana la laḗas apitalia kare naga vanonia, ana laḗasia apisa pania, apisape "Poga ga, toña sanene wa. Pona visae p̄isi na imimi mela pulmas tai van ko vena ko osunyu sina van imimi pogos tai yo." ³³ Ana Pol pisu sane la nene yepel mavin yagogonen naga, ana naga petan la, p̄asuḗe sina pito garo tano, ³⁴ ana yeririna laḗas nae lele nene la amlelaga, ana asuña apimi akuspran la apa lele taaga amio Pol, naña lala yaru tai, naga pe yerkawa tai na kumali nae ruru nena Areoḗakas nene, kiena kia Tionisia, ana ta mēna ga, naga pe sira tai, a naga kiena kia Tamaris, a la taḗena mēna ga la laḗasia.

18

Pol sike garu Koren

¹ Ana siraun e suri la nene naña Pol kila garu Atens, naga purmatania, naga pa e pupia pulkumali taḗena naña Koren. ² Ana e yo nene, naga m̄al yere Yu tai, naña naga pe yaru tai nae lepas nae Pontas, a naga pa sike ga e purvanua naña Italia, e kana pulkumali keviu naña Rom, ana nanagane, naga amio wona, lalua apimi ga asike Koren na wa, komin P̄arin Suḗe Koltias nae Rom naga koven plan le Yu lala e kiena yo. Yaru nene, kiena kia, Akwila, a wona, kiena kia Prisila.

Sanene, Pol pa pisu lalua nene, ³ a lalua apisape popon Pol suña amio la, la ayuñaen re laa kilavaru sane wa, komin naña lalua amio Pol, la telu, kiela yuñaena taaga, naña kiela yuñaena nasuluen kanus na yuña. ⁴ Ana la amiyuñaē m̄a sanene pano-o, ana e Legiena Wa lala, Pol naga suña pa ke e yuña na leniena kiena ne le Yu la, a suña kila ke visena la moki paḗisi amio le Yu lala, a amio mēna ga le Kris lala naña asike ea, ana naga kila m̄a sanene pano-o taulu la moki.

⁵ Ana siraunia, Saelas amio Timote la apimi mare ga rau atol ga yo e nene na wa, ana e pogos nene, Pol naga taḗan make kiena pog punu ga e yuñaena kiena ne Suḗe, naña suña mlologo, suña pisawal ke pa le Yu lala pisape kiela Navisaarena lelaga naña la asuḗmate ke asape imi, naga nane Yesu nene naña pimi rui. ⁶ Ana visena nene kila le Yu laḗasia sinela kar Pol, ana la apisataḗe kare naga paḗisi, ana la akila m̄a pano-o kila narui pogos tai Pol kila kile tai pan la, naña naga kululun plan yavi nae yo nene petan m̄ana kulsaket, naga pisa pan la, pisape "Visena lelaga kiena ne Ntewa nepisawal ruru pan amiu le Yu la rui. Ana visae yepemiu mavin logearena, sinemiun asape ava akokovio ga, nevisa van amiu sanini nesape kamiu kuruta naga sike ga e limamiu, pe su re si e luḗau po laa rui. Siar nanagane, neligan amiu, p̄isi na neva nevisawal ga Lologena Wo nene va la naña pe ape Yu re poli." ⁷ Ana Pol molue petan la e kiela yuña na lotuena, ana naga pa sike ga e yuña tai naña m̄eke ga e lepas nen yuña na lotuena nene. Yuña nene, m̄ana ne yaru tai naña naga pe pe Yu re poli, ana nanagane naga mlelaga e Ntewa rui, kiena kia Titias Sastas. ⁸ Ana nasumonena na yuña na lotuena nene e pogos nene, naña

kiena kia Krispas, naga tai naña mlelaga e Suþe Yesu, naga amio la ne e ñana mratava, a le Koren ñena ga la moki naña pogos naña la amloge visena lala kiena ne Pol, ana la amlelaga, a siraunia akee la.

⁹ Ana sirau, e yemalo tai, Pol momalio pisu Suþe pisi pania, pisape “Pol, ko na ve omaraun re yaru, ana ova ga, osuña ovisawal kiau visena. Ve okila re naña yaru taþena la akila ko omalumu, ¹⁰ komin naña in na nesike nemio ko. Þisi na taþatete yaru nae e pulkumali nene tai naña kilia su ko pona ñene ko, komin naña in na kiau yeririna la mokliu asike e yo nene rui.” ¹¹ Ana Pol sike e yo nene yam piavi ñaga, pa tol kas taaga kupario orai, a silaga naga suña pian ke visena kiena ne Ntewa pa yeririna lala.

Le Yu la aþure Pol pa kumali

¹² Ana e pogos nene, þarin suþe nae Rom naga mligan yaru tai vena naga ve suþen lepas nen yo kiena ne le Kris la nene, a yaru nene kiena kia ne nanene Kalio. Ana e pogos nene le Yu la apisayuia ana la apiranari apisape la monar akila suri tai vena akila wo Pol naga ve lologo re sina, ana la apa atarar Pol, aþure pa e kumali kiena ne Kalio nene. Ana le Yu lala apisawal pa Kalio amio kiena naliþereena lalua, la apisape ¹³ “Yaru nene, naga suña kilali ke pisape were yaru lala vena ava alotun Ntewa e mrapa tai naña pe mesmesu re nenaga e lepas na kiamimi navisaluaena.”

¹⁴ Ana Pol suña sinenan ke pisape la navisatañeen visena kiena ne la nene narui, ana naga pe pisi re poli wa, ana Kalio nene suwo marana, pislí ña pa le Yu lala. Naga pisa pan la, pisape “Le Yu lala, visae avisa van inu avisave yaru nene naga kila þelaga la naña piowa manene paþisi, pona naga ñe yaru tai, pona naga pinau, pona suri tai sanene, pogaga, pona nekilia neyagogon amiu yo. ¹⁵ Ana ya naña amiu apisa, nemloge sane pe pe suri re tai poli, pe suri korena ga nene na e kiamiu lepas navisaluaena amiu le Yu ga lala. Ve sanene, þisi na amiu ga avisuveve e naga, in na pe nekekarar re naña neyagogo e suri la nene poli pona nekila naliþereena tai vanonia.”

¹⁶ Ana e visena la nene naga ñene plan la ke sina ga petan kiena kumali. ¹⁷ Ana suri nene kila narui la sinela mimi manene la sane, ana pogos naña la apa vanua, atarar kiela nasumonena viu naña na kiela yuña na lotuena, naña kiena kia Sostinis, ana la asu kare naga paþisi mon ga e mratava na kumali nene. Ana Kalio suña pisu ke ne, ana naga pe sitom þele re poli, naga pe kila re nena suri tai pan la poli.

Pol sike Episas, siraunia pa si ma Antiok

¹⁸ Ana siraun e naga nene, Pol naga sike amio arueta lala nae Koren yam piavi towe laa sane, ana siraunia, naga mligan la, sitom sape va si Seria, a e pogos nene, Prisila amio Akwila, lalua amio naga. Ana la apito garo losi, e pulkumali naña Kenkria, ana e yo nene, Pol pisape awe vilþarina. Naga nene komin naña naga kila navisaarena ñarera pa Ntewa rui nanua sumo, ana nanagane, suri punu ga e navisaarena nene la þisi rui, ana la añe ga viluna e pogos nene na wa. Ana la amiai e waa tai, naña suña pa ke garu Episas. ¹⁹ Ana pogos naña apimi atol Episas, la apa ura, ana Pol pisape þisi na Prisila amio Akwila la asuña ayuñae e yo nene sumo wa. Ana naga, naga mligan lalua, pa loyuña na lotuena kiena ne le Yu lala e yo nene, ana naga kila visena moki amio la. ²⁰ La akekarar naña asun amio Pol, ana la sinelan asape naga su re laa amio la wa vena la akilia avis amio naga, ²¹ ana Pol pisa pan la, pisape “Potena paþisi, ana in na monar nowasuþe si neva garu Seria sumo wa. Ana visae Ntewa naga kiena naliganarena visave neimi sina, þisi na ve ve piavi re, nowasuþe si pun amiu e yo nini Episas.” Ana naga taaga mligan si la nene, kus waa pano.

²² Ana pogos naña naga pimi tol ke sina ga Seria, naga pa ura e pulkumali naña Sisaria, ana naga pa si ma metava Yerusalem. Þisi na naga pa ñalivin þegas nen li nalelagaena lala, a siraunia, naga pitomi si garo Antiok. Nane, Pol kila make kiena pupia yalena yam lua nene narui.

Pol mial ke sina ga, yam telu narui

²³ Ana Pol pa suña garu Antiok pano-o ñisi, ana naga mligan si yo nene, naga ñasupe si pa e pulkumali kar ga la punu ga e lepas nae Kalesia nene amio Prisia. Naga pa komli e yo la nene yam tai rui, ana naga pa ke sina ga vena iila li nalologena lala vena aviawa ñarera la sane.

Apolos mlologo garu Episas amio Koren

²⁴ Ana pogos naña Pol pe pimi tol re si Episas poli wa, yere Yu tai pimi e yo nene, naga nae pupia pulkumali nene Aliksantrea. Yaru nene, kiena kia Apolos, naga pe yaru tai naña ñarina po pañisi, naña naga kilia make visena la naña sike e Siriena Wa lala, a naga pe yaru tai naña mlologo po naña po. ²⁵ La apian ruru naga e mrapa kiena ne Supe rui, ana naga tañan kiena malena wetelu vena naga lologo pona vian ruru yeririna la e suri la e Yesu. Suri la punu ga naña naga pisa pe mesmesu pañisi, ana suri ga tai, naga pe mlogeli re poli wa naña apisape yaru la monar ava e nakeena e kia kiena ne Yesu, naga kilia ga nakeena naña Yoane Nakeena naga kila nanua sumo. ²⁶ Ana pogos naña naga suña pa mlologo ke loyuma e yuma na lotuena kiena ne le Yu lala, ana naga pe maraun la re poli, naga pe sitom ñele re suri tai poli. Ana pogos tai, Prisila amio Akwila, lalua amloge naña naga mlologo ke sanene, ana lalua amloge kilale sane yaru nene pe kilia ruru re suri lañas poli wa e mrapa kiena ne Ntewa, ana lalua aþure naga pa akilapian ruru si e suri la moki.

²⁷ Ana siraunia, Apolos naga sinenan sape va e yo kiena ne le Kris lala, garu Akaea, ana arueta lala nae Episas la apisa apisape po pañisi naña visae naga va sanene, ana la asiri ñaki tai pa li nalologena lala e lepas nene naña Apolos naga kilia war vano, vena la akekarana naña aurear naga sike amio la. A pogos naña naga pa tol yo nene, naga miila ruru la naña lemamienna kiena ne Ntewa kila la amlalaga rui. ²⁸ Naga miila la naña sane e marana ne yeririna lala, naga kipian la pisape sanape naña le Yu lala la akila pal mrapa, komin naña naga kipian la e visena la moki naña sike e Siriena Wa naña la apisa meraravan rui apisape Yesu naga pe Navisaarena kemua lelaga. Ana pogos naña le Yu la amloge kiena vianena la nene, la pe apisa re si suri tai poli.

19

Pol sike sina ga garu Episas

¹ Ana pogos naña Apolos pa sike ma Koren wa, Pol suña mialoro ke e kiena mrapa naña kom ke e lepas naña pa ña metava e kunus lala, ana naga mlilu ña mrapa nene pano-o naga pimi tol Episas. Ana e yo nene, naga pa ñalivin narin ñegas nen li nalelagaena la naña asike ea, ² a pogos tai, naga piun tan la, pisape “?Pogos naña amlalaga e Yesu, amninu Ninuna Wa pimi e amiu e pogos nene, pona pe amninu re poli?”

Ana la apisatañe naga, apisape “?Ana Ninuna Wa ya nene? Imimi pe memlogeli re suri tai sanene poli wa.”

³ Ana Pol piun ke sina ga tan la, pisape “?Ana pogos naña akee amiu, amiu apisu sane naga nene na kana kinas sanape?”

Ana la apisatañea, pisape “La akee imimi, imimi mepisu sane sa ke ga e nakeena nene naña Yoane suña kila ke nanua sumo.”

⁴ Ana Pol naga pian ruru la, pisape “Ee, naga nene naga poga ga, ana nakeena naña Yoane naga kila nanua sumo, naga kila pa yaru lala sane kile ga tai naña sane yaru la nene la apilon la rui, ana naga nene na kana kinas na pe sa re naña amlalaga e Yesu po laa wa. Yoane naga ñena ga kilia ña suri nene, komin naña naga pimi sumo, a naga suña pisa ke pa yeririna lala, pisape la monar alelaga van naña ñisi na imi raunia, sane Yesu.” ⁵ A pogos naña le Episas la amloge naña Pol pisayu ruru suri nene pan la, la apisu sane popon la ava si e nakeena, ana la akeela e kia kiena ne Supe Yesu. ⁶ A e pogos nene, Pol pu ñarila, ana Ninuna Wa pitomi e la, kila la asuña apisi ke kome visena tañena lala,

a kila ñena la asuña apisawal ke ñena ga visena lañasia naña Ntewa mla pan la. ⁷ E kiela narin ñegas nene, pe la moki re poli, la atol ga lualima taaga pa lua.

⁸ Ana Pol na sike garu Episas tol sina ga kupario telu, a pogos punu ga naga pa kila ke lotuena loyuña e yuña kiena ne le Yu lala, a naga kila ke visena moki pan la. Pogos tai, naga pe sitom ñele re poli, naga pisi ñarera pan la, pogos tai naga peveyu pan la, a pogos tai naga tagin la vena aimi loyuña e nasuñenena kiena ne Ntewa. ⁹ Naga kila ña sanene pano-o, ana naga pisu naña peraga, la ape ñarñarera ga, la pe sinelan re nena naña alelaga poli. Ana la ñasia la asuña apisayu kare Mrapa Viu nene pa yaru tañena lala loyuña e yuña na lotuena nene, ana Pol suñalu ñere plan si li nalogena lala, la amolue petan le Yu tañena la nene, ana legiena punu ga la apa akila viorena a amlologo pa yaru lala e yuña na viorena kiena ne yaru nene Tiranas. ¹⁰ Naga nene, Pol suña kila ña ga sanene pa tol ke sina ga kas lua, ana kila sanene yeririna lala nae lepas keviu nene Esia, le Yu lala amio yaru tañena lala, la punu ga amloge visena kiena ne Suñe.

Yaru lañasia la amlenpal ga e kia kiena ne Yesu

¹¹ Ana pogos naña Pol suña miyuña ke sanene garu Episas, Ntewa miyuña e naga, kila kile kerkeviu la moki ve na iilaen yeririna lala. ¹² Visae narin kulmrae tai, pona kulsota tai, ana yaru la añar pimi Pol pilivili sumo wa, ñisi na añar pano akila tol ga yepena ne li namaiena lala, a kulmrae la nene añene plan kiela maiena lala, pona ninuna viowa la naña asike e la.

¹³ Ana e pogos nene, le Yu ñena ga lañasia amialiali ke yaru lala, la asuña añene plan ke ninuna viowa petan la. La nene pe amlelaga re e Suñe Yesu poli, ana pogos naña amloge sane Pol miyuña ke sanape, la ñena ga asitom asape ñisi na la akilali naña ayuña e nañareraena na kia nene. Ana pogos naña añene plan ninuna viowa, la apisi pania, apisape “Mepisa mesmesun pan ko e kia kiena ne Suñe Yesu naña Pol suña mlologon ke ne, pisape ko oure vetan yaru nene.”

¹⁴ Ana e pogos tai, ñee ñena ga lañas sinelan asape akilali ve sanene. La nene, la olua nene la na narina ne ñarin yar wa kiena ne le Yu naña kiena kia Skeva. ¹⁵ Ana la nañani apimi amlenwo yaru tai naña ninuna viowa sike e naga, ana la apisi pa ninuna viowa nene vena ligania, ana ninuna viowa nene sinena kar la, pisape “Ee, nekilia ña kia naña Yesu, a nemloge ke ñena ga kia naña apisape Pol, ana amiu na ai? !In na nemninue amiu nena ga, avisuar amiu!” ¹⁶ Ana veraga ga, yaru nene pula pimi pula, kila mara amio la su la pano pano-o, taulu la olua nene, kilapel la naña kilapel la pitolwowa make ñala kulsota lala. Ana apurmatan yo nene añar kuruta pañisi. ¹⁷ Ana yeririna la apisayu suri nene pano tol le Yu lala amio ñena ga yaru tañena lala, le Episas lala la punu ga amloge, a suri nene kila narui la sinela kurkur towe la sane, a kila narui amieluar kia kiena ne Suñe Yesu pa laa sane.

¹⁸ Ana siraunia, la moki naña nanagane la apimi ape li nalelagaena la ñisi rui, la apimi apisawal apisape la añar ke kimi, a la apisawal suri la naña la amiyuñaen ke e purkol. ¹⁹ A lañas naña ape purpes nen kimi kemua lelaga, añar polo suri la naña amiyuñaen ke amio la apimi lele taaga, sa naña kana tus ne lala, ana e marana ne la naña apisu ke e pogos nene, la akoven make ga pa e kapi. Tusi la nene moki pañisi, ana pogos naña asitoñal kana kilavaru ne la punu ga naña apul la e sumo, ana la apisu sane keviu pañisi, taulu tenario na kilavaru moki pañisi. ²⁰ Ana pogos naña suri la ne sanene pimi ñarwowo ke yo, la apisu sane nañareraena kiena ne Ntewa naga suña miyuña ke ñarera pañisi, a la apisu naña visena kiena ne Suñe naga suña kulkululu pano taulu yaru la moki laa narui e yo punu ga.

Veveyuena keviu garu Episas

²¹ Ana Pol pisu kilale naña yuñaena kiena ne Ntewa pa ke metava narui, ana naga mninukilale pisape naga ñena ga monar yuña va re laa na wa, vena naga va telivi visuveveli sina ga lepas la nene Masitonia amio Akaea, gare Kris, a sirau, ñisi na naga wasuñe ke sina ga va Yerusalem. A naga pisaar ñena ga e pogos nene, pisape “A siraun

naña nowasuþe neva si Yerusalem, þisi na monar neyaloro si neva re laa na wa, monar neva ma neva ma netol ma Rom.”²² Ana naga pisu sane þisi na naga monar su re laa yam ve plas laa sane sumo wa e lepas nae Esia amio kana pupia pulkumali nena naña Episas, ana yaru naiilaen lalua nene, Timote amio Erastas, naga mligan la asumo apa Masitonia.

²³ Ana e pogos nene, naña Pol sike gar yo naña Episas wa, ana pupia veveyuena tai molue e lepas na Mrapa Viu kiena ne Yesu. ²⁴ Suri nene, kana purþesia naña le Episas lala, la apisa apisape kiela ntewa, naga sira tai, kiena kia Artemis, a la amlotun ke kana pupia nono nena e kana pupia yuña wa nena. Ana yaru tai nae e yo nene, kiena kia Timitrias, naga þere yaru moki liu apimi amiyuñae kiena, naña la asuña amiyuñae ke narin nono lala na yuña mña ne sira ntewa nene, la amiyuñae e selpa, a yaru la asuña apul ke tania, naña naga amio kiena yeririna lala la asuña aþar manene kilavaru e paþisi.

²⁵ Ana sirau, naga pisu yuñaena naña Pol kila ke ne suña mne moñar ke kiena yuñaena nene narui, ana pogos tai naga pio kiena yeririna la nene, amio yaru taþena la naña la amiyuñae ke suri la e selpa, ana pogos naña apimi lele taaga, naga pisi pan la, pisape “A, aulai, amiu akilia ma naña sane ita temali ke ga e kieta yuñaena nene naña ita tesuña temiyuñae ke suri la e selpa. Yuñaena ga nene kila na ita tesuña toþar ke kilavaru laþasia. ²⁶ Ana nesitom nesape amiu na amloge narui, pona ita laþasia tepisu e kilamarata rui, naña yaru suri naña Pol nene naga suña pilon ke sitomena kiena ne yeririna la pa pe taþena. Naga suña kila ke e nini, a suña kila ke mña e lavisin pulkumali punu ga na pupia kieta lepas nini Esia, naña naga suña pian ke yaru lala pisape nono la naña yaru miyuñae e limana, la pe ape ntewa re nena poli. ²⁷ Ana in na nepisu sane visena kiena ne yaru nene þisi na kila kieta yuñaena vito tano vaþisi, naña þisi na yaru la ve akekaran re si auli suri la naña ita temiyuñae ke narui. A metavana, ita temio le Esia lala, amio mña ga yeririna taþena kar ga lala e yomarava nini, ita tesuña temlotun ke ntewa wo tanea tai nene naña Artemis, pona yaru nene sinenan pisape kovenlua kare naga yo, pona sinenan pisape kila mña yuña wa imi ve suri korena tai yo.”

²⁸ Ana pogos naña naga þalelar kare kiela sitomena la sanene, kila la sinela mimi manene laa narui, ana la asuña apiovionia, apisape “!Artemis nae Episas naga po, tepinaia naga taaga-o!” ²⁹ Ana la sane añarera laa narui, ana la apa akila pupia maagena gar kumali, ana apa atarar Kaias amio Aristakas, yere Masitonia lua naña amialoro amio Pol apimi asike e yo nini, ana la apurela, akiriri amio la apa loyuña e pupia lelen viorena nae Episas nene, a le Episas mña ga lala apa amio la, apa akokonia yo nene þisa.

³⁰ Ana Pol mña ga sinenan pisape va loyuña vena kilali naña visi amio pupia þina nene, ana nalogena nae Episas lala amaraun asape sa þisi aweñarlaea, ana apisaluþar naga. ³¹ A yerkawa laþas na Lokol Kansel kiena ne le Esia lala, la ape erau ruru po amio Pol, ana la mña ga amligan visena pimi, apiun manene pa Pol vena naga ve va re loyuña, akila sanene naga pe pa re si poli.

³² Ana loyuña e yo nene, yeririna lala la akila ke pupia maagena paþisi, la moki liu naña apisi veraga, laþasia apisi pa sanene, laþasia apisi pe taþena, a la moki naña aminue nena ga sane ma akila ke viorena na ya wa.

³³ Ana le Yu lala la amaraun asape sa þisi yaru la asitom asape la ke naña la ape purþes nen veveyuena nene narui, ana la asupon lala yaru tai, kiena kia Aliksanta, naga pa suñalu se maran yaru lala vena visli van la vena la ve sinela kar re le Yu lala. Naga kuan limana kila avarurula, ana la aþape naga ke tai naña pe yaru na veveyuena narui.

³⁴ Ana siraunia, pogos naña la apisu kilale asape naga pe yere Yu ga tai, maagena pe pito re nena tano poli, ana la asuña apio manene ke e kia kiena ne kiela ntewa naña sira nene, la asuña apiovion ke veraga, apisa apisape “!Kiamimi Artemis imimi le Episas lala naga po paþisi-o! !Kiamimi Artemis naga taaga po paþisi-e!” Ana la apio ma sanene pano-o tol mrae lua pe suri tai.

³⁵ Ana siraunia, suþe kiena ne le Episas la nene suñalu se marala, naga kilali naña aimi amalumu sina pano-o þisi, ana naga pisa pan la, pisape “Yeririna nae Episas lala, ita punu

ga tekilia ruru rui tesape kieta pulkumali nene, naga pe kumali keviu tai, a pe pulkumali wa tai. Ita ke narui naña tesuña tepisuar ke yuña wa kiena ne pupia kieta ntewa nene, Artemis, a tekilia tesape kieta lelagaena pe lelaga, komin nanua sumo verue ta nene mlai, ana kana pupia kilavaru wa nena mloru ma e peni pitomi, naña pe mloru re e yo taña la poli, mloru ga e ita rui, ana ita tesuña tepisuar ruru ña ga. ³⁶ Suri la nene tekilia rui tesape lelaga make ga, yaru taña lala tañatete nena ga avisa karea. Ana sanene na, pe pon re tekila manene ãarita poli, popon tekilali naña tesu ruru ga tesu ñaga. ³⁷ Ana e lepas kien la nene naña amiu añaure la apimi e nini, in na pe nemloge re naña amiu apisa apisape la apa apinaun suri wa tai e yuña wa ñana ne kieta ntewa poli, pona la apiuelin kiena kia, ana visae ve sanene ita tañatete tekila suri tai va lalua nene e yo nini.

³⁸ “Ana visae yaru na kilaen selpa la nene, sane Timitrias lala, visae la kiela suri na visaen lañaasia sike ga wa vena avisa van lalua nene, poga ga, kieta kumali la suña ga, a kieta naliñereena la suña ga, ana visae avisu ve sanape, la akilia aurela ava avis van la e kana yo nena. ³⁹ Ana visae amiu asitom avisave suri si lañas sike ga wa vena ita punu ga tevisuveve sina, poga ga, tekilia tevisuveve ga e kieta viorena si tai.

⁴⁰ “Naga nene, komin ñelaga naña tekila ke nanagane, ita tepa manene laa narui. Pe pe suri re tai naña mesmesun tekilia tekila manene ñaagena nene vanon poli, pona tekila naveveyuena keviu sanene vanonia, a visae peraga, pona ñisi na yerikawa kiena ne le Rom lala la ñisi na akoven ita e yuña nakoena na wa vanon kieta yuñaena na nanagane.”

⁴¹ Ana pogos naña naga pisa visena nene ñisi, sitomena kiena ne yeririna lala pimi pa ruru ke sina ga po narui, ana naga kalo visena, naga pisa pan la pisape la akilia aviaña ke sina ga.

20

Pol mialiali sina li nalelagaena lala garu Ñasitonia a garu Kris

¹ Ana legiena si lañasia, pogos naña pupia ñaagena naña le Episas la nene akila, pito si tano, Pol naga pio nalelagaena lala apimi lele taaga, ana naga mla visena wo pan la vena asuñalu ñarera va laa sane, ñisi na naga pisi maro pan la, ana mligan la, pa si garu Ñasitonia. ² Ana e yo nene, naga pa mial kome kana lepas ne lala, ana e yo punu ga naga suña miila ke yeririna lala e kiena visena wo lala, ana siraunia, naga pa si metava ma Kris, naña kana pupia pulkumali nena, naña Koren. ³ Ana Pol naga sike e yo nene pano-o tol kupario telu, ana ñisi na naga suña sitom sape kome waa tai naña ñeke pa rui, wasuñe sina ga va garu Seria. Ana lavisi naña aure vano, ana visena pimi tol Pol pisape le Yu lala nae e yo nene, la asuña akila ke sitomena viowa tai vena akila van ia e pogos naña naga suña ñeke e mrapa komsusia, ana kila naga pe pa re si e waa nene po laa rui, ana naga mla mrapa piavi tai, naga mial ñasuñe si pa telivi garu yo Ñasitonia. ⁴ Ana e pogos nene lañas apa amio naga, sane Sopata nae Perea, naña narina Piras, amio Aristakas a Sekantas, lalua nae Tesalonaika, amio Kaias nae Tepe, amio Timote, a amio ñena Tikikas a Tropimas, lalua nae Esia.

Pol lala asike garo Troas

⁵ Ana lañas nene naña asike amio Pol, la asumo apano aporu garu Troas. ⁶ Ana Pol naga sirau pimi, ana inu Luk, nesikol inu sina nemio la garu Piliña, a imimi mekila Ñaagena Nakanena Tamña e yo nene. Pogos naña ñaagena nene ñisi, ana mokus waa, ana mekiriri ña pano-o tol legiena lima, ñisi na imimi mepimi metol yo Troas, la naña apa sumo la asuñate imimi ke e nene. Ana imimi punu ga mesike garu Troas tol legiena olua.

⁷ Ana e Legiena Wa, pogos naña mrae pito pa tano na ña rui, sa naña legiena ñesia na legiena olua siar narui, imimi mepiora memio nalelagaena lala nae yo nene, imimi memlotu a makawero kilaparavi wa. Ana Pol naga sitom sape imimi meial ke kolulag ga, ana komin naña pe kiamimi viorena maro memio la, ana la akila visena la moki, ana kila Pol ñena ga pisi yam piavi, pisi ña pano tol yemalo pa ko yepe lilika narui. ⁸ Ana e pogos

nene, imimi mesuña mepiora ke e lele tai metava e yotop naña na telu, ana yeririna lala añar kiela kapi vivaga moki pimi, kila yo loyuña nene yo pisusun keviu pañisi.

⁹ Ana yaru mēe tai, kiena kia Yutikas, naga toña tano e pulutava na lagi, ana pogos na Pol naga mlologo ña pa sanene pano-o, mēe nene mloge momalena na mloge momalena. Naga tekavito na tekavito, kila ña sanene pano-o, ñisi na naga momalio ruru nena naapo, ana la amilan ga naña naga mloru e pulutava na lagi nene, naga mloru pito koan vanua e porotano. Yo nene naga mon manene laa metava, ana pogos naña la akiriri apitove, atol naga, ana la apisu naña naga mare pa rui. ¹⁰ Ana Pol ñena pito tano vena visulia, naga pulu pito tano kutarar e limana luwoka, ana naga pisa pan la, pisape “Ve aloge re viowa, ve atagin re naga, nanagane kiena malena ñasupe si pimi e naga rui.”

¹¹ Ana Pol lala apa sina ga metava, ana la amla Kinanena Wa nene, siraunia la akinana, ana siraun nanene, la asun ke sina ga pano-o yemlagi, ana Pol mligan la pano. ¹² Ana e lepas na ninis yerñene nene, añar naga mali ruru sina amio apa uña, a la amloge po pañisi naña Pol naga kila ruru naga pan la.

Pol lala asike mrapa vena awasupe la sina

¹³ Ana Pol naga pis pan imimi rui pisa pisape imimi mesumo mokom e waa, imimi meva mesuñate naga e pulkumali nene Asos, ana naga sirau imi, naga yali ga kom ura.

¹⁴ Ana imimi mepano metol garu Asos, ana naga sirau pimi, ana naga mīai e waa, ana imimi punu ga mepano metol pulkumali naña Maetilin e narin purvanua tai.

¹⁵ Ana siraunia, imimi mekiriri si e legiena wetelu tai, mekiririn narin purvanua tai, kiena kia Kios, ana siraunia e legiena tañena, metol e narin purvanua nene Samos, ana legiena tañena sina, imimi metol e kumali nae Ñaelitas e purvanua keviu, ana imimi mepa ura e yo nene. ¹⁶ E pogos nene, imimi moñaro ga yo Episas sanene, pe mepa re ura e poli, komin Pol naga pisa pisape pe pon re naña ita tokus pogos ve moki e lepas nae Esia nene poli, komin naga suña sitom ke sape visae imimi mekilia mekila sanene, ana popon moworu garu Yerusalem mesmesun pogos na Ñapañena na Yui Marua.

Pol naga sike garu Ñaelitas, naga pis maro pan nasumonena lala nae Episas

¹⁷ Ana garu Ñaelitas, Pol mligan visena pa garu Episas, naga pisape nasumonena nalotena lala aimi avisuia. ¹⁸ Ana siraunia la apimi, ana Pol pisa kiena visena maro pan la. Naga pisa sanini, pisape “Amiu, amiu akilia ruru inu rui, naña siar e pogos naña nepimi ñesan e kieta lepas nini, naña Esia, pimi tol nanagane, nesuña nemio amiu pogos piavi pañisi rui. Ana akilia ruru ñena ga kiau ñelaga a yuñaena kiena ne Suñe la naña nekila rui. ¹⁹ Akilia ña naña yuñaena la nene, nekila ke naña kiau sitomena pito ga tano, a nekila ke ñena ga amio wamarau, a nekila ñena e pogos ñarera naña le Yu la akila pan inu, naña ñalivi e kiela sinemimienalala pan inu. ²⁰ Ana akilia ruru ñena rui, naña visena punu ga naña mesmesun navisaena, naña kilia iila amiu, visena la nene pe nemawan re naña nevisawal van amiu poli, pona pe nemaraun re naña neviaan amiu e poli, nanene e poglis la naña ita tesike e yo metava temio yeririna moki lala, pona e pogos la naña netelivi ke e ñamiamiu uña lala. ²¹ Ana nepis pan le Yu lala pona nepis pan la naña pe ape le Yu re poli, ana pe nesitom ñele re naña nevisawal van la poli, ana noñareran la, nepisawal ruru nena pan la, nesape la punu ga monar avilopu la ava puna Ntewa, la monar alelaga e kieta Suñe Yesu Kristo.

²² “Ana nanagane, nepa ke sina ma Yerusalem, pe nekilia re ya naña le Yu la yoko akila van inu poli e pogos naña noworu e yo nene, ana nemlogelupar e inu naña Ninuna Wa naga suña pure inu ke sanene, ana monar neva ga. ²³ Ana Ninuna Wa naga suña kila merarava pan inu rui naña e pulkumali punu ga la naña nepa ke ea, ana monar netol pogos ñarera lala, a yeririna la asuñate ke ga vena akoan inu neva e yuña nakoena. ? Sanene nepisu visae neva garu Yerusalem, pona ve sa ke ñena ga nene yo? ²⁴ Ana poga ga nene, komin naña pe nepisu re kiau malena naga pe suri tai poli, pona tasneu, vena monar nesitom manenea, peraga. Ana nesitom ke suri taaga ga, vena nekilia nekiriri

ũaaga vano-o netol luas nen kiau yuũaena naũa Suũa Yesu mligan sike e luũaau, naũa monar nevisawal Nalologena Wo na nalemamiena kiena ne Ntewa va e yo punu ga.

²⁵ “Ana nanagane, nekilia mũena rui, amiu naũa nesũa nemiali amiu, naũa nemlologon ke navesuũaenena kiena ne Ntewa pan amiu, nekilia naũa amiu punu ga taũatete si akilia avisu marau pogos tai. ²⁶ Visae amiu yaru tai naga pe mla re visena lala kiena ne Ntewa nene e kiena malena poli wa, naũa nepisa pan amiu rui, ana yokorena naga va kovio, ana visae naga va kovio, kiena kuruta teke ga e naga, ana pe to re e inu poli, ²⁷ komin naũa in na nepisawal mrapa pan amiu rui, ana pe nekilawan re sitomena kiena ne Ntewa pan amiu poli.

²⁸ “Ana amiu li nasumonena lala, komin naũa Ninuna Wa pisir plan amiu sa naũa yeririna lala navisuarena sipsip lala na nalotena kiena ne Ntewa nene naũa naga pul lua e tana ne narina, ana amiu na monar avisuar ruru amiu, a amiu monar avisuar ruru la nene. ²⁹ Ee, sineun nevisave nevisa van amiu, pogos naũa nevetan amiu pa narui, ana nekiliaũaaga naũa yoko lokul tetan lala aimi, akila kare kiamiu sipsip la vaũaisi, akilayon naũa aũanenetetai la, ava aveve taaga. ³⁰ Ana nekilia nevisa mũena ga, nevisave siraunia, ana amiu yerkawa ga laũaasia, ana asuũaalu, ana avisokan kar ga la ve moki vaũaisi, vena akilayon ga naũa asape aurelua nalogena lala ava ataveve la ga. ³¹ Sanene, monar asururuia, a monar avisururuia, a monar asitoũaal naũa ayuũaae mũarera ve sa naũa nekila pogos naũa nesike nemio amiu pano-o tol kas wetelu telu, naũa pogos punu ga, e legiena a kolemalu, nesũa nepian ke yeririna lala, a nepisawal nena visena kiena ne Ntewa pan la, pano-o wamarau kekapili vanon la.

³² “Ana nanagane, pe su re si e luũaau poli vena nevisuar amiu, nemligan amiu asike ga e limana ne Ntewa. A nemlen nesape yoko Lologena Wo na lemamiena kiena, naga suũa iila amiu, kila amiu asuũaalu mũarera, a kila naũa amiu mũena ga, akilia awar navisa ruruena wo lala naũa Ntewa naga yokorena war sirau va kiena yeririna wa lala.

³³ “Ana sineun nesape asitoũaal mũena ga, pogos naũa nesike nemio amiu, nesũa nemiyuũaae korena ga sanene, a pe sineu sun re kiamiu suri wo la naũa sane kiamiu kilavaru la poli, pona kiamiu kulmrae lala. ³⁴ Ana pe nepisa re nesape avisuar inu e suri la nene poli, ana inu ga nepisuar inu e yuũaena na luũaau luwoka nini, a nepisuar mũena la naũa amiyuũaae ke amio inu e pogos nene. ³⁵ Ana e mrapa nene, a eũaelaga taũaena mũena ga lala, nepian amiunia nesape popon ita teyuũaae mũarera teiila yaru lala naũa yepela malumu, apisuũael narui, komin naũa monar tesitoũaal mũena ga visena kiena ne Suũa Yesu tai, naũa naga pisape ‘Visae ko otol kioũa nalaena tai, ana ko ologe wonia, ana visae ko ola nalaena tai vano, ana ko ologe wonia va ve keviu laa sane, ana navisa ruruena sike e ko.’ ”

³⁶ Ana pogos naũa Pol naga pisa visena la neneũaisi, ana akinai, naga mlen amio la. ³⁷ Ana la asiar naũa atag narui, ana la atalopan Pol, akulkalil e yepena, amlipalipa naga pano pano-o paũaisi, ³⁸ komin naũa la asuũa asitom ke kiena visena taaga ga nene, naũa naga pisape ve avisu re si marana pogos tai. Kiena visena ga nene narui kila la sinela miye naga keviu paũaisi. Ana siraunia, la amiyal amio naga, aũaure naga pitomi si e waa naũa imimi mokusia mokomkom ke ea.

21

Luk pisayu naũa naga amio Pol lala, apa atol yo Yerusalem

¹ Ana imimi memligan la asike e yo nene Maelitas, ana imimi meũaere mũale, mepa mesmesu ga mepa metol narin purvanua naũa Kos, ana imimi momomalio e yo nene. Yemlagi kolulag, ana imimi mepetan ke sina ga yo nene, mepa mũa mepa mũa pano-o metol sina purvanua taũaena naũa Rots, ana imimi momon sina, ana yemlagi kolulag, meũaure sina ga, mepa metol pulkumali neneũaatara e purvanua keviu. ² Ana kiamimi waa nene naga pa tol ga yo nene, ana mepa ura. Ana pogos naũa moũaal si waa taũaena tai naũaũaisi na va garu e yo nene Ponisia, ana memiai ea, aũaere mũale, ana mesike sina ga e kiamimi mrapa. ³ Imimi mekirir mepa mũa sanene e sive keviu nene, va ko yotena ne, pano-o

moñal pupia purvanua naña Saepras, ana memligan sike ga e kiamimi lepas na ãañeli, ana mepa ña sanene mesape meva metol yo naña Seria naña sinemimin mesape meva ea. Waa nene ãar ke tegaki la naña sape va ligan e pulkumali naña Taea, ana pogos naña mepa metol yo nene, ana mepa ura ea. ⁴ Ana mepa makale li nalologena lala e yo nene, ana siraunia, mesuña memio la pano tol legiena olua. Ana e pogos nene, la apisu naña Ninuna Wa pian la naña ãisi na va ve sanape e Pol garu Yerusalem, a la apisi pania, sinelan asape avisaluþaria asape ve va re si tol yo nene. ⁵ Ana Pol mninu e naga, sape monar va ga, ana siraunia, mepa sina e kiamimi mrapa. Ana e pogos nene, yerñene lala a sira lala amio nin sisi lala, amiyal amio imimi, mepa vanua e kiela pulkumali, ana aþere imimi sina mepito garo e kiamimi waa. Ana imimi punu ga mekinai tano e none, ana memlenwo imimi, ãisi na metalopan la. ⁶ Ana memiai sina e kiamimi waa, ana la aþasuþela si apa uña.

⁷ Ana meþure petan yo Taea, mepa metava e pulkumali naña Tolimeas, ana e yo nene ana mepa mepitawe arueta lala, mesike memio la e legiena taaga nene. ⁸ Ana kolulagi, mepetan sina yo nene, ana mepimi metol pulkumali naña Sisaria, mepa ura ana e yo nene, mepa mesike e yuña ñana yaru na Lologena Wo nene, Pilip, naña naga lala olua tai naña apisiriplan la ãesania asape la aiila yuñaena, nane garu Yerusalem. ⁹ Ana Pilip nene, narina na sira la vari asike uña, ana la pe atalopa re poli wa, ana la nene, yam moki liu naña Ntewa mla ke visena pan la, ana la apisawal pa yeririna la. ¹⁰ Ana mesuña memio la legiena laþas ãaro rui, ana navisawalena tai mligan yo Yutea pitomi tano e yo nene, yaru nene naga kiena kia Akaþas. ¹¹ Ana naga pimi pun imimi, sinenan sape kila kile tai va Pol, ana naga mla kulmrae kiena ne Pol tai, ana pavinar e limana amio lana, ana pisawal pisape “Ninuna Wa pisa, pisape ‘Yaru naña naga kiena kulmrae nini, yoko le Yu lala garu Yerusalem, aviar naga ve sanini, a siraunia, akila naga va e limana ne la naña pe ape le Yu re poli, vena akila viowa vania.’” ¹² Ana pogos naña memloge visena nene, memio la naña asike e nene, metagin Pol, moñareran pania mesape naga ve va re si metava ña Yerusalem.

¹³ Ana Pol pisatañe imimi, pisa pisape “Ei, aulai, asuña atagi ke sanene, kila nemloge sane sineu sape wororo ga narui. Ana suri punu ga nene poga ga, visae le Yerusalem lala aligan inu e yuña nakoena komin kia kiena ne Suþe Yesu, ana naga poga ga, ana visae ñarera ña sanene vano-o nemare, ana nekekara ga.”

¹⁴ Ana metaþali naña mepisalupar sanene pano-o, mepisalupar þele ga, ana mepisa ga, mepisape “Poga ga, yoko monar ve sa ga naña Suþe naga sinenania.”

¹⁵ Ana mesike sina legiena laþas gar Sisaria nene, ana siraunia, mekila ruru ke sina ga kiamimi karo lala, ana mepetan yo nene, memial mepa metava ma Yerusalem. ¹⁶ Ana li nalologena laþas nae Sisaria ataveve imimi ñena ga, ana pogos naña mepimi metol yo Yerusalem, ana aþere imimi mepa e yuña ñana yere Saepras tai, vena mesike memio naga. Ana yaru nene, naga ñena pe nalogena ães tai naña amlelaga e Yesu sumo, ana naga kiena kia, Nason.

Garu Yerusalem, Pol pa pisu Semes

¹⁷ Ana pogos naña arueta lala apisu naña mepimi metol si yo Yerusalem rui, ana la akekara paþisi. ¹⁸ Ana memono-o, yemlagi kolulagi, imimi memio Pol mepa meñalivin Semes, ana li nasumonena taþena ñena ga lala na suñare nae Yerusalem, la ñena asike e pogos nene. ¹⁹ Ana metalopan la, ana Pol pisi pan la, naga pisawal suri punu ga peve taaga la naña Ntewa kila pa rui ñalivi e kiena yuñaena, nanene e la naña pe ape le Yu re poli, naña naga pa telivi ke e kiela yo lala.

²⁰ Ana pogos naña la amloge visena na suri la naña Pol naga pisawalia, kila sanene la amloge po manene la, la amieluar Ntewa vanonia. Ana e pogos nene, visena la moki ñena ga garu Yerusalem kana Pol, ana la akilia ña suri nene, ana apisa pa Pol, apisape “Wolai Pol, ko okilia rui naña osape yaru la e nini la sane manu pe suri tai naña la amlelaga mare ga na wa, la nene ape le Yu ga lala, ana sa naña ko okilia, yeririna la ne sanene la

akilia asuṁalu ṁarera manene la e kieta navisaluaena marua lala. ²¹ Ana lala amloge pa rui, naṁa yaru la asuṁa apisayu kare ko ke asape ko opa opiankare ga kieta lus la naṁa asike gare purvanua taṁena lala. La asape ko osuṁa opian ke la nene osape popon aligan rui navisaluaena kiena Mosis amio kala ṁelaga marua ne lala, ana asape osape popon manene ṁena naṁa ve akila re si ṁaviu e narila lala. ²² ?Ana ṁisi na ita tekila ya narui, komin naṁa visena la nene kila la sinela kari ko manene pa rui? Ana nanagane, ve ve piavi re, ana ṁisi na monar la aloge ṁena naṁa asape ko opimi osike pa e yo nini rui. ²³ Ana poga ga, ṁisi na ko okila ga ve sa naṁa ṁisi na mevisa van ko, komin naṁa mepisu pa mrapa tai rui naṁa okilia okila naṁa owe plan kiela sinemimiena nene. ṁisi na monar okila ve sanene: e yo nene, ana imimi yeririna la vari naṁa nanua sumo, ana la akila navisaarena ṁarera tai pan Ntewa, apisape ṁisi na la avalia suri laṁasia va tol pogos ve sanene. ²⁴ Ana peni, la kiela pogos naṁa ṁisi na monar ava e Yuṁa Wa ṁana Ntewa, naṁa vena la akila suri la e lepas na kiela navisaarena nene, sane leniena lala, amio nalaena naikikena, a suri la ne sanene, naṁa sane la akilia awe ke sina ga vilula lala. Ana mepisu mesape popon sane ko ṁena ga ova omio la nene, ova osuṁa omio la e pogos naṁa la akila suri la nene, ana popon ṁena ga naṁa visae suri la punu ga naṁa la monar aul e pogos nene, ko ga ovisuvevea. Ana visae okila sanene, ana ṁisi na yeririna la avisu asape ko ope yaru tai naṁa osuṁa okekarana make navisaluaena kiena Mosis amio kana ṁelaga la na wa, ana ṁisi na la akilia asape visena naṁa amloge, naṁa pisayu ko, ana pe pe lelaga re poli. ²⁵ Ana e lepas kiena la naṁa pe ape Yu re poli, naṁa la amlelaga rui, ita tepisayu pa suri nene nanua rui, ana kieta visena la nene nanua tepisa ne, ana imimi mesiri pa e ṁaki tai pa pan la rui. Imimi mepisawal pan la, mepisape la monar avalia tata la naṁa li taṁena lala akila pa kuṁaṁaena ea pa kiela nono la rui, a la monar ve akan re kuruta, pona akan tata na suri mali naṁa kana kuruta pe mlau re poli wa, a yokorena la monar ve akila re ṁelaga viowa, sa naṁa la ataṁa lau, pona kolau.”

²⁶ Ana Pol pa kila ga sa naṁa la apisa, naṁa e legiena taṁena, ana naga ṁere la vari naṁani, ana naga pa kila nalaena naikikena amio la, a naga pa ṁena ga loyuṁa e Yuṁa Wa ṁana ne Ntewa amio la, vena loge asape ṁisi na kiela navisaarena naga ṁisi na va tol legiena ve via, ana ṁisi na monar la awar kiela nalaena navisaarena la veve taaga nene e legiena ya. Ana apisape visae legiena ve olua warovia, ana ṁisi na la asiar akila suri la nene.

Atarar Pol mon loyuṁa e Yuṁa Wa ṁana ne Ntewa

²⁷ Ana e pogos nene, le Yu laṁas asike e Yuṁa Wa ṁana Ntewa, la nene akom perina e lepas nae Esia la apimi, nanene e yo la naṁa Pol tetelivi e nanua sumo rui. Ana pogos naṁa legiena olua navisaarena kiena Pol la nene lavis ga ṁisi, ana le Yu la naṁa aṁal naṁa Pol ṁeke loyuṁa e Yuṁa Wa ṁana Ntewa. Ana la akila pupia ṁaagena, la apa atarar Pol, ana asunyu kare naga pan yeririna lala, ²⁸ la apion pan la, apisape “!Ei, amiu le Israel lala, aiila imimi e yaru nene! !Yaru ke nanene narui naṁa naga suṁa pa make e yo punu ga, ana naga suṁa pisa kare ke ita le Yu lala, naṁa ita yeririna wa kiena ne Ntewa lala, a suṁa pian kare yeririna la pisape kieta navisaluaena amio kieta Yuṁa Wa nini, la pe ape suri re tai poli. Ana imimi mekilia ṁena ga mesape naga ṁerevinaun ga yeririna laṁasia naṁa la pe ape le Yu re la poli, ana apimi loyuṁa e yo wa na Yuṁa Wa nini. !Yaru nene naga ṁarnena kare manene Yuṁa Wa ṁana ne Ntewa paṁisi, popon tekila suri tai vania!” ²⁹ Apisa sanini, apisape Pol ṁere yaru naṁa pe pe Yu re poli pimi loyuṁa e yo wa, komin naṁa apisu Pol vanua e mrapa naṁa naga mial ke amio Tropimas naṁa nae Episas, naṁa naga pe pe Yu re poli, ana aṁape pona Pol ṁere naga pa loyuṁa.

³⁰ Ana la asuṁa akila ke sanene loyuṁa e Yuṁa Wa, ana ṁaagena nene naga pa ṁena ga ṁar make yo la e pulkumali nene, ana kila yeririna taṁena la akiriri apimi. Apimi aṁuar kare ga Pol, ana aṁere naga pa vanua e Yuṁa Wa nene, ana pogos naṁa la apa vanua rui, ana li wa la akotava ruru e kana mratava kerkeviu ne lala. ³¹ Ana pogos naṁa asuṁa aṁere

Pol pa ke naña asape aweñaria, ana visena pimi tol yaru keviu kiena li na mara lala nae Rom naña asike garu Yerusalem, pisape pupia mara kapuru ke gare. ³² Ana yerkawa nene suñalu veraga, pio kiena yeririna lala, amio kiela yaru na mara lala, ana la akiriri apito tano e yo naña asuña akila ke pupia ñaagena nene ea. Ana pogos naña yeririna la apisu apisape yerkawa na mara nene pimi tol yo nene, ana la amligan Pol, la pe asu re si poli. ³³ Ana yerkawa nene pimi, pisi pan kiena yeririna lala, pisape ava atarar Pol, ana aviar limana tai va e lala yaru tai, limana tañena va e lala yaru tai, aviar e sen. Pisi na naga piun tan la, pisape “?Ana yaru nene, naga ai? ?A naga kila ya ne pan amiu?”

³⁴ Ana yeririna la moki naña asuña apiovion manenea, lañasia apisape sanene, lañasia apisape sanene, pa ña pa ña ga yerkawa nene naga pe mloge kilale re si visena tai e lepas nen ya naña la asuña akila ke ne, ana naga pisa pan kiena yeririna lala pisape awere Pol wasuñe va e kiela kove.

³⁵ Ana pogos naña asuña apa ke e narin mrapa tai, ana mrapa nene ve tokak yokuskusun ga yeririna lala nene naña la asuña sinelan ke asape asu si Pol wa. Ana yaru na mara lala añure ga Pol pano, ³⁶ ana ñegas nen yeririna lala asuña asirau apimi, la asuña apiovionia, apisape “!Aweñar yaru viowa nañal !Aweñar ga naga mare!”

³⁷ Ana la asuña apano, ana lavis ga aimi atol mratava naña navaen loyuña e lokove kiena ne yeririna na mara la nene, ana Pol piun tan kiela yerkawa, pisape “Awis, ko otañan inu neviun suri tai tan ko sumo wa.”

Ana yerkawa nene milan naña Pol pis kome Krik pania, pisape “!A, ana ko okilia ña naña opis kom e Krik! ³⁸ ?Visae ve sanene, nesitom nesape ko ope yere Isip nini naña pe yam piavi re poli naga tañali sape kila politik nene, ana naga ñere yeririna lala manu vari apa e kiena ñegas naweena yeririna nene, ana añure apa atapolou e yo korena. ?Ko na yaru ne na nene, ne?”

³⁹ Ana Pol pisatañea, pisape “Ei, peraga, in na nepe yere Yu ke tai nini narui, ana in na nekilia nepisin visena nae Krik komin naña in na nae pupia pulkumali naña Tasas, e lepas naña Silisia. Ana in na sineun nesape neviun tan ko, naña ko otañan nevisi ke ne va ñina moki la nene sumo wa.” ⁴⁰ Ana yerkawa nene tañania, ana Pol suñalu su metava, ana kuan limana sape ava ruru la, ana la apimi apa ruru la nenaga pañisi. Ana naga pisi pan la, pisi nena ga kome visena kiena ne le Yu lala.

22

Pol pisi pa la naña asape aweñar naga mare

¹ Ana Pol pisi pan la, pisape “Wolai lala, amio ata lala, in na sineun nesape atañan vena nekilali naña nevisa ruru suri make ga van amiu. Ayaggon ruru inu sumo wa.”

² Ana pogos naña la amloge Pol pisi ke pan la e kiela visena, naña visena nae Epru, la apa ruru la narui, la sinelan asape aloge kiena visena.

Ana naga pisa, pisape ³ “In na yere Yu ga nini, sa ke amiu, a in na nepaeme e pulkumali naña Tasas, e lepas nae Silisia. Ana pogos na nepe sisi ke ga wa, in na nepimi e yo nini, e Yerusalem, in na yaru naña Kameliel naga pian inu, naña akilia ruru naga rui. In na netotano e lana, naga pian ruru inu e navisaluaena punu ga kiena ne kieta yermarua lala, pano pano-o inu towe nepimi nepe navianena tai na navisaluaena nene. A sane amiu nanagane, amiu asitom manene asape akila kia kiena ne Ntewa imi ve keviu, inu ñena ga, e pogos la nanua sumo, nekila yuñaena kiena ne Ntewa amio kiau malena wetelu. ⁴ E pogos nene, inu ñena ga pe sineun manene re nenaga la naña ataveve ke Mrapa Viu nene poli, naña nesuña netetelivi ke sanene nakale ke la naña la asuña ataveveia, ana nesuña netarar la, a nesuña nokoven la ke apa e yuña naloge viowaena, yermene lala amio sira lala. E pogos nene sineun nesape la monar amarmare ga, a sineun nesape kiela Mrapa nene monar ñisi vilaga. ⁵ Suri nene, akilia aviun tan ñarin yaru wa amio kiena nasumonena lala na kiena kumali, komin la akilia ruru inu naña nekila sanene. A e pogos

nene, la asiri ñaki lañasia, vena kila sa naña nekilia neva noñene yaru na Mrapa Viu la nene e kiela yo lala.

“Ana e pogos tai, nemla ñaki tai sanene, ana sineun nesape neto garo tano Tañaskas vena netarar la nene e yo nene, vena neviar la e sen, ana neligan plan la awasupe si aimi e nini vena kieta yerkawa lala la ala nakoena van la.

⁶ “Ana e pogos nene, nemialoro ña nepa sane, ana tol kolpae, lavis ga netol Tañaskas, ana nemilan ga naña pupia yomerarava tai pimi veraga tegoli yo naña nemial ke nepa ea.

⁷ Ana suri nene kila nemloru nepito tano e porotano, a nemloge visena tai, pisape ‘!Sol o, Sol o! ?Komin ya ne ko okila kare inu ke sanene sa naña osuña okila ke ne?’

⁸ “Ana nepiun tania, nesape ‘?Ana Supe, ko ko ai?’

“Ana nemloge naga pisi ke sina ga pan inu, pisape ‘Yesu nae Nasaret nene, naña ko okila ke piowa pania, nene inu ga ne.’ ⁹ Ana la naña asike varaun inu e pogos nene, la apisu pupia yomerarava nene, ana la pe amloge re pulgona nene naña naga pisi ke pan inu poli. ¹⁰ A siraunia, nepiun ke sina ga, nesape ‘?Ana Supe, pisi na nekila sanape narui?’

“A Supe pisa pan inu pisape ‘Ko osuñalu, oyali ova ga loyuña Tañaskas rui, a pisi na yaru tai iñasu visawal van ko e yuñaena la naña nemligan ruru pisi rui vena pisi na oyuñaenia.’ ¹¹ Ana nemloge visena nene, ana pe nepisu re si suri poli, komin pupia yomerarava nene kila kilamarau p̄ala, ana la atarar ga luñau, asumon inu e mrapa, mepa meporu Tañaskas.

¹² “Ana pe yam piavi re nena ga, yaru nae e yo nene tai pimi pisu inu. Naga pe yaru tai naña naga pe yaru kiena ne Ntewa kemua lelaga, a naga mlogear kieta Navisaluena, a kieta le Yu lala nae e yo nene, la apisu naga sane naga pe yaru wo tanea tai pañisi, a kiena kia Ananaias. ¹³ Ana naga pimi suñalu su lavisi pun inu, ana pisi pan inu, pisape ‘!Wolai Sol, nanagane, nesape kilamaraña imi wo sina!’ Ana e ke ga e pogos nene sa nena nene, ana nekilia nepisu kilale marana ne Ananaias nene. ¹⁴ Ana naga pisi ke sina ga pan inu, pisape ‘Ntewa Na Mava kiena ne repita lala, naga pisaar ko sumo rui, pisape ko ke narui naña pisi na ko okilia kiena nasitomwanena keviu tai, a vena ko ke narui naña ko ovisu kiena Yaru Mesmesu a ologe kiena visena. ¹⁵ Ntewa pisaar ko p̄isi rui, pisape p̄isi na ko ova ovisawal va yeririna lala e yo make ga, suri make ga la naña opisuia a omloge. ¹⁶ Ana nanagane ga ne, ita monar tekila suri tai sumo wa. !Monar osuñalu, monar akee ko e kia kiena ne Yesu, ana kia ga nene kee plan kioña mlamulena viowa lala, oimi oikiki e marana ne Ntewa!’

¹⁷ “Ana siraunia, in na neñasupe inu ke sina ga e nini Yerusalem, ana nepa e Yuña Wa ñana ne Ntewa, sineun nesape nekila leniena. Ana pogos naña nesuña nemlen ke sanene, nemloge sane kiau sitomena pa kovio, ¹⁸ ana nepisu Supe pisi pan inu, pisape ‘Ovitañili, omolue Yerusalem vilaga, komin la nae e yo nini, visae ko osunyu van la e ya naña inu nekila pan ko, p̄isi na tañatete nena ga alelaga e ko.’

¹⁹ “Ana nepisa pania, nepisape ‘Ana Supe, la akilia ruru inu p̄isi rui, amio ya naña in na nesuña nekila p̄esania. La akilia ñaga asape inu ke ga narui naña nesuña netetelivi ke e yuña lala nalotena kiena ne imimi le Yu lala, a nesuña nepuarar ke la naña amlelaga ke e ko. A la apisu ke rui naña in na nesuña noñe la nene, a nesuña nokotawe la ke e yuña nakoena, ana in na nesitom ke nesape la monar alelaga e inu sa naña nepe lelaga ga. ²⁰ A nanua ne, pogos naña kioña yaru nene Stipen, kana kuruta mlau, la akilia ruru po pañisi naña asape in ke naña nesuña nemio la e pogos nene narui. Pogos naña la akoveñaria, in na nemiila la, in na nepisuar ruru ñala kulkota lala. !La monar alogenu!’ ²¹ Ana Supe pisa ga pan inu, pisape ‘Omolue e yo nini, sineun nesape neligan ko ova koperina vañisi, ovanon la naña pe ape le Yu re poli.’ ”

²² Ana pimi tol aora nene, la naña asuña amiagogon ke Pol la asuña amiagogon ruru ga, ana nanagane, kiela sinemimiena e naga pimi ke sina ga, la apisape ‘!E, popon aweñar ga yaru na piowa lepa ga sanene! !Ita pe sinetan re yaru na sanene naga mali sike e yomarava nini poli!’ ²³ Ana la asuña apiovion sanene, a la asuña atatanogin Pol e ñala

kulkota lala, a la asuṁa akoven puluyavi na mrapa pa kar ga e yo punu ga. ²⁴ Ana yerkawa kiena ne yaru na kilaen mara lala pisape la aurelua Pol vetan ṽina nene va loyuṁa e kiela kove, a naga pisape alili re naga wa, la aṁareran naga vena alual li suri ya naṽa naga kila ṽina la sinela kari manene naga sanene.

²⁵ Ana pogos naṽa la apiar Pol ṽisi, la asape awe narui, ana Pol pisa pa kiela nasumonena tai, pisape “?Sanape, mesmesun ga naṽa awe yaru tai sanene naṽa naga sike vatanon navisuarena nae Rom, a naṽa naga pe pali re kumali yam tai poli wa vena la aliṽere ruru naga, pona akilia awe ga naga sa ga nene?”

²⁶ Ana pogos naṽa nasumonena naṽani mloge naviunena kiena ne Pol nene, naga pisape ve awe re si naga wa, ana naga pa pisa kiela yerkawa veraga, pisape “?Ei, ṽisi na ko okila ve sanapen yaru nene narui? Naga suṁa pisa ke pisape naga sike vatano e navisuarena nae Rom ne.”

²⁷ Ana yerkawa nene pimi si sape visu Pol, viun tania, visave “!Ei, ko na opisa ruru ke ne! ?Ko na osike vatanon navisuarena nae Rom, pona peraga?”

Ana Pol pisataṁea, pisape “Ee, in na sanene narui.”

²⁸ Ana yerkawa nene pisa pa Pol, pisape “?Ana ko na sanene na sanape ne? Naṽa in na sanini, in na nopul pupia kilavaru tai ne.”

Ana Pol pisa sanini, pisape “Pona ve sanene yo. Ana inu, ata na sa kemua nene rui, ana in na nepaeme, in na sa ke ṁena ga nene.” ²⁹ Ana pogos naṽa yaru la naṽa asape awea amloge visena nene, akilia narui asape Pol naga pe yerkawa ta ne sanene. Ana la apur matan veraga, akilia asape taṽatete si awe naga narui, a yerkawa ṁena ga nene, nanagane naga ṁena ga marau li laa narui, komin naga yaru na kilaen mara nae Rom, ana naga kila piowa pa Pol rui naṽa naga ṁena ga sike vatanon navisuarena nae Rom.

La aṽere Pol pa e pupia kumali kiena ne le Yu lala

³⁰ Ana kolulagi, yerkawa kiena ne yaru na kilaen mara la nene naga suṁa sinenan ke na wa sape popon sa kilia ya ne pe purṽes nen veveyuena nene, ana naga pio yerkawa lala kiena ne yaru wa lala amio nasumonena lala kiena ne le Yu lala, pisape la monar asuṁate naga gare kiela pupia kumali. Ana naga pisa pisape akila plan sen la e Pol, ana naga ṽere naga pito garo tano e kumali nene, naga mligan Pol sike likan la.

23

¹ Ana Pol naga tarlua marana pa metava tamaria yerkawa la nene, ana naga pisa pan la, pisape “Wolai lala, e kiau malena wetelu pimi tol ṽane, e yuṁaena punu ga kiena ne Ntewa naṽa nekila, in na pe nemloge re suri tai miyur sineu poli, naṽa pisape in na nekila pe mesmesu re poli. !Peraga rui!”

² Ana pogos naṽa ṽarin yaru wa nene Ananias naga mloge visena nene, naga sinena kari Pol paṽisi, a naga pisa pan la naṽa asike lavisin Pol sape alipa gona. ³ Ana Pol pisi towe laa pan naga narui, pisape “!Ei, ko ovisuar ko, yokorena Ntewa weṁar ko na wa! Ko ototano ke e yo na kieta navisaluaena, e yo na naliṽereen yaru, ana siraunia ko ke ga naṽa okilaro si navisaluaena nene narui, naṽa ko opisa osape la alipa inu sanene. Ko ope kulupopos ga na oteke ne.”

⁴ Ana la naṽa asike lavisi apisape “?Ei, ko osape poga ga naṽa ko opisa kare ṽarin Yaru Wa kiena ne Ntewa sanene, pona peraga?”

⁵ Ana Pol pisape “!Ke, lelaga o! Wolai lala, inu nemloge kiena visena, ana pe nekilia re si po laa rui, in na pe nesitom re si nesape naga pe ṽarin Yaru Wa nene poli. Ana sane amiu apisawal ruru pan inu narui, ana nekilia naṽa nepisa suri pe po re pan poli, komin Visena Wa kiena ne Ntewa naga pisawal ruru rui, pisape pe pe pon re ita tevisi viowa van yerkawa kiena ne kieta yeririna la poli.”

⁶⁻⁸ Ana Pol naga pe kilia re si ya naṽa yoko naga visa po laa rui, ana naga pisa sane la naṽa asike loyuṁa e viorena e pogos nene, la ṽasia ape Varasi, a la ṽasia ape Satusi. ṽegas

lua nene asuña apepeyu pañisi, komin Satusi lala apisa ke asape yeririna lala tařatete amal si vetan namarena, ana apisa suri la ne sane navisi lala, pona ninuna lala, apisape suri la nene, pe sur ta sa re nene poli, ana Varasi lala amlelaga e suri la nene. Ana Pol kilia narui, yoko visa sanape ne, ana naga pio yerkawa la nene, naga pisape “Wolai lala, in na nomolue ruru nena e lus kiena ne Varasi lala. Arimau lala la ape Varasi, a inu ñena nepe Varasi. Ana amio Varasi lala, in na nemlelaga nařa nesape pogos nařa yaru mare, siraunia, ana yoko naga kilia mali sina. Ana nesitom nesape nesuñalu nesu vamo e maramiu nanagane komin nařa yaru lařasia asitom ke asape avis van inu komin kiau nalelagaena nene.”

Ana visena kiena ne Pol nene kila Varasi la nařa asike e nene ana la asiar ke sina ga nařa apeveyu amio le Satusi la nařa asike ne, kila sanene la punu ga nařa asike e viorena nene la amlipere la ke sina ga. ⁹ Akila ña sanene pano-o, ñaagena pimi keviu pañisi, a siraunia, navianena lařas e lepas na puna ne Varasi lala asuñalu, apisi ñarera pañisi, apisape “Imimi mepisu sane yaru nene naga poga ga, pe suri re ta nařa ita tekilia tevisi van naga vanon poli. ?Ana ane kilia, pona pe lelaga ga nařa ninuna wo tai, pona navisi tai naga pisi pan yo?”

¹⁰ Ana sinemimiena nene naga pano keviu laa narui, la asu ña asitom ke asape asulania, ana yerkawa kiena ne li na mara lala naga pisu sane piowa laa narui, naga maraun sape sa řisi la nene akarkare manene laa Pol, ana naga pitetalia kiena yaru lala apito tano, ařerelua Pol petan yeririna lala, ana ařere naga pa si e kiela kove.

¹¹ Ana siraunia, kolemalu, Pol pisu nařa Suře suñalu sike ga lavisinia, nařa suña pisi pania, pisape “Pol, ve omarau re. Ko opisawal ruru inu pan yaru ñarera lala nae e nini rui, ana sineun nesape řisi na ko monar okila ña si sanene yam tai, naga nene garu Rom.”

Le Yu lařasia asape akilali nařa aweñar Pol

¹² Ana kolulag, le Yu lařasia apim vinau ga lele taaga, vena avisayu ve sanape nařa akilia aweñar Pol. Ana pogos nařa amal mrapa ta narui, ana la apisaar e kia kiena ne Ntewa nařa aligan kinanena amio namunena lala, vano-o tol nařa la monar aweñar Pol sumo wa. ¹³ Ana la nařa apiranar la e visena nene a nařa akila navisaarena sanene, la ataulu yaru la lualima yam vari.

¹⁴ Ana siraunia la apano apisu yerkawa kiena ne yaru wa lala, amio nasumonena lala, ana apisawal suri nene pan la. Apisape “Imimi mepisaar ñarera pan Ntewa rui, nařa imimi mevalian kinanena punu ga vano-o tol pogos nařa imimi mekilia moweñar yaru nene. ¹⁵ Ana sinemimin mesape aiila imimi, nařa amiu amio la nařa e kieta kumali, amiu aligan visena vano van yerkawa kiena ne yaru na mara la nene, avisave naga were si yaru nene vato si garo tano kumali, avisa kotalia ga naga avisave asitom asape avisuveve sina visena la nene. Ana imimi mesuñate ga e mrapa, a pogos nařa atomi, moweñaria, nařa naga sike perinan kumali wa.”

¹⁶ Ana siraunia, narina ne vinena Pol tai, naga mlogewal nařa asuña apisayu ke asape řisi na la akila ve sanene ve sanene, ana sisi nařani pa mesmesu ga e kove kiena ne yaru na mara lala, pa pisawal suri nene pa Pol. ¹⁷ Ana Pol pio yaru na mara la tai, naga pisape “Ei, awis, ko oure yaru viu nene vano visu kiamiu yerkawa, naga kilia ke sur tai nařa popon yerkawa nene naga monar loge.”

¹⁸ Ana naga řere mearu kiena ne Pol nene pa puna ne kiela yerkawa, pis pania, pisape “Pol nařa sike garo e yuña nakoaena, naga pisape noure kiena mearu nene iñasu visawal suri tai van ko.”

¹⁹ Ana yerkawa nene naga tarar limana ne yaru viu nene, řere yapen ga pa sanene, ana piun tania, pisape “?Ana ko ositom osape ovisa ya ne van inu?”

²⁰ Ana mearu kiena ne Pol nene pisa plan pania, pisape “Ko opisu ke ne, yerkawa kiena le Yu lala apisirilua kiela sitomena ta rui, nařa asape aweñar meruou nařa, Pol. La apisa rui apisape yoko aligan visena iñasu van ko, asape la sinelan avisuveve re laa visena la nene e lepas nene wa, ana aviun tan ko vena peni, ana oure si Pol vitove garo e kiela kumali. ²¹ Ana pe pon re nařa okila sanene poli, komin nařa la asuña akila kokan ke ga

nene. Apisa ruru rui apisape pogos naña visae asike mrapplepa, ato ke garo tano, ana lala lualima yam vari nene awulan amiu, aweñmar meruou nene. La nene apisaar pa Ntewa rui apisape yoko aligan kinanena amio namunena vano-o avisu naña sane la aweñmar naga ñisi, a la nene na asuñmate amiu ke rui, vena visae otañman naña amiu ato si garo tano.”

²² Ana yerkawa nene, pisa pan mearu kiena ne Pol nene, pisape “Poga, ana nevisa mesmesun van ko, ve ovisawal re si van yaru tai naña ko opimi opisawal suri nene pan inu. Ana potena pañisi, ko okilia ova si uña narui.”

Amligan Pol pano pan ñarin suñe tai nae Rom garu Sisaria

²³⁻²⁴ Ana yerkawa kiena ne li na mara la nene naga pio kiena yaru lua, naga pisa sanini, pisape “Suri lala naña e lepas na yaru nene naña Pol, la apimi ñarera pañisi. Nanagane, yoko in na neligan naga va e limana ne kieta ñarina suñe naña Vilikis, naña naga sike garo tano Sisaria. Amiu lua, akila ruru ñegas tai na kieta yaru na mara lala, vena amiu akirakirava ruru wo e Pol, amiu aure naga vito garo tano. Amiu akilia aure yaru na mara la ve ponotia ve lua, amio la lualima yam olua naña la akus wosi, amio si la tol ponotia ve lua naña la awar pupia kalie na mara lala. Ana akus ñena ga wosi kiena ne Pol tai vena naga kilia va totano ea. In na sineun nesape aligan kotaña kolemallo, e pogos naña yemalolo rui.”

²⁵ Ana yerkawa nene siri ñaki tai vena alarar amio la avano, naga siri sanini, pisape

²⁶ “Ñaki nini, inu Klotias Lisias, naña nesiri piñasu pan ko, Ñarin Suñe Vilikis, naña ko ope yerkawa nae Rom naña ko opisuar ke kieta pupia lepas nene. ²⁷ Inu nekekara keviu naña nevitawe ko sina e ñaki nini.

Yaru naña añere piñasu pan ko nene, kiena suniena nena sanini: sumo, le Yu lala nae e nini atarar naga, lavisi aweñmaria. Ana siraunia, nemlogewal naña naga sike vatanon kieta navisuarena nae Rom, ana imimi mepato garo tano, ana meñerelua naga petan limana ne le Yu la nene. ²⁸ Ana sineun nesape nekilia ya naña naga pe miasin suri nene, ana neñere naga pito e kiela kumali keviu. ²⁹ E pogos nene, nepisu naña naga pe kila re sur tai naña torokin aweñmar naga poli, pona ala nakoaena vania, ana nepisu sane la asuña apepeyu ke amio naga e ga e lepas na navisaluaena na kiela nalotena ga.

³⁰ Ana siraunia, visena tai pam tol inu, pisape apisayu rui a añal mrapa rui vena akilayonli sina vena aweñmaria mare. Ana nepisu sane popon vena nevitetalia naga iñasu puña vilaga, ana nepisawal ñena ga pan la naña sinela kari naga, nesape la monar aiñasu avisawal suri la naña la asitom ke asape aliñere naga vanonia e maraña.”

³¹ Ana li na mara la akila sa naña kiela yerkawa nene pisa, ana kolemallo la añere Pol, ana pupia ñegas nene amligan yo Yerusalem, apano atol yo garu Antipatris. ³² Ana kolulag nena, yaru na mara la naña amial ga, la añasuñe la sina apa ma Yerusalem, ana la naña la akus wosi, lala amio ke Pol na wa, la apito ke sina ga e kiela mrapa, apito garo Sisaria.

³³ Ana pogos naña apimi aporu e yo nene amla ñaki nene pa ñarin suñe nene narui, a siraunia añere Pol, apano amligan naga sike e limana. ³⁴ Ana ñarin suñe nene pulo ñaki nañani ñisi, ana naga piun tan Pol, pisape naga pe yaru nae lepas nape. Ana Pol naga pisape naga pe yaru nae ga yo garo Silisia, ³⁵ ana ñarin suñe nene naga pisa sina, pisape “Ana poga ga, ita monar tesuñmate ga yaru la naña yoko avis van ko, ana pogos naña aimi, ana nouarar visena nemio amiu.” Ana naga pisa pan kiena yaru na mara lala, pisape “Yaru nene naga kilia sike amio ita na wa e yuña marua ñena ne Ñarin Suñe Erot nene, naña ita tesike e nanagane, ana amiu akirawo ruru naga ea.”

24

Le Yu lala la apimin apisape avis va Pol e marana ne Pilikis

¹ Ana Pol suña ga sanene, tol legiena lima ñarovia, ana siraunia, ñarin yaru wa nae Yerusalem naña Ananias pitomi garo tano Sisaria, naga amio nasumonena tañena lala

kiena ne le Yu lala, amiowar ke yaru na navisaluaena tai, vena naga visi kiela, kiena kia Tetalas. Ana la nene apa apisu Ĥarin Suĥe Pilikis vena avisawal suri la punu ga naĥa la sinelan asape avis va Pol vanonia. ² Ana la apio ĥena ga Pol pimi loyuña, ana Pilikis mla pog pa Tetalas vena naga kilia vietava e kiela visena.

Ana naga pisi pa ĥarin suĥe naĥani, naga pisape “Ĥarin Suĥe Pilikis, imimi mekekara paĥisi naĥa mesuñalu mese maraña ĥane, komin mepisu naĥa ko osuña opisuar ruru imimi po paĥisi. Siar e pogos naĥa ko opuarar ke yuñaena nene, pimi tol nanagane, kioña manmaruaena naga kila suñare wo sike e purvanua nini, a ko osuña okila ke suri viu la moki vena iilaen yuñaena e yo nini. ³ Sanene, mepisa potena keviu pan ko naĥa silaga osuña okila ke po pan imimi sanene. ⁴ Ana ko, kioña yuñaena moki, pe pon re mekila kare ko e kiamimi visena la ve moki poli, in na sineun nesape neviun tan ko vena ko owo van imimi, oyagogon kiamimi narin visena tai naĥa plas laa ga.

⁵ “E lepas kiena ne yaru nene, mepisu sane naga pe ĥarkawa towe laa sane. Naga suña telivi ke piora e le Yu lala e purvanua taĥena lala, a e yo punu ga naĥa naga pa ea, ana naga kila ke yaru la apiaĥa a apeveyu. A naga pe nasumonena na ĥegas kiena ne yaru la naĥani, naĥa apisape naga molue garu Nasaret, naĥa pona naga pe nalotena taĥena, pona visae peraga, la asuña akila ke ga politik yo. ⁶⁻⁷ A pogos naĥa yaru nene pimi sike garu Yerusalem, naga kila piowa pano pano-o ĥisa, naga sinenan pisape kila kare sur wa na kiamimi Yuña Wa nene, ana kila narui mepa metararia. ⁸ Visae ko oviun ga tania, ĥisi na okilia ologe sur la naĥa imimi mepisa naga pe lelaga nena ga.”

⁹ Ana pogos naĥa naga pisi ke sanene, le Yu taĥena lala la asuña asisilin ĥarila, la asuña apisa ke apisape “Naga ke nene narui, sa ke ga nene, lelaga ĥa.”

Pol pisatañe la

¹⁰ Ana siraunia, ĥarin suĥe nene naga kira pisu Pol, naga mla pog tai pania vena naga kilia la kiena navisatañeena. Ana Pol pisape “Ĥarin Suĥe Pilikis, sa naĥa ko okila ĥa naliĥereena pan imimi e purvanua nini e kas moki ĥaro pa rui, in na nekekarar naĥa nesuñalu nese maraña vena nekila kiau navisatañeena. ¹¹ Nesape nevisa ga van ko sanini, in na nepa ĥa Yerusalem nanua ga ne. Visae oviun ruru tan yaru lala, ĥisi na olual naĥa sane in na nepa e yo nene vena neva ga nelen e Yuña Wa ĥana ne Ntewa, pe tol re legiena lualima taaga pa vari po laa wa. ¹² A pogos naĥa nesike e yo nene, pe apisu re naĥa nekila suri tai poli. In na pe nepepeyu re nemio yaru tai poli, a pe nepisa re pa yaru lala nesape akila suri tai poli. E Yuña Wa ĥana ne Ntewa, pona e yuña na leniena lala, pona e pulkumali e nape, ana in na pe nekila re nena suri tai poli. ¹³ A sur la naĥa apisa mare ga pan ko nanagane, apisape in na nekila sanene sanene, naga nene na visena na kiela ĥegas ga nene, ana la pe apisa re suri tai pan ko poli vena iilaen kiela visena nene, vena kila na ko ovisu sane kiela visena nene na pe lelaga.

¹⁴ “Ana sur taaga ga nekilia netañania, nekilia nevisa van ko nevisave lelaga, in na nekila kemua naga nene. Sur nene, naga sa naĥa in na nesuña netaveve ke Mrapa Viu nene, naĥa la apisape naga nalotena taĥena. Ana naga pe sa re nene poli, komin naĥa e Mrapa nene, imimi mesuña memlotun ke Ntewa taaga ga, naga pe Ntewa kiena ne repimimi marua lala na sumo, a mesuña memlelaga ke ga e sur la naĥa kiamimi navisaluaena pisa, pona naĥa kiamimi navisawalena lala la asiria. ¹⁵ Ana taveve suri la nene, in na neĥasine ga Ntewa, maran taaga sa ke ga naĥa la ĥena ga apisu ga naga, asape ĥisi na naga kila yaru la make ga añal ke sina ga e marena, naga nene na la naĥa la amesmesu e marana, a la naĥa la pe amesmesu re e marana poli. ¹⁶ Ana komin naĥa nekilia ĥa nesape ĥisi na Ntewa kila sanene, in na pe nesitom re nena nesape nekila ĥelaga viowa tai sanene poli, ana e pogos punu ga, in na noĥaryo paĥisi vena narin suri tai ve yur inu re pogos tai visave in na nekila ke piowa e marana ne Ntewa pona e mara yeririna lala.

¹⁷ “Ana kas laṁasia ṁaro pa rui, in na nepa nesike e purvanua taṁena lala, ana siraunia, nanagane ga ne, in na neṁasuṁe inu ke sina ga nepimi Yerusalem. Ana yaru nae gare lala, la akuwan nalaena tai vena iilaen kiamimi yeririna lala nae Yerusalem, ana in na noṁar nalaena nene nepimi, neṁar pan la, a in na sineun nesape neva nekila ke ṁena ga kuṁaṁaena laṁasia e Yuṁa Wa ṁana ne Ntewa. ¹⁸ Ana pogos naṁa nesike e Yuṁa Wa, nekila kuṁaṁaena na ikikiena rui, ana la nene la apimi apisu inu. E pogos nene, pe yaru taṁena re la asike amio inu poli, a pe visena re poli pona ṁaagena re nena poli, peraga, ana siraunia, le Yu laṁasia nae Esia apimi, ana la ke nene narui naṁa asiar veveyuena nene. ¹⁹ Ana la nene naṁa ape purṁes nen sur nene, visae la asitom asape in na nekila sur tai piowa, ana popon visae la ṁena asike amio ita e nini nanagane vena la avisawal li van ko, ana pe noṁal la re poli. ²⁰ Visae peraga, popon oviunli tan yaru taṁena la ne asike ne, ovisave pogos naṁa la aṁere inu nepa e kiela kumali, aṁal sane in na nekila ya. ?In na nekila ya ne pe mesmesu re poli, pona nepisa visena ya naṁa piowa? In na pe noṁal re poli. ²¹ Ana visena taaga ga naṁa nepisa, nepisa sanini, nesape: Inu na nepisu sane sinemiun asape avis van inu ṁane, komin ga kiau nalelagaena nene, naṁa pisape pogos naṁa yaru mare, ṁisi na, naga kilia mali ke sina ga. Nepisa visena nene ṁisi, ana kila la ga asuṁa apeveyu ke sina ga pan la.”

²² Ana ṁarin Suṁe Pilikis nene, naga kilia towe ṁa sur moki rui e lepas na Mrapa Viu nene, ana pogos naṁa naga pisu sane veveyuena nene, le Yu lala amio Pol akila vanon ga sur nena ga la nene, ana naga kalo nena visena, pisape “Poga ga, ṁisi na ita tesuṁa e nini sumo wa. ṁisi na nesuṁate ke ga yerkawa kiena ne yaru na kilaen mara la nene Lisias vena kom ma Yerusalem vitomi neloge ruru kiena visena nene wa, ṁisi na nela kiau naliṁereena van amiu.” ²³ Ana naga pisa pan kiena yaru na kilaen mara lala, pisape la atarar ga Pol, apisuar naga, ana naga pisape ve akila manene re ṁarera vania, la monar ataṁan naga yaloro ṁaga, a ve avisaluṁar re kiena erau lala vena aimi ayaliali naga avisuaria.

Pol pisayu Yesu pa Pilikis amio wona

²⁴ Ana ṁarin Suṁe Pilikis, naga wona sira re Yu tai, kiena kia Trusila, ana lalua nene la sinelan asape asun re amio Pol wa. Ana legiena laṁas ṁarovia, ana lalua apimi e yo naṁa Pol sike ea, ana aṁere Pol pimi pula, ana Pol pisi amio lalua, naga pisayu kiena nalelagaena naṁa e Kristo Yesu. ²⁵ Ana Pol mligan visena la moki la sane pan lalua, naga sitom ṁele la ga, naga pisayu sanape naṁa yaru monar kila ṁelaga mesmesu, a naṁa yaru naga monar kawe ruru kiena malena mesmesu, a pisayu ṁena ga naliṁereena kiena ne Ntewa naṁa ṁisi na imi e Legiena Maro. Ana pogos naṁa Pilikis mloge visena la nene, naga mloge sane miyur manene kiena sitomena paṁisi, kila narui naga marau towe laa sane, ana naga pisa pa Pol, pisape “Poga ga, toroki narui. Ko ova si loyuṁa e nene sumo wa, ana visae nelual si kiau pogos tai, ṁisi na neligan si visena viṁasun ko.” ²⁶ Ana pogos naṁa Pilikis pisa visena nene, naga kiena sitomena viowa ṁena ga tai toṁa ga, naṁa naga sitom ke pisape ṁisi na Pol naga war kilavaru keviu tai vania, vena kilia visa va Pol visave Pol kilia molue sina. Ana kiena sitomena nene kila narui naga mligan luen ga visena panon Pol, a naga suṁa sun amio naga yam mokliu. ²⁷ Ana naga kila ṁa sanene pano-o tol kas lua, ana naga ṁisin kiena yuṁaena nene. Ana naga pe taṁan re Pol molue si e yo naṁa apuarar naga sike e poli, komin naṁa naga sinenan pisape kila le Yu la akekaran naga. A siraunia, yaru taṁena tai pimi kus lelana ne Pilikis nene, kiena kia Posias Pestas.

25

Pol pisape Sisa ga naga monar liṁere naga

¹ Ana ṁarin suṁe viu nene Pestas, naga pimi garu Sisaria, pimin vena visuar kiena lepassia nene, ana siraun naṁa legiena telu ga ṁarovia, ana naga pisu naṁa naga monar vavini visuveve yo ma metava Yerusalem. ² Ana pogos naṁa naga pa tol yo nene, ana

naga piora amio yerkawa lala kiena ne yaru wa lala, amio yerkawa tařena lala kiena ne le Yu lala, ana apisa kare Pol pania. Ana ařareran pania, ³ apisape visae naga sitom sape kila suri wo tai van la, ana lala sinelan naga ligam Pol wasuře sina imi pula, vena la akilia aure naga va kumali avis vania. La apisa sanene, ana la asuřa asitomwan ke rui asape visae Pol imi, ana la ava asuřate naga gare, a vena aweřar ga naga mare řeke mrapa komsusia. ⁴ Ana Pestas pisape “Poga ga, ana ve ve piavi re inu řena nowasuře sina neva garu Sisaria, nařa la asuřa atarar ke yaru nene sike ea. ⁵ Sanene, ana amiu yerkawa lařasia, akilia ataveve inu teto garo ne, tevisu ve sanape. Visae yaru nene kila suri lařasia nařa pe mesmesu re poli, ana tekilia tekila kana visena nena e pogos nene.”

⁶ Ana Pestas sike amio la gar Yerusalem pe tol re legiena lualima yam taaga pa vari poli, ana naga pito si garo Sisaria, amio yaru lařas nařani. Ana e ga e legiena na siraunia, naga pa totano ke e kiena yo naliřereena, ana naga pisape avano aure Pol imi. ⁷ Ana pogos nařa Pol pimi loyuřa, ana le Yu la nae Yerusalem nařa ataveve Pestas apimi, asuřalu asu, ana asuřa apisawal ke pupia suri viowa la moki liu nařa apisape Pol naga kila, ana kiela visena la nene pe suřalu re nena ga.

⁸ Ana pogos nařa Pol sinenan sape la kiena navisatařeena, naga tero plas ga, pisape “In na pe nekila re nena suri tai poli, nařa nekilaro navisaluaena kiena le Yu lala, a pe nořarnena kare re Yuřa Wa nae Yerusalem poli, a pe nekilaro re řena ga navisaluaena kiena ne řarin suře nae Rom poli, nařa Sisa.”

⁹ Ana Pestas nene, naga sinenan sape le Yu lala la aloge wo e naga, ana naga sitom sape kilayonli kila ve sa nařa la apisa pania, ana piun tan Pol, pisape “?Sanape, pona popon neure ko teva nevisi ga van ko ma kumali nae ma Yerusalem, ana yoko ko osuřalu sina ga ose marau e yo nene yo?”

¹⁰ Ana Pol pisatařea, pisape “Nanagane, e yo nini, in na nesuřalu rui nesike e marařa, ko yaru naliřereena navisaluaena kiena Sisa nae Rom. Visae suri nakilaena tai van inu, ana yo ke nini narui naga mesmesun ga nařa ko okila. ?Ana yoko nevavin si ya ne ma Yerusalem ne? Ko opisu kilale rui nařa e lepas kiena ne le Yu lala, ana pe kiela visena tai suřalu re nena e inu poli, peraga. ¹¹ Ana visae ko opisu nekila suri tai piowa torokin nařa monar nemare vanonia, ana poga ga nene, in na pe nekilayonli re nařa noure vetan poli. Ana visae la nene, pe kiela visena re si tai nařa kilia suřalu suřa poli, ana pe mesmesu re nena nařa ko oiila inu nowasuře sina neva e limala vena la akila ya nařa la sinelania van inu. Ana nanagane, sa nařa nekilia nekila, sane nesike vatanon navisuarena nae Rom, ana nepisa ruru ga pan ko nesape sineun řarin Suře Sisa nae Rom, naga ga monar liřere inu.”

¹² Ana visena nene kila Pestas pano pis amio kiena kansel la sumo wa, ana siraunia, pimi sina ana pisape “Ko opisa rui opisape sinořan Sisa ga liřere ko. Ana nepisape poga ga, yoko osuřalu ga ose marana ne řarin suře nene narui.”

Pestas sunyu Pol pan suře keviu tařena nene Akriřa

¹³ Ana siraunia, legiena lařasia řaro sina, ana suře keviu na yo tařena tai pimi garu Sisaria. Naga kiena kia ne na nene, Akriřa Nalua, ana naga pimi amio vinena nařa Penis. Lalua amloge nařa Pestas siar ga kiena yuřaena na wa nařa pe řarin suře nae lepas nene, ana la sinelan asape aimi aialialia. ¹⁴ Ana la lua asike e yo nene pano-o, ana yam moki nařa la asuřa asun amio Pestas nene, ana legiena tai, ana Pestas sunyu ga lepas na puna ne Pol pan lalua. Naga pisa pan la lua, pisape “In na kiau yaru tai suřa e kiau yuřa nakoena, nařa sike e limana ne Pilikis nanua sumo rui, sumon nařa nepimi e nini. ¹⁵ Ana siraun nařa nepimi, ana nepa ma Yerusalem, ana yerkawa kiena ne li wa lala, amio nasumonena tařena kiena le Yu lala, la apimi apisayu yaru nene pan inu, la sinelan asape nevisawal kiena naliřereena tai vania. ¹⁶ Ana nepisa ruru pan la, nepisape tařatete nekila ga sanene, ana monar noure lepas luwoka aimi lele taaga sumo wa, ana la nařa akila navisawalena, monar avisawalia e marana yaru nařa akila ke navisawalena pania, a monar nela pogos van yaru nene vena naga řena la kiena navisatařeena. Nepisa pan

la nepisape kiamimi ṽelaga na navisaluaena nae Rom naga sa ke nene narui. ¹⁷ Sanene, in na neṽasuṽe sina nepimi e yo nini, ana le Yu lala la akom ma Yerusalem apitomi vena mekila visena. Ana pogos naṽa nekilia nesape la apimi atol yo nene ko yepekilavi, pe nemla re si pog tai pan la poli, ana kolulag ga, nepa netotano e yo naliṽereena, ana nepio yaru naṽa Pol pimi loyuṁa. ¹⁸ Ana pogos naṽa le Yu lala asuṁalun navisawalena suri lala na yaru nene, inu nesitom noṁape yoko neloge pupia suri viowa laṽas naṽa la apisape naga kila, ana nanene na peraga. ¹⁹ La apisa ga narin suri lala e ga e lepas na kiela nalotena, naṽa la asuṁa apepeyun ke amio yaru nene. Naga nene e ga e lepas na kiela ṽelaga marua ga lala, a e lepas na yaru tai, kiena kia Yesu, naṽa naga mare rui, ana Pol suṁa pisa ke pisape naga mali sina. ²⁰ Ana la apisayu ke suri la naṽa pe nekilia re nena poli, ana nemninue kare narui nesape aṁa yoko nekila ya ne, ana nepiun tania nepisape visae naga sinenania, wasuṽe si va ga ma Yerusalem, vena la akila ga kiela visena e yo nene. ²¹ Ana siraunia, yaru nene pisape peraga, ve va re sanene, ana naga suṁalu pisape sinenan pisape ṽarin Suṽe ga Sisa naga liṽerea. Naga kiena visena nene kila netarar naga sike e yo nini na wa, vena nelual mrapa tai neila naga va garu Rom, vena Sisa naga visuvevea.”

²² Ana Akriṽa pisa pan Pestas, pisape “Ana inu ṁena sineun paṽisi nesape neloge re visena kiena ne yaru nene.”

Ana Pestas pisape “Poga ga, peni ga na amlua asun.”

Pestas ṽere Pol pimin vena Akriṽa yagogonia

²³ Ana kolulagi, akila suri punu ga su ruru sike e kiela pupia yuṁa na viorena tai, la akila sane pe pupia suri tai. Ana suṽe keviu nene Akriṽa la lua vinena nene Penis, la lua apimi naṽa amiyowa ruru la rui, ana apimi loyuṁa naṽa yerkawa kiena li na mara lala amio yerkawa taṽena lala la amiyal ke varaun la. Ana la akila suri punu ga pa la lua nene sa naṽa la akila ke e pogos keviu la ne sanene. La akila ṁa pano-o, ana siraunia, ana Pestas pisape aure Pol imi loyuṁa. ²⁴ Ana la aṽere pimi, ana Pestas piṽi narui, pisape “A ṽarin Suṽe Akriṽa, amio yerkawa taṽena lala naṽa tesike e nini ṽane, nanene yaru ne nanini narui naṽa le Yu lala la apim apis pan inu vanonia. Garu Yerusalem, a e yo nini, la apimi apiun ṁareran tan inu apisape neliṽere naga, asuṁa apisi keviu apisape yaru nene, naga pe pon re si mali va re laa sane poli, la sinelan asape naga monar mare ga vilaga. ²⁵ Ana nepisuveve suri nene pano-o, pe noṁal re sur tai naṽa torokin naga mare vanon poli. Ana siraunia, yaru nene naga ṁena piun pisape kieta ṽarina suṽe keviu nae Rom, naga ga liṽerea, ana nanagane nesuṁa nepisuveve nesape yoko monar neila naga va ga e limana ne Sisa narui. ²⁶ Ana monar nesiri ṁaki tai va amio yaru nene va van kieta ṽarina suṽe nene, ana pe nekilia ruru re ṁena nesape aṁa nesiri ya ne te ṁaki nene wa. Nanini narui, nekekara naṽa neṽere naga piṁasu vena suṁalu se maraṁa, Suṽe keviu Akriṽa, amio amiu yerkawa taṽena la nene, vena ita tevisuveve ke sina ga kiena visena la nene, pona amiu akilia aiila inu navisaen ya naṽa nesiri te ṁaki nini. ²⁷ !Pe popon re neligan yaru nene va e pupia naliṽereena nene poli, naṽa pe nepisawal ruru re visena ya naṽa kila narui nemligan naga pano!”

26

Pol piṽ e marana ṽarin Suṽe Akriṽa

¹ Ana Akriṽa pisa pa Pol, pisape “Poga ga, nela pog van ko narui vena osunyu ko e lepas na suri la nene.”

Ana Pol koan limana sanene, ana siar kiena visena narui, vena la navisataṁeena na suri la nene. ² Ana pisa sanini, pisape “ṽarin Suṽe Akriṽa, nepisu sane po paṽisi naṽa nekilia nesuṁalu e maraṁa ṽane, vena netaṽali naṽa nela navisataṁeena laṽasia e visena la naṽa le Yu lala akila pan inu. ³ Nepisa visena nene komin naṽa ko ke narui, okilia ruru kieta ṽelaga ita le Yu la rui, a okilia ruru ṁena suri la naṽa pogos punu ga kieta yeririna lala asuṁa apepeyun la ke vanon rui, a naṽa la asuṁa amlṽere la ke vanonia.

Ana inu nepiun tan ko vena ko ve sineña kar inu re, komin naña yoko kiau suniena naga tawa manene e suri la ne sanene narui, a ve piavi towe ñena ga.

⁴ “Kiau suniena naga siar sanini, sane inu, nesiari e pogos naña nepe nisisi ke ga wa, nesu luen ga nemio le Yu lala, nanene e kiau yo, ana siraunia, garu ñena Yerusalem. Ana lala la akilia ruru kiau ñelaga lala nanua rui, a akilia ña naña pogos naña nepe yaru vii ke ga wa, ⁵ ana nesikol inu e ñegas kiena ne Varasi lala, naña la ke narui naña atarar manene kieta navisaluaena taulu ñegas tañena lala. Ana visae la ñena ga akekaran naña la asuñalu ase maraña, ana yokorena la akilia avisawal li van ko, avisave suri naña nepisa ke ne naga pe lelaga punu ga.

⁶ “?Ana komin ya ne la sinela kar inu si sanene? Nanene komin naña nesuñalu ñarera nesike e navisaarena tai naña Ntewa naga kila pa repita lala nanua sumo rui, naña pisawal sape naga yoko kila yaru la naña amare amal sina. ⁷ Ana navisaarena nene, kieta lus ñena ga la lualima taaga pa lua [12] nene la asuña amlen ke ko legiena a kolemallo vena yoko la akilia atolía. !Ñarin suñe, opisu ke ne! Sur nene Ntewa naga pisaar pan le Yu la rui, ana le Yu lala sinelan asape avis si van inu komin nemlelaga ea. ⁸ ?Pe nekilia re poli, ana komin ya narui naña yaru la nene asuña asitom ke asape Ntewa naga tañatete si kilia kila yaru naña mare rui naga mali sina?

⁹ “Ana pe lelaga, nanua sumo, in ñena sa ke ga nene, pe nemlelaga re e suri la nene poli. Na nanua na, in na sineu kar laa la naña amlelaga e Yesu nae Nasaret pañisi, a nepisu sane monar nekilali ñarera vena nekila kia nene vito tano. ¹⁰ Ana garu Yerusalem, nesuña nekila suri moki sanene. Yerkawa kiena ne li wa lala, la atañan pan inu, ana nepa nekila nalelagaena wa la nene, la moki naña apa e yuña nakoena, ana pogos naña la amliñere la asape monar la amare, in ñena ga nesike loyuña ea. ¹¹ A nesuña netetelivi e yuña na leniena lala, pogos punu ga nesuña nekila ke piowa pan la, a nesuña nekilali la ñena ga, nesuña nekilayon naña vena la aviuelin kia kiena ne Yesu. Ana nesuña nekila ña sanene pano-o yepu pisunun pañisi, ana noñene plan la apuretetai apeve taaga e purvanua tañena lala, ana siraunia, nepanon la ke sina ga e kumali la naña la apa asike e la.”

Pol pisayu sanape naña Yesu paemenia

¹² Ana Pol suña sun pano-o, pisape “Ana e pogos tai, nesuña nepito ke garo Tañaskas vena nekila ke sina ve sanene van la naña asike e yo nene. Yerkawa kiena ne yaru wa lala, la amiila inu nepitove, a la amla ñaki pan inu naña asape nekilia nekila sanene. ¹³ Ana mesuña memial ke mepato garo tano, ana kolpae ga, nepisu pupia yomerarava tai metava ma e peni, naña tego taulu mrae, ana yomerarava nene tegoli nena yo naña mesike ea. ¹⁴ Ana yomerarava nene naga merarava keviu sanene narui, naga kila imimi mekekapil mepito tano e porotano, ana siraunia, nemloge pulgon yar tai, pis pan inu pis ga kome visena nae Epru, naga pisape ‘!Sol o, Sol o! ?Komin ya ne ko osuña okila kare inu ke sanene sa naña ko osuña okila ke ne? Ko osuña laña te ñataun inu ke sanene, ana kila laña mlaea ñisa.’

¹⁵ “Ana nepiunia, nepisape “?Ana Suñe, ko a nene?”

“Ana Suñe pis ke sina ga pan inu, pisape ‘Yesu naña ko osuña okila ke piowa pania, nane in ne nanini narui. ¹⁶ Ana osuñalu sina, komin naña yoko oyuña kiau. In na neñalivin ko sanene komin suri nena nene narui. Ñane opisu kilale inu sane ovisave in na ai, a siraunia, yoko ovisu inu nesuña neñalivin ko e suri la ve moki e legiena lala naña pimi ke sirau. Suri la naña nepian kon ke ne, naga ke narui naña ovano ovisawal van yeririna lala. ¹⁷ Ana yoko ovanon ovisawal va le Yu lala, a va ñena yaru tañena la naña pe ape le Yu re poli, ana ñisi na ovisu naña la nene, yoko akila viowa van ko, ana ve sineña pepe re, yoko neñalivin ko e pogos la ne sa nene, vena netamalia ko.

“ ‘Nanene narui, nevitetalia ko ovanon la nene, ¹⁸ vena ovikepa kilamarala, vena ovilon la amolue vetan yemalolo naña la asike ea, aim e yomerarava, a vena aligan ñareraena kiena ne Yermare sike na, aim ga puna Ntewa. Ana pogos naña aviawa ga e inu sanene,

ana yoko Ntewa viewo kiela mlamulena viowa lala, a yoko naga sikol la e pegas nen kiena li wa lala.’ ”

Pol pisayu kiena yuñaena

¹⁹ Ana Pol pis ke na wa, pisape “Naga narui, Supe Akripa, pogos naña nepisu pupia suri naña molue ma e peni pitomi e inu, in na tařatete si nekila sur tai narui, ana nemlogear ga visena kiena ne Supe narui. ²⁰ Ana nepa Tařaskas sumo, nemlologon pa yeririna lala, nepisape monar avilopu la ava puna Ntewa, a kiela malena monar awo make nena ga, torokin navilopuena nene. Ana siraunia, nepa ke sina ga ma Yerusalem, nemlologon ke sina ga sanene pan la, siraunia nepa nekila sanene e kumali tařena lala e lepas nae Yutea, a siraunia, nepa kar ga e yo kiena ne la naña pe ape Yu re poli, nemla ke ga visena maran taaga sanene pan la. ²¹ Ana komin ga kiau yuñaena nene narui, kila le Yu lala apimi atatar inu loyuña e Yuña Wa Mana ne Ntewa, ana la sinelan asape aweřnar inunia.

²² “Ana pimi tol řane, naiilaena ga naña pimi kome Ntewa naga suña amio inu silaga, a nanagane nekilia nesuřalu nese maramiu amiu yerkawa lala, a amiu li tařena řena ga lala, a in na kiau pulmas nini naña nekilia nevis van amiu. Ya naña Mosis amio navisawalena lala apisa nanua nanua sumo rui, la apisape yoko ve sanene ve sanene, ana suri ga nene, nane nesuřa nepisawal ke pan amiu nanagane. ²³ Naga nene naga sanini, naña Navisaarena, pogos naña naga imi řalivi, ana yeririna lala monar akila viowa vania, ana siraunia, yoko naga ve yaru naña naga mal řesania petan marena. A kiena nasuřalena si nene petan marena, ana suri ne nanene narui ve mrapa nawaren yomerarava na tamaliaena imi tegoli yeririna la punu ga, Yu lala, a la naña pe ape le Yu re poli.”

Pol sinenan sape monar alelaga e Yesu sane naga

²⁴ Ana pogos naña Pol suña mla ke kiena navisatařeena sanene, Pestas suřalu tero kiena visena lala, naga pisi keviu, pisape “!Pol, ko ope wowe ga nene! Ko sinořan osape ove manmarua e nakiliaena tařena lala, ana kila řaruña pano-o pe wowe ga narui.”

²⁵ Ana Pol pisape “Nepatanon ko, řarin Supe Pestas, ana in na monar nevisa van ko, in na řaruu poga ga. Kiau visena la naña nesuřa nepisawal ke e yo nini, la ape purřes nen nalelagaena naña ape lelaga pařisi. ²⁶ Suri la naña nesuřa nesunyu ke ne, nekilia ruru nesape Supe Akripa naga kilia ruru rui, la apimi atol kiena navisuena rui, nanene narui kila pe nemaraun re naña nevisawal e marana poli. Suri la nene, pe apimi ařalivi re ga e narin yo ta naña yaru la pe akilia re poli, peraga, yeririna la punu ga akilia rui, asuřa apisayu pařisi. ²⁷ ?Ana Supe Akripa, ya naña pe kiořa sitomena lelaga e suri la nene? ? Nepisu sane ko řena ga omlelaga e visena kiena ne navisawalena lala nanua sumo, ne?”

²⁸ Ana Akripa pisa pa Pol, pisape “!E, peraga, peraga! ?Pona opis yam plas ga nene, osape okilia oure inu řena neiřasu neve yeririna kiena ne Kristo, ne?”

²⁹ Ana Pol pisatařea, pisape “E, nemninue ga, pona nevis ve plas ga pona nevis ve piavi, ana suri taaga ga nemlen nesape Ntewa kila řane, sineun nesape ko, omio yaru tařena la nene, naña asu řa amiyagogon ke kiau visena, sineun nesape aimi ave sa ga inu. Pe nepisa re nesape awar sen la nene ve sa naña nořar ke poli, ana nepisape popon aimi ave sa ga inu, naña nemla Yesu Kristo e kiau malena, nepimi nepe yaru viu e naga.”

³⁰ Ana řarin Supe Akripa kalo visena e nene, ana naga, amio Pestas, amio Penis, amio yerkawa tařena lala naña la ateke tano ma metava amio la, la nene asusuřalu, apava si vanua. ³¹ Ana pogos naña apava vanua rui, asuřa apisayu ke pan la, apisape “Yaru nene naga pe kila re nena suri tai piowa poli, naña torokin naga mare pona war nakoena nena vanonia.”

³² Ana Akripa pisa pa Pestas, pisape “Visae yaru nene ve visa re visvae Sisa ga liřerea, vera naga kilia molue ga va vanua sanene rui.”

27

Aḗere Pol amligan yo Sisaria vena ava garu Rom

¹ Ana e pogos nene, in Luk, in mēna nesike nemio Pol garu Sisaria, ana nepisape in mēna ga yoko neva nemio naga garu Rom. Ana pogos naḗa yerkawa lala apisu sane meva narui, ana aḗere plan Pol amio yaru taḗena laḗasia naḗa asike loyuḗa e yuḗa nakoena, amligan la apa e limana ne yerkawa na mara tai. Yaru nene, kiena kia Sulias, a naga pe nasumonena na ḗegas na li na mara la nene naḗa apio asape “ḗegas kiena ne Okastas.” ² Ana naga ḗere imimi mepano, mepito garo losi, ana aḗal waa tai nae Atramitiam, ana memiai meta ea. Ana e pogos nene, Aristakas nene nae Tesalonaika e lepas nae Masionia, memio mēna ga naga. Ana mokus waa nene mepano, naḗa kiena mrapa nena naga pano kome lowe lala e lepas nae Esia.

³ Ana kolulag, mepimi metol yo Saeton, ana e yo nene, Sulias naga kila po paḗisi pa Pol, naga taḗan naga pa ura vena visu kiena erau lala, a naga taḗan naḗa amiila Pol e suri laḗasia e kiena mrapa. ⁴ Ana memligan si yo nene, mekiriri ḗa e sive pano-o, ana makawe lagi e pogos nene, kila sane pogos naḗa metol purvanua nae Saepras, ana mepa mokom varaun lepas ḗasia, lepas navano. ⁵ Ana mokusro pupia sive nene naḗa va ko yotena narui vanua e lepas nen yo lua nene Silisia amio yo Pampilia, ana mekiriri mepimi metol kumali nae Māera, e lepas nae Laesia. ⁶ Ana waa nene naga mligan imimi e yo nene, ana yaru na mara nene Sulias naga pano kale mrapa taḗena. Ana naga mali waa tai nae Aliksantrea naḗa naga suḗa pa ke e purvanua naḗa mesitom ke mesape mevanea, Italia, ana naga miila imimi mepa mesike e waa nene narui.

⁷ Ana mepa sina metava e sive, ana lagi piowa ga, kila mekiriri malumu ga pano-o legiena la laḗasia, ana moḗar yo paḗisi, mepilolou ḗa ḗale sanene pano tol kunus nae Nitas, ana lagi monwo ruru imimi nenaga narui. Ana mepilon imimi, mekirilologia kunus taḗena nae Salmone e purvanua naḗa Krit, ana mepa varaunia e lepas na sive malumu. ⁸ Imimi mokom ga lavisin purvanua nene, mesuḗa mekeveve ḗa mepano, ana lagi ḗe kare imimi ke na wa, ana mepa ḗa pano-o metol lowe tai naḗa apio asape “Lowe Tanea,” lavisin kumali naḗa Lasea.

⁹ Ana mesu towe la e yo nene yam plas ga, ana la apisu sane piowa ga narui, komin naḗa lagi kila ke sanene pan imimi, ana mesike mrapa yam piavi laa rui, ana mrapa piavi ke ga wa, a nanagane, pogos na lagi amio pupia miava narui. Sila ga la apisape pog piowa nene siar e kupario na ḗaḗagena na Naviewoena, ana ḗaḗagena nene ḗaro pa rui. Ana Pol mloge piowagan suri nene, naga pisa ruru pan la, pisape ¹⁰ “Yerkawa lala, in na nemninuluḗar naḗa visae tevano, ana viowa vaḗisi, yoko suri la punu ga akilia akokovio. Nepisu sa naḗa yoko waa nene naga kilia talilu ga warar kana tegaki lala, a ita mēna ga, kieta malena lala akilia akokovio e sive.”

¹¹ Ana yaru na mara nene naga pe miyagogon re Pol poli, ana naga miyagogon ga yaru naḗa kus ke waa, amio yaru naḗa naga kiena waa nene. Ana lalua apisape “Peraga, woga ga ne, yoko teva ga, ¹² komin naḗa taḗatete tekilia tesike e yo nini vano-o tetol ke sina ga pog wo.” Ana apisayuia, la moki naḗa apisu asape popon meligan si yo nene, moureli ga mevano metol lowe taḗena tai kiena kia Pinikis, e purvanua ḗa nena nene, naḗa la apisu asape e nene narui popon mesike ea, tol pogos naḗa yoko pupia lagi na miava nene ḗisi.

Pupia lagi miyusesa kare la apano

¹³ Ana pogos naḗa apisu lagi pilonia, ana lagi marua naga molue towe narui, apisu apisape po narui, ana asitom asape lagi ke nene narui naga yu imimi meva e lowe naḗa mesitom ke mesape meva ea. Ana aḗere kilavaru pam metava, ana meḗure mepano, mekeveve ga yo ura. ¹⁴ Ana pe yam piavi re poli, memilan ga pupia lagi ura tai molue pimi miyu imimi. ¹⁵ Lagi nene miyui keviu sanene, ana taḗatete si mekilia moure naḗa mokus lagi nene, ana apilon ga waa narui, ana ataḗan ga lagi nene supon imimi ga mepa yotena, ana lagi nene miyusesa imimi sanene mepano. ¹⁶ Ana mekiriri mepano, metapolou towe la sane e narin purvanua tai, kiena kia Kaota, ana e yo nene memiyuḗaen kana narin

wa nene pano-o, ana aþurelua pam metava. ¹⁷ Ana la amaraun apisape sa þisi waa nene wurorowaia, ana aþere pupia kilika lala akom va tanon waa, ana apiar ruruia vena tarar ruruia.

Ana apisu naþa lagi moña miyusesa kare imimi mepa ke na wa, ana amaraun asape asuña apa ke lavisin piañe lala nae Saetis narui, lavisin yo Lipia, ana aþere si ñale. Ana lagi miyusesa kare imimi sanene mepano metaulu yo nene, ana yemalo, ana mekirir malo ga mepano.

¹⁸ Ana kolulagi, ana lagi ñarera ke na wa, a sive moña kokovenkare imimi, ana la asiar naþa akoven plan tegaki pito e sive. ¹⁹ Ana legiena taþena sina, yo piowa ke ga wa, ana apano amluþar plan kilika lala a ñale lala a suri la ne sanene, akoan ñena apito e sive. ²⁰ Sa ña ke sina ga nene tol legiena moki, naþa sinapane naga malo ga ñeke na, pe mepisu re verue la poli, a pe mepisu re maran mrae poli. Mepisu sane mesike loyuña e lagi tai nene naþa pe yaru tai sitom re si sape yoko memal poli.

²¹ Ana yaru na waa lala pe akinana re poli legiena moki rui, amloge piowa keviu paþisi, ana Pol pimi pisu la, pisa pan la, pisape “Suwala, visae ayagogon ruru inu ga nanua rui, e pogos naþa ita tesike garu Krit wa, ana yoko pupia loge viowaena a pupia nakilaluen suri la nene taþatete imi tol ita. ²² Ana nanagane, yoko nevisa si suri tai van amiu, vena akilia aloge si wonia. Nepisawal pan amiu, nesape yoko kieta waa nene naga talilu na wa, ana taþatete ita yaru tai kovio. ²³ Nekilia suri nene komin na kolemalu, kiau Ntewa naþa nemlen ke pania, nepisu naþa naga mligan kiena navisi tai pitomi ñalivin inu. Navisi nene pimi suñalu sike lavisin inu, ²⁴ ana naga pisape ‘Pol, ve omarau re. Ana monar ovano-o oworu garu Rom, monar osuñalu ose marana ne Sisa na wa, ana nekilia nevisawal van ko sanini, malena kiena ne la naþa asike e waa nene amio ko, Ntewa naga sitom sape tañan ga van ko sape yoko amal ga, taþatete tai kovio.’ ²⁵ Na nene narui, ve aloge re si viowa, in na neþasine manene Ntewa paþisi nesape yoko ve sa ga naþa kiena navisi nene pisawal pan inu. ²⁶ Ana suri taaga ga, yoko monar tokus kieta waa vano teyalar ga yo ura e narin purvanua tai.”

La apim lavisin purvanua tai

²⁷ Ana lagi nene naga suña miyusesa kare imimi mepa ke ga wa, tol wik lua narui naþa mesuña mekirir ke e pupia sive nae Metiterenian nene. Ana kolemalu pogos tai, yaru na waa la nene apisu kilale sane mesuña mepimi ke lavisin purvanua tai ko yo tai. ²⁸ Ana amligan kilika pito tano, la apulo merorol na sive nene pano-o tol meta lualima yam vari, siraunia, asu laa yam plas ga, ana akila sina, apulo asape meta lualima yam telu. ²⁹ Ana amaraun asape sa þisi mekirir ña sanene mevane lawe pupia kilavaru laþasia pona ya, ana akoan kilavaru vari naþa sike varau e þeren waa, ana asuña amlen ke asape vena kilavaru lala nene monar atarar imimi, a vena yelagi imi vilaga.

³⁰ Ana yaru na waa lala apisayuia, apisape yoko avisa kotalia imimi ke sina ga laþasia, ana yoko la akilayon naþa akus kana narin waa nene ana aure akom ea ava ura. Ana apisa kotalia imimi, apisape “Oe, yoko mokusli kilavaru nene va gare sumo wa, vena metaþali naþa uarar kieta purgon waa.” Ana asuña amligan narin waa pito tano e sive.

³¹ Ana Pol pisu kilalea, ana pis pan yaru na mara lala, pisape “Visae asitom asape amali, monar avisaluþar la nene asuña ga amio ita e waa nini.” ³² Ana yaru na mara la nene amloge, asuñalu veraga apano ateroro kilika na narin waa nene, ana lagi miyulua ga tan waa, korur mian pano.

³³ Ana lavisi yemlagi merarava, ana Pol sitom pisape monar akan suri tai, ana naga pisa pan la, pisape “Ei, pimi tol þane, ana wik lua narui naþa tesike e pogos piowa nene, pe tekinana ruru re poli. ³⁴ Ana popon þane na tekinana ruru sina, vena yepeta lala akilia aimi ñarera sina, ana sanene yoko tekilia temali. Sa naþa nepisa rui, ana yoko taþatete narin vilþarita tai kovio, ana yoko ita punu towoga ga.”

³⁵ Ana siraun naþa pisayu suri nene þisi, pano mla kilaparavi tai, ana mlen e marala, pisa potena pan Ntewa vanonia, ana kawewowaia, suña kania. ³⁶ Ana pogos naþa lala taþena apisu naþa Pol suña kinana ke sanene, la ñena ga amlelaga asape pe lelaga

kemua, yoko lala awoga ga ne, ana la ñena ga akekarana asape akinana sina, ana akinana.
³⁷ Ana imimi punu ga naña mesike e waa nene, metol ponotia lua lualima yam olua pa orai. ³⁸ Ana pogos naña la punu ga akinana ñisi, apisu asape popon akila waa melala va laa sane, ana aþar plan mras nen wit la nene naña sane kamimi kinanena, akoakoan plan pito e sive.

Waa pa tawa ñeke ga yotena, ana akulkul ga apa ura

³⁹ Ana pogos naña yemlagi narui, ana mepisu ña yo ura lavis ga rui, ana pe mekilia re yo nene poli. Ana apisu pululus tai naña pe lowe ñeke ea, ana ura e yo nene none tanea ñeke ea, ana apisayuia, apisape yoko la akilayonli naña vena akila kiamimi waa kiriri va ura ea. ⁴⁰ Ana ate plan kilika na kilavaru lala, amligan la asike e sive, a amluþar plan kilika la naña apiar ke þeligas nen waa, ana aþere narin ñale naña teke e purgon waa, vena lagi yu imimi meva meialar none.

⁴¹ Mesuña mekirir ña mepano-o, memilan ga, naña waa mialar lae pupia none tai naña koruru þerepoloia sike lele taaga tanon sive. Purgon waa mialar lae none nene, ana tawa ruru nenaga ñarera ñeke ea, pe kululu re si po laa rui. Ana pupia sive lala asusuñalu aþanwowola apimi asusu þeren waa nene, asuwowaia.

⁴² Ana yaru na mara lala asuña apisayu rui, asape visae suri tai sanene, ana awe moñar ga yaru na yuña nakoena la naña asuña akirawo la ke na, visae peraga, pona laþasia akilayonli naña awula ato tano e sive, vena akulu ava ura, aure. ⁴³ Ana kiela yerkawa pialuþar la, pisape ve akila re, komin naña naga sitom ke sape Pol naga monar mali ga. Ana naga pisa ga pan imimi punu ga, pisape “Poga ga, ita naña tekilia tokulu, tesumo, towula ga e sive, ana teyenli ura. ⁴⁴ Ana ita naña temiye þele ga, ana tokus kulutaki, pona ya naña tekilia telual e waa, vena tokusia tokulu, ana ita sirau tevano.” Ana e ga e mrapa nene, imimi punu ga mepano-o mepa ura e yo nene, naña imimi punu ga memali po ga, pe imimi yaru tai kovio re poli.

28

Pol lala la asike e purvanua naña Molta

¹ Ana pogos naña imimi punu ga mepimi mesu ruru ke pa ura rui, yeririna lala nae e yo nene apimi apisu imimi, ana apisa ga pan imimi na wa apisape yo nini naga pe purvanua tai, kiena kia Molta. ² Ana akila po manene laa pan imimi, la sinela po pan imimi paþisi. E pogos nene, yua powo ña ga, ana la apisu naña imimi memloge miava tol imimi paþisi, ana la apirani kapi, apisuar ruru imimi sanene. ³ Ana Pol pa þar lukilar na yato tai, pisape kuan va e kapi, ana pogos naña kuan pa e kapi, narin loñara tai talinar naga teke likan yato la nene, pogos naña mloge kapi mlege, ana molue e lukilar na yato nene, talinar naga e limana ne Pol, karia. ⁴ Ana pogos naña yaru nae e yo nene lala apisu loñara nene na kilañaren yaru telan teke e limana ne Pol sanene, la apisamumun ga pan la, apisape “!Ovisu yaru na yuña naloge viowaena nene, pona naga pe yaru tai naña ñe moñar ga yaru la moki yo! Sive pisape kilañar naga, ana naga pure ga, ana nanagane na, loñara nene tol ruru nena naga na teke ne.”

⁵ Ana Pol silinlua si loñara nene petan limana mloru pa e kapi, ana mloge re nena suri tai poli, limana pe mlae re nena ga. ⁶ Ana asuña apisuar ña naga, asitom asape þisi na yepena la monar sirop ve keviu va þisi yo, a visae peraga, pona loru vito tano na mare, ana asuñate ña sanene pano-o peraga, apisu suri nene pe kilañar re nena ga naga. Ana pogos naña apisu naga pogaga, asitom pe taþena narui, asitom asape pona Pol naga pe ntewa tai yo.

⁷ Ana e yo naña mepa ura ea, naga lavisin lokove lala kiena ne suþe na purvanua nene, kiena kia Puplias. Ana þere imimi mepa uña ñana, a pisuar ruru imimi e legiena telu naña mesike memio. ⁸ Ana pogos naña mesike memio la nene, yermarua naña arimana ne suþe nene naga momalio ñeke ñana tog, naga mai, naña yepena la pisun, a ñeþena piowa þarwowea. Ana Pol pa pisu yermarua nene, ana mligan limana tea, mlotuwoia, kila naga pimi po sina. ⁹ Ana pogos naña yeririna taþena lala amloge naña Pol kila sanene e

yermarua nene, la ñena ga naña amai apimi, ana la ñena ga kiela maiena la ñisi. ¹⁰ Ana akekara keviu pañisi e suri la nene, ana asuña añar korenan suri la moki pan imimi. A mesuña e purvanua nene pano-o tol kupario telu, a pogos naña mepiaña sina, la añar kinanena mokliu a suri la naña añar korenan ga pitomi, amligan e kiamimi waa tañena vena iila imimiena e kiamimi mrapa.

Pol la apa atol yo Rom

¹¹ Ana waa tañena naña yoko mokom ea, naga wa tai nae Aliksantrea naña naga ñena ga ñeke e purvanua nene yam piavi rui, monmate ke ga visae pogos na lagi war ro narui. Waa nene, la asikia kiena kia “Kasto a Polakis,” naña kia lua nene na kia kiena ne kiela ntewa lua naña lalua ape kaora, naña la ate kana nono nena sike e purgon waa nene.

¹² Ana memligan yo nini mepano metol ke sina ga yo tai, kiena kia Saerakius, ana mesike e nene legiena telu. ¹³ Ana momolue ke sina ga, mokom varaunia mekirir mekeveve ña yo sanene pano pano-o metol Resiam. Mesuña e yo nene tol legiena wetelu tai, ñisi ana lagi marua tanea tai miyui na po pañisi, ana mekiriri manene laa sane tol legiena lua, mepa metol lowe nae Puteoli. ¹⁴ Ana mepa ura memligan waa ñeke e nene narui, ana moñal wolai lañasia, ana añaure imimi mepa mesike pula tol wik taaga. Ana siraunia, mepisu sane pupia kiamimi yalena e pogos nene lavisì ñisi narui, mepimi ke lavisin pupia pulkumali na yomarava nini narui, naña Rom.

¹⁵ Ana wolai la naña asike Rom, visena pa tol la apisape imimi na memial mepito ke pula narui, ana la amiyalilu mrapan imimi. La apam manene laa perina pañisi, naña lañasia apam asuñate imimi e pulkumali nene naña pupia lлена wilwiliena kiena ne Apias ñeke ea, a lañas apami manene laa sane, apam yalensilau atol pulkumali nene naña yuña telu ñana ne wolawa lala sike ea. A pogos naña Pol pisu asuñate ke naga sanene, naga kekara pañisi, a pisa potena pa Ntewa naña suri nene kila naga mloge po pañisi, a kila naga mloge sane naga ñarera sina. ¹⁶ Ana pogos naña mepimi metol yo Rom, la pe amligan re Pol pa e yuña naloge viowaena poli, ana la apisape naga kilia lual yuña tai naga va sike ea, ana la amligan yaru na kirakiravanena tai naga sike amio.

Kas lua naña Pol sike garu Rom

¹⁷ Ana Pol sike garu Rom legiena telu, ñisi na mligan visena pa pa li na sumonena kiena ne le Yu la naña asike e yo nene, ana pogos naña la apim lele taaga, Pol sun pan la. Naga pisa pan la, pisape “Wolai lala, kiau suniena sanini: inu nepim e nini komin naña e kas nanua ñaro ne, nesike garu Yerusalem, ana kieta yerikawa la akuwan inu nepa e yuña na loge viowaena, siraunia la amligan inu e limana ne yaru naliñereena lala nae Rom naña la apisuar ke kieta purvanua. E inu, pe nekila re nena suri tai pa kieta yeririna lala, a pe nekila re suri tai naña pe mesmesu re e kieta ñelaga poli, pona e visena kiena ne repita lala, ana la akila sanene pan inu narui. ¹⁸ Ana pogos naña naliñereena lala nae Rom la apisuveve ruru suri nene, la sinelan asape nekilia nomolue ga narui, komin la pe añal re suri tai naña kila na ala nakoena van inu vanon poli, sane monar nemare. ¹⁹ Ana siraunia, kieta nasumonena lala nae Yu la apisin sina, ana pa piowa ga ñeke na. La akila sanene, ana nepisu sane pe yo re si po laa rui naña nekilia neva ea, ana mrapa ga naña nekilia neva ea, ana nepisawal nesape Ñarin Suñe ga Sisa nae Rom nene, naga ga monar liñere inu. In na pe sineun re nesape neligan la nae kieta purvanua ava e pupia kumali nae e nini poli, peraga, ana komin naña la akila ñarera manene laa pan inu sanene, nane kila narui nepisape la monar aware inu neimi e yo nini Rom. ²⁰ Nane nesike e nini narui, ana sineun nesape monar akilia suri la nene, ana nepio amiu vena aimi tesu lele taaga sanene vena inu nekilia nesunyun van amiu. Sineun nesape monar akilia naña sen la nene naña asuña apiar inu ke sanene, pe komin re kiau napiowaena lañas poli, ana komin kieta Navisaarena naña ita le Israel make ga tepisape tesuña toñasine ke ga naga.”

²¹ Ana nasumonena kiena ne le Yu la nene naña asike Rom apisa pa Pol, apisape “Suri la naña osuña opisa ke ne, imimi meminue ga. Imimi pe moña re ñaki tai naña pisayu

ko poli, naña molue garu Yerusalem pimi pun imimi, a kieta wolai lañasia naña la akom e naña apimi, ana pe apisayu ko re pan imimi poli apisape okila ke sanene sanene. ²² Ana memloge kioña visena la nene narui, ana sinemimin mesape meloge re laa si kioña sitomena na wa pona kioña nalelagaena, komin naña pe lelaga, memloge towe m̄aga e lepas na nalotena viu nene, ana memloge ga naña yaru lala la asuña apisayu kare ga e yo punu ga.”

²³ Ana la asitere apisape p̄isi na aimi avisu si Pol vanonia e yo nene naña naga sike ea. Ana siraunia, pogos naña la apimi, la moki na moki, ana asuña amiagogon ke Pol, naña siar kolulagi pa ne tol pogos naña mrae pito tano ana naga suña pisi ke pan la na wa. Naga pisawal pan la sanape naña yaru kilia va loyuña e nasuñenena kiena ne Ntewa, a naga suña pian la ke sanape naña navisaluaena kiena ne Mosis amio visena kiena ne navisawalena na sumo lala, la akila merarava ruru naña asape Yesu ga narui, naga pe kieta Navisaarena, naña la m̄ena asuñate ke naga vena imi tamalia la. ²⁴ Ana lañasia amloge visena lala kiena ne Pol sane pe lelaga, ana lañasia pe amlelaga re e poli. ²⁵ Ana naga nene kila na la asike e lepas lua narui, ana asitom p̄ele ga apisape popon āpisi ga rui, ava uña wa. Ana Pol pisa maron suri tai pan la, pisape “Ei, in na nepisu naña Ninuna Wa naga pisa suri na pe lelaga pāpisi ne, nanua sumo, naga pisa visena tai pa repita lala, naña Navisawalena Aisea naga pisawal pan la. Naga pisa, pisape

²⁶ *‘Ovanon kieta yeririna la nene, ovisawal van la sanini, ovisave “P̄isi na aloge vano vano-o, ana tāpatete aloge kilale pogos tai,*

p̄isi na avisu vano vano-o, ana tāpatete avisu kilale pogos tai,

²⁷ *komin naña amiu na sa ga yaru la naña kiela sitomena lala marmare,*
sa naña aposino pulkiligala,

a sane la āpelawa p̄isi rui.

Visae la ve akila re ve sanene,
vera na kilamarala lala kilia visu kilalea,
a kiligala lala kilia loge kilalea,

a kiela sitomena kilia sitom kilalea,

ana ve sanene la akilia avilon la aimi pun inu vena nekilia netamalia la.” ’ *Ais 6:9,10*

²⁸⁻²⁹ A nanagane, nevisa van amiu, nevisave monar akilia sane natamaliaena kiena ne Ntewa nene naga molue rui pano pa tol la naña pe ape Yu re poli, ana la asuña amloge ke ne a p̄isi na la ke narui la alogearia!”

Ana pogos naña Pol pisa maron kiena visena nene pan la, la apiaña, naña la asuña apeveyun la ga narui.

³⁰ Ana Pol sike e yo nene sanene pano-o tol kas lua, a naga ga pul m̄ana yuña, naga ga suña pisuar naga. A yaru ai naña pimi pisuia, ana kekarana ga naña were va uña m̄ana,

³¹ ana sanene, naga suña mlologon ke nasuñenena kiena ne Ntewa silaga pa yaru la punu ga naña naga m̄al la. A naga suña pian ke Supe Yesu Kristo pan la, naña pe yaru tai pisi re si pan vanon poli, pona pisaluñar naga pisape naga ve kila re sina.

Ñaki Naña Pol Siria
 Pa Pan Li Nalelagaena Wa Lala Nae Garu
 ROM
 Visayuena Na Tusi Nene

Komþasnen suniena plas na tusi nini

Pol siri ñaki nini vena kila ruruen kiena mrapa, naña sinenan sape va visu li nalelagaena lala gar Rom. E kiena sitomiena, naga sinenan sape yuñae re yam ve plas ga amio li nalelagaena la nae yo nene, vena siraunia aiila naga naña sinenan sape yalen silau va garu Spen. Pol kilia ruru naña visae yaru lelaga e Yesu Kristo, a imi ve yaru kiena Yesu naña taveve kiena þelaga e kiena maliena, yaru nene yoko ve yaru mesmesu e marana Ntewa. Ana komin suri ne na nene, naga siri ñaki nene vena visawlaen þelaga na lelagaena naña po van li nalelagaena lala gar Rom. Tusi nini puara purþesnen sitomiena kiena Pol e mrapa la naña yaru kilia lelaga e Kristo.

Sumo, naga pisa pokolemalo pan li na suñare lala nae Rom, a pisawal panla sape naga suña mlotu wola. Ana siraunia, pisawal si purþesnen sitomiena na ñaki nini, naña pisape “Lologena wo nene naga suña kilologia ke þelaga lala naña yaru kilia imi mesmesu e marana Ntewa. Siar e purþesia va tol luwasia, þelaga nena ñalivi ke e ita kom ga e lelagaena.” (1:17)

E tusi nini, Pol pisayu ruru va moki kiena purþesnen sitomiena. Naga sape yaru make ga, pe suri korena ga naña visae ape lus nae Israel pona pe ape lus nae re Israel poli, ana ita punuga maran taaga, tesike vatanon ñareraena na milamulena viowa.

A yaru kilia imi ve yaru mesmesu e marana Ntewa, visae naga lelaga ga e Yesu Kristo. Suri si tai, Pol pisayu maliena naña yaru sikol ruru naga amio Kristo, e malena vii naña yaru pimi mesmesu e marana Ntewa. Yaru naña lelaga e Kristo, naga pe marawo amio Ntewa, a Ninunane Ntewa kilia visaruru kiena maliena, naña kilalua naga vetan milamulena viowa, a kila naña ñareraena na milamulen viowa amio marena pe aþuar re si naga poli. A siari e marana na keviu 5 pa tol marana na keviu 8, Pol pisawal sanape naña Ntewa mila navisaluaena pa kiena yeririna na sumo lala, a pisawal ñena þelaga naña Ninunane Ntewa suña miyuñae ke e malena kiena yaru naña mlelaga e Yesu Kristo.

A naga pisayu ñenaga naña lus nae Israel lala, a la naña pe ape lus nae re Israel poli, la punuga akilia asikol la e namaplarena naña Ntewa Kila vena yaru na yomarava la atavevea. Pogos naña sape visi þisi narui, naga sape þelaga naña lus nae Israel la asuña apilon ñasila pa Yesu, Ntewa naga kilia sape yoko ve sanene, ana kila naña naga sinena miyee makega yeririna na yomarava, ana pitetalia Yesu pimi, vena ita naña telelaga ea, tekilia teimi mesmesu e marana Ntewa. A Pol mlelaga sape lus nae Israel lala, yoko la na taþatete avilon masilia va Yesu silaga, monar avilopu la yam tai.

Pito e luwasnen ñaki nini, Pol pisayu þelaga naña li nalelagaena la monar atavevea e kiela maliena lala, a metavan ñena nanene pisayu þelaga naña ita monar sineta si yaru taþena lala. Pisayu þelaga naña yaru tavevea e yuñaena kiena Ntewa, a þelaga naña li nalelagaena la monar akila van þarin suþe lala na purvanua, pona va yerikawa taþena lala. A naga pisayu þelaga naña li nalelagaena la monar asitom ruruia vena re akila kare re sitomena kiena yaru taþena. E luwasnen kiena ñaki, naga amio kiena erau lala apisa kiela visena na potena pan kiela erau taþena lala garu Rom, a kiena visena maro, pisawal visena tai na yeluaren Ntewa.

Komþasnen tusi la na nini

Visena þesa amio purþesnen sitomiena na ñaki 1:1-17

Yaru makega monar awar malena vii naña Ntewa kian pimi 1:18—3:20

Mrapa kiena Ntewa na tamaliaen yaru 3:21—4:25

Maliena viu kiena yaru naþa sikol naga amio Kristo 5:1—8:39
 Namaplarena kiena Ntewa pa kiena lus nae Israel lala 9:1—11:36
 Ñelaga wo naþa li nalelagaena la monar ataveveia 12:1—15:13
 Visena maro 15:14—16:27

Visen þesia

¹ Erau nae Rom lala:

Inu Pol nevisa pokolulagi pona pokolemalo van amiu e kia kiena Yesu Kristo, naþa in na nepe kiena yar na yuþaena, in na nepe nalologena ke naþa Ntewa pio inun narui, mligan lua inu vena neyuþaen navisawalen kiena lologena wo viu nene.

² Lologena wo nene, naga sike loyuþa e visena lala na Nasiriena Wa kiena ne Ntewa rui, nane e visawalena lala naþa kiena navisawalena lala apisawal na konua konua rui pimi. ³ Pupia sur naþa lologena viu nene pisawalia, nane Yesu Kristo kieta Suþe, naþa pe narina ne Ntewa naþa mligan naga pimi malivin ita e yomarava nini. Naga ke narui naþa e lepas na mratava puna, tekilia tevisave naga molue nenaga e lus kiena ne yermarua Ñarin Suþe Tepet. ⁴ Ana e lepas na ninuna, naga pe wa paþisi, naga molue ruru nenaga kome lus kiena ne Ntewa. Aþeþar naga mare, ana e kiena pupia mareraena, Ntewa kila naga mal ruru sina ga. Ana tekilia tevisu kilale ruru tesape lelaga, kieta Suþe nene naga pe narina ne Ntewa kemua lelaga.

⁵ Naga ke narui naga pisirlua inu nepe nalologena, a mligan lua inu vena nevano e þegas nen yeririna taþena la naþa pe ape Yu re poli, vena la mena ga akilia alelaga e Ntewa, vena akilia alogear kiena visena. Yuþaena na sanene naga pe nalaena wo tai naþa Suþe mla pan inu, ana nekekaran nakilaena vena kiena kia va metava.

⁶ A nagane, nesuþa nekila ke yuþaena nene e amiu, komin naþa amiu mena kiamiu kia sike loyuþa e, amiu mena amio li taþena la nene naþa Ntewa pio la, vena aim ave yeririna kiena Yesu Kristo. ⁷ Amiu yeririna mena la naþa naga sinen si amiu paþisi, naþa naga pisirlua amiu ape kiena li nalelagaena wa lala e pupia pulkumali naþa Rom, nane nekekaran manene narui nesiri maki nini piþasu pan amiu.

Nesiri sanene, nemlen nesape lemamiena a nasinesiena kiena ne Arimata Ntewa amio kieta Suþe Yesu Kristo, pimi keviu e kiamiu malena la peve taaga.

Pol sitom manene paþisi vena va malivin la gar Rom

⁸ Sumon naþa nevisawal sur laþas van amiu, nemlen e kia kiena ne Yesu Kristo, nepisa potena keviu pan kieta Ntewa vanon amiu. Nesape nekila ve sanene, komin nanagane, visena e lepas na kiamiu þelaga wo na suþalun mareraena e lelagaena e Kristo, naga suþa pa mlewo make yo moki narui. ⁹ Sur nene kila nekegara paþisi, komin naþa nemiyuþae kiena ne Ntewa nakonua rui nemio kiau malena wetelu, nemiyuþaen visawalen lologena wo naþa pisayu narina. A naga kilia ma naþa nesuþa nesitoþal amiu silaga e kiau leniena, ¹⁰ a nesuþa nepiun ke mena tania nesape visae mesmes ga e kiena nasinenanena, yoko naga kila kiau mrapa vena nekilia neim noþalivin amiu. ¹¹ Sineun manene naþa neim nevisu amiu vaþisi, a visae nekilia neim nelipere re nalaena kiena Ninuna Wa vena kila amiu aþarera laa sane, vera na wo vaþisi. ¹² Nemlelaga nesape kiau viawaena kilia iilar amiu, a sineun neimi vena kiamiu viawaena kilia iila inu mena ga, a visae sanene ita tesuþa temiila ruru ita ke sina ga.

¹³ Erau lala, sineun nesape akilia naþa sane yam mok liu, noþion viþasen pun amiu paþisi, ana silaga mrapa pe po re poli komin sur laþas suwo ga yo, kila narui pe nepiþas re poli wa. Ana sineun iþasen paþisi, vena kiau yuþaena kilia war mrasa e amiu naþa amlelaga rui, sa naþa þar mras rui e la naþa pe ape Yu re poli e yo taþena lala. ¹⁴ Yuþaena naþa sike e luþau naga sanini, sane monar nelologo nenaga van ita, ita le Yu lala, a van mena yeririna taþena lala, a monar nelologo van la naþa akilia suria a la mena naþa pe akilia re sur poli, ¹⁵ nane kila narui sineun neim nevisawal lologena wo van amiu e kiamiu pupia pulkumali naþa Rom.

¹⁶ Lologena wo nene, nane mrapa taaga ga naþa nañmareraena kiena ne Ntewa miyuñae ea vena la tamaliaena van yaru, kila sane silaga pe nemawan re visawalen poli. Lologena wo nene pimi ñaliv þesan pun ita le Yu lala, siraunia mlewo palilue pun la naþa pe ape Yu re poli, ana yar ai naþa lelaga, yoko lual malena ea. ¹⁷ Lologena wo nene naga pe kieta mrapa na kilaen naþa teim temesmesu sina e marana Ntewa, vena ve tetol re si nakoena vanon kieta mlamulena viowa lala, ana popon tekilia sane monar tesiar amio naviawaena, a yoko toþisin amio naviawaena, komin naþa sane visena marua tai kiena ne navisawalena Aþakuk pisa, pisape
 “Yaru naþa visae wasine ga Ntewa,
 yoko Ntewa kila naga imi mesmes ruru nenaga, nane mrapa nenaga nene vena tolen malena.”

¹⁸ Mrapa na tolen malena toña ga, ana þarñmarera a napiowaena pule manene laa likan yeririna la naþa pe ape Yu re poli e yomarava nini, kila sane asuwo manene visena lelaga lala kiena ne Ntewa, ana sanene tepisu naþa Ntewa sike ma e peni, kiena sinemimiena monar imi ñalivi kilapel la nenaga. ¹⁹ Naga suña þi plan ke kiena þelaga wo lala pimi ñalivi e yometava e maran yeririna la rui, ana popon avisu kilalea, ana pe sinelan re kiliaena poli. ²⁰ Lelaga sane Ntewa naga pe pe yar re poli, ana yar taþatete visuia, ana siar e nasiiena yomarava nini pimi tol nagane, yar la asuña apisu ke kiena þelaga wo lala, ana akilia apisu kilale asape naga pe Ntewa kemua lelaga. Visae avisu ga kiena nasiiena lala vera na taþatete si aviun avisave aña naga ai.

²¹ Visae peraga, akilia asape Ntewa suña ga, ana pe akilali re naþa sinelan akila kiela sitomena su vatanon poli, pe akilali re naþa sinelan visaen potena van poli vanon kiena nawoena la pan la. La pe asitom re sur ta poli, pano pano-o kiela sitomena lala pulen make ga yemalolo. ²² Asitom ke asape ape manmarua, ana apa ape wowe make la, ²³ a pe amlotun re si Ntewa naþa taþatete si mare pogos tai poli. Yepel mavin ga naga, ana amiyuñae ga nono la naþa aþar maran yaru pona maran manu pona maran sur mal la ne sane nopi lala pona ya, ana asitom ke asape alotun ga sur la ne sanene narui.

²⁴ Pogos naþa akila sanene, Ntewa sinen maren kiela þarñmarera la nene, ana mligan la vena asuña akilakila ga napiowaena ya naþa la sinelania. E pogos nena nene narui tevisu naþa yar la asuña akila þelaga na mawaena lala e tasnela, ²⁵ a monar ve sanene, komin akovenlua visena lelaga kiena ne Ntewa, amligan visokanena kus lelana, a pe amlotu re si Ntewa naþa popon ayeluar kiena kia wa silaga, ana apatanon ga sur la naþa naga sii la.

²⁶ Apilopu kare suri make sanene, ana Ntewa pe pisaluþar la re si poli, ana tañan la apa akila þarila amio kiela nasinenanena viowa lala. Sa naþa sira lala pe apa re si amio yerñene poli, ana apa amio ke sina ga sira, ²⁷ a yerñene ñena lala pe asitom re si asape popon atalopa amio sira poli, sa naþa Ntewa pisa pisape popon akila, ana la asuña sinelan ga yaru, asuña apa amio la ke sina ga e þelaga naþa temawan visayuena. Yuñaena la ne sanene pe mesmes re nena poli, a la naþa asuña akilakila ke sanene, yoko e kiela malena lala, alual ga nakoena la naþa torokin yar naþa kila sanene monar kusia.

²⁸ Yar sur la ne sanene, pe asitom re Ntewa poli e kiela malena lala, pe sinelan re ñena kiliaena poli, ana Ntewa pe pisaluþar la re poli, ana mligan la vena kiela sitomen viowa lala were la ava nena e þelaga viowa lala. ²⁹ Akila ña sanene pano-o opisu kiela malena pimi pulen þelaga na kilaroen navisaluaena, amio napiowaena lala, navinayaena, amio sitomen viowa lala na kila kareen yar taþena. Amloi, añemoñar yar lala, apeveyun la, apisokani, sinela kar yar taþena lala, asuña apisasayu la, ³⁰ apisatañela, a e lepas kiena ne Ntewa, la pe sinelan re nena ga. A amio þelaga viowa la nene, ape þarñmarera paþisi, aþarwar la, apis vilave, amaplar na kilaen sur viu viowa lala naþa nanua sumo na peraga, a pogos naþa kiela yermarua la apis pan la, pe sinelan re nena loge laen poli. ³¹ Yar la nene tekilia tevisave la pe ape manmarua re poli, pe apuarar ruru re kiela navisaarena poli, pe ape lemm re poli, pe kiela nasineyena re nena poli.

³² Akilia ruru visena kiena ne Ntewa, akilia m̃a naṗa Ntewa pisaar marena pa yeririna la ne sanene rui, ana pe asitom re nena ga. Asuṃa akila luen ga sanene, a metavana, akekaran manene paṗisi naṗa visae avisu kiela erau taṗena la asuṃa akila ke viowa sanene amio la.

2

Ntewa naga taaga liṗere yaru lala

¹ Sanene, visae ko na yere Yu tai naṗa osuṃa opisu ke napiowaena kiena yaru taṗena la nene, yoko ositom ve sanape? Pona ositom osape ko na opo, la apiowa ga, ana peraga, napiowaena naṗa teke e ko maran taaga, ana taṗatete si ovisa sur tai. Ko ope yar na liṗereen yar taṗena lala, ana osuṃa omliṗere ko ke ga ne, komin osuṃa okila ke sur torokin ke naṗa omliṗere la vanonia. ² Ana sane tekilia m̃aga, yoko Ntewa la nakoena va la make naṗa akila piowa sanene maran ve taaga.

³ Pona ko tai naṗa ositom ke osape ko na opo yo, komin naṗa opis ke pa yar na kilaroen navisaluaena, ana ko m̃ena ga osuṃa okilarovia, ana pe pon re ositom ovisave yoko nakoena naṗa Ntewa lavia taṗatete tol ko. ⁴ Pona ositom ke osape Ntewa pe lemam paṗisi yo, naga sinen miye yaru, pona kiena sitomena piavi, nane ositom ke osape taṗatete kila sur tai van ko yo? Ee, Ntewa po paṗisi sane osuṃa opisa ke ne, ana kiena lemamiena pe taṃan ko re naṗa osuṃa okilaroro navisaluaena poli, ana vena were koena ovilon ko vetan mlamulena viowa naṗa osike ea.

⁵ Ana ko na pe otaṃan re nena naṗa ovilon ko poli, okila luen ga ṗar m̃arera pa m̃aga, ana sanene osuṃa okila naṗa omiuonpolo ke kioṃa nakoena lala vano tol pogos naṗa yoko sinemimiena kiena ne Ntewa liṗere nena yar lala. ⁶ E pogos nene narui yoko naga vion plan van yar lala toroki taveve sa naṗa la asuṃa akila ke ne.

⁷ Sane yeririna la ṗasa, apa rurula ga, asuṃa akilakila ke ga ṗelaga wo la silaga vena kiela kia la wo e marana Ntewa, akilia kila naṗa atol naurarena nae peni. Ya naṗa Ntewa la van la, naga malena naṗa ve uro re.

⁸ Ana la ṗasa, ape yar na veveyuena, pe amlelaga re e visena lelaga po, asike ga vatanon m̃areraena viowa. Ya naṗa yoko Ntewa la van la, naga naliṗereena naṗa molue e pupia kiena nasinemimiena ga. ⁹ Yoko pogos m̃arera amio naloge viowaena imi tol make yeririna la naṗa akila ke piowa, siar e la naṗa Ntewa pisir plan la ṗesania, nane le Yu lala, va tol yar taṗena la naṗa pe ape le Yu re poli.

¹⁰ A la naṗa kiela malena po, yoko atol navisa ruruena kiena ne Ntewa, yoko kiela kia su ruru amio naga, kiena suṃare sike amio la. A naga m̃ena nene siar e le Yu lala, va tol yar la naṗa pe ape Yu re poli, ¹¹ komin Ntewa naga pe pisuveve re sane yar tai pe taṗena poli, ana naga kila po maran taaga pan la.

¹² Le Yu la asike vatanon navisaluaena rui naṗa Ntewa mla pan la, ana visae akilaro navisaluaena nene, yoko Ntewa la nakoena van la. A yar la naṗa pe ape Yu re poli, pe atol re navisaluaena nene poli, pona pe akilia re ya naṗa navisaluaena nene pisa poli yo, ana visae akila viowa, yoko la akovio. Sanene, mlamulena viowa sike e ita punu ga maran taaga, ana yoko Ntewa monar liṗere make ita ga.

¹³ Yar la naṗa amesmesu e marana Ntewa, pe la re naṗa akilia ga ya naṗa navisaluaena pisa poli, ana la naṗa Ntewa kekaran sape were la, naga la naṗa kiela malena taveve ruru ke ya naṗa navisaluaena pisa narui. ¹⁴ Yar laṗasa pe ape le Yu re la poli, aminue navisaluaena kiena ne Ntewa, ana pe sur koren ga, kiela malena po pano-o, kiela ṗelaga sa ga naṗa navisaluaena kiena ne Ntewa sike amio la rui.

¹⁵ La sa ga naṗa ya naṗa navisaluaena suṃa pisa ke ne, sike e losinela rui. Sanene, pogos naṗa amloge visena kar lala apisa pan la asape ova e nene pona ova e nene, ana kiela sitomena wo suṃa pisawal ruru ke pan la e ya naṗa po a ya naṗa piowa.

¹⁶ Sa naṗa lologena wo naṗa nesuṃa nemlologonia pisa, pupia legiena naṗani suṃa pimi ke ne, a e pogos nene, yoko Ntewa la va Yesu Kristo vena visuveve ruru sitomena

kiena yar lala, vano-o tol sur naŕa amlawan ruru teke e losinela, a liŕere sur la naŕa akila, vano tol nena naŕa asitom asape pe yar kilia re poli.

Le Yu lala amio navisaluaena kiena ne Ntewa

¹⁷ Nepisu sane popon nevis si va laa sane wa e lepas na sur la naŕa ita le Yu lala tesuŕna tepisa. Tesuŕna tepisayu ke sanape naŕa ita ke narui ita na tetaveve ke navisaluaena kiena ne Ntewa, tesitom ke tesape ita ke narui naŕa Ntewa sinenan ita pa laa sane wa, ana kila narui kieta sitomena la pa manene laa metava.

¹⁸ Tepisa ke tesape tesukul ruru po e navisaluaena kiena ne Ntewa, kila narui tesitom tesape ita ga tekilia ruru Ntewa amio kiena nasinenanena, ita ga tekilia ruru sur la naŕa lelaga pona naŕa mesmesu napo. ¹⁹ Ita tesuŕna tepisa ke tesape ita le Yu ga lala topon naŕa tesumon la naŕa pe ape Yu re poli, komin naŕa tepisape la ape kilamara ŕala naŕa pe akilia re mrapa poli. Toŕnape ita ga tepe yomerarava kien la naŕa asike e yemalolo, ²⁰ ita ga topon naŕa takawe ruru yaru naŕa kila pal mrapa, ita ga tetorokin naŕa tevian ruru la naŕa asa ga sisi lala, pe akilia re sur poli.

Ana sineun nesape nevis re e lepas nene, sane pogaga naŕa tepisu kilale sane navisaluaena kiena ne Ntewa pulen make kiliaena wo lala a visena wo make la rui, ana piowagan ga naŕa tesuŕna tesape naga pe kieta ga. ²¹ A sur si tai naŕa piowa manenea metavan nene, toŕmareran vianen yar taŕena lala, ana nepisu sane pe tepian ruru ita re si poli. Visae olologon naŕa ovisave yar ve vinau re sina, ana popon naŕa ko na osuŕna ovinau ŕnaga? ²² Ko naŕa opian ke yaru osape monar ve akila re kolau, komin ya ne ko ŕnena okila? A ko naŕa opisa ke osape nono la naŕa la amiyuŕnaenia, apiowa ga, opisa tanea, ana ko ŕnena ga, pona osuŕna opinaun ke sur la ne pe kol naŕa amligan sike e kiela lele wa lala, a?

²³ E lele nene monar tevisave piowa paŕisi wa, komin ita la naŕa toŕarwar ita vanon naŕa toŕar Navisaluaena kiena ne Ntewa, ana tesuŕna tekila kare ke sina kia wa kiena kieta Ntewa ne, komin naŕa tesuŕna tekilaroro ke kiena navisaluaena la nene. ²⁴ Visena Wa pisayu ke kieta ŕelaga nene rui, pisa sanini sape “Amiu yeririna lala kiena ne Ntewa, kiamiu navisokanena kila sane yar taŕena lala asuŕna apisa kare ke kiena kia.”

Yaru naŕa pe yere Yu kemua lelaga

²⁵ Ko osape ope ŕaviu rui, ana ope Yu kemua lelaga, nanene na po paŕisi. Ana sur nene miila ko visae ologear ga navisaluaena kiena ne Ntewa. Ana visae okilarovia, ko ope Yu korena ga, ko opiowa pa Ntewa sa ga la naŕa pe ape ŕaviu re poli. ²⁶ Ana pona yaru tai pe sa re le Yu la naŕa ape ŕaviu poli yo, naga pe pe ŕaviu re poli, ana visae yar nene logear ruru Navisaluaena lala, e navisuena kiena ne Ntewa naga imi torokin ga yere Yu narui. ²⁷ Yere Yu naga pe ŕaviu rui a mla ke navisaluaena, ana visae pe mlogear re poli, monar visuar ruruia, visae peraga, yoko Ntewa kovenlua naga, a were taŕena naŕa pe pe ŕaviu re poli ana mlogear kiena navisaluaena.

²⁸ Nanene komin e navisuena kiena ne Ntewa, naga naŕa pe yere Yu kemua lelaga, pe naga re ga naŕa pe Yu e kulus poli. Ana ŕaviu naŕa Ntewa pisu sane lelaga napo, pe naŕa re ga e tas nen yar vanua poli.

²⁹ Yar naŕa pe yeririna kiena ne Ntewa lelaga, pe naga re ga naŕa ŕuarar nasiriena wa e limana poli, ana naga yaru naŕa Ninuna Wa miyuŕnae ke e losinena, naŕa kiena malena pilonia pimi po. Yar na sanene, pona yeririna la asitom ke asape naga pe pe yar re tai nene poli yo, ana Ntewa kekaran naga paŕisi.

3

Sur wo naŕa sike e le Yu lala

¹ Nepis ke sanene, pona naviunena tai ŕmalivi yo, viun sanini, visave “Visae yere Yu maran ve taaga ga amio yar taŕena lala, sa naŕa osuŕna opisa ke ne, komin ya ne kia naŕa

Yu naga po, a tesitom ke tesape ita na tepe sur tai? Naþa tekila þaviu e ita, vena teim teve le Yu kemua lelaga, ana pona pe sur koren ga yo?”

² Naviunena nene mesmes ga, ana nevisataþnea nesape, Peraga, toþar kia na Yu, naga pe pupia sur wa tai naþa po manene laa pan ita. Lus kiena yeririna ai sina naþa Ntewa mligan kiena visena wa sike e limala? Pe yar taþena kar re la poli, ana ita le Yu ga lala. ³ Pe lelaga naþa kieta yeririna la þasa pe amlogear re visena kiena ne Ntewa nene poli, ana naviunena sike na sape: Sanape, pona yoko Ntewa ve visa ruru ita re sina sa naþa naga pisaaria sape yoko kila? Ana pe sa re nene poli. Pe sur koren ga naþa laþas pe apuarar ruru re visena kiena ne Ntewa poli, ana pe Ntewa purmatan li re kiena navisaaren e ita pogos tai poli wa. ⁴ Pona ita yeririna lala ita tepisokan lue ga, ana Ntewa naga pe lelaga lue ga, sa naþa Þarin Suþe Tepet pisa e kiena Tus na Yauena lala, naþa pisa sape “Yoko avisu naþa ko ope lelaga kemua e kioþna visena lala vena liþerelaena, a yoko sinelan liþere koena sina ga, ana ko na omesmesu ga na osike ne.” Yauena 51:4

⁵ Kieta napiowaena lala apioyowa ga, ana sur tai naþa po towe laa ga, napiowaena la nene akila merarava e maran yeririna lala asape navisaluaena kiena ne Ntewa la naþa apisalupar ke napiowaena la nene, apo na apo. Nepisa sanene, pona visae yoko yar laþas naþa þarila pe wowe asuþmalu avisave “Visae kieta napiowaena la akila sur wo nene, komin ya ne Ntewa sinena kar ita sape la si nakoena van itania?” Ana peraga, nanene sitomena kiena yaru ga, ⁶ pe sa re nena nene poli! Visae Ntewa ve liþere ita re le Yu lala, ana pe pon re naga liþere li taþena la naþa pe ape Yu re poli, ana peraga, naga mesmesu nena ga, a naga taaga torokin liþereena.

⁷ Naviunena si tai ve sa nene kilia vim, naþa pisa sanini, sape “Nanua sumo nesape nemlelaga e Ntewa, ana siraunia pe nemlogear re poli, ana sa naþa nesuþna nepisokan ga. Ana kiau visokanena nene suþna pisawal ke sape visena kiena ne Ntewa ga pe lelaga paþisi, a sanene na suþna kila kiena kia pa metava. Ana visae ve sanene, komin ya ne naga sinena sape liþere in ke na wa, sape in na nepiowa ga?” ⁸ A þisi na yar la þasa avilon visena la ne sanene va ve taþena laa na wa, avisave “Visae þelaga viowa visawal visave visena kiena ne Ntewa pe lelaga, popon tesuþna tekilakila þna mlamulena viowa la ve moki silaga, vena kilaen visena kiena ne Ntewa ve lelaga laa sane.” Laþas apisape nesuþna nemlologon ke sanene, ana naga nene na visokanena ga, a la naþa asuþna apisa, yoko akus naliþereena torokin kiela visen viowa la nene.

⁹ Nesape nowasuþe in sina e sur naþa tepisayu ke þa rui, tesape yar na þar kia na Yu, yoko ve sanapenia? Pona yar laþasa, naviunena sike e la yo sape yoko wo vaþisi vania taulu yar naþa pe þar re kia nene poli, pona peraga? Pogaga, kiau navisataþneena nesape ve sa re nene poli. Sa naþa nepisa þa rui, le Yu amio le Kris lala, la make ga asike vatanon þareraena na mlamulen viowa maran taaga. ¹⁰ A sane visena na Tus Wa pisape “Pe yar re nena tai naþa kiena malena po poli.

¹¹ Peraga, pe yar re nena tai naþa pisa kilale mrapa poli,
pe yar re nena tai naþa suþna kilali ke sape lual Ntewa e kiena malena poli.

¹² Yeririna make ga apilipal ga mrapa naþa mesmesu, apa apiowa manene laa.

Pe tai re nena naþa miyuþmae po poli.

Yauena 14:1-3

¹³ Kiela visena piowa ga, sa ga yar mare naþa kona rui,
purmenela suþna miyuþmaen ke ga visokanena,
navisa kareena la naþa suþna þnalivi ke e kulugola lala, sa naþa loþara viowa karþar yaru.

Yauena 5:9

¹⁴ Lelaga þa, gola lala pulen ga viaiena amio visen melkalka lala.

Yauena 10:7

¹⁵ Lala lala suþna þar la akirkirir kar ga la ne vena kilaen kuruta lau,

¹⁶ kiela yalorena lala apa akila kare make suria, akila yaru la amloge piowa.

¹⁷ Pe asitom re asape mrapa na suþmare tai sike poli,

Ais 59:7,8

¹⁸ pe apisu kilale re nena asape Ntewa suþna pisa la ke poli.”

Yauena 36:1

¹⁹ Ee, visen la nene amolue kome Navisaluaena kiena ne Ntewa, a tekilia tevisave ya naþa Navisaluaena kiena ne Ntewa pisa ke ne, kiar ita ga le Yu lala. Ita tesike vatanon

Navisaluaena nene, a yar naþa pisu kilale ya naþa navisaluaena nene pisa, naga pe kiena visena na visaen re si po, naga kilia sape yomarava wetelu kilarovia, yar make ga akus nakoena vanonia. ²⁰ Pe yar re tai naþa logear Navisaluaena kiena ne Ntewa torokin vena naga kilia mesmesu e marana, ana Navisaluaena nene kila sane yar make ga akilia ruruia asape mlamulena viowa sike e la.

²¹ Ve sa nene, mrapa na logearen visaluaena, yar la taþatete atayu nena aimi amesmesu e marana Ntewa, a nane kila sane Ntewa pisu popon kila ruru mrapa viu taþena tai naþa tekilia tetavevea.

Mrapa viu nena naga po paþisi, komin pe kana navisaluaen re la naþa yar monar logear la poli. Mrapa nena, nasiriena marua wa lala amio visena kiena ne navisawalena lala, apisawal mña ve torokak nanua sumo rui, ana nagane Ntewa kilologia pan ita rui.

²² A mrapa nena naga sanini: pe mrapa nalelagaena. Sanene, yar ai naþa viawa e Yesu Kristo, yoko Ntewa kila naga imi wo e marana. Mrapa nena pe kiena yar re ga laþas poli, ana pe kien yaru make ga, ²³ komin yar make ga amlamla piowa, pe ta re poli naþa kiena malena mesmesu va torokin naþa tol malena wo naþa Ntewa sinenania.

²⁴ Ana pogaga, komin Yesu Kristo pul lua ita rui, kila naþa Ntewa kila ita tepim temesmesu e marana, sane kiena nalaena tai pan ita, naþa mlavia pimi ga kome kiena lemamiena. ²⁵ Naga pul plan ita komin naþa Ntewa pisirlua naga sane kuþaþaena tai naþa kana kuruta mlau kee plan kieta mlamulen viowa ita la naþa temlelaga ea.

Ana sanapen yeririna la naþa siar e kas la nakonua rui pimi, pogos naþa Yesu pe pimi re poli wa? Pe tepisu re naþa Ntewa mla nakoena pan la vanon amlamla piowa poli, pona sitomena tai sape pona Ntewa mla ga nakoena pan mlamulen viowa kien yar laþas yo, ana yar laþasa pe mla re nakoena pan kiela mlamulena viowa la poli. Ana peraga, naga pe sa re nene poli. Nakonua manenea, Ntewa kila ke ga kiena sitomena piavi, suña piro ke ga kiena sinekar, a kila mña sanene pano-o tol pogos naþa Yesu maren mña mlamulena viowa kien la na sumo. ²⁶ Sanene Ntewa pisawal meraravan pan ita nagane narui sape naga miyuñae po silaga, kila sane yar ai naþa viawa ga e Yesu, yoko ekik ruru nena e marana.

²⁷ Visae sanene, yoko tekilia towarwar ita komin si ya ne? Pe sur re si ta poli, komin ya ne kila ita si tepim topo temio Ntewa? Pe þelaga wo re na tai nalogearen kiena navisaluaena poli naþa tesitom ke tesape tekila yo, ana peraga, kana purþesa, kieta lelagaena ga e Yesu. ²⁸ Kiamimi lologena pisa sanene narui, sape visae yar imi mesmesu e marana Ntewa, naga wasine ga kiena naviawaena e Yesu. Taþatete wasine kiena yuñmaena wo la naþa naga mlogear ruru navisaluaena make ga kiena le Yu silaga, komin naþa taþatete yaru tai kila ve sanene.

²⁹ Sanene, tepisu sa naþa Ntewa pe pe Ntewa kiena ne re ga ita le Yu la poli, ana pe Ntewa kiena ne mña li taþena lala. ³⁰ Ee, Ntewa naga taaga ga, ana pe kien yar make ga, ana visae yere Yu, naga kilia imi mesmesu e marana Ntewa visae viawa ga e naga, pona visae yar naþa pe pe Yu re poli, naga mña ga kilia imi mesmesu e marana Ntewa visae viawa ga ea.

³¹ Ana visena la nene pe pisa re sape þelaga na lelagaena kiena Yesu kovenlua navisaluaena kiena ne Ntewa naþa sike ne poli, sape pe kiena yuñmaena na kilaen re si poli. Pe sa re nene poli, ana kana kinasa sane pogos naþa tesuñma temlelaga ke e Yesu, tesuñma tepatanon ruru ke e sur la naþa navisaluaena pisa, tekila ke naþa ape lelaga.

4

Epraam tepo yoñmarua na vianen mrapa na viawaena van ita

¹ Tesuñma tepisayu ke sane þelaga na lelagaen e Kristo naga pe mrapa na tolen natamaliaena, ana sanapen kata apua la nanua sumo, sane pupia apua na kieta lus naþa yermarua Epraam? ² Naga kila yuñmaena la moki naþa Ntewa kekarania, ana yuñmaena la nene taþatete kila naga mesmesu e marana Ntewa. Visae naga imi mesmes komin kiena

yuñaena lala, pona naga kilia warwar si e yo, ana pe sa re nene poli. Pe yar re tai naña kilia warwar e marana Ntewa vanon yuñaena la naña naga kila,³ ana naviawaena ga kilia kila yaru mesmesu amio Ntewa, sa naña suniena kiena Epraam pisayu e Tusi na Siiena, naña sape

“Epraam naga piawa ñarera pañisi e navisaarena kiena ne Ntewa, ana Ntewa kekarania, mla viawaena nene kiena Epraam, kila narui pimi mesmesu e marana.”

Nas 15:6

⁴ Ositomlia, sane yar naña miyuñaen kilavaru, pogos naña kupario ñisi monar waria ve kiena. Ana ve tevisa re tevisave kilavaru nene naga pe nalaena tai naña kiena yerkawa mla pania molue kome kiena sitomena, ana kilavaru nene, yar na yuñaena nene, ñiyon pañisi naña, ana popon kemua naga waria ve kiena.

⁵ Ana lepas naña yaru imi mesmesu e marana Ntewa, naga pe pe sur re tai naña teyuñaen vanon poli, naña tekilia towaria sane sur tai naña ita ga tetauluia ve kieta. Ita, kieta yuñaena la piyowa ga, ana monar towasine ga Ntewa, naña naga ga kilia war plan napiowaena e kieta malena. Visae towasine ga naga, ana yoko kila ita temesmesu e marana.

⁶ Yermarua Ñarin Suñe Tepet kilia sur nene nanua rui, ana kiena yauena tai pisayu sanapen naña yoko wo vañisi van yar naña pe ñasine re ke sina ga kiena yuñaena poli, ana ñasine ga Ntewa sape yoko naga kekara naña kila naga mesmesu e marana. Yauena nena pisa sanini, sape

⁷ *“Yar naña Ntewa piwo kiena napiowaena lala,*

naña yumu plan kiena mlamulen viowa,

na nene navisa ruruena tai naña yoko wo van vañisi.

⁸ *Yar naña Ntewa pisa naga sane pe namname tai to re si e poli, naña monar war nakoanania, naga yoko kilia loge wo na loge wo.”* *Yauena 32:1,2*

⁹ Ana la naña akilia aloge wo sa naña yauena nene pisape, a la nene? Navisa ruruena nene, yoko tañatete imi ga va ñaviu lala, sa naña ita le Yu ga lala, ana yoko imi ñena va la naña pe ape ñaviu re poli, na nene naga merarava ruru po pañisi, komin sa naña tepisape, Epraam pimi mesmesu e marana Ntewa, pe komin re naña naga pe ñaviu poli, ana pimi mesmesu e marana Ntewa komin ga naña mlelaga ñarera ea.

¹⁰ Ana tekilia sur nene sanape? A Ntewa sape Epraam mesmesu e marana na pogwai? Naga pisa e pogos naña Epraam pe ñaviu pa rui, pona pisa e pogos naña pe pe ñaviu re poli wa? Visae teva si e kiena suniena, yoko tevisu naña Ntewa pisape Epraam mesmesu e marana pogos naña naga pe pe ñaviu re poli wa.

¹¹ Sanene, viawaena kiena Epraam e Ntewa, naga ga nene kila naga mesmesu e marana. E poglis nene naga pe ñaviu re poli wa, ana siraunia, Ntewa mla ñaviu pania sane kile tai naña pisawal sape viawaena ga e Ntewa nane mrapa naña yar imi mesmesu amio naga.

Epraam naga pe yar ñesa naña sanene, ana yar moki apim sirau naña pe ape ñaviu re poli, ana amlelaga e Ntewa ana Ntewa pisa sane amesmesu e marana. La pe amolue re e lus kiena Epraam naapo poli, ana nagane apisu naga sane pe kala apua marua ñena tai,

¹² maran taaga sa ke naña naga pe apua kan la naña ape ñaviu.

Ana nanua sumo, ita le Yu lala tesitom tesape yar naña pe ñaviu sane yermarua Epraam, lelaga kemua naña naga ke narui naga molue kome kiena lusa. Ana nagane, sitomena tai ñalivi naña pisape yaru naña kilia visa visave Epraam naga pe kana apua marua kemua lelaga, nanene pe yaru naña mlelaga e Ntewa sa ke naña Epraam mlelaga ea, pogos naña pe pe ñaviu re poli wa.

Naviawaena kiena yaru kila navisaarena kiena ne Ntewa imi ve lelaga

¹³ Nakonua konua rui Ntewa pisaar pa Epraam sape yoko kiena navisa ruruena lala amolue akome Epraam amio kiena lusia avava vanua va va yeririna make ga na yomarava. Ana komin ya ne Ntewa kekaran sape kila kiena navisaarena nene va Epraam? Pe vanon re ga naña Epraam mlogear ruru kiena navisaluaena poli, komin pogos naña

Ntewa kila navisaarena nene, pe navisaluaena re poli wa, pogos kiena ne Ntewa na laen navisaluaena va Mosis sike koperina wa. Sanene, tekilia tevisave naviawaena kiena Epraam ga kila naga mesmesu e marana Ntewa, nane Ntewa kekarana naŕa la navisaarena wo nene vania. ¹⁴ Visae navisaarena nene pe kiena yar ga la naŕa aŕmal amlogear ke navisaluaena, yoko kila sane yar naŕa mlelaga, mlelaga korena ga ne, a kila sane navisaarena kiena ne Ntewa pe suŕnal re si poli. ¹⁵ Suri taŕena ke sina ga nini, naŕa kila meraravan pan ita sape navisaarena wo kiena ne Ntewa lala taŕatete aŕmalivi e ŕelaga nalogearen navisaluaena. Naga nene komin pogos naŕa navisaluaena sike na, ana ŕelaga na kilaroen navisaluaena monar ŕmalivi, ana siraunia monar kana nakoena nena, komin naŕa pe yaru tai tokon re kilaroen navisaluaena pogos tai poli.

¹⁶ Ve sanene, navisaluaena taŕatete kilia iila ita vena tekila ruru kieta napiowaena e marana Ntewa, ana Ntewa pe lemm manene laa pan ita, ana naga ga kila. Naga pisu naŕa toŕasine ga naga, tevisu ga naga, ana naga kila tetol kiena navisaarena wo lala. Nanene na pe le Yu re ga la naŕa navisaluaena pitomi ŕesan pan la poli, ana yeririna taŕena ŕmena la asikola amio la. Yer pe lala, ana visae akus ŕelaga na lelagaena e Ntewa maran ve taaga sa ke naŕa Epraam mlelaga ea, naga sane la ŕmena amolue e kiena lusa. A ita make ŕmena ga e ŕegas nen nalelagaena teliv piora e yomarava, tepisu sane naga pe pupia kata apua.

¹⁷ A nanene mesmesun ga naŕa Ntewa pisaar pa Epraam nanua rui, naŕa pisa pania sape

“In na nepisirlua ko, ko ope purŕes nen lus nen yeririna lala na purvanua moki.” Nas 17:5

Pogos naŕa Ntewa pisaar sanene pa Epraam, Epraam pe sinen kurkur re poli, ana ŕuarar ruruia, komin naŕa naga kilia sape Ntewa nena naŕa naga pisa visena nene pania, naga pe Ntewa naŕa kilia kila ya naŕa mare imi mali, kilia kila sur naŕa pe su re poli wa vim ŕmalivi. ¹⁸ Pe lelaga, Ntewa pisa sur ta pania ŕmarera paŕisi naŕa naga lelaga ea, komin naŕa pisaar pania, sape

“Kioŕna lus lala yoko aim ave moki na ave moki vaŕisi e yomarava nini.” Nas 15:5

Ana pogos naŕa Epraam mloge, mlelaga ea sape monar ve sa ga nene narui. ¹⁹ E pogos nene, naga kilia sape naga amio wona Sera, kiela mrae lalua lavis vito tano narui, naŕa kiena kasa lavis tol ponotia ve taaga [100], a wona pe ŕarli re sisi poli wa, ana kiena naviawaena pe mlor re nenaga. ²⁰ Naga pe sitom re nena suri ta poli, ana kiena sitomena sike ga e ya naŕa Ntewa pisaaria. Kiena naviawaena suŕna pimi ŕmarera laa narui, a silaga suŕna mieluar ke Ntewa a pisa lue ga potena keviu pania vanon ya naŕa yoko kila. ²¹ Naga pe sitomli re pogos ta poli sape Ntewa naga pe torokin re naŕa yuŕnae taveve ruru kiena navisaarena poli, ²² a kiena ŕelaga na viawaena nene narui kila Visena Wa pisayu si naga, sape Epraam ŕasine ga Ntewa, ana Ntewa pisawal sape naga mesmes ruru e marana.

²³ Ana visena nene pisayu ga Epraam naga taaga, ²⁴⁻²⁵ ana popon tela sane visena tai naŕa pisayu ita make ga, komin ita ŕmena ga temlelaga e Ntewa tesape yoko naga kila ita teim temesmesu e marana sa naŕa naga kila pa Epraam. Temlelaga sane naga ke narui naŕa mligan Yesu pitomin vena tol marena vanon kieta mlamulen viowa lala, a temlelaga tesape Ntewa ŕere lua ke sina ga Yesu petan marena vena kila merarava ruru van ita sa naŕa tekila si mara wo temio naga rui.

5

Tepe mara wo si temio Ntewa rui, tepisu suŕmare a lemamiena

¹ Pogaga, nagane merarava ruru po pan ita sane sur naŕa kila ita tepe mara wo sina temio Ntewa, naga kieta naviawaena e ya naŕa Yesu kila vena tamalia itaena. A pogos naŕa tepisu kilale tesape tepe mara wo temio Ntewa sanene, kila naŕa tepisu suŕmare sike likan ita temio naga, ² a kila naŕa tesu ruru ga tesike e kiena lemamiena silaga. Visae ve sanene, kieta sitomena ŕmareran sape siraunia, yoko ita monar teva loyuiŕna e naurarena kiena ne Ntewa, temio kekarena keviu.

³ A pe tekekaran re ga malena wo naþa yoko imi sirau poli, a tekekaran mēna pog mārera la naþa tesuṃa tepisu ke nagane. Pona temloge piowagan yo, ana teloge won ga komin naþa tekilia tesape naloge viowaena kilia kila sitomena ve piavi vaþisi, ⁴ a sitomena piavi kila þelaga wo va laa e marana Ntewa, a þelaga wo nene kila nawasineen Ntewa va laa na wa, ⁵ a nawasineen Ntewa kila taþatete kieta sitomena lorun sur tai pog tai. Nanene komin naþa Ninuna Wa naþa naga mla pan ita, silaga suṃa kokonia ruru ke sinesiena kiena ne Ntewa va loyuṃa e ita vano vano-o toulen ruru nenaga.

⁶ Tekilia tesape Ntewa sinen si manene ita sanene komin naþa sumo, temloru e þiliþili ta rui naþa taþatete si tekila sur tai vena tamalia ita, ana e nena e kana pogos naþa pisaar pa rui, naga pitetalia Yesu pimin marewo ita yeririna viowa lala.

⁷ Ita na, pe tepisu manene li re naþa yar tai kilia taṃan kiena malena vena tamalia yar taþena poli, pona yam peve taaga yar tai kilia taṃan kiena malena vena tamalia yar tai naþa asitom asape naga po paþisi, ana sur ne nanene narui Kristo kila pan ita make ga naþa ita li viowa lala. ⁸ Nasinesiena kiena ne Ntewa keviu sa ke nene narui, komin pogos naþa ita yar na kilaen mlamulena viowa tekila ke þarṃarera wa, Kristo pitomin mare wo itania. ⁹ Kana kuruta mlau kevan ita temekiki rui, ana tepim temesmesu e marana Ntewa, a kila naþa pe sur re si tai sike e ita poli naþa yoko naga la nakoena van itania. ¹⁰ Nanua, pogos naþa tepe nasinekar kiena ne Ntewa ke lala wa, marena kiena narina kila mara wo temio, a nagane, komin naþa tepe erau wo temio rui, yoko malena kiena narina kila ita mēna ga temal lue temio. ¹¹ Sanene, tekekaran paþisi naþa Ntewa pisirlua kieta Suþe Yesu Kristo, komin naþa naga kila kieta mrapa na mara wo temio, tesu si veraga temio naga.

Atam kila marena pimi, Kristo mla malena

¹² A sur lua nene marena amio malena, lalua apim e yomarava nini sanape? Yar þes na yomarava nini nane Atam, a naga pe purþes nen mlamulen viowa, a kila naþa nakoena na mlamulen viowa, sane marena, monar imi māliv e yomarava. A yeririna la naþa asiraunia, la mēna ga atol mlamulen viowa, ana marena tol la make mēna ga.

¹³ Sumon pogos kiena Mosis, Ntewa pe mla re navisaluaena poli wa, ana pe sur koren ga naþa pe navisaluaena re poli wa, þelaga na mlamulena viowa sike pa rui. Sanene, Ntewa pe mliþerela re e pogos nene poli sape akilaro ke kiena navisaluaena, komin naþa pogos nene, navisaluaena naga pere wa, ana kiela mlamulena viowa la narui kila sane la monar akus nakoena na marena na wa. ¹⁴ Tekilia tesape sanene, komin siar e pogos kiena Atam, pimi tol pogos kiena Mosis, pe navisaluaen re poli, ana yar la asuṃa amarmare mēga, komin nakoena na mlamulen viowa sike e yomarava rui. Pona laþas akila piowa sane Atam kila yo, pona akila mēna sur taþena lala, ana e navisuena kiena ne Ntewa, kiela napiowaena make la nene ape mlamulena piowa torok ga.

Sanene, tepisu ya naþa yar taaga ga nene naþa Atam kila, tol make malena kien yeririna na yomarava, sa ke ga naþa ya ne Kristo naga taaga kila sirau, naga mēna ga tol make kieta malena ita punu ga naþa temlelaga.

¹⁵ A yuṃaena wo naþa Ntewa kila naþa molue kome kiena lemamiena, naga po paþisi, kilia taulu yuṃaena viowa naþa Atam kila naþa molue kome kiena mlamulen viowa. Mlamulen kiena Atam naga taaga kila yar la monar amare, ana nawoena kiena Yesu Kristo naga taaga kila tepim temesmesu e marana Ntewa. Sur nene sane nalaena wo tai naþa toþar korenan ga sa ga ne. ¹⁶ Mlamulen kiena Atam pe kila re nena sur wo tai, ana nalaena nene po pan ita paþisi. Ntewa mliþere mlamulen kien yar taaga nene, pisape yoko pupia kiena nakoena va e yar make ga, ana siraunia, Ntewa pisu nalaena naþa Yesu mla pan ita, naþa pul plan kieta mlamulen piowa lala, ana sape temesmesu ruru e marana rui.

¹⁷ Lelaga kemua naþa mlamulen kiena yar taaga ga, naþa Atam, kila sane marena suṃa taulu ita, naþa kilia war plan make malena kien yar lala. Ana yoko, lemamiena kiena si yar taþena, naþa Yesu Kristo, mla nalaena wo nene pan ita nanagane, kila sane temesmesu e marana Ntewa, tetaulu marena rui, ana siraunia yoko tetol malena wo

temio naga. ¹⁸ Sanene, kana kinas sane mlamulen viowa nene kiena Atam naga taaga ãpere yeririna make ga apa e nakoena, ana siraunia yuãaena wo mesmesu taaga ga nene kiena Yesu, kilia kila plan la make ga e nakoena nene, ana mligan la ase malena naãa ve uro re. ¹⁹ Ana sa ke sina nene, yar taaga pe ãarãarera, pe miyagogon re Ntewa poli, ana kila yar make ga ape yar na kilaen mlamulena viowa, ana siraunia, yar taãena mlogear ya naãa Ntewa pisa pania, ana mare e lak torovia kila narui ita moki naãa tepim temesmesu e marana Ntewa.

²⁰ Nanua, Ntewa mla navisaluaena pa Mosis, a navisaluaena nena suãa kilologia ke yeririna lala sape kiela mlamulen viowa la pule paãisi. Ana pogos naãa mlamulena viowa la suãa pimi pe moki manene lue ga, Ntewa ãena ga pa laa sane, kila sane kiena lemamiena pimi keviu manene laa. ²¹ Nanua sumo, mlamulen viowa ãar marena pimi, a marena nena suãa kila mlamulen viowa tolue ga metava silaga. Ana siraunia, Ntewa kila kieta mrapa vena teim temesmesu e marana, ana nane kila sane nagane kiena lemamiena taulu make suria, komin naãa suãa kila ita make ga naãa temlelaga e kieta Suãe Yesu Kristo, yoko tetol malena naãa ve uro re.

6

Popon toãisin mlamulen viowa, temal temio Kristo

¹ Sa naãa nepisa ga na wa, ita tepe yar na kilaen mlamulen viowa lala, ana Ntewa pe lemam pan ita piewo ita, ana vanon sur nene, popon kieta malena nanagane ve sanape? Pona yaru laãas apisape popon tesuãa tekilakila mlamulen viowa ve moki yo, vena kila sane lemamiena kiena ne Ntewa ãena ga suãa imi manene laa, sa naãa naga suãa pievewo ke kieta mlamulen viowa la nene? ² Ana peraga, taãatete nena ve sanene! Tekilia tevisave e lepas na sinenanen viowa na kilaen mlamulena viowa, ita sa ga yar mare lala, monar toãisin nena ga, ve tekila re sina.

³ Ositomli pogos naãa akee ita vena teve taaga temio Kristo Yesu. E poglis nene, ya naãa ãalivin ita naga torokin ke ya naãa ãalivin naga nanua rui. Sane nanua sumo naga mare wo kieta mlamulen viowa, ana nagane, pogos naãa akee ita, kieta malena marua na mlamulena viowa ãena lala monar mare. ⁴ Sumo, amligan tasnena ãene lele na marena, ana nagane, pogos naãa akee ita, monar teligan kieta ãelaga na mlamulena, toãisin ruru nena ga. A nanua ãena sumo, Ntewa kila yuãaena na iilanena nene, naãa kila Kristo suãalu mal sina, a nanagane, pogos naãa akee ita, tesuãal sina temialoro e malena viu tai.

⁵ Sanene, tepe taaga temio Kristo rui komin naga mligan kiena malena mare e yomarava nini, ana ita ãena ga monar teligan kieta malena marua. Ana tekiliar ruru sane yoko teve taaga si temio ke na wa, komin naãa naga ãar si kiena malena viu tai, a yoko ita ãena ga towar kieta malena viu.

⁶ A monar tesitoãal silaga, sane ãelaga na kilaen mlamulen viowa naãa tepaeme temio, naga sa naãa asuar sike e lak torovia amio Kristo. Sanene, kila naãa ve tekila re si mlamulena viowa la naãa tasneta la sinelan kilaena, a mlamulena viowa taãatete kilia ve suãen kieta malena sape tepe kiena yar nayuãaena ga. ⁷ Popon toãisin mlamulen piowa, nagane ãareraena na sinenanen kilaena mlamulena viowa monar ãisin ita, komin ita na sane yar mare naãa sitomena viowa na mlamulen viowa taãatete kila sur tai van ita. ⁸ Lelaga kemua, nanua sumo, sa naãa temare temio Kristo rui, ana nagane, kieta lelagaena ãarera sape yoko temal lue temio naga narui.

⁹ Tekilia tesape Ntewa kila Kristo mal si petan marena, kila sane yoko Kristo mal ãa vano-o yoko taãatete si mare pog tai, naãareraena na marena taãatete si kilia tol naga pogos tai. ¹⁰ Kiena marena nanua ne, naga pe marena tai na war plan makeen nakoena na mlamulen viowa, a kiena malena nagane, naga pe malena tai na visirluaen kia kiena ne Ntewa, ¹¹ a yoko monar ve sa ga nene van ita. Monar tesitoãalia tevisave ita ãena

ga popon toþisin ruru þelaga na mlamulen piowa, a silaga monar tevisirlua kia kiena ne Ntewa e malena viu naþa tesike ea temio Kristo Yesu.

¹² Sanene, kiau visena urmi e lele nene sanini, sane ve ataþan re kiamiu sitomena la nakilaen mlamulena viowa imi ve sa naþa naþareraena m̄arera tai naþa suþna ve suþen amiu. Visae peraga, tasnemi lala, naþa ape na yomarava ga nini, yoko asuþna alogear ga nasinenanena viowa la na þelaga naþa ita yeririna la tepaeme temio. ¹³ Ana sanene pe po re poli, komin lepas nen tasneta lala, pe pon re aim sane sur na yuþnaena naþa napiowaena miyuþnae amio vena kilaen kiena þelaga viowa ne lala. Sumo, ita sane yar mare lala, naþa malena na Ninuna pe su re nena e ita, ana nagane Ntewa kila ita si temali, ana monar teyawawo kieta malena viu nene va si vania vena naga lavia vena kilaen kiena yuþnaena. Sanene, yoko lepas nen tasneta lala apim sane sur na yuþnaena naþa Ntewa miyuþnae amio, vena kilaen kiena þelaga mesmesu lala.

¹⁴ Sumo, tesike vatanon navisaluaena naþa Ntewa mla pa Mosis, amio kana nakoena nena lala, ana ita toþion logearen pano-o, ana peraga, pe tetorokin re natolen kana natamaliaena poli. Sanene, Ntewa sinen miye ita a nagane suþna miila ita vena nasinenanena na kilaen mlamulen viowa taþatete nena uarar ita.

Mlamulen viowa taþatete si uarar ita, ana ita yar na yuþnaena na þelaga wo

¹⁵ Nepisa ke ga yam tai þisi ne nesape pe tesu re si vatanon navisaluaena naþa Ntewa mla pa Mosis poli, ana nemarau nesape pona yar laþasa amla kiau visena nene pa piowa yo. Pona asitom asape, “Ke, Pol pisape ita na pe tesu re vatanon navisaluaena poli, a nagane ita tekilia tekila ya naþa piowa naþa sinetania, tekila naga pogaga, ana yoko Ntewa sinen ye ita, viewo ita.” Ana peraga, pe nepisa re nena poli þisa. ¹⁶ Monar asitoþal sane pogos naþa yar tai sike vatanon suþe tai, monar logear suþe nena a monar imi sa naþa yar na yuþnae kienaena tai. A ve sa m̄ena nene e kieta malena. Visae nasinenanena viowa suþna ve suþen kioþna malena, yoko monar okila mlamulena viowa la naþa naga sinenan sape okila. Ana visae kioþna suþe naga Ntewa, yoko osuþna okila kiena yuþnaena wo lala. Mrapa lua nene, tai yoko kila ko omio Ntewa amlua aviaþa lue, ana taþena yoko kila ko omesmesu omio naga.

¹⁷ Nanua sumo, amiu m̄ena yar na yuþnaena vatanon m̄areraena na kiamiu nasinenanena viowa ga lala, ana potena paþisi pa Ntewa naþa nepian amiu, ana amligan ruru sike e losinemi lala, ataveve ruru e kiamiu malena lala. ¹⁸ Sanene, amiu amolue vetan suþe viowa nene nanua sumo, pe ape kiena yar na yuþnaena re si la poli, ana nagane ape yar na yuþnaena kiena ne Ntewa, naþa amiu asuþna akila ke sur mesmes lala sa naþa naga sinenania. ¹⁹ Nekilia nesape navianena la nene m̄arera li m̄aga komin sitomena kiena yar naga pe sa re sitomena kiena ne Ntewa poli, nane kila nemiila amiu ke ne, nepis kome þakaiwa naþa pisayu ga yeririna lala na yomarava nini, sane suþe lala amio kiela yaru na yuþnaena lala.

Ana monar avisu kilale ruru kinas nen visena la nene, sane nanua, sitomena na kilaen sur viowa, naga keviu manene laa e amiu, naþa suþna m̄areran ke yepemi lala vena kilaen mlamulena viowa naþa apiowa na apiowa, ana nagane pe sa re si nene poli. Nagane, sitomena na kilaen þelaga wo monar ve keviu e amiu, naþa kila sane kiamiu malena imi ve wa naþa ve wa.

²⁰ Pogos naþa sane ape yar na yuþnaen ga na mlamulen viowa, m̄areraena na sitomena na kilaen þelaga wo taþatete yuþnae e amiu, ²¹ ana akila ke ga yuþnaena viowa lala. Ana sur la nene, pe amiila re nena kiamiu malena poli, ana amligan amiu nena e mrapa na marena, a nagane, visae asuþna asitoþal la sina, yoko amawan vaþisi ya naþa akila. ²² Ana nagane, Ntewa þerelua amiu petan þelaga na sinenanen kilaen mlamulena viowa la nene, amiu apim sane ape yar na kilaen kiena yuþnaena, kila naþa po manenea e kiamiu malena naþa apim ape wa ruruia, a nagane asike e mrapa na malena naþa ve uro re.

²³ Wulena naþa mlamulena viowa kila yar waria, nane marena naþa ve uro re, ana kieta Suþe Yesu Kristo kila naþa towar malena naþa ve uro re, naþa pe topul re poli, ana pe nalaena tai naþa Ntewa mla korenan ga pimi pan ita.

7

Ita li nalelagaena lala pe tesu re vatanon Navisaluaena poli

¹ Erau lala, nekilia naþa amiu akilia ruru navisaluaena lala na kiamiu purvanua, ana yoko nevisayu sur tai e lepas na visaluaena la nene naþa kilia iila kieta sitomena e lepas navisaluaena kiena ne Ntewa naþa tesuþna tepisayu ke ne.

Sur nene sanini, sape e navisaluaena, pogos naþa temal ke ga wa, monar telogearia, ana visae temare, pe tesu re si vatanon po laa rui. ² Ositomyuli þelaga kiena yaru naþa þere sira, lalua atalopa. Visae sira tai, pogos naþa wona mal ke ga wa, navisaluaena mmareran sape sira nene monar su ruru lue ga amio wona na yermene nene. Ana visae yar nene kovio, navisaluaena pe pisa re si sur tai e lepas na sira nene poli, sape naga monar suþna ve wona yar ke nene na wa. ³ Ve sanene, visae sira nene, wona mal ke ga wa ana naga va vinaun yar taþena, yoko navisaluaena visave naga taþa ke kolau. Ana visae wona na yermene mare tania, navisaluaena taþatete si visa sur tai ea. Naga kilia va talopa si amio yar taþena woga, naga pe pe kolau re nene poli.

⁴ Pogaga, erau lala, sitomena nene naga sa ga nono ga na kilologia itaena temio navisaluaena naþa Ntewa mla pa Mosis. Nanua sumo, yar la asike vatanon navisaluaena nene, naþa monar alogearia vena atol natamaliaena, ana nagane, ita li nalelagaena lala temare petan navisaluaena nene. Nagane pe tesu re si vatanon navisaluaena poli, ana tekilia teva tesu vatanon yar taþena, nane Kristo naþa mare wo ita. Ntewa kilamalia sina, ana kila sane ita korowas nena lala yoko towar mras wo lala naþa naga sinenania.

⁵ Nanua sumo pogos naþa tesike vatanon mmareraena na þelaga viowa naþa tepaeme temio, kieta nasinenanena viowa lala amiyuþnae e tasneta, akila tekila manene laa mlamulena viowa lala. Ana pogos naþa tekilia tesape navisaluaena kiena ne Ntewa suþna naþa pisaluþar ke mlamulen viowa la nene, pisape ve okila re nene, ve okila re nene, ana sur nene kila kieta nasinenanena piowa lala pa laa metava narui. Sanene navisaluaena na kilawoen þelaga viowa nene suþna kila ke sane tepim tepiowa manene laa narui, a mligan ita nena ga e mrapa na marena. ⁶ Navisaluaena nene þuarar ita mmarera sanene, kila tepim tepe yar na yuþnae korenaen kiena navisaluaena marua la naþa asiripolo la asike rui. Ana nagane toþisin ruru nenaga mrapa nene, tomolue tokom ea ana tepim tepe yar na yuþnae korenaena e mrapa viu wo nene kiena ne Ninuna Wa.

⁷ Ana kam na asitom ya ne e kiau visena la nene, naþa nesape navisaluaena kiena Mosis suþna kila ke kieta nasinenanen viowa pa laa metava narui? Pona kam na asitom ke asape sanene na nesuþna nepisa ke nesape navisaluaena kiena ne Ntewa piowa ga?

Ana peraga, kiau navisaena pe naga re nene poli, komin navisaluaena naga kiena yuþnaena wo toþna ga. Visae ve navisaluaena re, yoko taþatete tekilia naþa nakilaroen navisaluaena naga sanape. Sane navisaluaena pisaar mmarera sape “Ve ovinaia re sur ken yar taþena,” ana visae navisaluaena ve visa re, yoko taþatete tekilia tevisave navinayaena naga ya ne, pona navinayaena naga kana þelaga sanape. ⁸ Ana lelaga, pogos naþa navisaluaena kilaro navinayaena nene, nagane narui sitomena na kilaroen navisaluaena suþmalu mþal kiena narin pulmas tai, kila navinayaena lala pimi moki loyuþna e ita. Ve sanene, navisaluaena kiena yuþnaena toþna ga, komin visae ve navisaluaena re, yoko taþatete tevisu kilale þelaga viowa nakilaen mlamulena naþa tepaeme temio.

⁹ Sane nanua sumo, nemninue navisaluaena, a pe nesitoþmal re poli, nesuþna ga sanene. Ana siraunia, nepisu kilia naþa navisaluaena pisape, Ve ovinaia re sur ken yar taþena, ana nagane nepisu kilia narui nesape nesuþna nekilaro ke navisaluaena, ¹⁰ a nekilia sane monar nokus nakoena vanonia, nemare.

Sanene þelaga na logearen navisaluaena pe pe mrapa na tolen re si malena poli, ana navisaluaena naga pimi sane pe kieta mrapa na marena rui. ¹¹ Nanua sumo, toþnape navisaluaena naga pe mrapa na malena, ana nanene naga kieta nasinenanena viowa na kilaen mlamulena ga naþa kilali ita, kila tesitom sanene. Ana pe sa re nene poli, komin naþa tekilaro navisaluaena nene, ana mligan ita e mrapa na marena rui. ¹² Naga ke

narui yuñmaena naþa navisaluaena suñma kila, ana pe nepisa re nesape piowa poli, komin navisaluaena naga pe wa na pe wa, a kana visena lala apo a amesmes ruru nenaga.

¹³ Ana pona laþasa aviun naviunena yo, avisave visae lelaga naþa navisaluaena naga pe sur wo tai, ana sanape naþa kila ke yar la monar awar nakoena na marena? Ana peraga, pe nepisa re nesape navisaluaena nene monar kilañmar ita poli, ana kieta nasinenanena viowa nakilaroen navisaluaena la nene, naga ga kila. Visena na visaluaena la apogaga, ana pogos naþa nekila mlamulen viowa, in ga nemligan inu e mrapa na marena. Visae ve navisaluaena re nene, taþatete tekilia tevisave mlamulen viowa naga ya ne, a yoko teninue tevisave ya ne po a ya ne piowa. Ana pogos naþa navisaluaena suñmalu suñma ga, kila meraravan ruru pan ita sape þelaga na kilaen mlamulen viowa naþa sike e ita, piowa na piowa.

Suri lua apilup loyuñma e sitomena kiena yaru

¹⁴ Sa naþa nepisa, navisaluaena kiena Mosis na pe wa paþisi, molue kome Ninuna ne Ntewa pimi, ana in na nepisu sane kiau þelaga pe pe wa re nenaga, in na nesuñma nemiyuñmae taveve ga kiau nasinenanena viowa lala. ¹⁵ Sur viowa la naþa nesuñma nekila ke ne, pe nekilia ruru re poli aña nekila sanape, pona aña nekila vanon ya, komin sur wo naþa sineun nesape nekila, ana pe nekila re poli, ana sur viowa naþa pe sineun re kilaen poli, naga ke nane nekila ke narui.

¹⁶ Nanene narui, nesape navisaluaena kiena ne Ntewa po paþisi, komin naþa monar navisaluaena suñma ga vena visaluþaren kiau napiowaena la nene, naþa sa naþa nepisa ke nene, yepmavin kilaena, ana nesuñma nekila maga. ¹⁷ Sanene, pe in re naþa nesitom kilaen napiowaena la nene poli, ana þelaga nasinenanen kilaen mlamulen viowa naþa suñma miyuñmae manene laa e kiau malena, naga ke narui naga suñma kila. ¹⁸ A kiau þelaga na kilaen mlamulena viowa nene, pe nepisuli re nesape naga kila sur wo tai se kiau malena poli wa. Yam moki kiau nasinenanena pisape nekila sur wo, ana siraunia, pe nekila re poli.

¹⁹ Sa ke naþa nepisa ke narui, pe nekila re nawoena naþa sineun kilaen poli, ana napiowaena la naþa pe sineun re kilaen poli, sur nene naga ke nane nesuñma nekila ke narui. ²⁰ A visae nesuñma nekila ke napiowaena la naþa pe sineun re kilaen poli, nanene kana kinasa sane pe nekila re po poli, ana sur taþena suñma mñareran ke sape nekila, nane þelaga na kilaen mlamulena viowa naþa sike e kiau malena.

²¹ Þelaga na kilaen mlamulen viowa nena, nepisu sane naga navisaluaena mñarera taþena sina ga tai naþa suñma miyuñmae ke e inu. Pona pogos tai sineun nesape neyuñmaen suri wo tai yo, ana sitomena viowa sike ga lavisi, kilali naþa were inu neva neviowa sina ga. ²² Pogos moki, e kiau sitomena in ga taaga, nesuñma nesitoñmal ke suri la naþa Ntewa pisa, a nepisu kiena visena lala apowo paþisi, ²³ ana nemloge e inu sane visena taþena si tai naga mñena suñma pis. Naga nane þelaga na mlamulen viowa, naþa naga suñma mñareran inu vena nesu vatanon mñareraena na kiau nasinenanena piowa lala. Naga sane nasinenanena viowa la nene asike e tasneu, asuñma akila ke pupia mara amio nawoena la naþa asike e kiau sitomena.

²⁴ Kei, sitomena wo amio þelaga viowa, lalua asuñma apeveyu ke e in sanene, nemloge piowa paþisi, nepisu kieta malena e yomarava na tolena marena nini mñarera paþisi. Ana ane yoko kilia iila ita, ane yoko werelua ita e naloge viowaena nene? ²⁵ Kieta malena mñarera paþisi naþa, komin e kana lepas ne tai, kieta sitomena sinenan sape logear navisaluaena kiena ne Ntewa, ana e kana lepas ne komþasa, þelaga na kilaen mlamulen viowa suñma miyuñmae ke e tasneta.

Ana lelaga, potena paþisi pa Ntewa, komin naþa naga pitetalia kieta Suþe Yesu Kristo pitomi, naþa yoko iila ita, werelua ita vetan naloge viowaena nene, tamalia ita.

8

Malena wo amio Ninuna Wa

¹ Kristo Yesu pitomin tamalia ita, ana kila sane ita naŕa kieta malena su ruru sike amio naga rui, yoko Ntewa taŕatete la nakoena van ita pog tai.

² Nanene komin nanua sumo, tesike e malena viowa naŕa ŕelaga na mlamulen viowa pa metava, a naŕa pisaar marena pan ita, ana siraunia, Yesu Kristo ŕerelua ita petan malena nene, mligan ita tesike e mrapa viu taŕena tai naŕa tekilia tetol malena wo naŕa Ninuna Wa mlavia.

³ Yar la asuŕna aŕion ke nalogear ruruen navisaluaena kiena ne Ntewa vena atol natamaliaena ea, ana akila ŕele ga vanon yaru naga ŕarin ŕarera paŕisi. Ana ya naŕa akila ŕele ga, Ntewa ga kila. Naga mligan narina Yesu pitomi e yomarava, kila tasnena a kiena malena maran taaga sa ke ita li na mlamulen viowa lala. Ana Yesu pitomi taŕnan tasnena a kiena malena nene, sane kuŕaŕaena tai vena weluaen nakoena na kieta mlamulena viowa lala. ⁴ Nakoena na kieta nakilaroen navisaluaena, naga ga ŕaria, kila ita temesmesu rui e visuena kiena ne Ntewa, ana nagane pe temial re si e ŕelaga naŕa mlamulena viowa suŕna ŕuarar itania, ana tekilia teyaloro ga e ŕelaga naŕa Ninuna Wa suŕna susumon ita ke ea.

⁵ Yar naŕa suŕna mialoro taveve ke ŕelaga na mlamulena naŕa naga paeme amio, kiena sitomena suŕna pulen nasinenanena viowa na yomarava, ana yar naŕa suŕna mialoro taveve ke Ninuna Wa, kiena sitomena pule mamaga e sur wo la naŕa Ntewa sinenania.

⁶ Nasinenanen maneneen ŕelaga viowa lala e yomarava nini, naga pe mrapa na marena, ana nasinenanena maneneen ŕelaga wo kiena Ninuna, naga pe mrapa na suŕna, pe mrapa na malena. ⁷ Yar naŕa kiena sitomena sinenan manene ŕelaga na sinenanena viowa, naga pe nasinekar kiena ne Ntewa nenaga. Pona pe sinenan re vatanonen navisaluaena kiena ne Ntewa la poli yo, pona visae peraga, pona sinenan ŕna vatanon yo, ana komin naŕa naga pa piowa manene la rui pano-o, ana yoko vatanon ŕele sina, ana naga pe yar na sanene narui. ⁸ La naŕa amiyaloro ataveve ke ŕelaga na mlamulen viowa naŕa apaeme amio sanene, taŕatete akila sur tai naŕa yoko Ntewa kilia kekarania.

⁹ Ana ko naŕa visae Ninuna ne Ntewa teke e ko, ve oyal re si e ŕelaga na mlamulen viowa naŕa opaeme omio, ana monar osuŕna oyal e ŕareraena kiena Ninuna naŕa Kristo mla pan ko. Ana visae yaru tai suŕna ga naŕa Ninuna nene ve to re si e naga, yar nena pe pe kiena re Ntewa poli. ¹⁰ ŕelaga na mlamulen viowa na yomarava nini kila sane ita make ga tasneta monar mare pogos tai, ana ita naŕa Kristo sike e ita, naga kila ita temesmesu e marana rui, ana yoko ninuta mal lue ga. ¹¹ Ninuna ne Ntewa naŕa kila malia si Yesu petan marena, nane ninuna ne nane teke e ita narui, a yoko kila ŕena wo ve sanene van ita. Pe sur korena ga naŕa tasneta mare, ana Ninuna Ntewa naŕa sike e ita yoko kila malia ita sina.

¹² Erau lala, Ntewa kila po paŕisi na pan ita sanene, ana kila sa naŕa kieta pupia lapui sike e naga narui. Sanene, popon telamaran si sur wo vania, ana pe pon re si teyaloro tetaveve kieta ŕelaga na sinenanen mlamulena viowa poli. ¹³ ŕelaga na mlamulena viowa naga pe mrapa na tolen marena, ana yar naŕa sinenan yali taveve mrapa na malena, naga monar taŕnan Ninuna yuŕnae ea, iila vena te plan nasinenanena viowa nakilaen mlamulena viowa vetan kiena malena.

¹⁴ A ita naŕa temlogear pulgona ne Ninuna Ntewa sanene, ita ke la nene narui tepe narina ne Ntewa lelaga. ¹⁵ Nanene komin naŕa Ninuna ne Ntewa pe kila re tepim sane tepe yar na yuŕnae korenan re poli kiena ne Ntewa, ana naga kila sane Ntewa kuslua ita tepe kiena, tepim tepe narina lala. Sanene, monar ve temaraun re Ntewa, ana pogos naŕa tevis vania, tekilia tevio sane arimata, tevisave "Ata." ¹⁶ Mesmesun ga naŕa tevio ve sa nene komin Ninuna Ntewa suŕna pian ita ke narui ana ninuta ŕena kilia sape lelaga, ita tepe narina ne Ntewa.

¹⁷ Ana komin ita tepe narina ne Ntewa sanene, navisa ruruena wo la naña Ntewa mligan ruru sike ne ve kiena ne narina napo naña Yesu Kristo, yoko ave kiena ne ita narina tañena ñena lala, yoko towaria tevion pae temio. Lelaga naña sane ita ñena monar towar naloge viowaena sa ke ga naña naga ñaria, ana visae tekekara ga, yoko Ntewa kila wo vañisi van ita maran taaga ve sa naña kila po pa Kristo.

Yoko wo vañisi va yeririna lelaga kiena ne Ntewa

¹⁸ Nagane e yomarava nini tesuñña tepane ke pog ñarera la nene moki, ana visae kieta sitomena la su ga e naurarena naña yoko imi sirau, nekilia nevisa nevisave e kiau visuena, naloge viowaena la na nagane, ape suri korena ga. ¹⁹ Naloge viowaena la nene suñña tol ke sur make ga naña Ntewa siia, a sur punu ga suñate ke ga wa, sinelan manene la asape popon legiena maro imi, vena Ntewa kipian ga na wa naña sape a la ne ape narina kemua lelaga. ²⁰ Nanua sumo, pe naloge viowaena re poli, vanon Ntewa si sur punu ga apoga ga, ana siraunia, asuñña apim apililua, apororowaia, apiyowa sanene pano-o, sur make ga pe su re si sa naña naga sinenan poli. Naga tañan sape ve sa nene e yomarava, vena kilaen ve sa naña yoko yeririna lala monar asitom asave monar awasine ga naga. ²¹ Sitomena nene yoko monar sike e narina lala, naña monar alelaga avisave yoko sur la tañatete asu ña sanene silaga, monar asitoñal asave pogos tai yoko naga kila sur la punu ga naña naga sii la aim awo sina, atol kiena naurarena, sa ke ga naña ita narina la nene yoko tetolia.

²² Ana nagane tepisu ke yomarava nini na wa, naña siar nanua sumo pimi, sur la naña asike ea asuñña amloge piowa sa naña sira tai sape war narina. ²³ A maran taaga sa ke ñena ga ita naña tetol Ninuna Wa sane nalaena ñesia tai naña Ntewa mla pan ita, naña kila tesitoñal naña ñisi na nalaena keviu imi sirau na wa. Ita ñena ga, tagena sike e losineta la na wa, a tekilia sa naña yoko teloge viowa ña vano-o tol pogos naña Ntewa wereplan ita vetan yomerava. Sinetan manene sur nene pañisi, komin ita na sane ninis la naña kus plan la ga. Ana e poglis nene, yoko teloge ga wo na wa sane ita tepe narin kemua la lelaga naña teva tesike nena temio e kiena yo napo.

²⁴ Sur ne nanene naga tamalia ita vanonia, a siar e pogos nene pimi, tesuñña temlelaga ke ñarera e kiena navisaarena naña sape yoko naga kila wo van ita ve sanene. Temlelaga ñarera e naga komin pe tepisu re poli wa, ana pogos naña imi ñalivi, yoko tañatete si tevisave telelaga tevisave ve sanape, vanon sane ve sanene narui. ²⁵ Ana pe tepisu re sur nene poli wa, ana monar telelaga ñarera sane yoko ve sa nene, a monar tekila kieta sitomena la ve piayavi vena suñateen vano-o kilamarata la visu ga na wa.

²⁶ Pogos naña tesuñate ke sanene, pogos tai sineta marenia a yepeta malumu, ana silaga Ninuna Wa suñña miila ita, pogos tai sinetan tesape telen wo pog ñarera lala, ana temloge piowa manene narui tekilali naña tepis, toñal ñele visena napo navisaena. Ana e pogos nene Ninuna Wa kilia imi, kus leleta narui naga lenin kieta e tagena la naña apisawal ke kieta sitomena la naña visena la pe torokin re avisa poli. ²⁷ E pogos na sanene, Ntewa kilia make ya naña sike e losineta lala ita kiena li na lelagaena lala, a kilia naña Ninuna suñña mlenwo ita ke lala, naña suñña pisa ke ga sur la naña mesmesun nasinenanena naña sike e sitomena kiena ne Ntewa rui.

²⁸ A e pog ñarera naña tepanea, e ya naña yoko imi ñalivin ita, tekilia tesape yoko Ntewa kila sane e kana luasa, yoko woga ga van ita naña sineta si naga. Naga kila sanene komin naña mligan plan ita sumo rui vena kila kiena yuññaena wo lala e kieta malena. ²⁹ Naga kilia ruru ita nakonua konua rui pimi, mligan ruru kieta mrapa nakonua rui, ana kila kieta malena ñar nono na narina naña Yesu. Sanene, ita tepe puruvi a tepe vineta lala e mratava taaga, naña Yesu naga sane kieta puruvi nasumo.

³⁰ Nane yuññaena wo ne nane Ntewa kila pa yeririna la naña mliganar la vena ave kiena namratava lala. Naga pio la vena aim puna, kila la ape mara wo amio naga, a kila sa naña yoko atol kiena naurarena e legiena naña yoko imi.

Sinesiena wo kiena ne Ntewa

³¹ Sur la nene akila merarava sane Ntewa sike amio ita, suña kila ke po pan ita, a visae ve sa nene yoko tevisa si ya ne? Visae Ntewa sitom visae visir plan ita, yoko ane kilia kila si teloru? ³² Tepisu naña Ntewa sinen miye ita manene pano-o tañan sape aweñar narina vanon ita, ana visae kekaran naña kila pupia yuñaena wo van ita sanene, yoko kekaran ñena la sur nowo tañena la van ita. ³³ A nanene Ntewa suña kila ke pan ita rui. Naga ga mligan lua ita vena teve kiena narui, ana yoko a si naña visave ita pe tetorokin re toñalivi e marana poli?

Ntewa ke narui naña suña pisa ke sape ita temesmesu temio naga rui, ³⁴ ana a si naña visave monar towar nakoena vanon kieta mlamulena viowa? Pe yar re tai po, okilakan naña Navisaarena Yesu kila sur make rui. Naga mare wo ita, siraunia mal si petan marena, siraunia ñasupea pa teke tano e kiena lele wa ma metava amio Ntewa, a nagane pisawal ita ke pa Ntewa vena Ntewa viewo ita. ³⁵ Kristo sinen si ita manene sanene, sur ya si naña yoko kilalua ita si vetan kiena sinesiena nene? Pe sur re tai poli.

Pogos tai, yuñaena la urmi pan ita, pona yar la akila piowa pan ita. Pogos tai, tetol pog ñarera, pona pe kata kinanena re poli, pona pe ñata kulsota re poli. Pogos tai temarau kieta malena, pona takan playu na mara, ana peraga, silaga Kristo sinen sii ita, a kieta malena su ruru sike e limana. ³⁶ Nanene sa naña Ñarin Suñe Tepet pisa nakonua rui, e pogos naña naga ñena kus ke pog ñarera, naña sape:

“Kioña kia sike e imimi,

ana sinelan asape awe moñar imimi lue ga,

apisu imimi sane sipsip la naña asvilevilesan vena asiro kolmekila.”

Yauena 44:22

³⁷ Ana sur kar la ne sanene, akilia aimi añalivi pun ita, ana pe suri korena ga, e sur punu ga na sanene, sinesiena kiena Kristo sike e ita, ana tesulue ga metava, tetaulu silaga. ³⁸ Nekilia nevisaar nena van amiu, nevisave pe sur re si tai poli naña kilia kila Ntewa pe sinen sii ita re si poli. Visae temali pona temare, visae navisi la asike amio ita pona yermare la apimin ita ke yo, visae tevene sur la naña asuña añaliv ke nagane yo pona tevene sur la naña yoko añalivi e legiena na pimi ke ga wa, ³⁹ a visae nañareraena wo lala na yo na metava asike amio ita, pona nañareraena viowa na yo tano asuwo ita, ana pe sur re nena tai naña Ntewa siia kilia lalua kiena sinesiena vetan ita. Kristo Yesu kieta Suñe mligan sinesiena kiena ne Ntewa sike e kieta malena la rui, ana sulue na sike ne.

9

Pol mloge piowagan naña le Yu la pe sinelan re alelaga sane Yesu naga pe kiela Navisaarena poli

¹ Erau lala, nagane sineun nesape nevisayu e lepas nene naña ita le Yu lala, tesape ita na yeririna kiena ne Ntewa lala, ana ita mokliu naña pe sinelan re Yesu poli. Ana yoko ve sanapen la nene? Pogaga, tañatete nevisokan, monar nevisawal van amiu e sitomena wo lañasia naña Ninuna Wa kian pan inu e lepas nene rui, ² ana lelaga, visena la nene, akila sane kiau sineyeena a kiau naloge viowaena keviu pañisi, pe pito re nena tano poli.

³ Nanene komin nagane, kiau malena sikol amio Yesu rui, ana nepisu sane namratava tañena na Yu la naña ita kuruta taaga, kiela malena pe sikol ruru re amio naga poli wa. Visae nekilia nourelua in sina vena la akilia aimi akus leleu, yoko nekekara ga, ana tañatete ve sanene. ⁴ Asitomyuli sur wo la naña Ntewa kila pan ita le Yu la rui, naña la na sanini:

ita ke narui naña Ntewa mliganar kata apua lus nae Israel lala sape ape kiena yeririna

lala,

ita ke narui naña Ntewa pisawal sape kuslua ita sane tepe narina lala,

ita ke narui naña Ntewa mligan kapi vivaga na kiena urarena sumon kieta yeririna lala e yomema nanua sumo,

ita ke narui naña Ntewa suña kila ke naviranarena lala amio kieta yermarua lala,

ita ke narui naña Ntewa mligan kiena navisaluaena sike e ita,

ita ke narui naña pupia yuña wa na lotunen Ntewa sike pun ita,

ita ke narui naŕa Ntewa pisaar navisa ruruena moki pan ita,

⁵ ita ke narui naŕa tepio yermarua wa nasumo lala, sane Epraam, Aisak, amio Sekop, ape kata apua lala,

ana metavan sur make la nene, ita ke narui naŕa Yesu molue kome kieta lusia, naga paeme e yomarava nini sane pe yar ga, ana naga mēna pe Navisaarena, naŕa naga Ntewa naŕa pe suŕen sur make ga, naŕa popon teyeluar naga silaga vano-o ve uro re.

Sur wo ne naga ke la nene narui naŕa Ntewa kila ve kiena ne kiena yeririna lala, ana ita mokliu naŕa tepisuiua sane ape sur koren ga.

⁶ Nane la naŕa pe asikol la ruru re amio Kristo poli, a pona yeririna laŕasa asitom asape suri nene kila sane navisaarena naŕa Ntewa mlaŕesania pe mālivi re sa naŕa naga pisa poli, komin naŕa naga pisaar sape yoko kiena navisa ruruena su make amio lus kiena ne le Yu lala. Ana pe sa re nene poli, komin sur taŕena tai naŕa pa sanini, sape la naŕa amolue akome lus kiena Sekop, naŕa tepio la le Israel lala, pe la make re naŕa Ntewa sape la ape kiena yeririna la poli. ⁷ Pona tevisa si visena nene kome mrapa taŕena, tevisave la naŕa apisape la kala apua Epraam, pe la make re naŕa tesape la amolue e kiena lus nena napo poli. Visena tai naŕa sike e Visena Wa pisa sanene rui, naŕa Ntewa pis pa Epraam, e lepas na narina lua nene Ismael amio Aisak, pisape

“Kioŕna lus napo lala yoko amolue ga akome naruŕna naŕa Aisak.”

⁸ Ana visena nene, kana kinasia sape la naŕa Ntewa pisu sane asike loyuŕna e ŕegas nen lus kiena ne Epraam kemua lelaga, la ape ai? Pe yeririna make re naŕa amolue e lus kiena ne sisi taŕena la naŕa naga ŕar la poli, ana la naŕa amolue e lus na nisisi naŕa Aisak, naŕa Ntewa kilologia naga, pisaaria sape yoko kiena navisa ruruena lala sike e la.

⁹ Tekilia tesape sanene, komin nanua sumo Epraam mla sisi pa kiela sira na kilavanen yo mālala naŕa Aka, ana sisi nene pe naga re naŕa Ntewa sape yoko lus kiena ne Epraam napo la amolue akome poli. Ana Ntewa piranar ruru sina ga amio Epraam, pisape “Epraam, yoko nekila van ko omio woŕna Sera, sane e kas na sirau, e pogos na sanini, yoko amiu lua awar narimiu tai, ve yerŕene.” Ana siraunia, sanena naŕa Ntewa pisaaria, ana narina ne Epraam nene, Aisak, naga ke narui naŕa ita lus kiena ne le Yu lala tomolue tokom ea.

¹⁰ A pogos naŕa tepisu Aisak pimi keviu, naga narina tai, a maran taaga ke sina ga, wona naŕa Repeka naga ŕar kaora Sekop amio Esau, ¹¹ a pogos naŕa lalua pe apaeme re poli wa, Ntewa pisawal ya naŕa maplar pe kiela lalua. Naga pe sitom re sape kila taveve kiela yuŕnaena lalua poli, sape lalua akila suri piowa pona po, ana kila ga taveve ya naŕa sinenania. ¹² Ana pogos naŕa lalua apaeme, Esau na paeme ŕesa a Sekop paeme maro, ana Ntewa pisa pa kala auia, pisape

“Naga naŕa paeme maro yoko taŕatete logearia naga naŕa paeme sumo, ana naga naŕa paeme sumo, naga monar logear naga naŕa paeme maro.” [Nas 25:23](#)

Sanene, pe ŕelaga marua nataveveen re nene poli, ana kila meraravanja sape Ntewa pisirlua yaru, pe taveve re sitomena kiena yaru poli, ana taveve ga ya naŕa Ntewa maplaria. ¹³ A sur nene merarava po paŕisi e lepas kiena kaora lalua nene, komin naŕa visena taŕena sike e Nasiriena Wa rui, naŕa Ntewa pisape

“In na nemligan Esau naŕa naga paeme ŕesa, naga sike vatano, a nemligan Sekop naŕa naga paeme maro, naga to metava.” [Mal 1:2,3](#)

¹⁴ Pogaga, Ntewa pisawal kiena sitomena merarava ruru sanene, ana yoko tevisa si ya narui? ŕisi na tekilia tevisave ŕelaga kiena ne Ntewa nene piowa ga, pona naga kila pe mesmes re e lepas kiena lalua nene poli yo? Ana peraga, taŕatete tevisa kare Ntewa sanene. ¹⁵ Nanene sa ke sina visena taŕena tai naŕa pisa pa Mosis nanua sumo rui, naŕa sape

“In na nepe Ntewa, sike ga e inu sane nekilia sineu ye yar ai naŕa sineun nesape sineu yea.” [Nau 33:19](#)

¹⁶ Sanene na Ntewa suŕna pisa plan kiena yeririna lala, pe taveve re naŕa la ga apisape naga monar visa plan la, a pe komin re naŕa la aŕion asape akila sur laŕasa naŕa sane

pona naga kekaran la vanon yo, ana naga pisa plan yar lala taveve ga kiena sineyeena e yar la naŕa asuŕna amloge ke piowa.

¹⁷ Ŕelaga kiena ne Ntewa nene, naŕa kila ke pa yaru taveve ga kiena sitomena, tepisu naga kila ŕena pa Ŕarin Suŕe Pero nae Isip, e pogos kiena Mosis nanua sumo. Pero nene naga yaru tai naŕa naga kawe ke yeririna kiena ne Ntewa, ana Ntewa pialua naga ŕena ga vena kilaen kiena yuŕnaenai tai, sa naŕa Nasiriena Wa pisape, naŕa Ntewa pis pa Pero, sape

“In na nepisirlua ko vena ovisuar kioŕna purvanua. Yoko netaŕnan ovilaven kioŕna ŕareraena sumo wa, ana nekila vena yoko ovisu ga kiau ŕareraena na wa naŕa naga ŕarera manene taulu kioŕna naŕareraena, a sineun nesape yeririna la nae yo make ga yoko akilia sane naŕareraena make ga sike ga e inu.” Nau 9:16

¹⁸ Sanene, tepisu yar naŕa Ntewa sinenan sape ve lemam vania, yoko monar ve sa nene, ana visae yar tai ve sa Pero nene naŕa Ntewa sinenan sape kila kiena sitomena ŕarera vania, ana monar ve sa ga nene narui.

Sinemimiena kiena ne Ntewa, amio kiena lemamiena

¹⁹ Nepisa sanene, yoko monar sitomena tai va metava naŕa yaru kilia viun sanene, visave “Visae e yaru laŕasia, Ntewa ve lemam van la, a e yar taŕena lala, naga suŕna kila ke naŕa kiela sitomena ŕarera, yoko ve sanape narui? Visae Ntewa naga ga narui naŕa suŕna kila sape teim towo pona teim teviowa, ana pe pon re naga liŕere ita si poli. A visae Ntewa sinenan kila van ita taveve ga kiena nasinenanena, yoko taŕatete tevisaluŕar tevisave ve kila re.”

²⁰ Ana yoko nevisataŕne visena la nene, nevisave: Peraga Ŕara, ko na ope yaru ga, ko ope sur tai naŕa Ntewa siia, ana ve okilali re naŕa ovisataŕne kioŕna visena tometavan si naga. Naga sa naŕa visae yaru tai suŕna yuŕnaen porotano ve piaki. Pogos na yuŕnaen pae porotano ve piaki ŕisi, ana piaki na porotano nene taŕatete kilia suŕnalalu vis sina vania, visave, “Ei, komin ya ne omiyuŕnaen kare in ga sanene?”

²¹ Ana taŕatete ve sa nene, komin yar naŕa miyuŕnaen piaki naŕa e porotano, sike e naga kilia yuŕnaen taveve kiena sitomena. Visae la narin porotano tai, kilia yuŕnaen piaki taŕena ve lua ea. Tai, piaki nowo tai naŕa popon ŕaŕagena lala, a taŕena, naga piaki tai na uŕna ga.

²² Ana Ntewa ŕena ga kila sa ke nene, naga ŕena ga kiena sur lua naŕa naga sinenan sape kila. Naga sinenan sape kila yar la avisu kilale naŕa naga sinen kar ke kiela mlamulen viowa lala, vano-o yoko kilia la ruru nakoana van la amio kiena naŕareraena. Na konua rui, naga kila kiena sitomena piavi pan la, ana nagane sike ga e naga kilia kila van la ya naŕa naga sinenania. ²³ A sur taŕena naŕa naga sinenan sape kipian la, naga kiena ŕelaga wo la naŕa naga sinenan sape kila van ita la naŕa naga pe lemam pan ita. Nanene naga sane nakonua rui, naga kila ruru kiena navisa ruruena nowo lala, a nagane miyuŕnaen ita sa naŕa pias nen sur naŕa kon la vito ea. ²⁴ Naga kila po pan ita sanene komin ita ke narui naŕa naga pio ita, naŕa ita laŕasa tomolue e lus kiena ne le Yu lala, a ita laŕasa pe tomolue re e lus kiena le Yu la poli. ²⁵ A ŕelaga nene sane visena kiena ne Ntewa tai naŕa Navisawalena Osea pisawal e kiena tus, naŕa Ntewa pisa sanini, sape “Ŕegas nen yeririna la naŕa nanua sumo la pe ape kiau re poli, a nagane nepio la, nesape ape kiau yeririna lala.

Purvanua nene naŕa nanua sumo pe nesitoŕnal re poli, a nagane nesape nekekaran paŕisi.” Ose 2:23

²⁶ A yam si tai, Osea pisawal taŕenan si visena kiena ne Ntewa tai, naŕa pisape “Nanua sumo nepisa pa yeririna nae e yo nini lala nesape la pe ape kiau yeririna re la poli, ana nagane, yoko aloge naŕa asuŕna avio la asape naruu lala, in na nepe Ntewa naŕareraena, nepe Ntewa naŕa nemali.” Ose 1:10

²⁷ A visena taŕena pisa ke ŕena sanene, naŕa sike e tus naŕa Navisawalena Aisea siriyuia. E yo nene, naga mloge piowagan le Israel, pisape

“Ĕegas nen yeririna nae Israel lala la moki manene laa, la moki na moki, la sane mras nen none naĕa yar wolo ĕele ga.

Ana suri piowa tai, yoko la ve lua la ga naĕa Ntewa tamalia la.

²⁸ *Ana e pogos na liĕereena, yoko naga la nakoena va yeririna lala na yomarava. Yoko kilapel ga la ve moki naĕa pe amlelaga re poli.”* [Ais 10:22,23](#)

²⁹ *A nanene yoko ve sa ga visena taĕena naĕa Aisea siriyu nanua sumo rui, naĕa pisayu pogos na liĕereena naĕa yoko imi, naĕa visae Ntewa ve sinen ye re yaru, yoko la punu ga akokovio. Visena nene pisa sanini, sape*

“Ntewa pitomi amio kiena yar na mara lala, lavisi we moĕar make ita. Visae ve sinen ye re narita la naĕa avetorokaki, ana mligan la asikena, yoko kieta lus la akokovio make nenaga.

Lavisi naga kila van ita maran ve taaga torokin ke ya naĕa kila pa yar viowa la e pupia yo lua nene nanua sumo, Sotom amio Komora, ana siraunia kila sane ita laĕas tekilia temal tesike ga wa.” [Ais 1:9](#)

³⁰ *Pogaga, visena la nene kana kinasa sanini, sape la naĕa pe ape Yu re poli, pe aĕi re yon naĕa ataveve navisaluaena kiena ne Ntewa poli vena amesmesu e marana, ana siraunia, pogos naĕa amlelaga e Yesu, Ntewa kila la ga apim amesmesu e marana na wa.* ³¹ *Ana le Yu lala, aĕionli naĕa aimi alogear navisaluaena vena aimi amesmesu e marana Ntewa, ana akila ĕele nena yonia, ana la apiowa ga narui.* ³² *Nepisape piowa pan la sanene, komin naĕa la aĕilion naĕa aimi amesmesu e marana Ntewa, ana la akom e mrapa taĕena, apa amlor ruru nena ea. La akome mrapa naĕa asitom ke sape kiela yuĕaen wo lala kilia kila aim awo amio Ntewa, ana pe sa re nene poli. Monar tesuĕal ga tese e ya naĕa Yesu kila, naga ke nene narui kieta mrapa naimen towo si temio Ntewa.*

³³ *Visena si tai sike e tus kiena Aisea, naĕa Ntewa pisawal ĕakaiwa tai, naĕa pisayu kilavaru na ĕeren yuĕa tai, ana kilavaru nene naga Yesu, sane Navisaarena naĕa Ntewa mligan naga pimi. Visena nene pisayu sa naĕa yar laĕasa pe sinelan re kilavaru nene poli, ana laĕasa amlelaga ea, ana pisa sanini, pisape*

“Avisu ruruia!

Nesuĕa nepisirlua ruru kilavaru wo na ĕeren yuĕa tai, nane metava e kunus naĕa Saeon e pupia pulkumali kiena kiau yeririna lala nae Yerusalem.

Kilavaru nena ĕarera ruru po, ana yoko yar la ve moki naĕa yepela mavinia, atan ĕa lala ea vano-o kila alolor kar ga va ke ne.

Ana yeririna la naĕa alelaga e kilavaru nene, asuĕalarla asea, yoko nekila wo van la vaĕisi.” [Ais 8:14, 28:16](#)

10

Yesu ga kilia kila ita temesmesu e marana Ntewa

¹ *Erau lala, nemloge piowagan naĕa kiau lus ruru nena lala, sa naĕa le Yu lala, pe amlelaga re poli. Ana sineun manene nesape monar atol natamaliaena, nane nesuĕa nemlen manene ke pa Ntewa vanon la ne.* ² *Asuĕa aĕikeyon naĕa akale Ntewa e kiela malena, ana nepisa lelaga, aminue mrapa, yoko taĕatete alualia.* ³ *Nanene komin ga naĕa asuĕa ataveve ke ga kiela sitomena lala, ana yepela mavin taveveen mrapa naĕa Ntewa miyuĕaenia vena kilaen yaru imi mesmesu sina e marana.* ⁴ *Asuĕa aĕareran ke ga naĕa asape nalogear ga navisaluaena naga pe mrapa, ana mrapa nene piowa rui, komin naĕa ita make ga tekilaro navisaluaena lala. Mrapa naĕa tesape temesmesu temio Ntewa komin naĕa temlogear navisaluaena, Kristo suwo rui, a naga miyuĕaen kieta mrapa viu tai. A nagane, visae telelaga tevisave Kristo ĕar plan kieta mlamulen viowa lala, ana Ntewa kilia kila ita teim temesmesu e marana.*

⁵ *Visae ve tekilaro re navisaluaena, yoko woga ga, tekilia teim temesmes e marana Ntewa komin naĕa temlogear navisaluaena, komin Mosis pisa visena tai e lepas nene rui, pisape*

“Yaru naĕa taveve ruru sur make ga naĕa navisaluaena nene pisa, yoko tol malena.” [Lev 18:5](#)

Ana pe yar re tai naĕa kiena malena po sa naĕa Mosis pisa poli, ana taĕatete tetol malena kome kieta yuĕaena wo la naĕa tekila. ⁶ *Nakilaen sanene, naga ĕarera paĕisi, ana visae*

telelaga ga e Kristo tekilia teim temesmesu e marana Ntewa, a naga pe pe sur re tai naþa ñarera poli. Sane visena tai naþa Mosis pisa, naþa pisape

“Pe pon re asitom avisave sur nene ñarera paþisi, ana asuñña aviuviun avisave ane yoko kilaþesan mrapan ita vena vaen ma e peni?” Nav 30:12

Naviunena nene kana kinasa sape ane kilia va tol ma e peni were Kristo vitom tano e nini vena tamalia ita, ana sitomena na sanene piowa ga. ⁷ Pona aviun naviunena taþena naþa sike e Nasiriena Wa la yo, naþa sape

“Ana ane kilia vito tano vito tol yo kiena yar mare lala ana wasuþe sina?”

Naviunena nene, kana kinasa asitom sape Kristo mare e lak torovia, ana naga ñena ga pito sike e lelen marena, ana asitom asape taþatete yar tai kilia vito si werelua naga e yo nene vena vam tamalia ita, ana tekilia tesape visena la nene pe po re poli. Tekilia ruru rui tesape Kristo molue ma e peni pitomi tano rui, a siraunia mare, þisi na naga suñmal mal sina a pa si ma e peni rui. ⁸ Visae ve sanene, tekilia tevisatañne naviunena la nene, tevisa visena taþena naþa Mosis pisa nanua sumo, naþa pisa pisape

“Visena kiena ne Ntewa naþa pan ita ita yeririna lala sike amio ita rui. Sike e limata, ana tekilia teligan se gota, tekilia teligan ruru se kieta sitomena lala.” Nav 30:14

A visena kiena ne Ntewa naþa visena nene pisayuia, nane Lollogena Wo naþa mesuñña melologon ke ne, naþa pisawal ke sape yar lala monar alelaga e Yesu Kristo.

⁹ A ko ai naþa olelaga e Yesu Kristo e losineña, ovisave Ntewa naga kila naga mal si petan marena, a okekarana naþa ovisawal e yo metava ovisave omla Yesu pe kioñña Suþe, yoko otol malena. ¹⁰ Nanene komin naþa visae yar naþa lelaga e losinena visave Yesu naga mal sina petan marena, a visawal e yo metava visave Yesu naga pe kiena Suþe, yoko Ntewa ve la re si nakoaena vania komin kiena mlamulena viowa lala, yoko tamalia naga.

¹¹ Naga nene sane visena tai na Siriena Wa, naþa sane pisayu naþa temlelaga e Kristo, naþa pisape

“Yaru naþa mlelaga ea, naga taþatete kiena sitomena loru pog tai.” Ais 28:6

¹² Yaru naþa mlelaga naga pe Yu yo, pona naga pe pe Yu re poli, ana Suþe naga taaga pe kiela suþe la punu ga, kila make po pan la naþa atag ke pania. ¹³ Naga sane visena tai naþa Navisawalena Soel siriyu nanua sumo, naþa sape

“Yaru ai naþa vio kia kiena Suþe, yoko tamalia naga.” Soel 2:32

¹⁴ Ana lelaga, le Yu la mok liu naþa pe apio re Kristo asape tamalia la poli, ana sanape na sanene? Nanene komin taþatete avio naga visae ve alelaga re ea, a taþatete alelaga ea visae ve alogeli re kiena kia pogos tai, a taþatete aloge kiena kia visae ve yar va lologon re van la. ¹⁵ A taþatete yar va lologo visae Ntewa ve ligana lua re naga vano, ana visae yaru nene kekarana naþa vano, yoko ve sa naþa Siriena Wa pisayu rui, naþa sape

“Potena paþisi pa Ntewa naþa kiena nalologena lala, temloge la amial tañin ke ava e kiela mrapplepa la ne, asuñña apava ke amio kiena lollogena wo.” Ais 52:7

¹⁶ Nane visena naþa yar laþas asuñña apisasa, ana nekilia nesape Peraga, Ntewa suñña pitetalia kiena nalologena lala apava ke rui, ana piowa paþisi naþa le Yu la mok liu yepela mavin ga logeena. Nanene taveve ke sina ga visena na Siriena Wa tai, naþa Navisawalena Aisea tagi pa Ntewa na mava, sape

“Ake Suþe, mesuñña memlologon ñña kioñña visena pano-o, ana sane yar la yepela mavin ga logeena.” Ais 53:1

¹⁷ Ana nagane imimi sanene, mesuñña memlologon ke Yesu Kristo pan la, a pogos naþa mesuñña memlologo, laþasa amloge, a pogos naþa amloge, laþasa amlelaga.

Komin ya ne omlologon ke pa le Yu la naþa apuloyu ke Siriena Wa la rui?

¹⁸ Nane nesuñña nemlologon ke pa le Yu la ne, ana yoko naviunena tai kilia kate e nene, sape Pona osuñña omlologon ke pan la sanene komin naþa ositom osape pona la pe amloge re ya naþa Siriena Wa pisayu poli yo? Ana yoko nevisatañnea nesape, Peraga, visena kiena ne Ntewa tol la nakonua rui. La make ga akilia maran taaga torokin ke naþa la make ga apisu ke mrae amio kupario a verue lala, sa ke ga naþa visena tai e Tus na Yauena pisayuia, pisape

“Yeririna make ga na yomarava nini wetelu apisu sur la meta e sinapane, a apisu kilalea sane Ntewa sike na, pano-o tol yeririna la e yo la naŕa asike koperina, la mēna apisu kilale asape kiena m̄areraena keviu paŕisi.” Yauena 19:4

¹⁹ Sanene, sane le Yu lala apisu kilale sur mokliu rui, ana sur viowa tai, la asitom asape Ntewa tamalia la ga yo. A pe apisu kilale re asape Lologena Wo naga kiena yar make ga, komin Ntewa sinenan sape tamalia mēna yeririna la naŕa pe ape Yu re poli.

Ana popon avisu kilale sur nene, komin kiela navisawalena marua lalua apisayu nakonua rui e Siriena Wa lala asape yoko ve sa nene. Mosis p̄esa, naŕa pisayu visena tai naŕa Ntewa pisa pa le Israel lala, naŕa sape

“Apisu piowa e la naŕa pe ape Yu re la poli, sa naŕa la ape sur korena ga, ana yoko amiu avielue e navisa ruruena la naŕa yoko nekila van la.

Amiu asitom asape taŕatete la nene akilia akila sur wo tai, ana yoko sinemi kari la e pogos naŕa amiu avisu netamalia la mēna ga.” Naw 32:21

²⁰ A nalua nena, naga Navisawalena Aisea, naga mēna suŕalu pisawal nena visena taŕena si tai kiena ne Ntewa e marana kata apua ita le Yu lala, naŕa Ntewa pisayu la naŕa pe ape Yu re poli, pisa pisape

“Nanua sumo, pe akale in re poli, ana siraunia, yoko ataŕan inu, nanua pe apiunin re poli, ana yoko siraunia, sinelan asape neva nakaten la.” Ais 65:1

²¹ Ana Aisea siri plan taŕenan sina visena kiena ne Ntewa tai, naŕa Ntewa pisayu la naŕa pe ape Yu re poli, pisape

“Yar la nene asuŕna amlogelu inu, asuŕna akovenlua inu silaga.

Nakonua rui nepikeŕa ga luŕau pan la, sineun nesape awasuŕela aimi si pun inu, ana la na peraga narui.” Ais 65:2

11

Le Yu la yepela mavin Yesu, ana Ntewa pe pilon re m̄asina pan la poli

¹ Naviunena taŕena suŕna ga, nane e lepas kiena le Yu lala, sa naŕa pe amlelaga re e Ntewa poli, ana naga mēna ga suŕalu pilon m̄asina pan la, pona peraga?

Nekilia nesape peraga, naga pe kila re sanene poli komin in na nepe yere Yu na nesike ne, inu mēna ga yermarua Epraam naga pe repiu marua, a in na nomolue e lus kiena yermarua Pensiman, a nekilia ruru po naŕa Ntewa pe koven lua in re poli.

² Sanene, nekilia nesape peraga, Ntewa pe koven plan ita re ita naŕa pio ita tepe kiena. Popon tesitoŕnal Siriena Wa tai nanua sumo rui, e pogos kiena navisawalena Elaisa. E pogos nene, Elaisa mloge piowagan p̄arŕarera kiena yeririna lala kiena ne Ntewa, ana pisimumu pa Ntewa, sape

³ “Suŕe, kioŕna navisawalena lala, kioŕna yeririna la asuŕna aŕemoŕar la, a kioŕna wonta wa lala, asuŕna akilarovia,

a piowa pano-o nepisu sane in ga taaga nepatanon ko ke narui, a nagane in mēna ga, ataveve in ke ne asape alalua kiau malena.”

Suŕe1 19:1

⁴ Ana e poglis nene, Ntewa pisataŕnea, sape

“Peraga Elaisa, pe ko ga taaga re poli. Pe okilia re poli, ana e yo nene in na kiau yeririna la tol manu olua [7000] la asuŕna sane ko, naŕa pe akila re lotena pa nono navisokanena poli, naŕa Paal nene.” Suŕe1 19:18

⁵ A nagane, e kieta pogosa, maran taaga ga amio nene. Yar moki liu naŕa pe amlelaga re poli, ana ita ke narui naŕa tesike ne, ita narin p̄egas nen le Yu lala, naŕa Ntewa pe lemam pan ita, kian plan ita, narui temlelaga ea. ⁶ Ana popon tekilia ruru tesape Ntewa kian plan ita vanon ya? Pona yar laŕasa asitom ke asape naga kian plan ita komin tekila ke yuŕaena wo la moki naŕa naga kekaran yo. Ana peraga, komin visae ve sanene, kana kinasa sane lemamiēna kiena ne Ntewa pe kila re nena sur tai poli. Ana Ntewa kian plan ita pe e re ga e naŕa tekila sur wo la moki poli, ana kian plan ita e ga e kiena lemamiēna wo pan ita.

⁷ Tekilia tesape ita le Yu lala, ita make ga tesuŋa takale ke mrapa naŋa teim temesmesu temio Ntewa, ana ita lua la ga naŋa toŋalia. Ana visae ve sa nene, yoko ve sanapen taŋena la nene? Nanene kana kinasa sane la mokliu naŋa ape ŋarŋarera paŋisi, ana pe amal re mrapa nene po la wa. ⁸ Visena na Siriena Wa tai pisayu la ne sanene, sape

*“Ntewa taŋan la asuŋa ga amio kiela wowe lala,
ana pimi tol nagane sa naŋa kilamarala la sike na,
ana pe apisu kilale re sur poli,
kiligala la sike na, ana pe amloge kilale re sur poli.”*

Ais 29:10

Naw 29:4

⁹ A sa ŋena visena kiena ŋarin Suŋe Tepet nanua sumo, pogos naŋa sinenan sape Ntewa lalua ŋareraena kiena nasinekar lala naŋa asuŋa aŋareran ke naga. E pogos nene naga piun tai Ntewa, sape

*“Suŋe, kiau nasinekar la nene silaga asuŋa amloge ke pon kiela pupia ŋaŋagena lala,
ana nesape neviun tan ko vena okila sane kiela na logwoena la nene vim sane suri tai naŋa
kila kare ruru la nenaga, kan la ke sina ga, kila sane pe apisu kilale re sane kiela nasinekar
la asike ga lavisin la poli.*

¹⁰ Ana popon sane okila kilamarala imi ŋala, vena ve akilia re si avisu kilale sur lala,
a okila naŋa kiela nasinekar la aŋareran naŋa ayuŋae koren ga, awar sur urmi la e ŋasila.”
Yauena 69:22,23

¹¹ Ana e lepas kiena ne le Yu lala, Ntewa pe koven plan la re poli, ana pe lelaga naŋa, la apiowa towe ŋaga. Ana napiowaena kiena la nene, kila narui Ntewa tamalia la naŋa pe ape le Yu re la poli, a pogos naŋa le Yu la apisu Ntewa sinena miye ŋena yaru taŋena la nene, apisu piowa ga, apieluen la, ana kila aŋareran vena la ŋena ga monar aim amesmesu ke sina ga amio Ntewa. ¹² Ana na nene kana kinasa sane le Yu lala kiela ŋelaga nene, naŋa pe amlelaga re e Yesu poli, nanene kila mrapa na viewoena a navisa ruruena kiena ne Ntewa kilia imi tol la naŋa pe ape Yu re poli.

A visae le Yu lala, la ŋena alelaga, alelaga vano-o tol marana naŋa Ntewa pisaaria, yoko kilia kila naŋa kiena navisa ruruena lala aim ave keviu manenea.

¹³ Pogaga narui, sineun nesape nevisa narin visena tai e lepas na pun amiu la naŋa pe ape Yu re poli. In na nepe nalologena naŋa Ntewa pisirlua inu vena navanon nevisawal kiena lologena wo van amiu, a naga pe yuŋaena tai naŋa noŋareran ruru kilaena, komin naŋa nepisu po paŋisi. ¹⁴ Nanene komin naŋa nepisu sane pog naŋa nemlologon ke pan amiu naŋa pe ape Yu re poli, asuŋa amlelaga, a kila naŋa imimi le Yu laŋasa sinelan asape la ŋena monar ava loyuŋa ea, ana la ŋena amlelaga.

¹⁵ Sumo na, Ntewa pilon ŋasina pa le Yu lala, a nanene kila naga pisu la naŋa pe ape Yu re poli la rui, naga sitom sape kilia kila kiela mrapa aim ave mara wo sina amio naga.

Ana visae le Yu la avilon la a la ŋena awasuŋela puna Ntewa, vera wo na wo, komin nagane la sa ga naŋa amarmare rui, ana visae alelaga e Yesu, yoko aim sa naŋa amal sina.

¹⁶ Yoko nevisa ŋakaiwa tai e yo nene e lepas na mralaki ŋesia naŋa tesuŋa toŋar pa e yuŋa na leniena, tepisa potena vanonia pa Ntewa, teyawawoia ve sur wa. Ana pogos naŋa toŋar ŋesan mralaki pa Ntewa, kila sane mralaki taŋena ŋena la naŋa pe toŋar re poli, lala ŋena ape wa, ape kana Ntewa. Ana yermarua kiena le Yu lala, la sane mras ŋesia naŋa apa ŋesan e yuŋa ŋana Ntewa, a kila sane le Yu la naŋa aim sirau, la ŋena ga ave kiena ne Ntewa. A yermarua la nene, la sane purlaki tai naŋa suŋa kapur ke e lokove kana Ntewa, a visae purŋesa ve kana Ntewa, yoko korowas la naŋa avim sirau la ŋena ave kiena ne Ntewa.

¹⁷ Sanene, purŋes nene amio korowas lala naga kana kinasa yeririna kiena ne Ntewa lala, sane le Yu lala. Ana siraunia, Ntewa pisu korowas laŋasa piowa ga, ana peve plan la, a pa te plan ruru korowas nen laki taŋena tai naŋa sike ga yoŋarua, ana ŋar pimi, a teruruia piar la panon purŋesia naŋa sike lokove, vena kus lelen korowas la naŋa peve plan la rui.

Ana korowas taŋena la naŋa pimi sikol e purŋes nene, kinasa sane kam la naŋa pe ape Yu re poli. Amiu na pe amolue re e purŋes nen yeririna kiena ne Ntewa napo poli, ana

naga sinenan sape amiu m̄ena monar asikol amiu amio la loyuṃa e kana lokove, vena amiu punu ga awar kiena navisa ruruena lala.

La naṓa pe ape Yu re poli, la taṓatete akilia awarwarlan naṓa Ntewa ṓere la

¹⁸ Sanene kam naṓa pe ape Yu re poli, kam na monar ve awarwar amiun re naṓa Ntewa piran amiu amio kiena yeririna lala, komin naṓa amiu na pe ape purṓes re poli, ana kam na ape korowas ga la naṓa Ntewa sikol amiu e purṓes nene naṓa sike pa sumo rui. Korowas lala pe kila re purṓes mali poli, ana purṓes ke narui naga suṃa kila korowas la amali. ¹⁹ Sa nene, pe pon re kam na asitom asape kam apo poli, ana asape, Ke, Ntewa na sinenan imimi paṓisi, ana peve plan korowas laṓas petan purṓes nene vena kila sane mekilia mesikolia.

²⁰ Lelaga naṓa Ntewa peve plan korowas laṓasa, ana kila ga pa le Yu la naṓa pe amlelaga re e Yesu poli, a pe lelaga naṓa sinenan sape amiu akilia asikol amiunia, ana nanene pe komin re naṓa akila yuṃaena wo laṓas poli, ana komin naṓa asuṃal ṃarera e kiamiu viawaena e naga. Sanene, ve avilaven re naṓa apimi sane yeririna lala kiena ne Ntewa, ana monar ava ruru amiu asuṃa asitom ruru sur wo nene naṓa Ntewa kila pan amiu. A monar maraṃe amiu ruru m̄ena ga, ²¹ komin naṓa sane Ntewa koven plan korowas marua la nene naṓa kiena yeririna la naṓa pe amlelaga re poli, yoko naga kilia koven plan amiu m̄a nenaga korowas viu lala maran va taaga sa ke ga, visae ve amiu awar re mras wo lala. ²² Sanene, e nene tevisu ṓelaga kiena ne Ntewa e lepas ga luwoka. E kana lepas tai, kiena sinemimiena ṃarera na ṃarera pan la naṓa amloru, naṓa pe asṃal re ṃarera e naga poli, sane le Yu lala. Ana e kana lepas taṓena, naga pe lemam paṓisi pan la naṓa pe ape Yu re poli, naga la naṓa akekarania a asuṃa ataveve ruruia. Ana la m̄ena ga visae ve asuṃalu re ṃarera, naga kilia te plan la sina ga vetan purṓes wo nene naṓa asuṃa asikol la ea.

²³ Nanene naga kila pa le Yu la rui. Pe amlelaga re poli, ana te plan la, ana visae avilopu la ga, akilia awasuṓela, ana Ntewa kilia sikol rurula sina e purṓesa sane kiena yeririna ruru nena la napo. ²⁴ Naga kila sanene rui pan amiu naṓa pe ape Yu re poli, komin naṓa amiu na sane korowas nen laki na yoṃarua, ana naga ṓere amiu apimi, sikol amiu e purṓesa naṓa sike e kana lokove, ana asikol amiu amio navisa ruruena naṓa naga sinenan sape la van kiena yeririna lala. A visae kila van amiu ṓisi, yoko kilia kila m̄ena van le Yu la naṓa naga te plan la, komin naga kekarana sikol ruru la sina e purṓes nene naṓa asikol e naga nanua sumo rui.

Ntewa sinenan sape le Yu lala atol natamaliaena

²⁵ Erau lala, sineun nesape nevisawal van amiu la naṓa pe ape Yu re poli, sane monar avisu kilalea sa naṓa Ntewa pe koven plan re kiena yeririna la nene poli, naṓa le Yu lala.

Lelaga sane asuṃa ape ṓarṃarera ke ga wa a yepela mavin lelagaena, ana naga mligan la towe m̄a ga sumo, a suṃa kila ke naṓa amiu naṓa pe ape Yu re poli akilia alelaga, akilia aim ave moki loyuṃa vano-o tol pupia maran naṓa Ntewa sinenania. Sur nene sane sur tapolou tai naṓa yar la pe akilia ṓesan re poli, ana nagane Ntewa kila meraravan ruruia. A monar akilia sur nene, komin pe pon re awarwar amiun poli, asitom asape Ntewa sitom amiu ga, ana pe kekarana re si le Yu la poli. ²⁶ Pe sa re nene poli, ana yoko naga tamalia la na wa, sane visena na Sirienua Wa tai, naṓa pisa sanini, sape

“Yar na tamalia itaen yeririna lala kiena ne Ntewa yoko ṃalivi ga e kieta yo, e kieta pupia pulkumali nene Yerusalem metava e tavie naṓa Saeon.

Ita lus lala kiena Sekop, ita le Yu lala

naṓa kieta napiowaena la moki paṓisi, ana yoko naga ke narui imi war plan make kieta nakoena lala, kila ita towo sina.”

Ais 59:20,21

²⁷ Visena taṓena na Sirienua Wa tai pisawal navisaarena kiena ne Ntewa tai e m̄ena e lepas nene, naṓa pisa sanini, sape

“Kiau navisaarena pan la sike pa rui,

sape yoko nowar plan kiela mlamulena viowa lala, neviewo la make ga.”

Ais 59:20,21, 27:9

²⁸ Pogos naþa Lologena Wo pimi m̃alivin le Yu lala, la pe sinelan re poli, ana e lepas tai naga po, komin naþa kila sane kam la naþa pe ape Yu re poli, Ntewa mla towe pulmas pan amiu vena alelaga. Ana e kana lepas taþena, naga m̃ena piowa ga, komin naþa kila le Yu la apim si sane nasinekar kiena ne Ntewa lala. Ana Ntewa taþatete kilia visu la ave kiena nasinekar silaga, naga monar sinena ye la sina, komin naþa naga taþatete sinen þesan kiena visaarena wo la naþa kila pan li marua lala kiena ne kiena yeririna la nene, le Yu lala. ²⁹ Ntewa pisaar navisaar ruruena la pan la þisi rui, a naga pio la ape kiena rui, a yoko naga taþatete kilia vilon sina ga kiena sitomena pogos tai.

³⁰ Sanene, naga miyuñae e ita sanene. Nanua sumo, kam naþa pe ape Yu re poli, kam na pe amlelaga re e Ntewa poli, ana pogos naþa imimi le Yu la imimi pe melelaga re e Lologena Wo poli, nanene kila kiena mrapa vena sinena ye amiu. ³¹ A pogos naþa naga sinena miye amiu sanene, kila naþa imimi m̃ena memlelaga e Lologena Wo, ana yoko naga kilia sinena ye imimi sina. ³² Nane sitomena kiena ne Ntewa sanene narui. Nanua sumo naga tañan naþa ita punu ga teyal e mrapa naþa pe sinetan re logeen kiena visena poli, kila sane naga kilia sinena ye ita, kilia were ita punu ga teim teve kiena.

³³ Erau lala, navisa ruruena lala kiena ne Ntewa e ita keviu paþisi! Kiena manmaruaena a kiena kiliaena apa manene laa metava! Kiena sitomena la merorol paþisi, a kiena þelaga la apowo manene laa! ³⁴ Sa naþa visena na Sirienua Wa tai pisa, pisape “Pe yar re nena tai naþa torokin tol ya naþa teke e sitomena kiena ne Ntewa. Pe yar re nena tai naþa torokin kilia la visena na iilarena va Ntewa.

³⁵ A pe yar re nena tai naþa kila po pa Ntewa torokin naþa kilia kila Ntewa monar lamaran si navisa ruruena wo la vania ve sa naþa naga suñna þar ke pan ita.” *Sop 41:11*

³⁶ A nesikol visena nene, nesape: Kieta Ntewa, naga taaga pe purþes nen sur make ga, naga taaga pe m̃areraena na sur make ga, naga taaga pe luas nen sur make ga, ana popon ita punu ga teyeluar luen ga naga vano ve þisi re pogos tai.

12

þelaga wo kiena yaru naþa mlelaga

¹ Erau lala, sa naþa Ntewa sinena miye amiu ruru nena ga, kila po pan amiu paþisi, sineun neviun manene van amiu vena monar atañan kiamiu malena wetelu vania. Monar ave wa ruru wo, sa naþa amiyawawo tasnemiun pania sane kuþaþaena tai naþa amla pania. Naga pe pe kuþaþaena re sane sur mali tai naþa añeñar mare, ana naga pe kuþaþaena naþa sane mali, a yoko Ntewa kilia kekaran manenea. Naga ke narui þelaga mesmesu na kilaen lotena va Ntewa naþa mesmesu naþa akila. ² A ve atañan re sane naviowaena lala na yomarava nini awere amiu vena ataveve kiena þelaga, ana silaga, monar atañan Ntewa kila kiamiu sitomena la imi ve urviu sina. Sanene, yoko kiamiu þelaga kilia vilonia, kilia imi wo silaga, a yoko akilia ayaloro ataveve nasinenanena kiena ne Ntewa, naþa po, merarava a mesmesu naþa mesmesu silaga. ³ Nepisawal visena la nene pan amiu, komin naþa Ntewa pe lemam pan inu, mligan lua inu, mligan yuñnaena nene e luñau narui. A nesape nevisa re m̃ena suri tai van amiu, sane pe pon re si naþa asuñna akila kiamiu sitomena apa manene metava poli. Tekila kiena yuñnaena sanape, ana kieta sitomena la monar mesmesu, monar su ga tano. ⁴ Taþatete tevisave ita na tepo laa taulu taþena lala, komin ita na sane tas nen yaru taaga, naþa kana korowasa la asuñna ga, ana korowasa la peve taaga nene kiela yuñnaena na kilaena la susuñna ga. ⁵ Sane ita moki, ana Kristo þere ita make ga tepim tepe taaga, ana sane inu neþasine ko, a ko oþasine inu. ⁶ A Ntewa pe lemam pan ita, a tañan nakiliaena taþena lala pan ita, naþa sane nalaena lala naþa naga kian plan pan ita vena teyuñnae temio. A ita veve taaga monar toñareran teyuñnae temio ya naþa mla pan ita. Sanene,

visae Ntewa tañan van ko sape kioñna, ko na ove navisawalen visena naþa mla pan ko, ana monar okila omio pupia lelagaena naþa sape sane kiena visena nene pe lelaga paþisi,

- 7 pona visae kioña, ko na ove naiilaen yuñmaena na suñmare, monar okila omio kioña ñareraena wetelu,
 pona visae kioña, ko na ove navianena yaru e visena kiena ne Ntewa, ko na monar yepeña ñmaen ruru kilaena,
- 8 pona visae kioña, ko na ove naiilaaren sitomena kiena yaru lala, ko na monar ositom urmin kilaen,
 pona visae kioña, ko na ve nalaen naiilaena, monar owar ve moki,
 pona visae kioña, ko na ove nasumonen yaru lala e yuñmaena kiena ne Ntewa, ko na monar ve omalum re,
 pona visae kioña, ko na ve naiilaen la naña asike e pog ñmarera, ko na monar okekaran kilaena.
- 9 A naga ke nene narui ñelaga wo tañena la naña akila:
 kiamiu sinesiena e yaru tañena lala monar ve lelaga,
 monar aure vetan ñelaga viowa lala,
 monar auarar ruru ñelaga wo la ñmarera,
- 10 monar avinaia amiu sane ave namratava taaga ga,
 monar akilali naña avisu sane ane yoko kilia kila ruru ñelaga navatanonena va la ga wa,
- 11 ve atañan re naña kiamiu sitomena ñmarera na kilaen suri wo la kovio sina vetan amiu,
 monar akila sane kapi vivaga sa Ninuna Wa suña vivaga ruru e amiu,
- 12 monar akekaran navisaarena kiena ne Ntewa naña kiamiu sitomena wasinea sane yoko kila wo van amiu sa ga naña naga pisa,
 pogos naña avane naloge viowaena, monar akila kiamiu sitomena ve piavi,
 monar alen silaga,
- 13 pogos naña li nalelagaena tañena lala limala plasan suri lañasa, monar akekara aliureure suri van la,
 a monar akekaran visuaren yaru tañena lala e ñmamiu uña.
- 14 A nanene suri si lañas nanini narui naña monar asitom ruruia vena kilaen va yaru tañena lala:
 visae lañas asuña akila kare amiu komin naña amlelaga e Yesu, monar akila wo van la. Ve avis re viowa van la, ana aviun Ntewa visa ruru la,
- 15 visae lañas amloge po komin suri nowo tai, amiu ñmena monar akekara amio la,
 visae lañas asuña atagin ke sur tai, amiu ñmena monar atag amio la,
- 16 visae amiu amio tañena lala, monar asu ruru ga amio la naña kiamiu sitomena ve taaga ga,
 visae ayuñae amio tañena lala, ve aligan amiu re metavan la, sane amiu na apo, ana akekaran ga narin yuñmaena lala, a akekaran ayakol amiu amio yar la naña ave torokaki,
 visae akila suri lañas, ana ve asitom re avisave ape manmarua, ana akila kiamiu sitomena vito su ga tano,
- 17 visae yaru lañas akila viowa van amiu, ana ve akila maran re si naviowaena van la, ana silaga monar asitoñalia vena akila suri punu ga naña yoko yaru la akilia avisu kilale asape po a mesmesu,
- 18 a visae kiamiu suri viowa tai sike likan amiu amio yar tañena lala, monar akila suri make ga naña sike e limamiu vena were si suñarena imi sike pun amiu punu ga.
- 19 Erau lala, sineu si amiu pañisi nane nepisa sur la nene pan amiu. Lañas sina sanini, sane:
 “Visae lañas akila viowa van amiu, ana ve akilali naña ala nakoena van la. Akilia aligania van Ntewa vena naga liñere mare la sirau, komin visena tai sike e Siriena Wa rui, naña Ntewa sape,
 in ke narui naña yoko nela nakoena van yeririna lala, inu ke narui naña yoko nelamaran va la naña akila ke piowa.”

Nav 32:35

²⁰ A sanene, visae kiamiu nasinekar la asuṃa ga, monar akila ruru la, sa naṓa visena na Siriena Wa pisa, naṓa sape

“Visae kioṃa nasinekar visokaria, ola kinanena vania, visae moto karia, ola wii vania. Visae okila sanene, yoko okila naga mawan kiena ṓelaga viowa vaṓisi, vano vano-o pona kekaran naṓa amiu lua ave erau wo sina yo.” ṓakaiwa 25:21,22

²¹ Taveve suri la nene, nepisa sanene pan amiu, nesape ve ataṃan re ṓelaga viowa taulu amiu, ana monar ataulu ṓelaga viowa e kiamiu ṓelaga wo lala.

13

Li nalelagaena la monar avatanon yerkawa lala amio ṓarin suṓe lala naṓa Ntewa pisir plan la

¹ Nagane sineun laen visena laṓasa e lepas kiena li nasumonena lala. Tekilia tesape Ntewa na mon manene laa metava, naga pe suṓen ke suri punu ga, a naga ke narui ṓarin suṓe taṓena la naṓa asike ne, mla ṃareraena pan la. Sanene, ita li na lelagaena make ga monar tewatanon ṓarin suṓe la nene, monar telogear la. ² Yaru la naṓa visae asuṃa akilali naṓa avisaluṓar ṓarin suṓe lala, asuṃa apisaluṓar ke suri naṓa Ntewa pisirplania, a yoko Ntewa taṃan ṓarin suṓe lala akilia ala nakoena van la vanonia. ³ ṓarin suṓe lala, Ntewa pe pisiriplan la re poli vena kilaen yeririna wo la amarau, ana naga pisiriplan la komin la naṓa asuṃa akilaro ke navisaluaena. La ke nene narui monar amarau, komin naṓa visae ṓarin suṓe tol la yoko la nakoena van la. A visae sinoṃan sane ve omaraun re ṓarin suṓe, yoko monar okila mesmes ga e ya naṓa yerkawa la apisa, ana yoko ve akila re viowa van ko, yoko akekaran ko. ⁴ Ntewa pisiriplan la sane ape kiena yaru na yuṃaena lala, vena kilaen yuṃaena wo naiilaen yeririna lala, a visae sinoṃan kilaen ṓaruṃa, monar ovisuar ruruia, komin naṓa asuṃa aṓarar ke ṃena plaki, ana pe aṓarar korenan re poli. Ntewa pisiriplan la, mligan e limala vena ala nakoena van la naṓa akila piowa. ⁵ Sanene, popon tewatanon ṓarin suṓe lala, komin naṓa pe pon re tekila viowa poli vena ala nakoena van ita. A nekilia sane kieta sitomena suṃa pisu kilale ke ṃena rui sape popon manene visae tesuṃa tekila ke sur make ga wo mesmesu silaga. ⁶ Taveve visena la nene, popon tekekaran toul takis lala naṓa monar tela va ṓarin suṓe, komin pog naṓa ṓarin suṓe kila kiena yuṃaena, suṃa kila ke yuṃaena naṓa Ntewa mligan vena akila. ⁷ Sanene, monar akila sur punu ga naṓa mesmesun akila. Visae kilavaru na takis e lepas na kilavaru naṓa tesuṃa tetaulua, pona kilavaru tai naṓa monar tokoan vanon sur laṓasa, na monar toulia. A la naṓa apuarar ke yuṃaena kerkeviu lala, pona kiela kia pa metava loyuṃa e ṓarin suṓe lala, monar tekekaran la, mesmesun ga naṓa tewatanon la.

Li na lelagaena lala monar akila wo va yaru taṓena lala

⁸ Suri taṓena tai, naga e lepas na lapui la naṓa yaru la asuṃa akila. Visae kioṃa lapui teke e yaru tai, monar olamaran vania torokin ga ya naṓa amiu lua apisaaria. A popon ositomyuli ṃena sane kioṃa lapui teke ṃena e Ntewa, komin naga mla suri tai pan ko keviu manene rui. Suri nene naga sinesiena, a ko na monar olamaran ruru va yeririna taṓena lala. Monar sineṃa sisi la naṓa asike lavisin ko, komin yaru naṓa kila ke sanene, naga sane naga mlogear make navisaluaena kiena ne Ntewa rui.

⁹ Visena kar la moki sike loyuṃa e navisaluaena, sane la naṓa apisa sanini, asape: Ve okila re kolau, pona ve oweṃar re yaru mare, pona ve ovinau re, a ve sineṃa sun re suri kiena yaru taṓena, a suri taṓena la ne sanene. Ana visena na visaluaena make ga, asike vatanon pupia purṓes nen navisaluaena tai naṓa pisa sanini, sape: Monar sineṃa si yaru naṓa sike lavisin ko, okila wo vania sa naṓa osuṃa okila ke sina ga pan ko. ¹⁰ Yaru naṓa visae sinena si kemua yaru taṓena lelaga, yoko naga taṓatete nena kila sur naṓa viowa vania. Sanene, ṓelaga na sinesiena yaru naga kilia kila sa naṓa sane okilia ologear make visena la naṓa Navisaluaena pisa. ¹¹ Ita na monar tekila ga ṓelaga wo la naṓa, komin nagane, pog pa ke narui. Monar tevisu kilale sane lavis pogos naṓa tesuṃal ruru narui,

ve tomomalio re sina. Pogos naþa ita temlelaga mare ga na wa, ita tesitom tesape yoko Ntewa tamalia ita vetan yomarava nini pogos piavi ke ga wa, ana nagane, pimi ke lavisi rui.

¹² Nekilia nevisa sanini nesape lavis yemalo þisi, yomerarava suþna pimi malivi, ana popon toþisin þelaga viowa lala na yemalolo, a monar towar sur na kilaen mara na þelaga mesmesu na yomerarava, vena tekilia tomolue tevano vena tekila mara van sur viowa la nene. ¹³ Kieta malena monar mesmesu ruru wo, torokin naþa tepe yeririna lala naþa tesuþna temial ke e yomerarava, a yoko monar teligan þelaga viowa lala. Ve tekila re þaþagena kar la naþa apulen ga kekarena na yomarava a yaru la amun wii vano-o akilalu þarila lala. Ve tesuþna tekila re suri naþa yerþnene lala amio sira lala asuþna aureurela kar ga sa ga nene, a asuþna akila ke þelaga namname lala. Ve tesuþna teveveyun ita re, a ve tesikol ita re e vielueena lala. ¹⁴ Monar teligan þelaga viowa naþa tepaeme temio, a pe tesitoþnal re na taveven kiena nasinenanena poli, ana sa naþa tesuþna temiyen ke mata kulsota nowo e marana yeririna lala, monar teyen þelaga mesmesu lala kiena ne Suþe Yesu Kristo e kieta malena, vena yeririna la avisu sane ita tepe kiena yeririna kemua la lelaga.

14

Popon li nalelagaena lala ve asuþna avisa kare la re sina vanon ga narin sur laþasa

¹ Erau lala, sineun nesape akilia sa naþa nemloge rui sane pupia visena tai sike e amiu nagane. Sane laþasa, kiela sitomena mok liu e sur laþasa, asape popon akila, pona viowa ga naþa akila, pona amaraun asape visae akila, sa þis Ntewa ve kekaran la re sina.

Sineun nesape la ne sanene, nepisu sane la pe apiawa re marera poli wa, ana pogos naþa asike amio ita, ve tekilali re naþa takawe manene laa, tekekaran naþa toure la. ² Sanene, yar laþasa akan kare ga kinanena lala amio mena tata punu ga lala, a yar laþasa asitom asape Ntewa sinenan sape avalia kinanena laþasa, pona avalia tata. ³ Ana sineun nesape nevisa van amiu visae ko tai naþa okan ke ga tata, ve ovisu re viowa e yaru naþa palia, a visae ko tai naþa opalia tata, ve oliþere re naga naþa suþna kania, ovisave yoko Ntewa liþere naga vanonia. Ntewa kekaran make ita ga, ana amiu mena ga monar akekaran amiu. ⁴ Li nalelagaena make ga asuþna apisu ke ga Ntewa asape naga pe kiela suþe, ana naga ga kilia visa van la visave la veve taaga akila nene pona ve akila re nene. A sanene, pe pon re ita ga teliþere ita si poli. A Ntewa pisu yeririna laþasa akan tata, a laþasa pe akan re tata poli, ana naga kekaran la make ga, komin naga kilia naþa sape yoko Suþe Yesu kilia suþna iila la silaga vena asuþna asuþnal marera e naga.

⁵ A naga nene maran taaga e lepas na legiena lala. Yar laþasa amla legiena tai asape pe kiela legiena wa, a yar laþasa apisu legiena lala asape maran taaga. Naga nene naga pogaga, ana ita make ga monar ita veve taaga tekila kieta sitomena lala, ana tesu ea, ana ve toþareran re yaru taveve kieta sitomena. ⁶ Yar naþa mareran sape la legiena tai sane kiena legiena wa, naga kila vanon sinenan sape visirlua kia kiena ne Ntewa ea. Yaru naþa kekaran sape kan suri make ga, naga pisa ke potena pa Ntewa vanonia, ana pogos naþa kinana, suþna pisirlua ke kiena kia. Yar naþa kila sane palia kinanena laþasa, naga mena ga suþna kila ke naþa pisirlua kia kiena ne Ntewa, ana naga mena suþna pisa ke potena pa Ntewa e kinanena taþena la naþa suþna kania. ⁷ Monar tesitoþnalia, sane pe yar re tai naþa kilia sike e yomarava nini sane yar taaga ga poli, vena kilaen sur make ga sa naþa naga taaga sinenania, a pe ita yar re tai naþa visae mare, ana sur nene pe kiena naga taaga ga. ⁸ Pe sa re nene poli, komin visae temali, temali naþa tevisirlua kia kiena Suþe, a visae temare, temaren naþa tevisirlua kiena kia. Sanene, sur make naþa tekila, monar tekila amio sitomena naþa sane pe tekila re ga kieta nasinenanena poli, ana ita tepe kiena ne Ntewa, monar tetaveve ga kiena nasinenanena. ⁹ Nanene komin nanua ne, siraun naþa Kristo mare, na suþnal mal sina, ana kila naga pimi pe suþen kiena yeririna

la naþa amare, a pe suþen kiena yeririna la naþa amali, ana silaga monar tesu ga vatanon kiena nasinenanena.

¹⁰ Ana sanene, pogos naþa nalelagaena tai suþna kila sur la taveve þelaga marua kiena ne le Yu lala, ana suþna mliþere ke nalelagaena taþena naþa pe asuþna akila re poli, naga nene na piowa manene laa paþisi. A pogos naþa yar tai ve kila re sanene, ana naga suþna pisu ke piowa e yar taþena naþa kila, naþa sane kiena puruvi tai loyuþna e namratava kiena ne Ntewa, na nene pe þelaga na mawaen tai.

Ve tesuþna teliliþere ita re, komin naþa yoko ita make ga tesuþnalu tese marana Ntewa na wa, a yoko naga ke narui naþa visuveve ruru ya naþa ita make ga tekila. ¹¹ Sur nene sike e Nasiriena Wa la rui, naþa Ntewa pisi, pisape

“In na nemal na nesike ne, ana nekilia nevisa ruru sane pogos na pimi ke ne naþa yoko yar make ga akinai vamon inu,

a yoko yar make ga avisawal avisave in ga taaga nepe Ntewa.”

Ais 45:23

¹² Sanene, yoko ita make ga teim e marana Ntewa, a yoko monar ita make ga veve taaga tevisawal sur la naþa tesuþna tekila, a naga ke narui yoko visuvevea.

Monar ve okila re kioþna erau tai kiena naviawaena loru

¹³ Taveve sitomena la nene, ve tevisuveve manene ita re sina ga, tevisayu ya naþa yar taþena kila, tesape po pona piowa ga. Ana ya naþa ita li nalelagaena lala monar tesitomia vena tekila sina van ita, naga sanini, sane monar ve tekila re sur tai naþa kilia kila nalelagaena kila pal mrapa pona kilia kila naga loru e mlamulena viowa. ¹⁴ Sane visae nesitomveve inu, nekilia nesape nesuþnalar m̄arera ruru na nesike ne nemio Suþe Yesu, ana nemlelaga m̄arera nesape taþatete sur tai naþa monar tevalia, ve takan re. A visave nalelagaena tai war sitomena visave kinanena tai pe torokin re kan po, naga pogaga, ana kana kinasa sane monar valia ruru nenaga, a ita taþena lala monar tetaþnan naga taveve kiena sitomena nene. ¹⁵ A visae ositom ovisave kinanena la torokin ga nakanena, okilia osuþna okania, a visae kioþna puruvi taþena tai naga valia, ve okilali re naþa ovisave naga m̄ena ga monar kania. Visae peraga, yoko okilia okila kare nena kiena sitomena, a naga nene naga pe þelaga wo re kiena ne ita yar la naþa sineta sisi ita poli. Monar tesitoþnal tevisave Kristo maren nakilaen kieta malena imi wo, ana pe pon re tetaþnan narin sitomena e lepas na kinanena imi ve sur keviu naþa suþna kila kare si kieta malena poli.

¹⁶ A taþena sina, visae sur tai naþa ko opisu sane pogaga vena kilaena, naga pogaga, ana pe pon re naþa osuþna okila þisi na kila kare sitomena kiena nalelagaena taþena tai, vano-o kila yar taþena lala avisa kare kieta kia ita li nalelagaena lala vanonia. ¹⁷ E lele nene tesuþna tepisayu visena la na lepas nene naþa sape yoko tekilia tomun ya pona takan ya, pona monar tevalia namunena ya pona kinanena ya, ana monar ve sineta þesan re tesape nanene naga pe sur keviu re tai nene poli loyuþna e nasuþnenena kiena ne Ntewa. Ana kana pupia sur ne lala, nane naþa ita tekila þelaga wo na malena mesmesu, a tese suþnare temio yar taþena lala, a tetol kekarena naþa Ninuna Wa suþna mlavia. ¹⁸ A pogos naþa tela sur la nene ve keviu e kieta sitomena, tekila ke yuþnaena wo naþa Kristo sinenania, ana yoko Ntewa kekarana ita vaþisi vanonia, a yoko yar taþena lala avisu sane po paþisi.

¹⁹ Sanene, silaga ita make ga monar toþmareran li naþa tekila þelaga wo naþa kilia ligan suþnare sike e ita li nalelagaena lala, a naþa aiila ita make ga kieta sitomena la imi marua nena napo. ²⁰ Kinanena naga sane pe sur re ta nene poli, ana pe pon re tekila naga imi ve sur ta naþa kila kare ke sina ga yuþnaena wo naþa Ntewa kila e malena kiena nalelagaena taþena la rui. Nepisa sanene, nesape kinanena make ga po torokin kanena, ana pe pon re okan sur tai narui yar taþena visuia ana kila naga loru, naga kila sur tai naþa sitom sape pe popon re naga kila poli. ²¹ Ana kana þelaga wo na kilaena naga sanini, sane ve okan re tata, pona ve omun re kuruta, pona ve okila re si sur tai, visae pogos naþa kioþna puruvi visuia, kilia kila kare naga, kilia kila naga loru. ²² Sanene, visae kioþna sitomena laþasa e laþas na narin sur naþa ositom osape pogaga nakilaena pona ositom osape pe

pon re okila poli, naga pogaga, ana owarar ruru suña ve kiamiu ga amiu lua Ntewa, ve ova olologon re e yo make ga. Yar naña kila ga ya naña naga kilia sape mesmesun ga naña kila, yoko Ntewa kekarania, a naga pe mloge re piowagan poli sape kila sur piowa. ²³ Ana visae yar nene kiena sitomena veve lua e lepas na ya naña kilia kania, ana kan ga, yoko Ntewa tařatete kekarania. Nanene komin naña yar nene sitom rui sape kila sur nene, pona pe po re e marana Ntewa poli yo, ana pe sur korena ga, naga kila ga. Sanene, naga kila pa mlamulen piowa narui, komin naña naga pe miyuña re amio kiliaena e ya naña po pona piowa e navisuena kiena ne Ntewa.

15

Amareran li naña akila ke sina ga wo van amiu

¹ Ita mokliu naña tesuñalu m̄arera ga tesike e Kristo, a pe kieta sitomena peve lua re poli e lepas na narin sur lala naña li nalelagaena tařena lala asuña apeveyu ke ea. Ana ita na sanene, monar ve tekila re ga ya naña sinetan kilaena, ana monar tekila kieta sitomena la ve piayavi ruru wo va nalelagaena tařena lala naña asitom ke asape tařatete akila sur lařasa naña tesitom tesape tekila woga ga. ² Ita make ga, monar tesitoñal li nalelagaena tařena la naña asike lavisin ita, a monar tekila ya naña la asitom asape po, vena akekarania, a vena iilaen kiela malena amio Suře. ³ Visae tesitoñal Kristo, naga sike e yomarava naga pe kila re ya naña naga sinenan sape kila poli, ana naga pane pog m̄arera yam mokliu, akila pania sa naña visena tai na Tus na Yauena pisa, naña yar tai pis pa Ntewa, sape

“Visen viowa la naña akoven pan ko, akoven m̄ena pan inu maran taaga.” *Yauena 69:9*

⁴ Visena la ne sanene, naña asike e Nasiriena Wa la nanua sumo, asiria vena vian ruru itaen la naña teim sirau, ana touloia, akilia akila kieta sitomena la m̄arera ruruia vena ita m̄ena tekilia teva teyupor e pog m̄arera lala. Visena la nene vena iila itaena, akila tekilia ruru tesape yoko monar tetaulu sur make la naña Ntewa pisaaria.

⁵ Sanene na, nemlen ke pa Ntewa vanon amiu, komin naga ke narui naga pe purřes nen sitomena viavi, naga ke narui naña kilia iilar malena kiena yaru, a nemlogin ke tania vena kila sane asuña ataveve řelaga kiena Kristo Yesu, asuña ruru ga veraga amio řelaga na ve taagaena, ⁶ naña kiamiu sitomena ve taaga a kiamiu visena ve taaga, ana yoko ayeluar ruru Ntewa, naña naga pe armanane kieta Suře Yesu Kristo.

⁷ Sanene, amiu le Yu lala, amio kam la naña pe ape Yu re poli, pogos naña asuña apim ke lele taaga, ana akekarana ga naña aworworun amiu punu ga aim loyuña, sa ga naña Kristo kekarana worworun itaena. Pogos naña visae akila ve sanene, naga pe mrapa si tai naña vena visirluaena kia kiena ne Ntewa. ⁸ A popon naña akila ve sa nene, komin Kristo pitomi e yomarava, pe kila re ga yuñaena pan le Yu la poli, ana kila m̄ena pan la naña pe ape Yu re poli. Sane e lařas kiena le Yu lala, kila ya naña Visena Wa kiena ne Ntewa pisa, kila naña navisaarena lala naña Ntewa kila pa apua kana le Yu lala, pimi pe lelaga. ⁹ A e lepas kiena la naña pe ape Yu re poli, naga kipianli lemamiena kiena ne Ntewa pan la, kila vena ayeluarda, maran taaga e naña Siriena Wa la apisa. Tai naña pis řesania sike e Tus na Yauena, naña sape

“Nesike likan wolawa lala, nemieluar kioña kia, yoko nelotun ko e yauena wa lala.”

Yauena 18:49

¹⁰ A tařena, sike e Tus Navisaluaena lala, pisape

“Kam wolawa lala, aimi vai amio nena yeririna lala kiena ne Ntewa naña le Yu lala, amiu make ga akekara!”

Naw 32:43

¹¹ A tai sina sike sina e Tus na Yauena lala, sape

“Amiu naña pe ape Yu re poli, avisirlua kia kiena ne Ntewa, Amiu yeririna na yo make ga aieluarda.”

Yauena 117:1

¹² A na maro molue kome Tus kiena Aisea, pisayu Navisaarena kiena le Yu lala, sape yoko naga sumon m̄ena la naña pe ape Yu re poli. Ana visena nene pisa sanini, sape

“Yoko lus kiena yermarua Sese tai m̄alivi,

naþa yoko Ntewa ligan lua naga metava ve suþen li taþena la naþa pe ape Yu re poli, ana yoko awasinea vena naga kila navisa ruruena kiena ne Ntewa imi malivin la.” Ais 11:10

¹³ Ana nemlenin amiu sina pa Ntewa, naþa tekilia towasine ga kiena visaarena lala, nemlogin vena awasine ma naga vano-o kiena kekarena make ga a kiena sumare imi ulemamaga e kiamiu malena, ana kila vena mareraena kiena Ninuna Wa kilia yumae e amiu vena kila sa naþa amiu asuma aþasine ke kiena navisaarena lala, imi uleule va va sa nene.

Pol pisayu pa le Rom lala e lepas na kiena yumaena naþa kila pa la naþa pe ape Yu re poli

¹⁴ Erau lala, pe nesitom þele amiu re poli, ana nekilia ruru nesape amiu sinemiu la po paþisi, akilia ruru sur la moki rui, a kam na atorokin naþa akilia avian amiu sina e visena kiena ne Ntewa la ve moki. ¹⁵ Sanene, pona ailan towe laa mak nini yo, apisu naþa nesumalu nepisayu sur marera la moki towe laa pan amiu sane, a nepisayu ke sina ga sur laþasa naþa pona kam na asape akilia yo rui. Ana nepisu sane monar nekila ve sa nene, komin Ntewa mligan nakiliaena nakilaen yumaena nene e lumau vena nekila, sane nalaena wo tai, ¹⁶ vena neim sane yar na yumaena kiena Yesu Kristo vena visawalena Lologena Wo kiena ne Ntewa va yar la naþa pe ape Yu re poli. Nekila yumaena nene, in na sane yar wa tai naþa nemiyumae ke loyuma e Yuma Wa mana Ntewa, nekila la naþa pe ape Yu re poli vena aim ave wa ruru nenaga, neyawawo la e kia kiena Ninuna Wa, vena akilia aim sane nalaena wo tai naþa pa Ntewa naþa yoko kekaran vaþisi. ¹⁷ Sanene, imimi lua Kristo Yesu memiyumae ke veraga, a nekekaran naþa inu mena nekila ke yumaena kiena ne Ntewa komþasa. ¹⁸ Ve nevisin re kulin wowe, ana nekilia nevisave noþarwar inu paþisi e ya naþa Kristo miyumaen pimi malivi kome inu, komin nagane, imimi lua moþere la naþa pe ape Yu re poli apim lavisin Ntewa, asuma apatanonia. Nepisawal visena lala, nekila yumaena moki, ¹⁹ Ntewa kila kile la naþa peve taþena, namareraena kiena Ninuna Wa miyumae, ana kila sane lologena wo kiena Kristo pa vanua make nenaga e yo la moki, siar gar Yerusalem pa nena perina yalen silau pa tol pupia lepas naþa Lirikam. ²⁰ Ana nepisu sane pe torok re poli wa, kiau sitomena marera tai toma e inu naþa sape monar neva laa sane wa. Ana pe nesitom re nesape neva e naþa kia kiena ne Kristo pa pa e rui, komin pe sineun re nesikol yumaena naþa yar taþena siar pa rui, ana sineun nesape neva e yo naþa yar la pe akilia re naga poli wa. ²¹ Nanene sane visena tai naþa navisawalena Aisea pisawal nanua rui, naþa pisayu Navisaarena, pisape “La naþa pe yar pisawal re naga pan la poli wa, yoko akilia avisu kilalea, la naþa pe amlogeli re kiena kia poli wa, yoko alogekilalea.”

Ais 52:15

Pol maplanar ruru naþa va malivin le Rom lala

²² Sa naþa nepisa þa rui, yam mokliu naþa sineun nesape neim nomalivin amiu gar Rom, ana nesuma nekila ke yumaena la e yo taþena lala, a sur taþena mena la moki paþisi pano-o pe nomal re kana pulmas tai poli wa. ²³ Ana nagane, nepisu sane kiau yumaena e lepas nini naþa Esia sane þisi narui, a sitomena naþa sike e inu kas mokli rui, sane sineun nesape neim nomalivin amiu re, nomape pona woga ga yo narui. ²⁴ Nekila ruru ke nesape noure matan e nini neva yalen sila u gar pupia purvanua naþa Spen, ana nesitom ke nesape yoko nokom pun amiu, vena tekilia tesu re veraga telual pog wo tai sanene temio ita sumo wa. Yoko taþatete nesike ve piavi ve sa naþa sineunia, ana visae akilia akila sur laþasa vena iila inuena e kiau mrapa, yoko nela sina ga kiau mrapa nevano. ²⁵ Ana nanene pe nagane re poli, komin naþa yoko neva nokom ke ne Yerusalem sumo na wa, komin naþa kiau narin yumaena tai vena kilaen va li nalelagaena kiena ne Ntewa la naþa asike e nene sumo. ²⁶ La asike e pog marera tai nagane, naþa la mokliu pe kiela sur re poli, limala korena ga, ana þegas nen li nalelagaena la nae yo make ga naþa Masionia amio Kris, amloge, ana la ga aþar sitomena nene naþa asape popon akuan kilavaru tai vena iila laena. ²⁷ Nanene sur wo tai naþa akila taveve ga kiela sitomena, ana nepisu sane naga pe sur wo tai naþa monar akila kemua. La nene pe ape Yu re poli, ana e kiela

malena amio Suþe, aþar navisa ruruena moki kiena ne Ntewa pimi e la, kome le Yu lala, ana pogos naþa le Yu la nene atol mēna ga pog mārera, popon la naþa pe ape Yu re poli, akila maran towe van la, aiila la e sur laþas naþa limala plasia.

²⁸ Ana kilavaru nene naþa amiyuwon poloia, amligan e luñau vena nowar vano, ana pogos naþa neva neligan ruru sike amio le Yerusalem la narui, yoko nowasuþe in sina neim nokom pun amiu gar Rom, siraunia yoko neva yalen sila u gar Spen. ²⁹ A nemninu rui visae pogos naþa noworun amiu, yoko wo na wo van ita make ga, yoko neim nemio navisa ruruena wo kiena ne Kristo la ve moki naþa nevion van amiu.

³⁰ Erau lala, sineun nesape neviun manene van amiu e kia kiena kieta Suþe Yesu Kristo, nesape asitoñal in mña e kiamiu leniena lala. Nekilia nesape apulemamaga amio sinesiena naþa Ninuna Wa mlavia, ana popon alen wo inu manenea, asikol kiamiu leniena amio kiau leniena naþa noþion ke nesape nelen silaga. ³¹ Pogos naþa nepa netol lepas naþa Sutea vena neva Yerusalem, la mokliu naþa pe sinelan re naþa alelaga e Lologena Wo poli asike ea, ana pe nekilia re nesape yoko la asitom akila ya ne van inu, ana nemie awis pan amiu vena alen va Ntewa kilawo inu e kiela sitomena viowa lala e inu. A monar alen mēna ga sane li nalelagaena wa lala naþa asike gar Yerusalem, yoko akekarana ala narin kilavaru naþa yoko nekian van la. ³² Ana visae sur make ga torokin nasinenanena kiena ne Ntewa, yoko nekilia noñalivin amiu amio pupia kekarena na losineu, a yoko nekilia nesu ruru nemio amiu, neva ruru inu sumo wa. ³³ A in mēna nesuñna nemlen wo amiu, nesape yoko kieta Ntewa, purþes nen suñare, sike amio amiu vano-o ve uro re.

16

Pol pisawal sur laþasa pa li nalelagaena lala gar Rom

¹ Erau lala, sineun kaloen kiau mñaki e visena laþasa e lepas na kam laþasa. E lepas na vineta naþa Vipi, naþa naga ke narui þar mñak nene pimi mñalivin amiu, sineun akilia sa naþa naga pe yaru na visuaren yuñnaena wo tai na þegas kiena ne li nalelagaena lala nae pulkumali naþa Kenkria, ² ana popon akekarana naþa aworworun naga, aure naga sane vinemiu tai loyuñna e namratava mñana Suþe, sane torokin nenaga naþa ita li nalelagaena lala tekila van ita. Awis aiila naga e ya naþa naga limana plasia, komin naþa naga pe sira wo tai naþa pe erau wo amio imimi moki, miila ruru imimi po paþisi.

³ Sineun mēna ga nesape avisa kiau pokolulagi pona pokolemalo va sira wo taþena nene Priska, amio wona na yerñene Akwila, naþa mepe yar na yuñnaevaena e yuñnaena kiena Kristo Yesu. ⁴ Lelaga naþa, pogos tai nanua ne, nesike e lepas na marena rui, ana lalua akila naþa lavis akilalu kiela malena naþa apim atamalia inu, ana nepisa potena pan la vanon paþisi. A pe in ga taaga re poli, ana þegas nen li nalelagaena taþena mēna laþasa e lepas nene la mēna apisa potena pan lalua vanon ya naþa akila ne. ⁵ A pokolulagi pona pokolemalo naþa nepisa pan lalua, sineun nevisa mēna va taþena la naþa asuñna loyuñna e narin þegas nen li nalelagaena lala naþa apiora ke lele taaga e mñala loyuñna lalua.

Sineun nesape nevisa mēna ve sa nini va la nene, sane kiau erau wo naþa Eþanatas, naþa naga pe yar þesa e pupia lepas na Esia naþa naga mlelaga e Yesu, ⁶ a Maria, naþa naga kila yuñnaena wo moki likan amiu, ⁷ a yar lua taþena na kiau yo nene Antronikas amio Sunia, naþa nanua ne imimi make ga mesike e yuñna na koena veraga. Nalologena lalua nene, lalua amlelaga e Yesu nanua rui, sumon inu, a lalua aþar kia wo paþisi e nalologena taþena lala.

⁸ Laþas ke sina ga, nane Ampliata, naþa Suþe kila sane imimi lua mepe erau wo, ⁹ a Uþanas, naþa memiyuñnae lele taaga memio e lologena wo kiena Kristo, a kiau puruvi wo nene Stakis, ¹⁰ a Apelesi, naþa pe sur koren ga naþa pupia na kilaliena pimi pania, ana naga suñalu mārera e Kristo.

A nevisa mēna pokolulagi a pokolemalo va la ne mratava puna Aristopeulas, ¹¹ a taþena naþa imimi lua kiamimi visena taaga nane Erotian, a li nalelagaena kiena namratava puna Narsisas, ¹² a sira wo lalua na yuñnaena kiena Suþe nene, Traepina amio luena

Traeposa, a vineta mēna naḗa Pesis, naḗa sineta si naga paḗisi, a naga kila yuḗaena kiena Suḗe moki manene laa rui, ¹³ a Rupus, nasumonena wo na yuḗaena kiena Suḗe, amio anena naḗa naga kila inu sa ga narina nenaga.

¹⁴ A laḗas sina nane Asinkritas, Plekon, Emes, Ḥatroḗas, a Emas, amio mēna puruvi taḗena la naḗa asike amio la, ¹⁵ a naga sina, pe sineu ḗesan re Pilologas, Sulia, Nereas amio vinena, a Olimḗas, amio li nalelagaena wa taḗena la naḗa akila lotena pa lele taaga.

¹⁶ Nekekarān naḗa nepitawe amiu make ga e kiau ḗmaki nini, a amiu mēna monar aworworun ruru amiu, akila kiamiu sinesiena imi kate e namunen pipimiu e sinewoena. A ḗegas nen li nalelagaena kiena Kristo mēna lala e lepas la nene apisawal asape asuḗna asitoḗmal amiu ke e kiela leniena lala.

¹⁷ Erau lala, nepiun ḗmareran ke sina ga pan amiu nesape monar avisu ruru la naḗa asuḗna asiar ke veveyuena, akila ke li nalelagaena la amliliḗere la, a asuḗna akawe ke visena na vianena la naḗa amiu atol pa rui. A pogos naḗa apisu ruru la, ve ava re lavisin la. ¹⁸ Na nene komin naḗa yaru kar la ne sanene, pe akila re yuḗaena kiena kieta Suḗe Kristo poli, ana la asuḗna ataveve ke ga kiela sinenanena viowa lala. Akilia avisawal sur ve moki naḗa wo na wo, ana visen kiki ga la ne, a asuḗna akilali nena sitomena ken yar la naḗa pe akilia ruru re sur poli. ¹⁹ La punu ga akilia ruru rui asape amiu asuḗna amlogear ruru ke visena lala kiena ne Ntewa, a nanene kila nekekara paḗisi, ana monar avisuar ruruia e lepas na sur naḗa po, monar yepemiu ḗmae ruruia, a e lepas na sur viowa lala, monar ve kala narin namname tai to re nena e amiu.

²⁰ A visae akila ve sa nene, yoko kila mrapa kiena kieta Ntewa na suḗmare, kila Yermare sike vatanon lolamiu lala vena aviemumuia. A kiau leniena nesape yoko lemamiēna kiena kieta Suḗe Yesu Kristo sike amio amiu.

²¹ Erau naḗa Timote naḗa imimi lua memiyuḗmae lele taaga, pisa pokolulagi a pokolemalo pan amiu, a la telu nene nae kiau yo, Lusias, Sason, amio Sosipata, la mēna apisa.

²² In naḗa nemlarar sur na siriena, nesiri ḗmaki kiena Pol nini pan amiu, kiau kia Tesias, a in mēna ga sineun nesape nekekara paḗisi naḗa nevitawe amiu e ḗmaki nini, e kia kiena Suḗe.

²³⁻²⁴ Pogaga, inu si Pol nene nesiri ne, ana lavis nesiri make kiau ḗmaki narui, a pokolulagi a pokolemalo piḗmasu ke pan amiu, pimi kome la telu nene, Kaias, naḗa nesike e ḗmana uḗna, a naḗa li na lotena nae e yo nene asuḗna apim ke lele taaga e ḗmana uḗna, a Erastas, naḗa naga yerkawa na visuaren kilavaru na pulkumali nene, a kieta puruvi naḗa, Kotas.

²⁵ Ana e kiau visena maro, sineun nesape nela maran si nayeluarena make ga va Ntewa. Nemlen nesape yoko naga la visena la na Lologena Wo, amio navianena wo la naḗa apisayu Yesu Kristo naḗa nemla pan amiu rui, ligan ruru sike e kiamiu malena lala, vena asuḗnal ḗmarera e legiena na pimi ke ne. Visena wo lelaga la nene, yar la pe akilia re poli e kas la moki ḗaro pa rui, ana nagane Ntewa kipian ita. ²⁶ Nanua, yar la apulo visena lala kiena navisaluaena lala, amninue asape visen lelaga la nene asike loyuḗna e la, ana nagane, mepisawal meraravana, a ita punu ga tekilia telogekilalea. A Ntewa, sane naga naḗa sike nakonua rui a yoko sike sike nena, naga pisaar sape Lologena Wo nene monar va vanua va yeririna na purvanua make ga, vena la mēna akilia aloge, a akilia alelaga ea.

²⁷ Naga taaga pe Ntewa, naga taaga pe purḗes nen manmaruaena, a naga taaga naḗa Yesu Kristo kila kieta mrapa na lotunena, vano vano ve uro re pogos tai.

Inu, Pol.

Ñaki Nasumo Naña Pol Siri
 Pa Pan Li Nalelagaena Wa Lala Nae Garu
 KOREN
 Visayuena Na Tusi Nene

Komþasnen suniena plas na tusi nini

Ñaki nini pe ñaki naña Pol siri þesa pa le Koren lala naña amlelaga e Yesu. Naga siria komin suri viowa la suñalu e maliena kiena li nalelagaena lala nae yo nene, a naga mligan ñaki nene pano vena iila la. Suñare nae Koren, Pol ke narui naga siaria.

Koren naga pupia pulkumali kiena le Kris lala, a naga pe pulkumali keviu na lepas naña Akaea, naña ñeke vatanon þarin suþe nae pulkumali naña Rom. Yaru nae purvanua taþena la moki asike e nene, a naga pe yo tai naña yaru la akila ruruia e lepas na kilaen yuñæna na tauluen kilavaru, a e lepas na kiela þelaga marua. A la nae yo nene, kiela kia keviu e yomarava komin kiela þelaga viowa lala, a naña amlotun ke ntewa taþena la moki.

Suri kerkeviu la naña Pol pisayu e kiena ñaki nene sanini:

pisayu napiowaena naña yaru na suñare la asuñna amlipere la,

pisayu napiowaena naña la asuñna akila ke piowa pa sira lala,

pisayu mrapa mesmesu na kilaen talovaena,

pisayu sanape e kinanena lala naña akila kuþaþaena e la van nono lala.

Pol pisatañe kiela naviuniena laþasa, ana pian la e mrapa mesmesu na taveveena vena alotu e suñare, amio ñareraena la naña Ninuna Wa suñna kian ke pa suñare, a nalelagaena naña yaru kilia mali sina. Pol kila meraravan naña kilia ruru napiowaena a navisatañeena la nene, a pisa meraravan naña lologena wo kiena Yesu ga kilia la navisatañeena van la.

E marana na keviu 13 pisayu þelaga na sinesien Ntewa amio yaru lala naña pe þelaga keviu tai naña yeririna kiena Ntewa la monar atavevea. Marana na keviu nene pe komþasnen visena kiena ne Ntewa naña yaru la akilia ruruia, taulu komþas taþena la na tusi nene.

Komþasnen tusi laþas nene

Visena þesa 1:1-9

Yaru na suñare la amlipere la 1:10—4:21

Mlamulena viowa amio sira, a malena na mratava 5:1—7:14

Li nalelagaena lala a yaru la naña amninue Ntewa 8:1—11:1

Mrapa kiena li nalelagaena lala na kilaena lotena 11:2—14:40

Yesu mali sina, a yaru la naña alelaga ea akilia amali 15:1-58

Nalaena naña aligan va van li nalelagaena lala nae Yutea 16:1-4

Visena maro 16:5-24

Pol sike gar Episas, pisa pokolulagi pona pokolemalo pan le Koren lala

¹ Erau nae Koren lala, inu naña nesiri ñaki nini piñasu pan amiu, inu Pol, naña Ntewa sinenan sape neimi neve nalologena tai kiena narina Yesu Kristo, ana pio inu, pisirlua inu vena nouarar yuñæna na sanini.

Nesike e yo nini nemio kieta erau Sostinis, ana imimi lua mepisa pokolulagi pona pokolemalo pan amiu punu ga, ² nae suñare kiena ne Ntewa e pupia pulkumali nene Koren. Kam ke narui naña Ntewa pio amiu aimi vena asikol amiu amio kiena li nalelagaena taþena lala, naña asutetae asike e yo punu ga naña asuñna amlotun naga naña kila ita tepe wa ruru rui, nane Yesu Kristo naña naga pe kieta Suþe ita punu ga.

³ Memlen mesape lemamiena kiena ne Yesu Kristo a suŋmare kiena ne Ntewa arimata sike amio amiu.

Pol pisa potena pa Ntewa komin naviawaena kiena le Koren lala

⁴ Nepisu sane pogos naŋa apim ape yeririna kiena Kristo Yesu, lemamiena kiena ne Ntewa suŋna miyuŋnae keviu e kiamiu malena lala, ana silaga nesuŋna nepisa potena keviu vanonia.

⁵ Asuŋna apim apo manene laa e lepas na visawalen Lologena Wo, a asuŋna apa ke metava e lepas na kiamiu nakiliaena, e ŋmena ga e lepas na ŋelaga wo taŋena make ga lala. ⁶ Pogos naŋa nepisu nene, nepisu sa ga kiau yuŋnaena la nanua ne, naŋa nepian amiu e Kristo, nagane suŋna ŋar ke pupia mrasa.

⁷ Nalaena lala pona naŋareraena lala naŋa Ninuna Wa suŋna kian pan amiu, pe tai re naŋa pe atol re poli wa, ana asuŋna amiyuŋnae ke amio la po paŋisi, komin akirakiravan ke naŋa kieta Suŋe Yesu Kristo kilia imi ŋmalivi si e yomarava nini.

⁸ Naga pe pimi ŋmalivi re poli wa, ana naga suŋna miila ita silaga vena tesuŋmalu ŋmarera tesuŋna ga vano-o tol legiena maro nene, ana pogos naŋa tesuŋmalu tese marana ne Ntewa, yoko naga kila naŋa naviawaena taŋatete se ita.

⁹ Ntewa pisaar rui vena viewo ita, ana tekilia towasine ruru kiena visena nene, komin naga pio ita, ŋpere ita sikol ita teve erau wo temio narina, Yesu Kristo kieta Suŋe.

Suŋmare suŋna mliliŋere paŋisi

¹⁰ Kiau namratava lala kiena kieta Suŋe Yesu Kristo, nesape neviun manene van amiu e kiena kia, nesape aŋionli naŋa aim ave taaga sina. Popon ve aliliŋere amiu re, ana amiu, kiamiu sitomena a kiamiu visena monar ve taaga.

¹¹ Nepisa visena la nene, komin la naŋa puna yaru nene Kloe apim apisawal pan inu asape veveyuena sike likan amiu, olai lala a vineu lala.

¹² Nemloge naŋa amiu peve taaga asuŋna apisasa ke kiamiu ŋegas lala asape “In na yoko netaveve Pol,” pona taŋena sape “O, in na nepe kiena Apolos,” pona tai sina, sape “O, in na nesikol inu e ŋegas kiena Keŋas.” A laŋas sina, apisirilua si kiela narin ŋegas laŋasia, akoven plan taŋena lala, asape “O, imimi ga mepe yeririna kiena Kristo lelaga.”

¹³ Ke, ya ne akila ke sanene? ?Pona popon tetewowa Kristo ve kinakinasa, teliwerwere e kiamiu narin ŋegas la sanene? ?Pona laŋas asape ape kiau Pol, komin naŋa asitom asape in ke narui naŋa netelan inu e laki torovia vena netamalia la? ?Pona laŋasia sinela ŋpesan naŋa akeela e kia kiena Yesu, ana asitom asape akeela e kiau kia?

¹⁴⁻¹⁶ Sanene, nepisu pogaga naŋa nanua ne, pe nekee amiu re nena tai poli, Krispas ga lalua Kaias, pona sineu ŋesania, nekee ŋmena Steŋanas amio namratava puna, a pe nesitoŋmal re si po laa rui, sane la ga nene, pona laŋas sina? Nepisa sanene komin naŋa visae nekee amiu ve moki, pona asuŋmalu avis vilaveena rui, asuŋna avisave “!O, imimi ke narui, naŋa Pol kee imimi e kiena kia!”

¹⁷ Sanene piowa ga, komin Kristo pe mligan inu re nepimin keen yar la poli, ana mligan inu nepimin lologonen kiena Lologena Wo van la. A pogos naŋa nemlologon ke sanene, pe nekila re nemio ŋmareraena na manmaruaena na yomarava nini poli, ana nekila amio ŋmareraena na laki torovia kiena ne Kristo.

Kristo kipian manmaruaena a ŋmareraena kiena ne Ntewa

¹⁸ Ana yaru la naŋa asuŋna ataveve ke mrapa na kovioena, amloge visena na laki torovia kiena ne Kristo sane suri tai naŋa pe sur korena ga pan la, ana ita la naŋa tetaveve ke mrapa na malena, temloge visena na kiena laki torovia sane ŋmareraena kiena ne Ntewa natamalia itaena.

¹⁹ Naga nene sane visena kiena Siriena Wa tai, naŋa Ntewa pisa sanini, sape “Yoko nowe plan manmaruaena kiena la naŋa asitom ke asape ape manmarua, yoko nekilawo nakiliaena kiena la naŋa asitom ke asape akilia suria.”

Ais 29:14

²⁰ Ana visena nene pe lelaga pañisi, komin naña tepisusu yomarava, tekilia teviun tevisa sanini tevisave awa kiena yaru na manmaruaena lala? Awa yaru la naña apisuveve ruru kiliaena la naña sike e tus lala? Awa yaru la naña akilia avisayu ruru sitomena la naña pe tañena pe tañena naña tetelivi ke nagane? Tepisu sane peraga yo, a tepisu sane Ntewa kila manmaruaena lala na yomarava nini apimi sane sur wowe ga tai rui.

²¹ Ntewa ga pe manmarua, a e kiena manmaruaena, naga kila sane manmaruaena na yomarava nini tañatete kilia kila yaru kilia naga. Ana naga pisu sane po laa sane vena kila naña kiamimi lologena lala, naña yaru la asitom ke asape pe wowe ga, kilia tamalia yaru naña mlelaga ea.

²² Le Yu la moki liu naña yepela mavin lelagaena, asuñna apisavisa ke asape visae mekila kile lala, yoko alelaga ga na wa, a le Krik la moki liu yepela mavin lelagaena, asuñna apisa ke asape visae mevis mesmesu nena e kiela nakiliaena marua lala, yoko alelaga ga na wa, ²³ ana pe mekila re sanene pan la poli. Memlologon ga Yesu pan la, mesape naga marewo kiela mlamulena viowa lala e laki torovia, ana visena nene, le Yu lala asape tañatete alelaga ea, a le Krik lala, asape visena na wowe ga nene.

²⁴ Ana e lepas kiena ne la naña Ntewa pio la vena ave kiena, sane ita, naña ita lañas tepe le Yu a ita lañas tepe le Krik, pe sa re nene poli. Ve tesitom re tesape tevisu kile tañena, komin naña tepisu kilale ñareraena kiena ne Ntewa e yuñnaena kiena Kristo rui, a ve tesitom re tevisave tetaveve kiliaena tañena, komin naña tepisu kilale namanmaruaena kiena ne Ntewa e mrapa kiena Kristo natamalia itaena.

²⁵ Yaru tañena lala apisu naña Ntewa tañan Kristo mare e laki torovia, asitom ke asape Ntewa malumu ga, ana peraga. Sur nene kila meraravan kiena ñareraena naña ñarera laa sane, taulu ñareraena kiena yaru. Apisu sur nene, asitom asape Ntewa pe wowe ga, ana peraga, kipian kiena manmaruaena naña po manene laa taulu manmaruaena kiena yaru.

²⁶ Wolai a vineu lala, asitomyuli sane kam na sanapen naña Ntewa pio amiu ape kiena? Pe ita moki re poli naña e lepas na visuena na yomarava, ita temanmarua, pona tepe yaru ñarera, pona tepe yaru kerkeviu lala. ²⁷ Yomarava nini sape tepe wowe, ana Ntewa ñere ita, ana kome ita suñna kila plan ke manmaruaena na yomarava. Yomarava nini sape ita temalum ga, ana Ntewa ñere ita, ana kome ita, suñna kila ke ñareraena na yomarava pito tano. ²⁸ Yomarava nini pisa ke sape ita yaru korena ga naña tesike tano, ana Ntewa ñere ita, ana kome ita, suñna kila ke pupia sur kerkeviu la pito tano, kila apimi ape suri korena.

²⁹ Sanini, pe yar re nena tai naña kilia visirlua naga e marana Ntewa, sape naga pe manmarua, pona naga ñarera, pona naga yar tai ne, ³⁰ ana Ntewa ga pe purpes nen kieta malena viu temio Kristo Yesu. Naga ke narui pitetalia Yesu pimi kilologia mrapa pan ita, ana Yesu pul plan ita, kila ita temesmesu e marana, kila ita tepimi tepe kiena yaru wa lala.

³¹ Ana komin suri ne nanene, tepisu naña visena kiena ne Tusi Wa tai pe lelaga pañisi, naña pisa sanini, sape

“Yaru naña sinenan sape warwaria, naga kilia warwarian ga kieta Supe.”

Ser 9:24

2

Pol mlologon lak torovia kiena Yesu e ñareraena kiena Ninuna Wa

¹ Erau lala, nanua kam na amninue visena kiena ne Ntewa lala, ana nepim nepisawal pan amiu. Ana sa ga naña apisuia, pogos naña nepimin nekila, pe nekila re naña nepilaven visena piayavi lala pona manmaruaena kiena yaru. ² Nekila kiau sitomena ñarera nesape pogos naña nesike likan amiu, yoko ve nesitoñal re si sur tañena, ana yoko nelologon ga Yesu Kristo, amio kana marena e lak torovia. ³ Nesike nemio amiu, nemloge sane yepeu malumu pañisi, nemarau, sineu kurkur, ⁴ a kiau visena a kiau suniena pe pulen re nena manmaruaena pona kiliaena kiena yaru. Ana e pogos nene, amloge naña kiau visena lala apulen ñareraena kiena Ninuna Wa, ⁵ a kila sane kiamiu

naviawaena pe suñal re su e visena na manmaruaena kiena yaru poli, ana suñalu su e ñareraena kiena ne Ntewa.

Manmaruaena kiena ne Ntewa

⁶ Lelaga naña kiau visena pe pulen re visena lala na manmaruaena na yomarava nini poli, pona kiliaena kar la naña yerkaawa na yomarava nini la akekan poli, ana pogaga, komin yomarava nini amio kiena yerkaawa lala yoko avano amap ga. Ana kam la naña kiamiu sitomena marua ruruia, apisu kilale naña kiau visena lala pulen ruru nena manmaruaena kiena ne Ntewa. ⁷ Kiena manmaruaena nene, naga ðarpolo ruru sike pa rui sumon naña naga si yomarava nini, ana manmaruaena nene tapolou ruru suña ga, yar la pe akilia re nena ga, ana nagane narui molue merarava ruru ga pan ita na wa sane pupia visaruruena tai naña Ntewa mlavia vena kila ruruiaena. ⁸ A kiena manmaruaena nene ñalivin ita e mrapa naña Yesu pimi tamalia ita, ana yerkaawa na yomarava lala pe apisu kilale re sur nene poli, ana atarar Yesu, naña naga pe pupia Suþe na urarena nae ma e peni, la atelanñar naga metava e laki torovia. ⁹ Yeririna la pe apisu kilale re sitomena kiena ne Ntewa sanene poli, naga sane Siriena Wa tai, naña pisa sanini sape
Sur nowo la naña kilamarana yaru pe pisuli re poli wa, pona kiligana yaru pe mlogeli re poli wa, pona los nen yaru pe sitomli re poli wa,
ana sur ke la nene Ntewa kila ruru suña ga pe kiena ne kiena yaru la naña sinela si naga. Ais 64:4

¹⁰ Ana ita, ita na tekilia navisa ruruena la nene, komin Ninuna ne Ntewa naña pisu kilale make suria, a kilia make sitomwanena kiena ne Ntewa, naga kipian itania. ¹¹ Sa ga ita yeririna, naña yar taþena mninue ya naña sike e kieta sitomena, ana ninuta ga kilia ruru po. Ana maran taaga ñena sa nene e Ntewa. Pe tekilia re ya naña sike e kiena sitomena poli, ana Ninuna ga kilia ñaga, ana pisawal pan ita. ¹² Pe ninuna na yomerava re ga nini tai poli naña pisawal pan ita, ana Ninuna Wa nene naña molue ma puna Ntewa pitomi, naga ke narui naña kila ita tepisu kilale ruru nalaena wo la naña Ntewa suña kian ke pan ita.

¹³ Sanene, popon avisu kilale ñena sane kiamimi visena la naña pimi ke pan amiu, pe amolue re e manmaruaena kiena yar poli, ana Ninuna Ntewa ga suña pian itania. Sanene, mesuña moþar ke visena lelaga lala kiena Ninuna Wa nene, ana memligan sike e amiu naña Ninuna nene sike e kiamiu malena rui. ¹⁴ Yar naña Ninuna pe su re e kiena malena poli, naga taþatete visu kilale sur lala na Ninuna, naga sane pe yar tetan ga e la, ana naga taþatete nena tol ñareraena la naña Ninuna kiania. ¹⁵ Yaru naña Ninuna sike e naga, yoko naga kilia visu kilale ruru sur make ga, ana yar naña Ninuna pe su re e naga poli, naga taþatete visu kilale ruru ya naña sike e malena kiena yaru naña Ninuna sike ea. ¹⁶ Visena Wa pisa sanini, sape
Pe yar re nena tai naña kilia ya naña sike e sitomena kiena ne Ntewa poli,
pe yar re nena tai naña kilia vian si sur va Ntewa poli. Ais 40:13

Visena nene pe lelaga paþisi, ana e ita naña Ninuna sike e ita, tetol sitomena kiena Kristo rui.

3

Pe pon re veveyuena su likan nalelagaena la poli

¹ E pogos naña nesike nemio amiu nanua ne, sineun nesape nevis ruru nemio amiu sa naña kam na ape yeririna naña Ninuna ne Ntewa sike e kiamiu malena rui, ana peraga. Nepisu sane kam na pe atoroki re poli wa, nane kila narui nepis pan amiu sa naña kam na ape yar na yomarava ke ga wa, naña e lepas na kiamiu malena amio Kristo, kam na sa ke sisi tomtom lala wa. ² Sanene, nepagan amiu e ga e yu, taþatete nela kinanena ñarera van amiu, komin kam na pe atorokin re poli. Ana pimi tol nagane, nepisu sane kam na pe atoroki re poli wa, ³ komin naña þelaga na yomarava nini mok liu sike likan amiu wa. Pona kam na pe apisu kilale re poli yo, ana pogos naña vielueena amio veveyuena sike e

amiu, kana kinasa sane asike e yemalolo na wa, kiamiu ðelaga sa ga ðelaga kiena yaru. ⁴ Merarava ruru po paþisi naþa amiu na sanene, komin naþa asuþna amlipere amiu ke sanene. Kam laþasa asuþna apisa inu, asape “Aulai, imimi na mekekarana Pol, metaveve naga,” a kam laþasa asuþna apisa ke erau nalologena Apolos nene, asape “Ke, imimi na mekekarana Apolos, metaveve naga,” ana sitomena sur la ne sanene, sitomena kien yaru ga.

⁵ Visae sinemiun avisayu kiamimi kia imimi lua Apolos, popon asitom ruruia avisave imimi lua mepe yar sur na sanape? Imimi lua mepe yar kiena Suþe ga, vena kilaen yuþnaena naþa mligan sike e limamimi, vena kila sane akilia alelaga ea. ⁶ E lepas na yuþnaena nene, in ke narui nemapila kurusia, a Apolos ke narui naga ðeleule susia, ana Ntewa ga naþa kila purþesia kapuru pimi kerkeviu þar mrasa. ⁷ Ana monar tevisu kilale sane yar naþa mapila kurusa, a naga naþa ðeleule susia, lalua pe akila re pupia sur tai poli, ana naga naþa kila purþesa pimi keviu þar mrasa, naga ke narui kila pupia suria. ⁸ Ana imimi lua, naþa tai mapila kurusa, a tai ðeleule susia, imimi lua memiyuþnae maran taaga ga, a yoko imimi luoka ga mowar kiamimi nalaena torokin kiamimi yuþnaena. ⁹ Pe sa re naþa imimi lua, imimi yar tai naga po, a tai piowa ga, ana imimi lua mepe yar na yuþnaevaiena lele taaga kiena ne Ntewa, a amiu na sane porotano naþa memiyuþnae ea.

Pona kana totou taþena na visaena, nekilia nevisave kam na sane yuþna tai naþa Ntewa suþna miyuþnaena. ¹⁰ Ntewa mla kiliaena wo pan inu, ana nemiyuþnae sane yar tai naþa yepena maen yuþnaena, nemiyuþnaen þeren yuþna tai naþa mmarera ruruia sike na. Ana siraunia, pe in re naþa nepisirlua yuþna metava e þerena nene poli, ana erau taþena nene pimi suþna miila nayuþnaenen yuþna. A kam ke sina ga laþasa akilia aiila nakilaen yuþna metava e kana þerena nene, ana yaru naþa yuþnaen sanene monar visuar ruru kana ðelaga na yuþnaenena. ¹¹ Naga monar taþatete liganli si þerena taþena, komin nemligan þerena napo rui, nane Yesu Kristo. ¹² A pogos naþa amiyuþnaen yuþna metava e þerena nena, pona laþasa amiyuþnaen e kol pona selpa pona kilavaru mmarera, pona laþasa amiyuþnaen e laki pona maero pona makururuye. ¹³ Ana siraunia, yoko kapi na legiena maro kekania kilali kiela yuþnaena lala, kila yuþnaena la naþa akila, malivi e yo metava. ¹⁴ Visae kapi tol yuþna naþa yar tai pisirlua metava e þerena nene, ana kekan þele ga, yuþna suþmalu ruru suþna ga, yoko yar nene war kiena nalaena wo tai. ¹⁵ A visae yar taþena, kapi kekan make kiena yuþnaena, yoko yar nene kilalu make kiena suria. Lavis kapi nene kilia kekanmar mmena yar na yuþnaena nene, ana pona naga purmatan kapi nene, tamalia kiena malena.

¹⁶ A kam na monar avisu kilale sane yuþna nene naþa amaplar metava e þerena nene, naga kam li nalelagaena lala, a sane yuþna na lotena wa tai mana Ntewa, naþa Ninuna suþna loyuþna ea. ¹⁷ Yuþna na lotena kiena ne Ntewa naga kam ga ne, a visae yar tai sinenan sape kila kare yuþna nene, yoko Ntewa welua nena naga, komin kiena yuþna na lotena nene naga pe wa paþisi.

¹⁸ Amiu monar ala ya naþa nepisa ke ne, pe pon re asitom avisave naga pe sur korena ga. Visae amiu yar tai sitom ke sape naga pe manmarua ruru po e nakiliaena na yomarava nini, popon manene naga ligan sitomena navisokanena la nene sike na. E lepas nakiliaena na yomarava nini, naga monar kila naga sane yar ga tai naþa pe wowe, ana visae naga kila sanene, yoko naga kilia ve manmarua ruruia e nakiliaena lala kiena ne Ntewa. ¹⁹ E Visena Wa, tepisu visena tai naþa kila meraravan sape manmaruaena na yomarava nini sane sur wowe ga e marana Ntewa, naþa pisa sanini, sape

La naþa asitom ke asape la ape manmarua ruru po e yomarava nini, asitom ke asape la akilia suria, ana e marana Ntewa la ape wowe ga, naga pisu kilale la ruru rui. Sop 5:13

²⁰ A visena taþena sina sanini, naþa sape

Suþe pisu kilale ruru sitomena lala kiena li na manmaruaena la na yomarava nini, sape ape sur korena ga. Yauena 94:11

²¹ Sanene na, ve tevilaven re sitomena na yomarava lala. Tařatete akila sur wo tai van amiu, komin nařa Ntewa kian kiena navisa ruruena wo punu ga pan amiu rui. ²² Inu Pol nemio Apolos a Keřas, mekila yuřaena wo punu ga pan amiu rui, a nagane yomarava nini sike e limamiu. Visae amal pona amare, visae asuřa nagane pona ase legiena nařa pimi ke ga wa, ana sur punu ga ape kiamiu rui, ²³ a amiu ape kiena Kristo, a Kristo pe kiena ne Ntewa.

4

Yuřaena kiena Pol amio Apolos sane nalologena kiena Yesu

¹ Sanene na, amiu ve aligan imimi re meva metava, ana popon avisu imimi sa ga yar na yuřaena kiena Kristo lala, nařa naga mligan visawanena lala kiena ne Ntewa e imimi, vena mevisawal va la nařa pe akilia re poli.

² A pupia sur nařa sike e kiamimi sitomena, mekilia sane monar memasisun ruru wo e yuřaena nene nařa kiamimi yerkawa mligan e limamimi.

³ Pe nesitom manene re nesape ařa amiu asitom ke sanapen inu, po yar la aliřere inu ve sanape, a in řena pe nepilevilen in re sina poli nesape in na sanene pona sanene.

⁴ Lelaga, pona nepisu in ke sina ga nesape nemiyuřae pogaga ne, ana nanene kiau sitomena ga ne. Kiau sitomena nene tařatete kilia kila inu nemesmesu, a Suře ga naga pe yar nařa torokin liřere inuena.

⁵ Ve sanene na, ve tokoskosin re liřereen yar tařena, ana monar tesuřate Suře wasuře e kana legiena na liřereena nena. E pogos nene, yoko naga la sur la nařa atapolou asike e yemalolo, kila nařa amolue e yomerarava, a yoko la sitomwanena la nařa atapolou ke e los nen yaru, kila nařa amolue e maran yeririna make ga. Yoko Ntewa waveve sur la nene, ana yoko naga vis va yeririna lala torokin ya nařa naga řal e kiela malena.

⁶ Erau lala, visen la ne nesuřa nepisa řisi ne, nesuřa nepisayu ke ga imimi lua Apolos ne, ana nekila sanene komin sineun nevian ruru amiu, sane ve avisusu re ve tařena e kiamiu navianena lala. Amiu lařasa apilave komin navianena na kiela řegasa, a asuřa apisusu ke piowa e navianena na řegas tařena, ana sanene na pe mesmes re poli.

⁷ Kam punu ga maran taaga, kam na pe apo manene re taulu tařena la poli, a visae sur wo tai sike e amiu, pe kam re na amiyuřaen poli. Ntewa ga kian pan amiu sane nalaena tai, ana sanene na pe pon re si avis vilave vanon poli. ⁸ Lelaga, nekilia nesape asuřa asitom ke asape kam na limamiu pulen sur wo lala kiena ne Ntewa rui, ana amloge po, asitom ke asape kam na ape kiena yerkawa lala na yomarava nini rui, nařa akoven imimi mesike nena varau. Visae lelaga nařa sane kam na ape řarin suře lala kiena ne Ntewa na yomarava nini, po pařisi, ana pe nesitom re nesape sanene poli.

Ana visae pogos tai ve sanene, pona pe kam re ga poli yo, ana yoko Ntewa visu sane imimi lua řena ga metorokin meto metava memio amiu vena ve suřenen kiena yeririna lala.

⁹ Ana nagane, imimi li nalologena lala pe mesu re e yo wo na sanene poli. Sane Ntewa mligan imimi mesike laa varau tano, nařa yeririna na yomarava nini amio řena navisi lala apisu kare imimi, sane metorokin ke ga yaru lala nařa amla koena na marena pan la.

¹⁰ Memlogear ke Kristo, mekila ke kiena yuřaena, ana li tařena la apisu imimi sa ga mepe wowe towe ga, ana asuřa apisayu amiu asape ape manmarua ruru nena e malena kiena Kristo. Apisu sane imimi na memalum ga, ana kam na ařarera. Apisu imimi piowa ga, ana amligan amiu asike metava.

¹¹ Imimi na pe sa re nena amiu poli, komin siar nanua pimi tol nagane, viso kar imimi, moto kar imimi, pe řamimi kulsota wo re poli, mesuřa mepane ke pog řarera lala, řamimi yuřa wo re nařa memon e poli, ¹² ana mesuřa memal ke ga e yuřaena na limamimi. Yar la apiuelin imimi, ana mepisa ruru la ga. Akila kare imimi, ana metařan ga. ¹³ Apisa kare kiamimi kia, ana mekilali nařa mepe erau ruru ga memio la. Mekila po

sanene, ana akila imimi sa ga kororaki na yomarava nini. Lelaga, pimi tol nagane apisu imimi sa ga sur korena ga.

Pol piun sape ataveve lana

¹⁴ Pogaga, pe nepisa re visena la ne ne vena kila amiu amawa poli, komin kam na sa ga naru lala naña sineu sii amiu pañisi, a sineun nevian ruru amiu. ¹⁵ Nekilia nesape yerkawa tañena la mok liu naña apisu ar amiu a amiila kiamiu lelagaena e Kristo, ana popon asitoñal sane inu ga taaga nepe arimamiu. In na noñar ðesan Lologena Wo kiena Kristo pimi pan amiu, ana in na sane arimamiu e kiamiu malena amio naga.

¹⁶ Sanene na, nepisu sane mesmesun ga naña nevis van amiu, noñareran amiu nesape ataveveli lelen lau sumo.

¹⁷ Sitomena ne nanene kila nesape nevitetalia Timote iñasu pun amiu. Nepisu sane Suñe tañan naga pan inu sa ga naru tai, komin naga miyuñae ruru po e yuñae lala a nekekan naga pañisi. Ana pogos naña visae imi ñalivin amiu, sineun nesape naga kila amiu asitom ruru si kiau ðelaga nayalena naña nataveven Kristo, sa naña nesuñe nepian ke pa yar lala na suñare make ga la naña nesuñe neteteliv ke e la. ¹⁸ Nekilia sane pogos naña apisu sane pe noñalñaliv re si pun amiu poli, kam lañasa akilali naña amligan la sina asu metava.

¹⁹ Ana pogaga, komin naña visae Suñe tañan van inu, yoko ve ve piavi re neim noñalivin amiu. E pogos ne nanene narui, yoko yepeu mavin logeen visena kiena la nene, ana sineun nesape nevisu sane kiela ñareraena na kilaen yuñae ñarera sanape.

²⁰ Nanene komin naña visena kiena yaru pe pe sur re tai poli loyuñe e nasuñenena kiena ne Ntewa, ana ñareraena kiena Ninuna ke narui naga pe pupia suria.

²¹ Pogaga, sineun nesape asitom ruru sumo, sane visae noñalivin amiu, yoko ve sanape? Visae sinemiunia, nekilia neiñasu pun amiu nemio kiau visena ñarera lala na veveyuena, ana po manene laa visae akila kiamiu sitomena la su tano sumo wa, ana nekilia neiñasu nemio ga visena la naña malumu, e ðelaga na sinesiena.

5

Ñelaga viowa loyuñe e suñare

¹ Visena pimi tol kiligau sape sur tai sike likan amiu naña piowa manene laa. Apisape kam yar tai, arimana pa talopa amio sira tañena, ana siraunia, yar nene pinaun wona arimana nena pimi sike amio. Lelaga kemua naña, yaru na yemalolo lala tañatete akila ðelaga nene, ana sanape na kam li nalelagaena tai suñe kila?

² Kam li nalelagaena lala asuñe apisir plan amiu, asape kam na amiyuñae ke po, ana sanape asuñe atañan ke ðelaga na sanene suñe miyuñae ke likan amiu? Popon aloge viowagan sur nene, a popon akovenlua yaru nene vetan kiamiu suñare.

³ Ee, lelaga naña nagane nesike e yo nini nesike laa perinan amiu, ana e ninuu nemloge sa ga nesike ga nemio amiu. Sanene na, e kia kiena Suñe Yesu, nesuñe nepisawal ke naliñereena tai kiena yar nene sa ga nesuñal ke ga nesike e maramiu. ⁴ Sanene na, pogos naña aim si lele taaga, monar avisu sa naña ninuu sike ga amio amiu, a monar akilia sane Suñe Yesu ñena sike amio kiena ñareraena, ⁵ ana monar akovenlua yar nene vetan suñare. Naga monar ure sina, wasuñe si e yomarava va e limana Yermare, ana popon ðelaga lala na mlamulena viowa na yomarava akila naga loge viowa vano vano-o va ðisi, ana suraunia pona wasuñe si imi yo, vena Suñe kekan tamalia ninuna e legiena maro.

⁶ Erau lala, pe pon re asuñe awarwar manene amiu poli, avisave kam na amekiki, komin kororaki nene sike e amiu na wa. Kam na akilia rui sa naña narin is ga, ana kilia kila kilaparavi punu ga lapa. ⁷ Sanene na, popon vena awar plan is viowa nene naña sike e amiu, vena amiu punu ga aim aekiki ruru sina. Monar tesitoñal sa naña yermaru lala asuñe akila ke kuñae e narin sipsip vena kilaplanen kiela mlamulena viowa lala,

ana Kristo pimi mare e laki torovia vena warplanen kieta mlamulena viowa lala, ana pe pon re kororaki suña e ita poli.

⁸ Ana pogos naña yermarua la akila kuḗpaḗaena ḗisi, akila kana ḗaḗagena nena, a ita nalelagaena ḗena lala ita ḗena kieta ḗaḗagena tai. Ana pe pon re tesike e ḗaḗagena nene poli, takan kilaparavi tai naña is marua sike ea. Visena nene kana kinasia sane pe pon re sane mlamulena viowa a ḗelaga viowa na malena marua suña ga e ita, komin loyuña e malena na suñare, sur make ga monar ikiki ruru wo, ve lelaga ruru wo, a ve wa ruru wo.

⁹ Kiau visena tai pan amiu sanene rui. E ḗaki tai naña nesiri piḗasu pan amiu nanua rui nepisawal nesape pe pon re ava lele taaga amio yar la naña akila ke ḗelaga viowa la poli, pona asuña akiriri kar ke vanon sira lala. ¹⁰ Ana pona kam laḗasa amlogopal kiau visena nene yo, komin pe nepisa re e lepas kiena yar la naña pe amlelaga re poli. E la nene, la moki akila kolau, la moki ape puluvis lala, la moki apinau, la moki amlotun kiela nono lala, ana visae sinetan tevisave tesu perinan la, pona monar teligan ga yomarava nini narui, komin naña ita make ga tesike e yomarava, a tesuña tepitawe ke yar sur na sanene silaga. ¹¹ Pe nepisaluḗar re nene poli, naña tesuña tepitawe ke yar kar na sanene e kieta yalorena, ana ya naña sineun nesape nevisa, sineun nesape visae yaru tai suña ga, neḗa naga pe nalelagaena lelaga tai, ana apisu ke naña e kiena malena naga suña taḗa ke kolau, pona suña pe puluvis lue ga, pona suña mlotun ke nono lala, pona suña piuel, pona suña mun kuruta namunena, pona suña pinau, ana pogaga, yar sur ne nanene narui ve akila re nena sur tai amio naga. Yoko ve ava re lavisinia, ve akinana re lele taaga amio.

¹² Ve sanene na, e lepas kiena la naña asike vanua e suñare, pe pe kieta re naña teliḗere kiela malena poli, ana e lepas kiena la naña asike loyuña e suñare, monar tevisuveve ruru la. Visae laḗasa asuña akila ke ḗelaga na mlamulena viowa la naña sane nepisa ke ne, monar teliḗere la, a monar tekila sur tai van la.

¹³ Ntewa ga yoko liḗere la naña pe asu re loyuña e suñare poli,
*ana e lepas kiena yar nene naña suña kila ke ḗelaga viowa likan amiu, kam ke narui monar akoven
 lua naga vano.* *Naw 17:7*

6

ḗelaga wo na kilaruruen veveyuena

¹ Nemloge ḗena sane pogos tai, kieta puruvi tai na suñare naga pepeyu amio amiu taḗena tai, ana naga suñalu ḗere taḗena nene pa e pupia kumali apis pania. Nepisu sane sur nene pe mesmes re nena poli, komin naña pe pon re yar la naña amlelaga e Ntewa ava asuñalu e marana yerkawa la nene naña pe amlelaga re e Ntewa poli, vena yerkawa la nene aliḗere la.

² Pogos naña li nalelagaena lala aveveyu, popon li nalelagaena taḗena ga lala akila ruruia, komin naña monar tesitoḗal tevisave ita li nalelagaena ke la narui naña teliḗere yeririna lala na yomarava e legiena maro. Ana visae ita ke narui naña yoko tekila pupia yuñaena na sanene, pona amiu atorokin naña akila ruru kiamiu narin veveyuena la ne sanene. ³ Yoko Ntewa ligan ita vena teliḗere navisi lala nae peni, ana pogos naña li nalelagaena taḗena lala avisin sur na yomarava nini, sanape? Apisu sane ḗarera paḗisi, taḗatete akila ruruia?

⁴ Peraga, monar akila. A visae peraga, pona asitom asape popon amiu li nalelagaena lala aligan kiamiu visena e limana yar taḗena la naña pe asuña apim re e suñare poli?

⁵ Nepis ḗarera sanene komin naña sineun nesape nekila amiu amawa towe laa ga! Ee, nemilan manene paḗisi navisuena sa naña pe amiu re nena tai naña pe manmarua poli, naña kilia kila ruru kiamiu veveyuena la nene. ⁶ Pona sur ne nanene narui kila sane kieta puruvi taḗena na suñare suñalu mligan puruvi taḗena nene pa e pupia kumali, ana suña pisawal ke kiena napiowaena lala e marana pupia yerkawa lala e totanoena nene, la naña pe amlelaga re e Ntewa poli?

⁷ Nesuŋa nepis ke pan amiu sanene e lepas na mrapa naŋa monar atavevea vena kilaruruen veveyuena la naŋa sike likan amiu, ana po manene laa visae ve veveyuena re mēna ga. Veveyuena la ne sanene, kana kinasa sane Yermare suŋa taulu amiu rui. Pona pe akilia re poli yo wa, naŋa visae womla tai kila viowa van ko, pona vinaun kioŋa sur tai, ve ositom re, otaŋan ga, komin mlamulena viowa naga kiena. ⁸ Ana visae osuŋalu sinoŋan oligan yar nene e pupia kumali vena ala nakoena vania, ko ke narui ko osuŋa okila ke piowa pan womla nene.

⁹ Monar asitoŋalia sane la naŋa kiela malena pe memes re poli, yoko taŋatete avisu nasuŋenena kiena ne Ntewa imi mālivi pu la. Pe pon re akilali akila sa naŋa amninue ke sur nene na wa, komin akilia rui asape Ntewa pe kekaran re nena la naŋa asuŋa amiyaloro kar ga, pona la naŋa amlotun ke ga ntewa navisokanena lala, pona la naŋa akila ke kolau, pona la naŋa asuŋa aŋiliwilin ke tasnela, pona yerŋene pona sira la naŋa asuŋa aŋere la ke sina ga, ¹⁰ pona la naŋa asuŋa apinaw, pona la naŋa pe apion re kiela sur pa yar taŋena la poli, pona la naŋa asuŋa amun wii, pona la naŋa apiueli, pona la naŋa akila urlelai.

¹¹ Lelaga naŋa, nanua sumo kam laŋasa akila sanene rui, ana potena paŋisi naŋa Ninuna Wa kevan amiu amekiki, kila amiu ape wa, a kieta Suŋe Yesu Kristo kila ita temesmesu ruru sina e marana Ntewa.

Tasneta monar ikik ruru wo

¹² Nepisawal ŋelaga viowa la nene, naŋa pe pon re tekila poli, ana yar laŋasa pe sinelan re kiliaen poli. La apisa sanini, asape “E, kiau malena naŋa, nekilia nekila ya naŋa sineun nesape nekila.”

Ana nevisataŋe la, nesape “Lelaga, pona kiamiu malena yo, ana avisuaria, komin sur moki liu naŋa sinoŋan kilaena, akilia akila kioŋa malena imi viowa mēna ga. Sur mok liu naŋa sinoŋania osape suŋa e kioŋa malena, ositom osape okilia okawe ruru woga, ana peraga, yoko ovisu naŋa sur ke la nene narui yoko akawe ruru si kioŋa malena.”

¹³ A yar si laŋasa naŋa sinelan asape akila ya naŋa la sinelania e tasnela, la asuŋa apisa ke visena taŋena tai, asape “Kinanena, naga na mēŋeu, a mēŋeu, naga pe na kinanena.”

Ee, lelaga, ana ovisuar ruru sina, komin naŋa yoko Ntewa kila sur lua nene ava akovio na wa. Sanene na, Suŋe mla tasneta pan ita vena ve kieta, ana ita monar tela tasneta tela si vania. Tasneta vena kilaen kiena yuŋaena, ana pe nava kareena re ga poli. ¹⁴ Visae tetaŋan tasneta vena kilaen ga yuŋaena wo lala, yoko e legiena maro Ntewa kilia visirlua si tasneta, sa naŋa pisirlua tasnena ne kieta Suŋe Yesu rui, e kiena pupia māreraena. ¹⁵ Monar tekilia sane tasneta lala la sane komŋas nen tasnena Kristo. Ana sanape, popon komŋas nen tasnena ne Kristo tai va sikol si amio sira na mrapa tai? Taŋatete ve sanene ŋisa!

¹⁶ Ana Visena Wa pisa sanini, sape “Yoko yerŋene amio sira, lalua aim ave taaga,” ana yar naŋa va amio sira na mrapa tai, kila naŋa tasnena pimi pe taaga amio tasnena sira nene. ¹⁷ Pe memesun re yar tai kila sanene poli, ana monar tesikol ita temio Suŋe, naŋa ninuta imi ve taaga temio Ninuna. ¹⁸ Monar tevisuar ruru wo e mlamulena viowa la naŋa yar la akilia akila amio tasnela, e lepas na yerŋene amio sira. Mlamulena viowa taŋena la naŋa asuŋa akila, asuŋa akila ke piowa ga pa e yepen yar taŋena, ana yar naŋa kila mlamulena viowa amio sira, suŋa kila ke sina ga piowa pa e yepena.

¹⁹ Ve sineta ŋesan re, sane tasneta na sane yuŋa wa na lotena tai naŋa pulen Ninuna Wa naŋa Ntewa mligan sike loyuŋa e ita. Ana tasneta nene, pe pe kieta re mēna poli, ²⁰ ana pe kiena ne Ntewa, komin naŋa naga pul lua kieta malena e marena kiena Yesu. Sanene na, monar teyuŋae temio tasneta vena kilaen ga sur la naŋa asuŋa avisirlua kiena kia.

¹ Pogaga, nagane yoko nevisawal sitomena laḡasa e naḡa apiun tan inu e lepas na talopaena, asape popon tetalopa, pona popon tesuḡa ga sanene?

Ana pogaga, yoko nevisa ve sanini. Visae yaru tai sitom ke sape ve talopa re, naga nene pogaga, pe pe sur re tai poli. ² Ana komin naḡa tepisu naḡa nataḡaliena pimi ḡarera, a nataḡaena lau pule manene la, popon manene yar make ga aure wola lala.

³ Sanene na, visae yar sinenan sape va lavisin wona na sira, wona nene monar kekarania, a pogos naḡa sira sinenan sape va lavisin wona na yerḡene, wona nene monar kekarania. ⁴ Sira naḡa talopa taḡatete visave tasnena pe kiena naga taaga, ana wona na yerḡene kilia visave naga pe kiena ḡena ga. Ana yaru naḡa talopa taḡatete visave tasnena pe kiena naga taaga, ana wona na sira kilia visave naga pe kiena ḡena ga. ⁵ Sanene na, tai ve visaluḡar re taḡena visave ve imi re lavisinia.

Ee, pona pogos tai lalua apisayu yo, lalua ataḡan naḡa lalua aligania, ve amon re lele taaga e narin pogos tai, vena kila lalua akilia alen ḡarera vanon sur tai wa, ana nanene na pogaga. Ana siraunia, lalua monar sinelan si aim lele taaga, komin visae peraga, pona Yermare visu kilale naḡa tai malum ga, taḡatete uarar naga, ana kila loru e nataḡaliena koyo tai.

⁶ Sur la naḡa nesuḡa nepisa ke ne, pe nepisa re sane navisaluaena ḡarera tai poli, sane yar monar talopa, pona monar ve talopa re, ana nemla ga sitomena naiilaena laḡas nene. ⁷ Visae yar make ga akilia asuḡa ga sane inu, naḡa pe netalopa re poli, nesuḡa ga sanene, pona yoko vera na wo na wo, ana sur nene sike ga e sitomena naḡa Ntewa mlavia pan ita peve taaga.

⁸ Nesape nevisa visena tai van la naḡa asu ḡaga sanene, sane la naḡa pe atalopa re poli wa, amio letano lala. Nepisu sane visae akilia asuḡa ga sanene, sane naḡa in ḡena nesuḡa nekila ke ne, yoko wo na wo. ⁹ Ana visae laḡasa apisu sane peraga, yoko ḡarera van la vaḡisi vena auarar la lue ga sanene, pogaga, po paḡisi naḡa visae alual tai naḡa atalopa amio. Pe pon re nataḡaliena suḡa kar la sanene vano-o asuḡa aloge viowagania silaga.

¹⁰ Visena taḡena si tai naḡa sineun nesape nevisa, naga van la naḡa atalopa rui, naḡa pe kiau sitomena re ga poli, ana naga pe visena tai naḡa Suḡe mlavia sane visena ḡarera tai pimi pan ita. Pisa sanini, sape sira monar ve ure matan re wona na yerḡene. ¹¹ A visae pogos tai sira tai ligan wona na yerḡene, ure matan sina, naga monar ve talopa re sina, ana monar suḡa ga sanene. Pona visae peraga, popon naga amio wona na yerḡene lalua akila ruru marala, lalua asu si lele taaga. A yerḡene lala, ve aḡene plan re si wola na sira lala.

¹² Pogaga, yoko nevisawal si suri taḡena laḡasia. La pe sa re navisaluaena kiena Suḡe poli, ana sane kiau sitomena ga laḡasa vena iila itaena.

Suri ḡesia, naga e lepas naḡa yaru tai naḡa mlelaga e Yesu sike amio wona sira tai, ana sira nene mlelaga re poli. Ana visae sira nena kekarana ga naḡa lalua asuḡa veraga, po pon re yaru nene sitom sape ḡenelua si sira nene poli. ¹³ A maran taaga ḡena ga visae sira tai mlelaga e Yesu sike amio wona yerḡene tai, ana yerḡene nene pe mlelaga re poli. Visae yerḡene nene kekarana ga naḡa lalua asuḡa veraga, po pon re sira nene sitom sape ḡenelua si yerḡene nene poli. ¹⁴ Nanene komin naga e lalua naḡa mlelaga kilia kila suri wo tai van naḡa pe mlelaga re poli, ana kiena ḡelaga wo kilia kila kiela talopaena lalua imi wo vaḡisi sane talopaena kiena yaru lalua naḡa amlelaga. A naga e lalua naḡa mlelaga kilia kila suri wo tai va narila lala, komin naga yoko kilia ligan ruru narila lala e mrapa na malena wa, yoko akapuru loyuḡa e mratava tai naḡa po sa ke ga ninis taḡena la naḡa arimala amio anela la ga luwoka amlelaga. ¹⁵ Ana e lepas kiena lalua nene naḡa tai mlelaga a tai pe mlelaga re poli, visae naḡa pe mlelaga re poli sinenan sape ligan lua si naḡa mlelaga, ita li nalelagaena taḡena lala monar tetarḡan ga sanene narui. Visae naḡa pe mlelaga re poli yepen mavin naḡa mlelaga, taḡatete tekilali naḡa toḡareran

naþa mlelaga suþna amio wona naþa sinenan sape ligania, komin Ntewa sinenan sape tese malena tai naþa pulen þelaga na suþnare.

¹⁶ Ko sira naþa omlelaga, pona ko yerþnene naþa omlelaga, pona ositom osape okilia otaulu si woþna naþa pe mlelaga re poli, ana peraga, pe okilia ruru re naþa osape yoko ve sanene poli, komin pona taþatete nena otauluia þisa, peraga.

Monar teva ruru ita tesuþna e malena naþa Ntewa mligan ita tesike ea

¹⁷ Ana ya ga naþa monar tekila, ita make ga monar teligan ruru kieta malena ita punu ga su ruru e naþa kieta Suþe mligan ita tesike e rui, pona monar teyali ga e mrapa naþa Ntewa pio itania vena teyal ea. Nanene naga visena tai naþa nemligan sike e kieta suþnare lala. ¹⁸ Visena nene kana kinasa sane e nape naþa osike ea nanua, sumon naþa omlelaga, monar okekaran osuþna ga ea wa, pogos naþa osiar omlelaga. Sanene visae laþasa ape le Yu la yo, naþa asuþna ataveve ke kiela þelaga marua lala, sane þaviu pona ya sina, nanene na pogaga, pe nepisa re nesape visae pogos naþa alelaga ana monar avilopu kiela þelaga marua la naþa asuþna ataveve ke poli. A maran taaga mþena ga sa ke la naþa pe ape le Yu re poli, naþa pe akila re þaviu poli ana asuþna ataveve ke kiela þelaga marua taþena lala. E mþena e kiela leþasia, pe nepisa re nesape visae alelaga monar avilopu la e kiela þelaga marua la poli. ¹⁹ Yaru taveve þelaga marua ya, sane ve þaviu pona ve ve þaviu re, naga pe pe suri keviu re tai poli e navisuena kiena ne Ntewa, ana Ntewa sinenan ga sape tetaveve kiena visaluaena. ²⁰ Nane nepisa ke pan amiu narui nesape pogos naþa olelaga, ova ruru ko ga osuþna e yo naþa osike ea pogos naþa pe omlelaga re poli wa. ²¹ Sa ke ga naþa visae omiyuþnae korena kiena yaru tai nanua sumo, ana nagane omlelaga ga na wa, nanene pogaga, monar okekaran naþa oyuþnae korena ga sanene. Ana lelaga, visae pog tai olual kioþna pulmas tai naþa okilia ourmatan e naþa omiyuþnae korena ke ea, naga mþena nene popon oþisina. ²² Visae ko na omiyuþnae korena kiena yaru tai, monar ositoþnal sane pogos naþa Suþe vio ko, naga visirlua ko ligan ruru ko nenaga e namratava puna. Ana e kana leþas ne tai, visae ko pe omiyuþnae korena kiena yaru tai poli, osuþna ga sanene, ko mþena monar ositoþnalia ovisave pogos naþa Kristo vio ko, ko na monar oimi sane kiena yaru na yuþnae korenaena tai narui, vena kilaen kiena yuþnaena make ga. ²³ Naga nene komin Kristo pul þlan ita e pupia suri tai, sane kana kuruta, vena ita teve kiena, ana monar tevisu kilale ga narui sane mesmesun ga naþa teyuþnae koren ga vania, po pon re teyuþnae korena van yaru taþena poli, pona tesike vatanon sitomena kiena yaru taþena naþa temiyuþnae ke pania.

²⁴ Erau lala naga ke nene narui, yo naþa osike ea pogos naþa pe okilia re Ntewa poli wa, yo ke nanene narui monar osuþna ga ea, ana nagane omlelaga rui, yoko Ntewa suþna ga amio ko e nene silaga.

Naviunena e leþas kiena la naþa pe atalopa re poli wa, amio letano lala

²⁵ Pogaga, nesape nela narin visena tai van amiu e leþas kiena la naþa pe atalopa re poli wa. Visena nena, taþatete nevisave nanene navisaluaena tai kiena Suþe naþa pisa pan inu, ana visena nene naga sane kiau sitomena ga tai. Ana kam na akilia rui sane Suþe naga po paþisi pan inu, naga mla manmaruaena lala pan inu naþa yoko amiu akilia awasine ruru la, ana popon asitom urmi e kiau visena nini narui. ²⁶ Nagane, tesike e pog viowa tai naþa tesuþna tepisu ke suri mþarera la naþa tepane la, ana popon nevisa si visena naþa nepisa metava rui, naþa nesape popon teva ruru ita tesuþna ga e malena naþa tesike pae e rui. ²⁷ Sanene, visae ko yaru tai naþa otalopa rui omio sira tai, popon osu ruru ga osuþna sanene, ve ositom re ovisave oligan lua naga. Visae ko pe opure re sira tai poli wa, ko mþena ga osuþna ga sa ga nene, pe ositom re osape otalopa omio tai poli.

²⁸ Ana visae ositom sane peraga, sinoþnan manene osape oure sira tai, pe nepisa re nesape piowa poli, a visae sira mþee tai talopa amio yaru tai, naga mþena nene pe sa re kiena mlamulena viowa tai poli, nanene na pogaga nene. Ana la naþa sinelan talopaena, la monar avisu kilale sane yoko taþatete kiela malena memea, yoko avane pog mþarera

la ve moki vaḗisi e yomarava nini, a visae otaveve kiau visena, naḗa ve otalopa re, yoko nekekara vaḗisi.

²⁹ Erau lala, nepisa ke sanene komin naḗa narin pog plas ga sike ga wa vano-o tol pogos naḗa sa Suḗe wasuḗe si vitomi, a pe yaru la moki re poli na kilaen kiena yuḗaena. Ve sanene popon manene visae la naḗa aḗure wola la rui, akila sa naḗa pe atalopa re poli wa, ana akilia akila yuḗaena lala kiena Suḗe ve moki. ³⁰ A la ḗmena ga naḗa asuḗa atagin ke suri tai, popon sinela ḗesan suri naḗa atagin ke ne, a la naḗa amloge ke pon kekarena lala na yomarava, popon ve asitoḗal re sina. La ḗmena naḗa amiyuḗaen ke kilavaru, popon akila sa naḗa limala korena ga. ³¹ La naḗa akila yuḗaena taḗena lala na yomarava nini, popon akila sane pe kiela sur re tai sike e poli, komin yomarava nini amio kiena suri make ga naḗa sike ea sun ke naḗa yoko va kokovio narui.

³² Nepisa ke visena la nene pan amiu komin nesitom amiu paḗisi, pe sineun re naḗa silaga aligan lue ga kiamiu sitomena se suri la ve moki poli. Yaru naḗa pe wona re poli, naga kilia sitom urmi e yuḗaena kiena Suḗe silaga, sape yoko naga kila ve sanape naḗa yoko Suḗe kekarania, ³³ ana yaru naḗa sike amio wona, naga suḗa sitom manene suri na yomarava la paḗisi, ana kila ve sanape naḗa yoko wona na sira kekarania, ³⁴ a yoko kilia kila ḗmena sa naḗa kiena sitomena la ve ve lua. A sira ḗnee naḗa pe wona re poli, naga ḗmena ga kiena sitomena ḗmarera ruru po vena kilaen yuḗaena kiena Suḗe, a kiena yalena amio kiena yuḗaena kilia ve wa ruru lue ga. Ana sira naḗa wona suḗa ga, kiena sitomena monar su ga e yuḗaena na yomarava nini, sane monar kila suri la naḗa wona na yerḗene loge wonia. ³⁵ Kiau visena la nene, pe sineun re visaluḗar amiuenta e suri tai poli, naḗa sinemiun asape akila, ana nepisa kiau visena kilali naḗa iila kiamiu malena. Sineun ga nesape suri na suḗare punu ga kirir ruru wo, a sineun nesape ita li nalelagaena lala ve tekirakirai re, ana tekira tevisu ga kieta Suḗe naga taaga.

³⁶ Ita laḗasia akila naḗa akilawo kiela sira tai, ana asitom asape popon asutowe laa sane wa, pe asitom re talopaena poli komin naḗa sinelan kilaen yuḗaena kiena Suḗe. Ana visae lala tai visu sane sitom manene la sira nene naḗa akilawoia, sa naḗa sitom manene vano-o visu sane yoko uarar ḗele si naga, naga popon akila ga lalua atalopa narui. Nanene naga pogaga ne, naga pe mlamulena viowa re tai nene poli ḗisa. ³⁷ Ana visae tai kila ruru sitomena ḗmarera naḗa ḗmarera sape naga sinenan vena naga amio sira nene naḗa akilawoia vena ve kiena, lalua asuḗa sanene sumo wa, a visae naga visu kilale sane naga kilia kawean ruruia, nanene naga kila po paḗisi visae ve talopa re ga amio wona nene rui. ³⁸ Sanene, naga naḗa talopa mare ga amio naga naḗa akilawoia asape ve kiena, naga kila suri wo tanea tai paḗisi, a naga naḗa suḗa ga, pe talopa re amio naḗa apisawo poli, naga kila sur tai naḗa po manene laa sane. ³⁹ E lepas kiena la naḗa atalopa rui, monar ve aure matan la re sina. Sira naḗa talopa naga monar su ruru ga amio wona na yerḗene naḗa wona nene mali ke ga wa. Ana visae yaru nene mare, sira nena kilia talopa sina, akilia talopa amio yaru tai naḗa naga sinenania, ana monar ure ga naḗa naga ḗmena mlelaga e Suḗe. ⁴⁰ Sanena naḗa nepisa ke ne, naga kilia talopa, ana nepisu sane yoko wo laa vania, pona kiena kekarena keviu laa sane, visae naga ve talopa re sina. Nanene inu ga kiau sitomena, ana nesitom nesape Ninuna Ntewa ga mla sitomena marua la nene pan inu, ana popon asitomruruia.

8

Sanapen tata la naḗa aḗeḗmaria pe na kilaen lotena van nono lala?

¹ Nagane sineun visataḗeen kiamiu naviunena e lepas na tata la naḗa yar la naḗa pe amlelaga re poli akuḗapaḗain la ke pan kiela nono lala. Ana amiu asuḗa apiun ke asape popon ita li nalelagaena la takan tata la nene, pona peraga?

Pogaga, yoko kiau navisataḗeena visayu sur ve lua, ḗelaga na kiliaena, a ḗelaga na sinesiena. E lepas na kiliaena, yar la mok liu naḗa la asape akilia ruru navisataḗeena na kiamiu naviunena nene, a akilia avilaven towe ḗmaga naḗa asitom asape akilia suria. ḗelaga na kiliaena kilia kila yaru ligan kiena sitomena va metava, ana ḗelaga na sinesiena

pe sa re nene poli, suŋa miila ruru ke ga malena kiena yaru. ² Yaru naŋa sitom manene ke sape naga tol ruru ŋelaga na kiliaena, naga pe kilia ruru re Ntewa poli wa sane popon kilia naga. ³ Ana yaru naŋa tol ruru ŋelaga na sinesiena, naga ke narui naŋa Ntewa pisu kilale ruru naga.

⁴ Pogaga, nane kiau visena lua si ne nanene narui, e lepas na tata la naŋa akuŋaŋain pa nono lala. Suri na sumo pisa sanini, sape akilia asape sane nono la nene ape totou ga, a pe ape totou na sur lelaga re nena tai poli. A sur na lua naga sanini, sane kieta Ntewa naga taaga nena naŋa pe lelaga sike na. ⁵ Yar la asuŋa apisayu ke kiela ntewa taŋena lala pona kiela suŋe taŋena lala naŋa asape asike ma e peni pona e yomarava nini, a apisayula ke sa ga la yo pulen la ga asuŋa ga, ⁶ ana e ita, tekilia ruru tesape Ntewa na taaga ga suŋa ga. Naga nane Ata Ntewa, naŋa naga pe purŋes nen sur make ga, naŋa ita tepe kiena. A Suŋe taaga ga naŋa sike na, nane Yesu Kristo, naŋa naga sii make suria, a naŋa temal ke ŋena ga e naga.

⁷ Naga nene kiliaena napo naŋa ita li nalelagaena la moki tetol rui, ana sur tai piowa ga, ita laŋasa pe tekilia ruru re sur la nene poli wa. La nene, nanua sumo la ŋena asuŋa amlotun nono lala, ana pimi tol ŋane, ŋarera paŋisi naŋa avisu kilalea sane naga nene pe sur na visokanen ga. Sanene na pogos naŋa yaru la akukin tata la naŋa akila kuŋaŋaena ea pa nono lala, tekilia takania sa ga pe pe sur re tai poli, ana ita taŋena la nene, pogos naŋa akania, akan amio sitomena naŋa asape tata nene naga kana nono lala, a siraunia yepela ŋilinia, amloge sane akila sur tai naŋa pe mesmes re poli e marana Ntewa.

⁸ Ana monar tekilia sane kinanena, naga pe pe sur re tai naŋa kilia kila Ntewa visu ita sane topo pona tepiowa. Visae ve takan re tata nene, pe kana kinas re nane topo e kiena navisuena poli, pona visae takania, pe kana kinas re nane tepiowa poli.

⁹ Sike ga e ita visae sinetan takania pona yepeta mavin kanena, ana pe pon re tekila sur tai naŋa nalelagaena taŋena sitom sape pe mesmesun re kilaen poli. Pona ita tekilia tekila sur nena woga ga yo, ana pe pon re naga visu naŋa tekila poli, ana kila kare kiena sitomena.

¹⁰ Sane e lepas na tata la nene, pona e kioŋa sitomena, okilia okan woga yo, ana okilia okila pe pe sur re tai poli. Ana visae pogos tai osike omio yar lala loyuŋa e kiela yuŋa na lotunen nono lala, ana ala tata van ko ana okan omio la, yoko ve sanape naŋa visae nalelagaena taŋena tai visu ko? Pona naga tai naŋa pisaar pisape naga mlon ke tata la nene yo, ana pogos naŋa naga pisu ke naŋa okania, yoko naga visave “Suwala, yar nene naga pe yar na suŋare tai naŋa kilia ruru suria, ana naga suŋa kan ke ga tata la nene. Sanape, popon in ŋena ga nakania.” Naga pisa sanene narui, ana naga ŋena ga kania, ana siraunia yoko kilia loge viowagania vaŋisi komin naŋa sitom sape naga kila pupia mlamulen viowa tai.

¹¹ Naga nene kana kinasa sane ko na osuŋa otaveve ke kioŋa kiliaena napo, opisu kilale sane okilia okila sur nene. Ana monar ositom ovisave yar taŋena nene, naŋa naga pe womla tai naŋa Kristo mare vena tamalia naga, naga maraun kilaen paŋisi. Sanene, visae naga visu naŋa okila pogos tai, yoko kilia kila naŋa okila kare nena kiena naviawaena. ¹² Visae ve sanene, yoko Ntewa visu ko sane ko ke narui okila mlamulena viowa pa womla nene, komin naŋa okila naga kila sur tai naŋa e kiena sitomena piowagan kilaena. Naga nene piowa ga, sane okila ke ga mlamulena piowa pan Kristo.

¹³ Komin sur nene, in na nekila kiau sitomena tai, sane visae kiau ŋelaga na kanen tata nene naga pe sur tai naŋa kila kare naviawaena kiena wolai nene, yoko neligan ga narui. Ve netol re sina, komin naŋa yepmavin naŋa in ke narui nekila wolai nene loru.

9

Pol pisayu kiena ŋelaga na yuŋaena

¹ Erau lala, sineun nevisa van amiu nevisave in na pe nesu re vatanon e sitomena kiena yar taŋena poli, ana nemiyuŋae taveve ke ga ya naŋa nekilia nesape mesmesun nakilaena. In na nepe nalogena tai naŋa nepisu kieta Suŋe Yesu e kilamarau, a amiu ke

narui naþa sane mras nen kiena yuþnaena naþa nemiyuþnaenia. ² Nekilia nesape yar la þasia yepela mavin visu kilale inena sane nepe nalologena tai, ana amiu na pe sa re nene poli. Nagane kiamiu malena su ruru sike amio Suþe rui, a sur nene kila apisu kilale asape nemiyuþnae ke pan amiu sane nepe kiena nalologena lelaga tai.

³ Ana e la naþa sinelan liþere inena sane asape nekila ke piowa sanene sanene, kiau navisataþmeena la suþna ga. ⁴ Nekilia sane asape asuþna apisuar imimi pano-o sinela mare, ana sanape? Apisuar mna taþena la nanua sumo ne, ana pe apis re sanene poli, ana pogos naþa nepimi, apisa sur taþena narui. Pona asitom asape visae ve mekinana re pona ve momun re ana mekilia memal ga ve sanene vena kilaen yuþnaena pula?

⁵ A apisayu imimi laþas naþa atalopa rui, apiun asape komin ya ne wola mna la apim asuþna ataveve imimi? Ana ane sape nene naga piowa ga? Nalologena taþena la ne apim þesa, amio wenla Suþe lala, amio Keþas, pogos naþa amiyalin ke yuþnaena sanene, wola na sira lala asuþna ataveve la, ana e poglis nene, yar la nene pe apisa re sur tai e lepas nene poli.

⁶ Ana asape avisaluþar imimi ke sina ga ve meyuþnaen re kilavaru vena ulen kiamimi suri lala. Visae imimi lua Þanaþas ve meyuþnae re ga woga ga rui, ana komin ya ne apisa ke ga sanene pan imimi lua Þanaþas, ana pe apisa re pan taþena la poli?

⁷ Asitomyuli yaru na mara lala na purvanua taþena tai. Pogos naþa apanon mara, ana ane pul ke kiela sur lala? La ga apulia, pona kiela þarin suþe naga pisuvevea? A asitomyuli la naþa amapla kinanena e lokove. Visae akinana e lokove nene, taþatete yar tai vis van la vanonia. A sanapen mna yar naþa pagan ke surmal lala? Pona naga pe kanli re nena kala tata ne tai poli yo?

⁸ Nepisa sur la nene vena kila amiu avisu kilale sa naþa visae yar tai kila yuþnaena tai, popon yar la naþa naga miyuþnae kiela monar avisuar ruruia. A nepisa sanene, pe molue re ga e kiau sitomena poli, ana kieta navisaluaena wa pisayu mna ga sanene. ⁹ Visena tai sike loyuþna e navisaluaena kiena Mosis rui, naþa pisa sanini, sape
Pogos naþa kioþna puluk tai suþna yaloro ke metava e kioþna mralaki sane kona vena vie plan kirusnela, ve oviar re gona, ana monar otaþman naga yaloro ea ana kinana lilue mþaga vano. Naw 25:4

Pogos naþa Ntewa pisa visena nene narui naga pe suþna sitoþnal re sur mal la poli, ¹⁰ ana naga sitoþnal ita naþa temiyuþnae, sape la naþa temiyuþnae kiela, monar avisuar ruru ita. Yaru naþa miyuþnae e porotano, mesmesun naþa naga sitom visave pogos tai yoko kan ya naþa naga mapila, a yar naþa va lokove war kinanena vitomi, mesmesun naþa naga mna sitom visave yoko ataþman ve tokaki vania. ¹¹ Ana e lepas na kiamimi yuþnaena pun amiu, memapila mras wo la mok liu rui e kiamiu malena, ana popon vena amiu akekaran naþa avisuar imimi a akian navisa ruruena laþas naþa Ntewa mligan e limamiu van imimi. ¹² Amiu asuþna amiila ke yar taþena laþasa sanene rui, ana popon akekaran manene laa sane nakilaen wo van imimi naþa imimi mekila þesan po pan amiu sumo rui.

Ee, popon akila sanene van imimi, ana tol nagane pe mepisa re nena pan amiu mesape monar akila. Memaraun mesape sa þisi mevisawal sanene þisa, yoko asitom viowa e imimi narui, sa þisi kilawo lawe mrapa na Lologena Wo imi pun amiu. Kila narui mepis re si poli, a visae meloge viowagan naþa pe apisuar imimi re poli, pogaga.

¹³ Ana popon asitomyuli mna ga sane e Yuþna Wa mna Ntewa, la naþa amiyuþnae ke loyuþna ea amio li na kuþaþaena lala, asuþna akan ke sur la nene, a asuþna amal ke e sur la naþa yar la amla ke sane kiela nalaena pa Ntewa. ¹⁴ A Suþe pisawal mna ga sa ke nene e lepas kiena ne kiena yeririna la naþa asuþna amlologon ke Lologena Wo. La mna ga, mesmesun naþa akilia amal e nalaena la naþa yaru la ne amloge ke Lologena Wo nene asuþna ala van la.

¹⁵ Pogaga, in na yar la ne tai ne sanene, ana siar nanua sumo pimi pe nepisali re nesape yar la monar ala sur tai sanene van inu poli, pona monar akila ve sanape na van inu. A

nesuṃa nepisakol ke ga sur la ne e ṃaki nini, pe naga re ga naṓa nesape neviun sur tai tan amiu poli. Pe sineun re nesape asiar naṓa ala sur van inu poli, ana aṓarwar amiu asape amiu ke narui apagan inu, ana sineun nesape in na nekilia nesuṃa nowarwar inun nesape Ntewa ga suṃa pisuar inu silaga. Pogos naṓa nekilia nesape kiau malena sike ga e limana, nesuṃa nemloge po paṓisi, a visae ve naga re naṓa suṃa visuar inu, pona yoko neloge sane popon sa nemarṓan ga rui. ¹⁶ Nesape noṓarwar inun naṓa naga pisuar inu sanene pogos naṓa nemlologon ke kiena Lologena Wo, ana e lepas na pun inu, lelaga paṓisi pe sur re tai naṓa nekilia noṓarwar inun poli. Taṓatete nevisirlua si kiau kia va metava, nesape in ke narui nepe yar na lologonen Lologena Wo, vanon Ntewa ke narui naga mligan e luṃau, ana nepisu sane monar nekila ga narui. Visae pogos tai nourenia ve nekila re sina, yoko viowa van inu vaṓisi. ¹⁷ Visae nekila ke yuṃaena nene e ga e kiau sitomena tai, inu ga nesape popon nekila, vena Ntewa kekarania, pona yoko kilia la nalaena tai van inu komin yo, ana pe sa re nene poli. Pe inu re naṓa nesitom nesape nekila poli, ana Ntewa ga pisawalia, mligan e luṃau, ana monar nelogearia, nekila ga ve sanene narui. ¹⁸ Ana sanene, nesitom ṓele nesape nela nalaena tai vanonia, ana naga nene pogaga, komin naṓa Ntewa suṃa kila ke sur taṓena tai sane pul inu e sur wo tai rui. Sur nena, naga pupia nalogewoena nene naṓa netolia, pogos naṓa nesuṃa nemlologon ke lologena wo pa yar lala, naṓa nekila korenan ga sanene pan la. Pona nekilia nevisa van la nevisave ala sur van inu vanonia, pona avisuar ruru inu e pogos naṓa nemiyuṃae ke sanene, ana pe sineun re nene poli, sineun nesape akilia atol ga sa ga nene, pe suri tai suwo la re poli.

Pol naga miyuṃae korena ga pa yaru lala sane nalologena wo tai kiena ne Ntewa

¹⁹ Sitomena ne nanene sike e inu, a nesuṃa nemiyuṃae ke e ṓelaga tai naṓa yoko nevisa meraravan van amiu nagane.

Sane, inu na pe nemiyuṃae kiena yar re tai poli, a pe yar re tai naṓa pe yerkawan inu poli, ana inu na nekila inu nepimi sane yar na yuṃae korenen van yar taṓena lala, vena kila sane nekilia netaulu la ve moki aimi alelaga.

²⁰ E lepas kiena ne le Yu lala, nesuṃa nekila inu nepim nepe yere Yu nena napo, vena kila sane nekilia noure laṓasia aimi.

E lepas kiena ne la naṓa pe ape Yu re poli, ana ataveve ke navisaluaena kiena Mosis, nesuṃa nekila inu nepim sane yar tai naṓa nataveveen ṃena ga navisaluaena nene. Pe nepisu re sane nesike vatanon navisaluaena nene poli, ana nekekaran naṓa nevatanonia ve sanene, vena tauluen la nene naṓa sinelan suen vatanonia.

²¹ E lepas kiena taṓena la naṓa pe ape Yu re poli, naṓa pe ataveve re navisaluaena kiena Mosis poli, nesuṃa nekila inu neve taaga nemio la, komin nesape netaulu la ṃena ga. Pe nepisa re nesape nesuṃa nekilaro navisaluaena marua kiena ne Ntewa poli, peraga, ana pogos naṓa nesike nemio la, nesuṃa netaveve ke navisaluaena viu kiena Kristo vena kilia kila la alual malena.

²² E lepas kiena ne la naṓa nepisu sane pe asuṃal ruru re ṃarera poli, pe nepis ṃarera re pan la poli, ana nekila ke sa naṓa in ṃena nemio la, nesuṃa nemiila la, vena pona netaulu la yo.

Sanene, inu na nesuṃa netaveve ke mrapa make ga nakilaen suri make ga naṓa nekilia nekila van yaru make ga, vena kilaen sanene vano-o yoko nekilia netamalia laṓasa aimi alelaga e Yesu.

²³ Nekila sanene, pe nekila re ga pan inu poli, pona vanon suri taṓena tai, ana nekila vanon ga naṓa sineun nesape Lologena Wo monar war mrasa e malena kiena yaru lala, a pogos naṓa nepisu navisa ruruena naṓa Lologena Wo kila pan la, nemloge po na po.

²⁴ Asitomyuli pogos naṓa yaru na kiririena lala akiriri ke veraga. E pogos nene, la make ga monar akilali naṓa akiriri koskos veraga avano, ana la ve via aim ṓes vamon la, a kilia taulu taṓena lala? Yoko ve taaga kilia koven make laṓasa, kiriri vano yuve la, la kiena nalaena vanonia. Ve sanene narui, kam make ga monar aṃareran yuṃaena kiena Suṓe, monar aṃareran akiriri avano vena ala kiamiu nalaena.

²⁵ Yar na kirakiraena la asuñña aþion ruru la silaga, a asuñña apalia ke suri make ga la naþa kilia kila tasnela ve ñarera ruru re. Asuñña akila ke sanene komin kiela sitomena lala ñareran sape monar atauluia, atol nalaena. Ana pogos natelannen meme e yaru na kirakiraena la nene, yam plas ga meme la nene piyowa sina, ana meme naþa popon toþion naþa atelan e ita, naga yoko sike sike nena.

²⁶ Sanene, in na nekila ke sanene narui e yuññaena kiena Suþe naþa nekila ke ne. Pe nekiriri koren kar re ga poli, a pe nekirakirai re ga sanene poli, ²⁷ ana nesuñña nakawean inu, nesuñña nepisuar ruru tasneu silaga, komin naþa pe pon re nesuñña nelologo ruru van yaru lala, nesape la sanene, sanene, ana siraunia, in ke narui nekila pal mrapa, pona pe netorokin re naþa nekila make ruru kiririena naþa nekiriri ke ea.

10

La naþa asitom asape la amesmesu rui, akilia akila pal mrapa, sa naþa apua kana le Yu la akila sumo rui

¹ Erau lala, popon tesitomyuli ya naþa kata apua la akila. Naga nene e pogos naþa yermarua Mosis sumon la amolue gar Isip, amio naga ataveve lul nene naþa suñña sumon la apa akusro pupia sive nene naþa mliþere pan la. ² Aññal pogos ñarera laa nene, ana Mosis þere la apa aþarpoyo ea, ana apim sane ape kiena yeririna kemua lelaga. ³ Kas moki asuñña amialoro ke e yokorena, la make ga akan kinanena nene naþa Ntewa kian pan la, ⁴ a pogos naþa moto kar la, Ntewa kila wii kate e pulus nen kilavaru nene vena amunia. E poglis nene, sane Kristo ga sike amio la, suñña pisuar ruru la e sur make ga.

⁵ Ntewa kila ñña po pan la sanene pano-o, ana yepela mavin suññalen ñarera se ea. Apilon ñasila pania, ana naga pe tañan la re apa loyuñña e yo naþa naga pisaar pan la poli, kila naþa asuñña amarmare tetai kar ga e yomema.

⁶ Ana ita nagane, pe pon re teve þarñarera ve sa repita la nene poli, ana visae tesitom ruru e ya naþa pimi paemen la, kilia vian ita ea. ⁷ Visae ve sanene, monar ve teligan re sur taþena sumon Ntewa e kieta malena, sane nono tai naþa telotunia, sa naþa repita la nene akila. Visena tai naþa pisayu kiela þelaga e poglis nene, pisape
“La pe asitom re si sur taþena poli, sinelan ga kilaen þaþagena, amun wii marala tetelivi, a aþure ñña sira lala e wolena lala, naga ga nene.” Nau 32:6

⁸ La asitom asape malena wo ne nanene narui, ana ve sineta þesan re legiena nene naþa Ntewa kila loñara viowa la apim akar yerñene lala amio sira lala naþa akila lau, ana e legiena taaga ga nene la manu lualima yam lua pa telu [23,000] amare veraga e legiena taaga, sane kiela nakoena ñarera tai. Visae ve sanene monar tevisuar ruruia, pe pon re ita laþasa ava kar ga sanene poli. ⁹ Yar naþa pilave, kila mlamulena viowa sanene, a naga sitom sape pogaga ne, ana suñña miyur kare Suþe paþisi. Yoko Suþe kilia kila sur tai vania, yoko yar nene ilania, loñara iminia sane yar na sumo la nene.

¹⁰ A pe pon re tevismumun Ntewa poli, sane la naþa asuñña akila nanua sumo e pogos kiena kata apua lala. E poglis nene, Ntewa pitetalia navisi tai na visaaren marena pimi pula, ñmemoñar la.

¹¹ Tepisu naþa la asuñña akila ke mlamulena viowa sanene, ana tepisu naþa nakoena pimi ñmalivin la ke sanene, ana pe suri tai naweþege itaena. La asirilua kana suniena nena nakonua konua rui, ana tekilia tesitomyu si suri nene nagane, e legiena maro la ne tesike e ne. ¹² Sanene, visae yar tai visuveve si kiena malena naga taaga, a sitom sape naga suñña suññalu ruru ke ñarera rui, popon naga visuar ruruia, komin viowagan naþa visae naga kila si viowa pogos tai, ana loru.

¹³ Apisu nakilaliena la imi, ana ve sinemi kurkur manene re. Pe kam re ga apane ke nataþaliena la nene poli, ana asuñña aññalivi ke e malena kiena ne yaru make ga. Ana akilia awasine Ntewa, komin naþa yoko naga taþatete kila ko ovane nataþaliena naþa ko pe otorokin re otaulu poli, ana pogos naþa nataþaliena imi kilali ko, yoko naga vian kon kioñña mrapa nañareraena naþa nasuwoen nataþaliena, vano-o oure matan nañareraena na taþaliena nene.

¹⁴ Kiau erau wo lala, monar ve ava re nena lavisin p̄elaga naḗa yar la asuḗna amlotun ke nono na visokanena lala. ¹⁵ Nekilia nesape kam na yar sur la naḗa akilia suria, ana pogos naḗa nepisaar mesmesun nena pan amiu sanene, nemlelaga nesape kam na amninu kilale ya naḗa nesuḗna nepisa ke ne. ¹⁶ Nepisa visena la nene komin naḗa pogos na ova oyakol amio yar la naḗa asuḗna amlotun ke nono tai, sa ga naḗa ko ḗmena omlotun ke nono nene narui. Naga nene maran taaga amio ita la naḗa temlelaga ke e Kristo. E pogos na p̄aḗagena wa, temlenin namunena wa, temlavia, a na nene sa naḗa ita tepisawal tesape tesikol ita e p̄egas kiena yar la naḗa kana kuruta mlau komin la. Ana siraunia, takawero kilaparavi wa, temlavia, a na nene sa naḗa ita temio la naḗa akila kare tasnena naḗa tamalele metava e lak torovia.

¹⁷ Nanene lelaga pan ita punu ga naḗa tesuḗna tepim lele taaga e p̄aḗagena wa nene, komin naḗa tepim sane p̄egas taaga, a takan pae ga kilaparavi taaga nene.

¹⁸ A sa ke ḗmena ga nene pa le Israel lala, pogos naḗa aḗmemoḗar suri na kuḗaḗaena lala. Laḗasa pe akila re kuḗaḗaena poli, ana akekaran kanen tata na kuḗaḗaena nene naḗa yaru taḗena ga la akila, ana kila sa naḗa ape p̄egas taaga naḗa akila lotena na sanene pan Ntewa.

¹⁹ Pogaga, visena la nene kana kinas na ya? Nesuḗna nepisayu ke nono lala amio nakuḗaḗaena la nene, ana e kiau sitomena kana kinas pe nepisa re nesape sur la nene na lelaga poli, pona apowo liu. ²⁰ Pe sa re nena nene poli, ana popon nekila meraravan van amiu, nesape la naḗa akila ke lotena kar la ne sanene, pe amlelaga re e Kristo poli, a kuḗaḗaena la naḗa asuḗna akila ke ne, pe asuḗna akila re pa Ntewa lelaga poli, ana asuḗna akila ke ga pa yermare lala. Sanene, pe pon re ava lavisin la naḗa asuḗna akila ke poli, komin pe sineun re nesape asikol amiu amio yermare la poli. ²¹ Ko naḗa ototano ke e lele na kinanena kiena Suḗe, osuḗna omun ke e ḗmana piala wa, a osuḗna okan ke kana kinanena wa, taḗatete okilia ova ototano e lelen kinanena kiena yermare lala vena omun kiela namunena a okan kiela kinanena. ²² Yar na kila sanene naga suḗna miyur ke Suḗe, kilia kila Suḗe vielue vaḗisi, sinena karia. A pona yar nene sitom ke sape visae Suḗe sinena kar sanene, pe pe sur re tai poli, komin naga ḗmarera manene taulu Suḗe? Pe nesitom re nena sanene poli.

Li nalelagaena lala monar ve akila re sur naḗa kilia kila li nalelagaena taḗena lala aloge viowa

²³ Visena tai suḗna ga, naḗa yar la mokliu apisa apisape, yaru kilia kila ga ya naḗa naga sinenan sape kila. Pona visena nene pe lelaga yo, ana sur laḗasa sike na naḗa nekilia nekila, ana yepmavin ga kilaena, komin e kiau navisuena, la pe asuḗna amiila inu re e kiau malena poli, a pe asuḗna amiila re malena kiena yar la naḗa asike lavisin inu poli. ²⁴ Nepisa sanene komin naḗa pe pon re yar tai suḗna sitoḗmal ga naga taaga poli, ana monar sitoḗmal ḗmena yeririna la naḗa naga sike lavisin la.

²⁵ Pogaga, nagane yoko nevisa sur laḗasa e lepas na tata na sur mali lala naḗa akila kuḗaḗaena ea pan kiela nono na visokanena lala. Visae awar tata la nene imi, aligan su amio tata taḗena lala, vena awilwilin la, tekilia toulia takan woga ga. Nanene komin naḗa taḗatete tekilia tevisu kilale sane tata na ya la ne sanene, tesape tata ya naḗa akila kuḗaḗaena ea, pona tata ya naḗa pe akila re kuḗaḗaena e poli, ana ve tesitom manene re, ve teviun re, toul ga narui. ²⁶ Telavia, takania, komin naḗa sane visena tai pisa sanini sape yomarava nini, amio sur make ga naḗa sike ea, naga pe kiena ai? Naga pe kiena kieta Suḗe. *Yauena 24:1*

²⁷ A visae yaru tai naḗa pe mlelaga re poli, vio ko vena ova okinana e ḗmana yuḗna, pona omaraun vaena yo, osuḗna ositom ke osape pona awar kinanena laḗasa van ko naḗa akila pae lotena na kiela nono la e yo rui. Ana peraga, visae osuḗna ositom ke naḗa ovano, ova ga, a ve oviun re naviunena sanene, ola ga ya naḗa visae ala van ko. ²⁸ Ana sur ga tai, visae ova osike pae e naḗa rui, a nalelagaena taḗena tai teke ea, ana pona naga visa van ko sanini, visave Wolai, tata nene, italua monar telonia, komin nekilia rui nesape akila pae e rui pa kiela nono lala. Visae naga visa ve sanene van ko, ana sanene yoko ko ḗmena

ga ve okan re. ²⁹ Lelaga, e lepas na kiořna sitomena, okekarana ga kanena, ana e lepas na womla tařena nene nařa pisa sur nene pan ko, viowa vania, ana pe pon re si otol poli, komin visae peraga, yoko okila sur tai nařa kiena sitomena pe mesmesun re nenaga řisa.

Ana visae ko ga taaga, a pe yar tai pisawal re sur la sanene pan ko poli, okilia okila ya nařa ko sinořnan osape okilia okila.

Nane kiau sitomena sanene e lepas nene. Nesitom nesape pe mesmesun re nařa yaru tařena ga kilia řmareran inu visave monar nekila nene, pona ve nekila re nene. ³⁰ Visae kinanena ya, nevisu sane visae nelenwo sumo, yoko nekilia nakania woga ga. Pe pon re yaru tařena sinena karinun poli, nařa nakan ke tata nařa nepisa potena pa Ntewa vanon rui.

³¹ Pogaga, naga kana kinasa sanini, sane visae tekan suri tai, pona tomun sur tai, pona ya si nařa tekilia tekila, ana monar tekila make ga e řelaga tai na visirluaen kia kiena ne Ntewa. ³² Pe pon re akila sur nařa kila kare sitomena kiena le Yu la poli, pona le Kris lala, pona kieta li nalelagaena tařena lařasa, ³³ ana popon amiu akilali sa nařa in na nesuřna nekila ke pan la. E sur make ga nařa nesuřna nekila, pe nekilali re ya nařa yoko wo van inu poli, ana nořikeyon nařa wo van la, vena kila sane pona lařasa akilia atol natamaliaena.

11

¹ Lelaga erau lala, sa nařa nesuřna nekilali ke nařa neyaloro nelilu lana Kristo, popon akilali ayaloro alilu lenen lau.

Řelaga wo kiena yeririna la pogos nařa ava e suřnare

² Erau lala, nemloge sane asuřna asitořmal ke yuřnaena la nařa nekila pan amiu na wa, a asuřna atarar ruru ke řelaga lala na yuřnaena nene nařa nepian amiyunia. ³ Ana e sur la nene, tai sike ga wa nařa sineun nesape monar akilia ruruia, nařa pisayu yerřmene amio sira, nařa lalua kiela yuřnaena pe maran taaga re poli. Sa nařa Ata Ntewa naga pe řarun Kristo, a Kristo naga pe řarun yaru, ana yerřmene naga pe řarun wona.

⁴ Ana taveve kieta řelaga, visae yar tai lotu, pona visi e marana li nalelagaena lala, naga monar ve yan re karo na řarina e řarina. Visae naga yania, tevisu naga sane wowe tai nařa mninue řelaga na vatanoena. ⁵ Ana sira lala na pe tařena. Visae sira tai lotu, pona visi e marana li nalelagaena lala, tepisu sane popon naga yenwo řarina e karo na řarina pona kulmrae tai. Visae ve yenwo re řarina sanene, naga řmena ga kila piowa, tepisu naga maran taaga visae akervan řarina ve řarmu ga rui suřnal se maran yaru lala. ⁶ Visae sira tai ve řarřmarera, yepen mavin kaloen řarina sanene, popon avisa vania avisave popon naga kervan vilřarina, ana yoko kilia suřnal ga na wa su loyuřna e suřnare ana lotu. Ana yoko naga mawa vařisi nakilaen sur nene, komin pe pon re sira la aweroro vilřarila ve plalas manene poli, pona akervan řarila ve řarmu. A visae ve sur na kilaen sira mawa sanene, popon sira la akekarana tararen kieta řelaga na vatanoena, monar ayenwo řarila la sanene pogos nařa aim alotu e suřnare.

⁷ Ana komin ya ne yerřmene lala la monar ve ayenwo re řarila lala? Nanene komin Ntewa sike metava, a naga pe řar pa rui, ana naga kila yerřmene sane naga, pisirlua yerřmene kila naga pe řarun sira. Nane sa ke nene narui, yerřmene tařatete kalo řarina, ana sira monar kalo řarina. ⁸ Tekilia sane yerřmene naga monar ve řarin sira sanene, komin Ntewa sii řesan yerřmene, siraunia sii sira molue kome lepas nen yerřmene, ana pe sii re yerřmene molue kome sira poli, ⁹ a naga sii sira vena iilaen yerřmene, pe sii re yerřmene poli vena iilaen sira. ¹⁰ Sanene, sira monar kalo řarina, vena kilaen sa nařa naga patanon ke wona. Ana pogos nařa naga kila sanene, navisi lala nae ma e peni apisuia, a kila nařa apisu kilale sa nařa sira kekarana vatanonen wona na yerřmene, a la řmena monar akekarana vatanonen kiela yerřkawa keviu nařa Ntewa. ¹¹ Lelaga nařa sira monar vatanon yerřmene sanene, ana nanene kana kinasa sane pe sa re nařa sane lalua pe atoroki re poli. Ita nařa tesike loyuřna e řegas nen kieta Suře, tekilia rui tesape sira na tařatete suřna

naga taaga, a yermene tařatete suřna naga taaga, ana lalua monar asuřna ayuřnae lele taaga vena aiila la maran ve taaga. ¹² Nanua sumo la e nasiiena, sira nasumo molue e tasnena yermene, ana siraun na nene, yeririna punu ga amolue akome tas nen sira tol nagane, ana tekilia tesape purřes kemua lelaga, nařa sur punu ga molue komea, naga Ntewa ga.

¹³ Pona lařasa pe akekaran re kiau visena poli yo, nařa nesape popon sira lotu monar kalo řarina, ana asitomyu rurulia. E kiamiu navisuena, apisu sane sira nařa ve kalo re řarina, mesmesun ga nařa suřmalu lotu va Ntewa? Peraga, e kieta řelaga na pe mesmes re poli. ¹⁴ E kieta malena na yomarava nini, merarava ruru pan ita rui sane pogos nařa yermene ligan vilřarina kapuru vim ve piyavi manenea, piowa pan pařisi. ¹⁵ Ana pogos nařa sira tařan vilřarina ve piyavi ruruia, po pan pařisi, a viluna na piyavi ne, Ntewa mla pania sane sur tai nařa miyowauia ruru yepena.

¹⁶ Ana sa nařa nepisa, li nalelagaena lařas asuřna apisliu, pe akekaran re sitomena nene poli, sane sira nařa sinenan sape lotu monar kalo řarina. Pogaga, kiau visena sanini, nesape imimi li nalologena lala, memlologon ga sanene, pe mekekaran re řelaga tařena poli, a suřmare kiena ne Ntewa tařena la ne asike ne, la řena ga asape ve sa nene.

Mrapa mesmesu nakilaen řařagena wa

¹⁷ Sur si tai sike ga wa nařa sineun nela sitomena lařasa ea van amiu. A piowa ga, komin nařa naga pe pe sur re tai nařa nekilia nevisir plan amiun poli, ana naga pe sur tai nařa monar nevis van amiunia. Naga e lepas na pogos na suřmare, nařa popon vena sur tai naiilaen kiamiu malena, ana akila sa nařa pimi pe purřes nen sur viowa si tai. ¹⁸ Nepisa sanene komin nařa nemloge rui sane pogos nařa amiu li nalelagaena lala apim lele taaga, pe ape taaga re poli, ana naliřereena suřna pa ke metava likan amiu. Visae visena la nene navisokanena ana po, ana peraga, nepisu sane monar ve lelaga ga. ¹⁹ Ana pe nekilia re poli vanon ya ne sinemiun asape akila sanene? Pona yar tai sinenan sape yuve tai, tai sape yuve tai sanene yo? Pona sinořan osape otauluia vena yoko yar la avisave ko ke narui ope lelaga, pona ko ke narui nařa Ntewa sike amio ko?

²⁰ Ana e lepas na řařagena wa, nemloge sane naga řena nene asuřna akila ke piowa ga. Pogos nařa apim lele taaga vena kilaen řařagena wa nene, pe akila re si sane nasitomwalena kieta Suře poli, ana akila ke ga sa nařa kiamiu kinanena tařena lala. ²¹ Visae tai imi loge viso karia, yoko naga suřmalu kian limana la kilaparavi ve keviu, pona tařena mun kuruta na munena ve keviu, ana ve torokin re si lařasia! ²² Pona pe kiamiu lelana viranen re kapi e poli yo, řisi na aim vena akinana loyuřna e suřmare? Pona asuřna akila sanene komin nařa asuřna asitom korenan ke ga suřmare kiena ne Ntewa, pona asuřna asitom korenan ke ga erau na lelagaena tařena lala? Nemninue kare narui ařna nevisa ya ne van amiu e sur nene, yoko nevisa ga nevisave pe nekekaran re nena poli.

²³ Mrapa mesmesu na kilaen kinanena wa, Suře ga pisa pan inu, ana siraunia in ke narui nařa nemla lein pan amiu. Pa sanini, sa nařa Suře Yesu, kiena yemalo maro nene, nařa Sutas pielua naga ea, naga mla kilaparavi nene, ²⁴ ana mlen pisa potenania, kawerorovia, ana pisape “Tasneu ke nini narui, nařa netařania vanon amiu. Ana monar asuřna ala luen ga kilaparavi sanini silaga, sa nařa sur na sitořalinena tai.”

²⁵ Ana siraunia, pogos nařa akan pae, mla piala na kuruta, kila ke řena sanene, pisa pan la, pisape “Piala nini, naga kau kuruta, nařa vena kilaen naviranarena viu nařa Ntewa kila amio yaru suřmalu. A pogos punu ga nařa ala piala nene, awis, monar asitořalinena inu.”

²⁶ Erau lala, nane visena kiena Suře e lepas nene, ana kila sane pogos nařa tela kilaparavi a tela piala sanene, tesuřna tepisawal ke nasitořalena na kiena marena, a monar tekila řna sanene vano tol pogos nařa naga imi řmalivin ita sina.

²⁷ A nalaen kilaparavi kana Suře nene amio řmana piala, naga pe sur tai nařa pe wa pařisi. Visae yar tai la e řelaga tai nařa ve mesmesu re, yaru nene kila piowa ga, řarnena kare tasnena Suře amio kana kuruta, sa ga nařa naga ga řmemořaria. ²⁸ Ana pogos

nakilaen p̄ap̄agena wa sanene, monar ita make ga veve taaga tevisu ruru kieta malena lala, p̄isi na, tela kilaparavi amio kuruta nene. ²⁹ A pogos naṗa telavia, monar tevisu kilale sane sur nene kana pupia kinasa suṗa ga, naṗa pisayu kieta Suṗe naṗa naga taṗan kiena malena vanon ita. Ana visae yar tai lavia, ve sitom re urmi sane ita make ga tepe tas taaga e Kristo, naga la korenan ga, ana yoko naga visu sa naṗa viowa manene laa vania. ³⁰ Sur nene suṗa kila amiu ke rui, naṗa amiu mokliu yepemiu la miaiai a amai, pano-o tol naṗa kam laṗasa amare. ³¹ Ana visae tevisu ruru kieta malena silaga, yoko Ntewa ve la re nakoena sanene van ita. ³² Ana ita naṗa Ntewa kila sanene pan ita, ve tela re sa naṗa nakoena tai, tela sa naṗa navianena tai naṗa Ntewa kila pan ita sape tekirava, vena la pulmas tai van ita e legiena maro, naṗa yoko ve akoven ita re teva temio yar na yomarava taṗena la naṗa yoko ava e lele naloge viowaena.

³³ Erau wo lala, kiau visena ne na nene e lepas na kilaen p̄ap̄agena wa. Pogos naṗa aimi lele taaga sanene, ana akila ga e p̄elaga napo. Ve yar tai kilali re naṗa la p̄esania vena kan ve keviu, ana ava ruru amiu ga, pogos naṗa amiu make ga asike lele taaga narui, ana akilia akila ga na wa. ³⁴ Yaru naṗa viso karia sitom manene laa kinanena, popon naga suṗa ga uṗa, kinana ruru kana. A monar ataveve ruru kiau visena e lepas nene, visae peraga, pogos naṗa aimi lele taaga, ana yoko taṗatete suri tai wo van amiu.

Sur taṗena si laṗasa sike e inu vena visawalen van amiu, ana yoko nevisayu la van amiu e pogos naṗa neim noṗmalivin amiu.

12

Ṣareraena la naṗa Ninuna Wa kian ke sa naṗa nalaena tai

¹ Wolai a vineu lala, pogaga, sineun visayuen ṗareraena la naṗa Ninuna Wa kilia kian van ita li nalelagaena lala sane nalaena tai. E lepas nene, ve ave wopen re, ana sineun nesape monar akilia ruru toweli ṗaga. ² Ana popon asitom si wasuṗe va e pogos naṗa kam na pe amlelaga re poli wa. E poglis nene, naṗareraena na ninuna taṗena lala asuṗa amiyuṗae ke e amiu, aṗure kare kiamiu sitomena la pa pe wopen ruru nenaga nalotunen nono kar la naṗa pe apis re poli. ³ Nane ninuna sur ne la naṗa akilia akila yaru vis viowa va Yesu, viuelin kiena kia, ana Ninuna Wa kiena ne Ntewa naga taṗatete la visena la ne sanene. A ninuna la nene, taṗatete akilia akila yaru visa visena wo lala, naṗa sape Yesu naga pe Suṗe kemua lelaga, ana yar naṗa visa sanene, tekilia tesape Ninuna Wa miyuṗae ke e kiena malena, mla visena na sanene pania.

⁴ Sanene, pogos naṗa tepisu ṗareraena wo la naṗa li nalelagaena la akilia amiyuṗae amio, tekilia tevisave nane sane nalaena la naṗa Ninuna Wa mla ke pan la. Ṣareraena mokliu nakilaen yuṗaena la sike ne, ana Ninuna ne Ntewa naga taaga pe purṗesan make ga. ⁵ Sa ga naṗa p̄elaga na yuṗaena la mokliu sike ga wa, ana kieta Suṗe naga taaga pe p̄arun la make ga, ⁶ a sitomena wo na kilaen yuṗaena la sike ne, ana Ntewa ga naga taaga kila la apa ke metava pan ita make ga. ⁷ Sanene, e lepas naṗareraena lala naṗa Ninuna Wa kiania, li nalelagaena lala aṗar peve taaga sane tai mla tai, tai mla tai, taveve ga ya naṗa Ntewa pisu sape yoko iila manene p̄egas nen li nalelagaena lala.

⁸ Pan tai, Ninuna kian visena la naṗa amanmarua paṗisi.

Pan tai, kian navisukiliaena nowo lala.

⁹ Pan tai, kian pupia naviawaena, pan tai, kian naṗa kilia kila ruru maiena.

¹⁰ Pan tai, kian naṗa kilia yuṗaen kile lala.

Pan tai, kian navisawalena suri la naṗa pimi ke ga wa.

Pan tai, kian naṗa kilia ṗene plan yermare lala.

Pan tai, kian naṗa kilia vis e visena taṗena lala.

Pan tai, kian naṗa kilia vilon visena kiena la naṗa apis ke e visena taṗena lala.

¹¹ Nane nalaena la naṗa Ninuna Wa naga taaga kilia ligan se malena kiena yaru, kian plan ke pan ita peve taaga taveve ga ya naṗa naga sinenania.

¹² Li nalelagaena lala aþar nalaena taþena la ne sanene, sa naþa tasneta lala kiela kinakinas taþena lala mokliu. Kinakinas taþena la nene, amiyakolkol la asuþna amiyuþnae ruru ke veraga e tas taaga, a sa mþena ga nene loyuþna e þegas kiena ne li na lelagaena lala, naþa la na sane kinakinas nen tasnena Kristo. ¹³ Pona ita tepe yere Yu pona tepe yere Krik, pona tepe yerkaawa pona tesuþna temiyuþnae korena kiena yerkaawa tai, ana Ninuna ne Ntewa naga þere ita make ga, kila akee ita vena teimi teve kinakinas nen tasnena ne Yesu komþasa, ana Ninuna ne nane naga taaga sike e kieta malena peve taaga.

¹⁴ Popon tesitom manene laa totou naþa tesuþna tepisa ke ne, sane ita li na lelagaena lala ita na sane tasnena Kristo. Ana e lepas na tasneta lala, tekilia tesape kana kinakinas la mokliu. ¹⁵ Ana sanene, pe mesmesun re naþa kinakinas komþasa sane lana, mloge piowa, suþmalu pisape “Ke, in na nepe lana ga, in na pe nemiyuþnae ruru re sane limana miyuþnae poli, pona in na pe pon re ga neve kinakinas nen tas komþas poli.” Ana peraga, lata pisa þele sanene, komin naga pe pupia kinakinas na tasneta komþas rui. ¹⁶ Ana pe mesmesun re naþa kiligata loge viowa poli, suþmalu pisape “Ke, in na nepe kiligana ga, pe nepisu kilale re sur sa naþa kilamarana kila ke poli, pona in na pe netorokin re nesikol nemio tasnena poli yo.” Ana peraga, kiligata taþatete visa sanene, komin naþa naga kiena yuþnaena napo e tasneta sike pa rui. ¹⁷ Naga nene komin naþa visae tasneta ve kilamarana ga, yoko taþatete teloge kilia suria, a visae tasneta ve kiligana ga, taþatete telopon suria. ¹⁸ Ana e tasneta, Ntewa kila taveve kiena sitomena, mligan ruru kinakinas make ga su mesmesu ruruia sike nena e lelela lala, vena la veve taaga akila nena kiela yuþnaena lala. ¹⁹ Visae kinakinas nen tasneta make ga maran ve taaga, yoko taþatete tevisu sane tas tai, ²⁰ ana kinakinas taþena la monar asikol la lele taaga vena kila sane tas nen yaru. ²¹ Kilamarata taþatete visa kare limata, visave “Ke, pe sineun ko re poli,” a þarita taþatete mþene lata, visave “Ke, pe nesitom ko re si poli.” ²² Pe sa re nena nene poli, ne! Kinakinas nen tasneta la þasia amalumlum paþisi, ana tekilia sane asuþna akila ke pupia yuþnaena. ²³ Kinakinas nen tasneta taþena laþasa, pe tesitom re tesape aþna la apo sanape wa, ana tesuþna tepisuar ruru la. Kinakinas nen tasneta taþena lala, pe sinetan re yar taþena visu poli, ana tesitom urmin naþa teyenwoia. ²⁴ A kinakinas nen tasneta taþena laþasa, la atorokin ga naþa yar la akilia avisuia, ana ve teyenwo re. Sanene tepisu ke naþa Ntewa mligan ruru make kinakinasnena mesmes ga, a mligan sitomena tai sike e ita sape pe sur korena naþa kinakinas laþasa amalumlum, po pe akila re yuþnaena keviu poli, ana tesitom urmi e la a tepisuar ruru la. ²⁵ A naga nene kila naþa kinakinas make ga pe apeveyun la re poli, asu ruru ga, asuþna amiila la ke sina ga silaga. ²⁶ Visae kinakinas nen tasneta tai loge viowagan sur tai, kinakinas taþena make ga monar aloge viowa amio, a visae avisirlua kinakinas taþena tai akila wo vania, kinakinas make ga akilia aloge wo amio.

²⁷ Ana visena la nene la kala kinasa sanini, sane ita li nalelagaena lala, ita na sane tasnena Kristo, a ita peve taaga tepe kana kinakinas lala. ²⁸ A Ntewa mligan ita kinakinas na tasnena Kristo, ve nakilaen yuþnaena lala na suþnare. Na sumo, Ntewa pisirplan laþasia ape nalologena, a nalua, laþasa ape navisawalena, a natelu, laþasia ape navianena, a suraunia, la mþena ga þasia naþa ave nakilaen kile lala, pona akila ruru maiena lala, pona avisuar yuþnaena na suþnare, pona avis e visena taþena la, sanene. ²⁹ Ana þegas nen li na lelagaena lala, tepisu naþa la make ga ape nalologena? Pona la punu ga ape navisawalena? Pona la make ga navianena? Pona la make ga ape nakilaen kile? Peraga, sa re nene poli. ³⁰ Pona la make ga nakilaruruen maiena? Pona la make ga akilia avis e visen taþena lala, pona avilon visena taþena lala? ³¹ Pe sa re nena nene poli, ana popon vena la make ga akekarana naþa atol pupia naþareraena ya naþa Ninuna kilia kian van la.

A e mþareraena la nene, tai suþna ga naþa monar imi þesa e kieta malena ita punu ga, naþa po taulu make taþena lala, naþa sineun visayuen van amiu, nane þelaga na sinesiena.

13

Sinesiena

¹ Sinesiena, naga sur tai naþa monar ve sur nasumo e kieta malena. Pona nekilia nevisi kome visena kiena yar taþena la woga yo, pona nekilia nevisin visena kiena navisi la woga yo, nanene pogaga, ana visae ve sineu sii re yar lala, nekila ke sane kiau visena make ga sane þe tai naþa aþnea miyelu wowe korena ga. ² Pona pupia m̄areraena sike e in yo vena visawalen visena kiena ne Ntewa, pona nekilia ruru sur moki naþa yar taþena la pe akilia re poli yo, pona kiau naviawaena keviu manenea torokin nelotu ana sur la imi m̄alm̄alivi yo, sur la nene po manene paþisi, ana visae ve sineu si re yaru lala, nepe sur korena ga. ³ Pona nekian kiau sur make ga pa yar la naþa limala korena yo, pona nesuþmalu m̄arera m̄a pano-o asikap tasneu komin naþa nepe yaru kiena Kristo, naga m̄ena nene po na po, ana visae ve sineu sii re yaru, nekila korenan ga.

⁴ Ana pupia sur nene, þelaga na sinesiena, naga sanape? Kiena sitomena piavi, a naga sinewo. Naga pielue re poli, naga pilave re poli, a naga pisirlua re si naga poli. ⁵ Kiena þelaga po, naga puluvis re poli, naga sinena mimi koskos re poli, a naga tarar re sitomena viowa piavi poli. ⁶ Naga pe sinenan re sur viowa poli, ana naga kekaran ga sur wo. ⁷ Sinesiena naga suþmalar lue ga, sinesiena naga lelaga lue ga, sinesiena naga wasine lue ga, a sinesiena naga taulu lue ga. ⁸ Sinesiena naga pe sinena mare re pogos tai poli.

Lelaga paþisi, naþareraena taþena lala, sane navisawalena lala, pona navisaen visena taþena lala, pona nakiliaena lala, yoko taþatete sike lue, ana nasinesiena ga naga su lue, naga taþatete þisi pogos tai. ⁹ E kieta pogosia, asuþna apisawal ke visena kiena ne Ntewa, a asuþna apian ke nakiliaena la ne sanene, ana ya naþa asuþna akila ke nagane, naga komþas nena ga, pe wetelu re nenaga þisa. ¹⁰ Sur la nene ape nanagane ga, a e pogos naþa Ntewa yoko kila sur make ga imi wo ruruia, sur taþena la nene yoko aþisi, ana sinesiena yoko su lue.

¹¹ Naga maran taaga ga amio kieta malena. Pogos naþa tepe sisi ke ga wa, kieta visena amio kieta sitomena mla ke ga þelaga kiena sisi. Ana pogos naþa tepe yerkawa, pe tesa re si ninis poli, kieta þelaga marua ruru nenaga. Ana kieta malena amio Ninuna Wa monar ve sa m̄ena ga nene. ¹² A maran taaga m̄ena ga e kupito naþa tepisu ke marata ea. Pogos tai, visae kupito nene namname pona pe urmarua, ana taþatete si tekilia tevisu ruru marata ea. Ana e pogos naþa Ntewa kila ruru make sur la imi wo, yoko tevisu kilale make suria, a yoko tevisu nena marana Ntewa e kilamarata. A e m̄ena e lepas na kieta kiliaena, nagane tekilia vitokak ga, ana e pogos naþa pimi ke ne, yoko Ntewa kila naþa tekilia ruru naga, amio sur taþena make ga, maran ve taaga sa ke ga naþa naga kilia ruru ita nanua sumo rui pimi tol nagane.

¹³ Sanene, sur taþena lala yoko þisi, ana sur la ve telu ga yoko kilia sulue, nane naviawaena, nawasineena, a sinesiena. A e sur la telu nene, naga naþa keviu manenea, nane nepisa maron ne, naga sinesiena.

14

Pol pisayu sina m̄areraena lala kiena Ninuna Wa, sa naþa avis kome visena taþena lala

¹ Ana komin sinesiena naga pe sur tai naþa keviu manene sanene, monar aligan naga su þesia e kiamiu malena. A amio naga nene, monar aligan kiamiu sitomena se naþareraena la naþa Ninuna Wa suþna kiania, akekarana naþa atolia. A e m̄areraena la nene, tai naþa po manenea, na naþa yar visawal visena kiena ne Ntewa.

² Visae yar tai suþmalu visawal visena kome visena taþena naþa Ninuna Wa mla pania, pona wo van yo, ana sa naþa pis ke ga pa Ntewa, naga pe suþna pisa re visena naþa yar taþena la akilia aloge kilale poli. Pona naga suþna pisawal ke pupia visena la naþa Ninuna Wa mla ke pan yo, ana visena la nene pe merarava re pan ita poli, tapolou ga, taþatete tetolia. ³ Ana visae yar tai visawal visena lala kiena ne Ntewa van ita, vis van ita kome kieta visena, kiena visena wo la nene akilia akila ita toþarera, akilia avisir plan kieta

sitomena, akilia akila luḡeluḡe losineta. ⁴ Sanene, yar naḡa pis ke kome visena taḡena naḡa Ninuna Wa mla pania, suḡa pagan ke sina ga naga taaga, ana yar naḡa pisawal ke visena kiena ne Ntewa naḡa yar la amloge kilalea, naga suḡa pagan ke suḡare make ga.

⁵ Pogaga, nekekaran naḡa visae avis kome visena taḡena la ne sanene, ana nepisu sane popon manene visae asuḡa avisawal ke visena kiena ne Ntewa van yar taḡena lala. Naga naḡa suḡa pisawal ke visena kiena ne Ntewa, kiena yuḡaena po manenea taulu yuḡaena kiena yar naḡa suḡa pis ke kome visena taḡena. Naga nene komin yar naḡa suḡa pis ke kome visena taḡena, kiena yuḡaena taḡatete kilia war mrasa e malena kiena yar taḡena. Kiena yuḡaena taḡatete vagan suḡare visae yar re tai naḡa suḡa vilon kiena visena vena yar taḡena lala akilia alogekilalea.

⁶ Erau lala, asitomyulia visae inu, pogos naḡa nepim ke pun amiu nesuḡa nemlologo kome visena taḡena naḡa Ninuna Wa mla pan inu. Ana yoko taḡatete nena kiau visena la ne sanene kilia iila amiu. Ana pogos naḡa nepis kome visena naḡa akilia amloge kilalea, kila sane ya naḡa nemla pan amiu, sane sur viu tai naḡa Ntewa kipian inunia, pona kiliaena tai, pona navisawalena tai na visena kiena ne Ntewa, pona vianena tai, ana kilia iila ruru kiamiu malena.

⁷ Naga sane plaḡe amio kana laki naweena naḡa aḡea apolu, visae sur lua nene amenunu, ana pogos na wolena taḡatete ologe yauena pona pialu yelu. ⁸ Ana visae suḡe tai sinenan visave we ḡe na kumali, ana ḡe nene menununu, taḡatete yelu ruru ve keviu, yoko yeririna la taḡatete akilia aloge kilale avisave suḡe ḡe na ya. ⁹ Ana sa ke ḡena nene e kiamiu suḡare gar e naḡa. Visae yar tai suḡa pisa ke visena lala kome visena taḡena naḡa yeririna la akilia re poli, yoko taḡatete nena atol narin sur tai e ya naḡa naga sinenan sape visa van la. Kiena visena yoko va kovio ga e yepesinas na ḡeke ne.

¹⁰ Sa naḡa tekilia, visena mokliu sike e yomarava, a kiela visena lala kala kinas la suḡa ga. ¹¹ Ana visae neva ko yo tai, neninue kiena visena, in na sane nepe wolawa ga e yo nena, a la ḡena ga ave wolawa ga e inu. ¹² Ana visena nene, kana kinasa e amiu naḡa asuḡa aḡion ke asape ḡareraena lala kiena Ninuna Wa ayuḡae likan amiu. A kana kinasa sanini, ve akila re naḡa kam veve taaga asuḡa avisir plan amiu ga, ana monar awionlia vena amiu make ga asuḡa avisirlua suḡare imi ḡarera ruruia. ¹³ Ana visae amiu yar tai kilia visi kome visena taḡena tai sanene naḡa Ninuna Wa mla pania, popon naga lenin va Ntewa vena Ntewa la ḡareraena vania vena vilon kiena visena la nene ava e kiamiu visena. ¹⁴ Nepisa sanene komin naḡa visae nelotu kome visena taḡena na sanene, nepisu sane nesuḡa nelotu ke ga e ninuu, ana loyuḡa e kiau sitomena nemninue ya naḡa nesuḡa nepisa ke ne. ¹⁵ Visae ve sanene, yoko popon tekila ve sanape? E kiau navisuena, popon tekila e lepas ga luwoka veraga. Visae nesuḡa nelotu, pona nesuḡa neyau, ana popon nekila e visena naḡa molue kome ninuu, a popon ḡena nekila e visena naḡa molue kome kiau sitomena. ¹⁶ Visae peraga, pona osuḡa olotu ga kome visena naḡa molue kome ninuḡa, osuḡa ovisa potena va Ntewa komin sur laḡasa, ana yar taḡena naḡa loge ḡele visena nene, yoko taḡatete kilia, yoko taḡatete visa “Sanene” e kioḡa leniena. ¹⁷ Pona osuḡa omlotu ke sanene, opisa ke suri wo la moki yo, ana kioḡa lotena nene taḡatete kilia iila sitomena kiena kioḡa erau ḡisa.

¹⁸ In na nekekara paḡisi naḡa Ntewa mla naḡareraena nene pan inu vena nevisi kome visena taḡena naḡa Ninuna Wa mlavia, nepisa potena pan paḡisi, a nepisu sane inu na nekila keviu paḡisi taulu amiu make ga. ¹⁹ Ana nesuḡa nekila ke e pogos naḡa inu ga taaga nesiau, pe nekila re e maran yaru la poli e pogos na suḡare. E kiau navisuena, visae nevisa visena tai ve tokak ga kome visena tai naḡa yar la akilia, naḡa kilia vian kiela malena, naga nene po manene laa taulu naḡa visae nekila visena la ve moki kome visena taḡena tai naḡa la pe amloge kilia re poli.

²⁰ Erau lala, awis akilali naḡa asitom ruru e sur la nene, kiamiu sitomena ve ve sa re ga ninis. Pe lelaga naḡa e lepas na ḡelaga viowa lala, popon ave sa ga ninis, ve akilia make re sur ea. Ana e lepas na ḡelaga wo, kiamiu sitomena lala monar marua ruruia. ²¹ Visena tai sike e Siriena Marua, pisawal visena tai naḡa Ntewa pisa sanini, sape

Yoko noure yar la naþa apimi e purvanua taþena lala, naþa apisi kome visena taþena lala, neligan plan la avano vena avisawal kiau visena van kiau yeririna lala.

Ana kiau yeririna lala ape þarmarera paþisi, yoko taþatete ayagogon kiau visena la naþa wolawa la nene avisawal van la. *Ais 28:11-12*

²² E visena nene, nepisu naþa Ntewa pisawalia pisape naþmareraena na visinen visena taþena lala naþa Ninuna Wa kiania, naga na ya? Mareraena nene pe pe kieta re poli ita la naþa temlelaga pa þisi rui, ana naiilaen la naþa pe amlelaga re poli wa. Pogos naþa aloge, avisu kilalea sane lelaga. Ana naþmareraena navisawalen visen kiena ne Ntewa, naga kilia iila manene ita naþa temlelaga rui, naþa tekilia teloge ruru merarava wo. Ana naþmareraena nene taþatete iila manene la naþa pe amlelaga re poli, komin yepela mavin yagogonen visena lala kiena ne Ntewa.

²³ Ana pogos naþa aimi lele taaga vena kilaen suþmare sanene, pe pon re asuþna avis manene kome visena la naþa Ninuna Wa mla ke pan amiu poli. Visae pogos tai, yar tai naþa pe kilia ruru re sur nene poli yo, pona pe mlelaga re poli, visae naga imi loyuþna e kiamiu suþmare, yoko naga visa ve sanape? Yoko naga monar sitom visave kam make ga ape wowe la. ²⁴ Ana visae imi loyuþna, visu naþa asuþna apisawal ke visena kiena ne Ntewa kome visena naþa amiu punu ga akilia, yoko naga yagogon ruru kiamiu visena wo lala, ana kilia yur kiena malena, kilia kila naga visu kilale kiena mlamulena viowa. ²⁵ A pogos naþa yagogon þna sanene vano-o, yoko naga loge visena kiena ne Ntewa tol kiena malena, va yupor e sur la naþa naga þarwan sike e kiena sitomena, a yoko kila naga sinena ye si naga, kinai tano lotun Ntewa, visawal visave lelaga, Ntewa sike likan amiu.

Monar teyuþnae e naþmareraena kiena Ninuna Wa e þelaga mesmesu

²⁶ Taveve visena la nene e lepas na naþmareraena lala naþa Ninuna Wa kiania, yoko akila ve sanape e pogos na kiamiu lotena lala? Pogos naþa aimi lele taaga, popon vena aliureure kana yuþnaena lala van amiu. Sanene, yar tai la yauena tai, yar tai la navianena tai, yar tai la sitomen viu tai naþa Ntewa pisawal pania, yaru tai la visena tai e visena taþena tai naþa Ninuna Wa kian pania, a taþena kilia vilon visena nene vena yeririna la make ga akilia kana kinasia, ana suri punu ga kilia vagan ruru malena kiena li nalelagaena la naþa asike ne.

²⁷ Ana sa naþa nepisa, visae e pogos nene, yar tai sinenan vis kome visena taþena naþa Ninuna Wa kian pania, nanene pogaga. Visae ve lua pona ve telu naga pogaga þna ga, ana monar ve yuve re telu. A ve avis re veraga, ana ala pogos van la, tai sumo, siraunia taþena sanene. A tai þna ga, visae tai vis pae, yar taþena monar vilon kiena visena, vena la make ga akilia. ²⁸ A visae sinelan visen kome visena taþena sanene, ana visae pe tai re suþna ga naþa tol naþmareraena na visawalen kinas nen visena la nene poli, yoko la ve avivis re si kome visena taþena la ne sanene e maran yaru lala. Yaru na sanene, yoko topur ga, a kilia vivis ga kome visena taþena e ga e ninuna, naþa naga ga amio Ntewa lalua akilia aloge.

²⁹ E lepas kien la naþa apisawal ke visena kiena Ntewa, popon sane la ve lua pona ve telu ga avis. A pogos naþa avis pae, popon li nalelagaena taþena lala avisawal kiela sitomena ea. ³⁰ Visae tai suþna mlologo þna ga, ana Ntewa kila sitomena viu tai imi van nalelagaena taþena naþa totano teke ne, naga naþa suþna pis ke ne monar þisi kone wa vena la pulmas van taþena nene. ³¹ Sanene, amiu punu ga akilia atol pulmas na visawalen visena kiena ne Ntewa, naþa tai visawal tai, þisi taþena visawal tai, sanene. Ana visena la nene yoko kilia visirlua sitomena kien yaru make ga, a la make ga akilia atol sur wo ea.

³² Visena wo tai sike ne, naþa torokin la naþa aþar ke naþmareraena naþa Ninuna Wa kian pan la. Visena nena pisa sanini, sape Ninuna naþa mla visena pan yaru naga pe þmareran re yaru poli, ana naga monar logear ga manmaruaena kiena yaru nene naþa pisawal ke visena nene. ³³ Visena nene kana kinasia asape monar teyuþnae e þelaga wo sa naþa Ntewa naga sinenania, komin naga pe suþna miyuþnae kar re poli amio kiena naþmareraena, ana suþna miyuþnaen ke sur punu ga torokin þelaga na suþarena.

A popon akila ve sa naþa þegas nen li nalelagaena wa taþena lala asuþna akila, ³⁴ naþa pogos na lotena, akila naþa sira lala apa ruru la ga asuþna ga. Pe ataþnan re sira la asuþnal poli vena avis e marana yermene lala, komin sa naþa navisaluaena marua pisa, sira lala monar ve asu re metava taulu yermene lala. ³⁵ Visae sira la sinelan kiliaen suria, pe pon re aviun manene naviunena poli pona avisawal manene kiela sitomena loyuþna e suþnare, ana visae ava uþna narui, akilia aviun ga va wola la na wa.

³⁶ Nanene kiau visena laþasa naþa pan amiu, ana pe pon re kam laþasa asitom asape nepisa sur nene pe mesmes re poli. Pe kamiu re naþa Visena Wa kiena ne Ntewa pimi þes pan amiu poli, a pe kam re ga naþa atol poli. ³⁷ Visae kam yar tai sitom visave naga yar na visawalen visena kiena ne Ntewa, pona naga pe yar naþa sitom ke sape naga taveve ke mrapa naþa Ninuna Wa kila pe merarava pania, naga ke narui naga po, ana visae ve sa kemua nene, yoko naga monar visu kilia visave sur la naþa nesuþna nesiriyu ke pan amiu, ape visena kiena Suþe kemua lelaga. ³⁸ Ana visae naga ve visu kilale re sane kiau siriena la nene ape visena lelaga kiena Suþe, yoko monar ve ataþnan re si naga yuþnae amio amiu.

³⁹ Pogaga, monar asitom ruru kiau visena lala, nesape aþnareran naþa vena atol naþareraena na visawalen visena kiena Suþe, ana visae la þasa atol naþareraena na visena kome visena taþena naþa Ninuna Wa kian pan la, monar ve avisaluþar la re avisave kilaen toko. ⁴⁰ Ana visae akila nene, pona ya sina, ana monar akila sur make ga taveve kana mrapa naþa mesmes ruru po.

15

Suþmalen sina e marena

¹ Erau lala, sineun nesape nevisayu si Lologena Wo naþa nepim nemlologon pan amiu rui, naþa amlavia, asuþna asuþnal ke mþarera ea, vena kila amiu ve sinemiu þesan re. ² Lologena Wo nene na naþa visae asuþna amlarar ke mþarera yo wa, naga suþna kila ke naþa atol kiamiu natamaliaena. Ana visae ve atarar re si mþarera torokin ya naþa nemlologon pan amiu, pona visae avilon ve ve taþena, kana kinasa sane amlelaga nanua sumo ana amlelaga korenan ga.

³ Lologena Wo naþa amla þesan pan inu nanua sumo, nane nemla narui, nepisawal ke pan amiu ne. Kana pupia visena ne lala apisayu Kristo, naþa naga kila maran taaga sa ke naþa Nasiriena Wa pisayu nakonua rui sape yoko naga kila, pogos naþa naga pe pitomi re poli wa. Pa sanini, sape Kristo, naga mare wo ita vanon kieta mlamulena viowa lala, ⁴ siraunia amligan naga mþene puluve, siraunia e kana legiena na telu suþnal mal sina, ⁵ a siraun naga nene naga mþalivi þesan e marana Keþas, siraunia, naga mþalivi ke sina ga e marana la lualima yam taaga pa lua. ⁶ A siraun naga nene, pogos si tai naga mþalivi e marana þegas nen li na lelagaena lala, la taulu ponotia lima [500], naþa la mok liu amal ke ga wa tol nagane, ana laþasa akokovio rui. ⁷ Ana siraunia, naga mþalivi sina ga e marana Semes, siraunia mþalivi e marana nalologena taþena lala, ⁸ ana siraun nene, naga þasuþe si pa ma e peni. In na pe nesu re e poglis nene poli, ana potena paþisi naþa siraunia, Suþe mþalivi si yam tai, naþa naga mþalivi maro nenaga, mþalivin inu. ⁹ In na pe netorokin re naþa naga kila sanene van inu poli, komin naþa e nalologena make ga, in na nesumaro tano, a in na pe netorokin re nena kia nene poli, komin nanua ne in ke narui naþa nesuþna noþnene ke þegas nen li na lelagaena lala kiena ne Ntewa. ¹⁰ Ana Ntewa naga pe lemam pan inu paþisi, pisirlua inu e yo naþa nesike e nagane, a naga pe lemam korena re sanene pan inu poli, komin naþa nekila ke kiena yuþnaena kerkeviu la moki. Lelaga, pona nekilia nevisave in na nekila ke yuþnaena pa laa sane taulu make taþena lala, ana pe in re naþa nekila ke poli, ana lemamiena kiena ne Ntewa ne nanene narui naþa sike e inu, naga ke narui miyuþnae þarpoyo kome kiau malena. ¹¹ Ana in na pe nesitom manene re nesape in na nemiyuþnae ke sanape, pona nalologena taþena lala amiyuþnae

ke sanape, ana pupia sur nena sane memlologon Lologena Wo pan amiu, ana amlelaga ea.

¹² A pogos naþa memlologo ke sanene pan amiu, mepisawal meraravan ruru pan amiu mesape Kristo, naga mare, ana siraunia mal sina. Ana komin naþa mekila ke sanene, nemilan paþisi naþa nemloge sane kam la þasa asuþna apisape pogos naþa tokovio, asin ita, ana yoko temare lue, ve temal re si pogos tai. ¹³ Sitomena na sanene pe mesmes re poli, komin naþa visae asuþna avisave pe yaru re tai naþa kilia suþnalu si poli, kana kinasa sane Kristo mþena pe suþnalu re si poli. Ana peraga, Ntewa pisirlua naga mali si rui. ¹⁴ Visae naga ve visirlua re Kristo, kila sane memlologon korenan ka ga Kristo pan amiu, a amiu mþena amlelaga korenan ga. ¹⁵ A visae ve sanene, kila sane pogos naþa memlologon ke sanene pan amiu mesape Ntewa pisirlua Kristo mal si rui, mepisokan paþisi e kia kiena ne Ntewa, pona mepian amiu ke e sur tai naþa pe lelaga re poli. ¹⁶ Visae lelaga naþa sane yar mare taþatete si mali, kana kinasa sane Kristo mþena ga taþatete si mali. ¹⁷ A visae Kristo mare mon mþaga sanene, kana kinasia sane kiamiu naviawaena pe sur korena ga, a kana kinasia sane kiamiu mlamulena viowa la sike e amiu na wa. ¹⁸ A visae Kristo ve mal re mþena ga si sanene petan marena, kana kinasa sane kieta erau la naþa amlelaga ana akovio rui, apa e yo viowa rui, komin pe yar re tai naþa kilia tamalia la poli. ¹⁹ A visae kieta lelagaena e Kristo suþna miila ita e ga e yomarava nini, ana taþatete iila ita e pogos naþa tokovio ea. A visae Kristo taþatete tamalia ita e pogos naþa tokovio e yomarava nini, yoko viowa manene van ita, sineta ye kare ita vaþisi.

²⁰ Ana peraga, pe sa re nena nene poli, nekilia nevisa mesmesu nevisa ve lelaga, Ntewa kila si Kristo mal si petan marena, a pisirlua naga sane pe mras þesa kiena li na lelagaena make ga, naþa visae akovio pogos tai, ana yoko Ntewa kilia kila amal sina ga vetan marena. ²¹ Nanua e purþesa, yar þesa naþa Atam þere marena pimi e yomarava, ana nagane, yar taþena nene naþa Kristo þerelua malena petan marena pimi. ²² Taveve ya naþa Atam kila, yeririna make ga na yomarava monar amare, ana taveve ya ne Kristo kila, yeririna make ga na yomarava akilia alual malena. ²³ Ana sur make ga kala pog mesmesu sike ne, komin naþa Kristo naga sumon naþa suþnalu þesa e marena, ana ita li na lelagaena lala yoko tesuþmate mþa vano-o tol pogos naþa naga wasuþe sina, ana yoko ita mþena tesuþmalu e marena. ²⁴⁻²⁵ Ana siraun nene yoko naga wereplan ninuna viowa lala amio yermare lala na yomerava, a yoko naga taaga ve þarin suþen sur make ga, vano-o taulu naþareraena viowa taþena lala asike vatanon lana. Þisi yoko naga war nasuþenen wetelu e sur make ga wasuþe si va Ntewa Arimana. ²⁶ A e nasinekar la naþa yoko Kristo taulu e pogos nene, naþa yoko naga taulu maronia, sur nene marena, amio kiena naþareraena viowa lala. ²⁷ Kristo monar taulu marena nene, komin visena na metava ne pisa sanene rui, sape yoko Ntewa ligan sur make ga su vatanonia. Ana visena nene kana kinas pe pisa re sape Ntewa mligan ke sina ga naga sike vatanon Kristo poli, ana pisayu sur taþena lala, naþa yoko Kristo taulu make la nenaga. ²⁸ A pogos naþa Ntewa mligan sur make ga sike vatanon Kristo sanene rui, yoko Kristo, sane narina Ntewa, mligan sina ga naga vatanon Ntewa, ana yoko kila naþa Ntewa naga taaga ve Ntewa na sur make ga.

²⁹ Nowasuþe si neva e visena naþa nepisayu nesape visae temare, yoko siraunia tesuþnal sina. Ana laþas naþa amlelaga sa nene, la asitom manene kiela erau la naþa pe akeela li re poli wa, ana amarmare. Asitom ke asape la nene taþatete atol malena, kila narui akee la sina e kia kiena ne kiela erau lala naþa amare rui. La akila ke sanene, komin naþa amlelaga mþarera asape visae temare, yoko tesuþnal sina.

³⁰ A imimi mþena ga maran taaga, asitomli sane komin ya ne mesuþna moþnal pog mþarera lala e pogos make ga? Mesuþna moþar ke naloge viowaena la sanene komin ga memlelaga mþarera mesape visae yaru tai mare, yoko naga kilia mal sina ga vetan marena. ³¹ Lelaga erau lala, mesuþna memiyuþnae ke sanene, nekilia nevisa mesmesun sane nemloge sane nesuþna netaþnan ke kiau malena vanon amiu e legiena make ga. Ana nanene pogaga, komin nekekara na nekekara e malena naþa atolia amio kieta Suþe Yesu

Kristo. ³² A pogos naþa nesike e pulkumali naþa Episas, þarmarera lala nae yo nene la asaga lokul tetan lala, asuñalun inu lue ga, ana komin ya ne nesuñna nepisaluþar la? Nesuñna nekila ke sanene, pe netaulu re nena sur wo tai na malena na yomarava nini, ana nesuñna nekila ke sanene komin nesitoñmal ke malena na pimi ke sirau.

Visae ve malena re nene, popon teve sa ga yar kar taþena la naþa pe amlelaga re poli, naþa la asuñna apivis ke sanini, asape, “Þane, tekila þaþagena, ve tesitom re sur tai, komin naþa peni, ane kilia? Visae temare na þisi narui, yoko taþatete tekilia sur tai.”

³³ Ana monar ve ataveve re sitomena na wowe la ne sanene, visae peraga, yoko visena taþena nene imi ve lelaga e amiu, naþa pisa sanini, sape “Oyaloro omio erau viowa lala, yoko kiela napiowaena kila kare kioñna þelaga wo.” ³⁴ Monar aim ave manmarua, a monar aligan kiamiu mlamulena viowa lala. Nepisa sanene, pona asitom ke asape nekila kare kiamiu kia yo, ana monar nevisa, komin kam laþasa pe akilia ruru re nena mrapa mesmesu lala kiena ne Ntewa poli.

³⁵ Ana e lepas na malena si e marena, yoko laþasa aviun sanini, avisave “Yoko akila si yar mare la amal e marena ve sanape?” Pona yoko aviun sanini, avisave “La naþa amare nakonua rui, yoko asuñmal sina amio tasnela na sanape?” ³⁶ Ana naviunena la ne sanene ape naviunena kiena yar naþa pe kilia re sur poli. Visae tesitomli narin kurus nen sur la naþa tesuñna temapila ke ne, yoko telual kana navisatañneena. Pogos naþa omapila narin kurus tai vito e porotano, okilia rui osape kurus nene monar menun, monar mare, ana siraunia, yoko sirus viu kilia kapur komea. ³⁷ Sur naþa omapila, naga kurus ga tai naþa yoko sike e porotano, ana sur naþa yoko kapur marea ve urviu sina, naga ve sur taþena. ³⁸ Sa naþa omapila ke kurus la peve taþena ana Ntewa suñna kila sirus viu lala peve taþena, ³⁹ a maran ve taaga e sur mali lala, naþa tasnela la peve taþena. Tasnena yaru kana tata pe taþena, a surmali lala sane na porotano, na si, po na metava, la peve taaga tata taþena la sike e la. ⁴⁰ A surmali la nene, tasnela lala pe taþenan manene laa e tas nen sur taþena la naþa asike ma e sinapane, ⁴¹ sane mrae, kupario, amio verue lala. La telu nene, tai marana pe taþenan maran taþena, a maran taaga ñmena ga e lepas na verue lala, naþa tai, marana pe taþenan taþena.

⁴² Ana sur make ga la nene, tepisu naþa Ntewa kila la ape taþena manene laa, a sur nene þar totou na tasneta, kiena ita la naþa tokovio, naþa tekilia tokusia pogos naþa tesuñnalun temal sina. Tasneta vito e pulus nen porotano, sane kurus tai naþa amapla, naþa monar menun, ana siraunia, tasneta viu naþa molue yoko taþatete si imi viowa pogos tai. ⁴³ Tasneta naþa vito e porotano, tepisu piowa ga, a pororovia, ana tasneta viu naþa ñmalivi sirau, yoko tevinaia vaþisi, a ñmarera ruru wo. ⁴⁴ Sur naþa vito e porotano, naga e lepas na tasneta ga ne, ana sur naþa ñmalivi sirau, naga e lepas na ninuta. ⁴⁵ A tekilia tesitoñmal ñmena yar na sumo naþa Ntewa siia, naþa Atam, amio Atam maro naþa mligan e yomarava, naþa Kristo. Visena tai pisape Atam, Ntewa kila naga pimi amio tasneta tai naþa mali, ana Kristo, Ntewa kila naga pimi amio ninuna tai naþa pe purþes nen malena. ⁴⁶ Taveve nene, tepisu naþa sur na lepas nen tasia pimi þesa, ana sur na lepas na ninuna, pimi maro. ⁴⁷ Yar na sumo naþa Atam, Ntewa sii naga molue kome porotano na yomerava nini, ana yar na lua naþa Kristo, Ntewa mligan naga kom ma e peni pitomi. ⁴⁸ Ana ita yeririna taþena lala, ita naþa tepe na yomarava, tokus ke þelaga kiena yar na sumo na yomerava nini, ana ita naþa tepe nae ma e peni, tokus ke þelaga kiena naga naþa pitomi ma e peni. ⁴⁹ A ita naþa temlelaga, sumo tokus maran yaru na yomerava, ana nagane tokus ke maran yaru nae ma e peni. ⁵⁰ Erau lala, sur naþa kate ga e yomarava nini, sane tasneta, taþatete va loyuñna e nasuþenena kiena ne Ntewa nae peni, a sur naþa yoko va kovio, taþatete va tol yo naþa sike sike lue.

⁵¹ Ana yoko ve sanapen li na lelagaena lala naþa amal ke ga wa, pogos naþa Kristo wasuþea? Sur nene, pe yar mok re naþa akilia poli, ana yoko nevisawal mesmesun van amiu. Lelaga, ita li na lelagaena laþasa yoko ve temare re e yomarava nini, ana e pogos nene, yoko tasneta vilopu nena veraga sa ga yekarpla. ⁵² Sa naþa toþelawa ve plas ga,

yoko teilan ga kumasua yelu, a yoko li na lelagaena la naþa amare pa rui yoko asuñal amal sina amio tasnela viu, a ita ñena naþa temal ke e pogos nene wa, tasneta ñena lala yoko imi ve urviu. ⁵³ Tasneta marua monar vilon ve sanene, komin naþa sur na yomerava monar imi ve sur nae peni a sur na marena monar yoko imi ve sur naþa mal nalue. ⁵⁴ Ana pogos naþa toþar tasneta viu na sanene, yoko kila visena na Siriena Marua tai imi ve lelaga nenaga, naþa sape

“Nañareraena na malena kiena ne Ntewa ñenelua nena na ñareraena na marena.” Ais 25:8

⁵⁵ E pogos nene, yoko tevisa lele kare sur naþa marena þisa, tevisa sanini tevisave

“Marena, ko sinoñan osape otauluia, ana nagane kioña kap mare. Kioña nenas naþa nayur imimiena sike pe nagane?” Ose 13:14

⁵⁶ Yoko tevis sanene komin navisaluaena naþa sike pa rui, naga mla ñareraena pan þelaga na mlamulena viowa loyuña e kieta malena, naþa kila ita tepim sane yar lala na kilaroen navisaluaena, a kieta þelaga na mlamulena viowa nene mla na ñareraena pan marena vena ve sa nenas naþa kilia yurñar ita. ⁵⁷ Ana potena pa Ntewa paþisi, komin naþa naga kila naþa kieta Suþe Yesu Kristo taulu ñareraena navisaluaena a ñareraena na mlamulena viowa a ñareraena na marena, kila tetol malena naþa ve uro re.

⁵⁸ Erau nowo lala, komin naþa Ntewa kila po pan ita sanene, asuñalu ñarera, ve akulkulu kar re, a ayuñan ruru yuñana kiena kieta Suþe amio kiamiu nañareraena wetelu. A pogos naþa akila ke sanene, popon asuña asitoñal sane kiamiu yuñana nena ve ve sur korena re, ana yoko monar war mrasa sa naþa Suþe sinenania.

16

Kilavaru naþa akoania va li na lelagaena lala nae Yerusalem

¹ Sineun nesape nela visena laþasa van amiu e lepas na warpoloen kilavaru vena iilaen li na lelagaena lala nae Yerusalem, naþa apane ke pogos ñarera, limala korena ga e poglis nene. Nemla visena pan suñare kar make ga e lepas nae Kalesia rui, a nagane sineun nesape nevisawal van amiu narui. ² Sineun nesape nevisa sanini, nesape ve asusu koren re asuña sanene va tol pogos naþa neiñasu noñalivin amiu ana awarpolo ga nalaena na wa, ana sineun nesape siar nagane, e legiena þesa na legiena olua make ga, kam veve taaga monar ala narin kinakinas nen ya naþa amlavia, ana monar aligan ruru toña ga. ³ Ana pogos naþa neiñasu, yoko towarpolo narin kilavaru la nene imi lele taaga, a yoko akilia akilalua yar laþasa awar nalaena nene va gar Yerusalem. A yoko nesiri ñaki laþasa awararia va va li na lelagaena lala gar ne, vena visawal amiuena van la. ⁴ Nemninue ke ga wa pona inu ñena nemio la yo, ana yoko nevisulia wa.

Mrapa kiena Pol

⁵ Pogaga, kiau mrapa sanini, sineun nesape neva nokom e lepas nae Ñasitonia sumo, ana suraunia yoko neiñasu noñalivin amiu. ⁶ Nemninue ke ga wa nesape yoko nesike nemio amiu va tol pogwai, ana nesitom ke nesape nesike nemio amiu e pogos na miava na pimi ke ne, ana siraun naga nene, akilia aligan inu si e kiau mrapa, vena neva si e nape naþa yoko neva ea. ⁷ Pe sineun re nokom pun amiu nagane poli naþa nesuña nepanon ke Ñasitonia, komin visae ve sanene, yoko nekilia nesu yam ve plas ga ne, ana yoko neva ke ne gare sumo wa, siraunia neiñasu, komin naþa visae Suþe tañania, nekekarana naþa yoko nesu towe laa nemio amiu ve piavi. ⁸ Nagane nesike Episas, a yoko nesu towe laa e nini na wa, tol pogos na Þaþagena na Yui Marua warovia. ⁹ Kiau pulmas na kilaen yuñana wo la e nini moki ke wa, a suri si tai, nasinekar ñarera ñena la mokliu asike e nini, ana pe nekilia re poli naþa nekilia neyal pogwai.

¹⁰ Visae avisu Timote imi ñalivin amiu, awis, awo vania, akila naga logewon naþa sike amio amiu, komin naþa naga kila ke yuñana kiena Suþe, maran taaga sa ke inu. ¹¹ Ve atañan re kam laþasa avisusu viowa e naga, ana avisuar ruruia e þelaga na suñare, siraun

aligan naga e kiena mrapa vena naga kilia wasuþe ruru imi pun inu, komin nesuþmate ke nesape vena naga amio wolai taþena lala aim aworu e nini.

¹² E lepas kiena ne kieta puruvi naþa Apolos, nepiun manene pania vena naga taveve puruvi taþena la nene aiþasu pun amiu, ana kiena sitomena m̃arera sape naga nene pe kana pog mesmes re poli naþa m̃alivin amiu, ana visae kana pog nena, pona yoko naga sirau iþasu.

¹³ Erau lala, lavis ke kiau visena þisi narui, ana sineun nesape nevisa van amiu sane amiu avisuar ruru amiu, asuþmal ruru ase kieta lelagaena, ve sinemiu kurkurun re suria, ana aþmarera. ¹⁴ A suri make ga e naþa akila, monar akila e þelaga na sinesiena.

¹⁵ Popon avisu kilale Steþanas nene amio kiena namratava lala, amio yuþaena naþa asuþma akila ke ne. E yeririna nae make ga e kiamiu lepas nene, Akaea, la ke nene narui la amlelaga þesa. A sirau naþa amlelaga, asuþma akila ke yuþaena wo paþisi, asuþma amiila ke li na lelagaena lala pimi tol nagane. ¹⁶ Yar nowo la ne sanene, popon avisir plan la vena asumon amiu, a popon avatanon m̃ena yeririna taþena la naþa amiyuþae ke lele taaga amio la. ¹⁷ Steþanas nene pimi m̃alivi e nini rui, naga pimi amio Posanatas a Akaekas, a nekekanan la telu paþisi. La asuþma amiila inu ke e suri moki, torokin ke ga naþa amiu m̃ena akilia akila visae asike e nini. ¹⁸ La telu nene akila po pan amiu rui, ana pogos naþa apam e nini akila inu m̃ena nemloge po paþisi, apisirlua kiau sitomena. Popon avisa potena ve keviu van la komin kiela pupia yuþaena wo na sanene.

¹⁹ Suþmare make ga lala na lepas nini nae Esia asape asuþma asitom amiu paþisi. A kieta erau lua nene, Akwila amio wona na sira Prisila, amio yeririna lala na suþmare naþa e m̃ala uþna, la apisa pokolulagi a pokolemalo pan amiu e kia kiena Suþe. ²⁰ Kieta erau lala nae yo nini akekanan navitawe amiuena e m̃aki nene, a amiu m̃ena, pogos make ga naþa avitawe amiu, popon asuþma atalopan amiu a asuþma aviran pipimiu, vena akekanan amiu amio sinewo.

²¹ Ana siar e narin yo nini, inu Pol nemlarar ke pensel nesuþma nesiria vena nevisa kiau visena maro van amiu. ²² Monar sinemiu sii ke m̃ena Suþe ve lelaga, visae peraga, yar naþa ve sinena sii re naga, visaarena na marena sike e naga. Nesuþma nemlen ke sanini, nesape Suþe Yesu, awis, otom vilaga, ²³ a nesuþma nemlotuwo amiu ke m̃ena ga, nesape lemamiena kiena kieta Suþe Yesu sike amio amiu. ²⁴ A sane silaga, nekilia nevisa e kia kiena Kristo Yesu sane kiau sinesiena van amiu keviu sulue ga suþna ga.

Kiau m̃aki þisi ga e nene narui,

Inu, Pol.

M̃aki Nalua Naḗa Pol Siri
 Pa Pan Li Nalelagaena Wa Lala Nae Garu
 KOREN
 Visayuena Na Tusi Nene

Komḗasnen suniena plas na tusi nini

M̃aki na lua nene naḗa Pol siria pa li nalelagaena lala nae Koren, ana naga siria e pogos naḗa pane ke pogos m̃arera amio li nalelagaena lala e suḡare nene nae Koren, naḗa laḗasia sinela kar manene naga paḗisi, ana akawelan naga. Ana Pol kila mareravan panila sape naga kiena sitomienna m̃arera ke na wa vena kila ruruen napiowaena nene. Naga sinenan sape naga amio la aimi ave erau wo sina, ana pisawal panila pisape kerara paḗisi naḗa amlogear naga.

E komsusnen m̃aki na sumo Pol pisayu komin yane naga pis m̃arera e m̃aki na sumo tai naḗa siri pa pan la. A pisa naḗa naga kerara paḗisi naḗa mloge sape apilon kiela sitomienna komin kiela milamulena viowa lala, a kila ruru napiowaena la naḗa sike pula, ana ape erau wo sina amio.

A siraunia, pisa panila sape monar akuwan kilavaru vena waren van kiela erau na lelagaena lala nae Yutea, la naḗa pe kiela sur re poli. E komḗasnen luwasnen m̃aki nene, Pol pis m̃arera pa yaru la ḗas nae Koren naḗa la asape ape li nalologena wo kemua lelaga, ana asuḡna akila kare li nalelagaena la nae yo nene e kiela vianiena la naḗa pe mesmesu re poli. Asuḡna apisa ke asape Pol naga pe nalologena kiena ne re Yesu Kristo lelaga poli, ḗisi na Pol pis m̃arera vena suwoyon laena, a kila meraravan sane naga pe nalologena kemua lelaga kiena ne Yesu Kristo.

Komḗasnen tusi la nini

Visena ḗesa 1:1-11

Pol amio li nalelagaena lala nae Koren 1:12—7:16

Kilavaru naḗa na warena va li nalelagaena lala nae Yutea 8:1—9:15

Pol kila meraravan naḗa naga pe nalologena kemua lelaga 10:1—13:10

Visena maro 13:11-14

Visena ḗesia

¹ Erau lala, inu Pol nemio kieta puruvi naḗa Timote; imimi lua mekekarana naḗa mevitawe amiu sina e m̃aki nini, nane amiu suḡare kiena ne Ntewa e pupia kumali nae Koren amio m̃ena li na lelagaena taḗena lala naḗa asutetai asike e pupia lepas naḗa Kris.

Ntewa kiena nasinenanena, naga pisirlua inu Pol vena neim sane nalologena tai kiena ne Yesu Kristo, kila narui kiau suri moki naḗa nevisawal van amiu e m̃aki nini, ana sumon nanene, ² nevisa sanini nevisave kiau leniena nesape yoko Ntewa Arimata amio Suḗe Yesu Kristo aligan lemamienna a suḡarena, lalua asike e amiu punu ga.

Pol pisa potena pan Ntewa vanon kiena sinewoena

³ Sineun manene paḗisi neyeluar kieta Ntewa nene naḗa naga pe Arimana kieta Suḗe Yesu Kristo, a naga pe Arimata nowo tai naḗa naga pe purḗes nen ḗelaga na sineyeena, a naga pe Ntewa nowo tai naḗa naga pulen ḗelaga na kila luḗeluḗeena. ⁴ Pogos ya naḗa visae teване pog m̃arera, Ntewa suḡna kila luḗeluḗe ita ruru nenaga, ana kila toḡarera ruru sina ga. Ana siraunia, tekilia tela ḗelaga na kila luḗeluḗeena naḗa naga kila pan ita, tekila towe va kieta erau taḗena lala naḗa apane ke kiela pogos m̃arera lala, teiila la sanene.

⁵ Pe lelaga paḗisi sane pogos moki tesuḡna ga toḗar ke naloge viowaena maran taaga sa naḗa Kristo ḗaria, ana naga kila naḗa tekilia towar m̃ena kiena kila luḗeluḗeena nowo

lala. ⁶ Pogos naþa mepane pog m̃arera lala, metañan ga narui, vena kila sane amiu akilia aloge wo a alual malena. A pogos naþa mevisu sane Ntewa kila luþeluþe imimi, naga m̃ena ga po paþisi, komin naþa kila sane imimi m̃ena ga mekilia mekila luþeluþe amiu sina ga, a mekilia meila amiu vena akila kiamiu sitomena ve piavi vena akilia awar ro e napiowaena la naþa amiu m̃ena ga akilia alualia. ⁷ Mesitomyu ya naþa amiu aþarpoyo e þisi rui, kila sane e lepas na pun amiu, pe kiamimi sitomena kurkur re nenaga, sane yoko amiu na ve sanape. Nanene komin naþa imimi mekilia ruru þisi rui sane pe sur korena naþa amiu monar avisu naloge viowaena maran taaga sa ke naþa mepisuia, ana yokorena amiu akilia atol m̃ena ga pupia kila luþeluþeena kiena ne Ntewa ve sa ke ga naþa imimi metolia.

⁸ Pona pe amloge kilia ruru re poli yo wa, e pupia pogos naloge viowaena lala naþa mepisuia pogos naþa mesuñma memiyuñmae kar ke ga e pupia lepas nene naþa Esia, ana nekilia nevisa nevisave piowa na piowa paþisi. Sur la urmi manene la pan imimi, imimi pe metorokin la re si poli, pano pano-o mesitom mesape naga narui monar kiamimi luas nen malena narui. ⁹ Lelaga, memloge sa naþa visae yerkawa na kumali tai visawal visave awe moñar imimi memarmare, yoko mevisu sane sa ve sanene na wo laa sane, komin naþa mepisu rui sane taþatete si mekila sur tai, moþasine imimi þele sina mesape yoko imimi moñarera ve sanape. E pogos nene, memligan kiamimi malena sike ga e limana Ntewa, moþasine ga naga komin naþa naga taaga ga pe Ntewa naþa kilia kila yaru naþa mare imi mali sina. ¹⁰ A moþasine naga sanene, mepisu naþa pe lelaga paþisi naþa naga tamalia imimi, a nagane kiamimi sitomena m̃arera ruru po sane naga kilia tamalia imimi sina, pe yam taaga re ga poli, ana yoko naga suñma kila lue ga silaga.

¹¹ A monar amiu aiila imimi naþa asitoñmal imimi silaga e kiamiu leniena lala. Sa nene, pogos naþa Ntewa loge kiamiu leniena moki nene, yokorena visa ruru imimi narui, tamalia imimi sina vetan pogos m̃arera la nene, a yoko amiu ve moki avisa ga potena vaþisi va naga vanon ya naþa yoko naga kila van imimi.

Pol pisa meraravan ruru sur naþa kila naga pe pimi mialiali la re si poli

¹² Moþar naloge viowaena la sanene, ana sur tai suñma naþa kila imimi memloge pon imimi paþisi. Nane sitomena tai naþa teke e imimi naþa pisa sanini, sape e lepas na kiamimi þelaga e maramiu, a e maran yeririna taþena lala na yomarava nini, mekila sur make ga pe wa ruru nenaga, a kiamimi malena pe lelaga nena na po, sa naþa Ntewa sinenania. Pe memiyuñmae re memio sitomena na yomerava nini poli, ana memiyuñmae ga memio lemamiena kiena ne Ntewa. ¹³ Sur make ga naþa mesiriyuia e kiamimi m̃aki la nini, naga pe sur la naþa mekilia mesape aulo woga, a mekilia mesape akilia aulo kilalea. Ana visae sur laþas naþa amiu akilia ga komþasa, sineun nesape e legiena la ne pimi ke ne, yoko monar akilali naþa akilia ruru make la ga. ¹⁴ Visae ve sa nene, pogos naþa ita punu tesike lele taaga e legiena keviu nene naþa Suþe Yesu wasuþe sina, ana yoko amiu akekaran imimi vaþisi a imimi m̃ena ga mekekaran amiu vaþisi.

¹⁵ Ana komin naþa nekilia ruru nesape sitomena wo na sanene sike likan ita rui, sineun manene nesape pogos naþa neva e lepas nene M̃asitonia, yoko neiñmasun noñmalivin amiu. ¹⁶ Lelaga, nesuñma nesitom ke nesape neiñmasu nokom pun amiu yam ve lua, naþesia e pogos nene naþa nesuñma nepa ke M̃asitonia, a yam ve lua nena e pogos naþa noþasuþe inu, naþa nesitom nesape amiu akilia aligan ruru inu e kiau mrapa vena nowasuþe si neva Sutea, ana peraga. Sineun nesape nekila wo van amiu sanene, ana sa naþa akilia rui, taþatete nekilia nekila.

¹⁷ Ana sineun nesape amiu monar akilia ruru sane pogos naþa nesitom ke nesape neimi pun amiu, naga sur tai naþa sineun manene paþisi nesape nekila, naþa kiau sitomena m̃areran paþisi ve na kilaena. Naga pe pe sur re tai naþa kiau sitomena peve lua e poli, naþa nesitom ke nesape yoko nevano pona ve neva re. Peraga, inu na pe nesa re yeririna taþena la poli, naþa taþatete olelaga e kiela visena, ¹⁸ ana sa naþa amiu akilia awasine

ga visena kiena ne Ntewa, akilia awasine m̄ena kiamimi visena. Kiamimi “Ore” pe kana kinas re naŋa asape “Peraga” pona “Ana yo,”¹⁹ ana pogos naŋa mevisape “Ore,” naga “Ore” ga. Monar meve lelaga sanene, vena meve maran taaga memio narina Ntewa, Yesu Kristo, naŋa imimi telu Silvanus amio Timote mepimin memlologon pan amiu nanua rui. E pogos nene mepisawalia mesape kiena visena make ga pe lelaga silaga, komin kana “Ore” pe “Ore” nena napo,²⁰ a navisaarena make ga naŋa Ntewa pisawalia e lepas kiena ne Yesu, pe tai re naŋa pimi sane pe navisokanena poli, ana punu ga pe lelaga. Sur ne nanene kila sane pogos naŋa tesuŋa temlen pa Ntewa, e kana nasiarena pitomi tol naŋa tepisape “Sanene,” tekila ga e kia kiena ne Yesu Kristo.²¹ Kristo ke nanene narui naŋa memlologon pan amiu, a Ntewa ga pisirilua imimi pe na kilaen kiena yuŋaena. A amio naga nene, Ntewa kila imimi memio amiu, ita punu ga tepim lele taagania.²² Ntewa kiar ita tepe kiena, ana naga mligan Ninuna e losineta, sane navisaarena tai naŋa sape yoko temio naga e pogos la naŋa suŋa pimi ke ne.

²³ Kieta Ntewa nene naga pe lelaga silaga, a naga kilia iila visena nene naŋa sineun nesape nevisawal van amiu. Sane nanua ne nepisa m̄na nesape yoko noŋmalivin amiu gar Koren nene, ana siraunia pe nepiŋas re si poli, a pona asitom piowagan inu e yo. Ana nesape nevisa van amiu naŋa pe vanon re kiau sur tai poli, ana vanon amiu ga, komin naŋa nekilia nesape visae neiŋasu yoko monar nevis m̄arera van amiu komin kiamiu ŋelaga laŋasia. Ana pe sineun re nesape yoko nekila amiu aloge viowa poli, nane kila sane pe nepim re si poli.²⁴ Nepisa pan amiu sanene, awis monar ve asitom re avisave mesitom ke mesape mesike metavan amiu, vena meve ŋarun kiamiu lelagaena. Pe sa re nene poli, ana sinemimin mesape teyuŋae ga lele taaga, vena kila amiu akilia aloge wo silaga, asuŋalu ruru m̄arera ase kiamiu naviawaena.

2

¹ Sa naŋa nepisa, nanua nepim sumo, sur laŋasa suŋa ga naŋa monar nepis pan amiu panon narui, ana kila amiu amloge piowagan. Ana nagane pe sineun re neim nekila amiu aloge viowa yam si tai poli, a sitomena ne nanene narui kila sane ve neiŋasu nakaten amiu re sumo wa.² Visae neiŋasu nevis van amiu, nekila aloge viowa, yoko inu m̄ena ga neloge viowa, ana pogos naŋa ita punu ga teloge viowa sanene, yoko taŋatete si naŋa tai kilia iila tai vena loge wo sina.³ Sitomena ne naga nene naŋa nepisa ŋesan e m̄aki taŋena naŋa nemligan piŋasu nanua rui. Sineun nesape akilali akila ruru sur viowa la nene sumo wa, vena kila sane visae pogos naŋa neiŋasu, yoko ve sur re si tai sike likan amiu naŋa monar neloge viowagan. Ana visae akila ruru kiamiu yuŋaena wo, yoko nekilia neiŋasu naŋa nevisu naŋa apim apo si rui, a visae ve sanene, yoko nekekara vaŋisi, a yoko kiau kekarena nene kila kiamiu kekarena m̄ena ga ve keviu vaŋisi.

⁴ Nepisa sanene komin naŋa pogos na nesiri piŋasu pan amiu nanua ne, nemloge piowagan manene laa. Nemloge sane losineu lavis worovia, a wamarau la suŋa mlalau. Visena m̄arera la naŋa nepisa pan amiu e m̄aki nene, pe nekila re poli komin naŋa sineun amiu m̄ena ga aloge viowa, ana sineun nekila amiu avisu kilale sane sineu sii manene amiu silaga.

⁵ Ana sa naŋa ita make ga tekilia, tai sike likan amiu naŋa naga kila pupia naloge viowaena nene. Sineun nesape sane sur viowa naŋa naga kila, kila inu nemloge piowa, ana pe in re ga poli, kila amiu m̄ena ga moki liu amloge piowa. Ana pe sineun re si nevisave monar ala manene si nakoena van poli,⁶ komin nekilia sane amiu punu ga apis pan ŋisi rui.⁷ Apis pania toroki narui, ana nagane pe pogos naŋa aviewo naga, sinemiu ye si naga. Visae peraga, yoko naga loge viowagan manene sina vano vano-o viowa vania.⁸ Ore, noŋmareran vena neviun van amiu ve sa nini, sane monar akila merarava ruru vania sane sinemiu si ke naga na wa.

⁹ In na nesiri m̄aki taŋena nene nanua ne, sineun nevisuveve sane yoko amiu akekara naŋa alogear kiau visena lala naŋa sike loyuŋa ea, pona peraga.¹⁰ Pogos naŋa nepisa

nesape popon aviewo yar tai, nemlelaga nesape yoko akila, a naga naþa aviewoia, in mēna ga neviewoia. A nemninue ga, pona naga kila mēna sur laþasia piowa pan inu yo, ana nekekarana naþa nevisawal e marana Kristo nesape nepiewo naga, ana sanene, iila amiu mēna ga vena akekarana aviewo yar taþena. ¹¹ Monar tevisuar ruruia, komin naþa tekilia ruru sitomena viowa lala kiena yermare vena kila kare itaena, ana visae tesuṃa teviewiewo ita silaga, yoko naga taþatete nena taulu ita þisa.

Pol pisayu kiena mrapa navaen ma Troas amio Māsitionia

¹² Ana pogos naþa nepam re si pun amiu ma Koren poli, nepito ga nemlologon lologena wo kiena Kristo garo kumali naþa Troas, ana e yo nene, nepisu sane pulutava pietava ruru nena pan inu vena nekila yuṃaena kiena Suþe. ¹³ Ana sur viowa tai e pogos nene, nesitom ke nesape yoko nelual wolai naþa Taetas e yo nene, ana naga pe su re poli. Ana kiau sitomena nesitom manene naga paþisi, kila sane pe piavi re poli nemligan la nene, nemla si kiau mrapa yalen silau ma lepas nene Māsitionia.

¹⁴ Kiau yalena pa sanene narui, ana potena paþisi pa Ntewa komin naþa silaga mligan Kristo naga suṃa sumon ita. Nanua sumo ita tepe kiena nasinekar ga lala, ana naga taulu ita rui, ana tetaveve naga tepa kar ga e yo make ga, ana pogos naþa yar la apisu ita, yoko avisu kilale sane Kristo naga pe kieta Suþe. Pona nekilia nevisa sanini, sane ita na sane ponotaninu wo tai naþa asikapia, ponos miyere þar make yo, ana pogos naþa yar la amloponia, yoko alopon kilalea sane Kristo suṃa pimi mālavin la. ¹⁵ Ntewa kila ponotaninu nene pa vanua e yar make ga, pano tol la naþa asuṃa apanon ke mrapa natamaliaena, a pano tol la naþa apanon ke mrapa na kovioena. ¹⁶ Ana e la naþa apanon ke akovio, ponotaninu nene naga ponos piowa sane sur mare tai naþa kona, ana e la naþa asuṃa aṃal ke malena, naga sane ponos nen māþes wo na tamaliaena.

Nanene narui ita tevisu yuṃaena naþa mesuṃa mekila naga pe pupia yuṃaena paþisi, komin memlologon visena kiena ne Ntewa naþa kilia kila yar tol malena pona tol marena. ¹⁷ Nalologena la þasa pe asitom manene re urmi e yuṃaena nene poli, asuṃa amlologon ke visena kiena ne Ntewa vena ataulu ga kilavaru ea, ana imimi na pe sa re nene poli. Ntewa pisir plan imimi ana memiyuṃae ga e yo metava e marana, a mepian visena lelaga kiena Kristo pa yar taþena lala, þarpoyo ga e māreraena naþa mla pan imimi.

3

Imimi na yar na kilaen yuṃaena na viranarena vii

¹ Nepisayu kiamimi yuṃaena keviu na metava ne, pe pon re asitom avisave nepis vilave ke sane navianena taþena lala navisokanena. La nene apim pun amiu amio mēki la naþa apisayula asape la apo pa sanape, a pogos naþa amolue petan amiu, aṃararan asape monar amiu asiri si mēki laþasia vena visawalen kiela yuṃaena naþa aþar ke pano. Ana visae sinemimin meva si e lele taþena, pe mesitom re mēki tai ne sanene poli vena visawal imimiena. ² Visae yaru tai sinenan kilia visave imi sanape, popon imi visu ga mras nen kiamimi yuṃaena e kiamiu malena lala. Amiu na sa ga mēki tai narui, naþa Kristo siria navisawalen kiamimi yuṃaena. Yaru taþena lala akilia aim auloia, vena akilia ya naþa mesiria e losinemiu lala. ³ Yoko avisu amiu sane ape mēki tai naþa Kristo naga mligania, ana moþar pimi, a yoko avisu kilalea sane lelaga, mekila yuṃaena e amiu po paþisi. Ana mēki nene naga pe mēki re naþa wii na kilamemego na kapi naþa asiri e mās nen tus tai poli, ana naga mēki naþa Ninuna Ntewa siri e los nen yaru.

⁴ Visae ve sanene, kiau visena la nene pe visen vilave re poli, ana mekilia mevis sanene komin Kristo ga naga taaga kila naþa moþasine Ntewa keviu pa þisi. ⁵ Visae imimi ga, yoko taþatete mevisave imimi metorokin mekila sur tai, komin sur make ga naþa mekila, Ntewa ga kila sane imimi mekilia mekila. ⁶ Naga ke narui mla māreraena amio kiliaena pan imimi, kila imimi mepim mepe kiena yaru na yuṃaena e lepas na viranarena vii naþa naga kila amio ita yeririna lala na yomerava. Naviranarena þesa asiri plan kana

visena ne lala e tus lala navisaluaena lala kiena Mosis, ana visena la nene amiila ita ana pe torok ruru re poli. Apowo, ana ya naþa akila, akila meraravan ga asape ita yaru nakilaroen navisaluaena, naþa yoko monar telual marena vanonia. Ana naviranarena viu, naga visena ne lala apim amlalivi e Ninuna Wa, a Ninuna nene narui kila ita tetol natamaliaena.

⁷ Mrapa marua nasumo nene, naþa ate kana navisaluaena lala e kilavaru la naþa pe lepalepas nene, naga suþna pisaar ke ga kieta marena, ana naga pe sur tai naþa pe wa paþisi. Pogos naþa Mosis þar lepalepas nen kilavaru la nene, naurarena kiena ne Ntewa pimi e naga, ana pogos naþa þar maran si kilavaru la nene pa le Israel lala, mmareraena naurarena nene suþna pito ke tano rui, ana la apisu þele marana komin naþa pilavila na pilavila. ⁸ Sanene, visae naurarena kiena ne Ntewa miyuþmae mmarera e pogos naþa apisawal mrapa na tolen marena, yoko yuþmae ve sanape e pogos naþa yoko avisawal mrapa na tolen malena? ⁹ Yoko naurarena kiena ne Ntewa monar yuþmae ve keviu va manene va þisi e pogos nene, a tesuþna tepisu þisi rui naþa kapi vivaga na mrapa viu suþna tego kar ga, suþna taulu kapi na mrapa marua nene naþa suþna pito ke tano rui. ¹⁰ Lelaga, kapi viaga na mrapa marua nene naga suþna tego ruru nanua sumo, ana nagane, tepisu naþa kana kapi nena sane pe tego ruru re si poli, komin kapi na mrapa viu pimi þarpoyo, suþna tego keviu e yo make ga. ¹¹ Kapi naþa suþna pito ke tano nene, lelaga naþa naga pitomi þesa, pitomi amio kana pupia naurarena nena. Ana nagane kapi viu naþa naga pimi mare ga sirau, yoko naga sulue na sike ne, a kana naurarena nena yoko ve keviu manene lue.

¹² Visae tesitomiyluli nene, yoko kila kieta sitomena mmarera ruruia, a ve temaraun re si naþa tekila kapi vivaga kiena Suþe tegoli yo kar lala. ¹³ Ana tesitomiyluli mmena yermarua Mosis, naþa naga pa metava e tavie, ana Ntewa pimi lavisinia, kila marana pilavila paþisi. Ana pe pon re ita teve sa naga poli, komin pogos naþa þasuþe si pitomi pu le Israel lala naga kalo marana e kulmrae vena ve avisu re, vano-o tol pogos naþa kana tegoena suþna vito mna tano vano þisi. ¹⁴ E pogos nene, pe apisuli re kapi nene poli wa, komin naþa þarila mmarera paþisi, ana tepisu naþa pimi tol nagane, la sa mna ke nene na wa. Apulo ke visena lala e tus marua naþa sike ne, ana sane kulmrae na sike ga wa, suþna kilawo ke kiela sitomena lala. Ana visae alelaga ga e Kristo yoko naga kilia tarlua kulmrae nene vena akilia avisu kilale kiena yomerarava viu. ¹⁵ Pogos naþa apulo ke navisaluaena kiena Mosis, naga sa naþa sur tai kalo ke þarila, ¹⁶ ana pogos naþa visae yaru tai imi e Kristo, a warlua sur nene naþa kilawo ke kiena sitomena, ana naga kilia visu kilale suria. Sa ga visena na Nasiriena Wa naþa pisayu yermarua Mosis nene, naþa pisape "Pogos naþa Mosis pilon naga, kira pisu Suþe, kulmrae nene mloru si petania." ¹⁷ Ana pogos naþa visena nene sape Mosis pilon naga kira pisu Suþe, visena naþa Suþe, kana kinasia naga naþa pe Ninuna Wa kiena ne Ntewa. A tekilia tesape e nape naþa Ninuna Wa kiena ne Ntewa sike ea, yaru lala akilia aurmatan mmareraena na viowaena, alual malena.

¹⁸ Sanene, ita make ga naþa temlelaga rui, pe kulmrae tai towo re si marata poli, ana tesuþna tepisu ruru nena pupia nauraraena kiena ne Ntewa. A pogos naþa tesuþna tepisu mna pano, nauraraena nene pimi puleule e ita, pano tol naþa tepim tepe sane kupito vena tegoliaena kiena kapi vivaga va va yeririna taþena lala. Ana kapi vivaga nene pe molue re kome kieta malena poli, molue kome kieta Suþe, naþa naga Ninuna nanene naþa sike e ita.

4

Pol amio nalologena lala amlologon kapi vivaga nalologena wo

¹ Mesuþna mekila ke kapi vivaga kiena ne Ntewa pilavila ke sanene, naga pe kiamimi pupia yuþmaena tai vena iilaena yaru taþena lala. Losinena Ntewa pulen sineyeena, a naga ke narui naþa mla yuþmaena nene pan imimi, a pogos naþa mesitoþmal nene, kila sane pe sinemimi maren re yuþmaenen pogos tai poli. ² A pogos naþa memiyuþmae, mesuþna memiyuþmae ruru po silaga. Yaru laþasa, amiyuþmae vinau e ga e nakilakotaliaena lala pona akilali naþa awere sitomena kiena yaru lala, a akilia avilovilon mmena

visena kiena ne Ntewa va ve taþena, a imimi na pe mekila re þelaga la sanene poli. Mekilia mesape pogos naþa mesuþna memiyuþnae, mekila ke ga e marana Ntewa, a monar meyuþnae wo. Yeririna taþena mþena lala asuþna aþaveve ke kiamimi yuþnaena a asuþna amloge ke ponía, komin naþa asuþna apisu kilale asape mesuþna mepisawal make visena lelaga kiena ne Ntewa lala mesmes ga.

³ Memlologo sanene, pe yaru re tai naþa kilia visave naga pe mloge kilale re lologena wo poli, naþa mesuþna mepisawalia. Ana visae yaru tai visave pe merarava re pan poli, naga pe yar re tai naþa suþna mialin ke yomerarava poli, ana monar ve yar tai naþa suþna mialin ke ga yemalolo, naþa monar sur tai kilawo ke kiena sitomena, sane kulmrae naþa tepisayu rui. ⁴ E lepas kiena ne la naþa pe amlelaga re poli wa, suþe viowa na yomerava nini naga kilawo kiela sitomena rui, naga kila la sane ape kilamara kata, komin naþa naga yepen mavin sape avisu pupia kapi vivaga na lologena wo kiena Kristo. Kristo nene, kiena naurarena tego paþisi, komin naþa naga þarnena marana Ntewa lelaga. ⁵ Mesuþna memlologon ke nene narui, nane Yesu Kristo, kieta Suþe. Pe mesuþna mepisiri plan imimi re sina pan amiu poli, ana mepe kiamiu yar na yuþnaena ga lala vena lologonen Kristo van amiu vena akilia naga.

⁶ A sur make ga la nene naga pe yuþnaena kiena ne Ntewa ga. E nasiiena, Ntewa pisa sanini, sape “Yoko kapi imi tegoli yemalolo naþa mþeke ne,” a suþna kila ke sanene pan ita na wa. Ntewa ke ga nanene narui naþa suþna miyuþnae ke nagane, kila kiena kapi vivaga tegoli losineta lala, kila tetol kapi nene naþa suþna tego molue kome marana Kristo, naþa molue nena e naurarena kiena ne Ntewa naþa sike ea.

⁷ Nakiliaena lala na naurarena kiena ne Ntewa sike e ita sanene, naga pe sur wo tai naþa pe wa paþisi. E imimi naþa memiyuþnaen ke yuþnaena kiena kieta Suþe, mepisu sane imimi na sa ga sur korena ga, a pe metorokin re naþa kiena nawaena la naþa powo nene ase e imimi, ana Ntewa naga po, suþna kokonia ke e kiamimi malena la silaga. A nanene kila sane visae pogos tai meyuþnaen sur wo la þasia, ana yoko mevisu kilale ga sane pupia mþareraena na kilaen sur la nene pe pe mþareraena na yomarava re tai nene poli naþa þar po yo kome imimi, ana naga mþareraena tai nae ma e peni naþa kom ga e Ntewa pitomi.

⁸ Nagane memiyuþnae ke memio mþareraena nene naga miila imimi keviu, komin naþa mepane ke pog mþarera la moki, ana pe memloru re poli wa. Sur la moki naþa akila imimi mesitom þele paþisi, ana kiamimi sitomena la pe kovio re poli. ⁹ Yaru la moki naþa akila kare imimi pano paþisi, ana silaga Ntewa pisuar ruru imimi. Moþar magka lala, ana taþatete awe plan imimi, memal ke na wa. ¹⁰ Lelaga, pogos mþarera pan imimi sanene narui, pano pano naloge viowaena na marena sike e yepemimi sa naþa Yesu þaria e kiena marena. Ana metaþnan ga, komin naþa visae marena kiena Yesu sike e imimi, yoko kiena malena mþena ga sike e imimi. ¹¹ Memiyuþnae kiena Yesu sanene, kila sane pogos naþa memal mesike e yomerava nini, ana silaga mesike ga lavisin marena, ana nanene kila mþena ga sane amiu akilia avisu kilale sane malena kiena Yesu suþna mþalþalivi ke keviu e yepemimi na marena ga lala. ¹² Lelaga naþa mesuþna mepanon ke kiamimi marena, ana mekila sanene vena amiu akilia avano alual kiamiu malena.

¹³ Visena tai sike e Tus na Yauena Wa lala, naþa yaru tai pisi pisape “In na nemlelaga rui, nane kila narui nekilia nevisawal visena,” a mepisu sane ninuna na viawaena naþa sike e yaru nene, nagane keviu mþena ga e imimi. Mesa ke ga naga, naþa imimi mþena ga memlelaga, a sur ya naþa memlelaga e naga, nanene mepisu sane mekilia mevisawalia. ¹⁴ A pe memaraun re nena visawalen poli, komin naþa mekilia ruru sane kieta Ntewa naþa naga kila kieta Suþe Yesu mali sina e marena, yoko naga kila imimi mþena memali sa ke ga Yesu, a yoko naga kila amiu mþena amal sina sane imimi, ana yoko were ita punu ga teva tesike temio naga. ¹⁵ Lelaga, mepa moþarpoyo e pogos mþarera la moki sanene, ana pogaga, komin naga kiamimi mrapa ke ga tai nanene narui naþa mekilia miila amiunia. Sanene sinemimin ga lemamiena kiena ne Ntewa monar momolue silaga va yar kar ga

lala e yo punu ga, vena kila sane ayeluar Ntewa silaga, asuñña avisa potena vania vano vano-o vena kila kiena naurarena imi lapa ve keviu.

¹⁶ Sitomena wo la nene kila sane pe sur korena ga naña viowa van imimi ve sanape, ana mesuññalu moñarera ruru mesuñña ga. E lepas na yepemimi lala, pimi pe yermarua, suñña pimi pororovia, ana e lepas na ninumimi lala, Ntewa suñña kila pimi pe urviu, ñmarera ruru lue ga e legiena make ga. ¹⁷ Narin pog ñmarera lala e yomarava nini, la ape na yam plas ga, ana asuñña akila ita tesururuia vena teva toñmalivi tese e naurarena nae peni, naña keviu pañisi, po pano-o po manene laa, naña teloge ke wonia vano vano ve uro re. ¹⁸ Nagane ve kieta sitomena la ve su re e sur la naña kilamarata visuia, ana kieta sitomena la sike e sur la naña kilamarata pisu ñele ga, komin naña sur la naña kilamarata kilia visuia, la ape na yam plas ga e yomarava nini, ana sur la naña kilamarata pisu ñele ga, la ape na sulueena ma e peni.

5

Leleta ma e peni

¹ Tekilia rui tesape tasneta na yomarava nini tañatete sulue. Naga sane narin silparpara tai naña tesuñña, naña yoko pogos tai monar ñawowo make ga, pona yar tañena lala aimi aweplania. Ana tekilia ñena tesape pupia ñmata yuñña ñmarera tai ñeke ga wa, naña pe amiyuññaen re e yomarava nini poli, ana Ntewa ga kila ruru monñmate ita ke ma e peni ana siraunia tekilia teva tesu ea. ² Yomarava nini naga sa ga lele na tagiena ga, a tekekan ga naña tourmatania, sinetan teva tetapolou e ñmata yuñña ma metava, ³ a pogos naña teva tesike ea, yoko ve teloge re si sane pe ñmata uñña re poli, ana tevisu ga na wa sane kieta yo nena napo nane suñña ne.

⁴ Lelaga, tasneta naga sa ga silparpara tai naña tesuñña e yomarava nini, ana lelaga naña, pogos naña tesike e sanene tesuñña takar malueta silaga komin naloge viowaena lala na pog ñmarera la naña tesuñña toñarwowo ke yo ea. Pona pe pon re aimin awe kare tasneta poli, ana sitomena tai monar suñña ga e ita sane visae akila, pogaga, komin naña popon sane toure matan silparpara nini, teva tese yuñña wo tai sumo wa. Monar tevisu kilale ruruia sane popon sa tas nen marena nene ñisi, ana yoko tas viu tai kilia imi kus lelana. ⁵ Nakonua rui, Ntewa suñña miyuñña ke e ita vena kila ruru ita teva e kiena yo sanene narui. Naga mligan Ninuna sike e ita vena kila ita tesitoñal silaga sane kiena visaarena na kilaen van ita sanene yoko imi ve lelaga.

⁶ Tesuñña tesitoñal ke nanene, kila sane silaga toñarera. Tekilia tesape nagane, tesuñña tekila ke ñmata uñña e silparpara nene, naña tasneta, ana pe tesu re e ñmata uñña wo temio Suñe ma metava poli wa. ⁷ Sanene, pogos naña tesike e yomarava nini wa, monar ve tekilali re naña tesuññalu e ya naña kilamarata ga kilia visuia, ana monar tesuññalu ñmarera e naviawaena. ⁸ A e lepas na pun imimi, moñarera ruru ke ga wa vena suen e yomarava nini vena mesuñña mekila kiena yuññaena, ana mepisu sane po ñena ga visae mekilia meligan tasnemimi la na yomerava nini, meva mesu nena e ñmamimi uñña memio Suñe. ⁹ Sanene, visae tesike e yomarava nini, pona tesike ma metava, ana silaga monar tekilali ya naña yoko naga kekarania. ¹⁰ Monar tesitom sane pogos naña Kristo pa totano metava e kiena yo wa na liñereena, yoko ita make ga veve taaga teva tesuññalu tese marana. Ana e pogos nene, yoko naga ga kila sane wo van ita, pona viowa van ita, taveve ga ya naña tesuñña tekila e pogos naña tesike e tasneta e yomarava nini.

Kristo kila ruru marata temio Ntewa

¹¹ Pogos naña mesitoñal naña yoko Kristo liñere yaru lala, memarau, a mepisu sane popon meyuñña ñmarera vena metaulu yar lala vena ve akovio re. Ntewa pisu kilale ruru ñelaga na kiamimi yuññaena la nene, a nesitom sane amiu ñena apisu kilale sane memiyuñña sa ga naña naga kekarania. ¹² Nesuñña nepisa ke sur la nene, pe nekila re poli komin naña sineun vena amiu avisirlua imimi sina, ana popon vena akilia akekara

e ya naþa mesuþma mepisa. Visae atol ruru kiamimi visena lala, yoko kila sane visena la nene kilia se amiu, ana yoko akilia avisataþne la naþa asitom ke asape apo rui. Ana la nene akila la ke apa metava komin ga ya ne akila ke e maran yaru lala, ana pe asitom re ya naþa sike loyuþma e kiela malena poli.

¹³ Nekilia nesape pogos naþa nepisa visena la nene, yoko la þas naþa asike amio amiu monar avisave nepe wowe, ana na nene na poga ga. Visae lelaga naþa mepe wowe, mepe wowe komin naþa mekila manene laa yuþmaena kiena ne Ntewa, ana visae þarimimi la woga ga suþma ga, þarimimi la po komin naþa mesitoþmal amiu, ana monar ayagogon imimi. ¹⁴ Sur taaga ga naþa suþma kawe ruru ke kiamimi malena vena mekila ruru yuþmaena wo la kiena Kristo, nane kiena sinesiena. Memlelaga mþarera mesape kiena marena naga taaga tamalia kieta malena ita make ga, visae peraga, yoko ita punu ga monar temare ga, yoko taþatete ita yaru tai kilia mali. ¹⁵ A naga mare wo ita punu ga sanene, naga sinenan sape ita la naþa temlelaga ea pona temal ke e yomerava nini wa, ve teyuþmae kieta re ga, ana teyuþmae kiena, naþa naga mare vena tamalia kieta malena, siraunia Ntewa pisirlua si naga.

¹⁶ Sanene, popon ve tevisuveve re si yaru lala taveve sitomena na yomarava nini. Nanua, pog naþa Kristo sike e yomarava nini, yaru la apisuvevea taveve sitomena na yomerava nini, ana nagane pe tepisu re si naga sanene poli, a pe pon re tevisuveve yaru taþena lala taveve mþena sitomena na yomerava nini poli. ¹⁷ Na nene na komin naþa visae yaru a naþa mlelaga e Kristo, naga pimi sane pe yaru viu ruru nena ga. Kiena malena marua na sumo kovio nena ga, ana nagane kiena malena viu pimi mþalivi rui. ¹⁸ Ntewa ga kila sane tekilia tevilopu kieta malena sanene, komin naþa naga ke narui mligan Kristo pitomi e yomerava ve na kilaen kieta mrapa towasuþe si teimi puna, a sinenan sape monar toure yar taþena lala la mþena ga awasuþe si aimi puna. ¹⁹ Visae ve sanene, Ntewa miyuþmae þarpoyo e Kristo vena wereen yar na yomerava lala awasuþe sina vena aim ave taaga sina amio, naþa naga pe sitom re si sape la nakoena van la vanon kiela mlamulena viowa la poli. A amio mþena nene, naga sinenan sape ligan kiena visena lala e limata, vena tela va va yar taþena lala vena la mþena ga awasuþe si aim puna. ²⁰ Sur ne nanene narui kila sane mepim mepe yaru kiena ne Kristo vena waren visena kiena ne Ntewa vano. Sanene, pogos naþa mepisawal visena pan amiu, sa ga naþa Ntewa ga suþma pis, ana sinemimin paþisi mesape meviun manenea van amiu punu ga mesape awis, e kia kiena ne Kristo, monar awasuþe amiu aim puna Ntewa. ²¹ Naga ke narui sinena miye ita, ana mligan narina nene Kristo, naþa naga pe kilali re mlamulena viowa poli, kila naga pimi sane yaru na waren kieta mlamulena viowa ita make ga. Ntewa kila sanene vania vena kila sane ita yar na kilaen mlamulena viowa, tekilia teim teve yaru mesmesu lala e marana ne Ntewa.

6

Malena mþarera kiena yaru na yuþmaena kiena ne Ntewa

¹ Mesuþma memiyuþmae ke sane yar lala na yuþmaena lele taaga memio Ntewa, a mekilia sanape naþa naga pe lemam paþisi pan ita make ga. Sanene, mesape meviun manene van amiu, sane kiena lemamiena wo naþa pimi e amiu, pe pon re imi korena ga poli. Monar alavia, a monar ataþmania kila kiena yuþmaena e kiamiu malena. ² Visena tai teke e Tus Marua pisa sanene rui, naþa Ntewa sape,
*“Mesmesun pogos naþa po pan amiu, neyagogon kiamiu tagena,
 a mesmesun legiena natamaliaena, neim neiila amiu.”*

Ais 49:8

Ana e kiamimi navisuena, mekilia mevisawal mevisave nagane narui pe kiamiu pog mesmes narui, nagane narui pe legiena na natamalia amiuena.

³ E lepas na kiamimi yuþmaena, mesuþma moþpiketon naþa mekila wo lue ga, vena ve mekilawo re mrapan yaru kar ga naþa sinenan sape imi. Pe sinemimin re naþa yar laþasa asape mekila sur tai piowa, pona mekila pal yuþmaena koyo tai. ⁴ Mesuþma mekila ke sur make ga vena kilologia sane mekila ke yuþmaena mesmesu sane yar wo lala na yuþmaena

kiena ne Ntewa, ana mesuñña metaññan imimi vena mevane sur ve moki. Mesuñña makawean imimi vena meva mowarpoyon luas nen yuññaena lala, pe suri korena naña mepane sur viowa lala, pog ñarera lala, a sur nailanen viowa lala.

⁵ Asuññalu akawe imimi, a añe imimi, a akoven imimi e yuñña nakoena. Pogos moki, memiyuññae na memiyuññae, pe momomalio ruru re poli, a kamimi kinanena pe po re poli.

⁶ Piowa manene laa pan imimi sanene, ana mesuñña ga memiyuññae mesmes ga, a mesuñña memiyuññae memio kiliaena, a sitomena viavi, a sinewoena. Yeririna la apisu naña kiamimi malena pulen Ninuna Wa, a kiamimi ñelaga pulen sinesiena naña lelaga, ⁷ naña mepisawal visena la naña pe apisokan re poli, naña memiyuññae e ñareraena kiena ne Ntewa, a naña e limamimi lala, e lepas na ñamarua a e lepas na ñañeli, mopuarar sur na mara lala vena kilaen mesmesuena taulu naviowaena. ⁸ Yeririna la ñasa apisir plan imimi, a lañasa amligan imimi mesike laa tano, lañasa apisa ruru imimi, lañasa apisa kare imimi pañisi, ana pe mesitom re poli, mekila ga. Pe mepisa kotalia re yar tai poli, ana asuñña apisu imimi sane pe mepe lelaga re nenaga. ⁹ Akilia ruru imimi ñisi rui, ana asuñña akila ke sa naña pe sinelan re akilia imimi poli. Memal ruru mesuñña ga, ana asuñña sinelan asape visae memare ga rui.

Nane suñña pa sanene pan imimi narui, ana pe sur korena naña moñar ke nakoena lala, la tañatete akilalua kiamimi malena na wa. ¹⁰ Pe sur korena ga naña naloge viowaena la moki pañisi, ana sinemimi la kekara silaga. Pe sur korena naña limamimi korena ga silaga, ana mesuñña mekila ke yar tañena la añar ke sur moki. Ana pe sur korena naña pe kiamimi sur re la poli, ana mepisu naña sur make ga pe kiamimi ga.

¹¹ Erau nae Koren lala, pe kiamimi sitomen viowa re tai e amiu poli, naña mekilawania pan amiu suñña ga. Mepisawal sur make ga pan amiu rui, a sinemimi sii amiu pañisi. ¹² Pe mekila re suri tai naña pona kilawo kieta erau wo poli, ana visae kilawo e lele tai, nanene komin naña amiu ga apuarar sitomena viowa lañasa e imimi suñña ga. ¹³ Ana visae ve sanene, monar nevis van amiu sa ga naruu la narui, nesape awis, ve akilawan re si kiamiu sitomena lañasia, ana monar akilali losinemiu vike van imimi.

Avisuar ruru e la naña pe amlelaga re poli

¹⁴ Sineun nevisa van amiu nesape ve asuñña akilali re naña aimi ave taaga amio la naña pe amlelaga re poli. Popon asitoññalia sane ñelaga na mesmesu amio ñelaga na mlamulena viowa, lalua tañatete aviran la aim lele taaga, a legiena pe erau ñele ga amio yemalolo. ¹⁵ Kristo kiena sitomena ve taaga ñele ga amio Yermare, a yaru naña mlelaga pe kiena sur re tai poli teke amio yaru naña pe mlelaga re poli. ¹⁶ Nono na visokanen lala asu ñele loyuñña e yuñña wa ñana Ntewa pogos tai, a visena nene kana kinasa komin yuñña wa ñana Ntewa, naga pe yuñña re ga tai poli, ana ita li na lelagaena kiena ne Ntewa naña mali. Naga nene taveve ga kiena visena lañasa, naña pisa sanini, sape
“Inu yoko nesike e la, yoko neyaloro likan la.

Inu yoko neve kiela Ntewa, yoko aimi ave kiau lus nena lala.

Lev 26:12

¹⁷ *Ve sanene, sane kiela Suñe, nepisa pan kiau la nene nesape monar amolue vetan tañena lala, monar aviaña vetan yar viowa lala.*

Monar aim ave wa nenaga, a monar ve atol re kororaki lala, sanene yoko nekilia noworworun la aim asike amio inu.

¹⁸ *Yoko inu, sane Ntewa na mava, nekilia nevisa van la nevisave
‘Amiu aim vena neve Arimamiu, a vena amiu ave naruu nena lala.’”*

7

¹ Erau lala, nanene navisaarena wo lala kiena ne Ntewa naña pisape yoko naga were ita sane kiena namratava lala. Naga kila sanene pan ita po pañisi, ana popon monar tewatanon naga silaga, naña monar towe plan make kororaki e kieta malena lala.

Mlamulena viowa laþasa tekila e tasneta, a laþasa tekila ga loyuþna e losineta, ana monar toþisin la make ga, monar tevim naþa teve wa naþa teve wa sa naþa naga sinenania.

Pol kekaran paþisi naþa Ntewa miyuþnae e la

² Sineun nesape neviun si tan amiu nesape ve sinemiu kar imimi re, ana aligan ruru lelemimi tai e sinemiu lala, vena nekilia nevisa re si sur laþasa van amiu sumo wa. Popon akila sanene, komin naþa pe amiu re tai poli naþa mekila piowa pania, pona mekila karea, pona mekila kotalia e sur laþasa. ³ Ana pogos naþa nepisa visena la nene, pona asitom ke asape nesitom ke piowa e amiu, pona nesape nevisa kare amiu, ana pe sa re nena nene poli þisa. Peraga, sa ga naþa nepisa rui, nesape amiu na asike e losinemimi rui, a tesuþna tepim tepe taaga pano pano tol naþa sanena naþa tesike ga e malena taaga, pona visae ita tai vane marena, yoko teloge sane ita make ga temare. ⁴ Lelaga nekilia nevisa sanini nevisave in na noþasine amiu keviu na keviu, noþarwar inun amiu pa þisi, a pogos naþa nesitoþnal kiamiu yuþnaena wo lala, suþna miila ke kiau sitomena keviu pa þisi. Lelaga naþa nepane sur viowa moki, ana asuþna akila pan inu naþa nalogewoena a kekarena suþna pule manene paþisi e losineu.

⁵ Nepisa sanini komin sanene narui nanua sumo ne, pogos naþa mepa moþalivi e lepas naþa Masitonia. E yo nene, moþar ke si veveyuena mþarera lala, kila sa naþa memarau towe mþaga, a tasnemimi pe pulmas re tai naþa va ruru e poli. ⁶ Ana kieta Ntewa naga pe Ntewa na kila luþeluþeen sitomena kiena yaru lala naþa amloge piowa, ana naga sitoþnal imimi, kila kiamimi erau wo naþa Taetas pimi mþalivin imimi, a pogos naþa mepisu si naga memloge po paþisi. ⁷ A pogos naþa sun pa imimi, naga pisawal sur wo la naþa amiu akila, miilaar imimi keviu paþisi. Naga pisayu sanape naþa naga mþena ga, pogos naþa naga pimi mþalivi pun amiu, naga mþal sur mok liu e amiu naþa miila naga, a pisawal sape akila mara wo e kiamiu visena la nanua ne, naþa nagane apilopu kiamiu sitomena, asuþnalu asike e kiau lepasa. Pisawal sape sinemiun manene laa paþisi naþa neiþnasu neyaliali amiu, a suwala, pogos naþa nemloge nene nemloge po na nemloge po!

⁸ Pogos naþa nesiri mþaki taþena nene pimi pan amiu, nemligan pae pano ana pe piavi re poli nesitomiyu sina, nesape visae ve neligan re ga rui. Nanene komin naþa nekilia nesape kiau visena mþarera lala yoko monar kila amiu aloge viowagan towe mþaga. A poglis naþa memloge navisawalena kiena Taetas, nepisu sane lelaga ga na wa, kiau mþaki kila kare kiamiu sitomena þisa. Ana nanene na yam plas ga, siraunia avilopu amiu sina, ana kila sane nekekarana sina naþa nemligan mþaki nene piþnasu. ⁹ Sane pe nepisa re nesape nekekarana naþa mþaki nene kila amiu amloge piowa poli, ana nekekarana ga naþa naloge viowaena nene kila apilon amiu. A kiamiu naloge viowaena nena, pe imimi re naþa mekila pimi mþalivin amiu poli, ana Ntewa narui naga kila pimi mþalivi. ¹⁰ Sanene, naloge viowaena nene naga naloge viowaena wo tai naþa pitomi ma e peni, naþa kila yaru vilonia vena tol natamaliaena. Ana naloge viowaena taþena, naga naloge viowaena na yomerava nini, naþa naloge viowaena viowa tai naþa yoko kila yaru loge viowagan mþa vano vano va tol marena. ¹¹ Amiu mþena akilia avisu kilale sane naloge viowaena naþa Ntewa taþnan pimi pan amiu, naga kila yuþnaena wo tai paþisi. Kila sane asitom urmi manenea e kiamiu malena, a mþareran ke paþisi vena kiamiu kia imi wo sina. Sumo na, sinemiu mimin naþa apisayu napiowaena naþa sike likan amiu, ana pogos naþa nepis pan amiu vanonia, apisu kilale ga mrapa na wa, ana amarau. Amiu ga asuþnalu apisi ke sina ga pan amiu, a amla nakoena pan la naþa akila piowa, vena ve naviowaena tai su re si pun amiu.

¹² Sineun nesape nevisa mþaki nasumo, nemligania komin naþa nepisape nevis va lalua nene naþa akila piowa, a sineu miye mþena yermarua nene naþa lalua akila kare manene laa naga. Nemligan mþena ga komin naþa sineun nesape monar avisu kilale sane lelaga, sinemiu si imimi, ana pogos naþa mevis van amiu e kia kiena ne Ntewa, amiu akekarana naþa avatanon ya naþa mevisa. ¹³ Ana poglis naþa Taetas pimi pisawal pan imimi sape amiu akila sanene rui, kilalua kiamimi sitomena pa metava paþisi.

Mekekaran manene laa nene rui, ana pogos naŕa Taetas pisayu sina pan imimi, pisayu sa naŕa amiu akila manene po pania, mekekaran pa laa sane. Naga pisa ke naŕa sike amio amiu, amiila naga a apisirlua kiena sitomena, a akila si naga kekara pa ŕisi. ¹⁴ Nepisayu amiu pania nanua sumo rui, nesape nekekaran kiamiu ŕelaga wo la pa ŕisi, ana pogos naŕa piŕasu ŕmalivin amiu, ana pisu ga na wa sane pe nepisokan re poli, nepisa ga lelaga. Sa ke ga nanua sumo, nepisa ke ga sur lelaga la pan amiu silaga, ana nagane, akila kiau visena naŕa pa Taetas e kiamiu lepasa pimi pe lelaga ruru ŕmena ga. ¹⁵ Naga taŕatete sinen ŕesan pogos naŕa piŕasu, amiu amarau paŕisi a sinemiu kurkur, ana poglis naŕa pis pan amiu, amlogearia, apatanon ruru nena kiena visena. Kiamiu ŕelaga wo na sanene, kila sane pogos naga ŕasuŕe sina, sitoŕmal amiu lue ga silaga. ¹⁶ A e kiau lepasa, nepisa ga nesape nekekara naŕa nekekara, a nagane nepisu sane nekilia nowasine ruru amiu e sur make ga e pogos make ga.

8

Popon ala nalaena

¹ Erau nae Koren lala, sinemimin mesape amiu aloge lologena na sur wo tai naŕa suŕna ŕarwowo ke yo e suŕmare lala na pupia lepas naŕa ŕasitonia, naŕa Ntewa miyuŕnaen ke e kiena lemamiena. ² E yo nene, apa aŕarpo yo e pog ŕmarera lala naŕa sur moki liu kilali kare la, a pano tol naŕa pe kiela sur re si poli, ana la nene, pe aŕis re nena e kekarena ga e ya naŕa la apisuia. Limala korena ga, ana memilan paŕisi sane pogos naŕa amloge asape nalelagaena taŕena la gar Yerusalem apane ŕmena pog ŕmarera, sinela miye la ana sane limala pimi pule ruruia amio sur lala vena laen vano sane kiela nalaena van li taŕena la nene. ³ Pe yar re tai poli naŕa pisape monar akila ve sanene, ana la ga asape akila, a nekilia ruru sane amla sur make ga naŕa akilia alavia, vano tol naŕa laŕasa amlavia taulu ya naŕa akilia alavia. ⁴ A pogos naŕa aŕar viraran punu pae rui, amligan e limamimi, aŕareran asape melual mrapa tai vena liganen nalaena nini vano, komin naŕa asape visae akilia alual si pulmas naiilaena na lelagaena wa taŕena la sanene, yoko ve sur wo manene laa tai van la, naŕa yoko akekaran vaŕisi. ⁵ La apo paŕisi, komin nanua sumo ataŕnan make kiela malena sane kiela nalaena tai pa Suŕe, a amligan la asike vatanon kiamimi visena, ana siraunia amla ya naŕa la kiela sane nalaena tai pimi pan li na lelagaena taŕena lala. Akila po taulu manene ya naŕa mesitom mesape yoko akila, ana lelaga, akila mesmesun ga e nasinenanena kiena ne Ntewa.

⁶ Ana pogos naŕa mepisu le ŕasitonia taŕena lala akila sanene, mesitom mesape popon meligan si Taetas iŕnas pun amiu, vena iilar amiu vena akila ŕmena ve sa nene. Mekilia mesape pogos naŕa naga piŕasu sumo, naga suŕna pis pan amiu ana amiu asiar kilaen yuŕnaena wo na sinewo nene rui, ana popon naga imi kila make ruru nena ga amio amiu. ⁷ Mepisu naŕa yuŕnaena taŕena lala, asuŕna akila ke po rui, naŕa kiamiu viawaena keviu paŕisi, apisawal ke visena lelaga po paŕisi, akilia sur moki rui, asuŕna yepemiu ŕnaen ruru yuŕnaena, a asuŕna sinemiu sii imimi li nalelagaena taŕena lala keviu paŕisi. Akila yuŕnaena la nene pano taulu ya naŕa mesitom mesape atorokin akila, ana popon akila ŕmena ve sa ke ga e lepas na yuŕnaena nakianen nalaena nene.

⁸ Nepisa sanene, ana visena nene naga pe sa re navisaluaena tai naŕa yoko monar atavevea. Sur nene sike ga e amiu, ana nesitom nesape popon sa nevisayu taŕena laŕasa ve sanene, nepisawal sur wo la naŕa akila ke rui. A pogos naŕa yoko aloge, yoko kila amiu avisuveve amiu towe li laa ŕnaga sane, sane kiamiu sinesiena keviu ŕnaga yo, maran taaga sa ke kiena la nene pona peraga? ⁹ A popon tesitoŕmal lemamiena kiena kieta Suŕe Yesu Kristo ve keviu silaga, naŕa sumo, naga sa naŕa kiena sur make ga, ana naga sitom ita e yomarava, naga pitomi sa naŕa pe kiena sur re tai poli, vena kila sane tekilia teim teve yar na sur moki.

¹⁰ Pogaga, nanene kiau sitomena tai nene e lepas nene. Nepisa ga nesape nepisu sane sur nene sinemiun asape akila e kas nanua rui, a nane asiar asape akila ne, ana popon

manene laa naþa asuñalun sina vena akila make ruruia. ¹¹ Kiamiu sitomena nakilaen sanene naga ñarera ruruia nanua þa rui, a nagane popon añareran ruru nakilaena, a vena akila va aña pe naþa atorokin akila. ¹² Ntewa pe pisa re pisape monar tela nalaena taulu ya naþa teke e limata vena tekiania, ana naga sinenan ga sape tekekan iilaen yaru taþena, a tela nalaena torokin ya naþa tekilia telavia.

¹³ Ana poglis naþa nepiun tan amiu vena akekan iilaena sanene, pe nesitom re nesape nekila sane yoko yuñena urmi van amiu poli, ana imi melala ga van li taþena lala. ¹⁴ Nesuñna nesitom ke ga sane popon ita make ga teve maran taaga ga. E pogos nene, kiamiu sur mok liu, ana lala na peraga, pe kiela re poli, ana popon kiamiu sur komþasia vano ve kiela, vena kiela sur ña tai ve tokak ga. A pona yam laþasa visae kiamiu sur re e kas laþasa naþa pimi ke ne, kiela sur komþasa kilia imi kila sane kiamiu narin sur ña tai. Pogos naþa tesuñna teila ita ke sanene na po, kila sane ita make ga tesuñna marana taaga, ¹⁵ a yoko ve sa visena na Tus Marua tai, naþa pisa sanini, sape

“Yar naþa war kinanena ve moki vim,

yoko naga kan vano kan make nena ga, ana siraunia visu sane pe kana re si tai poli,

a naga naþa pa þar kinanena vitokaki ga, naþa pisa sane torok ga, yoko naga ve ve plasan re sur tai.”

Nau 16:18

Yoko Taetas wasuþe si va gar Koren

¹⁶ Nakonua rui pimi, nesuñna nesitom amiu paþisi, a nagane, nepisa potena paþisi pa Ntewa naþa naga kila pa Taetas sape sitomena ñarera tai sike e naga rui, sane naga monar iñasu iila amiu. ¹⁷ Ana pogos naþa mepisayu mesape iñasu ñalivin amiu, naga kekan ga, komin naþa kiena sitomena tai sanene sike pa e naga rui. ¹⁸ A pe naga re ga taaga poli, ana yoko meligan imimi yar taþena tai iñasu amio naga, naþa naga kieta puruvi tai naþa suñare la na yo moki akilia ruru naga, komin naþa naga yar wo nalologonen Lologena Wo. ¹⁹ Suñare make ga la akekan kiena yuñena, ana amligan lua naga vena suñna yaloro amio imimi metelivi e kieta lepasa, pogos naþa mesuñna mekilapolo ke kilavaru na iilaen li nalelagaena lala gar Yerusalem. Mekila yuñena nene komin naþa sinemimi sii la paþisi, a pogos naþa atol nalaena nene yoko ailan ruru vaþisi e þelaga naiila laena naþa tekila pan la, yoko avisirlua kia kiena Suþe va metava. ²⁰ A mekekan paþisi naþa kieta puruvi taþena nene taveve imimi, komin naga kilia iila imimi vena visuar ruruen pupia kilavaru nene naþa asuñna akoan poloia. Sinemimin mesape mevisuaria taveve ga kana mrapa wo ne lala, pe sinemimin re si meloge visena laþasa imi sirau poli. ²¹ Sinemimin mesape mekilala yuñena nene sa naþa yoko mesmesu e navisuen kiena Suþe, a yoko mesmesu ñena e visuen kiena yar taþena lala.

²² Ana amio lalua Taetas nene, yoko meligan puruvi taþena iñasu visu amiu. Naga ñena ga pe yaru tai naþa memligan sur moki sike e limana rui, a mekilali ña naga sanene pano mepisu naþa naga yepen ñaen make sur la nene. Naga pe yaru wo tai na yuñena, a pogos naþa nepisayu kiamiu þelaga wo la pania, naga þasine amiu paþisi sape visae imi yuñae re amio amiu vera wo vaþisi. ²³ Sanene, e lepas puna kiau erau wo nene Taetas, monar avisu naga sane imimi ke lua narui naþa memiyuñae veraga vena iila amiuna, a e lepas na kieta puruvi taþena lua nene naþa yoko aimi amio naga, monar avisu la sane aim pun amiu e kia kiena suñare taþena lala na lepas nene, a aimi e kia kiena Kristo naþa kiela malena suñna kipian ke kiena þelaga wo lala. ²⁴ Ana sineun nesape nevisa van amiu sane pogos naþa la nene aim añalivin amiu, kiamiu malena lala monar kipian ñena kiamiu þelaga wo lala. Nesuñna nemlologon amiu ke pan la rui, ana popon manene sane la avisu kilale ruru ga na wa e kilamarala sa naþa nepisa ga sur na lelaga, nesape kiamiu sinesiena keviu manene paþisi, a akilia ala navisawalena wo tai naþa visayu amiu va va suñare taþena lala.

¹ In na nesiri plan visena moki rui e lepas na laena na kilavaru naþa toþar viravirania vena iilaen li na lelagaena taþena lala nene kiena ne Ntewa, ana nesitom ke nesape asuþna asitoþmal ke sur la nene na wa. ² In na nekilia ruru sane amiu akekaran naþa asikol e yuþnaena nawar viraviranan kilavaru nalaena nene, komin naþa e kas nanua þaro pano, asuþna akila ruru ke naþa ataulu kana narin kilavaru rui. A poglis naþa nepa e lepas nene Masitonia nepisayu amiu pan la, nepisape amiu le Akaea lala asiar rui, a pogos naþa la amloge miyur la towe mþaga, kila sane miilaar kiela sitomena pa metava vena monar aþmareran laa sane vena kilaen kiela komþasia. ³ Nepisayu amiu ke pan yaru taþena lala rui, sane amiu na amiyuþmae po sanene sanene, ana sa ve akila re na piowa ga! Naga ke nanene narui kila sineun neligan kieta puruvi telu nene aiþnasu avisuveve ruru amiu lia, komin naþa nepisa pan la nesape monar awar viraviran kilavaru la nene rui, ana la akilia aiþnasu alual sane sanene pona pere wa. ⁴ Visae pere wa, monar amiu akila vilaga, komin naþa lavis ke inu mþena neiþnasu narui, a yoko neiþnasu nemio le Masitonia laþasa, naþa nepisayu amiu pan la rui. Ana visae meiþnasu melual naþa pe akila ruru re poli wa, yoko kieta kap mare, pupia mawaena van inu, a van amiu mþena ga, a yoko monar la avisave nepisa koskosin manene nayeluaren kiamiu kia pan la. ⁵ Nane kila narui nepisu sane monar nevisa van Taetas lala aiþnasu sumon inu, ana ayuþmae amio amiu vena war viraviranan kilavaru la naþa amiu apisaar asape awaria, awarpolo ruru suþna ga, ana yoko meiþnasun mowaria mowar vano. Nepisa sanene, ana ve asitom re sane nesuþna noþmareran amiun ke nesape monar awar nalaena nene. Waren nalaena na sanene, naga sur tai naþa ape sinewo, ana kiamiu sitomena ga kekaran nakilaena.

Navisa ruruena na þelaga nalaen suria

⁶ Ana visena tai ne nekilia nevisa manene van amiu sanini, yaru naþa mapila ve tokaki, yoko naga war ve tokaki, ana yaru naþa mapila ve moki, yoko naga war ve moki. ⁷ E lepas na kianen nalaena van yar taþena, ita make ga veve taaga monar tela ga ya naþa kieta sitomena pisaar sape tekila, ana pe pon re olavia naþa pe okekaran re laen poli, pona olavia komin naþa yaru taþena mþareran sape monar olavia. Ntewa pe sinenan re nene poli, ana naga kekaran manene yaru naþa mla suria molue kome kiena sinewo a e ga e kiena sitomena naga taaga. ⁸ Ana visae ko tai naþa osuþna omla ke nalaena pano, ve ositom manene re, komin naþa Ntewa kilia lamaran si nalaena wo la imi van ko, ve moki na ve moki. Naga kilia kila naþa silaga owar toroki e sur make ga naþa sinoþmania, a metavanja owar torokin naþa owar sina ve na iilaen yuþnaena wo taþena lala. ⁹ Nanene sane visena tai na Tus na Yauena Wa lala naþa pisayu sinewo kiena ne Ntewa, sape
*“Naga suþna kiakian lua ke nalaena wo lala pa yar la naþa limala korena,
 kiena þelaga wo lala sulue na sike ne.”*

Yauena 112:9

¹⁰ A Ntewa, naga ke narui mla mrasa pan ita vena temapila e porotano, a naga ke narui naþa kila kurusa þar mrasa nakilaena kata kinanena ea, a ve sanene, yoko naga la ya naþa sinetania vena kilaen yuþnaena ea, a yoko kila kieta sur la imi ve moki, a yoko kila naþa kieta yuþnaena mesmesu lala awar mrasnela ve moki. ¹¹ Yoko naga visu kilale kiamiu þelaga wo nene, naþa silaga akekaran kianen suria, ana yoko naga lamaran sina ve moki vim van amiu, a pogos naþa mowar kiamiu nalaena va taþena la nene, yoko kila naþa ita punu ga tevisa pupia potena tai va Ntewa komin navisa ruruena nowo naþa naga suþna kian ke pan ita. ¹² Nalaena nene naþa yoko ala vano, yoko iila li nalelagaena wa taþena la ve keviu naþa asuþna apane ke pogos mþarera, a yoko kila ayeluar mþena Ntewa ve keviu vaþisi, avisa manene potena vania vaþisi.

¹³ Yoko ayeluar Ntewa sanene komin naþa yoko avisu naþa pe asuþna amlologon re ga lologena wo kiena Kristo poli, ana asuþna amlogear mþena ya naþa pisa, a yoko avisu nalaena naþa amlavia keviu paþisi, naþa yoko kilia iilala ve keviu a iila li taþena mþena lala. Ana pogos naþa apisu sur la nene, yoko avisu kilale mþena sane kiamiu yuþnaena suþna kipian ke sane kiamiu viawaena mþarera ruruia a pe lelaga na sike ne. ¹⁴ Yoko avisu

naþa lemamienna kiena ne Ntewa pule manene sanene e losinemiu, a yoko asitom amiu vano vano þisa, yoko sinela ye amiu, yoko asuþna alen wo amiu silaga.

¹⁵ Popon avisa potena van amiu komin kiamiu nalaena wo na sanene, ana po mþena ga vena ita punu ga tevisa manene potena van Ntewa silaga komin nalaena tanea naþa naga mla pan ita, naþa narina ne nane Yesu Kristo.

10

Pol mla navisatarþeena pa la naþa apisa kare kiena yuþnaena

¹ Erau lala, akilia sane in ga Pol nesuþna nesiri piþnasu, ana sineun nesape ala kiau visena e þelaga mþa nena naþa sike e Kristo, naþa naga moþmau po a malumu po. Naga ke nene narui þelaga naþa nesuþna noþikeyon kilaena pan amiu nanua sumo, ana nekilia mþa sane yaru laþasa asuþna apisa kare in ke vanonia. Asuþna apisa ke asape pogos naþa nesike nemio amiu, in na nemalumu manene laa, a nemaraun visena, ana asape pogos naþa nesiri piþnasu, nekila ga sane in na yaru tai naþa nekilia nevis mþarera, komin ga naþa nesike perinan amiu. ² Na nene na pogaga, ana monar akilia sane pogos naþa neim noþmalivin amiu, visae nevisu sane popon nevis mþarera, nekilia nekila ga narui. Ana sur ne nanene narui nesape nevisa van amiu, a nepisa awis pan amiu, neviun manene van amiu vena akilali napiowaena la nene vim wo towe laa ga wa, pogos naþa pe nepim noþmalivi re pun amiu poli wa. Visae ve sanene, pogos naþa neiþnasu, yoko ve sur re si tai naþa monar nevis mþarera ea, ana visae peraga, in na pe nemaraun re nena nakuanen visena laþasa naþa mþarera na mþarera van la naþa asike loyuþna e napiowaena la nene poli, a naþa apisa kare imimi ke ne, apisape memiyuþnae taveve ke ga sitomena na yomarava.

³ Lelaga, ita make ga tesike e yomarava nini, ana imimi pe metaveve re kiena þelaga poli. A lelaga, mesuþna mekila ke mara tai e yomarava, ana mara nena na pe nae re e yo nini poli. ⁴ Mesuþna mesikol ke mara tai naþa mþareraena lala nae ma e peni asuþna akila ke pan mþareraena lala na yo naloge viowaena, a suri na mara la naþa mesuþna moþaria, pe ape na yomarava re nini poli, ana mekila ke mara moþar ke mþareraena kiena Ninuna Wa naþa kilia yumu plan make yo mþarera la naþa sur viowa la asuþna atapolou ke ea. ⁵ Visae avisa visena viowa laþas na kaween yuþnaena kiena Suþe, ana mekilia metaulu woga. A visae avilaven, akilali naþa avisaluþar kiena yuþnaena, ana mekilia meva mowarpoyo vena kilaen yar la akilia naga e kiela malena. Visae asuþmalu amio sitomena viowa lala, ana mekilia mevilon yar la nene aimi naþa kiela sitomena imi mþarera vena ataveve ga Kristo. ⁶ Yoko mekilia mekila ve sanene van amiu vano vano ataþnan amiu, vena aligan amiu asu vatanon visena kiena Suþe, a siraunia, yoko mekila mþa vano va e yo taþena la naþa yaru na kaween naga asike mþena ea.

⁷ Ana e lepas na yaru nene naþa pe purþes nen napiowaena nene, pona amiu asuþna apisa ke asape sur punu ga pogaga komin naþa yaru nene pisape naga pe yeririna tai kiena Yesu yo? Ana awis, ve avisu re ga kulyepena, aþionli avisuveve sur lelaga naþa sike pae e maramiu rui. Naga pisape pe yeririna kiena Yesu na pogaga, ana naga suþna kila ke piowa, a popon naga visu ruru si kiena malena. Sinemiun ke yagogonen naga na wa, ana sanape, inu mþena ga nepe yeririna kiena Yesu, ana komin ya ne yepemiu mavin yagogon inuena? ⁸ Nepisa sanene, pona yoko laþasa avisa kare in sina avisave in na sineun ga netaulu luen suria, ana pe sa re nene poli. Pona lelaga sane pogos laþasa noþarwar inu paþisi yo, pona nesuþna nepisayu manene sane imimi ke narui mesuþna mepisuar amiu, ana pe nesitom re nesape nekila sur tai piowa naþa monar nemawania. Nesuþna nepisayu amiu sanene komin naþa Suþe ga mligan amiu e limamimi nanua rui vena mekila kiamiu malena amio naga va metava. Visae amiu asitom avisave mesuþna mepis ke pan amiu vena kila kareen si kiamiu malena, pe sa re nena nene poli. ⁹ A visae asitom ke asape in na nepe yar na sinemimiena tai naþa nesuþna nesiri ke mþaki la nene piþnasu vena kila sane monar amaraun inu, naga mþena nene pe mesmesu re poli. ¹⁰ Nekilia nesape laþasa asuþna apisayu in ke sanene rui, asape "Suwala, Pol sur nene, naga ga kiena mþaki lala apulen visena urmi la naþa mþarera, ana visae ovisu naga, naga sane pe yar malmale kar

ga tai, a visae ologe naga visi, melala ga.” ¹¹ Ana sineun nesape nevisa van la nene sane popon avisu kilale sane ya naþa mesiriwal ke e mñaki, pogos naþa pe mesu re memio amiu poli, naga maran taaga ga sa ke e ya naþa yoko mesuþna mekila e maramiu, pogos naþa mesike memio amiu. ¹² Nepisa sanene, ana pe sineun re visaen sur ve moki poli vena kilaen si kiamimi kia va metava. Pe sineun re naþa meim sane yaru taþena laþas poli, naþa apilaven manene visawalen si kiela sur wo lala. Yar la ne sanene asuþna apisuveve ke kiela erau lala, a asuþna apisuveve ke mñena yar taþena lala, ana asitom asape la apo taulu la, ana naga nene pe yuþnaena na wowe ga tai, komin naþa pona la punu ga nene apiowa maran taaga yo.

¹³ Sanene, yoko ve nevisayu manene imimi re va sanene, ana monar nevisa sur laþasa van amiu naþa atorokin yuþnaena lala naþa Ntewa mligan e limamimi, a loyuþna ea, pano tol sur laþasa e lepas navisuar amiuena naþa mesuþna mekila. ¹⁴ Pe mesitom re naþa meva manene poli vena mekilali naþa mesu metavan amiu, ana mesmesun naþa mekilia mela visena laþasa naþa monar avatanonia, komin naþa ve sinemiu þesan re sane imimi ke narui naþa moþar þesan lologena wo kiena Kristo pimi pimi yalen silau pimi tol amiu. ¹⁵ Visae taþena laþasa la apimþes pun amiu, yoko ve mesitom re navisuar amiuena, pona nalaena visena la ne sanene van amiu. Ana siraun naþa mesiar yuþnaena memio amiu, monar meva re laa na wa memio amiu. Sinemimin ga naþa kiamiu naviawaena suþna kapuru silaga, a mekekaran manenea visae kiamimi yuþnaena kilia imi ve keviu laa sane, ve e re ga e kiamiu yo, ¹⁶ ana yoko mekekaran vaþisi visae amiu akilia aiila imimi vena kilaen sane teva re laa ga wa vena lologonen lologena wo va e purvanua taþena lala na pun amiu lepas þasa na vano, vena teva tetepo yoþmarua e yo naþa yar taþena lala pe apa amlologo re e poli wa. Sanene, visae pogos tai tevisayu yuþnaena lala naþa yoko tekila e yo la nene, yoko taþatete si avisa kare ita avisave tesuþna tepilaven ke ga mrasa naþa molue e lokove kana yar taþena! E pogos nene, yoko la akilia sane tesuþna tepisayu mrasa naþa molue ga e kata lokove naþa ita ga temapila.

¹⁷ Sitomena la nene apowo paþisi, ana popon ve towarwar itan re sur naþa tekila, komin Tus Wa pis rui, sape

“Yaru naþa sinenan vilaveena sur tai, monar vilave ga e ya naþa Ntewa kila.”

Ser 9:24

¹⁸ A pe pon re ita ga teyeluar ita si poli, komin yar wo naþa lelaga, pe naga re naþa naga ga pisa si sape naga po, ana naga naþa Ntewa ga pisa sape naga po.

11

Le Koren lala ataveve nalogena lala navisokanena

¹ Pona apulo visena la þasa naþa nesiri rui, asitom asape nepis wowe yo, ana awis, sineun nesape akila kiamiu sitomena ve piavi li laa sane e inu, ana yoko nekilali naþa nevisa si laþasa. ² Ana monar nevisa visena la nene komin naþa silaga nesuþna nesitom amiu paþisi. Yoko nevisa ve sanini, sane nepisu amiu sane amiu na kiau sira mñee tanea tai, naþa nepisalar vena talopa amio kiena yar mesmesu nene naþa Kristo. Nemloge sane nepieluen ruru amiu nenaga, komin naþa sineun visuar ruru amiuena vena ave lelaga e visaarena nene, a naga nene sa ga Ntewa, naþa naga mñena ga pieluen ruru ita, pe sinenan re sape teligan naga poli vena teva si varau. ³ A inu mñena ga nemarau towe mñaga sane saþisi yar taþena imi were si kiamiu sitomena va ve taþena. Sa nanua sumo ne, loþmara nene pimi pisa kotalia sira naþa Iv, kila kotalia kila mloru e mlamulena piowa, ana pe sineun re nenaga vena pogos tai ve alelaga re si e Kristo, sa þisi ve sinemiu sii ruru re si naga taaga.

⁴ Nepisa sanene komin naþa nepisu kilale towe mña þarimiu rui. Pogos naþa nalogena tai iþnasu visayu Yesu taþena tai naþa pe Yesu re naþa memlologon ke poli, ana alelaga ke e naga veraga. A pogos naþa ninuna taþena imi mñalivin amiu naþa ve Ninuna re nene naþa Ntewa mligania, apulan amiyopua ga. Pona pogos naþa lologena wo taþena tai imi mñalivin amiu, yoko akekaran logearen naga veraga. ⁵ Nalologena taþena la apisa kotalia amiu ruru nenaga e sur la nene, ana nepisu naþa amiu asuþna asitom urmi manene laa e

la. Amiu akila sa naþa la ga ape nalologena e kieta yomarava nini, a amligan inu nesike tano, ana pe nesitom re nesape nanene naga mesmesu poli. ⁶ Lelaga, nekilia nesape yar laþasa asitom ke asape in na pe nemlologo ruru re po poli, ana nekilia nesape pe yar re si tai naþa kilia sur taulu inu poli, a nesitom nesape amiu apisu kilale suri nene rui, komin naþa suþna mñalivi ke e yuþnaena punu ga naþa nekila ke ne e maramiu.

⁷ Nekilia nesape e lepas na warpoloen kilavaru nene, yar laþas pe akekaran re nenaga, ana nemninue ga komin ya ne sanene. Pona asitom asape nepiun ke kilavaru nene ve kiau ga? Peraga rui, komin pogos naþa nepimin nemlologon Lologena Wo kiena ne Ntewa pan amiu, pe nepisali re nesape ala sur tai van inu poli. In na nemligan inu nesike laa tano, vena nekilia nevisirlua amiu ava metava, ana pona amiu þasia sinemiu karinun naþa nekila sanene? Pona asitom asape in na nekila piowa ga naþa pe nepiun re suri tai pan amiu e pogos nene poli yo? ⁸ Nekilia nevisa mesmesun van amiu nevisave e poglis nene, suþmare taþena lala asuþna amligan nalaena pimi vena iila inu, a nesuþna nakan ke ga kilavaru nene pogos naþa nemiyuþnae kiamiu ke ne. Ana pe nekila re sur wo tai pan la nene poli e pogos nene, ana nemloge sane sa ga nesuþna nepinaun la ke ga. ⁹ A pogos naþa nesike nemio amiu, luþmau plasa pano pano þisa, ana puruvi la lua naþa akom Masionia apitomi apisu kilale naþa nemloge ke piowa sanene ana apisuar ruru inu. Pe nepim netag li re pan amiu poli vanon sur tai, a nepisaaria sane yoko taþatete nekila kare amiu naþa noþmareran amiu nesape monar akila sanene pona sanene pan inu.

¹⁰ Nepisarar sanene komin naþa yepmavin yar la asuþna avisa kare inu asape visokar inun kiamiu kilavaru, ana yoko nevisawal kiau navisaarena nene va kar ga e yo punu ga e lepas nene Akaea. Pe nemarau re nenaga, nepisaaria e kia kiena ne Kristo naþa kiena visena lelaga sike e inu sane yoko nekila ga narui. ¹¹ Ana pogos naþa nepisa sanene, pona yar laþasa yoko avisave sineun ga kila kareen kiamiu kia, pona asitom asape pe sineu sii amiu re poli yo, ana in na pe sa re nena nene þisa. Ntewa kilia ruru sane sineu sii amiu paþisi. ¹² Ana monar noþmareran ga sane visaarena naþa nepisa, yoko monar nekila ga narui, komin naþa sineun kemaren kapi kiena taþena la nene naþa asuþna apilave kar ke sanene. Asuþna apisali ke pan amiu asape asuþna amiyuþnae lele taaga amio imimi, asape akila ga yuþnaena mña nena naþa mesuþna mekila ke ne, ana pe sa re nene poli.

¹³ Yar la ne sanene ape nalologena navisokanena ga, amiyuþnae pe mesmes re nena poli, ana asuþna akila kotalia amiu ke ga li na lelagaena lala, sane aþar marana nalologena lelaga lala kiena Kristo. ¹⁴ Ana monar ve ailan re naþa akila sanene, komin kiela yerkawa naþa Yermare, naga mña ga suþna kila ke sanene rui. Naga kilia kila sane naga imi ve navisi wo na yomerarava, ¹⁵ ana tepisu naþa kiena yar lala na yuþnaena akila kotalia ke mña yaru lala, akila la sane la ape yar na kilaen þelaga mesmesu. Ana pogaga, tekilia sane yoko ava ga narui aþisi e yo naþa mesmesun ga kiela yuþnaena viowa lala.

¹⁶ Ana sa naþa nepisa rui, pe sineun re sane nevisi ana kila laþasa asape nepe wowe, ana visae sinelan visaena, ataþnan avisa. Ana visae ve sanene, popon la akila van inu sa naþa akila pa wowe lala, sane ve avisaluþar in re sumo wa, ana ataþnan nevisa ya naþa sineun nesape nevisa. ¹⁷ Pogos naþa nesuþna nepisayu ke kiamimi yuþnaena, visae nevis vilaveena manenea, kila sane pe lelaga kemua naþa nesuþna nepis wowe, a yoko Suþe taþatete kekarania. ¹⁸ Pe pon re tevis vilave manene poli, ana in na pe nesa re yaru taþena la naþa asuþna apis vilaveena kiela sur lala na yomarava nini, komin naþa visae nevis vilave, nesuþna nepisayu ke ga sur wo lala. ¹⁹ A nepisu naþa asuþna sinemiu miye ke yar taþena lala naþa amiu asitom ke sane la ape wowe, komin naþa apisu sane la ape taþena, pe atol re manmaruaena wo nene poli naþa amiu asitom ke asape asike ea. Ana visae asitom ke asape in mña nepe wowe, komin ya ne taþatete akila kiamiu sitomena ve piavi laa sane e inu mña?

²⁰ Nepisu naþa asuþna ataþnan ke pa nalologena navisokanena taþena la nene vena akila sur viowa la ve moki van amiu. Akila van amiu sa naþa amiu ape kiela yar na yuþnaena lala, la amiyelelain amiu, aþar kiamiu sur lala, amligan la asu metavan amiu,

a visae sinelania akilia alipa maramiu. Amiu asuṃa ataṃan akila sanene, ana sanape? Ana pogos naṓa nepisa ga visena tai pan amiu, komin ya ne yepemiu mavin yagogonena? ²¹ Pona popon manene visae in ṃena nesuṃa nekila ṓelaga kar la ne sanene van amiu, ana pona kila amiu akekarana inu ga yo na wa? Ana pe sineyeena, in na nemalum laa paṓisi yo, in na pe netorokin re nekila nene poli yo?

Pogaga, nepisa visena nene, nekilia sane yoko yar laṓasa avisave nesuṃa nepis wowe ke sina ga, ana sineun nesape visae nalologena taṓena la nene asitom sane akilia avis vilave komin naṓa asitom asape sur laṓasa na lepas pula naga po, ana in ṃena nekilia nevis vilaveena sur laṓasa na sanene. ²² Visae asuṃa avisir plan la ke asape la ape yer Epru, ana in ṃena nepe yer Epru. Visae asuṃalun avisave la ape yaru na lepas nene Israel, ana in ṃena nae yo nene. Visae aligan la metava komin naṓa apisape la ape lus kiena Epraam nena ga, ana in ṃena nepe lus nene. ²³ Ana yoko neviun naviunena tai van amiu narui, sane la nene amiyuṃae kiena Kristo pa tol yuṃaena naṓa inu nemiyuṃaenia? Peraga, inu nesitom sane in na nekila po manene laa taulu la. Piowa ga naṓa nesuṃa nepisayu inu ke sina sanene, ana ṓarimiu la ṃarera paṓisi kila sane in ṃena lavis ṓaruu ve wowe, nane nesuṃalu nepis sanene. Ana sur nene na lelaga paṓisi, naṓa in na nekila pupia yuṃaena la taulu la, yerkawa la akoven inu e yuṃa naloge viowaena yam moki taulu la, aṃe inu yam via nopulo ṓele sina, a yam moki ṃena ga naṓa pano-o lavis ga nemare. ²⁴ Nekilia sane yam lima rui, yerkawa kiena ne le Yu lala aṃe inu naṓa yam taaga, kovilva kakapuru e mosineu yam lualima yam telu pa ovaru [39], ana akila sanene yam lima. Apisaluṓaria asape ve akila re va tol lualima yam ve vari [40], komin visae peraga, vena marena ga narui. ²⁵ Ana yam telu aṃe inu e laki lala, a yam si tai akove inu e kilavaru pano pano lavis nemare. Yam telu nokulu e sive naṓa waa talilu, e pogos la tai nene, sive mian inu ṃaga tol lemalo wetelu tai a legiena wetelu si tai. ²⁶ Pupia yalena piayavi lala, nemialoro e la yam moki manene laa, a e pogos la nene nepane sur la moki liu naṓa namarena ga. Wii lala na ṓalu lavis ayanlua inu nevano, yar la naṓa aṃevinaun ke yar lala aṃene inu, kiau yeririna ga lala sa naṓa le Yu lala apisu piowa e inu, a la naṓa pe ape le Yu re poli akila kare inu ṃena ga. Nepa e yo nape, sane pulkumali, pona yoṃarua, pona losi, ana nepane pog ṃarera, ana silaga, puruvi navisokanena la nene, asuṃa akawe inu. ²⁷ Sila ga nepa nemio yuṃaena ṃarera a pog ṃarera, nepano naṓa nomomalio ṓele ga, nepano naṓa moto kar inu paṓisi a viso kar inu naṓa pe kinanena re nena poli, a nepano naṓa pe noṃal re yo natapolounen miava poli. ²⁸ A metavan pog ṃarera la nene, silaga nesuṃa nesitoṃal luen ga kiau yuṃaena nemio suṃare lala, naṓa sane sur tai naṓa urmi na urmi e kiau malena. ²⁹ A nesitom amiu ṃena ga paṓisi, naṓa visae nevisu amiu li na lelagaena yaru tai imi malumu, yoko kila neloge sane yepeu malumunia, a visae neloge naṓa amiu tai loru e mlamulena viowa, yoko kila naṓa neloge sineu laea paṓisi.

³⁰ Nanene sur viowa la naṓa nesuṃa nepisui, ana nepisu sane nemalumun manene laa yuṃaena kiena Suṓe, ana pe nekila re sur wo tai naṓa nekilia nevis vilaveena poli, kila sane nesuṃa nepis vilave e pog viowa la nene naṓa nepanea. ³¹ A kieta Ntewa, naṓa naga pe Arimana Suṓe Yesu, naṓa yoko teyeluar luen ga kiena kia, naga kilia sape pe nepisokan re poli, sur la naṓa nepisa ke ne ape lelaga make ga.

³² A pupia sur viowa si tai naṓa noṃalia, pe nepisa re ma metava poli, nanene e poglis naṓa nepa e pupia pulkumali naṓa Taṃaskas. E poglis nene, ṓarin suṓe nae lepas nene naga yar naṓa Aretas, a kiena yerkawa naṓa naga pisirlua vena visuaren kiena pulkumali sinenan sape tarar inu, ana pitetalia kiena lokul na taren yaru lala apa asuwo make mralaea punu ga e yo nene vena ve noure re. ³³ Lavis atol inu, ana erau laṓasa amiila inu, akonwan inu e los nen pupia karo tai, ana apiar e kilika, asuṃalu metava e pupia arman kove na yo nene, amligan malumun pito tano vanua e yepas nen kove nene, pito malum ṃa pito tol tano, ana nomolue e karo nene nopure nepano.

12

Sur la naþa Pol pisu e mēniena

¹ Poga, nepisu sane visae nesuþna nepisayu in ke sanene wa, yoko taþatete vilon kiamiu sitomena imi wo sina, ana pogaga, nemloge sane sineun nesikol si visena nevisayu sur la naþa nepisuiia pona sur la naþa Suþe kilologia pan inu e mēniena lala. ² Ana yoko nesunyu yar kiena Kristo tai sumo wa, naþa nekilia ruru naga, naþa kas lualima taaga pa vari [14] þaro rui, naga suþna ga milan aþere naga pa kate ma e peni ma metava. Nemninue ga pa amio tasnena wetelu, pona apitom aþerelua ga ninuna pavini, Ntewa ga kilia. ³ Ana pe sur korena ga naþa visae pa e tasnena pona pa e ninuna ga, nekilia nesape lelaga sane yar nene pavini yalen silau pisu loyuþna e mþata uþna tanea e yo nene. ⁴ Naga mloge sur mok liu naþa pe navisawalen re si poli, naþa pe visena re si na yomarava laþas poli naþa torokin navisayuena.

⁵ Ana pogos naþa nepisayu yar nene, pona amilan yo, apisape ke, yar nene, naga pe yar tanea tai naþa ne. Ana sanape, visae nevisave pe yar taþena re poli, ana nepisayu in ke ga, pona yoko avisa ga avisave nanene naga pe pe sur re tai poli a? Sanene, nepisu sane visae sineun nevisayu pupia sur laþasa sanene van amiu, popon nevisa ga e kia kiena yar taþena, vena akekarana naþa alelaga ea, ana e kiau kia, yoko nevisayu ga kiau narin sur laþasia. ⁶ A visae sineun nevis vilave e pupia sur la naþa nekila, yoko taþatete si yar tai kilia visave nesuþna nepis wowe, komin sur la punu ga ape lelaga make ga. Ana pe sineun manene re nevisa sur la ne sanene poli, komin naþa pe pon re nekilali aligan inu metava vanon sur laþasa naþa pe apisuli re poli wa pona pe amlogeli re poli wa, ana in ga nesuþna nepisa. Sineun nesape asuþna avisuveve inu e yuþnaena ya naþa apisu nekila ke pan amiu, a e visena ya naþa nepisa pan amiu.

⁷ A nepisu sane Ntewa mēna naga yepen mavin sape kiau sitomena va manene laa metava vanon mēniena lala pona sur la naþa naga pisa lologia ke pan inu, a naga mligan napiowaena tai sike e tasneu naþa nemloge sane kurumol tai naþa Yermare suþna miyur inu ke e silaga, naþa suþna kila tasneu mlalaea, a suþna kila kiau sitomena suþna ga tano. ⁸ Nepiun tan Suþe vena lalua sur nene vetan tasneu, ana pe kila re poli, ana yam lua sina nemleninia, yoko kana yam telu nena, ana peraga rui. ⁹ Ana naga pis ga pan inu, pisa sanini sape “Yoko kiau lemamiena ga torokin uarar ko, komin kiau mþareraena kilia yuþnae ve keviu manenea e pogos naþa yuþnae amio kioþna malumuena.” Visena ne nanene narui kila sane nekekarana nevisayu manene in laa sane, ana yoko nevisayu ga kiau malumuena lala, vena kila sane mþareraena kiena Kristo kilia yuþnae kome inu sanene, sa naþa naga pisa. ¹⁰ Sanene, vena kila kiena kia imi ve keviu manene laa sane, netaþnan sane nekekarana malumuena la se tasneu, pona avisu viowa e inu, pona nelual pog mþarera lala, pona akila kare inu, pona neva nowarpoyo e sur viowa lala, komin naþa nekilia sane pogos naþa yepeu malumu, Kristo ga yoko kila noþarera.

¹¹ Suwala! Nesitoþmal ke visena la naþa nepisayu e yo nini, nepisu sane lelaga, nepisi sa naþa nepe wowe paþisi. Aviewo inu, ana po mēna ga naþa apisu kilale sane amiu ke narui naþa akila nepisi sanene. Nesitom ke nesape amiu ke narui yoko asuþna avisayu ruru inu, naþa akekarana sur wo la naþa nekila pan amiu rui, ana peraga, asuþna apisa kare ruru inu nena ga. Nekilia nesape in na nepe sur korena ga, ana pe nesitom re nesape in na nepiowa taulu nalologena navisokanen taþena la poli, ana vanon ya ne asuþna amieluar la sanene?

¹² Popon asitoþmal si sur la naþa nekila likan amiu, naþa pisawal inu sape in ke narui nepe nalologena lelaga. Sila ga, kiau sitomena piavi ruruia vena yuþnae malumu amio amiu, a nekila amiu apisu kile lala, amio sur nailanena lala, amio kile lala na naþareraena kiena ne Ntewa. ¹³ Nekila sur make ga pan amiu po paþisi, maran taaga e ya naþa nekila pan suþnare taþena lala, ana la pe apismumun re sur tai poli, ana amiu na apis liu wa. Sur ga tai naþa nekila nemio la ana pe nekila re nemio amiu poli, pe nepiun amiu re poli nesape avisuar inu pona aiila inu, sa naþa la akila, ana pona nane nekila pal e nene

yo? Visae ve sanene, aviewo inunia, komin naþa visae pona neviun ga sur ve moki vetan amiu vera na yoko akekaran in ga na wa?

¹⁴ Pogaga, nagane narui nesuþna nekila ruru ke nesape neiþnasu nevisu amiu sina, naþa kana yam telu ne narui. Nepisaar nesape yoko ve nekila re yuþnaena van amiu, komin naþa ve neiþnasun re vena kiamiu sur la iila inu, a neiþnasun vena neiila amiu. Nanene sane ata lala a auya lala amio narila lala, naþa pe yuþnaena kiena re nin sisi la poli naþa avisuar kiela yermarua lala, ana yermarua ke la narui monar avisuar ruru narila lala, ¹⁵ ana visae sanene, in na nekekaran ga naþa nekian make kiau suria, amio mþena kiau malena, vena iila amiuena. In na nekilia nekila sanene komin naþa sineu sii amiu manene paþisi, ana nemloge piowa komin naþa nepisu sane pog naþa kiau sinesiena e amiu suþna pa manene ke metava, ana kiamiu sinesiena e inu suþna pito lilue ke ga tano. ¹⁶ Nepisa nanene komin nemloge visena taþena e amiu. Asuþna apisu kilale ke asape pogos naþa nesike nemio amiu, pe nekila re yuþnaena tai mþarera pan amiu ve navisuarinena poli, a pe nakan re nena kamiu kilavaru poli, ana sitomena tai teke ga e amiu wa. Amiu apisa apisape in na nepe manmarua po e lepas nakilakotaliaen yaru, ana asitom ke asape nesuþna nekila vinaun ke mrapa na visa kotalia amiuena vanon kiamiu sur lala. ¹⁷ Ana pe sa re nena nene poli þisa. Asitom ruruli la naþa nepitetalia la apiþnas pun amiu. Apisu naþa akila kare amiu e sur tai, pona aþar kiamiu sur laþasa pe kiau? Pe nesitom re poli. ¹⁸ A sanapen mþena pogos naþa noþmareran Taetas sane naga amio kieta puruvi taþena nene, lalua monar aþalivin amiu? Apisu naþa lalua akilakokanin ga naþa awar kiamiu kilavaru laþasa? Peraga, komin imimi sane þegas taaga ga, naþa Ninuna taaga ga sike e imimi, a mesuþna metaveve mrapa na yuþnaena taaga ga, naþa pe mesitom re nena naþa nakilaen yuþnaena kiena Suþe vena mowar sur laþasa ve kiamimi.

Pol sitom manene paþisi sape pogos naþa va gar Koren yoko ve sanape?

¹⁹ Nesuþna nepisayu ke kiau yuþnaena la sanene, pona asitom ke asape noþikeyon nekilalua kiau kia va metava e maramiu yo vena ve asitom re si viowa e inu. Ana peraga, in na pe nesitoþnal inu re poli, ana nesuþna nesitoþnal amiu ga, a visena la naþa nepisa, nepis sane yar kiena Kristo tai, e marana Ntewa, vena iilaen kiamiu malena. ²⁰ Nepisa visena la nene komin nemarau paþisi sane pe pon re naþa noþmalivin si amiu poli, ana nevisu naþa amiu asike e yo tai naþa piowa paþisi e kiau sitomena, a nemaraun mþena ga sa þisi yepemiu mavin inu. Visae ve sa nene kilia kila sane teveveyun ita, pona tesitom ita viowa, pona sineta kar ita, pona ve tesitom re si yar taþena ana tesitoþnal ita ga veve taaga. E pogos la ne sanene, yar kilia viueli, kilia vismumun yar taþena, kilia vis vilave, a kilia mþaga manene mþena ga. Visae va sanene, ana viowa narui. ²¹ A nemaraun manene mþena ga sane pogos naþa nowasuþe si neim pun amiu la nene, yoko nevisu kiau yuþnaena lala e amiu sane aviowa ruru make nenaga. A visae ve sa nene, yoko kila inu nemawan Ntewa vaþisi, yoko kila inu neloge sane naga mligan inu nepito tano keviu paþisi e maramiu. Ana nepisu sane yoko monar ve sa ga nene narui, komin pupia mlamulena viowa naþa amiu laþasa asuþna akila ke ne naga pe þelaga na kororaki na kolau naþa kilaro navisaluaena naþa Ntewa mligan pa yermene amio sira vena atavevea, a pe apilon la re nena ea þisa, ana amiu ataþnan ga naþa la asuþna akila.

13

Visena maro na weþege laena

¹ Erau lala, sa naþa nepisa ne, nanene yam telun naþa nemialoro naþa yoko nekila vena neimi neyalial li mþa amiu, a pona yoko yam ve telun naþa nevisi van amiu komin napiowaena nene. Nanene kila narui nesitoþnal visena tai na Tus Wa naþa pisa sanini, sape

“Pogos naþa apa kumali apis pa yar tai vanon mlamulena viowa tai, monar yar ve lua pona ve telu naþa akilia avisawal mlamulena viowa nene, vena kila sane avisu sane lelaga.” *Naw 19:15*

² Nesitoñmal nene komin pogos naña nepim ñesan noñarpoyo pun amiu yam lua nanua sumo ne, nepis nemio amiu la naña akila mlamulena viowa nene, nanene naga pogos naña nekila ñesania. A nagane nesuñna nepis ke sina ga yam lua pan la e ñaki nini, a visae neim nevis sina, naga nene kila kana yam telu nena. A sineun nesape nevisa van la nene, amio la naña asike e yepas nela, visae neiñasu nevis sina, nanene yoko ve nasineyeena to re si e inu narui, yoko neliñere la e nakoena ñarera tai. ³ Amiu asuñna apisa ke asape popon nekilologia inu towe ñnaga sane ve lelaga naña Kristo suñna pis ke ñarpoyo e kiau visena lala, ana visae sinemiun sanene, popon aim ayagogon inu e poglis nene, ana yoko avisu ga na wa. Yoko avisu sane pogos naña Kristo sinenan kilaen kiena yuñnaena e amiu, naga pe malum re nena ga, ana naga kilia yuñnae amio kiena ñareraena make ga. ⁴ Pogos naña añear naga mare e laki torovia, tepisu naña tasnena pimi malumu nenaga, ana pogos naña suñnalu e marena mali sina, naga pule ruru nenaga e ñareraena kiena ne Ntewa. Ana imimi ñnena memalumu sane naga, ana pogos naña mekila kiena yuñnaena naiila amiuena, mesuñna memiyuñnae ke memio ñareraena naña Ntewa tañan pan imimi.

⁵ Sineun ñnena nevisawal nesape nevisu sane amiu asuñna amlañere inu manene laa, ana sanape narui, tañatete naña amiu ga akilia alañere amiu re sina, sane kiamiu viawaena suñna ñarera ke ga wa pona sanape? Avisu ruru amiu, sane asuñna apisu kilale ke sane Yesu Kristo suñna miyuñnae ke e kiamiu malena wa, pona peraga? A visae peraga, pona lañasa asike nena e malena naña Suñe pe su re nena e poli, a pe ape nalelagaena re naña pe lelaga poli. ⁶ A visae pogos tai visae sinemiun avisuveve ñnena kiamimi malena, naga pogaga, ana sineun manene pañisi sane yoko avisu kilale naña Suñe suñna miyuñnae ke e kiamimi malena ana pe mekila pal re kana nin kinakinas tai poli.

⁷ A mesuñna memlen ke pa Ntewa vena yuñnae e kiamiu malena vena amiu ñnena ve akila pal re suri tai. Visae ave sanene, yoko kilia kila ñnena kiamimi kia wo, komin imimi ke narui mepian amiu, ana pe memlenwo amiu re poli komin ga kiamimi kia. Visae yar lala avisu sane memiyuñnae piowa sanape, nanene na pogaga, ana kiamimi pupia sitomena, sinemimin naña asuñna akilalue ga mesmes silaga. ⁸ A imimi ñnena ga, sinemimin naña kiamimi yuñnaena make ga mesmes ga e visena lelaga kiena Suñe, ve sinemimin re si kilaen sur tai naña welua si kiena visena lelaga vito tano. ⁹ Mesuñna memiyuñnae kiena ke ga, a visae pogos tai kila imimi meim memalumu, mekekaranga, komin naña mekilia mesape pogos naña meim memalumu, ana amiu aim añarera. Mesuñna memlotun ke ga na nene, sane yoko asuñna aimi awo manene silaga. ¹⁰ Sitomena ne nanene kila nesiri ñaki nene piñasu pan amiu nagane e pogos naña nesike perinan amiu wa. Sineun nesape alogearia, a visae akila, yoko pogos naña neiñasu tañatete nevis ñarera van amiu. Suñe mligan amiu e luñau vena nevisuar amiu, pe nakila kare amiuen re poli, ana nakila amiuena ava metava. A visae neiñasu nevisu ve sanape, yoko monar nekila ñarera van amiu e ga e ya naña mesmesun nekila.

Pol pisa pokolemalo pan la

¹¹ Erau lala, nepim e kiau visena maro narui, nevisa ga pokolemalo van amiu. Awis, akilali naña akila ruru kiamiu mrapa mesmesu. Alogear ruru suri la naña nepiun tan amiu. Amiu punu ga atañan ga aviranar amiu e sitomena wo tai. Asururu ga e ñelaga namalumena, ana yoko Ntewa na sinesiena a na suñnarena sike amio amiu. ¹² Pogos naña asuñna avitawe amiu, atalopan ruru amiu, aviran pipimiu e kekarena wa. ¹³ Nalelagaena wa lala nae e nini apisa ñnena kiela pokolemalo pan amiu.

¹⁴ Ana kiau leniena nesape yoko lemamiena kiena kieta Suñe Yesu Kristo, amio sinesiena kiena ne Ntewa, amio pañnaga kiena Ninuna Wa, asike amio ita make ga.

Inu na, Pol.

Maki Naþa Pol Siria Pa Pan
 Li Nalelagaena Wa Lala Nae Garu
KALESIA
 Visayuena Na Tusi Nene

Komþasnen suniena plas na tusi nini

Kalesia naga lepas keviu tai naþa mēke vatanon Þarin Suþe nae Rom, a mēke e purvanua naþa nagane kiena kia Teki.

E pogos naþa nalogena kiena Yesu la asiaria vena ava alologon kiena lologena wo, yaru la naþa pe ape lus nae re Israel poli lala akekaran lologena wo nene paþisi.

Ana yaru laþasa asuþnaga, naþa e kiela sitomiena lala, asape visae yaru tai sinenan sape naga imi ve yaru lelaga nalelagaena kiena ne Yesu, naga monar taveve ke navisaluaena marua lala naþa sumo na Ntewa mila pa Mosis. Ana Pol pis mārera kawe sitomiena nene, pisawoia sape þelaga nene pe mesmesu re nenaga. Naga pisawal merarava sape visae yaru naþa sinenan tolen maliena e Kristo, purþesnen suri nene na sanene, naga monar lelaga ga e Kristo. E ga e þelaga nene, yaru makega akilia aimi amesmesu e marana Ntewa.

Ana e suþmare lala e pulkumali lala nae lepas nae Kalesia, yaru laþasa apimi akawe Pol e visena lala, apian li-nalelagaena lala asape visae yaru tai sinenan sape imi mesmesu e marana Ntewa, naga monor taveve ke navisaluaena lala kiena Mosis.

Maki nini, Pol siria pan la naþa asuþna ataveve ke vianena nene naþa pe po re poli, vena urela awasuþe si aimi e lelagaena na lelaga, a e þelaga la naþa mesmesu. E kiena maki, naga siar visena, pisawal sape naga kilia vis vanla sanenen komin naga puarar yuþnaena sane nalologena kiena Yesu Kristo, a li na lelagaena lala e yo pinuga apisukilia naga sanene. Naga pisa mþaga sape pe yaru la re apisa pania asape imi ve nalologena tai poli, ana Ntewa ke naþa pisirlua naga narui, pio naga vena visawalen lologena wo va yaru la naþa pe ape lus nae re Israel poli. A naga pisa luwega visena na kaweena vianena viowa la nene, naga sape lelagaena kiena yaru ga kilia kila yaru mesmesu e marana Ntewa. E maran tusi maro na maki nini, Pol kila meraravan sape þelaga wo naþa li nalelagaena la asuþna akila, molue kome þelaga naþa yaru sinensi wenlai a vinena, komin nanene nau i naga þelaga po na malien kiena ne la naþa amlelaga e Kristo.

Komþasnen tusi la na nini

Visena nasumo 1:1-10

Naþareraena sike e Pol komin naga pe nalologena tai 1:11—2:21

Ntewa suþna miila ita e kiena lemamiēna 3:1—4:31

Li nalelagaena la apimi po, ana kiela yuþnaena suþnaga 5:1—6:10

Visena maro 6:11-18

Pol siar kiena visena pan la

¹⁻² Inu Pol nesiri maki nini piþnasu pan amiu, amiu þegas nen li nalelagaen lala garu laþas nae Kalesia, a inu nemio kieta wolai lala nae e yo nini, imimi mepiun tan amiu mesape sanape amiu asuþna pogaga pona amiu asike sanape? Inu nena nini naþa Yesu Kristo, amio Ntewa Arimata, naþa naga pisirlua sina ga Yesu e marena, lalua ne na nene lalua amligan inu nepe yaru nalologena, ana in na sanene, pe yaru re naþa pio inu poli, a pe yaru re mēna ga naþa naga mligan lua inu sanene poli. Ee, amiu na monar ayagogon ya naþa nevisawalia.

³ Inu sineun nesape Ntewa Arimata amio Suþe Yesu Kristo, lalua amligan lemamiēna amio suþmare sike e amiu.

⁴ Yesu Kristo, naga kila mesmesu sa naþa Ntewa Arimata naga sinenania, naþa naga taþnan naga mare vena war plan kieta mlamulena viowa lala, vena kilia werelua ita e

mlamulena viowa naþa tesike ea. ⁵ Vanon sur ne na nene, þisi na ita teyeluar manene kia kiena ne Ntewa nene va metava silaga, vano vano taþatete þisi. Sanene.

Lologena Wo, taaga ga

⁶ Inu nemilan amiu paþisi, naþa Ntewa naga pio amiu rui, a Kristo kila po pan amiu paþisi rui, ana pe e re ga e pogos nene poli ana amiu asuþna aþure ke sina ga petan Ntewa, naþa amiu asuþna ataveve ke sina ga visena tai naþa sane lologena wo taþena tai. ⁷ Ana taþatete si lologena wo taþena tai ve sanene, komin naþa lologena wo taaga ga nene naþa sike na. Inu nemloge apisa sanini, vanon naþa yar laþas naþa akila ke sinemiu la pilovilopuia, naþa la sinelan avilopu lologena wo kiena ne Kristo imi ve taþena. ⁸ Ana visae imimi yaru tai, pona navisi nae peni tai, pona a re mþena ga, naþa naga lologon nalologena wo tai, naþa pe toroki re amio naþa imimi mepisawal pan amiu sumo rui, ve sanene popon manene naþa yaru nene akoven vitove e lele na logeen viowa. ⁹ Ee, in na nevisawal ke sina ga nene, van amiu narui, nesape visae yaru ai naþa pisawal visena na lologena wo taþena tai pan amiu sumo rui, naþa pe taþenan lologena wo nene naþa amiu amla þisi rui, ana þisi na yaru nene naga monar ala nakoena viowa vania e kapi.

¹⁰ In na nekilia nesape yaru laþasia apisa kare inu yam mok rui, apisape in na sineun ga nesape yaru lala aloge wo e kiau visena lala, ana amiu amloge kiau visena mþarera nene sanape? Pona yoko yaru laþasia sinela kar inu yo, ana pogaga, komin naþa ya ne in na sineunia, in na sineun ga nesape Ntewa, naga kekaran kiau visena, komin naþa visae in nemlologon ga vena yaru la aieluar inu, ve sanene in na pe nepe yar lelaga na yuþnaena kiena ne re si Kristo poli narui.

Pol pisayu naþa Ntewa pio naga

¹¹ Wolai lala amio vineu lala, popon nevisa meraravan van amiu, sane, lologena wo nene naþa nepisawal ke ne, naga pe visena re tai naþa yar la asiar poli. ¹² In na pe nemla re lologena wo nene tan yaru tai poli ana pe yar re tai naþa pian inu e poli, peraga. Ana Yesu Kristo naga ga kipian ruru inu e lologena wo nene merarava.

¹³ Nanene na sa naþa amiu amloge rui, naþa kiau namalena nanua sumo na sanape, e pogos naþa in na nesike loyuþna e lotuena kiamimi imimi le Yu lala. E pogos nene, inu silaga sineu kari luen ga þegas nen nalelagaena lala kiena ne Yesu, ana neþnene la nekila kare la naþa pe nesitom la re nena poli, komin naþa sineun nesape nalelagaena la ne sanene na monar toko ga. ¹⁴ E pogos nene, netaveve ruru þelaga na lotuena kiamimi imimi le Yu lala, taulu yaru taþena lala naþa imimi na sane teras taaga, a inu nepuarar visena marua lala kiena ne repimimi la mþarera, naþa kiamimi apua le Yu lala naþa asuþna ataveve pimi tol nanagane.

¹⁵ In na nekila ke sanene pano pano-o, ana inu pe nekilia re naþa nesape Ntewa naga pisaar inu þisi rui, e pogos naþa in na pe nepaeme re poli wa. Ana e ga e kiena lemamiena, naga pio inu vena neve kiena, a e kiena sitomena wo, ¹⁶ naga kila narina mþalivin inu vena nevisu kilale naga, vena nevano nelologon Yesu nene van la naþa pe ape Yu re poli. E pogos nene, ana pe nepa re nepisu yaru taþena la þas poli vena nela nakiliaena laþas tan la e lepas na lologena wo nene, ¹⁷ a pe nepa re mþena ma Yerusalem poli vena nevisu nalogena la naþa la ape nalogena sumon inu vena neviun tan la nevisave “?þisi na nelologon ya ne, pona nevisawal visena ve sanape?” Peraga, pe nepa nepiun re sanene poli, komin naþa Kristo naga kila make sur la nene merarava pan inu þisi rui. E pogos nene in na nemligan la vilaga, nepa perina paþisi e purvanua naþa Arepia, a siraunia neþasuþe ke sina ga nepimi, nepa yalensilau ga nepa garu e pulkumali naþa Taþmaskas. ¹⁸ Siraun naþa kas telu þarovia, ana e pogos ga nene narui in na nepa si ma Yerusalem. Nepa ma Yerusalem nepa nakaten Pita, ana pe nesu re nemio naga piavi poli, ana nesuþna nemio tol ga legiena lualima taaga pa lima. ¹⁹ A e pogos nene, in na pe nepisu re mþena nalologena taþena laþas poli, ana nepisu ga kiela nasumonena naga taaga, naþa Semes

naþa naga wenla kieta Suþe. ²⁰ Naga nene narui, ya naþa nepisa ke pan amiu, naga lelaga pe nepisokan re nene poli, Suþe kilia mþaga.

²¹ Sanene narui, inu nesike ma Yerusalem pe piavi re nena poli, a siraun nene, inu nepa nemial vivia lepas lua nene naþa Seria amio Silisia, ²² kila sanene narui e pogos nene, nalelagaena lala nae ma e lepas taþena naþa Yutea, amio kana pulkumali keviu nena naþa Yerusalem, la nene pe akilia ruru inu re poli wa. ²³ La amloge ga ya naþa yaru la asuþna apisa ke, naþa apisape, “Yaru nene nanua sumo naga mþene kare ita paþisi, naga suþna kilali naþa kila kare kieta nalelagaena, ana nanagane naga suþna mlologon ke mþarera e kieta nalelagaena nene paþisi.” ²⁴ A komin suri ne nanene, la asuþna amieluar Ntewa keviu naþa naga pilon kiau malena sanene. Ana la asuþna apisirilua kia kiena ne Suþe vanon inu.

2

Nalologena taþena lala apiran ruru amio Pol

¹⁻² Siraun kas lualima taaga pa vari þarovia, ana Ntewa pisa pan inu sape monar neva si ma Yerusalem. Nemloge Suþe pis sanene narui, ana imimi lua Panaþas, imimi lua mepavini, a nepure mþena Taetas pimi taveve imimi lua. Metol ma Yerusalem, ana metotano e viorena tai, memio nasumonena lala na suþmare naþa la ga apimi loyuþna ea. E viorena nene, nepisawal visena lala naþa inu nemlologon ke pan yaru la naþa pe ape le Yu re la poli. Inu nepisayu ruru sur punu ga naþa nekila pan la, komin naþa pe sineun re nesape yoko la asitom avisave in na pe nemiyuþnae mesmes re poli, ana pe pon re avisa kare kiau yuþnaena imi tol pogos nini poli, ana kila sane kiau yuþnaen nanene imi ve sur korena ke sina ga. ³ Sumo in na noþmape pona þisi na la aþmareran van inu, vena nevisa nevisave yar la naþa pe ape le Yu re poli la mþena ga monar ave þaviu. ?Ana viorena nene pisa sur ya? E lepas na kiau erau nene Taetas, naga pe nae re Yu poli, naga yaru nae Kris tai, naþa naga pe pe þaviu re poli, ana la pe apirurua re naga asape naga monar ve þaviu poli. ⁴ Ana e viorena, yaru laþas naþa sinelan asape Taetas naga monar ve þaviu, ana nepisu yaru la nene sa naþa la apisa apisape ape kieta wolai lala, ana la apisokan ga. La nene la apimi vinau ga loyuþna e viorena vanon la sinelan ga visu imimiena, naþa imimi mepian ke mesape imimi mepimi mepe taaga memio Yesu Kristo rui, ana þelaga marua la nene pe piar imimi re si poli ana imimi moþisin rui. Ana la nene pe akekaran re nena kiamimi visena nene po, la sinelan asape akila navisaluaena la nene na lotuena kiena ne le Yu lala monar aviar punu ita mþaga. ⁵ Ana imimi pe metaþnan re naþa la ato metavan imimi poli, vanon naþa imimi mesitom paþisi naþa mouarar ruru visena na lelagaena na lologena wo nene, vena þisi na amiu atol ruruia.

⁶ Ana e viorena la þasia naþa yeririna la apisape ape kiela nasumonena la asuþna, ana inu pe nesitom re nesape la ape yerkawa pona la pe ape yerkawa re poli, nanene na pe pe sur re tai nene poli, vanon Ntewa naga sitom korena ga kia la ne sanene. Ana nasumonena ne la nanene, pe la apian inu re e sur viu tai poli vena nelologonia. ⁷⁻⁸ Peraga, pe sa re nene poli. La apisu kilale ga asape Ntewa, naga e kiena puriukawa, naga mligan inu nepe yaru nalologena tai, vena inu nevisawal lologena wo van la naþa la pe ape le Yu re poli, sa naþa e kiena puriukawa mþena ga, naga mliganar Pita þisi rui, vena naga ve nalologena tai vena naga mþena ga visawal nalologena wo va le Yu lala. ⁹ Ana Semes amio Pita a Yoane, naþa yeririna lala la apisa apisape la telu nene la ape kiela nasumonena, la telu nene la apisu kilale naþa Ntewa naga mligan yuþnaena wo nene e luþnau e kiena lemamiena. Ana la telu nene la apim atalopan imimi lua Panaþas, sa naþa imimi mepe þegas taaga memio la, ana imimi punu ga metaþmania vena imimi mevion yuþnaena lala, sa naþa sane imimi lua meva melologon e yo kiena ne yar la naþa la pe ape Yu re poli, a lala na yoko la alologon e yo kiena ne le Yu lala. ¹⁰ A la nene amla ga visena taaga ga pan imimi, asape imimi lua monar mesitoþnal kiela yar la naþa pe kiela sur re poli, vena meila la, ana nanene, naga sur tai naþa e pogos nene in na nekekaran þisi rui vena neyuþnaen ve sanene.

Pol pis m̄arera pa Pita vena visaluḡar naga

¹¹ Siraun na nene, inu nepito ke sina ga nesike garo e pulkumali nene Antiok, ana pogos naḡa Pita m̄alivin imimi e yo nene, nesuḡmalu e marana ne nalelagaena lala, nepisaluḡaria, vanon naḡa merarava ruru nena po naḡa ya ne naga kila, ana pe mesmesu re poli. ¹² Nanua sumo, Pita kila mesmes ga naḡa naga sumo kinana ke ga amio kieta wolai lala naḡa la pe ape le Yu re poli, ana siraunia, Semes mligan kiena yeririna la ḡasia apim gar Yerusalem, ana la apis pa Pita, apisa apisape “La naḡa pe ape le Yu re poli, la m̄ena ga monar ave ḡaviu, ana visae peraga, Ntewa naga taḡatete tamalia la.” Visena nene naga pe taveve re nena ya naḡa viorena keviu naga pisa ḡesan poli, ana kila kare sitomena kiena ne Pita kila naga marau, ana naga pe kekaran re si su lele taaga amio nalelagaena la nene naḡa la pe ape ḡaviu re poli. ¹³ A pe Pita re ga naga taaga poli, ana kieta wolai m̄ena la nae e yo nene, naḡa la ape le Yu, pimi tol m̄ena ga ḡanaḡas, la nene ataveve m̄ena Pita e sitomena na marauena nene. ¹⁴ Ana pogos naḡa nepisu la nene asuḡna amial ke e mrapa tai naḡa pe mesmesu re amio ya naḡa lologena wo pisa poli, inu nepis m̄arera pa Pita e marala, ne pisa sanini nepisape “Pita, lelaga kemua naḡa ko ope le Yu tai, ana po paḡisi ana ko osuḡna naḡa nanua sumo rui, naḡa okekaran m̄ena ga ḡelaga kiena ne yar taḡena la rui, naḡa ko okinana ga lele taaga amio la ḡisi rui. ?Ana sanapen nanagane narui, naḡa ko osape oḡareran ke sina ga la nene naḡa la pe ape le Yu re poli opisape la monar ataveve kieta ḡelaga ita le Yu lala, naḡa opisape la m̄ena ga la monar ave ḡaviu ve sa ke ga ita?”

Yaru ai naḡa piawa e Yesu, Ntewa tamalia naga

¹⁵ A e pogos nene, in na nepisa ruru pan la sanene nepisape, “Ita punu ga na, ita tepe lus kemua kiena ne le Yu lala. Ita na pe tepe yaru taḡena re la poli, sane la naḡa le Yu la moki asitom asape ape kororaki ga.” ¹⁶ Peraga, ita tepe le Yu kemua lelaga, ana nanagane, ita tekilia rui, sa naḡa yaru taḡatete mesmesu amio Ntewa, vanon naḡa naga suḡna taveve ruru ke ga navisaluaena kiena ne Mosis. Yaru ga naḡa naga mlelaga e Yesu Kristo, naga ga kilia mesmesu amio Ntewa. Sitomena nena nene narui kila ita le Yu lala ita m̄ena ga monar telelaga ga e Yesu vena ita m̄ena ga temesmesu temio Ntewa. Ana amiu monar akilia ruru visena nene naḡa Visena Wa kiena ne Ntewa pisa, naḡa pisa pisape pe yaru re tai naḡa naga kilia mesmesu amio Ntewa poli vanon naḡa naga suḡna taveve ruru ke navisaluaena nene.

¹⁷ Ana ita le Yu lala, ita tesitom ke tesape temesmesu temio Ntewa narui, ana pe sa re nene poli. Ana visave lelaga kemua naḡa ita tepe le Yu m̄ena ga, ita monar telelaga ga e Yesu Kristo vena ita temesmesu temio Ntewa, in na nesitom nesape pona yaru laḡasia amloge piowagan visena nene, pona la apisali naḡa apisape visena nene kila sane ita le Yu lala ita tepimi tepe yaru lala na mlamulena viowa maran taaga ga temio la naḡa pe ape le Yu re poli. Ana pona akilali m̄ena ga naḡa apisape ve sanene, nanene naga kana kinasia sane Kristo ke nene narui naga kila ita le Yu lala ita tepimi tepe yaru na mlamulena viowa ga. Ana peraga, pe sa re nena nene poli. ¹⁸ Nanene vanon nanua sumo, in na nesuḡna nekilaroro ke ḡelaga marua lala navisaluaena nene rui, ana visae nagane nevisirlua ke sina ga ḡelaga na taveveen navisaluaena nene, naḡa nesape ita monar teve ḡaviu a ita monar tekila ve sanene vena ita temesmesu temio Ntewa, naga nene kila sane nanua sumo in m̄ena ga nepe yar na kilaroen navisaluaena narui. ¹⁹ Lelaga, Navisaluaena nene naga sinenan pisape kila inu nemare, vanon naḡa nekilaroro ke navisaluaena lala. Ana nanagane Navisaluaena nene naga sa ga sur mare ga tai e inu, inu neḡisin naga rui. Nemligan Navisaluaena nene rui, vena kiau malena su ga e Ntewa narui. Sa naḡa asuar inu e laki torovia nemio Yesu, nemare nemio naga, ²⁰ a nanagane sa ga naḡa pe in re si naḡa nemal ke ne poli, ana Kristo na mal ke e inu. A kiau malena nanagane, naga komin naḡa nepiawa ke e Narina Ntewa, naḡa naga sitom inu paḡisi, naga taḡan kiena malena, naga mare wo inu. ²¹ E ḡelaga nene, tepisu naḡa lemamienna kiena ne Ntewa keviu paḡisi,

ana in na tařatete nařa nekila kiena lemamiēna imi ve sur korena tai, komin nařa visae yar tai kilia mesmesu kemua amio Ntewa vanon taveve navisaluaena, nanene sane Kristo mare kemua na pe suri korena ga.

3

Le Kalesia lala akilalu mrapa

¹ In na nepisu amiu le Kalesia lala sa ga nařa řarimiu pe wowe pa rui. ?Pona yaru lařasia akila male e amiu yo, ana nane amiu apa akila pal mrapa sanene? Inu nepisawal ruru merarava e maramiu řisi rui, sanape nařa Yesu Kristo mare e laki torovia, a nanagane narui amiu apano ape tařena narui. ² In na sineun nesape neviun naviunena tai van amiu sumo wa. Naviunena ne sanini, sape “?Amiu nene, nařa amla Ninuna Wa nanua sumo rui, Ntewa mla pan amiu vanon ya? ?Amiu amlavia komin nařa amiu amlogear navisaluaena la nene kiena ne Mosis?” Peraga, amiu amlavia komin nařa amloge nalologena wo, ana asuřna amlelaga ea. ³ Sumo, amiu asiar malena viu amio Kristo e nařareraena na Ninuna ne Ntewa, a nanagane asitom asape ařisin ga e kiamiu nařareraena ga? !Tařatete ve sanene, peraga! !Amiu asuřna apa ape wowe la narui! ⁴⁻⁵ E kiamiu namalena viu nene, suri wo la moki nařa pimi řmalivi e amiu rui, sa nařa Ntewa naga mla ke kiena ninuna pan amiu, a naga suřna kila ke kile lala e maramiu, ana sanape, pona amiu na pe apisu kilale re poli yo wa sa nařa sur la nene apimi e amiu komin ya. Amiu monar akilia ruru sa nařa Ntewa naga kila ke sanene, pe komin re nařa amiu amlogear ke navisaluaena nene poli, ana komin nařa amiu amloge ga lologena wo, ana amiu amlelaga ea.

?Ya ne po? Navisaluaena, pona naviawaena e Kristo?

⁶ Amiu asitom li yermarua Epraam, nařa Visena Wa kiena ne Ntewa pisayu naga, pisape

“Vanon naga piawa e Ntewa, ana kila naga mesmesu amio Ntewa.” *Nas 15:6*

⁷ Ana yaru tařena la nařa apimi sirau nařa la ařasine Ntewa sanene, la ape lus kiena ne yermarua Epraam kemua la lelaga.

⁸ Ita tekilia tevisu e Visena Wa nařa lologena wo nene nařa ita tesuřna temlelaga ke e nanagane, Ntewa naga pisawal nanua sumo sumo la rui, pogos nařa pisa pa Epraam pisa pisape

“E ko řisi na Suře kilia visa ruru lus kiena ne yeririna lala na yomarava nini.”

Taveve visena nene, Visena Wa kiena ne Ntewa pisaar řmena ga rui pisape řisi na Ntewa kilia kila yaru lala nařa pe ape le Yu re poli a mesmesu amio naga, visave apiawa e naga.

⁹ Ana la nařa la apiawa ke e naga sanene, ana kana kinasa sa nařa Ntewa naga pisa ruru la ke nanagane, sa nařa naga pisa ruru Epraam sumo, komin nařa naga piawa e Ntewa.

¹⁰ Ana la nařa asitom ke asape yoko akilia atol malena komin nařa la asuřna akilali ke nařa alogear navisaluaena lala, la nene la asike vatanon naliřereen tai rui, komin nařa pe yaru re tai nařa mlogear make navisaluaena la nene poli, a Visena Wa kiena ne Ntewa pisa pisape,

“Yaru la nařa la pe amlogear re sur la punu ga nařa asike e tusi navisaluaena poli, la monar atol nakoena.”

¹¹ Sanene narui ana merarava ruru pan ita nařa yaru tařatete imi mesmesu amio Ntewa komin nařa naga logear ga navisaluaena nene ana sa nařa Visena Wa kiena ne Ntewa naga pisa nařa pisa pisape

“Yaru nařa naga mesmesu amio Ntewa komin nařa naga piawa e Ntewa, naga ga kilia mali.”

¹² Visena ne na nene naga pisayu řelaga naviawaena, a ita tekilia tevisu nařa řelaga kiena ne naviawaena nene amio řelaga na nalogearena e navisaluaena, lalua pe maran taaga re nenaga. Nanene komin nařa řelaga na logearena Navisaluaena, naga suřnalu se lepas na suri la punu ga nařa yaru ga kilia kila sa nařa visena wa pisa, nařa pisape yaru ga nařa kila punu sur la nařa navisaluaena pisa, naga kilia tol malena ea.

¹³ Ana komin naþa ita na pe yaru re tai naþa naga kila punu sur la naþa navisaluaena nene pisa poli, ana Navisaluaena nene naga pisaar nakoena amio marena pan ita punu ga. Ana Kristo naga pitomi narui, þurelua ita e naliþereena nene, tañan naga kus leleta, ana naga pa sike vatanon naliþereena nene, naga nene na sa naþa Visena Wa pisa, naþa pisape

“Yaru naþa apiar naga atelania mon metava e purlaki, vena mare komin naþa naga sike vatanon e naliþereena kiena ne Ntewa.”

¹⁴ Kristo tañan naga sanene, vena la naþa pe ape le Yu re poli, la mēna ga akilia atol navisa ruruena la nene naþa Ntewa naga pisaar pan Epraam, ana suri nena nene kila sane nanagane ita naþa tepiawa mārera e Kristo, ita tekilia tela Ninuna Wa nene naþa Ntewa pisaaria pisape la van yeririna lala.

Navisaarena pimi sumo, Navisaluaena naga pimi sirau

¹⁵ Wolai lala a vineu lala. Yoko nevisa suniena tai e ga e kieta malena naþa kana kinasa pa lavisin ga navisaarena nene kiena ne Ntewa naþa pa Epraam. Visae yaru tai visawal maron kiena visena, visave pogos naþa nemare, yoko kiau sur lala naga monar ve sa nene ve sa nene, ana naga siriar kiena navisaarena nene sike e maki tai, ana pogos naþa visave naga kovio, la taþatete avilopu kiena navisaarena nene. ¹⁶ Pogaga, ana sanene, Ntewa kila kiena navisaarena pa Epraam, a e kiena lusia. Ana e visen nene pe pisa re pisape Ntewa naga kila kiena visaarena e “Lus kiena ne Epraam la poli,” naþa kana kinasa sane yeririna moki, naga pisa sanini, pisape “E kiena lus tai,” naþa naga pisa sane yaru taaga ga, a yaru nane, naga Kristo.

¹⁷ Kiau visena e lepas nene kana kinas sanini nanua sumo Ntewa naga pranaria amio Epraam, a Ntewa pisaar pisape uarar kiena naviranarena lalua nene mārera. Ana siraunia kas ponotia vari lualima yam telu þarovia þisi rui, ana navisaluaena kiena ne Mosis pimi mālivi ana navisaluaena nene naga taþatete kilaro naviranarena nene naþa sike pa rui, taþatete si kilia yumulua naviranarena kiena ne Ntewa. ¹⁸ Ana visae ita tekilia tetol navisa ruruena lala kiena ne Ntewa komin naþa ita tesuñna tetaveve ke ga Navisaluaena nene, naþa naga pe sur tai naþa pimi ga sirau, nanene naga kana kinasa sa naþa navisaarena kiena ne Ntewa nene naþa su la nanua sumo rui, naga pimi korena ga. Ana ita tepisu naþa Epraam naga tol navisa ruruena lala kiena ne Ntewa nene, komin ga naþa naga þuarar ruru navisaarena kiena ne Ntewa, pe komin re Navisaluaena poli, komin e kiena pogosia, Navisaluaena pe pimi mālivi re poli wa.

Navisaluaena naga kiena yuñnaena suñna ga

¹⁹ Poga, ana pona kana naviunena toñna ga, naþa pisa pisape “?Ve sanene, Ntewa mligan Navisaluaena kiena ne Mosis nene pe na ya pona komin ya?” Pogaga, nevisa van amiu narui, sanini, Suþe naga mligan ke sina ga Navisaluaena nene to metavan kiena naviranarena, vena iila ita yeririna lala tekilia tevisu kilale kieta mlamulena viowa lala. Ntewa mligan navisaluaena nene vena suñnalal su mñaga, vano vano tol pogos naþa yar nene naþa pe lus kiena ne Epraam, naþa Ntewa pisaar pan imimi pimi mālivin ita.

Ana ita tepisu naþa Navisaluaena naga kiena yuñnaena wo tanea toñna ga. Ana ita monar tesitoñalia sane Navisaluaena nene, pogos naþa pimi mālivi, kom þesan puna ne navisi kiena ne Ntewa lala, siraunia amla pan yaru tai, naþa Mosis, ana naga mla pimi mla pan yeririna lala. Ana pogos naþa Ntewa naga kila naviranarena nene amio Epraam, nanene na pe sa re nene poli. ²⁰ Ana pogos naþa lalua nene apiran ruru ke kiela visena lele taaga, ana pe navisi re poli pona yaru taþena naþa suñna likan lalua vena la visena, ana Ntewa naga ga taaga naga pisawal kiena navisaarena nene mesmesu e marana ne Epraam.

²¹ A nanene naga pe sa re naþa asape Navisaluaena nene kilali naþa kalwo navisaarena kiena ne Suþe poli, peraga. Komin naþa visae Suþe naga kilia la si navisaluaena taþena naþa visae ita telogear make ga ana kilia kila ita temali, pona naga mligan navisaluaena

nene pimi yo rui vena ita tekilia temesmesu temio naga. ²² Ana pe sur tai sa re sanene poli, komin naŕa Visena Wa pisa ŕisi rui pisape ita punu ga tesike vatanon naŕareraena na mlamulena viowa, ita tesuŕna tekilaro ke ga navisaluaena lala. Ana navisa ruruena naŕa Ntewa pisaar pisape yoko ligan imi, la akilia aimi la aŕalivi e ita komin ga naŕa ita tepiawa ke e Yesu Kristo.

Pogos na wasineen Kristo pimi ŕalivi rui

²³ Sumo rui, pimi tol nanagane tekilia tepiawa e Kristo, navisaluaena kiena ne Mosis nene piar ita ŕarera pa ŕisi, sa ga naŕa tesike e yuŕna na koaena rui. ²⁴ Navisaluaena nene, naga sane pisuar ita, sa ga kieta navianena tai, pimi tol pogos naŕa Kristo pimi, vena e pogos nene, ita tekilia teviawa e naga narui ana tekilia temesmesu temio Ntewa. ²⁵ Ana nanagane, Navisaluaena nene taŕatete si kilia visuar ita, komin naŕa pogos na viawaena e Kristo naga pimi ŕalivi ŕisi rui.

Amiu punu ga ave taaga e Kristo narui

²⁶ Ana komin naŕa amiu apiawa e Kristo Yesu, ana amiu punu ga amio Kristo ape narina ne Ntewa. ²⁷ Akee amiu ŕisi rui, ana amiu apimi ape taaga amio naga, sa naŕa amiu akus ŕelaga wo kiena ne Kristo lala e amiu, sa naŕa amiu amien kulsota lala e yepemiu. ²⁸ Nanagane amiu punu ga apimi ape taaga ga e Kristo Yesu, suri ne na nene narui, amiu punu ga atorok ga. Popon ita monar ve teliŕere re si yaru lala, tevisave nanene pe Yu, a nanene pe yaru nae ga lele taŕena, pona tevisave nanene pe yerkaawa, a nene naga pe yar nayuŕnaena ga, pona sane nanene pe yerŕene, ana nanene naga pe sira ga. Ana ŕelaga nene monar ve to re si e amiu. ²⁹ A komin naŕa amiu ape kiena ne Kristo sanene, amiu ke la nanene narui amiu ape lus kiena ne Epraam kemua lelaga, a ve sanene, navisa ruruena lala naŕa Ntewa naga pisaaria pa lus lala kiena ne Epraam, ŕisi na amiu ke narui amiu akusia.

4

Ita tepe narina ne Ntewa

¹ Ana ŕisi na nevisa re laa e kieta ŕelaga nene sane vena nevisa ruru laa merarava sane e lepas nen Navisaluaena nene. Visae yaru tai, ana naga mare, ŕisi na narina naga kus kiena suri lala. Ana visave nisisi nene vitokaki ke ga wa, ŕisi na naga taŕatete kilia visuar sur la nene. Naga sa ga yaru na yuŕnaena kiena ne ariman ga, ² naŕa ŕisi na naga monar suŕna ga vatano e liman yaru taŕena ga lala, sane arimana taŕena la nene, vano vano tol mesmesun nena pogos naŕa arimana naga pisawal sumo rui, pisape naga kilia uarar sur la nene e pog nene. ³ E ŕena ga e ita sanene, naŕa sumo, ita na sa ga nisisi, naŕa ita kieta sitomena lala sike ga vatano e yermare lala na sumo na yomarava nini. ⁴ Ana pimi tol ruru kana pogos nena, Ntewa naga mligan narina pimi, naŕa sira tai naga ŕaria, paeme e yomarava nini, naŕa naga paeme vatano e Navisaluaena kiena ne le Yu lala. ⁵ Naga paeme vatanon Navisaluaena nene, kapur ea, vena naga kilia wereplan imimi la naŕa la asike vatano e Navisaluaena nene rui, vena Ntewa kuslua ita, teimi teve narina lala.

⁶ Ana nanagane, sa naŕa ita tepim tepe narina lala, naga mligan Ninuna kiena ne narina pimi e losineta lala, naŕa kila ita tekilia tevio Ntewa, tevisave "Ata Ata." ⁷ Komin sur ne nanene, amiu na pe sa re si yar na yuŕnaena ga la poli, ana amiu na ape narin Ntewa kemua lelaga, naŕa ŕisi na naga la suri wo van amiu sa naŕa naga pisaar pa narina lala pisape ŕisi na la akusia.

Pol sinena mie le Kalesia lala

⁸ Nanua sumo, pogos naŕa amiu pe akilia re Ntewa poli wa, amiu asike ga vatanon naŕareraena kiena ne yermare la nene naŕa pe ape Ntewa re nenaga, ⁹ ana nanagane, amiu akilia Ntewa ŕisi rui, pona popon nevisa nevisave nanagane, Ntewa kilia amiu rui. Ana inu sineun nesape neviun tan amiu, nesape komin ya ne amiu sinemiun awasuŕe sina ga ava puna ne yermare la nene nanua sumo, naŕa la pe aŕarera re poli, a naŕa la

taĵatete akilia akila wo van amiu pogos tai? ?Vanon ya ne amiu sinemiun asape asu ke sina ga vatanon kiela naĵareraena? ¹⁰ ?Sanape na amiu asuĵna asitoĵnal ke legiena wa lala kiena ne la nene, a kiela kupario wa lala, a kiela pogos wa lala, a kiela kas wa sanene? Asitom asape ĵisi na Suĵe kekaran amiu vanonia? ¹¹ !Aulai, akila inu nemaraun amiu paĵisi! !Pona nemiyuĵnae ĵarera pan amiu paĵisi ana nepisu sane pe sur korena ga!

¹²⁻¹³ Wolai lala a vineu lala, nanua sumo kam na pe asu re vatanon navisaluaena poli, ana pogos naĵa nepim nesike nemio amiu, in na nekila inu ĵena ga nesa ga amiu. Ana nanagane, nemloge asape amiu sinemiun asape awasuĵe si ava e ĵelaga na navisaluaena nene, a vanon sur ne nanene nepiun ĵareran tan amiu vena amiu na aimi ve sa ga in narui, naĵa in na pe nesu re si vatanon Navisaluaena nene poli. Amiu asitoĵnali pogos naĵa in na nemlologo pan amiu sumo, naĵa kiau maiena ga kila narui noĵnal pulmas naĵa nesike nemio amiu, ana pe sur korena ga naĵa nemai e pogos nene, ana amiu na pe akila re nemloge piowa poli. ¹⁴ Peraga, ana kiau maiena nene kila kare amiu keviu wa, ana amiu pe amloge re piowa e inu poli, a pe asitom re ĵena piowa e inu poli, peraga. Amiu aĵure inu nepa e ĵamiu yuĵna lala, sa naĵa visave in na neve navisi kiena ne Suĵe tai, pona sa ga in na Yesu Kristo lelaga. ¹⁵ Sumo, amiu akekaran inu paĵisi, naĵa nepisu sa naĵa visave amiu akilia akila, pona amiu akekaran naĵa aurelua kilamaramiu vena aligan te kilamarau, vena iila inu. ?Ana sanape nanagane narui? ¹⁶ Pona nenagane, kiau visena lelaga la nene, akila inu nepimi sane kiamiu erau viowa sina. ?Ana ya ne sanene?

¹⁷ Yaru taĵena la nene naĵa nemloge apisape la asike amio amiu nanagane, ana la nene asuĵna apilonvilon ke lologena wo kiena ne Kristo, la apimi asuĵna veraga amio amiu vena ave erau wo amio amiu, vena akila amiu asu vatanon la, ana nanene la akila kotalia amiu ga ne. Komin naĵa la sinelan asape aure lua amiu ga vetan inu. ¹⁸ Ana pe nepisa re nesape vena in ga taaga ga nekilia nesuĵna nemio amiu poli, vena in ga taaga teve erau wo, komin naĵa ĵelaga nene naĵa na erau wo amio yaru taĵena, naga wo silaga, ana popon sane nakilaen ga yuĵnaena wo lala.

¹⁹ Naruu lala, inu na sane sira tai naĵa ĵeĵena mlaea vena war sisi, sa naĵa nesuĵna nemloge piowa paĵisi vanon amiu, nesuĵna nemiyuĵnae ĵarera pan amiu paĵisi vena amiu ala Kristo amio kiena ĵelaga wo lala e kiamiu malena. ²⁰ Aulai, visae nesuĵna nemio amiu nanagane, nanene na kila inu neloge wo paĵisi. Visae ve sanene, ĵisi na nekilia nevilon li laa kiau visena vito tano sane, ana nanagane naĵa nesike perinan amiu sanene, inu pe nekilia re si po la rui sane aĵna sanapen amiu narui.

Suniena kiena Eka amio Serai

²¹ Amiu laĵas naĵa sinelan asape ita na monar telogear kieta Navisaluaena vena ita ve sa ke Ntewa, inu sineun nesape la avisataĵne kiau naviunena tai, sape “?Navisaluaena naĵa apisayuia, la asuĵna amloge kilale ke ya naĵa Navisaluaena nene pisa pona pe apisu kilale re poli?” ²² Visena wa nene pisayu ke yermarua Epraam nene, naĵa naga narina na yermene lua, naĵa tai, sira naĵa miyuĵnae kiena ne wona naĵa Eka naga ĵaria, a narin taĵena tai naga wona ruru napo naĵa Sera naga ĵar maronia. ²³ Naga naĵa paeme sirau, kiena kia Aisak, naga paeme komin naĵa Ntewa pisaaria, a naĵa naga paeme sumo, kiena kia Isĵnael, naĵa sira na yuĵnaena nene naga ĵaria, naga paeme ga sa ga nene. ²⁴⁻²⁵ Ana ita tekilia tela suniena nene sa naĵa ĵakaiwa tai, naĵa sira la lua nene, lalua na sa naĵa naviranarena lua naĵa Ntewa naga kila. Sira naĵa Eka naga sa ga naviranarena naĵa Ntewa kila e tavie keviu nae Sinae, nanene na e purvanua naĵa Arepia, yo ne nanene naĵa Ntewa mla Navisaluaena nene pa Mosis ea. Eka nene, naga pe sira na yuĵnaena ga tai, a narina ĵena ga lala la ape yaru na yuĵnaena ke ĵena ga lala. Sanene, Eka ĵena ga naga na sa ĵena ga pulkumali keviu naĵa Yerusalem, naĵa kana yaru ne lala apuarar Navisaluaena lala ĵarera, ana la sa naĵa ape yaru na yuĵnaena ke ĵena ga, komin naĵa la asike vatanon navisaluaena nene narui. ²⁶ Ana sira taĵena nene, naĵa Sera, pe yaru re tai naĵa ĵuarar e yuĵnaena poli, naga ga, a naga nene naga sane Yerusalem taĵena nene, naĵa pe Yerusalem nae ma e peni. A narina ne Sera lala, la ĵena ga la pe yaru re tai naĵa

ṽuarar la vena ayuṽnae poli ana la ṽna ga asuṽna ga sanene, kila sane Sera nene sane aneta naṽa ita tepiawa e Kristo. ²⁷ Visena Wa pisayu li ṽna sur la nene naṽa pisa pisape, “Sira nene, ko naṽa sumo na ko ope luṽaluṽna ga, naṽa mopoṽna pe mlaeli re pogos tai poli vena waren sisi, nanagane ko omloge po, ko okekara ko omiau, komin naṽa woṽna na yerṽene mligan ko rui ana nanagane naruṽna lala apimi ape moki la narui, ataulu la naṽa sira naṽa wona suṽna amio naga silaga naga ṽar la.” *Ais 54:1*

²⁸ Visena nene naga sa naṽa Ntewa naga pisaaria pisape yoko narina la ve moki, na ve moki a amiu kiau wolai lala a vineu lala, ita ke ga na ita tepe narina ne navisaarena kiena ne Ntewa nene narui, sa ke ga naṽa kiena navisaarena nanua sumo naṽa kila Sera ṽar narina naṽa Aisak. ²⁹ Ana pogos naṽa Aisak paeme sumo, sisi taṽena nene naṽa Isṽael naga paeme sa ga nene, naga suṽna ṽene nisisi nene naṽa Aisak naṽa naga paeme e yuṽnaena na Ninuna Wa kiena ne Ntewa. Ana pimi tol nanagane, tepisu ṽelaga sa ke ga nene na wa. ³⁰ ?Ana Visena Wa pisa sanape? Naga pisape Ntewa pisi pa Epraam, pisa pisape “Ko monar okuwanlua sira naṽa naga pe sira na yuṽnaena ga nene amio narina, komin naṽa narina nene, naga pe torokin re si naṽa la sur tai e kioṽna sur la poli. Sur la punu ga monar va ga e limana narina naṽa sira naṽa naga ga naṽa woṽna naapo.”

³¹ Poga, erau lala, Ntewa pisa sanini, a inu nevisa van amiu nagane nesape ita nini, ita pe tesa re narina ne sira naṽa na yuṽnaena poli, naṽa ita tesike vatano e Navisaluaena kiena ne Mosis, ana peraga, ita na sane tepe narina ne sira naṽa naga suṽna ga sanene, sa naṽa sane ita na temlelaga ga e Yesu. A sur la naṽa Ntewa naga pisaar pa narina na lelaga lala, ṽisi na ita ke ga na yokorena tokus narui.

5

Yesu pure plan pa nalelagaena la rui

¹ Pogos naṽa Kristo ṽurelua ita, naga kila sanene vena tomolue, naṽa ita tomolue lue, ana vena ita ve towasuṽe ita re si teva tesuṽna vatanon Navisaluaena kiena ne Mosis nene poli. Ve sanene, monar aviawa ṽarera, vena ve aṽareran amiu re si sa naṽa amiu na sa ga yaru na yuṽnaen lala, naṽa Navisaluaena nene piar manene ruru amiu ke sina ga.

² Amiu na ayagogo ruru e visena nene naṽa inu Pol nesuṽna nepisa ke pan amiu. Visae amiu ataṽan la aṽareran amiu avisave amiu ave ṽaviu, ṽisi na yuṽnaena nene naṽa Kristo naga kila ṽisi rui taṽatete iila amiu. ³ Ee, nepisa ke sina ga visena ṽarera nene pan amiu, nepisape visae yaru naṽa taṽan naga ve ṽaviu, naga ga suṽna mligan ke sina ga naga sike vatano e Navisaluaena nene. A yaru naṽa sike vatanon Navisaluaena sanene, naga monar visuar ruru naga naṽa naga logear sur punu ga naṽa Navisaluaena nene naga pisa, visae peraga, yoko naga tol nakoena. ⁴ Amiu la ṽasia nene naṽa asuṽna akilali naṽa alogear Navisaluaena nene rui, vena amesmesu amio Ntewa vanonia, amiu la nene asuṽna ate plan amiu ke e Yesu rui, amiu apilon ṽasimiu rui e lemamienna kiena ne Ntewa. ⁵ Ana ita na, ita tesuṽna sinetan manene tesape ṽisi na Suṽe kila ita temesmesu ruru temio naga, komin ga naṽa ita tepiawa ga e naga, a pogos naṽa ita tesuṽmate ke ga wa, Ninuna Wa naga suṽna miila ita temlelaga ṽarera, tesape ṽisi na Suṽe naga monar kila sanene van ita. ⁶ Pogos naṽa ita tepimi tepe taaga temio Kristo Yesu sanene pe sur korena ga naṽa yaru naga pe ṽaviu pona pe pe ṽaviu re poli, ana sur keviu na e lepas nene nane kiet naviawaena e Kristo naṽa naviawaena nene naga kila ita tesitom Suṽe, a ita tesitom ṽna ga yeririna taṽena lala.

⁷⁻⁸ Sumo na nepisu amiu akiriri na po paṽisi wa, ana nanagane, pe sa re si nene poli. Suṽe naga pio amiu sumo ṽisi rui, ana sineun neviun nevisave yeririna ai nene naṽa naga suwo amiu sina ga, naga kila amiu pe amlelaga re si e visena lelaga poli? !Pe Ntewa re nena poli! ⁹ Navianena viowa nene naṽa kila kare kiamiu sitomena naga sa naṽa visena pisa pisape “Narin korme ga, ana naga kilia kila kare kilaṽiu la melkalka vaṽisi.” ¹⁰ Ana sa naṽa amiu amio inu, ita tepimi tepe taaga e Ntewa, nesuṽna nemlelaga ṽarera ke e

amiu na wa sa naþa þisi na ita kieta sitomena ve taaga, sa naþa ita ve toþmareran re si li na lelagaena lala naþa la pe ape Yu re poli tevisave la monar ave þaviu. A nemlelaga mēna ga mārera ke ga wa nesape yeririna nene naþa suþna kila kare amiu ke sanene pe sur korena ga naþa naga pe yeririna ya, þisi na Suþe naga la nakoena vania.

¹¹ Puruvi lala a vineu lala. Visena laþasia pisa ke pisape inu mēna ga nesuþna nemlologon ke ga wa nesape li nalelagaena mēna ga lala monar ave þaviu vena Ntewa kilia tamalia la, ana visena nene pe pe lelaga re poli. Visae nelologon ve sanene þisi na yeririna la nene naþa asike amio amiu akekaran in ga. Ana amiu apisu ke ne, la asuþna sinela karin ke na wa, komin naþa kiau navisawalena e laki torovia naga suþna yumulua kiela sitomena lala. ¹² Inu na nesitom ke nesape yar la nene naþa la asuþna apilovilopu amiu ke sanene, akila ke sinemiu kurkur naþa la sinelan manene asape monar ave þaviu, popon ala playu ana asila ke sina ga, akila kare rurula ke sina ga.

¹³ Ana amiu naþa kiau erau lala, lelaga paþisi naþa Suþe pure lua amiu rui, amiu pe asu re si vatano e Navisaluaena kiena ne Mosis la nene poli. Ana maraþne amiu, avisuar ruru amiu, ve asitom re avisave, “Pogaga nene narui, in na nomolue e navisaluaena nene rui, inu ga taaga narui. Þisi na nekilia nekila sur punu ga naþa kiau sitomena sinenan narui.” Amiu ve avisa re sanene, ana þisi na kiamiu sitomen wo naga monar kila amiu akekaran naþa aiila yeririna taþena. ¹⁴ Þelaga na sanene naga taveve ruru visena tai naþa Navisaluaena naga pisa, naþa naga kalo ruru visena taþena lala e Navisaluaena nene, naþa pisa pisape, “Ko ositom nalavis puþna lala, akila wo van la, ve sa ke naþa ko ositom ko mþaga.” ¹⁵ Ana visae amiu ave sa suri mali tetan lala, naþa amiu ga agorua amiu, ana amiu ga asuþna akarkare amiu sanene, ana monar avisuar ruru amiu, þisi na þelaga nene naga kila kare punu amiu ke sina ga.

Þelaga kiena ne Ninuna Wa amio þelaga kiena ne yeririna

¹⁶ Inu sineun nesape nevisa visena nene van amiu. Amiu nene na Ninuna Wa naga monar sumon amiu, amiu na ve ataveve re si kiamiu þelaga marua naþa apaeme amio. ¹⁷ Vanon þelaga nene naþa ita tepaeme temio, naga pe sinenan re þelaga kiena ne Ninuna Wa poli, a þelaga kiena ne Ninuna Wa naga pe kekaran re þelaga nene naþa ita tepaeme temio poli. Suri nene naga sa naþa þelaga la lua nene sane la lua ape nasinekar la ga, ana sur ne na nene narui, visae Ninuna Wa suþna sumon amiu, taþatete si amiu akilia akila ga ya naþa kiamiu sitomena sinenania. ¹⁸ Ana amiu monar ve sinemiu þesan re mēna ga naþa visae Ninuna Wa naga suþna sumon amiu, ana amiu ve asu re si vatano e Navisaluaena nene narui.

¹⁹ Yuþnaena la na þelaga nene naþa yeririna lala la apaeme amio naga merarava ruru ga. Yuþnaena la nene la ne nanene narui sa naþa nataþaen lau, a sur la naþa namawaena, a þelaga namname ga lala, ²⁰ amio nalotunen nono lala, amio nawarena kimi. Amio mēna ga, nagorualaena lala, namaraena lala, navielueena lala, nasinekarena lala, napuluvisena lala, naliliþereena lala, nakaween yaru lala, ²¹ a nasinesuniena lala, amio namunen wii keviu, a naþaagena viowa lala, amio mēna sur taþena la sanene. Ana nevisawal sina ga van amiu, sa naþa nepisawal pan amiu sumo rui, nesape amiu avisuaria vanon yaru naþa suþna kila ke þelaga la sa nene, þisi na naga taþatete su e nasuþnenena kien Suþe pogos tai.

²² Ana mras naþa Ninuna Wa kila pitovi e malena kiena ne yeririna naga sane: nasitomiēna, a nakekarena, a nasuþmareena, a namalumena, a nasinewoena, a nawoena, a nayepeþnaena, ²³ a navatanoena, a nawanaren sine. Þelaga la nene na po paþisi, a pe visena navisaluaena re tai naþa pisa luþar amiu pisape amiu ve akila re si suri la nene. ²⁴ Ana þelaga naþa ita tepaeme temio, amio kiena nasinenanena viowa la nene, ita tesuaria e laki torovia þisi rui. Nanene, ita naþa tepe kiena Kristo Yesu, ita temligan sur la nene þisi rui.

²⁵ Ana komin naþa ita temali e Ninuna Wa, popon ita teyali m̃ena ga e kiena þelaga wo lala. ²⁶ Pe pon re towarwar ita poli, pona ita ga tekilaweke ke sina ga naþa sineta mimi, pona ita ga tesuþa tepieluen ita ke sina ga.

6

Amiu punu ga monar aiila amiu

¹ Kiau wolai lala a vineu lala, visae amiu yar tai naga loru e mlamulena viowa, popon amiu naþa Ninuna ne Ntewa teke e amiu, amiu monar aiila naga vena akila ruru ke sina ga naga. Ana amiu monar avis malumu ga vania, sa naþa amiu sinemiu miye naga, a amiu monar avisuar ruru amiu m̃ena ga, vena sur naþa amiu akila ruru yaru taþena nene vanonia ve imi kila li amiu re m̃ena ga. ² Amiu na monar aiila amiu ve sa nene narui vena akuspae ga naurmiena kiena ne amiu taþena lala. Ve sanene sane amiu asuþa amlogear ke ya naþa navisaluaena kiena Kristo naga pisa ke narui. ³ Ana taþatete si avilave van amiu, sa naþa yaru tai suþa sitom ke naga pisape “In na yar tai nini.” Visae ve sanene yaru nene naga suþa pisa kotalia ke sina ga naga ne, komin naþa naga pe pisu kilia re sape naga pe pe yaru re tai nene poli. ⁴⁻⁵ Ana amiu punu ga monar amiu veve taaga avisu veve ruruli kiamiu yuþaena lala naþa akila. Visae sanene, yaru tai taþatete kilali visu veveli sa naþa kiena yuþaena po taulu yar taþena lala, ana naga monar visu veve kiena yuþaena naga taaga. A visae kiena yuþaena nene po, naga kilia kekara narui, komin kiena yuþaena wo nene. Komin naþa yaru punu ga pe maran taaga re poli, la kiela naurmiena taþena lala peve taaga naþa la akus ke e kiela malena lala.

⁶ Amiu naþa asuþa apian amiu ke e visena nalelagaena, pogos naþa visae amiu alual narin sur tai popon amiu avion van amiu amio kiamiu navianena lala.

⁷ Amiu avisuaria, ve avisa kotalia amiu re sina ga. Ko taþatete ootoroun Ntewa. Kurus nen ya naþa omapila e kioþa lokove, naga kana mras ke naþa þisi na ko ga okan narui. ⁸ Yar naþa mapila þelaga naþa naga paeme amio, yoko naga sane kurus nen sur tai e kiena malena, þisi na naga war mras viowa lala e þelaga nene, naþa marena napiowa ga, ana visae naga mapila þelaga kiena Ninuna Wa e kiena malena, þisi na Ninuna Wa naga la kinanena marua lala naþa po vania, naþa naga pe malena naþa ve uro re. ⁹ Ana þisi na ita tekilia towar kinanena wo lala e ruru e kana pogos naþa marua, visave ita ve teligan re yuþaena. Ve sanene, ita na monar ve sineta maren re naþa tekila þelaga wo lala, ¹⁰ ana ita na monar sineta wo va yaru lala silaga, a monar sineta wo va laa sane va la naþa ita tepe mratava taaga temio la e Kristo.

Visena maro kiena ne Pol

¹¹ Poga, þisi na inu nesiri maron kiau visena la nene e ga e luþau, nane amiu akilia avisu kana mras nen visena lala kerkeviu sanene. ¹² Inu sineun nesape nevisa sanini, la naþa sinelan asape aþareran amiu ave þaviu, nanene naga sa naþa la sinelan ga vilaveena komin sur la naþa na kulus nen yaru ga. Ana la sinelan asape akila sanene komin sur taaga ga, naþa la sinela asape la akilia aligan nalologonena na laki torovia kiena ne Kristo naþa kilia tamalia ita. Visena nene la yepel mavinia komin naþa la amaraun asape saþisi la asuþa alologon lologena wo na marena kiena ne Yesu naga mesmesu ve sa nene, þisi na yar taþena laþasia aþene la. ¹³ A la nene naþa la sinelan asape amiu monar ave þaviu, la sinelan m̃ena ga ve sanene vena þisi na la akilia awarwar lan avisave la ataulu amiu þisi rui, naþa la amligan amiu apito si vatano e Navisaluaena kiena ne le Yu lala. Ana amiu na avisu rurua, komin naþa la m̃ena nene la pe asuþa amlogear re si sur la punu naþa Navisaluaena nene pisa poli.

¹⁴ Ana e inu, pe sur re tai naþa sineun nesape nowarwar inu e poli, ana e ga e laki torovia kiena ne kieta Suþe Yesu Kristo, in na neþarwar inu ea, komin kiena marena nene kila þelaga lala na yomarava nini la apimi sane sur mare ga e inu, a kila inu m̃ena ga nepimi sa ga yar mare ga tai e þelaga lala nataþaliena na yomarava nini.

¹⁵ Naþa yar tai imi mesmesu amio Ntewa, ana pe sur korena ga naþa yar nene naga pe þaviu pona pe pe þaviu re poli, ana visae Ntewa naga sii ke sina ga yar nene imi ve yar viu sumo wa, ana þisi na yar nene kilia imi mesmesu amio naga. ¹⁶ A naga narui in na nelen wo la naþa þisi na alogear visena la nene, naþa þisi na aimi ave le Israel kemua lelaga lala kiena ne Ntewa, nesape suñarena kiena ne Ntewa a kiena nasineyeena sike amio la.

¹⁷ Kiau visena naga loka ga nene. Ana in na pe sineun re si naþa þisi na yar tai kila ke sina viowa van inu sanene poli, komin naþa nesuñna noþar ke piakapila kiena ne Kristo e tasneu rui, sa naþa la akove inu a la aiñe inu.

¹⁸ Wolai lala a vineu lala, nemlen nesape þisi na nasineyeena kiena ne kieta Suþe Yesu Kristo naga sike amio ninumi la punu ga,
Sanene.

Ñaki Naña Pol Siria Pa Pan
 Li Nalelagaen Wa Lala Nae Garu
 EPISAS
 Visayuena Na Tusi Nene

Komþasnen suniena plas na tusi nini

Purþesnen sitomiena naña Pol pisayuia e ñaki nini naña naga siria pan li nalelagaena lala garu Episas, nanini visena tai naña siria teke marana na keviu taaga na vetokaki lualima [1:10], naña pisayu na maplarena keviu kiena Ntewa. Pisape Ntewa sinenan sape suri la naña naga kila, yoko aimi aviranar la lele taaga. Naga sinenan sape suri nae mae peni a nae yomarava yoko asikolia ga amio Kristo, naña naga pe þarin suri makega. Pupia maplarena kiena Ntewa nene, naga miliganaria sape ve kiena yaru makega na yo punuga aimi aviranar la e þegas ve taaga ga e yomarava nini. Visae alelaga e Yesu Kristo, akilia akila sanene, a naga pisa ruru pa yeririna lala kiena Ntewa vena asiar naña akila meraravan maplarena nene e kiela maliena.

E komþasnen ñaki þesa nini, Pol pisayu mrapa naña Ntewa arimata miyuñae ea vena kilaen yeririna makega aimi ave taaga. Naga pisayu þelaga naña Ntewa mligan lua kiena yaru lala, a pisayu naña e Yesu Kristo narina Ntewa, Ntewa piyewo la, a þar plan kiela milamulena viowa ea, kila apimi amesmesu apo. A pisayu ñena naña Ntewa mila Ninuna Wa pan kiena yeririna lala, vena kila meraravanen naña yoko naga la sur la van la, sanaña naga pisaar sape yoko kila. E komþasnen ñaki na lua, Pol pisa pan la naña yoko aulo ñaki nini, sape la monar akila meraravan naña ave taaga amio Kristo, e þelaga naña akilia asikol la ruru amio li nalelagaena taþena lala.

Pol pis pan la e þakaiwa lala, vena kila meraravanen þelaga naña yeririna kiena Ntewa lala asuñna asikol ruru la ke amio Kristo. Naga pisape suñare naga sane tas tai, naña Kristo naga pe þarunia, pona sane yuñna tai, naña Kristo naga pe kemraþe keyowo po na mrapun yuñna nena, pona sane sira tai naña Kristo naga pe wona.

Ntewa sinen sii manene yeririna na yomarava la paþisi, a yaru la apisu kilia sinesiena nene pim kome Kristo. Pupia sinesiena nene kiena Ntewa miyuri sitomiena kiena Pol, ana naga pisawal kiena lelagaena e Kristo e ñaki nini. Ñaki nini kila meraravan þelaga kiena Kristo naña sinen sii ita paþisi, mare vena ulplan ita, viyewo ita, suñna iila ita e kiena lemamienna, a kila ita temesmesu ruru nena ga e marana Ntewa.

Komþasnen tusi la na nini

Visena þesa 1:1-2

Kristo a kiena suñare 1:3—3:21

Malena viu e Kristo 4:1—6:20

Visena maro 6:21-24

Pol siar kiena visena pan la

¹ Inu Pol, naña Ntewa ga naga mligan inu vena neve yaru nalologonen Lologena Wo kiena ne Kristo Yesu, inu nesiri luñaki nini piñasu pan amiu, amiu li nalelagaena lala nae pupia pulkumali naña Episas, naña amiu apiawa ñarera e Kristo Yesu.

² Inu nemlenwo amiu ke nesape þisi na lemamienna a suñarena kiena ne Ntewa Arimata a amio ñena ga kiena ne Yesu Kristo kieta Suþe, suñna amio amiu.

Ntewa naga visa ruru ita e Kristo

³ Popon naña ita teyeluar Ntewa, naña naga Ntewa kiena ne kieta Suþe, Yesu Kristo, a naga pe Arimana ñena ga, vanon naña ita, naña tepe taaga temio Kristo, ana Ntewa naga kila po paþisi pan ita e navisa ruruena wo lala nae ma metava. ⁴ Nanene naga sa

naþa pogos naþa yomarava nini naga pere wa, ana Ntewa naga pisaar ita þisi rui vena ita teve taaga temio Kristo, vena ita teve kiena, a vena kieta malena ikik ruru wo e marana, naþa pe kororaki re e poli. ⁵ Nanua sumo laa rui, kome pupia kiena sitomena, ana Ntewa naga mliganar ita vena kuslua ita sane narina lala, kome Yesu Kristo. Suri nene, Ntewa naga kila sane mesmesun e ya naþa naga pisu sape po, a naga kekaran mēna ga paþisi naþa naga kila. ⁶ !Teyeluar Ntewa vanon kiena pupia lemamiēna nene a vanon mēna ga nalakorenanena wo nene naþa naga mla korenan ga pan ita, naþa pimi kome narina naþa naga sitom paþisi!

⁷ Tana ne narina nene mlau, ana vanon suri nena nene, ita naþa tepe taaga temio Kristo nene, Ntewa naga pure plan ita, naþa naga piēwo kieta mlamulena viowa lala. !Lelaga þa, lemamiēna kiena ne Ntewa e ita keviu manene paþisi, naga pa re laa na wa! ⁸ Ntewa naga pe manmarua paþisi wa, a naga pisu kilale make suria, ⁹ ana naga kekaran naþa taþan ita tekilia kiena sitomena tai naþa naga sane navisawanena tai pan ita sumo. Naga kila sitomena nene pimi merarava ruru e ita narui, a kiena sitomena nene, nayuþaenen suri wo la ve moki imi mþalivi ga e Kristo. ¹⁰ E sitomena nene narui na, Ntewa naga sikol ruru suri punu ga va lele taaga, naþa naga sii la sike ma e peni, a e mēna ga e yomarava nini, la aimi lele taaga vatanon Kristo, ana Ntewa naga yuþaen ruru make suri punu ga torokin kiena sitomena nene, vano vano kilamake ruru ga e kana pog nena naapo.

¹¹ Ana þisi na suri punu ga monar imi mþalivi mesmesun nena ga naþa Ntewa naga sitom ruru ke pisape kila. Ana vena taveve kiena sitomena nene nanua sumo, naga pisaar imimi le Israel lala vena imimi meve kiena, naþa imimi meve taaga memio Kristo. ¹² Imimi ne nanini, Ntewa naga mliganar imimi vena imimi naþa memligan þesan kiamimi sitomena mþarera e Kristo, a visae sanene, popon imimi monar meieluar Ntewa silaga, komin naga po paþisi.

¹³ Ana amiu yeririna taþena mēna ga lala, naþa pe ape le Yu re la poli, amiu amloge visena lelaga nene þisi rui, nanene Lologena Wo naþa amiu atol kiamiu natamaliaena e naga, a amiu amlelaga e Kristo þisi rui, ana amiu apimi ape yeririna kiena ne Ntewa þisi rui. A vanon naþa amiu na ape kiena, Ntewa naga mligan kana kile na suri nene tai e amiu, naþa naga mla Ninuna Wa pan amiu, sa naþa naga pisaaria. ¹⁴ A Ninuna Wa nene, naga sane komsus nen navisaarena na sumo kiena ne Ntewa e ita, vena ita tekilia ruru tesape metavan Ninuna nene, þisi na ita tokus lalimana punu ga ve kieta, nanene na e pogos naþa Ntewa naga wereplan yeririna lala ava puna, nanene na la ga naþa naga pul plan la þisi rui ana la ape kiena. !Ita teyeluar Ntewa, pe mias naga po paþisi!

Leniena Kiena ne Pol

¹⁵⁻¹⁶ Komin suri ne la nanene, silaga e kiau leniena lala, nesuþa nesitoþnal amiu luen ga, a nepisa luen ga potena pan Ntewa vanon amiu. Þelaga nene, nesiar e pogos naþa nemloge naþa amiu apiawa mþarera ke e Yesu, kieta Suþe, a naþa asitom manene mēna ga nalelagaena wa taþena lala, ana pimi tol nanagane, nesuþa nemlen ke sanene. ¹⁷ Sila ga naþa nesuþa ga nemlen ke pa Ntewa, naþa naga pe Ntewa kiena ne Yesu Kristo kieta Suþe, a naþa naga pe Arimata naþa pe naurarena keviu, nesuþa nepiun ke tania vena naga ligan Ninuna na manmaruaena naþa Ninuna na kipianena van amiu, vena akilia Ntewa va ve keviu laa sane.

¹⁸ A nesuþa nepiun ke tania vena naga vike kiamiu sitomena lala, vena avisu kilale kiena yomerarava, vena akilia suri nene naþa Ntewa naga pio amiu vanonia, a naþa kiamiu sitomena monar mþarera vena atol suri nena. Suri la nene, naga lalimana la nene naþa pe kiamiu, sa naþa suri wo la moki naþa Ntewa naga kila ruru sike na, naga pe kiena ne nalelagaena wa lala. ¹⁹ A amio mēna ga naga, monar avisu kilalea a monar akilia ruru pupia naþareraena kiena ne Ntewa, naþa naga suþa miyuþae ke e kieta malena lala, naþa ita temlelaga e naga. ²⁰ Nanene naga naþareraena keviu ke ga nene naþa Ntewa naga miyuþae ea e pogos naþa naga pisirlua Kristo suþalu mali sina ga e marena, ana naþa siraunia, naga þere naga pa mligan naga teke tano e kiena lepas marua

ma e peni. ²¹ Nañareraena nene, naga pa laa metavan ñareraena tañena lala, amio ñena ga suri ñarera tañena lala, amio yerikawa tañena lala, amio nasumonena tañena lala nae ma e peni. Kia kiena ne Kristo naga mon manene laa metavan make kia tañena lala, pe e re ga e yomarava nini poli, ana e ñena ga e yomarava tañena nene naña yoko imi. ²² Ntewa naga mligan suri la punu ga asike vatano e lana ne Kristo rui, a naga mligan lua Kristo pa e kiena suñare wa, ana naga pe ñarin suri la punu ga. ²³ A kiena suñare wa nene, naga sane tasnena ne Kristo, naña naga pule ruru e Kristo, a naña Kristo ga rui naga pule ruru e suri punu ga e yo punu ga.

2

Nanagane ita temal e Kristo

¹ Nanua sumo, ana sa ga naña amiu amare ga, vanon naviowaena lala, a kiamiu mlamulena viowa lala, ² naña e pogos nene, amiu amial ga e ñelaga viowa na yomarava nini. A nanua sumo, ataveve ga suñe nene na nañareraena na yo yau lala, amlogear ga naga narui, naña naga ninuna nene naña naga suña kila ke kiena yuñena e la naña pe amlogear re Ntewa poli. ³ Ana nanua sumo, imimi le Israel ñena ga lala, imimi na maran taaga ga memio yeririna tañena lala, naña imimi mesuña memialoro metaveve ga nasinenanena na ñelaga viowa kiena ne yeririna lala. Imimi ñena ga mesuña mekila ke ga suri la naña kiamimi sitomena la sinemiminia, a suri la naña imimi memloge po ea. Komin suri la nene, imimi na sa ga yeririna tañena ga la nene, naña ñisi na Ntewa naga sinena kar imimi ñena ga, tañatete kila si suri tai van imimi narui, vano vano ñisi na naga monar la nakoena van imimi.

⁴ Ana Ntewa, kiena sineyena a kiena nasitomiena naga keviu pañisi e ita, ⁵ ana pogos naña sane ita na temare ñisi rui vanon kieta mlamulena viowa lala, ana naga kila ita temali temio Kristo. Nanene na lelaga, Ntewa naga tamalia ita kom ga e kiena lemamiena. ⁶ Ana sa naña ita na temali temio Kristo, Ntewa pisirlua ita temio ñena ga naga, ana Ntewa naga mligan ita teto tano temio ñena ga naga e yo nametava.

⁷ Ntewa naga kila sanene vena e pogos la naña apimi ke ne, ñisi na yeririna lala, la akilia avisu kilale sane kiena lemamiena nene naga keviu manene pañisi, naña naga sitom ita sanene kome Kristo Yesu. ⁸ Ntewa naga tamalia amiu e ga e kiena lemamiena, vanon naña apiawa e naga. Suri nene naga pe pimi ñalivi re e kiamiu yuñena wo lañas poli, peraga, Ntewa naga mla korenan ga pan amiu. ⁹ Ana nanene naga pe suri re tai naña yaru kilia yuñae vanon poli, komin visae ve sanene, ñisi na towarwar itan vañisi, tevis vilavenia, tevisave “O inu, in ga netamalia in e kiau yuñena.” ¹⁰ Ita na sane suri wo tai naña Ntewa miyuñeen ruru po pañisi, naña naga sii ita tepimi tepe yaru viu lala e Kristo Yesu, a Ntewa naga kila sanene vena ita tekila ñena ga yuñena wo lala, naña naga mligan ruru sumo rui, vena ita teyuñenia e kieta malena lala.

Ita na teve taaga e Kristo

¹¹ Amiu na monar asitoñali pogos naña apaeme, ana amiu na pe ape yeririna kiena ne Ntewa re poli sane le Yu lala, amiu na ape yaru tañena ga lala. Komin suri ne nanene, le Yu lala, la asitom ke asape la ape yaru wa, komin naña la apuarar manene ñaviu ñarera, ana la apisa kare amiu apisa “Kulpaona” pan amiu. Ana ñaviu nene naga pe suri korena ga na vanua ga e tas nen yerñene ne. ¹² Ana komin nanua sumo, amiu na sa ke nene narui. Amiu ve sinemiu ñesan re naña nanua sumo, amiu asike laa koperinan Kristo pañisi, amiu na asike vanuan ñegas nen le Israel lala, amiu na ape wolawa ga, naña amiu na tañatete akilia atol suri la naña Ntewa naga pisaar pan kiena yeririna lala. Ana amiu naña asike e yomarava nini, amiu na peraga ape suri korena ga narui, a amiu na pe akilia re nena Ntewa poli. ¹³ Ana amiu, naña nanua sumo asike laa perina, nanagane amiu apimi lavisi rui komin tana ne Kristo, nanagane narui amiu na ape taaga amio naga.

¹⁴ Kristo naga pe kieta suñarena, ana naga kila kieta ðegas lua nene apimi ape taaga. Nanua sumo, imimi le Yu lala memio amiu yeririna taþena lala, naþa ita sineta kar ita ñaga silaga, sa ga naþa pupia kove tai mliþere ita, ana Kristo naga ñe plan suri nene e kiena marena. ¹⁵ Naga pialuþar navisaluaena kiena ne le Yu lala, amio kana narin visena ne lala, a naga kila sanene naþa kila kieta ðegas lua nene lalua aimi ave yaru taaga e naga, sane lalua aimi ave suri viu tai. Visae ve sanene narui, Kristo naga kila suñarena van ita. ¹⁶ E kiena marena e laki torovia, naga kilalua sinemimiena e ita, naga kila kieta ðegas lua nene apimi ape yeririna taaga, ana naga pure ita sina ga toþasuþe si puna ne Ntewa, naga kila ita tepe mara wo temio naga. ¹⁷ Pogaga, e þelaga nene narui, Kristo naga pimi, pisawal lologena wo na suñarena nene pa yeririna la punu ga, nanene na amiu naþa pe ape le Yu re poli, naþa amiu asike laa perinan Ntewa, amio imimi ñena ga le Yu lala naþa imimi na mesike lavisin þisi rui. ¹⁸ Ana komin suri ne la nanene naþa Kristo naga kila rui, nanagane ita punu ga kieta mrapa taaga e Ninuna taaga, naþa teimi e marana ne Arimata.

¹⁹ Ve sanene, ana amiu na pe ape wolawa la re si poli narui, a amiu na pe ape yaru re si naþa pe kiela yo re poli, peraga. Nanagane, amiu na sa ga yeririna na yo kiena ne Ntewa, amio li nalelagaena wa taþena lala, a amiu asike loyuña e ñana mratava. ²⁰ Amiu na sane kemraþe lala na yuña tai, naþa li nalologena lala amio li navisawalena lala, la sane kemraþe na mrapun yuña lala. E yuña nene, Yesu Kristo naga sane kemraþe wo naþa pe keyowo ñeke lika, ²¹ naþa naga suña þuarar ruru ke kemraþe taþena la nene. Naga þuar la, ana la asuñalu ñarera, ana yuña nene naga sa naþa suña pimi pe yuña wa ñana ne Ntewa. ²² Ntewa naga miyuñaen amiu ke sanene narui, vena e Kristo amiu li nalelagaena lelaga lala, amiu asuña apimi ke sane yuña tai, naþa naga kilia va sulueen ga loyuña ea e Ninuna.

3

Pol kila yuñaena kiena ne Suþe pan la rui

¹ Ana komin suri la nene naþa nepisa þisi rui, inu Pol, nemlen wo amiu pa Ntewa. Nanagane nesike e yuña na koaena, vanon naþa nemiyuñaen ke yuñaena kiena ne Kristo Yesu pan la naþa pe ape le Yu re poli, sane amiu, a in na nemlen wo amiu ke na wa pa Ntewa. ² ?Pona amiu na apisu kilale ñaga naþa sane nesuña nemiyuñae ke vanon amiu sanene, pona peraga? Kiau yuñaena naiila amiuena nene, Ntewa naga mla pan inu e kiena lemamiena, ³ ana naga sane kiena sitomena tai naþa sumo naga mlawania, ana siraunia naga kipian inu ea.

Ana suri nene nesiriyu þisi rui, ⁴ a visae amiu auloia, þisi na amiu atol kiau kiliaena e lepas nen sitomena nene kiena ne Ntewa, naþa nanagane suña pimi ke merarava e Kristo. ⁵ E teras nasumo lala, yeririna lala la pe akilia re suri nene poli sane nanagane, naþa nanagane Ntewa kipian ke e li nalologena wa lala amio ñena ga kiena navisawalena lala kome Ninuna Wa. ⁶ A visena nene naþa naga pimi merarava, naga sanene narui, naþa pisa sanini pisape, yeririna taþena ñena lala, la amio le Yu lala, la ga luwoka ga la atol navisa ruruena lala kiena ne Ntewa, a naþa la sa ga ape lepas nen tasnela taaga ga, a naþa navisaarena kiena ne Ntewa lala, la ga luwoka kiela. Suri wo la nene la apimi añalivi komin lologena wo kiena ne Kristo Yesu.

⁷ Ana Ntewa naga kila inu nepe yaru na yuñaena kiena ne lologena wo nene tai narui, ana yuñaena nene naga pe nalaena wo tai naþa Ntewa naga mla pan inu, naþa kiena nañareraena suña miyuñae ke kome inu. ⁸ Inu neto manene laa tanon nalelagaena wa taþena lala, ana nekekara paþisi naþa e lemamiena kiena ne Ntewa, naga mligan e luñau vena nelologon kiena lologena wo van la naþa la pe ape le Yu re poli. Ve sanene narui, nesuña nepisawal ke pan la e suri wo kiena ne Kristo lala, naþa aulo þele ga, ⁹ a nekipian la ke ñena ga sanape naþa Ntewa naga suña kila ke kiena sitomena nene pimi þarpoyo. Siar e pogos naþa Ntewa naga sii suri punu ga, pimi tol pogos la naþa aþaro pa þisi rui,

Ntewa naga mlawan kiena sitomena nene toña ga, ¹⁰ ana e kieta pogos nini narui, naga kila navisi lala amio nañareraena lala e yo na metava ma e peni, la avisu kilale kiena namanmaruaena tañena lala, e suri la naña naga miyuñaenia e lotuena kiena ne Kristo. ¹¹ Suri la nene na, la torokin sitomena kiena ne Ntewa, naña naga sitom ruru kemua sumo rui, pogos naña yomarava nini na pere wa, ana naga kila suri la nene la apimi añalivi rui kome Kristo Yesu, kieta Suñe. ¹² Ana komin naña ita tepiawa e Kristo, a komin naña ita tepe taaga temio naga, ana ita tekilia teimi tesuñalu e marana ne Ntewa narui, naña kieta sitomena ve yuwawa re, a monar sineta ñarera e naga tevisave ñisi na naga kekaran ita. ¹³ Komin suri ne nanene, nepiun ñareran pan amiu, nepisape, awis, amiu na ve atañan re sinemiu la aloru pogos tai, naña ve aloge manene re viowagan inu e pog ñarera la nene naña nekus ke vanon amiu e yuña nakoena nene, naña la akilali inu ke pañisi. Suri la nene na, la vena ilaar amiuena vena atol naurarena kiena ne Ntewa.

Leniena kiena ne Pol

¹⁴ Sanene, komin suri ne la nane nepisa ke ne, nekinai, nemlen wo amiu pa Arimata, ¹⁵ naña naga pe Arimata kemua lelaga, naña ata tañena lala na mratava lala nae ma e peni amio ñena ga nae yomerava nini, la asuña amla ke ñelaga wo a kiela kia wo lala, e ga e naga.

¹⁶ Nesuña nepiun ke tan Ntewa, nesape sa naña naga kiena naurarena keviu pañisi, ñisi na ligan kiena nañareraena e losinemiu kome kiena Ninuna, vena sinemiu lala asuñalu ñarera asulue. ¹⁷ Inu nesuña nemlen ke ñena ga, nesape Kristo naga suña pumi silaga e losinemiu lala kome kiamiu naviawaena, a nemlen wo amiu ñena ga vena ñelaga nasitomiena imi sane purpes nen kiamiu malena lala. ¹⁸ Visae ve sanene, ñisi na amiu, amio nalelagaena wa tañena lala, akilia u atorokin naña avisu kilale pupia nasitomiena kiena ne Kristo, sanape naña pe lepalepasa, pona piavi, pona pa metava, pona merorol sanape. ¹⁹ Lelaga ña, kiena nasitomiena nene naga keviu manene pañisi, ita tañatete tevisave tekilia ruru rui. Ana pe suri korena ga, nemlen ga vena ñisi na amiu na akilia avisu kiena nasitomiena nene e kiamiu malena lala, vano vano-o ñelaga wo kiena ne Ntewa lala, a kiena malena wo, aule ruru e amiu.

²⁰ Ana nanagane, teyeluar Ntewa, naña e kiena nañareraena keviu naña naga suña miyuña ke ea e losineta lala, naga kilia yuñaenia taulu manene ya naña tekilia teviun tania, pona ya naña tekilia tesitomia. ²¹ Ana nanagane, nalotena kiena ne Ntewa wetelu miyeluar naga komin Kristo Yesu, nanagane, a e ñena ga e teras lelein lala na pogos la naña apimi ke ne, vano vano-o ve uro re, sanene.

4

Ita na sane tepe tasneta taaga e Kristo

¹ Sa naña nesike e yuña naloge viowaena, komin yuñaena kiena ne kieta Suñe, neñareran amiu, nesape kiamiu malena lala monar mesmesu ruru e ñelaga nene naña Ntewa naga pio amiu vena amiu ayal ea. ² Ve sanene, amiu avatanon amiu, a amoñau silaga. A kiamiu sitomena lala monar malum ga van amiu, naña ve sinemiu mimi koskos re van amiu. Ñelaga na nasitomiena ne nanene. ³ Amiu na akilayonli naña auarar ruru suñare nene naña naga suña sikol ruru amiu, ana ve sanene, akilia avisuar ruru navetaagaena naña Ninuna Wa naga suña mla ke pan amiu. ⁴ Amiu na sa ga ape tasnemiu taaga ga, a Ninuna ñena ga taaga ga sike e amiu, a e ke e ñelaga nene ana navisaarena taaga ga, naña kiamiu sitomena kilia suñalu ñarera se ea, naña Ntewa naga pio amiu vanonia. ⁵ Ana Suñe Yesu naga taaga ga, a kieta nalelagaena taaga ga, a nakeena ñena ga taaga ga, ⁶ a Ntewa ñena ga taaga ga naña sike na, naña naga pe Arimanane yaru punu ga, a naga pe suñen suri punu ga, a naga miyuñaen kiena yuñaena ñarpoyo e yo punu ga, a naña naga sike e malena kiena ne yeririna punu ga.

⁷ Ana e ita punu ga peve taaga, Kristo naga mla nalaena taþena lala e kieta malena lala, naþa la apowo paþisi, mesmesu e kiena pupia lemamiena. ⁸ Nanene na sa naþa Visena Wa naga pisa nanua sumo rui e Yauena Lala, naþa pisa pisape

“Pogos naþa naga pa metava e yo na metava manenea,
naga þere kiena nasinekar lala naþa naga taulu la rui, ataveve naga,
a naga mla nalaena pan kiena yeririna lala.”

Yauena 68:18

⁹ ?Ana visena naþa pisa pisape “Naga pa metava,” naga kana kinasia na ya? Kinas nen visena nene sape nanua sumo, naga pito manene laa tano rui, naþa naga pitomi tano e yomarava nini, naga pito tano e kana þiliþili merorol ne lala. ¹⁰ A yeririna nene, naþa sumo naga pitomi tano, naga pe yaru mña ke sina ga nene naþa sirau naga pa laa metava, metava ma e peni, ana þisi na, naga pa ke laa metava na wa, vena naga kilia kokonia yo la punu ga naþa Ntewa sii la. ¹¹ A naga yaru ke ga naþa naga mla nalaena pa kiena yeririna la narui, naþa laþasia, naga mligan la ape li nalologena lala, laþasia, naga mligan la ape navisawalena lala, laþasia, naga mligan la ape nayalinen Lologena Wo, a laþasia, naga mligan la ape yaru na visuaren li nalelagaena lala, ana laþasia, la ave navian laena mña ga lala. ¹² Kristo naga kila sanene vena kiena li nalelagaena wa lala akilia akila kiena yuþnaena, vena þegas kiena ne li nalelagaena lala e yomarava nini, naþa sane tasnena, kilia kapuru manenea, a imi mñarera laa sane. ¹³ Ve sanene, þisi na ita punu ga tekilia teimi teve taaga ga e kieta naviawaena e Narina ne Ntewa, a ita teimi teve taaga mña ga naþa tevisu kilale ruru naga e kieta malena lala. Naga ke nanene narui, tekilia teimi teve sa naþa yaru na marua, vano vano tol naþa temarua ruru sane Kristo, naþa þisi ita teimi teve yerikawa kemua lelaga sane naga.

¹⁴ Sanene, þisi na ita ve teve sa re si sisi, naþa navianena taþena kiena ne yaru na visokanena lala aure kieta sitomena lala va ve taþena, a naþa kiela navisa kotalia itaena lala la apilovilon ita, sa ga naþa lagi miyu ita, pona sive suþna kuakuankare ita tepa sane, tepa sane, peraga. ¹⁵ Ana monar towarar nalelagaena e þelaga nasitomiena, a e kieta mrapa la punu ga, monar tekapuru vena teimi teve yerikawa lala e Kristo, naþa naga pe þarin þegas nen kiena nalelagaena lala. ¹⁶ A ita na sane kinakinas nen tasnena lala, a naga suþna kila ke kinakinas la nene apimi ape tas taaga ga e naga, naþa kiena merpu lala la asuþna asikol ruru kana kinakinas la nene van þarina. A pogos naþa kana kinakinas nen tasnena la nene, la ataveve ruru kiela yuþnaena lala, a la asuþna asitomila, ana tasnena nene naga kilia kapuru, kilia imi mñarera va laa sane.

Malena viu e Kristo

¹⁷ E kia kiena ne kieta Suþe, noñareran amiu ke sina ga, nesape amiu na monar avisuar amiu, þisi na amiu na ve ataveve re si þelaga kiena ne la naþa pe amlelaga re e Ntewa poli. La nene, kiela sitomena lala apiowa rui, ape mias pa rui, ¹⁸ ana asike ga e yemalolo. Ana la asike manene laa perinan malena nene naþa Ntewa naga mligan ke pimi, komin naþa la þarila mñarera paþisi sa ga kilavaru, la pe amloge kilia re suri poli. ¹⁹ Sinela lala taþatete si amawan kiela naviowaena lala, ana la ataþan la ga e lau narui, a e þelaga na kororaki lala, naþa la asitom korenan ga.

²⁰ Ana e Kristo, pe apian amiu re nenaga e þelaga tai ne sanene poli, peraga. ²¹ Ana la apisayu kiena suri wo la moki pan amiu þisi rui, pan amiu naþa ataveve ke naga, a la apian ruru amiu e nalelagaena la nene naþa sike e Yesu. ²² Sanene, ana amiu na monar aligan lua þelaga marua naþa apaeme amio. Þelaga nene naga suþna kila ke kiamiu malena na sumo pimi piowa, a sumo, kiamiu nasinenanena viowa na þelaga la nene asuþna apisa kotalia amiu, ana asuþna akila kare manene kiamiu malena la keviu paþisi. ²³ Ana nanagane, sinemiu lala a kiamiu sitomena lala monar imi ve urviu nenaga, ²⁴ a amiu na monar akus þelaga viu lala na kiamiu malena viu e Yesu nene, naþa Ntewa naga sii e amiu, sa ga kiena, naþa yeririna lala la akilia avisu sa naþa mesmesu ruru kemua, a pe suri wa.

²⁵ !Sanene narui, visokanena toko! Komin naþa ita tepe kinakinas nen tasnena ne Kristo ga, ana monar teve lelaga lue ga va nalavisin ita la silaga.

²⁶ A visae sinemiu mimi pogos tai, ve akila re naþa nasinemimiena nene were amiu ava e namlamulen viowa, a kiamiu nasinemimiena nene monar vito tano sumo, þisi na mrae vito tano. ²⁷ Amiu na monar ve ala re pulmas tai va Yermare, vena naga imi kila kare amiu, ava aviowa laa sane.

²⁸ Yaru naþa sumo naga pe yaru na vinauena, naga monar þisin vinauena. Naga monar yuñae m̃arera e limana, e þelaga na mesmesu, ana þisi na naga kilia visuar ruru naga, a iila m̃ena ga yaru la naþa limala korena.

²⁹ E kiamiu visena lala, ve avisa re visena kar lala, ana avisa ga visena la naþa naga kilia iilar kiela sitomena lala, naþa la aloge kiamiu visena nene, naþa naga toroki ga, a naþa mesmesu, a naþa kilia iila la. ³⁰ Amiu ve akila re Ninuna Wa memawa, pona loge viowa vanon kiamiu visena viowa la nene, komin naþa Ninuna Wa nene, Ntewa naga mligan e amiu sane kiena kile tai, vena naga visawal visave amiu na ape kiena, a vena visawal m̃ena ga visave þisi na naga wereplan amiu e legiena maro. ³¹ Sanene, popon ve akila re si sinekarena lala, a sinemiu ve uarar re si simimiena, a sinemiu ve melkalka re sina. Amiu aligan þelaga na vilupena a navisviowaena, a aligan þelaga na sinekarena.

³² Ana amiu na awo van amiu, a sinemiu lala malumu ga van amiu, aviewo amiu, sa naþa Ntewa naga piewo amiu rui kome Kristo.

5

Amiu na ayal e yomerarava

¹ Ana komin naþa amiu ape sisi wo kiena ne Ntewa lala, amiu akilali naþa ataveve kiena þelaga. ² Amiu na monar ayal e nasitomiena, sa naþa Kristo naga sitom amiu, naga tañan kiena malena pan amiu, sane ponotaninu tai naþa po pan Ntewa, a sane nakuþaþaena tai naþa Ntewa kekarania.

³ Komin naþa amiu ape nalelagaena wa kiena ne Ntewa, ana pe mesmesun re nenaga naþa pogos tai, suri laþasia imi kakate e amiu sane lau, pona suri na memawaena lala, pona þelaga nasinesuniena suri lala, a suri la nene pe pon re m̃ena ga ava atakorkoron poli. ⁴ A pe pon re naþa amiu avisa visena kar la poli, a visena namname lala, a visena na totorouena viowa. Ana popon amiu na asuñna avisa ga potena van Ntewa. ⁵ Nesape nevisa meraravan van amiu sanini: la naþa la asuñna ataþa ke lau, a la naþa asuñna akila ke suri na memawaena, a la naþa sinela sun manene suri la silaga, la nene þisi na akokovio. Yaru na sinenan manene laa suri la silaga, naga maran taaga ga amio yaru naþa naga mlotun ke suþe taþena lala. Amiu na monar alelaga e visena nini silaga, pisape la naþa apuarar ke þelaga viowa la nene, þisi na la taþatete nenaga akilia ava loyuñna e Nasuþenena kiena ne Kristo amio Ntewa.

⁶ Amiu na ve atañan re yaru la aure amiu ava e mrapa taþena lala, naþa la avisa kotalia amiu ga e kiela visena kiki lala. Suri ne la nanene naga kila Ntewa naga sinena karla rui, sa naþa visae la pe amlogear re naga poli, ana þisi na naga la nakoena van la. ⁷ Þisi na amiu ve ava ave þegas re nena amio yeririna la ne sanene. ⁸ Nanua sumo na, amiu la nene ape yeririna na yemalolo ga lala, ana nanagane naþa amiu asike e kieta Ntewa narui, ana amiu asike m̃ena ga e kiena yomerarava. Ve sanene na, amiu monar ayal silaga ve sa naþa amiu na ape yeririna na yomerarava nene narui, ⁹ komin e yomerarava nene, þisi na kiamiu malena wo, a mesmesu, a ve lelaga, ana þisi na kilia war mras la naþa po ve moki. ¹⁰ Amiu na monar akilayonli naþa alual þelaga ya naþa kieta Ntewa naga kekarania. ¹¹ Þisi na amiu na ve amio re yeririna la naþa la akila ke suri viowa lala, naþa pe yuñnaena korena ga lala na yemalolo. Ana popon visae amiu avietavan suri viowa la nene aimi e yomerarava. ¹² Ita na tememawanli m̃ena ga vena tevisayu suri la naþa la apa akilawania, ¹³ ana pogos naþa Ntewa naga vietavan suri la punu ga nene, aimi e yomerarava, þisi na yomerarava nene naga kila þelaga la nene la amolmolue. ¹⁴ A pogos naþa yomerarava

naga kila suri la punu ga imi molmolue e yometava sanene, suri m̄ena ga la nene p̄isi na imi ve sa yomerarava. Nanene na sa ga yauena nene pisa, naḗa naga pisa, pisape
 “Ko nene naḗa omomalio rui, otavilo,
 osuḗmalu e marena, omal sina,
 ana p̄isi na Kristo naga tegoli ko.”

¹⁵ Komin suri nene, amiu na monar avisuar ruru amiu, sane p̄isi na yoko ayal ve sanape. P̄isi na amiu na ve ave sa re la naḗa la pe p̄arila re poli, ana amiu na monar akila p̄elaga kiena ne yeririna la naḗa ape manmarua ruru po. ¹⁶ Amiu na monar ava ayuporu e pulmas punu ga naḗa amiu aḗmalia, vena kilaen yuḗmaena wo lala ea, komin naḗa ita tesike e pogos na viowaena. ¹⁷ P̄isi na amiu ve ayuḗmae wowe re, ana monar amiu na akilali akilia suri punu ga la naḗa kieta Suḗe naga sinenan sape akila.

¹⁸ P̄isi na amiu na monar ve amun re si kuruta na munena vano vano-o akilalu p̄arimiu, vanon p̄elaga nene, p̄isi na naga kilia kila kare make ke sina ga kiamiu malena lala. Ana amiu na monar aule ga e Ninuna Wa. ¹⁹ Popon naḗa amiu asunyu visena na Tus na Yauena lala, a yauena wa lala, a yauena na yeluaena Ntewa lala van amiu, a amiu monar ayau e yauena wa lala, vena aieluar kieta Suḗe e sinemiu la wetelu. ²⁰ A vanon suri la punu ga, silaga amiu asuḗa avisa potena va Arimata Ntewa, e kia kiena kieta Suḗe, Yesu Kristo.

P̄elaga na talopaena

²¹ Amiu li nalelagaena lala, yerḗmene a sira, monar avatanon amiu, sa ke ga naḗa asuḗa apatanon ke Kristo.

²² Amiu sira la naḗa atalopa, monar avatanon womiu lala, sa naḗa asuḗa apatano ke pa kieta Suḗe, ²³ komin naḗa yerḗmene naga pe p̄arin wona, naga sa naḗa Kristo naga pe p̄arin kiena lotuena, naḗa lotuena nene naga pe tasnena, naḗa naga tamalia. ²⁴ Komin suri nene, sira lala la monar avatanon wola lala e suri punu ga, sa ke naḗa lotuena kiena ne Kristo suḗa patanon ke naga.

²⁵ A amiu yerḗmene la naḗa atalopa, monar asitom manene womiu lala, sa naḗa Kristo naga sitom manene kiena lotuena, ana naga taḗan kiena malena vanonia. ²⁶ Naga kila kiena lotuena mekiki, a naga kevania e wii, a e kiena visena, ana naga miawa pa Ntewa. ²⁷ Kristo naga kila sanene vena kilia were kiena lotuena imi puna, naḗa naga pe wa naḗa pe wa ruru manene laa sike na, sane sira m̄ee tai, naḗa naga suḗate ke sape talopa, naḗa naga mekik ruru po, a naga pe namname re poli, a sa naḗa amiyowau ruru tanea naga po na po. ²⁸ E p̄elaga m̄ena nene, yerḗmene naga monar sitom manene wona, visuar ruruia sa ga naḗa naga pisuar ruru ke ga tasnena. Yerḗmene naḗa naga sitom manene wona, naga suḗa sitom ke sina ga naga. ²⁹ Yaru la ve asuḗa avisu kare re tasnela lala, pona akila kare la, peraga, ana yeririna la asuḗa apagan rurula, a la asuḗa apisuar ruru ke tasnela lala. Naga nene naga sa ke ga naḗa Kristo kila ke pan kiena lotuena, ³⁰ a ita na tekilia ruru suri nene po paḗisi, komin naḗa ita na tepe kinakinas nen tasnena lala. ³¹ Visena Wa naga pisayu m̄ena ga p̄isi rui, naḗa yerḗmene amio wona, lalua na aimi ave tasnela ve taaga ga, naḗa naga pisa pisape

“Komin suri ne nanene, yerḗmene ligan arimana amio anena, vano vilolar wona na sira, ana lalua aimi sane ave taaga ga narui.”

³² Visena Wa nene, visena urmi tai naga suḗa ea, naḗa sumo naga sane navisawanena ga tai, ana nanagane, nekilia nesape visena nene naga suḗa pisawal ke Kristo amio kiena lotuena ne. ³³ Ana ve asitom re avisave visena nene naga pe pisa amiu re m̄ena poli, peraga, pisa amiu ke m̄ena ne. Ee lelaga p̄a, amiu yerḗmene lala, monar asitom manene womiu lala, sa ga naḗa asitom amiu ke ga, a amiu sira m̄ena ga lala, monar avatanon womiu lala.

6

P̄elaga kiena ne sisi lala amio arimala lala a anela lala

¹ Sisi lala, amiu na ape sa naþa li nataveveena Kristo, amiu alogear arimamiu lala a anemi lala, sur ne nanene na mesmesun naþa amiu akila. ² Navisaluaena tai e Visena Wa kiena ne Ntewa pisa sanini, naþa pisape “Amiu na ato ga tano e arimamiu amio anemi lala,” a naga nene navisaluaena na sumo naþa kiena navisaarena tai teke metava e a, ³ naþa naga pisa, pisape visae akila sanene,

“þisi na sur na kiamiu malena lala kilia kiriri wo, a vena þisi na kiamiu malena e porotano nini naga ve piavi.” Naw 5:16

⁴ Amiu arimala lala a anela lala, sinemi la ve vilul re va narimiu lala silaga, vano vano la sinela kar amiu ke sina ga. Ana amiu na monar akawe ruru la mesmesu, a amiu avian la, a akipian la e mrapa na kieta nalelagaena e Kristo.

þelaga kiena ne yaru na yuþaena amio kiela yerkawa lala

⁵ Amiu yaru na yuþaena lala, alogear kiamiu yerkawa lala na yomarava nini, sa naþa amaraun la, a avatanon la, a amiu monar akila sanene e sinemi la wetelu, sa naþa amiyuþae ke kiena ne Kristo. ⁶ Amiu na pe pon re asuþa akila ve sanene e pogos ga naþa la asike amio amiu poli, vena amiu akilali ga naþa la akekaran amiu, ana monar akila suri la naþa Ntewa naga sinenania silaga, amio kemua sinemi lelaga, sa naþa amiu na ape yaru na yuþaena kiena ne Kristo. ⁷ Amiu na monar akekaran kiamiu yuþaena lala, a popon ve akila re si yuþaena sa ke naþa amiyuþae ke ga pa yaru, ana akila sa naþa amiyuþae ke pa kieta Suþe. ⁸ Amiu na asitomli sa naþa visae yaru tai naga pe yerkawa tai, pona naga pe yaru na yuþaena ga tai, ana pe suri korena ga, þisi na Suþe naga lamaran suri wo vania torokin kiena yuþaena wo lala.

⁹ A amiu yerkawa kiena ne yeririna na yuþaena lala, amiu mþena ga akila mesmesu va kiamiu yeririna na yuþaena lala, a ve avisin re sinekar van la silaga. Amiu na asitoþalia, naþa amiu amio la, amiu punu ga kiamiu Yerkaawa taaga ga naþa sike ma e peni, a naga suþa kila maran taaga ga pa yeririna la punu ga.

Tekila mara pa yermare

¹⁰ Lavisi ke nekila make kiau visena narui, ana nesitom nesape nevisa van amiu sanini, amiu aþareran manene li naþa amiu aþarera e kieta Suþe, amio kiena pupia naþareraena. ¹¹ Amiu na ayen kulsota mþarera na mara lala naþa Ntewa naga mla pan amiu, vena amiu akilia asuþalu, a akilia asuwo mraai kiena ne Yermare, amio kiena navisokanen viowa lala naþa naga suþa kila ke pan amiu. ¹² La naþa ita tesuþa tekila ke mara pan la e kieta malena, la pe ape yeririna re poli. Ita tesuþa tekila ke mara pa naþareraena taþena la ne, amio yerkaawa lala kiena ne yermare lala, amio suþe lala kiena ne la naþa nanagane la ape purþes nen yemalolo e yomarava nini, a tesuþa tekila ke mþena mara temio kimi viowa la nene, naþa la moki liu, naþa asuþa ke e yo punu ga.

¹³ Ana popon ayen ruru suri na kilaen mara kiena ne Ntewa la nene narui, ana pogos punu ga a e legiena punu ga, naþa Yermare naga imi vena kila mara van ita, þisi na ita tekilia tekila mara va nasinekar la nene, vano vano þisi, ana ita tesuþalu mþarera ke tesike na wa.

¹⁴ Pogos naþa amiu asuþalun kilaen mara sanene, kiamiu sur mþarera nakilaen mara lala na sanini narui. Kulka naþa aþereari e mþemi, naga sa naþa amiu apuarar þelaga na lelagaena. A kulsota mþarera na kilawoen yepemi vanon mraai lala, nanene na sa naþa amiu apuarar ruru þelaga mesmesu suþa e kiamiu malena lala wetelu. ¹⁵ Ana pupia kulus nen lamiu na yalena, naga na sa naþa amiu asun ke asape ava avisawal Nalologena Wo na suþarena. ¹⁶ Kulþave nene naþa amiu na apuararia nakilawoen mraai kiena ne Yermare la nene, naþa kapi pivavaga ke e la, nanene naga sane kiamiu naviawaen mþarera e Ntewa. ¹⁷ A kiamiu kulparimiu na mara, naga sane natamaliaena, naþa Ntewa naga mla pan amiu, a playu na kilaen mara kiena ne Ninuna Wa naþa amiu awaria, naga sane Visena Wa kiena ne Ntewa.

¹⁸ A amio suri la nene, amiu na monar alen m̃ena ga, monar aviun tan Ntewa vena iila amiu. A silaga monar alen e nãmareraena kiena ne Ninuna Wa, a p̃isi na monar asitõmal li nalelagaena wa tãpena la silaga e kiamiu leniena lala, nãpa maramiu ve kawa re pogos tai. ¹⁹ A naga ke sina ga, amiu na monar alenwo inu m̃ena ga, vena p̃isi na Ntewa naga la pulmas na visena tai van inu vena nevis, vena ve nesitom p̃ele re nãpa nekilia nelologon Nalologena Wo kiena ne Kristo, nãpa sumo naga su tapoloun yeririna lala, ana nanagane, p̃isi na nẽmareran nãpa nevisawal van la. ²⁰ Inu na nepe yaru na lologonen Nalologena Wo nene, ana nesike e yũna nakoena, ana amiu na monar alenwo inu vena ve nesitom p̃ele re nãpa nelologon Nalologena Wo nene e nini, sa nãpa mesmesun ga nãpa netãpa.

Visena maro kiena ne Pol

²¹ Inu sineun nesape vena amiu na akilia kiau suniena lala, ana komin sur ne nanene yoko neligan kieta erau wo nene, Tikikas, ĩmasu pun amiu. Naga na p̃ar yepe m̃aen yũnaena lala kiena ne kieta Supe e yo nini, ²² ana p̃isi na naga visawal van amiu visave imimi mesike sanape, vena amiu na akilia aloge wo si e imimi.

²³ Ana sũnarena, sitomena a naviawaena la apitom kome Ntewa Arimata, a Yesu Kristo kieta Supe, la asũna amio ita, amio m̃ena li nalelagaena la punu ga. ²⁴ A lemamiena kiena ne Ntewa naga sike e amiu, a e m̃ena ga e ita punu ga nãpa tesũna tesitom manene laa kieta Supe Yesu Kristo, nãpa p̃isi na ita tesitom naga vano vano-o, ve uro re, sanene.

Inu, Pol.

Maki Naþa Pol Siria Pa Pan
 Li Nalelagaen Wa Lala Nae Garu
PILIÞAE
 Visayuena Na Tusi Nene

Komþasnen suniena plas na tusi nini

Pol siri maki nene pa e suñare nae Piliþae naþa la nene ape yaru þesa nae Yurop naþa Pol mlologon þesan lologena wo pani la, ana apimi ape li nalelagaena. Piliþae naga pulkumali keviu tai na lepas ne Masetonia, naþa sike vatanon Þarin Suþe keviu nae Rom. Pol siri maki nini e pogos tai naþa meke e yuñna naloge viowaena, a e poglis nene li nalelagaena laþasa asuñna akawe naga, a naga miloge piowa menaga e vianena na visokanena naþa sike loyuñna e suñare nae Piliþae. Maki nini kila meraravan naþa Pol naga þasine ga Ntewa, a naga kekara na kekara, ana tekilia sane naga sanene komin naþa naga mlelaga marera e Yesu Kristo.

Pol siri maki nini vena visan potena van li nalelagaena lala nae Piliþae naþa amiila naga e ya naþa naga sinenania. La nene amligan kilavaru laþasa pa pania vena iilaen naga, a naga siri maki nini pani la, vena visirluaen kiela sitomiena vena alelaga marera e Yesu Kristo. Naga kila sanene komin naþa visae aloge sane naga meke yuñna naloge viowaena, ana pe aloge viowagan vaþisi.

Naga pisa pan la vena akila kiela sitomena la suñaga tano, sane sitomena kiena Yesu Kristo. Pe pon re avilave poli, a asuñna asitom la ga. Naga pisa panila sape kiela maliena viu naþa sike e Yesu Kristo, naga suri naþa Ntewa mla korenan ga sanene pan la e kiena lemamiena, a atol ga e kiela lelagaena lala. Pe atol re kome naþa amlogear navisaluaena kiena lus nae Israel la poli, peraga, atolia komin amlelaga ga e Yesu Kristo.

Pol sinenan sape li nalelagaena lala nae Piliþae monar atol þelaga kiena Yesu Kristo. Naga sape la naþa asikol la ruru e Yesu, Ntewa mla suñare na lelaga sike e kiela maliena, a kila la asuñna akekara luwega.

Pupia suri tai naþa Pol pisayu e maki nini, naga sape li nalelagaena lala monar asikol ruru la amio Kristo, monar akekara, a kiela sitomena lala a kiela lelagaena lala suñal marera e naga silaga. Maki nini kila merarava pan ita naþa Pol naga sinen sii paþisi li nalelagaena na suñare lala nae Piliþae.

Komþasnen tusi la na nini

Visena þesa 1:1-11

Suri la naþa Pol suñna mloge ke piowagania 1:12-26

Malena kiena yaru naþa mlelaga monar taveve maliena kiena Kristo 1:27—2:18

Pol sape vitetalia Timote va gar pun la, a pitetalia Epaprotetas þasuþe si pa uña 2:19-30

Le Piliþae lala monor avisuar la e kiela sinekar lala 3:1—4:9

Pol amio kiena erau lala nae Piliþae 4:10-20

Visena maro 4:21-23

Visena na sumo

¹ Maki nini, yar na yuñnae korenenana la lua kiena ne Yesu Kristo, nane imimi lua Pol amio Timote, imimi lua mesiri piñasu pan amiu, naþa asike e pulkumali naþa Piliþae, nane amiu naþa kiamiu malena su ruru ke amio Kristo, sane ape li nalelagaena wa lala, amio kiamiu nasumonena lala amio kiamiu yaru naiilaena lala. ² Imimi lua mekekarana navitawe amiuena sina ga e maki nini, e kia kiena ne Ntewa arimata a Suþe Yesu Kristo, a imimi lua mepiun tan lalua nene, vena aligan lemamena a suñarena sike amio amiu nanagane.

Pol mlenwo la

³⁻⁴ In na nesitoñal amiu lue ga e kiau leniena, a nekekara lue ga nalenwo amiuena van kieta Ntewa, a navisaen potena paþisi vania vanon amiu. ⁵ In na nesitoñal ke kiamiu navisuarinena, amio ñena kieta nayuñae veragaena e lologena wo, siar e naþa nesiar kiau yuñae e amiu, pimi tol nanagane, ana nepisa potena paþisi vanonia. ⁶ In na nemlelaga sane Yarkeviu, naþa siar kiena yuñae na tai pan amiu rui, naga kilia yuñae ña vano, vano-o kila ruru punu ga, nane e pog maro e pupia legiena nena kiena Yesu Kristo. ⁷ Vanon sanene, avisu naþa in na nesitom amiu manene laa, nepisu sane nanene na mesmes ga, vanon tepa lele taaga loyuñae e lemamena kiena ne Ntewa rui, ana amiu amio inu e sur la mok rui, e pog wo a e pog ñarera. Nanagane, nepuarar ruru amiu asike e loyuñae e inu, kila sane nanagane pogos naþa nesike e yuñae na koena, sa ga naþa ita ña nena ga. Pona visae aure inu neva e kumal na visen van inu vanon lologena wo naþa nepisawal ke ne, ana sa ga amiu amio inu ke na wa. ⁸ Nanene pe lelaga ne, ana Ntewa kilia sape sineun ñena nesape nevisuli si maramiu wa. Awe, sineu miye amiu paþisi ne, e sinesiena make ga kiena ne Yesu Kristo. ⁹ Nemlenwo amiu sanini, nesape kiamiu sinesiena monar kapuru lue ga, a visae na kiliaena wo a namanmaruaena a navisuveve ruruena sike e amiu, kilia iila sinesiena nene imi ve keviu lue van amiu. ¹⁰ Visae amiu ave sanene, yoko akilia atol make ga þelaga wo lala, a aligan la naþa piowa, ana yoko kiamiu malena la kilia merarava ruruia, taþatete sur tai te amiu e legiena kiena ne Kristo naþa pimi ke ne. ¹¹ A kiamiu malena la yoko kilia war mras nen mesmesuena naþa Yesu tañan pimi, ana sane kieta mrapa tai naþa tekilia teyeluar Ntewa vanonia, a Ntewa ñena þarwarinia.

Pol sike e yuñae na loge viowaena a kila ke yuñae kiena Suþe

¹² Wolai a vineu lala, nesape nevisawal sur nene van amiu, sane pog ñarera la naþa pimi pan e inu ke narui, pe akilawo re kiau yuñae poli, peraga. Ana la amiilaar ke lologena wo kilia va manene laa sane e yo taþena la ve moki. ¹³ E lepas nen yo naþa nesike ea, nepisu sane yar na mara lala amloge lologena wo na rui, a pa tol yar na mara e yuñae ñana ne Þarin Suþe Sisa, amio yeririna taþena lala. Nanagane na la apisu kilale rui sane noþar ke sen la nene vanon ga Kristo. ¹⁴ A nekekara ñena paþisi navisuen pogos naþa apuarnu e yuñae na koena sanene, ana sur nene pe kila re li nalelagaena taþena la e nini amarau poli, kila la asuñal ñarera laa sane e Suþe, a aþaryon ke ga navisawalen visena kiena ne Ntewa.

¹⁵ Lala amlologon visena kiena ne Ntewa, pe sur wo tai, ana sur taaga, nekilia sane lala þasia amlologon Navisaarena Kristo e sitomena wo, a þasa amlologon e sitomena na vilaveena. ¹⁶ A la naþa amiyuñae po, apisuluþar sane nesike e yuñae na koena vanon nemiyuñae lologena wo, ana sinela piowagan inu, a sinela piowagan la naþa pe amloge re poli wa, þisi na amlologo e sitomena wo. ¹⁷ Ana lala taþena nene, amlologon Kristo ana pe ape lelaga re poli, aþarwar la paþisi, asape akila sa naþa lala towe ava metava. Sitomena viowa na sanene sike e la, ana pogos naþa apisu naþa apiar ruru inu e sen la nene nesike e nini, apisu sane pe kiela pog naþa akilia avisayu kare kiau kia e maran yar lala, ana akila kiela kia la pa metava. ¹⁸ Ana ane kilia, pona pe pe sur re tai poli. Kiela sitomen po yo, po piowa ga, ape lelaga pona apisokan, ana pupia sur keviu, kia kiena ne Kristo monar molue lue ga silaga.

Pol sape mal pona mare, ana sinenan ga Yesu

¹⁹ Sur ne na nene, pogos naþa nemloge asape kiena kia momolue ke pa rui, nekekara paþisi, ana sa pogos tai neloge sane kiena yuñae pa po manene laa ke sane, yoko neloge won vaþisi. Nanagane na nepisu sane amligan nu neñeke ga e marena, a pe mrapa re naþa nekilia nemolue si vetan poli, ana pogos naþa nemloge sane kiena yuñae pa ke meta sanene, miilalua si kiau sitomena sane, kila nemlelaga manene laa sane e kiamiu leniena lala, amio naiilaena wo kiena ninuna ne Suþe Yesu Kristo, sane yoko wo van inu

na wa. ²⁰ Sanene na, nanagane na nemlelaga ke m̃arera sane akilali ya ne van inu, ana taþatete akila nekila sur tai na piowa pona nevisa visena tai naþa yoko nemawan sina e marana ne Ntewa. Visae nemal po nemare, pe pe sur re tai poli, ana sane pogos punu ga, sineun ga nesape ne m̃areran ga kilaen kia kiena ne Kristo va manene laa metava wa, e sur ya naþa yoko vim katen inu po e tasneu. ²¹ Sur naþa teke e inu sanini, visae nemali, malena wo kiena Kristo sike amio inu, a visae nemare, neva nesike nemio naga, naþa wo manene laa sane. ²² Visae ve kiau naþa nemal ve piavi re laa sane e yomarava nini, naga nene sane kiau yu m̃aena wo þas sike ga wa nayu m̃aenena, naþa kilia war mras wo lala. Sanene na, nepisu sane visae nesu m̃a, woga ga, a nepisu m̃ena sane visae nevano, naga m̃ena poga ga. Þisi na nemninue narui, popon netaveve nape narui. ²³ M̃arera pan inu paþisi navisuveveen mrapa lua nene navisa lologiaena tai, komin e kana lepas tai, sineun manene laa paþisi vena nevetan yomarava nini, neva nesike nemio Kristo, naga po manene laa sane, ²⁴ ana nepisu m̃ena sane popon manene nesu re laa e nini sane, vena neiila amiu re laa ga wa. ²⁵ Sitomena ne sanene m̃arera ruru pan in rui, kila sane nanagane nepisu sane nekilia nevisaar van amiu sane nesike si nemio amiu na wa, vena kila amiu akilia aloge wo e kiamiu viawaena e Kristo Yesu, a vena akilia ava re laa sane amio naga. ²⁶ Ve sanene, yoko visae pogos tai neim ne katen amiu, nemlelaga sane yoko kila amiu akekaran Kristo va laa sane na wa, a yoko wo vaþisi van amiu, kila ne kiamiu sur la ve moki sina na visaen potena vania a ve nayeluaren naga vanonia.

Monar teyakolkol ita ruruia, teve taaga na kilaen mara van sinekar lala

²⁷ Ana pe tekilia ruru re poli wa sane yoko ve sanapen inu, ana pe sineun re asito m̃al in poli, asito m̃al amiu ga. Ayal ruru e mrapa na po, memes sane ave yar na lologena wo kiena ne Kristo. Pona nekilia neim nakaten amiu, po taþatete nei m̃asu, ana popon visena tai tol kiligau sane apiawa m̃arera ruruia, naþa ninumiu ve taaga, kiamiu sitomena taaga ga na su m̃alen lele taaga, amiu a m̃areran sane nalelagaena e lologena wo monar tauluia. ²⁸ Ana ve amarau re, asitom korenan sur la naþa sane yoko nasinekar la akila van amiu. Pogos naþa neloge sane akila ke sanene, yoko wo na wo, vanon yoko ve kile kiena ne Ntewa van nasinekar lala vena welualaen, a ve kile kiena ne Ntewa van amiu vena kiamiu natamaliaena. ²⁹ Lelaga, yoko monar akila mara amio sinekar la sanene, vanon pogos naþa Kristo þere amiu ape kiena, pe naga re ga naþa aviawa ga e poli, ana yoko akus m̃ena naloge viowaena vanonia. ³⁰ Monar ve sanene, vanon nanagane tokus pae ke pupia mara nene naþa nanua apisu ke nokusia, pona naþa asu m̃a amloge ke asape nokus ke ga wa.

2

Þelaga wo naþa popon tekila van ita

¹ Sineun nesape amiu asitom veveli kieta malena wo temio Kristo. Kiena þelaga miilalua ke kieta sitomena, ne! Kiena sinewoena kila temloge po paþisi, ne! Ninuna kila tesu ruru ke temio ita, ne! A naga kila naþa malumuena a sineyeena pulen ita, ne! ² Ana komin naþa kila po pan ita sanene narui, nesape neiakol visena, neviun van amiu vena ava re laa sanene. Awis, ata m̃an sane kiamiu þelaga pan amiu, yoko maran ve taaga ga sane kiena þelaga pan amiu. Ana popon sinemiu iyeiye amiu, maran taaga ga sa naþa naga sinen miye amiu, a kiamiu visena a kiamiu sitomena ve taaga. Visae nevisu akila ve sanene, yoko neloge wo, neke kara na neke kara. ³ Ve sanene na, ve teyu m̃ae re si e þelaga na puluvisena, a ve tekila re si suria e nawarwarena, ana monar temalumu, tekila ita tesu ga tano, tevisu yar taþena la sane apo taulu ita. ⁴ Ve tesito m̃al ita re ga, amio ya naþa pe kieta, ana monar tesito m̃al m̃ena yar taþena lala, amio ya naþa pe kiela. ⁵ Popon sitomena wo amio þelaga wo su lue ga e ita, komin naga nene naþa tepisu e Kristo Yesu rui, naþa po na po.

⁶ Naga sa naþa yauena tai naþa pisa, sape Naga pe nono na Ntewa, sa ga Ntewa,

ana pe m̄areran re sape naga maran taaga ga sane naga poli.

⁷ Naga mligan kiena naurarena sike ma e peni,

pitomi sane pe sur korena ga tai,
paeme e yomarava nini pe yeririna

pimi sane yaru na yuṁaena naþa pe kiena kia re poli.

⁸ Lelaga, yaru nae ma e peni pimi pe yeririna nae yomarava,

kila naga pito tano, sike ga tano vatanon nasinenanena kiena ne Ntewa,
pano-o tol marena e laki torovia.

⁹ Mlogear Ntewa, þisi na Ntewa pisirlua naga

kila kiena kia pa metava manene laa taulu kia taþena la punu ga.

¹⁰ La nae peni, a la nae yomarava, a la nae yo tano, yoko la punu ga avatanon kia nene,
yoko akinai vania.

¹¹ Yoko gola la punu ga ayeluar Ata Ntewa, avisawal e marala, asape Yesu Kristo naga
taaga ga pe Suþe.

¹² Erau lala, e yo nene tepisu naþa Yesu mlogear arimana, a amiu m̄ena, nanua nepisu
sane amlogear ruru m̄ena naga po na po. A nanene pe nakilaen re ga e pogos naþa nesike
nemio amiu, komin nanagane pe nesu re si nemio amiu poli, pe nepisu re si sane asike
sanape, ana sineun nesape asuṁa akila m̄a wo va laa sanene.

Amiu atol pa natamaliaena rui, ana piowa naþa atotano korena amio, ana monar
asitom urmi ea. Monar avisuar ruru pupia yuṁaena wo naþa Ntewa kila, na amiu m̄ena
monar ayuṁaen lili m̄aga yuṁaen wo lala na malena viu nene naþa naga mla pan amiu.

¹³ Ana nemlelaga sane tekilia tekila, vanon Ntewa ga nene miyuṁae ke e kieta malena
la ita peve taaga, miila ruru ita naþa kieta sinenanena lala kekaran na kilaen kiena
sinenanena, a kila ita ke tetorokin nakilaen suri nene.

¹⁴ Ve sanene, sur ya naþa sike e lumoṁa na kilaena, okila naþa sane ve ovis mumu
re pona ve ovisamaran re sina. ¹⁵ A tesike likan yeririna la naþa akuspal mrapa, kiela
sitomena la pe taþena, ana ita monar teyuṁaen kieta yuṁaena la wo a mesmes. Ita tepe
narina ne Ntewa lala, naþa popon kororaki ve to re e ita, a monar tepe sane kap tego na
tegolien mrapa kiena yeririna la na yomarava nini. ¹⁶ Amiu auarar ruru visena namalena
vanla, vano-o tol pogos naþa pupia legiena naþa Kristo yoko wasuþe sina ga. Sanene yoko
nekilia nevisu sane pe nekirir korena re poli, ana nekilia nevilaven amiu, nekekaran amiu
sane ape pupia mras nen kiau yuṁaena tai. ¹⁷ Pona vano-o tol sane kau kuruta monar lau
vanon amiu, a visae ve sanene, nepisu sane pogaga. Nepisa sanene vanon nepisu sane
amlogear Yesu, akila amiu sane pe kuþaþaena tai pan rui, ana popon in m̄ena nekekaran
nataṁanen kiau malena vanon yuṁaena kiena Suþe. ¹⁸ Nane nepisa, sane nekekaran ve
sanene, a popon amiu m̄ena akekarania, komin naþa visae Ntewa kekaran sape nekilia
netarlu kiau malena vanon yar taþena lala, naga pe sur wo tai naþa naga kila van inu.

Pol sinenan sape vitetalia Timote va pula

¹⁹ Nesape nevisawal m̄ena van amiu sane e lepas kiena ne wolai nene Timote, kiau
sitomena m̄arera e Suþe Yesu sane yoko ve ve piavi re, yoko nevitetalia naga iṁasu pun
amiu. Nekekaran naga paþisi sane popon sa naga iṁas visu amiu, þisi na war kamiu
lologena þasia imi si pun inu, naga nene yoko kila neloge wo vaþisi ne. ²⁰ In na nepisu
sane pe nekirawal re si yar tai e nini poli sane naga, po torokin naþa nevitetalia iṁas
pun amiu. Naga kiena sitomena maran taaga ga amio inu, ana nekilia sane visae naga
sike amio amiu, neþasine sane yoko naga sitom lue ga nakilaen wo manene laa van amiu.

²¹ Lala taþena la asikena, ana pe asa re naga poli. In na nepisuluþar la rui, sane sur
naþa keviu e kiela sitomena, nane sur la naþa pe kiela ga, ana sur kiena ne Yesu Kristo,
asitom korenan la ga, pe asitom re urmi e poli. ²² Ana Timote tekilia sane naga po paþisi,
akilia rui sanape naþa imimi lua memiyuṁae veraga e lologena wo, pano-o nepisu naga
sane pe naru, a naga pionu pe arimana. ²³ Sanene na, nepisu sane pe yar mesmes naþa
nevitetalia iṁas pun amiu, ana taþatete iṁas na wa. Sineun nesape nevisuli sane yoko ve
sanape van inu e nini sumo wa, þisi na naga kilia iṁas visawal van amiu. ²⁴ Visae yoko imi

wo van inu e nini, nekilia sane yoko ve naga taaga re kilia vim katen amiu, ana nemligan ke e kiau leniena, nemlelaga e Suþe sane yoko ve ve piavi re na yoko akilia avisu mena marau neias nakaten amiu.

Pol pisu sane popon Epaprotætas wasuþe si pula

²⁵ Sur taþena si tai na visawalen van amiu, sane kieta puruvi naþa Epaprotætas, naga mai paþisi pano-o nepisu sane popon neligan naga wasuþe si pun amiu sumo wa. Amligan naga pimi sane kiamiu naiilaena tai van inu, þisi na memiyuae veraga po, mesual veraga e mara na po na po. ²⁶ Ana sur taaga ga, maiena nene tolia, kila kare naga paþisi, kila naga sinenan pisape ias si una pun amiu. Ana pogos naþa naga mloge sane lologena na kiena maiena nene tol pa pulkiligamiu la rui, kila naga mloge piowa li maga, sinenan pisape visu amiu. ²⁷ Lelaga ga, maiena nene kila naga piowa pano-o mepisu sane yoko taulu naga, þisi na Ntewa sinen miea, pe mare re poli. Ana in na nesitom ke sane Ntewa pe sitom re ga naga poli, a sitom in mena ga, komin visae naga mare, yoko marera mena van inu vaþisi, yoko yakol si pupia naloge viowaena metavan si naloge viowaen taþena la naþa nokus ke pa rui. ²⁸ Ana pogos naþa mai sanene, sike amio in e nini wa, nemloge piowagan naga paþisi. Ana sineun nesape neligan naga wasuþe sina pun amiu sumo wa, a nemlelaga sane amiu mena akekaran navisuen si marana. ²⁹ Sineun aworworun naga e kia kiena ne Suþe, avisuar ruru naga sa naþa apisuluþar naga amio kiena yuaena la naþa kila e nini. Yar sur la ne sanene, popon tevisuar ruru la, po tewatanon la, ³⁰ vanon akila yuaena kiena ne Kristo po paþisi. Epaprotætas naga sanene narui, naþa sitom manene laa yuaena nene, kila sane pe sitom re nena kiena malena, lavis marena. Naga kila sanene vanon sinenan sape ve masisu e yuaena naþa amligan e limana. Amiu taþatete aim aiila inu, ana amligan naga kus kiamiu kia, pimi miyuae ke amio inu. Naga nene aure si naga, akila wo vania.

3

Sineun nesape nekilia ruru Kristo va laa sane, amio kiena puriu kawaena

¹ Wolai lala a vineu lala, poga ga, nesape nesiar nokotawe kiau visena narui. Visena maro tai na po na visaen van amiu sa nini, amiu akekara silau e malena wo naþa Suþe mla pa pan amiu rui.

Pona visena nene nepisa pa pan amiu yam moki yo rui, ana ve sinemiu kar in re, pe nesitom re sane piowa navisaen sur wo la van amiu yam ve moki poli. Naga poga ga pan inu, a nesitom sane kilia iila amiu mena ve keviu va laa sane.

² Ana visena viu si tai naþa nesitoalia navisaen van amiu sanini, sane monar avisuar ruru amiu e la naþa amlologon manene ke þaviu. Na nene komin naþa aararan ke asape þaviu nene naga ga pe mrapa naþa yar kilia va loyua e namratava puna Ntewa, ana na nene na pe lelaga re poli. In na pe nekekaran la re nena ga, nepisu la sane amiyuwon polo la asu kar ke ga sa ga lokul tetan lala.

³ Sur naþa tesike ea, naga pe sa re nena nene. Ve tevisu re sur la naþa sike e kulu yepeta, sane sur ne la nene kila ita temerarava e marana ne Ntewa, komin temlotun ke naga e ninuta, a tekekara silaga na sitoalen Yesu Kristo kila ruru kieta mrapa. !Visae asun avisasa ke asape þaviu ga kila Ntewa kekaran yeririna, monar tevisa tesape naga pe na yepela ga. A naþa nalelaga nena, nane ita tesike e ne, naþa tete plan ke þelaga viowa a sitomena viowa vetan kieta malena lala!

⁴ A visae aararan ke asape Ntewa yoko kekaran ita e sur ga la naþa sike e ita, pona nekilia nevisawal kiau sane yoko wo taulu si kiela yo. ⁵ Visae nevisa plan kiau sunena lala, yoko amiu avisu punu ga mesmes ga a po, taveve þelaga mesmes a ya naþa navisaluaena pisa. Sur na sumo, e kiau lus lala, in na nemolue mesmes ga e pupia lus nae Israel, nepe kuruta mal mesmes e lus kiena ne yermarua apua naþa Pensiman. Ata amio auia, lalua ape Yu, kila in mena nepe Yu nena napo. A ta sina, in na nepaeme, tol kana wik taaga ga, nepe þaviu. Sur taþena, e lepas na navisaluaena kiena le Yu la, in na nepim nekeviu

nepe kana Varasi tai, nepian ke pan yar taþena lala. ⁶ A nanua sumo, e lepas na iilaaren lotena kiena le Yu la m̄arera, in ke narui naþa netaulu punu la la sane, nekilaþel ke ga li nalelagaena na suṃare la paþisi. Ana na maro naþa nekilia nevisa, e lepas na þelaga memes, pe visen re nena tai e navisaluaena kiena le Yu lala naþa nekilarovia pona nekila palia.

⁷ Sur la nene, kila apisu sane in na nepo paþisi, amligan inu nemon laa metava paþisi. Ana pogos naþa Kristo pio inu, pe nepisu re si sur la nene sane pe sur wo la pan inu poli, nepisu la sane pe sur na kokovioena ga, þisi na nemligan punu ga sike na, nesiraun ga naga. ⁸ Lelaga, nekilia nevisave ve sa nene narui, sane nepisu ke sur la punu ga nene pe sur na kokovioena ga, ana sineun ga nesape nekilia Kristo Yesu sane pe Suþe e kiau malena, va re laa sane. Sur taaga ga nene nepisu po, naþa kana napoena po taulu sur taþena la punu ga, ana naga ga nene sineunia. Sineun manenea na tolen naga e kiau malena, ana nekilalu kiau sur taþena la punu ga kominia, ana woga ga, nepisu sur la nene sane pe kororak ga pan inu.

⁹ !Visae kiau malena kilia yakol ruruia e kiena malena yoko wo na wo! Naga nene in ga taaga taþatete neyuṃaenia, komin naþa sa nelogear navisaluaena, yoko navisaluaena taþatete kila sane netorokin naþa nemesmesu e marana ne Ntewa. Ana kieta mrapa taþena natolen namesmesena suṃa ga. Na nene, naviawaena e Kristo, a naga pe mrapa namesmesena naþa Ntewa ga pietavan ita ke la naþa temlelaga e narina.

¹⁰ !Visae nekilia naþa nekilia ruru ga naga, amio pupia puriukawaena kiena ne Ntewa naþa kila naga mal sina ga e marena, yoko wo na wo! In na nekekarana ga na kuspaeen naloge viowaena la naþa naga kusia, a visae nekilia netorokin naþa nemaren marena ta ne sane kiena marena, yoko nevisu wo manene vaþisi van inu. ¹¹ Sur m̄arera ya na sa nene naþa monar nowaro ea, na woga ga, ana monar nekila ga ya naþa nekilia vena netol malena viu na suṃalen sina e marena.

Sur naþa tesuṃa toþarwaryon ke ne

¹² Nepisayu inu ke sina ga sanene, pe sineun re nesape asitom ke asape in na nesape nepo punu pa rui, pona netol pa kana m̄ak rui. In m̄ena pere ke ga wa, ana komin nekilia sane Kristo Yesu þure inu nepe kiena pa rui, sineun nesape nowaryon lue ga vena netol lele tai naþa naga kilia kekarania. ¹³ Wolai a vineu lala, monar nevisa ruru van amiu, nepisu in sane pe netol re lele nene poli wa, ana yuṃaena taaga ga nene teke e kiau sitomena silau, sane in na monar sineu þesan sur ya naþa sike varaun inu, ana monar newaryon natauluen sur ya naþa sike e marau. ¹⁴ Sur naþa neþaryon ke ne, naga sanini, sane kiau malena monar yoko wo ruruia amio Kristo Yesu, vano-o yoko in m̄ena neve yar tai naþa neloge vioena wo kiena ne Ntewa naþa visa van inu, sape “!Pogaga, ko ovam metava osike amio inu narui!” Sur nene sa naþa tropi tai naþa amligan ruru m̄eke rui, ana tekiririn ke, vena tetaulu ve kieta. ¹⁵ Visae ita þasia kieta sitomena la marua ruru þisi, popon teyuṃae ve sanene narui, ana visae e sur la þasia, ita þasia kieta sitomena la pe marua ruru re sanene poli wa, nemlelaga sane Ntewa yoko kila sur la nene merarava ruruia van la. Pona e sur la moki pe tepim tepo re e poli wa, ana yoko naga iila ita e na wa. ¹⁶ Ana monar towarar ruru naga naþa tepim tepo pa e rui, sane piowa naþa teloru teviepal sina ga vetania.

Ataveve lau

¹⁷ Wolai a vineu lala, nepisa awis pan amiu sane monar ayakolkol ruru amiu, ataveve li lelen lau e mrapa na kiau malena. Visae avisu kilale amiu þas sane akila ke po sanene rui, amiu taþena towe lai, ayal ataveve lala lala. ¹⁸ Nepisawal visena nene pan amiu yam mok li rui, a nanagane na nepisa ke sina ga naþa nemloge piowagania, amio wamarau mlau. Nanene komin naþa nepisu ke amiu þasia sane aþar ke kia naþa ape li nalelagaena, ana kiela malena þarlologia ga sane ape sinekar amio Kristo, amio kiena lak torovia. ¹⁹ Kieta nasinekar la nene, sur naþa amlotunia, naga meþela ga. Kiela naviowaena lala, popon

amawania, ana apilaven manene laa. Sur naþa pulen kiela sitomena, sur na yomarava ga la nini, ana luasnela, akovio viowa ga.

²⁰ Ana ita, pe tepe yeririna na yomarava re la nini poli, kieta purvanua napo, nane ma e peni metava. Yar keviu nae e nene, nane Suþe Yesu Kristo, kieta natamaliaena, ana tesike e yomarava nini wa, tesuñate ke naga, tepisusu ke sane yoko ve ve piavi re vitomin ita sina. ²¹ Ana pogos naþa visae naga vitomi, yoko yuñae amio kiena pupia puriukawaena naþa torokin nakilaen sur punu ga su vatanon kiena nasuþenena, ana yoko vilopu ita. Nanagane, tesike temio yepeta marua la na yomarava nini wa, naþa menunu pororowa ga, na ape sur na marena ga, ana yoko naga la tas viu la van ita naþa po sane tasnena, naþa merarava, tego, ñarera, suña wo sulue ga.

4

¹ Ve sanene, wolai lala a vineu lala, popon amiu asuñal ñarera sanene e kieta Suþe. Nepisa sanene vanon nesitom amiu, sineun amiu paþisi, amiu akila inu nekekara keviu, noþarwarin amiu paþisi, ana sineun nesape yoko wo van amiu silaga.

Visena kiena yeririna þasia

² Nemloge piowa komin nepisu sane monar nevis ve tokaki van kieta sira lua nene, Yuotia amio Sintike. Lalua apis vitawa pan la paþisi, ana nepisa pan amiu sane sineun lalua monar akila kiela sitomena vito ga tano, vim ve taaga vatanon kieta Suþe. ³ Sira lua nene, nanua nemiyuñae veraga nemio la po paþisi, amio ñena yaru nene Klemen amio yar taþena lala, naþa moþaryon lologena wo pano-o imimi punu ga kiamimi sitomena taaga ga. Nekilia sane kia kiena ne yeririna nayuñae punu ga nene asiriar sike pa e tus na malena rui, ana pogos naþa amlipere la sina, nemloge piowa paþisi. Ve sanene, kiau naviunena tai van ko ne, kiau erau naþa nanua sumo tepe yar na yuñae veragaena konua rui pimi. Neviun tan ko vena ko na oiila sira lua nene vena aim ave erau wo sina ga.

Visena na iilarena lala

⁴ Ana kiau visena si tai van amiu punu ga, nesape amiu akekara e Suþe, akekarana naga silau. ⁵ Pogos naþa alual pog ñarera, ava ruru ga, akila sa naþa yar la avisu kilale sane kiamiu sitomena la piayavi ruruia. Akilali naþa asitoñal lue ga sa naþa ve ve piavi re na, Suþe wasuþe sina. ⁶ Amiu ve akila re sinemiu la pepen sur lala, a e sur ya la naþa imi kate e kiamiu malena, avisa siþa van Ntewa vanonia. Avisawal vania e sur ya naþa apilasina, aleninia, atagin vania, ana nanene monar akila silau e sitomena na visaen potena.

⁷ Ana pogos naþa aligan sur punu ga e limana sanene, yoko avisu naþa Ntewa yoko ligan kiena suñare e amiu, iila amiu. Kiena suñare nene keviu paþisi, kilia kila wo vaþisi van ita taulu ya naþa tekilia tesitomia, vano-o kila naþa uarar ruru sineta po kieta sitomena vena ñarera e Suþe Yesu.

⁸ Wolai lala a vineu lala, lavis nevisa make kiau visena van amiu narui, ana nesape neiilaar amiu vena kiamiu sitomena la ulen ga sur la naþa Ntewa sinenania. Sur ya na pe lelaga, po sur ya na mon metava, po sur mesmes ya, po sur merarava ya, po sur nowo ya, po sur ya navinaiaiena, po sur ya na yeluarena, po sur taþena ya napo, nanene kana sur ne la naþa po asulue ga e kieta sitomena lala. ⁹ Naga nene pe þelaga la naþa noþaryon ke vena neviani amiunia, pona atol tan inu, pona metavana, apisu e kiau malena. Ana visae avisu sane pe lelaga sane þelaga wo laþas nene sike e kiau malena, nemiye awis pan amiu vena amiu ñena aligan ruru e kiamiu malena lala. Ana visae akila sanene, nemlelaga sane kieta Ntewa nasuñareena yoko sike amio amiu, iila amiu.

Potena e nalaena

¹⁰ Nesape nevisa van amiu nesape pupia kekarena pan inu, sane yam piavi li ña ga pe nepisu re sur tai poli, þisi na netol ga narin nalaena naþa amligan pimi. Nemlelaga sane asitom in ña ga, ana nekilia sane amiu pe mrapa re ga naþa akilia akila sur imi tol inu e nini poli. Ana pogos naþa nepisu kiamiu nalaena nene, nepisu sane kiamiu sitomena

naiilaena kiau yuþnaena mal sina ga, ana nemiyeluar Ntewa vanonia. ¹¹ Nepisa sanene, a pe naga re ga naþa sane nepisape pe kiau sur re poli, vanon sur nene neþarpoyo e rui, sane sur ya na vim katen inu, po nesike sanape, nekekarana ga. ¹² Nesike tano po nesu metava, visokar inu po kau kinanena moki, luþnau korena po luþnau pule, in na nokom e sur la punu nene rui. Pog viowa pona pog wo, ana mrapa kien Ntewa navawarpoen ea teke ne, a naga pian inu ea, kila neþarpoyo e sur la nene rui. ¹³ Ve sanene, nanagane na nepisu sane nekilia netaulu sur la punu ga naþa þisina vim e inu, nane e pupia puriukawaena naþa Kristo kila ke neþarera ea.

¹⁴ Nesape nevisa sanene, amiu nae Piliþae, asitom na iila inuena e pog þmarera la ne sanene, amiu ape lemm paþisi ne. ¹⁵ Sa naþa apisuluþar pa rui, pogos naþa nesiar kiau nayalinen lologena wo nene, pogos naþa nepetan Masionia nepano, pe suþnare re nena tai naþa miila inu, peraga, amiu ga. In na neþar sur wo la moki pan la paþisi, a pe lala yar re tai naþa sitom sape ligan sur tai vim poli vena iilaen kiau mrapa pona kiau yuþnaena. ¹⁶ Ana amiu apo paþisi, pogos naþa luþnau plasia amiilala inu, amligan nalaena la pimi pan inu yam mok li þmaga, pano tol pogos naþa nepa nemiyuþnae ke gare gar Tesalonaika. ¹⁷ Nepis ke sanene, pe naga re ga naþa nesape nowar lue nalaena la poli, ana vanon naþa sineun nevisu naiilaena la molue e suþnare lala na iilaena yuþnaena kiena Suþe. Nanene vanon sane visae akila wo sanene van yar taþena lala, ana kiamiu þelaga wo nene yoko war mrasa, kila sur punu ga wo laa sane van amiu sina ga. ¹⁸ Vanon nagane, nepisa potena pan amiu paþisi e nalaena la naþa apitetalia Epaprotetas þar pimi, netol la punu pa rui. Nalaena la nene pimi, pa taulu ya naþa sineunia, ana nepisu sane nanagane po laa pan inu. Kiamiu naiilaena la nene, sane ponotaninu tai naþa ponos po paþisi, la sane kuþaþaena tai naþa akila pan Ntewa naga pisu po paþisi, kekarania. ¹⁹ Ana nekilia sane visae limamiu plas pogos tai, yoko kiau Ntewa visuvevea lue ga, vanon Yesu Kristo kila pa rui naþa naurarena lala kiena ne Ntewa nae mae peni akeviu paþisi. ²⁰ Sanene, yoko tesuþna teyeluar kia kiena ne arimata Ntewa silau, yoko teyeluar þna naga vano-o ve þisi re pogos tai, sanene.

Visena maro

²¹ Aliganlelein kiau visena nene van li nalelagaena wa lala naþa asike ne, avisawal van la apisape nesitoþnal la ke silau. Wolai taþena lala amio vineta taþena lala naþa asike amio inu e nini, lala þmena asape avisa pokolulagi po pokolemalo van amiu. ²² Þas si naliganen visena sanene iþmasu van amiu, nane li na lelagaena wa la punu ga e nini, amio þmena la naþa amiyuþnae kiena þarin suþe nene Sisa e þmana pupia yuþna nene.

²³ Kiau leniena, sane lemmamiena kiena ne Suþe Yesu Kristo sike e ninumiu lala, sike likan amiu silaga.

Inu, Pol.

Maki Naþa Pol Siria Pa Pan
 Li Nalelagaena Wa Lala Nae Garu
KOLOSI
 Visayuena Na Tusi Nene

Komþasnen suniena plas na tusi nini

Kolosi naga pupia pulkumali tai na lepas nae Esia naþa nanua sumo na mēke vatanon Þarin Suþe keviu nae Rom. Pulkumali nene sike e purvanua naþa nagane kiena kia Teki. Pulkumali nene mēke yepasnen pulkumali taþena naþa Episas e lepas naþa mrae molue ke komea. A maki nini Pol siria pan yaru na suþmare lala nae yo nene. Pol pe siar re suþmare nae Kolosi poli, ana pulkumali nene sike lavisin Episas, naþa pupia pulkumali na lepas nene, naþa Pol miyuþmae ke e silaga. Pogos naþa Pol sike garu Episas, naga mligan plan ke kiena yaru lala apa amlologon ke lologena wo e yo lala na lepas nene, a Kolosi naga tai naþa mēke e yo la nene. Ana komin suri ne nanene, Pol pisu sane yuþmaena na visuaren yo nene Kolosi naga mēna sike e limana.

Pol mloge visena tai asape navianiena lala na suþmare nene, asuþma apisa ke asape yaru lala monar alotun ga yerkawa lala a nasumonena kiena yermare lala, vena akilia ruru Ntewa, a vena akilia atol maliena naþa pulen suri makega. A apiyan ke yaru lala, asape monar ataveve navisaluaena marua e lepas na kinaniena, a suri taþena si laþasa, a monar ave þaviu vena atol maliena.

Ana Pol siri maki nini vena visaluþaren sitomiena viowa la ne sanene, a pisawal visena lelaga kiena Yesu Kristo pan la. Purþesnen sitomena naþa pisa na sanini, sape Yesu Kristo naga taaga kilia la maliena naþa ulen suri makega van ita, a vianena viowa la nene asuþma aþere plan yaru lala aþure matania. Kristo miyuþmaen yuþmaena kiena Ntewa na sien yomarava nini, a naga miyuþmae kiena Ntewa vena wereplan si yaru la aimi ea. Yaru monar sikol naga e Kristo vena kilia tol malena, a pe mrapa taþena re si poli. Þisina siraunia, Pol pisawal panila e suri la naþa akilia atol e kiela maliena komin naþa amlelaga e Yesu, a naþa asikol la ruru amio naga.

Pol mla maki nene pan yaru tai kien kia Tikikas vena la va van li nalelagaena la garu Kolosi. Tikikas nene, naga yaru mna nena naþa lalua Onesiþmas apano, naga mla Onesiþmas þasuþe si pa kiena yo. Suniena nene sike e maki kiena Pol naþa pitetalia pa puna Pilimon.

Komþasnen tusi la na nini

Visena þesa 1:1-8

Þelaga kiena Kristo, a kiena yuþmaena 1:9—2:19

Malena viu e Kristo 2:20—4:6

Visena maro 4:7-18

Pol siar kiena visena

¹⁻² Inu Pol, naþa in na yaru nalologena kiena ne Kristo Yesu naþa Ntewa naga mligan inu, a nekekara naþa nevitawe amiu e maki nini, naþa nesiria piþmasu pan amiu li nalelagaena wa lala nae Kolosi, naþa amiu punu ga ape kiau wolai lala a vineu lala e Kristo, naþa asuþma apiawa mmarera e naga. In na nemio Timote, naþa naga sike amio inu, imimi lua memlen mesape þisi na lemamiena a suþmarena kiena ne Arimata Ntewa sike amio amiu.

Pol pisa potena pan Ntewa vanon la

³ A silaga e kiamimi leniena lala, imimi lua mepisa potena pan Ntewa Arimana ne kieta Suþe, Yesu Kristo, vanon amiu. ⁴ Naga nene vanon naþa imimi lua mekekaran amiu paþisi, naþa visena tol imimi sape kam na asuþma apiawa ke mmarera e Yesu Kristo, a asuþma sinemiu sii manene ke mēna li nalelagaena taþena lala. ⁵ Þelaga wo nene naga

suŕna molue ke ga e kiamiu malena lala komin naŕa sinemiun manene naŕa ŕisi na akilia atol suri wo la naŕa Ntewa mligan ruru sike ma e peni vena ve kiamiu. Suri wo la ne sanene, amloge lologena wo pisaar pan amiu ŕisi rui. ⁶ Visena lelaga nene pimi pun amiu ŕisi rui, a nagane, suŕna pa vanua manene ke ŕena ga e yo taŕena lala e yomarava nini narui. Suŕna pava ke sanene, ana suŕna kapuru a suŕna ŕar ke ŕena ga mras la naŕa powo, torokin ke naŕa kila pan amiu e ke e pogos naŕa amloge ŕesania, naŕa apisu kilale sane lemamiena kiena ne Ntewa e ita naga keviu a lelaga paŕisi. ⁷ Sur la nene Eŕaŕas naga pian amiu e rui, pogos naŕa naga kus lelemimi imimi lua, ana naga pimi pisawal ŕesan lologena wo nene pan amiu. Naga pe yaru tai naŕa imimi memiyuŕnae ke lele taaga, a naga masusun yuŕnaena wo lala kiena ne Kristo. Imimi mekekarana naga paŕisi, ⁸ a nanagane, naga ŕasuŕe si pimi pun imimi rui, mla lologena wo tai pan imimi, naŕa pisayu sanape naŕa kiamiu malena lala suŕna pule luen ga e pupia sinesiena naŕa Ninuna Wa mla pan amiu.

⁹ Komin sur nene, pogos naŕa imimi lua memloge visena nene kiena Eŕaŕas, memlen wo amiu silaga pimi tol nagane, a mesuŕna mepiun ke tan Ntewa mesape ŕisi na Ninuna Wa la manmaruaena a nakiliaena wo lala van amiu, vena akilia ruru nasinenanena wo punu ga kiena ne Ntewa. ¹⁰ Ve sanene, ŕisi na yoko akilia ayal mesmesu e mrapa napo naŕa popon yeririna kiena kieta Suŕe la ayal ea, a ŕisi na akilia akila naŕa naga kilia kekarana make kiamiu ŕelaga punu ga. A yoko mras wo lala kilia imi ŕnalivi e kiamiu malena lala a e ŕena ga e kiamiu yuŕnaena lala, a ŕisi na kiamiu kiliaena e Ntewa kilia va merorol manenea. ¹¹ Imimi lua memlen mesape ŕisi na pupia puriukawaena kiena ne Ntewa suŕna kila amiu ŕena ga aŕarera, vena akilia asuŕmalar amiu e pog ŕarera, a vena kiamiu sitomiena ve piavi, a akekara ga e pog la ne sanene. ¹² Ita na monar tevisa potena va Arimata, naŕa kila ita ŕena ga temio li nalelagaena wa taŕena lala, tekilia tokus lalimana loyuŕna e kiena nasuŕenena na yomerarava nena, ¹³ komin naga ŕurelua ita rui petan ŕareraena na yemalolo, ana naga mlen plan ruru ita tepa e nasuŕenena kiena ne narina nene, naŕa naga kekarana naga paŕisi. ¹⁴ Ore, Ntewa naga ŕerelua ita ŕisi rui, naŕa piwo ita komin kieta mlamulena viowa lala.

Kristo pe ŕarun yo yau wetelu

¹⁵ Narina nene, naga Kristo nene, naŕa naga pe nono tai naŕa tekilia tevisuia, naga kiena ne Ntewa naŕa taŕatete tevisu naga,

naŕa naga pe ŕearun make suri la punu ga naŕa Ntewa sii la.

¹⁶ E ga e Kristo nene, Ntewa sii make sur punu ga,

naŕa ma e peni a e yomarava,

naŕa tekilia tevisuia a naŕa taŕatete tekilia tevisuia,

amio sur la naŕa apisuar ke yo yau, sa naŕa ŕarin suŕe lala, naŕareraena lala, yerkawa lala, a navisi lala.

Ntewa sii make suria e Kristo,

a Ntewa sii make suria pe kiena ne Kristo.

¹⁷ Kristo naga sike pa sumon sur taŕena la rui,

a naga mligan ruru make sur la nene, asuŕna amiyuŕnae ruru ga e lelela.

¹⁸ Kristo pe purŕes nen malena kiena nalotena,

a naga pe ŕarin lotena nene, sa naŕa lotena nene naga pe tasnena.

Naga sumon ŕes yaru la naŕa amal sina e marena,

ana sanene naga kila sane nanagane naga sike laa metavan make sur taŕena lala.

¹⁹ Kristo to metavan make sur la sanene, komin naŕa Ntewa taŕan kiena naurarena sike e naga, sa naŕa kiena malena wetelu a kiena naŕareraena sike ea.

²⁰ E ke e Kristo nene na wa, Ntewa ŕar ke sina ga sur nae ma e peni amio yomarava nini awasuŕe ke sina ga vania.

Naga kila yo yau wetelu kilia imi ve mara wo ke sina ga amio naga, nanene e ga e tana ne Kristo naþa mlau e laki torovia.

Amiu ave marawo ke sina ga amio Ntewa

²¹ Nanua sumo, kam na ape wolawa ga, a asike laa perinan Ntewa, a ape kiena nasinekar ga, komin kiamiu sitomena viowa a kiamiu þelaga viowa lala. ²² Ana nanagane, naþa Kristo pimi pe yaru sane ita, kiena marena kila ita teve mara wo ke sina ga temio Ntewa. Ntewa kila sanene, vena kilia were amiu aimi puna naþa ave yar wa kemua lelaga, a ayekiki ruru wo, a naþa ve sur viowa re nena tai teke e amiu. ²³ Ana nanene na kilia ve sanene, visae asuñmalu ga ñarera ase Kristo, a visae amlelaga ke e naga wa. Popon amiu ve auresun amiun re naþa auarar manene lelagaena e navisaarena lala kiena ne Ntewa, monar alelaga sane yoko naga monar la sur punu ga van amiu naþa amloge rui e nalologena wo nene, naþa yeririna na yomarava la amloge rui, naþa inu Pol in na nepe yaru na lologona.

Pol miyuñae ñarera komin li nalelagaena lala

²⁴ Nanagane nemloge piowa e tasneu komin amiu, ana in na nekekara ga ea. Nanene naga sa naþa nesuñma nemiyuñmaen sur na loge viowaena make ga e tasneu, naþa Kristo naga mliganar inu vena nowaria, sa naþa naga þar þisi rui, vena neiila þegas nen li nalelagaena lala vena asuñmalu ñarera. ²⁵ Ntewa mligan inu vena neimi ve sa yaru na yuñmaena tai na þegas nen li nalelagaena lala, a nagane nekilia neiila amiu e yuñmaena nene naþa Ntewa mligan e luñau, nanene vena nevisawal kiena visena va yeririna lala vena akilia make ga. ²⁶ Kiena visena nene sane visena tai naþa nakonua konua rui, tapoloun ga e yermarua lala, naþa la pe akilia re nenaga, ana nanagane Ntewa kila pimi merarava pan kiena li nalelagaena wa lala. ²⁷ Kiena sitomena naga pe na kilaen sanene narui, sane visena nene naþa kiena yeririna la naþa le Yu lala, la pe amloge kilale re poli, ana þisi na naga visawal kana sur nowo ne lala, naþa po manene laa, va la naþa pe ape le Yu re poli. ?A visen tapolou nene pisa ya? Naga pisa sanini narui, pisape Kristo naga kilia suñma e losinemi lala, a amiu akilia alelaga asape þisi na Kristo naga kilia kila amiu akilia asikol Ntewa e kiena malena wo nae ma e peni.

²⁸ Imimi lua mesuñma memlologon ke Kristo ne nanene narui pan yeririna lala, mesuñma mepisa ke pan la mepisape la monar avisuar ruru la, a mesuñma mepian la ke e manmaruaena lala. A visae laþasia naþa kiela sitomena lala a kiela lelagaena lala marua ruru wo, la akilia aimi asuñmalu amio imimi lua e marana ne Ntewa. ²⁹ Nesuñma nemiyuñmae ke ñarera paþisi komin sur ne nanene, ana silaga nesuñma nemiyuñmae ke e pupia nañareraena nene naþa Kristo naga kokonia inu ea.

2

Monar amiu alelaga ñarera e Kristo

¹ Ee, naga sa naþa nepisa ne, naþa nesuñma nemiyuñmae ñarera komin amiu, a komin ñmena ga la naþa nae Laotisia a amio ñmena ga yeririna taþena lala naþa la pe apisuli re marau pogos tai poli wa. ² Sineun nesape nekila kiela sitomena suñmalu ñarera suñma ga, a vena kiela sinesiena lala kilia sikol ruru sinela lala la aimi ave taaga. Sineun manene nesape þisi na la atol pupia nakilia wanen suri nene naþa sumo na la pe akilia re poli, naþa naga Kristo ke narui, ana þisi na kiela sitomena lala ve veve lua re sina. ³ Naga nene komin naþa e Kristo, yeririna lala la akilia alual sur la naþa powo na manmaruaena amio na kiliaena kiena ne Ntewa, naþa naga þarwania suñma ga e Kristo.

⁴ Nesuñma nepisa ke visena nene pan amiu, vena taþatete yeririna lala akila gola kiki van amiu vano-o aure kiamiu sitomena lala va ve taþena, e kiela visokanena na manmaruaena lala. ⁵ Nepis sanene pan amiu komin naþa nesitom manene amiu paþisi. Pe sur korena ga naþa tasneu sike laa perinan amiu, ana silaga kiau sitomena sike amio amiu. Ana nekekaran manene amiu ñmena ga, naþa nemloge asape amiu na pe asu re

ga sanene poli, ana asuṃa amiyuṃae mesmesu ruruia, a asuṃa apa veraga aṃsine ke Kristo ṃarera.

Kieta malena monar suṃalu se Kristo

⁶ Komin naṃa ita tokus Kristo Yesu naga pe kieta Suṃe rui, silaga monar teyal ga e naga, ⁷ a naga monar ve sa naṃa ṃeligas nen kieta malena, pona yuṃa na kieta malena monar suṃalu su metava e naga. Ve sanene, kieta naviawaena e naga kilia imi ṃarera laa sane silaga, sa naṃa apian ita e ṃisi rui. Ana silaga, monar tevisa luen ga potena vania.

⁸ Ana amiu monar avisuar ruruia vena ṃisi na taṃatete yeririna lala aimi aviar amiu e visena la naṃa taveve ga namanmaruaena kiena ne yeririna, pona navianena la naṃa pulen ga nakiliaena na yomarava nini. Visena korena la nene pe navisokanena ga, a la amolue ga kome sitomena marua kiena ne yeririna lala, a la amolue e lepas kiena ne yermare lala amio kimi lala, ana la pe amolue re e Kristo poli.

Kristo naga pe ṃarin sur punu ga

⁹ Ntewa naga mligan kiena malena amio kiena naṃareraena make ga sike e tasnena ne yeririna nene naṃa Kristo, ¹⁰ naṃa naga pe ṃarin sur la punu ga, a naga su metavan naṃareraena taṃena lala. A e ṃelaga ṃa nenaga nene, Ntewa mligan kiena sur tanea lala asike e kiamiu malena lala, amiu naṃa asike e Kristo. ¹¹ Ana komin naṃa amiu asike e Kristo, naga te plan ṃelaga viowa lala a sitomena viowa lala vetan amiu, sa naṃa naga kila ṃaviu e amiu, ana pe nepisa re ṃaviu nene naṃa yaru la asuṃa akila ke poli, nepisa ke ṃaviu taṃena tai naṃa Kristo naga kila, sa naṃa naga ṃar plan napiowaena lala e kiamiu malena. ¹² A pogos naṃa la akee amiu, naga sa naṃa Ntewa sin amiu amio Kristo, a naga kila amiu amal ṃena ga amio Kristo, naga nene komin naṃa amiu aṃsine naṃareraena keviu nene kiena ne Ntewa naṃa kila Kristo mali sina ga e marena rui. ¹³ Ana amiu la nene, nanua sumo Ntewa pisu amiu sa ga naṃa kiamiu mlamulena piowa lala kila amiu amare pa rui. Amiu na pe ape ṃaviu re sane le Yu la poli, ana Ntewa pisu amiu sa naṃa kiamiu malena pe pe ṃaviu re ṃena ga poli, sa naṃa kiamiu malena pe pilon ruru re poli wa, a ṃelaga viowa lala sike e amiu wa. Ana nagane, naṃa asikol amiu amio Kristo, Ntewa mla malena viu pan amiu ṃisi. Ita tetol malena viu nene komin naṃa Ntewa na piowo ita vanon kieta mlamulena piowa lala, ¹⁴ a naga miyumu plan kieta lapui la rui. Nanua sumo, lapui la nene la asike e tus nene naṃa navisaluaena ṃarera kiena ne Ntewa sike ea, naṃa la apiar ita paṃisi, ana Ntewa mlalua sur la nene. Amio kana tus ne lala, sa naṃa sane suar make ga e laki torovia amio Kristo, ana pe lapui re si la nene poli. ¹⁵ E laki torovia nene, Kristo taulu sur taṃena la naṃa puriula ṃarera, a naga kilaro nena naṃareraena kiena ne yermare lala, sa naṃa naga taulu la e pupia mara tai, ana naga kila kiena nasinekar la nene aimi ave sur korena ga e marata ita yeririna lala, vena ve tesitom re si tevisave la ato laa metava.

Kristo naga pe ṃarimiu

¹⁶ Visae ve sa nene, amiu na monar ve ataṃan re yaru tai visaluṃar amiu visave ve akan re suri nene, pona ve amun suri re nene. A amiu na monar ve ataṃan re naṃa yaru tai ṃareran amiu vena ataveve kiela ṃelaga marua lala e lepas na sur sane legiena wa la na kasa, pona e lepas nen ṃaṃagena na kupario viu, pona e lepas na legiena na olua. ¹⁷ Navisaluaena la ne sanene, yeririna lala la apisa vena akilali naṃa alual mrapa naṃa mesmesu, ana la sa ga ninun sur ga naṃa naga pimi ṃarpo re yo poli wa, ana purṃes nen sur lelaga punu ga, naga Kristo ga. ¹⁸ Yeririna la ṃasia asuṃa ga naṃa la asitom ke asape la apo manene taulu amiu, komin naṃa la apisu sur la moki e kiela ṃenienna lala, ana la asitom ke asape la akilia manene e lepas nen navisi lala. Ana asitom ke asape la apo, akila kiela sitomena lala sike ga tano yo, taulu yeririna taṃena lala, ana peraga, la nene la sa ga keriko. La asuṃa apilave ga e kiela visena lala, naṃa la apisayu manene laa ke sina ga paṃisi, ana kiela sitomena lala pulen ga vilaveena amio kiela sitomena korena taṃena laṃasia, vano vano-o tol naṃa la asuṃa amieluar la ke sina ga. Ve sanene, amiu

ve atañan re si la nene aliþere amiu avisave amiu na pe atol re sur nene poli wa naþa la asike e þisi rui, ¹⁹ komin naþa la nene la amligan Kristo þisi rui, la pe apuarar ruru re si naga ñarera poli sa naþa naga pe þarila. Ana Kristo naga suña þuarar ruru ke ga la naþa la sane komþas nen tasnena, a naga suña pagan ruru la, suña kawes mesmesun ruru kilamerpu amio kana kowiu lala, ana tasnena naga suña miyuña po a suña kapuru po sa naþa Ntewa naga sinenania.

Amiu na atol malena viú e Kristo

²⁰ Inu nekilia nesape sa naþa Kristo naga mare nanua sumo rui, amiu ñena ga amare amio naga, kila naþa e lepas na þelaga viowa, amiu amare e þisi rui, a pe pon re si þelaga viowa imi tol kiamiu malena poli. A Kristo naga þurelua amiu ñena ga rui e ñareraena na sitomena nasumo lala na yomarava nini, amio kiena yermare lala. Sanene narui, sineun nesape neviun tan amiu sanini: ?Sanape asuña amialoro ke sa naþa amiu ape yaru na yomarava ke ga wa? ?A komin ya ne amiu asuña amlogear ke navisaluaena marua la naþa apian e sumo, naþa la apisa apisape: ²¹ “Amiu ve auarar re sur nene,” pona “Amiu ve amunli re sur nene,” pona “Amiu ve atol re sur nene.” ²²⁻²³ Ana pe lelaga naþa yaru la amloge visena la nene, ana la asitom asape navisaluaena la ne sanene ape manmarua ruru po, ana navisaluaena la nene la amolue ga kome sitomena kiena ne yar lala, la pe ape lelaga re poli e vianena kiena Kristo. La apisayu ga sur na yomarava la nini, sa naþa kinanena, pona sur na munena, ana sur la nene taþatete iila amiu, a la taþatete ñena ga akila kare kiamiu malena, komin naþa visae olavia pona oyuñaena, þisi na sur la nene yokorena akokovio.

Pona yaru la apisirilua visaluaena la nene vena akilali yuñaena wo laþas yo, naþa la apisa apisape yaru monar len sanene pona sanene, a pona la apisa apisape yaru monar ligan kiena sitomiena su ga tano sanene pona sanene, a pona la apisa apisape yaru monar kilali naþa kawes ruru tasnena sanene pona sanene e sur la naþa ñarera pan naga.

Ana nevisa van amiu, sane visaluaena la ne sanene, la pe puriula ñarera re nena poli vena suwoen sitomena viowa lala a þelaga viowa la naþa sike e los nen yaru.

3

Malena naþa mekiki ruru po a pe wa ruru nenaga

¹ Amiu la nene, Ntewa naga pisirlua amiu amal sina ga e marena amio Kristo, ana sanene na monar aþionli ga sur la naþa nae ma e peni, e yo nene naþa Kristo naga toña tano e lepas nen Ntewa na þamarua. ² Amiu na monar asitoñal ga sur lala nae e yo nene, ve asitom re si sur na yomarava la nini, ³ komin naþa sane amare e þisi rui. Nanagane kiamiu malena viú naga tapolou amio Kristo e Ntewa, ⁴ komin naþa Kristo pe purþes nen kieta malena nagane, ana suraunia, e pogos naþa naga kate e maran yeririna lala, yoko ita ñena ga takate temio naga e kiena pupia naurarena.

Kiamiu malena na sumo monar þisi

⁵ Amiu na monar awe plan punu ga þelaga lala na yomarava nini e kiamiu malena lala, sane nataþaena lau, sur na mawaena lala, nasinenanena viowa lala, nakekaranen mlamulena viowa, a navinavinayaena ñena ga. Þelaga la nene piyowa ga, a navinavinayaena nene, naga sa naþa yaru kila sane sur la naþa naga sinenan manene laa paþisi apimi sa naþa kiena ntewa taþena lala. ⁶ Komin þelaga ne la nanene narui, Ntewa sinena mimi paþisi, ana kiena naliþereena naga suña pimi ke pan la naþa la pe amlogear re naga poli. ⁷ Sumo na, kiamiu malena sa ke nene narui, naþa amiu amiyal ke ga e þelaga la nene, ⁸ ana nagane, pogos na liganen þelaga la nene, pogos na sur la nene aþisi e kiamiu malena lala. Ve sanene, amiu taþatete sinemiu mimi, a taþatete avis kapuru va yaru taþena, a taþatete asuña ave erau viowa van amiu. Þisi na taþatete avismumun yar taþena, a ve avisa re visena la naþa pe kororaki. ⁹ A ve avisa kotalia amiu re ñena ga, nanene komin naþa amiu na amlalua þelaga marua naþa apaeme amio naga þisi rui, ¹⁰ a

amiu na amiyen ðelaga viu tai e amiu, sa naða malena viu tai naða Ntewa naga siia pe kiamiu. A pogos punu ga, Ntewa naga suða kila ke malena nene pimi pe urviu ke sina ga, vena kila amiu akilia ruru kemua naga lelaga, a vena kila amiu aimi laa ve sa naða ave kiena totou. ¹¹ Komin sur ne la na nene, ita na ve teliðere re si yaru lala, sa naða tevisave laðasia ape le Yu, ana laðasia ape li na yo taðena ga lala, pona laðasia la ape ðaviu, ana laðasia pe ape ðaviu re poli, pona laðasia la ape suðe, ana laðasia ape li nayuðaena kiena ne suðe ga lala. A ita na ve tevisa re mña ga tevisave yaru laðasia la aþian ruru la ana akilia suria, a laðasia ape yer ura ga, pe akilia re sur tai poli. Ana pupia suri taaga ga naða tekilia tevisuvisu yaru ea, tevisave naga mlelaga e Kristo pona ve lelaga re, komin Kristo naga sike e sur punu ga a e yar punu ga.

Amiu aliðan malena viu nene e amiu

¹² Pogaga, sa naða Ntewa naga sinenan manene amiu paðisi, ana naga ligan amiu vena ave kiena yeririna wa lala, monar ayen ðelaga viu nene e amiu sa naða naga sinenania. ðelaga viu nene naga sa naða sur la nene asike e kiamiu malena, sa naða nasineyeena yaru, nasinewoena, navatanoena, namoðuena, a namalumena. ¹³ Amiu na monar ve sinemiu kar amiu re vilaga, a visae amiu yar ve lua, sur tai sike likan lalua nene, ðisi na monar avieviewo lalua. Ana monar amiu avieviewo amiu, e ke e ðelaga nene naða kieta Suðe naga piewo amiu. ¹⁴ Ana amio ðelaga wo taðena la nene naða monar ayenia, monar ayen mña sitomena e amiu, komin sitomena naga kilia sikol ruru ðelaga wo la nene vena la ayuða ruru ve raaga, vena la aimi ave taaga. ¹⁵ ðisi na suðare naða Kristo naga mligania naga kilia visuar sinemiu lala, komin naða Ntewa naga pioproan amiu vena ave taaga, naða amiu punu ga asikol ruru amiu amio naga e þegas tai naða naga pe þarunia, vena silaga suðare nene kilia su luen ga amio amiu. A silaga avisa potena e sur punu ga.

¹⁶ A visena wo kiena ne Kristo, silaga naga monar imi sa naða mali e sinemiu wetelu, komin naða kiena visena la nene naga po tanea wa. Amiu monar asuða avian amiu ea, a amiu ga asuða akila ruru amiu ke sina ga e kiena manmaruaena wo lala. A popon asuða ayau va Ntewa e sam lala, a yauena wa lala, a e yauena lala na yeluaren Ntewa, ana e pogos naða asuða ayau ke sanene, ðisi na sinemiu la punu ga ulen visaen potena vania. ¹⁷ Sur punu ga naða amiu akila, a visena punu ga naða avisa, ana monar akila e kia kiena ne Yesu, naða kieta Suðe, a pogos punu ga na monar avisa potena kome naga va Ntewa Arimata.

Malena viu kiena yaru lala

¹⁸ Amiu sira lala naða atalopa rui, monar avatano e womiu lala, sa naða mesmesun naða sira naða mlelaga naga kila.

¹⁹ A amiu yerðene la naða atalopa, monar asitom manene womiu lala, a kiamiu ðelaga lala monar ve melkalka manene re silaga van la.

²⁰ Amiu sisi lala, monar alogear arimamiu lala amio anemiu lala, komin naða kieta Suðe naga kekaran ðelaga nene paðisi.

²¹ A amiu arimala lala a anela lala, ðisi na sinemiu lala ve vilul re va narimiu la silaga, komin naða visae ve sanene, akila kare la, akila kiela sitomiena lala loloru.

Suðe lala a kiela yar na yuðaena lala

²² Amiu yar punu ga na yuðaena kiena ne suðe lala, silaga monar alogear kiamiu yerkawa la nene. ðisi na ve akila re sanene e ga e pogos naða la asike amio amiu, vena akilali naða la akekaran amiu, ana silaga monar ayuða naða kiamiu sitomena la ve lelaga make ga, sa naða e yuðaena nene, asuða amlogear ke kieta Suðe silaga. ²³ E yuðaena ya naða amiu akila, monar akila naða akekarania, sa ke naða asuða amiyuða kiena ne Suðe, pe kiena yaru re ga la poli. ²⁴ Popon asitoðal sa naða Suðe ke nene narui ðisi na naga la kiena lalimana van amiu, sa naða naga pul amiu, komin yerkawa ruru

napo naþa ayuñmae vania, naga Suþe Kristo. ²⁵ Ana yaru naþa suñna kila ke pe mesmesu re poli, þisi na naga kilia la maran ke sina ga vanon kiena napiowaena nene lala, komin Ntewa pisuveve yuñmaena kiena ne yar la punu ga mesmesu ga.

4

¹ Ana yerkawa lala, amiu ñena ga monar akila mesmesu ruru wo va yaru lala e kiamiu yuñmaena lala, komin naþa amiu ñena ga kiamiu Suþe tai sike ma e peni naþa þisi na naga liþere kiamiu þelaga lala.

Pol naga pian la

² Amiu na monar añarera e leniena pogos punu ga, a monar alen naþa asitom ruru e sur la naþa avisa e leniena, a naþa kiamiu sitomena lala naga suñna pisa ke potena pan Ntewa. ³ Sineun ñena ga nesape monar alen wo imimi, vena þisi na Ntewa vike kiamimi mrapa mekilia melologon sur wo nene naþa sumo na tapolou, naþa visena kiena ne Kristo, naþa nanagane na nesike e lokap vanonia. ⁴ Awis, sineun nesape alen naþa þisi na nekilia nevisi wo, vena kila visena la nene merarava, sa naþa mesmesun ga naþa yoko monar nekila. ⁵ E þelaga la nene naþa asuñna akila ke e maran yar la naþa la pe amlelaga re e Kristo poli, monar ave manmarua wo vena akilia ataveve kiamiu pulmas lala, vena aurela aimi e Kristo. ⁶ Amiu na monar avis ruru amio la, e ga e visena lala naþa nasinewo a kiki, ana la aloge visena la nene aloge wo, a monar akilia mrapa na visatañelaena visae aviun naviunena kar ga lala e lepas na kiamiu viawaena.

Pol mligan yaru la lua apa pula

⁷⁻⁸ Kieta wolai wo nene Tikikas, naþa naga sike amio inu, þisi na neligan naga la ñmaki nene iñasu pun amiu vena visawal van amiu visave imimi mesike sanape, vena akilia aloge wo. Nekekarman manene kieta wolai nene paþisi, naþa pogos punu ga naga ñmareran naþa iila inu e yuñmaena kiena ne Suþe. ⁹ A kieta wolai taþena naþa erau wo nene Onesimñas, naga ñena ga þisi na taveve Tikikas iñasu pun amiu. Onesimñas naga nae ga kiamiu yo, a naga ñena ga suñna mlelaga ke e Kristo. Lalue nene þisi na avisawal van amiu, e sur la punu ga naþa kakate ke e yo nini.

Visena maro kiena ne Pol pan la

¹⁰⁻¹¹ Aristakas naþa naga sike e lokap amio inu, a Ñak nene naþa naga wenla Þanaþas, a Sisas naþa apio naga Sastas, la telu nene apisape asitom amiu paþisi. Ñak nene, kana visena piñasu tol amiu pa rui, a pisape visae naga imi kome lepas nen yo na pun amiu, monar akekarania vena aure naga sukol amiu.

E le Israel la naþa amlelaga e Kristo þisi rui, la ga telu nene amio inu, imimi memiyuñmaen ke yuñmaena nasuþenena kiena ne Ntewa, a la telu nene la amiila inu keviu paþisi rui e pogos ñmarera lala. ¹² Eþaþras nene naþa naga ñena ga amiu kiamiu yar tai, naga pe yar wo tai na yuñmaena kiena ne Kristo Yesu, a naga ñena ga pisa pokolulagi pona pokolemalo pan amiu, pisape silaga naga suñna mlenwo amiu ke ñmarera paþisi, vena akilia asuñmalu ñmarera, vena amarua ruruia e Kristo sane keyowo, a vena asuñna añarera naþa akila ga sur la naþa Ntewa sinenania. ¹³ Sineun nesape nevisa mesmesun van amiu, nevisave yar naþa Eþaþras naga suñna miyuñmae ñmarera manene paþisi komin amiu, a komin le Laotisia lala, a le Erapolisi ñena ga lala. ¹⁴ Kieta erau wo nene, naþa Tokta Luk, amio kieta wolai taþena nene Timas, la ñena lua asikena a lalue apisa apisape lalue na asuñna asitom amiu paþisi.

¹⁵ Sineun nesape aligan kiau visena van kieta wolai lala a vineta lala nae Laotisia, amio sira nene Nemeva amio þegas nen nalelagaena lala naþa asuñna apiora ke e ñmana yuñna, avisave in na nesuñna nesitom la ke paþisi. ¹⁶ Ana yoko pogos naþa amiu aulo kiau ñmaki nene þisi, awis sineun nesape aligan van le Laotisia lala, vena auloia van þegas nen li

nalelagaena lala e yo nene, a monar aulo m̃ena ga kiau m̃aki taṗena nene naṗa ṗisi na le Laotisia lala la aligan imi van amiu. ¹⁷ A kiau visena tai naga va Akiṗas, nesape “Ko ovisuar ruru yuṃaena nene naṗa Suṗe naga mligan e lumoṃa, monar okila make ruru yuṃaena nene.”

¹⁸ Ana nanagane, nelalua kilamemego e limana ne yar na sirien m̃aki, ana inu ga Pol, nesiri kiau visena maro nini van amiu e ga e luṃau, nevisa pokolulagi pona pokolemalo van amiu. Amiu ve sinemiu ṗesan re sen la naṗa apiar manene inu ke ne, a lemamiena kiena ne Ntewa sike make e amiu.

Inu, Pol.

Ñaki Nasumo Naña Pol Siri
 Pa Pan Li Nalelagaena Wa Lala Nae Garu
TESALONAIKA
 Visayuena Na Tusi Nene

Komþasnen suniena plas na tusi nini

Pulkumali keviu nene Tesalonaika naga pulkumali keviu na provens nene Masetonia, naña ñeke vatanon Ñarin Suþe keviu nae Rom sumo. Pogos naña Pol molue Piliþae, pa ma Tesalonaika mlologon lologena wo e yo nene, ana suñare nene siaria. Ana siraunia pe yam piyavi manene re poli, lus nae Israel laþasa e yo nene apisa karea, la apieluenia komin naña apisu sane yaru moki naña pe ape lus nae re Israel poli, nanua sumo la amloge kiela vianiena lala, ana pogos naña amloge lologena wo naña Pol pisawalia, ana amlelaga e Yesu. Ana lus nae Israel la nene sinela kari Pol, ana añenelua e yo nene, ana pae pulkumali si tai, Perea. Siraunia, naga pa tol pupia pulkumali naña Koren, naga mloge lologena kiena li nalelagaena lala nae Tesalonaika e kiena erau Timote, naña miyuñae ke amio naga.

Pol siri þesan kiena ñaki nini pa li nalelagaena lala nae Tesalonaika vena visirluaen kiela sitomiena, a vena kila meraravan va li nalelagaena lala nae yo nene sape naga sitom la ñaga, a Ntewa sike amio la. Naga pisa potena pa Ntewa komin naga mloge sape asuñña amlelaga ke ñarera e Ntewa, a sinela sii ke yaru lala, a pisa panila vena la asitoñal si kiena þelaga wo e pogos naña sike amio la, vena atavevea.

A naga pisa tañe kiela viunena lala naña apiyun tania, asape yoko Yesu wasuþe si ve sanape. Sinelan asape akilia meraravan sane visae yaru naña marþan þesa ana Yesu ve vitom re wa, yoko tol malena naña ve uro re, pona peraga. A sinelan akilia naña yoko Yesu wasuþe pogwai. Pol pisaruru panila, sape monar ayuñae ga, naña kiela sitomena la varuru ga suñaga, a naña aligan kiela sitomena lala suñalu ñarera e Yesu vena asuñateo, vano vano-o tol pogos naña naga wasuþea.

Komþasnen tusi la na nini

Visena þesa 1:1

Pol kekaran la a pisa potena pa Ntewa vanon la 1:2—3:13

Pol piyani la e þelaga kiena yaru naña lelaga 4:1-12

Pol piyani la sape yoko Kristo wasuþe sina 4:13—5:11

Pol kila make kiena vianena lala 5:12-22

Visena maro 5:23-28

Visena na sumo

¹ Inu Pol, nemio Saelas a Timote, imimi telu mekekara paþisi nasirien ñaki nini imi van amiu, þegas nen li na lelagaena lala e suñare na pulkumali naña Tesalonaika. Memlelaga sane kiamiu malena lala asike ruru ga e Arimata Ntewa amio kieta Suþe Yesu Kristo, ana memlen ke sane lemamiena a suñarena sike amio amiu punu ga.

Pol lala akekara komin namasisuena kiena le Tesalonaika lala

² Lelaga, silaga na memlen ke pan Ntewa Armata, monar mevisa potena vania vanon amiu. ³ Mesitoñal amiu ke e kiamimi leniena lala sanini, taþatete sinemimi þesania sanape naña kiamiu naviawaena, amiyuñae ñarera tavevea, a sanape naña kiamiu na sinesiiena pimi plamolue ke e kiamiu þelaga wo lala, a sanape naña kiamiu sitomen piyavi lala kila amiu asuñal ñarera ruru ga po e kieta Suþe Yesu Kristo.

⁴ Erau lala, mepisuluþar sane Ntewa pe sinen sii amiu re ga poli, ana naga kilologia amiu ñena sane ape kiena lelaga, ⁵ komin pogos naña memlologon lologena wo pan amiu, naga sa ga pe visena korena re kiena yaru poli, ana naga pimi pan amiu sane visena

urmi tai naþa m̃arera. M̃areraena kiena ne Ninuna Wa sike ea, a naga miyur ruru sinemiu la pano-o amlelaga.

Amiu akilia kiamimi þelaga la pogos naþa mesike memio amiu, moþaryon paþisi na kilaen sur punu ga naþa mekilia mekila na kilaen naþa alelaga, ⁶ þisi na atolia, apimi sa naþa ape kiamimi nataveveena lala, ana pe kiamimi re ga poli, apim ape nataveveena kiena Suþe. Pe sur korena ga naþa lala taþena la akila pupia naloge viowaena a akila amiu atol pog m̃arera e pogos la nene, ana aporworun ga lologena wo, ana pupia kekarena kiena ne Ninuna Wa sike e amiu. ⁷ E kiamiu þelaga wo la nene, sane akuspo yoþmarua, asumon vena kipianen mrapa van li nalelagaena taþena lala e lepas na yo la naþa M̃asitonia amio Kris. ⁸ Lollogena wo kiena Suþe molue e amiu pa vanua, pe e re ga e yo lua nene poli, a pa m̃ena yo punu ga la ne, kila yeririna la amlogeyu kiamiu nalelagaena e Ntewa þisi rui.

Naga nene po paþisi, ana nanagane sane e yo ya naþa visae meva si ea, pe sur na visaen re si poli, komin visena la punu ga pimi e amiu pa tol la rui! ⁹ Pe mesun re si pan li taþena la nene poli, ana lala asun ke sina ga pan imimi, apisayu sanape naþa amiu le Tesalonaika lala aþure imimi pimi pun amiu, a sanape naþa apilopu amiu, akuwan plan kiamiu nono na marena lala, apim ape yeririna kiena ne Ntewa Mali naþa pe lelaga. ¹⁰ Ana amio naga nene, apisayu ke m̃ena naþa amiu, asuþnal ke m̃arera, asuþna asuþmate ke narina ne Ntewa, Yesu. Naga yoko imi m̃alivin ita sina ga, vanon Ntewa pisirlua sina ga naga rui taulu marena, þisi na ligan naga imi m̃alivin ita yam na luania, vena tamalia itaena e pogos na liþereena na pimi ke ne.

2

Pol pisayu kiena yuþaena pogos naþa sike gar Tesalonaika

¹ Erau lala, memloge visena tai asape memiyuþae piowa ga, ana nesitom nesape apisu kilale sane kiamimi nayalin amiuena naga þar mras wo lala moki. ² Nanua susumo, pogos naþa memiyuþae gar Piliþae, apis kar ke sanene pan imimi rui, a sa naþa amiu akilia pa rui, pogos naþa meþalivin amiu, akawe imimi ke sina ga paþisi. Ana mepisu sane Ntewa miila imimi m̃aga, pe memaraun re naloge viowaena poli, moþaryon ga na lollogonen lollogena wo van amiu.

³ Memlollogon pan amiu, ana nekilia nevisa nevisave kana visena lala pe sa re naþa yar laþas apisasa ke ne poli. Pe amolue re ga e kiamimi na kila palen tai poli, pona e kiamimi na sitom viowaena tai, a pe naga re ga naþa metaþali na were kare amiu e poli, peraga.

⁴ Pe sa re nena nene, ana e pogos nene, imimi sane yeririna la naþa Ntewa mligan kiena lollogena wo e limamimi, þisi na mepim mepisawal kiena visena nalelaga nene pan amiu. Imimi na pe memiyuþae re naþa yeririna la avisu imimi sanape poli, ana imimi sinemimin ga mesape vena Ntewa kilia kekaran sur ya naþa memiyuþaena, komin naga ga kilia sur ya naþa sike e losineta peve taaga. ⁵ Amiu akilia ruru po sane pe mepimin re nakuwanen visen kiki pona visen vilave la van amiu poli, a Ntewa kilia ruru m̃ena sane pe sinemimi sun re kiamiu sur tai poli, pona mepimin vena visa kotalia amiuena. ⁶ Ana e pogos m̃ena nene, pe memla re nena sitomena tai vena kilaen naþa sane amiu pona yar taþena lala ayeluar kiamimi kia.

⁷ Pe lelaga naþa mepimi moþalivin amiu sane li nalollogena lala kiena ne Kristo, naþa mesmesun sane monar akila sur ve moki vena visuar imimiena, ana pe mesitoþnal re sur nene poli. Imimi mepimi memalum ga, mekila pan amiu sa ga naþa auya tai pagan narina. ⁸ Mekekaran amiu sanene paþisi wa, sinemimin mevisawilwilin lollogena wo kiena ne Ntewa van amiu, ana memloge sane mepinaia amiu paþisi, vano-o mesuþna metaþnan kiamimi malena vena iilaen kiamiu malena.

⁹ Erau lala, nepisa sanene, pe nepisokan re poli, komin akilia asitoþnal sanape naþa imimi memninu e yuþaena urmi na limamimi e pogos nene. Memiyuþae ea legiena a kolemallo, vena kilaen sane pogos naþa mesike memio amiu memlollogon lollogena kiena

ne Ntewa, pe mekila re urmi pan amiu poli. Imimi ga mepisuar imimi, pe amiu yar re nena tai naþa pisuar imimi poli, peraga.

¹⁰ Imimi mesitom mesape e maramiu, a e marana ne Ntewa, mekilia mevisawal mesape pogos naþa mesike likan amiu li nalelagaena lala, kiamimi malena pe sur tai piowa re e poli, mesmes ga, a pe wa ruruia. ¹¹ Pona asitoñal ke yo wa, naþa mekila pan amiu sane ata tai naþa naga kila po paþisi e naiilaen malena kiena ne narina lala.

¹² Mekila sinemiu la malum ruruia, memla visena na iilaaren la pan amiu, a memiilaar kiamiu sitomena lala vena monar akila kiamiu malena la mesmes ruruia e þelaga lala kiena ne kieta Ntewa, naþa naga ga pio amiu vena aim loyuma e naurarena wo na kiena nasuþenena.

¹³ Sur taþena si tai naþa silaga mepisa ke potena pan Ntewa paþisi vanonia, nane kiamiu þelaga pogos naþa lologena wo pimi porun amiu. Amiu amlogeyuia, ana pe akovenlua re poli sane pe visen kien yar ga tai, ana apisuia sane pe lelaga, pe visen kiena ne Ntewa lelaga. A amiu naþa amlelaga ea, apietavan losinemiu pania pano-o suña miyuñae ke e kiamiu malena pimi tol nanagane.

¹⁴ Wolai a vineu lala, nekilia sane pogos naþa amlelaga, pe piavi re poli naþa yar la nae ke sina ga pun amiu asuñalun na kilaen viowa van amiu, kila apane pogos ñarera tai paþisi. Sanene na piowa ga, ana e lele nene amiu amiyal ke ga e mrapa taaga ga naþa li nalelagaena kiena Yesu Kristo e suñare kiena ne Ntewa e lepas nae Yutea amiyal e nanua susumo rui. La ñena, pogos naþa amlelaga, ana le Yu ñena la akila kare la paþisi! ¹⁵ Ana þelaga nene, le Yu la asuña akilakila kemua nanua susumo rui pimi. Susumo, pe sinelan re navisawalena la poli, siraunia, lala ke sina naþa akila añeñar kieta Suþe Yesu mare, a lala ke sina ga naþa asuña añene imimi yam mok rui. Sur la naþa asuña akila ke ne, Ntewa pe kekaran la re nena vanonia, komin asuña akakawe visena silaga. ¹⁶ Mesuña memlologon ke lologena wo pan la ga naþa pe ape le Yu re la poli, ana pe sur korena ga naþa pulmas nene na tamaliaen kiela malena, ana le Yu la nene asuña apisawo imimi ke ga, pe sinelan re naþa meva mevisawal van la poli.

Kiela þelaga viowa la nene, asuña amiyakol ke sina metavan kiela mlamulena viowa la naþa amiyuñae la nanua pimi, kila sane nanagane kiela naviowaena la nene piowa manene laa. Amiyuñae sanene pano-o pe asitom re sur tai poli, ana tekilia sane pupia na sinekar kiena ne Ntewa pitomin la ke rui.

Pol naga sitom la paþisi vena visu la si yam tai

¹⁷ Erau lala, mesape mevisawal van amiu, mesape memligan amiu nanua ga ne, meþure mepa li ve tokak ga, sinemimi miye amiu ga, sinemimin mesape mevisu si maramiu. Lelaga, tesutetai e tasneta, ana e losineta, tepe taaga ga. ¹⁸ Mesike sanene, mesape mekirawal si mrapa tai na iñasen pun amiu, ana inu Pol neþaryon yam moki paþisi, ana yar viowa naþa Yermare, naga kila wo ke silaga. ¹⁹ Ana komin ya ne mesape meim mevisu amiu sina? Naga nene komin a sina naþa mowasine la? A si naþa kila imimi mekekara? A si naþa ve kiamimi mras nen yuñae na wo, naþa mekilia melogewonia pogos naþa visae kieta Suþe Yesu vim sina? Pe yar taþena re si po, amiu ga narui! ²⁰ Pe lelaga paþisi, amiu na sane tropi nowo tai naþa metauluia, apim sane pupia purþes nen sineyeena na kiamimi malena.

3

Pol pisayu naþa pitetalia Timote pa katen la nanua rui

¹ Mesitoñal amiu ña sanene pano-o, mepisu sane peraga, imimi yar tai monar imi katen amiu sina. Þisi na mepisa mesape imimi lua Saelas monar mesu Atens sumo wa, ² ana yoko Timote iñasu pun amiu. Wolai nene, memiyuñae yuñae na kiena ne Ntewa veraga memio naga, vena kilaen lologena wo kiena ne Kristo va vanua, ana nepisu sane naga pe yar wo tai na katen amiueña. Nekilia naþa naga kilia iilaar amiu, kilia iila amiu

vena kiamiu naviawaena suñmalu ñarera silaga, ³ vena ve sinemiu la kurkurun kare re pogos naña avane pogos ñarera la naña asuñña apimi. Pog ñarera na sanini, tekilia ruruia sane pe lepas na kieta malena tai, naña ita li nalelagaena lala tařatete toure tania. ⁴ Ana visae tesitoñal ke ga wa, tekilia sane pogos naña mesike memio amiu, mesuñña mepisawal ke pan amiu, mesape mepisusu ke pa rui sane yoko ve ve piavi re, yoko monar akila viowa van ita. A nanagane, sur nene pimi kate sa ke ga nene rui, naña amiu nena akus ke pařisi. ⁵ Sur ne na nene kila sane in na nemloge sane pe pon re nesuñña sanene poli, ana monar nekila sur tai vena neloge lologena tai sane amiu asike sanape. In na nemarau li ñaga sane yar viowa na tařalien yar nene, sa lual kiena mrapa tai nakila amiu en aloru rui, řisi na nesape nelogelia sanape, asuñal ñarera ke ga wa po sanape, komin piowa ga naña kiamimi yuññaena wo lala e amiu imi ve sur korena sina ga. Sanene nepitetalia Timote piñasu.

Timote řasuře si puna ne Pol amio navisařlanena wo e lepas puna ne la nae Tesalonaika

⁶ Timote piñasu pisu amiu, ana nanagane ga ne naga řasuřea pimi katen imimi. Pogos naña pimi, řar lologena wo, pisayu sanape naña kiamiu naviawaena amio řelaga na sinesiena keviu ga sike na wa, suñña poga ga, řisi na kila sineu kekara keviu. Naga mla kiamiu visena pimi pan imimi, sape asitoñal imimi ke silaga, ana sinemiun visuen si maramimi pařisi, sa ga naña imimi ñena mesape mevisu si maramiu. ⁷ Ana pe sur korena ga naña mesike memloge piowa sanene e yo nini komin naviawaena naña akila ke pan imimi, ana pogos naña memloge lologena na kiamiu masisuena amiu kiamimi erau lala, memloge sane pisirlua si kiamimi sitomena. ⁸ Memloge naña asuñmalu ke ñarera e Suře, řisi na kila memloge sane memal ruru sina.

⁹ Pogos naña memlen wo amiu ke sanene, mepisu sane pe imimi re naña mekila ke sur wo tai pan amiu poli, peraga, ana amiu na akila ke sur wo tai pan imimi, komin amiu akila ke naña mokus pupia kekarena e losinemimi, pano-o pe kiamimi visen re si tai navisaen potena van Ntewa vanon poli. ¹⁰ Naga nene kila sane sinemimin manene pařisi vena melen kolegiena a kolemalu, sane sa mekilia mevisu amiu sina ga, visae narin lele tai naña kiamiu naviawaena tai kulkulul li ñaga, ana yoko mekekaran vařisi naiilaen si naña kilia ñarera ruru sina silaga.

¹¹ Sur ne nanene naña nemlenin ke ñarera nanagane, sane kata Ata Ntewa amio kieta Suře Yesu, avietavan kiamimi mrapa vena mekilia meim meialiali amiu sina. ¹² Pano tol pogos nene, nemlen ke pa Suře, nepiun ke sane yoko naga kila kiamimi sinesiena kapuru ke imi sane kokonia ruru kiamiu malena vano-o tataroi va tol si yar tařena lala, imi ve keviu manenea maran taaga ga sa naña kiamimi sinesiena e amiu. ¹³ Ana amio naga nene, nemlen sane naga ligan sitomena wo tai naña ñarera ruruia e amiu, vena akilia auarar ruru kiamiu malena vano-o tol pogos naña kieta Suře Yesu imi kate sina amio kiena li wa lala, ana e pogos nene akilia asuñmalu e marana ne Ata Ntewa naña amerarava po, ape wa ruru ga asuñña ga.

4

Řelaga na malena naña Ntewa sinenania

¹ Erau lala, pogos naña mesike memio amiu, mepian ruru amiu sanape naña amiu akapuru laa sane e řelaga na malena naña Ntewa sinenania, ana memloge sane akila lili ña rui, naga po pařisi. Ana e kia kiena Suře Yesu, moñareran van amiu sane ve aligan re, awaryon ga kilaen vano. ² Suře Yesu mligan kiena navianena lala e limamimi na visawalen van amiu, ana akilia ruru la rui. Sanene, popon atavevea.

³ Poga, sur ne lařas nanene naña Ntewa sinenan kiena yeririna la monar ayuññaena. Kieta malena monar ve wa ruruia, sane ve tekila re řelaga viowa e lepas na yerñene amio sira. ⁴ Ita punu ga monar tetaveve ruru mrapa mesmes na talopaena, vena yerñene kilia su amio wona na sira naapo e řelaga naña merarava ruruia, vena ve akila kare re si kieta

kia lalua. ⁵ Sanene, pe pon re yaru talopa koskos poli taveve ga kiena sinenanen sira m̄arera, komin nanene pe p̄elaga ken yaru na yemalolo ga lala, naṗa pe akilia ruru re Ntewa poli. ⁶ Visae yar la akila ke ga p̄elaga wo silaga e nini, yoko wo vaṗisi, yoko ve akila kare re si sur nowo naṗa pe kiena kiela puruvi taṗena lala. Amiu monar avisu ruru yo nene, vanon Ntewa mla ke nakoena silaga pan yeririna la naṗa amlor ke e mlamulena viowa kar la ne sanene, sa naṗa mepisawal pan amiu rui, mesape maraṁe amiu.

⁷ Asitomveveli naga nene. Pogos naṗa Ntewa pio ita tepim tepe kiena yeririna lala, naga pe kila re vena kieta malena imi ulen si p̄elaga la naṗa pe merarava re poli, a naga kila vena sane kieta malena imi ulen p̄elaga la naṗa ape wa ruruia. ⁸ Sanene na, yar naṗa pe kekaran re navianena la nene poli, naga monar visu kilale sane pe pe visen ken yeririna re la naṗa naga miaslua poli, ana miaslua ke visena kiena ne Ntewa, naṗa mligan kiena Ninuna e ita naṗa sane Ninuna naṗa pe wa.

⁹ Sur si tai naṗa nesape nesunyu van amiu, naga kieta p̄elaga ita li nalelagaena lala, naṗa monar tekekaran ita tepe namratava taaga. Sur nene amiu akilia ruru p̄isi rui, pe pon re nesiriyu si van amiu poli, vanon Ntewa kilapian ita make ga rui sane naga nene pe sur wo tai po tanea paṗisi. ¹⁰ Nekilia sane amiu akila ke pa sanene rui pan li nalelagaena lala nae Masitonia po paṗisi, a nesape nevisa ke sina ga, nesape amiu auarar ruru p̄elaga wo nene, akila imi ve keviu laa sane likan amiu.

¹¹ Nanagane na nesape nesiri si sur laṗasia naṗa popon sane awaryon na kilaena. Nasumo, ve oulaula kar re, ana osu ruru ga. Nalua, ve okian re kunuṁa va e kove kiena yar taṗena lala, ana ovisusu ga kioṁa malena. A tai sina ga, ve ove yowen re, ana oyuṁae m̄arera wo e yuṁaena naṗa sike e lumoṁa, sa naṗa mepisawal susumo rui. ¹² Visae okila sanene e kioṁa malena legiena punu ga, yoko la naṗa pe amlelaga re poli akilia avisu ruru ko, apisuluṗar naṗa pe yaru taṗena re la apisuari ko poli, a ko ga osuṁa opisuar ruru ko.

Nawasup̄een si kiena ne Suṗe

¹³ Ana erau lala, nepisu sane popon amiu akilia lili ṁa sur la p̄asa e lepas kiena ne ita p̄as naṗa amomalio rui, sa naṗa akovio e yomarava. Yaru la moki naṗa pe amlelaga re poli, amaraun marena, asitom asape yar la akovio yoko viowa vaṗisi van la, ana kila sane pogos naṗa lala tai kovio, atagin paṗisi.

¹⁴ Ana ita na sa re nene po, komin temlelaga sane siraun naṗa Yesu mare e lak torovia, naga suṁal mal sina ga, ana e p̄elaga ṁa ne nanene, temlelaga ṁena sane lala naṗa ape taaga amio naga amare, yoko Ntewa kila la ave taaga amio naga amal sina, ana awasuṗe aimi sina amio naga.

¹⁵ Nekilia nevisa ve lelaga van amiu, sane taveve visena tai naṗa Suṗe ga pisa, ita naṗa temal ke ga wa tol pogos naṗa nawasuṗeena sina, ita taṗatete teva metava sumon lala naṗa akokovio rui. ¹⁶ Peraga, ana sur naṗa kate e pogos nene sanini. P̄arin navisi nae ma e peni vion manene va metava, a kumasua kiena ne Ntewa yelu, ana kieta Suṗe vetan ma e peni vitom tano, yoko li nalelagaena la naṗa amarmare asike ne, yoko asuṁal si sumo. ¹⁷ P̄isi na, ita naṗa temal ke ga wa tesike yomarava, naga wereplan ita ṁena teva metava temio la, tekom likan lul meta e sinapane, teva tevitawe kieta Suṗe meta e yo yau. Teva sanene, ana yoko tesike lue ga temio naga.

¹⁸ Navisaarena nene naga po paṗisi, ana popon teiila ita silaga e sitomen wo la nene.

5

Monar tesururuia, tekirava; ve ve piavi re na naga yoko vim

¹ Erau lala, nekilia sane yeririna la moki sinelan asave akilia sur la nene yoko vim kate e legiena ya, pona pogwai. A naga nene pe pe kiau re nene naṗa nesiriyu van amiu poli, ² komin akilia pa rui sane sur nene pe kiena re yeririna na kilia poli. Naga p̄arlologia ga

sa naþa yar na vinauena kila kiena yuþnaena kolemalo. Naga taþatete visawal þesania pog ya naþa naga imi!

³ Pona naga imi e pogos tai naþa yar la apisa ke pan la, asape “O, nanagane pe pog na suþnarena pa rui!” Pona asape “O, nagane tesike e pog wo narui!” Lala amninue ga, ana sur nene naga sa naþa auia tai veraga ga mloge sa naþa kiena sisi vaeme narui. Ana pogos nawasuþeena ve sa ke ga nene, naþa yoko yeririna la aila ga, sane pe asitoþnal re poli, ana pupia pog viowa imi katen la, naþa sane taþatete nena aur matania.

⁴ Ana amiu erau lala, pe asu re si e pupumalko poli, ana visae pupia legiena nene imi kate, nesitom pule ga sane amiu akilia ailania, sa naþa pe yar na vinauen tai pimin kiamiu sur lala. ⁵ Pe tepe yeririna na yemalolo na kolemalo re si poli, ana tepe yeririna na yomerarava na legiena rui. ⁶ Sanene na, kieta sitomen la monar tavilo ruru silaga, touarar ruru kieta malena, vena ve teve sa re yeririna taþena lala na yemalolo. ⁷ Yuþnaena la naþa asuþna amiyuþnaenia, la asuþna amun mna wii pano-o wii me la, þisi na asuþna amomomalion ga, ⁸ ana ita naþa tepe yeririna na yomerarava, monar tekila kana yuþnaena mesmes lala. Tekila kieta malena la mesmes ruruia, tekilawo yepeta e þelaga na viawaena amio þelaga na sinesiiena, a monar teyanwo þarita e nalelagaena mmarera naþa tesape yoko Ntewa monar tamalia ita. ⁹ Naga nene pe pon re naþa kieta sitomen veve lua poli tesape Ntewa tamalia ita pona ve tamalia ita re, komin naga pe kiena sitomena re naþa sape yoko kiena li nalelagaena lala atol nakoena poli, ana naga pisaaria sape yoko tetol natamaliaena nene naþa Suþe Yesu Kristo tauluia pe kieta. ¹⁰ Naga marewo ita, vena kilaen sane visae wasuþe sina, pe sur korena ga naþa visae tomomalio, sane tokovio pa rui, pona tetavilo, sa ga naþa temal ga tesuþna ga, ana kieta malena su ruru ga amio naga silaga.

¹¹ Visena ne na nene popon amiu avisasa vena iilaaren kiamiu sitomena, aila amiu vena yuþnaenen kiamiu naviawaena imi mmarera ruru laa sane, sa naþa nekilia sane amiyuþnaen ke pa rui.

Visena maro

¹² Erau lala, nesape neviun mmena van amiu vena avisu kilia ruru li la naþa amiyuþnae mmarera ke e yuþnaena kiena ne Suþe likan amiu. Nanene komin naþa naga mligan la vena ave suþen amiu, avian amiu. Amiu monar avatanon ruru la, ¹³ aligan la asu metava e kiamiu sitomena lala, akekaran la, vanon yuþnaena la naþa amiyuþnaen ke ne. A þisi na, amiu ve akakawe amiu re, ana sinemiu la monar ve lemmam van amiu silaga.

¹⁴ Nepiun mmareran tan amiu puruvi a vineu la, visae amiu þas ape yowena, popon avis van la vena yepela mmae la sane. Visae amiu þas amarau, avis van la vena akilia asuþmalu mmarera. Visae laþas yepela mavi, avis van la vena iila laena. Ana e la punu ga nene akila sane kiamiu sitomen la viayavi ruruia.

¹⁵ Amiu awaryonli sane visae yar tai kila viowa van amiu, ve akilamaran re si viowa vania. Ita monar tekilali sane sineta wo ruru van ita silaga, a sineta wo ruru mmena van yar taþena lala.

¹⁶ Pe sur korena ga e sur ya naþa imi katen ita, ana tekekara silaga, ¹⁷ telen silaga, ¹⁸ tevisa potena van Ntewa silaga. Na nene kiena sinenanena naþa sape teyuþnaenia, e lepas pun ita naþa tepe kiena Yesu Kristo.

¹⁹ Sur si tai, visae kapi kiena ne Ninuna ne Ntewa vivaga ruru ke yo tai, yoko weþnaren toko, ²⁰ ana visae yar tai suþna pisa plan ke navisawalen lala, ve avisalele kare re naga, ²¹ ana asitomveve ruru sur punu ga. Naga naþa po, auarar mmarera, ²² ana naga naþa piowa, aligania. ²³ Nanagane nelen sane Ntewa ga, naþa pe Ntewa na suþnarena, kila sinemiu amio kiamiu sitomena a kiamiu malena ve wa naþa ve wa ruruia. Sineun manene nesape pogos naþa visae kieta Suþe Yesu Kristo wasuþe sina ga, yoko ninumiu wetelu, losinemiu wetelu, amio tasnemiu wetelu, ve narin kinakinas nen kororak re nena tai se e la. ²⁴ Naga naþa piolua amiu naga pe masisu lelaga, a naga yoko yuþnae mmae ve sanene vano.

²⁵ Sur maro, nevisa van amiu erau lala, neviun tan amiu sane ve sinemiu þesan imimi re e kiamiu leniena lala. ²⁶ Avisa pokolulagi po pokolemalo van li nalelagaena wa taþena lala naþa asike ne, ²⁷ a e kia kien Suþe, nepisa sane luñaki nini, aulolua e marala.

²⁸ Lemamiena kiena ne kieta Suþe Yesu Kristo sike amio amiu.
Inu, Pol.

Maki Nalua Naþa Pol Siri
 Pa Pan Li Nalelagaena Wa Lala Nae Garu
TESALONAIKA
 Visayuena Na Tusi Nene

Komþasnen suniena plas na tusi nini

Yaru lala na suñmare nae Tesalonaika amloge piowa komin amloge ke visena la mokliu, naþa asape Yesu þasuþe rui, a amininuwe kare narui aña visena nape naþa lelaga. Ana Pol siri kiena ñmaki na lua nini pano pa li nalelagaena la garu Tesalonaika vena visawalen visena na lelaga vani la. Naga pisape yoko Yesu wasuþe sina, ana sumonia þelaga viowa lala monar imi viowa manene la vatanon nasuþenena kiena yaru tai naþa yoko imi ñmalivi, naþa kiena kia “Yaru na kilaroen navisaluaena,” a yoko naga visakare Kristo amio li nelagaena lala.

Pol pisawal meraravania sape yaru la naþa aulo ñmaki nini monar asuñmalu ñmarera e kiela lelagaena lala, pe suri korena ga visae avane suri viowa la ve moki, pona aloge viowa manenea vaþisi. A naga sape monar ayuñmae ga ñmarera vena atol suri la naþa limala plasania e kiela maliena lala, sanaþa naga amio yaru la naþa amiyuñmae ke amio naga, la asuñma akila kene, a monar akila luwe ga yuñmaena wo lala.

Komþasnen tusi la na nini

Visena þesa 1:1-2

Pol pisawal sape kekaran la paþisi 1:3-12

Pol pian la sape Yesu yoko wasuþe si ve sanape 2:1-17

Pol pian la e þelaga kiena li nalelagaena lala 3:1-15

Visena maro 3:16-18

Visena na sumo

¹ Þegas na li nalelagaena lala kiena ne Ntewa Arimata a kieta Suþe Yesu Kristo, naþa asike e kumali nene Tesalonaika, imimi telu Pol, Saelas a Timote, mekekara paþisi navitawe amiüena sina e ñmaki nini. ² Lemamiena a suñmarena kiena ne Ntewa Arimata amio kieta Suþe Yesu Kristo sike amio amiu.

Pol siar kiena ñmaki e leniena na visaen potena

³ Sur tai naþa popon meyuñmaen silaga, monar mevisa potena van Ntewa vanon amiu kiamimi erau wo lala. A nanagane, mekekaran mesape meyuñmaen sanini, komin memloge ke kiamiu lologena lala, sane kiamiu naviawaena pam manene laa meta sane silaga, a amiu punu ga akekekaran amiu taþena lala pimi keviu manene la. ⁴ Naga nene po paþisi, ana pogos naþa mepa metelivi ke puna þegas nen li nalelagaena taþena lala kiena ne Ntewa, memieluar amiu ke paþisi pan la. Mepisa meraravan ke pan la sane amiu aþar ke þelaga ñmarera kiena li nasinekar lala, ana amiu apa aþarpoyo ke e yo ñmarera tai naþa kila kare amiu paþisi, ana pe akukulul re poli, kiamiu naviawaena pe mlor re nenaga.

⁵ Pogos naþa asuñmal ke ñmarera sanene, mepisu sane pogos naþa Ntewa kilologia amiu, naga kila mesmes ruru ga, komin naþa pisuluþar sane amiu ape yeririna la naþa taþatete aloru. Nanagane, naga pisuluþar rui naþa aþar ke naloge viowaena lala komin kiena nasuþenena, a siraunia yoko naga visu amiu atorokin vaen loyuñma ea.

⁶ Naga, silaga miyuñmae mesmes ga, a yoko kilamaran viowa van la naþa akila piowa pan amiu. ⁷ Lala akila amiu akus naloge viowaena paþisi, ana naga yoko kila þisi, naga yoko iila amiu gar ne, a iila imimi ñmena e nini naþa mepane ke sur laþasia. Pogos naþa tevisu pupia kapi tego ma e sinapane, tekilia tesape kila ke mrapa naþa Ntewa ligan lua Suþe Yesu ma e peni vitom tano e yomarava, amio kiena navisi ñmarera lala, naþa yoko

wereplan ita vetan naloge viowaena lala na yomarava. ⁸ Naga m̄alivi, yoko liṗere la naṗa yepela mavin Ntewa, naṗa yepela mavin logearen lologena wo kiena ne kieta Suṗe Yesu.

⁹ Naloge viowaena kiena ne la naṗa yoko akusia, yoko akokovio lue ga narui, yoko akilawo la taṗatete nena asike amio Suṗe pogos tai e yo nowo naṗa kiena m̄areraena miyuṁaenia mon m̄aga. ¹⁰ E pogos naṗa naga m̄alivi, yoko kiena yar wa lala ayeluar vaṗisi, la naṗa amlelaga ea avisu naga sane po na po paṗisi, ana amiu amio la akilia ataveve naga. Akilia akila sanene komin amlelaga e kiamimi lologena, ana li taṗena la nene, taṗatete nena atavevea.

¹¹ Mesuṁa mesitomveve m̄a sur la nene pano-o, kila imimi moṁarera ruruia na lenwo amiuena silaga. Mepiun ke tan kieta Ntewa naṗa iila amiu vena atorokin malena wa naṗa naga pio amiyunia. Memlen ke sane kiamiu naliganarena wo la naṗa sike e kiamiu sitomena vena taveveena, amio yuṁaena wo la naṗa kiamiu naviawaena kilia kila, yoko Ntewa yuṁae e kiena m̄areraena vena kila awar mrasa. ¹² Memlen ke sanene vena ayeluar kia kiena ne kieta Suṗe Yesu imi ve keviu likan amiu, a vena akapur manenea amio kiena ṗelaga wo lala. Visae akilia akila sanene vano-o maran taaga amio lemamiena wo kiena ne Ntewa kieta Suṗe, nane Yesu Kristo, yoko wo na wo.

2

Yar viowa nene, Nasinekareena Navisaluaena, yoko imi m̄alivi

¹ Nesape nevisayu sina ga nawasuṗeen sina kiena ne kieta Suṗe Yesu Kristo, amio sanape naṗa yoko were ita lele taaga tesike temio naga. Erau lala, e lele nene nesape nevisa sanini, ² sane ve sinemiu pepe re, ve amarau re. Nekilia sane visena tai tetelivi ke sape yar laṗasia apisasawalia pona amlologon ke asape nanagane legiena na nawasuṗeen si kiena ne Suṗe naga pimi kate rui, ana la ṗasia apisasa ke asape imimi ke nalologena la narui mepisawal sur nene e kiamimi luṁaki tai rui. Ana amiu ve alelaga re e visena nene, ³ ve ataṁan re naṗa avisa kotalia amiu sanene. Sur na apisa ke ne, pe sa re nena nene, komin pupia nakawelannen van Ntewa monar va meta sumo. Siraunia yoko yar viowa na kovioena, naṗa apio Nasinekareena Navisaluaena, naga m̄ena monar imi kate e yometava. ⁴ Yar nene naga piowa paṗisi, naga pilolon kare make ga sur wo lala, a naga mligan ke naga mon metavan sur make ga naṗa kia kiena ne Ntewa sike ea, amio sur wa taṗena la naṗa yeririna la apatanon ruruia. Yoko naga kila m̄a sanene vano-o, naga ga visirlua si naga sike e lele wa loyuṁa e Yuṁa Wa m̄ana ne Ntewa, visawal naga sape naga ga pe Ntewa rui. Ana pogos naṗa kila sanene, nanene naga e pogos ke naṗa lavis ke towarpoyo e legiena maro narui.

⁵ Visae amiu asitoṁal ke ga wa, pogos naṗa nesike nemio amiu, nepisasawal ke suri nene pan amiu yam mokli rui. ⁶ Ana taveve ya naṗa nepisa meraravan ke ne, akilia avisu kilale sane yar nene, kan pog mesmes naṗa vim kate sike ga wa, ana apisawo ke ga wa komin kan pog nena na pere wa.

⁷ Ana pe sur korena ga naṗa Nasinekareena Navisaluaena pe kate re poli wa, ana kiena m̄areraena suṁa miyuyuṁaen wan ke kiena ṗelaga viowa lala e yomarava nini rui. Taṗatete imi kate e yometava amio kiena pupia m̄areraena na wa, komin Ninuna Wa suwo ke naga, ana pogos naṗa Ninuna Wa ure si vavini, ⁸ yoko naga suṁalu amio kiena m̄areraena make ga. Naga yoko kila mara vano lavis taulu make sur narui, ana yoko Suṗe Yesu vim kate, yoko lagi na kiena visena lelua yar viowa nene veraga ga, pupia yomerarava naṗa pimi amio, m̄enelua yar nene va kovio e pupumalko. ⁹ Pogos naṗa Nasinekareena Navisaluaena nene vim kate, yoko naga yuṁae amio m̄areraena kiena Yermare, ṗisi na naga kila pupia kile lala amio sur na ilanen lala, ana ape navisokanen ga lala. ¹⁰ Naga yoko kila ve sanene komin sinenan werekareen sitomena kien yeririna la naṗa ave na kovioena. A yoko kila m̄ena ṗelaga viowa lala naṗa kilia were kare kiela sitomen la va ve taṗena, komin ape yeririna la naṗa pe sinelan re akekaran visen lelaga lala kiena ne Ntewa poli, pe asitoṁal re nena sane yoko naga kilia tamalia kiela malena

poli. ¹¹ Ana pogos naþa Ntewa pisu kiela sitomen la m̃arera sanene, yoko naga ligan la ga, tañan naþa sane pupia visen navisokanena la kilia taulu la ga sane, yoko alelaga ruru e visokanena la nene.

¹² Ana siraunia, yoko naga liþerela mesmesu nena, sape ape yeririna la naþa yepela mavin lelagaen e kiena visen lelaga, ana sur naþa la akekarania, naga þelaga na kilaen viowa la naþa akilakila ke pa rui.

Asuñal m̃arera ruru silau

¹³ Sur wo tai naþa popon meyuñmaen silaga, monar mevisa potena van Suþe Ntewa vanon amiu kiamimi puruvi a vinemimi lala naþa naga kekaran amiu paþisi. Siar nanua susumo rui, naga kilologia amiu vena kam na ape mras þesia naþa amlelaga e kiena visen nalelaga, a Ninuna myuñmae e kiamiu malena lala ana apim amerarava e marana, þisi na naga kilia tamalia amiu.

¹⁴ Naga pio amiu kome lologena wo naþa mokus pimi, komin naga sinenan pisape amiu m̃ena ayakol e pupia naurarena vena yeluaren kia kiena ne kieta Suþe Yesu Kristo. ¹⁵ Ve sanene erau lala, pe pon re amiu yar tai kila pal poli. Monar asuñal m̃arera ruru silaga, a monar auarar ruru nakilapianen la naþa mekila pan amiu rui e kiamimi visena lala pona e m̃aki la nene.

¹⁶ Armata Ntewa kekaran ita paþisi, pe lemam pan ita a miilaar si kieta sitomena e kiena navisaarena wo tai, sane ita na tesu wo lue ga temio vano-o taþatete þisi pogos tai. Ana nemlen pania, sane narina, kieta Suþe Yesu Kristo, ¹⁷ iilaar kiamiu sitomena lala, kila amiu añarera ruruia e visen wo punu ga lala a e kiamiu yuñmaena wo punu ga lala.

3

Pol piun vena alenwoia

¹ Erau lala, sumon neþisin kiau visena nesape neviun tan amiu punu ga ve sinemiu þesan imimi re e kiamiu leniena lala, vena mekilia meyuñmae m̃arera laa sane vena visena kiena ne Suþe kilia momolue vilaga e yo la punu ga. Visae ve sanene, yoko yar taþena m̃ena la akilia aloge kiena visena nalelaga, akilia avisirlua kiena kia, sa ga naþa amiu amiyuñmaenia pogos naþa pimi m̃alivin amiu sumo ne. ² Ana pogos naþa visae alen, popon asitoñal m̃ena sane pe amiu punu re amlelaga poli, a yeririna viowa þas asike naþa aþar ke sitomen taþena lala, ana amiu akilia alen vena Ntewa suwo ruru imimi vena taþatete atol imimi.

³ Ita tekilia sane tekilia towasine Suþe silaga, ana pe sur korena naþa Þarin Yar Viowa taþali kila ya ne van ita, a nemlelaga sane yoko Suþe kila ita toñarera ruruia, yoko visuar ruru ita vaþisi. ⁴ Kiau sitomena nekiliaar sane naga yoko kekaran naiila amiuen sanene, komin sur la naþa mepisawal pan amiu, nemlelaga sane amiu akila ke pa rui, a nemlelaga sane amiu yoko awaryon nakilaena e legiena la ne pimi ke ne. ⁵ Amiu akila sanene po paþisi, ana kiau leniena sane kieta Suþe Kristo sumon amiu vano tol naþa kiamiu sitomena la viayavi lelaga sane kiena, a losinemiu la va ulemamaga e sinesiena kiena ne Ntewa.

Visena e lepas na yowena a na su korenena ga

⁶ Erau lala, e kia kiena ne Yesu Kristo nesape nevisawal van amiu, sane visae puruvi tai pe miyuñmae ruru re poli po pe taveve ruru re navianena la naþa mepian amiun poli, popon asu perinan li laa ga naga sane. Yowena la ne sanene, ve ava re lavisin la, ⁷ komin pogos naþa mesike likan amiu, pe mesu koren re ga sanene po. Mekila meraravan mrapa wo pan amiu, ana amiu akilia ruruia sane popon asiraunia. ⁸ Pog naþa visae memla kinanena tai, ana monar moul ga, komin memiyuñmae legiena a kolemalo natauluen narin kilavaru vanon sur ya naþa sinemiminia. Imimi na memninu sanene sane ve mekila re yuñmaen keviu van amiu na visuar imimiena. ⁹ Visae amiu avisuar re imimi ve tokaki pona mesmesu yo, ana moþaryon mesape imimi ga mevisuar imimi, vena kilapian amiuen e þelaga wo naþa akilia atavevea. ¹⁰ Pogos naþa mesike memio amiu, amloge ke

naña mepisa ke sur nene, sane pe kiamimi navisaluaena tai, ana memla mña pan amiu, mesape yar na yepen mavin yuñnaena, naga tañatete kinana. ¹¹ Nepis ke sanene komin narin visena tai pimi tol kiligau sane kiamiu yeririna pñasia pe amiyuñnae re la poli, asusu korena ga asuñna sane, ana asuñna apisimumu e sur la naña yar tañena ga la amiyuñnaenia.

¹² Kiamimi visena e yar la ne sanene pa sanini, sape ve asu kare re sanene, akilia ava ruru amiu la sane, ana akila towe li la yuñnaena na tauluen kamiu kinanena sa naña amla ke legiena punu ga. ¹³ Ana visena pan amiu punu ga puruvi lala a vineu la, sane ve ita yar re tai naña loge yepen malumun yuñnaena wo la naña sike ne vena teyuñnaenia.

¹⁴ Mepisawal sur la moki e mñaki nene, ana visae yar tai ve kekaran re, popon avisu ruru yar nene. Yoko ve akilali re naña ayuñnae veraga amio naga sumo wa, vena kila naga mawa towe la sane, vena visu kilale kiena viowaena. ¹⁵ Ana ve akila re suri tai vania sane naga ve kiamiu sinekar tai, ana awepege si naga sane imi ve kiamiu puruvi wo ga tai.

Visena maro

¹⁶ Kiau visena maro, nemlen nesape yoko Supe na suñnarena ligan kiena suñnarena sike e amiu e kiamiu mrapa la punu ga, nemlen nesape naga sike amio amiu punu ga silaga.

¹⁷ Narin yo na tano yoko ovisu sane in ga nesiri visena la nene e luñau. Sineun nesape nekila ve sanene e kiau mñaki lala vena akilia avisu kilia luñau sane in ke narui nemligan mñaki nene piñasu. Naga kiau nasiriena ga nane teke ne, nesape:

¹⁸ Lemamena kiena kieta Supe Yesu Kristo sike amio amiu punu ga.

Inu, Pol.

Maki Nasumo Naña Pol
 Siria Pa Pan
 TIMOTE
 Visayuena Na Tusi Nene

Komþasnen suniena plas na tusi nini

Timote naga pe yaru viiu tai nae pupia pulkumali naña Listra, a naga mlelaga e Yesu Kristo. Anena naga pe lus nae Israel tai a arimana naga yaru nae Kris. Timote na erau kiena Pol tai naña tavevea apa ke e yo makega vena visawalen lologena wo kiena kieta suþe Yesu Kristo. Pol siri maki nini pa Timoti, e pogos naña sike garu provens naña Masetonia, a Timote naga sike Episas.

Pol siri maki nini pan Timote, pisa pania sape visuar naga e vianiena na visokanena lala naña kilia imi loyuña e suñare. Vianena na visokanena nene molue kome sitomena tai naña pisape suri makega na yomarava piyoyowaga pona pe namname. Yaru la naña apian ke yaru la e vianiena na visokanena nene, asape yaru kilia tol malena visae ga viyon sape tol kinasnen kiela vianena la naña tapolou, a monar lon kinanena laþasa, kan ga kinanena la naña asitom sape torokin akania, a yoko naga ve talopa re, a taveve kiela þelaga taþena si laþasa.

E maki nini Pol pisayu þelaga wo la naña li nalelagaena lala akilia atavevea vena akila lotena, a vena visuaren suñare. A naga pisa þelaga wo laþasa naña nasumonena na suñare lala a li nalelagaena lala monar atavevea. A suri maro naña Pol pisa, naga pisa pa Timote sape naga monar imi ve yaru wo tai vena kilaen yuñena kiena Yesu Kristo. Naga pisa pania sape kiena þelaga monar ve senape, pogos naña naga yalin þegasnen li nalelagaena taþena la a naña vianila.

Komþasnen tusi la na nini

Visena þesa 1:1-2

Vianena e leþas na suñare a nasumonena lala 1:3—3:16

Visena lala na iilaren Timote e kiena yuñena lala 4:1—6:21

Visena na sumo

¹ Naruu Timote, inu navisawalena Pol nesiri maki nini piñasu pan ko, naña Ntewa kieta natamaliaena amio Yesu Kristo kieta nawasineena amligan inu vena neyuña e lologena wo. ² Nekekara navitawen ko si e nini, vanon nepisu ko sane ko ope naruu wawa loyuña e namratava na kieta naviawaena. Nemlenin ko ke, sane Ntewa arimata, amio kieta Suþe Kristo Yesu yoko aligan lemamiena, sineyeena, amio kiela suñarena sike amio ko.

Okilawoli nakilapianen visokanen lala

³ Nesape nevisawal si van ko sur naña tepisayu nanua ga ne, pogos naña nesike nemio ko gar Episas, sumon naña nemligan ko navaen Masitonia. E pogos nene tepisu ke naña þar mñarera laþas asuña ga, naña tekilia ruru la, ana nesape osuña ga e yo nene wa, vena okilali naña okilawo la. Sur ne nanene nesape nevisawal si van ko, sane osuña e nene wa, vanon la nene, asun akilapian ke sur la naña pe mesmes re poli. ⁴ Sila ga kiela sitomena la mlor ke ga e kiela suniena marua ga lala, ana sinelan ke ga navisayuen lus kiena ne kiela li marua la na nanua sumo sumo, ana popon aligan sur la nene sike na. Visena sur la ne sanene kila ke yeririna la kiela sitomena peve lua paþisi, ana taþatete nena aiila la vena atol malena wo naña Ntewa sinenania, naña tekilia tetolia e ga e lelagaena e naga.

⁵ Sanene na, popon tevisawo la, vena kilaen sane yoko kieta yeririna lala, losinela kilia merarava ruruia, kiela sitomena kilia mesmes ruruia, a kiela naviawaena ve lelaga, komin sa ve sanene, yoko þelaga wo na sinesii itaena kilia imi ve keviu sina vaþisi likan ita.

⁶ Ana nanagane piowa ga, komin la ðas e neña, aterere akuspal mrapa wo nene, amial ña e mrapa naviswoween lala. ⁷ La apilave, sinelan asape avim ave navianena na navisaluaena wa, ana asuña apisawal ke kana visena ñarera ne lala, pe akilia ruru re sur la naña apisa ke poli, taðatete avisa meraravan ruruia.

Navisaluaena kiena ne Ntewa pe na ya?

⁸ La nene apisin manene navisaluaena kiena ne Ntewa, ana tekilia tesape navisaluaena, visae teyuñaer ruru ea, naga pupia kana yuñaena sike ea. ⁹ Ita monar tekilia tesape navisaluaena naga apisirlua pe naiilaen re la naña amesmes ruru pa rui, ana naiilaen yar taþena lala, sane la naña akilarovia amio la naña yepela mavin logearena. Lala nene, nane la naña pe akekararan re Ntewa poli, la naña asitom korenan ga sur wa lala, la naña þar ñarera ga lala, a la naña aña arimala lala amio anela lala, po aña ñena yar taþena lala. ¹⁰ Amio yar la nene, þasia naña ataþa kolau, amio naña yerñene were si yerñene po sira were si sira, þasia apinaun nisisi vena awililinia, lala na visokanena, amio lala na kilawanen kiela naviowaena. Navisaluaena nene pe kien la nene narui, amio la naña akila ke þelaga taþena la ne sanene, vanon yepela mavin kieta navianena wo lala. ¹¹ Pe ataveve re nena lologena wo kiena kieta Ntewa wa nowo, naña mligan sike e inu vena nevisawal van amiu.

Lemamena kiena Yesu pa Pol

¹² Yuñaena nene sike e luñau vena neyuñaenia, ana nesape nevisa potena ve keviu va kieta Suþe Kristo Yesu. Naga ga naña pisuveve ruru kiau malena, pisu sane nekilia nemasusu wo e yuñaena nene, þisi na pisirlua inu vena neyuñaenia, ana monar nevisawalia nesape naga ga mla ke puriukawaena pan inu silaga vena neyuñaen sa naña naga sinenania. ¹³ Nanua sumo, in na nepe yar tai naña nepepeyun kare ke kia wa nene naña Yesu, ana nekila kare ke naga paþisi, naña nekila piowa manene laa paþisi pan kiena nalelagaena lala, mesmesun ga naña la nakoaena van inu vanonia. Ana peraga, pisu sane nemial ke ga e pupumalko, pe nemlelaga re e naga poli, ana pe nekilia re sur naña nemiyuñaen ke poli, þisi na naga kila po manenea, sinen miye inu.

¹⁴ Sanene na, nepisu sane kieta Ntewa mligan kiena lemamiena nowo e inu keviu paþisi, kokonia kiau malena e naviawaena a e sinesiiena naña pe kieta ita punu ga naña tepe taaga temio Yesu Kristo.

¹⁵ Visena tai toña ga, naña tekilia towasinea, popon yar punu ala e kiela malena, naña pisa sanini, sape Kristo Yesu pitomi tano e yomarava nini vena tamaliaen malena kiena ne yar ai naña taþa mlamulena viowa.

Ana e la naña amiyuñaen mlamulena viowa sanene, nepisu sane in ke nanini naña nepe kiela nasumonena, nepiowa manene laa taulu la make ga, ¹⁶ ana potena pan Ntewa naña sinen miye inu. Nepisu sane pe pon re naga viewo inu sanene poli, naña nepe nasumonena kien yar na mlamulena viowa lala. Ana naga kila pan inu sanene, vena yeririna la akilia avisu kilale sane Yesu Kristo, kiena sitomena naga piavi paþisi vena sinen ye yar viowa lala. Ana visae la naña aim sirau avisu naña Ntewa kekararan were inuena sanene, yoko avisu kilale sane la ñena akilia alelaga ea vena atol malena naña pe luas re poli.

¹⁷ Nesitoñal kiena þelaga wo nene, kila nemiyeluar naga, nepisa nesape naga pe þarin suþe na nanua sumo, ana naga mal sulue ga narui. Naga sike e yo punu ga ana yar taþatete visuia, naga taaga pe Ntewa, pe yaru re si tai poli. Sanene popon tewatanon naga, teyeluar kiena kia vano-o ve þisi re pogos tai, sanene.

Osuñalu ñarera, ve oloru re

¹⁸ Timote, in na nepio ko ke sane ko na ope naruu, ana nesitoñal navisawalena la naña apisayu ko nanua ne, naña akila meraravan ko pan inu. Akila sane nepisu kilia ko sane ko na ope yar tai naña nekilia nowasinea. Sanene na, visena urmi la þasia pona pupia

na vianena ðasia sike na naþa sineun nesape neligan e ko. Visena la nene kilia iila ko oñarera vaþisi e mara wa naþa tesuñna tekila ke ne, ¹⁹ vena yoko aiila ko nauarar ruruena ðelaga na nalelagaena a akilia akila ko naþa kioñna sitomena merarava ruruia silaga.

Yar la ðasia, sa naþa apilolon ke waa, ana kiela sitomena wo pisawal pan la sape mrapa nanene, ana yepela mavin yagogenena, ana akuspalia, kiela naviawaena pa tawa ruruia e piañne tai. ²⁰ Pona ko okilia lalua nene Aemeneas amio Aliksanta, ana pe sineyeena naþa nesape nevisawalia sane lalua sanene rui. Akila ñna piowa pano-o, pe sinelan re si yagogen poli, ana nekuan plan lalua apa si e liman Yermare sumo wa, ana vena lalua avisu kilale si yo, sane popon ve asuñna akila kare re kia wa kiena ne Kristo sa naþa asuñna akilakila ke ne.

2

Nakilapianena ðasia e lepas na lotena

¹ Pogaga, nevisawal nakilapia-nena nene narui. Sur nasumo, nemiilaar amiu sane e pog na leniena la, monar avisa potena van Ntewa vanon yar taþena lala, a monar alen wo la ñarera, monar aviun ñareran tania vena iila la. ² Naga nene monar akila ñna e lepas kiena ne yerikawa lala, sa naþa þarin yar wa lala amio nasumonena la naþa asu metavan ita, vanon sa ayuñnae ruruia, yoko wo laa van ita. Tekilia tese e malena wo, naþa nawaena amio suñnarena sike ea, ana tekilia teyuñnaen yuñnaena wa kiena ne Ntewa la punu ga, e ðelaga wo sa naþa naga sinenania. ³ Þelaga la ne sanene apo paþisi, pe ðelaga naþa Ntewa natamaliaena kekarana visuena e kilamarana, ⁴ vanon sinenan sape yeririna punu ga atol kiena natamaliaena, sinenan sape yeririna punu ga akilia kiena visena na lelaga. ⁵ Pe mrapa re si tai poli, komin naga taaga pe Ntewa suñna ga, a yar taaga ga naþa kilia kila mara wo temio naga, nane Kristo Yesu, ⁶ naþa pimi pe yeririna, siraunia kus leleta, tañan si kiena malena, pul plan yeririna punu ga na yomarava petan limana ne yar viowa.

Yuñnaena naþa Yesu miyuñnaenia, kila navisaarena lala kiena ne Ntewa na susumo apim ape lelaga, apaeme e kana pog nena napo, ⁷ ana mloru e luñau narui, vena nevisawal van yeririna lala. Þas asitom ke asape nepisokan ga yo, ana peraga, nepisa ke pe lelaga narui. Apisirlua inu sane yar tai nawaren visena pona nepe lologena tai, vena nevian yolai lala e ðelaga na viawaena a e mrapa na visena nalelaga.

⁸ Vanon sitomena la nene, sineun nesape yeririna la punu ga monar asuñna alen lue ga e yo punu ga, ana sa asuñnal vena alen, monar ave wa ruruia, naþa sinekar ve su re e la, a sinemimiena ve su re likan la amio yeririna taþena lala.

Þelaga kiena ne sira lala

⁹ E lepas kiena ne sira lala, sineun nesape visae avim loyuñna e yuñna na lotuena, monar la avisu ruru kiela ðelaga lala. Popon ayowauia ruru la wo, ana piowa naþa ava laa sane, monar torok ga e yo wa naþa apa ke loyuñna ea. Pe sineun re akila manene vilula la ve taþena ve taþena sanene poli, po atelan manene kol la se yepela lala, a pe pon re avilaven manene kulmrae la naþa apul e pupia kilavaru poli. ¹⁰ Sur taaga naþa kilia yowauia rurula, nane kiela yuñnaena wo lala, naþa mesmesun ga malena kiena ne sira naþa mlotun ke Ntewa. ¹¹ Sira la monar atotano ruruia, avarurula na yagogen ruruena navianena la naþa apisa ke pan yeririna lala.

¹² In na pe netañan re sira la avian yerñene la poli, pona ave þarun la, monar avarurula ga. ¹³ Nanene mesmes ga, vanon Ntewa sii þesan yar nene Atam, sirau sira nene Iv, ¹⁴ a pe Atam re naþa Yermare kila kotalia naga poli, ana Iv, naga kilaro þesan navisaluena.

¹⁵ Yermare kila kotalia Iv, ana Ntewa sinen miye ke sira la na wa, mla yuñnaena wo pan la, sane yoko la ke narui awar sisi viu lala aim e yomarava nini. Ana visae sira tai naga

viawa m̄arera, kiena p̄elaga ulen sinesiiena, kiena malena ve wa ruruia, a kiena sitomena to ga tano, yoko Ntewa kekaran tamalia naga.

3

Nasumonena na suṃare lala

¹ Visae yar tai, naṓa sitomena tai teke e naga sinenan sape war kia naṓa nasumonena, nanene na po paṓisi ne, komin pe lelaga kemua, naga pe yuṃaena wo tai naṓa naga sape yuṃaenia. Ana kieta nasumonena lala, yoko nevisawal van la sane lala monar ave yar la ne sanape.

² Sur na sumo, nasumonena naga monar ve sur viowa tai to re e kiena malena.

Naga monar were sira ve taaga a ve lelaga wo van silaga.

Naga monar kawē ruru kiena p̄elaga lala,

monar ve manmarua,

yeririna la monar avatanonia,

monar kekaran na visuaren yeririna la e ṃana uṃa,

a monar kilia ruru p̄elaga nakilapianena.

³ Amio sur la nene, naga monar ve ve yaru namun maneneen re wii va ve torog, naga ve suru re,

kiena sitomena monar viavi

sinena monar malum ga.

Naga monar ve vilup re,

a ve sinenan manene re kilavaru.

⁴ Tai ṃena ga sanini, monar ve suṓen ruru ṃana uṃa, naṓa narina la vatanon ruru naga e sur la punu ga, ⁵ vanon sane visae yar ta ne sanene ve sumon ruru re ṃana uṃa, ve sanape na kilia visuar ruru suṃare kiena ne Ntewa?

⁶ Yar nene monar marua li ṃaga, sane mla Yesu e kiena malena yam piavi li ṃaga, visae pere na yoko p̄arina kilia imi ulen vilaveena, p̄isi na kila naga kila pal mrapa lor vito e p̄iliṓili ṃa nena naṓa Yermare mlor pito e nanua sumo.

⁷ Na sumonena na suṃare lala monar ave yar la naṓa yeririna punu ga, vito tol la naṓa pe amlelaga re poli, avisave lala ape yar mesmesu wo, vanon Yermare kilayon ke paṓisi naṓa kila kotalia la, sinenan sape kila vena yar la asitom asape sur tai piowa teke e la.

⁸ Na nene na sumonena lala, ana nagane neva e lepas kiena ne yaru na visuaren yuṃaena lala. Yar naṓa p̄uarar yuṃaena na visuaren yuṃaena,

kiena sitomena monar su ga tano,

naga ve yar naṓa visa visena la ve lelaga ga, a naga taṓatete purmenena ve lua.

Naga ve mun re kuruta silaga,

monar ve sinenan manene re sur lala,

⁹ ana monar uarar ruru ga p̄elaga na lelagaena e kiena malena, taulu naṓa yaru taṓena la atolia.

¹⁰ Yar naṓa na uararen yuṃaena na visuaren suṃare, monar avisusu ruru naga, akilali kone naga sumo wa, a visae yuṃae wo, kiena p̄elaga mesmesun yuṃaena nene, akilia ala kiena kia, siar yuṃaena narui.

¹¹ Wona yaru na visuaren yuṃaena, naga ṃena kiena sitomena la monar varuruia, ve visamumun re yar taṓena lala, monar ve sira tai naṓa kilia warar ruru kiena p̄elaga lala, a monar kila yuṃaena punu ga wo.

¹² Yaru na visuaren yuṃaena la monar aure sira ve taaga ga,

monar ave yar la naṓa akilia asumon ruru narila lala, akilia avisuar ruru ṃala uṃa.

¹³ Yaru na visuaren yuṃaena la naṓa yepela ṃaen ruru kiela yuṃaena, p̄isi na avisu sane yeririna la akekaran la vaṓisi, ana aloge naṓa Kristo Yesu miila la ke vena ve amaraun re na suṃalen m̄arera e kiela yuṃaena nena.

Pupia visawanena na kieta lelagaena

¹⁴ Timote, nesape neiñmasu nevisu ko ve ve viavi re navisaen visena la nene van ko, ana nepisu sane peraga, monar nesiriwal ko ne ga van ko sumo wa. ¹⁵ Pona sur la ðas auarar inu e nini yo na wa, ana sineun nesape monar otol navianena la nene vilaga, vena okilia ruru ðelaga la naða mesmesu vena akila e mratava wa ðmana Suðe. Namratava wa nene, na ne pe suñare kiena ne Ntewa mali, naða monar tarar kiena visena na lelaga silaga, sane ðeren yuñna ðuarar kana kemraðe lala. ¹⁶ Lelaga, ðelaga na kieta lotuena suñal sike e nalelagaena tai naða sane pe visawanena tai, naða pito ruru tano, urmi ruru po. Tepisawal ke kieta nalelagaena nene sanene, tesape Yesu, naga pe Ntewa naða paeme e yomarava nini e tas nen yeririna, ðareraena kiena Ninuna miyuñmae manene ea, a navisi la asike amio naga, amlologon naga pa tol yolai taðena lala, kila sane amlelaga e naga telivi e yomarava, siraunia Ntewa pure naga pa si metava e kiena pupia naurarena ma e peni.

4

Avisuar ruru amiu e navianena na visokanena lala

¹ Ninuna Wa pisawal visena tai merarava paðisi, naða pisape e pog maro lala, na lala ðas naða amlelaga sumo rui, yoko ayagogan ninuna na visokanena lala, ana ataveve navianena kiena ne yermare lala, ana kila la aure ava e malena naða pe po re poli. ² Navianena viowa la nene, yoko amolmolue e yeririna na visokanena lala naða la asitom ke asape la akilia suria, ana kiela sitomena naga malolo sa ga kilamemego. ³ Sur la ðas naða yoko avisa sanini, sane yar taðatete talopa, ana avisaluðar manene yeririna lala e kinanena wo lala naða Ntewa sii la vena tekekarar na kanena. Komin ita naða temlelaga a tekilia sur naða pe lelaga, tekan ke suri la nene silaga rui, a tesuñna tepisa lue ga potena pania.

⁴ Naga nene vanon sur punu ga naða Ntewa sii la, pe tepisa re tesape piowa poli, ana tepisu sane po na po paðisi. Pe sur re tai naða tepisusu ke piowa e poli, ana tekekarar nawaren sur punu ga, tevisa potena van Ntewa vanonia. ⁵ Ana pogos naða tekila sanene, kila sur la nene pimi pe wa. Visena kiena ne Ntewa amio kieta leniena la kila merarava pa rui.

⁶ Navianena la nene, visae ovisa merarava va li nalelagaena lala, naga sa naða opisawal ke osape ko na ope yar na viawaruruen e yuñmaena kiena Navisaarena Yesu. Pogos naða apisu ko omiyuñmae po sanene, yoko akilia asape ko osuñna opa ruru metava rui sane yar tai naða marua ruru e visena lelaga na kieta viawaena. Yoko akilia ruru naða ko ðmena osuñna otaveve ruru ke navianena wo ya naða osuñna opisawal ke pan la, ana yoko akekara vaðisi.

⁷ E lepas na suniena marua wowe la nasusumo, naða apisayu sur kar ga lala, ana pe kioñna sur tai to re e la poli. Oligan la sike na, ana ko na monar okilarar ruru ko oñarera e malena wa. ⁸ Yar la sinelan ke akilarar tasnela ðarera ruruia, ana naga nene pogaga e lepas ðasia, ana pogos naða okilarar ruru ko oñarera e malena wa, naga kila po manene laa sane e lepas punu ga. E lepas na malena na nanagane, malena wa naga kilia iila ko, ana e lepas na malena naða pimi ke sirau wa, yoko malena wa kila kioñna mrapa okilia ova loyuñna puna.

⁹⁻¹⁰ Sur nene, temiyuñmaen keviu, toðaryon ke paðisi, vanon temligan kieta sitomena sike e Ntewa mali naga taaga ga, naða pe natamaliaena kiena ne yeririna punu ga, sane la naða amlelaga ea. Visena nene pe lelaga paðisi, okilia olelaga ea e sinema wetelu.

¹¹ Kiau visena la nene naða nepisa ke pan ko, sur ne la nanene monar ovian van yeririna taðena lala, oñareran van la vena alogearia. ¹² Visae yeririna ðasia avisu ko piowa ga vanon ko na ope teras ga tai, ve omarau re, ova ga. Lelaga, sane ope teras ga, ana sa naða osuñna okila ke rui, monar ovike mrapa van li nalelagaena taðena lala. Popon naða ataveve laña, naða okila pian ruru la e malena wo, e lepas na visena, e lepas na ðelaga wo, e lepas na sinesiiena, naviawaena, a mekikena.

¹³ Vano tol pogos naþa visae neiñmasu neñalivin ko, ouarar pog na lotena la ñarera. Oulolua visena wa e maran yeririna lala, olologonia, ovian lania.

¹⁴ Ve sineña þesan re puriukawaena wa naþa Ntewa mla pan ko e pogos naþa þegas nen nasumonena lala apu þaruña. Visena kiena navisawalena tai e pogos nene pisawal sape puriu kawaena nene naga pe kioña, ana oñareran oyuña e omio. ¹⁵ Ko na monar okilarar ko e yuñaena la nene naþa amlor asike e lumoña, monar owarwaryon nakilaena silaga, ana yoko yeririna punu ga akilia avisu kilale sane ko na opa manene laa ke amio Ntewa e kioña malena. ¹⁶ Monar ovisuar ruru ko, a ko ñena monar otaveve ruru nakilapianena la naþa omla ke pan yeririna taþena lala. Visae ouarar ruruia, yoko okila sane ko omio la naþa amiyagogon ko ke ne, amiu punu ga akilia atol natamaliaena.

5

Þelaga wo na kilaen van li nalelagaena lala

¹ Timote, visae ovisu yermaru tai naþa kila suri tai pe mesmes re poli, ve ovisin re sinemimiena vania. Omoñau woga vania, okila vania ve sa ga naþa naga pe arimoña narui. Popon okila ñena sanene van taþena lala. Ovisu teras lala sa ga womla, ² ovisu sira marua lala sa ga anoña, a ovisu sira ñee lala sa ga vineña. Visae okila ve sanene, yoko kioña sitomena kilia mekiki ruru silaga.

Letano lala

³ E lepas kiena ne letano lala, ita na suñare monar sineta iye ruru la, monar tevisuar ruru la naþa asike lala ga, pe ola re tai naþa iila la poli. ⁴ Ana visae letano tai, narina la asuña ga, pona mapina lala, yoko la nene monar avisuarua. E mrapa nene, akilia awar maran sina ga vania navisusu warena wo lala a naiilaena naþa naga kila pa pan la e kas lala naþa þaro rui. Lala monar avisu kilale sane naga nene pe yuñaena mesmes tai, po suri wa tai nakilaen van yaru tai na ñala mratava mesmes, a naga pe þelaga wo tai naþa Ntewa sinenan paþisi.

⁵ Letano naþa pe yar re tai naþa visuar poli, naþa lala amarmare tania pano-o naga taaga ga sike na, naga monar wasine ga Ntewa naga taaga. Naga kilia sitoñal ke Ntewa legiena a lemalo vena len vania vena kirakira visu ga naga e sur ya naþa naga sinenania. ⁶ Ana visae letano tai sitom ke ga naieluaren naga e malena na yomarava nini, naga sa naþa naga mare tan Suþe sa ga naþa namratava la puna amare tania nanua sumo rui.

⁷ Nemloge sane amiu li nalelagaena lala asitom asape akila mrapa tai na iilaen letano lala. Na nene po paþisi, ana nemaraun sa þisi visena ve keviu lawe vanonia, ana sineun laen visena laþas van amiu e lepas nene sumo wa.

⁸ Visena na sumo naga sanini, sape visae li nalelagaena lala tai, ve visuar ruru re la na kiena lusia, a na keviu nena, ve visuar ruru re kiena namratava mesmes lala, yar nene naga sane pe pe yeririna kiena Kristo re poli. Naga piowa manene laa narui, nepisu sane naga piowa manene laa taulu la naþa pe amlelaga re poli.

⁹ Ana nalua e lepas kiena ne letano lala, na sanene. Þegas kiena ne letano la naþa suñare visuar la suña ga, a visae letano tai naþa sinenan sape kiena kia va loyuña, monar naga ga naþa pe sira marua, sa naþa kiena kas siar e lualima yam orai [60] va metava.

Taþena, naga sira ga tai naþa talopa yam taaga, pure wona taaga ga, a pe lelaga pania silaga.

¹⁰ Yam si tai, monar ve sira tai naþa yeririna la avisu kilia sane pe sira tai naþa miyuñaen yuñaena wo la paþisi, naþa naga pian ruru narina lala, naga tai naþa kekarar na visuaren yeririna taþena lala e ñana uña. Pogos naþa li nalelagaena wa taþena lala aim añalivinia, naga kevan lala lala, a naga miilaar ke la naþa amlolor e naloge viowaena kar lala. Sira marua letano naþa þaryon yuñaena wo la naþa sanene, naga ke narui naþa kiena kia kilia va loyuña.

¹¹ Ana visae letano laþas naþa asike ga wa pe ape sira marua re poli wa, popon ve owar re kiela kia. Naga nene komin akilia avisaar va Kristo sane yoko asuña ga sa nene amio

naga vano-o tol luas nen kiela malena, ana siraunia, ve ve piavi re, pona sinenanena na talopaena imi m̄arera sina ga, ana p̄isi na ailan ga, letano nene suṃalu were si yar tai. ¹² Visae kila sanene avisu viowa e naga, vanon naga kila pal kiena navisaarena, kilaro sina ga. ¹³ Ana amio naga nene, letano viu la nene akilia ayowo pona yepela mavin kilaruruen yuṃaena, ana asun atetalivi akakate ke e yuṃa ṃana yar lala, ana metavana asun apisasayu ke lala taṓena, akian ke kunula pa e sur la naṓa pe pe kiela visena su re loyuṃa e poli.

¹⁴ Ana e kiau navisuena, nepisa nesape letano la naṓa ape ṃee ke ga wa, popon tetaṃan la ga atalopa sina ga wa, popon awar sisi, avisuar ṃala uṃa lala, ana yoko ve sur re naṓa yeririna la avis viowa van la vanonia. ¹⁵ Nepisa nanene vanon lala p̄as akuspal pa mrapa rui, ataveve ke mrapa na marena naṓa pa puna ne Yermare.

¹⁶ Sanene na, visae ita yar tai naṓa pe nalelagaena ana letano tai teke e ṃana mratava, naga ga monar iila ruruia. Visae naga kila, yoko suṃare taṓatete visuyonia, ana kilia visuveve ga letano taṓena lala naṓa pe yar naiilalaena re poli.

Kilavaru kiena ne nasumonena lala na suṃare

¹⁷⁻¹⁸ E lepas na narin nalaena naṓa temla ke pan kieta nasumonena lala, neure ita teva si e visena lua na Tusi Wa. Nasumo, pisayu puluk la naṓa temligan la amial atalivi metava e p̄egas nen wit lala vena avie plan mras lala. Visena nene pisa sanini, sape
“Ve oviar re gon kioṃa puluk naṓa pie plan ke kioṃa wit lala, otaṃan naga kan re ṃa ve tokak ga.”
 Naw 25:4

A visena na lua pisa sanini, sape

“Yar naṓa miyuṃae, mesmes naṓa naga visu sur tai naṓa molue e limana vanonia.” Luk 10:7

Sanene na, popon tekila ṃena van nasumonena na suṃare lala. Ana lala naṓa amiyuṃae po, aṓaryon nalologonen lologena wo a nakilapianen yeririna lala, popon atol ve keviu li laa sane, va yam ve lua.

¹⁹ Visae yar tai imi visawal nasumonena tai, sape naga kila sur tai piowa naṓa monar avis van e kumali vanonia, visena kiena yar nene naga taaga pe torokin re naṓa akila sanene poli. Visena na sanene, monar yar ve lua po ve telu vena aiilaaria, p̄isi na akilia aure va kumali. ²⁰ Ana visae nasumonena tai taṓa lue ga mlamulena viowa, yoko monar ovisaluṓar nena vania e maran p̄egas nen nalelagaena lala, ana pogos naṓa nasumonena taṓena la avisuia, marauena tol ruru la, sane lala ṃena ve alor re sanene.

²¹ Italu tekilia sane Ntewa amio Kristo Yesu amio kiela navisi wa lala apisu ita ṃaga, ana e marala, nevisa van ko sane ouarar ruru kiau visena la nene. A nepisa ṃena ga nesape pogos naṓa sa oyuṃaen ke sur la nene, ve ovisu re yar la veve taṓena, ana ko na monar okila maran taaga ga van la punu ga.

²² Visena si laṓasia naiilaena sanini, ve okoskosin re wuen p̄arin yaru vena imi ve nasumonena tai, ana ovisu ruruli kiena malena sumo wa. Pe pon re naga kilawan mlamulena viowa naṓa suṃa miyuṃaenia. A ko na owaryon ruru ga vena losineṃa merarava, a ve wa silaga.

²³ Sa naṓa nesuṃa nemloge ke rui, nekilia sane ko na osuṃa omai lili ṃaga, ana nesape nevisa van ko ve ovalia re si munen kuruta. Ve osuṃa omun re ga wii, a okilia omun narin kuruta pogos p̄asia, p̄isi na pona kilia iila mopoṃa yo.

²⁴ Ta sina sanini, sane yar p̄asia, akila naṓa kiela mlamulena viowa sike e marata merarava ga, p̄isi na tevisu kilia sane yoko atol nakoena vanonia. A yeririna taṓena laṓasia, akila naṓa kiela mlamulena viowa tapolou ruru ga suṃa ga, a siraunia, naga ṃena yoko vim kate e yo metava sirau.

²⁵ Yuṃaena wo ṃena la ne sanene. Laṓasia, asike e marata merarava ruruia, a laṓasia, atapolou ruruia, pe tekilia re poli. A naṓa tapolou sike ne, taṓatete tapolou lue, a naga ṃena monar kate e maran yaru lala.

6

Yaru la naþa amiyuñae koren ga kiena yar tai

¹ Nagane nesiri e leþas kiena ne ita þasia naþa asuñna sane pe kiela sur re poli, silaga asike e limana ne yerþawa tai, amiyuñae koren ga pania e ñana uña.

Malena na sanene ñarera, sa naþa sur urmi tai mon lue ga e ñasila, ana taþatete sinela kar kiela yerþawa, monar avisu naga sane mesmesu ga naþa avatanonia. Visae akila ve sanene, yoko kiela yerþawa taþatete visu viowa e kia kiena ne Ntewa naþa teke e la.

² Nekilia sane yeririna laþas naþa amiyuñae koren sanene, kiela yerþawa ñena la amlelaga. Sanene, yaru na yuñnaena amio yerþawa, lalua ape wenla ga e Kristo, ana naga nene pe pe naga re ga naþa yar na yuñnaena kilia kirakirai e yuñnaena kiena kiena yerþawa. Peraga, monar ayuñae ruru laa sane, monar akeþaran ga naiilaen yar naþa amiyuñae kiena, komin naga lala tai e þegas kiena ne li nalelagaena a naga ñena pe lala tai naþa monar sinela siia.

Navianena na visokanena

Naga nene navianena þasia naþa avisa lelein van lala taþena, naþa monar oiilaar la ea vena ataveve ruruia.

³ Yar naþa kila navianena taveve sitomena taþena, naga tarlu visena nowo lala kiena ne kieta Suþe Yesu Kristo, kiena visena ve maran taaga re si amio navianena naþa kilia were þelaga kiena ne yeririna imi ve sa þelaga kiena ne Ntewa.

⁴ Yaru naþa taveve kiena sitomena va ve taþena sanene, tepisu naga þarwarria, þarina keviu paþisi, ana pe kilia re nena suria. Naga to lue ga e sinenan manene vilupena, pis liu, ana pe sur wo tai kate re e lele nene poli. Þelaga viowa ga la akakate e naga, sane vielueena, wankareen visena, visena mumu amio sitomen viowa lala van yar taþena.

⁵ Yar la naþa amiyuñnaen nene asuñna apilup kare ga, naþa sitomena naþa wo amio visena naþa pe lelaga pe su re nena e la poli. Ana apa apiowa re laa sane wa, vanon asitom ke asape nayakolen suñare naga pe mrapa wo tai natauluen kilavaru. ⁶ Ana pe sa re nene poli, vanon yar naþa kiena þelaga po sane Ntewa, a naga keþaran ga sur ya naþa Ntewa mla pania e kiena malena, yar ke nanene narui naga taulu sur wo tai naþa po rui.

⁷ Pogos naþa tepaeme e yomerava nini, tepe plamoñe ga tepimi, limata korena ga, ana yoko tevetan sina ga sa ñna nena ga nene tevano, pe sur re tai naþa tekilia towarar poli. ⁸ A pogos naþa temal ke e yomerava nini wa, visae telual narin kinanena tai, amio narin kulmrae nakalo itaena, nanene naga torok ne, tekilia tekeþaran ga, sinetan ke si ya?

⁹ Ana lala naþa sinelan manene laa sur lala, sinelan asape ave yar na sur moki, pona pe apisuluþar re poli yo, naþa asike pa e yo nataþaliena rui, ana Yermare suñna tol la ke rui e kiena nakilakokanena la.

Yoko nasinenanena viowa naþa na kila kareen malena kien yeririna lala vim ve moki e la, vano-o aure la ava viowa laa, akuspal sur punu ga, ava atalilu e lele na kovioena.

¹⁰ Lelaga, þelaga nasitom maneneen kilavaru naga pe purþes nen þelaga viowa kar la punu ga. Nasinenan maneneen waren kilavaru ve moki naga karmo sineta ita þasia, þere la amial lili ña apano, ana amilan ga naþa amolue punu ga petan mrapa na viawaena rui.

Siraunia, akus viowaena moki vanonia, a kila naloge viowaena la tol la, ana asiar ga apisuluþaria, asitom sina ana piowa ga rui.

Þelaga wo

¹¹ A Timote, ko na sane yar kiena ne Ntewa lelaga, monar ovilon masuñna van nataþaliena viowa punu ga na sanene. Sur ya naþa monar oligan to vamon ko silaga, naga pe þelaga na mesmesuena, þelaga naþa yar imi wo sane Ntewa, þelaga na viawaena, þelaga na sinesiiena, þelaga na uarar ruruen yuñnaena, a þelaga na moñauena.

¹² Ko monar osuñnal u ñarera e kieta mara wa na lelagaena. Ve sineñna þesan re pogos naþa osuñnal e marana ne li nalelagaena la moki, naþa opisawal kioñna navisaarena nanua ne. Ntewa pio ko vena okus malena nene naþa ve þisi re, ana mla pan ko e pogos

nene, ana ko na monar ouarar ruru vano-o ve lor re sina ga vetan lumoña. ¹³ Ntewa naga pe purpes nen malena na sur make ga, a Yesu Kristo, pogos naña aþure naga aþaro pa puna yaru naña Pontis Paelat, ana naga pe marau re poli, ana mareran ga pisawal ruru kiena naviawaena, ana sa naña italu tesike e marana lalua Ntewa amio Yesu, sineun nesape nela si pupia visena tai van ko.

¹⁴ Nevisa ve sanini, nevisave nomareran ko nesape monar olarar ruru visena kiena ne Ntewa la nene, naña pe kioña kororaki pona kioña nakila palen re tai poli, vano tol pogos naña kieta Suþe Yesu Kristo wasuþe ea. ¹⁵ Kiena nawasuþeena nene, yoko malivin ita e kana pog ne napo, sa naña Parin Suþe wa na mava sinenania, komin Parin Suþe wa nene naga taaga pe suþe kiena suþe la make ga, a pe yerka wa kiena yerka wa la punu ga. ¹⁶ Naga taaga mal lue na sike ne, naña sike loyuña e kiena pupia naurarena naña pialuþar sape taþatete yar va lavisinia, pe yar tai pisuli re pogos tai poli wa, a taþatete yoko yar tai visu pogos tai. Kieta Ntewa nene, tewatanon naga, a popon navesuþeen sur make ga ve kiena naga taaga, vano-o taþatete þisi pogos tai, sanene.

Nalelagaena la naña kiela sur moki

¹⁷ Pe lelaga naña ita laþasia, kiela kilavaru moki, limala pulen ruru make nena suria. Nanene pogaga, ana monar ovian la marera ovisave ve avilave re, ve awarwar lan re sina vanonia. A pe pon re awasine ga kiela kilavaru la nene poli, naña pona pogos tai ailan ga, avisu sane kokovio make nenaga, ana monar awasine ga Ntewa. Naga ga pe purpes nen sur make ga la nene, suña þar ke nalaena la nene mokliu pimi malivin ita, mok paþisi, vena iila ita tekekara e kieta malena lala.

¹⁸ La naña limala pulen kilavaru, kiela malena monar ulen yuñaena wo la naña amiyuñaen ke amio. Ve asitom manene re avisave monar auarar manene kilavaru nene ve kiela ga, ana popon akekaran naña avion va yar taþena naña kiena pe torok re poli. ¹⁹ Visae akian plan va ve sanene, yoko Ntewa kila naña asuña amiyuwon polo ke kiela navisa ruruena ma e peni, sa naña asuña apisirlua ke mala yuña nowo tai monmate pog na pimi ke ne. E mrapa ne nanene, asuña apanon ke naña awarpoyon atol malena naña pe lelaga.

Visena maro

²⁰ Ake Timote, olarar visena wo make ga naña nepisa piñasu pan ko, naña nemligan e lumoña vena okian lelein va laa sane.

Ve ova re loyuña e visena la naña taþatete aiila kioña malena amio Ntewa. Yar moki apian la ga e kiliaena na yomarava, ana apisape kieta lelagaena amio visena wa kiena ne Ntewa, sur la naña pe lelaga re poli sike ea. Ana kiela kiliaena nene pe lelaga re nena poli, naga pisokanin ke sina ga kiela sitomena lala.

²¹ Laþas atol ruru manmaruaena na yomarava nini, amlologon ruruia pa e yo make ga, ana sur taaga, akila pal mrapa na lelagaena naña akila pal ruru nenaga.

Kiau visena þisi e nene, ana sane silaga, nemlen nesape lemamiena kiena ne Ntewa sike amio ko.

Inu, Pol.

Ñaki Nalua Naña Pol
 Siria Pa Pan
 TIMOTE
 Visayuena Na Tusi Nene

Suniena plas na tusi nini

Ñaki na lua nene naña Pol siri pan Timote, ana pulen visena wo lala na iilaen Timote naña kiena erau viu naña suña miila naga. Sitomena keviu naña sike e ñaki nini, Pol pisa pan Timote sape suñalu ñarera vena visawal lologena wo kiena Yesu Kristo. A pisa pania sape naga monar uarar vianiena lelaga na lologena wo, a na Tusi Marua. Naga pisa pan Timote sape monar kila luwe ga yuñæna na vianen yaru lala, a vena kila yuñæna na wereen yaru lala, pe suri korenaga visæ yaru la avisakare naga pona avisakare yuñæna na suñare naña naga suña kila ke ne.

Pol pisa pan Timote vena ve va sikol re naga e visena wowe lala a visena na veveyuena naña tañatete kila suri wo tai, ana vena kila kareen ga yaru lala.

E ñaki ñenaga nini Pol pisa pan Timote sape taveve ñalaga wo la sa naña naga kila ke ne e kiena maliena. Nanene ñelaga kiena Pol sa naña mlelaga ñarera, a kiena sitomiena piyavi, a sinen si yaru lala, a kiena ñelaga naña pa ñarpoyo e pogos ñarera lala naña yaru la akila miloge piowa e tasnena, ana naga pe paruru re poli, suña pisawal luwen ga lologena wo kiena Yesu Kristo.

Kompasnen tusi la na nini

Visena ñesa 1:1-2

Pol mieluar Ntewa vanon Timote ana pian Timote 1:3—2:13

Pol mila visena na iilaen maliena kiena Timote 2:14—4:5

Pol pisayu naga amio kiena yuñæna 4:6-18

Visena maro kiena Pol 4:19-22

Visena ñesia

¹ Naruu Timote, in Pol naña nesiri ñak nini piñasu pan ko, naña nasinenanena kiena ne Ntewa ga naga pisirlua inu nepim nepe nalogena kiena Kristo Yesu. Kristo Yesu naga pe purþes nen malena naña Ntewa pisaar pan la naña amlalaga pania.

² Timote, kiau leniena nesape yoko Ntewa Arimata a kieta Suþe Yesu Kristo, lalua aligan pupia lemamiena, sineyeena, a suñarena su lue ga pun ko.

Visena na potena pa Ntewa

³ Sa naña kau apua lala ataveve nanua rui pimi, in na noñareran lue ga kilaen yuñæna kiena ne Ntewa, a in na nesuña noþikeyon naña nelotun naga amio losineu wetelu. Ana legiena a lemalo, e pogos na leniena lala, nesitoñal ko ñaga, nesuña nepisa lue ga potena paþisi pania vanon ko. ⁴ Nesuña nesitoñal ke wamaraña lala nalogeen viowa, ana kila narui sineun manene paþisi naña neiñasu neñalivin ko sina. Visæ nevisu sina ga maraña, yoko neloge wo na neloge wo! ⁵ Nesuña nesitoñal ñena ga kioña naviawaena lelaga, naña nanua se koña apua naña sira marua Lois, siraunia se koña ñaña naña Yunis, a sa naña nepisu kilale rui, nagane sike e ko.

⁶ Naga ke narui nesuña nesitoñal ñena ga nalaena naña Ntewa mla pan ko, pogos naña nopu þaruña nemlotuwo ko. Sineun nesape nevisa van ko sanini, ve otañan re kapi na nalaena nene vito tano, ana monar osuña okila lue ga vivaga ruru silaga. ⁷ Monar ositoñal Ninuna naña Ntewa mla pan ita, naga pe ninuna re naña na maraunen yaru poli, ana naga pe Ninuna na ñareraena, pe Ninuna na sitomena, a pe Ninuna naña kila yaru kawo ruru kiena malena.

⁸ Visae lelaga kemua naþa Ninuna ke nanene narui sike e kioþna malena, monar ve omawan re visawalen lologena wo kiena Suþe va yar lala, pona monar ve omawan re naþa ovisawal va yaru lala ovisave lelaga sane ko na ope kiau erau wo tai. A amliganin nesike e yuþna naloge viowaena vanon kiena yuþnaena, ana pe pon re omawan inu vanon sur nene poli. Kioþna suria naþa yoko okila, monar okekaran ove þegas omio inu e naloge viowaena vanon Lologena Wo, vano tol naþa mþareraena kiena ne Ntewa kila ko otorokin oyuþnaenia. ⁹ Ntewa ke narui, naþa naga tamalia ga ita luwoka rui, a pio ita ga luwoka teyaloro e mrapa na kiena malena wa, ana silaga kilia iila ita. Nanene pe vanon re ga naþa italua tekila kiena yuþnaena wo poli, pona italua tekila ya, ana naga kila ga molue kome kiena sitomena amio kiena lemamiena wo pan ita. Kiena lemamiena nena, naga kila ruruia, mligan ruruia sike amio Kristo Yesu nanua sumo rui, sumon naþa siar kieta pogos ita yeririna lala na yomarava.

¹⁰ Ana lemamiena nene suþna sanene pano-o tol nagane towe ga, naþa mþalivi mare ga e yomarava naþa kate e marata kome kieta natamaliaena Kristo Yesu. Naga pitomi e yomarava, kila make naþareraena na marena pimi pe sur korena ga tai, a kiena nalologena wo kila naþa nagane tesike e yomarava nini wa, tekilia telual malena wo. Ana naga kila mþena naþa siraunia, yoko tekilia teva loyuþna e malena naþa taþatete þisi pogos tai.

¹¹ Lologena wo nena, naga ke narui naþa Ntewa pisirlua inunia nepe kana navi-sawalena nena, nepe kana nalologonena nena, nepe kana navianena mþena ga. ¹² Kiau yuþnaena nena nane kila nepane ke pogos mþarera lala loyuþna e yuþna naloge viowaena nini vanonia, ana pogaga naþa, pe pe sur re tai pan inu poli. Pe nemawa re poli, komin nekilia nesape yar naþa nemlelaga ea, naga pe lelaga, kiau nalelagaena ea mþarera ruru po paþisi sane ya naþa nemligan e limana, yoko uarar ruru mþarera suþna ga vano-o tol Legiena maro.

¹³ Sanini Timote, nesape nevisa van ko sanini, monar otaveve ruru mrapa na visena mesmesu lala naþa nemla pan ko, monar osuþmalu mþarera e Yesu Kristo silaga, a monar oligan ruru kiena sinesiena suþna ule e kioþna malena. ¹⁴ Ninuna Wa suþna kokonia ruru losineta, ana ve oligan re navisa ruruena la naþa naga mligan ruru sike e kioþna malena rui, ana oloun ruruia.

Pol pisayu Onesiporas

¹⁵ Nekilia nesape omloge lologena viowa tai rui, naþa asape li na lelagaena lala nae pupia lepas naþa Esia, apilon mþasila pan inu rui, a la nene amio mþena kieta erau lua naþa Paekelus amio Emosenisi.

¹⁶ Ana kieta wolai wo naþa Onesiporas, naga kila po paþisi. Pe sur korena ga naþa apiar inu e sen lala loyuþna e yuþna naloge viowaena nini, ana naga pe mawan re naþa imi katen inu poli, ana nemlen pa Suþe vena visa ruru naga ve keviu amio kiena namratava lala. ¹⁷ Naga pimi mþaliv Rom nini, pe yam piavi re nenaga naga þiyon naþa sape lual inu, pano-o pimi tol inu e yo nene. ¹⁸ Naga suþna kila manene ke sina ga suri wo la paþisi pan inu e Rom nini, sa ke ga naþa miila ruru inu sumo rui pogos naþa nesike gar Episas nanua ne, sa naþa kam na akilia ruru rui. Naga po pan inu sanene, nemlelaga nesape yoko Ntewa sinen ye ruru nena naga e legiena maro.

2

Yaru na mara kiena Yesu monar war naloge viowaena

¹ Naruu Timote, nesape nevisa van ko sanini, popon ola lemamiena kiena Kristo Yesu ve keviu e kioþna malena, ana yoko okilia oþmarera ruru wo vena osuþmalu osulue. ² Yam moki rui naþa omiagogon kiau visena lala naþa nepisawal ke e maran yeririna lala, ana monar olual yar laþasia naþa auarar ruru yuþnaena, ola visena la nene van la, ana siraunia, la mþena ga akilia avian liluen la vano tol yeririna taþena lala. ³ Ita yar na kilaen mara lala kiena ne Kristo Yesu, yoko ita veve taaga monar kieta pogos na lualen pog

ñarera la sike ne. Ana visae nagane kioña pogos narui, monar ola ga ve sa naña kioña lepas na yuñnaena tai.

⁴ Ositom ruruli yar na mara lala. Kiela yuñnaena monar akila kare ñareraen na sinekar kiena ne kiela yerka wa vito tano, ana pe asikol la re amio yuñnaen kar la poli, sa naña yar tañena la asuñna amiyuñnaen ke ne.

⁵ A monar ositomyuli ñnaena yaru viu la naña akila kiriena. La añareran ke naña atauluia, vena atol kiela nalaena tai, ana visae akilaro navisaluaena na kiriena, yoko akila plan la, tañatete atol sur tai ñisa.

⁶ A ositoñal ñnaena yaru na yuñnaenen lokove lala. Yar na ñareran yuñnaenen lokove mapila ve moki, nane yar ne nane popon war kinanena ea.

⁷ Sur la ne nesuñna nepisa ke ne, visae ositom ruru la, yoko Suñe iila ko vena otol kiena manmaruaena wo lala a kiena kiliaena lala ea.

Popon yar na lelagaena la asuñna asitoñal lue ga Yesu

⁸ Naga naña yoko ositom manene laa naga, nane Yesu Kristo. Naga paeme e yomarava molue kome lus kiena yermarua Ñarin Suñe Tepet, a siraunia, añeñar naga, ana naga mal sina sa naña Lologena Wo pisa. Nane Lologena Wo ne nane nemlologon ke ne, ⁹ a nane Lologena Wo naña netol pupia kana naloge viowaena e yo nene, naña kila narui nagane apiar tasneu la wetelu e pototo, sa naña in na yar viowa na kilaroen navisaluaena. Ana sur tai naña yar la tañatete aviaria, nane visena wa kiena ne Ntewa, komin momolue ke ga wa tañatete avisaluñaria.

¹⁰ In na nesuñna sineu miye manene yeririna la naña Ntewa mligan plan la vena nekila la atol malena kome Kristo Yesu. A sitomen ne na nene narui kila sane pog ñarera ya naña nokom ea, ana in na nesuñna nakawean inun ga vena nekila make suria, vena la ñnaena ga akilia atol naurarena nae ma e peni naña tañatete ñisi pogos tai.

¹¹ Yauena tai pisayu sur nene, kana visena ne lala lelaga pañisi, naña pisa sanini, sape “Visae teva e marena temio naga, yoko temal temio naga.

¹² Visae tesuñal ñarera e pogos ñarera, yoko teve suñen yo temio naga. Visae tevilon ñasita vania, yoko naga ligan ita,

¹³ ana visae tekila pal naña teloru, yoko naga tarar ita ñarera suñna ga, komin naga kuslua ita tepe kiena, ana naga tañatete visokan, tañatete si kovenlua ita.”

Yaru wo na yuñnaena kiena ne Ntewa monar uarar ñareran visena lelaga

¹⁴ Nalelagaena la ne asike ne, monar osuñna ovian la ñnaga vena ve sinela ñesan re sur la nene. A monar ovis ñarera van la ovisave e kia kiena ne Ntewa, ve aveveyun la re. Apeveyun ke kinas nen visen la sane asuñna akila ke ne, pe akila re sur wo tai poli, a pe amiila re nena la tañena naña asuñna amiagogon ke poli.

¹⁵ Sur wo ya la naña okilia okila sane yaru wo tai na yuñnaena kiena ne Ntewa, monar okila make ga vena wo vañisi e kiena navisuen. Visae okila wo ve sanene narui, yoko tañatete omawan mras naña kioña yuñnaena waria, a okilia oim ove yar na vianen visena lelaga lala kiena ne Ntewa va yaru lala mesmesu a wo.

¹⁶ Ovisuar ruru e visena korena la naña yar la asuñna apisayu kare ke ne. Visena la ne sanene pe nasuen re e sitomena kiena lelagaena la poli, komin naña akilia aure la ava manene laa e ñelaga naña Ntewa pe sinenan re poli. Popon ve ova re lavisin yar la naña akila ke sanene, ¹⁷ komin visena kien la nene sa naña magka wa tai, naña kar ke tas nen yaru tañatete imi wo pogos tai.

Nepisu sane monar nevisa sane lalua nene Aemeneas amio Ñaelitas, lalua sa towe ña nene rui, ¹⁸ komin naña apur matan mrapa na visen lelaga, asuñna amlologon ke kiela lelagaena tai naña pe pe lelaga re nenaga. La asuñna apisasa ke asape e luas nen yomerava, nasuñmalen si e marena na peraga, komin e kiela sitomena, asitom asape Ntewa kila ke rui, nane e pogos naña naga miyuñnae e kieta malena. Ana pogos naña amlologon ke kiela visokanena nene, asuñna akila kare ke lelagaena kiena yeririna la moki, kila narui

kiela sitomena pimi peve lua sina. ¹⁹ Ana ko m̃ena ga monar ve sineṃa kurkur re, komin yuṃa naṓa Ntewa suṃa miyuṃaenia, miasin namaplarena la nene suṃal m̃arera ruru suṃa ga. Visena lala e siriena wa kiena ne Ntewa sike ne naṓa torokin e lepas nene, a tai pisa sanini, sape

“Ntewa kilia ruru po paṓisi a la naṓa ape kiena yeririna lelaga.”

A nalua nena, pisa sanini, sape

“Yaru naṓa mla kia kiena Suṓe teke e kiena malena,

naga monar ligan ṓelaga lala na mrapa nakilaen mlamulena viowa.”

²⁰ Ositomyuli pupia yuṃa ṃana yar na sur moki lala. Loyuṃa e yuṃa la nene, tekilia tevisu pias nen sur na kinanena lala, naṓa laṓasa, amiyuṃaen e kol pona selpa, a laṓasa, amiyuṃaen ga e porotano pona e laki. La naṓa apisu sane po, asuṃa apio kinanena pa ea, e kiela pupia ṓaṓagena kerkeviu lala, ana laṓasa, asuṃa akinan kai ga ea. ²¹ A ita yeririna lala ita maran taaga sa ke ga nene. Yar naṓa kila kiena malena merarava ruru po, a pe wa, a pe kila re yuṃaena viowa la poli, yoko kiena yerkawa were naga kila kiena yuṃaena wo la ve moki e maran yar lala.

²² Visae sinoṃan osape ko ove sanene, monar ovisa luṓar kioṃa naninuena m̃arera lala a nasinenanena viowa lala naṓa sitomena kiena ṃee lala kilia ulenia. Monar oṓionli naṓa kioṃa sitomena ulen nawoena, a viawaena, a sinesiena, a suṃarena, ana sanene yoko wo vaṓisi van ko omio taṓena la naṓa kiamiu sitomen taaga, naṓa asuṃa amlen ke pa Suṓe vanon kiena naiilaena.

²³ Yam mokliu, yar la akilia aveveyu vaṓisi van la komin sur wowe lala pona kiela sitomena kar lala, sa naṓa pe akilia re suri tai poli. Pogos tai veveyuen la nene va ṃaga tol naṓa asulania, akilia aliṓerela sina, ana ko na pe pon re ova loyuṃa e visen la ne sanene poli. ²⁴ Yar nayuṃaena kiena kieta Suṓe, naga monar ve sinena kar re yar taṓena lala, ana naga monar visuar ruru la, monar kilia ruru mrapa na vian malumunlaena. Naga monar ve sinen mimi re vilaga, ana kiena sitomena ve piavi ruru wo van la.

²⁵ Pona pogos tai laṓas ve aloge re naga yo, yepel mavinia, ana visae kilali naṓa were ruru kiela sitomena, ana naga monar malum ga van la. E mrapa ne nanene pona Ntewa yoko kilia la narin pogos tai van la vena vilonen kiela sitomena, vena atol kiena visena lelaga. ²⁶ La ne sanene, Yermare suṃa ṓuarar ruru la ke rui, suṃa m̃areran la ke vena akila ya naṓa naga sinenania. Ana visae akilia atol maran si kiela kiliaena wo, yoko akilia aure vetan kiena pova a kiena visokanena lala.

3

ṓelaga na ṓarm̃arera lala na legiena maro

¹ Timote, monar ve sineta ṓesan re sane e legiena maro la nini, yoko monar pog m̃arera la ve moki aimi aṃaliv. ² Monar ve sa nene narui, komin naṓa e pogos nene yoko ṓelaga kiena yar lala va viowa manene laa. E pogos nene, yoko ave sanini:

yoko ave yaru na sitoṃal laen ga,

yoko asitom manene ga kilavaru,

yoko avilave a awarwarla vaṓisi,

yoko ave yar na veveyuena,

yoko taṓatete alogear visena kiena kiela yermarua lala,

yoko taṓatete nena avisa potena e sur tai,

yoko asitom korenan ga sur wa lala,

³ yoko taṓatete awo van yaru taṓena,

yoko ave ṓarm̃arera vaṓisi,

yoko aviueli a avisa kare sur wo lala,

yoko sinela kar yaru lala, asu la,

yoko yepel mavin sur wo lala,

⁴ yoko avisa kotalia kiela erau lala,

yoko ve asitom re suri tai,

yoko asitom asape la ga na apo,

yoko ve sinela si re Ntewa, ana sinela si ga malena wo ya naþa la sinelania,

⁵ a visae akilali naþa auarar towe laa narin yuþaena na suþare lala, ana na nene e ga e kulusa, komin naþa kiela malena pisawal ruru rui sape m̄areraena lelaga na lelagaena e Ntewa pe to re nena e la poli.

Nane þelaga na malena kiena yaru na legiena maro lala, a monar ve osu re lavisin la. ⁶ Sineu miye m̄ena sira la nene paþisi wa naþa navianena navisokanen lala asuþa ateteliv ke m̄ala uþa lala. Sira la nene laþasa asuþa aþar ke urmiena namlamulen viowa rui, a laþasa sitomen taþena la sike e la, kila sane visae yar la aimi vinau sanene, ana sira la nene ameu paþisi, pe puriula re si naþa avisaluþar la poli. ⁷ Ya naþa yar la nene apisa, ana amlelaga ga narui, akila m̄a sanene pano-o ana pe atol ruru re kiliaena napo poli e visen lelaga kiena ne Ntewa.

⁸ Yar la ne apivim ke sanene, nepisu la sane ape nasinekar kiena ne visena lelaga napo, sane e pogos kiena ne yermarua Mosis nanua sumo, lalua naþa Sanes amio Sampres, apim apian kare sitomena kien yar la moki. Yuþaena ne nanene yar la nene asuþa akila ke na wa, naþa kiela sitomena la pilolon kare pa piowa, pe apuarar re si kieta viawaena poli, ana apurmatan apa e taþena. ⁹ Ya naþa la akila naga piowa manene laa, ana pogos na waren kana nakoena nena yoko imi m̄aliv pogos tai na wa, sa naþa m̄alivin lalua na nepisa ga na wa. Pogos tai, amilan ga kiela visokanena kate ga yometava, ana yar la apisu kilalea.

þelaga wo lala kiena ne Pol

¹⁰ Timote, tesu lele taaga nakonua rui, ana nekilia nesape ko na opisuveve inu po paþisi. Okilia inu sanene, naþa

okilia ruru ya naþa nepian ke pan yar la ea,

okilia ruru kiau þelaga,

okilia ruru ya naþa sineun nesape neyuþaen e kiau malena,

opisu kiau viawaena e Kristo keviu sanape,

okilia ke osape kiau sitomena piavi,

opisu ke sinesiena naþa teke e inu pa yar taþena keviu,

okilia ke osape pog m̄arera ya naþa pimi pan inu, ana nesuþalu ga,

¹¹ okilia ruru napiowaena la naþa kiau nasinekar la akila pan inu, sane e pupia kumali telu nene, Antiok, Aekoniam amio Listra,

a okilia ke yepe lalaea naþa noþaria e limala e pogos la nene.

Naloge viowaena la nene am̄arera paþisi, ana nakawean inu ga pano-o noþal naþa Suþe pimi þerelua inu e napiowaena make la nene.

¹² Ee, ita punu ga naþa sinetan Kristo Yesu se ita, pona telual malena wo temio, monar tekilia tesape yoko towar naloge viowaena e yar taþena lala. ¹³ Nanene na pogaga, ana naloge viowaena taþena sike ga wa naga piowa ga, naþa yaru viowa lala amio yar navisokanena yoko awaria. Nagane asuþa akila manene ke piowa rui, a yoko akila m̄a viowa sanene vano vano-o viowa manene la, vano vano viowa naþa viowa.

¹⁴ Ana ko Timote, okila ga omio kiliaena wo la naþa otol rui, ana oyuþae va sanene omio lelagaena wo la naþa opiawa ruru m̄arera e rui. Ve sineþa þesan re sane imimi ai naþa mepian ko, ¹⁵ siar e pogos naþa ove tokak ke ga wa gar moþa, pimi tol nagane, ana kila sa naþa okilia ruru Tusi Wa, naþa kilologia mrapa na tamaliaena kiena yar naþa mlelaga e Kristo Yesu.

¹⁶ Siriena Wa la nene, Ninuna ne Ntewa sike e la, ana akilia aiila ita ve keviu vano-o vaþisi. Avian ruru ita, aweþeþe sineta, akawe ruru kieta þelaga, a akila kieta malena wo nenaga, ¹⁷ vano vano-o ita yeririna lala kiena ne Ntewa teim towo a tetorokin nakilaena kiena yuþaena wo lala.

4

Pol miilaar Timote

¹ Timote, sane italu tesike e marana Ntewa, a e kia kiena Kristo Yesu, nepiun tan ko nesape owarar ruru sur laḡasa naḡa sineun nesape nevisa van ko. Italu tekilia tesape kieta Suḡe yoko liḡere la naḡa amarmare rui amio la naḡa amali, a italu tesuḡna tesitom ke urmi paḡisi e kiena nawasuḡeena sina, amio kiena nasuḡenena naḡa yoko naga visirlua, ana monar ologe ruru visena la nene.

² Ya naḡa yoko okila na ve sanini, monar olologon Visena Wa silaga. Visae pog wo pona pog viowa, ana monar osuḡalu ḡarera vena visawalena, monar oḡion tauluen yeririna lala, monar oure ruru la naḡa akom ke e mrapa taḡena, a monar oiilaar yaru la naḡa amlelaga.

A pogos naḡa okila yuḡaena la nene, silaga kioḡna sitomena monar ve piavi ruruia, a ve sineḡna maren re vian laena. ³ Pogos la ne pimi ke ne yoko yeririna la yepela mavin vianen wo lala, ana yoko kiligala lala vikiraran sitomen kar lala, a yoko asuḡna aure navianena la ve moki naḡa asitom ke asape yoko akilia avisa sur wo lala vena kilaen alogewonia. ⁴ Yoko aligan logeen visen lelaga, a yoko akila pal mrapa ava ataveve suniena lala naḡa yar ga la akila.

⁵ Ana ko na ve ove sa re nene, ana okila ga kioḡna sitomena va ruru suḡna ga, okawean ko e pogos ḡarera lala, okila kioḡna yuḡaena na lologonen Lologena Wo, a oyuḡnae taveve ya naḡa Ntewa pio kon sape oyuḡaenia.

Pol pisu sape lavisi aweḡar naga narui

⁶ E lepas naḡa pun inu, nemloge sane nagane nepim ke lavisin luas narui, nepimi ke e lele tai naḡa yoko monar nokuḡaḡain kiau malena vanon Lologena Wo narui. Ee, nepisu sane kiau pogos na liganen yo pimi ke lavis narui. ⁷ Ana pogaga, komin naḡa nekilia sane nekila mara, noḡaryon ḡarera po; nekiriri, nekila make nenaga; a nopuarar lelagaena, pe nemligan li re pogos tai poli.

⁸ Yar napo lala kiena ne Suḡe yoko atol karo wa na ḡarila, a nesitom sane naga mligan ruru kiau sike ma e peni rui, vena yoko e ga e legiena maro ana la van inu.

E pogos nene, yoko naga liḡere yaru make ga, a yoko naga la nalaena van ita make ga naḡa kieta sitomena ḡareran naḡa tekrakravan kiena nawasuḡeena.

Visena maro

⁹ Timote, sineun manene nesape owarlion naḡa oyal kawa oim e nini. ¹⁰ Sineun ko paḡisi, komin wolai naḡa Timas, sur na yomarava la aḡere kiena sitomena pano-o pure pa garu Tesalonaika. Kresens ḡena ga pa garu Kalesia rui, a Taetas pe su re si amio inu poli, naga pito ke Telsesia. ¹¹ Erau ga tai sike amio inu nagane, nane Luk. Ana visae okilia olual Mak, yoko oure naga imi amio ko, komin naḡa nepisu naga suḡna miila inu keviu paḡisi e yuḡaena kiena Suḡe naḡa sineun nesape nekila. ¹² Taekikas, nepitetalia naga pa garu Episas rui.

¹³ Yoko nevisa kiau sur laḡasa, sanini pogos naḡa ovam e nini, yoko owarar la avami. ḡau kulkota na miava, nemligan ḡeke puna Karḡas pogos naḡa nesike gar Troas, a kiau tus lala amio ḡas nen tus lala, sineun nesape owarar sur la nene imi.

¹⁴ Okilia ke yar na yuḡaenen piaki naḡa Aliksanta, naga kila visena viowa la mok liu pan inu. Yoko Suḡe ga visuvevea vena kila ya ne vania, ¹⁵ ana monar nekila ḡena okilia naḡa naga kawe manene ke kieta Lologena Wo, ana monar ovisuar ruru ko ea.

¹⁶ Yer kawa nae Rom lala apis pan inu kumali yam tai rui. E pogos nene, kiau erau taḡena lala apureure make ga, pe la yar re tai naḡa pimi e lepasneu poli. Ana nanene na pogaga, popon sane Ntewa ve sinen karla re vanonia. ¹⁷ E poglis nene, Suḡe ga naga taaga amio inu, ana nemloge sane naga mla pupia naḡareraena pan inu, ana noḡareran

4:10 Kolosi 4:14; Pilimon 1:24, 2Kor 8:23; Kal 2:3; Taetas 1:4 4:11 Kolosi 4:14; Pilimon 1:24, Yuḡaena 12:12,25, 13:13, 15:37-39; Kolosi 4:10; Pilimon 1:24 4:12 Yuḡaena 20:4; Epis 6:21,22; Kolosi 4:7,8 4:13 Yuḡaena 20:6
4:14 1Tim 1:20, Rom 2:6

visawalen sur make ga na Lologena Wo e maran yeririna lala, kila narui ðegas nen la naþa pe amlelaga re e Ntewa poli amloge. E pogos nene, lelaga, nesike pae e logon laion rui, ana naga þerelua in sina petania.

¹⁸ Nemninue narui aña nelual naviowaena ya ne yoko nevan ea, ana nemligan inu e limana Suþe, nesape yoko naga tamalia inu vena nesike nemio e kiena yo wo ma e peni, a silaga yoko nelasuþe si naurarena la vania, vano vano-o ve uro re, sanene.

¹⁹ Sur si laþasa navisaena, awis ovisa pokolulagi pona pokolemalo va sira nene Prisila amio wona Akwila, a va ðena namratava puna ne Onesiporas. ²⁰ Erastas pe pam re si e nini poli, sike ga Koren, a pogos naþa mepam, metol yo ðaelitas, ana Tropimas mai, nemligan naga sike e yo nene.

²¹ Timote, sineun manene paþisi nesape monar okilayonli ovam e nini vilaga, komin pogos na miava pimi ke lavis narui.

La ne e nini asape nevisawal van ko, la asape asitom ko paþisi, nane Yupulus, Putensa, Linas, Klotia, amio erau taþena lala.

²² Noþisi e nene narui, nesape Suþe sike amio ninuña, kiena lemamienna sike amio amiu make ga.

Inu, Pol.

Ñaki Naña Pol
 Siria Pan
 TAETAS
 Visayuena Na Tusi Nene

Suniena plas na tusi nini

Taetas, naga pe yaru viu naña naga pe pe lus nae re Israel tai poli, ana naga pimi pe yaru tai naña mlelaga e Yesu, ana naga suña taveve Pol vena iila naga e yuñnaena a na visawalen lologena wo kiena Yesu Kristo. Pol mligan Taetas sike e purvanua naña Krit vena visuar yuñnaena na suñare e yo nene, a naga siri ñaki nini pania vena visayuen suri telu.

Nasumo, Pol pisa pa Taetas vena sitoñal ðelaga naña nasumonena na suñare la monar atavevea. Naga pisa sanene, komin le Krit la moki, kiela ðelaga a kiela maliena pe mesmesu re poli.

A na lua, Pol pisawal mrapa pa Taetas naña monar tavevea vena vianen yaru lala e ðegas taña lala loyuña e suñare. Nane yermarua lala, a sira marua lala, a yaru viu amio yaru na yuñae korenen lala. A naga sape sira marua lala monar avian ruru sira ñee lala.

A namaro, Pol pisawal pa Taetas e navianena naña naga monar la van yaru lala, a monar ave erau ruru wo amio la, naña asuña ve apeveveyu re, a yaru na suñare lala monar ve aliþerela re.

Komþasnen tusi la na nini

Visena þesa 1:1-4

Na sumonena na suñare lala 1:5-16

Yuñnaena kiena yaru taña lala loyuña e suñare 2:1-15

Visena na vianen yaru lala 3:1-11

Visena maro 3:12-15

Pol porworun Taetas

¹ Kiau erau Taetas,

In na Pol, nekekaran nevitawe ko sina e ñaki nini, e kia kiena ne Ntewa, naña in na kiena yar na yuñnaena, a e kia kiena ne Yesu Kristo, naña in na nepe kiena nalologena.

Nesike e yo nini, nesuña nemiyuñae ke ga wa, nemio yeririna la naña Ntewa pisaar la sape ape kiena, komin sineun nesape popon kiela viawaena imi ñarera laa ga wa, a kiela nakiliaena e visena lelaga imi ve keviu laa ga wa. Visae ve sa nene, yoko kiela ðelaga kilia imi torokin ðelaga kiena yar wa taña lala kiena ne Ntewa, ² a yoko akilia atol malena naña ve uro re.

Kieta sitomena ñarera pa rui sape yoko tetol malena nene, komin Ntewa pisaar na konua konua rui sape yoko monar ve sa nene, a tekilia sane naga pe pisokan li re pogos tai poli. ³ Naga pe kieta Ntewa natamaliaena, ana pogos naña pisu sane kana pog ruru napo, naga mligan kiena visena imi ñalivi vena kilaen mrapa na kieta malena, a nagane mligan sike e inu vena neva nelologon va e yo make ga.

⁴ Ana Taetas, nane kiau ñaki nene pan ko. Nepisu ko sane ope naruu ruru nenaga naña ita lua kieta naviawaena taaga, ana kiau leniena pan ko pa sanini, sane lemamiena a suñarena kiena ne Ntewa Arimata a Kristo Yesu kieta natamaliaena sike amio ko.

Yuñnaena kiena Taetas e purvanua naña Krit

⁵ Nesiri piñasu pan ko, sineun iilar koena e yuñnaena naña omiyuñnaen ke gar Krit wa. Nanua sumo, ita lua toþar þesan lologena wo pimi ñaliv e yo nini, ana pogos naña

nepetan ko, pupia yuñmaena komḗas mēke ga wa, ana nemligan ko osun ke naḗa okila ruru ke ne yuñmaena la imi wo laa sane wa.

Sa naḗa nepisa pan ko e poglis nene, sineun nesape ova oteliv make e kumali lala, owu ḗarin kiela yaru laḗas, aim ave li nasumonena wa lala.

⁶ La nene, la monar ave yaru la naḗa pe naviowaena re e kiela malena poli, monar atalopa amio wola ve taaga ga, a narila lala, la mēna monar alelaga e Yesu, pe pon re tevisu la ave ḗar mārera poli, pona asuñma apilon ke visena kiena kiela yermarua luwoka.

⁷ Monar ve sa nene komin naḗa ape yerkaawa na suñmare lala. La ape yar na visuaren yuñmaena wa kiena ne Ntewa, ana monar ave yar mesmesu. Ve asitom re asave la na yar tai ne, ve sinela mimi koskos re, monar ve amun manene re wii mārera, monar ve ave yar na kilaen re mara, a monar ve asitom manene re sur lala toko.

⁸ Ana visae ve sa nene, yoko nasumonena naga kiena malena ve sanape? Yoko popon naga kekaran visuaren wolawa lala e mēna uñma, amio ḗelaga wo taḗena la ne sanene. Popon naga sumon ruru yuñmaena lala, ve manmarua ruruia, kiena sitomena mekik ruruia, a naga kawē ruru kiena malena mesmesu. ⁹ Visena lelaga la naḗa apian ea, naga monar uarar ruru mārera, vena kila sane naga towe kilia vian liluen vano.

Ovisuar lelagaena navisokanena lala

Yeririna la ḗasa asitom asape kieta lelagaena pe navisokanena ga, ana kieta navianena wo lala kilia kila kiela visena lala taḗatete suñmal ruruia.

¹⁰ Yar la mok liu asike ne naḗa yepel mavin loge itaena, ana apis mārera paḗisi, pona asuñma akilali ke naḗa aure sitomen kien yar la va ve taḗena. Garu e neñma Krit, ita lua tekekara paḗisi pan le Yu la moki naḗa tetaulula apim ape yeririna kiena Yesu rui, ana nagane li taḗena la nene sinelan asape aure kare la ava aviowa sina. ¹¹ Sa nene, popon sa sur tai mono logola, komin akila kare ke mratava wetelu laḗas rui. Asuñma apian ke sur laḗas naḗa pe mesmesun re naḗa avisayu poli, ana asuñma aḗareran ga asape akila, pe na sitomen wo re poli, ana komin ga sitomena viowa naḗa asape pona ala narin kilavaru la e yo.

¹² Pona le Krit lala, kiela ḗelaga sa ga nene yo, komin yar nasirien suniena tai nanua sumo, naḗa naga pe yar nae nena kiela yo tai, pogos tai pisayu la sape
“Le Krit lala, la ape yar na visokanena, apiowa taulu nompui, ape yar na yowena, ape yar na sitoḗalen ga mēḗela.”

¹³ Yar nene, kiena visena mārera li mēga, ana in na nepisu sane pona lelaga yo, ana po paḗisi naḗa ovis mārera van la, visae peraga, yoko kiela nalelagaena taḗatete imi wo ruru pogos tai. ¹⁴ Nagane asuñma apuarar ke sunena marua na sumo kiena le Yu lala, asuñma akekaran ke visen kiena ne yerkaawa taḗena la naḗa akoven lua visen lelaga, ana komin ya ne pe sinelan re lelagaen e visen wo kiena ne Ntewa naḗa tesuñma temla ke pan la?

¹⁵ Yar naḗa kiena sitomena merarava ruru nena po, sur naḗa namname pe torokin re kila kiena sitomena imi namname poli, ana sur make ga merarava ga pania. Ana yar naḗa pe mlelaga re poli, naḗa kiena sitomena namname, pona sur tai merarava mēa yo, ana taḗatete kilia kila kiena sitomena imi merarava, a pe sur re tai naḗa merarava ruru e naga poli. Nanene komin naḗa kiena sitomena pona losinena apa apiowa rui.

¹⁶ Yar la naḗa nesiriyu la ke ne, asuñma apisawal ke asape akilia Ntewa, ana kiela yuñmaena lala kila meraravan pan ita sape pe akilia re nenaga. Losinela la menun a melkalka, ape ḗar mārera paḗisi, pe atorokin re nena kilaen si sur wo ta poli.

2

Navianena wo kila ḗelaga wo mālivi

¹ Ana Taetas, nekilia nesape ko na yoko ve ove sa re nene, ana yoko ko na monar osuñma ovisawal van la visena la naḗa torokin navianena la napo.

² Visen laḗasa nalaen van yermarua lala naga sanini, sape monar ve aulaula re, avarurula ga, a popon asitom urmi e kiela malena, amio kiela sitomena na manmarua

ruruena. E lepas na lelagaena e Yesu, e lepas na sinesien yar taþena, a e lepas na suñal rurunen ñarera e yuñnaena, monar aulen þelaga mesmes silaga.

³ Visena na sanene kiena sira marua ñena la suña ga, sape monar aulen þelaga na vatanonen Ntewa, ve asuña re ga avis kar viowa va yar taþena lala, a sitomena na laen wii ñarera ve sukaþara re e la silaga. Yuñnaena naþa popon akila naga sanini, sape monar avian taþena lala e sur ya naþa po vena ayuñnaena.

⁴ Keviu manene paþisi e lepas na sira ñee la naþa atalopa mare ga na wa, monar akipian la ruru e mrapa wo na sinesi rurunen wola lala amio narila lala. ⁵ Sira marua la nene, kiela sitomena la monar manmarua, kiela malena monar ekiki, monar avisuar ruru ñala uña, ave sinewo lala, a monar avatanon ruru wola lala. Visae akila sur la nene, yoko yar la visu kilalea sane visena kiena ne Ntewa naþa pisawal mrapa wo la nene, naga pe nasiriena wa tai naþa po paþisi.

⁶ E ña nenaga e þelaga nene, sineun nesape oñareran yar viu lala, ovisave la monar akawe ruru kiela malena lala. ⁷ Po paþisi visae pogos naþa avisu ko, alual naþa osuñna omiali osumon la ke e mrapa na malena na po, naþa pulen make yuñnaena wo lala, ana la akilia ayal e lelen laña.

Ya naþa ovian lania, monar sike e kioña malena rui, a monar naþa akilia avisu kilale asave ko ñena osuñna ositom ke si urmi ea. ⁸ Ya naþa aloge ovisawalia, monar ve ve visen re tai naþa yoko akilia avis van ko vanonia. Visae ve sa nene, yar la naþa sinela kar ita, yoko akilali naþa asuwo ita, ana yoko akila wowen ga suria, yoko kiela visena tai taþatete si suñalu.

⁹ E lepas kien la naþa amiyuñnae korena ga kiena ne yerka wa tai, okila la akilia ruru asape monar avatanonia, a monar aþionli naþa akila sane kilia kekaran yuñnaena naþa akila pania. Monar ve avistañe re si vania, ¹⁰ a pe pon re asitom avisave akilia avivinaun kiena narin sur laþasa ve kiela. Monar ave lelaga ruru napo, vena kila naþa kiela yerka wa kilia wasine la e kiena sur make ga. Pogos naþa li nalelagaena la ayuñnae ruru wo sanene, akilia akila kiela vianena e lepas kiena ne kieta Ntewa natamaliaena va manene metava ve keviu e visuena kien yar taþena lala.

¹¹ Popon sane yar la avisu kilale kieta lelagaena, vanon Ntewa naga pe lemm e yomarava nini, mla natamaliaena pimi ñalivin þegas nen yeririna make ga peve taaga.

¹² Ana ita naþa tetolia, tepisu kilale naþa Ntewa suña kilapian ita ke e kieta malena lala, sape monar teligan þelaga viowa kiena yeririna la naþa pe akilia re naga poli, a monar tevilon ñasita van nasinenanena viowa lala na yomarava nini. Yomarava ne nane yo naþa temal tesike e ne, ana kieta malena monar moñau ruru wo, a monar mesmesu, monar torokin nena yeririna lala kiena ne Ntewa. ¹³ Monar tesuñna ga sane, a monar tesuñna tesuñmate ga pog wo naþa kieta sitomena sike ea, naþa kieta Ntewa keviu, kieta Natamaliaena Yesu Kristo yoko imi ñalivi ea, amio kiena pupia naurarena.

¹⁴ Naga ke narui naþa tañan kana kuruta mlau vanon ita, þere plan ita petan ñareraena naviowaena, kevan ita temekiki tepim tepe þegas wa na yepemaenen yuñnaena wo lala sa naþa naga sinenania.

¹⁵ Visena ne naga ke la na nene narui yoko osuñna ovisawalia. Yar naþa popon aiilaria, oiilaria, a yar naþa popon avis vania, ovis vania. Pogos make ga oyuñnae omio nañareraena amio ñareraena, a ve otañan re avisa kare ko pona asitom korenan ko.

3

þelaga wo kien yaru naþa mlelaga e Yesu Kristo

¹ Popon ovian li na lelagaena lala vena silaga asitoñal þelaga wo nakilaena. E lepas na kiela suþe lala, amio kiela yerka wa la naþa asike ne, monar avatanon la, alogear la, a akekaran kilaen yuñnaena wo punu ga. ² A monar okila pian la ñena ga, ovisave la nene, ve asuñna avisa kare la re sina, a pe pon re ava e veveyuen poli. Ana þelaga naþa monar

akila va yar tařena ve sanini, sane monar amořau, ve akila re řelaga řmarera, a monar akila řelaga navatanoena ve keviu silaga.

³ Visena la ne sanene pan ita make ga, komin nařa nanua sumo pe yar tařena re ga la poli, ana, ita řmena tesu ga e malena viowa. Tekila wowe pa Ntewa, a tepe řar řmarera pania. řelaga viowa řere kare ita pano-o tepim tepe yar na suen vatanon řmareraena nasinenanena viowa lala amio nakekarena viowa na yomarava. E poglis nene, kata kinanena na kanen e legien punu ga nane sinemimiena amio vielueena lala. Kieta sitomena lala piowa pan yar tařena lala, a metavana, tepiowa ke sina ga pan ita.

⁴ Tesuřa e malena viowa sanene pano-o, ana siraunia, kieta Ntewa natamaliaena, kiena nasinewoena a kiena nasinesiena wo pimi řmalivin ita, ⁵ naga tamalia ita ruru nenaga. Tamalia ita sanene, pe komin re ga kieta yuřaena wo nařa tekila poli yo, ana vanon ga kiena nasineyeena wa pan ita.

Naga sinena miye ita, ana kevan ita temekiki, ana kiena Ninuna Wa kila tepaeme sina e malena viu, ⁶ e kuruta kana Yesu Kristo kieta natamaliaena, nařa mlau kalo ita.

⁷ Naga mrapa ke nene narui nařa e kiena lemamiena, tepim temesmes ruru e marana. A pe naga re ga nene poli, ana metavana, naga kila ita tepim tepe narina lala, nařa yoko towarpae ga kiena lalimana, nařa yoko war van ita, nane malena nařa ve uro re.

⁸ Potena pařisi pania, visena la nene ape lelaga pařisi.

Pol miilaar Taetas

Sineun nesape ořmarera, ořmareran li nalelagaena lala kiena ne Ntewa, sane monar auarar ruru visena la nene, a monar ařilion nařa auarar ruru yuřaena lala nařa po, a nařa akilia aiila řmena yarunia.

⁹ Pogos tai asuřa apisasa ke ga visen koren lala nařa tařatete iila malena kien yaru, sa nařa asuřa apeveyu wowe ga e sitomena la nařa pe kana kinas re poli, pona asuřa apeveyu komin sur lala kiena ne kiela yermarua la nařa apuarar ruru kiela kia la suřa ga. Pogos tai asuřa apiuelinila, pano-o tol nařa kiela sitomena la kilia liřere řmena e visena nařa navisaluaena kiena ne Ntewa pisa. Ana popon ovisa va li nalelagaena ovisave la monar ve aviran la re e visena la ne sanene.

¹⁰ Visae yar tai suřa sikolia, kawekapin řna visena silaga, akilia avis vania yam tai, sa pere yam ve lua, ana visae sitom korenan ga, suřa kila řmaga, pe pon re si akilavain sur tai amio naga poli.

¹¹ Tekilia yar la ne sanene rui, sane kiela malena pilon pe tařena, a kiela sitomena pulen ga mlamulen viowa. Pe ita re nařa tesape naga piowa poli, ana kiena yuřaena pisawal kiena napiowaena e marata ita punu ga.

Visena maro lala

¹² Taetas, sineun nesape nevisa van ko sane visae olual neligan lalua nene tai Artemas pona Tikikas iřasu řmalivin ko, e pogos nene narui okilia ourmatan yo nařa, owaryonli nařa oim ovisu inu gar Nikopolis. Na nene komin nařa ve ve piavi re, yoko neligan e nini, sineun nesape neva nesuřa e yo nene vano-o tol pogos na miava warovia.

¹³ Lalua tařena nařa asike amio ko nagane, yar na navisaluaena nene Sinas, amio Apolos, yoko okilali okila sane lalua akilia ala si kiela mrapa lalua ve ve piavi re, vena ava řmena e yo tařena lařasa. Awis, oiila lalua e ya nařa limala plasinia.

¹⁴ Sike řmena e ko vena oiilaar kieta yeririna lala sane nepisa ga na wa, la monar awion nařa atarar yuřaena wo lala. Visae ve sa nene, pogos nařa sur na ilanen tai, ana kiela naiilaen la sike rui, a kila řmena nařa kiela malena kilia war mras ve moki sa nařa Ntewa sinenania.

¹⁵ La nařa asike amio inu nagane apisa pokolulag pona pokolemalo van ko. A yeririna la nařa asike amio ko nařa asitořmal imimi asape ita punu ga teve taaga temio la e kieta viawaena ve taaga, awis, ovisawal van la sane imimi řmena ga mesuřa mesitořmal la řmaga.

Kiau leniena nesape yoko lemamiena kiena ne Ntewa sike amio amiu make ga silaga.

Taetas 3:15

450

Taetas 3:15

Inu, Pol.

M̃aki Naŕa Pol Siria Pan PILIMON Visayuena Na Tusi Nene

Suniena plas na tusi nini

Pilimon naga pe yaru na lelagaena tai, a naga suŕe kiena yaru na yuŕnae korenena tai naŕa kiena kia Onesim̃as. Onesim̃as pure petan kiena suŕe naŕa Pilimon, pa sike garu pulkumali keviu naŕa Rom, ana e lele nene naga ŕeke loyuŕna na logeviowaena ea. A e yo nene naga pitawa amio Pol, a pogos naŕa sike amio Pol naga pimi pe yaru kiena Yesu. Ana Pol siri m̃aki tai pa Pilimon, piyun tania vena naga monar were Onesim̃as wasuŕe iŕnasu sike amio naga. Pol pisa pa Pilimon, sape nagane Onesim̃as pimi pe yaru kiena Yesu rui, a popon naga sinena kar re, ana naga viewoia a werear sina vena ve yaru na yuŕnae korenaen sina. Ana yoko naga ve ve yaru na yuŕnaena koren rega, naga imi ve wenla ruru napo komin lalua asikol la amio Yesu Kristo.

Komŕasnen tusi la na nini

Viena ŕesa 1-3

Pol mieluar Pilimon komin kiena yuŕnaena 4-7

Pol piyun m̃areran pa Pilimon vena were si Onesim̃as 8-22

Visena maro 23-25

Pol siar kiena visena pa Pilimon

¹ Inu Pol, nesiri ke m̃aki nene pan ko Pilimon. Nanagane nesike e pupia pulkumali nae Rom, a komin naŕa nekila ke yuŕnaena kiena ne Yesu Kristo, la amligan inu nesike e yuŕna naloge viowaena e nini na wa. Kieta wolai naŕa, Timote, naga sike amio inu e nini na wa, ana imimi lua mepisa pokolulagi pona pokolemalo pan ko, naŕa ita ga teloka temiyuŕnae ke pa Suŕe taaga ga, ² a kiamimi visena imimi lua sanene pan ke m̃ena ga vineta nene, Lewia, a yaru na kieta ŕegasia nene, Akiŕas, naŕa naga pe yaru m̃arera na kilaen mara e lepas na yuŕnaena kiena ne Suŕe, amio ŕegas kiena ne li nalelagaena taŕena lala naŕa asuŕna apiora ke e moŕna yuŕna.

³ Imimi lua memlen mesape Arimata Ntewa, a kieta Suŕe Yesu Kristo, lalua aligan kiela lemamiena a suŕarena sike amio amiu e yo naŕa asike ea.

Sinesiena a naviawaena kiena ne Pilimon naga keviu manene paŕisi

⁴ Wolai Pilimon, pogos naŕa nesitoŕnal ko e kiau leniena lala, silaga nesuŕna nepisa ke potena pan Ntewa vanon ko. ⁵ Na nene komin naŕa nemloge rui naŕa la apisayu kioŕna ŕelaga wo, asape kioŕna naviawaena e kieta Suŕe Yesu m̃arera po paŕisi, a kioŕna sinesiena pan nalelagaena lala, keviu manenea. ⁶ Nemlen wo ko ke, nesape pogos naŕa ko osuŕna okianlua ke kioŕna naviawaena pa yaru taŕena lala, ŕisi na kila la akilia manene laa sane e navisa ruruena nowo la naŕa ita kieta, naŕa temla Kristo e kieta malena lala. ⁷ Ee, Pilimon, kioŕna sinesiena wo naga suŕna kila ke li nalelagaena wa lala, la sinela la amloge po paŕisi, a pogos naŕa nemloge, suri nene kila nemloge po sina, a kila inu m̃ena nekekara paŕisi.

Pol naga piun m̃areran pa Pilimon vena were si kiena yaru na yuŕnaena nene Onesim̃as

⁸ Ana Pilimon, sineun nesape neviun suri tai van ko. E pupia yuŕnaena kiena ne Kristo naŕa nesuŕna nekila ke ne, pona mesmesun ruru ga naŕa nevisa ruru ga van ko nevisave popon ko okila ve sanene ve sanene, ⁹ ana taveve ŕelaga na sinesiena, pe sineun re nevis m̃arera ve sanene van ko poli. Nanagane, in na nepimi nepe yermarua ke narui,

nesike e yuṁa nakoena vanon Yesu Kristo, ana sineun nesape neviun ga tan ko, visae ko okekaran naṁa otaṁan suri nene naṁa nesape neviun tan ko.

¹⁰ Yaru tai sike e nini, pogos naṁa nesike pa e yuṁa naloge viowaena sanini rui, ana nesumon yaru nene pimi e Kristo, a nanagane nesuṁa nepisu ke yaru nene sa ga naruu tai. Yaru nena Onesimās, naṁa sumo pe kioṁa yaru na yuṁaena tai, siraunia naga pure petan ko, pimi e yo nini. ¹¹ Ee, yaru nene, kiena kia kana kinas sape “kila yuṁaena wo,” ana nesitom nesape nanua sumo, naga suṁa kila kioṁa yuṁaena pe po ruru re poli. Ana nanagane, naṁa pilon kiena malena rui, nemlelaga nesape naga kilia kila yuṁaena wo lala na iila koena, a naga kilia kila ṁena ga yuṁaena na iila inuena.

¹² Ana, nanagane nesape neligan si Onesimās wasuṁe ke sina ga iṁasu puṁa narui, sa naṁa nemlalu ga kiau malena komṁasia nane nemligan piṁasu puṁa ne. ¹³ In na nekekaran nesape popon naga suṁa ga amio inu e nini, vena iila inu e pogos ṁarera nini naṁa neṁeke e yuṁa naloge viowaena vanon lologena wo, a visae naga kila sanene, sa naṁa naga kus leleṁa, naga kila yuṁaena tai pan inu naṁa torokin ko okila van inu.

¹⁴ Ana pe pon re noṁareran naga vena naga sike amio inu sanene poli, vanon naṁa ko na omninue ga. Sineun nesape visae ko okila kiau yuṁaena wo tai sanene van inu, ṁisi na ve vanon re ga naṁa neṁareran kon poli, ana vanon kioṁa sinesiena wo a kioṁa sinewoena ga. Ya naṁa yoko Onesimās kila, naga pe kioṁa naṁa ovisawalia.

¹⁵ Lelaga naṁa Onesimās naga pur matan ko, ana ane kilia, pona Ntewa kila naga pur matan ko yam plas ga sanene yo, vena visae wasuṁe ke sina ga imi puṁa, ṁisi na naga ve kioṁa lue narui, vano vano-o taṁatete ṁisi. ¹⁶ Sanene komin naṁa nanagane, ṁisi na naga wasuṁe ke sina ga puṁa, naga ve ve sa re si yaru nayuṁae kioṁaena, ana naga wasuṁe puṁa sane womla tai e Yesu, naṁa sanene na po manenea. Sineu si naga keviu paṁisi rui, sa ga wolai tai, a nemlelaga nesape ṁisi na sineṁa si naga vano vano-o vaṁisi, komin naga pe kioṁa yaru ṁisi rui, a metavanja, nanagane naga pimi pe womla ṁena ga. ¹⁷ Suri ne na nene nesape neviun tan ko. Visae ko opisu inu sa naṁa ita lua tepe wolai, a ita lua tepe yaru nakilaen yuṁaena taaga ga, sineun nesape oure si Onesimās wasuṁe iṁasu puṁa, sa ke ga naṁa visae neiṁasu puṁa, ṁisi na ko okekara vaṁisi naṁa oure inu neiṁasu e moṁa yuṁa. ¹⁸ A visae Onesimās naga pinaun kioṁa suri tai, pona kila kare kioṁa suri tai, pona ya sina, ana ṁisi na inu ga nevisuveve suri la nene.

¹⁹ Visena nene inu ke ga Pol narui nesiri ke ga e luṁau, sane kiau navisaarena tai van ko, nesape visae sinoṁania, ṁisi na neul plan make kiena lapui vetan ko. Ana pona ko osuṁa ositoṁal ke naṁa ko ṁena ga kioṁa pupia lapui tai naṁa sike e inu, naṁa kioṁa malena wetelu, komin naṁa inu na nekila ko otol malena nene e pogos naṁa nemlologon lologena wo pan ko.

²⁰ Ve sanene, sineun nesape okila yuṁaena wo nene van inu naṁa nesuṁa nepiun ke tan ko e kia kiena ne Suṁe. Wolai, visae okila ve sanene, ṁisi na neloge sineu wo sina vaṁisi, naṁa malena wo kiena ne Kristo naga suṁa miyuṁae ke sanene e kieta malena lala.

²¹ Pe nemaraun re naṁa nesiri visena la ne sanene van ko poli, komin naṁa nekilia ruru po rui naṁa ṁisi na ko okila taveve ya naṁa nepiun tan ko. Ee, nekilia ṁena ga nesape pona ṁisi na okila ṁena ga wo laa sane yo, vano taulu kiau naviunena nene.

²² A nesape neviun ke ṁena ga suri taṁena tai tan ko, nesape awis, okila ruru ṁau lele na monena tai e moṁa yuṁa, komin naṁa nesuṁa nekila ke kiau sitomena ṁarera nesape ve ve piavi re, ṁisi na Ntewa naga taṁan inu nowasuṁe ke sina ga neimi pun amiu, sa naṁa amiu asuṁa apiun ke tania e kiamiu leniena lala.

Visena maro kiena ne Pol pa Pilimon

²³ Eṁaṁras nene, naṁa naga ṁena ga imimi lua mesike e yuṁa nakoena e nini vanon Yesu Kristo, naga pisa pisape Ntewa visa ruru ko. ²⁴ A yaru taṁena la nene, Mak, a

Aristakas, a Timas, a Luk, naþa la amiila inu keviu paþisi e yuþaena, la mþena ga apisape la asitoþmal ko ke e kiela leniena lala. ²⁵ A nanagane, kiau leniena sanini, nesape lemamiena kiena ne Suþe Yesu Kristo naga sike e losinemi la punu ga.

Inu, Pol.

M̃aki Naṓa Pa Ke Pan
 LE YU LALA
 Naṓa Amlelaga
 Visayuena Na Tusi Nene

Suniena plas na tusi nini

Yaru naṓa siri m̃aki nini, naga siri pano pa ṓegas tai kiena li nalelagaena lala naṓa asuṃa aṃal ke pog m̃arera lala e kiela maliena, komin yaru la naṓa pe amlelaga re poli asuṃa akawela ke amio la. ṓelaga naṓa yaru la akawela manene amio la sanene, kila sane aṃal m̃arera, a lavis aligan kiela lelagaena e Yesu Kristo. Ana yaru nene pisa panila sape monar asuṃalu m̃arera e kiela lelagaena lala. Naga pisa panila sape Yesu Kristo ga pe yaru wo naṓa pisa meraravan Ntewa pan ita. Ana na visa meraravanen suri nene, naga pisayu suri telu.

Suri na sumo, naga pisayu sape Yesu naga pe narina Ntewa kemua lelaga naṓa suṃa vano vano taṓatete ṓisi pogos tai. Pe lelaga naṓa naga pe narina Ntewa rui, ana naga m̃ena suṃa ṓikeyon kinasinen ṓelaga nene na logearen Ntewa, e sur la naṓa kila naga mloge piowa e tasnena. Ana komin naṓa naga pe narina Ntewa, naga mon la metavan navisawalena lala, pona navisi lala, pona Mosis m̃enaga.

Suri na lua, Ntewa pisawal rui sape Yesu, naga pe ṓarin yaru wa naṓa naga mon manene metava naṓa suṃa vano vano taṓatete ṓisi pogos tai. Naga pe ṓarin yaru wa naṓa taulu make ṓarin yaru wa na sumo lala.

A suri na telu, e yuṃaena kiena Yesu naṓa naga pe ṓarin yaru wa na mon manene metava, naga maren natamaliaen yeririna makega, ṓarplan kiela milamulena viowa lala, kila la pe amarau re si poli, a mla malena naṓa ve uro re panila. Na kuṓaṓaena nasumo lala, la ape totou na kuṓaṓaena ga naṓa Yesu Kristo kila.

E marana na keviu lualima taaga pa taaga, yaru naṓa siri m̃aki nini naga pisayu yaru laṓasa e Tusi Marua naṓa amlelaga m̃arera e Ntewa. A naga pisa pa la naṓa naga siri m̃aki nini panila, sape popon ataveve malena kiena la nene, vena akilia asuṃalu m̃arera silaga, vano vano-o tol luwasnen kiela maliena. A silaga, monar akira avisu Yesu, vena akilia ava awarpoyo e pog m̃arera lala, naṓa asuṃa atol ke e yaru la naṓa asuṃa akila ke m̃arera panila paṓisi. A na kilamakeen kiena visena, naga pis ruru pan kiena yaru lala, pisa panila sape monar avisuar ruru kiela maliena lala.

Komṓasnen tusi la na nini

Visena ṓesa. Kristo kila meraravan Ntewa panita 1:1-3

Kristo naga mon laa metavan navisi lala 1:4—2:18

Kristo naga mon laa metavan Mosis amio Yosua 3:1—4:13

Kristo naga mo laa metavan ṓarin yaru wa lala 4:14—7:28

Naviranarena viu naga mon laa metavan naviranarena marua 8:1—9:28

Kuṓaṓaena naṓa Kristo kila naga mon laa metavan kuṓaṓaena marua lala 10:1-31

ṓelaga na lelagaena naga po paṓisi 11:1—12:29

Visena la naṓa kila yaru la asuṃalu m̃arera, a visena maro 13:1-25

Yesu na mon la metavan li navisawalena lala

¹ Kiau erau le Yu lala, nakonua konua la rui Ntewa pisawal kiena visena yam mokliu pa kieta yermarua lala, e mrapa la moki a e ṓelaga wo la naṓa pepe taṓena, pimi molue kome kiena navisawalena lala. ² Ana nanagane, e legiena maro la naṓa tesike e ne, naga pis memes nena pan ita pimi kome Narina Yesu. Narina ne nane nanua sumo, e nasiien yomarava, Ntewa miyuṃae kome naga, lalua amliganar make pog a yo lala, a siraunia, Ntewa pisirlua Narina nena, mligan sur punu ga sike e limana, naga pe ṓarun la. ³ Narina

nene, naurarena kiena ne Ntewa tego e kiena malena, sane kus nena marana ne Ntewa veraga, pe totou na þelaga kiena ne Ntewa. A nañareraena na kiena visena mñarera paþisi, naga ga þuarar sur make ga na yomarava nini, a yo taþena mñena lala su ruru suña ga. A naga ke narui naga tañan naga pimi kilavan make kieta mlamulen viowa lala, a pogos naþa kila make ruru kiena yuñnaena nene e yomarava nini, þasuþe si pa ma e peni, pa to metava e lepas nen Arimana na þamarua, Þarin Suþe nae ma e peni.

Yesu na mon la metavan navisi lala

⁴ Yesu totano e nene sanene, naga mon manene la metavan navisi la naþa asike ne, komin kia naþa naga þaria vanon kiena yuñnaena, po manene la taulu kiela kia. ⁵ Visae tevisu e Siriena Wa lala, visena moki naþa sike ea naþa asape Ntewa kila Narina mon manene la metavan navisi lala. E visena la ta nene, Ntewa pis pa kiena Navisaarena nena, sape

“Ko na, nepisu sane þane opim ope naruu nenaga, a nepim nepe Arimoña kemua lelaga.” Yauena 2:7

A ta sina pisa mñena sanini, sape

“Yoko in na neim neve Arimana, a yoko naga ve naruu.”

Sam2 7:14

Visena lua nene, Ntewa pe pisa re nena pa kiena navisi la ta poli, sape pe Narina Wa, ana pisa ga pa Yesu. ⁶ A visen si tai, pisayu pogos naþa Ntewa sinenan sape ligana narina mñearu nene imi e yomarava, ana pisape

“Popon navisi make ga alotunia.”

Naw 32:43

⁷ E lepas kiena ne navisi lala, la akila yuñnaena wo la mokliu, ana Visena Wa pisayu la, sape

“Navisi kiena ne Ntewa lala aþar kiena visena, asa ga lagi, amiyuñae kiena ne Ntewa, asa ga kapi.”

Yauena 104:4

⁸ Ana pogos naþa Visena Wa pisayu Narina ne Ntewa, sape naga mon manene la metavan navisi lala, pisayuia sane naga maran taaga sa ke Ntewa, pio naga Ntewa. Pisayu naga, sape

“O Ntewa, kioña lele wa na totanoena naga mon lue ga na mñeke ne. Plaki na kioña nasuþenena, naga þelaga wo ke narui.”

⁹ Ko okekarana manene la þelaga naþa po, ana yepmavin visuen þelaga viowa, ana kioña Ntewa na mava naga mligana ko opa metava, opa manene la metava otaulu kioña erau lala, kila ko okekarana keviu sa naþa miyowauia ruru ko e ponotaninu wo tai.”

Yauena 45:6-7

¹⁰ A e visen si tai, tepisu naþa Ntewa na mava pio Narina sape Suþe, a pisayu pupia sur kerkeviu la naþa naga sii la, sape

“Suþe, ko ke narui ko opisirlua purþes nen yomarava, lumoña ga miyuñnaen sinapane ma metava.”

¹¹ Ana sur la nene, yoko amenunu makea, akokovio, ana yoko ko na osike osike lue.

¹² Sane takue marua tai, yoko osulowar la owar plan la nenaga, a sane moña kulsota marua tai, yoko oyenlua nenaga, ana yoko ko na ove urviu maran ve taaga silaga, a kioña kas la taþatete þisi pogos tai.”

Yauena 102:25-27

¹³ A visen kiena ne Ntewa taþena si sike ga wa, naþa pe pisali re pa navisi tai poli wa, ana pisa ga pa Narina naga taaga, sape

“Ototano e lepasneu na þamarua, otoña sanene, vano-o yoko neligan kioña nasinekar lala aim ave takue na vilanvanen laña ea.”

Yauena 110:1

¹⁴ Nane visena maro e lepas nene narui, naþa pisayu sanape naþa navisi kiena ne Ntewa lala la na amiyuñae kiena ga, la ape ninuna na waren kiena visena, a ape naiila itaena vena tetol natamaliaena, ana yaru tai sike ga wa naga mon metavan la make ga, nane Narina Wa ne nane Yesu, naþa Ntewa pis maro pan ita ea.

¹ Sanene, visena wo lelaga nalologena wo la naþa temloge pa narui, monar tesitom urmi manene e la, monar touarar ruru m̄arera. Visae peraga, tevisuaria saþisi korur yan plan ita si vetania.

² E lepas nen navisaluaena marua nasumo lala, navisi ga la aþar pimi, ana kana visena ne lala amesmes ga, a aþarera paþisi. Ana na kilaroen kana visena make ga, a kana nalogeluen make ga, kana nakoena ruru napo sike þa rui. ³ Ana nanagane, nalologena wo viu pimi tol ita þa rui, a naga keviu taulu manene navisaluaena marua nasumo. Sanene, visae tesitom korenan mrapa na kieta natamaliaena naþa sike ea, yoko taþatete nena toure vetan kana nakoena nena-a þisa. Kieta Suþe ke narui naga kila þesan lologena wo pimi m̄alivi, a la naþa amloge pisawal e kiligala, la apisawal liluen pimi pan ita, akila merarava van ita apisape lelaga. ⁴ A Ntewa m̄ena miila naga e visena nene, naþa naga kila kile lala, a sur nailanen lala, a yuþaena lala na kiena naþareraena, a metavana, naga kiakian plan nalaena lala kiena ne Ninuna Wa pan ita ai naþa naga sitom sape la vania. Ana tepisu sur la nene, tekilia tesape lologena wo kiena ne Yesu Kristo naga pe visena tai naþa naga po manenea taulu kieta navisaluaena marua ita le Yu lala.

Yesu ve Suþe e yomarava naþa yoko imi na wa

⁵ Tekilia tesape Yesu naga mon la metavan navisi lala, komin naþa e lepas na yomarava naþa pimi ke ne, yoko Ntewa taþatete ligan navisi la ave suþenia, ana mligan sike vatanon Narina. ⁶ Sur nene Tus Marua m̄ena pisa, e visen tai kiena ne Þarin Suþe Tepet naþa pisa pa Ntewa, sape

“?Sur wo ya na sike e yaru, naþa kila ositom manene naga sanene?

?Pona ya ne kila oþalivi ke e narina ne yeririna?

⁷ *Nanua, omligan naga sike tanon navisi lala, ana nanene na yam plas la ga,*

a nanagane, opisirlua si naga rui. Omligan naga metava e yo wo tai amio kana pupia naurarena a nawarwarena nena,

⁸ *ana omligan sur make ga sike vatanon kiena naþareraena.”*

Yauena 8:4-6

Ana pogos naþa Ntewa kila yaru ve þarun sur make ga, kila sane pe sur re nena tai naþa naga pe pe suþen re poli. Naga kila sane sape ve sanene, ana pimi tol nanagane, pe tepisu make re sur la e yomarava nini poli wa e kilamarata pa mapin sa naþa Ntewa sinenania. ⁹ Sur la pere wa, ana silaga tekira tepisu ga Yesu, naþa Ntewa pisirlua naga pa mon manene la metava. Nanua sumo Ntewa sinen miye ita paþisi, ana kila Yesu pito tano yam plas la ga, kila naga patanon navisi lala, a kila naga þar manene pupia naloge viowaena na namarewoitaena, ana siraunia, pisirlua sina, paia ruruia amio naurarena nae peni.

Yesu pe kieta natamaliaena, pe kieta þarin yar wa

¹⁰ Þelaga na yuþaena kiena ne Ntewa na tamaliaitaena nene naga mesmesu, komin naga sii sur make ga, a sur make ga pe naga kiena, ana sinenan sape taulu maran si pupia þegas nen narina la tai vetan yomarava nini, aim si ave kiena. Naga sinenan sape kila sanene, ana nakilaena na m̄arera paþisi, ana m̄al mrapa taaga ga nakilaena, naga sanini: mrapa naloge viowaena kiena ne Yesu, naþa Ntewa kila ga naga pimi pe yeririna, naga pe yar natepoen yoþarua vena taulu kieta natamaliaena. ¹¹ Yesu kilia sumon ita sanene komin naga ke narui naþa kila ita temekiki, kila narui naga kekarana naþa pisu ita sane tepe mratava taaga ga temio. ¹² Visena telu e lepas nene apisa sanini. Tai sike e tus kiena ne Yauena lala, sane Yesu pis pa Ntewa, sape

“Yoko nevisawal ruru kioþa kia va wolai lala, yoko neieluar ko likan yeririna lala.”

Yauena

22:22

¹³ Ta sina, pisawal naþa Yesu mlelaga e Ntewa sa ke naþa temlelaga e naga, visena naþa sike e tus kiena ne Navisawalena Aisea, sape

“In ke narui, naþa kiau nawasineena, nemligan sike e naga.”

Ais 8:17

Namaro, visena si tai kiena ne Aisea, pisayu Yesu amio wenla lala, sape

“Nane in ke nane nesike nini narui, nemio narina ne Ntewa taþena lala naþa naga mligan la e luþau.”

Ais 8:18

¹⁴ Ana ita narina ne Ntewa la nini, ita make ga tepe yeririna, temio tasneta a kata kuruta, ana naþa Yesu imi ve wenla kemua lelaga e ita, naga pimi e yomarava nini, naga tasnena a kana kuruta sa ke ga ita. Sanene, pogos naþa taþan si naga mare wo ita, ana kiena marena nene m̃elua puryukawaena kiena ne þarin suþe na m̃areraena na marena, nane Yermare. ¹⁵ Naga m̃elua m̃areraena kiena ne Yermare, mluþar plan kilika lala naþa aþanaria kararkare ruru ita nenaga, sane maraunen marena naþa temloge viowagania e kieta malena wetelu. ¹⁶ Lelaga naþane, yuþnaena wo na iilaena kiena ne Yesu, pe kila re pa navisi nae ma e peni la poli, ana kila ke ga pan ita na yomarava nini. Visena la mokliu apisa visena sanini, asape

“Naga suþna miila ruru ke lus kiena ne yermarua Epraam lala.”

Ais 41:8-9

¹⁷ Nane sitomena kiena ne Ntewa sanene. Naga pisu sane Yesu monar imi sane ita wenla lala e sur make ga, vano-o kilia kilia ruru ita, kilia sinen ye ita. Ana tekilia towasinea, sa naþa yoko naga masisun yuþnaena naþa yoko naga kila va Ntewa komin kieta mlamulen viowa lala, naþa kila kieta marawo temio Ntewa, sane pe kieta Þarin Yar Wa. ¹⁸ Naga pisu pupia nakilaliena pimi m̃alivin kiena malena, mloge piowagan pano-o tauluia, ana kila naga kilia iila ruru ita sina e pogos naþa nakilaliena imi m̃arera m̃ena ga van ita.

3

Yesu mon la metavan yermarua Mosis

¹ Wolai a vineu wa lala, naþa amlogear navioena nae peni rui, nepisa pan amiu rui nesape Yesu kilia iila ruru ita, ana nenagane noþareran amiu, sineun nesape popon asitomyu manene naga va laa sane wa, sane naga pe nalologena a naga pe þarin yar wa na kieta nalelagaena. ² Tevisu veve ruru li Yesu amio yermarua Mosis nanua. Yermarua Mosis nanua sumo, naga masisun kiena yuþnaena la paþisi e mratava m̃ana ne Ntewa, a Yesu m̃ena masisun yuþnaena la paþisi naþa Ntewa pisirlua naga sape naga yuþnaenia. ³ La ga luwoka amasisun yuþnaena, ana Ntewa pisirlua Yesu pa manene la metavan Mosis, komin naþa sane Mosis naga sike ga loyuþna m̃ana ne Ntewa, kila ke kana narin yuþnaena ne lala, ana pupia yuþnaena na visirluaen yuþna nena, Yesu ga kila.

⁴ Yuþna make ga, monar yar tai naþa yuþnaenia, ana Yesu ke narui naga miyuþnaen yuþna m̃ana Ntewa, ana Ntewa naga pe þarun yuþnaena nene. ⁵ Sanene, Mosis naga pe yar na yuþnaena, masisun ruru kiena yuþnaena make ga loyuþna e mratava m̃ana Ntewa, pano tol naþa naga pe yar na visawalen pupia visen kiena ne Ntewa lala naþa apisawal liluen ke pimi tol nanagane, ⁶ ana Kristo naga kila pa manene la sane, komin naga masisun visuaren pupia yuþnaena make ga na yuþna nene, sane naga pe m̃earu na pupia kana þar nena.

?A yuþna nene na pisa ke ya ne, pona pisa ke ai? Suþna pisa ita ke ga ne, komin visae ve temarau re, a visae tekekarana kiena navisaaren lala, touarar ruru kieta nawasineena e la, ita teve kiena namratava wa ruru nena lala.

Yesu mon la metavan Mosis, a monar telelaga manene va la sane taulu la naþa Mosis sumon la

⁷ Visena ta teke e Siriena Wa, naþa pe visena kiena ne Ninuna Wa na kilaþege itaena, naþa pisa sanini, sape

“Þane, visae aloge pulgon Ntewa,

⁸ pe pon re si kiamiu sitomena la imi si m̃arera poli, sa naþa kiamiu yermarua la akila rui.

Nanua sumo, e yomema, asike e pog na kilalien tai paþisi, asuþna pano-o asuþnal ke sina ga akila þarila.

⁹ Ana Ntewa pisu la, pisa sanini, sape

Nayalena kena la nene naþa tol kas lualima yam vari ne, nesike nemio la silaga, apisu kiau naiilaena wo la pan la, ana þelaga kien la nene na kilali in paþisi.

¹⁰ Kiela þarmarera kila sineu pikirara paþisi, ana nepisu sane peraga, la nene na, silaga asuþna apa e nene apa e nene amiyepe ke petan kiau mrapa mesmes lala.

¹¹ *Sineu maren la ne sanene narui, sineu kar la paḡisi, ana nesuḡalu narui, nepisaar pan la nesape purvanua wo navaruruena naḡa nekila ruru suḡate la nesape ve kiela, yoko ve ava re si loyuḡa ea.*” *Yauena 95:7-11*

¹² Wolai a vineu lala, komin sur ne la nanene, popon kam na avisuar ruru amiu. Pe pon re visae amiu yar tai, sitomen viowa sike e naga, pona sinena ve lelaga re si narui, kila naḡa naga werelua si naga vetan malena wo kiena ne Ntewa mali. ¹³ Pe sinetan re ita yar tai loru sanene poli, ana monar tela visena naiilaaren van ita silaga e legiena punu ga, vena ve ita yar re tai naḡa ḡelaga na mlamulen viowa la visa kotalia kare re naga vano-o naga manin nenaga. Visena naḡa meta ne sape “ḡane, visae aloge pulgon Ntewa,” ana naga pe visena nasumo tai, ana suḡal suḡa ga, pulgona pio ke na wa, tesike e kana legiena na logearen la na wa. ¹⁴ Popon touarar kieta lelagaena ḡarera ve sa nena ga naḡa temlelaga ḡesan ea, popon tesuḡal ḡarera tesuḡa vano-o tol luasa. Ana visae tekila ve sanene, yoko temio Kristo, teve yar na war viraviranen naurarena wo lala kiena ne Ntewa. ¹⁵ Lelaga naḡane-e, Visena Wa naḡa metava pisa sanene, sape pe pon re si sinemiu la im ḡarera poli, sa naḡa yermarua lala akila e pogos na kilaliena lala e yomema, naḡa asuḡalu akawe visena kiena Mosis.

¹⁶ ?Ana la ne akila ḡar ḡarera sanene, a la nene? La naḡa akila sanene, la naḡa akekaran amlogear ḡesan pulgona Ntewa, ḡis narui apatanon kiela yar keviu yerkawa Mosis, naga sumon la apetan Isip. Naga sumon la amolue petan yo nene ana pe yam piavi re poli, akawe ke sina naga. ¹⁷ ?A la naḡa akilali Ntewa, amiyuyur sinena e kas lualima yam vari nene e kiela nayalorena, pano-o sinen kar manene la la, la ke nene na wa? Ee, la naḡa akila sanene, la ke ga nene na wa, naḡa naga tamalia la, ana siraunia akila luen ga mlamulena piowa e marana, pano naga kila amarmare ga, puryula la sutetai kar ga sike e yomema. ¹⁸ ?A la naḡa naga pisaar sape yoko la taḡatete ava loyuḡa e kiena purvanua wo tanea navaruruena naḡa kila ruru sape ve kiela, la ape yeririna la ne sanape? La naḡa taḡatete ava ea, naga la naḡa akilakila ke ḡarila, naḡa pe amlogear re sur ta poli. ¹⁹ ?A ya ne kila narui taḡatete ava loyuḡa e yo wo na varuruena nene? Taḡatete avavini vanon pe amlelaga re e Ntewa poli, a pe aḡasine re naga poli.

4

Navaruruena wa kiena ne yeririna lala kiena ne Ntewa

¹ Nanua sumo, Ntewa kila ruru tanea yo na varuruena tai kiena ne kieta yermarua lala, ana nanagane ḡena ga kila ruru si kieta yo wo na varuruen rui. Nasiiena tere nene naga mal ruru ga sike na wa, ana pe pon re teve sa yermarua la nene poli, naḡa akilalu kiela navaruruena nene, la moki naḡa pe apa re loyuḡa e poli. Peraga, popon ita tevisu ruru ita yo, pe pon re naḡa vano-o ḡisi na ita laḡasa, la ḡena akilalu kiela pulmas, Ntewa visu veve ruru la sa ḡisi ve ava atol re kiela navaruruena. ² Naga nene komin naḡa ita maran taaga ga sane yermarua la nene, naḡa lologena wo kiena ne Ntewa tol ita, sa naḡa tol la, ana akila sa naḡa amloge, ana pe amla re si lelagaena to metavan poli. Pe amla ruru re si kana visena la nene e kiela malena la poli, ḡisi pe ḡar re mras e la poli. ³ Ana e lepas kiena ne la nini naḡa pe amlelaga re sanene poli, Ntewa pis ḡarera rui, pisa visena naḡa nesiri metava yam tai rui. Visena nene, pisape

“La nene akila sineu kar la paḡisi,

ana nepisaar nesape yoko la taḡatete akilia atol kiau navaruruena nene.”

Yauena 95:11

Ana ita naḡa temlelaga kemua e lelaga, navaruruena nene naga pe kieta naḡa teva loyuḡa ea.

Navaruruena kiena ne Ntewa nene, naga kila ruru pe kieta su nakonua rui, komin e pogos nasiiena, naga miyuḡae pano-o tol kana legiena orai ana ḡisi nena ga, ⁴ ana sa naḡa Visena Wa pisa e yo laḡasa, sape e kana legiena olua, naga pa ruru e kiena yuḡaena ne lala, pe miyuḡaen re si sur la nene poli.

⁵ Ana sur si tai, visena na metava pisayu naḡa Ntewa pisape yoko yar laḡasa taḡatete nena atol kiena navaruruena, ⁶ ana visena nene kila meraravan sape sane monar yar

si laḡas asike koyo tai naḡa yoko Ntewa taḡan la ava loyuḡa. La nanua sumo, amloge lologena wo kiena ne Ntewa amio purvanua wo naḡa pisaar pisape ve kiela, ana pe asuḡal re ḡarera poli, pe amlogear re poli, ana akila pal ruru nena ga, pe apa re loyuḡa e poli. ⁷ Ana kieta navaruruena sike na wa sike ne, a Ntewa pisaar kana legiena na tolena, komin kas mok ḡaro rui, ḡarin Suḡe Tepet pisawal visena la naḡa sike meta rui, naḡa pisa sanini sape

“Nanagane visae aloge pulgona, pe pon re kiamiu sitomena la imi ḡarera si poli.” Yauena 95:7,8

Popon tevisu kilale sane “nanagane” naḡa pisa e nini, nane kieta pogos ne nanini narui, naḡa Ntewa kila ruruia vena tetol natamaliaena. ⁸ Asitomyuli yermarua Yosua nanua. Naga sumon kieta yermarua la komḡasa apa loyuḡa e purvanua wo naḡa Ntewa pisaaria, ana visae naga ke narui navaruruena kiena ne Ntewa naḡa akus rui, yoko Ntewa taḡatete si visayu pogos taḡena tai va Tepet, visave pe legiena na vaen loyuḡa e kiena navaruruena. ⁹ Ana peraga, naga suḡa pisa ke pisape navaruruena wa nowo tai sike ga wa kiena ne kiena yeririna lala, ¹⁰ ana visae a naḡa va loyuḡa ea, yoko wo naḡa wo vana vaḡisi, yoko naga kilia va ruru e kiena yuḡaena make ga, sa ke ga naḡa Ntewa ḡena pa ruru e kiena.

¹¹ Visae sanene, popon toḡareran li naḡa tetol navaruruena wa nowo nene, ana pe pon re ḡena ita yar tai ve logear re Ntewa, yoko kilapalia.

Visena kiena ne Ntewa po paḡisi

¹² Tesike vatanon visena kiena ne Ntewa, vanon kiena visena naga mali, miyuḡae ke ḡarera paḡisi, kilia yur malena kien yaru, mal paḡisi taulu playu na mara naḡa mal lepas luwoka. Visena kiena ne Ntewa kilia va warpoyo va loyuḡa e losineta, kilia va liḡere sur ya naḡa teke e kieta sitomena, pona visuveve ya naḡa teke e ninuta. ¹³ Lelaga, naga naḡa yoko visuveve kieta malena, kilamarana tol make suria, taḡatete ita yar tai tapolounia.

Yesu pe kieta ḡarin yaru wa

¹⁴ Ntewa kilia make sur la ne lepas na e ita, ana potena pania naḡa narina, pupia ḡarin kieta yaru wa naḡa Yesu, naga mligan yo nini pa yalen silau ma e kiena yo ma metava e peni, pa kila ruru si mara wo pan Ntewa vanon ita. Ana vanon naḡa kila ruru ita ke temio Ntewa sanene, popon touarar nalelagaena ḡarera ea, a popon ve teligan li re si naga pogos tai. ¹⁵ Kieta ḡarin yar wa nene, naga pe yar ta naḡa pe mninue re kieta ursuen la poli, ana kilia ruru po paḡisi naḡa ita pe tesuḡal re ḡarera poli. Naga sinen miye ita, yoko iila ita, komin nanua naga ḡena ga, nataḡaliena lala apim ke e naga ḡarera paḡisi pania e lepas punu ga, sa ke ga naḡa apim ke e ita. Naga sa ga ita, ana sur ga tai, nataḡaliena pe ḡere re nena naga mloru e mlamulena viowa poli. ¹⁶ Visae ve sanene, tepisu sane toḡal kieta mrapa narui vena tekilali naḡa telen ita teva la lavis pun lele natotanoena wa kiena ne Ntewa, naḡa pe purḡes nen lemamiena. Ve temarau re sina, tekekarana naḡa teim puna Ntewa, ana yoko tekilia tetol kiena sineyeena e kieta malena, yoko tevisu naḡa kiena nasinewoena iila ita e pog ḡarera ya naḡa tesike ea.

5

Yesu pe ḡarin yar wa na sineyeen yar lala

¹ La naḡa apuarar yuḡaena na ḡarin yar wa, apisiriplan la petan li wa taḡena lala vena kilaen yuḡaena na sanene narui. Yaru naḡa pe ḡarin yaru wa, naga suḡalu su likan yeririna lala a Ntewa, vena waren kiela nalaena lala amio nakuḡaḡaena lala vania, vena naga kilia viewo kiela mlamulena viowa lala. ² ḡarin yaru wa nene pisu kilale ruru naḡa yar la asuḡa amiyuḡae piowa ga, asuḡa amiyepe ga petan mrapa, komin naḡa naga ḡena pe kumpui ga, naga ḡena kilia malum, kila sane sinena kilia ye ruru nena yeririna taḡena lala, naga moḡau ruru nena pan la. ³ Naga sa ga yeririna taḡena lala, ana pogos naḡa kila nakuḡaḡaena lala, monar kila ve vanon re ga mlamulena kiena ne yeririna lala, ana vanon ḡena kiena mlamulena viowa lala. ⁴ Komin sur ne nanene, pe pon re yar tai ligana si naga poli visave popon imi ve ḡarin yaru wa, ana Ntewa ga kilia ligana yaru

vena war pupia kia na sanene, sa naña naga mliganar yermarua Eron nanua sumo pe kieta þarin yaru wa þesa.

⁵ A e lepas kiena Kristo, sa ke mēna nene. Naga pe kieta pupia þarin yaru wa, ana naga pe pisirlua re naga pa metava sape naga sanene poli, ana Ntewa ga pisirlua naga. Visena kiena ne Ntewa naña pisa sanene sike e nasiriena wa na sumo lala, naña ta pisa sanini, sape

“Ko na nepisu sane þane opim ope naruu nenaga, a in na nepim nepe arimoña kemua lelaga.”
Yauena 2:7

⁶ Taþena, pisa sanini, sape

“In na nemligan ko sane yermarua Malkusteke, ko na yaru wa maro e kiena lus, naña yoko ouarar ma yuñāena nene vano-o ve uro re.”
Yauena 110:4

⁷ Ntewa mligan yuñāena nene pa Yesu, ana tepisu e pogos na kiena malena e yomarava nini, naga kila ke pa rui. Sila ga naga sitom manene yomarava nini paþisi, ana tagin pa Ntewa, wamarana mlau vanonia. Naga suñalar mārera sike e Ntewa sape visae kiena malena kovio, yoko Ntewa kila malia sina, ana naga māreran la sane naña mlenwo itania.

Ana Ntewa pisu þelaga wo na moñauena a navatanoena kiena ne Yesu, ana sinena myea, mloge kiena naviunena lala. ⁸ Lelaga naña Yesu naga pe narina ne Ntewa rui, ana Ntewa tañan naloge viowaena na pogos mārera lala pimi pania, sape vian Yesu vena tol ruru þelaga na logearena e kiena malena. ⁹⁻¹⁰ Naga patanon make nasinenanena lala kiena ne arimana, pano-o kila make yuñāena la naña Ntewa mla pania, kila narui pisirlua naga sane yermarua Malkusteke. Sanene, Yesu pimi pe Ntewa kiena þarin yaru wa, pim pe purþes nen malena naña ve uro re kieta ita punu ga naña temlogearia.

Popon teimi temarua ruru wo e Kristo

¹¹ Ana kia naña Malkusteke, kiena suniena marua wo la sike ne, naña akilia akila meraravan ruru van amiu sanape e yar nene amio kiena yuñāena. Māreran navisayu ruruen merarava van amiu, komin naña yam tai sa naña kiligamiu poþe towe la sane. Ana visae kam na asitom asape aloge kilalelia, ¹² yoko wo vaþisi, komin naña kam na amlelaga nakonua rui, ana atorokin naña aim ave navianena na visena wa kiena ne Ntewa rui. Ana peraga, asuñā ga sa ga nene, ana monar avian amiu si ea, siar si e kana purþes nen visena ne lala.

!Lelaga naña, kam na nakanen kinanen mārera la rui, ana sa ga naña asuñā sinemiun ke amun yu na wa! ¹³ La naña amun ke yu sanene wa ape sisi ke ga wa, ana taþatete ave manmarua e visena na mrapa lelaga, ¹⁴ ana la naña akan ke kinanen mārera, la amarua ruru rui. La ne sanene, kiela sitomena la miyuñāe ruru pano-o apisu veve ruru make sur punu ga, ana akapur apimi po tol naña apisu kilale ruru sur ya naña po a sur ya naña piowa.

6

Popon tevisuar ita ve towasuþe re si teva varau

¹ Komin sitomena la nene, popon teligan þelaga na sisi sike na, teva re laa sane wa e navianena mārera kiena ne Kristo na atorokin sitomena naña marua.

Tepilopu ita e kieta yuñāena piowa namarena la rui, tetol naviawaena e Ntewa rui, ana popon ve tesuñā teva re si ea. Naga sa naña tekilavan lelen yuñā rui, pe pogos na visirluaen narui. ² Apian ita e nakeena rui, apu þarita rui, temlelaga rui tesape yoko tesuñā si e marena, a tekilia rui naliþereena ta sike ne amio kana nakoena nena naña yar viowa la akus vano-o taþatete þisi pogos tai. Sur la nene toþaro make e rui, ana pe pon re tesuñā teteteliv mēga e sur la nene silaga poli, ana popon tesuñā teva re laa sane temio kieta Suþe. ³ Sur nene mārera paþisi, ana visae Ntewa tañan ga van ita, yoko tekilia teyuñāen wo ga. ⁴ Lelaga, yoko tekilali naña teva re laa ga wa temio naga silaga, ana sanapen la naña amloru, apa si varau rui?

La nene, la amial ruru ðes e yomerarava asuñna akinan ke e lokove nae ma e peni rui, a Ninuna Wa pimi ñena e la, a pogos naña apa si apiowa sanene, yoko taþatete si avilopu la awasuþe aim e malena. ⁵ Visena Wa kiena ne Ntewa miila la e kiela malena rui, a atol towe ña nañareraena na suþenena naña pimi ke ne, ⁶ ana pogos naña apilopu si ñasila, akila þarila sanene, yoko aim awo si sanape? Peraga, yoko viowa van la vaþisi, komin naña akila ke sane asuar ke si Narina ne Ntewa meta e lak torovia, sa naña asuñna apisirilua ke naga e maran yar lala vena aviuelin kare si kiena kia.

⁷ Asitomyuli na nene. Porotano naña mun yua naña mloloru ea, ana þar manene kinanen kan la naña amiyuñae ke ea, ana Ntewa kekaran paþisi, kiena navisa ruruena sike ea. ⁸ Ana porotano naña pe þar re sur wo poli, þar ga viluñini viowa lala, naga sa ga naña apiain ga maren pania, ana taþatete akila sur wo ta ea, yoko asikap ga narui.

⁹ Erau lala lelaga paþisi, visena la ne sanene añarera paþisi, ana e lepas na pun amiu, in na pe nesitom re nesape kam na sanene poli. Peraga, noþasine amiu, sane mras nen malena viu naña po kapuru ke e amiu na wa. ¹⁰ In na nemlelaga nesape yoko taþatete Ntewa sinen þesan kiamiu yuñnaena wo lala, a yoko taþatete sitom korenan vinayaena a sineyeena naña kam na akila pania, pogos naña kam na amiila kiena nalelagaena wa taþena lala. Kam na amiyuñae po sanene, ana kila Ntewa kekaran paþisi, yoko naga ñena kila ruruia a kila wo van amiu.

¹¹ Sanene, nesape neiilaar amiu sina, vena ve ava re si varau, kam na añareran ava re laa ga wa, ava ñaga atol ga luas rui, vena akilia atol sur punu ga naña kiamiu sitomena sike ea. ¹² Kam na ve ave yowen re, ve yepemiu malum re, ana monar avesinaia e yuñnaena maran ve taaga sa ke kieta yermarua wo la naña amasusun ruru yuñnaena, kiela sitomena la piyavi pano-o atol sur punu ga la naña Ntewa pisaar þesan pan la.

Visaarena kiena ne Ntewa pe lelaga paþisi

¹³ Navisaarena ta naña Ntewa kila, naga kila pa yermarua Epraam, pisaar ñarera pania e lepas na lus la naña yoko amolue raunia. Pe kia taþena re si naña Ntewa kilia visa vena kila kiena navisaarena nene ñarera poli, komin kiena kia naga mon metavan make kia taþena lala, ana Ntewa pisaar ke sina e ga e kiena kia, sape

¹⁴ *“In na Ntewa, yoko nevisa ruru ko ve keviu vaþisi, nekila kioñna lus la aim ave moki vaþisi e yomarava nini.”*

¹⁵ Ana Epraam lavisi sitom þele visena nene, ana pisu naña Ntewa kila kiena navisaarena nene ñarera ruru po paþisi, ana pe sur koren ga naña Epraam tol pogos ñarera la mok paþisi, ana pe mligan re navisaarena nene poli, þuarar ruru ña pano-o pisu naña siar tol ya naña Ntewa pisaar pania.

¹⁶ E lepas na þelaga nakilaen navisaarena ñarera, yar la asuñna apisa kia kiena yar wa tai pona sur wa tai. Ana pogos naña yar taþena la aloge, la monar alelaga ea, taþatete si avisin sinekar vania, komin kia naña apisa kila visena ñarera.

¹⁷ Ana sanapen Ntewa? Naga ñena sinenan sape kila kiena visena van ita ñarera ruruia, vena telelaga ea, ve tesitom þele re. Ita na sane narina lala na waren kiena lalimana, ana naga sinenan sape tekiliaar ruru tesape kiena sitomena wo naña teke e ita taþatete þisi pogos tai, ana kila kiena navisaarena pan ita ñarera paþisi.

¹⁸ Navisaarena kiena ne Ntewa naña pan ita ñarera ruru sanene rui, komin naga pe pisokan li re poglis tai poli wa, kiena visena taþatete vilovilopu karea, ana metavan kiena navisaaren nene, pisa si amio kiena kia wa, vena kilaen kiena visena nene ñarera nenaga. Ana sur lua nene, kiena navisaarena amio kiena kia, lalua amiyuñae lele taaga vena kila ita tesuñal ñarera tese kiena visena. Ita topur matan yo viowa naña tesu þes ea, takalewele ke yo na suvanena, ana navisaarena lala kiena ne Ntewa akila kieta sitomena la piyavi ruru po. Sanene yoko tekilia teva tetol ruru yo wo naña Ntewa kila ruruia a mligan sike e marata woga ga naña.

¹⁹ Kieta nalelagaena ñarera nene, naña tesape yoko Yesu tamalia ita, naga sitomen ta naña sane kilavaru na tararen waa. Yoko uarar ruru kieta malena, vena ve sur re si ta naña kilia werelua ita, vano-o tol pogos naña teva varaun pupia kulmrae loyuñna e Yo Wa

naþa pe Yo Wa paþisi. E yo nene teva tesuñal nena tese marana ne Ntewa, yoko kieta sitomena lala akilia añarera ruru ke na wa asape woga ga van ita.

²⁰ Naga nene komin naþa Yesu sumon ita pa e yo wa nene rui, pa kila kiena yuñnaena sane kieta þarin yar wa, vena kila kieta mara wo temio Ntewa.

Sa naþa tepisa rui, naga sane pe þarin yar wa maro na lus kiena ne yermarua yaru wa Malkusteke, ana naga pul plan kieta mlamulen viowa la rui, a yoko kila ña kiena yuñnaena na sanene vanon ita vano-o taþatete þisi pogos tai.

7

Malkusteke na sumo naga mon la metavan make þarin yar wa taþena lala

¹ ?Ana yermarua Malkusteke nene, naga ai, a kana suniena naga pa sanape? Tus naþa Nasiarena pisayuia, pisape naga pe yar na pogos kiena ne Epraam nanua sumo, pe þarin suþe na kumali marua wa naþa Salem, a naga pe pupia yar wa kiena ne Ntewa na mava. Ana pogos tai, yermarua Epraam pa kila mara pa kiena nasinekar lala, naþa þarin suþe taþena lala, ana taulu la, þasuþe ke si narui, pitawe Malkusteke kinae patanonia, ana Malkusteke pisa ruruia. ² Ana Epraam mla nalaena pania, mlalua lualima petan ponotia na sur make la naþa taulu e pogos na mara naþa þarar ke sape wasuþe si va ñana. Pupia yar wa nene naga pe yar tai, sa naþa kiena kia ga luwoka apisa. Kiena kia þes nena, Malkusteke, kana kinasa pisape “Þarin suþe na mesmesu,” a kiena kia na lua pisa sanini, sape “Þarin suþe na suñare,” komin naga pe þarin suþe nae pulkumali naþa Salem, naþa kana kinasnena na suñare. ³ Yar nene, kana suniena nena pe taþena ga, komin naþa pe temloge re apisape kiena yermarua lalua na sanape, pona aña repina lala la ape lus nae pe wa. La pe apisawal re kiena maliena poli asape aña siar sanape, a pe suniena na kiena marena re poli. !Sa naþa naga pe mare re nena poli, suña þuarar ke kiena yuñnaena na wa! Sanene, naga sa ga narina ga Ntewa narui, naþa yoko naga ve kieta yar wa ña vano-o taþatete þisi pog tai. ⁴ Komin sur la nene, tepisu e visena marua kiena ne Ntewa naþa kia na Malkusteke, naga pe kia tai naþa pa metava paþisi, pano-o tol repita yermarua Epraam, naþa asitom ke asape naga mon la metava rui, naga ñena patanonia, þar nawaren pania e komþas nen sur la naþa taulu e mara.

⁵ Ana þelaga na laen nawarena na sanene, naga þelaga ta naþa navisaluena pisape le Israel lala la monar akila luen ga. Kiela yar wa lala na lus kiena ne Livae, la monar avisuar ruru la, awarplan lualima petan ponotia e kiela sur make ga van la, komin la na sa ga namratava taaga, naþa ape lus kiena ne Epraam. ⁶ Ana Malkusteke nene, naga pe nae re mratava puna ne yermarua Epraam poli, ana Epraam pisu kilalea sape naga yaru wa tai, mliþere nawarena komþas pania. Yermarua Epraam nena naþa Ntewa pisaar sur wo la pania, ana naga patanon Malkusteke.

Ana pogos naþa Malkusteke tol nalaena nene, kekara, pisa ruru Epraam, a nanene kila meraravan si pan ita sane naga mon manene la metavana, ⁷ komin yar naþa torokin visa ruru yar taþena, naga monar mon laa metavan yar nene. ⁸ Ana Malkusteke amio yar wa taþena la nene, la make ga atol kiela nalaen la torok ga, ana la ape taþenan sur tai. Suri nene sanene, sape yaru wa lala aþar kiela, ana siraunia amarmare, ana Malkusteke mla kiena, asape naga suña pano-o pe mare re poli. ⁹ Ana sanaþa Malkusteke mon la metavan yermarua Epraam, naga mon ñena metavan pupia kia taþena naþa Livae. Lelaga kemua, Livae naga þesan naþa pe repina ne lus kiena ne yaru wa lala, ana naga ñena ga molue kome lus kiena ne Epraam, ana pogos naþa Epraam patanon Malkusteke, mla nalaena pania, sa ga naþa Livae ñena patanon Malkusteke mla nalaena pania. ¹⁰ Suri nene naga sane pogos naþa Epraam ñalivin Malkusteke, kila pania, Livae pe paeme re e repina nene poli wa, ana sa ga naþa naga ñena kila.

Yesu pe molue re e lus kiena ne yaru wa la poli, ana molue ga kome lus viu tai

¹¹ Ana visena la ne ma metava apisawal ke pupia sur ta ne paþisi. Akila meraravan asape Ntewa þere plan lus na yaru wa lala kiena ne Livae, pisirilua lus taþena tai kiena

ne yar wa lala, kus lelana. Yermarua Eron mēna pisirlua yuṁaena na lus kiena ne yar wa lala, ana Mosis p̄ar kiena navisaluaena nene pimi ṁalivi, ana visae Ntewa visu sane sur lua nene torokin kila ita temesmes ruru nena temio, vera na ligana suṁa ga. Ana peraga, naga pilopuia, mligan si p̄arin yar wa viu tai pimi ṁalivin ita, naṁa pe lus kiena ne yermarua taṁena nene Malkusteke. ¹² Ana komin Ntewa pisirilua p̄arin yar wa viu nene, mesmesun mēna naṁa visirlua kana navisaluaena viu tai. ¹³ Monar ve sanene, komin e nene naga pisayu kieta Suṁe, naṁa naga ṁalivi e lus ta naṁa pe la re nena ta suṁal se wonta ana kila yuṁaena kiena ne yar wa poli. ¹⁴ Lus naṁa Yesu ṁalivi ea, tekilia tesape naga lus nae Suta, ana pogos naṁa Mosis pisawal kia kiena ne lus kiena ne yar wa lala, naga pe pisawal re nena kia naṁa Suta poli.

¹⁵ Ana lus na yar wa taṁena lala suṁa ga, naṁa Yesu molue komea, nane lus kiena ne Malkusteke naṁa tepisasa ke narui. Sur ne nane kila narui tepisu sane Yesu pe sa re yar wa taṁena la poli, ana naga sa nena Malkusteke ne narui. ¹⁶ Taṁena la nene, apim ape yar wa komin ga naṁa sane ape kana lus na kuruta mal nene, sa naṁa navisaluaena marua pisa, ana Yesu pimi pe kieta p̄arin yar wa e pupia naṁareraena na kiena malena naṁa taṁatete akila karea, naṁa sike sike lue narui. ¹⁷ Tekilia tesape naga su lue sanene, komin naṁa visena kiena ne Ntewa pisa rui, naṁa sape

“In na nemligan ko sane yermarua Malkusteke, ko ope yar wa maro na kiena lusa, naṁa yoko ouarar yuṁaena vano-o taṁatete p̄isi pogos tai.” Yauena 110:4

¹⁸ E nene, pimi merarava ruru pan ita sane Ntewa pilopu kiena mrapa na yuṁaena. Mrapa marua naga navisaluaena kiena Mosis na sumo, naṁa suṁal sukaṁar paṁisi, ana sa naṁa kiena naṁareraena naga pe torokin re kila sur wo ta van ita poli. ¹⁹ Naga kila p̄ele yon naṁa kila mesmesun ruru ita, ana Ntewa mligan mrapa marua nena sike ga narui, kila si sitomen viu ta pa metava, kus lelana. Mrapa viu nane tekilia telelaga ṁarera tesape naga pe mrapa namalena naṁa pe lelaga, naṁa kilia sumon ita teim lavisin Ntewa.

²⁰ Ana mrapa viu nena, navisaarena kiena ne Ntewa tai kilarar suṁalar ṁarera su lue na sike ne. Yar wa taṁena na sumo lala, poglis naṁa apuarar p̄arila, amiyawawo la vanon kiela yuṁaena, pe navisaarena re tai sanene poli. ²¹ Ana pogos naṁa Ntewa pisirlua Yesu pimi pe kieta p̄arin yar wa, kila amio kiena navisaarena ṁarera tai. Naga sa naṁa visena tai na Tus na Yauena Wa Lala pisa, naṁa sape

“Ntewa pisaar ṁarera rui, ana taṁatete si vilopu kiena visena nene, visave

‘Ko na yoko ouarar yuṁaena sa naṁa p̄arin yar wa kiena ne kiau yeririna lala, vano-o taṁatete oṁisin pogos tai.’” Yauena 110:4

²² Ana Yesu p̄uarar ruru kiena yuṁaena nena sanene, pe kile na naviranarena viu kiena ne Ntewa amio ita, naṁa po manene la taulu na sumo, a pe nasiaren suri la naṁa Ntewa pisaaria pan ita, yoko kila make ruru nena van ita sirau.

²³ Nanua sumo na yar wa la moki, komin naṁa ta miyuṁae pano-o kovio, taṁena kus lelana, miyuṁae ṁa pano-o, naga mēna kovio, la akilakila sanene. La taṁatete asu lue, ²⁴ ana Yesu, naga yoko su lue ga narui, ana yoko naga taaga ga uarar kiena yuṁaena sa naṁa kieta p̄arin yaru wa vano-o taṁatete p̄isi pog tai. ²⁵ Sanene, naga sike ga e marana ne Ntewa silaga, mlen lue ga pania vanon ita, ana kila sane ita nanagane, pona ita la naṁa tepim ke rau wa, ana naga ke narui naṁa yoko tamalia make ruru ita punu ga naṁa teva tokom puna teim lavisin Ntewa.

Yesu na pe p̄arin yaru wa nena napo

²⁶ Tekekara paṁisi naṁa Ntewa pisa sane popon ligana p̄arin yaru wa ta naṁa po manene sanene imin ita. Naga pe yar ta naṁa pe yaru wa paṁisi, pe napiowaena ta to re nena ea p̄isa, merarava paṁisi, kiena p̄elaga pe sa re nena yar na kilaen mlamulen viowa la poli, kiena kia pa manene laa to metavan punu ga sur nae peni. ²⁷ Yar wa taṁena la nene, la monar akila luen ga kuṁaṁaena na ikikena legiena punu ga. Sumo, monar akila vanon si kiela mlamulena viowa lala, a siraunia, akilia akila vanon mlamulena viowa kiena ne yeririna taṁena lala, ana Yesu na pe sa re nene poli. Naga kila kuṁaṁaena na ikikinen

mlamulena viowa na yomarava wetelu yam taaga, nanene e pogos naþa kuþaþain si tasnena vanon ita.

²⁸ Lelaga kemua naþa navisaluaena marua pimi sumo, ana kiena þarin yar wa pe yar ga, malum ga, ana naviranarena viu naþa pimi marea, kiena þarin yar wa naga mesmes lue ga, nane Yesu narina ne Ntewa.

8

Naviranarena viu: yuþaena kiena ne kiena þarin yar wa naga po manene la

¹ Ana vianen la naþa meta ne apisa sur mok liu e lepas na þarin yaru wa lala. Ana pupia purþes nen visena tai suþna ga, naþa popon tesitom urmi ea, naþa pisa sape kieta þarin yaru wa wo tanea ta sike rui. Naga Yesu, naþa þasuþe si pa ma e peni, ana Yerkawa Keviu na Yo na Ma Metava mligan naga totano teke e lepas nena na þamarua. ² Naga sike e yo nene, kila ke kiena yuþaena wa lala, sa naþa yaru wa la nanua sumo akila lotena e yuþna kanus wa naþa e yo mema. Ana lelen kilaen lotena nene, yar ga la amiyuþaenia, ana kieta þarin yaru wa Yesu naga miyuþnae ke loyuþna e yo na lotena naþa po, pe lelaga ruruia, naþa Ntewa ga miyuþaenia. ³ A þarin yaru wa taþena la nene, kiela yuþaena, silaga apisir plan la vena waren nalaena va Ntewa, a akila kuþaþaena la pania, ana popon teviun tevisave kieta þarin yaru wa nene, pona naga mþena mla nalaena pa Ntewa, a kila kuþaþaena pania? ⁴ Visae e ga e yomarava nini, yoko taþatete avisu naga sane yaru wa tai, komin naga pe molue re kome lus kiena ne Livae poli, naþa navisaluaena pisalua pan la sape lala ga akilia awar nalaena va Ntewa. Sanene, kieta þarin yaru wa nene suþna miyuþnae ke ga e yo wa na ma e peni.

⁵ Yo wa na yomarava nini, amio yuþaena la naþa akila ea, naga sa ga kana yanen ga, ana naga naþa ma e peni, naga napo nena ga lelaga. Ntewa mþena pisa sa ke ga, pisa kilale pa Mosis, ve sanape naþa yoko yuþnaen yuþna kanus wa, pisape yoko yuþnaen taveve kana nono nena torokin naþa naga pisuia poglis naþa pa ma e tavie. ⁶ Ana sanene tepisu naþa Yesu kieta þarin yaru wa pe lelaga napo, a kiena yuþaena punuga powo la sane. Naga totano likan ita temio Ntewa, miyuþnaen naviranarena viu tai van ita temio naga po manene la sane, naþa sike e navisaarena lala kiena ne Ntewa naþa po laa sane, pano-o tepisu naþa sike ma e yo wa na peni kila yuþaena po manene laa sane. ⁷ Visae naviranarena þes nene naga woga ga rui, vera na taþatete si nalua nena, ana peraga, kila narui nanagane Ntewa pisirlua naviranarena viu amio ita naþa po manene rui.

Naviranarena viu: Ntewa pisaar nanua rui

⁸ Naviranarena naþa na sumo, Ntewa pisa sane pe miyuþnae po re poli, pe torokin re kiena sitomen poli wa, ana kila naga pisaar sina na urviu tai. Naga pisawal sanene e visena ta naþa mla pa Navisawalena Sereþnaea vena visawalia. E visena nena, Ntewa pisaar sanini, sape

“Ayagogo ruruia. Sineun nesape nevisa van amiu nevisave pogos ta pimi ke ne, naþa yoko nekila naviranarena viu tai nemio amiu kiau yeririna lala, kam na lus kiena ne Suta amio lus nae Israel.

⁹ Yoko naviranarena nena ve maran taaga re amio naþa nekila nemio kiamiu yermarua la nanua sumo ne. Naviranarena na urmarua nene, naga e pogos naþa sineu mie la, noþere plan la e pogos mþarera gar Isip, ana siraunia, pe asitoþmal re si naviranarena nene poli, pe amlogear re si poli, kila narui in mþena nepilopu mþasuu pan la.

¹⁰ Ana nanagane, yoko nevisirilua si naviranarena viu tai nemio si kiamiu lus lala. E naviranarena nene, yoko nekila sanini:

Yoko neligan ruru kiau navisaluaena lala sike e kiela sitomena lala, yoko nesiri kiau visena la sike e losinela lala, yoko neim neve kiela Ntewa kemua lelaga, a yoko aim ave kiau þegas nen yeririna.

¹¹ E pogos nene, taþatete si akilali naþa avian la, sane ta kilali naþa pisawal van nalavis puna, visave ‘Ke, mrapa nanene,’ pona ta pisawal va wenla, visave ‘Ntewa, naga sanene sanene.’

Peraga, yoko taĵatete si akila ve sanene, komin yoko la punu ga veve taaga avisu kilale inu e kiela malena, siar e la naĵa pe kiela kia re poli, vano-o tol kiela yerkawa ne lala.

¹² *Nepisaar nesape kiela napiowaena lala, yoko neviewo nena ga, a kiela mlamulen viowa lala, yoko ve nesitoĵal re si na rui.*

Nane kiau naviranarena viu ne nanene narui nemio kiau yeririna lala.”

Ser 31:31-34

¹³ Ana e kiena visena nene, Ntewa pisayu naviranarena viu nene, kila ita tepisu kilale sane naga pisu ke kiena naviranarena na sumo nene sane pe urmarua rui. A sitomena ta suĵna ga sane sur naĵa Ntewa pisa ne sape pe urmarua rui, nagane pito la tano narui, ve ve viavi re yoko kovio make nenaga.

9

Naviranarena viu: kiena lele na lotuena naga po manene la

¹ Ana tekilia ruru po naĵa sane naviranarena marua, naga kana mrapa lala na kilaen lotena asuĵna ga, amio ĵmena kiena lele na kilaen lotena tai, naĵa sike ga yomarava nini.

² Lele na kilaen lotena nene, naga kana yuĵna kanus wa nena, naĵa aĵere pupia kulmrae ea, akila ĵerea sane loyuĵna lua. Lepas tai, naĵa apio asape Yo Wa, purĵes nen kapi vivaga tai naĵa kana koruas olua sike ea, amio varvara tai na kilaparavi lualima yam taaga pa lua, naĵa apio kilaparavi na vianen van Ntewa.

³ A varaun kulmrae nene, lepas ĵas na vano, naga apio asape Yo Wa naĵa pe Yo Wa paĵisi. ⁴ Loyuĵna e yo nena, naga kana wonta na ponotaninu nena naĵa amiyuĵnaen e kol, amio pias nen navisaluaena. Pias nene amiyuĵnaen kana kulusa e kol, yepas na loyuĵna a vanua, naĵa e kana loyuĵna nena, amligan ruru sur telu sike ea. Nasumo, naga pialora naĵa pe kol, naĵa kinakinasnen kinanena na yo mema naĵa asape ĵmana teke ea, a sur na lua, naga plasgai kiena ne yermarua Aron naĵa nanua na pitovi, a sur na maro, naga kilavaru lua naĵa pe lepalepasa naĵa Ntewa siri kiena navisaluaena sike e la. ⁵ A e wos nen pias nen navisaluaena nene, naga pe keplamarana, naĵa asape lele na totanoena na sineyeena kiena ne Ntewa. A nono lua na navisi asuĵnal asike meta ea, naĵa akian kupela suvivi yo naĵa naurarena kiena ne Ntewa pitom ke tano ea. Ana yo wa na lotena naviranarena marua naga kana sur ne la powo paĵisi, ana taĵatete si tevisa sur ve moki e lespanela. Ana sur na visaena taaga, tesape yo na lotena nena, amio kana sur ne lala, naga amiyuĵnaen ga e sur na yomarava la nini, taĵatete nena sike sike lue, naga pe po re sane yo na lotena na naviranarena viu poli.

Naviranarena viu: kana nakuĵaĵaena nena naga po manene la

⁶ Sur la ne sike meta ne, nane sur ke la nene narui naĵa amligan ruru sike loyuĵna e yuĵna kanus wa na sumo nanua ne, ana poglis naĵa yar wa la apa loyuĵna, amiyuĵnae amio la. Ana silaga, apava ke e ga e yo wa naĵa mon ĵesa, ⁷ ana e yo wa na lua naĵa pe yo wa manenea, yar wa lala pe apa li re nena loyuĵna e poli. Yo nene yar taaga kilia va loyuĵna ea, nane kiela ĵarin yar wa, a naga pe pa re silaga poli, kilia va ea yam ve taaga ga e kasa. A visae pogos naĵa vavini, taĵatete va koren ga sanene, ana monar taveve kana mrapa ne lala.

Sumon naĵa vavini, monar kila kuĵaĵaena e sur mal tai, ana monar war piasnen kana kuruta nena va loyuĵna sane nalaena tai, nanene na e lepas nen kiena mlamulen viowa amio kiena ne yeririna lala. ⁸ Ana pogos naĵa akila ke sanene, naga sane pe kile na Ninuna Wa naĵa kila meraravan pan ita sape pog naĵa visae yuĵna kanus nene susu ĵna ke ga wa, vera na ita yar kar la pe kieta mrapa re nena ta poli naĵa teva toworu e yo naĵa Ntewa sike ea.

⁹ Kanus na yuĵna wa naĵani, amio kana kulmrae nena naĵa telan liĵere loyuĵna, a kana sur ne lala, la na ape sur na konua na ĵa rui, ana apisa ke pupia sur ta ne pan ita na nagane ne. Akila narui tesuĵna tepisu kilale tesape nalaena la naĵa yaru wa lala amlavia pan Ntewa, amio kuĵaĵaena la naĵa akila ke ne, akila poga ga, ana sur la nene taĵatete kilia kila yeririna la aloge sane kiela sitomena la mekiki ruru nenaga e navisuena kiena

ne Ntewa. ¹⁰ Akila sur la nene, amio ya la naþa narin navisaluaena la apisa, naga nene e lepas na mrapa na yuþaenen kinanena amio namunena, a e þelaga na kevanen sur lala. Ana sur la nene ape na yepas nen yar ga na vanua, ana pe atol re losinena pona kiena sitomena poli. Kieta yermarua la apuarar m̃a þelaga marua na sanene pano-o, ana sur la nene na ve nauarar laen ga vano-o tol pogos naþa Ntewa kila kieta mrapa viu, naþa kana naviranarena viu nena naþa pimi m̃aliv rui.

Tana ne Kristo kevan ita mekiki rui

¹¹ Ana pogos naþa Kristo pimi m̃alivi, naga pimi sane kieta þarin yaru wa, naþa pe na þelaga marua re poli, ana pe na mrapa viu, vena kila narui tekilia tetol navisaruruena wa la naþa Ntewa mligan ruru sike na. Naga pe pa miyuþaen re e yuþa wa kanus marua na sumo poli, miyuþaen e ta naþa po manene la paþisi, pa la metavan nene. Yo wa naþa kila ke yuþaena ea, pe yar re miyuþaen e limana po, a pe su re m̃ena e yomarava nini poli, sike nena e yo merarava e marana ne Ntewa nae peni. ¹² Ana pogos naþa Kristo pa loyuþa e yo wa nene, naga pano pano-o tol nena kana yo wa naþa pe yo wa nena napo, ana pa yam taaga ga, pe navaen re si pogos taþena poli. A pogos naþa pa loyuþa, kuruta naþa naga þaria pe pe kuruta na nane re poli pona kuruta na narin puluk, ana kana kuruta nena napo naþa mlau e lak torovia. Ana kurutana sike e marana ne Ntewa sanene, taulu naul luaen kieta mlamulen viowa la, naþa taþatete þis pog tai. ¹³ Monar ve sanene, komin naþa e þelaga marua, visae yar tai kila sur ta viowa, amla narin kuruta na nane pona puluk, amio posnoyavi na narin puluk naþa askapia, amla pa e yo wa. Ana e pogos nene asitom asape nalaena na sanene kilia kila yar nene ikiki si e marana ne Ntewa. ¹⁴ Ana visae kuruta na sur mal ga la akila sanene, yoko kuruta kana Kristo naga kilia kila va ve keviu laa sane. Kristo pe yaru wa tai, naga mekiki ruru nena ga, pe kororaki ta to re e poli, ana naga taþan kiena malena vena Ninuna Wa la va Ntewa sane nalaena tai, ana naga pim pe kieta natamaliaena. Sanene, yoko kuruta kana Kristo kilia kila sineta la ikiki, kilia wereplan ita vetan kieta yuþaena na marena lala, pisir plan ita vena tekila yuþaena lala kiena ne Ntewa mali.

Tana ne Kristo kila naviranarena viu suþalu m̃arera

¹⁵ Ana komin naþa Yesu kila yuþaena wo pan ita sanene, tekilia tevisu naga, sane naga pe yar na waren sur wo lala na viranarena viu imi m̃alivi e ita. Nanene naga miyuþaen e kiena marena, naþa sane marena ta naþa pul plan make maliena kiena ne yeririna lala naþa akilaro navisaluaena lala na viranarena nasumo. Ana komin naþa naga pul plan ita sanene, kila sane visae ita a naþa Ntewa vio ita, tekilia tetol kieta lalimana naþa yoko taþatete þis pogos tai. ¹⁶ Visae Yesu ve mare re, taþatete tetol kiena lalimana la nene, ana sa naþa sane mare kemua lelaga, navisaarena make ga naþa na naviranarena nena apim sane visena maro kiena Yesu, ana sur make ga pimi e limata. ¹⁷ Komin naþa visae yar tai visaar maron sur tai sa naþa kiena visena maro, ana pogos naþa naga mal ke ga wa, apuarar ruru kiena visaarena nene suþa ga, ana pe amiyuþaen re poli suþa pano-o tol pogos naþa visae naga mare narui, yoko ayuþaen ga na wa. ¹⁸ Sa ke m̃ena naviranarena naþa Ntewa kila þesania, naþa visae kuruta na kuþaþaena lau, ana visena naviranarena suþalu.

¹⁹ Sur nene Mosis m̃ena kila, naþa Ntewa kian kiena navisaluaena la pania ma e tavie, ana pitomi tano pisawal make kana visena ne lala pa yeririna lala, ana pogos naþa pisawal make pae, m̃emoþar nakuþaþaena ne lala, vena kila sa naþa visena navisaluaena nena amali, a asuþalu. A m̃e moþar narin puluk lala a nane la naþani ana naga mla kala narin kuruta ne lala, taron narin wii pito amio, ana mla narin laki tai, apio asape isop, piar vilus nen sipsip naþa pivaga pa ea, ana puton pito e kuruta naþani, peven ve tokak ga e tus navisaluaena nena, a peven m̃ena e yeririna lala, pisawal pan la, sape

²⁰ “Naga nene kuruta na sur mare naþa vena kilaen navisaluaena kiena ne Ntewa mali. Ana monar tevanonia a telogearia.”

²¹ A sa naþa peven kuruta nene e la, ana peven mēna ve torokaki e yuþna tapolen nene, amio sur la naþa asike loyuþna ea, naþa asuþna akila ke kiela lotena amio la.

²² Mrapa na yuþnaena la naþa na navisaluaena marua nene la sa ke nene narui, naþa lavis sur make ga naþa amiyuþnae ke amio la, monar aveven kuruta ea vena akila aim ave sur wa silaga. Naga nene sane kila meraravan pupia sur ta ne paþisi van ita, sane visae kuruta ve lau re, mlamulen viowa taþatete aviewoia.

Naviranarena viiu: kana kuþaþaena þar plan make ga mlamulena viowa lala na yomerava

²³ Sanene, sur la naþa li wa la amiyuþnae ke ea, monar akila mekik lue ga taveve kana narin þelaga ne lala. Ana yuþna wa kanus nena, amio kana sur ne lala, la ape sur na yomarava ga nini, ana sanapen yo wa naþa na lelaga, naþa nane Ntewa teke ea ma e peni? ?Naga mēna monar kana kuþaþaena na viewoen tai? Ee sanene, naga mēna monar kuruta lau vena kila make kana sur ne la ve sur wa, amio mēna yeririna la naþa apa ke ea. Ana kuþaþaena na yo wa nae ma e peni, naga pe sa re kuþaþaena na sur mal la naþa akila ke e yo wa na yomarava nini poli, naga pe kuþaþaena tai naþa keviu manene la, a po lue ga. ²⁴ A kuruta na kuþaþaena nene sike e marana ne Ntewa rui, komin kieta þarin yaru wa Kristo þar pa loyuþna e yo wa rui, naþa pe yo wa re ga naþa yar la amiyuþnaen poli, ana yo wa nene yo wa lelaga napo, nane ma e peni. ²⁵ A pogos naþa kila kiena kuþaþaena nena, naga pe sa re naþa þarin yaru taþena wa la akila ke poli. La akuþaþain ga kuruta na sur mal lala, ana naga kuþaþain ke si na kana kuruta. A silaga apa akila e kana yo wa nena yam taaga e kasa punu ga, la akila luen ga sanene pa ke ne, ana naga kila yam taaga nena ga, pe nakilaen re si pogos tai poli. ²⁶ Visae Yesu monar kila luen ga kiena kuþaþaena nene vanon mlamulen viowa la naþa yeririna la asuþna akila lue ga pa ke na, kana kinasa sane siar e nasiiena na yomarava nini pimi tol nanagane, naga tamalele ga mēke e lak torovia mloge piowagan naþa kana kuruta mlau lue silaga.

Ana e naliganaren naþa Ntewa pisir lua naga pe sa re nene poli. Naga pisu naþa luas nen pog naþa tesike e nanagane pimi ke lavis narui, ana kila Yesu pimi paemen ita mare ga na wa. Naga pimi m̄alivin ita, kuþaþain make nena kiena malena, mēne plan þelaga na mlamulen viowa.

²⁷ E lepas naþa ita yeririna lala, Ntewa kila sape temal e yomarava nini, ana yoko tokovio ea þisi na temal sina vena teva e naliþereena, ²⁸ a e lepas kiena ne Kristo, naga mēna sa ke ga. Naga pimi m̄alivi e yomarava nini, siraunia kuþaþain naga ve na waren kieta nakoena na mlamulen viowa lala, ana yoko naga imi m̄aliv si yam ta ne, pe na ulen re si mlamulen viowa poli, ana ve na wereplan ita vetan nakoena na kieta mlamulen viowa. Sanene, ita toþasine ke ga naga, tesape monar naga imi tamalia ita.

10

Nakuþaþaena kiena ne Yesu naga po la sane

¹ Tesitomyu li si navisaluaena marua kiena ne Mosis. Naga pisa m̄na sur wo laþasa, ana pe pisawal make re navisaruruen wo naþa Ntewa sinenan sape Kristo kila imi m̄alivin ita poli, kila sane navisaluaena nene sane pe kulus ga, ana pe kana kinas re napo poli. Navisaluaena marua nena, naga suþna kila ke ga kana kinakinas la sanene, kana kinas nene sane kiena kuþaþaena la naþa akila silaga, maran taaga ga e kas punu ga, pe atorokin re poli, taþatete akilavan make la naþa akila ke lotena amio. ² Visae peraga, vera na la naþa akila lotena sanene, aim amekiki ruru make wo þisi, ve aloge re si sane mlamulen viowa sike e la, ve asitom re si kilaen kuþaþaena, ana peraga, akila ke sina ga sanene silaga. ³ Kuþaþaena lala, popon naþa kila naþa aninu sane pe kiela mlamulen viowa re si poli, ana peraga rui, e kas make ga apisu sane kuþaþaena la nene akila sane asitoþmal si kiela napiowaena lala, ana amloge sane kororak na kiela mlamulen viowa sike e la wa pano-o pimi piowa manene la. ⁴ La amninu ke sanene komin naþa kiela sitomena ta sike na, naþa asape kuruta na purwolu puluku pona kuruta na nane kilia

yumu plan kiela mlamulen viowa sanape ne? Sur nene, asitom ðele paþisi, pano-o apisu sane peraga, aþi ðele yonia, kiela mlamulena viowa su ña ga.

⁵ Ana komin sur ne la nanene, pogos naþa Kristo pitomi ñalivin ita e yomarava nini, naga pisawal kiena mrapa viu narui. Naga mla visena tai naþa teke e tus na Yauen wa lala, pisa pa Ntewa Arimana, sape

“Ko na pe sinoñan re si kuþaþaena lala amio nalaena lala poli, ana okila ruru tasneu naþa yoko netañan van ko.

⁶ *Sur la naþa asikap lele ke ne, opisu apiowa ga, a nalaena la nakilaena mlamulen viowa ikiki, pe sinoñan re nena ga.*

⁷ *Ana siraunia, nesuñalu nepisawal ruru pan ko, nesape*

‘Ntewa in na nekekan ga nekila ya naþa ko sinoñania,

sur ne nanene in na nepitominia, sa ga naþa Tus Marua sape yoko nekila.’” Yauena 40:6-8

⁸ Ana popon tevisu ruru visena naþa Kristo pisa ne. Sur ðes naþa pisa, pisa ke kuþaþaena lala amio nalaena taþena la naþa asuñña akilakila ke ne, pe sur korena ga naþa navisaluaena sape monar akila, ana Ntewa pe mloge re nena pon la, a pe sinenan re si sape akila poli. ⁹ Siraunia, sur na lua naþa Kristo pisa, naga sape tañan naga narui, vena imi kila nasinenanena kiena ne Ntewa.

E nene, tepisu mrapa na sumo na kilaen kuþaþaena komin mlamulen viowa lala, Ntewa koven lua nena ga, ana kom ga e kiena mrapa na lua. ¹⁰ E mrapa viu ke nanene narui, Yesu Kristo kila sa naþa nasinenanena kiena ne Ntewa pisa, tañan make tasnena wetelu, nane kila narui tepim temekiki a tepe wa e marana ne Ntewa, sike sanene sulue narui.

Kuþaþaena kiena ne Yesu naga sulue na sike ne

¹¹ Yar wa la naþa asuñña amiyuñae ke e ðelaga marua, monar la ðas naþa e legiena make ga asike e Yo Wa. La asuñña akila ke narin kuþaþaena la silaga, naþa akila lue ga maran taaga silaga. Kuþaþaena la nene akila ke ne komin mlamulen viowa la naþa yeririna la akilakila ke na, ana pe atorokin re nena naþa akilia awar plan ðelaga na mlamulen viowa petan malena ken yar la poli.

¹² Ana kieta þarin yaru wa naþa Yesu, kiena kuþaþaena na pe sa re nene poli. Naga kuþaþain sur taaga ga panon mlamulen viowa make ga, a kila yam taaga ga, ana pogos naþa naga kila pae, pa teke metava e yepas nena Ntewa na þamarua. ¹³ Ntewa pisu Yesu kila ña sanene, na pisawal pisape yoko war nasinekar kiena Yesu lala, ligan la asike vatanonia sane takue tai naþa yoko vilavan lana ea. ¹⁴ Pe yuññaena taþena re si ta naþa yoko Yesu monar kila sanene poli, komin naga mla nalaen þisi rui, naþa kana kuruta kila ita temekiki, nanagane tepo rui e marana ne Ntewa, tesu ruru tesu ña sanene vano-o taþatete þisi. ¹⁵ Ninuna Wa ñena miakol visena pan ita e lele nene, e visena ta pimi kome Navisawalena Sereñaea. E visena nena, Ntewa pisa sanini sape

¹⁶ *“Ana nanagane, yoko nevisirlua si naviranarena viu tai nemio kiau yeririna lala. Ser 31:33*
E naviranarena nena, yoko nekila sanini: neligan ruru kiau navisaluaena lala sike e kiela sitomena,
nesiriar kiau visena lala sike e losinela.”

¹⁷ Ntewa pisa pa sanene ana sukol si pa la sane, pisa sanini sape

“Yoko kiela mlamulena viowa lala amio kiela napiowaena lala, taþatete si nesitoñalia.” Ser 31:34

¹⁸ Visena nene pisawal ke pupia naviewoena naþa Ntewa kila pan ita rui, ana visae ve sa kemua nene, pe nalaen taþena re si ta naþa tekilia telavia komin naviewoen kieta mlamulen viowa lala pona kieta napiowaena lala, komin naþa Ntewa kila ruru þisi rui.

Ve temaraun re va lavisinen Ntewa

¹⁹ Wolai a vineu lala, sa nena naþa visena la nene apisa narui, kuruta kana Yesu pike mratavan ita rui, ana pe pon re si temarau poli, popon tokom ea teva loyuñña e Yo Wa naþa Ntewa sike ea. ²⁰ Sumo na pupia kulmrae nene telan mono kieta mrapa, ana pogos naþa tasnena ne Yesu porovia, kulmrae ñena nene purþa lepas lua, pietavan kieta mrapa na vaen loyuñña. Nanagane tesike e mrapa wo ne narui, naþa pe mrapa viu tai, a pe mrapa na vanonen malena.

²¹ Ana Yesu kila kieta mrapa navaen loyuña e Yo Wa sanene, naga pimi pe kieta pupia yar wa, naña naga pisuar make ita ga la naña na mratava puna ne Ntewa. ²² Kana kuruta war plan kieta kororak napiowaena la naña sike loyuñan ita, kiena wii merarava kevan tasneta imi mekiki nena ga, ana ve temawa re sina, a tekilia teva loyuña. Tekilia teva lavisin Ntewa naña sineta la ve lelaga, teviawa manene ñarera e naga tesape yoko ve koven lua ita re, yoko naga worworun ita ga.

²³ Tekilia telelaga ruru tevisave yoko Ntewa kila wo ve sanene van ita, komin naña silaga, naga suña kila nena taveve ya naña naga pisaaria. Ve tesitom ñele re sina, ana touarar ruru yuñena wo navisawalen va yar tañena lala sur tanea naña naga kila pan ita. ²⁴ Ana e ke sina ga e lepas na pun ita, popon tesitom ruruia, telual mrapa na yuren kieta sitomena lala vena sineta si manene ita la sane, a vena tekilakila ruru yuñena wo la van ita va laa sane. ²⁵ Pe pon re teligan ñelaga na viranar ruru itaen poli, sa naña yar lañas akila ke rui, ana popon teiilaar ita silaga. Ñelaga wo la nene, monar tekila lue ga van ita, a visae tevisu pogos ñarera na legiena maro la asike lavisi narui, popon towo lue ga van ita sanene va ña ga.

Ve tesitom korenan re naliñereena kiena ne Ntewa

²⁶ Popon teviun naviunena e lepas na pan ita naña tetol nakiliaen la e visena lelaga rui. Teviunia tesape visae ve tevisuar ruru ita re, sane tesuñalun naña tekila ruru ke mlamulena viowa, yoko ve sanapen ita narui? Navisatañeena nena, sanini, mlamulen viowa la ne sanene, pe kana kuñañaena re si tai naña yoko war plan poli. ²⁷ Ya ga naña sike pa rui, nane navisaarena kiena ne Ntewa nalaen nakoena ñarera vanonia, amio pupia lenen kapi naña yoko kekan make nena kiena nasinekar lala. Nanene naga pe sur tai naña monar temaraun vañisi. ²⁸ E navisaluaena marua kiena ne Mosis nanua sumo, visae yar tai kilaro kana visena ne tai, a visae yar ve lua pona ve telu avisave lelaga kemua, pe mrapa na sineyena re si poli, yar nene yoko akilalua kiena malena veraga. ²⁹ Visae akila ve sanene va yar naña kilaro navisaluaena kiena ne Mosis, ana yoko ve sanapen yar naña pilon ke si ñasina pa Narina ne Ntewa? Yoko naga kiena nakoena ve keviu manene laa na wa, komin naña naga ñarnena kare kuruta naña naviranarena viu naña kila naga mekik rui e marana ne Ntewa. Yoko Ninuna na lemamiena loge viowagan ñelaga nene vañisi, sinen kar li yar naña kila na wa. ³⁰ Yoko monar war nakoena nena, komin Ntewa pisaar sanene ña rui. Kiena Visena Wa tai sike e Tus na Visaluaena, naña pisa sanini, sape

*“Naliñereen mlamulen viowa, naga kiau in ga taaga.
Yoko nelamaran si van la ñarera na ñarera vanon kiela naviowaena lala.”* Nav 32:35 A e ke e lele nene na wa, visena tañena pisa ke ñena ga sanini, sape

“Yoko Ntewa na mava liñere kiena yeririna lala.” Nav 32:36

³¹ Monar tevisuar ruruia, komin yar naña kila mlamulen viowa, pogos naña aligan naga e limana ne Ntewa vena visu vevea, nanene na pe narin sur re nene poli, naga pe sur namarauen ke nene narui.

Viawaena ñarera navisuen sur naña yoko imi ñaliv na wa

³² Temninue kare narui aña yoko ve sanapen legiena la ne pimi ke ne wa, ana popon tesitoñal luen ga mrapa wo la naña Ntewa miila ita ea, e legiena la naña ñaro pa rui. Nanua pogos na tepim toñaliv e yomerarava, pe piavi re nena poli, tepane pogos ñarera la pañisi, naña akila piowa manene la pan ita naña temlelaga ke e Yesu. ³³ Pogos la ñasa, e ga e maran yar lala, akoven visena viowa la pan ita, a pogos tañena lañasa, akilapel ita ga e ñelaga viowa la naña piowa na piowa manene la. Pogos lañasa, pe akila re pan ita poli ana akila pa kieta erau tañena lala, ana tepa tesuñal tesu temio la, temiila la.

³⁴ Ita lañasa, akoven la apa e yuña nakoena, ana sineta miye la pañisi, tepanon tekilali naña teiila la vena towar plan re kiela pupia naloge viowaen naña apisu e yo nene. A pog tañena si lañasa, la naña sinela kar ita apimin kieta sur lala, añar plan kare petan ita naña tekilalu manene la sur lala. Ana e pogos nene, pe sineta kar la re poli, tetañan ga, komin naña nasinekekaren tai sike e ita, sane sur la naña añar plan pavano lala ape na

yomarava ga nini, ana kieta sur nowo la naþa apowo manenea asike ga wa, naþa taþatete akovio pog tai, yoko ave kieta lue narui. ³⁵ Nane kieta pupia naulua itaena nane nanene narui, naþa yoko Ntewa la van ita, ana komin naþa nalaena tanea nene sike e marata, pe pon re si tekilapal nakiliaaren m̄arera naþa sike e ita poli, ³⁶ ana monar tesuñal ruru nena m̄arera tese Ntewa. Kieta sitomena la monar ve piavi ruruia vena tesuñna tekila ga kiena nasinenanena ne lala, ana tekilia tetol sur la naþa naga pisaar pan ita. ³⁷ A pog na tolana, pona ve ve piavi re yo, yoko imi m̄alivin ita, sa naþa visena kiena ne Ntewa tai naþa navisawalena Aþakuk pisawalia, sape

“Yam ve plas la sina, ve ve piavi manene re, ana yerkawa naþa yoko imi ne, naga taþatete si su laa sane, yoko imi m̄alivi nenaga.”

³⁸ *E pogos nene, kiau yar mesmes lala, yoko amal ruru nenaga, komin naþa amlelaga e inu, ana visae nevisu lala yar tai yepen mavin inu, weresu si naga, yoko taþatete nena nekekarania-a þisa.”* *Aþa 2:3-4*

³⁹ Ana pe ita re nene poli. In na pe nesitom re nesape ita yar sur la ne sanene yoko temaraun Ntewa poli. La naþa aþeresula sanene, yoko monar ava akovio ga narui, ana ita naviawaen m̄arera ea, monar tetol malena.

11

?Naviawaena naga ya ne?

¹ Kieta viawaena nena, yoko tevisave naga sur ya na sanene? Tekilia tevisave naga pe þelaga na wasine ruruen Ntewa m̄arera, naþa kilia kila kieta sitomena kapuru ruru wo e ga e naga, a kilia kila kieta lelagaena m̄arera, tesape sur la naþa pe tepisu re poli, ana pe lelaga naþa asuñna ga. ² Viawaena naga pe pupia sur tai paþisi e navisuena kiena ne Ntewa. Siar e repita nasumo lala pimi, mrapa taaga nena nanene naþa Ntewa kila sane kilia kekararan yaru. ³ Þelaga naviawaena ne nanene narui kila ita tepisu kilale sane pe lelaga kemua, visena kiena ne Ntewa ga sii make suria, kila kieta yomarava nini pimi m̄alivi. Kiena m̄areraena ne nane mla sur la naþa yar taþatete visuia, miyuñnaen make sur la naþa tepisu sike ea. ⁴ Popon tesitomyu si repita na sumo laþasa, sanape naþa la m̄ena apiawa e Ntewa nakonua.

Ta naþa naga yermarua Epol. E kiena naviawaena e Ntewa, naga mlotun e nalaena ta naþa mesmes paþisi, ana Ntewa kekarania, naga pisu po manenea taulu nalaena naþa wenla naþa Ken sinenan sape lavia. Ana Ken sinen mimi, m̄eñmar wenla nena, ana þelaga wo naviawaena kiena ne Epol e Ntewa kila Ntewa pisu sane naga pe yar mesmes tai, a suri nene kilia iila ita ke vim tol nagane na wa.

⁵ Taþena sina, nane yermarua Inok. E kiena naviawaena e Ntewa, naga pe tol re marena poli. Naga pe yermarua, ana Ntewa ga pitomi þerelua naga, kovio e yomarava nini pa metava, ana akale pano-o pe añnal re poli. Ntewa kila sanene pania komin pogos naþa sike e yomarava nini, naga pe yar tanea tai naþa Ntewa kekararan paþisi.

⁶ Lelaga paþisi, visae naviawaen e Ntewa ve su re e ita, taþatete tekila naþa yoko Ntewa kekararan ita. Yar a naþa sinenan sape kilia Ntewa e kiena malena, sinenan sape imi lavisinia, naga monar viawa manene sanini. Naga monar lelaga sane pe lelaga kemua paþisi, Ntewa suñna ga, a monar wasinea sane yoko Ntewa kila wo vaþisi va la naþa akale ke naga.

⁷ Yermarua si tai naga Noa. E kiena naviawaena e Ntewa, naga kila ya naþa pisa pania. Ntewa pisawal pupia womie nene pania, ana pogos naþa Noa pe pisu re nena kana kile ta poli wa, ana kila ga ya naþa Ntewa pisa pania, kila kiela pupia waa nena vena namratava puna lala akilia amal ea.

Naviawaena kiena ne Noa nene e Ntewa tamalia la nene, kila m̄ena pupia nakoena pimi m̄alivin make yar taþena lala e yomarava, komin naþa pe amlelaga re poli. Ana Noa naga pe na þegas kiena ne nalelagaena lala tai e Ntewa, ana Ntewa kila amesmes e marana.

⁸ Taņena si tai, naga yermarua Epraam. E kiena viawaena e Ntewa, naga mlogear ruru paņisi, molue petan yo naņa sike ea, pa e yo taņena tai, naņa Ntewa pisaar sape taņan vania. Naga mialin ke sape va ea, mninue kare sape aņa kope ke na wa, ana komin naņa Ntewa pio, naga pa ga narui. ⁹ Naga mial mņa pano-o, pogos naņa pa mņalivi ea, sa ga wolawa ga tai, ana purvanua ke naņa Ntewa pisaar pan narui. Ana pņere yuņa tapolen mņene yo nena, sike e nene amio na mratava puna lala, sa naņa narina lala, naņa Aisak lala amio mapina lala naņa Sekop lala, naņa la mņena akus porotano nene naņa Ntewa taņan pan la ve kiela lue. ¹⁰ Ana Epraam tol yo nene, sike ea, ana pe kila re pupia mņa yuņa ta poli, mņeke ga e yuņa tapolen la naņane. Naga nene komin naga kiliar ruru po paņisi sape pe mņa uņa re napo nene poli wa, ana naga sukoko ga e nene na wa, vena yoko va e pupia pulkumali kiena ne Ntewa, naņa Ntewa pisirlua a miyuņaen amio kana pņeren mņarera naņa taņatete si wororowa pogos tai.

¹¹ Ta sina, naga sira marua Sera. E kiena naviawaena e Ntewa, naga mņeņenan pņesan narina naņa Aisak. Nakonua nena, pe pņarli re sisi poli wa pano-o pimi pe sira marua, ana suņmal mņarera sike e naņa sape yoko navisaarena kiena ne Ntewa ve lelaga vania amio wona yermarua Epraam, sape yoko lalua awar narila. ¹² Yermarua Epraam mņena ga sa naņa mrae pito tano rui, ana narina naņa pņaria kila namratava puna la apim ape mok paņisi. Ana siraunia aņarliluen la apitom sanene, pano-o kiena lus lala apim ape mok sane verue la metava ma e sinapane, taņatete si aulola, asaga mras nen none la garo losi narui.

¹³ Ana yermarua make la naņa amlalaga e Ntewa sanene, Ntewa pisaar kiela sur wo lala pan la, ana aņar ga kana narin kinakinas komņasa, ana amar tan yomarava nini. Ana akilia asape Ntewa pņar ligan ga laņasa sike ga wa, yoko warpo nakeviu sirau, ana kila apisu kilale asape ape wolawa ga e yo nena. ¹⁴ Yomarava nini naga pe kiela yo re nena poli, ana kiela sitomena sike e mņala uņa taņena naņa napo. ¹⁵ Ana visae yo naņa asitom manenea naga purvanua ke naņa amligan apim, visae la sinelania, akilia avilopu la awasuņe si ava e wo ga. ¹⁶ Ana peraga, pe kiela sitomena pņasuņe re si pa e nanene poli, la asitom ke asape atol yo taņena naņa po manene la sane, sinelan ga uņa nae ma e peni. Ntewa kila ruru make kiela pulkumali wo nene rui, ana naga sinenan paņisi sape popon loge avisave naga pe kiela Ntewa kemua lelaga, a naņa avisave mņa uņa, naga ve mņala uņa lue narui.

¹⁷ Ana e lepas kiena ne yermarua ke la nene na wa, tevisayu si yermarua Epraam, naņa e kiena nakilaliena mņarera naņa naga pisuia. E kiena naviawaena e Ntewa, naga taņan nena narina taaga naņa Aisak pania, taņan sape kuņaņain ke sina ga vania. Aisak ke naņa nanua ne Ntewa pisaar mņarera pa arimana, sape

¹⁸ *“E naruņa nene, yoko kioņla lus la aim ave moki.”*

Jen 21:12

¹⁹ Ana pogos naņa Aisak lavis mare, Epraam pe kiena sitomena re poli e navisaarena kiena ne Ntewa nene, ana naga mlalaga ke naņa sape visae monar weņar narina nene mare, Ntewa kilia tamalia si wo ga ne. Ana Ntewa pisu naņa kiena naviawaena pe lelaga sanene, ana Aisak pe mare re si poli, ana ariman pisu ga naņa Ntewa mla maran si malena kiena ne narina nene pania mligan e limana.

²⁰ Ana yermarua taņena si tai, naga narina ne Epraam naņa Aisak. E kiena naviawaena e Ntewa, mla kiena visena maro pan narina lua nene Sekop amio Esau, mlalaga mņarera sane yoko sirau navisa ruruena imi van lalua sa ga naņa pisaar pan la.

²¹ Ana Sekop mņena nene sanini, e kiena naviawaena e Ntewa, pņasine ga naga sane yoko kila wo van kiena lus lelein la naņa avim sirau. Naga pņar narina naņa Yosop, ana Yosop pņar narina la lua. Ana pogos tai, lavis repila marua naņa Yosop kovio, suņmalun kiena plasgai telan pņarina pito tano vena lotun Ntewa, pņisi na pisawal navisaarena navisa ruruena pan mapina la punu ga.

²² Arimala marua nene Yosop, naga mņena popon sa tesitoņalia. E kiena naviawaena e Ntewa, naga mlalaga mņarera sape Ntewa ve ligan re yeririna nae Israel la asulue Isip, ana yoko wereplan la awasuņe si e kiela purvanua wawa. Naga pisawal sanene, ana pogos

naþa kiena malena lavis þisi, pisa mēna sape visae naga mare, ve asin re mon Isip, monar akus vano-o asin mēne kiela yo.

²³ Taþena sina naga yermarua Mosis, kiena yermarua lua. E kiela naviawaena e Ntewa, pe amaraun re navisaluaena mārera kiena ne Þarin Suþe Pero poli, pogos naþa narila nane Mosis paeme, apinaia naga paþisi, pe ataþan re aþeþar poli, ana akuswan naga mon moþa ga, pano-o tol kupario telu.

²⁴ Ana Mosis nene, naga mēna, pogos naþa kapuru pa keviu pae na, naga mēna pe yar na lelagaena. E kiena naviawaena e Ntewa, pe sitom manene re e kia wo naþa amla pania, sa naþa Þarin Suþe Pero narina naþa sira, narina, ²⁵ ana naga sitom manene la kiena lus taþena lala, yeririna na mratava kiena ne Ntewa. Naga mligan uþa mþana yar keviu, amio þelaga la na yomarava nini, naþa sane kana kekarena pe na þane ga ne, þisi na pa miakol amio kiena yeririna lala e malena na pog mārera la naþa le Isip la akila ke pan la. ²⁶ E pogos nene, naga suþa sitom veve ke ga navisaruruena la naþa kilia imi mþalivin naga e pogos la naþa pimi sirau. Naga mnunun sape visae kus ke naloge viowaena amio la vanon yuþaena kiena ne Navisaarena, naga po manene la taulu naþa naga kus ke sur wo lala na malena memee ga e uþa mþana ne yar keviu nae Isip. ²⁷ E kiena naviawaena e Ntewa, pe maraun re sur ya naþa Þarin Suþe Pero kilia kila vania, ana naga mligan ga Isip sa naþa Ntewa pisa pania. Naga pe pisu re marana ne Ntewa poli, ana þar yon ga naþa logearia sa ga naþa pisu nena e kilamarana.

²⁸ Naga ke sina ga, e kiena naviawaena e Ntewa, naga þuarar ruru mrapa natamaliaena naþa Ntewa pisa pania, a naga kila kiena yeririna lala aplan ke kuruta na sipsip e mþala pulutava lala, ana pogos naþa Ntewa mligan kiena navisi na marena pitomi vena la nakoena va Pero, war ro ga kom metavan mþala uþa lala, pa mþemar mþearu na uþa punu ga nae Isip. ²⁹ Ana siraun nanene, yeririna nae Israel la nene aþure matan Pero, amial apa atol Sive naþa Pivaga. E kiela naviawaena e Ntewa, akusro pupia sive nene apa lepas þasia, amial ke apano-o sa ga amial ke ga e porotano. Ana la nae Isip asirau apimin la, ana la mēna amial asape akusro sa ke ga, ana pupia sive nene pimi pranwo la sina, kila talilun make la ga amarmare. ³⁰ Ana pogos naþa yeririna nae Israel lala amial apa la sane apa atol pupia kumali naþa Seriko, amio kiena li na mara la naþa asike loyuþa e kana pupia kove naþa amiyuþaen e kilavaru telivi piora. E kiela naviawaena e Ntewa, la nae Israel amial atalivi e kumali nene pano tol legiena orai, pano-o tol legiena na olua, apisu naþa Ntewa kila kove la nene amloloru veraga.

³¹ Ana loyuþa e kumali nene, sira tai suþa ga, naþa nanua sumo pe sira na mrapa, kiena kia Reap. Sumon, yar la lua navisu veveen yo kiena ne le Israel lala, la apa atapolou loyuþa Seriko, ana pogos naþa asike ea, sira nene þerewan la e mþana yuþa, miila la keviu paþisi. Yaru taþena la nae kiena yo, pe sinelan re avatanon Ntewa poli, ana e pogos na mara, amarmare, ana e kiena naviawaena e Ntewa, Reap pe mare re poli, atamalia kiena malena.

³² Nane repita marua la þasia naþa ape purþes nen yar naviawaena nakonua. Ana tekilia teva laa sane, vanon kia moki sike ga wa, sane yermarua la nene Kition, Þarak, Samsen, Septa, amio Þarin Suþe Tepet, amio mēna Samiuel amio navisawalena taþena lala, ana nepisu sane torok ga wa, pe aora torokin re poli naþa nekilia nesiri plan kiela suniena la veve taaga e la punu ga. ³³ Pe lelaga kemua, visae teloge ga sunena la nene na, apo na apo. E kiela naviawaena e Ntewa, kieta yermarua lala akila pupia sur la moki. Yoko tevisu naþa akila mara ataulu purvanua mārera taþena lala, ana akila naþa yeririna na yo viowa lala monar ayuþaen ataveve navisaluaena na po, ana aþareran na tolen ya naþa akilia asape Ntewa pisaar pan la. Yeririna taþena lala akuwanla apito e þiliþili na laion vena akan la, ana pe akan la re poli. ³⁴ Akuan la e pupia kapi, ana taþatete nena kekan la. Pogos laþasia apane playu na mara, ana aþure matan poga ga, a pogos laþasia li na mara la akila kare la mþa pano-o pe puriula mārera re si poli, lavis ga þisi. Ana siraunia, apisu ga naþa apa sina metava, aþarera manene paþisi, akila mara amio kiela li na mara na purvanua taþena la nene, pano-o ataulu la, aþene plan la aþasuþe sina.

³⁵ Lala p̄as amarmare e pog m̄arera la nene, ana ola la atagin la, ana amilan ga Ntewa mla si ninula pan la sina, pisir plan la amal sina.

La sina p̄asia, nasinekar la akila yepe lalae moki pan la, a akilali la visae la avisave la pe amlelaga re si e Ntewa poli, yoko aligan la awasupe la sina. A visae avisave asuṃa amlelaga ke ga e Yesu wa, yoko akila m̄arera la sane van la na wa.

Ana e pogos nene, yeririna lala kiena ne Ntewa asape visae akila m̄arera la ve sanene van la, poga ga, ana taṣatete aligan kiela Supe. Asitoṃal ga asape e pogos naṣa visae naga visirplan la sina, la sinelan suṃalen se marana naṣa akekara, a ve amawan re sina.

³⁶ Lala p̄asia apiar la, aṣure la apa aṃe la e yometava e maran yar la naṣa apisa kare la ke paṣisi. La p̄asia, pogos naṣa apiar la, nane e sen urmi lala, akuan la p̄araria e yuṃa na koaena. ³⁷ Lala p̄as sina ga, akove moṃar la, la p̄as apiliro la komṣas lua e sowa, p̄asia ateṃar la e playu na mara lala. La naṣa visae ve amare re, la ṃena ga sur m̄arera van la pa ṣisi. Pe kiela sur re poli, limala plas paṣisi, ṣisi na asi plan ga kulus nen nane pona sipsip vena ayenia nakilaen yepela visusun. Sur la punu ga piowa lue ga pan la, a yar taṣena lala pe apisuar la re nena ga, akila kare la keviu ṣisa. ³⁸ Pe ṃala uṃa re poli, a pe kiela yo re naṣa ava e poli, ṣisi na asuṃa amialialoro kar ga e yo mema a metava e tavie lala, asu kar ga e pulpe lala.

Nane yar na viawaena lala na sa nene. Yomarava nini na piowa manene la pan la, sa naṣa tekilia tevisa tesape yomarava nini pe torokin re si yeririna wo la na sanene ase poli, yar la na sanene popon asuṃa ga ṃala uṃa metava ma e peni. ³⁹ Tepisu sane la punu ga naṣa tepisayu la pa rui, apane pog m̄arera la mok paṣisi, ana pe amlor re poli, asuṃal m̄arera ga, kila temnununu kilale kiela naviawaena e Ntewa keviu, a pe lelaga. Ana la ape na pog nane naviranarena marua nanua sumo, ana asuṃa amloge navisaarena wo lala kiena ne Ntewa, sane yoko naga kila mrapa naṣa akilia atol malena naṣa ve uro re, ana pe apisu re mras navisaarena nene molue pula poli. ⁴⁰ Ana Ntewa pisuveve sape popon kila mrapa viu tai van ita. Ana pitetalia Yesu pitom kila pae kiena yuṃaena, kila sane la nanua sumo ne, amio ita, ita punu ga towar mras na visaarena kiena ne Ntewa nene e mrapa ve taaga ga, a e pogos taaga ga.

12

Kilamarata suṃa ga e Yesu, naṣa naga m̄arera manene pano taulu pogos m̄arera lala

¹ A la punu naṣa tepisayu la p̄aro rui, la na sane ape pupia purṣes nen viawaena lala, asa ga pupia p̄egas nena naṣa asuṃal asuṃa apisuveve ita ke ne, asuṃa apisu ruru ke kieta viawaena, asape yoko tekirir va ve sanape. Sur ya naṣa suwo ke kieta mrapa, monar teyaslua, a mlamulen viowa la naṣa suṃa piar kare ita ke ne, monar towarplanian, ana toṃareran kiririen e mrapa piavi naṣa sike e marata, naṣa sitomiena na ligana ve su re si e ita, kieta sitomen la ve piayavi ga.

² Tekira tevisuar manene Yesu, naṣa suṃal sike e luas nen mrapa gare. Naga pe purṣes nen mrapa na viawaena, a pe kana luas ṃena ga, ana pogos naṣa tesitoṃalia, yoko la m̄areraena van ita. Tekilia tesitomyu si pogos naṣa naga p̄ar ke yepe lalaea a naloge viowaena meta e lak torovia, naga sitom korenan ga pogos m̄arera naṣa naga pana. Naga mligan kiena sitomena m̄arera su ga e pupia kekarena naṣa sike e marana, kila ṃa pano-o tauluia, ana nanagane teke e lepasnena ne Ntewa na p̄amarua, e pupia lelana wa ma e peni. ³ Popon tesitomyu ṃa Yesu, e pogos naṣa yeririna viowa la nene akuan make visen viowa la panian, sinela kar manene paṣisi, ana naga taṃan ga naga pano tol luas. Sanene, ita ṃena popon ve sineta maren re yuṃaena vilaga, a taṣatete temarau, ve tesitom re urmatanen ya naṣa monar tekila. ⁴ Pona tesitom ke tesape temloge piowagan kilaen mara temio p̄elaga viowa ana torok yo narui, sineta mare, ana pe tetol re ya naṣa Yesu kila poli wa, pe tesu wo li re mlamulen viowa poli wa, pano-o kata kuruta mlau e yepeta. ⁵ A popon ve sineta p̄esan re visena na iilaren naṣa Arimata Ntewa pisa pan ita, sape pio ita sane narina lala, sape

“Naruu, visae nevisu popon sane naloge viowaena tai imi tol ko, ve ositom korenan re,

pona visae yam laḗasa nevisu sane monar nela nakoarena van ko, kioḗna sitomena ve lor re, komin kiau ḗelaga navian koena naga sanene.

⁶ *Visae la naḗa sineu sii la, yam laḗasa monar nekila aloge viowa, a la naḗa nepe Arimala, yam laḗasa monar nowela.”*

Ḗakaiwa 3:11-12

⁷ Sanene, visae pog tai ovisu sane ve sanene van ko, monar oḗarera, otaḗan ga sane mrapa ke tai naḗa Ntewa sinenan sape vian ko e narui, sinenan sape kila ruru kioḗna malena ne. Ita punu naḗa tepe ata, tesuḗna tekila ke sanene pa narita lala, ana visae Ntewa pisu ita sane narina lala, naga monar kila ḗmena ve sa ke nene van ita. ⁸ Sur nene naga yoko ita make tetolia, a visae ve kila re van ita tai, naga pisu yaru nena sane pe pe narin ruru re napo poli, naga pe narin yar nae ga koyo tai. ⁹ A nanua sumo, ita make ga, pogos naḗa arimata la amla ke nakoarena pan ita, pe sinetan re poli, ana pe lelaga, nenaga ne tepisu kilale sane amesmes ga, a kila sane tesitom la va la sane. Ve sanene na, popon manene tewatanon Arimata e ninuta, tekekaran ya naḗa kila pimi ḗmalivin ita, vanon naga ke nene narui pe mrapa na malena.

¹⁰ Arimata lala amla ke nakoarena pan ita e kas la naḗa tepe sisi ke ga wa, akila sanene komin asitom asape yoko wo la sane van la ke sina ga, ana pogos naḗa Ntewa mla nakoarena pan ita, kila vena yoko wo ke sina ga van ita, vena ita ḗmena ga tekilia tetol kiena malena wa. ¹¹ Nakoarena pe sur tai naḗa e ke e kana pog na kusena, pe kiki re nena ga, melkalka paḗisi. Ana siraunia, visae tetaḗan naga vian ruru kieta malena, yoko war mras napo lala, sane ḗelaga na moḗauena a suḗarena, amio ḗelaga na waena a na mesmesuena. ¹² Ve sanene, visae sur ya naḗa avitaweia, amiu akilali sane navisawaliena Aisea pisa sumo, naḗa sape

“Avisir plan limamiu la naḗa tayoi sike ne, akila la akulul sina, a purpur na lamiu la naḗa miyuyuwawa ke ne, akila la aḗarera sina.”

Ais 35:3

¹³ Sanene, amiu ḗmena ga akila ruru si kiamiu mrapa la amesmes ruru wo, ana kiamiu laulu la naḗa ayaloro atavevea, yoko lala ve viowa manene re la sane, ana yoko imi ḗarera sina.

Avisuar ruruia ve akila pal re mrapa

¹⁴ Sur lua na waryoen silaga la sanini. Tai, naga ḗelaga na ve erau woena amio yeririna taḗena lala, a ta sina, naga ḗelaga na malena wa naḗa yaru monar se ea visae sinenan sape visu marana ne Ntewa na mava. ¹⁵ Ana monar ayuḗnae ḗarera vena ve amiu yar tai naḗa kirir ḗna pano-o ḗisi ga e mrapa komsusia, naḗa pe tol re lemamienna kiena ne Ntewa poli wa. Ovisuar ruru ḗmena ga naḗa ve narin ḗeligas melkalka ve imi tawa re e sineḗna. Visae pere, ḗisi na kapuru war mras la ve moki naḗa piowa e kioḗna malena, a kana kororak ne la ve kila kare re malena wa kiena ne li na lelagaena wa taḗena lala. ¹⁶ Monar ḗelaga viowa na yerḗene amio sira ve imi re e amiu, a monar ve ḗelaga nasineḗesan ruruen re Ntewa, sa naḗa Esau kila nanua sumo. Esau nene, Ntewa kilologia naga pe ḗearu kiena ne arimana vena kilia war lalimana ve kiena, ana pogos tai naḗa visokaria, mlopon ponos nen pursi wo naḗa wenla na vetokaki Sekop miyuḗaenia, ana mias lua sitomienna kiena ne Ntewa e kiena malena, pisa pa wenla, pisape “Ei, ola pursi nene im van inu nagane, a lalimana ne ata make ga naḗa pe kiau, ana nela vaniko.” ¹⁷ Ana sa naḗa tekilia ḗa rui, siraunia Esau pisa sape yoko war maran si lalimana ne arimana ve kiena, ana apisalupa ga, vanon naga ḗiliwilin plan rui. Ana mloge piowagania, tagi pano-o kila ḗele ga rui. Naga sitom ke sina ga, sape sa ve kila re ga, ana nagane kilalu rui.

Tavie naḗa Sinae na yomarava, amio tavie naḗa Saeon nae peni

¹⁸ Ana popon tesitomli si ve tokak ga e lepas nen navisaluaena na sumo wa, amio lologena wo kiena ne Yesu Kristo naḗa pimi ga na wa. Sur lalua nene pe taḗena paḗisi, ana sur nene tekilia tevisu kilale e kala tavie la lua.

Tavie na navisaluaena marua, nane Tavie Sinae, naḗa na yomarava ga nini. Kieta li marua le Yu lala akilia apisu e kilamarala, ana apisu sane pe pupia yo wa na marauena, naḗa kap ḗeke ea a kana pulḗalu ne lala yo malolo ga rui, amio kan yaku nena naḗa yemalolo kalo make ga, a lagi tai miyui lue ga ea. ¹⁹ Ana pupia kana kumasua nena

miyelyelu m̃alia, ana amloge pulgo tai pis naḗa urmi paḗisi, kila sane amarau pano-o, atag asape ve visa re si sur tai van la. ²⁰ Apisu sane yo nene pe wa paḗisi, akranwo ruru nena, sane visae sur mal ya naḗa waro lavisin tavie nene, kus pal laea, yoko monar akoveḗaria. ²¹ Ana yermarua Mosis pisu sur la nene, naga m̃ena marau, pisape “Lelaga naḗane, nemiyuwawan ga marena.”

²² Naga nene tavie wa na navisaluaena marua na sumo, ana nanagane na pe tepa re si e poli, tepim e tavie wa viu na lologena wo nene na Tavie Saion. Naga sike ma e peni, naḗa pulkumali kiena ne Ntewa mali m̃eke ea, naga pe Yerusalem viu ne nae yo mava. Naga pulen ga navisi lala, mok na mok naḗa sane apulopule ga, naḗa asuvileviles kar ga vena kilaen yauena na kekarena. ²³ Ana likan la, ita ḗegas na li na lelagaena wa la tesike lele taaga ea, naḗa ita tepe sane m̃earu lala kiena ne Ntewa naḗa teḗar lalimana. A amio ita m̃ena, ninuna ne kieta yar mare lala asike ea, nane la naḗa amesmes ruru pa rui e yomarava, ana pogos naḗa amare, aḗure plan la apa atol luasnen mrapa natamaliaena, naḗa apa asu ruru e yo nene. A yaru naliḗereena m̃ena tai totano teke metava e yo nene, naga pe Ntewa na sur make ga. ²⁴ A amio sur wo taḗena la naḗa asike e kieta kunus wa nalologena wo nene, tekilia tevisu Yesu, amio kana kuruta naḗa mlau, naḗa apeven pa e losineta lala vena kila temekiki. Kana kuruta nena, pe sa re kuruta kana ne yermarua Epol nanua poli, naḗa asape kuruta na ween yaru, a kuruta na kilamaranen napiowaena, ana kana ne Yesu naga pe kuruta na tamaliaena yaru, a pe kuruta na viewoena. Yesu kila po paḗisi wa, naḗa suḗal su likan Ntewa amio yaru, kila kiela naviranarena viu lalua suḗalu ruruia, vena kila lalua ave erau wo sina.

Ayagogon ruru pulgona ne Ntewa

²⁵ Navisaluaena marua, naga sane visena na kilaḗegeena ta naḗa paeme e yomarava nini, a lologena wo, naga sane visena na kilaḗegeena ta naḗa pitom ma e peni. Ana la naḗa apilon m̃asila pan navisaluaena marua nene, taḗatete nena aurmatan nakoena ḗisa, ana visae ve sanene, yoko ve sanapen la naḗa apilon m̃asila pan lologena wo? Yoko taḗatete nena aur matan ve tokaki. Visae ve sanene, popon teyagogon ruru pulgona ne Ntewa, telogearia. ²⁶ E pogos naḗa Ntewa pis pa yermarua nasumo la nene, kiena visena urmi paḗisi kila yemninu, ana siraunia, kiena visaaren tai pisa si mon metavana, sape “Yoko yam si tai nokululun make yo punu ga, ve yomarava re ga nini, a amio make yo la ne ma metava yam veraga.” *Akai 2:6*

²⁷ Visena naḗa pisa e nini, naḗa sape “Yam si tai,” naga pisa ke sur keviu ta ne. Naga kana kinasa sape Ntewa kululun yo yam tai rui, ana kiena sitomena m̃arera sike ga wa sape kululun li si yam tai ana visu ruru li make ga suria. E legiena maro yoko kululun wowa yomarava nini, amio sur make naḗa naga sii la sike ea, ana yoko sur naḗa taḗatete kululun rovia yoko suḗal m̃arera sulue na sike ne. ²⁸ Sur ga tai naga kilia su lue na sike ne sanini, nane nasuḗenena kiena ne kieta Ntewa nena, a potena paḗisi naḗa mligan kieta malena su ruru sike loyuḗa ea. Popon silaga tekila lotena wo tai vania naḗa kilia kekarania, tepisu kilale naḗa naga pe na wa paḗisi, tewatanonia. ²⁹ Komin kieta Ntewa naga kapi ke nene narui, naḗa kilia sikap van make sur punu ga.

13

ḗelaga la naḗa Ntewa kekarania

¹ Visen si laḗas nini vena iila amiuena, naga sanini. Popon asuḗa akekaran amiu lue ga, sa naḗa kam na ape mratava taaga ga amio Kristo. ² Ana ve akekaran amiu re ga, akekaran ke m̃ena wolawa lala, akekaran naḗa avisuar la e m̃amiu uḗa lala. Popon akilakila sanene, komin pog laḗasa, kam na amninue ga, ana wolawa la naḗa apisuar la ke ne, la na navisi kiena ne Ntewa ke la narui. ³ Asitoḗal la naḗa asike e yuḗa nakoena, awar pae kiela naloge viowaena lala, sa ga naḗa akoven amiu m̃ena apa asike amio la. Kam na ve sinemiu ḗesan re m̃ena la naḗa yar taḗena la asuḗa akilakila kare la ke silaga,

komin ita punu ga tesike e yomarava nini, a monar tokus pae pogos m̄arera la naḡa yoko tevisuia.

⁴ Popon yar make ga avisu kilale ḡelaga na talopaena naga pe sur wo a pe sur wa m̄ena ga, a komin sur ne nanene, pe pon re si kororak tai imi kila kare tog naḡa aḡaenia pe m̄ala lalua naḡa atalopa, komin lalua apisaaria asape yoko ve aure re si taḡena. Yoko Ntewa la na liḡereena va la naḡa amiyalyal kar ga, sane li na talopaena naḡa akila kolau, pona yar viu la naḡa akila lau.

⁵ Ovisuar ruruia naḡa ve oligan re kilavaru imi ve suri na sumo e kioḡna malena. Popon okila ko okekaran ga narin ya naḡa teke e lumoḡna rui, komin navisaarena kiena ne Ntewa naḡa sike pa rui, pisa sanini, sape

“Taḡatete neligan ko yam tai, taḡatete nevilon m̄asuu van ko.”

Lev 31:6

⁶ Ana pogos naḡa tesitomyu si naga nene, mla si naḡareraena pan ita, vena tevisawal visena naḡa sike e Tus na Yauena lala, pimi pe kieta visena, naḡa tevisave

“Yar na iila ruru inena, naga Ntewa na mava ga,

ana ve nemarau re si narui, yoko yar taḡena kilia kila si ya ne viowa van inu ne?” *Yauena 118:6*

⁷ Sur taḡena, popon asitoḡalar m̄na kiamiu nasumonena lala, naḡa apisawal ḡesan visena kiena ne Ntewa pan amiu. Avisu veve ruru mras naḡa molue kome ḡelaga wo na kiela malena, a akila ga nono na kiela lelagaena m̄arera e kiamiu malena lala. ⁸ La amlelaga ruru po, ana ita m̄ena tekilia telelaga, komin Suḡe Yesu Kristo naga piloulou re pogos tai poli, naga maran taaga sa ke nakoneva, ḡane, a peni, sulue na sike ne.

⁹ Popon tevisa m̄ena tevisave avisuar ruru amiun visena kar taḡena lala amio navian wowenen lala ve aim aure plan amiu re vetan kove wo naḡa kam na asike pae rui. Yar laḡasa asitom manene la e ḡaḡagena wa lala, amio kala kinanena ne lala, ana kinanena la nene taḡatete nena iila kiela malena lala. Sur taaga ga naḡa kilia kila sineta la m̄arera ruruia, nane lemamiēna kiena ne Ntewa pimi pan ita. ¹⁰ Kinanen la ne tai ne sanene, naga nane kilaḡiu na kuḡaḡaena lala naḡa yaru wa la akuan ke e wonta. Amlenwoia, akila pa yuḡaena la e narui, ana siraunia akania sa naḡa akinan kala ke narui. Yar wa la nene la amal ga e kinanena na wonta la nene, ana ita naḡa temlelaga e Yesu, ita na pe tekinan re e wonta nene poli, ita na kata wonta taḡena m̄eke na, naḡa temal e kana kuḡaḡaena nena naḡa akuan su ea, naḡa yar wa la pe apisu kilale re poli, a la taḡatete akinana ea.

¹¹ La asuḡna akila ke kiela kuḡaḡaena la nene, ana tai na pe taḡena towe laa sane, sa naḡa asape kila totou na marena kiena ne Yesu, kuḡaḡaena nena naga naḡa asape na lakorenanena na viewoen mlamulen viowa, ana pogos naḡa ḡarin yar wa kila naga, naga pe kus make re tas nen sur mal pa loyuḡna naḡa pe yo wa manene poli, ana ḡar ga kana kuruta, pa mligan se wonta. Ana tas nen sur mal nena, akuslua si petan uḡna, akus pa vanua, ana askapia.

¹² Naga sa nenaga naḡa Yesu kila, naḡa akus m̄ena naga pa vanua e purkove na pulkumali, akila mloge m̄na piowa pano-o kana kuruta mlau make nenaga, naḡa pe mlau koren re poli, ana mlaun naḡa kila ita kiena yeririna lala tepim tepe yar wa ruru nena napo lala e marana ne Ntewa. ¹³ Ana komin naḡa Yesu kekaran sape kila ve sa nene vanon ita, ita m̄ena ga monar tekekaran teva tesuḡnal tesu temio naga vanua e uḡna, yar la avisu kare ita sa naḡa apisu kare naga, tokus naloge viowaena ve sa ke ga naḡa naga kusa. ¹⁴ Visae viowa ga van ita e yomarava nini sanene, sanene na pogaga ne, komin naḡa pe tesitom re tesape yoko tesike e pulkumali tai e nini ana tesulue poli, ana temligan kieta sitomena sike ga e m̄ata uḡna napo e pulkumali viu naḡa tepanon ke rui.

¹⁵ Popon kemua tesitoḡal lue ga naḡa Yesu kila po manene la pan ita, naga pietavan ita e mrapa rui ana silaga tekilia tevisa potena va Ntewa vanonia. Ve tekila re kuḡaḡaena e sur mal la vania, ana nalaena tai toḡna ga naḡa tekilia tela luen ga van silaga, naḡa yoko kekaran vaḡisi, naga nalaena na yeluarena. Tesuḡna tepisirlua ke kiena kia sanene, ana visena na gota ne lala sa ga mralak tai naḡa kiki ruru nena po pania. ¹⁶ Visae sanene, ve sineta ḡesan re naḡa tekila yuḡaena wo lala, komin naga sane kuḡaḡaena naḡa tekilia

tela va Ntewa. Tai naŕa naga kekaran manene la sane, naga sanini, sape tekila luen ga wo va yar taŕaena lala, tekekaran ga naŕa teviovion kieta sur la temio la.

¹⁷ Sur si laŕasa, sane monar telogear kieta nasumonena lala, monar tekekaran ga naŕa tesu vatanon kiela visena lala. La aŕion ke paŕisi naŕa avisuar ruru ita, komin naŕa pupia yerkaŕa kerkeviu la naŕa asu metavan la asuŕna apisu veve ke kiela yuŕnaena a kiela ŕelaga ŕmena lala. Visae kieta nasumonena lala, kiela sitomena la marmare, ana yoko yuŕnaen make ga va viowa nenaga, ana visae telogear ruru la wo, yoko kila yuŕnaena ve urmi manene re van la, akekarania, ana yoko wo manene ŕmena van ita, yar na yuŕnaena lala.

¹⁸ Pogaga, lavis ke visena make la ŕisŕis narui, ana sinemimin mesape meviun ŕmena tan amiu mesape asitoŕnal imimi e kiamiu leniena lala, vanon yoŕarera naŕa mesike e nanagane. Pe mepisu re sur tai piowa teke e imimi poli, kiamimi sitomena la merarava ruru ga, a mesuŕna mesuŕalu ŕarera lue ga mesike e ŕelaga wo la naŕa mesmesu e maran yar lala.

¹⁹ Ana sineun nesape visena la nene akila ruru vilaga, vena nekilia neviaŕa e nini ve piavi re nowasuŕe si neiŕas pun amiu. ²⁰ In na nesuŕna nemlen wo amiu ke ŕmena ga, nesape yoko Ntewa iila amiu. Naga pe Ntewa na suŕare, naga pe Ntewa naŕa sinena miye ita kiena sipsip lala, ana pitetalia kieta Suŕe Yesu pitom e yomarava nini, pitom pe yerkaŕa na visuaren kieta sipsip lala, kana kuruta mlau vena visirluaen naviranarena viu naŕa yoko sike sike nena. Naga pe Ntewa ŕmena naŕa Yesu taŕnan kiena malena pania, ana naga ŕerelua petan marena, pisirlua malia sina, ²¹ ana noŕasine naga nesape yoko la sur nowo make ga naŕa kam na sinemiun ke nanagane vena kilaen kiena yuŕnaena e yomarava nini sa naŕa sinenania. Naga suŕna miyuŕnae ke e kieta malena la pe ve taaga, komin Yesu Kristo suŕna miyuŕnaen ke kieta ŕelaga wo vim ve sa naŕa naga sinenania, ana yoko teieluar manene naga vanon vano-o taŕatete ŕisi, Sanene.

²² Na mratava pun inu lala e Kristo, nesiri ŕŕaki nini piŕnasu pan amiu, pona visae ve ve piavi manene re yo, ana visae avisu ve sanape kam na ve sinemiu karin re, ana kam na ala kiau visena na iilaen la naŕa sike ea.

²³ Sineun nesape nevisawal van amiu aloge kieta wolai naŕa Timote, amligan lua si naga molue petan yuŕna nakoena rui. Visae ve ve piavi re imi kom e nini, yoko imimi lua, meiŕnas mevisuveve amiu.

²⁴ Sinemimin mesape avisawal va kiamiu nasumonena lala, amio ŕmena yeririna taŕena lala kiena ne Ntewa, avisave mepiun ke mesape la asike sanape, asururuga pona sanape? A le Italia la naŕa asike e nini la ŕmena sinelan asape avisa pokolemalo van amiu. ²⁵ Kiau visena maro nae e nini, nane nesiri van amiu narui, nesape yoko lemamiena wo a sinewo kiena ne Ntewa sike amio amiu make ga.

Ñaki Naña
 SEMES
 Siriyuia
 Visayuena Na Tusi Nene

Suniena plas na tusi nini

Ñaki kiena Semes, naga kiena visena wo lala naña vena vianen yeririna lala kiena Ntewa naña asu tetai asike e yo punuga e yomarava nini. Semes naga kila totou la mokliu e kiena visena vena iilaen yaru lala, vena atol sitomena a kiliaena wo lala. E ñaki nini, naga pisayu suri moki naña nalelagaena lala monar kiela sitomen tolia a monar akila. Naga sape nalelagaena naña limana korena, naga monar kekara pogos naña visae Ntewa visirlua naga va metava, a nalelagaena naña kiena suri moki, naga monar kekara pogos naña visae Ntewa ligan naga vito su tano. A pisayu ðelaga wo naña yaru monar kila, a naga sape lelagaena a yuñmaena, suri lua nene lalua monar akiriri lele taaga. Pisayu ñena sape yaru naña kila ke ðelaga wo na iilaen yaru taña, yoko kiena lelagaena ñarera.

Semes pisayu suri lala na kilalien yaru lala, a naga sape yaru naña suri la aimi akilalia, ana naga suña ðuarar ke ðelaga mesmesu, naga kilia loge wo. Pisa sape nalelagaena monar ve tañan re gona visa suri viowa, ana monar yeluar ga Ntewa ea. A pisayu manmaruaena naña Ntewa kiania, amio ðelaga taña leñas naña po, sane ðelaga kiena yaru naña kila kiena sitomena pito ga tano, pona kila kiena sitomena piyavi. Pisayu ñena ðelaga lañas naña piowa, sane yaru la asuñma apeveyu, apilave pañisi, amila nakoena pa yaru taña, pona akila kiela sitomena pa metava.

E ñaki nini Semes pisayu lotena naña navisatañeena sike ea, a suri keviyu si tai, pisawal ruruia naña lelagaena amio yuñmaena wo, suri lua nene monar asike lele taaga e maliena kiena yaru naña lelaga, ana nanini naga taveve sitomena kiena Ntewa.

Komñasnen tusi la na nini

Visena ðesa 1:1

Ðelaga na lelagaena a ðelaga na manmarua 1:2-8

La naña limala korena a yaru na suri moki lala 1:9-11

Suri na kilalien lelagaena kiena yaru 1:12-18

Yaru naga monar loge visena kiena Ntewa a monar kila suri la naña visena nini pisa 1:19-27

Visena na kila woen yaru pisu suri piowaga e yaru taña 2:1-13

Lelagaena a yuñmaena wo 2:14-26

Li nalelaga monar visuar ruruia e kiena visena 3:1-18

Li nalelagaena a ðelaga lala na yomarava 4:1—5:6

Suri taña la naña Semes pisa 5:7-20

Visen ðesia

¹ Inu Semes inu nepe yaru na yuñmaena kiena ne Ntewa, a kiena ne kieta Suñe Yesu Kristo, naña inu nesiri luñaki nini pimi pan amiu naña amiu lus nae Israel lala lualima taaga pa lua naña amiu asutetai asu ke e narin ðegas lala e yo punu ga e yomarava nini. Inu nepiun nesape sanapen amiu asu pogaga pona amiu na asike sanape?

Naviawaena amio namanmaruaena

² Puruvi lala a vineu lala, pogos naña na kilaliena lala imi e amiu, amiu na akilia avisu la sa naña suri nalogewonena. ³ Nanene na sa naña amiu akilia, pogos naña suri nakilaliena naga kilali kiamiu naviawaena lala, ana amiu atauluia, nanene kila kiamiu naviawaena imi ñarera manenea vena suñmalu sulue. ⁴ A pogos naña amiu asuñmalu ñarera sanene,

nanene naga kilia kila kiamiu malena mesmesu ruru wo vaḗisi marua ruru nenaga a ule ruru e suri wo la punu ga, pe ḗelaga wo re tai naḗa naga pe kiena re poli.

⁵ Ana visae amiū yaru tai naga sitom pisape kiena manmaruaena ve tokaki ga, naga monar viun tan Ntewa e kiena leniena, ana Ntewa kilia la van naga. Vanon naḗa e ḗelaga kiena ne Ntewa, Ntewa naga taḗatete visi viowa va yaru naḗa naga viun suri tania, vanon Ntewa naga mlaluen ga nalaena wo silaga e kiena sinewo. ⁶ Ana pogos naḗa yaru viun suri sanene e kiena leniena, naga monar lelaga m̄arera, naḗa naga ve sitom ḗele re sina, vanon naḗa sitomena kiena ne yaru na sanene naga sane sive naḗa lagi miyuia kulkululu, lagi suḗa supon kare ga pa e yo punu ga. ⁷⁻⁸ Yaru na sanene, kiena sitomena peve lua, a kiena ḗelaga lala kar ga, ana yaru na sanene taḗatete si sitom visave ḗisi na la suri wo tai e Ntewa.

Yaru la naḗa kiela suri re poli, a yaru la naḗa kiela suri la moki

⁹ Kieta puruvi laḗasia limala korena ga, pe kiela suri re poli, ana la popon awarwar la vaḗisi naḗa Ntewa pisirlua kiela sitomena pa metava, ¹⁰ a kieta puruvi taḗena m̄ena ga lala, naḗa la kiela suri moki, ana la m̄ena ga popon awarwar la manene vaḗisi, komin naḗa Ntewa naga kila kiela sitomena la sike ga tano. Lala akilia akekara sa naḗa la apisu kilale asape yaru naḗa naga kiena suri moki, naga sa ga naḗa meme tai naḗa to yam plas ga. ¹¹ Pogos naḗa mrae pa metava, naḗa yo pisun paḗisi, ana mlege meme la nene la apimi ameu, ana akekapili pito tano ana maran meme la nene kokovio. A e ḗelaga ke nene, e pogos naḗa yaru na suri moki lala asuḗa akilapolo ke kiela kilavaru lala wa, ana ḗisi na la aloru m̄ena ga akokovio.

Nakilaliēna lala

¹² Yaru naḗa suḗmalu m̄arera e nakilaliēna lala naḗa aimi e naga, navisa ruruena sike e naga, vanon pogos naḗa naga taulu suri la nene ḗisi, ana Ntewa yowauia ruru naga e nalaena wo tai, naḗa naga namalena nene naḗa Ntewa naga pisaaria ḗisi rui pan la naḗa la asitom manene naga. ¹³ Visae nakilaliēna lala imi e amiū, ana la ataḗali amiū, ana amiū na ve avisa re avisave “O, nataḗaliēna la nene la amolue e Ntewa.” Amiū taḗatete avisa ve sanene, vanon naḗa taḗatete suri viowa naga kilia taḗali Ntewa, a ḗelaga nakilaliēna yaru Ntewa naga pe kiena ḗelaga re nene poli. ¹⁴ Nataḗaliēna la nene apimi m̄arera e yaru, e ga e pogos naḗa kiena nasinenanena viowa ga naḗa kila luḗeluḗe naga, ana pure naga pano. ¹⁵ Siraunia, ana nasinenanena viowa nene naga pitovi pimi keviu ana naga ḗar narina, naḗa mlamulena viowa, a siraunia, pogos naḗa mlamulena viowa nene naga m̄ena ga pitovi pimi keviu, ḗisi na naga m̄ena ga ḗar narina, naḗa naga marena.

¹⁶ Kiau puruvi wo lala, ḗisi na amiū avisuar ruru amiū, ve ataḗan re yaru la aimi avisa kotalia amiū, naḗa la avisave “Nataḗaliēna naga pimi e Ntewa.” ¹⁷ Amiū na monar akilia sa naḗa suri wo punu ga, a nalaena tanea punu ga, la amolue ma e peni la apitomi e ita. La amolue e Ntewa naḗa naga sii suri lala punu ga naḗa la apivavaga ke e sinapane, suri vivavaga la nene naḗa la akilia avilolou la silaga, ana naga kiena ḗelaga pe pe taḗena re nena pogos tai poli, naḗa naga taḗatete vilon m̄asina van ita pog tai, vena ligan ita tesuḗa ga e yemalolo. ¹⁸ Nane Ntewa ne nanene naḗa sane kiena sitomena ga, naga kila ita tepimi tepe narina, komin naḗa ita temlelaga e kiena visena lelaga, vena ita na sa naḗa teve mras ḗesia na yeririna moki lala naḗa ḗisi na lala alelaga mare e Kristo sirau.

Ita monar telogear visena kiena Suḗe

¹⁹ Kiau puruvi wo lala, ḗisi na ve sinemiū ḗesan re visena nene, naḗa apisape yeririna punu ga monar avitaḗilin yagogoena, a monar avis male ga. A monar ve avitaḗilin re m̄ena ga sinekarena, ²⁰ komin naḗa nasinemimienā kiena ne yaru, naga taḗatete nenaga kilia kila ḗelaga namesmesuena kiena ne Suḗe imi kate pog tai, peraga. ²¹ Ve sanene, amiū na monar akoven plan ḗelaga namname lala, a yuḗaena viowa lala e kiamiu malena la wetelu, a amiū monar aligan kiamiu sitomena suḗa vatano e Visena Wa naḗa naga kilia tamalia amiū, naḗa Ntewa naga mapila e losinemiū lala ḗisi rui.

²² Amiu monar akila ya naþa Visena Wa nene naga pisa, pe pon re naþa amiu asuþna avisa kotalia amiu ga poli, naþa amiu asuþna ayagogonia ana amiyagogo korena ga e Visena Wa nene, amiu pe akila re suri la naþa pisa ke poli. ²³ Nanene sa ga naþa yaru tai pisu marana e wii naþa ato e kilika, ²⁴ naþa pogos naþa naga pure petania, pog plas laa ga nene, naga sinena þesan ke sina ga marana pisape mna naga marana sanape wa. ²⁵ Ana yaru naþa naga pisu ruru loyuþna e navisaluaena wo nene naþa naga kilia wereplan ita e mlamulena viowa, a naga yagogo ruru ea, naþa naga ve yagogo korena re ga þisi sinena þesania, ana naga logearia a naga yuþnaenia, yaru ne nanene narui þisi na Ntewa naga visa ruru naga e kiena yuþnaenia punu ga.

²⁶ Visae yaru tai naga sitom ke sape naga pe yaru mesmesu nalelagaena tai, ana naga pe þuarar ruru re purmenena poli, naga suþna pisa kotalia ke sina ga naga, a kiena nalelagaena pe suri korena ga. ²⁷ Ana þelaga na lelagaena naþa mesmesu ruru po, a naþa naga pe lelaga kemua naþa po e marana ne Ntewa, naga sanini: þisi na amiu aialiali ninuyu lala a letano lala, vena aiila la e kiela malena mmarera lala, a amiu auarar ruru kiamiu malena mmarera vena þelaga viowa amio kororaki lala na yomarava ve atolkare amiu re.

2

Amiu na ve awaveve re yaru lala

¹ Kiau puruvi lala a vineu lala, sa naþa amiu apiawa e kieta Suþe Yesu Kristo, naþa naga pe Suþe Nawarwarena, þisi na amiu ve awaveve re yaru lala, naþa amiu akila wo van laþasia, a amiu akila viowa van laþasia. ² Sa naþa visae yaru la ve lua, aimi loyuþna e kiamiu yuþna na leniena, tai naþa kiena suri la moki naþa mna kulsota miyowau ruru po a naga miyen pialaliga tai naþa pe kol teke e mrasilmana, a naþa taþena naga pe kiena suri re poli, naga mna kulsota la pororo ga, ana þisi na amiu ve akila re ve taþena van lalua nene. ³ Pe pon re naþa amiu asitom manene yaru naþa naga mien kulsota naþa miyowau ruru po poli, naþa amiu aure naga va e yo naþa po a avisa vania avisave “Þaraga leleþna napo nanene, imimi sinemimi mesape ko ototano e yo nene,” a e yaru taþena nene amiu avisa ga avisave “Þisi na ko osuþnaluga osuþna varau e naþna, visae peraga oto ga tano e naþna.” ⁴ Pogos naþa amiu akila ke þelaga la ne sanene, amiu na asuþna apisuvisu yaru laþasia la apo, a yaru laþasia la apiowa ga, nanene na vanon ga suri la naþa la amien ke ne, a kiamiu navisuena na sanene naga pe þarpooyo re nena e sitomena wo nene poli.

⁵ Kiau puruvi lala, amiu aloge inu. Yeririna la naþa na yomarava nini la naþa limala korena ga, Ntewa naga pure plan la nene la ape kiena, vena naga kila sa naþa la kieta suri wo lala e lepas nen kiela nalelagaena lala. A Ntewa kila mna ga ve sanene vena akilia ava ala kiela lalimana lala e nasuþenena kiena, sa naþa naga pisaar þisi rui pan la naþa asitom manene naga. ⁶⁻⁷ Ana amiu na asuþna apisuvisu ke yaru la naþa la limala korena la sane ape kororak ga. Ana amiu na asitomyulia: ?A la naþa la asuþna aþene amiu ke ne naþa la asuþna aþure amiu ke apa kumali? ?A li pe mna ga la naþa la asuþna apiuelin amiu ke e kia keviu wo nene naþa Ntewa naga mligan e amiu? Nanene na pe yeririna re la naþa limala korena poli, ana nanene na yeririna la naþa kiela suri moki.

⁸ Mrapa mesmesu naþa amiu ataveve e nene naga sa naþa purþes nen navisaluaena kiena ne nasuþenena kiena ne Ntewa pisa naþa naga pisa pisape “Ko na ositom nalavis puþna lala, okila wo van la, ve sa ke ga naþa ko na ositom ko mþaga.” ⁹ Ana visae amiu asuþna avisuvisu ke yeririna lala awaveve la ke sanene, nanene na amiu asuþna amlamula ke piowa nene ne, a navisaluaena kiena ne Ntewa þisi na naga liþere amiu visae amiu na ape yaru na kilaroen navisaluaena. ¹⁰ Komin yaru naþa naga kilaro ga visena kiena ne navisaluaena ve taaga ga, naga kila ke mlamulena viowa ne e marana ne Ntewa, naga sa naþa naga kilaroro make visena kiena ne navisaluaena la nene punu ga þisi narui. ¹¹ Komin Ntewa nene naþa naga pisa pisape “Þisi na amiu ve ataþa re kolau,” nanene na Ntewa ke ga nene na wa naþa naga pisa pisape “Þisi na amiu na ve aweþnar re yaru.” A visae amiu ve ataþa re kolau ana amiu aweþnar ga yaru, þisi na amiu na ave yaru

na kilaroen ga navisaluaena narui. ¹² E pogos na liḗpereena, ḗisi na Ntewa naga ve la re nakoena van amiu sa naḗa ḗisi na naga la van yeririna viowa lala, ḗisi na naga ure plan amiu e nakoena nene narui. Komin suri ne nanene, kiamiu visena lala a kiamiu yuḗaena lala naga monar ve sa naḗa amiu na pe akila re suri tai naḗa mesmesun naḗa amiu akus nakoena vanon poli. ¹³ Nanene na komin naḗa Ntewa naga sinena mie amiu, a kiena nasineyeena nene naga ḗisi na yumuvanlua naliḗpereena naḗa naga mesmesun naḗa amiu akusia. A pogos naḗa Ntewa naga ḗisi na liḗpere yeririna la naḗa la pe sinela mie re yeririna taḗena poli, ḗisi na naga ḗena ga taḗatete sinena ye la.

Ḗelaga na viawaena a na yuḗaena wo lala

¹⁴ ?Puruvi lala, sanapen naḗa visae yaru tai naga suḗa visa ke visave naga piawa ke e Kristo, ana ḗisi na naga pe kila re yuḗaena wo la poli? ?Ḗisi na kiena naviawaena ga nene naga kilia tamalia naga, pona peraga? Nanene na, taḗatete suri wo tai kilia molue kome kiena visokanena naviawaena kiena ne yaru na sanene. ¹⁵ ?A sanapen ḗena ga naḗa visae kieta puruvi laḗasia amio vineta laḗasia naḗa la pe ḗala kulsota re poli, a la pe kala kinanena re poli? ¹⁶ Visae amiu yaru tai naga visin sineyeena van la visave “Ntewa naga visa ruru amiu, amiu na ve miava tol amiu re, a ve viso kar amiu re,” ana naga pe mla re nena suri tai pan la poli vena iila la, visave ve sanene pogaga ne pona pe po re nene poli? Peraga, kiena visena na sanene ana pe visena korena ga. ¹⁷ A kieta naviawaena na sa ke ga nene narui, naḗa visae naga suḗa naga taaga, a ve yuḗaena wo lala ve su re amio, ana kieta naviawaena nene pe naviawaen korena ga, mare ga ne.

¹⁸ Ana pona ḗisi na yaru laḗasia la aloge visena nene, ana ḗisi na la akilali naḗa avisataḗea avisave, “Naga pogaga, ana pe sa re nene poli. Ana naga sa ga naḗa yaru laḗasia, la ape yaru na viawaena, a yaru laḗasia, la ape yaru na kilaen yuḗaena wo lala.”

Ana ḗisi na inu nevisataḗea la nevisave “Visae inu nevisu ko naḗa ko ovisa ovisave ko na ope yaru na viawaena ga, ana ko na pe yaru na kilaen re yuḗaena wo la poli, ana ve sanene ḗisi na taḗatete nevisu kile tai naḗa sane naviawaena kioḗa pe lelaga. Ana visae ko ovisu naḗa nesuḗa nekila ke ḗelaga wo lala, nanene kilia kila merarava van ko sane kiau viawaena naga pe lelaga kemua.” ¹⁹ Ee, inu nekilia ḗaga naḗa ko omlelaga naḗa Ntewa taaga ga sike na, nanene na po paḗisi nene. Ana nevisa van ko, yermare ḗena ga lala la amlelaga sa ke ga, ana la asuḗa amiyuwawa paḗisi vanonia. ²⁰ Sa naḗa nesuḗa nepisa ke ne, yaru naḗa naga pisape naga piawa ḗaga, ana pe kila re ḗelaga wo la poli, kiena naviawaena nene pe suri korena ga, yaru na sanene na pe wowe ga nene. ?Pona amiu sinemiun asape nevisa meraravanli la suri nene sane wa? ²¹ Pogaga, amiu asitomli repita naḗa Epraam ne. ?Ntewa naga kila Epraam naga mesmesu e marana vanon ya ne? Nanene komin naḗa Epraam naga ḗere narina naḗa Aisak, piar naga e wonta, ana taḗan narina nene pisape kila kuḗapaena ea va Ntewa. ²² Amiu apisu ke ne, e lele nene ita tevisu naḗa naviawaena kiena ne Epraam a kiena yuḗaena lala, ana suri la lua nene amiyuḗae ga lele taaga. Kiena yuḗaena lala la akila sane kiena naviawaena naga pe lelaga ruru kemua naḗa lelaga, ²³ a suri nene naga kila Visena Wa pe lelaga kemua, naḗa pisa pisape, “Epraam naga piawa ke e Ntewa, a pe miasi suri ne nanene, Ntewa naga kila Epraam mesmesu amio naga.” A nanagane ita tesuḗa tepio ke Epraam tesape naga pe erau kiena ne Ntewa. ²⁴ Komin suri ne la na nene, ita tekilia tekirawal sane Ntewa naga kila yaru mesmesu amio naga komin kiena ḗelaga wo na malena ḗena ga, pe komin re ga kiena naviawaena poli. ²⁵ A amiu asitomli Reap nene, nanua sumo naga pe sira na mrapa ga tai. ?Ntewa kila naga mesmesu amio naga vanon ya ne? Nanene vanon naḗa naga pisuar ruru le Israel la lua nene naḗa lalua apim vinau ga apisape avisu kilia Seriko. Naga ḗerewan lalua nene e ḗana yuḗa, a ḗisi na naga kipian lalua nene e mrapa taḗena tai vena lalua akilia aure ana awasuḗela si akom ea.

²⁶ Pogaga, ana sa naḗa tas nen yaru naḗa naga pe ninuna re poli, naga mare, naviawaena ḗena ga, naḗa pe ḗelaga wo re laḗas ayuḗae veraga amio poli, naga ḗena ga mare ga.

3

Ita monar touarar ruru purmeneta

¹ Puruvi lala a vineu lala, pe pon re naþa amiu ve moki akilali naþa auarar yuþaena na vianena e yuþa na lotuena la poli, vanon naþa amiu akilia mþaga, e legiena na liþereena, þisi na Ntewa naga kila naliþereena van imimi navianena lala ana mþarera laa sane. ² Visae yeririna tai naga pe kila pal re kiena visena pogos tai poli wa, yaru nene naga po na po, naga kilia þuarar ruru kiena malena wetelu. Ana peraga, ita punu ga ita tesuþa tekila pal luen ga kieta visena lala silaga. ³ Popon ita tesitomli narin pototo nene naþa ita temligan pa teke e logon wosi. Pogos naþa ita temligania, ita na tekilia tekila wosi nene logear ita, a ita tekilia tevilon pupia tas nen wosi nene naga va e yo naþa ita sinetan tesape naga va ea. ⁴ A ita na tesitomli mþena ga waa lala, naþa pe suri korena ga naþa aurmi paþisi, a pona pupia lagi miyuia ana sinenan pisape sapon vano, ana narin þeligas ga, naga kilia kila pupia waa nene va e yo naþa yaru na uararen þeligasia naga sinenan pisape va ea. ⁵ Purmeneta lala naga sa ke nene narui, naþa la ape narin suri ga tai, ana la akilia avis molmolue ve keviu vaþisi.

Amiu na asitomli, naþa narin mþau na kapi ga tai, ana naga kilia kekan ga pupia laki lala e pupia yoþmarua tai. ⁶ Ee, lelaga kemua, naþa purmeneta naga sane kapi ta ne. Komþas nen tasneta la moki, ana purmeneta naga ta naþa suri viowa punu ga na yomarava nini la apule manene la ea, a kiena naviowaena la nene la asuþa akila kare make kieta malena wetelu. Purmeneta nene na suþa mla ke kapi e lele na loge viowaena, a naga suþa kila ke kapi nene pivaga e kieta mrapa na malena punu ga. ⁷ Ita tekilia tepisu naþa yaru naga kilia kila suri tetan lala aimi amoþau, sane suri mali na yoþmarua lala a manu lala, loþara lala, a ika lala, ⁸ a pe yaru re tai naþa naga kilia kila purmenena moþau poli. A purmeneta lala la apiowa la, a taþatete touararia, a kiela visena lala la sa ga mrasuþapo naþa kilia kilaþar yaru. ⁹ Ita tesuþa tepis ke e kieta purmeneta nene vena teieluar Ntewa Wa nene naþa naga pe Arimata, ana siraunia, ita tepis ke sina ga ea ana teþiuelin yaru taþena lala naþa ita na pe tesitom re tesape Ntewa naga sii la poli. ¹⁰ E gota taaga ga, ita tesuþa tepis po ea, a tepis mþena ga piowa ea. Puruvi lala, suri nene naga piowa manene la. ¹¹ Pe puluwii re ta naþa mon mþaga ana e pulusa si amio wii lalua akate veraga e poli. ¹² A sa ke mþena ga naþa purþik taþatete kilia war mraolip, a kilkerþ taþatete war mravik. Taþatete mþena okilia ova ovio wii e pulusive.

Namanmaruaena wo naþa Ntewa naga mlavia

¹³ Visae amiu yaru laþasia naþa ape manmarua paþisi, la akilia ruru suri po, popon lala akila suri la nene imi merarava ruru wo sa naþa la kiela malena mesmesu, kiela sitomena lala monar vito ga tano, a kiela þelaga lala monar marua ruru wo. ¹⁴ Ana visae amiu asitom sa naþa amiu ape manmarua, ana kiamiu sitomena lala apulen navielueena amio mþena ga nakalawaena, visae ve sanene amiu na apisokani ke ga ne. Amiu na ve avisvilaven re si vanon kiamiu visokanena na manmaruaena nene, vanon nanene na pe þelaga na manmaruaena re nenaga nene poli. ¹⁵ Nanene naga pe manmaruaena nae re ma e sinapane nene poli, ana naga manmaruaena na yomarava ga nini ne, a naga pe kiena ne yeririna viowa ga lala, naga pe manmaruaena naþa naga molue ruru ga kome Yermare. ¹⁶ Vanon pogos naþa yaru la naþa avielue ana la sinelan asape ato kalawa make yeririna taþena lala, ana suri la punu ga asutetai ga narui, taþatete si akirir ruru wo. ¹⁷ A visae yaru naþa naga tol namanmaruaena nae ma e peni, ana kiena þelaga ve taþena. A metava suri taþena lala, kiena malena ikik ruru wo, a naga ve yaru nasuþareena mþena ga, naga ve yaru moþau, naga ve erau ruru wo van yeririna taþena lala, a naga ve yeririna na sineyeena. A naga ve yeririna mþena ga tai naþa e kiena malena war mras la naþa po. A naga ve waveve re yaru lala, a kiena sitomena ve veve lua re. ¹⁸ Yaru na sanene, suri la punu ga e kiena malena naga mesmesu ruru po paþisi, a þisi na ve sa ke mþena ga e yaru la punu ga naþa la ape yeririna na suþare, naþa la amiyuþae ke e þelaga na suþarena.

4

Yaru naþa naga kila erau wo amio yomarava nini

¹ ?Ana visae suñarena nene ve su ruru re amio amiu, ana amiu asuñma akila ga mara van amiu, a aveveyun amiu, ana ya ne pe mias nen suri nene? Suri nene naga molue kome kiamiu nasinenanena lala, naþa la asuñma akila amiu amiyuñmae ñarera paþisi vena akilali naþa aloge wo e suri punu ga naþa sike e yomarava nini. ² Amiu na sinemiun manene la suri la naþa sike e yomarava nini, ana amiu taþatete akusla, ana nane kila amiu na sinemiun asape awe yeririna vanonia. A amiu na sinemiun manene la suri kiena ne yeririna taþena lala, ana taþatete ñena ga akilia akusla, ana kila amiu apeveyu a añe amiu ñaga vanon suri la nene. Ana amiu pe atol re suri laþas naþa amiu sinemiun poli, vanon naþa pe apiun re tan Ntewa poli. ³ A pogos laþasia amiu apiun tan Ntewa, ana pe atol re poli, vanon naþa apiun pal ga. Ana nanene komin naþa amiu asuñma apiun ke ga vena kila kiamiu nasinenanena lala akilia awar ya naþa la sinelania vena aloge wo ea.

⁴ Amiu na sa naþa yeririna la naþa la pe ape lelaga re pa wola poli, naþa amiu pe akekaran manene re si kiamiu Ntewa poli, amiu pe ape lelaga re pan poli. Ana yaru naþa naga sinenan pisape naga ve erau wo amio yomerava nini a amio ñena ga kiena þelaga lala, ana naga sane suñma kila ke erau viowa amio Ntewa ne, naga sane pe nasinekar kiena ne Ntewa þisi narui. ⁵ Visena lelaga tai teke e Visena Wa, naþa naga pisa pisape “Ninuta naþa Ntewa naga mligan teke e ita, naga suñma sinenan pisape va viowa silaga e kiena nasinenanena viowa lala.”

A nanene naga pe pe visena korena re nene poli, ⁶ a Ntewa naga suñma miila ita keviu paþisi e kiena sinewo, vena ita ve tekila re si ve sanene. Ana naga nene sa naþa Visena Wa naga pisa, naþa naga pisa pisape

“Ntewa naga suñma pialuþar ke yaru naþa naga þarwaria, ana naga pe sinewo pa yaru naþa naga kiena sitomena to ga tano.”

⁷ Vanon suri ne nanene, amiu monar aligan amiu asuñma tano, vatano e limana ne Ntewa, a amiu na monar asuwo Yermare Lego, ana þisi na naga ure vetan amiu. ⁸ Amiu na monar aimi manene laa lavisin Ntewa sane wa, a þisi na naga ñena ga imi manene laa lavisin amiu sane. Amiu yeririna viowa lala, amiu monar akevan limamiu lala. A amiu naþa amiu kiamiu sitomena pepe lua, amiu monar akila sinemiu lala imi ikik ruru wo. ⁹ Nanagane kana pogos ruru naþa amiu sinemiu viowagan kiamiu mlamulena viowa la narui, amiu aloge viowa vanonia, amiu alokain tagiena. Popon amiu akila kiamiu vitalena imi ve kiamiu tagiena ga, a kiamiu kekarena imi ve kiamiu nasineyeena. ¹⁰ Ana amiu monar akila kiamiu sitomena su ga tano e marana ne Ntewa, naþa naga mon metava a naga þisi na visirlua amiu.

Amiu na ve aliþere re kiamiu puruvi lala

¹¹ Puruvi lala a vineu lala, pe pon re amiu asuñma avisa kare amiu poli, a aliþere amiu ke sina ga. Þelaga nene, Navisaluaena kiena ne Ntewa pialuþar þisi rui, ana yaru naþa naga suñma kila ke sanene pan kiena puruvi lala, naga suñma pisa kare ke ñena ga Navisaluaena nene, a naga suñma mliþere ke Navisaluaena nene pisape naga piowa ga. A pogos naþa amiu apisu Navisaluaena nene apisape piowa sanene, amiu asuñma amligan amiu apa ke metava e naga, ana amiu pe asu re si vatanon naga poli. ¹² Ntewa nene naga kilia tamalia yaru a naga kilia kila yaru kovio, a memesun naþa naga taaga ligan Navisaluaena a naga liþere yaru. ?Ana amiu na asitom asape amiu ape Ntewa, vena akilia aliþere kiamiu puruvi la sanene?

Amiu avisuar ruru amiu, ve avis vilave re

¹³ Amiu laþasia akilia avisa avisave, “Þane pona peni þisi na imimi meva e pulkumali taþena tai. Ana e yo nene, þisi na imimi mesuñma ga tol kas wetelu ve taaga, ana þisi na imimi mekila yuñmaena na warena kilavaru ve moki.” Ana amiu ayagogon inu. ¹⁴ Amiu na pe akilia re nenaga ya naþa þisi na naga kilia warpoyo e kiamiu malena peni poli. Kiamiu malena naga sa ga ñau naþa pimi kate e tavie a naga su plas ga ana siraunia kokovio

ke sina ga. ¹⁵ Ana visena naþa mesmesun naþa amiu avisa, naga sanini, pisape “Visave Ntewa naþa mon metava naga sinenan ve sanene, þisi na imimi mekilia mesuþna memal re la ve plas ga na wa, ana þisi na imimi mekilali ve sanene ve sanene.” ¹⁶ Ana peraga, amiu asuþna apisi vilave ga, a amiu aþarwar amiu paþisi wa, ana nanene na piowa nene. ¹⁷ Ana yaru naþa naga kilia ruru þelaga wo lala naþa mesmesu naþa naga kila, ana naga pe kila re poli, nanene naga kiena mlamulena viowa nene.

5

Yeririna na suri moki lala, monar maraþe amiu

¹ Li na suri moki lala, popon amiu mēna ga ayagogon inu. Popon amiu na alokain tagiena vanon pogos mārera la naþa asuþna apimin ke naþa atol amiu. ² E marana ne Ntewa, kiamiu suri wo lala sa ga suri la naþa apililua þisi rui, a māmīu kulsota wo mēna ga lala sa ga naþa kirara lala akarwowo þisi rui. ³ A kiamiu suri mēna ga lala naþa sane kilavaru, la sa naþa asuþna asiar asape avililua narui, ana þisi na tasnemiū mēna ga lala avililua, sa naþa kapi kekania, a nanene naga kila merarava pisape amiu na amiyuþnae piowa ga amio kiamiu kilaveru la nene. Ita tesike e legiena maro la ne, ana amiu na asuþna apanon aþarpolo manene ke kiamiu kilavaru la pa laa na wa. ⁴ Li na yuþnaena lala amiyuþnae þisi rui e kiamiu lokove lala, ana amiu na pe apulila re poli wa. Kiela naulena lala naþa amiu apuarar sike na, naga sa naþa suþna mlakai keviu vena visawal naþa amiu apisokan ga. Li na yuþnaena mēna ga la nene asuþna atagi, a kiela tagiena nene naga pa tol kiligana ne Ntewa naþa naga pe Ntewa na māreraena. ⁵ E yomarava nini, kiamiu malena meme ga, naþa amiu akilia aul ga suri punu ga naþa amiu sinemiunia naþa alogewonia. Amiu na akan ga kinanena wo la silaga, ana inu nevisa van amiu, amiu na sa ga suri mali lala naþa yaru la apagan ruru la po pano-o amlapa ruru po paþisi, nanagane amloge po paþisi, ana legiena na we moþnar laena pimi ke lavisi narui, ana suri mali la nene amninue ga. ⁶ Amiu na asuþna apisu ke la naþa limala korena ga la apito ga tano. Amiu amla naliþereena viowa lala pan la, pe suri korena ga naþa la amesmesu ga. Amiu akila kare la mþaga pano-o amiu aþmemoþnar la amare. Suri la nene, amiu akila pan yeririna lala naþa taþatete nenaga la akilia avisaluþar amiu.

Amiu monar amalumu ga

⁷ Puruvi lala, amiu na monar amalumu ga vena asuþmate mþaga kieta Suþe vano vano-o naga wasuþe sina ga. Naga sane yaru na lokove, naþa naga to malumu ga toþna ga toþmate pogos wo na yuþnaenen kiena lokove lala, a vena yua naga imi kepanania, a vena war kinasa naþa marua sike ea. ⁸ Ana amiu na monar amalumu mēna ga sanene narui, vena asuþmate kieta Suþe naga wasuþe sina ga imi. A amiu monar kiamiu sitomena lala asuþnalū mārera, vanon naþa þisi na naga ve ve piavi re ana naga imi ke sina ga.

⁹ Puruvi lala, amiu ve avismumun amiu re silaga, vena þisi na Ntewa naga taþatete liþere amiu vanonia. Vanon naga pe yaru naliþereena, a sa ga naþa naga suþna suþnalū ga sike e pulutava narui vena imi loyuþna.

¹⁰ Puruvi lala, popon ita tesitomli navisawalena na sumo lala kiena ne Ntewa. La apian ita e mrapa wo tai, naþa pogos na yeririna lala akila piowa pan la, la amalumu ga a kiela sitomena lala pe mloru re poli. ¹¹ La asuþnalū mārera asuþna ga pano pano-o, ataulu suri la nene, a komin suri ne nanene, ita tepisuiā tepisape Ntewa naga pisa ruru la paþisi wa. Yeririna naþa Sop, naga mēna ga tai naþa naga suþnalū mārera su piavi e suri mārera la ne sanene, a ita tekilia suri wo lala naþa Ntewa naga kila pania sirau þisi. Nene na lelaga, Ntewa naga pe lemam pan yeririna la paþisi, naga sinena mie la paþisi.

þelaga na visaena visena naþa lelaga

¹² Kiau puruvi lala a vineu lala, metavan suri taþena la punu ga, pogos naþa visae amiu apisaar suri tai, pona amiu apisa pupia visena keviu tai, þisi na amiu ve avisa re amio kia kiena ne sinapane, a kia kiena ne yomarava nini, pona kia kiena ne suri taþena

tai, vena kila kiamiu visena nene m̄arera. Visae amiu avisa avisave “Lelaga,” monar avisa ga “Lelaga.” A visae amiu avisa avisave “Peraga,” monar avisa ga “Peraga.” Visae kiamiu visena ve lelaga ruru kemua sanene, p̄isi na Ntewa naga taṗatete liṗere amiu vanonia.

Leniena naṗa navisataṗeena pimi ea

¹³ Visae amiu yaru tai naṗa naga mloge piowagan ke suri tai, naga popon len, a visae amiu yaru tai naga kekara, ana naga popon yeluar Ntewa e yauena. ¹⁴ A visae amiu yaru tai mai, nanene naga mesmesun naṗa naga vio nasumonena na suṃare lala vena aimi avisu naga, ana p̄isi na lala akilia alenwo naga, a la akilia ataron sirveve va e naga e kia kiena ne kieta Suṗe. ¹⁵ Ana komin naṗa apiawa m̄arera e Ntewa, ana alen vania, p̄isi na Ntewa naga tamalia namaiena nene, kila ruru sina ga naga. A visae maiena nene naṗa tol yaru nene naga vanon kiena mlamulena viowa laṗasia, a visae yaru nene visa plan kiena mlamulena viowa la nene, p̄isi na Ntewa naga viewo m̄ena ga mlamulena viowa nene. ¹⁶ Komin suri ne nanene, ana popon amiu na asuṃa avisa plan kiamiu mlamulena viowa lala van amiu, a popon m̄ena ga amiu asuṃa alenwo amiu ana vena p̄isi na Ntewa naga kila amiu awo sina. Pogos naṗa yaru mesmesu naga len m̄arera, kiena leniena kilia war mrasa ve moki. ¹⁷ Elaisa naga pe yeririna ga sa naṗa ita, ana naga mlen m̄arera pisape yua p̄isi, ana tol kas telu komsusa ana pe yua re nenaga e kiena yo poli. ¹⁸ Ana siraunia naga kila ke sina ga leniena, ana yua kove ke sina ga ana lokove lala ape kinas sina ga.

Amiu na monar aure si yeririna naṗa pure wasuṗe sina ga imi

¹⁹ Puruvi lala a vineu lala, visae amiu yaru tai molue vetan nalelagaena, ana amiu yaru tai naga vanon ure naga wasuṗe sina ga imi, naga nene na yuṃaena wo ta nene. ²⁰ Amiu na monar asitoṃalia, sa naṗa visae yaru naṗa naga vilon yeririna viowa tai molue e mrapa naṗa piowa wasuṗe sina ga imi e mrapa naṗa mesmesu, naga tamalia yeririna viowa nene narui, ana p̄isi na taṗatete yeririna viowa nene naga kovio. A naga kila sa naṗa p̄isi na Ntewa naga kilia ure plan punu ga mlamulena viowa kiena ne yaru viowa nene.

Ñaki Nasumo Naña
 PITA
 Siriyuia
 Visayuena Na Tusi Nene

Suniena plas na tusi nini

Ñaki ðesa kiena Pita, siria pan la naña amlelaga rui, naña naga pio la sape yeririna lala kiena Ntewa, naña naga ga pisirplan la. La naña asu tetai asike sane wolawa lala e provens makega e yo nene naña nagane tepio sape purvanua naña Teki. Sitomena keviu na ñaki nini, vena visirluaen sitomena kiena li nalelagaena la naña yaru la asuñña akila ke ñarera manene panila pañisi, kila la añal ke ñarera panila pañisi komin naña amlelaga e Yesu Kristo. Naga pisa panila sape monar asitoñal lologena wo nene, naña Yesu Kristo maren ita, a mal sina, a yoko naga wasuñe si vitomi sina vena were kiena yeririna lala. Sitomena nene kilia iila ita vena tesuñalu ñarera, a kieta lelagaena la kilia ñarera suñña e Yesu Kristo.

Komin suri ne nanene, pogos naña atol pog ñarera, a yaru la akila suri ñarera la panila, akilia asuñalu ñarera, kieta sitomena tañatete loru, pe suri korena ga naña yaru la akila piowa manene panila. Visae akila sanene, yoko kila meraravan naña la amlelaga kemua e Yesu, a yoko atol suri wo la naña Ntewa miligan ruru sike mae peni, sape ve kiena kiena yeririna lala, e legiena naña yoko Yesu Kristo vitom ñalivi ea.

Amio visena nene na visirplanen kieta sitomena lala, naga pisi ñarera ñenaga panila, sape monar akila kieta maliena la mesmesu ruruia, komin naña ape yaru lala kiena ne Kristo.

Komñasnen tusi la na nini

Visena ðesa 1:1-2

Mrapa kiena Ntewa naña tamalia kiena yeririna lala 1:3-12

Maliena kiena li nalelagaena lala monar ve wa 1:13—2:10

Yuññaena kiena li nalelagaena lala pogos naña asike e nalogeviowaena 2:11—4:19

Sitomena kiena yaru na lelagaena monar vito ga tano 5:1-11

Visena na maro 5:12-14

Visena na sumo

¹ Erau lala, inu Pita nevisa pokolulagi a pokolemalo e kia kiena Yesu Kristo, naña in na nepe kiena nalogena.

Ñaki nini piñasu pan amiu yeririna kiena ne Ntewa lala, naña nanua asike gar kiamiu yo Yerusalem, ana añene plan amiu, nagane kam na ape wolawa ga naña asike e pupia lepas la naña, Pontas, Kalesia, Kapatosa, Esia, amio Pitinia. ² Amloge piowagania, ana sineun nesape nevisawal van amiu, Ntewa armata naga kilia make mrapa na kiamiu malena nanua nanua rui. Naga mligan plan amiu nanua rui, ana Ninuna miyuñae ke e amiu, amlogear Yesu Kristo, amla e kiamiu malena, kana kuruta kevan amiu amekiki, apim ape kiena yar wa lala.

Kiau leniena nesape yoko naga ligan kiena lemamiena a suñare vena suñña iila amiu silaga.

Natamaliaena naña nalelagaena la atolia

³ Popon tesitoñal sanape naña Ntewa Armanane kieta Suñe Yesu Kristo, naga kilali po pan ita wa. Temieluar naga pañisi, komin sinen miye ita laa, kila ita tepim tepaeme tepe urviu si e mratava puna. Sa naña naga kila narina Yesu Kristo mal si e marena, tekilia naña suri naña sike vamon ita, pe maren re si poli ana malena naña ve uro re. ⁴ Naga sane lalimana ne Ntewa naña po naña yoko tetol sirau. Naga kila ruru rui, mligan sike ma meta e peni, yoko tañatete menun, a tañatete viowa, tañatete si kovio pog tai. ⁵ Sur

nene pe tetol re poli wa, ana temlelaga tesape yoko nañareraena kiena ne Ntewa suwo ruru ita nenaga, uarar ruru ita suña vano-o tol legiena maro. Ana e pogos nene, yoko naga kilologia natamalia itaena e maran yar tañena lala.

⁶ Nekilia nesape nanagane, asuña añar naurmiena na loge viowaena e nakilaliena la naña asuña atol ke ne. Pona yoko suña ga sanene yo e pogos lañas naña pimi ke na wa, ana e sitomen la ne nepisa pisi ne, popon kila amiu akekara, sinemiu la loge wo sina. ⁷ Sur na kilalien la nene, apimin ga naña kila kiamiu naviawaena suñal laa sane, imi ñarera ruruia. Nanene naga sa naña kol naña visae sinelan asape ikik ruru wo, monar askap plan kororak la naña sike ea, pona omlelege kiai okaweruruia imi mesmesu, ana ita ñena ga sa ke ga. Nakilaliena la naña tetol ke ne, sane kap tai naña kekanvan ke kieta naviawaena vena imi merarava ruruia, a ñarera ruruia. Visae pogos naña Yesu Kristo imi sina, naga lual kieta naviawaen ekik ruru sanene, ana yoko ita make ga tekekekara, tekilia tevisu ruru ita, teloge wo vañisi.

⁸ Nesuña nepisayu ke Yesu sa nene, nesitoñal si nanua sumo nesike nemio naga, nekilia ruru naga, kam na peraga. Lelaga naña nanua kam na pe amio re naga poli, ana pe sur koren ga, nagane na kam na akekanvan pañisi, a pe apisuli re naga e kilamaramiu poli, ana asuña amlelaga ruru ke ñarera e naga, sinemiu la kekanvan e pupia kekarena ta ne keviu pañisi, naña pe atorokin re avisa meraravan poli. ⁹ Kiamiu kekarena nene, pe kiamiu mras nen nalelagaen wo tai naña akilia akan nagane, ana pe naga re ga nene poli, komin amio ñena, e pogos la ne pimi ke ne, yoko akan tai naña kiki laa sane, nane natamaliaen kiamiu malena.

¹⁰ Sur nene naña tepisayuia, sa naña natamaliaen malena ken yaru, naga sur tai naña navisawalen nasumo la añar kilien pañisi. Akilia ruru navisaarena kiena ne Ntewa po, naña sape yoko naga sinen ye kiena yeririna lala, yoko tamalia la, ana asuña apisawal ke sanene. ¹¹ Apisa ke sanene, ana pe akilia meraravan re asape yoko naga kila ve sanape poli, pona yoko kila pogwai. Amloge ga naña Ninuna Navisaarena suña kipian la ke sape yoko akila kare pisan naga, siraunia, navisa ruruena lala imi ñalñaliv, ana amninue asape Navisaarena naga yar na sanape, pona naga ai. ¹² Sumo na asitom asape naga yerikawa yar ga tai na kiela pogos ne, ana siraunia, apisu kilale ga na wa asape sur la naña apisa ke ne, pe e re e kiela pogos poli, a e kieta pogos la ne pimi ke sirau. Ana kam ñena apisu kilale asape suri la naña navisawalena la apisawal nanua sumo, nane apim ape lelaga e visena kiena lologena wo naña memlologon ke pan amiu e nañareraen kiena ne Ninuna Wa nae ma e peni rui.

A pe navisawalen re ga la poli, ana navisi ñena lala sinelan asape akilia sur la nene, ana peraga, pe kiela re naña akilia poli. Sur la nene añalivi ga yo metava e kieta pog na wa.

Monar ove yar wa ruruia

¹³ Ana pogos naña Yesu Kristo pitomi ñaliv e yomarava e nena e kieta pogosa, ita ke narui monar tekila ruru kieta sitomena vena toñareran ruru naña tekila kiena yuñena. Monar takawe ruru kieta malena, a ve tesitom re yomarava nini, a monar tesitoñal ga navisa ruruena wo naña yoko towaria pogos naña yoko Yesu vitom warpo si yo e yomarava nini. ¹⁴ Yoko monar teim teve sa sisi wo la naña asuña amlogear ruru ke armala, a nasinenanen viowa na wowe lala, pe pon re si tetañan ave suñen kieta malena poli, sa nanua sumo e pogos naña pe tekilia re sur tai poli.

¹⁵ Armata, naga ke narui naga pio ita, ana monar tekilia tesape naga naña sinenan sape teim lavisinia, naga pe wa pañisi, ana ita ñena monar teve wa ruru e mrapa make ga na kieta malena. ¹⁶ Visen kiena ne Ntewa tai teke e kiena navisaluaena marua, pisa sanene rui sape

“In na nepe wa, kam ñena monar ave wa.”

Lev 11:44,45

¹⁷ A sur si tai, yam mokliu naña tesuña tepio Armata vena iila ita, ana monar tevisu kilale tevisave naga suña pisuveve ruru yaru lala mesmesu ga e kiela yuñena la peve taaga, ana teyaloro e yomarava nini monar kieta sitomen vatanonia, temaraunia. Naga

mligan ita tesike e yo nini yam plas ga sane ita tepe wolawa ga ea, ana monar tesitom tevisave siraunia, yoko teva tesuñal nena tesu e marana.

¹⁸ Nanua sumo, kieta li marua lala pe akilia re Ntewa poli, ana akiakian lelein ña kiela malena na yemalolo pitomi pitomi tol pogos naña Yesu Kristo pimi ñerelua ita petania. A sa naña akilia, naga kila sanene, pe pul plan ita re e sur na yomerava sane kilavaru poli pona kol pona ya si naña sane yoko kovio pogos tai. ¹⁹ Peraga, naga pul plan ita e kana kuruta nena napo, komin naga tañan kiena malena kus leleta, naga tañan naga sane narin sipsip tai naña pe narin maran sur tai pe to re e poli, vena kilaen kuñañaena ea.

²⁰ Ntewa kilalua Yesu vena tamalia itaena sanene nanua rui. Nanua e pogos naña si yomarava, ana ñuarar narina nene suña amio pano tol pogos naña sinen miye ita keviu, narui kila naga pitomi ñaliv ga na wa e legien maro la nini. ²¹ Naga pitomi ñalivi, naga pike mrapa pan ita na vaen si puna ne Ntewa po pañisi. A pogos naña toñal naña Ntewa kila malia si naga, mligan sike amio naga ma e kiena naurarena, toñar sitomena naña tesape, Ntewa ne nanene narui, popon telelaga vania, teviawa ea, towasinea.

²² Siar e nene narui, amlelaga e visena lelaga kiena ne Ntewa, a kiamiu malena la mesmes ruru po, a asitom manene laa kiamiu erau tañena lala. Ana ve akilakila re ga, monar añareran li naña akekaran amiu e sinemiu lala ve keviu manenea.

²³ Apaeme apim ape urviu sina, atol malena viu rui, ana nanene na pe sa re naña ñañña la añar sisi poli. Kieta malena viu nene naga pimi ñarpo ga yo e visena kiena ne Ntewa, pe visena mali, a visena naña tañatete kovio pogos tai.

²⁴ Malena kien yar tañatete su ve piavi, komin kapur ruru po sane ñaki, kilia imi wo vañisi sane meme, ana siraunia ñak nene kilia mano, ana meme kilia loru. ²⁵ Ana sur taaga naña sike sike lue, nane visena kiena Suñe.

Ana visena ne nane, mesuña memlologon ke pan amiu siar nanua rui pimi tol ñane.

2

¹ Ana komin naña lologena wo tol amiu rui, monar aligan ñelaga viowa lala. Nasinekareena lala, visokanen lala, namlamulen wanen viowa lala, vielueen lala, a navis viowaena lala, ñelaga la ne sanene monar awar plan vetan kiamiu malena.

² Sa naña sisi tomtom la sinelan manene munen ñala yu vena amal ea, kam ñena monar añareran naña atol kamiu kinanena a namunena wo naña kilia kila ninumiu kapur imi marua ruru, torokin ñelaga kien yeririna la naña Ntewa tamalia la. ³ Akan li kinanena kana Suñe rui, a visae akan kiki, popon akan lue ga, ñeñemiu ulen silaga.

Yesu naga pe purñes nen kilavaru na ñeren yuña naña mali

⁴ Ntewa sinena sape visirlua yuña wa tai, ana naga pisaar kilavaru na ñeren yuña tai naña mali, naña pisu po pañisi, nane Yesu. Yar tañena lañasa yepel mavinia, akovenlua, ana ita tesitom naga pañisi, tetavevea. ⁵ Ana Ntewa ñere ita, pisirlua ita tesu meta e kilavaru nena, naga pran kolkol ita sane kilavaru mali lala na ñana yuña nena. Naga pisu ita sane kiena ñegas nen yar wa na yuñaena lala, naña tekilia towar kuñañaena nowo vania naña naga kekaran la, naña towar vania komin ga yuñaena naña Yesu Kristo kila rui. ⁶ Sa ga visena tai naña sike e tus kiena yermarua navisawalen Aisea rui, naña Ntewa sape:

“Apisu kilale rui pona pere wa? In na nepisaar kilavaru wo na ñeren ñau yuña tai rui, naña nekekaran pañisi. Yoko nevisirlua nena se kiau kumali wa naña Saeon.

Yaru ai naña visirlua kien malena se ea, tañatete nena loru vito viowa pog tai.” *Ais 28:16*

⁷ Ana ita naña temlelaga e kilavaru nene, tesape kieta visuena po na po, ana lañasa pe sinelan re poli, akovenlua ga pano. Ana visen tañena ñena kiena ne Ntewa e lepas nene sike e Tus na Yauena lala, naña sape:

“Pe sur koren naña yar na yuñaenen yuña asape kilavaru nene piowa ga, akovenlua, ana in na nemla kilavaru nena, nekila naga pe kilavaru na ñeren ñau yuña wa nena napo.” *Ais 8:14*

⁸ A e ke sina e Tusi kiena Aisea, visen kiena ne Ntewa tai pisayu ke kilavaru nene wa, pisa sanini, sape:

“*Kilavaru nene, yoko yar ve mok naŕa lala tau ea, kila ayal wowe. Naga pe kilavaru tai naŕa yoko kila yeririna na yomarava nini aloloru.*”

Ais 8:14

Visae teviun tevisave ya ne kila amlolor sanene, naga komin ga naŕa pe amlogear re visena lelaga naŕa amloge poli, yoko akekapil make atotano e lele na kovioena naŕa su ruru sike pa rui ve kiela.

⁹ Ana e ita pe sa re nene po, ita tepe ŕegas taaga naŕa Ntewa pisirlua, ita tepe li na ŕarwa lala vena ve suŕenen kiena yo, ita tesike loyuŕna e kiena purvanua wa, ita tepe yeririna na mratava nena puna lala. Ita ke narui tepe yeririna na yeluaren naga vena visawalen kiena sinewo naŕa kila pan ita, naŕa ŕere plan ita petan yemalolo, mligan ita tesike e kiena yomerarava napo. ¹⁰ Nanua sumo ita tepe yeririna kar ga lala, ana nagane tepim tepe ŕegas kiena ne Ntewa taaga. Nanua sumo pe tetol re kiena sineyeena poli, ana nagane kiena sineyeena pulen ga kieta malena.

¹¹ Erau lala, visae ve sanene, popon avisu kilale naŕa yomarava nini pe ŕmata uŕna re napo poli. Sa ga tepe yar taŕena ga lala, tepe sane wolawa ga, ana monar teligan ŕelaga nasinenanen nakilaen mlamulen viowa lala na yomerava nini, komin kiena napiowaena lala ape nasinekar nena na ninuta. ¹² Sila ga tesike likan la naŕa yepel mavin lelagaena, akawe ita silaga, a pogos naŕa tesike e marala, kieta malena monar wo na wo. Visae ve sanene, yoko akilia avisu kilale ya naŕa tesuŕna tekila ke ne naga po na po, ana visae la ŕmena aelaga, yoko ita make ga temio la teieluar Ntewa e pogos naŕa yoko imi ŕmalivin ita sina.

ŕelaga wo kiena li nalelagaena lala pogos naŕa asike e yomarava

¹³ Sa naŕa tepe li nalelagaena kiena Suŕe rui, kieta ŕelaga naŕa tesike e yomarava nini monar torokin ga kiena kia naŕa tesuŕna temlologonia.

Li nalelagaena lala monar avatanon yerkawa la naŕa apisir plan la vena visuaren yeririna lala. Suŕe la yo, pona yerkawa kerkeviu lala, ¹⁴ pona ŕarin suŕe keviu la, ana monar tevisu kilale la sane Ntewa ke narui naga mligan e limala vena liŕereen yar lala, vena laen nakoan va naŕa pe mesmes re poli, a vena yeluaren naŕa kila yuŕnaena wo. ¹⁵ Ntewa sinenan sape kiena yeririna la monar ayuŕnae wo, komin naŕa visae akila ŕna sanene silaga, yoko yar la naŕa pe akilia re sur po, naŕa asuŕna akoven ke ga visen kar lala kawe ita, yoko taŕatete avisa si sur tai. ¹⁶ E lepas tai, lelaga sane tekilia tekila ga ya naŕa sinetania, a e lepas komŕasa, yar naŕa mlelaga naga pe sitom manene re sanene po. Pona naga sitom ke sape visa ve sa nini yo, visave Ke, sur nene sike ga e in naŕane, nekilia nekila ga suri viowa ya naŕa sineunia. Ana pe sa re nena nene poli ŕisa, komin monar tevisu kilale tevisave ita la naŕa temlelaga tepe yar na yuŕnaena kiena ne Ntewa, ana monar tekila ya naŕa naga sinenania. ¹⁷ Li nalelagaena lala monar avatanon yar taŕena lala, monar akekarman manene wenla taŕena lala amio vinela taŕena lala e namratava puna ne Ntewa. Monar amaraun Ntewa, avatanonia, a monar avatanon ŕmena kiela suŕe lala.

¹⁸ E ŕegas nen li nalelagaena lala, laŕasa ape kiena ne yerkawa lala, naŕa ayuŕnae korena ga van la. A kiela yerkawa lala, laŕasa apowo paŕisi, a laŕasa aŕarera paŕisi, ana pe sur koren ga naŕa yerkawa naga po pona piowa ga sanene, ana yar na kiena yuŕnaena monar vatanon ruruia.

¹⁹ Pogos la ŕasa, pona yar na yuŕnaena miyuŕnae pogaga yo, ana kiena suŕe kilia sinen karkare vaŕisi, kilia viowa lue ga vania. Yar nene yoko loge viowagan ŕelaga kiena ne kiena suŕe naŕa pe mesmes re poli, ana po paŕisi visae torokin taŕan ga ve sa nene, naŕa e kiena sitomena ŕasine ga Ntewa, ana yoko loge kilale naŕa Ntewa sike amio vena iilaena.

²⁰ Ana visae yar na yuŕnaena kila sur viowa ve moki, pona yoko kiena yerkawa monar visave ala nakoana vania. Ana visae pogos naŕa ala nakoana van yar nene, naga va ruru ga teke na, yoko ve tevisa re tevisave naga pa ruruia komin naga pe yar wo tai, ana tekilia tevisave naga pe pis re poli komin pisu kilale kiena napiowaena.

Ana visae okila ga sur wo la sa naþa Ntewa sinenania, asuñmalu sinela kar ko, ala nakoena m̄arera tai van ko, ana ova ruru ko ga, þelaga wo ke narui naþa Ntewa sinenania.

²¹ Sur nene naþa yar wo loge viowa ga naþa akila piowa pania, naga pe lepas nen kieta malena tai naþa Kristo pio itania, komin sa kemua nene pan naga sumo rui. Pe kila re sur tai poli, ana akila naga mloge piowa manene laa, ana naga tañan ga, vanon ita. Ana sa ke ga mrapa naþa kieta Suþe mial kome nanua sumo rui, monar teyal ga e lelen lana tetaveve tevano.

²² Visena Wa marua pisayu naga sumo rui, naþa pisa sanini, sape
*“Naga pe kila re nena mlamulen viowa pogos tai poli,
 visena na visokanena pe kate li re e gona poli.”*

Ais 53:9

²³ A sa ke ga naþa tekilia m̄aga, pogos naþa akuan visen viowa la pania, pe pisamaran re si poli, a pogos naþa añe kare yepen lala, pe pisa re nena sur tai pan la. Pa ruru ga mon m̄aga, mligan sur make ga sike ga e limana ne Ntewa Arimana naþa kiena nalipereen lala mesmes make ga.

²⁴ Pogos naþa Yesu telan m̄eke e lak torovia, nakoena na kieta mlamulen viowa make ga mloru e tasnena, a kiena marena kila naþa þelaga na mlamulen viowa mare petan ita, ana kila þelaga na kilaen mesmesu mal suñna e kieta malena. Lelaga, kiena yepe lalaea lala kila kieta yepe lalaea lala pimi po nenaga.

²⁵ Sumo, tesuñna temyal wowe sane sipsip la naþa akila pal kiela mrapa, ana nagane yar na visuaren sipsip m̄al ita si rui, nagane tepim tesu ruru tesike temio naga naþa pe yaru navisuarena kieta malena.

3

La naþa atalopa rui monar avatanon wola lala

¹ Sa naþa ita la naþa temlelaga monar tewatanon þarin suþe na purvanua, ita naþa tetalopa monar tewatanon m̄ena wota lala.

Nevis þesan van amiu kam sira lala, nesape monar avatanon ruru womiu na yerñene lala. Pona sira tai, wona na yerñene pe mlelaga re e Tus Wa poli, yepen mavin yagogonen wona na sira visayu vania, ana visae wona na sira kila lue ga wo vania, pona yoko kilia were m̄ena naga imi lelaga yo. ² Visen manenea taþatete taulu yar nene, ana pogos naþa visuveve þelaga na sitomena wa a þelaga na vatanoena kiena wona sira nene, yoko naga kekaran naþa lelaga.

³ Sira lala, popon avisu kilale naþa sane kiamiu purþes nen nawoena pe vanon re naþa avilovilon vilþarimiu veve taþena poli, pona atelan mrañmalela lala, pona ayen kulmrae wo lala. ⁴ Sur nene, pe komin re naþa apaia ruru tasnemi la sanene poli, ana ya naþa yoko kila amiu aim awo ruru napo lelaga nane þelaga wo naþa teke loyuñna e amiu. Ee, lemamiena naþa malumu a sinemi naþa vito ga tano, naga ke na kiamiu nawoena narui, a naga taþatete imi ve urmarua pog tai, nane þelaga ne nanene Ntewa pisa po paþisi.

⁵ Apua sira marua nasumo lala, la m̄ena kiela þelaga la sa ga nene. La aþasine Ntewa, ana amlelaga asape naga ga kilia iilala aim awo manene e marana a e maran yar taþena lala. A pogos naþa ola na yerñene m̄ena lala apisu naþa wola na sira la nene apatanon ruru la sanene, apisu po na po. ⁶ Sira tai naþa kilakila sanene naga sira marua Sera, naþa naga kekaran patanon ruru wona yermarua Epraam, pano pano-o pio ke naga sape kiena suþe. Sira marua Sera nene, tepisu ke naga sane aneta sira marua tanea, ana kam sira na nagane lala, visae asuñna akila luen ga wo va womiu lala, sa naþa naga kila, kam na aim ave narina nena napo lala. Pona laþas amaraun asape sa þisi akila ve sa nene va wola na yerñene lala yoko ve sanapen la, ana peraga, monar avatanon la ve sa naþa Ntewa sinenania.

⁷ Ana visena van amiu kam yerñene lala, sape monar asitom urmi manene e womiu na sira lala. Visae yar tai sike uñna m̄ana amio wona na sira, monar visu kilale sape naga

yermene, naga m̄arera manenea, ana wona na sira, naga pe m̄arera manene re sane naga poli. Monar sitoṃal silaga sane Ntewa pe mla re ga malena viu pa yermene naga taaga poli, ana mla ga pan la luoka, yermene amio sira la ga luwoka maran taaga.

Ana visae yermene tai ve m̄arera manene re va wona, ana kiena sitomena vito ga tanonia, malum ruru wo vania, yoko lotena kiena lalua nene ve va map re ga mrapa komsusa, ana yalen silau va tol yo e naṓa Ntewa sike ea.

Monar avatanon amiu vena kiamiu sitomen la imi ve taaga

⁸ Visen maro tai e lepas nene, nesape popon ala ruru sitomen la ne nepisawal ma meta ne. Kam punu ga, monar aṃareranli naṓa silaga asu ruru amio amiu naṓa kiamiu sitomen la imi ve taaga ga. Sinemiu ye amiu, akekarana naṓa sane kam na ape mratava taaga, awo van amiu, aligan amiu asike sina vatanon amiu. ⁹ Naga naṓa kila piowa pan ko, ve okila maran re si viowa vania, a naga naṓa viuelin ko, ve oviuelin maran re sina. Visae ya naṓa imi van ko, yoko osuṃa ola ga navisataṃeena navisa ruruena wo vano. Ṕelaga wo la ne sanene Ntewa pio itania, vena tela ve sanene silaga, a visae tela navisa ruruena va yar taṓena, yoko Ntewa ligan kiena navisa ruruena sike e kieta malena. ¹⁰ Navisaarena la ne sanene sike e Tusi na Yauena la rui, naṓa pisa sanini, sape:

“Yar naṓa kekarana sape su ruru suṃa wo e yomarava nini, pona sinenan sape kiena malena va wo, ve piavi, monar kilawo visena viowa lala ve molue re kome pulgona, monar visuar ruruia sa naṓa ve visokan re.

¹¹ *Monar ligan naviowaena, kila ga wo. Monar m̄areran suṃare, a monar ṓiyonli naṓa silaga were imi lavisi likan yeririna lala.*

¹² *Suṓe suṃa pisu manene ruru ke yar naṓa kila ke po, ten kiligana pan leniena kien yar wo la ne sanene. Ana la naṓa akila ke piowa, maran m̄arera pan la, pilon ga ṃasina pan la.”*
Yauena 34:12-16

Pogos naṓa akila piowa pa yeririna wo kiena ne Ntewa lala

¹³ Visae toṃareranli naṓa tekila ruru sur make ga wo na wo, ve tesitom re tevisave yar laṓas sinela kar ita vanon poli. ¹⁴ Pona pogos tai avisu naṓa tesuṃa tekila ke po sa naṓa Ntewa sinenania, ana teilan ga asuṃalu akila kare ita vanonia. Ana visae ve sanene, monar tevisu sane naviowaena nene pe pe sur re tai poli, naga navisa ruruena ga tai naṓa Ntewa mla pan ita. Tekilia tesitoṃal visena na tus kiena ne yermarua navisawalena Aisea, naṓa pisa sanini, sape:

“Yar kiena ne Ntewa, ve sineṃa kurkur re, ve omaraun re ya naṓa yeririna na yomarava la amaraunia.”

¹⁵ Visena nene sape monar ve temarau re, ana ya naṓa monar tekila, e losineta, monar teligan Kristo ga su metavan sur make ga, naga taaga pe kieta Suṓe. A monar tekila ruru ita silaga, sa naṓa visae naviunena tai imi viun sape komin ya ne temlelaga, komin ya ne toṓasine Yesu, ana monar tekilia ruru ve sanape naṓa yoko tekilia tela navisataṃeena tai naṓa po vano. ¹⁶ A visae navisataṃeena vano, monar va amio ga ṓelaga malum, a ṓelaga navatanonen yaru. La naṓa sinelan ke kila kareen la naṓa amlalaga e Kristo, akilia akoan visen viowa ve moki vim van amiu, ana avisuar amiu, pe pon re si akuan maran si visen viowa la van la poli. Visae akila ve sa nene, siraunia akilia amawan si kiamiu visena m̄arera la nene vaṓisi, a visae amoṃau ga van la, yoko la ga monar amawan si kiela visena m̄arera lala.

¹⁷ Visae Ntewa sinenan sape naloge viowaena kilia vim ṃalivin ita pog tai, pe pon re naloge viowaena nene vim ṃalivi komin ga sur viowa laṓas naṓa ita ga tekila poli. Ana popon manene laa naṓa visae naloge viowaena nene vim ṃalivin ita, komin ga suri wo la naṓa temiyuṃaen ke ne. ¹⁸ Asitoṃali Kristo, naga sanene. Naga pe yar mesmes manene laa, ana naga mloge piowa manene paṓisi komin yar viowa lala. Kieta mlamulen viowa ita yeririna na yomarava lala mok liu, ana e kiena marena yam taaga nene kila sur make rui naṓa kila sane kieta mrapa suṃa naṓa kilia were ita teva lavisin Armata Ntewa. Akila

kare ña tasnena Yesu sanene pano-o marþan nenaga, ana po paþisi naþa siraunia, naga mal sina e nañareraena kiena Ninuna ne Ntewa.

¹⁹ Ana sumon naþa mal si sanene, naþa ñeke e lelen marena naþa, nañareraen kiena Ninuna ne Ntewa pimi pulemamaga ea, kila naga pa mlologon meraravan pa ninuna taþena la naþa asike e nene, sape nagane Ntewa taulu la narui, ana Yermare naga kila þele nena yonia. ²⁰ Ninuna la nene, nane yeririna sur la naþa yepel mavin Ntewa, sane la nanua e pogos kiena ne yermarua Noa. E pogos nene Ntewa suñate la ke sape avilon la, mla pog piavi pan la. La asuñga ga sane, Noa miyuñgaen ña kiena pupia waa nene, ana pe asitom re nenaga, ana pogos naþa womie pulemamaga la atalilu. La mok naþa akovio e pogos nene, ana yar la lua la ga naþa amal asike e pulu waa, nane Noa ga la orelu nene.

²¹ Ana pupia wii naþa kus la amal e kiela waa nene, naga kana kinasnena ya ne pan ita nagane? Naga kila tesitoñal si wii taþena, wii na tamalia itaena, nane wii naþa akee ita ea. Wii nakeena na nene, naga pe kila re sa naþa yepeta la mekik poli, ana kiar ruru ita sape Ntewa piwo kieta mlamulen viowa lala, ana ve temawan re sina vania.

Nakeena naga mligan kieta malena tesu ruru tesike temio Ntewa narui, ana popon tesitoñal ñena tesape ane kila kieta mrapa sanene? Yesu Kristo ga kila, pimi kome kiena nasuñalen si petan marena. ²² A siraun nene, þasuþe si pa ma e peni, pa totano teke amio Ntewa e limana marua ma metava, naþa navisi lala, a pupia yerkaawa lala, amio ñareraena lala, la make ga asike vatanon kiena navesuþenena.

4

Nasinenanena kiena ne Ntewa naga su þes e kieta malena

¹ Sa naþa nepisa rui, Kristo naga tañan naþa þar naloge viowaena la moki e yepena, ana ita ñena ga monar tekila kieta sitomena ve sa ke ga nene. Yar naþa tasnena mloge piowa, ve visa re visave viowa, komin naþa visae naga va warpo yo e naloge viowaen ta sanene, kilia kila naga ñarera manene laa sane, vena liganen þelaga na mlamulen viowa lala. ² Yar sur na sanene, naga pe pa manene re si e kiena malena na yomarava nini poli, naþa sinenanena viowa na þelaga kiena ne yeririna imi ve keviu manene e kiena sitomena, ana naga sitom ga sur mesmesu la naþa Ntewa sinenania. ³ Kieta malena, naþa tekila kare komþas keviu pa rui, naþa tesuñga tetelivi ke ga temio erau la naþa pe amlelaga re poli. Ita temio la e malena viowa naþa pule e nakila maneneen þarita, na wereen sira lala, na mun maneneen wii pano tepe wowe, na veveyuena a na kilaen mara, na kilaen ñaagena kar la pano-o yemlagi, nakilaroen navisaluaen lala, amio nalotunen nono lala.

⁴ Nane kieta malena ke na sumo narui, ana nagane, kieta erau nene aminue asape ita na sanape narui. Añal naþa pe sinetan re si taveve laen poli vena kieta malena talilu e pulmaran kiela sukoþene, ana pe akekaran re nenaga, kila sinela kar ita paþisi. ⁵ Ana ve tesitom re suria, yar sur la ne sanene yoko asuñgalu ase marana ne naga naþa yoko liþere yar mal lala amio ñena yar la naþa amarmare rui. Yoko monar avisawal kiela sur la vania, ana e pogos nene narui, yoko avisu kilale kiela napiowaena lala. ⁶ Ana taþatete ve sanene va nalelagaena lala. Pona yar na yomarava la aliþerela ala nakoena na yomarava van tasnela, kilia va tol naþa akilalu kiela malena. Ana pogos naþa asuñgalu ase marana ne Ntewa, yoko naga la nalaena na malena van ninula. A malena ne nane pe pupia sur naþa kila tesuñga temlologon ke lologena wo van yaru lala.

þelaga kiena li nalelagaena lala e pogos naþa legiena maro pimi ke lavis

⁷ Nesape nevisa sanini, sane lavis tetol luas nen sur make narui. E pog na sanene, nalelagaena lala monar asñal ruruia naþa kiela sitomen la ekik ruru wo, vena ve aursulan re leniena. ⁸ A metavan sur taþena make ga, monar asitom manene la si vaþisi, komin naþa visae tesitom yar tai, kila sa naþa meme ga na viewoen kiena mlamulen viowa lala. Visena tai pisa sanene rui, sape mlamulen viowa mok liu, ana nasinesiena kilia kalo la make ga. ⁹ Sur taþena, li nalelagaena lala la monar akekaran ga naþa avisuar la sina e

ĩmala uĩna. ¹⁰ A la make ĩmēna lala monar akilia ruru naĩmareraena amio nakiliaena taĩpena taĩpena lala naĩpa Ninuna mla pan la, monar ayuĩmae ruru amio vena iilaen kiela erau taĩpena lala. Visae avisuar ruruia, akilia akila naĩpa yoko lemamiēna wo kiena ne Ntewa imi warpo yo e la. ¹¹ Yar naĩpa nakiliaena na visena teke ea, naga monar vis ruruia sa ga naĩpa visen kiena ne Ntewa ga lelaga suĩna ĩar wowo ke e pulgona. Yar naĩpa nakiliaen naiilaen yuĩmaena sike ea, naga monar kila wo amio naĩmareraen make ga naĩpa Ntewa mla pania. Visae silaga tekila make sur wo ve sa nene, yoko yar make akilia aieluar Ntewa vanonia, aieluar naga komin kia kiena ne Yesu Kristo, naĩpa naurarena make ga a naĩmareraen make ga ape kiena ga vano vano ve uro re.

Naloge viowaena kiena ne li nalelagaena lala

¹² Erau lala, nekilia nesape nagane apane ke pog na loge viowaena tai naĩpa kila amloge piowa paĩsi. Ana sineun nesape nevisa van amiu, sa naĩpa ve ailan manene re, ve avisu re sur nene sane sur tai naĩpa asitom ke asape taĩpatete imi ĩmalivin amiu pog tai yo. ¹³ Ana ya ga naĩpa akila, akekaran ga naĩpa akilia ave ĩegas amio Kristo e kiena naloge viowaena lala. Visae sanene, yoko siraunia, pupia kekarena vaĩsi van amiu, naĩpa akilia ave ĩegas si amio e pogos naĩpa imi ĩmaliv amio kiena naurarena. ¹⁴ Visae taĩpena la akilia asape kia kiena Kristo sike e ko, yoko akilia akoven viuelen viowa la imi, ana ve ositom manene re. Yoko pupia navisa ruruena sulue ga e ko, komin naĩpa Ninuna ne naurarena kiena ne Ntewa nae ma e peni sike e kioĩna malena. ¹⁵ Visae ala nakoena tai pona naloge viowaen tai imi van ko, pe pon re akila komin naĩpa asape ko na yar na weĩmaren yaru, pona ope yar na vinauena, pona ope yar na kilaroen navisaluaena, pona ope yar na kilaen viowa yo.

¹⁶ A visae akila komin ga naĩpa akilia asape ko na omlelaga ke e Kristo, ve okila re sane omawa, ana monar oyeluar Ntewa naĩpa pisu ko ke sape ko na otoroki naĩpa kia kiena ne Yesu Kristo sike e ko.

¹⁷ Nagane, pogos na liĩpereena siar ke rui, a yoko va ĩna tol ĩesan mratava ĩmana ne Ntewa. A tepisu naĩpa naga kilia taĩnan pog ĩmarera laĩasia warpo yo e malena kiena narina lala, ana visae kila ve sa nene va la naĩpa amlelaga, temninue kare narui aĩna yoko ve sanapen la naĩpa pe sinelan re logearen kiena Lologena Wo poli. ¹⁸ Nanene na sane visena tai na Tus marua na Visena na Manmaruaena naĩpa pisa sanini, sape:

“Yar naĩpa asitom asape naga mesmes rui, pe sur ĩmarera tai naĩpa Ntewa kilia tamalia.” *Īakaiwa 11:31*

Ana visae ve sanene, ositomyuli yar la naĩpa yepel mavin Ntewa, la ape yar na mlamulen viowa ga narui. Yoko ve sanapen la?

¹⁹ Pogaga, e nene nevisa narin visen tai van amiu naĩpa Ntewa taĩnan naloge viowaena pimi ĩmalivin amiu. Nesape asuĩna akilakila ga wo van yeririna make ga, a asuĩna aligan kiamiu malena sike e limana Ntewa. Naga pe Ntewa naĩpa sii make suria, naga pe Ntewa naĩpa masisun ruru sur make ga, a naga pe Ntewa naĩpa tekilia towasine ruru naga silaga.

5

Visena pa pa nasumonen lala

¹ Pogaga, nagane sineun nesape nevisawal sitomena laĩasia van amiu nasumonen lala na suĩmare. Nesitom nesape netorokin nevis van amiu sanene, komin naĩpa in ĩmēna nepe nasumonena, a metavana, in ĩmēna tai naĩpa nepisu Kristo e kilamarau, pogos naĩpa kus ke naloge viowaena metava e lak torovia. Ana nekilia ruru nesape in ĩmēna tai naĩpa yoko nesike loyuĩna e naurarena la naĩpa yoko imi sirau, nane nepisu sane popon nekila visen la nene vena iila amiu. ² Neviun manene tan amiu sanini, nesape monar avisuar ruru ĩegas nen sipsip la naĩpa Ntewa mligan sike vatanon kiamiu navisuarena. Nanene na yuĩmaen tai naĩpa keviu paĩsi, ana lelaga, pe pon re visae akila naĩpa pe sinemiun re nakilaena poli. Ana popon akila ga amio sitomena naĩpa kekaren nakilaena, sa naĩpa Ntewa sinenania. Ana yuĩmaena ya naĩpa akila, ve akila re ga komin narin nalaen tai naĩpa yoko alavia, ana

akila ga komin naþa narin sitomen tai teke e amiu sape akila vena iilaen yar taþena lala.
³ A la naþa asike e limamiu vena avisuar la, ve akila re naþa akilali awarar manene laa, ana monar asumon ruru la, avian la e mrapa, ana akilia ataveve lelen lamiu. ⁴ Visae ayuñae ña sanene vano, yoko þar na visuaren sipsip kiena ne Ntewa yoko kekaran amiunia. Pogos naþa imi ñaliv sina, yoko visir plan amiu sane kiena þarin suþe lala, yoko vaia ruru amiu naþa kiena pupia navilavilaena naurarena vila e amiu naþa taþatete si vito tano pog tai.

Visena pa yar taþena lala

⁵ Nagane visena imi van amiu kam ñee lala. Nepiun manene pan amiu nesape monar akekaran naþa avatanon kiamiu yermarua lala a kiamiu nasumonena lala. Visen la ne sanene kam punu ga monar alavia, komin naþa popon silaga tekila þelaga na vatanoena van ita. Nanene sane visena tai na Tusi na Manmaruaena tai pisa nanua laa rui, naþa sape

“Ntewa pialuþar þelaga na vilaveena, ana miila þelaga na vatanoena.” *Þakaiwa 3:34*

⁶ Sanene, popon tekila kieta sitomena su lue ga vatanon Ntewa. Teligan ita e limana, ana e kiena ñareraena yoko kilia visirlua ita si pogos tai. ⁷ Teligan kieta naurmiena la sike e ñasina, komin naga sitom ita paþisi, sinenan sape iila ita.

Avisaluþar Yermare

⁸ Nesape nevisa ñena visena na weþege amiuena tai, sane monar avisuar ruru amiu, monar avisu kilale towe laa mrapa. Kieta nasinekar naþa Yermare, naga telivwo ita lue ga, naga sane pupia sur mal tetan tai naþa sane visokarian manene laa nalelagaena lala, visae suñalun la karwowa kare la vitolwowa la vaþisi. ⁹ Ana ve atañan re kila sanene, monar asuñal ñarera e kiamiu naviawaena vena avisaluþar ruru naga. Pe kam re ga naþa naga suña kilali amiu ke poli, ana akilia rui sane kieta erau taþena la mok liu teliv e yomarava nini piora, naloge viowaena la pimi ñalivin la ke ñena ga, ana popon ita make ga tesuñal ñarera vena Yermare ve taulu re ita yar tai. ¹⁰ Lelaga naþa asuña amloge piowa towe laa e pogos nene, ana kieta Ntewa nalemamiena make ga yoko iila amiu. Naga ke narui naþa mligan plan amiu rui vena yoko amiu amio Kristo loyuña e kiena pupia naurarena, a naga ke narui yoko ligan ruru amiu sina nagane. Yoko sinemiu ve kurkur re, yoko ve akulul re, ana e kiena nañareraena, yoko akilia aviawa ruru sina. ¹¹ Nane, teyeluar kieta Ntewa nene, komin kiena nañareraena suña taulu make suria, a yoko suña taulu vano-o taþatete þisi pog tai, sanene narui.

Visena maro

¹² Nesike e nini nemio kieta puruvi wo naþa Saelas, noþasine ke naga e sur moki, a naga miila inu sirilua kiamiu ñaki nene. Nekilia nesape ñaki nene plas laa ga, nepis ve tokak ga, ana ya naþa sike ea, nekilia nesape pisawal ruru þelaga wo tanea lala na lemamiena kiena ne Ntewa pe lelaga, naþa torokin amiu naþa asike e nagane. Ve sanene, auloia, alavia vena iilaen kiamiu sitomen lala, silaga asuñalu ñarera ase ea.

¹³ Lala na suñare nae nini Rom, amio ñena Mak, naþa nemla naga sa ga naruu narui, apisa po kolulag pona pokolemalo pan amiu. Mesike e nini, mepisu piowa towe ga, memloge sane mesike e pupia pulkumali viowa nasumo naþa asape Þapilon. Ana naga pogaga, komin naþa mekilua mesape Ntewa mligan plan imimi naþa memio amiu, ita teve kiena.

¹⁴ Nevisa maron sanini, nesape pogos naþa aim lele taaga, aworworun amiu, amun pipimiu sa naþa akekaran ruru amiu.

Ana kiau leniena sa naþa suñarena wo kiena ne Yesu Kristo sike make amio amiu naþa ape kiena.

Inu, Pita.

Maki Nalua Naþa
 PITA
 Siriyuia
 Visayuena Na Tusi Nene

Sunienu plas na tusi nini

Maki kiena Pita na lua, Pita siria pan li nalelagaena lala e pogos tai naþa navianiena la asike ne, ana kiela vianiena la pe mesmesu re poli, kila naþa yaru la ataveve la asuþna amloru e mlamulena viowa. Ana Pita pisawal pa li nalelagaena la nene vena monar avisuar ruruia vena yaru la nene ve avilovilon kare re kiela sitomena.

Ana na kila woen þelaga viowa la nene, monar yaru kilia ruru Ntewa, a monar taþnan Yesu Kristo, naþa kieta Suþe, vimi ve suri na sumo e kiena malienu. Li nalelagaena lala e pogos nene, amloge lologena wo nene e yaru la naþa apisu Yesu e kilamarala, a naþa amloge kiena visena lala, e pogos naþa pian ke yaru lala.

Pita siri maki nini vena visirluaen sitomena kiena li nalelagaena lala, komin naþa e pogos nene, navianiena la naþa kiela vianena pe mesmesu re poli, asuþna apisawal ke asape yoko Yesu taþatete si wasuþea.

Ana Pita sape Yesu pe þasuþe re polua komin naþa Ntewa pe sinenan re yaru tai kovio poli. Naga sinenan sape yaru makega monar avilon kiela sitomena vetan kiela mlamulena viowa lala (3:9). Ana yoko naga monar ve ve piyavi re, Yesu wasuþe si imi.

Komþasnen tusi la na nini

Visena þesa 1:1-2

Malena kiena li nalelagaena lala 1:3-21

Navianena la naþa kiela vianena piowaga 2:1-22

Yesu yoko wasuþe sina 3:1-18

¹ Mak nini, inu Saemon Pita na nesiria, sa naþa nepe yar na yuþnaena kiena ne Yesu Kristo, a nepe kiena nalologena. Nesiri ke piþmasu pan amiu, amiu naþa atol naviawaena e naga rui po paþisi sa ke ga naþa metol sumo. Naga pe Ntewa a pe kieta natamaliaena ita punu ga, naga kila lue ga po pan ita silaga. ² Sanene, nesitoþnal amiu, nemlen nesape yoko akilia ruru Ntewa kieta Suþe naþa Yesu va re laa ga wa, vano yoko naga kila kiena lemamienu a suþnarena ulemamaga e kiamiu malena.

Yesu pio ita vena teve kiena

³ Yesu po pan ita paþisi, naþa e mþareraenu na kiena urarena a kiena sinewoenu, naga pio ita vena tekilia ruru naga sanene. A pogos naþa tekilia ruru naga, naga ga kila sur punu ga e kiena naþareraenu wa nene, naþa kila malena kiena ne Ntewa a kiena þelaga wa ule e ita. ⁴ Yesu kila na tetol nalaenu wo la nene naþa apowo paþisi, tepisu naþa taveve ruru nena ga kiena navisaarenu lala. A e mrapa nene, tepisu naþa naga kila kieta malena pa pranar ke amio malena wa kiena ne Ntewa, a suþna miila ita vena toure matan kororak lala na sinenanenu viowa lala na yomarava nini. ⁵ Komin sur ne na nene, monar aþnareran naþa akila kiamiu malena lala imi wo la ve sa nene. E naviawaenu naþa teke e amiu rui, popon asikol si sinewoenu. E sinewoenu nene, popon asikol si kiliaenu amio manmaruaenu. ⁶ E kiliaenu amio manmaruaenu nene, popon asikol si nawanar ruruenu, a e nawanar ruruenu nene, popon asikol si sitomena viavi, a e sitomena viavi nene, popon asikol si þelaga wa. ⁷ E þelaga wa nene, popon asikol si sitomena wo, a e sitomena wo nene, popon asikol si sinesienenu.

⁸ Þelaga wo la punu ga nene, visae asike e amiu, a visae asuþna akapur ke silaga, yoko kiamiu malena kilia war mras wo la naþa kiki vaþisi. Pona kam na akilia kieta Suþe Yesu Kristo rui, a visae þelaga la nene ve su re e amiu, yoko taþatete nena akila kiena yuþnaenu

tai. ⁹ Yar na sanene pe kilamara ðala ga, taðatete visu kilale suria a kiena sitomen plas ga. Naga sinen þesan sape akevan kiena mlamulen marua viowa lala, pe sitoñal re si sape sike e malena wo tai poli. ¹⁰ Erau lala, pe pon re yar ve sanene poli, ana noñareran amiu ke nesape kam make veve taaga monar aþionli naða silaga akila yuñmaena wo lala vena avisawal ke asape Yesu pio amiu ape kiena, naga pe pe sur na visokanen re nene poli, a pe pe sur na kirakiraen re ñena poli, ana naga pe sur na lelaga. ¹¹ Visae akilakila ña sanene, yoko taðatete aloru pog tai, a pulutava na vaen loyuña e nasuþenena kiena ne Yesu Kristo naða naga pe kieta Suþe a Natamaliaena yoko suwowo ruru nena van amiu. Yoko aworworun ruru amiu vena ava asulue asike amio. ¹² Nekilia nesape visena la nene, pe pe urviu re pan amiu poli, komin naða apuarar ruru yam piavi rui. Ana taðatete neligan naða monar nevisasawal kaþaran ña visena lelaga la nene van amiu. ¹³ Naga nene pe yuñmaena na kiau malena, vena iila amiuena vena ve sinemiu ve þesan re, a nekilia yoko monar nekila ña sanene vano vano-o tol pogos naða kiau malena þisi. ¹⁴ Suþe Yesu Kristo pisawal pan inu rui sape in na ve ve piavi re yoko neligan tasneu nini nevavin, ¹⁵ a sumon nene, sineun nesape nesiri plan sur make su ruru suña ga. Ve sanene, visae nevavin, ana mrapa sike þa rui vena akilia asitoñal visena la nene silaga.

Visena kiena Pita amio nalogena taþena lala pe lelaga

¹⁶ Imimi nalogena lala mepian amiu mesape kieta Suþe Yesu Kristo yoko wasuþe sina amio kiena pupia nañareraena. Ana pe pon re laþas avisayu navianena la nene asave nanene na visena na sitomen kien yar ga, pona avisave nanene na sa ga suniena marua ga lala. Mekilia mevisaar van amiu mesape pe sa re nene poli, komin nañareraen kiena Yesu Kristo naga pe sur lelaga naða mepisu e kilamaramimi rui. ¹⁷ Nanua na, mesike memio e pogos naða Ntewa mligan naurarena nae ma e peni sike e naga, a mieluaria, naða kiena visena tai molue kom meta pitomi pisayu naga, sape “Nanene naga naruu nena napo naða sineu si paþisi, nekekaran nena ga naga.”

¹⁸ Imimi ke narui memloge pulgon nae ma e peni naða pisawal visena nene, naga nene e pogos naða mesike memio Suþe ma e tavie wa naþani. ¹⁹ Ana komin sur la naða mepisua a memloge, mekilua ruru merarava e kiamimi sitomen lala, mesape nanene naga sur lelaga la naða navisawalena nasumo la apisawalia. Kiela visena lala sane kapi vivaga wo tai vena vivagali yemalolo naða tesike ea, ana popon touloyuia ana telavia. Sanene yoko kilologia mrapa van ita vano tol pogos naða legiena viu imi ñalivin ita, a verue na kolulag vam metava e kieta sinapane vena tegoli kieta sitomen lala.

²⁰ Ana sineun nesape nevisa si sur tai e lepas na visawalena kiena ne navisawalena marua lala naða asirilua sike e Tus Wa. Naga sanini, sa naða navisawalen lala nene, taðatete yar tai suñalu visave naga taaga kilia ruru kala kinasa. ²¹ Nanene komin naða visawalena la nene, taðatete amolue vetan sitomen ken yaru, ana Ninuna ne Ntewa naga miyuñae e la, sumon la vena avisawal visawalena kiena ne Ntewa lala.

2

La naða apian ke visena navisokanena

¹ Ana sa naða tekilia, e pogos kiena ne navisawalena wo la na sumo, pogos laþasia navisokaninen navisawalena ñena añalñalivi ke e marana ne yeririna kiena ne Ntewa lala. A yoko ve sa ke ñena nene van ita nagane, naða pog tai, navianena navisokanena pona aim añaliv yo. Navianena kar la ne sanene, yoko awar vinaun ga navianen laþas naða pe pe lelaga re poli imi, la akilia asape amlelaga e Suþe na mava, asape naga tamalia la, ana kiela navianen la nene akawe ke sina ga naga. Navianen la nene kilia kila kare naviawaena kiena ne nalelagaena lala, ana navisokaninen vianena la nene pe apisu kilale re asape kiela nakoena pimin la ke vilaga narui. ² La apiowa manene paþisi, a temawan tevisayu ya naða akilakila ke ne. La asape amlelaga, ana akila ke ga naða yeririna taþena la apisu kilale kiela þelaga, asuña apisa kare ke kieta mrapa na lelagaena paþisi. ³ Yar

na visokanen lala, sinelan manene la sur lala, yoko akuan visena kiki la ve moki van amiu vaḗisi, yoko akilayon li naḗa aure amiu e suniena la naḗa apule e suri la naḗa pe pe lelaga re poli. Ana pogaga, Ntewa na pe momalio re poli. Naga mliḗerela, kila ruru kiela nakoena su ruru sike nakonua rui.

⁴ Popon tevisu kilale ḗelaga kiena ne Ntewa naliḗereen yaru a natamaliaen yaru nanua sumo. Naḗesa, asitomyuli navisi kiena ne Ntewa la nanua sumo, naḗa laḗasa asuḗalu asape asu metavana. Naga sape pe sur re tai nene poli, ana suḗalu koven plan la veraga, apito tano e puluyo malolo e kapi na loge viowaena, vena asuḗa e nene vano tol pupia legiena na liḗere maronen yar lala.

⁵ Ana asitomyuli ḗena yeririna nasumo la nene, naḗa e pogos kiena ne yermarua Noa. Pogos naḗa mlologon ke ḗelaga wo kiena ne Ntewa pan la, ḗarila ḗarera paḗisi, yepel mavin ga. Ana Ntewa kila pupia womie ḗere plan la, ana Noa ga amio namratava puna la olua, tamalia la.

⁶ A naga sina, asitomyuli pupia pulkumali keviu lua nene naḗa Sotom amio Komora. Ntewa ḗal kiela napiowaena lala, ana sikap mumu la apim ape posnoyavi nenaga, a naga nene vena visawalen sanape naḗa yoko kila va la make ga naḗa asike e malena viowa.

⁷ A nasitoḗal maronen la nanua sumo ne, nane yaru naḗa Lot. Naga pe yar mesmes tai, a naga mloge lue piowagan ḗelaga na kororak kiena yar la naḗa akilaroro ke navisaluaena, naḗa naga sike likan la. ⁸ Legiena make ga naga suḗa pisu ke kiela malena viowa lala, a suḗa mloge ke kiela viuelen lala, ana Ntewa kila sanape? Mla nakoena pa yar viowa lala nene, ana tamalia kiena yeririna wo naḗa Lot.

⁹ Ana visae tesitom ruru e la nene, yoko telual ḗelaga kiena ne Ntewa tai, naḗa sanini. Naga kilia ruru ve sanape naḗa wereplan kiena yeririna wo lala vetan sur na kilalien lala, a naga kilia uarar ruru yeririna viowa lala asuḗa awar kiela nakoena lala. Yoko kila la awar malumun ḗa nagane sumo wa, ana e legiena naliḗereena awar make ruru nena napo.

¹⁰ Visena nene tol make yeririna lala, ana tol manene laa naḗa asuḗa ataveve ke nasinenanen viowa lala na ḗelaga na mlamulena naḗa apaeme amio, ana tol ḗena la naḗa pe sinelan re yagogonen poli, ape ḗar ḗarera paḗisi. Yar kar la ne sanene, aḗarwarlan kiela ḗar ḗarera la ne sanene ḗisa, ana aplaven ḗena kiela napiowaena lala, pano pe amaraun re si sur tai poli, ana apisa kare yerkawa kiena ne Ntewa lala. ¹¹ Navisi nae ma e peni aḗarera taulu la nene, ana akilia asape asike e marana ne Ntewa nae ma e peni, ana amaraun visa kareen yaru la nene, ana yar la nene na pe sa re nene poli, la asitom korenan ga sur la nene. ¹² Sur la mok liu naḗa tepisu sane apa laa metava pona ape wa manene laa, ana yar la nene pe apisu kilale re poli, asuḗa aḗarnena kare ga sur wa la nene. Kiela ḗelaga la sanene, kila narui la asaga sur mal tetan ga lala, naḗa akila ke ga ḗarila pe akila re suri wo poli. Akila ḗa wowe sanene pano pano ailan ga sa naḗa yaru la aligan lokulia la, awe moḗar la amare, a yoko ve sa ke ḗena nene van la nene, ailan ga alual kiela marena. ¹³ Yar sur la ne sanene, akekarana ga akila ḗaḗagena lala na ve torog kareen ga kolpae, a e pogos na kilaen kamiu kinanena wa lala apim asike loyuḗa, kiela sitomena pulen ga kekarena na kiela viowaena lala. La na sa ga kurka pona magka la naḗa akila kare tasnemiwo wo lala, ana pe asitom re nena asape kiela napiowaena lala yoko kila ke sina ga la aloge viowa manene poli. ¹⁴ Kilamarala pulen ga sira na kilaen kolau, a akan ḗa mlamulen viowa pano-o pe sinela maren re poli. Kam laḗas naḗa amalum towe ga lala, aḗere la narui apa amio la, a ape yar ḗena la naḗa apian ruru la sina e mrapa na vinayaen sur lala. Lelaga naḗane, la nene ape ḗegas tai naḗa yoko nasinemimiena kiena ne Ntewa yumu plan la make na wa. ¹⁵ Amligan mrapa mesmes rui apa ataveve ke narin mrapa la naḗa tekilia tesape mrapa kiena yaru naḗa Palam Peor, naḗa Visena Wa pisayu naga sane yar tai naḗa pe navisawalen ḗesa, ana pano naga kekarana manene kan mras nen napiowaena. ¹⁶ Ana pogos tai, milan ga naḗa Ntewa kila narin togki tai pis pania vanon kiena napiowaena lala. Togki lala pe akilia re apis poli, ana nanene naga pis sane yaru, ḗere mesmesun towe laa kiena ḗelaga viowa lala. ¹⁷ Yar viowa la naḗa nepisayu la

ke ne, nekilia nevisa m̄ena nesape la sa ga pulus nen wii naḗa mema rui, yar naḗa moto karia taḗatete lual wii ea. Pona asaga lul malolo tai, tekekarania toḗape yua kove, ana peraga, lagi mlelua pano. Ana yar la nene, lelela napo pe yemalolo ga m̄eke ga wa, yo ne nanene pe lele na loge viowaena. ¹⁸ Yoko monar awar nakoena na sanene, komin naḗa gola la pulen ga visokanena amio visvilaveena naḗa ḗere manene sitomena kiena yar taḗena la paḗisi. Yar taḗena la nene, aḗure matan yomarava nini apimi ga loyuḗna na wa, ana nagane yar viowa lala nene asuḗna aḗisa ke visena la naḗa pagan nasinenanena viowa na mlamulen viowa la naḗa sike e la pimi keviu manene laa narui, ana e mrapa ke nene asuḗna aḗere plan la ke sina ga. ¹⁹ Kiela malena sike vatanon yerkaena na kilaen mlamulen viowa rui, ana sanape naḗa aḗisa kotalia ke yar la asape visae atavevela, yoko alual malena wo? Taḗatete ve sanene, komin naḗareraena ya naḗa pe suḗen kioḗna malena, ko ope kiena yar na yuḗnaena narui, sane la nene, naḗa na nagane apim sa ga yar na yuḗnaena na naḗareraena na mlamulena viowa narui. ²⁰ Visae lelaga naḗa asape aḗnal kieta Suḗe Yesu Kristo Natamaliaena e kiela malena, aḗisu kilale naḗa ḗelaga na yomarava suḗna kila kare la ga, kila narui aḗure matania apim, sanene na po paḗisi. A visae yam ve plas ga awasuḗe ke sina ava e kiela malena naḗa aḗure matan ga na wa, nanene na yoko va viowa la narui. ²¹ Visae pe akiliali re nena mrapa na ḗelaga mesmes po, sanene na po towe laa pan la, ana pogos naḗa akilia ruru po, apa li e ve tokak ga, ana siraunia aḗasuḗela ke sina apa varau, nanene piowa paḗisi. Visena wa kiena ne Ntewa la naḗa amla pan la, la na akekarana ḗesan naḗa ala e kiela malena lala, ana nagane aplon ke sina m̄asila pania.

²² Yar la ne sanene, visen lua naḗa pisayu la, naḗa tai, pisa sanini, sape

“Lokul ga kilia va kan ke sina ga kana liluaena,”

ḗakaiwa 26:11

a nalua, pisa sanini, sape

“Visae okevan ruru kioḗna nompui, yoko monar yal mesmesun ga sukoḗene va kupo ke sina yo m̄eke ea.”

3

Legiena keviu kiena ne Suḗe naḗa wasuḗe sina

¹ Erau lala, sa naḗa aḗisu kilalea, nane kiau m̄ak na lua pimi pan amiu. Ya naḗa teke e kiau sitomena vena sirien m̄aki la luoka ga nini, sineun visawalen visen wo laḗas naḗa yoko akilia asike lue e kiamiu sitomena la silaga vena iilaen kiamiu malena lala. ² Sineun nesape popon tesitoḗmal m̄a visena kiena ne navisawalena wa la na sumo silaga, amio m̄ena navisaluaena viua la naḗa kieta Suḗe Natamaliaena mla pan imimi kiamiu li na lologena lala, naḗa mepisawal liluen pimi pan amiu.

³ Sur ḗes naḗa sineun nesape nevisa naga sanini, nesape monar akilia sa naḗa e legiena maro lala, yoko yar la naḗa na visa kareen yuḗnaena kiena ne Ntewa akilia aim aḗnalivi. ḗelaga kien la nene, la sinelan ke ga suri ya naḗa asitomia, ana asitom korenan ga sitomen kiena yar taḗena. ⁴ Sur tai naḗa yoko avitalia ita vanonia, naga e lepas na visena kiena kieta Suḗe naḗa sape yoko wasuḗe si imin ita. Yoko asuḗna aviuvunia, avisave *“Nawasuḗeen kiena kiamiu yerkaena naḗa pisaaria pan amiu, nanape? Siar e pogos kiena kata apua la pimi, sur make ga na yomarava nini suḗna kiriri pogaga. Imimi na pe mepisu re nena sur tai poli wa, pona kam ga aḗisu yo?”*

⁵ Ana pogos naḗa aḗisa ke visena la nene, la pe asitom re naḗa navisaarena kiena ne Ntewa naga pe lelaga silaga, a kana visena nena kana pupia m̄areraena sike ea. Sa naḗa e pogos na siiena yomarava, kiena visena ga kila sinapane, a kila yomarava nini amio kana porotano lala a kana si lala. ⁶ A siraun nene, kiena visena kila pupia womie kalo sina yomarava nini, naḗa ḗere plan make nena sur punu ga naḗa sike ea e poglis nene. ⁷ A kiena visena nena miyuḗnae ke nagane na wa, suḗna ḗuarar ruru ke sinapane a porotano na yomarava vena asuḗna vano tol naḗa pupia kapi na legiena na liḗereen yaru yoko imi

kekan plan malena kien yar la naþa pe sinelan re Ntewa e kiela malena poli. Nanene pe m̄areraena kiena ne Ntewa, ana yaru la nene pe sinelan re naþa akilia poli.

⁸ Ana erau lala, e lepas naþa na visaarena na wasuþeen sina kiena ne Suþe nene, popon naþa ve sineta þesa re naþa Ntewa naga pe pulo re legiena amio kas sane ita poli. E kiena visuena, kas manu taaga pona legiena taaga, lalua maran taaga ga. ⁹ Pona yar laþasa asitom asape naga kila malen li sur yo, pe kila re ya naþa naga pisaar poli, ana pe sa re nene poli. Naga pe kila malion re sur poli, suþna kila ke kiena sitomen piavi paþisi, komin pe sinenan re yar tai kovio poli. Naga sinenan sape la pogos ve piavi sanene vena yar la akilia avilon kiela sitomena. ¹⁰ Ana lelaga, yoko pogos tai pupia legien kiena ne kieta Suþe imi m̄aliv e yomarava. Yoko ve sa yar na vinauena, naþa yomarava ninue sape pimi ke narui, ana yoko iilan ga naþa imi worunia. E pogos nene, yoko sinapane lala akakapuru sane polilu, yoko akokovio nenaga, a yoko kapi kekan make suria vano-o tol naþa yomarava amio sur make ga naþa sike ea, yokorena. ¹¹ Ana komin naþa yoko yomarava imi ve sur koren ga m̄eke na, nesape neviun tan amiu, nesape pogos naþa asike ea wa, popon kam na ave yaru na sanape, a popon ave wa pona akila yuþnaena kiena ne Ntewa ve sanape? ¹² Monar akekaran legiena nene imi, a visae kam na ave yar wo lala, ayuþnae m̄arera yoko akilia akilia imi m̄alivi vilaga.

Yoko kapi kekan ma e peni, kekan makea, a yoko imi kekan mumu make sur naþa sike e yomarava. ¹³ Ana tesuþmalu m̄arera tese kiena visaarena, naþa sape yoko m̄ata uþna viu tai, naþa peni viu amio yomarava viu, naþa pe purþes nen þelaga mesmesu make ga.

¹⁴ Erau lala, nane tesuþmate ke ne vena imi were ita teva e yo nene, ana pogos naþa pe tetol re poli wa, monar toþmareran teve yar wa tesuþna ga, teyekiki, a tesuþna e suþmare.

¹⁵ Lelaga sane Suþe pimi re poli wa, a ve tesitom re viowa, monar tekekaran naþa mla pogos pan ita vena tevilon ita, mla m̄ena pulmas pa kieta erau lala, vena la m̄ena akilia atol natamaliaena. Sitomena nene, kieta puruvi wo naþa Pol naga m̄ena pisa pan amiu nanua sumo rui e m̄aki tai, naþa siri amio manmaruaena wo la naþa Ntewa mla pania. ¹⁶ A nane visena ke nene naþa suþna kiakian ke e kiena m̄aki taþena lala, pogos naþa pisayu si na wasuþeen si kiena ne Suþe.

Kiena m̄aki la nene po paþisi, ana pogos laþasa kala navianena la urmi towe m̄aga, kila sane visen laþas naþa naga siria yaru laþasia pe apulokilale re poli. Ana pogos tai, yaru la naþa pe þarila po re poli, naþa pe akilia ruru re sur poli, apuloia apulolon kare kana navianena ne lala pa pe taþena, sa naþa asuþna akila ke yam mok li rui e visen taþena lala e siriena wa lala. Ana pogos naþa akila sanene, pe yar taþena re la naþa aloge viowagan poli, ana kila la ke ga apa e mrapa na kovioena.

¹⁷ Kiau erau wo lala, komin sur ne la nanene nesitom amiu paþisi. Nekilia nesape akilia ruru sur la nene rui, ana sineun nesape nela si visena m̄arera van amiu, nesape monar avisuar ruru amiu. Ve ataþnan re sitomena navisokanen ken yar la naþa pe ataveve re navisaluaena kiena ne Ntewa poli aim aure plan amiu sina. Lelaga, pe pon re si alor vetan yo wo na viawaena m̄arera naþa asike pa e rui.

¹⁸ Kiau visena maro, nesape akapuru aim amarua ruru e þelaga wo na lemamiena a namanmaruaena kiena ne Yesu Kristo kieta Suþe a kieta Natamaliaena. Ana tela maran si naurarena vania, nagane, a e pogos la naþa pimi ke ga wa, vano vano-o ve uro re, sanene.

Inu, Pita.

Maki Nasumo Naþa
 YOANE
 Siriyuia
 Visayuena Na Tusi Nene

Suniena na plas na tusi nini

Maki þesa kiena Yoane, naga kiena sitomena keviu lua.

Nasumo, Yoane sinenan sape visirlua sitomena kiena li nalelagaena lala naþa aulo maki nini, vena silaga monar asikol la ruruia naþa kiela sitomena ve taaga ga, a vena asikola ruruia amio Ntewa, amio narina naþa Yesu Kristo.

A nalua, naga vena visaen vanila vena ve ataveve re navianiena la naþa kiela vianena pe mesmesu re poli, komin navianena la nene akilia akila kare suñare e kiela visena na visokanen lala, ana yoko kilia kila naþa li nalelagaena la taþatete si asikol ruru la e sitomiena ve taaga.

Navianena la nene asuñna apian ke yaru lala, asape þelaga viowa la apimi añalivi komin yaru la asike e yomarava, a amiyuñae ke ga e suri na yomarava la ne. Amio nanene, asitom sape Yesu, naga narina Ntewa, ana pe pe yaru ruru re sane ita poli. La asuñna apisa ke asape visae Ntewa tamalia yaru, yaru nena taþatete sitomali si malena na yomarava nini, a pe pe suri re poli visae yaru na sanene kila milamulena viowa po pe kila re milamulena viowa poli a pe pe suri re mēna poli visae naga sinena si yaru taþena pona ve sinena si re, ana suri la nene maran taaga ga, pe suri na yomarava ga.

Yoane siri maki nini, sape kila meraravan naþa naga yepen mavin sitomiena la nene pano-o paþisi, a pisawal meraravan naþa Yesu Kristo, naga pe yaru nena sane ita. A naga pisaar mārera sape yaru la naþa amlelaga e Yesu, a sinela si Ntewa, monar sinela sisi la mēnaga.

Komþasnen Tusi La Na Nini

Visena þesa 1:1-4

Legiena a yemalo 1:5—2:29

Narina Ntewa lala a narina Yermare lala 3:1-24

Ninuna naþa pe purþesnen visena lelaga a ninuna naþa pe purþesnen visena na visokanena 4:1-6

þelaga kiena yaru naþa sinena si yaru 4:7-21

þelaga na lelagaena naþa kilia taulu make suri la silaga 5:1-21

Yar na visawalen malena kiena ne Ntewa van ita, naga pimi e yomarava þisi rui

¹ Sur tai, nanua sumo e pogos naþa yomarava siaria, ana nagane in na nemloge, nepisu e kilamarau, in na nepisu ruru pano-o, netol nena e luñau. Sur nene, kiena kia sanini, sape Navisawalen Malena, po Purþes nen Malena, po Malena Naþa Ve Uro Re Pogos Tai, nane in na sineun nesape nesiri van amiu. ² Sur nene, nanua sumo pe tekilia re poli, naga suñna ga amio Ntewa arimata pano-o, nagane na pimi þarpoyo merarava e marata e yomarava nini narui, ana imimi moki mepisuia, a mepisawal pan yeririna lala. ³ Imimi memloge ruru nena e kiligamimi lala, a mepisu nena e kilamaramimi, ana mesape mevisawal van amiu vena kam mēna ga alelaga ea. Visae kam alelaga ea, yokorena kam mēna aim ave taaga amio imimi, sa naþa imimi mepe taaga ga memio arimata Ntewa a narina Yesu Kristo rui. ⁴ Sur nene kila pupia kekarena sike amio imimi silaga, a visae auarar ruru visena la naþa nesape nevisa van amiu e maki nini, yoko pupia kekarena nene sike mēna amio amiu, þisi na kila ita punu ga teloge wo vaþisi.

Ntewa naga pe purþes nen yomerarava

⁵ Visena naþa narina ne Ntewa mla pan imimi, pisape monar mevisawal van yeririna taþena lala, sa nene, naga pisa sape, Ntewa pe purþes nen yomerarava, pe narin yemalolo re nena tai teke puna. ⁶ Ve sanene, visae tepisawal ke tesape tepe taaga temio Ntewa, ana tekila ke ga þelaga na yemalolo la na wa, nanene tepisokan ke ga ne, pe tekila re sur na lelaga nene poli. ⁷ Ana visae tesuþna teyal mna e yomerarava naþa Ntewa sike e silaga, kila yoko telapran ita ruru wo silaga, ana tevisu tana na narina, Yesu, kilia kevan ita temekiki e kieta mlamulena viowa lala.

Nayalena e yomerarava kiena ne Ntewa: Monar teligan plan þelaga na mlamulena viowa lala

⁸ Yeririna naþa pisawo ke, pisape naga pe naviowaena su re e kiena malena poli, kiena visena nene pe pe lelaga re poli, naga pisa kotalia ke sina ga naga. ⁹ Ana visae tevisa plan ga kieta naviowaena lala, yoko Ntewa viewo ita, þisi na war plan kieta naviowaena lala vetan ita, kila ita temekiki. Naga ga kila ruru mrapa na kilaen sanene rui, ana ita towasine ga naga sane yoko kila van ita sanena naþa pisaaria. ¹⁰ Ana visae tesuþna tevirovia, tevisa mna tesape pe tekila re naviowaena poli na, nanene ita tekila sane Ntewa naga pisokan ga, a ita tekila sane kiena visena nowo na lelagaena, pe tepuarar ruru re nena e kieta malena la poli.

2

¹ Naruu lala, sineun nesape nesiri visena nini van amiu vena iila amiu avisuluþar sane pe pon re si ataþa mlamulena viowa poli. Ana visae pogos tai, amiu yar tai kila viowa, monar tesitoþmal silaga Yesu sulue ga sike na, sane pe yar wa tai na waren kieta visena lala. Naga mesmes, a mekiki, naga kilia va suþmal mesmes e mara Ntewa, kilia viun tania vena naga sinen ye ita, viewo itania. ² Ana mrapa na kilaen sa naþa yoko Ntewa kilia viewo itania sanini, nane Yesu ga ne, komin naga pe kuþaþaena na warplanen kieta mlamulena viowa lala, ita yeririna punu ga na yomerava.

Nayalena e yomerarava kiena ne Ntewa: Monar telogear kiena navisaluaena lala

³ Visae yar tai viun ve sanini, visave: ?In na pe nekilia re poli, nekilia ruru Ntewa, pona pe nekilia ruru re naga poli? ?In na nepe kiena, pona pe nepe kiena re poli? Ve sanene na, teviun si tania, tevisave, ?Sanape, ko na omlelaga ke e kiena visena lala, pona pe omlelaga re poli? ⁴ Nanene vanon naþa visae yar tai visa sape naga kilia ruru sape Ntewa, naga pe kiena, a naga pe kila re sur la naþa navisaluaena kiena ne Ntewa pisa ke ne, yar nene naga pe pisa re lelaga ne poli, pisokan ga. ⁵ Ana yar naþa mlogear ruru visena kiena ne Ntewa, naga kila meraravan sane naga kekaran kemua lelaga, pimi keviu lue ga. Ana e mrapa na sanene narui tekilia ruru kemua tesape ita tepe kiena ne Ntewa na lelaga. ⁶ Yar naþa naga pisa ke sape pe kie Yesu, yoko monar tevisuluþar naþa naga mla kemua Yesu pe lelaga e kiena malena.

⁷ Erau lala, e lepas tai na, navisaluaena naþa nesiri ke pan amiu, naga pe pe visena viu re tai naþa na nanagane poli, naga pe visena tai na susumo, pe visena kiena ne Ntewa ga naþa amloge pa na susumo rui. ⁸ Ana e lepas taþena tai na, pe lelaga mna naþa navisaluaena nene, naga sa ga pe urviu si tai pan ita, komin ita tepisu ke sane nagane þere ke yemalolo þaro pano, kila ke yomerarava na lelagaena pimi narui. Naga sane e malena kiena ne Yesu narui, a nanagane pimi ke mna sanene e kieta malena la narui, þisi na kila ita tepisu kilale ke visena viu nene pe lelaga kemua.

⁹ Visae yar tai visa sape mial ke pa e yomerarava rui, ana tepisu naga sinen kar ke wenla, kila ke piowa pania, yar nene sike e yemalolo wa. ¹⁰ Ana yar naþa kekaran wenla, kila ke po pania, yar nene mial ke pa e yomerarava narui, taþatete sitoþmal sape þisi na yalwowe sina e yemalolo, lolor si pogos tai. ¹¹ Ana naga naþa sinen kar ke wenla, naga ve ve sa re nene. Naga sike e yemalolo wa, yemalolo kila sane kilamarana þala, mial wowe lue ga e pupumalko, pe pisuluþar re kiena mrapa poli, pisuluþar re lele ne kom ke e poli.

Nayalena e yomerarava kiena ne Ntewa: Ve tekekaran re yomarava nini

¹² Amiu naruu lala, amiu kiau nin sisi lala e kieta na lelagaena, in na nesiri ke visena la nene pan amiu komin kam ke narui naþa Ntewa arimata piewo kiamiu mlamulena viowa komin kia kiena Yesu Kristo, ana amiu akilia naga. ¹³ Kiamiu yermarua lala, in na nesiri ke visena la nene pan amiu komin kam ke narui akilia ruru laa naga rui, naþa naga mali sike nanua sumo, sumon na siiena yomarava nini. ¹⁴ Kiamiu yar m̄ee lala, in na nesiri ke visena la nene pan amiu komin kam ke naþa añarera ruru po narui, amligan ruru pa visena kiena ne Ntewa teke e kiamiu malena la rui, ataulu pa Yar Viowa nene rui. ¹⁵ Sineun nesape nevisa ve sanene van amiu, ve akekanan manene re yomarava nini, pona kiena sur lala. Yar na kekanan manene yomarava nini, naga taþatete kekanan ruru arimata. ¹⁶ Nanene komin naþa sur na yomarava lala, pona kiena þelaga lala, ape taþena, pe sa re sur kiena ne arimata Ntewa amio kiena þelaga lala. Sur na yomarava la nene la sanini, lala ape purþes nen nasinenanen sur moki, ape purþes nen nawereen kilamarata, ape purþes nen warwarena e kieta malena. ¹⁷ Yomarava nini, amio kiena sur la naþa yeririna la sinelan manene silaga, naga pimi ke vena kovioena ga, ana yar naþa kila ke mesmes e nasinenanena kiena ne Ntewa, naga yoko sulue ga sike narui.

Nayalen e yomerarava kiena ne Ntewa: Monar tevisuar ruru ita vanon sinekar

¹⁸ Naruu lalo-o, nagane tesike e pog maro narui, sa naþa amloge pa rui, na yar naþa apio asape Nasinekar kiena ne Kristo, yoko kilia vim katenia. Pe tepisu re naga poli wa, ana tepisu pa narin yeririna moki na kila kareen Kristo rui, ana kila tepisuluþaria sane yoko ve ve piavi re na Legiena Maro m̄alivi. ¹⁹ Sinekar la naþa nepisayu ke ne, kam na akilia ke ne. Nanua, la asu amio ita asu ga likan ita, ana siraunia, asuñalu narui, amligan ita aþure matan ita sina apano. Nanagane na, tepisuluþar la ruru nenaga, sane pe apimi re veraga ga amio ita poli, vanon visae peraga, yoko la asu ruru ga amio ita. ²⁰ Ana kam naþa asu ruru ke ga wa, yar wa Kristo pisa ruru amiu pa rui, ana apisuluþar kiena visena, yoko taþatete aurmatan si naga. ²¹ Ve asitom re asape in na sineun nesape nevisi van amiu vanon sitomena tai naþa asape amiu na aminue ga suria, vanon pe sa re nene poli. In na nepisu sane akilia aloge ruru kilale visena na lelaga a visena na visokanen þisi rui, amiu akilia pa rui visena navisokanena taþatete molue e visena nalelaga, ana nesape nevis van amiu ve naiilaar amiuena. ²² ?Ana visokanen ya ne la nene apisa ke ne? Visena ne nane, apisa sanene, asape Yesu naga pe pe Navisaarena re poli naþa Ntewa mligan pimi tamalia yomarava nini. Visena nene naga pe visena kiena yar la naþa sinela kar ke Yesu, ana yar naþa pisa sanene, naga kawe ke Ntewa arimata, a kawe ke m̄ena narina. ²³ Yar naþa pilopu m̄asina pa narina ne Ntewa, Ntewa taþatete se e naga, a yar naþa pisawal ruruia pisape naga mla narina ne Ntewa e kiena malena, yoko Ntewa m̄ena ga sike amio naga silaga.

²⁴ Lologena wo naþa amloge þesania nanua sumo, naga pe visen wo a pe lelaga, ana popon aligan ruruia e kiamiu malena lala. Visae ve sanene, yoko kiamiu malena naga suñna wo e Ntewa amio Narina silaga, ²⁵ nagane akilia atol malena naþa naga pisaaria sape la maran si van ita, naþa ve uro re pogos tai.

²⁶ Naga ga nene nesape nevisa van amiu e lepas kiena ne la naþa apisa kotalia amiu ke ne, asape aure amiu ava ave taþena sina. ²⁷ Kristo na miawawo amiu pa rui, ana Ninuna Wa naþa amiu atolia e pogos naþa, naga sike amio amiu wa. Naga kilia vian amiu e sur punu ga naþa pe lelaga a mesmes, ana taþatete si akale yar tai naþa naga kilia vian amiu sina ga e sur laþasia. Yoko akilali ga sa naþa Ninuna Wa pian amiun e þisi rui, naþa pisape popon amiu aligan ruru kiamiu malena to ruru lue ga e Kristo. ²⁸ Naga nene, naruu lala, visae kieta malena naga su ruru lue ga e Kristo, taþatete teloge viowa pogos naþa naga wasuþe sina ga pun ita. Ana visae peraga, pupia memawaena, þisi na tesape tokuswan marata pogos naþa tevisu naga vim. ²⁹ Tekilia tesape Kristo, kiena þelaga punu ga po a mesmesu, ana yar naþa naga m̄ena sanene, tekilia tesape yar nene naga m̄ena pe narina ne Ntewa sane Kristo.

3

Ita tepe narina ne Ntewa lala

¹ Asitomveveli sitomena kiena ne arimata Ntewa e ita yeririna viowa lala. Naga kekaran ita keviu paḗisi, pano-o kila pan ita sa ga naḗa tepisu ita sane narin ga lala. Ana pe ita re ga tepisu ita sa nene poli, naga ḗmena pisu ita sanene, komin naḗa pure ita tepa loyuḗna e namratava puna rui, sane narina wawa lala. Yar taḗena lala e yomarava pe akilia ruru re arimata poli, sa naḗa ita tekilia naga, ana sur nene kila la pe apisu kilale ita re ḗmena poli, sane ita tepe narina lala. ² Erau lala, ita tekilia tevisa tesape tepe narina ne Ntewa, ana pe tekilia re poli wa, sane ḗisi na sirau, yoko naga kila ita teim teve ya sina ga. Ana sur tai tekilia ruruia, naḗa visae Suḗe Yesu warpoyo sina ga, yoko tevisu ruru nena naga e kilamarata napo, tevisu ruru naga, naga ke narui, ana pogos naḗa tevisu sanene, yoko teimi teve sa ga naga. ³ Ana yar naḗa sinenan sape yoko naga ḗmena imi ve sa Yesu Kristo, naga monar uarar ruru kiena malena mekiki ruruia a ve wa, sa ga Yesu.

Ita narina ne Ntewa lala: Monar teligan ḗelaga viowa lala

⁴ Yar naḗa taḗa mlamulena viowa, kilaro ke navisaluaena kiena ne Ntewa, komin purḗes nen ḗelaga viowa, naga pe ḗelaga na monen logearen navisaluaena. ⁵ Ana pogos naḗa Yesu pimi e yomerava nini, naga pimi naḗa pe mlamulena viowa tai to re nene e naga, naga pimin vena war plan kieta mlamulena viowa lala. ⁶ Ana visae sanene, yar naḗa kiena malena teke ruru e naga, yoko mlamulena viowa ve su re si e naga, naga taḗatete si kila naviowaena. Ana yar naḗa mlamulena viowa teke e kiena malena silaga, naga pe pisu ruru re naga poli wa, naga pe kilia re nena naga. ⁷ Kiau narin sisi lala, piowa naḗa avisa kotalia amiu. Yar naḗa kiena malena po, naga pe yar mesmesu sane Kristo. ⁸ Yar naḗa kiena malena piowa, naga pe yeririna kiena Yermare, naḗa naga pe purḗes nen mlamulena viowa e yomarava, siaria e nasiiena pimi tol nanagane. ḗelaga viowa kiena ne Yermare kila narina ne Ntewa pitomi ḗmalivi e yomarava nini, vena we plan kiena yuḗnaena viowa lala a kila kiena puriukawaena naga ḗisi. ⁹ Yar naḗa sike loyuḗna e namratava kiena ne Ntewa, naga taḗatete si taḗa mlamulena viowa, vanon malena kiena ne Ntewa te ea. Naga pe narina ne Ntewa, ana monar kus ḗelaga wo kiena ne arimana nene, ḗisi na taḗatete si kila viowa. ¹⁰ E mrapa ne la nene ita monar tevisu kilia ruru ga sane ane pe narina ne Ntewa, a ane pe narina ne Yermare. Yar naḗa pe kila re mesmes poli, pona yaru naḗa pe kekaran re namratava puna poli, yar na sanene naga pe pe nin sisi kiena ne re nena Ntewa poli.

Ita narina ne Ntewa lala: Monar telogear navisaluaena nasitomen yeririna taḗena lala

¹¹ Lologena naḗa amiu amloge siar e purḗesia pimi, na sanini, naḗa pisa sape: ita monar tekekaran ita silaga. ¹² Asitoḗali yar sa Yermare nanua ne, Ken, naḗa pe kekaran re wenla naḗa Epol poli, naga ḗmemoḗaria. Piowa naḗa tekila sanene, ana popon tesitomvevelia mias ya ne naga kila sanene? Nanene vanon kiena yuḗnaena lala, Ntewa pisu piowa ga, ana kiena ne wenla, naga mesmes ruru po, ana Ntewa kekarania, ḗisi na kila Ken pieluen wenla panonia, sinen karia, ḗemaria.

¹³ Erau lala, ḗelaga viowa na sa nene, yeririna la akila ke pimi tol nanagane, ana ve teilan re naḗa visae tevisu la avieluen ita ḗmena ga, avisa kare ita vanon yuḗnaena wo lala kiena ne Ntewa naḗa visae teyuḗnaenia. ¹⁴ Ana ita naḗa pe sineta kar re yar la poli, tekekaran ruru na mratava pun ita, nanene pe mrapa na kila meraravanen sane temligan marena, tepim e malena rui. Ana yar naḗa sitomena pe to re e naga poli, naga sike e marena na wa. ¹⁵ Yar naḗa sinen kar na mratava puna tai, naga sane pe yar na wemoḗaren yar la narui, ana sa naḗa ita tekilia ruru ḗa rui, yar na wemoḗaren yaru, malena naḗa ve uro re pe to re e kiena malena poli.

¹⁶ Pona ita yar tai piun ke pisape, ana sur naḗane sitomena, naga pe sur na sanape? Pogaga, tekilia tesape sitomena naḗa pe lelaga, naga sanini: Yesu Kristo taḗan kiena

malena wetelu panon ita, ana visae sitomena nene teke e ita, p̃isi na ita m̃ena tetañan kieta malena vanon kieta wolai lala. ¹⁷ Yar tai naga limana pulen sur nowo lala a, wenla tai, limana plas kemua lelaga, pe kiena sur re poli. P̃isi na naga pisuluṗar wenla nene, ana naga kila sinen m̃arera laa sane pania, pe miila re poli, yar na sanene sitomena kiena ne Ntewa pe to re nena e poli.

¹⁸ Naruu lala, kieta sitomena ve e re ga e kieta visena lala. Sitomena naṗa pe lelaga, naga pe sur re tai na visaen ga poli, pe sur na yuñnaenena a na kilaena. ¹⁹ Ana visae kieta sitomena p̃arlologia ruru marana sanene, nane pe mrapa naṗa ita tekilia tesape visena lelaga kiena ne Ntewa p̃ar ke mras e kieta malena. Ana ve sanene na, teloge ga wo vena vaen lavisin Ntewa, ve temaraun re si naga. ²⁰ Pogos laṗasia tekilia temaraun naga, vanon naṗa yoko kieta sitomena kilia liṗere ita sina, kila ita tesitoñal sina tese kieta naviowaena lala, ana Ntewa naga kilia ruru punu pa rui, ana kieta na viewoena na naga keviu manene laa sane, p̃ar plan petan ita. ²¹ Erau lala, visae losineta naga merarava ruru wo, p̃isi na naga taṗatete liṗere ita sina, kila pe temaraun re nena na va suñmalen se marana ne Ntewa na viunen sur tania. ²² Visae telelaga m̃a e naga, tekila m̃a sur la naṗa naga sinenania, p̃isi na tekilia tetol suria la naṗa tepiun ke tania. ²³ Navisaluaena kiena ne Ntewa pan ita sanini, pisape: Monar telelaga e kia kiena ne narina, Yesu Kristo, a monar tekekan ita silaga, sa naṗa naga pisa pan ita. ²⁴ Yar naṗa mlogear e navisaluaena kiena ne Ntewa, naga sike amio Ntewa. Ntewa teke e kiena malena. ?A yoko ita tekilia tesape naga teke e ita sanape? Sur nene, Ninuna naṗa naga mla pan ita naga kilia kila ita teloge kilale sane pe lelaga.

4

Ita narina ne Ntewa: Monar tevisuar ruru vanon sinekar kiena ne Kristo lala amio p̃elaga na yomarava

¹ Erau lala: visae amiu yar tai visa ke sape Ninuna Wa teke e naga, kila ke naga pisawal ke kiena visena, popon sa amiu avisu ruruia aninuluṗar ninuna na teke e naga, pe lelaga ninuna kiena ne Ntewa, po pe kiena re Ntewa poli. Ita monar tevisu ruruia komin navisawalena navisokanena lala moki asu make yo la ne e yomarava nini rui. ² ?Ana tekilia teninu luṗar ninuna la nene ve sanape? Ita tekilia tevisu luṗar Ninuna Wa kiena ne Ntewa komin naga pisawal pisape Yesu Kristo pimi pe yeririna, paeme e yomerava, ³ ana visae ninuna tai ve visa re sanene, ninuna nene pe pe kiena ne re Ntewa poli. Ninuna na sanene na molue kome nasinekar kena Kristo, naṗa amiu amloge pa rui sane pimi ke rui, pona sike pa e yomarava nini rui. ⁴ Ana naruu lala, ve amaraun re navisawalena la nene, komin amiu asike e lepas kiena ne Ntewa, akilia ataulu la ga. Lelaga paṗisi, naga naṗa teke e amiu naga m̃arera laa taulu naga naṗa sike e yomarava. ⁵ Yar na visokanen la ape yeririna na yomarava ga nini, ana visena la naṗa apisa ke ne molue ga e sitomena na yomarava nini, ana yeririna taṗena la na yomarava nini amiyagogan la. ⁶ Ana ita yeririna na lelagaena, ita na pe na yomarava re nini poli, ita tepe kiena ne Ntewa. Yar naṗa kilia ruru Ntewa, naga kekanan yagogon itaena, a naga naṗa pe kiena ne Ntewa re poli, mon yagogon itaena. E mrapa ne la nene ita tekilia teninu luṗar Ninuna na visena naṗa lelaga, a ninuna na visokanena.

P̃elaga na sinesiena

⁷ Erau lala, popon naṗa tekekanan ita silaga, komin sinesiena naga pe p̃elaga kiena ne Ntewa. Yar naṗa sinen si yeririna, naga pe narina ne Ntewa, p̃arlologia ga p̃elaga kiena ne Ntewa, kilia ruru Ntewa e kiena malena. ⁸ Yar naṗa pe sinen si re yeririna la poli, naga kilia re Ntewa poli, komin Ntewa na pe purṗes nen nasinesiena. ⁹ ?Ana tepisu pupia nasinesiena kiena ne Ntewa nene pogwai? Tepisu kiena sinesiena nene e pogos naṗa mligan narina taaga nene pimi e yomarava, vena kila ita tekilia temal. ¹⁰ Nanene nasinesiena naṗa pe lelaga kemua: pe naga re naṗa sineta si Ntewa poli, ana naṗa naga

sinena si ita, pano-o tañan narina pitomi pe kuřařaena pe na kilaruruen marana ne kieta naviowaena lala.

¹¹ Erau lala, komin nařa Ntewa sinen si ita keviu sanene, kila po pan ita sanene, popon ita mēna ga sineta sisi ita ve sanene, tekila wo van ita. ¹² Yar tařatete kirawal Ntewa, ana visae ita sineta si manene ita, yoko tevisu sane Ntewa teke e kieta malena, ana řelaga na kiena sinesiena yoko imi ve keviu manene laa sane e kieta malena.

¹³ Ita tekilia Ntewa teke e kieta malena, a ita tesike ruru ga e losinena, komin naga mla Ninuna mesmes pan ita, pe na kilaen ita telogekilale tesape sur nařa pe lelaga. ¹⁴ Tekilia mēna ga pe lelaga ga nařa Arimata Ntewa mligan narina nene pitomi vena natamaliaena na yomarava, ve sa nařa ita tepisu pa e kilamarata rui a nařa tepisawal ke e yo punu ga. ¹⁵ Yar nařa pisawal ke sape Yesu pe narina ne Ntewa kemua lelaga, Ntewa teke e losinena, a naga mēna teke e losinena ne Ntewa. ¹⁶ Tekilia ruru po nařa Ntewa sinen si ita, komin nařa tekilia teloge kilia e kieta malena lala, ana tekilia telelaga e kiena visena nařa pisawal pan ita. Ntewa naga pe purřes nen nasinesiena, ana yar nařa řelaga na sinesiena pimi keviu e kiena malena, naga teke e losinena Ntewa, a Ntewa teke e losinena. ¹⁷ Ntewa sinenan sape kila řelaga na sinesiena vim ve keviu la sane e kieta malena lala, vena kilaen kieta řelaga lala na yomarava nini ve sa ga řelaga kiena ne Kristo nanua ne. Ana visae kieta řelaga lala vim wo ve sa nene, yoko wo van ita vařisi ne, vanon tařatete si temarau po tememawa e legiena na liřereena na pimi ke ne. ¹⁸ Visae yar tai naga marau, nanene vanon nařa naga pisu kiena nakoena tai pimi ke rui, a naga mloge kilale re sinesiena kiena ne Ntewa kila ruru kiena malena poli. Ana řelaga na sinesiena napo naga kilia mēnelua nena pupia marauena nene.

¹⁹ Visae sineta si ke yeririna tařena lala, nanene vanon Ntewa naga sinen si ita řesia. ²⁰ Yar nařa pisa sape naga sinen si Ntewa, ana sinen kar ke namratava tai puna, naga pisokan ke ga. Visae namratava puna nařa suřna pisu lue ga ana naga pe sinen si re poli, naga tařatete sinen si Ntewa nařa naga pe pisu re e kilamarana poli. ²¹ Navisaluaena kiena ne Kristo e kieta malena naga sanini, sape: yar nařa sinenan sape ve yar nasinesiruruen Ntewa, naga monar sinen si ruru mēna namratava puna lala.

5

¹ Yar nařa mlelaga sape Yesu na pe Navisaarena, yar nene naga pe narina ne Ntewa lelaga. Ana visae narina ne Ntewa nene visa sape naga sinen si Arimana Ntewa, naga monar sinen si mēna narina ne Ntewa tařena lala. ² ?Ana yoko naga kilia sape sinen si ruru la ve sanape? Visae sinen si Ntewa, ana mlogear kiena navisaluaena lala, yoko naga visu nařa sinen si kemua narin Ntewa la pe lelaga ga. ³ řelaga na sinen si Ntewa naga sanini: touarar ruru kiena visena. Kiena navisaluaena lala pe urmi manene re pan ita nařa teyuřaen poli, ⁴ komin ita sisi la nařa tepaeme pu Ntewa, visae tesuřal mārera e kieta naviawaena, ita tepe yeririna na tauluen pa yomerava nini rui. ⁵ Neviun si vetan amiu: ?Yar nařa taulu ke yomarava nini naga ai? Naga ga nařa visae suřal mārera sape Yesu naga pe narina ne Ntewa kemua lelaga.

⁶⁻⁸ ?Ana tekilia ve sanape nařa Yesu naga pe narina ne Ntewa? Yar la telu nařa apisawal visena nene pan ita: tai na Ninuna Wa, tai na wii, a tařena na kuruta, a la telu nene apisawalia sane visena taaga ga. Wii naga pisa sape e řelaga kiena ne Yesu Kristo, nařa paeme e yomarava sanape, naga tol nakeena sanape, ita tekilia tevisuluřar sane naga pe narina ne Ntewa. Ana pe naga re ga nene poli, ana kuruta mēna pisa sape e řelaga kiena ne Yesu mēna ke na wa, nařa naga mare sanape, ita tekilia tevisuluřar sane pe lelaga. Ana metavan si nanene, Ninuna Wa, nařa kiena visena pe lelaga lue ga, pisawal meraravan mēna e maran yeririna la nakonua rui. ⁹ Ana visena la nařa Ninuna Wa kila, la aurumi pařisi, visae ve sanene monar telelaga ga ea, komin nanene pe pe visena kie yeririna re ga la poli, naga pe visena kiena ne Ntewa navisawalen sape naga pisu Narina sanape. ¹⁰ Yar nařa naga mlelaga ruru e narina ne Ntewa ve lelaga, visena la nene tawa

ruru ga sike e kiena sitomena, pe sitom ðele re si poli, ana yar naða pe mlelaga re e narina ne Ntewa poli, pe mlelaga re e sur naða Ntewa pisa meraravan ke e narina poli, naga pisu sane Ntewa pisokan ga. ¹¹ Ana visena la naða monar tesuñal ñarera e silaga, sa nene, asape: Ntewa mla malena naða ve uro re pogos tai pan ita, ana purðes nen malena nene na pe Narina ga. ¹² Yar naða narina ne Ntewa teke e kiena malena, naga tol pa malena rui, ana naða narina ne Ntewa pe to re e kiena malena poli, naga pe tol re malena poli wa.

Visen maro: Malena naða pe luas to re e poli

¹³ Nesiri ke ñaki nini pan amiu naða amlelaga pa e kia kiena ne narina ne Ntewa rui, vena iila amiuena ve kiamiu sitomena ve veve lua re, vena akilia ruru sane atol pa malena naða ve uro re. ¹⁴ Pogos naða kieta sitomena ve pepe re, ita tekilia tesuñalu ñarera e naga, ðisi na sur ya ne teviun tania mesmesun e kiena nasinenanena, yoko naga loge ita. ¹⁵ Ana visae tekilia ruru sane naga mloge ita pa rui, tekilia ruru ñena sane sur ya naða tepiun tania, sa naða tetol pa rui.

¹⁶ Visae tevisu kieta wolai tai naga kila ke naviowaena, naða naviowaena nene pe keviu re poli, pe torokin re yar mare vanon poli, pona wereplan si yeririna lala vetan Yesu Kristo, ita tekilia telenwoia, ðisi na Ntewa kilia tañan ga naga to loyuña e malena. Ana pe nepisa re nesape poga ga amiu alenwo yar naða kila pupia naviowaena, vanon naviowaena ðasia naga na marena ga, ana visae yar tai naga kila sanene, yoko ita taðatete si tevisa sur tai. ¹⁷ Sur nataðaviowaena make ga naga mlamulena viowa nene, ana naviowaena ðasia ape na marena, ana ðasia pe na marena re poli.

¹⁸ Ana tekilia pa rui sane yar naða pimi pe narina ne Ntewa, naga ve kila re si viowaena na marena pona viowaena na pe na marena re poli. Yar na sa nene monar visuar ruru naga, vilon mesmes ruru kiena malena, ðisi na yar viowa nene taðatete si kila sur tai vania, taðatete kila kare si naga. ¹⁹ Yomarava wetelu nini sike vatanon puriukawaena kiena ne Yar Viowa nene, ana ita yeririna lala naða temlelaga, tekilia ita tepe kiena ne Ntewa ga. ²⁰ Ita tekilia sane narina ne Ntewa pitomi, mla pan ita navisu kilaleena vena tekilia Ntewa naða pe lelaga, ana ita tesike ga e naga ga narui, amio narina nene, Yesu Kristo. Kieta Ntewa nene naga pe lelaga, ana malena naða mla pan ita naga pe luas re poli.

²¹ Naruu lala: amiu avisuar ruru amiu, amiu alotun Ntewa nene naga taaga ga silau, ve atañan re nono taðena lala aimi akus lelana e kiamiu sitomen lala.

M̃aki Nalua Naṓa YOANE Siriyuia Visayuena Na Tusi Nene

Suniena plas na tusi nini

E m̃aki kiena Yoane na lua, Yoane pio si naga sape “nasumonena”, a pisa ke sape siria “pa sira tai naṓa Ntewa pisirlua naga”, a sape siri m̃ena “pa narina lala”. Kinasnen visena lalua nene “sira” amio “narina lala”, tesape naga pe pisa re sira tai amio narina lala, ana pisa ke “suṃare” amio “nalelagaena lala”. Maki nini pisa panila vena sinela sisi la m̃a silaga, a naga pisa panila sape monar avisuar ruru la, vena navianena la naṓa kiela vianiena la pe mesmesu re poli ve aimi akila kare la re e kiela vianiena na visokanena lala.

Komṓasnen tusi la na nini

Visena ṓesa 1-3

Li nalelagaena lala monar sinela si yaru lala 4-6

Visena na visapegeen li nalelagaena lala 7-11

Visena maro 12-13

Visena ṓesia

¹ Inu nasumonena marua nesiri m̃aki nini pimi pan ko, sane ope sira tai naṓa Ntewa pisirlua ko, ana naruṃa wa m̃ena lala. Sineu si paṓisi na vitawe amiuenta sina e m̃aki nini, nesitom amiu paṓisi, ana pe in ga taaga re poli, li na lelagaena taṓena m̃ena lala asitoṃal amiu silau. ² Sineta sisi ita ke sanene vanon visena lelaga kiena ne Ntewa teke e kieta malena la rui, ana toṃa e ita vano ve uro re sina pogos tai.

³ Nemlen wo amiu, sane lemamena, sineyeena, a suṃarena, vim kome arimata Ntewa, amio narina Yesu Kristo, sike e ita, kila ṓelaga na lelagaena a sitomena vim ve keviu manene laa sane e ita silau.

Ataveve ṓelaga na sinesiena silaga

⁴ Nesape nevisawal van ko, nepisu naruṃa la ṓasia e yo nini rui, ana nekekaran la paṓisi naṓa nepisu la amial ruru ke e ṓelaga na visena na lelagaena po paṓisi, sa naṓa Arimata pisa pan ita. ⁵ Auia, nepisu sur nene, ana nesape neiilaar amiu sina, vena alogear kiena navisaluaena la, naṓa ita tetol sumo e purṓes rui, sa naṓa ve nevisa re sur vii tai van amiu, ana nevisawal ga visena m̃a nena nene, naṓa nesape ita monar sineta sisi ita silau. ⁶ Visae sinetan tesape tekila ve sa nene, naga kana mrapa sa nini: monar telogear visena kiena ne Ntewa. A kiena pupia navisaluaena naṓa temloge nanua rui pimi tol nagane pisa sape monar teiali silau e ṓelaga na sinesiena.

⁷ Yeririna na visokanena lala la mokliu asike pa e yomarava rui, vena vilonen sitomena kiena ne yeririna lala. La apisa ke asape Yesu naga pe yar ga tai maran taaga ga sa ga ita, pe sinelan re asape yar la alelaga e Yesu poli, naṓa asape pe Navisaarena pimi kome Ntewa a pe natamalia itaena. Yar la na sa nene, ape yar na taṓalien yeririna ga lala, ape nasinekar lala kiena ne Kristo. ⁸ Visae ve sanene, monar avisuar ruru amiu e visena la ne sanene, vena ve akila pal re sina ga malena wo naṓa memiyuṃaen m̃areran vanon amiu. Monar asuṃal m̃arera ga, ṓisi na akilia atol kiamiu nalaena nowo punu ga sirau. ⁹ Yar naṓa suṃalu, pula petan kove pa vanua, pe mlelaga re si e na vianena na Kristo, naga pe pe kiena ne re si Ntewa poli. Ana yar naṓa suṃa ruru ga loyuṃa e kieta visena na lelaga lala, Ntewa arimata amio narina asike e naga.

¹⁰ Visae akirawal lala tai imi ñalivin amiu, ana pe pisa re visena la naña mesmes sa naña kieta na kilapianena poli, aligan lua si naga vano. Ve aure re naga va e ñamiu yuña lala, ve aurear re naga su amio amiu, ¹¹ visae peraga, amiilaar ke naga pe na kilaen kiena yuñaena viowa nene pa ke metava ne.

Visena maro

¹² Visena moki navisaena sike ga wa, ana pe sineun re neligan se e ñaki nene poli. Yoko nekilalia nevim nevisu amiu ga, vena tekilia tevisi ruru ga van ita e ga e marata. Visae ve sanene naga po manene laa sane, yoko ita punu ga tekilia teloge wo vañisi.

¹³ Lueña tañena ta nene, naña Ntewa pisirlar naga suñalu sa naña ko, narina ñena ga lala asike e nini, apisa ke asape Ntewa visa ruru amiu.

Nesape naga ga nene yo, naña nesape nevisa, visena maro ga e nene.

M̃aki Na Telu Naḗa YOANE Širiyuia Visayuena Na Tusi Nene

Suniena plas na tusi nini

E m̃aki kiena Yoane na telu, naga pio si naga sape “nasumonena”, a naga siria pa yaru tai, kien kia Kaias, naḗa naga nasumonena tai na suḡare. Mieluar Kaias nene, komin naga miila ke li nalelagaena lala, a pisa pania vena naga ve taveve re ḗelaga kiena yaru viowa tai naḗa kiena kia Totriḗas.

Komḗasnen tusi la na nini

Visena ḗesa 1-4

Nasumonena mieluar Kaias 5-8

Nasumonena naga pisi kawē visena kiena Totriḗas 9-10

Nasumonena kekaran ḗelaga kiena Timitrias 11-12

Visena maro 13-15

Visena ḗesia

¹ In na yermarua nasumonena nesiri m̃aki nini piḡasu, wolai naḗa Kaias. Pona ita laḗasia apieluen ko ke yo, ana nesape nevisa van ko nekekara paḗisi na nepitawe ko sina e m̃aki nini, komin nesitom ko paḗisi, taveve ḗelaga wo na visena na lelaga kiena Suḗe.

² Erau, nekilia sane ko na osuḡa ga omloge poga ga silaga komin kioḡa malena teke pa e limana ne Ntewa rui, ana nemlenwo ko ke silau, vena kioḡa yuḡaena la wo lue ga silau, a vena inanena ve kila kare re yepeḡa. ³ Nanagane na pe yam piavi re poli, wenlaita ḗasia apim atol e nini, la asunyu pan inu sanape naḗa ko na otaveve ke visena na lelaga kiena ne Suḗe, okila ke kiena yuḡaena wo lala pano-o yar la apisu sane kioḡa malena naga mesmes nenaga. Kiela visawalena kila sineu kekara na kekara paḗisi. ⁴ Pe sur re si ta naḗa kilia kila neloge wo sanene poli, ana pogos naḗa nemloge naruu la asuḡalu ke ḡarera sanene e visena na lelaga kiena ne Suḗe, naga nene na nepisu po paḗisi.

Kaias naga pe yar tai naḗa akilia awasinea

⁵ Erau, potena van ko e yuḡaena la naḗa omiyuḡaen ke pe na iilaen yar la naḗa amial ke amio Lologena Wo, pogos naḗa apim atol amiu. La apim sane ape wolawa ga lala, ana amiu ḗasia amon visuar laena, a ko, ko na okila po pan la paḗisi. ⁶ La apim apisawal pan na lelagaena lala e suḡare nae e nini rui, asunyu yuḡaena wo na kioḡa sinesiena. Ana nagane yar taḗena si laḗasia apim asike amio ko nanagane, ana nepiun tan ko vena ko oiila la ḡena ga. A visae akila yuḡaena punu ḗisi, popon akilia avisuvevelia e narin sur tai, vena iila laena e kiela mrapa, sane mesmesun na kilaen van yar naḗa miyuḡaen ke yuḡaena kiena ne Ntewa. ⁷ Lala nene amialin ga sur nene, pogos naḗa la apa amlologon ke visena pan yar la naḗa pe amlalaga re poli wa, la pe sinelan re asape la nene avisuar la e sur tai poli, komin pe amla re Yesu e kiela malena poli wa. ⁸ Ana ita naḗa temla Yesu e kieta malena, teke e ita narui vena iila laena. Popon teiilaar la, teiila la, vena kilaen sane ita ḡena ga teyakolkol temio la, ita punu ga na yuḡaenen veraga e visena na lelaga kiena ne Suḗe.

Totriḗas naga pisuar suḡare pe po re poli

⁹ Pona ko na okilia pa yo rui naḗa in na nesiri m̃aki panon sur nene pan nalelagaena lala e suḡare rui, ana Totriḗas nene, naga sinenan pisape ve suḗen la, naga pe pisu kilale in re poli, naga pe sinenan re yagogonen kiau visena la poli, naga pisawo ke yuḡaena kiena

Suþe naþa memiyuþnaen ke ne. ¹⁰ Naga pis ke paþisi, pisa ke visena viowa lala moki pan imimi, pisa kotalia kare imimi paþisi. A pe pis viowa re ga poli, ana miyuþnae mþena piowa ga, vanon naþa yar la naþa akila ke yuþnaen kiena ne Ntewa aþnalivin amiu, pe sinenan la re poli, pisape awasuþe la sina. A metavan nene, pogos naþa amiu þasia apisuar la, amiila la e yuþnaena naþa lala apiminia, a naga suþnalu koven plan amiu mþena petan suþnare. Sur la naþa naga kila ke ne pe mesmes re nena poli, pogos naþa sa neviþnasu nekatene amiu, yoko ita punu ga teva lele taaga tevisaweke tekila ve sanapenia.

¹¹ Erau, nesape nevisa van ko, yar nene kila piowa pan ko paþisi, a piowa ga naþa ko mþena okila si viowa sanene vania. Ve otaveve re þelaga viowa, ko na monar otaveve þelaga napo. Yar naþa kila po pan yeririna taþena lala naga pe yeririna kiena ne Ntewa lelaga, ana yar naþa kila piowa pan yar taþena, naga pe pisu re Ntewa poli wa, sike perina wa.

Timitrias naga pe yar wo tai

¹² Ana Timitrias nene, naga yoko iila ko. Yeririna la akekaran naga, apisa asape naga miyuþnae po paþisi, a visena kiena ne Ntewa pisayu ke þelaga la naþa sike e kiena malena, pisape po paþisi. Ana in mþena nepisu sane pe yar wo tai, a nekilia sane ko na omlelaga e kiau visena, sane nepisa ke sur lelaga pan ko ne.

Visena maro

¹³ Sur la mokliu navisaen van ko sike ga wa, ana pe sineun re nesiri e mþaki nini poli.
¹⁴ Ana sineun nesape ve yam ve viavi re na neiþnasu nevisu amiu, þisi na tekilia tevis van ita e ga e marata.

¹⁵ Suþnare sike amio ko. Kioþna erau lala nae e nini asape Ntewa visa ruru ko. Ana awis, ovisa van erau la punu ga naþa amiu asike ne, ovisave Ntewa visa ruru amiu mþena ga. Nesape naga ga nene yo naþa nesape nevisa, visena maro e nene.

M̃aki Naṓa SUT Siriyuia Visayuena Na Tusi Nene

Suniena plas na tusi nini

M̃aki kiena Sut, Sut siri e pogos naṓa navisawalena a navianiena la moki asuṃaga naṓa la asape amlelaga e Yesu, ana kiela vianiena la pe mesmesu re poli. Ana komin suri ne nanene naga pisa pan li nalelagaena lala, vena monar avisuar ruruia vena yaru la ne sanene ve akom re varaun la, vena akila la aloru. M̃aki na plas ga nini, kana sitomiena naga maran taaga amio m̃aki kiena Pita na lua, naṓa sape li nalelagaena lala monar atarar ṓelaga na lelagaena naṓa Ntewa mila panila m̃arera, naṓa yoko sike sike luwe vano ve uro re.

Komṓasnen tusi la na nini

Visena ṓesa 1-2

ṓelaga a vianena kiena navianena piowa, a kiela nakoena 3-16

Visena na kilap̃egeen li na lelagaena lala 17-23

Visena maro 23-25

Visena ṓesia

¹ Inu Sut, naṓa nepe yaru na yuṃaena kiena ne Yesu Kristo, a nepe wenla Semes, nesiri m̃aki nini piṃnasu. Nemligan pimi pan amiu yeririna la naṓa Ntewa arimata pio amiu ape kiena rui, naṓa naga sitom amiu paṓisi, a naṓa asike vatanon navisuar ruruena kiena ne Yesu Kristo. ² Kiau leniena nesape sineyeena, suṃarena, a sitomena, la aim aule e amiu, asuṃa aim ave keviu manene laa silaga.

M̃aki nini na e lepas kiena ne la naṓa apilon kare ke visena kiena ne Ntewa

³ Erau lala, sumo sineun nesape nesiri m̃aki tai van amiu vena visawalen sitomena laṓasa e lepas na natamaliaena naṓa ita punu tetolia, ana nanagane ga ne visena tai kom pun amiu pimi tol inu, ana nepisu sane monar nesiriyu suri taṓena nene narui.

Nemloge sane suri laṓas pe po manene re poli, ana nesape nevisa van amiu aviawa m̃arera, aṃareran naṓa atarar ruru kieta nalelagaena. Kieta nalelagaena nene, Ntewa mligan pitomi pan li nalelagaena wa lala nasumo e pogos ta rui, ana pe nakepuen re si poli pona pe naliganen re si taṓena mon metavan poli. ⁴ Ana suri naṓa nemloge, nepisu sane yaru la naṓa apimi aṓarpran amiu, la akepu ke kieta nalelagaena rui. La nene, pe mesmesun re awarpran amiu poli, apim vinau ga, pe akom re e pulutava poli, ana nanagane asike pun amiu rui. La nene ape nasinekareen kieta nalotena, la pe sinelan re Yesu Kristo naṓa naga taaga pe Yerkawa a pe kieta Suṓe. Ntewa pisape sanene, sape e kiena lemamiena, naga kekaran viewoen kieta mlamulena viowa lala, ana la nene apilopu ke sina ga kiena visena, asuṃa apisa ke asape visae sanene, akilia akila mlamulena viowa ya naṓa la sinelania, pe pe sur re tai poli, yokorena Ntewa viewo la wo ga ne. Visena nene piowa paṓisi, a la naṓa asuṃa apisa ke sanene, Visena Wa pisaar kiela nakoena nanua sumo rui.

Yeririna viowa la nene yoko monar atol nakoena

⁵ Popon asitomyuli la ṓas naṓa akila piowa sanene, ana Ntewa mla ruru nena nakoena pan la. Suniena la nene apian ruru amiu e rui, pona sinemiu ṓesan yo rui, ana yoko nevisa si van amiu.

Nasumo, naga le Israel la nanua amiyuñae korena garu Isip. Ntewa tamalia pupia ñegas nen yeririna la nene, ñere plan la sina ga garu Isip, ana siraunia, la mok liu naña apilopu ñasila pania, ana naga ñe plan la amarmare.

⁶ A nalua, naga navisi la naña asuñes ma e peni. Ntewa mligan la e yo wo tai naña mon meta rui, ana pe sinelan re poli, sinelan asape akus ke sina ga lelana, ana kila sanene narui naga piar la e sen lala, naña tañatete akekapil vetan la pogos tai. Naga kila lelela tañena e yemalolo, kuan plan la apa asike ea asuñna vano-o tol pupia nakoana e Legiena Maro.

⁷ A natelu, naga le Sotom lala amio le Komora lala, amio yaru tañena lala na pulkumali la naña lavisin la. La ñena ga sa ke ga navisi la nene, kiela sitomena la pa laa metava. Pe ataveve ruru re ñelaga mesmesu naña Ntewa mligan sike e ita poli, ana asuñna akila ke ga naña yerñene pa ñere ke sina ga yerñene, ana nasinenanena na kororak la ne sanene keviu manene la pu la silaga. Ana monar tesitom ruru ya naña pimi ñalivin la nene. Pupia kapi kekan la, ana asuñna atol ke nakoana nene na wa e kapi tañena naña ve vito re tano pogos tai.

Yaru viowa la nene la apano-o apiowa manene laa

⁸ Ana yaru viowa la nene naña apim asike amio amiu, la ñena nene akila ke mlamulena piowa sa ke ga. Asuñna apisu ke sur viowa lala e kiela ñenienna lala, ana ya naña la apisuia, sinelan asape akila. Akila suri piowa la e tasnela lala, akovenlua ga visena kiena yaru naña sape visli van la, a asuñna apitalia kare ke nañareraena wo tañena la naña tañatete tevisuia. ⁹ Ana nañareraena tañena la nene pe nakirakiraen re nena amio poli. Tekilia tevisu naña Ñarnavisi Ñaikel, pogos naña pepeyu ke amio Yermare, sape lalua nene ane yoko kus tasnena ne Mosis, ana pe pis re piowa pan poli. Pona tesitom ke tesape naga popon visa visena ñarera pona visena na sinekarena lala van yo, ana naga pe pisa re poli, pisa ga pisape “Ntewa Namava yoko vis van ko na wa.” ¹⁰ Ana yaru la nene, apis piowa a apisin sinemimiena e suri punu ga. Suri la naña akilia pona sur naña pe akilia re poli, ana la apisayu kare pa piowa ga. Kiliaena naña la atolia, maran taaga ga amio kiliaena kiena ne suri mali, naña suri ya naña mloge sape kila, po pona piowa ga, ana kila ga narui. Ñelaga piowa la naña asuñna akila ke nene, kila sane kiela vianena lala pe na visokanen ga, pe mesmesu re poli, tañatete nena suñalu.

Yaru viowa la nene akila kare yuñnaena na suñare lala

¹¹ La asuñna amlulu ke mrapa namarena nene naña yaru nene Ken mlilu nanua sumo, komin naña naga sinen kar wenla. Ana yaru viowa la nene amligan la asike ñena e yo viowa nene naña Navisawalena Pelaña mligan naga se sumo, komin naga pisa visena naña pe mesmesun re vena tauluen kilavaru e poli, ana kiena visena kila yeririna kiena ne Ntewa lala apa amlotun ntewa tañena. A ta sina, amloru apito akovio e pulus nen porotano naña Kora nasumo pito kovio ea, na nene e pogos naña porotano naña naga suñalu sike ea purñaia, komin naña naga kawe visena kiena ne nasumonena naña Ntewa naga mliganaria.

¹² A pogos naña aim lele taaga vena kilaen kinanena naviranaren kiamiu sinewo, ana la nene asike sane piañe tai naña tapolou ñe ke vatanon sive, naña visae waa va la lavisinia yoko va velan ga ñe ke ea. Akila kare ga kamiu kinanena la nene, naña akinan kar ga pañisi, amun wii pano-o akilalu ñarila, añaaga pañisi, a pe asitom re yaru tañena poli, pe asitom re sur ta poli.

Yaru la ne sanene sa ga lul naña lagi kus pa ñaro ga, pe mligan ruru re kana yua pitomi kove kata lokove poli. La sa ga laki tai naña atelua mon ñaga menunuu, vanon pe ñar re mras poli. ¹³ La sa ga pupia sive naña ñan wowoia kuan kana sirpup amio lakee pe kororaki ga pa sike ura. La sa ga verue naña mlai e sinapane, naña asu yam plas ga ñisi na akokovio make sina, apa asulue e pupia pupumalo na yemalolo.

Navisawalena Inok nasumo naga pisayu yaru la ne sanene rui

¹⁴ Asitomyuli mēna visawalena tai kiena ne yermarua Inok nanua susumo laa rui, naḗa naga molue kome lus olua kiena ne Atam. Naga pisayu ke yaru viowa la ne sanene narui, naḗa naga pisa sanini, pisape “!Avisuaria! Yoko Ntewa Namava vitom amio kiena navisi wa la ve tenario, ¹⁵ vena liḗereen yaru viowa na kilaen mlamulena naḗa pe amlogear re naga poli. Yoko naga la nakoena van la komin kiela yuḗaena naviowaena na ḗarḗarera, a komin kiela visen viowa na sinekar la naḗa akoven e marana.”

¹⁶ La naḗa apim asike pumi, visena nene torokin la nenaga, vanon la ape yar na vis mumuena, la ape yar na kaween visena e sur punu ga, la ape yar la naḗa sinelan la ga, a la ape yar na vilavenen visaen pupia visena lala. Ana visae sinelan atol sur tai pumi, monar avisuar ruru la, vanon la ape yar na visen kiki a ape yar na visruruena mēna ga.

Nalologena la mēna apisayu yaru la ne sanene

¹⁷ Ana amlilu kiau erau lala, popon asuḗa asitomyu mēna ya naḗa nalologena lala kiena ne Suḗe Yesu Kristo apisape yoko imi ḗalivi na wa. ¹⁸ Asuḗa apisa ke pan ita apisape “E pogos maro, yoko yar la avitalia lele kare yuḗaena kiena ne Suḗe amio kiena yeririna lala. Yoko akila ḗarila, akila ga ya naḗa kiela nasinenanena viowa la sinelania.” ¹⁹ Yaru la ne sanene la asape kiela ḗegas ga naga po, asape la ga amiyuḗae ke e Ninuna, ana sineun nesape nevisawal van amiu nesape la amiyuḗae ke ga e sitomena na yomarava nini, Ninuna Wa pe su re nena e la nene poli.

Visena na iilaaren li nalelagaena lelaga lala

²⁰ Ana amiu, kiau erau lala, popon kiamiu yuḗaena e kieta lelagaena wa naga suḗa ḗarera lilue va metava. Monar alen silaga e naḗareraena kiena ne Ninuna Wa. ²¹ Aligan ruru amiu asu luen ga vatano e sinesiena kiena ne Ntewa, a ava ruru amiu asuḗa avisu ga Suḗe Yesu Kristo, vano-o naḗa naga, e kiena sineyeena, wereplan amiu ava e malena na pe luas re poli.

²² Yaru naḗa sitom ḗele ga, aiila naga vena kiena sitomena imi ḗarera sina. ²³ La moki na sanene asuḗa e is nen kapi, lavis akekapil avito e narui, ana avitaḗilin aure plan la, atamalia la. Popon sinemiu ye yaru lala, ana laḗas naḗa apiowa laa sane, amaraun la towe ḗa ga. Kiela mlamulena a kiela namnamena, tol make ga kiela malena a kila kare kiela ḗelaga punu ga, a suḗa e tasnela make ga, a monar ve ave erau manene re amio la, alon la towe ḗaga.

Visena maro: Leniena na yeluaren Ntewa

²⁴ Ana teyeluar Ntewa, naḗa naga kilia tarar ruru ita vena ve telor re, vano-o naga were ita teva tesuḗalu tese e kiena naurarena wa, naḗa kieta malena ikiki ruru wo e marana, a tetol pupia kekarena. ²⁵ Memieluar ko Ntewa na mava, naḗa ko ga taaga ope Natamaliaena. Mepisirilua kioḗa kia, komin naḗareraena a puriukawaena a nasuḗeena naga pe kioḗa ga. Memieluar ko pimi kome Yesu Kristo kiamimi Suḗe, siar e pogos la nakonua rui, pimi tol nanagane, vano-o ve uro re, sanene.

NAKILOGIAENA
Naña Yoane Pisuia
Ana Siriyuia
Visayuena Na Tusi Nene

Suniena plas na tusi nini

E tusi nini, Yoani siriyu suri la naña Yesu Kristo kila meraravan pania. Tusi nene, kiena kia na plas “*Nakilologiaena*”.

Yoane siri tusi nini e pogos naña le Rom lala akila suri m̄arera manene la pañisi pa li nalelagaena lala, a asuñña añeñmoñari la ke amarmare, komin naña amlalaga e Yesu Kristo. Yoane siri m̄aki nini vena visirplanen sitomiena kiena la nene, vena asuñmalu m̄arera e pogos m̄arera lala.

E tusi nini, tekilia teulo suri la naña sane m̄enienna naña Yesu kila meraravan pa Yoane, naga pisayu totou na suri lala vena li nalelagaena la e pogos nene akilia alogakilalea kana kinasa. Ana yaru tañena lala tañatete akilia kana kinasa. Sitomien kiena totou lala na tusi nene sanini. Yesu Kristo, naga pe Ntewa namava, a pe kieta Suñe, a e limana, Ntewa yoko kila kare make nena Yermare amio nasinekar tañena lala. Pogos naña kila make yuñmaena nene, yoko naga la nalaena kiena yaru la naña asuñmalu m̄arera e kiela lelagaena lala. Yoko were la ava asike amio naga mae peni viu a e yomarava viu naña naga kila ruru make rui.

Kompañnen tusi la na nini

Visena ñesa 1:1-8

Suri ñesa naña Yoane m̄enia pisuia, ana luñaki lala pae suñmare olua 1:9—3:11

Tusi naña ve yaru vike re, naña suri la olua sike ea 4:1—8:1

Kumasua olua 8:1—11:19

Alkita amio suri mali lua naña la apiowa pañisi 12:1—13:18

Suri na m̄enienna tañena la naña Yoane pisuia 14:1—15:8

Pialora olua naña apulen sinemimiena kiena Ntewa 16:1-21

Ntewa kila kare pulkumali naña P̄apilon a taulu surmali naña piowa, amio navisaluaena kokani, amio Yermare 17:1—20:10

Ntewa la nakoena va yaru lala e legiena maro 20:11-15

Peni viu amio yomarava viu, a Yerusalem viu 21:1—22:5

Visena maro 22:6-21

Navisa meraravanen tus nini

¹ Tus nini naga nakilologiaena na sur ya la naña yoko aim añaliv e legiena la naña pimi ke na wa. Ntewa sinenan yar la naña amiyuñmae kiena ke e yomarava la monar akilia ruru sur la nini, ana naga mla nakiliaena la nene pa Yesu Kristo, yoko Yesu pitetalia kiena navisi tai pimi m̄alivin kiena yar na yuñmaena naña Yoane, kila sur la nene pimi ñarpoyo e kiena m̄enien tai. ² Yoane tol m̄enienna nene, ana pisu kilale sape nanene visena kiena ne Ntewa pe lelaga, pe visena lelaga nena napo naña navisa meraravanen ya naña yoko Yesu Kristo yuñmaen sirau, kila narui siriwal ruru make sur naña naga pisuia, vena nasirau takilia tauloia.

³ Ana yoko yar a naña wolo visena na visawalen la nene, pona yagogonia, ligán ruru teke e sinena, yoko na visaruruena kiena ne Ntewa ve keviu e kiena malena, komin naña pogos na legiena keviu nene pimi ke lavis manene laa narui.

Yoane siar visawalen kiena m̄enienna e visen tai nayeluaren Ntewa

⁴ In na Yoane, nesiri plan visena la nini iñmasu van amiu ñegas na lelagaena la olua naña asike e pulkumali lala e pupia lepas naña tepio tesape Esia. Nekekaran naña nevitawe

amiu e kia kien naga naþa sike na konua rui, sike nanagane, a yoko sike sike lue. Nemlen wo amiu ke nesape pupia lemamiena a suñare sike e kiamiu malena la silaga, naþa yoko tol amiu imi kome kieta Ntewa nene amio kiena ninuna olua naþa asmal asike vamon kiena lele wa na totanoena. ⁵ A kilia imi ñena kome Yesu Kristo, naþa naga masisu ña pano kana kuruta mlau, siraunia naga þes naþa mal si petan marena, naþa nagane naga pe þarin suþe kiena ne þarin suþe na yomarava lala.

Ee, Yesu Kristo ke nanene narui naþa naga sinen sii ita paþisi pano-o tañan kana kuruta mlau vena ul plan ita vetan koaena na kieta mlamulen viowa lala, ⁶ ana naga pisirlua ita teim teve mratava ve taaga na lus kiena ne kiena narin suþe lala, a naga mligan plan ita vena teiila naga sa naþa tepe yar wa na yuñena kiena ne arimana, nane Ntewa na mava.

Yesu na kila po pan ita sanene wa, ana popon teyeluar kiena kia, tevisirlua naga va manene laa metava, vano vano-o ve þisi re pogos tai, sanene.

⁷ Avisu ruruia! Naga ke narui naþa suña kupanpo lul la metava ñalivin sape vitom tano! Yoko ita make ga kilamarata visuia, ore, amio ñena la naþa asuar naga e lak torovia, la ñena yoko avisu kilale si naga. Ana yoko pupia sineyeena a tagena molue e yeririna na yomarava lala pogos naþa asitoñal si e ya naþa la akila pan nanua sumo. Yoko ve sa ke nene narui, nevisa “sanene” ea.

⁸ Popon tewatanon Suþe Ntewa, Ntewa na ñareraena nae meta manenea, naga naþa sike kemua rui, sike nagane, a yoko sike sike lue, naþa kiena visena urmi tai pisa sanini, sape

“In na nepe purþesa, in na neve luasa.”

Yoane pisu totou na Yesu

⁹ Kam erau make lala, in Yoane in na nepe wenla amiu, naþa nevisawal sur make van amiu. Nesape nevisawal van amiu komin naþa ita ke narui naþa tepe kiena ne Yesu, ita ke narui naþa tesike vatanon kiena nasuþenena, ita ke narui naþa tesuña toþar pae ke nalogeen viowa na pog ñarera nene, a ita ke narui naþa tesuña takawean ita ke temio sitomena napiayavi.

Pogaga, kiau sunena va sanini, sane nanua sumo, nesuña nepisawal ke visen kiena ne Ntewa, nemlologon ña Yesu Kristo pano-o, le Rom la amla nakoena pan inu, amligan inu nepim nemiyuñae korena e narin purvanua nini, kien kia Patmos. ¹⁰ Ana e Legiena Wa tai, nesuña sane nemloge sane Ninuna pimi e inu, nemloge pulgo tai varaun inu, pulgon keviu sane kumasua mielu, pisa sanini sape

¹¹ “Ya ne yoko ovisu ne,

ovisuia osirilua va e tus tai,

yoko oligan va teliliv viora e suñare punu ga na lepas nae Esia,

vena akilia auloia.

Suñare la nene, la olua, nane Episas, Suñana, Pekañam, Taeatara, Satis, Pilatelpia, a Laotisia.”

¹² Pulgo nene suña pis pan inu sanene, ana sineun nesape nevisu ane sanene, noþarpu inu sane nepisu lan kantel ga la sike na, la olua naþa amiyuñae e kol. ¹³ Lan kantel la asmal ga asike sanene, ana yoko noñal yar tai suñal sike likan la, naþa naga sanena naþa asape Narina ne Yeririna. Naga miyen kulsota piavi tai, amio kulmrae tai naþa amiyuñae e kol, atelan þaro e yerena. ¹⁴ Vilþarina, miyuwowo na miyuwowo manene laa, a kilamarana tego sane kap naþa mluamene. ¹⁵ Lana ñarera ruru po, sane pototo naþa ñarera ruru po, pilavila, a pogos naþa naga pis, pulgona ñaaga sane sii naþa þanpo e piañe.

¹⁶ Naga suñalar suña ga sa naþa e limana marua, mlarar ke verue olua, a playu na mara naþa mal na mal e lepas luwoka molue ke kome logona. Marana ñena ga, suwala, miyuwowo na miyuwowo, sa naþa mrae tego ñarera kolpae.

¹⁷ Nepisu sanene, lelaga, kila narui nemare nenaga, nemlor nena e mialana. Ana kian limana marua pimi tol inu, pisape

“Ve omarau re, in naþa nepe nasiarena a nepe naluasa.

¹⁸ Naga naþa pe purþes nen malena, inu, komin nemali, þisna nemare, þisna nemal sina, ana nemal lue narui.

In ke narui naþa ki namarena amio ki na pulukapi viowa kiena ne yar na marena lala sike e luñau.

¹⁹ Ana marauen toko, osiri plan ga ya naþa opisu ke ne, naþa lepas nanagane, þarar lepas naþa na legiena la naþa pimi ke na wa.

²⁰ A nevisa sur ta van ko sumo wa, e lepas na verue olua naþa opisu e luñau, amio purþes nen kantel olua naþa amiyuñmaen e kol. Sur la nene sane kiliaen tai naþa tapolou, ana kala kinasa sanini, verue olua nene, naga navisi la olua vena visuaren suñmare la olua.”

2

Luñaki na suñmare olua

¹ Ana Yesu pisa ke sina pan inu, sape “Nagane yoko nevisawal ya naþa okilia osiri va vininua suñmare olua naþani.”

Ñak nasumo, naga va e suñmare nae Episas, naga suñmare naþa pe sinesiiena su re e poli

“Osiri þesan ñak va van navisi na suñmare na pulkumali naþa Episas, osiri sanini, ovisave ‘Visena nene pimi pan amiu pimi kome naga naþa mlarar ke verue olua e limana marua, suña mialoro teteliv ke likan miasin kantel la olua naþani.

² “Naga pisawal pan amiu sanini, sape, “In na nepisu kilale amiu rui. Nepisu kiamiu yuñmaena wo lala, nepisu naþa aþio paþisi, nepisu naþa añareran amiu amio kiamiu sitomena viyavi lala po paþisi. Nepisu ñena po paþisi sa naþa pe atañan re yar viowa la apim akila kare amiu poli, komin naþa laþas, pog naþa apim añalivin amiu, apisape la ape li na lologena, ana sa naþa kam na akilali la, a apisuveve ruru la, ana akirawal rui sane apisokan ga. ³ Komin ga kiau kia naþa amla ke rui, kam na apane pog ñarera lala, a la akila kare amiu, ana nekilia rui kam na pe amligan re poli wa, kam na apuarar ke ñarera wa, a sitomen naþa kam na asape sinemiu male paþisi, pona amloge sa naþa toroki, nanene naga pe to re nena e amiu poli.

⁴ “ “Kiamiu þelaga la nene na po paþisi, ana lelaga, sur tai teke naþa kam na asuñma akila ke ne naþa in na pe nekekarar re nena ga, a nanene na popon nevisawal mesmesun nena van amiu. Naga sanini, naþa sane pupia sinesiiena naþa toþesan e amiu, nagane pito laa tano, pe sa re si nanua poli. ⁵ Akilali naþa sinemiu wasuþe si e pupia þelaga na sinesiiena wo nanua ne, naþa sinemiu sii inu paþisi, a sinemiu siisii amiu amio yar taþena lala. E pogos nene na po na po, ana nagane na, pito tano na pito tano. Ana pogaga, monar avilon amiu ga, a monar awasuþe amiu e yo wo naþa asu þes e sumo. Ana visae ve avilopu amiu re, nekilia nesape yoko neim noñalivin amiu, neurelua purþes nen kap vivaga naþa suñmal sike ne pivaga ke likan amiu nagane.

⁶ “ “Lelaga, naga nene naga kiamiu pupia napiowaena tai ne nepisa ga pan amiu na wa, ana sineun nesape nevisawal ñena van amiu sane kam na akila ñena pupia sur wo tai, naþa nekekarar paþisi. Nane naþa kam na asuñma akawe amiu ke amio la naþa akila ke sur nawowe taþena lala, naþa yar naþa Nikolaita mlologon þesania. Apiowa ga, in ñena ga yepmavin nenaga.

⁷ “ “Yar naþa kiligan teke ea, popon loge kilale ya naþa Ninuna ne Ntewa pisawal ke pa þegas nen li na lelagaena lala. Yar naþa suñmal ñarera suña vano-o taulu naviowaena, yoko netañan vana vena kilia va su nena loyuñma likan lokove nowo kana ne Ntewa, va kan mrasnen lak na malena.” ’ ’ ”

Ñak na lua, naga pa e suñmare nae Suñana, naga suñmare naþa yar la sinela karia

⁸ “Monar osiri ñak va va navisi na suñare na pulkumali naña Suñana, ovisa sanini, ovisave ‘Visena naña pimi pan amiu, pimi kome naga naña naga ðesa a naga maro, naña añeñar mare, ana siraunia mal sina.

⁹ “Naga visawal van amiu sanini, sape “In na nekilia ruru pog ñarera la naña kam na apisuia, a nekilia nesape limamiu koren ga. A monar akilia naña pe limamiu koren re poli, ana ape yar na sur moki pañisi! Ee, nekilia sane la naña asape la ape le Yu, akuan ke visen viowa mok liu pan amiu, ana ve asitom re, pe nepisu re nena nesape la ape kiau le Yu la poli, peraga, la na ape yar na taveveen nena Yermare. ¹⁰ A pe lelaga, pona ve ve piavi re kam lañasa monar awar pupia naloge viowaena la yo, komin naña amlelaga e inu, ana ve amarau re. Pona Yermare kilia kila naña yoko akoven amiu lañas ava e yuñna nakoena yo, vena kilali amiu, ana nekilia nevisave naga yoko kila kare amiu vano tol ga legiena ve lualima. Visae sanene, monar asuñal ñarera vano-o tol naña alalua kiamiu yalua, ana visae ve alor re e pogos nene, yoko pogos naña aim añalivín inu, yoko nela pupia nalaena van amiu, nane karo nañarila namaliena naña pe kol.

¹¹ “ “Yar naña kiligan teke ea, popon naga loge kilale ya naña Ninuna ne Ntewa suñna pisawal ke pa li na lelagaena lala. Yar naña taulu ðelaga viowa na malena nene, yoko naga ve va warpo re yo e marena na lua naña yoko imi sirau.” ’ ’

Ñak na telu, naga pa e suñare nae Pekañam, naga suñare naña tañan navianena viowa tañena lala apim loyuñna

¹² “Yam si tai, monar osiri ñak va va navisi na suñare na pulkumali nene Pekañam, ovisa sanini, ovisave ‘Visena naña pimi pan amiu ne, pimi kome naga naña ðarar ke playu na mara naña mal ga lepas luwoka.

¹³ “Naga pisawal pan amiu sanini, sape “Nekilia ruru sane e naña kam asike e ne, naga lepas tai naña likan nena yo naña Yermare pe suñenia! Naga lelana lala sike ga ko pun amiu ne, ana kam na apuarar ke kiau kia na po pañisi. Nanua loyuñna e kiamiu pulkumali nene, pona tevisa tevisave pulkumali kiena Yermare, la añeñar kiamiu puruvi naña Antipás, ana la añareran asape kam na monar aluñar kiamiu lelagaena e inu. Ana peraga, sa naña naga piawa ña ñarera e inu pano tol marena, kam ñena ga yar tai pe purmatan inu re poli.

¹⁴ “ “Naga nene naga lepas napo ne, ana sur lañasa naña sineun nesape nevisa ñena van amiu. Sur ðesa, loyuñna e kiamiu ðegasa, yeririna lañasa asuñna naña ataveve ke sitomena lañasa sa ke ga Navisawalena Pelaña nanua. Visae asitoñal ñaga, naga ke narui naña pisayu mrapa lañasa pa Pelaka, ana pe piavi re poli Pelaka towea mlavia pa pisayu pa le Israel lala, kila sanene pe piavi re poli, la asuñna akan kinanena wa la naña yeririna tañena la akila kuñañaena ea pa kiela nono lala, a la asuñna akila lue ga kolau lala. Akila ke mlamulen piowa la ne sanene, ana taveve visena naña amloge ne, la asitom asape pogaga.

¹⁵ “ “A kana na lua nena, lañas si naña kam na atañan la asike likan kiamiu li na lelagaena lala. Naga nene la naña asuñna ataveve ke navianena na wowe tañena la nene, naña yar nene Nikolaita naga mlologon ðesania.

¹⁶ “ “Visae ve sa nene, kam na monar avilopu kiamiu sitomen vetan naviowaena la nene! Visae peraga, yoko ve ve piavi re neim nakate pun amiu, a yoko visen la naña nevisa e gou van la e pogos nene, yoko ve sa playu na mara naña te kinekinela, kilapel la vañisi.

¹⁷ “ “Yar naña kiligan teke ea, popon naga loge kilale ya naña Ninuna ne Ntewa pisawal ke pa ðegas nen li na lelagaena lala. Naga naña taulu napiowaena, yoko naga la kiena nalaena wo tai. Yoko nela kinanena tai vania, kinanena nena sa naña le Yu la akan e yokorena, ana naga nene na pe kinanena tai naña pe yar pisu re poli wa. A yoko nela kilavaru yuwowo tai vania, naña ate kia viu tai sike ea, naña naga naña waria, naga ga yoko kilia ruru kana kinasa.” ’ ’

Āmak na vari, naga pa e suṃmare nae Taeatara, naga suṃmare naṓa taṃan ga ṓelaga piowa suṃa loyuṃa ea

¹⁸ “Pogos si tai, monar osiri ṃak va va navisi na suṃmare na pulkumali nene Taeatara, ovisa sanini, ovisave ‘Visena na pimi pan amiu pimi kome Narina ne Yeririna, naṓa kilamarana pila a pivaga sane purmenen kapi, a lana ṃarera sane pototo. ¹⁹ Naga pisawal pan amiu sanini, sape “In na nekilia ruru kiamiu yuṃaena lala, a kiamiu sinesiiena lala amio kiamiu naviawaena, kiamiu yuṃaena ṃarera a sitomena la naṓa piayavi, a metavana nekilia nesape nagane kam na akila pa laa narui, taulu naṓa akila ṓesania.

²⁰ “ “Naga nene naga kana lepas napo ne, ana sur si tai monar nevisa meraravan van amiu. Nanene e lepas na sira viowa nene, Sesepele, naṓa apisu kilale kiena napiowaena lala, ana ataṃan ga kila ṃa wowe e sur viowa la naṓa kilakila ke ne. Naga sape naga pe sira tai naṓa pe navisawalena, a pona kam na amlelaga e naga yo, ana naga pisokan ga ne. E kiena navianena lala, naga suṃa ṓere yar na kiau yuṃaena la apa ape taṓena la narui, naṓa nagane asike e ṓelaga na mlamulena na kolauena rui, a asuṃa akan ke kinanena kana nono lala, a la asitom asape ṓelaga la nene na pogaga ne. ²¹ In na nemla pulmas pania vena sitom ruru sina, vilon naga vetan kororak la nene, ana naga yepen mavin ga.

²² “ “Pogaga, kiau sitomena teke rui sane yoko nekila naga ṃene tog tai na maiena ṃarera lala, a yoko nekila yar la naṓa akila kolau amio sira nene, visae ve avilon la re e kiela mlamulena viowa lala, yoko la ṃena aloge viowa vaṓisi na vaṓisi. ²³ Sira nene, yoko taṓatete narina mali, yoko sineu kar la make ga. Ana pogos naṓa la na ṓegas nen li na lelagaena la avisu sur nene, yoko avisu kilale sane in ke narui, kiau navisuvevena telivi pano tol ya naṓa teke e sinen yaru, a kilia lual ya naṓa teke e kiena sitomena. A yoko avisu kilale ṃena sane in ke narui nesuṃa nekila maran ke pa yar lala torokin ga ṓelaga na sur la naṓa akila ke e kiela malena lala.

²⁴ “ “Ana e lepas na pun amiu kam yar taṓena lala nae Taeatara, nekilia nesape kam na pe ataveve re navianena kiena ne sira nene poli. Naga kilali naṓa koven visen kiki la pan amiu, sane yoko naga vike sitomena urmi la naṓa tapolou van amiu, ana kam na apisu kilale naṓa Yermare ga naga pe purṓesnen visena la nene. Yoko ve nevisa re si sur taṓena van amiu, ²⁵ ana nevisa ga sane kam na auarar ga visena lelaga la nene ṃarera naṓa kam na atol rui, ve aligan re, auarar la ṃa vano-o neim si na.

²⁶ “ “Naga naṓa taulu na viowaena, kila ga taveve ya naṓa sineunia vano-o tol luas nen pogos nini, yoko nela pupia nalaena vania. Yoko netaṃan vania naga ve suṓen purvanua lala, ²⁷ sa ga naṓa Tus na Yawena la pisayuia, naṓa sape
Naga yoko ve suṓen yeririna lala naṓa laki naṓa mlarar ke e limana, naga pe pototo ṃarera tai,
a la naṓa ape ṓarṃarera, naga yoko kuan wowa la e porotano ave kinakinasia sane piaki tai naṓa
amiyuṃaen ga e porotano. Yauena 2:9

“ “Naṃareraena na kilaen sanene, Ata taṃan pan in rui, ana yoko netaṃan lein va kiau yaru nene. ²⁸ Ana pe naga re ga nene poli, ana yar nene, yoko neligan verue naṓa Melag sike e limana.

²⁹ “ “Yar naṓa kiligana teke ea, popon naga loge kilale ya naṓa Ninuna ne Ntewa pisawal ke pa ṓegas nen li nalelagaena lala.” ’ ’

3

Āmak na lima, naga pa e suṃmare nae Satis, naga suṃmare naṓa momalio ga mon ṃaga

¹ “Monar osiri si ṃak va va navisi na pulkumali na suṃmare nae Satis, ovisa sanini, ovisave ‘Visena nene naṓa pimi pan amiu ne, pimi kome naga naṓa pisuar ke ninuna la olua kiena ne Ntewa amio kana verue ne la olua.

“Naga pisa pan amiu sanini, sape “In na nekilia ruru kiamiu yuṃaena lala. Amiyeluar amiu paṓisi, asape kam na suṃmare tai naṓa mal ruru po, ana peraga, in na nekilia ruru paṓisi kam na amare ga aṃeke na. ² Nagane pe pogos naṓa kam na akirava towe narui. Kiamiu yuṃaena lala, in na noṃal sane e visuena kiena ne Ntewa, kam na pe akila make ruru re poli, a kam na akila pe po re nenaga. Kiamiu kapi pe kovio make re poli wa, ana

naga suŕna panon ke naŕa lavis mare narui, ana komin sur ne nanene, nepisa ruru pan amiu nesape kam na monar ayuŕnaen ruruia vena imi wo sina.

³ “ “Visae ve sanene, kam na monar asitoŕnal si visena wo la naŕa amloge, a amla rui. Alogear ruruia, a avilon kiamiu malena wasuŕe si na, komin naŕa visae ve atavilo re, nekilia nevisa nena van amiu sanini, yoko neim noŕmalivin amiu sane yar na vinauen tai naŕa kam na taŕatete akilia.

⁴ “ “Ana lelaga, nekilia nesape kam nae Satis, kam pe moki re poli naŕa asuŕna pogaga, naŕa pe akila re ŕmala kulsota la namname poli sane laŕasia. La ke narui amekiki ruru nenaga, ana yoko ayen sur yuwowo, ayaloro amio inu meva e kiau yo. ⁵ Yar a naŕa taulu naviowaena, naga ŕmena yoko ayowa ruru wo e kulsota yuwowo la ne sanene. Naga, kiena kia taŕatete nena neyumulua e tus namalena pogos tai, ana yoko nekilogia naga va Ata amio kiena navisi lala, nevisave yar nene naga pe kiau yar lelaga nena napo.

⁶ “ “Yar naŕa kiligana teke na, popon naga loge kilia ya naŕa Ninuna ne Ntewa suŕna pisawal ke pa ŕegas nen li nalelagaena lala.” ’ ’ ”

Ŕak na orai, naga pa e suŕmare nae Pilatelpia, naga suŕmare naŕa pulmas wo na kilaen yuŕnaena sike e marana

⁷ “Monar osiri si ŕmak va va navisi na suŕmare na pulkumali naŕa Pilatelpia, ovisa sanini, ovisave ‘Visena naŕa pimi pan amiu ne, pimi kome naga naŕa pe wa, a pe lelaga, naŕa naga ke narui naga ŕar ke ki na kiluaen pulutava ŕmana Ŕarin Suŕe Tepet nanua. Ya naŕa naga vietavania, taŕatete si yar tai kotawea, a ya naŕa naga kotawea, taŕatete si yar tai vietavania.

⁸ “Naga pisawal pan amiu sanini, sape “In na nekilia ruru kiamiu yuŕnaena rui. Ana monar avisu ruruia, in na nevietava e pulutava tai van amiu naŕa yar tai taŕatete si kotawea. Nekilia ŕna naŕa kiamiu ŕmareraena ve tokak ga, ana nekekara paŕisi naŕa apuarar ruru ke kiau visena, a pe akila kare re kiau kia naŕa teke e amiu poli.

⁹ “ “La naŕa ataveve ke Yermare, la apa ke lele taaga vena avisirlua kiela ŕegas, a la apisa ke asape la ape le Yu nena napo, ana pe sa re nene poli, apisokan ga. Ana siraunia yoko nekila la nene aim akinai e lamiu vena avisu kilale sane pe kiau sitomiena su re e la poli, ana sike ga e amiu.

¹⁰ “ “In na nepisa ŕna pan amiu nanua rui nesape monar asuŕnal ŕmarera amio sitomen la naŕa piayavi silaga, ana nepisu sane apuarar ruru kiau visena nene. Komin sur ne nanene narui, nekilia nevisaar van amiu sane visae pupia naloge viowaena yoko imi e yomarava vena kilali la naŕa asike ea, ana yoko in na nesuwo amiu ruru nena ga, yoko sur nene taŕatete tol amiu.”

¹¹ “ “Ve ve piavi re, neimin amiu sina. Ya naŕa asuŕnal asike e rui, monar auarar ruru ŕna vano-o neim noworun amiu, ana yoko akilia ala kiamiu nalaena, ana taŕatete yar taŕena kilia warlua kiamiu karo na ŕarimiu naŕa pe kol vetan amiu. ¹² Yar naŕa taulu nakilaliena make ga vano-o neimi, yoko noure naga imi sane pupia kemraŕe na loyuŕna e yuŕna wa ŕmana Ntewa, yoko yar nene sulue sike loyuŕna nene narui. Yoko neyowauia naga amio kia la naŕa nesiri se ea, sane kia kiena ne kieta Ntewa, a kia kiena ne pupia pulkumali, na Yerusalem viu, naŕa mligan ma e peni kiena ne kieta ne Ntewa pitomi, a amio la nene, yoko nesiri ŕmena kiau kia viu ea.

¹³ “ “Yar naŕa kiligana teke ea, popon naga logekilale ya naŕa Ninuna ne Ntewa suŕna pisawal ke pa ŕegas nen li nalelagaena lala.” ’ ’ ”

Ŕak na olua pa e suŕmare nae Laotisia, naga suŕmare naŕa pa piowa rui, ana pe asitom re sur poli

¹⁴ “Na maro, monar osiri ŕmak van navisi na suŕmare na pulkumali naŕa Laotisia, ovisa sanini, ovisave ‘Visena naŕa pimi pan amiu pimi kom pun naga naŕa pe ŕarin sur make

ga, naþa naga ga kilia visave “Sanene.” Naga masisu pona pe lelaga e Ntewa vano tol naþa kana kuruta mlau, a naga pe suþen wetelun yomarava naþa Ntewa siia.

¹⁵ “ ‘Naga pisawal pan amiu sanini, sape “In na nekilia ruru kiamiu yuþnaena lala, a nekilia nevisu kilale sane pe kiamiu sitomena la manin manene re poli, a pe pisun manene ruru re mþena poli. Popon manene la naþa visae sinoþman omanini, ko omanin ruruia, pona visae ovisunu, ovisun ruruia, ana naþa sinemiu la peve lua ga sanene, þelaga nene pe sineun re nenaga. ¹⁶ Ana komin naþa sinemiun amanini a sinemiun avisun sanene, in na nesape neluelua amiu e logou narui.

¹⁷ “ ‘ “Kam na asape amiyuwon polo kiamiu sur wo la mokliu, ana kam na asape taþatete yar tai kilia la sur van amiu, kam na amla ke rui. Ana peraga, e kiau navisuena pe sa re nene poli. Kam na pe apisu kilale amiu re poli, ana pe kiamiu sur wo re nena tai, kam na limamiu koren ga, kilamaramiu þala, a yepemiu mian ga. ¹⁸ Nevisa van amiu, popon awasuþe si aim pun inu, aim awar kol nini naþa kap kekan van kana namname rui, vena akilia alarar sur wo tai e limamiu. A popon aim awar kulmrae la naþa miyuwowo, vena akalo amiu, vena ve amawa re, a popon aim awar mþaki na vilanen e kilamaramiu, ana vena akilia akirava sina.

¹⁹ “ ‘ “Yaru ai naþa sineu siia, monar nevis vania vena nakawe ruru kiena malena, ve sanene, monar ala kiau visena lala, ana avilopu amiu. ²⁰ Ayagogo ruruia! In na nesuþmal nesuþna nesigariga ke pulutava na kioþna malena. Ko naþa ologe pulgou pio, ovietavan inu, neiþmasu loyuþna italu tesun, italu tekinana.

²¹ “ ‘ “Naga naþa suþmal mþarera vano-o taulu naviowaena lala, netaþman vania sane naga topae amio inu e leleu wa na totanoena, sa ke ga naþa in mþena netaulu kiau nasinekar, ana siraunia Ata þere inu netotano ke nemio e lelenu wa na totanoena.

²² “ ‘ “Yar naþa kiligana teke ea, popon naga logekilale ya naþa Ninuna ne Ntewa pisawal ke pa þegas nen li nalelagaena lala.” ’ ’ ”

4

Ntewa na lelenu naþa meta manene laa ma e peni

¹ Pogos naþa nepisu pae sur la nene, noþmal ke sina ga pulutava tai navaen loyuþna ma e peni, mþeke ga vamon inu. A nemloge ke sina ga pulgo naþa pis pan inu nanua, pis na pulgona miyelu keviu sane kumasua, ana pisa pan inu, sape “Ovam meta e nini sumo wa, vena nekila ovisu sur la naþa yoko aim sirau.”

² Pisa sanene, ana veraga ga, nemloge sane Ninuna ne Ntewa þerelua ninuu, mligan inu ma e peni, ana nekira pa e pupia lele wa na totanoena tai mþeke ga e marau, naþa yerka wa tai totano teke ea. ³ Nepisu sa naþa pila, þar maran kilavaru la naþa po na po, a kana kap nena miyervivia sa ga kuperierier. ⁴ Kana pupia lele na totanoena nena mþeke ga lika, a lele na totanoena mþena laþasa miyervivia, nopuloia tol lualima yam lua pa vari [24]. E la peve taaga, yar taaga teke e tai kila sane la mþena tol lualima yam lua pa vari [24], la nene ape nasumonena nae ma e peni lala. La nene, mþala kulsota la miyuwowo paþisi, a amien karo na þarila naþa pe kol. ⁵ Nesuþna nepisu ke sane, nemilan mþena yekarpla ke ga likan yo wa naþani, amio mþaagena na pupia polilu tera ke ea. Vamonina, kap vivaga la olua asuþna apivavaga, naga nene nane ninuna ne Ntewa olua, ⁶ asuþmal asike e yotop tai, naþa meri ga mþeke na sa ga sive, pilavila a merarava ruru po sa ga kupito.

Ana likan yo naþani, yar mali la vari asuþnaga, naþa kilamarala la moki liu sike vamon la a varaun la, asuþmal lavisi, asuvivi pupia lele wa na totanoena.

⁷ Yar mal þes nene, sa ga laion, na lua sa ga puluk naþa purwolu, na telu naga þar ga maran yaru, na maro na sane pepauþna. ⁸ La nene, la make ga kupela la orai, naþa kilamarala la kalo make ruru mþena kupela la nene, pa mþena e pulugala.

La nene kiela yuṁaena, legiena a yemalo, la pe aparurula re pog ta poli, la asuṁal apisawal lue ga, asape “Ntewa na ṁareraena na mava, naga su ṁesa, naga sike nagane, a naga sike sike nena. Naga pe wa naṁa pe wa, naga pe wa paṁisi.”

⁹ E visena la ne sanene, la asuṁa apisirlua ke kia kiena naga naṁa totano teke lele wa likan la, apatanon ke naga, asuṁa apisa ke potena pa naga naṁa yoko mal lue narui. Pogos naṁa asuṁa apisa ṁaga, ¹⁰ nasumonena ṁena la nene apatanonia, amlotun ke naga naṁa taṁatete mare pogos tai. Ana siraunia, aṁar plan kiela karo na ṁarila naṁa pe kol, amligan su tano se lana, asape:

¹¹ “Kiamim Suṁe Ntewa, mesmesun naṁa naurarena, navatanonena a naṁareraena make ga, ala van ko, kioṁa ko ga taaga. Ko ke naṁa osii make sur narui, e ga e kioṁa nasinenanena atol kiela malena rui.”

5

Tus naṁa apulonaria, amio narin sipsip, naṁa lalua asike ma e peni

¹ Ana yokorena nepisu si yerkawa nene naṁa totano teke e lelena wa, naga mlarar ke sur tai e limana marua, sur nena naga tus tai, naṁa asiri ga e lepas luwoka, ṁisi na apulonaria, ana atelan kana lok olua suwoia.

² Ana nemloge pupia navisi tai pion manene pa metava, piunia pisape “Ane torokin kilaroro lok la nene? Yar tai sike ne kilia vae tus nene woga pona peraga?”

³ Moṁa ga sanene pano-o, peraga, pe yar re tai naṁa ma e peni pona yomarava, pona vatanon yomarava, naṁa kilia vae tus nene poli, pe yar re nena tai naṁa torokin kira va loyuṁa e poli. ⁴ Nepisu sanene narui, nemloge piowa, netagi na netagi, naṁa taṁatete yar tai kila.

⁵ Ana nasumonena la tai nene pis pan inu, pisape “E, ve otag re sina! Opisu ke ne, nanene naga laion naṁa molue kome yeririna la nae Suta, naṁa apio asape lus kiena ne Tepet, naga taulu make sur la ṁisi rui. Naga ke narui naga kilia kilaro lok la olua nene, naga ke naṁa yoko vae tus nene narui.”

⁶ Ana nekira pano, pe laion re poli, ana nepisu narin sipsip tai suṁal sike likan yar mal la vari a nasumonena lala vamon yo wa nene. Naga pe narin sipsip ga, ana kana laṁaliu olua amio kilamarana olua asike e ṁarina. Naga suṁal sike na, naga apisu sa naṁa akila kuṁaṁaena e rui, ana mal ruru ga suṁa ga. ⁷ Naga mial pimi, kuslua tus naṁa petan limana yerkawa na ṁamarua, metava e pupia lele wa na totanoena. ⁸ Mla pae, ana yar mal la vari nene amio nasumonena la lualima yam lua pa vari [24] nene amloru e lana. La pepe taaga aṁar kiela yukalele lala a kiela piala la naṁa amiyuṁaen e kol, pulen ga ponotaninu la naṁa asikapia, ana kala ponos taninu po paṁisi naṁa pa ke metava, nane leniena lala kiena nalelagaena wa lala. ⁹⁻¹⁰ A la amiyaun ke yau viu tai naṁa sanini,

“Akuṁaṁain ko,

ana e koṁa kuruta

opul plan yeririna lala ape kiena ne Ntewa,

naṁa amolue e ṁegas nen yeririna make ga,

e visena kar make ga,

e purvanua kerkeviu make ga,

a e narin purvanua make ṁena ga.

Ko osikol la apim ape ṁegas taaga navatanonen ṁarin suṁe ve taaga ga,

aim ave yar wa lala na yuṁaena kiena ne Ntewa,

naṁa yoko ave suṁen yomarava nini.

Ana komin naṁa okila sanene,

torokin sane ko ga taaga ola tus nene narui,

owar plan kana lok lala, ovae.”

¹¹ Nesuũa nepisusu ke sanene, ana nemloge navisi la amiyau, la mok na moki, aũa la tenario via na sanene. Amiervivi lele na totanoena wa amio yar mal lala a nasumonena la nene, ¹² amiyau ñarera pařisi, apisa sanini, asape, “Narin sipsip, nařa akuřařainia, naga taaga po na po. Nañareraena make ga, nawoena make ga, manmaruaena make ga, puriu kawaena make ga, navatanonena make ga, naurarena make ga, nayeluarena make ga, torokin akila ga van naga taaga.”

¹³ Siraun nanene, nemloge si surmal make ga la ñena amiyau, surmal la nařa asike ma e peni, amio la nařa asike e yomarava, pona e porotano pona e sive, kiela yauena pisa sanini, pisape, “Nayeluarena, navatanonena, naurarena, a nañareraena va va yerkawa nařa totano teke e lele wa, amio ñena narin sipsip, vano vano ve uro re.”

¹⁴ Ana yar mal la vari nařani apisawalia asape “Sanene” komin visena la nene, ana nasumonena lala amloru, akinai, amlotun lalua.

6

Lok la olua na tusi nařa aplonaria

Lok řesia: Yerkaawa na řelaga na kilaen mara, nařa kus wosi yuwowo

¹ Nepisu manene ñaga, nepisu narin sipsip nařa kilaro lok na sumo na tus nene. Naga kila pae, ana yar mal la vari nene tai pio e pulgo tai sa nařa polilu, pisape “Oimi!”

² Ana nořal ga wosi tai nařa miyuwowo suřal sike e marau veraga. Nořal yar tai teke meta ea, řar ke viu lamias, ana la amligan karo na řarina kiena řarin suře teke e řarina, ana kus kiena wosi nařani kirir pano sane yar namara tai nařa vanon vena taulu kiena nasinekar lala.

Lok na lua: Yerkaawa na řelaga na weñaren yaru, nařa kus wosi pivaga

³ Yoko narin sipsip kilaro lok na lua. Kila pae narui, ana nemloge yar mal na lua pio, naga ñena sape “Oimi!”

⁴ Ana wosi tařena ke sina ga pimi kate veraga, nařa pivaga. Yar nařa kusia, atařan pania vena va war plan suřarena nařa sike e yomarava, vena yar la asuũa awewe mořar la. Amligan pupia playu na mara tai e limana, ana naga ñena kiriri pano.

Lok na telu: Yerkaawa na řelaga na visoena e yomarava, nařa kus wosi malko

⁵ Yoko, narin sipsip kilaro lok na telu. Kila pae narui, nemloge yar na telu pio, naga ñena pisape “Oimi!”

Ana nepisu ga wosi si tai nařa malko suřal sike e marau veraga. Yar nařa kusa, naga mlarar ke skel tai e limana, vena visuveve kinanena lala kana yeririna na yomarava.

⁶ Ana nemloge visena tai molue ga likan yar mal la vari nařani, asape “Ovano, atařan pan ko asape okilia okila nařa yo ve plasan kinanena, nařa yoko monar aul narin kinanena ga e kilavaru keviu. Ana ve okila kare manene re purřes nen purolip lala nařa amiyuũaen ke sirveve e mrasnela, a ve okila kare manene re purřes nen kilkerrep lala nařa amiyuũaen waen e mrasnela.” Apisa sanene narui, a naga ñena kiriri pano.

Lok na vari: Yerkaawa na řelaga na marena, nařa kus wosi na yepen pe yavi

⁷ Yoko, narin sipsip kilaro lok na vari, kila pae ana nemloge yar mal na vari pio, naga ñena sape “Oimi!”

⁸ Ana nořal ga na wosi tařena nařa yepena pe yavi suřal ga sike e marau. Yar nařa kusia, apio kiena kia asape Marena, a naga, kiena erau tai mial ke amio, nařa kiena kia asape Pulukapi. Ana e lalua nene, atařan asape lalua akilia akila viowa va yar ve moki e yomarava, e playu na mara, pona e viso, pona e maiena, pona e surmal tetan lala. Visae ve sanene, yar la vari asike yomarava, la telu akilia asururu ga, ana tařena tai akilia akilapel naga sanene.

Lok na lima: Li na lelagaena la naña ape masisu pano-o aňemoňar la

⁹ Yoko, narin sipsip kilaro lok na lima. Kila pae, ana noňal wonta pulen ninuna ne yeririna lala amiyuwon la miyervivi miasina. Nanene la naña aňemoňar la komin aňarera e logearen visena kiena ne Ntewa, a asuňal m̄arera asape amlelaga e Yesu. ¹⁰ La nene, noňal atag ke pa Ntewa e pupia pulgo keviu, asape “Ake Suņe na sur make ga, ope wa a ope lelaga, awis ovisu kilale kamim kuruta nene. Pogwai naña yoko okila maran va yar viowa la naña akila ke piowa sanene?”

¹¹ Apisa pa sanene narui, ana aňar kulsaket yuwowo la pan la amiyenia, ana apisa pan la asape sur naña la apiunia naga pere wa. Asape monar asuňate li ga ve plas ga wa, komin naña kiela erau laņasa asike ga wa, amio m̄ena kiela puruvi taņena lala a vinela lala, naña yoko la m̄ena monar awe moňar la komin naña amlelaga, ana pogos naña la punu ga aimi toroki, yoko Ntewa kila ga ya naña la apiun na wa.

Lok na orai: Legiena maro

¹² Yoko, nepisu naña narin sipsip kilaro lok na orai. Kila narui, yemninu veraga, a pe piavi re poli mrae pimi malko yemalolo nenaga, a kupario pimi pivaga sane kuruta, ¹³ a verue la naña asike ma e sinapane akekapil apitom tano e porotano, sa ga naña mralak mene, pogos naña pupia lagi miyui kululun lasa. ¹⁴ Yoko, avilonar sinapane sa naña apilonar takue akus pano, a tavie make ga a purvanua make ga alen plan la vetan lelela lala.

¹⁵ Ana pogos naña yar la avisu sur la nene, pupia marauena naña pupia marauena. Ŕarin suņe na yomarava lala, yerkawa lala, nasumonena kiena ne yar na mara lala, yar na sur moki lala, yar m̄arera lala, amio m̄ena kiela yaru na yuňaena lala, a yar taņena make ga e yo kar ga lala, la make ga ayalin mesmesun puluve lala pona pulkilavaru, avavinin yo la metava e kunusa, akilayonli naña atapolou ea. ¹⁶ Atol yo la nene, ana marauena pimi keviu manene laa, a apion pa kilavaru lala amio kunus lala, asape “Awis, aloru akalo ruru imimi, vena navisuena kiena ne naga naña teke meta e lele wa ve tol imim re, a vena nasinekar kiena ne narin sipsip ve kila kare imim re. ¹⁷ Pupia legiena na sinekar kien la lua nene pimi rui, a yoko ane kilia suňalu mali e pogos nene? Peraga ne, nagane yoko viowa manene laa van ita make ga.”

7

Ntewa pisaar kiena pupia ŕegas nen yeririna tai vena ave kiena

¹ Siraun sur la nene, nepisu navisi la vari asuňal asike e mrapun yomarava varoka, asuňa akilawo ke lagi vari naña amiyui ke e yomarava, vena lagi la nene ve ayui re si e sive, pona e porotano, pona meta e lak lala. ² Yoko nepisu ke sina navisi taņena, ŕar sur na ween totou kiena ne Ntewa mali van kiena yeririna lala, ana naga molue e naña mrae pa meta ea pimi. Naga kilia m̄a sape navisi vari nene, la aňar ke naňareraena naña akilia akila kare porotano a akilia akila kare sive, ana naga pion manene pan la, pialuņar pan la vena ve akila re si sur tai. ³ Pisa sanini, sape “Ei, toko, ve akila kare re sive pona porotano pona lak lala, vano vano tol naña teligan totou tai te piamenan yar mesmes lala naña ape kiena ne kieta Ntewa.”

⁴⁻⁸ E pogos nene narui nemloge ga na wa naña apisawal nena maran la naña amligan totou e la. La nene amolue akom e lus nae Israel la lualima taaga pa lua, naga lus la naña aňar kia kiena yermarua apua kan la nene, nane Suta, Rupen, Kat, Asa, Naptali, Manasa, Simion, Levi, Isak, Sepulan, Sosep, a Pensiman. Ana e lus make la nene, tai kana manu lala tol lualima taaga pa lua [12,000] amolue komea, kila la punu ga tol sane kana manu ne lala tol ponotia lualima yam vari pa vari [144,000].

Pupia ŕegas taņena lala naña amiyen kulsota yuwowo lala

⁹ Ana siraunia, nekira pa vamon inu narui noñmal pupia ðina na yeririna lala, naða moki na moki, taðatete auloia, la ke naða amolue akom e lus taðena la narui. La ke naða ape yeririna taðena lala na purvanua taðena lala, amio kiela visena taðena lala, apim asuñal asike vamon pupia lele na totanoena naða narin sipsip totano teke ea. La make ga amien kulmrae yuwowo nowo lala, a aþarar mañela lala, ¹⁰ a apio manene pa metava, asape “Kieta Ntewa teke e kiena lлена wa, naga ga amio narin sipsip, lalua ape purðes nen kieta natamaliaena.”

¹¹ Ana amio la nene, navisi mñena lala asuñal amiyervivi yo wa, a amiyervivi mñena nasumonena lala amio yar mal la vari naðani, ana la mñena akinai aþan þarila pito tano vamon yo wa, amlotun Ntewa, ¹² asape “Ee, lelaga pa!

Nayeluarena make ga, a naurarena, a namanmaruaena, a navisaen potena, a navisirluaena, a puriukawaena, a nañareraena, la punu ga nene ape kiena ne kieta Ntewa naga taaga, a yoko ve sanene sulue na sike ne. Yeluaren van Ntewa!”

¹³ Ana e pogos nene, nasumonena la tai piun tan inu, sape “Pupia ðina naða amiyen kulmrae yuwowo la ne, okilia osape a la nene, a okilia osape la asu pe na apimi?”

¹⁴ Ana nesape “E peraga, ana ko ope yerkawa nae e nini tai, ko okilia ma yo?”

Ana pisatañea sape “Ore, la ke nene narui naða aþaro e pupia pogos naloge viowaena. Kulsota la ne amiyen ke ne, akevanla e kuruta kana narin sipsip naðani, nane apim amiyuwowo ruru sane opisu ke ne. ¹⁵ La na kiela yuñena sanini, sane ‘La asike vamon yo wa kiena ne Ntewa, legiena a lemalo amiyuñae kiena ke loyuña e mñana yuña wa,

a naga naða totano teke meta ne, naga yoko visuar la,

¹⁶ Yoko taðatete si viso kar la,

yoko ve moto karla re si narui,

mrae ve kila kare la re sina,

a pupia kapi ve visun la re sina,

¹⁷ komin narin sipsip naða teke likan yo wa meta ne,

naga yoko vagan la,

naga yoko sumon la ava e purðes nen wii na malena,

a yoko Ntewa yumu plan make wamarala.’ ”

8

Lok na olua: Yo pa ruru nenaga

¹ Siraun nene, nepisu narin sipsip kilaro lok na olua. Kila narui, sur make ga nae mae peni aparurula veraga, pe maagena re si ta poli, yo mñano nena ga mon ma pano-o tol komsus nen aora taaga.

Kumasua la olua

² A pe yam piavi re nenaga, noñmal navisi la olua naða asuñal asike e marana ne Ntewa vena kilaen kiena yuñena, a amla kumasua olua pan la, tai kus tai, tai kus tai.

Pias nen ponotaninu naða amiyuñae e kol

³ Ana siraunia, navisi taðena pimi. Naga kus pias nen ponotaninu tai, naða amiyuñae e kol, a naga kus pimi suñal sike e wonta, naða naga mñena amiyuñae e kol, a naða sike vamon lele wa na totanoena. Ana aþar ponotaninu mokliu pania vena sikapia e wonta vena kila ponos wo, a amla mñena leniena lala kiena ne nalelagaena wa lala pania, vena ligan to meta e wonta sane nalaena tai. ⁴ A pogos naða kapi nene kekan ke ponotaninu nena, kana ponosa amio leniena kiena ne nalelagaena wa lala, amolue petan limana ne navisi naðani akaka ava atol marana ne Ntewa.

⁵ Yoko, navisi naþani þar plategkap laþas naþa apranar sike e wonta nene, kokonia pito e pias nen ponotaninu nene ana koven pito tano e yomarava. Ana pogos naþa suri nene tol yomarava, kila polilu kapur kar ga e yo punu ga, amio kana mumuena sa naþa kapiapo, amio mēna yekarpla, a yemninu.

Kumasua na miyelu þesa: yua amio kuruta

⁶ Ana navisi la olua naþa aþarar kumasua olua nene, asu ruru ke naþa asape ayu narui.

⁷ Navisi na sumo miyu kiena kumasua, ana kila narui mrayua la naþa mārera sane kururu kilavaru, amio kuruta naþa pisusun sane kapi, aptom akila moñar sur kar la e yomarava. Amiyuñāen mña sanene pano-o kapi kekan make yomarava komþasa amio kana purlaki ne lala, amio sur make naþa kapur sike ea.

Kumasua na lua miyelu: tavie na kapi

⁸ Ana siraunia, navisi na lua miyu kiena kumasua. Nanene kila pupia tavie kar tai, naþa kap molue ke komea, akovenlua pito e sive. Pogos na kove sive, ana sive komþas pimi sane kuruta, ⁹ ana kana sur mal ne lala amarmare, a waa la naþa asike e pupia lepas nene atalilu.

Kumasua na telu miyelu: verue naþa kirir ma e sinapane

¹⁰ Yoko navisi na telu miyu kiena kumasua. Nanene kila pupia verue tai, naþa kapi pivaga ke ea tegoli yo sane kapi vivaga, molue ma e sinapane, miere pitomi miae yomarava. Ana kana kapi nena pa tol wii la naþa mlau a þarin wii lala. ¹¹ Kia kien verue nene, asape Wii Melkalka, ana kila narui wii nae yo la moki pimi melkalka, ana yeririna la amun þele ga, moto karla mña pano-o amarmare.

Kumasua na vari miyelu: yemalolo

¹² Yoko navisi na vari miyu kiena kumasua. Nanene kila naþa mrae komþas pimi malolo, a kupario komþas pe tego re si poli, a verue la moki naþa pe añal la re si poli. Kila narui legiena pimi plas manene laa, a pe lepamiema re si poli, kila narui yemalolo paþisi e yomarava wetelu.

¹³ Nepisu manene ke sane, noñal pupia pepauñā tai ka ke metava, suñā mlolokai kar ke metava na, pisape “Yo piowa rui e, ana na nene naga kulus ke na wa. Navisi la telu asike ga wa, la kiela kumasua miyelu mārera manene laa sane. Kam na yomarava, avisuar amiu, pupia na loge viowaena pimi mñaliv ke narui!”

9

Kumasua na lima miyelu: pulus naþa pito manene laa tano, naþa na þesia na loge viowaena mārera na telu

¹ Yoko navisi na lima miyu kiena kumasua. Nanene kila verue taþena kirir mñalia þarpoyo ma e sinapane pitomi e yomarava. Verue nene, amla ki tai pania, nanene ki naþa vietavan pulus naþa pito tol kap naþa garo tano. ² Pogos naþa mlalua keplamaran pulus nene, kapi piu þar wowo yo molmolue ke ea, sa naþa pupia kap tai piu, ana pa kar ga meta e sinapane, kilawo maran mrae, kila yemalo ke sina ga. ³ Ana pogos naþa kap piu kalo make yo sanene, kelsisi la amolue apitom tano e porotano, ana pe asa re si kelsisi poli ana apim sa naþa pupia kimi natano.

⁴ Apisaluþar la asape ve atol re purlaki lala a kinanena lala pona sur la naþa pitotovi sike e yomarava, ana atañan asape akilia akila viowa va yeririna na yomarava lala, la naþa pe aþar re totou kiena ne Ntewa naþa naga mligan sike nena e piamenana ne kiena yeririna lala. ⁵ Kimi na tano la nene, pe atañan la re naþa akilia awe moñar yar la poli, ana atañan la ga ayuyur la mña va tol kupario ve lima. Ana pogos naþa akila mña sanene vano-o, yoko yar la aloge yepela la lalae kar vano vaþisi. ⁶ E pogos nene, la ve moki na asave popon amarmare ga, yoko akale mrapa la naþa amare ea, ana yoko marena yepen mavin la, ligan la asuñā ga sanene.

⁷ Ana kelsisi la nene, pogos naþa nepisu ruru la, atorokin wosi la naþa yar namara la akus ke ne. Amyen karo naþarila naþa pe kol suwo þarila, a pogos naþa nepisu ruru marala, nemilan la ga asa ga yaru. ⁸ Añe vilþarila sane sira, ana maluela lala, sane na maluena laion. ⁹ Amyenwo yerela lala e pototo, a pogos naþa akaka tetai, kupela la kakapur mñalia sa naþa wosi la naþa aþere kiela kat lala akiriri ava akila mara. ¹⁰ Kelsisi la nene kesila sike e la, a sur na yuren yaru lala sike e la, naþa akilia ayur mña yar vano-o tol kupario ve lima.

¹¹ La kiela þarin suþe tai, naga navisi tai, ana pe navisi kiena ne Ntewa re poli, naga navisi naþa pisuar ke mratava na pulukapi. Yar nene, kiena kia e visena kiena le Epru lala, asikia asape Apatono, a e visena nae Krik, asikia Apoliono, kinas nen kia lua nene asape yar na warnena kareen suria.

¹² Kelsisi ne la nanene, naþa nasumo e naloge viowaena la telu nena nanene. Noñal naga þaro pa rui, ana lua sike ga wa.

Kumasua na orai miyelu: navisi lala na weñaren yaru, naþa nalua na naloge viowaena ñarera na telu nene

¹³ Yoko navisi na orai miyu kiena kumasua, nemloge visena tai molue kom e mrapun wonta wa nene varoka naþa amiyuñen e kol naþa sike e yo wa vamon Ntewa. ¹⁴ Visena naþa pisa pa navisi nene sanini, sape “Navisi la vari naþa apiar la asike e yo naþa wii mlau ke ea naþa kiena kia Yupretes, nagane kana pogos naþa ova okila plan la sina avavano narui.” ¹⁵ Navisi la nene, apuarar la ruru asuñna sanene pano-o tol nena kana aora na kana legiena na kana kupario, naþa akilia amolue ea vena akila kiela yuñnaena. Ana navisi taþena pa mluþar plan la, kila sane amolue apano, apa kar ga e purvanua lala añe yar lala lavis tol komþas nen yeririna na yomarava.

¹⁶ Apa amio kiela yar namara lala naþa akus wosi namara lala, ana nemloge apisawal kana marana tol tenario tol ponotia lua [200,000,000]. ¹⁷ A pogos naþa nepisu manene wosi la nene amio yar la naþa akusia, noñal pototo sur tai naþa amligan mono ke yerela, amiyowa ruru la apivavaga sane kapi, amemaena sane lowe memaena, amleleru sane mrae. Kiela wosi lala ape taþena ga, naþa þarila sa ga laion, a pogos naþa amiyuveve noñal kapi a mñau a posnoyavi na kapiapo mleleru molue petan logola. ¹⁸ Sur la telu ne nanene, sane kapi a mñau a posnoyavi na kapiapo kila lavis yeririna na yomarava nini la komþas akokovio e pogos nene. ¹⁹ Nañareraena kien wosi la nene sike e ya naþa molue ke kome logola, a sike mñena e kesila lala, komin kesila la pilolon sane loñara, a sur sane þarin loñara mñena sike e luas nen kesila naþa mla ke pupia magka pa yeririna lala.

²⁰ Napiowaena la ne ñarera paþisi sanene, a pupia komþas nen yeririna lala, nane laþas naþa amal ke na wa, pe asitom re poli. Pe apulon la re nena e kiela napiowaena la naþa akila ke e limala poli, ana asuñna akila luen ga lotena pa yermare lala, a asuñna akila ke leniena pa nono lala na kiela ntewa lala, naþa pe akirava re poli, a pe amloge kilale re sur poli, naþa pe amiyal re poli, naþa yar ga la amiyuñen e kol, pona selpa, pona pototo, pona kilavaru, pona laki.

²¹ A amio mñena nanini, pe apulon la re nenaga e þelaga na weñaren yaru poli, pona kimi lala, pona nakilaen viowa amio sira, pona e kiela vinauena la naþa asuñna akila ke ne.

10

Navisi tai mlarar narin tus naþa apilonaria

¹ Ana siraunia, nepisu si navisi ñarera taþena molue ma e peni pitomi tano. Naga mien lul sa naþa mñana kulsota, a kuperierier miervivi þarina, marana mñena ga sane mrae, ana lana luwoka sane pupia kemraþe ana ape kapi. ² Ana nepisu naga tarar ke narin tus tai, naþa pike þa teke e limana luwoka. Ana piaþereren lana marua piawa ke e sive a lana mñel piawa ke e porotano. ³ Naga suñalar ga suñna sanene, ana mligan pupia vioena tai naþa sa ga laion, a pogos naþa naga kila, polilu make kar ga lala apisatañe pimi, apis kome kiela mumuena lala. ⁴ Pogos naþa polilu la atera sanene, sineun nesape nesiri plan kiela

visena lala, ana lavis nekila narui, visena taņena molue ma e peni pitomi pan inu, sape “Toko, ve osiri re visena kiena ne la nene. Sur la naņa apisa, pe nakilaen re yeririna la akilia poli.”

⁵ Visena nene sanini, ana noņal ga navisi naņa piawa e sive amio porotano, kian limana marua pa ma e peni. ⁶ Ana pisa kiena visena mārera tai, pisaar e kia kien naga naņa mal sulue, naņa sii peni amio ya la naņa asike ea, amio yomarava a ya la naņa asike ea, amio sive a ya la naņa asike ea. Kiena visena pa sanini, sape “Nagane pe pogos na suņmateen re si poli! ⁷ Lavis ke navisi na olua nene yu kiena kumasua narui, a visae kila ga rui, vera na nasitomwanena kiena ne Ntewa la imi mālivi rui, vera na sur make ga imi merarava ve sa ga naņa naga pisawal p̄esan pa navisawalen la naņa amiyuņae kiena p̄esa.”

⁸ Pisa pa sanene narui, in mēna nemloge visen taņena molue ma e peni pitomi pan inu, sape “Narin tus naņa pike teke e limana ne navisi naņa suņal sike e sive a porotano, ova ola ke ne wa.”

⁹ Ana nepa lavisin navisi naņani, nepiun narin tus nene tania. Ana taņan ga pan inu, sape “Poga, okilia olavia. Visae olavia monar okania. A nesape nevisa van ko sanini, pogos naņa okania, yoko ologe kiki e logoņa vaņisi, ana siraunia, yoko ologe melkalka e mopoņa.”

¹⁰ Ana nemlavia nakania, ana kiki e gou paņisi. Ana nesinom pae, ana sanena naņa pisa, naņa sur nene melkalka, kila kare mēņeu paņisi. ¹¹ Yoko, visena pitomi si pan inu yam tai, sape “Yoko ve sa ga nene narui, komin navisawalena taņena la asike ga wa naņa yoko monar oto ovisawal sina, naņa apisayu p̄egas nen yolai lala, purvanua punu ga, yaru na visena taņena la punu ga, a p̄arin suņe la naņa asike e yomarava.”

11

Yar la lua na iilaaren visen kiena ne Ntewa

¹ Ana e pogos nene amligan kiai tai te luņau, asape neva nela totou na yo la ea. Asape, “Ova e yuņa wa mēna Ntewa, ola ruru kana totounena na keviu pa sanape, a ola totou na wonta naņa sike loyuņa ea, a oulo mēna yeririna la naņa akila ke lotena e yo nene, sane mēna tol via. ² Ana kana pupia yo naņa mēke vanua, naga ve ola re kana totounena, komin yuņa wa nene komp̄asa yar la naņa pe ape Yu re poli la yoko akusia. Wolawa la nene yoko aim ataulu pupia kumali wa nene Yerusalem, yoko aim loyuņa ayalar kar ga ea sa naņa la lelela, ana yoko akila ga va tol kupario ve lualima yam vari va lua [42]. ³ A pogos naņa asike e nene, yoko yar lalua naņa asuņal mārera asike e kiau visen lelaga aim aņalivi. Lalua ayen ga kulupak sa naņa mēala kulsota, a yoko avisawal kiau visena e siarena na kupario la nene va tol luasa, naņa kana legiena nena tol manu ve taaga ponotia ve lua lualima yam orai [1260].”

⁴ Yar lalua nene visena wa kiena ne Ntewa pisayu la nakonua rui, naņa pisayu sape purolip lalua asuņa ga, pona naņa pisayu kemraņe na kantel lua, naņa luoka ga asmal asike e marana ne kieta Ntewa naņa naga pe suņen yomarava wetelu. ⁵ A visae yar tai kilali naņa kila viowa va lalua nene pogos tai, yoko kapi kilia molue e logola, yoko kilia kilapel ruru nena kiela nasinekar lala. Nane mrapa ne nanene naņa visae yar sinenan sape kilaņar la, yoko naga ga kan ke sina kiena marena narui. ⁶ Lalua nene kiela naņareraena keviu liu, naņa akilia akilawo sinapane metava vena yua taņatete kove e pogos naņa apisawal visena kiena ne Ntewa, a akilia akila wii lala imi ve kuruta, a akilia akila naņa sur viowa kar ga imi pona pogos mārera imi kila kare yomarava e pogos ya naņa lalua asitom asape akila.

⁷ Ana lalua nene, lalua ave navisawalen sanene vano tol pogos naņa lalua akila yuņaena na sanene p̄isi. E pog nene narui, yoko pupia sur mal viowa naņa mēke tano e pulukapi molue vamin lalua, a yoko kiena naņareraena taulu la luwoka, kilaņar la. ⁸ A yoko akoven tasnela mēke likan mrapplepa e pupia pulkumali naņa naga pulkumali mē

nena naþa kiela suþe naga mēna aṁeṁaria meta e lak torovia. E nene, naþa e þelaga na visawanen suria, apisa kia na kumali naþani, pogos tai asape kia na kumali marua viowa naþa Sotom, pona apio asape Isip. ⁹ Tasnela moṁa ga e yepisun sanene yoko þegas nen yeririna lala, pona lus lala, pona visena lala, pona purvanua la aim avisu la, yoko avisaluþar la ve asinla re vano-o tol legien ve telu komsusa. ¹⁰ A pogos naþa apisusu mēna tasnena yar mare lua nene pano-o yoko apisa karela paþisi a apitalia kare la þisa. Yoko asitoṁal naloge viowaena lala naþa navisawalena lalua akila pimi pa yar na yomarava lala, ana yoko akekara na akekaran naþa lalua nene amare pa rui, yoko akila pupia þaþagena a yoko awarwar si nalaena lala van la vanonia.

¹¹ A pogos naþa legiena telu nene komsusa þaro pae, pe asin re luwoka poli wa, la amilan ga lagi na malena tai molue kome Ntewa pitomi tol maren lua naþa ne, kila si la ga luwoka asuṁal aþanarla asuṁal asikena. Pogos naþa yar la apisuia, amarau na amarau, ¹² a pe yam piavi re poli, amloge pupia visena la kom ma e peni pitomi, pisa pan lalua, sape “Poga, amlua avam metava narui.” Ana la ga luwoka apa metava veraga, akus lul lala apa atol ma e peni, naþa kiela nasinekar lala apisu sane asuṁalu wowe ga asikena, logola suwowo ga rui apis re si poli.

¹³ A e ke e pogos nene, pupia yem-ninu, naþa kila lepas nen pul kumali nene komþas, yuṁa make ga akekapil apororowa make nenaga, a yeririna la naþa amarmare e yemninu nene tol manu olua. La naþa amal ruru ga asuṁaga la apisu ke sur nene, amarau kar þan wa, ana apisu sane popon la ayeluar ga Ntewa nae peni komin kiena pupia māreraena naþa la apisu kilale ga na wa.

¹⁴ Yemninu nene sur sane pupia naloge viowaena na lua þaro narui, kana yam telu nena pere wa, yoko naga ve ve piavi re na imi.

Kumasua na olua mielu: pogos na liþereena, naþa kana naloge viowaena mārera maro na teloka nanene

¹⁵ Yoko navisi na telu miyu kiena kumasua. Nanene narui kila pulgo la moki apisasawal ke pupia visena la ma e peni, amieluar Ntewa apisa sanini, asape “Nagane narui yo punu ga naþa sumo sike vatanon suþe viowa na yomarava nini, la asike vatanon kieta Suþe Ntewa narui, lalua kiena Navisaarena, a yoko naga ve þarin suþen vano-o taþatete þisi pogos tai.”

¹⁶ A nasumonena mēna la lualima yam lua pa vari [24] amio la, naþa atotano ateke e lelela la naþa pa metava, akinai tano vamon Ntewa, amlotunia, ¹⁷ asape “O Ntewa keviu naṁareraena na mava, ko naþa osu nakonua rui, ko naþa osike nagane, ko naþa ope na pogos la ne pimi ke ne.

Mepisa potena pan ko paþisi wa, komin naþa oþarar kioṁa pupia māreraena rui, nagane narui osuṁalu mārera e kioṁa nasuþenena.

¹⁸ Purvanua make ga na yomarava nini sumo na sinela kar ko, ana pogos na kilologiaen kioṁa sinekar van la narui.

Nagane kana pogos naþa yoko oliþere yar mare lala, a yoko okila kare yeririna la naþa akila kare kioṁa yomarava.

Ana kioṁa yar na yuṁaena lala, naþa navisawalena lala, amio kioṁa li nalelagaena wa lala, a la naþa apatanon ke kioṁa kia, yoko awar kiela nalaena wo la e pogos nene, pe sur koren ga naþa ape yerkawa lala e kioṁa yuṁaena, pona pe ape yerkawa re poli.”

¹⁹ Ana e pogos nene apietavan yuṁa wa mēna Ntewa ma e peni e marana yeririna lala, a aṁal pias nen navisaluaena wa mon mēga. Amilan ga yo pe taþena veraga, komin naṁareraena kiena ne Ntewa sike ea, naþa yekarpla e yo punu ga, amio polilu tera, yo mēga, yemninu, a pupia mras nen yua aes kekapili.

12

Sira nowo amio pupia nopi tai

¹ Nepisu manene ke sur nae peni lala wa, ana nemilan ga pupia kile tai. Naga sira tai, naga kus mrae, mien pe m̄ana kulsota, suñmal sike e kupario, a karo na þarina, verue lualima taaga pa lua [12] sike ea. ² Sira nene m̄eþena, ana mloge piowa mlokai na mlokai, komin kiena kupario þisi narui, lavis waria.

³ Nepisu manene m̄a sanene, pupia surmali taþena molue ma e peni, naga pe namarauena manene laa. Naga pupia arman nopi tai, pivaga, þarin olua naþa amien karo na þarin suþe olua sike e la, a lañaliu m̄ena sike e þarila, make ga tol lualima. ⁴ Ana noñmal ga sur naþa kuþin kesina sane, ku plan verue la mokliu akekapil akowowo yo tano e yomarava. Ana sur viowa naþani pimi suñmalar se maran sira nene, naga sitom ruru rui sape sa sira nene war sisi, karñar ke veraga.

⁵ Suñna sanene pano-o sira naþa þarlua narina, pe yerñene. Ana Ntewa sinenan sape sisi nene imi ve þarin suþe vena uarar pototo e limana vena ve suþen yeririna na yomarava lala, ana pogos naþa sur mal viowa nene pe tol re sisi nene poli wa, ana akuslua veraga, akuslua pa ma puna ne Ntewa m̄ae kiena pupia lele na totanoena. ⁶ Ana sira nene marau, pure pa tapolou e yomema, e yo tai naþa Ntewa kila ruru pe lлена, ana pa tapolou e yo nene, apisuar ruru naga e legiena moki, legiena tol manu taaga ponotia lua lualima pa orai [1,260].

⁷ Ana e pogos nene pupia mara tai kapur ma e peni. Þar navisi nene M̄aikel amio kiena navisi lala, akila mara amio pupia nopi naþani, ana naga m̄ena ga amio kiena navisi lala akila mara m̄arera paþisi pan la. ⁸ Akila m̄a mara sanene pano-o, tol naþa nopi nene, kiena nañareraena þisi, ana amio kiena navisi lala amloru apito tano. Ana akila kare la paþisi, amla nakoena pan la, aþar plan lelela ma e peni petan la. ⁹ Ana pupia nopi naþani, akovenlua nena ma e peni veraga pitomi e yomarava, naga amio kiena navisi lala.

Ana e poglis nene nepisu kilale ga pupia arman nopi nene na wa, naga ke ga naþa kus maran loñara nanua sumo narui, naga yar sur naþa asape Yermare, pona Yermare Lego, naþa nanagane naga ke na wa, naga þere yomarava nini wetelu kusal ke mrapa silaga.

¹⁰ Ana siraunia, nemloge pulgo tai pio þar make yo ma e peni, sape
 “Nagane na natamaliaena kiena ne Ntewa suñmalu,
 puriukawaena kiena ne Ntewa tauluia,
 nasuþenena kiena ne Ntewa pimi m̄alivi,
 nañareraena kiena ne kiena Navisaarena pimi m̄alivi, mon metavan make suria.
 Yar viowa nene naþa suñna pisa kare mratava puna Yesu, akovenlua naga rui.
 Legiena a lemalo suñmal ga sike e marana Ntewa kilali naþa visawal mlamulen viowa kiena
 ne yeririna lala,
 ana nagane narui, akovenlua naga rui.

¹¹ Nalelagaena la mokliu naþa pe asitom re si kiela malena la poli,
 pe amaraun re si marena poli,

ana la asñal m̄arera m̄a pano-o ataulu yar viowa naþani,
 a ya naþa la apuarar ke e limala vena akila mara amio,
 naga kuruta kana Narin Sipsip ga, amio visena lala navisawalen kiela lelagaena e Yesu.

¹² Ataulu yar viowa nene rui, sane nagane ma e peni, amio la make naþa asike ea, akilia
 akekara na akekara,
 ana la naþa asike e yomarava pona sive, amloge piowa a monar amarau,
 komin Yermare pito tano sike likan la amio sinemimiena naþa pule manene laa, komin
 naga kilia sape kiena pogos plas ga teke na, lavis naga þisi narui, ana sirag manene
 laa.”

¹³ Visena nene yar tai pisawal ma e peni, nemloge pae, þisi na noñmal nopi nene pisu kilale naþa akovenlua naga pito tano e yomarava, ana sinena mimi laa narui, naga pisaar

ñarera sape yoko monar tol sira naþa þarmare ga narina na yerþene nene na wa. ¹⁴ Naga pa ñareran si pa sira naþani, ana milan ga amligan kupen lua pa sira naþani, sa naþa kupen pepauña, vena ka va tapolou e yo tai e yomema naþa akila ruru pa rui vena avisuar naga ea. Naga pa sanene narui pupia nopi nene taþatete si tol naga e yo nene, asape yoko naga sike e yo nene pogos ve piavi towe ñaga naþa kas tai, siraunia kas ve lua, þisi komsus nen kas si tai.

¹⁵ Ana nopi naþani pisu sira ka pano, naga kilia ga sape taþatete si va war po yo, naga sinen mimi laa narui, plamolue mliluan pupia womie tai vena werelua sira nene va talilunia. ¹⁶ Pupia wii nene mlau pano, lavis tol sira naþani, ana amilan ga yomarava sinen miye sira naþani, miila naga naþa porotano purþa veraga pikepaia sa naþa pupia logona, sinomlaun ga wii naþa nopi nene mliluania. ¹⁷ Nopi pisu narui, nagane kiena sinemimiena pimi piowa laa narui, ana mligan sira naþa sike na, sape vanon ga narina taþena lala, nane yeririna la naþa asuña ataveve ke navisaluaena kiena ne Ntewa, sane la naþa apuarar ke visena kiena ne Yesu ñarera.

¹⁸ Pisa pa sanene narui, pano amio kiena pupia sinemimiena, panon kila mara amio taþena la nene.

13

Surmal viowa þesa, naþa molue e sive, nopi mla nañareraena pania

¹ Pupia nopi mialoro pitove, suñal sike yepas nen sive. Ana pe piavi re poli, noñal ga surmal tai molue e sive paminia. Yar naþani naga þarina olua, a kana lañaliu tol lualima, a e kana lañaliu la peve taaga karo wa na þarila kiena ne þarin suþe lala telan sike ea. A e piamenala la peve taaga, asiri kia tai sike e la, naþa na viuelena nawarnena kareen Ntewa. ² Surmal nene, noñal pe taþena ga, naga sane sape ve sa towe ña laion, komin logona sanena laion, ana lana varoka sane lana surmal taþena naþa pea. Ana naga pimi suñalu sike e nopi naþani, a nopi mla puriukawa pania, kila naga pe þarin suþe e kiena lepasa, tañan nañareraena make ga pania.

³ Ana nepisu veve ruru surmal naþani amio þarina lala, noñal þarin tai pupia piakapila na magka tai ñeke ea, keviu paþisi. Pogos naþa þar magka nene, naga pe na marena ga, ana yar na yomarava la amilan ga naþa akila ruru pimi ñao sina, ana kila narui apilon kiela sitomena lala apim amlelaga e yar mal nene, ataveve ke naga.

⁴ Sanene, la akekaran manene laa surmali nene, ana pogos naþa apisu nopi mla nañareraena pania vena imi ñarera manene laa, akekaran paþisi, amlotun nopi, a amlotun yar mal nene naþa suña sumon la. Apisa sanini, asape “Ane kilia taulu kieta yar mal na kilaen mara nene pogos tai? Nagane pe yar re si tai naþa ñarera manene torokin naga poli.”

⁵ Ana pogos naþa yar mali nene pimi ñarera ruru sanene, siar vena kila kiena napiowaena lala. Naga suña kila ke kiena visena na vilaveena lala, suña piuel kar ga, a suña miyuña ke amio kiena nañareraena viowa, a kila ña pano tol kupario lualima yam vari pa lua [42], sane kas telu komsusa. ⁶ E pogos nene, naga suña þarnena kare Ntewa, piuelin ke kiena kia, a suña koven ke visena viowa pan peni amio yar wa la naþa asike ea. ⁷ Puriukawa naþa amla pania, torokin naga kila mara va va nalelagaena wa lala, vano-o kilia taulu la, a nañareraena naþa naga þar ke na, torokin naþa naga ve suþen yolai make ga, yeririna make ga, visena make ga, amio purvanua make ga. ⁸ Naga kilia ve suþe ña sanene vano-o yar make ga na yomarava nini yoko avatanonia, ana laþasa yoko taþatete avatanonia, a naga nene la ga naþa siar e nasiiena yomarava pimi, kiela kia asiriar sike loyuña e tus na malena kiena ne narin sipsip naþa añeñaria.

⁹ Ko naþa visae ologe visena la nene, visae kiligaña toña ga, popon ologe kilale ruruia. ¹⁰ Nalelagaena naþa vena akusvinaun ga e kiena purvanua vena va yuñae kiela, naga yoko monar va ga narui. A naga naþa na teluaen kolmekina e playu na kilaen mara, ee, yoko playu na kilaen mara monar te ga kolmekina narui. Visae pogos ñarera tai sanene,

yoko li nalelagaena wa lala monar asuñal ñarera amio kiela sitomena viayavi lala, monar amasisu ña vano-o awar ro ea ava atol luasa.

Sur mali viowa na lua, naña molue e porotano

¹¹ Ana siraunia nepisu ke sina ga sur mal viowa tañena tai, naga molue e porotano pam. Naga kana lañaliu na ñarina lua ga, sa ga narin sipsip tai, ana pogos naña pis, pulgona sa ga nopi naña sumo.

¹² Ana surmal na sumo tañan na lua nena yuñae amio kiena nañareraena ñarera make ga, naga kila ña pano-o yomarava amio kiena yeririna make ga la amlotun surmali na sumo nañani, naña ñar pupia magka na marena ga yoko ñao sina. ¹³ Ana na lua nene asuñal akila ke pupia kile lala amio pupia sur na ilanen lala, pano-o akila tai naña kap molue ke ma e peni pitom e yomarava e maran yar la naña apisu ke ne. ¹⁴ Ana e kile la nene naña naga kila ke ne e kia kiena ne sur mal na sumo, naga suñal pisa kotalia ke yeririna na yomarava lala, ñere la apa ape wowe laa narui.

Naga pisawal pan la sape ate nono kiena ne surmal nene, naña playu sia ana mal si moña ga. ¹⁵ Ana amiyuñae pae, amla ñareraena pan surmali na lua vena kila nono nene kilia yuveve, akilia vis, a amla ñareraena pania vena kilia weñar yar ai naña pe kekaran re vatanon naña lotun nono nene poli.

¹⁶ A amio ñena nanini, naga ñareran make la ga vena awe tatu se limala marua, visae peraga, e piamenala. Yaru kar ga lala amio yerkawa lala, a la naña limala korena ga amio la naña limala pule, a yar la naña amiyuñae, amio kiela nasumonena lala, la make ga awar tatu nene. ¹⁷ Visae tatu nene ve su re e la, tañatete aul sur tai e yuñal na wilwiliena, a tañatete awilwilin sur tai va yar tañena.

Tatu nene naña awe se e la, molue kome kia kiena ne surmali nene, naga marana na kiena kia.

¹⁸ Ko naña oulo tus nini monar omanmarua ruru e yo nene. Visae ovisu kilale make suria, yoko okilia olual marana na kia kiena ne yaru lala, ana apuloviraviran marana na kia na surmali nene, añal tol lualima yam orai pa orai, pona sa naña lañasa asape, orai orai [666].

14

Narin Sipsip amio la naña atol manu yam ponotia taaga lualima yam vari pa vari [144,000]

¹ Nekira ke sina pa yam tai, noñal tavie nae Saeon ñeke ga vamon inu, a ma e luasa noñal Narin Sipsip suñal sike ea, naga amio kiena pupia ñina na yeririna tai. La asiri kiena kia amio kia kiena ne arimana Ntewa sike e piamenala, a la moki pañisi, kana marana tol manu yam ponotia taaga lualima yam vari pa vari [144,000].

² Ana pupia ñaagena tai kom ma e peni pitomi, taulu naña sive ñanpo e piañe pona polilu tera. Ana nemiagogonia, nemloge ga naña aña kita la amiyelu, ³ a la asuñal asike vamon yo wa, e marana ne yar mal la vari nene amio nasumonena lala, amiyaun ke yauena viu tai. La tañena la mokliu naña akekaran yauena nene pañisi, la sinelan ñena asape ayaunia, ana akilayon ñelea. La ga naña akilia ayaunia, nane ñina na manu yam ponotia taaga lualima yam vari pa vari nene, naña apul plan la petan yomarava rui. ⁴ La ke naña pe akilali re piowa amio sira yam tai poli. La apuarar ruru kiela malena mekik ruru po silaga, a ataveve ke Narin Sipsip nene va e yo nape naña naga va ea. Yeririna la mokliu naña asike ne, ana la ke naña apul plan la petan tañena la narui, a la akilala apim sane mras ñesa nalaena va Ntewa amio Narin Sipsip.

⁵ La nene pe visokanen re tai molue kome logola poli, pe sur viowa re nena tai sike e kiela malena poli.

Navisi la telu

⁶ Ana e poglis nene, noñal navisi tai moña kaka ke e yo punu ga ma metava. Amla lologena wo naña ve uro re pania, vena naga kilia va lologon va e yo punu ga va yeririna

na yomarava lala, vena va tol purvanua make ga, yolai make ga, a visena make ga. ⁷ Naga pisawal ke pa e yo punu ga amio pulgona naþa keviu, sape

“Amiu avatanon Ntewa,
avisirlua kiena kia,

komin naþa kiena aora na liþereen yomarava m̃alivi rui.

Alotun naga naþa sii sinapane, yomarava, a sive amio purþes nen wii lala.”

⁸ Ana siraun na nene, navisi nalua taveve pimi naþa piozion ke sape

“Pupia pulkumali viowa naþa P̃apilon naga mlor rui!

Naga pa mla ntewa naþa pe pe lelaga re poli, a þere plan yeririna mokliu naþa apa ape wowe amio, la sa ga yar na ve torogen ga lala.

Nanagane, pupia pulkumali nene pimi piowa rui amio kiena nono lala.”

⁹ A yam si tai, navisi na telu taveve la pimi, pisawal manenea sape “Yoko yar la ve moki naþa akinai vena alotun yar mali viowa amio kiena nono, a yoko yar la ve moki naþa ataþan awe kiena tatu se piamenala pona limala.

¹⁰ Ana yar naþa kila sanene, yoko naga m̃ena ga mun e piala naþa pulen kuruta namunena naþa melkalka na pupia sinemimiena kiena ne Ntewa. Yar na sanene, mapulukapi luamene lege kare tasnena e marana navisi wa lala a e marana Narin Sipsip.

¹¹ Ponoyoþme na kiela naloge viowaena yoko molue lue e kapi naþa taþatete mare pog tai. La naþa amlotun ke Sur mal Viowa, apatanon kiena nono, amio la naþa aþar ke tatu na kiena kia e tasnela, la taþatete atol yo wo na va ruru laena, ana yoko ayuþaen ga loge viowaena ko legiena a kolemalu nalue ga narui.”

¹² Nakoena nini naþa navisi pisa m̃arera paþisi, ana kana kinasa sape ita li nalela-gaena wa lala monar tesuþalu m̃arera temio kieta sitomena viayavi. Monar telogear navisaluaena lala kiena ne Ntewa, a silaga monar teve lelaga e Yesu.

¹³ Ana nemloge visena tai molue ma e peni, sape “Nanene visena tai naþa yoko osirilua, naþa sape, siar nagane vano, la naþa yoko amare, naþa kiela malena su ruru sike e limana Suþe rui, yoko awar pupia navisa ruruena.”

Visena nene þisi, ana nemloge Ninuna taþania, sape “Ee, la nene yoko kiela yuþaena wo la avam metava amio la, a nagane yoko taþatete si ayuþae narui, la atol kiela navaruruena wo rui.”

Navisi la telu apito aþar kinanena naþa marua e yomarava nini

¹⁴ Nekira si pano, ana lul yuwowo tai m̃eke ga vamon inu, ana noþal yar tai, sane Narin Yeririna, totano teke e lul nene rui. Totano teke amio karo na þarila kiena ne þarin suþe lala e þarina, naþa amiyuþaen e kol, a e limana tarar ke uknaep tai naþa mal paþisi vena teen kras nen kinanena lala. ¹⁵ Ana navisi taþena molue e yuþa wa, pio ke naþa teke tano e wos nen lul nene, sape “Poga, osuþalu, otar kioþa playu ova osiar yuþaena. Kinanena la naþa sike e yomarava amarmarua rui, nagane pogos na teen narui.” ¹⁶ Ana naþa teke tano e lul suþalu, silin kiena playu pa e yo kar ga e yomarava, te kinanena la naþa marua sike ea.

¹⁷ Ana navisi taþena molue e yuþa wa ma e peni, naþa naga m̃ena þarar ke kiena playu naþa pe uk, naga m̃ena mal na mal. ¹⁸ Ana navisi ke sina tai pitomi, naga naþa pe navisuaren pulukapi, ana naga þaro e wonta pimi pio taþena naþa mlarar ke playu, sape “Pogaga, ko m̃ena ga, pogos naþa oto okila kioþa narui. Otar kioþa playu oto owar punu kilis nen kerep la nene teliv e yomarava nini viora, ote polo mras la naþa marua telan sike e kilisa.”

¹⁹ Ana navisi naþa mloge, teran kiena playu e yomarava, pito þarpolo mras nen kilkerep e yomarava, koven la e lele na winplanen was nela naþa asike vanua e pulkumali.

²⁰ Ana nasinemimiena kiena ne Ntewa kilapel la ga, pumumu kare la pano-o kuruta mlau þarpoyo, mlau pimi keviu sa ga womie, kokonia make purvanua wetelu mererol pa tol kolmekin yaru, pano pano kilamarala plasia.

15

Navisi olua amio pog viowa maro olua

¹ Nepisuveve ke sur la ma e peni wa, ana pe yam piavi re poli wa nepisu pupia kile taņena naņa pe pupia sur na ilanena paņisi, nane navisi la olua, naņa la aņar maron pog viowa la olua. La maro sanene komin naņa visae la awar ro pae, nane kila sane pupia nasinemimiena kiena ne Ntewa yoko ŗisi ruru nenaga. ² Ana noņal pupia yotop tai, meri ga pano mņeke na sa ga sive, ana naga kap mņeke ea, ana pila na pila. Ana e lepas nen yo nene, nepisu yar la mokliu asuņal asike ea, a la nene, naga yeririna make la naņa ataulu yar tetan, la ataulu kiena naņareraena, a la ataulu puriukawa na marana na tatu naņa aņe sike ea, naņa yar nene ŗaria sane kiena kia nowo tai.

La naņa atauluia, asuņalu asike amio kiela kita lala naņa Ntewa ŗar pan la, ³ ana asuņa aņe ke kita la naņani, la asuņa amiyaun ke kiela yauena tai naņa yauena kiena ne yar na yuņaena kiena ne Ntewa naņa Navisawalena Mosis, ana nagane pimi naņa apio asape yauena kiena ne Narin Sipsip. Yauena nene pa sanini, sape

“Akee Ata Ntewa na Māreraena
kioņa yuņaena la akerkeviu paņisi, apowo paņisi, ko ope ŗarin Suņe kiena pog make ga,
kioņa ŗelaga la mesmesu a ape lelaga.

⁴ Ko ope Suņe, pe yar re nena tai naņa ve maraun ke re.

Pe yar re nena tai poli naņa ve vatanon re kioņa kia.

Ko ga ope na wa kemua lelaga,

ana yolai make ga monar akinai tano alotun ko,

komin nagane, sur mesmes la naņa ko okila, lala aņaliv apim amerarava ruru e kilamaran yeririna na yomarava la rui.”

⁵ ŗisi na nekira ke sina ga pa loyuņa ma e peni ana noņal pulutava na yuņa wa lala suwowo ga sike na. Nepisu sane silparpara na tapolen nena nanua sumo akutarar kome yomema pimi, naņa amligan ruru navisaluaena kiena ne Ntewa sike ea. ⁶ Apike pae, ana navisi la olua amolue ea. La amiyen kulmrae urmi la naņa amekik ruru po, apilavila, a atelan kulka naņa amiyuņaen e kol ŗaro e yerela. Ana amial apim, amio pog viowa olua naņa aņar ke ne.

⁷ La apim asuņal asu narui yar mal la vari tai nene kian piala naņa pe kol olua pan la, tai kus tai, tai kus tai, naņa apulen ga nasinekar kiena ne kieta Ntewa naņa sulue na sike ne.

⁸ La akuspae, ana komin pupia naurarena na naņareraena kiena ne Ntewa sike e yuņa wa nene, kapiu ŗar punu yo paņisi, kila yar taņatete va loyuņa. Ana suņa sanene pano-o tol naņa pogos viowa olua kiena ne navisi la olua nene ŗisi ruru nenaga.

16

Pias nen nasinekar kiena ne Ntewa olua naņa puleule nenaga

¹ Ana nemloge visena mārera tai molue ma e peni pa pa navisi la olua nene, sape “Nagane, pogos na yuņae kiamiuena narui. Ataron plan pias nen nasinekar kiena ne kiamiu Ntewa veve taaga vito e yomarava.”

² Pisa pae, ana navisi na sumo pa taron plan kiena piasia pito e porotano, ana kana wii nena mlau pa kila magka wa la molmolue kalo tas nen yeririna la naņa aņe tatu na sur mal viowa sike e yepela, naņa la amlotun ke kiena nono, aņar kare magka pano-o ŗisa amloge sinelalaea pano-o paņisi.

³ Yoko navisi na lua towe taron plan kiena piasia pito e sive, ana kana wii mlau pito tol sive kila pimi pe kuruta sane na yar mare, a sur mal la naņa sike ea amarmare make nenaga.

⁴ Yoko navisi na telu taron kiena piasia pito e wii lala naņa amlau, ŗarar purņes nen wii lala, ana kana wii mlau pitove kila la mņena apim ape kuruta veraga. ⁵ Ana nemloge visen tai pitomi e navisi nene naņa pe ŗarun ke wii na yomarava lala, naga sape “Ko na osike mņa na konua rui, a osike nagane, ope Nawa,

kioṃa nakoarena la nene aṃarera manene laa, ana kioṃa naliṓereena mesmes ga.

⁶ Lelaga naṓa yar na yomarava lala, aṃemoṃar kioṃa yar wa lala, akila kuruta na kioṃa navisawalen la mlau, ana omla maran ke sina pan la pogaga, naṓa ṃala wii namunena ape kuruta make ga.”

⁷ A visen taṓena si molue ṃena e wonta, sape
“Ntewa na meta manenea, pe lelaga paṓisi, kioṃa naliṓereena lala amesmes ruru nenaga, ape lelaga paṓisi.”

⁸ Yoko navisi na vari taron plan kiena piasa pito e mrae, ana kana wii kila mrae yo pisun manene laa, kilia lege yeririna na yomarava la sane kapi. ⁹ Ana amloge yepisusun, yepisun kekan la pano-o apiuelin kare kia kiena ne Ntewa paṓisi. Akilia ke asape naga mligan ke nakoarena la nene pimi, akilia ṃa asape naga visae sinenania kilia visaluṓaria, ana yepela mavin ga vilon laena, asape taṓatete avatanon naga, a taṓatete aieluar naga pog tai.

¹⁰ Yoko navisi na lima taron plan kiena piasa pito e pupia lele na totanoena kiena ne sur mal viowa naṓani, ana kana wii mlau pito kila lepas wetelu na kiena nasuṓenena, yo malolo make nenaga. Yar la amloge piowagan nakoarena nene ṓisa, akarar purmenela la pano-o, ¹¹ apiuelin kare Ntewa nae peni komin kiela yepelalaea a kiela magka wa lala, ana apisalūṓar ga, asape taṓatete nenaga avilopu la e kiela naviowaena.

¹² Yoko, navisi na orai taron plan kiena piasa pito e pupia wii naṓa mlau, kiena kia Yupretes, ana kana wii nena mlau pito ṓartaṓe wii naṓa mlau ke ne pimi mema nena ga. Nanene kila narui ṓarin suṓe na purvanua make lala na lepas naṓa mrae ṓarpo yo ke ea, pe kiela mrapa narui, vena waroen yo ea aimi amio kiela yar na mara lala.

¹³ Ana noṃal ninuna viowa telu naṓa sane prok, naṓa tai molue e logona pupia arman nopi, tai molue kome logona Surmal Viowa, a tai molue kome logona navisawalena na visokanena. ¹⁴ La telu nene, ninuna ne yermare la telu naṓa asuṃa akila ke kile lala, a asuṃa aṓaro make puna ṓarin suṓe na purvanua lala na yomarava, aṓerela apim lele taaga vena akila ruru make suria komin pupia mara naṓa yoko kapur e pupia legiena maro naṓa Ntewa na mava pisaar rui. Ntewa pisayu legiena nene rui e kiena visena tai, naṓa sape

¹⁵ “Avisuar amiu, yoko noṃalivin amiu vinau ga, yoko ailan inu sa naṓa visae yar na vinauena tai imi.

Yar naṓa kon ruru kiena sur lala, naga su ruru ke narui, a tavolo ke ga wa, vena suṃate inu, vena imimi lua mevano, yoko wo van vaṓisi.

Ana yoko laṓasa ailan sane yepela ve sinas ga akiriri tetai, amawa vaṓisi e pogos nene.”

¹⁶ Ana noṃal pog na mara na legiena maro pimi ṓarpoyo, a ninuna la nene aure ṓarin suṓe na yomarava la ava lele taaga, nane e yo naṓa visena na Epru sikia sape Aṃaketen.

¹⁷ Yoko navisi na olua taron plan kiena piasa, ana taron plan ga pitomi metava e yepesinas na ṃeke ne. Ana visen tai molue kome yo wa na totanoena loyuṃa e yuṃa wa nae ma peni e pogos nene, pion manenea sape
“Nagane pogos na luas nen sur make ga.”

¹⁸ Ana yekarpla siar e yo punu ga veraga, ṓarar kana polilu ne la naṓa atera, a navioena lala a ṃaagena lala. A ṓarar ṃena, pupia yemninu, yemninu ṃa pano-o pa piowa manene laa sa naṓa pe yar tai pisuli re yam tai poli wa, siar e naṓa yar mal e yomarava pimi tol nagane. ¹⁹ Ana yemninu nene kilaṓa porotano, kila pulkumali lala na purvanua make ga teliv e yomarava nini piora amloloru, a kila pupia pulkumali naṓa ṓapilon purṓa lepas telu.

Ntewa suṃa sitoṃal ke yo nene, ṓarar kiena napiowaena lala, ana kila karepel manene paṓisi torokin nena kiena ṓelaga naṓa kilakila ke ne, kila naga mun e piala naṓa pulemamagan kuruta na munena na ṃareraena na kiena nasinekar. ²⁰ A ṓarar yemninu nene, narin purvanua la apureure apano akokovio, a tavie la nanua asṃal asu ne, aṃal la re si poli. ²¹ Aes yua la meta e sinapane amloloru sane pupia kilavaru lala, a monar

yeririna la naþa asike e yomarava. Amloge manene laa piowagania, apisu naþa sur viowa nene m̃arera manene laa, pano-o asuṃa apisalele kare Ntewa.

17

Sira viowa teke tano e surmal viowa

¹⁻² Ana e pogos nene navisi tai pimi, naga na navisi la olua tai naþa akus ke piawi pias olua nene. Naga pimi mesmesun in ga, pisawal sape “Otaveve inu. Yoko nekipian ko e pupia pulkumali viowa naþa P̃apilon, naþa m̃eke e naþa pupia wii la mlau ke ea. Pulkumali nene miyuṃae piowa ga, sa ga sira na mrapa tai. Naga sa ga þarin suþe na purvanua taþena apa akila ke kolau pania, a sa naþa m̃ana kuruta na munen kila sitomena kien yeririna na yomarava la apa apiowa laa narui. Ana oimi, yoko nekila ko ovisu ya naþa yoko imi m̃alivinia e pogos naþa yoko naga war ruru kiena nakoena napo.”

³ Ana navisi naþani pimi þerelua ninuu, mligan inu nesike e yomema tai. Ana nepisu sira tai totano teke meta e purwolu na puluk tai. Sur mal nene pivaga make ga, naga þarina olua, a kana laṃaliu lala tol lualima, a e yepen make ga asiri kia viowa lala navisalelekareen Ntewa. ⁴ A sira naþani, naga miyowau paþisi e kulsota la naþa amemaena a apivaga, a apaia kare yepena lala e mrakotal lala, a e piataliga lala, a e sur la naþa pe kol, a e kilavaru la naþa merarava po naþa kana kilavaru ne pa metava paþisi, amio sur la naþa asike loyuṃa e mratamelilivi. Naga mlarar ke piala tai naþa pe kol, a piala nene pulen ga kiena þelaga viowa lala amio kiena kolau. ⁵ Asiri visena tai sike e piamenana, pe visen wan ga tai, visena naþani naga sane kia tai, naþa pisa sanini, sape “P̃apilon naþa keviu, anenane sira na mrapa lala, purþes nen þelaga la naþa ape kororaki e yomarava.”

⁶ Nepisu manene m̃a sira nene sanene, nepisu kilale sane mun wii ana maran telivi, a pe komin re naþa mun kuruta na munena poli, ana komin naga mun ke kuruta kana li na lelagaena wa lala, nane la naþa aṃemoṃar la komin naþa ataveve Yesu. Nepisu sira naþa sanene narui, yepeu þili na þili!

⁷ Ana navisi pisa pan inu, sape “E, ya ne kila omila manene sanene? Osuwa, yoko nevisa meraravan van ko na wa. Sira nene, þarar purwolu puluk naþa teke e wos nena, a þarar þarina olua a kana laṃaliu lualima, suri la nene kala kinasia suṃa ga, a yoko nekila ovisu kilale ne.

⁸ “Purwolu puluk naþa opisus ne, naga m̃eke kemua nakonua rui, ana naga pe su re si nagane poli. Ana e pog tai naþa pimi ke ga wa, yoko molue si vetan pulus naþa m̃eke e nagane, yoko vanon marþanun kiena nakoena. Ana e pogos nene, yoko yeririna na yomarava la naþa asike ga wa, yoko avisu purwolu naþane. Nane la naþa siar e nasiiena yomarava pimi, kiela kia pe su re e Tus na Malena poli. Pog naþa avisuia, ailan vaþisi, komin akilia asape naga sike kemua na konua rui, yoko pe su manene re si yam piavi poli, ana siraunia, naga molue sina. ⁹ A yar naþa pe manmarua ruru po, yoko naga kilia visu kilale ruru kinas nen sur la naþa yoko nevisa.

“Nasumo, þarina la olua. Kana kinasia, pisa pulkumali tai naþa sira nene pe suþenia, kunus olua sike ea. A kunus la nene, la m̃ena kala kinas suṃa ga, naþa sape pupia þarin suþe la olua asuṃa ga. ¹⁰ Tol nagane, þarin suþe la lima nene aþis rui, a tai suṃal sike nanagane. Tai m̃ena ga pe m̃alivi re poli wa, sike ga wa, a pog naþa imi, yoko su towe laa ve piavi na wa.

¹¹ “Ana purwolu puluk m̃ena, naþa suþes nanua a nagane pe mon re si poli, nanua sumo naga m̃ena þarin suþe la olua nene tai. Naga la ke tai narui, ana yoko wasuþe sina sane þarin suþe na orely tai. Naga pe yerkawa sanene, ana pe sur koren ga, komin yoko naga m̃ena þisi, va war kiena nakoena m̃arera.

¹² “Sur taþena na vike meraravanena, nane laṃaliu la lualima naþani. Nanene kala kinasia nane þarin suþe si lualima. La nene pe asuṃal re poli wa vena ave suþen kiela

lepas lala, ana yoko akila ga kiela yuñmaen la na wa e pogos na purwolu nene suñmalu. Yoko ave suñpen pae yomarava nini amio, ana nane naga pe na yam plas ga, sa ga aora taaga.

¹³ “La lualima nañani, la tañatete akila kiela yuñmaena lala, ana la ape nakilaen ga yuñmaen kiena purwolu puluk nene, vena kiela nañareraena iila naga, vena kila naga imi ve keviu la sane. ¹⁴ Yoko la punu nene aim veraga vena akilali mara amio Narin Sipsip, ana tañatete atauluia. Peraga, ana yoko naga taulu la, komin naga ke narui naga pe suñpe kien suñpe lala, naga pe ãarin suñpe kien ãarin suñpe lala, a kiena yeririna nowo lala, nane la naña naga pio la, naga mligan plan la, a la nane ave lelaga e naga.

¹⁵ “Sur navisa meraravanena tañena, naga wii lala amio sive lala naña opisu sira viowa nene naña towar la ke ne. Kala kinasa, naga yeririna la naña asike e yomarava, amio yolai lala, a purvanua lala, a visena lala.

¹⁶ “Ana siraunia, purwolu puluk nene amio kana lañmalu lualima, yoko yepel mavin sira viowa nañani. Yoko asuñmalu akila imi viowa van vañisi, naña ayen plan ñana kulsota lala ve plamoñe e maran yar lala, a yoko akan make kana kilañiu lala ana okoven kana puriu lala vito kapi kekania.

¹⁷ “E mrapa ne nanene naña yoko akila va sira nene, tepisu sane torokin nena nakoena naña Ntewa pisawal e kiena visen tai nanua sumo rui, sinenan sape sira nene monar waria. Naga ga mligan e kiela sitomena lala amio purwolu puluk nene, vena akila sanene vania.”

¹⁸ Ana navisi nañani kila make kiena visena e poglis nene, sape “Nane navisa meraravanen sira nene narui, naña naga pupia pulkumali naña pe suñpen ãarin suñpe tañena lala e yomarava.”

18

Pulkumali viowa naña Ñapilon mloru

¹ Yoko, nepisu navisi tañena molue ma e peni pitomi tano. Naga pe navisi ñarera tai kiena ne Ntewa, pitomi ãarar pupia nañareraena, a kana nategoliena kila yomarava pilavila. ² Naga pio e pupia pulgo tai naña pisawal sape “Pupia pulkumali viowa naña Ñapilon, mloru rui.

Nagane, yo nene pimi pe uña tai ñana yermare lala a pe yo tai naña ninuna viowa la atapolou ea.

Manu make ga naña akila ke ãelaga na kororak viowa lala, la ñena aña ñala ponovi sike ea.

³ Naga pa ãere ntewa la naña pe ape lelaga re poli, a ãere yeririna tañena la apa ape wowe amio, la sa ga yar la naña amun wii ãarila telivi. Sa ga naña naga pa ãere ãarin suñpe na purvanua tañena lala, apa akila kolau amio, a yar la naña amiyuñmaen ke kilavaru e yomarava telivi piora, la ataulu kilavaru namname pañisi e yuñmaena viowa lala na pulkumali nene, pano pano-o apim ape yar na sur moki manene laa.”

⁴ Navisi pisayu sanene ãisi, ana nemloge visen tañena kom ma e peni pitomi, pisa sanini, sape

“Kiau yeririna lala, o! Popon aurmatan yo nini vilaga, visae peraga, naga warar amiu ava e kiena mlamulena viowa lala, visae peraga, naga warar amiu ñena ava e kiena nakoena lala.

⁵ Kiena mlamulena viowa lala ponpolo ñaga pa tol ma e peni, a Ntewa tañatete sinen ãesan naña naga kilaroro kiena navisaluaena yam via.

⁶ Popon ga naña alamaran si naloge viowaena vania sa naña naga kila pa yar tañena lala, popon aul maran vania va yam ve lua e ya naña naga kila rui.

Wii melkalka naña naga kila yar tañena la amunia, popon akokonia ruru ñana piala ulemamaga.

⁷ Nanua, kiena nalogewoena e kiena malena meme ga, naga keviu paḡisi, ana yoko vilon imi ve naloge viowaena e yepe lalaea lala amio tagiena lala.

Ana nanene na pere ke na wa, komin naga pilaven ke kiena sitomena na wa, suḡa pisa ke pania, sape 'Ke, in na nepe ḡarin suḡe sira sanene, neto ruru na neteke ne. Sur make ga po manene laa pan inu, ana taḡatete nena neve sa letano tai naḡa pe kiena sur re poli, taḡatete nena netagin naloge viowaena pogos tai.'

⁸ Ana naga, e legiena ta ne pimi ke ne, yoko sur viowa la kila kare ruru naga veraga. Yoko marena, warar tagiena, amio viso, a yoko kapi kekalele kare naga.

Naga pe sitom re sur poli, ana Suḡe Ntewa naḡa yoko liḡere naga, kiena naḡareraena naga keviu manene laa."

⁹ Ana navisi pisa sanini, sape "ḡarin suḡe make ga na yomarava nini telivi piora, la naḡa apa amlotun ke ntewa lala na pupia kumali nene, yoko avisu kilale naḡa naga mlor rui. La ke narui naḡa sane apa akila ke kolau amio, apa amloge po amio naga e kiena malena wo pano-o, pe asitom re nena sur tai.

"Ana pogos naḡa mloru, kana kap la naḡa kekan ke ne piuyu pa metava, nanene narui yoko sinela viowagan vaḡisi, yoko ataginia. ¹⁰ Yoko avisu nakoena la naḡa naga suḡa ḡaria, yoko kila la ḡena asiar ayuyuwawa. Yoko asu la gar perina akira avisusuia, avisave 'Ake, pupia ḡapilon, pulkumali naḡareraena, sinemimi miye ko paḡisi.

Lelaga naḡane, osu ruru ḡa pano-o, ana e aora taaga ga nene oḡal kioḡa luasa, omloru, oḡisi nenaga.' "

¹¹ A ḡarar ḡena, yar na stoa lala e yomarava wetelu yoko atagi a sinela yea, komin naḡa pe yar na ulen re si kiela sur la poli. ¹² Nanua sumo, akila kiela waa lala pulen ga tegaki nowo lala, sane sur la naḡa amiyuḡaen e kol ḡarar selpa, amio kilavaru na kupito naḡa pupia kilavaru, amio sur naḡa sike e mrakiav, a kulumrae la naḡa kala marala la powo, a lak la naḡa ponotaninu, a sur la naḡa amiyuḡaen e maluen elepen, pona e lak lala, pona e pototo lala, pona e kilavaru lala, ana nagane, kiela yuḡaena na tauluen kilavaru la nene apim amlolor make ga. ¹³ A e legien nene, yoko yar la ve aul re si sur na kilaen kinanen lala, sa naḡa ḡaki lala, ḡarar mrasil lala, pona yago lala, puluyavi na kilaen kilaparavi amio kona lala, ḡarar ḡena sur na munen lala sane kuruta na munena. Yoko yar ve ul re si sur la ne sane ponotaninu a sirveve na mras nen olip, a sur na tauluen kilavaru la ea sa nanua sumo, sane puluk, sipsip, wosi ḡarar kana sur naḡa ḡerewerea. Laḡasa nanua sumo apuliwilin yar lala apim amiyuḡae korena ga pan yerka wa la sane, yoko ve akila re si narui, komin pogos naḡa pupia pulkumali nene mloru, yoko yuḡaena toko narui, ana yar taḡatete si taulu kilavaru na visuaren kiena malena.

¹⁴ E pogos nene narui, yoko avisayu yo nene, avisave "Ko sinoḡan osape owar mrasnoḡa la naḡa ve kerkeviu ve moki, ana naga pe marua re poli wa, kekapil make rui.

Nanua, ko na lumoḡa pule ruru nenaga, kioḡa sur la punu ga po tanea paḡisi wa, ana nagane kokovio make nenaga, taḡatete nena yar tai visu si sur wo tai e ko narui."

¹⁵ A yar na wilwilenen sur la nene, naḡa la ataulu kilavaru la mok li e rui, yoko asuḡal ga asike perina akira vano, ailania a amaraun nakoena naḡa pupia pulkumali nene suḡa ḡaria. Yoko sinela ye vano-o vaḡisi, ¹⁶ yoko atagin vaḡisi, avisave

"Ake, pupia kiamimi pulkumali, mesitom ko paḡisi wa.

Nanua sumo ko na omyowau ruru po paḡisi wa, oḡar kotal a na kolmekiḡa la naḡa pe kol piataliga la ḡar punu yepeḡa lala, ana nagane na ko na peraga narui, kap mare.

¹⁷ Sanapen na kioḡa pupia sur mok la nene kovio ga e narin aora taaga ga sanene?"

A yar lala na uararen ḡeligas nen waa la naḡa nanua aḡarwar ke tegaki lala, ḡarar kiela yar na yuḡaena lala, amio la naḡa akomkom ke e waa, pona ataulu kilavaru e sive,

la m̄ena asuñal ga asike perina apisu manene ke yo nañani. ¹⁸ Pogos naña kana kap ne la piu, pa ke ma e sinapane, yoko avisasa yo nene avisave

“Lelaga o, pulkumali nene na yo ta nene nañane,
e yomerava nini yo tai pe sa re si nene poli.”

¹⁹ La asitom sanene, a amloge piowa, akoven kare posnoyavi e ãarila ãisa, atagi, asape “Ake, kiamimi pupia pulkumali, piowa pan ko pañisi wa.

Ko na opulen ga kilavaru, ana memiyuñae e kiamimi waa lala, moñar kioña tegaki lala,
pano pano-o imimi m̄ena ga moñal kilavaru naña miila imimi,
ana nagane piowa narui.

E pogos plas ga nene, ana opim ope yo na kovioena ga.”

²⁰ Ana pogos naña pupia yo viowa nene mloru sanene, visena tai molue kom ma e peni, sape

“Ma e peni, pupia kekarena a logewoena.

Amiu nalelagaena wa lala, a nalologena lala a navisawalena kiena ne Ntewa, amiu akilia aieluar naga vañisi, komin naga mliþere sira viowa nene rui, kila maran si pania komin napiowaena la naña kila pan amiu nanua.”

²¹ Ana e pogos nene, navisi tai pimi kawelua pupia kilavaru tai, kusyaun pa metavan ãarina koven pito kopo sive, talilu pito kovio. Siraunia navisi nañani pisa sanini, sape

“Pupia pulkumali viowa naña Ñapilon nanene narui, yoko akoven lua va ve sanene, akila naga loru vena taþatete si kilia suñalu pog tai.

²² A ko Ñapilon, visena na van ko sanini, sape

yauena veraga amio yuka lala, yoko taþatete yar tai loge si e ko,

yar na kilaen yuñae lala, yoko taþatete si tai se ko pogos tai,

a yoko ve m̄aгена na vilien re si kinanena lala.

²³ Yomerarava na kapi vivaga lala taþatete si tegoli kioña yo lala,

a yoko taþatete si ologe visena na kekarena kiena m̄ee amio sira m̄ee naña atalopa mare ga na wa.

Yar na kilaen kioña kilavaru lala, e yomarava nini pe tai torokin la re poli,

a nañareraena kiena ne kioña kimi lala a kioña navisokanena ga lala kila oþere sitomena kiena purvanua taþena lala apa ape wowe.”

²⁴ Nane tepisu naña Ñapilon nene, naga pe yo tai naña pe purþes nen napiowaena manenea. Navisawalena ai pona nalelagaena wa pona yar taþena naña añeñar la komin naña ape kiena ne Ntewa, ana kala kuruta la mlau e porotano na pulkumali nena, naga ke nene narui, naña kila naliþereena a nakoena kiena ne Ntewa mloru ea ñarera manene pañisi.

19

Pupia kekarena ma metava komin naña ma e peni taulu make suria

¹ Siraun naga nene, nemloge pupia ãina ma e peni apion manenea, asape “Potena pan kieta Ntewa!

Tamaliaena, urarena a ñareraena naga taaga ga kiena.

² Kiena naliþereena make ga ape lelaga a amesmesu pañisi.

Sira na mrapa la nene anela naga piowa ga,

kiela na kolauena la akila yomarava pimi pe kororaki pañisi, ana Ntewa mliþere naga rui.

Ana naga mla pupia nakoena tai pania komin kuruta kana kiena yar na yuñae lala la naña mlau.”

³ Asuñal amlolokai m̄a sanene, ana asikol ke sina ga, asape

“Potena pa Ntewa! Kapi kekan ke kororaki la nene rui, yoko kana kapi nena viu lue ga va metava narui.”

⁴ Ana nasumonena la lualima yam lua pa vari [24] amio sur mali la vari akinai e marana ne Ntewa naña totano teke meta e kiena yo wa, ana amlotun ke naga. Apionia, asape

“Po pañisi! Potena pan keviu!”

⁵ A visen tai molue m̄ena e yo wa nañani, pisa sanini sape

“Kam na yar na kilaen yuṁaena kiena ne Ntewa,
amiu yerkawa lala a yeririna kar ga lala,
kam make ga naṁa amlogear naga,
nagane kana pog nena napo naieluarena.”

⁶ Ana nemloge sina pupia ṁina naṁa pio naṁa kiela ṁaagena sa naṁa sive ṁanpoia mumu, sane polilu. La asape

“Potena pania!

Kieta Suṁe Ntewa na Mava, naga taulu make sur rui!

⁷ Teieluar naga,

tevisirlua kiena kia, tekekarania.

Nagane pog wo na kilaen ṁaṁagena na talopaena kiena narin sipsip narui.

Wona na sira paia ruru naga su ruru ga sike na,

⁸ a amiyowauia ruru naga e kulmrae viu wo lala, apowo a amerarava paṁisi.”

Ana kulmrae nowo naṁa miyuwowo ne naṁa wona narin sipsip na sira miyenia, naga kana kinas toṁa ga, kana kinasane sane yuṁaena wo la naṁa nalelagaena wa lala kiena ne Ntewa la akila rui.

⁹ Ana navisi naṁa sike amio inu e pogos nene pis pan inu, sape

“Yoko nevisa kioṁa visena tai vena osirilua e kioṁa tus nene. Visena sanini, sane yar naṁa yoko avio naga vena naga ṁena va e kinanena na ṁaṁagena na talopaena kiena Narin Sipsip, yoko naga loge wo na wo vaṁisi.”

A sikol sina visena nene, sape

“Naga visena lelaga tai kiena ne Ntewa naṁa pe lelaga paṁisi.”

¹⁰ Ana nemloge naga pisa sanene pan inu, nekinai pania, nesape nelotunia, ana naga pisaluṁaria. Pisape “Toko, ve okila re sanene van inu! Monar olotun ga Ntewa naga taaga. In na nepe kiena yar na yuṁaena ga, sane ko, a sa ṁena wolai taṁena la naṁa apiawa ṁarera ke e visena lelaga lala kiena ne Yesu. A po paṁisi naṁa amiu asuṁa akila ke sanene, komin naṁa purṁes nen kinas nen navisawalena lelaga make ga naṁa apisawal nanua pimi, naga Yesu ga ne, amio kiena visena lelaga la naṁa apuarar ke ṁarera.”

Yar ṁarera naṁa kus wosi na miyuwowo

¹¹ Ana e pogos nene, ma e peni pietava pan inu, nekira pa loyuṁa, nepisu wosi yuwowo tai naṁa po paṁisi suṁalar ga sike na, a yar ṁarera tai naṁa kusa totano teke ea. Naga ke narui naṁa kila mara suwo napiowaena, pona pogos naṁa kila kiena naliṁereena, ana naga miyuṁae nena mesmes paṁisi. Yar nena, apio kiena kia asape ṁarin Suṁe Lelaga Naviawaena. ¹² Ana kiena kia taṁena ṁena tai asiri sike ea pe yar tai kilia re kana kinas poli, naga taaga manene kilia. Kilamarana pilavila sane kap naṁa pivaga, a e ṁarina miyen ke karo na ṁarila kiena ne ṁarin suṁe lala. ¹³ Naga miyen ṁena ṁana kulkota viavi tai naṁa aputon pito e kuruta vena kila ve maran la ea, ana naga kiena kia si tai na naṁa asuṁa apio naga ea, naga sanini, asape Visena Wa kiena ne Ntewa.

¹⁴ Ana e pogos nene, ṁegas nen yar na mara lala nae ma e peni, amiyowau ruruia e kulmrae yuwowo a akus kiela wosi yuwowo lala, asuṁa ataveve ke kiela nasumonena nene apano. ¹⁵ Naga ṁere la apano, kiena visena molue ke kome gona sane playu na mara naṁa mal ga lepas luwoka, naṁa yoko te plan purvanua na yomarava la akekapil. A siraun naṁa yoko naga taulu la, yoko naga suṁalu ve suṁen la, a naga ṁuarar ke plaki e limana, pototo tai naṁa urmi. Nakoena ṁarera ya naṁa sinemimiena kiena ne Ntewa na mava ligana va yar la akusia, ana yerkawa ne nanene narui yoko naga war imi ṁalivi.

¹⁶ Ana naga kiena kia taṁena sike ga wa, naṁa asiri e ṁana kulkota a e lana, sape “ṁarin Suṁe kiena ne ṁarin suṁe lala, Yerka kiena ne yerka lala.”

¹⁷ Nepisu navisi tai suṁalar sike na naṁa yepisun tegolia, naga pion pa manu lala naṁa akaka ke metava ne, sape “Ei, kam punu ga aim lele taaga e pupia ṁaṁagena kiena ne Ntewa. ¹⁸ Kam manu na kanen tata lala, yoko ve ve piavi re ayuṁaen kinanena tai torokin

amiu nenaga, naþa tas nen yar mare lala kiena ne nasinekar kiena ne Ntewa. Þarin suþe lala, pupia yerkaawa na mara lala, yar m̄arera lala, wosi na mara lala, amio la naþa aþerela ke ne, amio yeririna kar ga lala la naþa ape yerkaawa pona ape yar ve torokaki na yuþaena ga lala, la make ga asuñalu vena akila mara va Ntewa, ana naga taulu la kila moñar la pa ke ne.”

¹⁹ Ana nepisu surmal viowa amio þarin suþe na yomarava amio kiela þegas na kilaen mara lala, apim amiyuwon vain la ke lele taaga. A sinelan asape akila mara amio naþa kus ke wosi yuwowo ne amio kiena yar na kilaen mara lala.

²⁰ Ana asape akila mara narui, ana yar viowa lala amilan ga naþa lepas kiena ne Ntewa asuñal veraga apa atarar kiela na sumonen luwoka naþa atarar ruru la nenaga, nane sur mal viowa amio navisawalena naþa pisosokan ga ne na pe yar naiilaena e kimi lala a sur nailanena lala. Sumo, naga miyuþaen sur la nene pisa kotalia ruru nena yar lala naþa þere kiela sitomena pano atañan añe tatu na sur mal viowa pa e piamenala, apa amlot wowe pa kiena nono.

Ana la atarar ruru nena nasumon-ena luwoka na þegas viowa nene, ana akuwanpran luwoka pito e pulukapi naþa mumu ke ne.

²¹ Ana taþena la pe akila re mara poli wa, amilan ga playu na mara tai molue kome gona naþa kus ke wosi yuwowo ne, pa sanene, pa sanene, te moñar kare la amarmar pa ke ne. Ana taveve ya naþa nepisua, manu na kanen kilañiu lala apim atewowa tas nen marena la naþani, akan pano-o meþela la puleule.

20

Apiar Yermare pa tol kas manu taaga [1000]

¹ Ana nepisu navisi tai molue ma e peni pitomi tano, mlarar ke ki tai e limana, ki na pulutava na pulus nen marena naþa pito na pitove pe luas re poli, a amio ki nena, þarar m̄ena sen m̄arera tai. ² Ana naga þere mesmesun pupia nopi nene, naþa pe yermarua loñara naþa Yermare naþa Yermare Lego, pa tarar ruru m̄arera, piar ruruia e sen, pisaar sape yoko mon m̄a sanene va tol kas manu ve taaga. ³ Ana kutarar naga amio kana sen naþani koven pito e pupia pulus naþa pito manene tano ne, ana kotawea, kiar ruru m̄eke ea, vena yar viowa nene ve va re si kilali yeririna lala na purvanua wetelu, va tol naþa kas manu ve taaga nene warovia. A kiena m̄areraena taþatete þisi make na wa, komin naþa siraunia, e narin pogos tai ve plas ga, yoko naga kilia molue vena kila ke sina ga þarina yam tai.

⁴ Ana nepisu yo wa lala, amio la naþa atotano ateke e wos nela, naga la naþa apisir plan la rui vena akilia aliþere yar lala. A nepisu m̄ena ninun yar la moki naþa asuñga ga amio la, nane yar þes la naþa amlologon Yesu amio visena wa kiena ne Ntewa, ana ateroro kolmekilania. La nene pe amlotun re sur mal viowa nene poli, pe akinain re kiena wonta poli, a pe aþar re kiena tatu e piamenala poli, pona e limala, ana Ntewa kekaran la, kila la amal sina vena akilia asuñal amio Kristo vena avisuar yo punu ga va tol luas nen kas manu ve taaga naþani.

⁵ Naþa amal si sanene, naga pogos þesia naþa yeririna lala amal si petan marena, ana la ga nene atolia. Taþena lala naþa amare ga asike na wa e pogos nene, la nene yoko atol ga kiela malena na wa e kana nalua nena, nane e luas nen kas na manu taaga nene. ⁶ Navisa ruruena wo kiena ne Ntewa sike e la naþa amal þes sina vetan marena nene, naþa la na kiela malena pe wa ruruia. Marena na lua taþatete nena tol la, ana yoko la ayuñae sane la ape yar wa kiena ne Ntewa, ape yar wa kiena Kristo, a yoko naga visir plan la avisuar yo amio naga e kas manu ve taaga nene.

Yermare, kana luas

⁷ Ana pogos naþa kas manu ve taaga nene þisi pae, yoko Yermare kilia molue sina e lele nakoarena naþa sike ea. ⁸ E pogos nene, yoko naga va kar ga e purvanua punu ga e yomarava nini, visa kotalia si yar lala, a yoko naga werepran pupia þegas lua nene aim

ve taaga, nane yer Koko lala amio yer M̃akoko lala, vena aim si ave taaga vena akila mara va yeririna lala kiena ne Ntewa. A visae p̃egas lua nene aimi ave taaga, la ave moki na ave moki, sane mras nen none la garo losi.

⁹ Ana apureviraviran ruru la sa naña li na kilaen mara lala, amial vera ga akusro yomarava apim atol yo Yerusalem, yo naña Ntewa kekaran pañisi, naña naga yo kiena ne kiena yeririna la naña asike ea. Ana amiervivi ruru nena pupia pulkumali nañani, asape sinelan siaren mara narui. Ana amilan ga pupia kap tai molue veraga kom ma e peni pitomin la, kekan la pano-o kekan make la nena ga. ¹⁰ A Yermare, naña naga pisa kotalia la sumo rui, akoven lua naga pa e pupia pulukapi naña mumu ke ne, nane kapi m̃na nena naña akoven surmali viowa amio navisawalena navisokanena lalua apa asike e rui. Ana la telu nene yoko akus naloge viowaena e yo nene ko legiena a kolemallo, vano vano-o ve uro re.

Naliṣereena maro kiena ne la naña pe amlelaga re poli

¹¹ Ana nepisu pupia yo na liṣereen yar lala, naña miyuwowo na miyuwowo, amio suṣe keviu naliṣereen yar lala totano teke metava ea. Kiena naurarena kokonia ruru make yo nene, kila porotano amio sinapane la luwoka aṣure apevenin plan la apano akovio. ¹² Ana nepisu pupia p̃egas nen yar la tai, naga yar la naña amare nanua rui e yomarava, pupia yerkawa lala a yar kar make ga lala. Ana apim aṃalivi e nañani vena asuṃal ase marana ne suṣe keviu naliṣereen yaru. Nepisu tus laṣas pike ṣa suṃa ga, ana apa akus ke sina taṣena, naga asape Tus na Malena, ana naga m̃ena apike. Ana apisu vevea asape alual ya naña asiriyu sike e tus nene e lepas kiena ne yar mare la nene, ana la peve taaga akus kiela nakoena taveve tus la nene. ¹³ A yar mare la nene, amio m̃ena la naña amarmare asike e sive, amio m̃ena la naña amare apa asike e yo nalogeen viowa rui, la make ga aimin si naña aliṣerela taveve kiela yuṃaena lala.

¹⁴ Ana amliṣere yar mare la nene pano-o ṣisi, asuṃalu akus sur lua nene naña marena amio m̃ena yo nalogeena viowa nene, ana akovenpran ga luwoka veraga vito e pulukapi. Ana marena naña yaru la atol e yo nene, naga asape marena na lua. ¹⁵ A a si naña pe aṃal re kiena kia sike e Tus na Malena poli, naga ke narui akoven m̃ena naga vito e pupia pulukapi.

21

Pulkumali viu naña Yerusalem

¹ Ana siraun nene, nepisu peni viu amio yomarava viu aṃalivi, komin peni nasumo amio yomarava nasumo amio kana porotano lala a kana sive nena, akokovio make nena rui. ² A nepisu pulkumali wa wo nene, Yerusalem viu, molue kom puna ne Ntewa ma e peni pitomi tano e yomarava. Nepisu naña apaia ruru po wa, sane sira tai naña amiyowauia po pañisi imin vena akila talopa amio wona.

³ A e pogos nene nemloge visena wo tai molue ma e peni, pisawal sanini, sape “Nagane, Ntewa sinenan sape sike amio yeririna lala na yomarava, sinenan sape kila m̃ana uṃa sike pu la.

Yoko aim ave kiena yeririna lala, komin naña yoko naga amio la lue narui, yoko naga imi ve kiela Ntewa lelaga.

⁴ Wamarala make ga, yoko naga yumuplania, yoko marena pona tagena pona yepelalaena pona naloge viowaena, la nene peraga narui, komin naña pogos marua nakonua la ṣaro pano pa kovio rui.”

⁵ Visena nene ṣisi, ana yar wa naña totano teke metava pisawalia, sape “Ee, lelaga pañisi ṣan wa! Yoko in na nekila make sur la imi ve urviu sina!”

A naga sikol ke sina ga pisawal nena pan inu, sape “Nanini yoko nevisa visen tai van ko naña pe lelaga nena napo, naña okilia owasine ruru nenaga, a popon osirilua.”

⁶ Ana naga pis m̃a ga, sape

“Kiau yuñnaena make ga, nekila punu ruru nena ga!

In na in ãesia a in maro, in na nasiarena a naluasia.

Yar naãa loge moto karia, yoko nevio ñana wii tai e purães nen wii na malena, nela vania mun korenan ga sanene.

⁷ Yaru naãa kiena malena ãaro e pog ñarera lala, suñal ñarera suña vano-o taulu viowaena, yoko naga tol navisa ruruena lala sane kiena lalimana. Yoko nesuñna neve kiena ne Ntewa kemua lelaga, yoko noure naga imi ve naruu.

⁸ Ana yar viowa lala, la ñena yoko atol kiela lalimana lala. Nane yar sur la naãa pe apiawa re ñarera e in poli, naãa pe amlelaga re poli, kiela ãelaga pioyowa paãisi, añeñar yar taãena, akila piowa amio sira pona yerñene, aãar kimi, amlotun nono, ape yar navisokanena. La ke nene narui yoko ava atol marena na lua, nane e lelela ke napo narui, nane pulukapi naãa pe ponoyoñe, naãa ñewo ãele ga.”

⁹ Visena nene nane ãisi ne, ana navisi nasumo la olua nene lala tai, naãa aãar pias nen sur olua na loge viowaena maro la olua na yomerava, pimi pio inu. Sape “Oim ke ne sumo wa, yoko nekila ovisu sira va talopa, nanene wona Narin Sipsip.” ¹⁰ Ana ãerelua inu nepa ga e ninuu, ana imimi lua mepa metol pupia tavie tai metava. Imimi lua mesuñalu mese yo nene narui, kipian inu e pupia pulkumali wa naãa Yerusalem, nepisu sina noñal naãa molue ma puna ne Ntewa ma e peni pitomi ke tano.

¹¹ Pitomi ke sanene narui, naurarena kiena ne Ntewa suña puleule, kila tego paãisi, sa naãa sur tai naãa pilavila ruru po paãisi. ¹² A kana pupia kove nena miyervivi nenaga, pa metava na pa metava, a pupia pulutava lualima yam taaga pa lua [12] sike ea, naãa kana navisi la peve taaga apisuar ruru la ñaga. A pulutava la make ga, tai kia sike ea, tai kia sike ea, naãa kia kiena ne lus nae Israel la lualima yam taaga pa lua, ¹³ naãa pulutava telu sike lepas na lagawa, telu sike lepas na lagi pasipurua, telu sike lepas na mrae molue ea, a telu sike lepas na mrae pito tano ea. ¹⁴ A pupia kove nena suñalu sike e kana pupia kemraãe nena tol lualima yam taaga pa lua, asiri kia sike e peve taaga, naãa kia la nene kiena nalologena la lualima yam taaga pa lua kiena narin sipsip.

¹⁵ Ana navisi naãa imimi lua mesun ke ne, naga kus ke natotou viavi tai naãa kol e limana, vena va lual totou na pulkumali nene keviu sanape, amio kana kove nena a kana mratava lala. ¹⁶ Kove na pulkumali nene, lepas varoka piavi maran taaga, ana navisi pa mla kana totou nena, taulu tasma manu lua [2000]. A mla ñena totou na yepasia siar tano pa tol metava, maran taaga ke sina ga e kana lepas la vari nene. ¹⁷ ãisi na pa pisu kana kove, mla totou na kana merorol nena, polo kana merpu ne lala pa taulu nena lualima yam orai [60] veraga. ¹⁸ A kove nene pe amiyuñnaen re e kilavaru kar ga la poli, ana miyuñnaen e kilavaru tai naãa kana marana la po paãisi, a pulkumali yepas make ga lala amiyuñnaen ga e kol, mekiki po na po, pilavila po na po paãisi. ¹⁹ A pupia kana kemraãe na kove nena, la ñena ga apaia ruru la amio kilavaru la naãa powo, naãa tai amiyowa e kana kilavaru naãa maran taaga sanene, tai ñena amiyowa e kana kilavaru naãa maran taaga sa ke ga, pano pano-o tol make kana kemraãe lualima yam taaga pa lua nene. A kia kiena ne kilavaru lualima yam taaga pa lua la nene, sanini. Nasumo, kiena kia sasma, na lua kiena kia sapaia, na telu, naga kalseton, na vari naga emrol, ²⁰ na lima naga satonik, na orai naga kanelion, na olua naga krisolaet, na orelu naga perol, na ovari naga toãas, na lualima naga krisopres, na lualima yam taaga pa taaga naga sasin, a na maro naãa lualima yam taaga pa lua naga ametis.

²¹ A kana mratava lala, la make peve taaga ape pupia perel peve taaga. Ana nepisu ñena pupia mrapa na pulkumali nene, naãa naga amiyuñnaen make nena e kol, po na po, pilavila paãisi.

²² Ana sur tai naãa nemilania, noñape yoko nelual pupia yuñna wa tai ñeke likan pulkumali wa naãani, ana nekira noñal re tai poli. Yo nene na pe yuñna re na sanene poli, komin Ntewa na mava amio narin sipsip, yar la apa amlotun la e yo punu ga silaga.

²³ A noñal naãa e pulkumali nene naga mrae amio kupario pe tego re e poli, komin narin sipsip naga sane kana yomerarava nena, naurarena kiena ne Ntewa kila yo make ga asike

ga e yemlagi silaga. ²⁴ Purvanua taþena lala yoko ayal e kana pupia yomerarava nena, a sur wo ya la naþa pupia þarin suþe taþena na purvanua lala aþar mþaga pe kiela, yoko awar van Yerusalem viu nene, sane kiela nalaena lala. ²⁵ Yo nene yemalolo taþatete yoko imi e pogos tai, kila sanene pupia kana mratava ne lala kilia suwowo ga suþa silaga, ²⁶ a naurarena a sur wo lala na purvanua taþena lala yoko asuþa aim lue ga loyuþa e silaga. ²⁷ Ana e lepas na sur la naþa pe mekik ruru re nena poli, yoko taþatete nena tai va loyuþa e nene pogos tai, a yar ai naþa kila yuþaena naþa na mawaena pona na visokanena, yoko naga mþena ga taþatete va loyuþa ea. La naþa navaen loyuþa, naga la ga naþa kiela kia, narin sipsip siri sike loyuþa e kiena Tus na Malena rui.

22

Purþes nen wii na malena

¹ Siraunia, navisi kilologia purþes nen wii na malena pan inu. Nepisu kana wii wo nena, merarava na merarava, mlau siar e yo wa kiena ne Ntewa naþa Narin Sipsip sike ea. ² Kana wii ne mlau pano, kana yo naþa mlau pa ea mlau nena pa likan pupia mrapa na pulkumali viu naþa Yerusalem. Wii na malena nene mlau sanene pano, a purþes nen lak na malena lala asuþal asike lepas luwoka. Laki la nene apo paþisi, komin naþa aþar mrasa e kupario make ga, yam lualima yam taaga pa lua [12] e kas taaga. A mþas mþena lala, apowo paþisi, komin naþa akilia akila ruru maiena kien yolai na purvanua make ga na yomarava.

³ Sanene, yoko þelaga viowa la kiena ne Yermare na kila kareen sur make ga, yoko e pulkumali nene naga peraga narui. Narin sipsip sike e yo wa kiena ne Ntewa e yo nene, a pulen ga kiena yar lala naþa kiela yuþaena, amlot lue ga e silaga. ⁴ Asike ga lavisinia, a asiri kiena kia sike e piamenala. ⁵ E yo nene, pe yemalolo re si poli, yo merarava make silaga, a pe yomerarava na kap vivaga re tai poli, pona mrae. Peraga, Suþe Ntewa ga pe purþes nen yomerarava naþa tegoli ruru ke yo nene, a naga þere kiena yeririna la naþani, pisir plan la ape þarin suþe na visuaren sur make ga.

Nawasuþeena kiena ne Yesu

⁶ Ana navisi naþa pis pan inu, sape “Sur la naþa opisuia pona omloge, ape lelaga paþisi, a yoko aim ave lelaga make nena napo. Kieta Suþe keviu, naga Ntewa naþa navisawalena na sumo lala amiyuþae e kiena ninuna, naga pitetalia imimi kiena navisi lala mepim moþalivin ko vena mekipian ko e sur la nene. Naga kila sanene komin naþa naga sinenan sape kiena yeririna lala monar akilia sur la naþa yoko ve ve piavi re aim aþnalivi.”

⁷ A visena kiena ne Yesu e lele nene pa pan kiena yeririna lala sanini, sape “Avisuarial! Ve ve piavi re, neimin noþalivin amiu sina. Yar naþa tarar visena la nene mþarera, naþa apisawal sike e kiau tus wa nene, yoko wo van vaþisi, yoko naga loge wo vaþisi.”

Yoane pis maro

⁸ Inu naþa nepisu sur lala nene, nemloge visena la nene, inu yermarua Yoane. A pogos naþa nepisu make pae, nemloru nekinai e lana navisi naþa naga kipian inunia, nemloge sane sineun nesape nelotunia. ⁹ Ana naga pisaluþar inu, sape “Toko, ve okila re sanene. In mþena nepe yar na yuþaena kiena ne Ntewa ga, sanene ko omio womla la naþa navisawalena la nanua sumo, amio mþena yar taþena la naþa apuarar ruru ke visena na tus wa la nene. Popon telotun kieta Ntewa naga taaga ga.”

¹⁰ A naga pisa mþena visen taþena pan inu, sape “Ve owarwan re navisawalena lala naþa sike e tus nene. Pog pimi ke lavis narui, popon yar la akilia ya naþa asuþa apisa ke ne. ¹¹ Yar naþa yepena ma yagogena, yoko kila kiena þelaga viowa va viowa laa sane, yoko kororaki na kiena mlamulen viowa lala va viowa ve keviu manene laa. Ana yar naþa loge, yoko kiena yuþaena mesmes lala aimi awo vaþisi, yoko kiena þelaga wo lala aim ave wa ruru nenaga.”

¹² Visena kiena Yesu e lele nene, naga sanini, sape “Avisuarial! Nepimin ke naþa ve ve piavi re nenaga noþalivin amiu. Neimi nemio kiau nalaen wo lala naþa powo, naþa yoko

nekian plan va yar lala taveve yuṁaena wo la naṁa akila pan inu. ¹³ Inu ṁesia a inu maro, inu nasumo a inu nasirau, inu nasiarena a inu naluasia na sur make ga.

¹⁴ “Ve ve piavi re, yoko pupia navisa ruruena imi ṁalivin ruru nena kiau yeririna lala. Apuvan ruru ṁala kulsota lala, amiyowau ruru rui, ana akilia ava awarpo yo e pulutava vena ava loyuṁa e pulkumali wa kiena ne Ntewa, akilia ava atol purlaki na malena. ¹⁵ Ana yar taṁena la mokliu naṁa taṁatete avam loyuṁa. Nane yar la naṁa asuṁa apa kar ga sane lokul lala, amio la naṁa aṁar kimi, amio la naṁa ataṁa kolau amio lau, la naṁa aṁeṁar yaru, la naṁa amlotun nono lala, a la naṁa sinelan asape akila ṁelaga lala na visokanena.

¹⁶ “In na Yesu, nemligan navisi nene pimin vena visawal visena la nene van ko, vena okilia ova ola va kiau suṁare make ga. Navisaarena naṁa apisaar asape molue kome lus kiena ne yermarua ṁarin Suṁe Tepet nanua, in ne nanini. In na nepe verue naṁa ṁelag, naṁa pisawal ke sape lavis yelagi imi warpoyo narui.”

¹⁷ Ninuna ne Ntewa mloge visena nene, pisawal pa Yesu sape “Pogaga, okilia oimi!”

Sira naṁa na talopaena amio, sape “Ee, popon oim narui!”

A yar ai naṁa loge visena la nene, popon naga ṁena visawalia, visave “Ake Yesu, visae oim ga rui!”

Yar naṁa loge moto karia, avietava vania vena kilia vam loyuṁa. Yar naṁa sinenan imiena, yoko naga kilia tol ṁana wii na malena, sa naṁa kiena nalaena tai naṁa pimi ga sa ga nene.

¹⁸ Ana nevisa visena ṁarera tai van amiu naṁa yoko aloge visena lala na visawalena lala na tus wa nene. Visae yar tai sukol si visen taṁena tai to metavan naṁa sike pa rui, yoko Ntewa kila naga war naloge viowaena make ga naṁa tus nene pisa ke pa rui. ¹⁹ Pona visae yar tai lalua si visena laṁas naṁa sike pa rui, yoko Ntewa lalua si lalimana vetania naṁa sike e purlaki na malena, yoko naga taṁatete tol sur wo la sa naṁa tus wa nene sape asike loyuṁa e pulkumali wa.

²⁰ Naga naṁa pisawal visena la nene, pisape “Sa ke nene narui. Ve ve piavi re, yoko neim noṁalivin amiu.”

A sitomena kiena ne yeririna kiena ne Ntewa lala, asape “Visae ve sa nene, wo vaṁisi. Awis Yesu, oim vilaga!”

²¹ A visena maro na lepas na sunena na kiau ṁeniena, in yermarua Yoane nemlen nesape yoko lemamiena wo kiena kieta Suṁe Yesu sike amio amiu, kam yeririna lala kiena ne Ntewa.

Sanene.